

नमो नमो निम्मलदंसणस्स  
पू. आनंद-क्षमा-ललित-सुशील-सुधर्मसागर गुरूभ्यो नमः

५

# भगवई पंचमं अंगसुत्तं

अवरनाम-विवाह पन्नत्ति

मुनि दीपरत्तसागर

Date : / / २०१२

Jain Agam Online Series-५

५

# गंथाणुक्कमो

सतकं	वगगो/सतं	उद्देसक	सुतं	गाहा	अणुक्कमो	पिठको
१	-	१०	००१-०८३	००१-०१८	००१-१०४	००३
२	-	१०	०८४-१२३	०१९-०२२	१०५-१५०	०३२
३	-	१०	१२४-१७०	०२३-०३०	१५१-२०६	०५०
४	-	१०	१७१-१७४	०३१-०३३	२०७-२१४	०७८
५	-	१०	१७५-२२७	०३४-०३६	२१५-२७१	०८०
६	-	१०	२२८-२५८	०३७-०५२	२७२-३२६	१०१
७	-	१०	२५९-३०७	०५३-०५६	३२७-३८०	११९
८	-	१०	३०८-३५९	०५७-०५९	३८१-४३७	१४०
९	-	३४	३६०-३९२	०६०-०६१	४३८-४७३	१८४
१०	-	३४	३९३-४०७	०६२-०६५	४७४-४९३	२१७
११	-	१२	४०८-४३५	०६६-०७१	४९४-५२८	२२७
१२	-	१०	४३६-४६८	०७२-०७३	५२९-५६६	२५०
१३	-	१०	४६९-४९८	०७४-	५६७-५९५	२७७
१४	-	१०	४९९-५३८	०७५-	५९६-६३६	२९८
१५	-	-	५३९-५६१	-	६३७-६५९	३१२
१६	-	१४	५६२-५९०	०७६-	६६०-६९२	३३७
१७	-	१७	५९१-६१६	०७७-	६९३-७२०	३५१
१८	-	१०	६१७-६४८	०७८-०८०	७२१-७५७	३६१
१९	-	१०	६४९-६६२	०८१-०८५	७५८-७७८	३८१
२०	-	१०	६६३-६८८	०८६-	७७९-८०५	३९०
२१	८	१०	६८९-६९१	०८७-	८०६-८२१	४१०
२२	६	-	६९२-	०८८-	८२२-८२८	४१३
२३	४	-	६९३-	०८९-	८२९-८३४	४१४
२४	-	२४	६९४-७१६	०९०-०९२	८३५-८६०	४१६
२५	-	१२	७१७-८१०	०९३-१०७	८६१-९७४	४५०

## [५-गंथाणुक्कमो अनुवर्तते]

सतकं	वग्गो/सतं	उद्देशक	सुतं	गाहा	अणुक्कमो	पिठंको
२६	-	११	८११-८१८	१०८-	०९७५-९९०	५०३
२७	-	११	८१९-	-	०९९१-	५१०
२८	-	११	८२०-८२२	-	०९९२-९९४	५१०
२९	-	११	८२३-८२४	-	०९९५-९९७	५११
३०	-	११	८२५-८२९	-	०९९८-१००२	५१३
३१	-	११	८३०-८४२	-	१००३-१०१५	५१९
३२	-	११	८४३-८४४	-	१०१६-१०१७	५२३
३३	१२	११	८४५-८५०	-	१०१८-१०३२	५२४
३४	१२	११	८५१-८५५	-	१०३३-१०४३	५२८
३५	१२	११	८५६-८६०	-	१०४४-१०५७	५३७
३६	१२	११	८६१-	-	१०५८-१०६०	५४३
३७	-	-	८६२-	-	१०६१-	५४४
३८	-	-	८६३-	-	१०६२-	५४४
३९	-	-	८६४-	-	१०६३-	५४५
४०	२१	-	८६५-८६६	-	१०६४-१०६७	५४५
४१	-	१९६	८६७-८६८	-	१०६८-१०७९	५४८
परिसेस	-	-	८६९-	१०९-११४	१०८०-१०८७	५५४

१

# भगवई-पंचमं अंगसुतं

## अवरनाम-विवाहपन्नति

### ॥ पढमं सतं ॥

[१] नमो अरहंताणं । नमो सिद्धाणं । नमो आयरियाणं । नमो उवज्झायाणं ।  
नमो लोए सव्वसाहूणं।

[२] नमो बंभीए

[३] रायगिह चलण दुक्खे कंखपओसे य पगतिपुढवीओ ।  
जावंते नरेइए बाले गुरुए य चलणाओ ॥

[४] नमो सुयस्स।

### ० पढमो उद्देशो ०

[५] तेणं कालेणं तेणं समएणं रायगिहे नामं नयरे होत्था। वण्णओ। तस्स णं रायगिहस्स  
नगरस्स बहिया उत्तरपुरत्थिमे दिसीभागे गुणसिलए नामं चेइए होत्था। सेणिए राया, चेल्लणा देवी ।

[६] तेणं कालेणं तेणं समएणं समणे भगवं महावीरे आइगरे तित्थगरे सहसंबुद्धे पुरिसुत्तमे  
पुरिससीहे पुरिसवरपुंडरीए पुरिसवरगंधहत्थी लोगणाहे लोगप्पदीवे लोगपज्जोयगरे अभयदये चक्खुदये  
मग्गदये सरणदये धम्मदेसए धम्मसारही धम्मवरचाउरंतचक्कवट्टी अप्पडिहयवरनाण-दंसणधरे वियट्ट-  
छउमे जिणे जावए बुद्धे बोहए मुत्ते मोयए सव्वण्णू सव्वदरिसी सिवमयलमरुजमणंतमक्खयमव्वाबाहं  
'सिद्धिगति'नामधेयं ठाणं संपाविउकामे जाव समोसरणं।

[७] परिसा निग्गया। धम्मो कह्तिओ। परिसा पडिगया।

[८] तेणं कालेणं तेणं समएणं समणस्स भगवओ महावीरस्स जेट्ठे अंतेवासी इंदभूती नामं  
अणगारे गोयमसगोते णं सत्तुस्सेहे समचउरंसंठाणसंठिए वज्जरिसभनारायसंघयणे कणगपुलगणिघस-  
पम्हगोरे उग्गतवे दित्ततवे तत्ततवे महातवे ओराले घोरे घोरगुणे घोरतवस्सी घोरबंभचरवासी उच्छूढसरीरे  
संखित्तविपुलतेयलेसे चउदसपुव्वी चउनाणोवगए सव्वक्खरसन्निवाती समणस्स भगवतो महावीरस्स अदूर-  
सामंते उड्ढं जाणू अहोसिरे झाणकोट्ठोवगए संजमेणं तवसा अप्पाणं भावेमाणे विहरइ।

[९] तए णं से भगवं गोयमे जायसइडे जायसंसए जायकोऊहल्ले, उप्पन्नसइडे उप्पन्नसंसए  
उप्पन्नक्कोऊहल्ले, संजायसइडे संजायसंसए संजायकोऊहल्ले, समुप्पन्नसइडे समुप्पन्नसंसए  
समुप्पन्नकोऊहल्ले उट्ठाए उट्ठेति, उट्ठाए उट्ठेत्ता जेणेव समणे भगवं महावीरे तेणेव उवागच्छइ,  
उवागच्छत्ता समणं भगवं महावीरं तिक्खुत्तो आयाहिणपयाहिणं करेति, तिक्खुत्तो आयाहिणपयाहिणं करेत्ता  
वंदति, नमंसति, नच्चासन्ने नाइदूरे सुस्सूसमाणे अभिमुहे विणएणं पंजलियडे पज्जुवासमाणे एवं वदासी-

से नूणं भंते! चलमाणे चलिते?, उदीरिज्जमाणे उदीरिते?, वेइज्जमाणे वेइए?, पहिज्जमाणे

पहीणे?, छिज्जमाणे छिन्ने?, भिज्जमाणे भिन्ने?, डज्जमाणे डड्ढे?, मिज्जमाणे मडे?, निज्जरिज्जमाणे निज्जिण्णे?, हंता गोयमा! चलमाणे चल्लिए जाव निज्जरिज्जमाणे निज्जिण्णे।

[१०] एण णं भंते! नव पदा किं एगट्ठा नाणाघोसा नाणावंजणा उदाहु नाणट्ठा नाणाघोसा नाणावंजणा? गोयमा! चलमाणे चल्लिए, उदीरिज्जमाणे उदीरिते, वेड्ज्जमाणे वेड्ए, पहिज्जमाणे पहीणे, एण णं चत्तारि पदा एगट्ठा नाणाघोसा नाणावंजणा उप्पन्नपक्खस्स। छिज्जमाणे छिन्ने, भिज्जमाणे भिन्ने, डज्जमाणे डड्ढे, मिज्जमाणे मडे, निज्जरिज्जमाणे निज्जिण्णे, एण णं पंच पदा नाणट्ठा नाणाघोसा नाणावंजणा विगतपक्खस्स ।

[११] नेरइयाणं भंते! केवइकालं ठिई पण्णता? गोयमा! जहन्नेणं दस वाससहस्साइं, उक्कोसेणं तेत्तीसं सागरोवमाइं ठिई पण्णता। नेरइया णं भंते! केवइकालस्स आणमंति वा पाणमंति वा ऊससंति वा नीससंति वा? जहा ऊसासपदे। नेरइया णं भंते! आहारट्ठी? जहा पण्णवणाए पढमए आहार उद्देशए तथा भाणियच्चं ।

[१२] ठिति उस्सासाहारे किं वा ssहारंति सच्चओ वा वि ।  
कतिभागं सच्चाणि व कीस व भुज्जो परिणमंति? ॥

[१३] नेरतियाणं भंते! पुच्चाहारिता पोग्गला परिणता ? आहारिता आहारिज्जमाणा पोग्गला परिणता ? अणाहारिता आहारिज्जिस्समाणा पोग्गला परिणया ? अणाहारिया अणाहारिज्जिस्समाणा पोग्गला परिणया ? गोयमा! नेरतियाणं पुच्चाहारिता पोग्गला परिणता, आहारिता आहारिज्जमाणा पोग्गला परिणताय परिणमंति य, अणाहारिता आहारिज्जिस्समाणा पोग्गला नो परिणता, परिणमिस्संति, अणाहारिया अणाहारिज्जिस्समाणा पोग्गला नो परिणता, नो परिणमिस्संति ।

[१४] नेरइयाणं भंते! पुच्चाहारिया पोग्गला चिता. पुच्छा। जहा परिणया तहा चिया वि। एवं उवचिता, उदीरिता, वेदिता, निज्जिण्णा । गाहा-

[१५] परिणत चिता उवचिता उदीरिता वेदिया य निज्जिण्णा ।  
एक्केक्कम्मि पदम्मी चउच्चिहा पोग्गला होंति ॥

[१६] नेरइयाणं भंते! कतिविहा पोग्गला भिज्जंति? गोयमा! कम्मदच्चवग्गणम अहिकिच्च दुविहा पोग्गला भिज्जंति। तं जहा-अणू चेव, बादरा चेव ।

नेरइयाणं भंते! कतिविहा पोग्गला चिज्जंति? गोयमा! आहारदच्चवग्गणम हिकिच्च दुविहा पोग्गला चिज्जंति। तं जहा-अणू चेव बादरा चेव । एवं उवचिज्जंति ।

नेरइया णं भंते! कतिविहे पोग्गले उदीरंति? गोयमा! कम्मदच्चवग्गणम हिकिच्च दुविहे पोग्गले उदीरंति। तं जहा-अणू चेव बादरे चेव ।

एवं वेदंति । निज्जरंति । ओयट्ठं सु । ओयट्ठंति । ओयट्ठिस्संति । संकामिं सु । संकामंति । संकामिस्संति । निहत्तिं सु । निहत्तंति । निहत्तिस्संति । निकायं सु । निकायंति । निकाइस्संति । सच्चेसु वि कम्मदच्चवग्गणमहिकिच्च। गाहा-

[१७] भेदित चिता उवचिता उदीरिता वेदिया य निज्जिण्णा ।  
ओयट्ठण-संकामण-निहत्तण-निकायणे तिविह कालो ॥

[१८] नेरइया णं भंते! जे पोग्गले तेयाकम्मताए गेण्हंति ते किं तीतकालसमए गेण्हंति?

पडुप्पन्नकालसमए गेण्हंति? अणागतकालसमए गेण्हंति? गोयमा! नो तीतकालसमए गेण्हंति, पडुप्पन्न-  
कालसमए गेण्हंति, नो अणागतकालसमए गेण्हंति ।

नेरइया णं भंते! जे पोग्गले तेयाकम्मताए गहिए उदीरेंति ते किं तीतकालसमयगहिते  
पोग्गले उदीरेंति? पडुप्पन्नकालसमयघेप्पमाणे पोग्गले उदीरेंति? गहणसमयपुरेक्खडे पोग्गले उदीरेंति?  
गोयमा! तीयकालसमयगहिए पोग्गले उदीरेंति, नो पडुप्पन्नकालसमयघेप्पमाणे पोग्गले उदीरेंति, नो  
गहणसमयपुरेक्खडे पोग्गले उदीरेंति । एवं वेदेंति , निज्जरेंति ।

**[१९]** नेरइया णं भंते! जीवातो किं चलियं कम्मं बंधंति? अचलियं कम्मं बंधंति? गोयमा!  
नो चलियं कम्मं बंधंति, अचलितं कम्मं बंधंति । एवं उदीरेंति वेदेंति ओयट्टेंति संकामेंति निहत्तेंति  
निकाएंति । सत्वेसु णो चलियं, अचलियं।

नेरइयाणं भंते! जीवातो किं चलियं कम्मं निज्जरेंति? अचलियं कम्मं निज्जरेंति? गोयमा!  
चलिअं कम्मं निज्जरेंति, नो अचलियं कम्मं निज्जरेंति । गाहा-

**[२०]** बंधोदय-वेदोच्चट्ट-संकमे तह निहत्तण-निकाए ।

अचलियं कम्मं तु भवे चलितं जीवाउ निज्जरए ॥

**[२१]** एवं ठिई असुरकुमाराणं भंते! केवइयं कालं ठिती पण्णत्ता? जहन्नेणं दस वाससहस्साइं,  
उक्कोसेणं सातिरेगं सागरोवमं।

असुरकुमारा णं भंते! केवइकालस्स आणमंति वा ४? गोयमा! जहन्नेणं सत्तण्हं थोवाणं,  
उक्कोसेणं साइरेगस्स पक्खस्स आणमंति वा ४ ।

असुरकुमारा णं भंते! आहारट्ठी? हंता, आहारट्ठी ।

असुरकुमारा णं भंते! केवइकालस्स आहारट्ठे समुप्पज्जइ? गोयमा! असुरकुमाराणं दुविहे  
आहारे पण्णत्ते। तंजहा-आभोगनिव्वत्तिए य, अणाभोगनिव्वत्तिए य। तत्थ णं जे से अणाभोगनिव्वत्तिए से  
अणुसमयं अविरहिए आहारट्ठे समुप्पज्जइ। तत्थ णं जे से आभोगनिव्वत्तिए से जहन्नेणं चउत्थभत्तस्स,  
उक्कोसेणं साइरेगस्स वाससहस्सस्स आहारट्ठे समुप्पज्जइ।

असुरकुमारा णं भंते! किमाहारमाहारेंति? गोयमा! दव्वओ अणंतपएसियाइं दव्वाइं, खित्त-  
काल-भावा पण्णवणागमेणं। सेसं जहा नेरइयाणं जाव ते णं तेंसिं पोग्गला कीसत्ताए भुज्जो भुज्जो  
परिणमंति? गोयमा! सोइंदियत्ताए सुरूवत्ताए सुवण्णत्ताए इट्ठत्ताए इच्छियत्ताए अभिज्झियत्ताए, उड्ढत्ताए, णो  
अहत्ताए, सुहत्ताए, णो दुहत्ताए भुज्जो भुज्जो परिणमंति।

असुरकुमाराणं पुव्वाहारिया पुग्गला परिणया? असुरकुमाराभिलावेणं जहा नेरइयाणं जाव  
चलियं कम्मं निज्जरेंति।

नागकुमाराणं भंते! केवइयं कालं ठिती पण्णत्ता? गोयमा! जहन्नेणं दस वाससहस्साइं,  
उक्कोसेणं देसूणाइं दो पलिओवमाइं।

नागकुमारा णं भंते! केवइकालस्स आणमंति वा ४? गोयमा! जहन्नेणं सत्तण्हं थोवाणं,  
उक्कोसेणं मुहुत्तपुहत्तस्स आणमंति वा ४।

नागकुमारा णं भंते! आहारट्ठी? हंता, गोयमा! आहारट्ठी।

नागकुमाराणं भंते! केवइकालस्स आहारट्ठे समुप्पज्जइ? गोयमा! नागकुमाराणं दुविहे आहारे

पण्णत्ते। तं जहा-आभोगनिव्वत्ति ए य अणाभोगनिव्वत्ति ए य। तत्थ णं जे से अणाभोगनिव्वत्ति ए से अणुसमयं अविरहिए आहारट्ठे समुप्पज्जइ, तत्थ णं जे से आभोगनिव्वत्ति ए से जहन्नेणं चउत्थभत्तस्स, उक्कोसेणं दिवसपुहत्तस्स आहारट्ठे समुप्पज्जइ। सेसं जहा असुरकुमाराणं जाव चलियं कम्मं निज्जरेंति, नो अचलियं कम्मं निज्जरेंति।

एवं सुवण्णकुमाराण वि जाव थणियकुमाराणं ति।

पुढविक्काइयाणं भंते! केवइयं कालं ठिती पण्णत्ता? गोयमा! जहन्नेणं अंतोमुहुत्तं, उक्कोसेणं बावीसं वाससहस्साइं।

पुढविक्काइया केवइकालस्स आणमंति वा४? गोयमा! वेमायाए आणमंति वा ४।

पुढविक्काइया आहारट्ठी? हंता, आहारट्ठी।

पुढविक्काइयाणं केवइकालस्स आहारट्ठे समुप्पज्जइ? गोयमा! अणुसमयं अविरहिए आहारट्ठे समुप्पज्जइ।

पुढविक्काइया किमाहारमारेंति? गोयमा! दव्वओ जहा नेरइयाणं जाव निव्वाघाएणं छद्धिसिं; वाघायं पडुच्च सिय तिदिसिं, सिय चउद्धिसिं सिय पंचदिसिं। वण्णओ काल-नील-लोहित-हालिद्ध-सुक्किलाणि। गंधओ सुब्धिगंध २, रसओ तित्त ५, फासओ कक्खड ८। सेसं तहेव। नाणतंकतिभागं आहारेंति? कइभागं फासादेंति? गोयमा! असंखिज्जइभागं आहारेंति, अणंतभागं फासादेंति जाव ते णं तेषिं पोग्गला कीसताए भुज्जो भुज्जो परिणमंति? गोयमा! फासिंदियवेमायत्ताए भुज्जो भुज्जो परिणमंति। सेसं जहा नेरइयाणं जाव चलियं कम्मं निज्जरेंति, नो अचलियं कम्मं निज्जरेंति।

एवं जाव वणस्सइकाइयाणं। नवरं ठिती वण्णेयव्वा जा जस्स, उस्सासो वेमायाए।

बेइंदियाणं ठिई भाणियव्वा। ऊसासो वेमायाए।

बेइंदियाणं आहारे पुच्छा। अणाभोगनिव्वत्तिओ तहेव। तत्थ णं जे से आभोगनिव्वत्ति ए से णं असंखेज्जसमइए अंतोमुहुत्ति ए वेमायाए आहारट्ठे समुप्पज्जइ। सेसं तहेव जाव अणंतभागं आसायंति।

बेइंदिया णं भंते! जे पोग्गले आहारत्ताए गेण्हंति ते किं सव्वे आहारेंति? नो सव्वे आहारेंति? गोयमा! बेइंदियाणं दुविहे आहारे पण्णत्ते। तं जहा-लोमाहारे पक्खेवाहारे य। जे पोग्गले लोमाहारत्ताए गिण्हंति ते सव्वे अपरिसेसिए आहारेंति। जे पोग्गले पक्खेवाहारत्ताए गिण्हंति तेषिं णं पोग्गलाणं असंखिज्जभागं आहारेंति, अणेगाइं च णं भागसहस्साइं अणासाइज्जमाणाइं अफासाइज्जमाणाइं विद्धंस-मावज्जंति।

एतेसिं णं भंते! पोग्गलाणं अणासाइज्जमाणाणं अफासाइज्जमाणाण य कयरे कयरेहिंतो अप्पा वा ४? गोयमा! सव्वत्थोवा पुग्गला अणासाइज्जमाणा, अफासाइज्जमाणा अणंतगुणा।

बेइंदिया णं भंते! जे पोग्गले आहारत्ताए गिण्हंति ते णं तेषिं पुग्गला कीसताए भुज्जो भुज्जो परिणमंति? गोयमा! जिब्भिंदिय-फासिंदियवेमायत्ताए भुज्जो भुज्जो परिणमंति।

बेइंदियाणं भंते! पुव्वाहारिया पुग्गला परिणया तहेव जाव चलियं कम्मं निज्जरंति।

तेइंदिय-चउरिंदियाणं णाणतं ठीतीए जाव नेगाइं च णं भागसहस्साइं अणाघाइज्जमाणाइं अणासाइज्जमाणाइं विद्धंसमागच्छंति।

एतेसिं णं भंते! पोग्गलाणं अणाघाइज्जमाणाणं ३,पुच्छा। गोयमा! सव्वत्थोवा पोग्गला

अणाघाइज्जमाणा, अणासाइज्जमाणा अणंतगुणा, अफासाइज्जमाणा अणंतगुणा।

तेइंदियाणं घाणिंदिय-जिब्भिंदिय-फासिंदियवेमायताए भुज्जो भुज्जो परिणमंति।

चउरिंदियाणं चक्खिंदिय-घाणिंदिय-जिब्भिंदिय-फासिंदियताए भुज्जो भुज्जो परिणमंति।

पंचिदियतिरिक्खजोगियाणं ठितिं भाणिरुण ऊसासो वेमायाए। आहारो अणाभोगनिव्वत्तिओ अणुसमयं अविरहिओ। आभोगनिव्वत्तिओ जहन्नेणं अंतोमुहुत्तस्स, उक्कोसेणं छट्ठभत्तस्स। सेसं जहा चउरिंदियाणं जाव चलियं कम्मं निज्जरेंति।

एवं मणुस्साण वि। नवरं आभोगनिव्वत्तिओ जहन्नेणं अंतोमुहुत्तं, उक्कोसेणं अट्ठभत्तस्स। सोइंदिय ५ वेमायताए भुज्जो भुज्जो परिणमंति। सेसं तहेव जाव निज्जरेंति।

वाणमंतराणं ठिईए नाणतं। अवसेसं जहा नागकुमाराणं ।

एवं जोइसियाण वि। नवरं उस्सासो जहन्नेणं मुहुत्तपुहत्तस्स, उक्कोसेण वि मुहुत्तपुहत्तस्स। आहारो जहन्नेणं दिवसपुहत्तस्स, उक्कोसेण वि दिवसपुहत्तस्स। सेसं तहेव।

वेमाणियाणं ठिती भाणियच्चा ओहिया। ऊसासो जहन्नेणं मुहुत्तपुहत्तस्स, उक्कोसेणं तेतीसाए पक्खाणं। आहारो आभोगनिव्वत्तिओ जहन्नेणं दिवसपुहत्तस्स, उक्कोसेणं तेतीसाए वाससहस्साणं। सेसं तहेव जाव निज्जरेंति।

**[२२]** जीवा णं भंते! किं आयारंभा? परारंभा? तदुभयारंभा? अणारंभा? गोयमा! अत्थेगइया जीवा आतारंभा वि, परारंभा वि, तदुभयारंभा वि, नो अणारंभा। अत्थेगइया जीवा नो आयारंभा, नो परारंभा, नो तदुभयारंभा, अणारंभा।

से केणट्ठेणं भंते! एवं वुच्चति-अत्थेगइया जीवा आयारंभा वि? एवं पडिउच्चारेतत्त्वं। गोयमा! जीवा दुविहा पण्णता। तं जहा-संसारसमावन्नगा य असंसारसमावन्नगा य। तत्थ णं जे ते असंसारसमावन्नगा ते णं सिद्धा, सिद्धा णं नो आयारंभा जाव अणारंभा। तत्थ णं जे ते संसारसमावन्नगा ते दुविहा पण्णता। तं जहा-संजता य, असंजता य। तत्थ णं जे ते संजता ते दुविहा पण्णता। तं जहा-पमत्तसंजता य, अप्पमत्तसंजता य। तत्थ णं जे ते अप्पमत्तसंजता ते णं नो आयारंभा, नो परारंभा, जाव अणारंभा। तत्थ णं जे ते पमत्तसंजता ते सुभं जोगं पडुच्च नो आयारंभा जाव अणारंभा, असुभं जोगं पडुच्च आयारंभा वि जाव नो अणारंभा। तत्थ णं जे ते असंजता ते अविरतिं पडुच्च आयारंभा वि जाव नो अणारंभा। से तेणट्ठेणं गोतमा! एवं वुच्चइ-अत्थेगइया जीवा जाव अणारंभा।

नेरइया णं भंते! किं आयारंभा? परारंभा? तदुभयारंभा? अणारंभा? गोतमा! नेरइया आयारंभा वि जाव नो अणारंभा। से केणट्ठेणं? गोयमा! अविरतिं पडुच्च। से तेणट्ठेणं जाव नो अणारंभा।

एवं जाव पंचिंदियतिरिक्खजोगिया।

मणुस्सा जथा जीवा। नवरं सिद्धविरहिता भाणियच्चा।

वाणमंतरा जाव वेमाणिया जथा नेरतिया।

सलेसा जथा ओहिया ।

किण्हलेस-नीललेस-काउलेसा जहा ओहिया जीवा, नवरं पमत्तअप्पमत्ता न भाणियच्चा। तेउलेसा पम्हलेसा सुक्कलेसा जथा ओहिया जीवा नवरं सिद्धा न भाणितच्चा।

**[२३]** इहभविए भंते! नाणे? परभविए नाणे? तदुभयभविए नाणे? गोयमा! इहभविए वि

नाणे, परभविए वि नाणे, तदुभयभविए वि नाणे।

दंसणं पि एवमेव।

इहभविए भंते! चरित्ते? परभविए चरित्ते? तदुभयभविए चरित्ते? गोयमा! इहभविए चरित्ते, नो परभाविए चरित्ते, नो तदुभयभविए चरित्ते।

एवं तवे, संजमे।

**[२४]** असंवुडे णं भंते! अणगारे किं सिज्झति? बुज्झति? मुच्चति? परिनिच्चाति? सच्चदुक्खाणमंतं करेति? गोयमा! नो इणट्ठे समट्ठे। से केणट्ठेणं जाव नो अंतं करेइ? गोयमा! असंवुडे अणगारे आउयवज्जाओ सत्त कम्मपगडीओ सिद्धिलबंधणबद्धाओ धणियबंधणबद्धाओ पकरेति, ह्रस्सकालट्ठितीयाओ दीहकालट्ठितीयाओ पकरेति, मंदाणुभागाओ तिच्चाणुभागाओ पकरेति, अप्पपदेसग्गाओ बहुप्पदेसग्गाओ पकरेति, आउयं च णं कम्मं सिय बंधति, सिय नो बंधति, सिय नो बंधति, अस्सातावेदणिज्जं च णं कम्मं भुज्जो भुज्जो उवचिणाति, अणादीयं च णं अणवदग्गं दीहमद्धं चाउरंतं संसारकंतरं अणुपरियट्ठइ। से तेणट्ठेणं गोयमा! असंवुडे अणगारे नो सिज्झति ५।

संवुडे णं भंते! अणगारे सिज्झति ५? हंता, सिज्झति जाव अंतं करेति। से केणट्ठेणं? गोयमा! संवुडे अणगारे आउयवज्जाओ सत्त कम्मपगडीओ धणियबंधणबद्धाओ सिद्धिलबंधणबद्धाओ पकरेति, दीहकालट्ठितीयाओ ह्रस्सकालट्ठितीओ पकरेति, तिच्चाणुभागाओ मंदाणुभागाओ पकरेति, बहुप्पदेसग्गाओ अप्पपदेसग्गाओ पकरेति, आउयं च णं कम्मं न बंधति, अस्सायावेयणिज्जं च णं कम्मं नो भुज्जो भुज्जो उवचिणाति, अणादीयं च णं अणवदग्गं दीहमद्धं चाउरंतं संसारकंतरं वीतीवयति। से तेणट्ठेणं गोयमा! एवं वुच्चइ-संवुडे अणगारे सिज्झति जाव अंतं करेति।

**[२५]** जीवे णं भंते! असंजते अविरते अप्पडिहयपच्चक्खायपावकम्मि इतो चुए पेच्चा देवे सिया? गोयमा! अत्थेगइए देवे सिया, अत्थेगइए नो देवे सिया। से केणट्ठेणं जाव इतो चुए पेच्चा अत्थेगइए देवे सिया, अत्थेगइए नो देवे सिया? गोयमा! जे इमे जीवा गामास्सर-नगर-निगम-रायहाणि-खेड-कब्बडमडंब-दोणमुह-पट्टणास्सम-सन्निवेसेसु अकामतण्हाए अकामछुहाए अकामबंधेचरेवासेणं अकामअण्हाणगसेय-जल्ल-मल-पंकपरिदाहेणं अप्पतरो वा भुज्जतरो वा कालं अप्पाणं परिकिलेसंति, अप्पाणं परिकिलेसइत्ता कालमासे कालं किच्चा अन्नतरेसु वाणमंतरेसु देवलोगेसु देवताए उववतारो भवन्ति।

केरिसा णं भंते! तेषिं वाणमंतराणं देवाणं देवलोगा पण्णत्ता? गोयमा! से जहानाम एहं असोगवणे इ वा, सत्तवण्णवणे इ वा, चंपगवणे इ वा, चूतवणे इ वा, तिलगवणे इ वा, लउयवणे ति वा, णग्गोहवणे इ वा, छत्तोववणे इ वा, असणवणे इ वा, सणवणे इ वा, अयसिवणे इ वा, कुसुंभवणे इ वा, सिद्धत्थवणे इ वा, बंधुजीवगवणे इ वा णिच्चं सुमितमाइत-लवइतथवइयगुलुइतगुच्छित-जमलितजुवलित-विणमितपणमित-सुविभत्त पिंडिमंजरि वडंसगधरे सिरीए अईव अईव उवसोभेमाणे उवसोभेमाणे चिट्ठति, एवामेव तेषिं वाणमंतराणं देवाणं देवलोगा जहन्नेणं दसवाससहस्सट्ठितीए हिं उक्कोसेणं पलिओवमट्ठितीएहिं बहूहिं वाणमंतरेहिं देवेहिं य देवीहि य आइण्णा वित्तिकिण्णा उवत्थडा संथडा फुडा अवगाढगाढा सिरीए अतीव अतीव उवसोभेमाणा चिट्ठति। एरिसगा णं गोतमा! तेषिं वाणमंतराणं देवाणं देवलोगा पण्णत्ता। से तेणट्ठेणं गोतमा! एवं वुच्चति-जीवे णं अस्संजए जाव देवे सिया।

सेवं भंते! सेवं भंते! ति भगवं गोतमे समणं भगवं महावीरं वंदति नमंसति वंदिता

नमंसिता संजमेणं तवसा अप्पाणं भावेमाणे विहरति।

**\* पढमे सते पढमो उद्देसो समतो\***

### ० बितिओ उद्देसो ०

**[२६]** रायगिहे नगरे समोसरणं। परिसा निग्गता जाव एवं वदासी-

जीवे णं भंते! सयंकडं दुक्खं वेदेति? गोयमा! अत्थेगइयं वेदेति, अत्थेगइयं नो वेदेति। से केणट्ठेणं भंते! एवं वुच्चइ-अत्थेगइयं वेदेति, अत्थेगइयं नो वेदेति? गोयमा! उदिण्णं वेदेति, अणुदिण्णं नो वेदेति, से तेणट्ठेणं एवं वुच्चति-अत्थेगइयं वेदेति, अत्थेगइयं नो वेदति। एवं चउव्वीसदंडएणं जाव वेमाणिए।

जीवा णं भंते सयंकडं दुक्खं वेदेति? गोयमा! अत्थेगइयं वेदेति, अत्थेगइयं णो वेदेति। से केणट्ठेणं? गोयमा! उदिण्णं वेदेति, नो अणुदिण्णं वेदेति, से तेणट्ठेणं०। एवं जाव वेमाणिया।

जीवे णं भंते! सयंकडं आउयं वेदेति? गोयमा! अत्थेगइयं वेदेति. जथा दुक्खेणं दो दंडगा तहा आउएण वि दो दंडगा एगत-पोहतिया; एगतेणं जाव वेमाणिया, पुहतेण वि तहेव।

**[२७]** नेरइया णं भंते! सव्वे समाहारा, सव्वे समसरीरा, सव्वे समुस्सास-नीसासा? गोयमा! नो इणट्ठे समट्ठे। से केणट्ठेणं भंते! एवं वुच्चति-नेरइया नो सव्वे समाहारा, नो सव्वे समसरीरा, नो सव्वे समुस्सास-निस्सासा? गोयमा! नेरइया दुविहा पण्णत्ता। तं जहा-महासरीरा य अप्पसरीरा य। तत्थ णं जे ते महासरीरा ते बहुतराए पोग्गले आहारंति, बहुतराए पोग्गले परिणामंति, बहुतराए पोग्गले उस्ससंति, बहुतराए पोग्गले नीससंति, अभिक्खणं आहारंति, अभिक्खणं परिणामंति, अभिक्खणं ऊससंति, अभिक्खणं निस्ससंति। तत्थ णं जे ते अप्पसरीरा ते णं अप्पतराए पुग्गले आहारंति, अप्पतराए पुग्गले परिणामंति, अप्पतराए पोग्गले उस्ससंति, अप्पतराए पोग्गले नीससंति, आहच्च आहारंति, आहच्च परिणामंति, आहच्च उस्ससंति, आहच्च नीससंति। से तेणट्ठेणं गोयमा! एवं वुच्चइ-नेरइया नो सव्वे समाहारा जाव नो सव्वे समुस्सास-निस्सासा ।

नेरइया णं भंते! सव्वे समकम्मा? गोयमा! णो इणट्ठे समट्ठे। से केणट्ठेणं? गोयमा! नेरइया दुविहा पण्णत्ता। तं जहा-पुव्वोववन्नगा य पच्छोववन्नगा य। तत्थ णं जे ते पुव्वोववन्नगा ते णं अप्पकम्मतरागा। तत्थ णं जे ते पच्छोववन्नगा ते णं महाकम्मतरागा। से तेणट्ठेणं गोयमा!०।

नेरइया णं भंते! सव्वे समवण्णा? गोयमा! नो इणट्ठे समट्ठे। से केणट्ठेणं तह चेव? गोयमा! जे ते पुव्वोववन्नगा ते णं विसुद्धवण्णतरागा तहेव से तेणट्ठेणं .।

नेरइया णं भंते! सव्वे समलेसा? गोयमा! नो इणट्ठे समट्ठे। से केणट्ठेणं जाव नो सव्वे समलेसा? गोयमा! नेरइया दुविहा पण्णत्ता। तं जहापुव्वोववन्नगा य पच्छोववन्नगा य। तत्थ णं जे ते पुव्वोववन्नगा ते णं विसुद्धलेसतरागा, तत्थ णं जे ते पच्छोववन्नगा ते णं अविस्सुद्धलेसतरागा। से तेणट्ठेणं०।

नेरइया णं भंते! सव्वे समवेदणा? गोयमा! नो इणट्ठे समट्ठे। से केणट्ठेणं? गोयमा! नेरइया दुविहा पण्णत्ता। तं जहा-सण्णिभूया य असण्णिभूया य। तत्थ णं जे ते सण्णिभूया ते णं महावेयणा, तत्थ णं जे ते असण्णिभूया ते णं अप्पवेयणतरागा। से तेणट्ठेणं गोयमा!०।

नेरइया णं भंते ! सव्वे समकिरिया? गोयमा ! नो इणट्ठे समट्ठे। से केणट्ठेणं? गोयमा !

नेरइया तिविहा पण्णत्ता। तं जहा-सम्मद्धिट्ठी मिच्छादिट्ठी सम्मामिच्छादिट्ठी। तत्थ णं जे ते सम्मादिट्ठी तेसि णं चत्तारि किरियाओ पण्णत्ताओ, तं जहा-आरंभिया पारिग्गहिया मायावत्तिया अपच्चक्खाणकिरिया । तत्थ णं जे ते मिच्छादिट्ठी तेसि णं पंच किरियाओ कज्जंति, तं जहाआरंभइया जाव मिच्छादंसणवत्तिया। एवं सम्मामिच्छादिट्ठीणं पि। से तेणट्ठेणं गोयमा!०।

नेरइया णं भंते! सव्वे समाउया? सव्वे समोववन्नगा? गोयमा! णो इणट्ठे समट्ठे। से केणट्ठेणं? गोयमा! नेरइया चउत्विहा पण्णत्ता तं जहा-अत्थेगइया समाउया समोववन्नगा, अत्थेगइया समाउया विसमोववन्नगा, अत्थेगइया विसमाउया समोववन्नगा, अत्थेगइया विसमाउया विसमोववन्नगा । से तेणट्ठेणं गोयमा!०।

असुरकुमारा णं भंते! सव्वे समाहारा? सव्वे समसरीरा? जधा नेरइया तथा भाणियव्वा। नवरं कम्म-वण्ण-लेसाओ परित्थल्लेयव्वाओपुव्वोववन्नगा महाकम्मतरागा, अविमुद्धवण्णतरागा, अविमुद्ध लेस-तरागा। पच्छोववन्नगा पसत्था। सेसं तहेव।

एवं जाव थणियकुमारा।

पुढविक्काइयाणं आहार-कम्म-वण्ण-लेसा जहा नेरइयाणं।

पुढविक्काइया णं भंते! सव्वे समवेदणा? हंता, समवेयणा। से केण ट्ठेणं? गोयमा! पुढविकाइया सव्वे असण्णी असण्णिभूतं अणिदाए वेयणं वेदंति। से तेणट्ठेणं०।

पुढविक्काइया णं भंते! समकिरिया? हंता, समकिरिया। से केणट्ठेणं? गोयमा! पुढविक्काइया सव्वे माईमिच्छादिट्ठी, ताणं नेयत्तियाओ पंच किरियाओ कज्जंति, तं जहा-आरंभिया जाव मिच्छादंसण-वत्तिया । से तेणट्ठेणं० समकिरिया।

समाउया, समोववन्नगा जधा नेरइया तथा भाणियव्वा।

जधा पुढविक्काइया तथा जाव चउरिंदिया।

पंचिंदियतिरिक्खजोणिया जहा नेरइया। नाणतं किरियासु-

पंचिंदियतिरिक्खजोणिया णं भंते! सव्वे समकिरिया? गो०! णो इणट्ठे समट्ठे। से केणट्ठेणं? गोयमा! पंचिंदियतिरिक्खजोणिया तिविधा पण्णत्ता। तं जहा-सम्मद्धिट्ठी, मिच्छादिट्ठी, सम्मामिच्छादिट्ठी! तत्थ णं जे ते सम्मद्धिट्ठी ते दुविहा पण्णत्ता, तं जहा-अस्संजता य, संजताऽसंजता य। तत्थ णं जे ते संजताऽसंजता तेसि णं तिन्नि किरियाओ कज्जंति, तं जहा-आरंभिया पारिग्गहिया मायावत्तिया । असंजताणं चत्तारि। मिच्छादिट्ठीणं पंच। सम्मामिच्छादिट्ठीणं पंच।

मणुस्सा जहा नेरइया । नाणतं-जे महासरीरा ते वहुतराए पोग्गले आहारंति आहच्च आहारंति। जे अप्पसरीरा ते अप्पतराए पोग्गले आहारंति अभिक्खणं आहारंति ।

सेसं जहा नेरइयाणं जाव वेयणा।

मणुस्सा णं भंते! सव्वे समकिरिया? गो०! णो इणट्ठे समट्ठे। से केणट्ठेणं? मणुस्सा तिविहा पण्णत्ता। तं जहा-सम्मद्धिट्ठी मिच्छादिट्ठी सम्मामिच्छादिट्ठी। तत्थ णं जे ते सम्मद्धिट्ठी ते तिविधा पण्णत्ता, तं जहा-संजता अस्संजता संजतासंजता य। तत्थ णं जे ते संजता ते दुविहा पण्णत्ता, तं जहा-सरागसंजता य वीतरागसंजता य। तत्थ णं जे ते वीतरागसंजता ते णं अकिरिया। तत्थ णं जे ते सराग-

संजता ते दुविहा पण्णत्ता, तं जहा-पमत्तसंजता य अपमत्तसंजता य। तत्थ णं जे ते अप्पमत्तसंजता तेसि णं एगा मायावत्तिया किरिया कज्जति। तत्थ णं जे ते पमत्तसंजता तेसि णं दो किरियाओ कज्जंति, तं- आरंभिया य मायावत्तिया य । तत्थ णं जे ते संजतासंजता तेसि णं आइल्लाओ तिन्नि किरियाओ कज्जंति। अस्संजताणं चत्तारि किरियाओ कज्जंति-आरं०। मिच्छादिट्ठीणं पंच। सम्मामिच्छादिट्ठीणं पंच। वाणमंतर-जोतिस-वेमाणिया जहा असुरकुमारा । नवरं वेयणाए नाणतं मायिमिच्छादिट्ठी- उववन्नगा य अप्पवेदणतरा, अमायिसम्मद्विट्ठीउववन्नगा य महावेयणतरागा भाणियच्चा जोतिस-वेमाणिया सलेसा णं भंते! नेरइया सव्वे समाहारगा? ओहियाणं, सलेसाणं, सुक्कलेसाणं, एएसि णं तिण्हं एक्को गमो। कण्हलेस-नीललेसाणं पि एक्को गमो, नवरं वेदणाए-मायिमिच्छादिट्ठीउववन्नगा य, अमायिसम्मद्विट्ठीउववण्णगा य भाणियच्चा। मणुस्सा किरियासु सराग-वीयराग-पमत्तापमत्ता ण भाणियच्चा। काउलेसाण वि एसेव गमो, नवरं नेरइए जहा ओहिए दंडए तहा भाणियच्चा। तेउलेसा पम्हलेसा जस्स अत्थि जहा ओहिओ दंडओ तहा भाणियच्चा, नवरं मणुस्सा सरागा वीयरागा य न भाणियच्चा।

[२८] दुक्खास्सउए उदिण्णे, आहारे, कम्म-वण्ण-लेसा य ।

समवेदण समकिरिया समाउए चेव बोद्धच्चा ॥

[२९] कति णं भंते! लेसाओ पण्णत्ताओ? गोयमा छल्लेसाओ पण्णत्ताओ। तं जहा-लेसाणं बीओ उद्देशओ भाणियच्चो जाव इड्ढी।

[३०] जीवस्स णं भंते! तीतद्धाए आदिट्ठस्स कइविहे संसारसंचिट्ठणकाले पण्णत्ते? गोयमा! चउच्चिहे संसारसंचिट्ठणकाले पण्णत्ते। तं जहा-णेरइयसंसारसंचिट्ठणकाले, तिरिक्खजोणिय संसारसंचिट्ठणकाले, मणुस्ससंसारसंचिट्ठणकाले, देवसंसारसंचिट्ठणकाले य पण्णत्ते।

नेरइयसंसारसंचिट्ठणकाले णं भंते! कतिविहे पण्णत्ते? गोयमा! तिविहे पण्णत्ते। तं जहा-सुन्नकाले, असुन्नकाले, मिस्सकाले।

तिरिक्खजोणियसंसारसंचिट्ठणकाले पुच्छा। गोयमा! दुविहे पण्णत्ते। तं जहा-असुन्नकाले य मिस्सकाले य।

मणुस्साण य, देवाण य जहा नेरइयाणं।

एयस्स णं भंते! नेरइयसंसारसंचिट्ठणकालस्स सुन्नकालस्स असुन्नकालस्स

मीसकालस्स य कयरे कयरेहितो अप्पे वा, बहुए वा, तुल्ले वा, विसेसाहिए वा? गोयमा!

सव्वत्थोवे असुन्नकाले, मिस्सकाले अणंतगुणे, सुन्नकाले अणंतगुणे।

तिरिक्खजोणियाणं सव्वत्थोवे असुन्नकाले मिस्सकाले अणंतगुणे।

मणुस्स-देवाण य जहा नेरइयाणं।

एयस्स णं भंते! नेरइयसंसारसंचिट्ठणकालस्स जाव देवसंसारसंचिट्ठण जाव विसेसाधिए वा? गोयमा! सव्वत्थोवे मणुस्ससंसारसंचिट्ठणकाले, नेरइयसंसारसंचिट्ठणकाले असंखेज्जगुणे, देवसंसारसंचिट्ठणकाले असंखेज्जगुणे, तिरिक्खजोणियसंसारसंचिट्ठणकाले अणंतगुणे।

[३१] जीवे णं भंते! अंतकिरियं करेज्जा? गोयमा! अत्थेगतिए करेज्जा, अत्थेगतिए नो करेज्जा। अंतकिरियापदं नेयच्चं।

**[३२]** अह भंते! असंजयभवियदव्वदेवाणं, अविराहियसंजमाणं, विराहिय संजमाणं, अविराहियसंजमासंजमाणं, विराहियसंजमासंजमाणं, असण्णीणं, तावसाणं, कंदप्पियाणं, चरगपरिव्वायगाणं, किट्विसियाणं, तेरिच्छियाणं, आजीवियाणं, आभिओगियाणं, सलिंगीणं दंसणवावन्नागाणं, एएसि णं देवलोगेसु उववज्जमाणं कस्स कहिं उववाए पण्णते? गोयमा! अस्संजतभवियदव्वदेवाणं जहन्नेणं भवणवासीसु, उक्कोसेणं उवरिमगेविज्जएसु। अविराहियसंजमाणं जहन्नेणं सोहम्मं कप्पे, उक्कोसेणं सव्वट्ठसिद्धे विमाणे विराहियसंजमाणं जहन्नेणं भवणवासीसु, उक्कोसेणं सोहम्मं कप्पे । अविराहियसंजमासंजमाणं जहन्नेणं सोहम्मं कप्पे, उक्कोसेणं अच्चुए कप्पे । विराहियसंजमासंजमाणं जहन्नेणं भवणवासीसु, उक्कोसेणं जोतिसिएसु । असण्णीणं जहन्नेणं भवणवासीसु, उक्कोसेणं वाणमंतरेसु । अवसेसा सव्वे जहन्नेणं भवणवासीसु; उक्कोसगं वोच्छामि-तावसाणं जोतिसिएसु । कंदप्पियाणं सोहम्मं कप्पे । चरग-परिव्वायगाणं बंभलोए कप्पे । किट्विसियाणं लंतगे कप्पे । तेरिच्छियाणं सहस्सारे कप्पे । आजीवियाणं अच्चुए कप्पे । आभिओगियाणं अच्चुए कप्पे । सलिंगीणं दंसणवावन्नगाणं उवरिमगेवेज्जएसु ।

**[३३]** कतिविहे णं भंते! असण्णियाउए पण्णते? गोयमा! चउट्विहे असण्णिआउए पण्णते। तं जहा-नेरइय-असण्णिआउए, तिरिक्खजोणियअसण्णिआउए, मणुस्सअसण्णिआउए, देवअसण्णिआउए ।

असण्णी णं भंते! जीवे किं नेरइयाउयं पकरेति, तिरिक्खजोणियाउयं पकरेइ, मणुस्साउयं पकरेइ, देवाउयं पकरेइ? हंता, गोयमा! नेरइयाउयं पि पकरेइ, तिरिक्खजोणियाउयं पि पकरेइ, मणुस्साउयं पि पकरेइ, देवाउयं पि पकरेइ। नेरइयाउयं पकरेमाणे जहन्नेणं दस वाससहस्साइं, उक्कोसेणं पत्तिओवमस्स असंखेज्जइभागं पकरेति। तिरिक्खजोणियाउयं पकरेमाणे जहन्नेणं अंतोमुहुतं, उक्कोसेणं पत्तिओवमस्स असंखेज्जइभागं पकरेइ। मणुस्साउए वि एवं चेव। देवाउयं पकरेमाणे जहा नेरइया।

एयस्स णं भंते! नेरइयअसण्णि-आउयस्स तिरिक्खजोणिय-असण्णिआउयस्स मणुस्स-असण्णिआउयस्स देवअसण्णिआउयस्स य कयरे कयरेहिंतो जाव विसेसाहिए वा? गोयमा! सव्वत्थोवे देव-असण्णिआउए, मणुस्सअसण्णिआउए असंखेज्जगुणे, तिरियजोणियअसण्णिआउए असंखेज्जगुणे, नेरइय-असण्णिआउये असंखेज्जगुणे।

सेवं भंते! सेवं भंते! ति।।

**\*पढ्मं सते बितिओ उद्देशो समतो\***

## ० तइओ उद्देशो ०

**[३४]** जीवाणं भंते! कंखामोहणिज्जे कम्मं कडे? हंता, कडे।

से भंते! किं देसेणं देसे कडे ?, देसेणं सव्वे कडे?, सव्वेणं देसे कडे?, सव्वेणं सव्वे कडे ?। गोयमा! नो देसेणं देसे कडे, नो देसेणं सव्वे कडे, नो सव्वेणं देसे कडे , सव्वेणं सव्वे कडे ।

नेरइयाणं भंते! कंखामोहणिज्जे कम्मं कडे? हंता, कडे जाव सव्वेणं सव्वे कडे ।

एवं जाव वेमाणियाणं दंडओ भाणियव्वो।

**[३५]** जीवा णं भंते! कंखामोहणिज्जं कम्मं करिसु? हंता, करिसु।

तं भंते! किं देसेणं देसं करिसु? एतेणं अभिलावेणं दंडओ जाव वेमाणियाणं।

एवं करेति। एत्थ वि दंडओ जाव वेमाणियाणं।

करेस्संति। एत्थ वि दंडओ जाव वेमाणियाणं।

एवं चित्ते-चिणिंसु, चिणंति, चिणिस्संति। उवचित्ते- उवचिणिंसु, उवचिणंति, उवचिणिस्संति।  
उदीरेंसु, उदीरेंति, उदीरिस्संति। वेदिंसु, वेदेंति, वेदिस्संति। निज्जरेंसु, निज्जरेंति, निज्जरिस्संति।

[३६] कड चित्, उवचित्, उदीरिया, वेदिया य, निज्जिण्णा ।

आदितिए चउभेदा, तियभेदा पच्छिमा तिण्णि ॥

[३७] जीवा णं भंते! कंखामोहणिज्जं कम्मं वेदेंति? हंता, वेदेंति।

कहं णं भंते! जीवा कंखामोहणिज्जं कम्मं वेदेंति? गोयमा! तेहिं तेहिं कारणेहिं संकिगा  
कंखिगा वित्तिक्किच्छिता भेदसमावन्ना कलुससमावन्ना, एवं खलु जीवा कंखामोहणिज्जं कम्मं वेदेंति।

[३८] से नूणं भंते! तमेव सच्चं णीसकं जं जिणेहिं पवेदितं? हंता, गोयमा! तमेव सच्चं  
णीसकं जं जिणेहिं पवेदितं।

[३९] से नूणं भंते! एवं मणं धारेमाणे, एवं पकरेमाणे एवं चिट्ठेमाणे, एवं संवरेमाणे आणाए  
आराहए भवति? हंता, गोयमा! एवं मणं धारेमाणे जाव भवति।

[४०] से नूणं भंते! अत्थित्तं अत्थित्ते परिणमइ, नत्थित्तं नत्थित्ते परिणमति? हंता, गोयमा!  
जाव परिणमति।

जं तं भंते! अत्थित्तं अत्थित्ते परिणमति, नत्थित्तं नत्थित्ते परिणमति तं किं पयोगसा  
वीससा? गोयमा! पयोगसा वि तं, वीससा वि तं।

जहा ते भंते! अत्थित्तं अत्थित्ते परिणमइ तथा ते नत्थित्तं नत्थित्ते परिणमति? जहा ते  
नत्थित्तं नत्थित्ते परिणमति तथा ते अत्थित्तं अत्थित्ते परिणमति? हंता, गोयमा! जहा मे

अत्थित्तं अत्थित्ते परिणमति तथा मे नत्थित्तं नत्थित्ते परिणमति, जहा मे नत्थित्तं नत्थित्ते  
परिणमति तथा मे अत्थित्तं अत्थित्ते परिणमति।

से नूणं भंते! अत्थित्तं अत्थित्ते गमणिज्जं? जथा परिणमइ दो आलावगा तथा गमणिज्जेण  
वि दो आलावगा भाणित्त्वा जाव तथा मे अत्थित्तं अत्थित्ते गमणिज्जं।

[४१] जथा ते भंते! एत्थं गमणिज्जं तथा ते इहं गमणिज्जं? जथा ते इहं गमणिज्जं तथा  
ते एत्थं गमणिज्जं? हंता, गोयमा! जहा मे एत्थं गमणिज्जं जाव तथा मे एत्थं गमणिज्जं।

[४२] जीवा णं भंते! कंखामोहणिज्जं कम्मं बंधंति? हंता, बंधंति।

कहं णं भंते! जीवा कंखामोहणिज्जं कम्मं बंधंति? गोयमा! पमादपच्चया जोगनिमित्तं च।

से णं भंते! पमादे किंपवहे? गोयमा! जोगप्पवहे।

से णं भंते! जोगे किंपवहे? गोयमा! वीरियप्पवहे।

से णं भंते! वीरिए किंपवहे? गोयमा! सरीरप्पवहे।

से णं भंते! सरीरे किंपवहे? गोयमा! जीवप्पवहे। एवं सति अत्थि उट्ठाणे ति वा, कम्मं ति  
वा बले ति वा, वीरिए ति वा, पुरिसक्कारपरक्कमे ति वा।

[४३] से नूणं भंते! अप्पणा चेव उदीरेइ, अप्पणा चेव गरहइ, अप्पणा चेव संवरेइ? हंता,  
गोयमा! अप्पणा चेव तं चेव उच्चारयव्वं ।

जं तं भंते! अप्पणा चेव उदीरेइ अप्पणा चेव गरहेइ, अप्पणा चेव संवरेइ तं किं उदिण्णं

उदीरेइ अणुदिण्णं अणुदिण्णं उदीरणाभवियं कम्मं उदीरेइ उदयाणंतरपच्छाकडं कम्मं उदीरेइ ? गोयमा!  
नो उदीण्णं उदीरेइ, नो अणुदिण्णं उदीरेइ, अणुदिण्णं उदीरणाभवियं कम्मं उदीरेइ, णो उदयाणंतरपच्छाकडं  
कम्मं उदीरेइ।

जं तं भंते! अणुदिण्णं उदीरणाभवियं कम्मं उदीरेइ तं किं उट्ठाणेणं कम्मेणं बलेणं  
वीरिणं पुरिसक्कारपरक्कमेणं अणुदिण्णं उदीरणाभवियं कम्मं उदीरेइ? उदाहु तं अणुट्ठाणेणं अकम्मेणं  
अबलेणं अवीरिणं अपुरिसक्कारपरक्कमेणं अणुदिण्णं उदीरणाभवियं कम्मं उदीरेइ? गोयमा! तं उट्ठाणेणं  
वि कम्मेण वि बलेण वि वीरिण वि पुरिसक्कारपरक्कमेण वि अणुदिण्णं उदीरणाभवियं कम्मं उदीरेइ, णो  
तं अणुट्ठाणेणं अकम्मेणं अकम्मेणं अबलेणं अवीरिणं अपुरिसक्कारपरक्कमेणं अणुदिण्णं उदीरणाभवियं  
कम्मं उदीरेइ। एवं सति अत्थि उट्ठाणे इ वा कम्मे इ वा बले इ वा वीरिण इ वा पुरिसक्कारपरक्कमे इ  
वा।

से नूणं भंते! अप्पणा चेव उवसामेइ, अप्पणा चेव गरहइ, अप्पणा चेव संवरेइ? हंता, गोयमा!  
एत्थ वि तं चेव भाणियच्चं, नवरं अणुदिण्णं उवसामेइ, सेसा पडिसेहेयच्चा तिण्णि।

जं तं भंते! अणुदिण्णं उवसामेइ तं किं उट्ठाणेणं जाव पुरिसक्कारपरक्कमे इ वा।

से नूणं भंते! अप्पणा चेव वेदेइ अप्पणा चेव गरहइ? एत्थ वि स च्चेव परिवाडी। नवरं  
उदिण्णं वेएइ, नो अणुदिण्णं वेएइ। एवं जाव पुरिसक्कारपरक्कमे इ वा।

से नूणं भंते! अप्पणा चेव निज्जरेति अप्पणा चेव गरहइ? एत्थ वि स च्चेव परिवाडी।  
नवरं उदयाणंतरपच्छाकडं कम्मं निज्जरेइ, एवं जाव परक्कमेइ वा।

**[४४]** नेरइया णं भंते! कंखामोहणिज्जं कम्मं वेदंति? जथा ओहिया जीवा तथा नेरइया  
जाव थणितकुमारा।

पुढविक्काइया णं भंते! कंखामोहणिज्जं कम्मं वेदंति? हंता, वेदंति।

कहं णं भंते! पुढविक्काइया कंखामोहणिज्जं कम्मं वेदंति? गोयमा! तेसि णं जीवाणं णो एवं  
तक्का इ वा सण्णा इ वा पण्णा इ वा मणे इ वा वई ति वा 'अम्हे णं कंखामोहणिज्जं कम्मं वेदो'  
वेदंति पुण ते।

से णूणं भंते! तमेव सच्चं नीसंकं जं जिणेहिं पवेदियं। सेसं तं चेव जाव  
पुरिसक्कारपरक्कमेणं ति वा।

एवं जाव चउरिंदिया।

पंचिदियतिरिक्खजोणिया जाव वेमाणिया जथा ओहिया जीवा।

**[४५]** अत्थि णं भंते! समणा वि निग्गंथा कंखामोहणिज्जं कम्मं वेदंति? हंता, अत्थि।

कहं णं भंते! समणा वि निग्गंथा कंखामोहणिज्जं कम्मं वेदंति? गोयमा! तेहिं तेहिं  
नाणंतरेहिं दंसणंतरेहिं चरिंतरेहिं लिंगंतरेहिं पवयणंतरेहिं पावयणंतरेहिं कप्पंतरेहिं मग्गंतरेहिं मंतंतरेहिं  
भंगंतरेहिं नयंतरेहिं नियमंतरेहिं पमाणंतरेहिं संकिया कंखिया वित्तिकिंछिता भेदसमावन्ना, कलुस-  
सामावन्ना, एवं खलु समणा निग्गंथा कंखामोहणिज्जं कम्मं वेदंति।

से नूणं भंते! तमेव सच्चं नीसंकं जं जिणेहिं पवेइयं? हंता, गोयमा! तमेव सच्चं नीसंकं जाव  
पुरिसक्कारपरक्कमे इ वा।

सेवं भंते! सेवं भंते!।

**\*पढमे सते ततिओ उद्देशो समतो\***

### ० चउत्थो उद्देशो ०

[४६] कति णं भंते! कम्मपगडीओ पण्णत्ताओ? गोतमा! अट्ठ कम्मपगडीओ पण्णत्ताओ। कम्मपगडीए पढमो उद्देशो नेतव्वो जाव अणुभागो सम्मतो।

[४७] कति पगडी? कह बंधइ? कतिहिं व ठाणेहिं बंधती पगडी? ।

कति वेदेति व पगडी? अणुभागो कतिविहो कस्स? ॥

[४८] जीवे णं भंते! मोहणिज्जेणं कडेणं कम्मणं उदिण्णेणं उवट्ठाएज्जा? हंता, उवट्ठाएज्जा।

से भंते! किं वीरियत्ताए उवट्ठाएज्जा? अवीरियत्ताए उवट्ठाएज्जा? गोतमा! वीरियत्ताए उवट्ठाएज्जा, नो अवीरियत्ताए उवट्ठाएज्जा।

जदि वीरियत्ताए उवट्ठाएज्जा किं बालवीरियत्ताए उवट्ठाएज्जा? पंडितवीरियत्ताए उवट्ठाएज्जा? बाल-पंडितवीरियत्ताए उवट्ठाएज्जा? गोयमा! बालवीरियत्ताए उवट्ठाएज्जा, णो पंडितवीरियत्ताए उवट्ठाएज्जा, नो बाल-पंडितवीरियत्ताए उवट्ठाएज्जा।

जीवे णं भंते! मोहणिज्जेणं कडेणं कम्मणं उदिण्णेणं अवक्कमेज्जा? हंता, अवक्कमेज्जा।

से भंते! जाव बालपंडियवीरियत्ताए अवक्कमेज्जा ३?

गोयमा! बालवीरियत्ताए अवक्कमेज्जा, नो पंडियवीरियत्ताए अवक्कमेज्जा, सिय बालपंडियवीरियत्ताए अवक्कमेज्जा।

जधा उदिण्णेणं दो आलावगा तथा उवसंतेण वि दो आलावगा भाणियव्वा। नवरं

उवट्ठाएज्जा पंडियवीरियत्ताए, अवक्कमेज्जा बाल-पंडियवीरियत्ताए।

से भंते! किं आताए अवक्कमइ? अणाताए अवक्कमइ? गोयमा! आताए अवक्कमइ, णो अणाताए अवक्कमइ; मोहणिज्जं कम्मं वेदेमाणे।

से कहमेयं भंते! एवं? गोतमा! पुत्विं से एतं एवं रोयति इदाणिं से एयं एवं नो रोयइ, एवं खलु एतं एवं।

[४९] से नूणं भंते! नेरइयस्स वा, तिरिक्खजोणियस्स वा, मणूसस्स वा, देवस्स वा जे कडे पावे कम्म, नत्थि णं तस्स अवेदइत्ता मोक्खो? हंता, गोतमा! नेरइयस्स वा, तिरिक्खजोणियस्स वा, मणूसस्स वा, देवस्स वा जे कडे पावे कम्म, नत्थि तस्स अवेदइत्ता मोक्खो। से केणट्ठेणं भंते! एवं वुच्चति नेरइयस्स वा जाव मोक्खो? एवं खलु मए गोयमा! दुविहे कम्मे पण्णत्ते, तं जहा-पदेसकम्मं य, अणुभागकम्मं य। तत्थ णं जं तं पदेसकम्मं तं नियमा वेदेति, तत्थ णं जं तं अणुभागकम्मं तं अत्थेगइयं वेदेति, अत्थेगइयं नो वेएइ। णायमेतं अरहता, सुतमेतं अरहता, विण्णायमेतं अरहता- इमं कम्मं अयं जीवे अब्भोवगमियाए वेदणाए वेइस्सइ, इमं कम्मं अयं जीवे उवक्कमियाए वेदणाए वेइस्सइ। अहाकम्मं अधानिकरणं जधा जधा तं भगवता दिट्ठं तथा तथा तं विप्परिणमिस्सतीति। से तेणट्ठेणं गोतमा! नेरइयस्स वा ४ जाव मोक्खो।

[५०] एस णं भंते! पोग्गले तीतमणंतं सासायं समयं भुवि इति वत्तव्वं सिया? हंता, गोयमा!  
एस णं पोग्गले तीतमणंतं सासायं समयं भुवि इति वत्तव्वं सिया।

एस णं भंते! पोग्गले पडुप्पन्नं सासायं समयं 'भवति' इति वत्तव्वं सिया? हंता, गोयमा! तं  
चेव उच्चारेत्तव्वं।

एस णं भंते! पोग्गले अणागतमणंतं सासतं समयं 'भविस्सति' इति वत्तव्वं सिया? हंता,  
गोयमा! तं चेव उच्चारेत्तव्वं।

एवं खंधेण वि तिण्णि आलावगा।

एवं जीवेण वि तिण्णि आलावगा भाणित्त्वा।

[५१] छउमत्थे णं भंते! मणूसे तीतमणंतं सासतं समयं केवलेणं संजमेणं, केवलेणं संवरेणं,  
केवलेणं बंभचेरवासेणं, केवलाहिं पवयणमाताहिं सिज्झंसु बुज्झंसु जाव सव्वदुक्खाणमंतं करिसु? गोतमा!  
नो इणट्ठे समट्ठे। से केणट्ठेणं भंते! एवं वुच्चइ तं चेव जाव अंतं करिसु? गोतमा! जे केइ अंतकरा वा,  
अंतिमसरीरिया वा सव्वदुक्खाणमंतं करिसु वा करेति वा करिस्संति वा सव्वे ते उप्पन्ननाण-दंसणधरा  
अरहा जिणा केवली भविता ततो पच्छा सिज्झंति बुज्झंति मुच्चंति परिनिव्वायंति सव्वदुक्खाणमंतं करिसु  
वा करेति वा करिस्संति वा, से तेणट्ठेणं गोतमा! जाव सव्वदुक्खाणमंतं करिसु।

पडुप्पन्ने वि एवं चेव, नवरं 'सिज्झंति' भाणित्त्वं।

अणागते वि एवं चेव, नवरं 'सिज्झिस्संति' भाणियत्त्वं।

जहा छउमत्थो तथा आधोहिओ वि, तथा परमाहोहिओ वि। तिण्णि आलावगा भाणियत्त्वा।

केवली णं भंते! मणूसे तीतमणंतं सासायं समयं जाव अंतं करिसु? हंता, सिज्झंसु जाव अंतं  
करिसु। एते तिण्णि आलावगा भाणियत्त्वा छउमत्थस्स जधा, नवरं सिज्झंसु, सिज्झंति, सिज्झिस्संति।

से नूणं भंते! तीतमणंतं सासायं समयं, पडुप्पन्नं वा सासायं समयं, अणागतमणंतं वा सासायं  
समयं जे केइ अंतकरा वा

अंतिमसरीरिया वा सव्वदुक्खाणमंतं करिसु वा करेति वा करिस्संति वा सव्वे ते  
उप्पन्ननाण-दंसणधरा अरहा जिणा केवली भविता ततो पच्छा सिज्झंति जाव अंतं करेस्संति वा? हंता,  
गोयमा! तीतमणंतं सासतं समयं जाव अंतं करेस्संति वा? हंता, गोयमा! तीतमणंतं सासतं समयं जाव अंतं  
करेस्संति वा।

से नूणं भंते! उप्पन्ननाण-दंसणधरे अरहा जिणे केवली 'अलमत्थु' ति वत्तव्वं सिया? हंता,  
गोयमा! उप्पन्ननाण-दंसणधरे अरहा जिणे केवली अलमत्थु ति वत्तव्वं सिया।

सेवं भंते! सेवं भंते! ति।

\* पढमे सते चउत्थो उद्देशो समतो \*

## ०-पंचमो उद्देशो-०

[५२] कति णं भंते! पुढवीओ पण्णत्ताओ? गोयमा! सत्त पुढवीओ पण्णत्ताओ। तं जहा-  
रयणप्पभा जाव तमतमा।

इमीसे णं भंते! रत्तणप्पभाए पुढवीए कति निरयावाससयसहस्सा पण्णत्ता? गोतमा! तीसं

निरयावाससयसहस्सा पण्णत्ता।

[५३] तीसा य पण्णवीसा पण्णरस दसेव या सयसहस्सा।

तिण्णेगं पंचूणं पंचेव अणुत्तरा निरया ॥

[५४] केवतिया णं भंते! असुरकुमारावाससतसहस्सा पण्णत्ता? एवं-

[५५] चोयट्ठी असुराणं, चउरासीती य होति नागाणं।

बावत्तरी सुवण्णाण, वाउकुमाराण छण्णउती ॥

[५६] दीवदिसाउदहीणं विज्जुकुमारिदथणियमग्गीणं।

छण्हं पि जुयलगाणं छावत्तरिमो सतसहस्सा ॥

[५७] केवतिया णं भंते! पुढविक्काइयावाससतसहस्सा पण्णत्ता? गोयमा! असंखेज्जा

पुढविक्काइयावाससयसहस्सा पण्णत्ता जाव असंखिज्जा जोदिसियविमाणावाससयसहस्सा पण्णत्ता

सोहम्मं णं भंते! कप्पे कति विमाणावाससतसहस्सा पण्णत्ता? गोयमा! बत्तीसं

विमाणावाससतसहस्सा पण्णत्ता। एवं-

[५८] बत्तीसऽट्ठावीसा बारस अट्ठ चउरो सतसहस्सा।

पण्णा चत्तालीसा छच्च सहस्सा सहस्सारे ॥

[५९] आणय-पाणयकप्पे चत्तारि सताऽऽरण-ऽच्चुए तिण्णि।

सत्त विमाणसताइं चउसु वि एएसु कप्पेसुं ॥

[६०] एक्कारसुत्तरं हेट्ठिमेसु सत्तुत्तरं च मज्झिमए।

सतमेगं उवरिमए पंचेव अणुत्तरविमाणा ॥

[६१] पुढवि ट्ठिति ओगाहण सरीर संघयणमेव संठाणे ।

लेसा दिट्ठी णाणे जोगुवओगे य दस ठाणा ॥

[६२] इमीसे णं भंते! रतणप्पभाए पुढवीए तीसाए निरयावाससतसहस्सेसु एगमेगंसि

निरयावासंसि नेरतियाणं केवतिया ठितिठाणा पण्णत्ता? गोयमा! असंखेज्जा ठितिठाणा पण्णत्ता। तं जहा-जहन्निया ठिती, समयहिया जहन्निया ठिई, दुसमयाहिया जहन्निया ठिती जाव असंखेज्जसमयाहिया जहन्निया ठिती, तप्पाउग्गुक्कोसिया ठिती।

इमीसे णं भंते! रतणप्पभाए पुढवीए तीसाए निरयावाससतसहस्सेसु एगमेगंसि निरायवासंसि जहन्नियाए ठितीए वट्टमाणा नेरइया किं कोहोवउत्ता, माणोवउत्ता, मायोवउत्ता, लोभोवउत्ता? गोयमा! सच्चे वि ताव होज्जा कोहोवउत्ता १, अहवा कोहोवउत्ता य माणोवउत्ते य २, अहवा कोहोवउत्ता य माणोवउत्ता य ३, अहवा कोहोवउत्ता य मायोवउत्ते य ४, अहवा कोहोवउत्ता य मायोवउत्ता य ५ अहवा कोहोवउत्ता य लोभोवउत्ते य ६, अहवा कोहोवउत्ता य लोभोवउत्ता य ७। अहवा कोहोवउत्ता य माणोवउत्ते य मायोवउत्ते य १, कोहोवउत्ता य माणोवउत्ते य मायोवउत्ता य २, कोहोवउत्ता य माणोवउत्ता य मायोवउत्ते य ३, कोहोवउत्ता य माणोवउत्ता य मायाउवउत्ता य ४। एवं कोह-माण-लोभेण वि चउ ४। एवं कोह-माया-लोभेण वि चउ ४, एवं १२। पच्छा माणेण मायाए लोभेण य कोहो भइयच्चो, ते कोहं अमुंचता ८। एवं सत्तावीसं भंगा णेयच्चा।

इमीसे णं भंते! रयणप्पभाए पुढवीए तीसाए निरयावाससयसहस्सेसु एगमेगंसि निरया-

वासंसि समयाधियाए जहन्नट्ठितीए वट्टमाणा नेरइया किं कोधोवउत्ता, माणोवउत्ता, मायोवउत्ता, लोभोवउत्ता? गोयमा! कोहोवउत्ते य माणोवउत्ते य मायोवउत्ते य लोभोवउत्ते य ४। कोधोवउत्ता य माणोवउत्ता य मायोवउत्ता य लोभोवउत्ता य ८। अधवा कोहोवउत्ते य माणोवउत्ते य १०, अधवा कोहोवउत्ते य माणोवउत्ता य १२, एवं असीति भंगा नेयव्वा, एवं जाव संखिज्जसमयाधिया ठिई। असंखेज्जसमयाधियाए ठिईए तप्पाउग्गुक्कोसियाए ठिईए सत्तावीसं भंगा भाणियव्वा।

**[६३]** इमीसे णं भंते! रतणप्पभाए पुढवीए तीसाए निरयावाससयसहस्सेसु एगमेगंसि निरयावासंसि नेरइयाणं केवतिया ओगाहणाठाणा पण्णत्ता? गोयमा! असंखेज्जा ओगाहणाठाणा पण्णत्ता। तं जहा-जघन्निया ओगाहणा, पदेसाहिया जहन्निया ओगाहणा, दुप्पदेसाहिया जहन्निया ओगाहणा जाव असंखिज्जपदेसाहिया जहन्निया ओगाहणा, तप्पाउग्गुक्कोसिया ओगाहणा।

इमीसे णं भंते! रतणप्पभाए पुढवीए तीसाए निरयावससयसहस्सेसु एगमेगंसि निरयावासंसि जहन्नियाए ओगाहणाए वट्टमाणा नेरतिया किं कोहोवउत्ता.? असीति भंगा भाणियव्वा जाव संखिज्जपदेसाधिया जहन्निया ओगाहणा।

असंखेज्जपदेसाहियाए जहन्नियाए ओगाहणाए वट्टमाणाणं तप्पाउग्गुक्कोसियाए ओगाहणाए वट्टमाणाणं नेरइयाणं दोसु वि सत्तावीसं भंगा।

इमीसे णं भंते! रयण. जाव एगमेगंसि निरयावासंसि नेरतियाणं कति सरीरया पण्णत्ता? गोयमा! तिण्णि सरीरया पण्णत्ता। तं जहा-वेउच्चिये तेयए कम्मए।

इमीसे णं भंते! जाव वेउच्चियसरीरे वट्टमाणा नेरतिया किं कोहोवउत्ता.? सत्तावीसं भंगा। एतेणं गमेणं तिण्णि सरीरा भाणियव्वा।

**[६४]** इमीसे णं भंते! रयणप्पभाए पुढवीए जाव नेरइयाणं सरीरगा किंसंघयणा पण्णत्ता? गोयमा! छण्हं संघयणाणं असंघयणी, नेवऽट्ठी, नेव छिरा, नेव प्हारुणि। जे पोग्गला अणिट्ठा अकंता अप्पिया असुभा अमणुण्णा अमणामा ते तेसिं सरीरसंघातताए परिणमंति।

इमीसे णं भंते! जाव छण्हं संघयणाणं असंघयणे वट्टमाणा नेरतिया किं कोहोवउत्ता ? सत्तावीसं भंगा।

इमीसे णं भंते! रयणप्पभा जाव सरीरया किंसंठिता पण्णत्ता? गोयमा! दुविधा पण्णत्ता। तं जहा-भवधारणिज्जा य उत्तरवेउच्चिया य। तत्थ णं जे ते भवधारणिज्जा ते हुंडसंठिया पण्णत्ता। तत्थ णं जे ते उत्तरवेउच्चिया ते वि हुंडसंठिया पण्णत्ता।

इमीसे णं जाव हुंडसंठाणे वट्टमाणा नेरतिया किं कोहोवउत्ता.? सत्तावीसं भंगा।

इमीसे णं भंते! रयणप्पभाए पुढवीए नेरइयाणं कति लेसाओ पण्णत्ताओ? गोयमा! एक्का काउलेसा पण्णत्ता।

इमीसे णं भंते! रयणप्पभाए जाव काउलेसाए वट्टमाणा. ? सत्तावीसं भंगा।

इमीसे णं जाव किं सम्मद्धिट्ठी मिच्छद्धिट्ठी? तिण्णि वि।

इमीसे णं जाव सम्मद्धंसणे वट्टमाणा नेरइया.? सत्तावीसं भंगा।

एवं मिच्छद्धंसणे वि।

सम्ममिच्छद्धंसणे असीति भंगा।

इमीसे णं भंते! जाव किं णाणी, अण्णाणी? गोयमा! णाणी वि, अण्णाणी वि। तिण्णि नाणाणि नियमा, तिण्णि अण्णाणाइं भयणाए।

इमीसे णं भंते! जाव आभिणिबोहियणाणे वट्टमाणा.? सत्तावीसं भंगा।

एवं तिण्णि णाणाइं, तिण्णि य अण्णाणाइं भाणियच्चाइं।

इमीसे णं जाव किं मणजोगी, वइजोगी, कायजोगी? तिण्णि वि।

इमीसे णं जाव मणजोए वट्टमाणा किं कोहोवउत्ता.? सत्तावीसं भंगा।

एवं वइजोए। एवं कायजोए।

इमीसे णं जाव नेरइया किं सागारोवयुत्ता, अणागारोवयुत्ता? गोयमा! सागारोवउत्ता वि, अणागारोवयुत्ता वि।

इमीसे णं जाव सागारोवओगे वट्टमाणा किं कोहोवउत्ता.? सत्तावीसं भंगा।

एवं अणागारोवउत्ते वि सत्तावीसं भंगा।

एवं सत वि पुढवीओ नेतच्चाओ। णाणत्तं लेसासु,

[६५] काऊ य दोसु, ततियाए मीसिया, नीलिया चउत्थीए।

पंचमियाए मीसा, कण्हा, ततो परमकण्हा ॥

[६६] चउसट्ठीए णं भंते! असुरकुमारावाससतसहस्सेसु एगमेगंसि असुरकुमारावासंसि असुरकुमाराणं केवतिया ठिइठाणा पण्णत्ता? गोयमा! असंखेज्जा ठितिठाणा पण्णत्ता। तं जहा-जहन्निया ठिई जहा नेरतिया तहा, नवरं पडिलोमा भंगा भाणियच्चा-सच्चे वि ताव होज्ज लोभोवयुत्ता, अधवा लोभोवयुत्ता य मायोवउत्ते य, अहवा लोभोवयुत्ता य मायोवयुत्ता य। एतेणं गमेणं नेतत्त्वं जाव थणियकुमारा, नवरं णाणत्तं जाणितत्त्वं।

[६७] असंखेज्जेसु णं भंते! पुढविकाइयावाससतसहस्सेसु एगमेगंसि पुढविकाइयावासंसि पुढविकाइयाणं केवतिया ठितिठाणा पण्णत्ता? गोयमा! असंखेज्जा ठितिठाणा पण्णत्ता। तं जहा-जहन्निया ठिई जाव तप्पाउग्गुक्कोसिया ठिती।

असंखेज्जेसु णं भंते! पुढविकाइयावाससतसहस्सेसु एगमेगंसि पुढविकाइयावासंसि जहन्नठितीए वट्टमाणा पुढविकाइया किं कोधोवउत्ता, माणोवयुत्ता, मायोवउत्ता, लोभोवउत्ता? गोयमा! कोहोवउत्ता वि माणोवउत्ता वि मायोवयुत्ता वि लोभोवउत्ता वि। एवं पुढविकाइयाणं सच्चेसु वि ठाणेसु अभंगयं, नवरं तेउलेस्साए असीति भंगा।

एवं आउक्काइया वि।

तेउक्काइय-वाउक्काइयाणं सच्चेसु वि ठाणेसु अभंगयं।

वणप्फतिकाइया जधा पुढविकाइया।

[६८] बेइदिय-तेइंदिय-चउरिंदियाणं जेहिं ठाणेहिं नेरतियाणं असीइ भंगा तेहिं ठाणेहिं असीइं चेव। नवरं अब्भहिया सम्मत्ते, आभिणिबोहियणाणे सुयणाणे य, एएहिं असीइ भंगा;

जेहिं ठाणेहिं नेरतियाणं सत्तावीसं भंगा तेसु ठाणेसु सच्चेसु अभंगयं।

पंचिंदियतिरिक्खजोणिया जधा नेरइया तथा भाणियच्चा, नवरं जेहिं सत्तावीसं भंगा तेहिं अभंगयं कायत्त्वं। जत्थ असीति तत्थ असीतिं चेव।

मणुस्सा वि। जेहिं ठाणेहिं नेरइयाणं असीति भंगा तेहिं ठाणेहिं मणुस्साण वि असीति भंगा भाणियव्वा। जेसु ठाणेसु सत्तावीसा तेसु अभंगयं, नवरं मणुस्साणं अब्भहियं-जहन्नियाए ठिईए आहारए य असीतिं भंगा।

वाणमंतर-जोदिस-वेमाणिया जहा भवणवासी, नवरं णाणत्तं जाणियत्वं जं जस्स; जाव अणुत्तरा।

सेवं भंते! सेवं भंते! ति।

**\*पढमे सते पंचमो उद्देशो समतो\***

**० छट्ठो उद्देशो ०**

[६९] जावतियातो णं भंते! ओवासंतरातो उदयंते सूरिए चक्खुप्फासं हव्वमागच्छति, अत्थमंते वि य णं सूरिए तावतियाओ चेव ओवासंतराओ चक्खुप्फासं हव्वमागच्छति? हंता, गोयमा! जावतियाओ णं ओवासंतराओ उदयंते सूरिए चक्खुप्फासं हव्वमागच्छति अत्थमंते वि सूरिए जाव हव्वमागच्छति।

जावतियं णं भंते! खेतं उदयंते सूरिए आतवेणं सव्वतो समंता ओभासेति उज्जोएति तवेति पभासेति अत्थमंते वि य णं सूरिए तावइयं चेव खेतं आतवेणं सव्वतो समंता ओभासेति उज्जोएति तवेति पभासेति? हंता, गोयमा! जावतियं णं खेतं जाव पभासेति।

तं भंते! किं पुट्ठं ओभासेति अपुट्ठं ओभासेति? जाव छद्दिसिं ओभासेति।

एवं उज्जोवेदि? तेवेति? पभासेति? जाव नियमा छद्दिसिं।

से नूणं भंते! सव्वंति सव्वावंति फुसमाणकालसमयंसि जावतियं खेतं फुसइ तावतियं फुसमाणे पुट्ठे ति वत्तव्वं सिया?

हंता, गोयमा! सव्वंति जाव वत्तव्वं सिया।

तं भंते! किं पुट्ठं फुसति अपुट्ठं फुसइ? जाव नियमा छद्दिसिं।

[७०] लोअंते भंते! अलोअंतं फुसति? अलोअंते वि लोअंतं फुसति? हंता, गोयमा! लोगंतं अलोगंतं फुसति, अलोगंतं वि लोगंतं फुसति।

तं भंते! किं पुट्ठं फुसति अपुट्ठं फुसति? जाव नियमा छद्दिसिं फुसति।

दीवंते भंते! सागरंतं फुसति? सागरंते वि दीवंतं फुसति? हंता, जाव नियमा छद्दिसिं फुसति।

एवं एतेणं अभिलावेणं उदयंते पोदंतं, छिद्धंते दूसंतं, छांयंते आतवंतं? जाव नियमा छद्दिसिं फुसति।

[७१] अत्थि णं भंते! जीवाणं पाणातिवातेणं किरिया कज्जति? हंता, अत्थि।

सा भंते! किं पुट्ठा कज्जति? अपुट्ठा कज्जति? जाव निव्वाघातेणं छद्दिसिं, वाघातं पडुच्च सिय तिदिसिं, सिय चउदिसिं, सिय पंचदिसिं।

सा भंते! किं कडा कज्जति? अकडा कज्जति? गोयमा! कडा कज्जति, नो अकडा कज्जति।

सा भंते! किं अत्तकडा कज्जति? परकडा कज्जति? तदुभयकडा कज्जति? गोयमा! अत्तकडा अभंगयं कायव्वं। जत्थ असीति तत्थ असीतिं चेव।

सा भंते! किं आणुपुव्विकडा कज्जति? अणाणुपुव्विकडा कज्जति? गोयमा! आणुपुव्विकडा कज्जति, नो अणाणुपुव्विकडा कज्जति। जा य कडा, जा य कज्जति, जा य कज्जिस्सति सव्वा सा आणुपुव्विकडा; नो अणाणुपुव्विकड ति वत्तव्वं सिया।

अत्थि णं भंते! नेरइयाणं पाणातिवायकिरिया कज्जति? हंता, अत्थि।

सा भंते! किं पुट्ठा कज्जति? अपुट्ठा कज्जति? जाव नियमा छद्दिसिं कज्जति।

सा भंते! किं कडा कज्जति? अकडा कज्जति? तं चेव जाव नो अणाणुपुव्विकड ति वत्तव्वं सिया।

जथा नेरइया तथा एगिंदियवज्जा भाणितव्वा जाव वेमाणिया।

एकिंदिया जथा जीवा तथा भाणियव्वा।

जहा पाणादिवाते तथा मुसावेदे तथा अदिन्नादाणे मेहुणे परिग्गहे कोहे जाव मिच्छादंसण-सल्ले एवं एते अट्ठारस, चउवीसं दंडगा भाणियव्वा। सेवं भंते! सेवं भंते! ति भगवं गोतमे समणं भगवं जाव विहरति।

**[७२]** तेणं कालेणं तेणं समएणं समणस्स भगवतो महावीरस्स अंतेवासी रोहे नामं अणगारे पगतिभद्दए पगतिमउए पगतिविणीते पगतिउवसंते पगतिपतणुकोह-माण-माय-लोभे मिदुमद्दवसंपन्ने अल्लीणे भद्दए विणीए समणस्स भगवतो महावीरस्स अदूरसामंते उड्ढंजाणू अहोसिरे झाणकोट्ठोवगते संजमेणं तवसा अप्पाणं भावेमाणे विहरति। तए णं से रोहे नामं अणगारे जातसड्ढे जाव पज्जुवासमाणे एवं वदासी-

पुव्विं भंते! लोए? पच्छा अलोए? पुव्विं अलोए? पच्छा लोए? रोहा! लोए य अलोए य पुव्विं पेते, पच्छा पेते, दो वि ते सासता भावा, अणाणुपुव्वी एसा रोहा!।

पुव्विं भंते! जीवा? पच्छा अजीवा? पुव्विं अजीवा? पच्छा जीवा? जहेव लोए य अलोए य तहेव जीवा य अजीवा य।

एवं भवसिद्धिया य अभवसिद्धिया य, सिद्धी असिद्धी, सिद्धा असिद्धा।

पुव्विं भंते! अंडए? पच्छा कुक्कुडी? पुव्विं कुक्कुडी? पच्छा अंडए? रोहा! से णं अंडए कतो? भगवं! तं कुक्कुडीतो, सा णं कुक्कुडी कतो? भंते! अंडगातो। एवामेव रोहा! से य अंडए सा य कुक्कुडी, पुव्विं पेते, पच्छा पेते, दो वेते सासता भावा, अणाणुपुव्वी एसा रोहा!।

पुव्विं भंते! लोअंते? पच्छा अलोयंते? पुव्वं अलोअंते? पच्छा लोअंते? रोहा! लोअंते य अलोअंते य जाव अणाणुपुव्वी एसा रोहा!।

पुव्विं भंते! लोअंते? पच्छा सत्तमे ओवासंतरे? पुच्छा। रोहा! लोअंते य सत्तमे य ओवासंतरे पुव्विं पेते जाव अणाणुपुव्वी एसा रोहा!।

एवं लोअंते य सत्तमे य तणुवाते। एवं घणवाते, घणोदही, सत्तमा पुढवी।

एवं लोअंते एक्केक्केणं संजोएतव्वे इमेहिं ठाणोहिं, तं जहा -

**[७३]** ओवास वात घण उदही पुढवी दीवा य सागरा वासा।

नेरइयादी अत्थिय समया कम्मइं लेस्साओ ।।

**[७४]** दिट्ठी दंसण णाणा सण्ण सरीरा य जोग उवओगे।

दव्व पदेसा पज्जव अद्धा, किं पुव्वि लोयंते? ॥

[७५] पुव्विं भंते! लोयंते पच्छा सव्वद्धा? .।

जहा लोयंतेणं संजोइया सव्वे ठाणा एते, एवं अलोयंतेण वि संजोएतव्वा सव्वे।

पुव्विं भंते! सत्तमे ओवासंतरे? पच्छा सत्तमे तणुवाते? एवं सत्तमं ओवासंतरं सव्वेहिं समं संजोएतव्वं जाव सव्वद्धाए।

पुव्विं भंते! सत्तमे तणुवाते? पच्छा सत्तमे घणवाते? एयं पि तहेव नेतव्वं जाव सव्वद्धा।

एवं उवरिल्लं एक्केक्कं संजोयंतेणं जो जो हेट्ठिल्लो तं तं छड्डेतेणं नेयव्वं जाव अतीत-अणागतद्धा पच्छा सव्वद्धा जाव अणाणुपुव्वी एसा रोहा!। सेवं भंते! सेवं भंते ति! जाव विहरति।

[७६] भंते ति भगवं गोतमे समणं जाव एवं वदासिकतिविहा णं भंते! लोयट्ठिती पण्णत्ता? गोयमा! अट्ठविहा लोयट्ठिती पण्णत्ता। तं जहा- आगासपतिट्ठिते वाते, वातपतिट्ठिते उदही , उदहिपति-ट्ठिता पुढवी, पुढविपतिट्ठिता तस-थावरा पाणा, अजीवा जीवपतिट्ठित, जीवा कम्मपतिट्ठिता, अजीवा जीवसंगहिता , जीवा कम्मसंगहिता ।

से केणट्ठेणं भंते! एवं वुच्चति अट्ठविहा जाव जीवा कम्मसंगहिता? गोयमा! से जहानामए केइ पुरिसे वत्थिमाडोवेति, वत्थिमाडोवित्ता उप्पिं सितं बंधति, बंधिता मज्झे णं गंठिं बंधति, मज्झे गंठिं बंधिता उवरिल्लं गंठिं मुयति, मुइत्ता उवरिल्लं देसं वामेति, उवरिल्लं देसं वामेत्ता उवरिल्लं देसं आउयायस्स पूरेति, पूरित्ता उप्पिं सितं बंधति, बंधिता मज्झिल्लं गंठिं मुयति। से नूणं गोतमा! से आउयाए तस्स वाउयायस्स उप्पिं उवरितले चिट्ठति? हंता, चिट्ठति। से तेणट्ठेणं जाव जीवा कम्मसंगहिता।

से जहा वा केइ पुरिसे वत्थिमाडोवेति, आडोवित्ता कडीए बंधति, बंधिता अत्थाहमतारमपोरुसियंसि उदगंसि ओगाहेज्जा। से नूणं गोतमा! से पुरिसे तस्स आउयायस्स उवरिमतले चिट्ठति? हंता, चिट्ठति। एवं वा अट्ठविहा लोयट्ठिती पण्णत्ता जाव जीवा कम्मसंगहिता।

[७७] अत्थि णं भंते! जीवा य पोग्गला य अन्नमन्नबद्धा अन्नमन्नपुट्ठा अन्नमन्न-मोगाढा अन्नमन्नसिणेहपडिबद्धा अन्नमन्नघडत्ताए चिट्ठति? हंता, अत्थि।

से केणट्ठेणं भंते! जाव चिट्ठति? गोयमा! से जहानामए हरदे सिया पुण्णे पुण्णप्पमाणे वोलट्टमाणे वोसट्टमाणे समभरघडत्ताए चिट्ठति, अहे णं केइ पुरिसे तंसि हरदंसि एगं महं नावं सदासवं सतच्छिड्डं ओगाहेज्जा। से नूणं गोतमा! सा णावा तेहिं आसवद्वारेहिं आपूरमाणी आपूरमाणी पुण्णा पुण्णप्पमाणा वोलट्टमाणा वोसट्टमाणा समभरघडत्ताए चिट्ठति? हंता, चिट्ठति। से तेणट्ठेणं गोयमा! अत्थि णं जीवा य जाव चिट्ठति।

[७८] अत्थि णं भंते! सदा समितं सुहुमे सिणेहकाये पवडति? हंता, अत्थि।

से भंते! किं उड्ढे पवडति, अहे पवडति तिरिए पवडति? गोतमा! उड्ढे वि पवडति, अहे वि पवडति, तिरिए वि पवडति।

जहा से बादरे आउकाए अन्नमन्नसमाउत्ते चिरं पि दीहकालं चिट्ठति तथा णं से वि? नो इणट्ठे समट्ठे, से णं खिप्पामेव विद्धंसमागच्छति।

सेवं भंते! सेवं भंते! ति! .।

**\*पढमे सते छट्ठो उद्देशो समतो\***

## ० सतमो उद्देशो ०

[७९] नेरइए णं भंते! नेरइएसु उववज्जमाणे किं देसेणंदेसं उववज्जति, देसेणं सत्वं उववज्जति, सत्वेणंदेसं उववज्जति, सत्वेणंसत्वं उववज्जति ? गोयमा! नो देसेणंदेसं उववज्जति, नो देसेणं सत्वं उववज्जति, नो सत्वेणंदेसं उववज्जति, सत्वेणंसत्वं उववज्जति।

जहा नेरइए एवं जाव वेमाणिए ।

[८०] नेरइए णं भंते! नेरइएसु उववज्जमाणे किं देसेणंदेसं आहारेति, देसेणंसत्वं आहारेति, सत्वेणंदेसं आहारेति, सत्वेणंसत्वं आहारेति ? गोयमा! नो देसेणंदेसं आहारेति, नो देसेणंसत्वं आहारेति, सत्वेण वा देसं आहारेति, सत्वेण वा सत्वं आहारेति।

एवं जाव वेमाणिए ।

नेरइए णं भंते! नेरइएहितो उव्वट्टमाणे किं देसेणंदेसं उव्वट्टति? जहा उववज्जमाणे तहेव उव्वट्टमाणे वि दंडगो भाणित्वो ।

नेरइए णं भंते! नेरइएहितो उव्वट्टमाणे किं देसेणंदेसं आहारेति? तहेव जाव सत्वेण वा देसं आहारेति, सत्वेण वा सत्वं आहारेति।

एवं जाव वेमाणिए ।

नेरइए णं भंते! नेरइएसु उववन्ने किं देसेणंदेसं उववन्ने? एसो वि तहेव जाव सत्वेणंसत्वं उववन्ने।

जहा उववज्जमाणे उव्वट्टमाणे य चत्तारि दंडगा तहा उववन्नेणं उव्वट्टेण वि चत्तारि दंडगा भाणियत्वा। सत्वेणंसत्वं उववन्ने; सत्वेण वा देसं आहारेति, सत्वेण वा सत्वं आहारेति, एएणं अभिलावेणं उववन्ने वि, उव्वट्टे वि नेयत्वं ।

नेरइए णं भंते! नेरइएसु उववज्जमाणे किं अद्धेणंअद्धं उववज्जति ? अद्धेणंसत्वं उववज्जति ? सत्वेणंसत्वं उववज्जइ ? सत्वेणंसत्वं उववज्जति ? जहा पढमिल्लेणं अट्ठ दंडगा तहा अद्धेण वि अट्ठ दंडगा भाणित्वो। नवरं जहिं देसेणंदेसं उववज्जति तहिं अद्धेणंसत्वं उवज्जावेयवत्वं, एयं णाणत्तं। एते सत्वे वि सोलस दंडगा भाणियत्वा।

[८१] जीवे णं भंते! किं विग्गहगतिसमावन्नए? अविग्गहगतिसमावन्नए? गोयमा! सिय विग्गहगतिसमावन्नए, सिय अविग्गहगतिसमावन्नगे।

एवं जाव वेमाणिए।

जीवा णं भंते! किं विग्गहगतिसमावन्नगा? अविग्गहगतिसमावन्नगा? गोयमा! विग्गहगति समावन्नगा वि, अविग्गहगतिसमावन्नगा वि।

नेरइया णं भंते! किं विग्गहगतिसमावन्नगा? अविग्गहगतिसमावन्नगा? गोयमा! सत्वे वि ताव होज्जा अविग्गहगतिसमावन्नगा, अहवा अविग्गहगतिसमावन्नगा य विग्गहगतिसमावन्नगे य, अहवा अविग्गहगतिसमावन्नगा य विग्गहगतिसमावन्नगा य । एवं जीव-एगिंदियवज्जो तियभंगो।

[८२] देवे णं भंते! महिड्ढिए महज्जुतीए महब्बले महायसे महेसक्खे महाणुभावे अविउक्कंतियं चयमाणे किंचि वि कालं हिरिवत्तियं दुगुंछावत्तियं परिस्सहवत्तियं आहारं नो आहारेति; अहे णं

आहारेति, आहारिज्जमाणे आहारिए, परिणामिज्जमाणे परिणामिए, पहीणे य आउए भवइ, जत्थ उववज्जति तमाउयं पडिसंवेदेति, तं जहा-तिरिक्खजोणियाउयं वा मणुस्साउयं वा? हंता, गोयमा! देवे णं महिड्डीए जाव मणुस्साउगं वा।

**[८३]** जीवे णं भंते! गब्भं वक्कममाणे किं सइंदिए वक्कमति, अणिंदिए वक्कमति? गोयमा! सिय सइंदिए वक्कमइ, सिय अणिंदिए वक्कमइ। से केणट्ठेणं? गोयमा! दव्विंदियाइं पडुच्च अणिंदिए वक्कमति, भाविंदियाइं पडुच्च सइंदिए वक्कमति, से तेणट्ठेणं०।

जीवे णं भंते! गब्भं वक्कममाणे किं ससरीरी वक्कमइ? असरीरी वक्कमइ? गोयमा! सिय ससरीरी वक्कमति, सिय असरीरी वक्कमति। से केणट्ठेणं? गोयमा! ओरालिए-वेउव्विय-आहारयाइं पडुच्च असरीरी वक्कमति, तेया-कम्माइं पडुच्च ससरीरी वक्कमति; से तेणट्ठेणं गोयमा!०।

जीवे णं भंते! गब्भं वक्कममाणे तप्पढमताए किमाहारमाहारेति? गोयमा! माउओयं पिउसुककं तं तदुभयसंसिट्ठं कलुसं किव्विसं तप्पढमताए आहारमाहारेति।

जीवे णं भंते! गब्भगए समाणे किमाहारमाहारेति? गोयमा! जं से माता नाणाविहाओ रसविगतीओ आहारमाहारेति तदेक्कदेसेणं ओयमाहारेति।

जीवस्स णं भंते! गब्भगतस्स समाणस्स अत्थि उच्चारे इ वा पासवणे इ वा खेले इ वा सिंघाणे इ वा वंते इ वा पिते इ वा? णो इणट्ठे समट्ठे। से केणट्ठेणं? गोयमा! जीवे णं गब्भगए समाणे जमाहारेति तं चिणाइ तं सोतिंदियत्ताए जाव फासिंदियत्ताए अट्ठि-अट्ठिमिंज-केस-मंसु-रोम-नहत्ताए, से तेणट्ठेणं०।

जीवे णं भंते! गब्भगते समाणे पभू मुहेणं कावलियं आहारं आहारित्तए? गोयमा! णो इणट्ठे समट्ठे। से केणट्ठेणं? गोयमा! जीवे णं गब्भगते समाणे सव्वतो आहारेति, सव्वतो परिणामेति, सव्वतो उस्ससति, सव्वतो निस्ससति, अभिक्खणं आहारेति, सव्वतो परिणामेति, सव्वतो उस्ससति, सव्वतो निस्ससति, अभिक्खणं आहारेति, अभिक्खणं परिणामेति, अभिक्खणं उस्ससति, आहच्च नीससति। मातुजीवरसहरणी पुत्तजीवरसहरणी मातुजीवपडिबद्धा पुत्तजीवं फुडा तम्हा आहारेइ, तम्हा परिणामेति, अवरा वि य णं पुत्तजीवपडिबद्धा माउजीवफुडा तम्हा चिणाति, तम्हा उचिणाति; से तेणट्ठेणं. जाव नो पभू मुहेणं कावलिकं आहारं आहारित्तए।

कति णं भंते! मातिअंगा पण्णत्ता? गोयमा! तओ मातियंगा पण्णत्ता। तं जहा-मंसे सोणिते मत्थुलुंगे।

कति णं भंते! पितियंगा पण्णत्ता? गोयमा! तओ पेतियंगा पण्णत्ता। तं जहा-अट्ठि अट्ठिमिंजा केस-मंसु-रोम-नहे।

अम्मापेतिए णं भंते! सरीरए केवइयं कालं संचिट्ठति? गोयमा! जावतियं से कालं भवधारणिज्जे सरीरए अच्चावन्ने भवति एवतियं कालं संचिट्ठति, अहे णं समए समए वोक्कसिज्जमाणे २ चरमकालसमयंसि वोच्छिन्ने भवइ।

**[८४]** जीवे णं भंते! गब्भगते समाणे नेरइएसु उववज्जेज्जा? गोयमा! अत्थेगइए उववज्जेज्जा, अत्थेगइए नो उववज्जेज्जा।

से केणट्ठेणं? गोयमा! से णं सन्नी पंचिंदिए सव्वाहिं पज्जतीहिं पज्जत्तए वीरियलद्धीए

वेडव्वियलद्धीए पराणीयं आगयं सोच्चा निसम्म पदेसे निच्छुभति, वेडव्विसमुग्घाएणं समोहण्णइ, वेडव्वियसमुग्घाएणं समोहण्णिता चाउरंगिणिं सेणं विडव्वइ, चाउरंगिणिं सेणं विडव्वेता चाउरंगिणीए सेणाए पराणीएणं सद्धिं संगामं संगामेइ, से णं जीवे अत्थकामए रज्जकामए रज्जकामए भोगकामए कामकामए, अत्थकंखिए रज्जकंखिए भोगकंखिए कामकंखिए, अत्थपिवासिते रज्जपिवासिते भोगपिवासिए कामपिवासिते, तच्चित्ते तम्मणे तल्लेसे तदज्झवसिए तत्तिव्वज्झवसाणे तदट्ठोवउत्ते तदप्पितकरणे तद्भावणाभाविते एतंसि णं अंतरंसि कालं करेज्ज नेरतिएसु उववज्जइ; से तेणट्ठेणं गोयमा! जाव अत्थेगइए उववज्जेज्जा, अत्थेगइए नो उववज्जेज्जा।

जीवे णं भंते! गब्भगते समाणे देवलोगेसु उववज्जेज्जा? गोयमा! अत्थेगइए उववज्जेज्जा, अत्थेगइए नो उववज्जेज्जा। से केणट्ठेणं? गोयमा! से णं सन्नी पंचिंदिए सव्वाहिं पज्जतीहिं पज्जतए तहारूवस्स समणस्स वा माहणस्स वा अंतिए एगमवि आरियं धम्मियं सुवयणं सोच्चा निसम्म ततो भवति संवेगजातसइडे तिव्वधम्ममाणुरागरते, से णं जीवे धम्मकामए पुण्णकामए सग्गकामए मोक्खकामए, धम्मकंखिए पुण्णकंखिए सग्गकंखिए मोक्खकंखिए, धम्मपिवासिए पुण्णपिवासिए सग्गपिवासिए मोक्खपिवासिए, तच्चित्ते तम्मणे तल्लेसे तदज्झवसिते तत्तिव्वज्झवसाणे तदट्ठोवउत्ते तदप्पितकरणे तद्भावणाभाविते एयंसि णं अंतरंसि कालं करेज्ज देवलोगेसु उववज्जति; से तेणट्ठेणं गोयमा!।

जीवे णं भंते! गब्भगए समाणे उताणए वा पासिल्लए वा अंबखुज्जए वा अच्छेज्ज वा चिट्ठएज्ज वा निसीएज्ज वा तुयट्ठेज्ज वा, मातूए सुवमाणीए सुवति, जागरमाणीए जागरति, सुहियाए सुहिते भवइ, दुहियाए दुहिए भवति? हंता, गोयमा! जीवे णं गब्भगए समाणे जाव दुहियाए दुहिए भवति।

अहे णं पसवणकालसमयंसि सीसेण वा पाएहिं वा आगच्छति सममागच्छइ तिरियमागच्छति विणिहायमावज्जति। वण्णवज्झाणि य से कम्माइं बद्धाइं पुट्ठाइं निहताइं कडाइं पट्ठविताइं अभिनिविट्ठाइं अभिसमन्नागयाइं उदिण्णाइं, नो उवसंताइं भवंति; तओ भवइ दुरूवे दुव्वण्णे दुग्गंधे दूरसे दुप्फासे अणिट्ठए अकंते अप्पिए असुभे अमणुण्णे अमणामे हीणस्सरे दीणस्सरे अणिट्ठस्सरे अकंतस्सरे अप्पियस्सरे असुभस्सरे अमणुण्णस्सरे अमणामस्सरे अणादेज्जवयणे पच्चायाए याऽवि भवति। वण्णवज्झाणि य से कम्माइं नो बद्धाइं. पसत्थं नेतव्वं जाव आदेज्जवयणे पच्चायाए याऽवि भवति।

सेवं भंते! सेवं भंते! ति. ।

**\*पढमे सते सतमो उद्देशो समतो\***

## ० अट्ठमो उद्देशो ०

[८५] रायगिहे समोसरणं जाव एवं वयासी- एगंतबाले णं भंते! मणुस्से किं नेरइयाउयं पकरेति? तिरिक्खाउयं पकरेति? मणुस्साउयं पकरेति? नेरइयाउयं किच्चा नेरइएसु उववज्जति? तिरियाउयं किच्चा तिरिएसु उववज्जइ? मणुस्साउयं किच्चा मणुस्सेसु उववज्जइ? देवाउयं किच्चा देवलोगेसु उववज्जति?

गोयमा! एगंतबाले णं मणुस्से नेरइयाउयं पि पकरेइ, तिरियाउयं पि पकरेइ, मणुयाउयं पि पकरेइ, देवाउयं पि पकरेइ; नेरइयाउयं पि किच्चा नेरइएसु उववज्जति, तिरियाउयं पि किच्चा तिरिएसु उववज्जति, मणुस्साउयं पि किच्चा मणुस्सेसु उववज्जति, देवाउयं पि किच्चा देवेसु उववज्जति।

[८६] एगंतपंडिए णं भंते! मणुस्से किं नेरइयाउयं पकरेइ? जाव देवाउयं किच्चा देवलोएसु उववज्जति? गोयमा! एगंतपंडिए णं मणुस्से आउयं सिय पकरेति, सिय नो पकरेति। जइ पकरेइ नो नेरइयाउयं पकरेइ, नो तिरियाउयं पकरेइ, नो मणुस्साउयं पकरेइ, देवाउयं पकरेइ। नो नेरइयाउयं किच्चा नेरइएसु उववज्जइ, णो तिरि०, णो मणुस्सा., देवाउयं किच्चा देवेसु उववज्जति।

से केणट्ठेणं जाव देवाउयं किच्चा देवेसु उववज्जति? गोयमा! एगंतपंडितस्स णं मणुस्सस्स केवलमेव दो गतीओ पन्नायंति, तं जहा-अंतकिरिया चेव, कप्पोववत्तिया चेव। से तेणट्ठेणं गोतमा! जाव देवाउयं किच्चा देवेसु उववज्जति।

बालपंडिते णं भंते! मणुस्से किं नेरइताउदं पकरेति जाव देवाउयं किच्चा देवेसु उववज्जति? गोयमा! नो नेरइयाउयं पकरेति जाव देवाउयं किच्चा देवेसु उववज्जति। से केणट्ठेणं जाव देवाउयं किच्चा देवेसु उववज्जति? गोयमा! बालपंडिए णं मणुस्से तहारूवस्स समणस्स वा माहणस्स वा अंतिए एगमवि आरियं धम्मियं सुवयणं सोच्चा निसम्म देसं उवरमति, देसं नो उवरमइ, देसं पच्चक्खाति, देसं णो पच्चक्खाति; से णं तेणं देसोवरम-देसपच्चक्खाणेणं नो नेरइयाउयं पकरेति जाव देवाउयं किच्चा देवेसु उववज्जति। से तेणट्ठेणं जाव देवेसु उववज्जइ।

[८७] पुरिसे णं भंते! कच्छंसि वा, दहंसि वा, उदगंसि वा, दवियंसि वा, वलयंसि वा, नूमंसि वा, गहणंसि वा, गहणविदुग्गंसि वा, पव्वतंसि वा, पव्वतविदुग्गंसि वा, वणंसि वा, वणविदुग्गंसि वा, मियवितीए मियसंकप्पे मियपणिहाणे मियवहाए गंता 'एते मिए' ति काउं अन्नयरस्स मियस्स वहाए कूड-पासं उद्दाइ; ततो णं भंते! से पुरिसे कतिकिरिए? गोयमा! जावं च णं से पुरिसे कच्छंसि वा, जाव कूड-पासं उद्दाइ तावं च णं से पुरिसे सिय तिकिरिए, सिय चउकिरिए, सिय पंचकिरिए।

से केणट्ठेणं भंते! एवं वुच्चति 'सिय तिकिरिए, सिय चउकिरिए, सिय पंचकिरिए'? गोयमा! जे भविए उद्वणयाए, णो बंधणयाए, णो मारणयाए, तावं च णं से पुरिसे काइयाए अहिगरणियाए पादोसियाए तीहिं किरियाहिं पुट्ठे। जे भविए उद्वणयाए वि बंधणयाए वि, णो मारणयाए तावं च णं से पुरिसे काइयाए अहिगरणियाए पाओसियाए पारियावणियाए चउहिं किरियाहिं पुट्ठे। जे भविए उद्वणयाए वि बंधणयाए वि मारणयाए वि तावं च णं से पुरिसे काइयाए जाव पाणातिवातकिरियाए पंचहिं किरियाहिं पुट्ठे। से तेणट्ठेणं जाव पंचकिरिए।

[८८] पुरिसे णं भंते! कच्छंसि वा जाव वणविदुग्गंसि वा तणाइं ऊसविय ऊसविय अगणिकायं निसिरइ तावं च णं भंते! से पुरिसे कतिकिरिए? गोयमा! सिय तिकिरिए सिय चउकिरिए सिय पंचकिरिए। से केणट्ठेणं? गोतमा! जे भविए उस्सवणयाए तिहिं; उस्सवणयाए वि निसिरणयाए वि, नो दहणयाए चउहिं; जे भविए उस्सवणयाए वि निसिरणयाए वि दहणयाए वि तावं च णं से पुरिसे काइयाए जाव पंचहिं किरियाहिं पुट्ठे। से तेणट्ठेणं गोयमा!०।

[८९] पुरिसे णं भंते! कच्छंसि वा जाव वणविदुग्गंसि वा मियवितीए मियसंकप्पे मियपणिहाणे मियवहाए गंता 'एए मिये' ति काउं अन्नयरस्स मियस्स वहाए उसुं निसिरइ, ततो णं भंते! से पुरिसे कतिकिरिए? गोयमा! सिय तिकिरिए, सिय चउकिरिए, सिय पंचकिरिए। से केणट्ठेणं? गोयमा! जे भविए निसिरणयाए तिहिं; जे भविए निसिरणयाए वि विद्वंसणयाए वि, नो मारणयाए चउहिं; जे भविए निसिरणयाए वि विद्वंसणयाए वि मारणयाए वि तावं च णं से पुरिसे जाव पंचहिं किरियाहिं पुट्ठे। से

तेणट्ठेणं गोयमा! सिय तिकिरिए, सिय चउकिए, सिय पंचकिए।

[९०] पुरिसे णं भंते! कच्छंसि वा जाव अन्नयरस्स मियस्स वहाए आयतकण्णायतं उंसुं आयामेत्ता चिट्ठिज्जा, अन्ने य से पुरिसे मग्गतो आगम्म सयपाणिणा असिणा सीसं छिंदेज्जा, से य उस्स ताए चेव पुव्वायामणयाए तं मियं विंधेज्जा, से णं भंते! पुरिसे किं मियवेरेणं पुट्ठे? पुरिसवेरेणं पुट्ठे? गोतमा! जे मियं मारेति से मियवेरेणं पुट्ठे, जे पुरिसं मारेइ से पुरिसवेरेणं पुट्ठे। से केणट्ठेणं भंते! एवं वुच्चइ जाव से पुरिसवेरेणं पुट्ठे? से नूणं गोयमा! कज्जमाणे कडे, संधिज्जमाणे संधिते, निव्वत्तिज्जमाणे निव्वत्तिए, निसिरिज्जमाणे निसट्ठे ति वत्तव्वं सिया? हंता, भगवं! कज्जमाणे कडे जाव निसट्ठे ति वत्तव्वं सिया। से तेणट्ठेणं गोयमा! जे मियं मारेति से मियवेरेणं पुट्ठे, जे पुरिसं मारेइ से पुरिसवेरेणं पुट्ठे। अंतो छण्हं मासाणं मरइ काइयाए जाव पंचहिं किरियाहिं पुट्ठे, बाहिं छण्हं मासाणं मरति काइयाए जाव पारितावणियाए चउहिं किरियाहिं पुट्ठे।

[९१] पुरिसे णं भंते! पुरिसं सतीए समभिधंसेज्जा, सयपाणिणा वा से असिणा सीसं छिंदेज्जा, ततो णं भंते! से पुरिसे कतिकिए? गोयमा! जावं च णं से पुरिसे तं पुरिसं सतीए समभिधंसेइ सयपाणिणा वा से असिणा सीसं छिंदइ तावं च णं से पुरिसे काइयाए अहिगरणि. जाव पाणातिवायकिए पंचहिं किरियाहिं पुट्ठे, आसन्नवहण्ण य अणवकंखणवत्तिएणं पुरिसवेरेणं पुट्ठे।

[९२] दो भंते! पुरिसा सरिसया सरित्तया सरिच्चया सरिसभंडमतोवगरणा अन्नमन्नेणं सद्धिं संगामं संगामेति, तत्थ णं एगे पुरिसे पराइणइ एगे पुरिसे पराइज्जइ, से कहमेयं भंते! एवं? गोतमा! सवीरिए परायिणति, अवीरिए पराइज्जति। से केणट्ठेणं जाव पराइज्जति? गोयमा! जस्स णं वीरियवज्जाइं कम्माइं नो बद्धाइं नो पुट्ठाइं जाव नो अभिसमन्नागताइं, नो उदिण्णाइं, उवसंताइं भवंति से णं परायिणति; जस्स णं वीरियवज्जाइं कम्माइं बद्धाइं जाव उदिण्णाइं, नो उवसंताइं भवंति से णं पुरिसे परायिज्जति। से तेणट्ठेणं गोयमा! एवं वुच्चइ सवीरिए पराजिणइ, अवीरिए पराइज्जति।

[९३] जीवा णं भंते! किं सवीरिया? अवीरिया? गोयमा! सवीरिया वि, अवीरिया वि। से केणट्ठेणं? गोयमा! जीवा दुविहा पण्णत्ता; तं जहासंसारसमावन्नगा य, असंसारसमावन्नगा य। तत्थ णं जे ते असंसारसमावन्नगा ते णं सिद्धा, सिद्धा णं अवीरिया। तत्थ णं जे ते संसारसमावन्नगा ते दुविहा पण्णत्ता; तं जहा-सेलेसिपडिवन्नगा य, असेलेसिपडिवन्नगा य। तत्थ णं जे ते सेलेसिपडिवन्नगा ते णं लद्धिवीरिएणं सवीरिया, करणवीरिएणं अवीरिया। तत्थ णं जे ते असेलेसिपडिवन्नगा ते णं लद्धिवीरिएणं सवीरिया, करणवीरिएणं सवीरिया वि अवीरिया वि। से तेणट्ठेणं गोयमा! एवं वुच्चति जीवा दुविहा पण्णत्ता; तं जहा-सवीरिया वि, अवीरिया वि।

नेरइया णं भंते! किं सवीरिया? अवीरिया? गोयमा! नेरइया लद्धिवीरिएणं सवीरिया, करणवीरिएणं सवीरिया वि अवीरिया वि। से केणट्ठेणं? गोयमा! जेसि णं नेरइयाणं अत्थि उट्ठाणे कम्ममे बले वीरिए पुरिसक्कारपरक्कमे ते णं नेरइया लद्धिवीरिएणं वि सवीरिया, करणवीरिएणं वि सवीरिया, जेसि णं नेरइयाणं नत्थि उट्ठाणे जाव परक्कमे ते णं नेरइया लद्धिवीरिएणं सवीरिया, करणवीरिएणं अवीरिया। से तेणट्ठेणं.०।

जहा नेरइया एवं जाव पंचिंदियतिरिक्खजोणिया।

मणुस्सा जहा ओहिया जीवा। नवरं सिद्धवज्जा भाणियत्वा।

वाणमंतर-जोतिस-वेमाणिया जहा नेरइया।  
सेवं भंते! सेवं भंते! ति. ।

**\*पढम सए अट्ठमो उद्देशो समतो\***

### ० नवमो उद्देशो ०

[१४] कहं णं भंते! जीवा गरुयत्तं हव्वमागच्छंति? गोयमा! पाणातिवातेणं मुसावादेणं अदिण्णा. मेहुण. परिग्ग. कोह. माण. माया. लोभ. पेज्ज. दोस. कलह. अब्भक्खाण. पेसुन्न. रति-अरति. परपरिवाय. मायामोस. मिच्छादंसणसल्लेणं, एवं खलु गोयमा! जीव गरुयत्तं हव्वमागच्छंति।

कहं णं भंते! जीवा लहुयत्तं हव्वमागच्छंति? गोयमा! पाणातिवातेणं जाव मिच्छादंसणसल्लेणं, एवं खलु गोयमा! जीवा लहुयत्तं हव्वमागच्छंति।

एवं आकुलीकरंति, एवं परितीकरंति। एवं दीहीकरंति, एवं ह्स्सीकरंति। एवं अणुपरियट्ठंति, एवं वीतीवयंति। पसत्था चत्तारि। अप्पसत्था चत्तारि।

[१५] सत्तमे णं भंते! ओवासंतरे किं गरुए, लहुए, गरुयलहुए, अगरुयलहुए? गोयमा! नो गरुए, नो लहुए, नो गरुयलहुए, अगरुयलहुए।

सत्तमे णं भंते! तणुवाते किं गरुए, लहुए, गरुयलहुए, अगरुयलहुए? गोयमा! नो गरुए, नो लहुए, गरुयलहुए, नो अगरुयलहुए।

एवं सत्तमे घणवाए, सत्तमे घणोदही, सत्तमा पुढवी।

ओवासंतराइं सव्वाइं जहा सत्तमे ओवासंतरे ।

[सेसा] जहा तणुवाए। एवं-ओवास वाय घणउदहि पुढवी दीवा य सागरा वासा।

नेरइया णं भंते! किं गरुया जाव अगरुयलहुया? गोयमा! नो गरुया, नो लहुया, गरुयलहुया वि, अगरुयलहुया वि। से केणट्ठेणं? गोयमा! वेउच्चिय-तेयाइं पडुच्च नो गरुया, नो लहुया, गरुयलहुया, नो अगरुयलहुया। जीवं च कम्मणं च पडुच्च नो गरुया, नो लहुया, नो गरुयलहुया, अगरुयलहुया। से तेणट्ठेणं।

एवं जाव वेमाणिया। नवरं णाणत्तं जाणियत्वं सरीरेहिं।

धम्मत्थिकाये जाव जीवत्थिकाये चउत्थपदेणं।

पोग्गलत्थिकाए णं भंते! किं गरुए, लहुए, गरुयलहुए, अगरुयलहुए? गोयमा! णो गरुए, नो लहुए, गरुयलहुए वि, अगरुयलहुए वि। से केणट्ठेणं? गोयमा! गरुयलहुयदव्वाइं पडुच्च नो गरुए, नो लहुए, गरुयलहुए, नो अगरुयलहुए। अगरुयलहुयदव्वाइं पडुच्च नो गरुए, नो लहुए, नो गरुयलहुए, अगरुयलहुए।

समया कम्माणि य चउत्थपदेणं।

कणह्लेसा णं भंते! किं गरुया, जाव अगरुयलहुया? गोयमा! नो गरुया, नो लहुया, गरुयलहुया वि, अगरुयलहुया वि। से केणट्ठेणं? गोयमा! दव्वलेसं पडुच्च ततियपदेणं, भावलेसं पडुच्च चउत्थपदेणं।

एवं जाव सुक्कलेसा।

दिट्ठी-दंसण-नाण-अण्णाण-सण्णाओ चउत्थपदेणं णेतव्वाओ।

हेट्ठिल्ला चत्तारि सरीरा नेयव्वा ततियएणं पदेणं। कम्मयं चउत्थएणं पदेणं।

मणजोगो वइजोगो चउत्थएणं पदेणं। कायजोगो ततिएणं पदेणं।

सागारोवओगो अणागारोवओगो चउत्थएणं पदेणं।

सव्वदव्वा सव्वपदेसा सव्वपज्जवा जहा पोग्गलत्थिकाओ ।

तीतद्धा अणागतद्धा सव्वद्धा चउत्थेणं पदेणं।

[९६] से नूणं भंते! लाघवियं अप्पिच्छा अमुच्छा अगेही अपडिबद्धता समणाणं णिग्गंथाणं पसत्थं? हंता, गोयमा! लाघवियं जाव पसत्थं।

से नूणं भंते! अकोहत्तं अमाणत्तं अमायत्तं अलोभत्तं समणाणं निग्गंथाणं पसत्थं? हंता, गोयमा! अकोहत्तं जाव पसत्थं।

से नूणं भंते! कंखा-पदोसे खीणे समणे निग्गंथे अंतकरे भवति, अंतिमसरीरिए वा, बहुमोहे वि य णं पुट्ठिं विहरिता अह पच्छा संवुडे कालं करेति तओ पच्छा सिज्झति ३ जाव अंतं करेइ? हंता गोयमा! कंखा-पदोसे खीणे जाव अंतं करेति।

[९७] अन्नउत्थिया णं भंते! एवमाइक्खंति एवं भासेंति एवं पण्णवेति एवं परूवेति-"एवं खलु एगे जीवे एगेणं समएणं दो आउयाइं पगरेति, तं जहा-इहभवियाउयं, च परभवियाउगं च। जं समयं इहभवियाउगं पकरेति तं समयं इहभवियाउगं पकरेइ; इहभवियाउगस्स पकरणयाए परभवियाउगं पकरेइ, परभवियाउगस्स पगरणताए इहभवियाउयं पकरेति। एवं खलु एगे जीवे एगेणं समएणं दो आउयाइं पकरेति, तं-इहभवियाउयं च, परभवियाउयं च। से कहमेतं भंते!

एवं? गोयमा! जं णं ते अण्णउत्थिया एवमाइक्खंति जाव परभवियाउयं च। जे ते एवमाहंसु मिच्छं ते एवमाहंसु। अहं पुण गोयमा! एवमाइक्खामि जाव परूवेमि-एवं खलु एगे जीवे एगेणं समएणं एगं आउगं पकरेति, तं जहा-इहभवियाउयं वा, परभवियाउयं वा; जं समयं इहभवियाउयं पकरेति णो तं समयं परभवियाउयं पकरेति, जं समयं परभवियाउयं पकरेइ णो तं समयं इहभवियाउयं पकरेइ; इहभवियाउयस्स पकरणताए णो परभवियाउयं पकरेति, परभवियाउयस्स पकरणताए णो इहभवियाउयं पकरेति। एवं खलु एगे जीवे एगेणं समएणं एगं आउयं पकरेति, तं-इहभवियाउयं वा, परभवियाउयं वा। सेवं भंते! सेवं भंते! ति भगवं गोयमे जाव विहरति।

[९८] तेणं कालेणं तेणं समएणं पासावच्चिज्जे कालासवेसियपुत्ते णामं अणगारे जेणेव थेरा भगवंतो तेणेव उवागच्छति, उवागच्छिता थेरे भगवंते एवं वयासी-थेरा सामाइयं ण जाणंति, थेरा सामाइयस्स अट्ठं ण याणंति, थेरा पच्चक्खाणं ण याणंति, थेरा पच्चक्खाणस्स अट्ठं ण याणंति, थेरा संजमं ण याणंति, थेरा संजमस्स अट्ठं ण याणंति, थेरा संवरं ण याणंति, थेरा संवरस्स अट्ठं ण याणंति, थेरा विवेगं ण याणंति, थेरा विवेगस्स अट्ठं ण याणंति, थेरा विउस्सग्गं ण याणंति, थेरा विउस्सग्गस्स अट्ठं ण याणंति।

तए णं ते थेरा भगवंतो कालासवेसियपुत्तं अणगारं एवं वयासी- जाणामो णं अज्जो! सामाइयं, जाणामो णं अज्जो! सामाइयस्स अट्ठं जाव जाणामो णं अज्जो! विउस्सग्गस्स अट्ठं।

तए णं से कालासवेसियपुत्ते अणगारे ते थेरे भगवंते एवं वयासी- जति णं अज्जो! तुब्भे जाणह सामाइयं, जाणह सामाइयस्स अट्ठं जाव जाणह विउस्सग्गस्स अट्ठं, किं भे अज्जो! सामाइए? किं भे अज्जो! सामाइयस्स अट्ठे? जाव किं भे विउस्सग्गस्स अट्ठे?

तए णं ते थेरा भगवंतो कालासवेसियपुत्तं अणगारं एवं वयासी-आया णे अज्जो! सामाइए, आया णे अज्जो! सामाइयस्स अट्ठे जाव विउस्सग्गस्स अट्ठे।

तए णं से कालासवेसियपुत्ते अणगारे थेरे भगवंते एवं वयासीजति भे अज्जो! आया सामाइए, आया सामाइयस्स अट्ठे एवं जाव आया विउस्सग्गस्स अट्ठे, अवहट्टु कोह-माण-माया-लोभे किमट्ठं अज्जो! गरहह? कालास. ! संजमट्ठयाए।

से भंते! किं गरहा संजमे? अगरहा संजमे? कालस.! गरहा संजमे, नो अगरहा संजमे, गरहा वि य णं सत्वं दोसं पविणेति, सत्वं बालियं परिण्णाए एवं खु णे आया संजमे उवहिते भवति, एवं खु णे आया संजमे उवचिते भवति, एवं खु णे आया संजमे उवट्ठिते भवति।

एत्थ णं से कालासवेसियपुत्ते अणगारे संबुद्धे थेरे भगवंते वंदति णमंसति, एवं वयासी-एतेसि णं भंते! पदाणं पुत्विं अण्णाणयाए असवणयाए अबोहीए अणभिगमेणं अदिट्ठाणं अस्सुताणं अमुत्ताणं अविण्णायाणं अत्त्वोगडाणं अत्त्वोच्छिन्नाणं अणिज्जूढाणं अणुवधारिताणं एतमट्ठे णो सद्धहिते, णो पत्तिए, णो रोइए। इदाणिं भंते! एतेसिं पदाणं जाणताए सवणताए बोहीए अभिगमेणं दिट्ठाणं सुताणं मुयाणं विण्णाताणं वोगडाणं वोच्छिन्नाणं णिज्जूढाणं उवधारिताणं एतमट्ठं सद्धहामि, पत्तियामि, रोएमि। एवमेतं से जहेयं तुब्भे वदह।

तए णं ते थेरा भगवंतो कालासवेसियपुत्तं अणगारं एवं वयासीसद्धहाहि अज्जो! पत्तियाहि अज्जो! रोएहि अज्जो! से जहेतं अम्हे वदामो।

तए णं से कालासवेसियपुत्ते अणगारे थेरे भगवंते वंदइ नमंसइ, २ एवं वदासी-इच्छामि णं भंते! तुब्भं अंतिए चाउज्जामाओ धम्मामो पंचमहत्त्वइयं सपडिक्कमणं धम्मं उवसंपज्जिताणं विहरितए। अहासुहं देवाणुप्पिया! मा पडिबंधं करेह।

तए णं से कालासवेसियपुत्ते अणगारे थेरे भगवंते वंदइ नमंसइ, वंदिता नमंसिता चाउज्जामाओ धम्मामो पंचमहत्त्वइयं सपडिक्कमणं धम्मं उवसंपज्जिताणं विहरइ।

तए णं से कालासवेसियपुत्ते अणगारे बहूणि वासाणि सामण्णपरियागं पाउणइ, जस्सट्ठाए कीरति नग्गभावे मुंडभावे अण्हाणयं अदंतधुवणयं अच्छत्तयं अणोवाहणयं भूमिसेज्जा फलगसेज्जा कट्ठ-सेज्जा केसलोओ बंधचेरवासो परघरपवेसो लद्धावलद्धी, उच्चावया गामकंटगा बावीसं परिसहोवसग्गा अहिया-सिज्जंति तमट्ठं आराहेइ, चरमेहिं उस्सास-नीसासेहिं सिद्धे बुद्धे मुक्के परिनिव्वुडे सत्त्वदुक्खप्पहीणे।

**[९९]** भंते! ति भगवं गोयमे समणं भगवं महावीरं वंदति नमंसति, २ एवं वदासी-से नूणं भंते! सेट्ठिस्स य तणुयस्स य किविणस्स य खतियस्स य समा चेव अपच्चक्खाणकिरिया कज्जइ? हंता, गोयमा! सेट्ठिस्स य जाव अपच्चक्खाणकिरिया कज्जइ। से केणट्ठेणं भंते! ? गोयमा! अविरतिं पडुच्च; से तेणट्ठेणं गोयमा! एवं वुच्चइ सेट्ठिस्स य तणु. जाव कज्जइ।

**[१००]** आहाकम्मं णं भुंजमाणे समणे निग्गंथे किं बंधति? किं पकरेति? किं चिणाति? किं उवचिणाति? गोयमा! आहाकम्मं णं भुंजमाणे आउयवज्जाओ सत्त कम्मप्पगडीओ सिद्धिलबंधणबद्धाओ धणियबंधणबद्धाओ पकरेइ जाव अणुपरियट्ठइ।

से केणट्ठेणं जाव अणुपरियट्ठइ? गोयमा! आहाकम्मं णं भुंजमाणे आयाए धम्मं अतिक्कमति, आयाए धम्मं अतिक्कममाणे पुढविक्कायं णावकंखति जाव तसकायं णावकंखति, जेसिं पि य

णं जीवाणं सरीराइं आहारमाहारेइ ते वि जीवे नावकंखति। से तेणट्ठेणं गोयमा! एवं वुच्चइ-आहाकम्मं णं भुंजमाणे आउयवज्जाओ सत कम्मपगडीओ जाव अणुपरियट्ठति।

फासुएसणिज्जं णं भंते! भुंजमाणे किं बंधइ जाव उवचिणाइ? गोयमा! फासुएसणिज्जं णं भुंजमाणे आउयवाज्जओ सत कम्मपयडीओ धणियबंधणबद्धाओ सिद्धिलबंधणबद्धाओ पकरेइ जहा संवुडे णं नवरं आउयं च णं कम्मं सिय बंधइ, सिय नो बंधइ। सेसं तहेव जाव वीतीवयति। से केणट्ठेणं जाव वीतीवयति? गोयमा! फासुएसणिज्जं भुंजमाणे समणे निग्गंथे आताए धम्मं णाइक्कमति, आताए धम्मं अणत्तिकममाणे पुढविक्कायं अवकंखति जाव तसकायं अवकंखति, जेसिं पि य णं जीवाणं सरीराइं आहारेति ते वि जीवे अवकंखति, से तेणट्ठेणं जाव वीतीवयति।

[१०१] से नूनं भंते! अथिरे पलोट्ठति, नो थिरे पलोट्ठति; अथिरे भज्जति, नो थिरे भज्जति; सासए बालए, बालियतं असासयं; सासते पंडिते, पंडिततं असासतं? हंता, गोयमा! अथिरे पलोट्ठति जाव पंडिततं असासतं।

सेवं भंते! सेवं भंते ति जाव विहरति।

**\*पढमे सते नवमो उद्देशो समतो\***

### ० दसमो उद्देशो ०

[१०२] अन्नउत्थिया णं भंते! एवमाइक्खंति जाव एवं परूवेति-"एवं खलु चलमाणे अचलिते जाव निज्जरिज्जमाणे अणिज्जिण्णे। दो परमाणुपोग्गला एगयओ न साहन्नंति। कम्हा दो परमाणुपोग्गला एगयतो न साहन्नंति? दोण्हं परमाणुपोग्गलाणं नत्थि सिणेहकाए तम्हा दो परमाणुपोग्गला एगयओ न साहन्नंति। तिण्णि परमाणुपोग्गला एगयओ साहन्नंति, कम्हा तिण्णि परमाणुपोग्गला एगयओ साहन्नंति? तिण्हं परमाणुपोग्गलाणं अत्थि सिणेहकाए तम्हा तिण्णि परमाणुपोग्गला एगयओ साहन्नंति।

ते भिज्जमाणा दुहा वि तिहा वि कज्जंति, दुहा कज्जमाणा एगयओ दिवड्ढे परमाणुपोग्गले भवति, एगयओ वि दिवड्ढे परमाणुपोग्गले भवति; तिहा कज्जमाणा तिण्णि परमाणुपोग्गला भवति, एवं जाव चत्तारि, पंच परमाणुपोग्गला एगयओ साहन्नंति, एगयओ साहन्निता दुक्खता कज्जंति, दुक्खे वि य णं से सासते समितं चिज्जति य अवचिज्जति य। पुट्ठिं भासा भासा, भासिज्जमाणी भासा अभासा, भासासमयवीतिककंतं च णं भासिया भासा भासा; सा किं भासओ भासा? अभासओ भासा? अभासओ णं सा भासा, नो खलु सा भासओ भासा।

पुट्ठिं किरिया दुक्खा, कज्जमाणी किरिया अदुक्खा, किरियासमयवीतिककंतं च णं कडा किरिया दुक्खा; जा सा पुट्ठिं किरिया दुक्खा, कज्जमाणी किरिया अदुक्खा, किरियासमयवीतिककंतं च णं कडा किरिया दुक्खा, सा किं करणतो दुक्खा अकरणतो दुक्खा? अकरणओ णं सा दुक्खा, णो खलु सा करणतो दुक्खा, सेवं वत्तवं सिया। अकिच्चं दुक्खं, अफुसं दुक्खं, अकज्जमाणकडं दुक्खं अकट्ठु अकट्ठु पाण-भूत-जीव-सत्ता वेदणं वेदंतीति वत्तवं सिया"।

से कहमेयं भंते! एवं? गोयमा! जं णं ते अन्नउत्थिया एवमाइक्खंति जाव वेदणं वेदंतीति वत्तवं सिया, जे ते एवमाहंसु मिच्छा ते एवमाहंसु। अहं पुण गोतमा! एवमाइक्खामि-एवं खलु चलमाणे चलिते जाव निज्जरिज्जमाणे निज्जिण्णे। दो परमाणुपोग्गला एगयओ साहन्नंति। कम्हा दो परमाणु-

पोग्गला एगयओ साहन्नंति? दोण्हं परमाणुपोग्गलाणं अत्थि सिणेहकाए, तम्हा दो परमाणुपोग्गला एगयओ साहन्नंति, ते भिज्जमाणा दुहा कज्जंति, दुहा कज्जमाणे एगयओ परमाणुपोग्गले एगयओ परमाणुपोग्गले भवति।

तिण्णि परमाणुपोग्गला एगयओ साहन्नंति, कम्हा तिण्णि परमाणुपोग्गला एगयओ साहन्नंति? तिण्हं परमाणुपोग्गलाणं अत्थि सिणेहकाए, तम्हा तिण्णि परमाणुपोग्गला एगयओ साहण्णंति; ते भिज्जमाणा दुहा वि तिहा वि कज्जंति, दुहा कज्जमाणा एगयओ परमाणुपोग्गले, एगयओ दुपदेसिए खंधे भवति, तिहा कज्जमाणा तिण्णि परमाणुपोग्गला भवति।

एवं जाव चत्तारि पंच परमाणुपोग्गला एगयओ साहन्नंति, साहन्निता खंधताए कज्जंति, खंधे वि य णं से असासते सया समियं उवचिज्जइ य अवचिज्जइ य। पुट्ठिं भासा अभासा; भासिज्जमाणी भासा भासा, भासासमयवीतिककंतं च णं भासिता भासा अभासा; जा सा पुट्ठिं भासा अभासा, भासिज्जमाणी भासा भासा, भासासमयवीतिककंतं च णं भासिता भासा अभासा, सा किं भासतो भासा

अभासओ भासा? भासओ णं सा भासा, नो खलु सा अभासओ भासा। पुट्ठिं किरिया अदुक्खा जहा भासा तहा भाणितत्त्वा किरिया वि जाव करणतो णं सा दुक्खा, नो खलु सा अकरणओ दुक्खा, सेवं वत्तत्वं सिया। किच्चं दुक्खं, फुसं दुक्खं, कज्जमाणकडं दुक्खं कट्टु कट्टु पाण-भूत-जीव-सत्ता वेदणं वेदंतीति वत्तत्वं सिया।

[१०३] अन्नउत्थिया णं भंते! एवमाइक्खंति जाव-एवं खलु एगे जीवे एगेणं समएणं दो किरियाओ पकरेति, तं जहा-इरियावहियं च संपराइयं च। जं समयं इरियावहियं पकरेइ तं समयं संपराइयं पकरेइ., परउत्थियवत्तत्वं नेयत्वं। ससमयवत्तत्त्वाए नेयत्वं जाव इरियावहियं वा संपराइयं वा।

[१०४] निरयगती णं भंते! केवतियं कालं विरहिता उववातेणं पण्णत्ता? गोयमा! जहन्नेणं एककं समयं, उक्कोसेणं बारस मुहत्ता। एवं वक्कंतीपदं भाणितत्वं निरवसेसं।

सेवं भंते! सेवं भंते! ति जाव विहरति।

**\*पढमे सते दसमो उद्देशो समतो\***

**०-पढमं सतं समतं-०**

**० मुनि दीपरत्तसागरेण संशोधितः सम्पादितश्च पढमं सतं समतं ०**

**[ ] बीईअं सतं [ ]**

[१०५] उसासखंदए वि अ, समुग्घाय, पुढवी, इंदिय, अन्नउत्थि, भासा य । देवा य चमरचंचा, समय, खित्तिकाय, बीयम्मि सए।।

**० पढमो उद्देशो ०**

[१०६] तेणं कालेणं तेणं समएणं रायगिहे नामं नगरे होत्था। वण्णओ। सामी समोसडे। परिसा निग्गता। धम्मो कहितो। पडिगता परिसा।

तेणं कालेणं तेणं समएणं जेट्ठे अंतेवासी जाव पज्जुवासमाणे एवं वदासी-

जे इमे भंते! बेइंदिया तेइंदिया चउरिंदिया पंचिंदिया जीवा एएसि णं जीवाणं आणामं वा पाणामं वा उस्सासं वा नीसासं वा जाणामो पासामो। जे इमे पुढविककाइया जाव वणस्सतिकाइया

एगिंदिया जीवा एएसि णं आणामं वा पाणामं वा उस्सासं वा निस्सासं वा ण याणामो ण पासामो, एए वि य णं भंते! जीवा आणमंति वा पाणमंति वा उस्ससंति वा नीससंति वा? हंता, गोयमा! एए वि य णं जीवा आणमंति वा पाणमंति वा ऊससंति वा नीससंति वा।

**[१०७]** किं णं भंते! एते जीवा आणमंति वा पाणमंति वा उस्ससंति वा नीससंति वा? गोयमा! दव्वतो णं अणंतपएसियाइं दव्वाइं, खेतओ णं असंखेज्जपएसोगाढाइं, कालओ अन्नयरट्ठितीयाइं, भावओ वण्णमंताइं गंधमंताइं रसमंताइं फासमंताइं आणमंति वा पाणमंति वा ऊससंति वा नीससंति वा।

जाइं भावओ वण्णमंताइं आण. पाण. ऊस. नीस. ताइं किं एगवण्णाइं आणमंति पाणमंति ऊस. नीस.? आहारगमो नेयव्वो जाव ति-चउ-पंचदिसिं।

किं णं भंते! नेरइया आ. पा. उ. नी.? तं चेव जाव नियमा आ. पा. उ. नी.। जीवा एगिंदिया वाघाय-निव्वाघाय भाणियव्वा। सेसा नियमा छदिसिं।

वाउयाए णं भंते! वाउयाए चेव आणमति वा पाणमति वा ऊससति वा नीससति वा? हंता, गोयमा! वाउयाए णं वाउयाए जाव नीससंति वा।

**[१०८]** वाउयाए णं भंते! वाउयाए चेव अणेगसयसहस्सखुतो उद्दाइता उद्दाइता तत्थेव भुज्जो भुज्जो पच्चायाति? हंता, गोयमा! जाव पच्चायाति।

से भंते किं पुट्ठे उद्दाति? अपुट्ठे उद्दाति? गोयमा! पुट्ठे उद्दाइ, नो अपुट्ठे उद्दाइ।

से भंते! किं ससरीरी निक्खमइ, असरीरी निक्खमइ? गोयमा! सिय ससरीरी निक्खमइ, सिय असरीरी निक्खमइ। से केणट्ठेणं भंते! एवं वुच्चइ सिय ससरीरी निक्खमइ, सिय असरीरी निक्खमइ? गोयमा! वाउयायस्स णं चत्तारि सरीरया पण्णत्ता, तं जहा-ओरालिए वेउव्विए तेयए कम्मए। ओरालिय-वेउव्वियाइं विप्पजहाय तेय-कम्मएहिं निक्खमति, से तेणट्ठेणं गोयमा! एवं वुच्चइ-सिय ससरीरी सिय असरीरी निक्खमइ।

**[१०९]** मडाई णं भंते! नियंठे नो निरुद्धभवे, नो निरुद्धभवपवंचे, नो पहीणसंसारे णो पहीण-संसारवेदणिज्जे, णो वोच्छिण्णसंसारे, णो वोच्छिण्णसंसारवेदणिज्जे, नो निट्ठियट्ठे, नो निट्ठियट्ठ करणिज्जे पुणरवि इत्तत्थं हव्वमागच्छति? हंता, गोयमा! मडाई णं नियंठे जाव पुणरवि इत्तत्थं हव्वमागच्छइ।

**[११०]** से णं भंते! किं ति वत्तव्वं सिया? गोयमा! पाणे ति वत्तव्वं सिया, भूते ति वत्तव्वं सिया, जीवे ति वत्तव्वं सिया, सते ति वत्तव्वं सिया, विण्णू ति वत्तव्वं सिया, वेदा ति वत्तव्वं सिया-पाणे भूए जीवे सते विण्णू वेदा ति वत्तव्वं सिया। से केणट्ठेणं भंते! पाणे ति वत्तव्वं सिया जाव वेदा ति वत्तव्वं सिया? गोयमा! जम्हा आणमइ वा पाणमइ वा उस्ससइ वा नीससइ वा तम्हा पाणे ति वत्तव्वं सिया। जम्हा भूते भवति भविस्सति य तम्हा भूए ति वत्तव्वं सिया। जम्हा जीवे जीवइ जीवतं आउयं च कम्मं उवजीवइ तम्हा जीवे ति वत्तव्वं सिया। जम्हा सते सुभासुभेहिं कम्मएहिं तम्हा सते ति वत्तव्वं सिया। जम्हा तित्त-कडुय-कसायंबिल-महुरे रसे जाणइ तम्हा विण्णू ति वत्तव्वं सिया। जम्हा वेदेइ य सुह-दुक्खं तम्हा वेदा ति वत्तव्वं सिया। से तेणट्ठेणं जाव पाणे ति वत्तव्वं सिया जाव वेदा ति वत्तव्वं सिया।

**[१११]** मडाई णं भंते! नियंठे निरुद्धभवे निरुद्धभवपवंचे जाव निट्ठियट्ठकरणिज्जे णो पुणरवि इत्तत्थं हव्वमागच्छति? हंता, गोयमा! मडाई णं नियंठे जाव नो पुणरवि इत्तत्थं हव्वमागच्छति।

से णं भंते! किं ति वत्तव्वं सिया? गोयमा! सिद्धे ति वत्तव्वं सिया, बुद्धे ति वत्तव्वं सिया, मुत्ते ति वत्तव्वं., पारगए ति व., परंपरगए ति व., सिद्धे बुद्धे मुत्ते परिनिव्वुडे अंतकडे सव्वदुक्खप्पहीणे ति वत्तव्वं सिया। सेवं भंते! सेवं भंते! ति भगवं गोयमे समणं भगवं महावीरं वंदइ नमंसइ, २ संजमेणं तवसा अप्पाणं भावेमाणे विहरति।

**[११२]** तेणं कालेणं तेणं समणे भगवं महावीरे रायगिहाओ नागराओ गुणसिलाओ चेइयाओ पडिनिक्खमइ, पडिनिक्खमिता बहिया जणवयविहारं विहरइ।

तेणं कालेणं तेणं समणं कयंगला नामं नगरी होत्था। वण्णओ। तीसे णं कयंगलाए नगरीए बहिया उत्तरपुरत्थिमे दिसीभागे छत्तपलासए नामं चेइए होत्था। वण्णओ। तए णं समणे भगवं महावीरे उप्पण्णनाण-दंसणधरे जाव समोसरणं। परिसा निग्गच्छति।

तीसे णं कयंगलाए नगरीए अदूरसामंते सावत्थी नामं नयरी होत्था। वण्णओ। तत्थ णं सावत्थीए नयरीए गद्धभालस्स अंतेवासी खंदए नामं कच्चायणसगोत्ते परिव्वायगे परिवसइ, रिउव्वेद-जजुव्वेद-सामवेद-अथव्वणवेद इतिहासपंचमाणं निघंटछट्ठाणं चउण्हं वेदाणं संगोवंग्गाणं सरहस्साणं सारए वारए पारए सडंगवी सट्ठितंतविसारए संखाणे सिक्खा-कप्पे वागरणे छंदे निरुत्ते जोतिसामयणे अन्नेसु य बहूसु बंभण्णएसु पारिव्वायएशु य नयेसु सुपरिनिट्ठिए यावि होत्था।

तत्थ णं सावत्थीए नयरीए पिंगलए नामं नियंठे वेसालियसावए परिवसइ। तए णं से पिंगलए णियंठे वेसालियसावए अण्णदा कयाइं जेणेव खंदए कच्चायणसगोत्ते तेणेव उवागच्छइ, २ खंदगं कच्चायणसगोत्तं इणमक्खेवं पुच्छे-मागहा! किं सअंते लोके, अणंते लोके , सअंते जीवे अणंते जीवे , सअंता सिद्धी अणंता सिद्धी , सअंते सिद्धे अणंते सिद्धे , केण वा मरणेणं मरमाणे जीवे वड्ढति वा हायति वा ? एतावं ताव आयक्खाहि वुच्चमाणे एवं।

तए णं से खंदए कच्चायणसगोत्ते पिंगलएणं णियंठेणं वेसालीसावएणं इणमक्खेवं पुच्छिए समाणे संकिए कंखिए वितिगिच्छिए भेदसमावन्ने कलुसमावन्ने णो संचाएइ पिंगलयस्स नियंठस्स वेसालियसावयस्स किंचि वि पमोक्खमक्खाइं, तुसिणीए संचिट्ठइ।

तए णं से पिंगलए नियंठे वेसालीसावए खंदयं कच्चायणसगोत्तं दोच्चं पि तच्चं पि इणमक्खेवं पुच्छे-मागहा! किं सअंते लोए जाव केण वा मरणेणं मरमाणे जीवे वड्ढइ वा हायति वा? एतावं ताव आइक्खाहि वुच्चमाणे एवं।

तए णं से खंदए कच्चायणसगोत्ते पिंगलएणं नियंठेणं वेसालीसावएणं दोच्चं पि तच्चं पि इणमक्खेवं पुच्छिए समाणे संकिए कंखिए वितिगिच्छिए भेद समावण्णे कलुसमावन्ने नो संचाएइ पिंगलयस्स नियंठस्स वेसालिसावयस्स किंचि वि पमोक्खमक्खाइं, तुसिणीए संचिट्ठइ।

तए णं सावत्थीए नयरीए सिंघाडग जाव महापहेसु महया जणसम्मद्धे इ वा जणवूहे इ वा परिसा निग्गच्छइ। तए णं तस्स खंदयस्स कच्चायणसगोत्तस्स बहुजणस्स अंतिए एयमट्ठं सोच्चा निसम्म इमेयारूवे अज्झत्थिए चित्तिए पत्थिए मणोगए संकप्पे समुप्पज्जित्था-एवं खलु समणे भगवं महावीरे, कयंगलाए नयरीए बहिया छत्तपलासए चेइए संजमेणं तवसा अप्पाणं भावेमाणे विहरइ।

तं गच्छामि णं, समणं भगवं महावीरं वंदामि नमंसामि सेयं खलु मे समणं भगवं महावीरं वंदिता णमंसिता सक्कारेता सम्माणिता कल्लाणं मंगलं देवतं चेतियं पज्जुवासिता इमाइं च णं एयारूवाइं

अट्ठाइं हेऊइं पसिणाइं कारणाइं वागरणाइं पुच्छित्तए' ति कट्टु एवं संपेहेइ, २ जेणेव परिव्वायावसहे तेणेव उवागच्छइ, २ ता तिट्ठं च कुंडियं च कंचणियं च करोडियं च भिसियं च केसरियं च छन्नालयं च अंकुसयं च पवित्तयं च गणेतियं च छत्तयं च वाहणाओ य पाठयाओ य धाउरताओ य गेण्हइ, गेण्हिता परिव्वायावसहाओ पडिनिक्खमइ, पडिनिक्खमिता तिट्ठं-कुंडिय-कंचणिय-करोडियभिसिय-केसरिय-छन्नालय-अंकुसय-पवित्तय-गणेतियहत्थगए छत्तोवाहणसंजुते धाउरतवत्थपरिहिए सावत्थीए नगरीए मज्झिमज्जेणं निग्गच्छइ, निग्गच्छिता जेणेव कयंगला नगरी जेणेव छत्तपलासए चेइए जेणेव समणे भगवं महावीरे तेणेव पहारेत्थ गमणाए।

गोयमा! इ समणे भगवं महावीरे भगवं गोयमं एवं वयासी-दच्छिसि णं गोयमा! पुव्वसंगतियं।

कं भंते!? खंदयं नाम।

से काहे वा? किह वा? केवच्चिरेण वा? एवं खलु गोयमा! तेणं कालेणं २ सावत्थी नामं नगरी होत्था। वण्णओ। तत्थ णं सावत्थीए नगरीए गद्दभालस्स अंतेवासी खंदए णामं कच्चायणसगोते परिव्वायए परिवसइ, तं चेव जाव जेणेव ममं अंतिए तेणेव पहारेत्थ गमणाए। से य अदूराइते बहुसंपते अद्धानपडिवन्ने अंतरापहे वट्टइ। अज्जेव णं दच्छिसि गोयमा!।

भंते! ति भगवं गोयमे समणं भगवं वंदइ नमंसइ, २ एवं वदासी-पहू णं भंते! खंदए कच्चायणसगोते देवाणुप्पियाणं अंतिए मुंडे भवित्ता णं अगाराओ अणगारियं पव्वइत्तए? हंता, पभू।

जावं च णं समणे भगवं महावीरे भगवओ गोयमस्स एयमट्ठं परिकहेइ तावं च से खंदए कच्चायणसगोते तं देसं हव्वमागते।

तए णं भगवं गोयमे खंदयं कच्चायणसगोतं अदूरआगयं जाणित्ता खिप्पामेव अब्भुट्ठेति, खिप्पामेव पच्चुवगच्छइ, २ जेणेव खंदए कच्चायणसगोते तेणेव उवागच्छइ, २ ता खंदयं कच्चायणसगोतं एवं वयासी हे खंदया!, सागयं खंदया!, सुसागयं खंदया!, अणुरागयं खंदया!, सागयमणुरागयं खंदया!।

से नूणं तुमं खंदया! सावत्थीए नयरीए पिंगलएणं नियंठेणं वेसालियसावएणं इणमक्खेवं पुच्छिए मागहा! किं सअंते लोगे अणंते लोगे? एवं तं चेव जेणेव इहं तेणेव हव्वमागए। से नूणं खंदया! अत्थे समत्थे? हंता, अत्थि।

तए णं से खंदए कच्चायणसगोते भगवं गोयमं एवं वयासी-से केस णं गोय

मा! तहारूवे नाणी वा तवस्सी वा जेणं तव एस अट्ठे मम ताव रहस्सकडे हव्वमक्खाए, जओ णं तुमं जाणसि?। तए णं से भगवं गोयमे खंदयं कच्चायणसगोतं एवं वयासी-

एवं खलु खंदया! मम धम्मयारिए धम्मोवएसए समणे भगवं महावीरे उप्पन्नणाण-दंसणधरे अरहा जिणे केवली तीय-पच्चुप्पन्नमणागयवियाणए सव्वण्णू सव्वदरिसी जेणं ममं एस अट्ठे तव ताव रहस्सकडे हव्वमक्खाए, जओ णं अहं जाणामि खंदया!।

तए णं से खंदए कच्चायणसगोते भगवं गोयमं एवं वयासी-गच्छामो णं गोयमा! तव धम्मयारियं धम्मोवदेसयं समणं भगवं महावीरं वंदामो णमंसामो जाव पज्जुवासामो।

अहासुहं देवाणुप्पिया! मा पडिबंधं।

तए णं से भगवं गोयमे खंदएणं कच्चायणसगोतेणं सद्धिं जेणेव समणेभगवं महावीरे तेणेव

पहारेत्थ गमणयाए।

तेणं कालेणं २ समणे भगवं महावीरे वियडभोई याऽवि होत्था। तए णं समणस्स भगवओ महावीरस्स वियडभोगिस्स सरीरयं ओरालं सिंगारं कल्लाणं सिवं धण्णं मंगल्लं सस्सिरीयं अणलंकियविभसियं लक्खण-वंजणगुणोववेयं सिरीए अतीव २ उवसोभेमाणं चिट्ठइ।

तए णं से खंदए कच्चायणसगोते समणस्स भगवओ महावीरस्स वियडभोगिस्स सरीरयं ओरालं जाव अतीव २ उवसोभेमाणं पासइ, २ ता हट्ठतुट्ठचित्तमाणंदिए नंदिए पीइ

मणे परमसोमणस्सिए हरिसवसविसप्पमाणहियए जेणेव समणे भगवं महावीरे तेणेव उवागच्छइ, २ ता समणं भगवं महावीरं तिक्खुतो आयाहिणप्पयाहिणं करेइ जाव पज्जुवासइ।

खंदया! ति समणे भगवं महावीरे खंदयं कच्चायणसगोतं एवं वयासी-से नूणं तुमं खंदया! सावत्थीए नयरीए पिंगलएणं णियंठेणं वेसालियसावएणं इणमक्खेवं पुच्छिए 'मागहा! किं सअंते लोए अणंते लोए? एवं तं चेव जाव जेणेव ममं अंतिए तेणेव हव्वमागए। से नूणं खंदया! अयमट्ठे समट्ठे? हंता, अत्थि।

जे वि य ते खंदया ! अयमेयारूवे अज्झत्थिए चिंतिए पत्थिए मणोगए संकप्पे समुप्पज्जित्था-किं सअंते लोए, अणंते लोए? तस्स वि य णं अयमट्ठे-एवं खलु मए खंदया! चउट्ठिहे लोए पण्णते, तं जहा-दव्वओ खेतओ कालओ भावओ। दव्वओ णं एगे लोए सअंते। खेतओ णं लोए असंखेज्जाओ जोयणकोडाकोडीओ आयाम-विकखंभेणं, असंखेज्जाओ जोयणकोडाकोडीओ परिक्खेवेणं प., अत्थि पुण से अंते। कालओ णं लोए ण कयावि न आसी न कयावि न भवति न कयावि न भविस्सति, भुविं च भवति य भविस्सइ य, धुवे णियए सासते अक्खए अव्वए अवट्ठिए णिच्चे, णत्थि पुण से अंते। भावओ णं लोए अणंता वण्णपज्जवा गंध. रस. फासपज्जवा, अणंता संठाणपज्जवा, अणंता गरुयलहुयपज्जवा, अणंता अगरुयलहुयपज्जवा, नत्थि पुण से अंते। से तं खंदगा! दव्वओ लोए सअंते, खेतओ लोए सअंते, कालतो लोए अणंते, भावओ लोए अणंते।

जे वि य ते खंदया! जाव सअंते जीवे, अणंते जीवे? तस्स वि य णं अयमट्ठे-एवं खलु जाव दव्वओ णं एगे जीवे सअंते। खेतओ णं जीवे असंखेज्जपएसिए असंखेज्जपदेसोगाढे, अत्थि पुण से अंते। कालओ णं जीवे न कयावि न आसि जाव निच्चे, नत्थि पुणाइ से अंते। भावओ णं जीवे अणंता णाणपज्जवा अणंता दंसणपज्जवा अणंता चरित्तपज्जवा अणंता गरुयलहुयपज्जवा अणंता अगरुयलहुयपज्जवा, नत्थि पुण से अंते। से तं दव्वओ जीवे सअंते, खेतओ जीवे सअंते, कालओ जीवे अणंते, भावओ जीवे अणंते।

जे वि य ते खंदया! पुच्छा। दव्वओ णं एगा सिद्धी सअंता; खेतओ णं सिद्धी पणयालीसं जोयणसयसहस्साइं आयाम-विकखंभेणं, एगा जोयणकोडी बायालीसं च जोयणसयसहस्साइं तीसं च जोयणसहस्साइं दोन्नि य अउणापन्ने जोयणसए किंचि विसेसाहिए परिक्खेवेणं प., अत्थि पुण से अंते; कालओ णं सिद्धी न कयावि न आसि.; भावओ य जहा लोयस्स तहा भाणियव्वा। तत्थ दव्वओ सिद्धी सअंता, खेतओ सिद्धी सअंता, कालओ सिद्धी अणंता, भावओ सिद्धी अणंता।

जे वि य ते खंदया! जाव किं अणंते सिद्धे? तं चेव जाव दव्वओ णं एगे सिद्धे सअंते; खेतओ

णं सिद्धे असंखेज्जपएसिए असंखेज्जपदेसोगाढे, अत्थि पुण से अंते; कालओ णं सिद्धे सादीए अपज्जवसिए, नत्थि पुण से अंते; भावओ णं सिद्धे अणंता णाणपज्जवा, अणंता दंसणपज्जवा जाव अणंता अगरुयलहुयपज्जवा, नत्थि पुण से अंते। से तं दव्वओ सिद्धे सअंते, खेतओ सिद्धे सअंते, कालओ सिद्धे अणंते, भावओ सिद्धे अणंते।

जे वि य ते खंदया! इमेयारूवे अज्झत्थिए चिंतिए जाव समुप्पज्जित्था केण वा मरणेणं मरमाणे जीवे वड्ढति वा हायति वा? तस्स वि य णं अयमट्ठे-एवं खलु खंदया! मए दुविहे मरणे पण्णते, तं जहा-बालमरणे य पंडियमरणे य।

से किं तं बालमरणे? दुवालसविहे प., तं-वलयमरणे, वसट्टमरणे, अंतोसल्लमरणे, तब्भवमरणे, गिरिपडणे, तरुपडणे, जलप्पवेसे, जलणप्पवेसे, विसभक्खणे, सत्थोवाडणे, वेहाणसे, गद्धपट्ठे, इच्चेतेणं खंदया! दुवालसविहेणं बालमरणेणं मरमाणे जीवे अणंतेहिं नेरइयभवग्गहणेहिं अप्पाणं संजोएइ, तिरिय. मणुय. देव., अणाइयं च णं अणवदग्गं दीहमद्धं चाउरंतं संसारकंतारं अणुपरियट्ठइ, से तं मरमाणे वड्ढइ वड्ढइ। से तं बालमरणे।

से किं तं पंडियमरणे? पंडियमरणे दुविहे प., तं.-पाओवगमणे य भत्तपच्चक्खाणे य।

से किं तं पाओवगमणे? पाओवगमणे दुविहे प., तं.-नीहारिमे य अनीहारिमे य, नियमा अप्पडिकम्मे। से तं पाओवगमणे।

से किं तं भत्तपच्चक्खाणे? भत्तपच्चक्खाणे दुविहे पं. तं.-नीहारिमे य अनीहारिमे य, नियमा सपडिकम्मे। से तं भत्तपच्चक्खाणे।

इच्चेतेणं खंदया! दुविहेणं पंडियमरणेणं मरमाणे जीवे अणंतेहिं नेरइयभवग्गहणेहिं अप्पाणं विसंजोएइ जाव वीईवयति। से तं मरमाणे हायइ हायइ। से तं पंडियमरणे।

इच्चेएणं खंदया! दुविहेणं मरणेणं मरमाणे जीवे वड्ढइ वा हायति वा।

**[११३]** एत्थ णं से खंदए कच्चायणसगोते संबुद्धे समणं भगवं महावीरं वंदइ नमंसइ, २ एवं वदासी-इच्छामि णं भंते! तुब्भं अंतिए केवलिपन्नतं धम्मं निसामेतए।

अहासुहं देवाणुप्पिया! मा पडिबंधं।

तए णं समणे भगवं महावीरे खंदयस्स कच्चायणसगोतस्स तीसे य महत्तिमहालियाए परिसाए धम्मं परिकहेइ। धम्मकहा भाणियव्वा।

तए णं से खंदए कच्चायणसगोते समणस्स भगवओ महावीरस्स अंतिए धम्मं सोच्चा निसम्म हट्ठतुट्ठे जाव हियए उट्ठाए उट्ठेइ, २ समणं भगवं महावीरं तिक्खुत्तो आयाहिणं पयाहिणं करेइ, २ एवं वदासी-

सद्धहामि णं भंते! निग्गंथं पावयणं, पत्तियामि णं भंते! निग्गंथं पावयणं, रोएमि णं भंते! निग्गंथं पावयणं, अब्भुट्ठेमि णं भंते! निग्गंथं पावयणं, एवमेयं भंते!, तहमेयं भंते!, अवितहमेयं भंते!, असंदिद्धमेयं भंते!, इच्छियमेयं भंते!, पडिच्छियमेयं भंते!, इच्छियपडिच्छियमेयं भंते!, से जहेयं तुब्भे वदह ति कट्टु समणं भगवं महावीरं वंदति नमंसति, २ उत्तपुरत्थिमं दिसीभायं अवक्कमइ, २ त्तिदंडं च कुंडियं च जाव धातुरत्ताओ य एगंते एडेइ, २ जेणेव समणे भगवं महावीरे तेणेव उवागच्छइ, २ समणं भगवं महावीरं तिक्खुत्तो आयाहिणं पयाहिणं करेइ, करेत्ता जाव नमंसित्ता एवं वदासी-

आलिते णं भंते! लोए, पलिते णं भंते! लोए, आलितपलिते णं भंते! लोए जराए मरणेण य। से जहानामए केइ गाहावती अगारंसि झियायमाणंसि जे से तत्थ भंडे भवइ अप्पसारे मोल्लगरुए तं गहाय आयाए एगंतमंतं अवक्कमइ, एस मे नित्थारिए समाणे पच्छा पुरा य हियाए सुहाए खमाए निस्सेसाए आणुगामियताए भविस्सइ। एवामेव देवाणुप्पिया! मज्झ वि आया एगे भंडे इट्ठे कंते पिए मणुन्ने मणामे थेज्जे वेसासिए सम्मए बहुमए अणुमए भंडकरंडगसमाणे, मा णं सीतं, मा णं उण्हं, मा णं खुहा, मा णं पिवासा, मा णं चोरा, मा णं वाला, मा णं दंसा, मा णं मसगा, मा णं वाइय-पित्तिय-सिंभिय-सन्निवाइय विविहा रोगायंका परीसहोवसग्गा फुसंतु ति' कट्टु, एस मे नित्थारिए समाणे परलोयस्स हियाए सुहाए खमाए नीसेसाए आणुगामियताए भविस्सइ।

तं इच्छामि णं देवाणुप्पिया! सयमेव पट्ठावियं, सयमेव मुंडावियं, सयमेव सेहावियं, सयमेव सिक्खावियं, सयमेव आया-गोयरं विणय-वेणइय-चरण-करण-जाया-मायावत्तियं धम्ममाइक्खिअं।

तए णं समणे भगवं महावीरे खंदयं कच्चायणसगोतं सयमेव पट्ठावेइ जाव धम्ममाइक्खइ- एवं देवाणुप्पिया! गंतव्वं, एवं चिट्ठियव्वं, एवं निसीतियव्वं, एवं तुयट्ठियव्वं, एवं भुजियव्वं, एवं भासियव्वं, एवं उट्ठाय उट्ठाय पाणेहिं भूएहिं जीवेहिं सतेहिं संजमेणं संजमियव्वं, अस्सिं च णं अट्ठे णो किंचि वि पमाइयव्वं।

तए णं से खंदए कच्चायणसगोते समणस्स भगवओ महावीरस्स इमं एयारूवं धम्मियं उवएसं सम्मं संपडिवज्जति, तमाणाए तह गच्छइ, तह चिट्ठइ, तह निसीयति, तह तुयट्ठइ, तह भुंजइ, तह भासइ, तह उट्ठाय २ पाणेहिं भूएहिं जीवेहिं सतेहिं संजमेणं संजमइ, अस्सिं च णं अट्ठे णो पमायइ।

तए णं से खंदए कच्चायणसगोते अणगारे जाते रियासमिए भासासमिए एसणासमिए आयाण-भंडमत-निक्खेवणासमिए उच्चार-पासवण-खेलसिंघाण-जल्ल-पारिट्ठावणियासमिए मणसमिए वय-समिए कायसमिए मणगुते वइगुते कायगुते गुते गुतिंदिए गुतबंभचारी चाई लज्जू धण्णे खंतिखमे जितिंदिए सोहिए अणियाणे अप्पुस्सुए अबहिल्लेस्से सुसामण्णरए दंते इणमेव णिग्गंथं पावयणं पुरओ काउं विहरइ।

**[११४]** तए णं समणे भगवं महावीरे कयंगलाओ नयरीओ छत्तपलासाओ चेइयाओ पडनिक्ख-मइ, २ बहिया जणवयविहारं विहरति।

तए णं से खंदए अणगारे समणस्स भगवओ महावीरस्स तहारूवाणं थेराणं अंतिए सामाइयमाइयाइं एक्कारस अंगाइं अहिज्जइ, २ जेणेव समणे भगवं महावीरे तेणेव उवागच्छइ, २ समणं भगवं महावीरं वंदइ नमंसइ, २ एवं वयासी-

इच्छामि णं भंते! तुब्भेहिं अब्भणुण्णाए समाणे मासियं भिक्खुपडिमं उवसंपज्जिताणं विहरित्तए। अहासुहं देवाणुप्पिया! मा पडिबंधं करेह।

तए णं से खंदए अणगारे समणेणं भगवया महावीरेणं अब्भणुण्णाए समाणे हट्ठ जाव नमंसित्ता मासियं भिक्खुपडिमं उवसंपज्जिताणं विहरइ।

तए णं से खंदए अणगारे मासियं भिक्खुपडिमं अहासुतं अहाकप्पं अहामग्गं अहातच्चं अहासम्मं कारण फासेति पालेति साहेति तीरेति पूरेति किट्ठेति अणुपालेइ आणाए आराहेइ, कारण फासित्ता जाव आराहेत्ता जेणेव समणे भगवं महावीरे तेणेव उवागच्छइ, २ समणं भगवं जाव नमंसित्ता एवं

वयासी-

इच्छामि णं भंते! तुब्भेहिं अब्भणुण्णाए समाणे दोमासियं भिक्खुपडिमं उवसंपज्जिताणं विहरित्तए। अहासुहं देवाणुप्पिया! मा पडिबंधं। तं चेव।

एवं तेमासियं चाउम्मासियं पंच-छ-सत्तमा। पढमं सत्तराइंदियं, दोच्चं सत्तराइंदियं, तच्चं सत्तरातिंदियं, रातिंदियं, एगराइयं।

तए णं से खंदए अणगारे एगराइयं भिक्खुपडिमं अहासुतं जाव आराहेत्ता जेणेव समणे भगवं महावीरे तेणेव उवागच्छति,२ समणं भगवं महावीरं जाव नमंसित्ता एवं वदासी-इच्छामि णं भंते! तुब्भेहिं अब्भणुण्णाए समाणे गुणरयणसंवच्छरं तवोकम्मं उवसंपज्जिताणं विहरित्तए। अहासुहं देवाणुप्पिया! मा पडिबंधं।

तए णं से खंदए अणगारे समणेणं भगवया महावीरेणं अब्भणुण्णाए समाणे जाव नमंसित्ता गुणरयणसंवच्छरं तवोकम्मं उवसंपज्जिताणं विहरति। तं जहा-पढमं मासं चउत्थं चउत्थेणं अणिक्खित्तेणं तवोकम्मेणं दिया ठाणुक्कुडुए सूराभिमुहे आयावणभूमीए आयावेमाणे, रतिं वीरासणेणं अवाउडेण य। दोच्चं मासं छट्ठं छट्ठेणं अनिक्खित्तेणं। दिया ठाणुक्कुडुए सूराभिमुहे आयावणभूमीए आयावेमाणे, रतिं वीरासणेणं अवाउडेण य। एवं तच्चं मासं अट्ठमं अट्ठमेणं, चउत्थं मासं दसमं दसमेणं, पंचमं मासं बारसमं बारसमेणं, छट्ठं मासं चोद्धसमं चोद्धसमेणं, सत्तमं मासं सोलसमं २, अट्ठमं मासं अट्ठारसमं २, नवमं मासं वीसतिमं २, दसमं मासं बावीसतिमं २, एककारसमं मासं चउत्वीसतिमं २, बारसमं मासं छट्ठीसतिमं २, तेरसमं मासं अट्ठावीसतिमं २, चोद्धसमं मासं तीसतिमं २, पन्नरसमं मासं बत्तीसतिमं सोलसमं मासं चोत्तीसतिमं अनिक्खित्तेणं तवोकम्मेणं दिया ठाणुक्कुडुए सूराभिमुहे आयावणभूमीए आयावेमाणे, रतिं वीरासणेणं अवाउडेणं।

तए णं से खंदए अणगारे गुणरयणसंवच्छरं तवोकम्मं अहासुतं अहाकप्पं जाव आराहेत्ता जेणेव समणे भगवं महावीरे तेणेव उवागच्छइ, २ समणं भगवं महावीरं वंदइ नमंसइ,२ बहूहिं चउत्थ-छट्ठसट्ठम-दसम-दुवालसेहिं माससद्धमासखमणेहिं विचित्तेहिं तवोकम्मेहिं अप्पाणं भावेमाणे विहरति।

तए णं से खंदए अणगारे तेणं ओरालेणं विपुलेणं पयत्तेणं पग्गहिएणं कल्लाणेणं सिवेणं धण्णेणं मंगल्लेणं सस्सिरीएणं उदग्गेणं उदत्तेणं उत्तमेणं उदारेणं महाणुभागेणं तवोकम्मेणं सुक्के लुक्खे निम्मंसे अट्ठिचम्मावणद्धे किडिकिडियाभूए किसे धमणिसंतए जाते यावि होत्था, जीवंचीवेण गच्छइ, जीवंचीवेणं चिट्ठइ, भासं भासित्ता वि गिलाइ, भासं भासमाणे गिलाति, भासं भासिस्सामीति गिलाति; से जहा नाम ए कट्ठसगडिया इ वा पत्तसगडिया इ वा पत्तित्तभंडगसगडिया इ वा एरंडकट्ठसगडिया इ वा इंगालसगडिया इ वा उण्हेदिण्णा सुक्का समाणी ससद्धं गच्छइ, ससद्धं चिट्ठइ, एवामेव खंदए वि अणगारे ससद्धं गच्छइ, ससद्धं चिट्ठइ, उवचिते तवेणं, अवचिए मंस-सोणितेणं, हुयासणे विव भासरासिपडिच्छन्ने, तवेणं तेएणं तवतेयसिरीए अतीव २ उवसोभमाणे २ चिट्ठइ।

[११५] तेणं कालेणं २ रायगिहे नगरे जाव समोसरणं जाव परिसा पडिगया।

तए णं तस्स खंदयस्स अणगारस्स अण्णया कयाइ पुव्वरत्तावरत्तकालसमयंसि धम्मजागरियं जागरमाणस्स इमेयारूवे अज्झत्थिए चित्तिए जाव समुप्पज्जित्था-एवं खलु अहं इमेणं एयारूवेणं ओरालेणं जाव किसे धमणिसंतए जाते जीवंचीवेणं गच्छामि, जीवंचीवेणं चिट्ठामि, जाव गिलामि, जाव एवामेव अहं

पि ससद्वं चिट्ठामि, तं अत्थि ता मे उट्ठाणे कम्ममे बले वीरिए पुरिसक्कारपरक्कमे तं जावता मे अत्थि उट्ठाणे कम्ममे बले वीरिए पुरिसक्कारपरक्कमे जाव य मे धम्मयारिए धम्मोवदेसए समणे भगवं महावीरे जिणे सुहत्थी विहरइ तावता मे सेयं कल्लं पाउप्पभायाए रयणीए फुल्लुप्पल-कमलकोमलुम्मिल्लियम्मि अहपंडरे पभाए रत्तासोयप्पाकासकिंसुयसुयमुह-गुंजसद्धारागसरिसे कमलागरसंडबोहए उट्ठियम्मि सूरे सहस्सरस्सिम्मि दिणयरे तेयसा जलंते समणं भगवं महावीरं वंदिता नमंसिता जाव पज्जुवासिता,.....

समणेणं भगवया महावीरेणं अब्भणुण्णाए समाणे सयमेव पंच महव्वयाणि आरोवेत्ता, समणा य समणीओ य खामेत्ता, तहारूवेहिं थेरेहिं कडास्सईहिं सद्धिं विपुलं पव्वयं सणियं सणियं दुरुहिता, मेघघणसन्निगासं देवसन्निवातं पुढवीसिलावट्टयं पडिलेहिता, दब्भसंथारयं संथरिता, दब्भसंथारोवगयस्स संलेहणा झूसणा झूसियस्स भत्त-पाणपडियाइक्खियस्स पाओवगयस्स कालं अणवकंखमाणस्स विहरितए ति कट्टु एवं संपेहेइ,२ ता कल्लं पाउप्पभायाए रयणीए जाव जलंते जेणेव समणे भगवं महावीरे जाव पज्जुवासति।

खंदया! इ समणे भगवं महावीरे खंदयं अणगारं एवं वयासीसे नूणं तव खंदया! पुव्वरत्तावरत्त. जाव जागरमाणस्स इमेयारूवे अज्झत्थिए जाव समुप्पज्जित्था-एवं खलु अहं इमेणं एयारूवेणं ओरालेणं विपुलेणं तं चेव जाव कालं अणवकंखमाणस्स विहरितए ति कट्टु एवं संपेहेसि,२ कल्लं पाउप्पभायाए जाव जलंते जेणेव मम अंतिए तेणेव हव्वमागए। से नूणं खंदया! अट्ठे समट्ठे? हंता, अत्थि। अहासुहं देवाणुप्पिया! मा पडिबंधं करेह।

[११६] तए णं से खंदए अणगारे समणेणं भगवया महावीरेणं अब्भणुण्णाए समाणे हट्ठत्तुट्ठ. जाव हयहियए उट्ठाए उट्ठेइ,२ समणं भगवं महावीरं तिकखुत्तो आयाहिणं पयाहिणं करेइ जाव नमंसिता सयमेव पंच महव्वयाइं आरूहेइ,२ ता समणे य समणीओ य खामेइ,२ ता तहारूवेहिं थेरेहिं कडास्सईहिं सद्धिं विपुलं पव्वयं सणियं २ दुरूहेइ, २ मेघघणसन्निगासं देवसन्निवायं पुढविसिलावट्टयं पडिलेहेइ,२ उच्चारपासवणभूमिं पडिलेहेइ, २ दब्भसंथारयं संथरेइ, २ दब्भसंथारयं दुरूहेइ, २ दब्भसंथारोवगते पुरत्थाभिमुहे संपलियंकनिसण्णे करयलपरिग्गहियं दसनहं सिरसावत्तं मत्थए अंजलिं कट्टु एवं वदासि-

नमोऽत्थु णं अरहंताणं भगवंताणं जाव संपताणं, नमोऽत्थु णं समणस्स भगवओ महावीरस्स जाव संपाविउकामस्स, वंदामि णं भगवंतं तत्थगयं इहगते, पासउ मे भयवं तत्थगए इहगयं ति कट्टु वंदइ नमंसति, २ एवं वदासी-"पुट्ठिं पि मए समणस्स भगवओ महावीरस्स अंतिए सव्वे पाणातिवाए पच्चक्खाए जावज्जीवाए जाव मिच्छादंसणसल्ले पच्चक्खाए जावज्जीवाए, इयाणिं पि य णं समणस्स भगवओ महावीरस्स अंतिए सव्वं पाणाइवायं पच्चक्खामि जावज्जीवाए जाव मिच्छादंसणसल्लं पच्चक्खामि।

एवं सव्वं असणं पाणं खाइमं साइमं चउट्ठिहं पि आहारं पच्चक्खामि जावज्जीवाए। जं पि य इमं सरीरं इट्ठं कंतं पियं जाव फुसंतु ति कट्टु एयं पि णं चरिमेहिं उस्सास-नीसासेहिं वोसिरामि" ति कट्टु संलेहणाझूसणाझूसिए भत्त-पाणपडियाइक्खिए पाओवगए कालं अणवकंखमाणे विहरति।

तए णं से खंदए अणगारे समणस्स भगवओ महावीरस्स तहारूवाणं थेराणं अंतिए सामाइयमादियाइं एक्कारस अंगाइं अहिज्जिता बहुपडिपुण्णाइं दुवालसवासाइं सामण्णपरियागं पाउणिता मासियाए संलेहणाए अत्ताणं झूसिता सट्ठिं भत्ताइं अणसणाए छेदेता आलोइयपडिक्कंते समाहिपते आणुपुट्ठीए कालगए।

[११७] तए णं ते थेरा भगवंतो खंदयं अणगारं कालगयं जाणित्ता परिनिव्वाणवत्तियं काउस्सग्गं करंति, २ पत्त-चीवराणि गिण्हंति, २ विपुलाओ पव्वयाओ सणियं २ पच्चोरुहंति, २ जेणेव समणे भगवं महावीरे तेणेव उवागच्छंति, २ समणं भगवं महावीरं वंदंति नमंसंति, २ एवं वदासी-एवं खलु देवाणुप्पियाणं अंतेवासी खंदए नामं अणगारे पगइभद्दए पगतिविणीए पगतिउवसंते पगतिपयणुकोह-माण-माया-लोभे मिउ-मद्दव संपन्ने अल्लीणे भद्दए विणीए। से णं देवाणुप्पिएहिं अब्भणुण्णाए समाणे सयमेव पंच महव्वयाणि आरोवित्ता समणे य समणीओ य खामेत्ता, अम्हेहिं सद्धिं विपुलं पव्वयं तं चेव निरवसेसं जाव अहाणुपुव्वीए कालगए। इमे य से आयारभंडए।

भंते! ति भगवं गोयमे समणं भगवं महावीरं वंदंति नमंसंति, २ एवं वयासी-एवं खलु देवाणुप्पियाणं अंतेवासी खंदए नामं अणगारे कालमासे कालं किच्चा कहिं गए, कहिं उववण्णे? 'गोयमा!' इ समणे भगवं महावीरे भगवं गोयमं एवं वयासी-एवं खलु गोयमा! ममं अंतेवासी खंदए नामं अणगारे पगतिभद्दए जाव से णं मए अब्भणुण्णाए समाणे सयमेव पंच महव्वयाइं आरोवित्ता तं चेव सव्वं अविसेसियं नेयव्वं जाव आलोइयपडिक्कंते समाहिपते कालमासे कालं किच्चा अच्चुए कप्पे देवत्ताए उववण्णे। तत्थ णं अत्थेगइयाणं देवाणं बावीसं सागरोवमाइं ठिती प०। तत्थ णं खंदयस्स वि देवस्स बावीसं सागरोवमाइं ठिती पण्णत्ता।

से णं भंते! खंदए देवं ताओ देवलोगाओ आउक्खएणं भवक्खएणं ठितीखएणं अणंतरं चयं चइत्ता कहिं गच्छिहिति? कहिं उववज्जिहिति? गोयमा! महाविदेहे वासे

सिज्झिहिति बुज्झिहिति मुच्चिहिति परिनिव्वाहिति सव्वदुक्खाणमंतं करेहिति।

**\*बितीयसते पढमो उद्देशो समतो\***

**० बीओ उद्देशो ०**

[११८] कति णं भंते! समुग्घात्ता पण्णत्ता? गोयमा! सत्त समुग्घाया पण्णत्ता, तं जहा-छाउमत्थियसमुग्घायवज्जं समुग्घायपदं नेयव्वं।

**\*बितीए सए बितीओ उद्देशो समतो\***

**० तइओ उद्देशो ०**

[११९] कति णं भंते! पुढवीओ पण्णत्ताओ? जीवाभिगमे नेरइयाणं जो बितिओ उद्देशो सो नेयव्वो।

[१२०] पुढविं ओगाहिता निरया संठाणमेव बाहल्लं।

विखंभ परिखेवो वण्णो गंधाय फासोय ॥

[१२१] किं सव्वे पाणा उववन्नपुव्वा? हंता, गोयमा! असइं अदुवा अणंतखुतो।

**\*बितीए सए तइओ उद्देशो समतो\***

**० चउत्थो उद्देशो ०**

[१२२] कति णं भंते! इंदिया पण्णत्ता? गोयमा! पंच इंदिया पण्णत्ता, तं जहा- पढमिल्लो इंदियउद्देशओ नेयव्वो, 'संठाणं बाहल्लं पोहतं जाव अलोगो।

**\*बितीए सए चउत्थो उद्देशो समतो\***

## ० पंचमो उद्देशो ०

[१२३] अण्णउत्थिया णं भंते! एवमाइक्खंति भासंति पण्णवेति परूवेति एवं खलु नियंठे कालगते समाणे देवब्भूएणं अप्पाणेणं से णं तत्थ णो अन्ने देवे, नो अन्नेसिं देवाणं देवीओ अहिजुंजिय २ परियारेइ , णो अप्पणच्चियाओ देवीओ अभिजुंजिय २ परियारेइ, अप्पणा मेव अप्पाणं विउच्चिय २ परियारेइ; एगे वि य णं जीवे एगेणं समएणं दो वेदे वेदेइ, तं जहा-इत्थिवेदं च पुरिसवेदं च। एवं परउत्थियवत्तव्वया नेयव्वा जाव इत्थिवेदं च पुरिसवेदं च। से कहमेयं भंते! एवं? गोयमा! जं णं ते अन्नउत्थिया एवमाइक्खंति जाव इत्थिवेदं च पुरिसवेदं च। जे ते एवमाहंसु मिच्छं ते एवमाहंसु, अहं पुण गोयमा! एवमाइक्खामि भा० प० पर०.-एवं खलु निअंठे कालगए समाणे अन्नयरेसु देवलोएसु देवताए उववत्तारो भवंति महिड्ढिएसु जाव महाणुभागोसु दूरगतीसु चिरट्ठितीएसु।

से णं तत्थ देवे भवति महिड्ढीए जाव दिसाओ उज्जोवेमाणे पभासेमाणे जाव पडिरूवे। से णं तत्थ अन्ने देवे, अन्नेसिं देवाणं देवीओ अभिजुंजिय २ परियारेइ, अप्पणच्चियाओ देवीओ अभिजुंजिय २ परियारेइ २, नो अप्पणामेव अप्पाणं विउच्चिय २ परियारेइ ; एगे वि य णं जीवे एगेणं समएणं एगं वेदं वेदेइ, तं जहा-इत्थिवेदं वा पुरिसवेदं वा, जं समयं इत्थिवेदं वेदेइ णो तं समयं पुरिसवेयं वेएइ, जं समयं पुरिसवेयं वेएइ णो तं समयं इत्थिवेयं वेदेइ, इत्थिवेयस्स उदएणं नो पुरिसवेदं वेएइ, पुरिसवेयस्स उदएणं नो इत्थिवेयं वेएइ। एवं खलु एगे जीवे एगेणं समएणं एगं वेदं वेदेइ, तं जहा-इत्थिवेयं वा पुरिसवेयं वा। इत्थी इत्थिवेएणं उदिण्णेणं पुरिसं पत्थेइ, पुरिसो पुरिसवेएणं उदिण्णेणं इत्थिं पत्थेइ। दो वि ते अन्नमन्नं पत्थेति, तं जहा-इत्थी वा पुरिसं, पुरिसे वा इत्थिं।

[१२४] उदगगब्भे णं भंते! 'उदगगब्भे'ति कालतो केवच्चिरं होइ? गोयमा! जहन्नेणं एककं समयं, उक्कोसेणं छम्मासा।

तिरिक्खजोणियगब्भे णं भंते! 'तिरिक्खजोणियगब्भे' ति कालओ केवच्चिरं होति? गोयमा! जहन्नेणं अंतोमुहुत्तं, उक्कोसेणं अट्ठ संवच्छराइ।

मणुस्सीगब्भे णं भंते! 'मणुस्सीगब्भे'ति कालओ केवच्चिरं होइ? गोयमा! जहन्नेणं अंतोमुहुत्तं, उक्कोसेणं बारस संवच्छराइ।

[१२५] कायभवत्थे णं भंते! 'कायभवत्थे'ति कालओ केवच्चिरं होइ? गोयमा! जहन्नेणं अंतो-मुहुत्तं, उक्कोसेणं चउव्वीसं संवच्छराइ।

[१२६] मणुस्स-पंचेदियतिरिक्खजोणियबीए णं भंते! जोणिब्भूए केवतियं कालं संचिट्ठइ? गोयमा! जहन्नेणं अंतोमुहुत्तं, उक्कोसेणं बारस मुहुत्ता।

[१२७] एगजीवे णं भंते! एगभवग्गहणेणं केवतियाणं पुत्ताए हव्वमागच्छंति? गोयमा! जहन्नेणं इक्कस्स वा दोण्हं वा तिण्हं वा, उक्कोसेणं सहस्सपुहत्तं जीवा णं पुत्ताए हव्वमागच्छंति।

[१२८] एगजीवस्स णं भंते! एगभवग्गहणेणं केवइया जीवा पुत्ताए हव्वमागच्छंति? गोयमा! जहन्नेणं इक्को वा दो वा तिण्णि वा, उक्कोसेणं सयसहस्सपुहत्तं जीवा णं पुत्ताए हव्वमागच्छंति।

से केणट्ठेणं भंते! एवं वुच्चइ-जाव हव्वमागच्छंति? गोयमा! इत्थीए य पुरिसस्स य कम्मकडाए जोणीए मेहुणवतिए नामं संजोए समुप्पज्जइ। ते दुहओ सिणेहं संचिणंति, २ तत्थ णं जहन्नेणं

एक्को वा दो वा तिण्णि वा, उक्कोसेणं सयसहस्सपुहंतं जीवा णं पुत्तताए हव्वमागच्छंति। से तेणट्ठेणं जाव हव्वमागच्छंति।

**[१२९]** मेहुणं भंते! सेवमाणस्स केरिसे असंजमे कज्जइ? गोयमा! से जहानामए केइ पुरिसे रूयनालियं वा बूरनालियं वा तत्तेणं कणएणं समभिधंसेज्जा। एरिसए णं गोयमा! मेहुणं सेवमाणस्स असंजमे कज्जइ।

सेवं भंते! सेवं भंते! जाव विहरति।

**[१३०]** तए णं समणे भगवं महावीरे रायगिहाओ नगराओ गुणसिलाओ चेइयाओ पडिनिक्खमइ, २ बहिया जणवयविहारं विहरति।

तेणं कालेणं २ तुंगिया नामं नगरी होत्था। वण्णओ। तीसे णं तुंगियाए नगरीए बहिया उत्तरपुरत्थिमे दिसीभाए पुप्फवतिए नामं चेतिए होत्था। वण्णओ। तत्थ णं तुंगियाए नगरीए बहवे समणोवासया परिवसंति अइढा दिता वित्थिण्णविपुलभवण-सयणास्सण-जाण-वाहणाइण्णा बहुधण-बहुजायरूव-रयया आयोग-पयोगसंपउत्ता विच्छड्डियविपुलभत्त-पाणा बहुदासी-दास-गो-महिस-गवेलयप्पभूता बहुजणस्स अपरिभूता अभिगतजीवाजीवा उवलद्धपुण्ण-पावा आसवसंवर-निज्जर-किरियाहिकरण-बंधमोक्ख-कुसला असहेज्जदेवासुर-नाग-सुवण्ण-जक्खरक्खस-किन्नर-किंपुरिस-गरुल-गंधव्व-महोरगादिएहिं देवगणेहिं निग्गंथातो पावयणातो अणत्तिकमणिज्जा, .....

णिग्गंथे पावयणे निस्संकिया निक्कंखिता निव्वित्तिगिच्छा लद्धट्ठा गहितट्ठा पुच्छितट्ठा अभिगतट्ठा विणिच्छियट्ठा, अट्ठि-मिजपेम्माणुरागरत्ता अयमाउसो! निग्गंथे पावयणे अट्ठे, अयं परमट्ठे, सेसे अणट्ठे, ऊसियफलिहा अवंगुतदुवारा चियतंतेउर-घरप्पवेसा, बहूहिं सीलव्वत-गुण-वेरमण-पच्चक्खाणपोसहोववासेहिं चाउद्दसट्ठमुद्धिट्ठपुण्णमासिणीसु पंडिपुण्णं पोसहं सम्मं अणुपालेमाणा, समणे निग्गंथे फासुएसणिज्जेणं असण-पाण-खाइम-साइमेणं वत्थ-पडिग्गह-कंबल-पादपुंछणेणं पीढ-फलग-सेज्जा-संथारगेणं ओसह-भेसज्जेण य पडिलाभेमाणा, अहापरिग्गहिएहिं तवोकम्मोहिं अप्पाणं भावेमाणा विहरंति।

**[१३१]** तेणं कालेणं २ पासावच्चिज्जा थेरा भगवंतो जातिसंपन्ना कुलसंपन्ना बलसंपन्ना रूवसंपन्ना विणयसंपन्ना णाणसंपन्ना दंसणसंपन्ना चरित्तसंपन्ना लज्जासंपन्ना लाघवसंपन्ना ओयंसी तेयंसी वच्चंसी जसंसी जितकोहा जियमाणा जियमाया जियलोभा जियनिद्धा जित्तिंदिया जितपरीसहा जीवियासा-मरणभयविप्पमुक्का जाव कुतियावणभूता बहुस्सुया बहुपरिवारा, पंचहिं अणगारसतेहिं सद्धिं संपरिवुडा, अहाणुपुव्विं चरमाणा, गामाणुगामं दूइज्जमाणा, सुहंसुहेणं विहरमाणा जेणेव तुंगिया नगरी, जेणेव पुप्फवतीए चेतिए तेणेव उवागच्छंति, २ अहापडिरूवं उग्गहं ओगिण्हिताणं संजमेणं तवसा अप्पाणं भावेमाणा विहरंति।

**[१३२]** तए णं तुंगियाए नगरीए सिंघाइग-तिग-चउक्क-चच्चर-महापहपहेसु जाव एगदिसाभिमुहा णिज्जायंति।

तए णं ते समणोवासया इमीसे कहाए लद्धट्ठा समाणा हट्ठनुट्ठा जाव सद्दवैति, २ एवं वदासी- एवं खलु देवाणुप्पिया! पासावच्चेज्जा थेरा भगवंतो जातिसंपन्ना जाव अहापडिरूवं उग्गहं उगिण्हिताणं संजमेणं तवसा अप्पाणं भावेमाणा विहरंति।

तं महाफलं खलु देवाणुप्पिया! तहारूवाणं थेराणं भगवंताणं णाम-गोत्तस्स वि सवणयाए

जाव गहणयाए?,

तं गच्छामो णं देवाणुप्पिया! थेरे भगवंते वंदामो नमंसामो जाव पज्जुवासामो, एयं णं इहभवे वा परभवे वा जाव अणुगाभियत्ताए भविस्सतीति कट्टु अन्नमन्नस्स अंतिए एयमट्ठं पडिसुणैति, २ जेणेव सयाइं सयाइं गिहाइं तेणेव उवागच्छंति, २ ण्हाया कयबलिकम्मा कतकोउयमंगलपायच्छिता, सुद्धप्पावेसाइं मंगल्लाइं वत्थाइं पवराइं परिहिया, अप्पमहग्घाभरणालंकियसरीरा सएहिं २ गेहेहिंतो पडिनिक्खमंति, २ ता एगतओ मेलायंति, २ पायविहारचारेणं तुंगियाए नगरीए मज्झंमज्झेणं णिग्गिच्छंति, २ जेणेव पुप्फवतीए चेतिए तेणेव उवागच्छंति, २ थेरे भगवंते पंचविहेणं अभिगमेणं अभिगच्छंति,

तं जहा-सचित्ताणं दव्वाणं विओसरणताए, अचित्ताणं दव्वाणं अविओसरणताए, एगसाडिएणं उत्तरासंगकरणेणं चक्खुप्पासे अंजलिप्पग्गहेणं, मणसो एगतीकरणेणं;

जेणेव थेरा भगवंतो तेणेव उवागच्छंति, २ तिक्खुत्तो आयाहिणं पयाहिणं करंति, २ जाव तिविहाए पज्जुवासणाए पज्जुवासंति।

**[१३३]** तए णं ते थेरा भगवंतो तेसिं समणोवासयाणं तीसे य महतिमहालियाए परिसाए चाउज्जामं धम्मं परिकर्हेति, जहा केसिसामिस्स जाव समणोवासियत्ताए आणाए आराहगे भवति जाव धम्मो कहिओ।

तए णं ते समणोवासया थेराणं भगवंताणं अंतिए धम्मं सोच्या निसम्म हट्ठतुट्ठ जाव ह्यहिदया तिक्खुत्तो आयाहिणपयाहिणं करंति, २ जाव तिविहाए पज्जुवासणाए पज्जुवासंति, २ एवं वदासी-संजमे णं भंते! किंफले? तवे णं भंते! किंफले? तए णं ते थेरा भगवंतो ते समणोवासए एवं वदासी:-

संजमे णं अज्जो! अण्हयफले, तवे वोदाणफले।

तए णं ते समणोवासया थेरे भगवंते एवं वदासी-

जइ णं भंते! संजमे अण्हयफले, तवे वोदाणफले किंपत्तियं णं भंते! देवा देवलोएसु उववज्जंति?

तत्थ णं कालियपुत्ते नामं थेरे ते समणोवासए एवं वदासी-पुव्वतवेणं अज्जो! देवा देवलोएसु उववज्जंति।

तत्थ णं मेहिले नामं थेरे ते समणोवासए एवं वदासी-पुव्वसंजमेणं अज्जो! देवा देवलोएसु उववज्जंति।

तत्थ णं आणंदरक्खिए णामं थेरे ते समणोवासए एवं वदासीकम्मियाए अज्जो! देवा देवलोएसु उववज्जंति।

तत्थ णं कासवे णामं थेरे ते समणोवासए एवं वदासी-

संगियाए अज्जो! देवा देवलोएसु उववज्जंति, पुव्वतवेणं पुव्वसंजमेणं कम्मियाए संगियाए अज्जो! देवा देवलोएसु उववज्जंति। सच्चे णं एस मट्ठे, नो चेव णं आतभाववत्त्वयाए।

तए णं ते समणोवासया थेरेहिं भगवंतेहिं इमाइं एयारूवाइं वागरणाइं वागरिया समाणा हट्ठतुट्ठा थेरे भगवंते वंदंति नमंसंति, २ पसिणाइं पुच्छंति, २ अट्ठाइं उवादियंति, २ उट्ठाए उट्ठंति, २ थेरे

भगवंते त्तिक्खुत्तो वंदंति णमंसंति, २ थेराणं भगवंताणं अंतियाओ पुप्फवतियाओ चेइयाओ पडिनिक्खमंति, २ जामेव दिसिं पाठ्ठभूया तामेव दिसिं पडिगया।

तए णं ते थेरा अन्नया कयाइ तुंगियाओ पुप्फवतिचेइयाओ पडिनिग्गच्छंति, २ बहिया जणवयविहारं विहरंति।

[१३४] तेषं कालेणं २ रायगिहे नामं नगरे जाव परिसा पडिगया।

तेषं कालेणं २ समणस्स भगवओ महावीरस्स जेट्ठे अंतेवासी इंदभूतीनामं अणगारे जाव संखित्तविउलतेयलेस्से छट्ठंछट्ठेणं अनिक्खित्तेणं तवोकम्मेषं संजमेणं तवसा अप्पाणं भावेमाणे जाव विहरति।

तए णं से भगवं गोतमे छट्ठक्खमणपारणगंसि पढमाए पोरिसीए सज्झायं करेइ, बीयाए पोरिसीए झाणं झियायइ, ततियाए पोरिसीए अतुरियमचवलमसंभंते मुहपोत्तियं पडिलेहेति, २ भायणाइं वत्थाइं पडिलेहेइ, २ भायणाइं पमज्जति, २ भायणाइं उग्गाहेति, २ जेणेव समणे भगवं महावीरे तेषेव उवागच्छति, २ समणं भगवं महावीरं वंदति नमंसति, २ एवं वदासी-इच्छामि णं भंते! तुब्भेहिं अब्भणुण्णाए छट्ठक्खमणपारणगंसि रायगिहे नगरे उच्च-नीयमज्झिमाइं कुलाइं घरसमुदाणस्स भिक्खायरियाए अडित्तए। अहासुहं देवाणुप्पिया! मा पडिबंधं करेह।

तए णं भगवं गोतमे समणेणं भगवया महावीरेणं अब्भणुण्णाए समाणे समणस्स भगवओ महावीरस्स अंतियाओ गुणसिलाओ चेतियाओ पडिनिक्खमइ, २ अतुरितमचवल- मसंभंते जुगंतरपलोयणाए दिट्ठीए पुरतो रियं सोहेमाणे २ जेणेव रायगिहे नगरे तेषेव उवागच्छइ, २ रायगिहे नगरे उच्चनीय-मज्झिमाइं कुलाइं घरसमुदाणस्स भिक्खायरियं अडति।

तए णं से भगवं रायगिहे नगरे जाव अडमाणे बहुजणसद्धं निसामेति-एवं खलु देवाणुप्पिया! तुंगियाए नगरीए बहिया पुप्फवतीए चेतिए पासावच्चिज्जा थेरा भगवंतो समणोवासएहिं इमाइं एतारूवाइं वागरणाइं पुच्छिया-संजमे णं भंते! किंफले, तवे णं भंते! किंफले?। तए णं ते थेरा भगवंतो ते समणोवासए एवं वदासी-संजमे णं अज्जो! अणण्हयफले, तवे वोदाणफले तं चेव जाव पुव्वतवेणं पुव्वसंजमेणं कम्मियाए संगियाए अज्जो! देवा देवलोएसु उववज्जंति, सच्चे णं एस मट्ठे, णो चेव णं आयभाववत्तव्वयाए से कहमेतं मन्ने एवं?।

तए णं से भगवं गोयमे इमीसे कहाए लद्धट्ठे समाणे जायसइडे जाव समुप्पन्नकोतुहल्ले अहापज्जतं समुदाणं गेण्हति, २ रायगिहातो नगरातो पडिनिक्खमति, २ अतुरियं जाव सोहेमाणे २ जेणेव गुणसिलए चेतिए जेणेव समणे भगवं महावीरे तेषेव उवा., २ सम० भ० महावीरस्स अदूरसामंते गमणागमणाए पडिक्कमति, एसणमणेसणं आलोएति, २ भत्तपाणं पडिदंसेति, २ समणं भ० महावीरं जाव एवं वदासि-एवं खलु भंते! अहं तुब्भेहिं अब्भणुण्णाते समाणे रायगिहे नगरे उच्च-नीय-मज्झिमाणि कुलाणि घरसमुदाणस्स भिक्खायरियाए अडमाणे बहुजणसद्धं निसामेमि 'एवं खलु देवा.! तुंगियाए नगरीए बहिया पुप्फवईए चेइए पासावच्चिज्जा थेरा भगवंतो समणोवासएहिं इमाइं एतारूवाइं वागरणाइं पुच्छिया-संजमे णं भंते! किंफले? तवे किंफले? तं चेव जाव सच्चे णं एस मट्ठे, णो चेव णं आयभाववत्तव्वयाए'।

तं पभू णं भंते! ते थेरा भगवंतो तेषिं समणोवासयाणं इमाइं एतारूवाइं वागरणाइं वागरित्तए? उदाहु अप्पभू?, समिया णं भंते! ते थेरा भगवंतो तेषिं समणोवासगाणं इमाइं एतारूवाइं वागर-

णाइं वागरित्तए? उदाहु असमिया?, आउज्जिया णं भंते! ते थेरा भगवंतो तेसिं समणोवासयाणं इमाइं एयारूवाइं वागरणाइं वागरित्तए? उदाहु अणाउज्जिया?, पलिउज्जिया णं भंते! ते थेरा भगवंतो तेसिं समणोवासयाणं इमाइं एयारूवाइं वागरणाइं वागरित्तए? उदाहु अपलिउज्जिया?, पुव्वतवेणं अज्जो! देवा देवलोएसु उववज्जंति, पुव्वसंजमेणं., कम्मियाए., संगियाए., पुव्वतवेणं पुव्वसंजमेणं कम्मियाए संगियाए अज्जो! देवा देवलोएसु उववज्जंति। सच्चे णं एस मट्ठे णो चेव णं आयभाववत्तव्वयाए?

पभू णं गोतमा! ते थेरा भगवंतो तेसिं समणोवासयाणं इमाइं एयारूवाइं वागरणाइं वागरेत्तए, णो चेव णं अप्पभू, तह चेव नेयव्वं अविसेसियं जाव पभू समिया आउज्जिया पलिउज्जिया जाव सच्चे णं एस मट्ठे, णो चेव णं आयभाववत्तव्वयाए।

अहं पि य णं गोयमा! एवमाइक्खामि भासेमि पण्णवेमि परूवेमि-पुव्वतवेणं देवा देवलोएसु उववज्जंति, पुव्वसंजमेणं देवा देवलोएसु उववज्जंति, कम्मियाए देवा देवलोएसु उववज्जंति, संगियाए देवा देवलोएसु उववज्जंति, पुव्वतवेणं पुव्वसंजमेणं कम्मियाए संगियाए अज्जो! देवा देवलोएसु उववज्जंति; सच्चे णं एस मट्ठे, णो चेव णं आयभाववत्तव्वयाए।

**[१३५]** तहारूवं णं भंते! समणं वा माहणं वा पज्जुवासमाणस्स किंफला पज्जुवासणा? गोयमा! सवणफला।

से णं भंते! सवणे किंफले? णाणफले।

से णं भंते! नाणे किंफले? विण्णाणफले।

से णं भंते! विण्णाणे किंफले? पच्चक्खाणफले।

से णं भंते! पच्चक्खाणे किंफले? संजमफले।

से णं भंते! संजमे किंफले? अणण्हयफले।

एवं अणण्हये तवफले। तेवे वोदाणफले। वोदाणे अकिरियाफले।

सा णं भंते! अकिरिया किंफला? सिद्धिपज्जवसाणफला पण्णता गोयमा!। गाहा-

**[१३६]** सवणे णाणे य विण्णाणे पच्चक्खाणे य संजमे।

अणण्हये तवे चेव वोदाणे अकिरिया सिद्धी ॥

**[१३७]** अण्णउत्थिया णं भंते! एवमाइक्खंति भासेति पण्णवेति परूवेति एवं खलु रायगिहस्स नगरस्स बहिया वेभारस्स पव्वयस्स अहे एत्थ णं महं एगे हरए अघे पण्णते अणेगाइं जोयणाइं आयाम-विक्खंभेणं नाणादुमसंडमंडिउद्देशे सस्सिरीए जाव पडिरूवे। तत्थ णं बहवे ओराला बलाहया संसेयंति सम्मुच्छंति वासंति तव्वतिरित्ते य णं सया समियं उसिणे २

आउकाए अभिनिस्सवइ। से कहमेतं भंते! एवं ? गोयमा! जं णं ते अण्णउत्थिया एवमाइक्खंति जाव ते एवं परूवेति मिच्छं ते एवमाइक्खंति जाव सव्वं नेयव्वं। अहं पुण गोतमा! एवमाइक्खामि भा० पं० प०-एवं खलु रायगिहस्स नगरस्स बहिया वेभारस्स पव्वतस्स अदूरसामंते एत्थ णं महं महातवोवतीरप्पभवे नामं पासवणे पण्णते, पंच धणुसताणि आयाम-विक्खंभेणं नाणादुमसंडमंडिउद्देशे सस्सिरीए पासादीए दरिसणिज्जे अभिरूवे पडिरूवे। तत्थ णं बहवे उसिणजोणिया जीवा य पोग्गला य उदगत्ताए वक्कमंति विउक्कमंति चयंति उववज्जंति तव्वतिरित्ते वि य णं सया समितं उसिणे २ आउयाए अभिनिस्सवति-एस णं गोतमा! महातवोवतीरप्पभवे पासवणे, एस णं गोतमा! महातवोवतीरप्पभवस्स

पासवणस्स अट्ठे पण्णत्ते।

सेवं भंते! २ ति भगवं गोयमे समणं भगवं महावीरं वंदति नमंसति।।

**\*बितीए सए पंचमो उद्देशो समतो\***

**० छट्ठो उद्देशो ०**

[१३८] से पूणं भंते! 'मन्नामी'ति ओधारिणी भासा? एवं भासापदं भाणियत्वं।

**\*बितीए सए छट्ठो उद्देशो समतो\***

**० सत्तमो उद्देशो ०**

[१३९] कइविहा णं भंते! देवा पण्णत्ता? गोयमा! चउत्विहा देवा पण्णत्ता, तं जहा-भवणवति-वाणमंतर-जोतिस-वेमाणिया।

चउत्विहदेवठाण-कप्पपइट्ठाणाइजाणणत्थं पण्णवणासुत्त-जीवाभिगम सुत्ता व लोयण निद्देशो

कहि णं भंते! भवणवासीणं देवाणं ठाणा पण्णत्ता? गोयमा! इमीसे रयणप्पभाए पुढवीए जहा ठाणपदे देवाणं वत्तव्वया सा भाणियत्वा। उववादेणं लोयस्स असंखेज्जइभागे। एवं सत्वं भाणियत्वं जाव सिद्धगंडिया समत्ता।

कप्पाण पत्तिट्ठाणं बाहल्लुच्चत्तमेव संठाणं।

जीवाभिगमे जो वेमाणियुद्देशो सो भाणियत्त्वो सत्त्वो।

**\*बितीए सए सत्तमो उद्देशो समतो\***

**० अट्ठमो उद्देशो ०**

[१४०] कहि णं भंते! चमरस्स असुरिदस्स असुररण्णो सभा सुहम्मा पण्णत्ता? गोयमा! जंबुद्वीवे दीवे मंदरस्स पव्वयस्स दाहिणेणं तिरियमसंखेज्जे दीव-समुद्दे वीईवइत्ता अरुणवरस्स दीवस्स बाहिरिल्लातो वेइयंतातो अरुणोदयं समुद्धं बायालीसं जोयणसहस्साइं ओगाहिता एत्थ णं चमरस्स असुरिदस्स असुररण्णो तिगिंछिकूडे नामं उप्पायपव्वत्ते पण्णत्ते, सत्तरसएक्कवीसे जोयणसत्ते उड्ढं उच्चत्तेणं, चत्तारितीसे जोयणसत्ते कोसं च उव्वेहेणं; गोत्थुभस्स आवासपव्वयस्स पमाणेणं नेयत्वं, नवरं उवरिल्लं पमाणं मज्झे भाणियत्वं जाव मूले वित्थडे, मज्झे संखित्ते, उप्पिं विसाले, वरवइरविग्गहिए महामउदंसंठाणसंठिए सत्वरयणामए अच्छे जाव पडिरूवे। से णं एगाए पउमवरवेइयाए एगेणं वणसंडेण य सत्त्वतो समंता संपरिक्खित्ते। पउमवरवेइयाए वणसंडस्स य वण्णओ। तस्स णं तिगिंछिकूडस्स उप्पायपव्वयस्स उप्पिं बहुसमरमणिज्जे भूमिभागे पण्णत्ते। वण्णओ। तस्स णं बहुसमरमणिज्जस्स भूमिभागस्स बहुमज्जइदेसभागे। एत्थ णं महं एगे पासातवडिसए पण्णत्ते अइढाइज्जाइं जोयणसयाइं उड्ढं उच्चत्तेणं, पणवीसं जोयणसयं विक्खंभेणं। पासायवण्णओ।

उल्लोयभूमिवण्णओ। अट्ठ जोयणाइं मणिपेढिया। चमरस्स सीहासणं सपरिवारं भाणियत्वं। तस्स णं तिगिंछिकूडस्स दाहिणेणं छक्कोडिसए पणपन्नं च कोडीओ पणतीसं च सतसहस्साइं पण्णासं च सहस्साइं अरुणोदए समुद्दे तिरियं वीइवइत्ता, अहे य रतणप्पभाए पुढवीए चत्तालीसं जोयणसहस्साइं ओगाहिता एत्थ णं चमरस्स असुरिदस्स असुररण्णो चमरचंचा नामं रायहाणी पण्णत्ता, एगं जोयणसतसहस्सं आयाम-विक्खंभेणं जंबुद्वीवपमाणा। ओवारियलेणं सोलस जोयणसहस्साइं आयामविक्खं-

भेणं, पन्नासं जोयणसहस्साइं पंच य सताणउए जोयणसए किंचिविसेसूणे परिक्खेवेणं, सव्वप्पमाणं वेमाणियप्पमाणस्स अद्धं नेयव्वं। सभा सुहम्म उतरपुरत्थिमेणं, जिणघरं, ततो उववायसभा हरओ अभिसेय. अलंकारो जहा विजयस्स।

उववाओ संकप्पो अभिसेय विभूसणा य ववसाओ।

अच्चणिय सुहगमो वि य चमर परिवार इड्ढतं ।।

**\*बितीए सए अट्ठमो उद्देशो समतो\***

### ० नवमो उद्देशो ०

[१४१] किमिदं भंते! 'समयखेते'ति पवुच्चति? गोयमा! अड्ढाड्ढज्जा दीवा दो य समुद्दा-एस पं एवतिए 'समयखेते'ति पवुच्चति। 'तत्थ पं अयं जंबुदीवे दीवे सव्वदीव-समुद्दाणं सव्वब्भंतरए' एवं जीवाभिगमवत्तव्वया नेयव्वा जाव अब्भितरं पुक्खरद्धं जोइसविहूणं।

**\*बितीए सए नवमो उद्देशो समतो\***

### ० दसमो उद्देशो ०

[१४२] कति पं भंते! अत्थिकाया पण्णता? गोयमा! पंच अत्थिकाया पण्णता, तं जहा-धम्मत्थिकाए अधम्मत्थिकाए आगासत्थिकाए जीवत्थिकाए पोग्गलत्थिकाए।

धम्मत्थिकाए पं भंते! कतिवण्णे कतिगंधे कतिरसे कतिफासे? गोयमा! अवण्णे अगंधे अरसे अफासे अरूवी अजीवे सासते अवट्ठिते लोगदव्वे। से समासतो पंचविहे पण्णते, तं जहा-दव्वतो खेततो कालतो भावतो गुणतो। दव्वतो पं धम्मत्थिकाए एगे दव्वे। खेततो पं लोगप्पमाणमेते। कालतो न कदायि न आसि, न कयाइ नत्थि, जाव निच्चे। भावतो अवण्णे अगंधे अरसे अफासे। गुणतो गमणगुणे।

अधम्मत्थिकाए वि एवं चेव। नवरं गुणतो ठाणगुणे।

आगासत्थिकाए वि एवं चेव। नवरं खेतओ पं आगासत्थिकाए लोयालयप्पमाणमेते अणंते चेव जाव गुणओ अवगाहणागुणे।

जीवत्थिकाए पं भंते! कतिवण्णे कतिगंधे कतिरसे कइफासे? गोयमा! अवण्णे जाव अरूवी जीवे सासते अवट्ठिते लोगदव्वे। से समासओ पंचविहे पण्णते; तं जहा-दव्वतो जाव गुणतो। दव्वतो पं जीवत्थिकाए अणंताइं जीवदव्वाइं। खेतओ लोगप्पमाणमेते। कालतो न कयाइ न आसि जाव निच्चे। भावतो पुण अवण्णे अगंधे अरसे अफासे। गुणतो उवयोगगुणे।

पोग्गलत्थिकाए पं भंते! कतिवण्णे कतिगंधे .रसे .फास? गोयमा! पंचवण्णे पंचरसे दुगंधे अट्ठफासे रूवी अजीवे सासते अवट्ठिते लोगदव्वे। से समासओ पंचविहे पण्णते; तं जहा-दव्वतो खेतओ कालतो भावतो गुणतो। दव्वतो पं पोग्गलत्थिकाए अणंताइं दव्वाइं। खेततो लोगप्पमाणमेते। कालतो न कयाइ न आसि जाव निच्चे। भावतो वण्णमंते गंध. रस. फासमंते। गुणतो गहणगुणे।

[१४३] एगे भंते! धम्मत्थिकायपदेसे 'धम्मत्थिकाए'ति वत्तव्वं सिया? गोयमा! णो इणट्ठे समट्ठे।

एवं दोण्णि तिण्णि चत्तारि पंच छ सत अट्ठ नव दस संखेज्जा असंखेज्जा भंते! धम्मत्थिकायपदेसा 'धम्मत्थिकाए'ति वत्तव्वं सिया? गोयमा! णो इणट्ठे समट्ठे।

एगपदेसूणे वि य णं भंते! धम्मत्थिकाए 'धम्मत्थिकाए'ति वत्तत्वं सिया? णो इणट्ठे समट्ठे।

से केणट्ठेणं भंते! एवं वुच्चइ एगे धम्मत्थिकायपदेसे नो धम्मत्थिकाए ति वत्तत्वं सिया जाव एगपदेसूणे वि य णं धम्मत्थिकाए नो धम्मत्थिकाए ति वत्तत्वं सिया?। से नूणं गोयमा! खंडे चक्के? सगले चक्के? भगवं! नो खंडे चक्के, सगले चक्के। एवं छत्ते चम्मे दंडे दूसे आयुहे मोयए। से तेणट्ठेणं गोयमा! एवं वुच्चइ-एगे धम्मत्थिकायपदेसे नो धम्मत्थिकाए ति वत्तत्वं सिया जाव एगपदेसूणे वि य णं धम्मत्थिकाए नो धम्मत्थिकाए ति वत्तत्वं सिया।

से किं खाइं णं भंते! धम्मत्थिकाए ति वत्तत्वं सिया? गोयमा! असंखेज्जा धम्मत्थिकाय-पदेसा ते सव्वे कसिणा पडिपुण्णा निरवसेसा एगग्गहणगहिया, एस णं गोयमा! धम्मत्थिकाए ति वत्तत्वं सिया।

एवं अहम्मत्थिकाए वि।

आगासत्थिकाय-जीवत्थिकाय-पोग्गलत्थिकाया वि एवं चेव। नवरं पदेसा अणंता भाणियच्चा। सेसं तं चेव।

**[१४४]** जीवे णं भंते! सउट्ठाणे सकम्मे सबले सवीरिए सपुरिसक्कारपरक्कमे आयभावेणं जीवभावं उवदंसेतीति वत्तत्वं सिया? हंता, गोयमा! जीवे णं सउट्ठाणे जाव उवदंसेतीति वत्तत्वं सिया।

से केणट्ठेणं जाव वत्तत्वं सिया? गोयमा! जीवे णं अणंताणं आभिणिबोहियनाणपज्जवाणं एवं सुतनाणपज्जवाणं ओहिनाणपज्जवाणं मणपज्जवनाणपज्जवाणं केवलनाणपज्जवाणं मतिअण्णाण-पज्जवाणं सुतअण्णाणपज्जवाणं विभंगणाणपज्जवाणं चक्खुदंसणपज्जवाणं अचक्खुदंसणपज्जवाणं ओहि-दंसणपज्जवाणं केवलदंसणपज्जवाणं उवओगं गच्छति, उवयोगलक्खणे णं जीवे। से तेणट्ठेणं एवं वुच्चइ-गोयमा! जीवे णं सउट्ठाणे जाव वत्तत्वं सिया।

**[१४५]** कतिविहे णं भंते! आकासे पण्णत्ते? गोयमा! दुविहे आगासे पण्णत्ते, तं जहा-लोयाकासे य अलोयागासे य।

लोयाकासे णं भंते! किं जीवा जीवदेसा जीवपदेसा, अजीवा अजीवदेसा अजीवपएसा? गोयमा! जीवा वि जीवदेसा वि जीवपदेसा वि, अजीवा वि अजीवदेसा वि अजीवपदेसा वि। जे जीवा ते नियमा एगिंदिया बेइंदिया तेइंदिया चउरिंदिया पंचेदिया अणिंदिया। जे जीवदेसा ते नियमा एगिंदियदेसा जाव अणिंदियदेसा। जे जीवपदेसा ते नियमा एगिंदियपदेसा जाव अणिंदियपदेसा। जे अजीवा ते दुविधा पण्णत्ता, तं जहा-रूवी य अरूवी य। जे रूवी ते चउव्विधा पण्णत्ता, तं जहा-खंधा खंधेसा खंदपदेसा परमाणुपोग्गला। जे अरूवी ते पंचविधा पण्णत्ता, तं जहा-धम्मत्थिकाए, नो धम्मत्थिकायस्स देसे, धम्मत्थिकायस्स पदेसा, अधम्मत्थिकाए, नो अधम्मत्थिकायस्स देसे, अधम्मत्थिकायस्स पदेसा, अद्धासमए।

**[१४६]** अलोगागासे णं भंते! किं जीवा? पुच्छा तध चेव । गोयमा! नो जीवा जाव नो अजीवप्पएसा। एगे अजीवदव्वेसे अगुरुयलहुए अणंतेहिं अगुरुयलहुयगुणेहिं संजुत्ते सव्वागासे अणंतभागूणे।

**[१४७]** धम्मत्थिकाए णं भंते! केमहालए पण्णत्ते? गोयमा! लोए लोयमेत्ते लोयप्पमाणे लोयफुडे लोयं चेव फुसित्ताणं चिट्ठइ।

एवं अधम्मत्थिकाए, लोयाकासे, जीवत्थिकाए, पोग्गलत्थिकाए। पंच वि एक्काभिलावा।

[१४८] अहेलोए णं भंते! धम्मत्थिकायस्स केवतियं फुसति? गोयमा! सातिरेगं अद्धं फुसति।  
तिरियलोए णं भंते! पुच्छा। गोयमा! असंखेज्जइभागं फुसइ।

उड्ढलोए णं भंते! पुच्छा। गोयमा! देसोणं अद्धं फुसइ।

[१४९] इमा णं भंते! रतणप्पभा पुढवी धम्मत्थिकायस्स किं संखेज्जइभागं फुसति?  
असंखेज्जइ भागं फुसइ? संखिज्जे भागे फुसति? असंखेज्जे भागे फुसति? सत्त्वं फुसति? गोयमा! णो  
संखेज्जइभागं फुसति, असंखेज्जइभागं फुसइ, णो संखेज्जे., णो असंखेज्जे., नो सत्त्वं फुसति।

इमीसे णं भंते! रयणप्पभाए पुढवीए घणोदही धम्मत्थिकायस्स किं संखेज्जइभागं  
फुसति?। जथा रतणप्पभा तहा घणोदहिघणवात-तणुवाया वि।

इमीसे णं भंते! रतणप्पभाए पुढवीए ओवासंतरे धम्मत्थिकायस्स किं संखेज्जइभागं फुसति,  
असंखेज्जइभागं फुसइ जाव सत्त्वं फुसइ? गोयमा! संखेज्जइभागं फुसइ, णो असंखेज्जइभागं फुसइ, नो  
संखेज्जे., नो असंखेज्जे., नो सत्त्वं फुसइ।

ओवासंतराइं सत्त्वाइं जहा रयणप्पभाए।

जथा रयणप्पभाए पुढवीए वत्तव्वया भणिया एवं जाव अहेसत्तमाए।

एवं सोहम्मं कप्पे जाव ईसिपब्भारापुढवीए। एते सत्त्वे वि असंखेज्जइभागं फुसंति, सेसा  
पडिसेहेतव्वा।

एवं अधम्मत्थिकाए। एवं लोयागासे वि। गाहा-

[१५०] पुढवोदही घण तणू कप्पा गेवेज्जसणुतरा सिद्धी।

संखेज्जइभागं अंतरेसु सेसा असंखेज्जा ॥

**\*बितीए सए दसमो उद्देशो समतो\***

**०-बितियं सयं समतं-०**

**० मुनि दीपरत्तसागरेण संशोधितः सम्पादितश्च बितियं सतं समतं ०**

**[ ] तइयं सयं [ ]**

[१५१] केरिस विउत्तवणा चमर किरिय जाणित्थि नगर पाला य।

अहिवति इंदिय परिसा ततियंमि सते दसुद्देशा ॥

**० पढमो उद्देशो ०**

[१५२] तेणं कालेणं तेणं समएणं मोया नामं नगरी होत्था। वण्णओ। तीसे णं मोयाए  
नगरीए बहिया उत्तरपुरत्थिमे दिसीभागे णं नंदणे नामं चेतिए होत्था। वण्णओ। तेणं कालेणं २ सामी  
समोसडे। परिसा निग्गच्छति। पडिगता परिसा।

तेणं कालेणं तेणं समएणं समणस्स भगवतो महावीरस्स दोच्चे अंतेवासी अग्गिभूती नामं  
अणगारे गोतमे गोत्तेणं सत्तुस्सेहे जाव पज्जुवासमाणे एवं वदासी-चमरे णं भंते! असुरिंदे असुरराया  
केमहिड्डीए? केमहज्जुतीए? केमहाबले? केमहायसे? केमहासोक्खे? केमहाणुभागे? केवतियं च णं पभू  
विकुत्तिए? गोयमा! चमरे णं असुरिंदे असुरराया महिड्डीए जाव महाणुभागे। से णं तत्थ चोतीसाए  
भवणावाससतसहस्साणं, चउसट्ठीए सामाणियसाहस्सीणं, तावतीसाए तावतीसगाणं जाव विहरति।

एमहिड्डीए जाव एमहाणुभागे। एवतियं च णं पभू विकुच्चित्तए-से जहानामए जुवती जुवाणे हत्थेणं हत्थे गेण्हेज्जा, चक्कस्स वा नाभी अरगाउत्ता सिता, एवामेव गोयमा! चमरे असुरिंदे असुरराया वेउच्चियसमुग्घातेणं समोहण्णति, २ संखेज्जाइं जोअणाइं दंडं निसिरति, तं जहा-रतणाणं जाव रिट्ठाणं अहाबायरे पोग्गले परिसाडेति, २ अहासुहुमे पोग्गले परियाइयति, २ दोच्चं पि वेउच्चियसमुग्घाएणं समोहण्णति, २ पभू णं गोतमा! चमरे असुरिंदे असुरराया केवलकप्पं जंबुद्धीवं दीवं बहूहिं असुरकुमारेहिं देवेहिं देवीहि य आइण्णं वित्तिकिण्णं उवत्थडं संथडं फुडं अवगाढावगाढं करेतए।

अदुत्तरं च णं गोतमा! पभू चमरे असुरिंदे असुरराया तिरियसंखेज्जे दीव-समुद्दे बहूहिं असुरकुमारेहिं देवेहिं देवीहि य आइण्णे वित्तिकिण्णे उवत्थडे संथडे फुडे अवगाढावगाढे करेतए। एस णं गोतमा! चमरस्स असुरिंदस्स असुररण्णो अयमेतारूवे विसए विसयमेते वुइए, णो चेव णं संपत्तीए विकुच्चिंसु वा, विकुच्चति वा, विकुच्चिस्सति वा।

जति णं भंते! चमरे असुरिंदे असुरराया एमहिड्डीए जाव एवइयं च णं पभू विकुच्चित्तए, चमरस्स णं भंते! असुरिंदस्स असुररण्णो सामाणिया देवा केमहिड्डीया जाव

केवतियं च णं पभू विकुच्चित्तए? गोयमा! चमरस्स असुरिंदस्स असुररण्णो सामाणिया देवा महिड्डीया जाव महाणुभागा। ते णं तत्थ साणं साणं भवणाणं, साणं साणं सामाणियाणं, साणं साणं अग्गमहिस्सीणं, जाव दिव्वाइं भोगभोगाइं भुंजमाणा विहरंति।

एमहिड्डीया जाव एवतियं च णं पभू विकुच्चित्तए-से जहानामए जुवति जुवाणे हत्थेणं हत्थे गेण्हेज्जा, चक्कस्स वा नाभी अरयाउत्ता सिया, एवामेव गोतमा! चमरस्स असुरिंदस्स असुररण्णो एगमेगे सामाणिए देवे वेउच्चियसमुग्घातेणं समोहण्णइ, २ जाव दोच्चं पि वेउच्चियसमुग्घाएणं समोहण्णइ, २ पभू णं गोतमा! चमरस्स असुरिंदस्स असुररण्णो एगमेगे सामाणिए देवे केवलकप्पं जंबुद्धीवं दीवं बहूहिं असुरकुमारेहिं देवेहिं देवीहि य आइण्णं वित्तिकिण्णं उवत्थडं संथडं फुडं अवगाढावगाढं करेतए।

अदुत्तरं च णं गोतमा! पभू चमरस्स असुरिंदस्स असुररण्णो एगमेगे सामाणियदेवे तिरियमसंखेज्जे दीव-समुद्दे बहूहिं असुरकुमारेहिं देवेहिं देवीहि य आइण्णे वित्तिकिण्णे उवत्थडे संथडे फुडे अवगाढावगाढे करेतए। एस णं गोतमा! चमरस्स असुरिंदस्स असुररण्णो एगमेगस्स सामाणियदेवस्स अयमेतारूवे विसए विसयमेते वुइए, णो चेव णं संपत्तीए विकुच्चिंसु वा विकुच्चति वा विकुच्चिस्सति वा।

[१५३]जइ णं भंते! चमरस्स असुरिंदस्स असुररण्णो सामाणिया देवा एमहिड्डीया जाव एवतियं च णं पभू विकुच्चित्तए चमरस्स णं भंते! असुरिंदस्स असुररण्णो तायतीसिया देवा केमहिड्डीया? तायतीसिया देवा जहा सामाणिया तहा नेयव्वा।

लोयपाला तहेव। नवरं संखेज्जा दीव-समुद्दा भाणियव्वा।

जति णं भंते! चमरस्स असुरिंदस्स असुररण्णो लोगपाला देवा एमहिड्डीया जाव एवतियं च णं पभू विकुच्चित्तए, चमरस्स णं भंते! असुरिंदस्स असुररण्णो अग्गमहिस्सीओ देवीओ केमहिड्डीयाओ जाव केवतियं च णं पभू विकुच्चित्तए?

गोयमा! चमरस्स णं असुरिंदस्स असुररण्णो अग्गमहिस्सीओ देवीओ महिड्डीयाओ जाव महाणुभागाओ। ताओ णं तत्थ साणं साणं भवणाणं, साणं साणं सामाणियसाहस्सीणं, साणं साणं महत्तरियाणं, साणं साणं परिसाणं जाव एमहिड्डीयाओ, अन्नं जहा लोगपालाणं अपरिसेसं।

सेवं भंते! २ ति

**[१५४]** भगवं दोच्चे गोतमे समणं भगवं महावीरं वंदइ नमंसइ, २ जेणेव तच्चे गोयमे वायुभूती अणगारे तेणेव उवागच्छति, २ तच्चं गोयमं वायुभूतिं अणगारं एवं वदासि- एवं खलु गोतमा! चमरे असुरिदे असुरराया एमहिड्डीए तं चेव एवं सत्वं अपुट्ठवागरणं नेयत्वं अपरिसेसियं जाव अग्गमहिस्सीणं वत्तव्वया समत्ता।

तए णं से तच्चे गोयमे वायुभूती अणगारे दोच्चस्स गोतमस्स अग्गिभूतिस्स अणगारस्स एवमाइक्खमाणस्स भा० पं० परू० एयमट्ठं नो सदहति, नो पत्तियति, नो रोयति; एयमट्ठं असदहमाणे अपत्तियमाणे अरोएमाणे उट्ठाए उट्ठेति, २ जेणेव समणे भगवं महावीरे तेणेव उवागच्छइ जाव पज्जुवासमाणे एवं वयासी-

एवं खलु भंते! मम दोच्चे गोतमे अग्गिभूती अणगारे एवमाइक्खति भासइ पण्णवेइ परूवेइ- एवं खलु गोतमा! चमरे असुरिदे असुरराया महिड्डीए जाव महाणुभावे से णं तत्थ चोतीसाए भवणावाससयसहस्साणं एवं तं चेव सत्वं अपरिसेसं भाणियत्वं जाव अग्गमहिस्सीणं वत्तव्वता समत्ता।

से कहमेतं भंते! एवं? गोतमादि समणे भगवं महावीरे तच्चं गोतमं वायुभूतिं अणगारं एवं वदासि-

जं णं गोतमा! तव दोच्चे गोयमे अग्गिभूती अणगारे एवमाइक्खइ एवं खलु गोयमा! चमरे ३ महिड्डीए एवं तं चेव सत्वं जाव अग्गमहिस्सीणं वत्तव्वया समत्ता", सच्चे णं एस मट्ठे, अहं पि णं गोयमा! एवमाइक्खामि भा० प० परू०।

एवं खलु गोयमा! चमरे ३ जाव महिड्डीए सो चेव बितिओ गमो भाणियत्त्वो जाव अग्गमहिस्सीओ, सच्चे णं एस मट्ठे।

सेवं भंते २ तच्चे गोयमे वायुभूती अणगारे समणं भगवं महावीरं वंदइ नमंसइ, २ जेणेव दोच्चे गोयमे अग्गिभूती अणगारे तेणेव उवागच्छइ, २ दोच्चं गोयमं अग्गिभूतिं अणगारं वंदइ नमंसति, २ एयमट्ठं सम्मं विणएणं भुज्जो २ खामेति।

**[१५५]** तए णं से तच्चे गोयमे वायुभूती अणगारे दोच्चे णं गोयमेणं अग्गिभूई नामेणं अणगारेणं सद्धिं जेणेव समणे भगवं महावीरे जाव पज्जुवासमाणे एवं वयासी-

-जति णं भंते! चमरे असुरिदे असुरराया एमहिड्डीए जाव एवतियं च णं पभू विकुच्चित्तए, बली णं भंते! वइरोयणिदे वइरोयणराया केमहिड्डीए जाव केवइयं च णं पभू विकुच्चित्तए? गोयमा! बली णं वइरोयणिदे वइरोयणराया महिड्डीए जाव महाणुभागे।

से णं तत्थ तीसाए भवणावाससयसहस्साणं, सट्ठीए सामाणियसाहस्सीणं सेसं जहा चमरस्स, तथा बलियस्स वि नेयत्वं नवरं सातिरेगं केवलकप्पं जंबुद्धीवं दीवं ति भाणियत्वं।

सेसं तं चेव नीरवसेसं नेयत्वं नवरं नाणत्तं जाणियत्वं भवनेहिं सामानिएहिं, सेवं भंते! २ ति तच्चे गोयमे वायुभूती जाव विहरति।

भंते ति भगवं दोच्चे गोयमे अग्गिभूई अणगारे समणं भगवं महा० वंदइ २ एवं वदासी- जइ णं भंते! बली वइरोयणिदे वइरोयणराया एमहिड्डीए जाव एवइयं च णं पभू विउच्चित्तए धरणे णं भंते!

नागकुमारिंदे नागकुमारराया केमहिड्डीए जाव केवतियं च णं पभू विकुच्चित्तए? गोयमा! धरणे णं नागकुमारिंदे नाग- कुमार राया एमहिड्डीए जाव से णं तत्थ चोयालीसाए भवणावाससयसहस्साणं, छण्हं सामाणियसाहस्सीणं, तायतीसाए तायतीसगाणं, चउण्हं लोगपालाणं, छण्हं अग्गमहिसीणं सपरिवाराणं, तिण्हं परिसाणं, सत्तण्हं अणियाणं, सत्तण्हं अणियाहिवतीणं, चउवीसाए आयरक्खदेवसाहस्सीणं, अन्नेसिं च जाव विहरइ। एवतियं च णं पभू विउच्चित्तए-से जहानामए जुवति जुवाणे जाव पभू केवलकप्पं जंबुद्धीवं दीवं जाव तिरियमसंखेज्जे दीव-समुद्धे बहूहिं नागकुमारेहिं नागकुमारीहिं जाव विउच्चिस्सति वा। सामाणिय-तायतीस-लोगपाल अग्गमहिसीओ य तहेव जहा चमरस्स । एवं धरणेणं नागकुमारराया महिड्डीए जाव एवतियंजहा चमरे तहा धरणेण वि नवरं संखेज्जे दीव-समुद्धे भाणियत्वं।

एवं जाव थणियकुमारा, वाणमंतर-जोतिसिया वि। नवरं दाहिणिल्ले सव्वे अग्गिभूती पुच्छति, उत्तरिल्ले सव्वे वाउभूती पुच्छइ।

भंते! ति भगवं दोच्चे अग्गिभूती अणगारे समणं भगवं म. वंदति नमंसति, २ एवं वयासी-जति णं भंते! जोतिसिंदे जोतिसराया एमहिड्डीए जाव एवतियं च णं पभू विकुच्चित्तए सक्के णं भंते! देविंदे देवराया केमहिड्डीए जाव केवतियं च णं पभू विउच्चित्तए? गोयमा! सक्के णं देविंदे देवराया महिड्डीए जाव महाणुभागे। से णं तत्थ बतीसाए विमाणावाससयसहस्साणं चउरासीए सामाणियसाहस्सीणं जाव चउण्हं चउरासीणं आयरक्खदेवसाहस्सीणं अन्नेसिं च जाव विहरइ। एमहिड्डीए जाव एवतियं च णं पभू विकुच्चित्तए। एवं जहेव चमरस्स तहेव भाणियत्वं, नवरं दो केवलकप्पे जंबुद्धीवे दीवे, अवसेसं तं चेव। एस णं गोयमा! सक्कस्स देविंदस्स देवरण्णो इमेयारूवे विसए विसयमेत्ते णं बुइए, नो चेव णं संपत्तीए विकुच्चिंसु वा विकुच्चति वा विकुच्चिस्सति वा।

[१५६] जइ णं भंते! सक्के देविंदे देवराया एमहिड्डीए जाव एवतियं च णं पभू विकुच्चित्तए एवं खलु देवाणुप्पियाणं अंतेवासी तीसए णामं अणगारे पगतिभद्दए जाव विणीए छट्ठंछट्ठेणं अणिक्खित्तेणं तवोकम्मेषं अप्पाणं भावेमाणे बहुपडिपुण्णाइं अट्ठ संवच्छराइं सामण्णपरियागं पाउणित्ता मासियाए संलेहणाए अताणं झूसेत्ता सट्ठिं भत्ताइं अणसणाए छेदेत्ता

आलोइयपडिक्कंते समाहिपते कालमासे कालं किच्चा सोहम्मं कप्पे सयंसि विमाणंसि उववायसभाए देवसयणिज्जंसि देवदूसंतरिए अंगुलस्स असंखेज्जइभागमेतीए ओगाहणाए सक्कस्स देविंदस्स देवरण्णो सामाणियदेवत्ताए उववन्ने। तए णं तीसए देवे अहुणोववन्नमेत्ते समाणे पंचविहाए पज्जतीए पज्जतिभावं गच्छइ, तं जहा-आहारपज्जतीए सरीरं इंदियं आणापाणुपज्जतीए भासामणपज्जतीए। तए णं तं तीसयं देवं पंचविहाए पज्जतीए पज्जतिभावं गयं समाणं सामाणियपरिसोववन्नया देवा करयलपरिग्गहियं दसनहं सिरसावत्तं मत्थए अंजलिं कट्ठु जएणं विजएणं वद्धावित्ति, २ एवं वदासि-

अहो! णं देवाणुप्पिएहिं दिव्वा देविड्डी, दिव्वा देवजुती, दिव्वे देवाणुभावे लद्धे पत्ते अभिसमन्नागते, जारिसिया णं देवाणुप्पिएहिं दिव्वा देविड्डी दिव्वा देवजुती दिव्वे देवाणुभावे लद्धे पत्ते अभिसमन्नागते तारिसिया णं सक्केणं देविंदेणं देवरण्णा दिव्वा देविड्डी जाव अभिसमन्नागता, जारिसिया णं सक्केणं देविंदेणं देवरण्णा दिव्वा देविड्डी जाव अभिसमन्नागता तारिसिया णं देवाणुप्पिएहिं दिव्वा

देविड्डी जाव अभिसमन्नागता। से णं भंते! तीसए देवे केमहिड्डीए जाव केवतियं च णं पभू विकुच्चित्तए? गोयमा! महिड्डीए जाव महाणुभागे, से णं तत्थ सयस्स विमाणस्स, चउण्हं सामाणियसाहस्सीणं, चउण्हं अग्गमहिस्सीणं सपरिवाराणं, तिण्हं परिसाणं, सत्तण्हं अणियाणं, सत्तण्हं अणियाहिवतीणं, सोलसण्हं आयरक्खदेवसाहस्सीणं अन्नेसिं च बहूणं वेमाणियाणं देवाण य देवीण य जाव विहरति।

एमहिड्डीए जाव एवइयं च णं पभू विकुच्चित्तए-से जहाणामए जुवति जुवाणे हत्थेणं हत्थे गेण्हेज्जा जहेव सक्कस्स तहेव जाव एस णं गोयमा! तीसयस्स देवस्स अयमेयारूवे विसए विसयमेते वुइए, नो चेव णं संपतीए विउच्चिंसु वा ३।

जति णं भंते! तीसए देवे एमहिड्डीए जाव एवइयं च णं पभू विकुच्चित्तए, सक्कस्स णं भंते! देविंदस्स देवरण्णो अवसेसा सामाणिया देवा केमहिड्डीया तहेव सत्वं जाव एस णं गोयमा! सक्कस्स देविंदस्स देवरण्णो एगभेगस्स सामाणियस्स देवस्स इमेयारूवे विसए विसयमेते वुइए, नो चेव णं संपतीए विउच्चिंसु वा विकुच्चंति वा विकुच्चिस्संति वा।

तायतीसय-लोगपाल-अग्गमहिस्सीणं जहेव चमरस्स। नवरं दो केवलकप्पे जंबुद्धीवे दीवे, अन्नं तं चेव। सेवं भंते! सेवं भंते! ति दोच्चे गोयमे जाव विहरति।

**[१५७]** भंते'ति भगवं तच्चे गोयमे वाउभूती अणगारे समणं भगवं जाव एवं वदासी-जति णं भंते! सक्के देविंदे देवराया एमहिड्डीए जाव एवइयं च णं पभू विउच्चित्तए, ईसाणे णं भंते! देविंदे देवराया केमहिड्डीए? एवं तहेव, नवरं साहिए दो केवलकप्पे जंबुद्धीव दीवे, अवसेसं तहेव।

**[१५८]** जति णं भंते! ईसाणे देविंदे देवराया एमहिड्डीए जाव एवतियं च णं पभू विउच्चित्तए, एवं खलु देवणुप्पियाणं अंतेवासी कुरुदत्तपुते नामं पगतिभद्दए जाव विणीए अट्ठमंअट्ठमेणं अणिक्खित्तेणं पारणए आयंबिलपरिग्गहिएणं तवोकम्मणेणं उड्ढं बाहाओ पगिब्भिय २ सूराभिमुहे आयावणभूमीए आतावेमाणे बहुपडिपुण्णे छम्मासे सामण्णपरियागं पाउणित्ता अद्धमासियाए संलेहणाए अत्ताणं झोसित्ता तीसं भत्ताइं अणसणाए छेदिता आलोइयपडिक्कंते समाहिपत्ते कालमासे कालं किच्चा ईसाणे कप्पे सयंसि विमाणंसि जा चेव तीसए वत्तव्वया स च्चेव अपरिसेसा कुरुदत्तपुते वि। नवरं सातिरेगे दो केवलकप्पे जंबुद्धीवे दीवे, अवसेसं तं चेव।

एवं सामाणिय-तायतीस-लोगपाल-अग्गमहिस्सीणं जाव एस णं गोयमा! ईसाणस्स देविंदस्स देवरण्णो एवं एगमेगाए अग्गमहिस्सीए देवीए अयमेयारूवे विसए विसयमेते वुइए, नो चेव णं संपतीए विउच्चिंसु वा विकुच्चंति वा विकुच्चिस्संति वा।

**[१५९]** एवं सणंकुमारे वि, नवरं चत्तारि केवलकप्पे जंबुद्धीवे दीवे, अदुत्तरं च णं तिरियमसंखेज्जे।

एवं सामाणिय-तायतीस-लोगपाल-अग्गमहिस्सीणं असंखेज्जे दीवसमुद्दे सत्त्वे विउच्चंति।

सणंकुमाराओ आरद्धा उवरिल्ला लोगपाला सत्त्वे वि असंखेज्जे दीव-समुद्दे विउच्चंति।

एवं माहिंदे वि। नवरं साइरेगे चत्तारि केवलकप्पे जंबुद्धीवे दीवे।

एवं बंभलोए वि, नवरं अट्ठ केवलकप्पे०।

एवं लंतए वि, नवरं सातिरेगे अट्ठ केवलकप्पे०।

महासुक्के सोलस केवलकप्पे०।

सहस्सारे सातिरेगे सोलस०।

२९. एवं पाणए वि, नवरं बत्तीसं केवल०।

३०. एवं अच्चुए वि, नवरं सातिरेगे बत्तीसं केवलकप्पे जंबुद्धीवे दीवे। अन्नं तं चेव।

सेवं भंते! सेवं भंते! ति तच्चे गोयमे वायुभूती अणगारे समणं भगवं महावीरं वंदइ नमंसति जाव विहरति।

तए णं समणे भगवं महावीरे अन्नया कयाइ मोयाओ नगरीओ नंदणाओ चेतियाओ पडिनिक्खमइ, २ बहिया जणवयविहारं विहरइ।

[१६०]तेणं कालेणं तेणं समएणं रायगिहे नामं नगरे होत्था। वण्णओ। जाव परिसा पज्जुवासइ।

तेणं कालेणं तेणं समएणं ईसाणे देविंदे देवराया सूलपाणी वसभवाहणे उत्तरइड्लोगाहिर्वई अट्ठावीसविमाणावाससयसहस्साहिर्वई अरयंबरवत्थधरे आलइयमालमउडे नवहेमचारुचितचंचलकुंडल विलिहिज्जमाणगंडे जाव दस दिसाओ उज्जोवेमाणे पभासेमाणे ईसाणे कप्पे ईसाणवडिंसए विमाणे जहेव रायप्पसेणइज्जे जाव दिव्वं देविइड्ढं जाव जामेव दिसिं पाउळ्भूए तामेव दिसिं पडिगए।

भंते! ति भगवं गोयमे समणं भगवं महावीरं वंदति णमंसति, २ एवं वदासी-अहो णं भंते! ईसाणे देविंदे देवराया महिइड्ढीए। ईसाणस्स णं भंते! सा दिव्वा देविइड्ढी कहिं गता? कहिं अणुपविट्ठा? गोयमा! सरीरं गता, सरीरं अणुपविट्ठा।

से केणट्ठेणं भंते! एवं वुच्चति सरीरं गता, सरीरं अणुपविट्ठा? गोयमा! से जहानामए कूडागारसाला सिया दुहओ लिता गुत्ता गुत्तदुवारा णिवाया णिवायगंभीरा, तीसे णं कूडागार. जाव कूडागार-साला दिट्ठंतो भाणियव्वो।

ईसाणेणं भंते! देविंदेणं देवरण्णा सा दिव्वा देविइड्ढी दिव्वा देवजुती दिव्वे देवाणुभागे किणा लद्धे? किणा पत्ते? किणा अभिसमन्नागए? के वा एस आसि पुव्वभवे? किंणामए वा? किंगोत्ते वा? कतरंसि वा गामंसि वा नगरंसि वा जाव सन्निवेसंसि वा? किं वा दच्चा? किं वा भोच्चा? किं वा किच्चा? किं वा समायरिता? कस्स वा तहारूवस्स समणस्स वा माहणस्स वा अंतिए एगमवि आरियं धम्मियं सुवयणं सोच्चा निसम्म जं णं ईसाणेणं देविंदेणं देवरण्णा सा दिव्वा देविइड्ढी जाव अभिसमन्नागया? एवं खलु गोयमा! तेणं कालेणं तेणं समएणं इहेव जंबुद्धीव दीवे भारहे वासे तामलित्ती नामं नगरी होत्था। वण्णओ। तत्थ णं तामलित्तीए नगरीए तामली नामं मोरियपुत्ते गाहावती होत्था। अइडे दित्ते जाव बहुजणस्स अपरिभूए यावि होत्था।

तए णं तस्स मोरियपुत्तस्स तामलिस्स गाहावतिस्स अन्नया कयाइ पुव्वरत्तावरत्त काल-समयंसि कुडुंबजागरियं जागरमाणस्स इमेयारूवे अज्झत्थिए जाव समुप्पज्जित्था-"अत्थि ता मे पुरा पोराणाणं सुचिण्णाणं सुपरक्कंताणं सुभाणं कल्लाणाणं कडाणं कम्माणं कल्लाणे फलवित्तिविसेसे जेणाहं हिरण्णेणं वइड्ढाणि, सुवण्णेणं वइड्ढामि, धणेणं वइड्ढामि, धन्नेणं वइड्ढामि, पुत्तेहिं वइड्ढामि, पसूहिं वइड्ढामि, विउलधण-कणग-रयण-मणि-मोत्तिय-संख-सिल-प्पवाल-रत्तरयणसंतसारसावतेज्जेणं अतीव २ अभिवइड्ढामि, तं किं णं अहं पुरा पोराणाणं सुचिण्णाणं जाव कडाणं कम्माणं एगंतसो खयं उवेहेमाणे विहरामि?,

तं जाव अहं हिरण्णेणं वड्ढामि, जाव अतीव २ अभिवड्ढामि, जावं च णं मे मित्त-नाति-नियग-संबंधिपरियणो आढाति परियाणइ सक्कारेइ सम्माणेइ कल्लाणं मंगलं देवयं चेइयं विणएणं पज्जुवासइ तावता मे सेयं कल्लं पाउप्पभाताए रयणीए जाव जलंते सयमेव दारुमयं पडिग्गहयं करेता विउलं असण-पाणखातिम-सातिमं उवक्खडावेत्ता मित्त-नाति-नियग-संबंधिपरियणं आमंतेता तं मित्त-नाइ-नियग-संबंधिपरियणं विउलेणं असण-पाण-खातिम-सातिमेणं वत्थगंध-मल्ला-सलंकारेण य सक्कारेता सम्माणेता तस्सेव मित्त-नाइ-नियग-संबंधिपरियणस्स पुरतो जेट्ठं पुत्तं कुटुंबे ठावेत्ता तं मित्त-नाति-णियग-संबंधिपरियणं जेट्ठपुत्तं च आपुच्छिता सयमेव दारुमयं पडिग्गहं गहाय मुंडे भविता पाणामाए पव्वज्जाए पव्वइत्तए। पव्वइत्ते वि य णं समाणे इमं एयारूवं अभिग्गहं अभिगिण्हस्सामि-

कप्पइ मे जावज्जीवाए छट्ठंछट्ठेणं अणिक्खित्तेणं तवोकम्मं उड्ढं बाहाओ पगिज्झिय पगिज्झिय सूराभिमुहस्स आतावणभूमीए आयावेमाणस्स विहरितए, छट्ठस्स वि य णं पारणयंसि आयावणभूमीतो पच्चोरुभित्ता सयमेव दारुमयं पडिग्गहयं गहाय तामलितीए नगरीए उच्च-नीय-मज्झिमाइं कुलाइं घरसमुदाणस्स भिक्खारियाए अडिता सुद्धोदणं पडिग्गाहेत्ता, तं तिसत्तखुत्तो उदएणं पक्खालेत्ता, तओ पच्छा आहारं आहारितए'ति कट्टु" एवं संपेहेइ, २ कल्लं पाउप्पभायाए जाव जलंते सयमेव दारुमयं पडिग्गहयं करेइ, २ विउलं असण-पाण-खाइम-साइमं उवक्खडावेइ, २ तओ पच्छा ण्हाए कयबलिकम्मं कयकोउयमंगलपायच्छित्ते सुद्धप्पावेसाइं मंगल्लाइं वत्थाइं पवर परिहिए अप्पमहग्घास्सभरणालंकियसरीरे भोयणवेत्ताए भोयणमंडवंसि सुहासणवरगते। तए णं मित्त-नाइ-नियग-संबंधिपरिजणेणं सद्धिं तं विउलं असण-पाण-खातिमसाइमं आसादेमाणे वीसादेमाणे परिभाएमाणे परिभुंजेमाणे विहरइ।

जिमियभुत्तरागए वि य णं समाणे आयंते चोक्खे परमसुइभूए तं मित्त जाव परियणं विउलेणं असणपाण० ४ पुप्फ-वत्थ-गंध-मल्लासलंकारेण य सक्कारेइ, २ तस्सेव मित्त-नाइ जाव परियणस्स पुरओ जेट्ठं पुत्तं कुटुंबे ठावेइ, २ ता तं मित्त-नाइ-णियग-संबंधिपरिजणं जेट्ठपुत्तं च आपुच्छइ, २ मुंडे भविता पाणामाए पव्वज्जाए पव्वइए। पव्वइए वि य णं समाणे इमं एयारूवं अभिग्गहं अभिगिण्हइ-कप्पइ मे जावज्जीवाए छट्ठंछट्ठेणं जाव आहारितए'ति कट्टु इमं एयारूवं अभिग्गहं अभिगिण्हइ, २ ता जावज्जीवाए छट्ठंछट्ठेणं अनिक्खित्तेणं तवोकम्मं उड्ढं बाहाओ पगिज्झिय २ सूराभिमुहे आतावणभूमीए आतावेमाणे विहरइ। छट्ठस्स वि य णं पारणयंसि आतावणभूमीओ पच्चोरुभइ, २ सयमेव दारुमयं पडिग्गहं गहाय तामलितीए नगरीए उच्च-नीय-मज्झिमाइं कुलाइं घरसमुदाणस्स भिक्खारियाए अडइ, २ सुद्धोयणं पडिग्गाहेइ, २ तिसत्तखुत्तो उदएणं पक्खालेइ, तओ पच्छा आहारं आहारेइ।

से केणट्ठेणं भंते! एवं वुच्चइ-पाणामा पव्वज्जा? गोयमा! पाणामाए णं पव्वज्जाए पव्वइए समाणे जं जत्थ पासइ इंदं वा खंदं वा रुद्धं वा सिवं वा वेसमणं वा अज्जं वा कोट्टकिरियं वा राजं वा जाव सत्थवाहं वा कागं वा साणं वा पाणं वा उच्चं पासइ उच्चं पणामं करेति, नीयं पासइ नीयं पणामं करेइ, जं जहा पासति तस्स तहा पणामं करेइ। से तेणट्ठेणं जाव पव्वज्जा।

तए णं से तामली मोरियपुत्ते तेणं ओरालेणं विपुलेणं पयत्तेणं पग्गहिएणं बालतवोकम्मं सुक्के लुक्खे जाव धमणिसंतते जाए यावि होत्था।

तए णं तस्स तामलिस्स बालतवस्सिस्स अन्नया कयाइ पुव्वरत्तावरत्तकालसमयंसि अणिच्चजागरियं जागरमाणस्स इमेयारूवे अज्झत्थिए चिंतिए जाव समुप्पज्जित्था-एवं खलु अहं इमेणं

ओरालेणं विपुलेणं जाव उदग्गेणं उदत्तेणं उत्तमेणं महाणुभागेणं तवोकम्मेणं सुक्के लुक्खे जाव धमणिसंतते जाते, तं अत्थि जा मे उट्ठाणे कम्मे बले वीरिए पुरिसक्कारपरक्कमे तावता मे सेयं कल्लं जाव जलंते तामलितीए नगरीए दिट्ठाभट्ठे य पासंडत्थे य गिहत्थे य पुव्वसंगतिए य परियायसंगतिए य आपुच्छिता तामलितीए नगरीए मज्झंमज्झेणं निग्गच्छिता पाठयं कुंडियमादीयं उवकरणं दारुमयं च पडिग्गहयं एगंते एडिता तामलितीए नगरीए उत्तरपुरत्थिमे दिसीभाए णियत्तणियमंडलं आलिहिता संलेहणाङ्गसणाङ्गसियस्स भत्त-पाणपडियाइक्खियस्स पाओवगयस्स कालं अणवकंखमाणस्स विहरितए ति कट्टु एवं संपेहेइ। एवं संपेहेता कल्लं जाव जलंते जाव आपुच्छइ, २ तामलितीए एगंते एडेइ जाव भत्त-पाणपडियाइक्खिए पाओवगमणं निवन्ने।

**[१६१]**तेणं कालेणं तेणं समएणं बलिचंचा रायहाणी अणिंदा अपुरोहिया यावि होत्था। तए णं ते बलिचंचारायहाणिवत्थव्वया बहवे असुरकुमारा देवा य देवीओ य तामलिं बालतवस्सिं ओहिणा आभोयंति, २ अन्नमन्नं सद्दावेंति, २ एवं वयासी-"एवं खलु देवाणुप्पिया! बलिचंचा रायहाणी अणिंदा अपुरोहिया, अम्हे य णं देवाणुप्पिया! इंदाधीणा इंदाधिट्ठिया इंदाहीणकज्जा। अयं च णं देवाणुप्पिया! तामली बालतवस्सी तामलितीए नगरीए बहिया उत्तरपुरत्थिमे दिसीभाए नियत्तणियमंडलं आलिहिता संलेहणाङ्गसणाङ्गसिए भत्त-पाणपडियाइक्खिए पाओवगमणं निवन्ने।

तं सेयं खलु देवाणुप्पिया! अम्हं तामलिं बालतवस्सिं बलिचंचाए रायहाणीए ठित्तिपकप्पं पकरावेत्तए" ति कट्टु अन्नमन्नस्स अंतिए एयमट्ठं पडिसुणेंति, २ बलिचंचाए रायहाणीए मज्झंमज्झेणं निग्गच्छंति, २ जेणेव रुयगिंदे उप्पायपव्वए तेणेव उवागच्छंति, २. वेउव्वियसमुग्घाएणं समोहणंति जाव उत्तरवेउव्वियाइं रूवाइं विकुव्वंति, २ ताए उक्किट्ठाए तुरियाए चवलाए चंडाए जइणाए छेयाए सीहाए सिग्घाए दिव्वाए उद्दुयाए देवगतीए तिरियमसंखेज्जाणं दीव-समुद्दाणं मज्झंमज्झेणं जेणेव जंबुद्धीवे दीवे जेणेव भारहे वासे जेणेव तामलिती नगरी जेणेव तामली मोरियपुत्ते तेणेव उवागच्छंति, २ ता तामलिस्स बालतवस्सिस्स उप्पिं सपक्खिं सपडिदिसिं ठिच्चा दिव्वं देविड्ढिं दिव्वं देवज्जुतिं दिव्वं देवाणुभागं दिव्वं बत्तीसत्तिविहं नट्टविहिं उवदंसंति, २ तामलिं बालतवस्सिं तिक्खुत्तो आदाहिणं पदाहिणं करंति वंदंति नमंसंति, २ एवं वदासी-

एवं खलु देवाणुप्पिया! अम्हे बलिचंचारायहाणिवत्थव्वया बहवे असुरकुमारा देवा य देवीओ य देवाणुप्पियं वंदामो नमंसामो जाव पज्जुवासामो। अम्हं णं देवाणुप्पिया! बलिचंचा रायहाणी अणिंदा अपुरोहिया, अम्हे य णं देवाणुप्पिया! इंदाहीणा इंदाहिट्ठिया इंदाहीणकज्जा, तं तुब्भे णं देवाणुप्पिया! बलिचंचं रायहाणि आढाह परियाणह सुमरह, अट्ठं बंधह, णिदाणं पकरेह, ठित्तिपकप्पं पकरेह। तए णं तुब्भे कालमासे कालं किच्चा बलिचंचारायहाणीए उववज्जिस्सह, तए णं तुब्भे अम्हं इंदा भविस्सह, तए णं तुब्भे अम्हेहिं सद्धिं दिव्वाइं भोगभोगाइं भुंजमाणा विहरिस्सह।

तए णं से तामली बालतवस्सी तेहिं बलिचंचारायहाणिवत्थव्वएहिं बहूहिं असुरकुमारेहिं देवेहिं य देवीहि य एवं वुत्ते समाणे एयमट्ठं नो आढाइ, नो परियाणेइ, तुसिणीए संचिट्ठइ।

तए णं ते बलिचंचारायधाणिवत्थव्वया बहवे असुरकुमारा देवा य देवीओ य तामलिं मोरियपुत्तं दोच्चं पि तच्चं पि तिक्खुत्तो आदाहिणप्पदाहिणं करंति, २ जाव अम्हं च णं देवाणुप्पिया! बलिचंचा रायहाणी अणिंदा जाव ठित्तिपकप्पं पकरेह, जाव दोच्चं पि तच्चं पि एवं वुत्ते समाणे जाव तुसि-

णीए संचिट्ठइ। तए णं ते बलिचंचारायहाणिवत्थव्वया बहवे असुरकुमारा देवा य देवीओ य तामलिणा बालतवस्सिणा अणाढाइज्जमाणा अपरियाणिज्जमाणा जामेव दिसिं पादुब्भूया तामेव दिसिं पडिगया।

**[१६२]** तेणं कालेणं तेणं समएणं ईसाणे कप्पे अणिंदे अपुरोहिते यावि होत्था। तए णं से तामली बालतवस्सी रिसी बहुपडिपुण्णाइं सट्ठिं वाससहस्साइं परियागं पाउणिता दोमासियाए संलेहणाए अत्ताणं झू सिता सवीसं भत्तसयं अणसणाए छेदिता कालमासे कालं किच्चा ईसाणे कप्पे ईसाणवडिसिए विमाणे उववातसभाए देवसयणिज्जंसि देवदूसंतरिते अंगुलस्स असंखेज्जभागमेतीए ओगाहणाए ईसाणदेविंदविरहकालसमयंसि ईसाणदेविंदताए उववन्ने। तए णं से ईसाणे देविंदे देवराया अहुणोववन्ने पंचविहाए पज्जतीए पज्जतीभावं गच्छति, तंजहाआहारपज्जतीए जाव भासा-मणपज्जतीए।

तए णं बलिचंचारायहाणिवत्थव्वया बहवे असुरकुमारा देवा य देवीओ य तामलिं बालतवस्सिं कालगयं जाणिता ईसाणे य कप्पे देविंदताए उववन्नं पासिता आसुरुता कुविया चंडिकिया मिसिमिसेमाणा बलिचंचाए रायहाणीए मज्झंमज्झेणं निग्गच्छंति, २ ताए उक्किट्ठाए जाव जेणेव भारहे वासे जेणेव तामलिती नयरी जेणेव तामलिस्स बालतवस्सिस्स सरीरए तेणेव उवागच्छंति, २ वामे पाए सुंबेणं बंधंति, २ तिक्खुतो मुहे उट्ठुहंति, २ तामलितीए नगरीए सिंघाडग-तिग-चउक्क-चच्चर-चउम्महु-महापह-पहेसु आकड्ढविकड्ढिं करेमाणा महया २ सद्धेणं उग्घोसेमाणा २. एवं वदासि-केस णं भो! से तामली बालतवस्सी सयंगहियलिंगे पाणामाए पव्वज्जाए पव्वइए! केस णं से ईसाणे कप्पे ईसाणे देविंदे देवराया' इति कट्टु तामलिस्स बालतवस्सिस्स सरीरयं हीलंति निंदंति खिंसंति गरिहंति अवमन्नंति तज्जंति तालेंति परिवहेति पव्वहेति आकड्ढविकड्ढिं करंति, हीलेता जाव आकड्ढविकड्ढिं करेता एगंते एडेंति, २ जामेव दिसिं पाउब्भूया तामेव दिसिं पडिगया।

**[१६३]** तए णं ईसाणकप्पवासी बहवे वेमाणिया देवा य देवीओ य बलिचंचारायहाणि-वत्थव्वएहिं बहूहिं असुरकुमारेहिं देवेहिं देवीहि य तामलिस्स बालतवस्सिस्स सरीरयं हीलिज्जमाणं निदिज्जमाणं जाव आकड्ढविकड्ढिं कीरमाणं पासंति, २. आसुरुता जाव मिसिमिसेमाणा जेणेव ईसाणे देविंदे देवराया तेणेव उवागच्छंति, २ करयलपरिग्गहियं दसनहं सिरसावतं मत्थए अंजलिं कट्टु जएणं विजएणं वद्धावेंति, २ एवं वदासी-एवं खलु देवाणुप्पिया! बलिचंचारायहाणिवत्थव्वया बहवे असुरकुमारा देवा य देवीओ य देवाणुप्पिए कालगए जाणिता ईसाणे य कप्पे इंदताए उववन्ने पासेता आसुरुता जाव एगंते एडेंति, २ जामेव दिसिं पाउब्भूया तामेव दिसिं पडिगया।

तए णं से ईसाणे देविंदे देवराया तेसिं ईसाणकप्पवासीणं बहूणं वेमाणियाणं देवाण य देवीण य अंतिए एयमट्ठं सोच्चा निसम्म आसुरुते जाव मिसिमिसेमाणे तत्थेव सयणिज्जवरगए तिवलियं भिउडिं निडाले साहट्टु बलिचंचं रायहाणिं अहे सपक्खिं सपडिदिसिं समभिलोएइ, तए णं सा बलिचंचा रायहाणी ईसाणेणं देविंदेणं देवरण्णा अहे सपक्खिं सपडिदिसिं समभिलोइया समाणी तेणं दिव्वप्पभावेणं इंगालब्भूया मुम्मुरब्भूया छारिब्भूया तत्तकवेल्लकब्भूया तता समजोइब्भूया जाया यावि होत्था।

तए णं ते बलिचंचारायहाणिवत्थव्वया बहवे असुरकुमारा देवा य देवीओ य तं बलिचंचं रायहाणिं इंगालब्भूयं जाव समजोतिब्भूयं पासंति, २ भीया तत्था तसिया उव्विग्गा संजायभया सव्वओ समंता आधावेंति परिधावेंति, २ अन्नमन्नस्स कायं समतुरंगेमाणा २ चिट्ठंति।

तए णं ते बलिचंचारायहाणिवत्थव्वया बहवे असुरकुमारा देवा य देवीओ य ईसाणं देविंदं देवरायं परिकुवियं जाणित्ता ईसाणस्स देविंदस्स देवरण्णो तं दिव्वं देविड्ढं दिव्वं देवज्जुतिं दिव्वं देवाणुभागं दिव्वं तेयलेस्सं असहमाणा सव्वे सपक्खिं सपडिदिसिं ठिच्चा करयलपरिग्गहियं दसनहं सिरसावतं मत्थए अंजलिं कट्टु जएणं विजयेणं वद्धाविति, २ एवं वयासी-अहो णं देवाणुप्पिएहिं दिव्वा देविड्ढी जाव अभिसमन्नागता, तं दिट्ठा णं देवाणुप्पियाणं दिव्वा देविड्ढी जाव लद्धा पत्ता अभिसमन्नागया। तं खामेमो णं देवाणुप्पिया!, खमंतु णं देवाणुप्पिया!, खंतुमरिहंति णं देवाणुप्पिया!, णाइ भुज्जो एवंकरणयाए ति कट्टु एयमट्ठं सम्मं विणयेणं भुज्जो २ खामेंति।

तते णं से ईसाणे देविंदे देवराया तेहिं बलिचंचारायहाणीवत्थव्वएहिं बहूहिं असुर- कुमारेहिं देवेहिं देवीहि य एयमट्ठं सम्मं विणएणं भुज्जो २ खामिए समाणे तं दिव्वं देविड्ढं जाव तेयलेस्सं पडिसाहरइ। तप्पभित्तिं च णं गोयमा! ते बलिचंचारायहाणिवत्थव्वया बहवे असुरकुमारा देवा य देवीओ य ईसाणं देविंदं देवरायं आढंति जाव पज्जुवासंति, ईसाणस्स य देविंदस्स देवरण्णो आणा-उववाय-वयण-निद्देसे चिट्ठंति।

एवं खलु गोयमा! ईसाणेणं देविंदेणं देवरण्णा सा दिव्वा देविड्ढी जाव अभिसमन्नागया।

ईसाणस्स णं भंते! देविंदस्स देवरण्णो केवतियं कालं ठिती पण्णत्ता? गोयमा! सातिरेगाइं दो सागरोवमाइं ठिती पन्नत्ता।

ईसाणे णं भंते! देविंदे देवराया ताओ देवलोगाओ आउक्खएणं जाव कहिं गच्छिहिति? कहिं उववज्जिहिति? गो.! महाविदेहे वासे सिज्झिहिति जाव अंतं काहिति।

**[१६४]**सक्कस्स णं भंते! देविंदस्स देवरण्णो विमाणेहितो ईसाणस्स देविंदस्स देवरण्णो विमाणा ईसिं उच्चयरा चव ईसिं उन्नयतरा चव? ईसाणस्स वा देविंदस्स देवरण्णो विमाणेहितो सक्कस्स देविंदस्स देवरण्णो विमाणा ईसिं नीययरा चव ईसिं निण्णयरा चव? हंता, गोतमा! सक्कस्स तं चव सव्वं नेयव्वं।

से केणट्ठेणं? गोयमा! से जहानामए करतले सिया देसे उच्चे देसे उन्नये, देसे णीए देसे निण्णे, से तेणट्ठेणं गोयमा! सक्कस्स देविंदस्स देवरण्णो जाव ईसिं निण्णयरा चव।

**[१६५]**पभू णं भंते! सक्के देविंदे देवराया ईसाणस्स देविंदस्स देवरण्णो अंतियं पाउब्भवित्तए? हंता, पभू।

से णं भंते! किं आढामीणे पभू, अणाढामीणे पभू? आढामीणे पभू, नो अणाढामीणे पभू।

पभू णं भंते! ईसाणे देविंदे देवराया सक्कस्स देविंदस्स देवरण्णो अंतियं पाउब्भवित्तए? हंता, पभू।से भंते! किं आढामीणे पभू, अणाढामीणे पभू? गोयमा! आढामीणे वि पभू, अणाढामीणे वि पभू।

पभू णं भंते! सक्के देविंदे देवराया ईसाणं देविंदं देवरायं सपक्खिं सपडिदिसिं समभिलोएत्तए? जहा पादुब्भवणा तहा दो बि आलावगा नेयव्वा।

पभू णं भंते! सक्के देविंदे देवराया ईसाणेणं देविंदेणं देवरण्णा सद्धिं आलावं वा संलावं वा करेत्तए? हंता, पभू। जहा पादुब्भवणा।

अत्थि णं भंते! तेसिं सक्कीसाणाणं देविंदाणं देवराइणं किच्चाइं करणिज्जाइं समुप्पज्जंति?

हंता, अत्थि।

से कहमिदाणिं पकरेंति? गोयमा! ताहे चेव णं से सक्के देविंदे देवराया ईसाणस्स देविंदस्स देवरण्णो अंतियं पाउब्भवति, ईसाणे वा देविंदे देवराया सक्कस्स देविंदस्स देवरण्णो अंतियं पाउब्भवइ-इति भो! सक्का! देविंदा! देवराया! दाहिणइढ्लोगाहिवती!; इति भो! ईसाणा! देविंदा! देवराया! उत्तरइढ्लोगाहिवती!। इति भो!, इति भो'ति ते अन्नमन्नस्स किच्चाइं करणिज्जाइं पच्चणुभवमाणा विहरंति।

[१६६] अत्थि णं भंते! तेषिं सक्कीसाणाणं देविंदाणं देवराईणं विवादा समुप्पज्जंति? हंता, अत्थि।

से कहमिदाणिं पकरेंति? गोयमा! ताहे चेव णं ते सक्कीसाणा देविंदा देवरायाणो सणंकुमारं देविंदं देवरायं मणसीकरेंति। तए णं से सणंकुमारे देविंदे देवराया तेहिं सक्कीसाणेहिं देविंदेहिं देवराईहिं मणसीकेए समाणे खिप्पामेव सक्कीसाणाणं देविंदाणं देवराईणं अंतियं पादुब्भवति। जं से वदइ तस्स आणाउववाय-वयण-निद्देसे चिट्ठंति।

[१६७] सणंकुमारे णं भंते! देविंदे देवराया किं भवसिद्धिए, अभवसिद्धिए? सम्मद्धिट्ठी, मिच्छद्धिट्ठी? परित्तसंसारए, अणंतसंसारए? सुलभबोहिए, दुलभबोहिए? आराहए, विराहए? चरिमे अचरिमे? गोयमा! सणंकुमारे णं देविंदे देवराया भवसिद्धिए नो अभवसिद्धिए, एवं सम्मद्धिट्ठी परित्तसंसारए सुलभबोहिए आराहए चरिमे, पसत्थं नेयत्वं।

से केणट्ठेणं भंते!? गोयमा! सणंकुमारे देविंदे देवराया बहूणं समणाणं बहूणं समणीणं बहूणं सावगाणं बहूणं साविगाणं हियकामए सुहकामए पत्थकामए आणुकंपिए निस्सेयसिए हिय-सुह-निस्सेसकामए, से तेणट्ठेणं गोयमा! सणंकुमारे णं भवसिद्धिए जाव नो अचरिमे।

सणंकुमारस्स णं भंते! देविंदस्स देवरण्णो केवतियं कालं ठिती पण्णत्ता? गोय मा! सत्त सागरोवमाणि ठिती पण्णत्ता।

से णं भंते! ताओ देवलोगातो आउक्खरणं जाव कहिं उववज्जिहिति? गोयमा! महाविदेहे वासे सिज्झिहिति जाव अंतं करेहिति। सेवं भंते!२,।

[१६८] छट्ठसट्ठम मासो अद्धमासो वासाइं अट्ठ छम्मासा।  
तीसग-कुरुदत्ताणं तव भत्तपरिण्ण परियाओ ॥

[१६९] उच्चत्त विमाणाणं पादुब्भव पेच्छणा य संलावे।  
किच्च विवादुप्पती सणंकुमारे य भवियत्तं ॥

**\*तइय सए पढमो उद्देशो समतो\***

**० बिइओ उद्देशो ०**

[१७०] तेणं कालेणं तेणं समएणं रायगिहे नामं नगरे होत्था जाव परिसा पज्जुवासइ।

तेणं कालेणं तेणं समएणं चमरे असुरिंदे असुरराया चमरचंचाए रायहाणीए सभाए सुहम्माए चमरंसि सीहासणंसि चउसट्ठीए सामाणियसाहस्सीहिं जाव नट्टविहिं उवदंसेत्ता जामेव दिसिं पाउब्भूए तामेव दिसिं पडिगए।

भंते! ति भगवं गोयमे समणं भगवं महावीरं वंदति नमंसति, २ एवं वदासी-अत्थि णं भंते!

इमीसे रयणप्पभाए पुढवीए अहे असुरकुमारा देवा परिवसंति? गोयमा! नो इणट्ठे समट्ठे।

एवं जाव अहेसत्तमाए पुढवीए, सोहम्मस्स कप्पस्स अहे जाव अत्थि णं भंते! ईसिपब्भाराए पुढवीए अहे असुरकुमारा देवा परिवसंति? णो इणट्ठे समट्ठे।

से कहिं खाइं णं भंते! असुरकुमारा देवा परिवसंति? गोयमा! इमीसे रयणप्पभाए पुढवीए असीउत्तरजोयणसतसहस्सबाहल्लाए, एवं असुरकुमारदेववत्तव्वया जाव दिव्वाइं भोगभोगाइं भुंजमाणा विहरंति।

अत्थि णं भंते! असुरकुमाराणं देवाणं अहे गतिविसए प.? हंता, अत्थि।

केवतियं च णं भंते! असुरकुमाराणं देवाणं अहेगतिविसए पण्णते? गोयमा! जाव अहेसत्तमाए पुढवीए, तच्चं पुण पुढविं गता य, गमिस्संति य।

किंपत्तियं णं भंते! असुरकुमारा देवा तच्चं पुढविं गता य, गमिस्संति य? गोयमा! पुव्ववेरियस्स वा वेदणउदीरणयाए, पुव्वसंगतियस्स वा वेदणउवसामणयाए। एवं खलु असुरकुमारा देवा तच्चं पुढविं गता य, गमिस्संति य।

अत्थि णं भंते! असुरकुमाराणं देवाणं तिरियं गतिविसए पण्णते? हंता, अत्थि।

केवतियं णं भंते! असुरकुमाराणं देवाणं तिरियं गतिविसए पण्णते? गोयमा! जाव असंखेज्जा दीव-समुद्दा, नंदिस्सरवरं पुण दीवं गता य, गमिस्संति य।

किंपत्तियं णं भंते! असुरकुमारा देवा नंदीसरवरदीवं गता य, गमिस्संति य? गोयमा! जे इमे अरहंता भगवंता एतेसिं णं जम्मणमहेसु वा निक्खमणमहेसु वा णाणुप्पत्तिमहिमासु वा परिनिव्वाणमहिमासु वा एवं खलु असुरकुमारा देवा नंदीसरवरं दीवं गता य, गमिस्संति य।

अत्थि णं भंते! असुरकुमाराणं देवाणं उड्ढं गतिविसए प.? हंता, अत्थि।

केवतियं णं भंते! असुरकुमाराणं देवाणं उड्ढं गतिविसए? गोयमा! जाव अच्युतो कप्पो। सोहम्मं पुण कप्पं गता य, गमिस्संति य।

किंपत्तियं णं भंते! असुरकुमारा देवा सोहम्मं कप्पं गता य, गमिस्संति य? गोयमा! तेसिं णं देवाणं भवपच्चइए वेराणुबंधे। ते णं देवा विकुव्वेमाणा परियारेमाणा वा आयरक्खे देवे वित्तासंति। अहालहुस्सगाइं रयणाइं गहाय आयाए एगंतमंतं अवक्कमंति।

अत्थि णं भंते! तेसिं देवाणं अहालहुस्सगाइं रयणाइं? हंता, अत्थि।

से कहमिदाणिं पकरंति? तओ से पच्छा कायं पव्वहंति।

पभू णं भंते! ते असुरकुमारा देवा तत्थगया चेव समाणा ताहिं अच्छराहिं सद्धिं दिव्वाइं भोगभोगाइं भुंजमाणा विहरित्तए? णो इणट्ठे समट्ठे, ते णं तओ पडिनियत्तंति, तओ पडिनियत्तिता इहमागच्छंति, २ जति णं ताओ अच्छराओ आढायंति परियाणंति, पभू णं ते असुरकुमारा देवा ताहिं अच्छराहिं सद्धिं दिव्वाइं भोगभोगाइं भुंजमाणा विहरित्तए, अह णं ताओ अच्छराओ नो आढायंति नो परियाणंति णो णं पभू ते असुरकुमारा देवा ताहिं अच्छराहिं सद्धिं दिव्वाइं भोगभोगाइं भुंजमाणा विहरित्तए।

एवं खलु गोयमा! असुरकुमारा देवा सोहम्मं कप्पं गता य, गमिस्संति य।

[१७१] केवतिकालस्स णं भंते! असुरकुमारा देवा उड्ढं उप्पयंति जाव सोहम्मं कप्पं गया य, गमिस्संति य? गोयमा! अणंताहिं ओसप्पिणीहिं अणंताहिं उस्सप्पिणीहिं समतिक्कंताहिं, अत्थि णं एस

भावे लोयच्छेरभूए समुप्पज्जइ-जं णं असुरकुमारा देवा उड्ढं उप्पयंति जाव सोहम्मो कप्पो।

किंनिस्साए णं भंते! असुरकुमारा देवा उड्ढं उप्पयंति जाव सोहम्मो कप्पो? से जहानामए इह सबरा इ वा बब्बरा इ वा टंकणा इ वा चुच्चुया इ वा पल्हया इ वा पुलिंदा इ वा एगं महं गड्डं वा दुग्गं वा दरिं वा विसमं वा पव्वतं वा णीसाए सुमहल्लमवि आसबलं वा हत्थिबलं वा जोहबलं वा धणुबलं वा आगलेंति, एवामेव असुरकुमारा वि देवा, णऽन्नत्थ अरहंते वा, अरहंतचेइयाणि वा, अणगारे वा भावियप्पणो निस्साए उड्ढं उप्पयंति जाव सोहम्मो कप्पो।

सव्वे वि णं भंते! असुरकुमारा देवा उड्ढं उप्पयंति जाव सोहम्मो कप्पो? गोयमा! णो इणट्ठे समट्ठे, महिड्ढिया णं असुरकुमारा देवा उड्ढं उप्पयंति जाव सोहम्मो कप्पो।

एस वि य णं भंते! चमरे असुरिंदे असुरकुमारराया उड्ढं उप्पतियपुव्वे जाव सोहम्मो कप्पो? हंता, गोयमा! एस वि य णं चमरे असुरिंदे असुरराया उड्ढं उप्पतियपुव्वे जाव सोहम्मो कप्पो।

अहे णं भंते! चमरे असुरिंदे असुरकुमारराया महिड्ढीए महज्जुतीए जाव कर्हिं पविट्ठा? कूडागारसालादिट्ठंतो भाणियव्वो।

**[१७२]** चमरेणं भंते! असुरिंदेणं असुररणा सा दिव्वा देविड्ढी तं चेव किणा लद्धा पत्ता अभिसमन्नागया? एवं खलु गोयमा!-

तेणं कालेणं तेणं समएणं इहेव जंबुदीवे २ भारहे वासे विंझगिरिपायमूले बेभेले नामं सन्निवेसे होत्था। वण्णओ। तत्थ णं बेभेले सन्निवेसे पूरणे नामं गाहावती परिवसति अड्ढे दित्ते जहा तामलिस्स वत्तव्वया तहा नेतव्वा, नवरं चउप्पुडयं दारुमयं पडिग्गहं करेता जाव विपुलं असण-पाण-खाइम-साइमं जाव सयमेव चउप्पुडयं दारुमयं पडिग्गहयं गहाय मुंडे भवित्ता दाणामाए पव्वज्जाए पव्वइत्तए।

पव्वइए वि य णं समाणे तं चेव, जाव आयावणभूमीओ पच्चोरुभइ पच्चोरुभित्ता सयमेव चउप्पुडयं दारुमयं पडिग्गहयं गहाय बेभेले सन्निवेसे उच्च-नीय-मज्झिमाइं कुलाइं घरसमुदाणस्स भिक्खारियाए अडेता 'जं मे पढमे पुडए कप्पइ मे तं पंथियपहियाणं दलइत्तए, जं मे दोच्चे पुडए पडइ कप्पइ मे तं काक-सुणयाणं दलइत्तए, जं मे तच्चे पुडए पडइ कप्पइ मे तं मच्छ-कच्छभाणं दलइत्तए, जं मे चउत्थे पुडए पडइ कप्पइ मे तं अप्पणा आहारं आहारित्तए' ति कट्टु एवं संपेहेइ, २ कल्लं पाउप्पभायाए रयणीए तं चेव निरवसेसं जाव जं से चउत्थे पुडए पडइ तं अप्पणा आहारं आहारेइ।

तए णं से पूरणे बालतवस्सी तेणं ओरालेणं विउलेणं पयत्तेणं पग्गहिणं बालतवोकम्मेणं तं चेव जाव बेभेलस्स सन्निवेसस्स मज्झंमज्झेणं निग्गच्छति, २ पाउय-कुंडियमादीयं उवकरणं चउप्पुडयं च दारुमयं पडिग्गहयं एगंतमंते एडेइ, २ बेभेलस्स सन्निवेसस्स दाहिणपुरत्थिमे दिसीभागे अद्धनियत्तणिय-मंडलं आलिहिता संलेहणाइसुणसुणसिए भत्त-पाणपडियाइक्खिए पाओवगमणं निवण्णे।

तेणं कालेणं तेणं समएणं अहं गोयमा! छउमत्थकालियाए एक्कारसवासपरियाए छट्ठंछट्ठेणं अनिक्खित्तेणं तवोकम्मेणं संजमेणं तवसा अप्पाणं भावेमाणे पुव्वाणुपुत्विं चरमाणे गामाणुगामं दूइज्जमाणे जेणेव सुंसुमारपुरे नगरे जेणेव असोगवणसंडे उज्जाणे जेणेव असोगवरपायवे जेणेव पुढविसिलावट्टए तेणेव उवागच्छामि, २ असोगवरपायवस्स हेट्ठा पुढविसिलावट्टयंसि अट्ठमभत्तं पणिण्हामि, दो वि पाए साहट्टु वग्घारियपाणी एगपोग्गलनिविट्ठदिट्ठी अणिमिसनयणे ईसिपब्भारगएणं काएणं अहापणिहिण्हिं गतेहिं सत्विंदिएहिं गुत्तेहिं एगरातियं महापडिमं उवसंपज्जिताणं विहरामि।

तेणं कालेणं तेणं समएणं चमरचंचा रायहाणी अणिंदा अपुरोहिया याऽवि होत्था। तए णं से पूरणे बालतवस्सी बहुपडिपुण्णाइं दुवालस वासाइं परियागं पाठणिता मासियाए संलेहणाए अत्ताणं झूसेता सट्ठिं भत्ताइं अणसणाए छेदेत्ता कालमासे कालं किच्चा चमरचंचाए रायहाणीए उववायसभाए जाव इंदत्ताए उववन्ने।

तए णं से चमरे असुरिंदे असुरराया अहुणोववन्ने पंचविहाए पज्जतीए पज्जतीभावं गच्छए, तं जहा-आहारपज्जतीए जाव भास-मणपज्जतीए।

तए णं से चमरे असुरिंदे असुरराया पंचविहाए पज्जतीए पज्जतीभावं गए समाणे उड्ढं वीससाए ओहिणा आभोएइ जाव सोहम्मो कप्पो। पासइ य तत्थ सक्कं देविंदं देवरायं मघवं पागसासणं सतक्कतुं सहस्सक्खं वज्जपाणिं पुरंदरं जाव दस दिसाओ उज्जोवेमाणं पभासेमाणं। सोहम्मो कप्पो सोहम्मवडैसए विमाणे सभाए सुहम्मए सक्कंसि सीहासणंसि जाव दिव्वाइं भोगभोगाइं भुंजमाणं पासइ, २ इमेयारूवे अज्झत्थिए चिंतिए पत्थिए मणोगए संकप्पे समुप्पज्जित्था-केस णं एस अपत्थियपत्थए दुरंतपंतलक्खणे हिरि-सिरिपरिवज्जिए हीणपुण्णाचाउद्दसे जे णं ममं इमाए एयारूवाए दिव्वाए देविड्ढीए जाव दिव्वे देवाणुभावे लद्धे पत्ते जाव अभिसमन्नागए उप्पिं अप्पुस्सुए दिव्वाइं भोगभोगाइं भुंजमाणे विहरइ? एवं संपेहेइ, २ सामाणियपरिसोववन्नए देवे सद्दावेइ, २ एवं वयासी-केस णं एस देवाणुप्पिया! अपत्थियपत्थए जाव भुंजमाणे विहरइ?

तए णं ते सामाणियपरिसोववन्नगा देवा चमरेणं असुरिंदेणं असुररण्णा एवं वुत्ता समाणा हट्ठतुट्ठा. जाव ह्यहियया करयलपरिग्गहियं दसनहं सिरसावत्तं मत्थए अंजलिं कट्टु जयेणं विजयेणं वद्दावेत्ति, २ एवं वयासी एस णं देवाणुप्पिया! सक्के देविंदे देवराया जाव विहरइ।

तए णं से चमरे असुरिंदे असुरराया तेसिं सामाणियपरिसोववन्नगाणं देवाणं अंतिए एयमट्ठं सोच्चा निसम्म आसुरुत्ते रुट्ठे कुविए चंडिकिए मिसिमिसेमाणे ते सामाणियपरिसोववन्नए देवे एवं वयासी-अन्ने खलु भो! से सक्के देविंदे देवराया, अन्ने खलु भो! से चमरे असुरिंदे असुरराया, महिड्ढीए खलु से सक्के देविंदे देवराया, अप्पिड्ढीए खलु भो! से चमरे असुरिंदे असुरराया। तं इच्छामि णं देवाणुप्पिया! सक्कं देविंदं देवरायं सयमेव अच्चासादेत्तए'त्ति कट्टु उसिणे उसिणब्भूए याऽवि होत्था।

तए णं से चमरे असुरिंदे असुरराया ओहिं पटंजइ, २ ममं ओहिणा आभोएइ, २ इमेयारूवे अज्झत्थिए जाव समुप्पज्जित्था-एवं खलु समणे भगवं महावीरे जंबुद्वीवे दीवे भारहे वासे सुंसुमारपुरे नगरे असोगवणसंडे उज्जाणे असोगवरपायवस्स अहे पुढविसिलावट्टयंसि अट्ठमभत्तं पगिण्हिता एगराइयं महापडिमं उवसंपज्जिताणं विहरति। तं सेयं खलु मे समणं भगवं महावीरं नीसाए सक्कं देविंदं देवरायं सयमेव अच्चासादेत्तए'त्ति कट्टु एवं संपेहेइ, २ सयणिज्जाओ अब्भुट्ठेइ, २ ता देवदूसं परिहेइ, २ उववायसभाए पुरत्थिमिल्लेणं दारेणं णिग्गच्छइ, २ जेणेव सभा सुहम्मए, जेणेव चोप्पाले पहरणकोसे तेणेव उवागच्छइ, २ ता फलिहरयणं परामुसइ, २ एगे अबिइए फलिहरयणमायाए महया अमरिसं वहमाणे चमरचंचाए रायहाणीए मज्झमज्झेणं निग्गच्छइ, २ जेणेव तिगिंछिकूडे उप्पायपव्वए तेणेव उवागच्छइ, २ ता वेउच्चियसमुग्घाएणं समोहण्णइ, २ ता संखेज्जाइं जोयणाइं जाव उत्तरवेउच्चियं रूवं विकुव्वइ, २ ता ताए उक्किट्ठाए जाव जेणेव पुढविसिलावट्टए जेणेव ममं अंतिए तेणेव उवागच्छति, २ ममं तिक्खुत्तो आदाहिणपदाहिणं करेत्ति, २ जाव नमंसित्ता एवं वयासी-

इच्छामि णं भंते! तुब्भं नीसाए सक्कं देविदं देवरायं सयमेव अच्चासादितए' ति कट्टु उत्तरपुरत्थिमं दिसिभागं अवक्कमइ, २ वेउत्थियसमुग्घातेणं समोहण्णइ, २ जाव दोच्चं पि वेउत्थियसमुग्घातेणं समोहण्णइ, २ एगं महं घोरं घोरागारं भीमं भीमागारं भासरं भयाणीयं गंभीरं उतासणयं कालइडरत्त-मासरासिसंकासं जोयणसयसाहस्सीयं महाबोदिं विउत्थइ, २ अप्फोडेइ, २ वग्गइ, २ गज्जइ, २ हयहेसियं करेइ, २ हत्थिगुलुगुलाइयं करेइ, २ रहघणघणाइयं करेइ, २ पायदद्वरगं करेइ, २ भूमिचवेडयं दलयइ, २ सीहणादं नदइ, २ उच्छोलेति, २ पच्छोलेति, २ तिवइं छिंदइ, २ वामं भुयं ऊसवेइ, २ दाहिणहत्थपदेसिणीए य अंगुट्ठनहेण य वितिरिच्छं मुहं विडंबेइ, २ महया २ सद्देणं कलकलरवं करेइ, एगे अब्बितिए फलिहरयणमायाए उड्ढं वेहासं उप्पतिए, खोभंते चेव अहेलोयं, कंपेमाणे व मेइणितलं, साकइडंते व तिरियलोयं, फोडेमाणे व अंबरतलं, कत्थइ गज्जंते, कत्थइ विज्जुयायंते, कत्थइ वासं वासमाणे, कत्थइ रयुग्घायं पकरेमाणे, कत्थइ तमुक्कायं पकरेमाणे, वाणमंतरे देवे वित्तासेमाणे २, जोइसिए देवे दुहा विभयमाणे २, आयरक्खे देवे विपलायमाणे २, फलिहरयणं अंबरतलंसि वियइडमाणे २, विउत्थभावेमाणे २ ताए उक्किट्ठाए जाव तिरियमसंखेज्जाणं दीव-समुद्दाणं मज्झंमज्झेणं वीयीवयमाणे २, जेणेव सोहम्मं कप्पे, जेणेव सोहम्मवडैसए विमाणे, जेणेव सभा सुधम्मं तेणेव उवागच्छइ, २ एगं पायं पउमवरवेइयाए करेइ, एगं पायं सभाए सुहम्मं करेइ, फलिहरयणं महया २ सद्देणं तिक्खुतो इंदकीलं आउडेति, २ एवं वयासी-

कहिं णं भो! सक्के देविदे देवराया? कहिं णं ताओ चउरासीइं सामाणियसाहस्सीओ? जाव कहिं णं ताओ चत्तारि चउरासीइंओ आयरक्खदेवसाहस्सीओ? कहिं णं ताओ अणेगाओ अच्छराकोडीओ ? अज्ज ह्णामि, अज्ज महेमि, अज्ज वहेमि, अज्ज ममं अवसाओ अच्छराओ वसमुवणमंतु'ति कट्टु तं अणिट्ठं अकंतं अप्पियं असुभं अमणुण्णं अमणामं फरुसं गिरं निसिरइ।

तए णं से सक्के देविदे देवराया तं अणिट्ठं जाव अमणामं अस्सुयपुत्वं फरुसं गिरं सोच्चा निसम्म आसुरुते जाव मिसिमिसेमाणे तिवलियं भिउडिं निडाले साहट्टु चमरं असुरिदं असुररायं एवं वदासी- 'हं भो! चमरा! असुरिदा! असुरराया! अपत्थियपत्थया! जाव हीणपुण्णचाउद्दसा! अज्जं न भवसि, नाहि ते सुहमत्थि'ति कट्टु तत्थेव सीहासणवरगते वज्जं परामुसइ, २ तं जलंतं फुडंतं तडतडंतं उक्कासहस्साइं विणिम्मयमाणं २, जालासहस्साइं पमुंचमाणं २, इंगालसहस्साइं पविक्खिरमाणं २, फुल्लिंजालामालासहस्सेहिं चक्खुविक्खेव-दिट्ठिपडिघातं पि पकरेमाणं हुतवहअतिरेगतेयदिप्पंतं जइणवेगं फुल्लकिंसुयसमाणं महब्भयं भयकरं चमरस्स असुरिदस्स असुररण्णो वहाए वज्जं निसिरइ।

तते णं से चमरे असुरिदे असुरराया त जलंतं जाव भयकरं वज्जमभिमुहं आवयमाणं पासइ, पासिता झियाति पिहाइ, पिहाइ झियाइ, झियायिता पिहायिता तहेव संभग्गमउडविडवे सालंबहत्थाभरणे उड्ढपाए अहोसिरे कक्खागयसेयं पिव विणिम्मयमाणे २ ताए उक्किट्ठाए जाव तिरियमसंखेज्जाणं दीव-समुद्दाणं मज्झंमज्झेणं वीयीवयमाणे २ जेणेव जंबुद्धीवे दीवे जाव जेणेव असोगवरपायवे जेणेव ममं अंतिए तेणेव उवागच्छइ, २ ता भीए भयगगरसरे भगवं सरणं इति बुयमाणे ममं दोण्ह वि पायाणं अंतरंसि इति वेगेणं समोवतिते।

**[१७३]** तए णं तस्स सक्कस्स देविदस्स देवरण्णो इमेयारूवे अज्झत्थिए जाव समुप्पज्जित्था नो खलु पभू चमरे असुरिदे असुरराया, नो खलु समत्थे चमरे असुरिदे असुरराया, नो खलु

विसए चमरस्स असुरिदस्स असुररण्णो अप्पणो निस्साए उड्ढं उप्पतिता जाव सोहम्मो कप्पो, णस्सन्तथ अरहंते वा, अरहंतचेइयाणि वा, अणगारे वा भावियप्पणो नीसाए उड्ढं उप्पयति जाव सोहम्मो कप्पो। तं महादुक्खं खलु तहारूपाणं अरहंताणं भगवंताणं अणगाराण य अच्चासायणाए'ति कट्टु ओहिं पजुंजति, २ ममं ओहिणा आभोएति, २ 'हा! हा! अहो! हतो अहमंसि'ति कट्टु ताए उक्किट्ठाए जाव दिव्वाए देवगतीए वज्जस्स वीहिं अणुगच्छमाणे २ तिरियमसंखेज्जाणं दीव-समुद्दाणं मज्झंमज्झेणं जाव जेणेव असोगवरपादवे जेणेव ममं अंतिए तेणेव उवागच्छइ, २ ममं चउरंगुलमसंपतं वज्जं पडिसाहरइ।

**[१७४]** अवियास्सइं मे गोतमा! मुट्ठिवातेणं केसग्गे वीइत्था।तए णं से सक्के देविंदे देवराया वज्जं पडिसाहरति, पडिसाहरिता ममं तिक्खुतो आदाहिणपदाहिणं करेइ, २ वंदइ नमंसइ, २ एवं वयासी-

एवं खलु भंते! अहं तुब्भं नीसाए चमरेणं असुरिदेणं असुररण्णा सयमेव अच्चासाइए। तए णं मए परिकुविएणं समाणेणं चमरस्स असुरिदस्स असुररण्णो वहाए वज्जे निसट्ठे। तए णं मे इमेयारूवे अज्झत्थिए जाव समुप्पज्जित्था-नो खलु पभू चमरे असुरिदे असुरराया तहेव जाव ओहिं पउंजामि, देवाणुप्पिए ओहिणा आभोएमि, 'हा! हा! अहो! हतो मी'ति कट्टु ताए उक्किट्ठाए जाव जेणेव देवाणुप्पिए तेणेव उवागच्छामि, देवाणुप्पियाणं चउरंगुलमसंपतं वज्जं पडिसाहरामि, वज्जपडिसाहरणट्ठताए णं इहमागए, इह समोसटे, इह संपते, इहेव अज्ज उवसंपज्जिताणं विहरामि। तं खामेमि णं देवाणुप्पिया!, खमंतु णं देवाणुप्पिया!, खमितुमरहंति णं देवाणुप्पिया!, णाइ भुज्जो एवं पकरणताए'ति कट्टु ममं वंदइ नमंसइ, २ उत्तरपुरत्थिमं दिसीभागं अवक्कमइ, २ वामेणं पादेणं तिक्खुतो भूमिं दलेइ, २ चमरं असुरिदं असुररायं एवं वदासी-मुक्को सि णं भो! चमरा! असुरिदा! असुरराया! समणस्स भगवओ महावीरस्स पभावेणं, नहि ते दाणिं ममाओ भयमत्थि' ति कट्टु जामेव दिसिं पाउब्भूए तामेव दिसिं पडिगए।

**[१७५]** भंते! ति भगवं गोयमे समणं भगवं महावीरं वंदति, २ एवं वदासि देवे णं भंते! महिइडीए महज्जुतीए जाव महाणुभागे पुट्ठामेव पोग्गलं खिविता पभू तमेव अणुपरियट्ठिताणं गिण्हितए? हंता, पभू।

से केणट्ठेणं भंते! जाव गिण्हितए? गोयमा! पोग्गले णं खिते समाणे पुट्ठामेव सिग्घगती भवित्ता ततो पच्छा मंदगती भवति, देवे णं महिइडीए पुट्ठिं पि य पच्छा वि सीहे सीहगती चेव, तुरिते तुरितगती चेव। से तेणट्ठेणं जाव पभू गेण्हितए।

जति णं भंते! देवे महिइडीए जाव अणुपरियट्ठिताणं गेण्हितए कम्हा णं भंते! सक्केणं देविंदेणं देवरण्णा चमरे असुरिदे असुरराया नो संचाइए साहत्थिं गेण्हितए? गोयमा! असुरकुमाराणं देवाणं अहेगतिविसए सीहे सीहे चेव, तुरिते तुरिते चेव। उड्ढंगतिविसए अप्पे अप्पे चेव, मंदे मंदे चेव। वेमाणियाणं देवाणं उड्ढंगतिविसए सीहे सीहे चेव, तुरिते तुरिते चेव। अहेगतिविसए अप्पे अप्पे चेव, मंदे मंदे चेव।

जावतियं खेतं सक्के देविंदे देवराया उड्ढं उप्पतति एक्केणं समएणं तं वज्जे दोहिं, जं वज्जे दोहिं तं चमरे तीहिं; सव्वत्थोवे सक्कस्स देविंदस्स देवरण्णो उड्ढलोकंडए, अहेलोकंडए संखेज्जगुणे।

जावतियं खेतं चमरे असुरिदे असुरराया अहे ओवयति एक्केणं समएणं तं सक्के दोहिं, जं सक्के दोहिं तं वज्जे तीहिं, सव्वत्थोवे चमरस्स असुरिदस्स असुररण्णो अहेलोकंडए, उड्ढलोकंडए

संखेज्जगुणे।

एवं खलु गोयमा! सक्केणं देविंदेणं देवरण्णा चमरे असुरिंदे असुरराया नो संचाइए साहत्थिं गेण्हितए।

सक्कस्स णं भंते! देविंदस्स देवरण्णो उड्ढं अहे तिरियं च गतिविसयस्स कतरे कतरेहिंतो अप्पे वा, बहुए वा, तुल्ले वा, विसेसाहिए वा? गोयमा! सक्कत्थोवं खेतं सक्के देविंदे देवराया अहे ओवयइ एक्केणं समएणं, तिरियं संकेज्जे भागे गच्छइ, उड्ढं संखेज्जे भागे गच्छइ।

चमरस्स णं भंते! असुरिंदस्स असुररण्णो उड्ढं अहे तिरियं च गतिविसयस्स कतरे कतरेहिंतो अप्पे वा, बहुए वा, तुल्ले वा, विसेसाहिए वा? गोयमा! सक्कत्थोवं खेतं चमरे असुरिंदे असुरराया उड्ढं उप्पयति एक्केणं समएणं, तिरियं संखेज्जे भागे गच्छइ, अहे संखेज्जे भागे गच्छइ।

वज्जं जहा सक्कस्स देविंदस्स तहेव, नवरं विसेसाहियं कायव्वं।

सक्कस्स णं भंते! देविंदस्स देवरण्णो ओवयणकालस्स य उप्पयणकालस्स य कतरे कतरेहिंतो अप्पे वा, बहुए वा, तुल्ले वा, विसेसाहिए वा? गोयमा! सक्कत्थोवे सक्कस्स देवदस्स देवरण्णो उप्पयणकाले, ओवयणकाले संखेज्जगुणे।

चमरस्य वि जहा सक्कस्स, णवरं सक्कत्थोवे ओवयणकाले, उप्पयणकाले संखेज्जगुणे।

वज्जस्स पुच्छा। गोयमा! सक्कत्थोवे उप्पयणकाले, ओवयणकाले विसेसाहिए।

एयस्स णं भंते! वज्जस्स, वज्जाहिवतिस्स, चमरस्स य असुरिंदस्स असुररण्णो ओवयणकालस्स य उप्पयणकालस्स य कयरे कयरेहिंतो अप्पे वा ४? गोयमा! सक्कस्स य उप्पयणकाले चमरस्स य ओवयणकाले, एते णं बिण्णि वि तुल्ला सक्कत्थोवा। सक्कस्स य ओवयणकाले वज्जस्स य उप्पयणकाले, एस णं दोण्ह वि तुल्ले संखेज्जगुणे। चमरस्स य उप्पयणकाले वज्जस्स य ओवयणकाले, एस णं दोण्ह वि तुल्ले विसेसाहिए।

**[१७६]** तए णं से चमरे असुरिंदे असुरराया वज्जभयविप्पमुक्के सक्केणं देविंदेणं देवरण्णा महया अवमाणेणं अवमाणिते समाणे चमरचंचाए रायहाणीए सभाए सुहम्मए चमरंसि सीहासणंसि ओहतमणसंकप्पे चिंतासोकसागरसंपविट्ठे करतलपल्हत्थमुहे अट्टज्जाणोवगते भूमिगतदिट्ठीए झियाति।

तते णं तं चमरं असुरिंदं असुररायं सामाणियपरिसोववन्नया देवा ओहयमणसंकप्पं जाव झियायमाणं पासंति, २ करतल जाव एवं वयासि-किं णं देवाणुप्पिया ओहयमणसंकप्पा जाव झियायंति? तए णं चमरे असुरिंदे असुरराया ते सामाणियपरिसोववन्नए देवे एवं वयासी-एवं खलु देवाणुप्पिया! मए समणं भगवं महावीरं नीसाए कट्टु सक्के देविंदे देवराया सयमेव अच्चासादिए। तए णं तेणं परिकुवितेणं समाणेणं ममं वहाए वज्जे निसिट्ठे। तं भद्वं णं भवतु देवाणुप्पिया! समणस्स भगवओ महावीरस्स जस्स म्हि पभावेण अकिट्ठे अक्कहिए अपरिताविए इहमागते, इह समोसडे, इह संपते, इहेव अज्जं उवसंपज्जिताणं विहरामि। तं गच्छामो णं देवाणुप्पिया! समणं भगवं महावीरं वंदामो णमंसामो जाव पज्जुवासामो'ति कट्टु चउसट्ठीए सामाणियसाहस्सीहिं जाव सच्चिइट्ठीए जाव जेणेव असोगवरपादवे जेणेव ममं अंतिए तेणेव उवागच्छइ, २ ममं तिक्खुत्तो आदाहिणपदाहिणं जाव नमंसिता एवं वदासि-एवं खलु भंते! मए तुब्भं नीसाए सक्के देविंदे देवराया सयमेव अच्चासादिए जाव तं भद्वं णं भवतु देवाणुप्पियाणं जस्स म्हि पभावेणं अक्कट्ठे जाव विहरामि। तं खामेमि णं देवाणुप्पिया! जाव उत्तरपुरत्थिमं दिसीभागं अवक्कमइ, २

ता जाव बतीसइबद्धं नट्टविहिं उवदंसेइ, २ जामेव दिसिं पादुब्भूए तामेव दिसिं पडिगते।

एवं खलु गोयमा! चमरेणं असुरिंदेणं असुररणा सा दिव्वा देविड्ढी लद्धा पत्ता

जाव अभिसमन्नागया। ठिती सागरोवमं। महाविदेहे वासे सिज्झिहिति जाव अंतं काहिति।

**[१७७]** किं पत्तियं णं भंते! असुरकुमारा देवा उड्ढं उप्पयंति जाव सोहम्मो कप्पो? गोयमा!

तेसिं णं देवाणं अहुणोववन्नगाण वा चरिमभवत्थाण वा इमेयारूवे अज्झित्थिए जाव समुप्पज्जति-अहो!  
णं अम्हेहिं देव्वा देविड्ढी लद्धा पत्ता जाव अभिसमन्नागया। जारिसिया णं अम्हेहिं दिव्वा देविड्ढी जाव  
अभिसमन्नागया तारिसिया णं सक्केणं देविंदेणं देवरणा दिव्वा देविड्ढी जाव अभिसमन्नागया, जारिसिया  
णं सक्केणं देविंदेणं देवरणा जाव अभिसमन्नागया तारिसिया णं अम्हेहिं वि जाव अभिसमन्नागया। तं  
गच्छामो णं सक्कस्स देविंदस्स देवरणो अंतियं पातुब्भवामो, पासामो ता सक्कस्स देविंदस्स देवरणो  
दिव्वं देविड्ढिं जाव अभिसमन्नागयं, पासतु ताव अम्ह वि सक्के देविंदे देवराया दिव्वं देविड्ढिं जाव  
अभिसमन्नागयं, तं जाणामो ताव सक्कस्स देविंदस्स देवरणो दिव्वं देविड्ढिं जाव अभिसमन्नागयं,  
जाणउ ताव अम्ह वि सक्के देविंदे देवराया दिव्वं देविड्ढिं जाव अभिसमन्नागयं। एवं खलु गोयमा!  
असुरकुमारा देवा उड्ढं उप्पयंति जाव सोहम्मो कप्पो।

सेवं भंते! सेवं भंते! ति।

**\*तइय सए बीइओ उद्देशो समतो\***

**० तइओ उद्देशओ ०**

**[१७८]** तेणं कालेणं तेणं समएणं रायगिहे नामं नगरे होत्था जाव परिसा पडिगया। तेणं  
कालेणं तेणं समएणं जाव अंतेवासी मंडियपुत्ते णामं अणगारे पगतिभद्दए जाव पज्जुवासमाणे एवं वदासी-  
कति णं भंते! किरियाओ पण्णत्ताओ? मंडियपुत्ता! पंच किरियाओ पण्णत्ताओ, तं जहा-काइया  
अहिगरणिया पाओसिया पारियावणिया पाणातिवातकिरिया।

काइया णं भंते! किरिया कतिविहा पण्णत्ता? मंडियपुत्ता! दुविहा पण्णत्ता, तं जहा-  
अणुवरयकायकिरिया य दुप्पउत्तकायकिरिया य।

अधिगरणिया णं भंते! किरिया कतिविहा पण्णत्ता? मंडियपुत्ता! दुविहा पण्णत्ता, तं जहा-  
संजोयणाहिगरणकिरिया य निव्वत्तणाहिगरणकिरिया य।

पादोसिया णं भंते! किरिया कतिविहा पण्णत्ता? मंडियपुत्ता! दुविहा पण्णत्ता, तं जहा-  
जीवपादोसिया य अजीवपादोसिया य।

पारितावणिया णं भंते! किरिया कइविहा पण्णत्ता? मंडियपुत्ता! दुविहा पण्णत्ता, तं जहा-  
सहत्थपारितावणिगा य परहत्थपारितावणिगा य।

पाणातिवातकिरिया णं भंते! पुच्छा। मंडियपुत्ता! दुविहा पण्णत्ता, तं जहा-सहत्थ

पाणातिवातकिरिया य परहत्थपाणातिवातकिरिया य।

**[१७९]** पुत्विं भंते! किरिया पच्छा वेदणा? पुत्विं वेदणा पच्छा किरिया? मंडियपुत्ता! पुत्विं  
किरिया, पच्छा वेदणा; णो पुत्विं वेदणा, पच्छा किरिया।

**[१८०]** अत्थि णं भंते! समणाणं निग्गंथाणं किरिया कज्जइ? हंता, अत्थि।

कहं णं भंते! समणाणं निग्गंथाणं किरिया कज्जइ? मंडियपुत्ता! पमायपच्चया जोगनिमित्तं च, एवं खलु समणाणं निग्गंथाणं किरिया कज्जति।

[१८१] जीवे णं भंते! सया समियं एयति वेयति चलति फंदइ घट्टइ खुब्भइ उदीरति तं तं भावं परिणमति? हंता, मंडियपुत्ता! जीवे णं सया समितं एयति जाव तं तं भावं परिणमति।

जावं च णं भंते! से जीवे सया समितं जाव परिणमति तावं च णं तस्स जीवस्स अंते अंतकिरिया भवति? णो इणट्ठे समट्ठे।

से केणट्ठेणं भंते! एवं वुच्चइ-जावं च णं से जीवे सदा समितं जाव अंते अंतकिरिया न भवति? मंडियपुत्ता! जावं च णं से जीवे सया समितं जाव परिणमति तावं च णं से जीवे आरभति सारभति समारभति, आरंभे वट्टति, सारंभे वट्टति, समारंभे वट्टति, आरभमाणे सारभमाणे समारभमाणे, आरंभे वट्टमाणे, सारंभे वट्टमाणे, समारंभे वट्टमाणे बहूणं पाणाणं भूताणं जीवाणं सत्ताणं दुक्खावणताए सोयावणताए जूरावणताए तिप्पावणताए पिट्टावणताए परितावणताए वट्टति, से तेणट्ठेणं मंडियपुत्ता! एवं वुच्चति-जावं च णं से जीवे सया समितं एयति जाव परिणमति तावं च णं तस्स जीवस्स अंते अंतकिरिया न भवति।

जीवे णं भंते! सया समियं नो एयति जाव नो तं तं भावं परिणमति? हंता, मंडियपुत्ता! जीवे णं सया समियं जाव नो परिणमति।

जावं च णं भंते! से जीवे नो एयति जाव नो तं तं भावं परिणमति तावं च णं तस्स जीवस्स अंते अंतकिरिया भवति? हंता, जाव भवति।

से केणट्ठेणं भंते! जाव भवति? मंडियपुत्ता! जावं च णं से जीवे सया समियं णो एयति जाव णो परिणमइ तावं च णं से जीवे नो आरभति, नो सारभति, नो समारभति, नो आरंभे वट्टइ, णो सारंभे वट्टइ, णो समारंभे वट्टइ, अणारभमाणे असारभमाणे असमारभमाणे, आरंभे अवट्टमाणे, सारंभे अवट्टमाणे, समारंभे अवट्टमाणे बहूणं पाणाणं ४ अदुक्खावणयाए जाव अपरियावणयाए वट्टइ।

से जहानामए केइ पुरिसे सुक्कं तणहत्थयं जाततेयंसि पक्खिजेज्जा, से नूणं मंडियपुत्ता! से सुक्के तणहत्थए जायतेयंसि पक्खित्ते समाणे खिप्पामेव मसमसाविज्जइ? हंता, मसमसाविज्जइ।

से जहानामए केइ पुरिसे तत्तंसि अयकवल्लंसि उदयबिंदुं पक्खिजेज्जा, से नूणं मंडियपुत्ता! से उदयबिंदू तत्तंसि अयकवल्लंसि पक्खित्ते समाणे खिप्पामेव विद्धंसमागच्छइ? हंता, विद्धंसमागच्छइ।

से जहानामए हरए सिया पुण्णे पुण्णप्पमाणे वोलट्टमाणे वोसट्टमाणे समभरघडताए चिट्ठति? हंता चिट्ठति। अहे णं केइ पुरिसे तंसि हरयंसि एगं महं नावं सतासवं सयच्छिद्धं ओगाहेज्जा, से नूणं मंडियपुत्ता! सा नावा तेहिं आसवद्वारेहिं आपूरेमाणी २ पुण्णा पुण्णप्पमाणा वोलट्टमाणा वोसट्टमाणा समभरघडताए चिट्ठति हंता, चिट्ठति।

अहे णं केइ पुरिसे तीसे नावाए सव्वतो समंता आसवद्वाराइं पिहेइ, नावाउस्सिंचणएणं उदयं उस्सिंचिज्जा, से नूणं मंडियपुत्ता! सा नावा तंसि उदयंसि उस्सितंसि समाणंसि खिप्पामेव उद्धं उद्दति? हंता, उद्दति। एवामेव मंडियपुत्ता! अतत्तासंवुडस्स अणगारस्स इरियासमियस्स जाव गुत्तबंभयारिस्स, आउत्तं गच्छमाणस्स चिट्ठमाणस्स निसीयमाणस्स तुयट्टमाणस्स, आउत्तं वत्थ-पडिग्गह-कंबल-पादपुंछणं गेण्हमाणस्स, निक्खिवमाणस्स जाव चक्खुपम्हनिवायमवि वेमाया सुहुमा इरियावहिया किरिया कज्जइ।

सा पढमसमयबद्धपुट्ठा बितियसमयवेतिता ततियसमयनिज्जरिया, सा बद्धा पुट्ठा उदीरिया वेदिया निज्जिण्णा सेयकाले अकम्मं चावि भवति।

से तेणट्ठेणं मंडियपुत्ता! एवं वुच्चति-जावं च णं से जीवे सया समितं नो एयति जाव अंते अंतकिरिया भवति।

**[१८२]** पमतसंजयस्स णं भंते! पमतसंजमे वट्टमाणस्स सच्चा वि य णं पमतद्धा कालतो केवच्चिरं होति? मंडियपुत्ता! एगजीवं पडुच्च जहन्नेणं एक्कं समयं उक्कोसेणं देसूणा पुव्वकोडी। णाणाजीवे पडुच्च सच्चद्धा।

अप्पमतसंजयस्स णं भंते! अप्पमतसंजमे वट्टमाणस्स सच्चा वि य णं अप्पमतद्धा कालतो केवच्चिरं होति? मंडियपुत्ता! एगजीवं पडुच्च जहन्नेणं अंतोमुहुत्तं, उक्कोसेणं पुव्वकोडी देसूणा। णाणाजीवे पडुच्च सच्चद्धं।

सेवं भंते! २ ति भगवं मंडियपुत्ते अणगारे समणं भगवं महावीरं वंदइ नमंसइ, संजमेणं तवसा अप्पाणं भावेमाणे विहरइ।

**[१८३]** भंते! ति भगवं गोतमे समणं भगवं महावीरं वंदइ नमंसइ, २ ता एवं वदासि-कम्हा णं भंते! लवणसमुद्धे चाउद्धस-ऽट्ठमुद्धिट्ठपुण्णमासिणीसु अतिरेयं वड्ढति वा हायति वा? लवणसमुद्धवत्तव्वया नेयव्वा जाव लोयट्ठिती। जाव लोयाणुभावे।

सेवं भंते! एवं भंते! ति विहरति।

**\*तइय सए तइओ उद्देशो समतो\***

## ० चउत्थो उद्देशो ०

**[१८४]** अणगारे णं भंते! भावियप्पा देवं वेउच्चियसमुग्घाएणं समोहयं जाणरूवेणं जायमाणं जाणइ पासइ? गोयमा! अत्थेगइए देवं पासइ, णो जाणं पासइ; अत्थेगइए जाणं पासइ, नो देवं पासइ; अत्थेगइए देवं पि पासइ, जाणं पि पासइ; अत्थेगइए नो देवं पासइ, नो जाणं पासइ ।

अणगारे णं भंते! भावियप्पा देविं वेउच्चियसमुग्घाएणं समोहयं जाणरूवेणं जायमाणं जाणइ पासइ? गोयमा! एवं चेव।

अणगारे णं भंते! भावियप्पा देवं सदेवीयं वेउच्चियसमुग्घाएणं समोहयं जाणरूवेणं जायमाणं जाणइ पासइ? गोयमा! अत्थेगइए देवं सदेवीयं पासइ, नो जाणं पासइ। एएणं अभिलावेणं चत्तारि भंगा।

अणगारे णं भंते! भावियप्पा रुक्खस्स किं अंतो पासइ, बाहिं पासइ? चउभंगो।

एवं किं मूलं पासइ, कंदं पा०? चउभंगो। मूलं पा० खंधं पा०? चउभंगो।

एवं मूलेणं बीजं संजोएयव्वं। एवं कंदेण वि समं संजोएयव्वं जाव बीयं। एवं जाव पुप्फेण समं बीयं संजोएयव्वं।

अणगारे णं भंते! भावियप्पा रुक्खस्स किं फलं पा. बीयं पा०? चउभंगो।

**[१८५]** पभू णं भंते! वाउक्काए एगं महं इत्थिरूवं वा पुरिसरूवं वा हत्थिरूवं वा जाणरूवं वा एवं जुग्ग-गिल्लि-थिल्लि-सीय-संदमाणियरूवं वा विउच्चित्तए? गोयमा! णो इणट्ठे समट्ठे। वाउक्काए णं विकुच्चमाणे एगं महं पडागासंठियं रूवं विकुच्चइ।

पभू णं भंते! वाउकाए एगं महं पडागासंठियं रूवं विउच्चिता अणेगाइं जोयणाइं गमित्तए?  
हंता, पभू।

से भंते! किं आयड्ढीए गच्छइ, परिड्ढीए गच्छइ? गोयमा! आतड्ढीए गच्छइ, णो परिड्ढीए  
गच्छइ। जहा आयड्ढीए एवं चेव आयकम्मणा वि, आयप्पओगेण वि भाणियत्वं।

से भंते! किं ऊसिओदयं गच्छइ, पतोदयं गच्छइ? गोयमा! ऊसिओदयं पि गच्छइ, पतोदयं पि  
गच्छइ।

से भंते! किं एगओपडागं गच्छइ, दुहओपडागं गच्छइ? गोयमा! एगओपडागं गच्छइ, नो  
दुहओपडागं गच्छइ।

से णं भंते! किं वाउकाए पडागा? गोयमा! वाउकाए णं से, नो खलु सा पडागा।

**[१८६]** पभू णं भंते! बलाहगे एगं महं इत्थिरूवं वा जाव संदमाणियरूवं वा परिणामेत्तए?  
हंता, पभू।

पभू णं भंते! बलाहए एगं महं इत्थिरूवं परिणामेत्ता अणेगाइं जोयणाइं गमित्तए? हंता, पभू।

से भंते! किं आयड्ढीए गच्छइ, परिड्ढीए गच्छइ? गोयमा! नो आतिड्ढीए गच्छति, परिड्ढीए  
गच्छइ।

एवं नो आयकम्मणा, परकम्मणा। नो आयपयोगेणं, परप्पयोगेणं।

ऊसितोदयं वा गच्छइ पतोदयं वा गच्छइ।

से भंते! किं बलाहए इत्थी? गोयमा! बलाहए णं से, णो खलु सा इत्थी। एवं पुरिसे, आसे,  
हत्थी।

पभू णं भंते! बलाहए एगं महं जाणरूवं परिणामेत्ता अणेगाइं जोयणाइं गमित्तए जहा  
इत्थिरूवं तहा भाणियत्वं। णवरं एगओचक्कवालं पि, दुहओचक्कवालं पि भाणियत्वं।

जुग्ग-गिल्लि-थिल्लि-सीया-संदमाणियाणं तहेव।

**[१८७]** जीवे णं भंते! जे भविए नेरइएसु उववज्जित्तए से णं भंते! किलेसेसु उववज्जति?  
गोयमा! जल्लेसाइं दव्वाइं परियाइत्ता कालं करेइ तल्लेसेसु उववज्जइ, तं.-कणहलेसेसु वा नीललेसेसु वा  
काउलेसेसु वा।

एवं जस्स जा लेस्सा सा तस्स भाणियत्त्वा जाव जीवे णं भंते! से भविए जोतिसिएसु  
उववज्जित्तए. पुच्छ। गोयमा! जल्लेसाइं दव्वाइं परियाइत्ता कालं करेइ तल्लेसेसु उववज्जइ, तं.-तेउलेस्सेसु।

जीवे णं भंते! जे भविए वेमाणिएसु उववज्जित्तए से णं भंते! किलेस्सेसु उववज्जइ?

गोयमा! जल्लेसाइं दव्वाइं परियाइत्ता कालं करेइ तल्लेसेसु उववज्जइ, तं.-तेउलेस्सेसु वा  
पम्हलेसेसु वा सुक्कलेसेसु वा।

**[१८८]** अणगारे णं भंते! भावियप्पा बाहिरए पोग्गले अपरियाइत्ता पभू वेभारं पव्वयं  
उल्लंघेत्तए वा पलंघेत्तए वा? गोयमा! णो इणट्ठे समट्ठे।

अणगारे णं भंते! भावियप्पा बाहिरए पोग्गले परियाइत्ता पभू वेभारं पव्वयं उल्लंघेत्तए वा  
पलंघेत्तए वा? हंता, पभू। अणगारे णं भंते! भावियप्पा बाहिरए पोग्गले अपरियाइत्ता जावइयाइं रायगिहे नगरे  
रूवाइं एवइयाइं विकुच्चिता वेभारं पव्वयं अंतो अणुप्पविसित्ता पभू समं वा विसमं करेत्तए, विसमं वा समं

करेतए? गोयमा! णो इणट्ठे समट्ठे।

एवं चेव बितिओ वि आलावगो; णवरं परियातिता पभू।

से भंते! किं मायी विकुच्चति, अमायी विकुच्चइ? गोयमा! मायी विकुच्चइ, नो अमाई विकुच्चति।

से केणट्ठेणं भंते! एवं वुच्चइ जाव नो अमायी विकुच्चइ?

गोयमा! मायी णं पणीयं पाण-भोयणं भोच्चा भोच्चा वामेति, तस्स णं तेणं पणीएणं पाणभोयणेणं अट्ठि-अट्ठिमिंजा बहलीभवन्ति, पयणुए मंस-सोणिए भवति, जे वि य से अहाबादरा पोग्गला ते वि य से परिणमंति, तं जहा-

सोतिंदियताए जाव फासिंदियताए, अट्ठि-अट्ठिमिंज-केस-मंसु-रोम-नहताए सुक्कताए सोणियताए। अमायी णं लूहं पाण-भोयणं भोच्चा भोच्चा णो वामेइ, तस्स णं तेणं लूहेणं पाण-भोयणेणं अट्ठि-अट्ठिमिंजा. पतणूभवति, बहले मंस-सोणिए, जे वि य से अहाबादरा पोग्गला ते वि य से परिणमंति; तं जहा-उच्चारताए पासवणताए जाव सोणियताए। से तेणट्ठेणं जाव नो अमायी विकुच्चइ।

मायी णं तस्स ठाणस्स अणालोइयपडिक्कंते कालं करेइ नत्थि तस्स आराहणा।

अमायी णं तस्स ठाणस्स आलोइयपडिक्कंते कालं करेइ अत्थि तस्स आराहणा।

सेवं भंते! सेवं भंते! ति।

**\*तइय सए चउत्थो उद्देशो समतो\***

## ० पंचमो उद्देशो ०

[१८९]अणगारे णं भंते! भावियप्पा बाहिरए पोग्गले अपरियाइता पभू एगं महं इत्थिरूवं वा जाव संदमाणियरूवं वा विकुच्चित्तए? णो इ।

अणगारे णं भंते! भावियप्पा बाहिरए पोग्गले परियाइता पभू एगं महं इत्थिरूवं वा जाव संदमाणियरूवं वा विकुच्चित्तए? हंता, पभू।

अणगारे णं भंते! भावियप्पा केवतियाइं पभू इत्थिरूवाइं विकुच्चित्तए?

गोयमा! से जहानामए जुवइ जुवाणे हत्थेणं हत्थंसि गेण्हेज्जा, चक्कस्स वा नाभी अरगाउता सिया एवामेव अणगारे वि भावियप्पा वेउच्चियसमुग्घाएणं समोहण्णइ जाव पभू णं गोयमा! अणगारे णं भावियप्पा केवलकप्पं जंबुद्धीवं दीवं बहूहिं इत्थीरूवेहिं आइण्णं वित्तिकिण्णं जाव एस णं गोयमा! अणागरस्स भावियप्पणो अयमेयारूवे विसए विसयमेत्ते बुइए, नो चेव णं संपत्तीए विकुच्चिंसु वा ३।

एवं परिवाडीए नेयत्वं जाव संदमाणिया।

से जहानामए केइ पुरिसे असिचम्मपायं गहाय गच्छेज्जा एवामेव अणगारे णं भावियप्पा असिचम्मपायहत्थकिच्चगएणं अप्पाणेणं उड्ढं वेहासं उप्पइज्जा? हंता, उप्पइज्जा।

अणगारे णं भंते! भावियप्पा केवतियाइं पभू असिचम्मपायहत्थकिच्चगयाइं रूवाइं विउच्चित्तए? गोयमा! से जहानामए जुवति जुवाणे हत्थेणं हत्थे गेण्हेज्जा तं चेव जाव विउच्चिंसु वा ३।

से जहानामए केइ पुरिसे एगओपडागं काउं गच्छेज्जा, एवामेव अणगारे वि भावियप्पा एगओपडागहत्थकिच्चगएणं अप्पाणेणं उड्ढं वेहासं उप्पतेज्जा? हंता, गोयमा! उप्पतेज्जा।

अणगारेणं भंते! भावियप्पा केवतियाइं पभू एगओपडागहत्थकिच्चगयाइं रूवाइं विकुच्चित्तए? एवं चेव जाव विकुच्चिंसु वा ।

एवं दुहओपडागं पि।

से जहानामए केइ पुरिसे एगओजण्णोवइतं काउं गच्छेज्जा, एवामेव अणगारे वि भा०

एगओजण्णोवइतकिच्चगएणं अप्पाणेणं उइडं वेहासं उप्पतेज्जा? हंता, उप्पतेज्जा।

अणगारे णं भंते! भावियप्पा केवतियाइं पभू एगतो जण्णोवतित किच्चगयाइं रूवाइं विकुच्चित्तए? तं चेव जाव विकुच्चिंसु वा ३।

एवं दुहओजण्णोवइयं पि।

से जहानामए केइ पुरिसे एगओपल्हत्थियं काउं चिट्ठेज्जा एवामेव अणगारे वि भावियप्पा? तं चेव जाव विकुच्चिंसु वा ३।

एवं दुहओपल्हत्थियं पि।

से जहानामए केयि पुरिसे एगओप लियंकं काउं चिट्ठेज्जा.? तं चेव जाव विकुच्चिंसु वा ३।

एवं दुहओपलियंकं पि।

अणगारे णं भंते! भावियप्पा बाहिरए पोग्गले अपरियाइत्ता पभू एगं महं आसरूवं वा हत्थिरूवं वा सहि-वग्घ-वग-दीविय-अच्छ-तरच्छ-परासरूवं वा अभिजुंजितए? णो इणट्ठे समट्ठे, अणगारे णं एवं बाहिरए पोग्गले परियादित्ता पभू।

अणगारे णं भंते! भावियप्पा एगं महं आसरूवं वा अभिजुंजित [? पभू] अणेगाइं जोयणाइं गमित्तए? हंता, पभू।

से भंते! किं आयइढीए गच्छति, परिइढीए गच्छति? गोयमा! आयइढीए गच्छइ, नो परिइढीए गच्छइ।

एवं आयकम्मणा, नो परकम्मणा। आयप्पयोगेणं, नो परप्पयोगेणं।

उस्सिओदगं वा गच्छइ पतोदगं वा गच्छइ।

से णं भंते! किं अणगारे आसे? गोयमा! अणगारे णं से, नो खलु से आसे।

एवं जाव परासरूवं वा।

से भंते! किं मायी विकुच्चति? अमायी विकुच्चति? गोयमा! मायी विकुच्चति, नो अमायी विकुच्चति।

माई णं तस्स ठाणस्स अणालोइयपडिक्कंते कालं करेइ अन्नयरेसु आभिओगिएसु देवलोगेसु देवताए उववज्जइ।

अमाई णं तस्स ठाणस्स आलोइयपडिक्कंते कालं करेइ अन्नयरेसु अणाभिओगिएसु देवलोगेसु देवताए उववज्जइ। सेवं भंते २ ति.।

[१९०] इत्थी असी पडागा जण्णोवइते य होइ बोद्ध्वे ।

पल्हत्थिय पलियंके अभियोगविकुच्चणा मायी ॥

**\*तइए सए पंचमो उद्देशो समतो\***

## ० छट्ठो उद्देशो ०

[१९१] अणगारे णं भंते! भावियप्पा मायी मिच्छद्दिट्ठी वीरियलद्धीए वेउच्चियलद्धीए विभंग-  
नाणलद्धीए वाणारसिं नगरिं समोहए, समोहणित्ता रायगिहे नगरे रूवाइं जाणति पासति? हंता, जाणइ  
पासइ।

से भंते! किं तहाभावं जाणइ पासइ? अन्नहाभावं जाणइ पासइ? गोयमा! णो तहाभावं जाणइ  
पासइ, अण्णहाभावं जाणइ पासइ।

से केणट्ठेणं भंते! एवं वुच्चइ नो तहाभावं जाणइ पासइ, अन्नहाभावं जाणइ पासइ?।  
गोयमा! तस्स णं एवं भवति-एवं खलु अहं रायगिहे नगरे समोहए, समोहणित्ता वाणारसीए नगरीए रूवाइं  
जाणामि पासामि, से से दंसणे विवच्चासे भवति, से तेणट्ठेणं जाव पासति।

अणगारे णं भंते! भावियप्पा मायी मिच्छद्दिट्ठी जाव रायगिहे नगरे समोहए, समोहणित्ता  
वाणारसीए नगरीए रूवाइं जाणइ पासइ? हंता, जाणइ पासइ। तं चेव जाव तस्स णं एवं होइ-एवं खलु अहं  
वाणारसीए नगरीए समोहए, २ रायगिहे नगरे रूवाइं जाणामि पासामि, से से दंसणे विवच्चासे भवति, से  
तेणट्ठेणं जाव अन्नहाभावं जाणइ पासइ।

अणगारे णं भंते! भावियप्पा मायी मिच्छद्दिट्ठी वीरियलद्धीए वेउच्चियलद्धीए  
विभंगणाणलद्धीए वाणारसिं नगरिं रायगिहं च नगरं अंतरा य एगं महं जणवयवग्गं समोहए, २ वाणारसिं  
नगरिं रायगिहं च नगरं तं च अंतरा एगं महं जणवयवग्गं जाणति पासति? हंता, जाणति पासति।

से भंते! किं तहाभावं जाणइ पासइ? अन्नहाभावं जाणइ पासइ? गोयमा! णो तहाभावं  
जाणति पासइ, अन्नहाभावं जाणइ पासइ।

से केणट्ठेणं जाव पासइ? गोयमा! तस्स खलु एवं भवति-एस खलु वाणारसी नगरी, एस  
खलु रायगिहे नगरे, एस खलु अंतरा एगे महं जणवयवग्गे, नो खलु एस महं वीरियलद्धी वेउच्चियलद्धी  
विभंगनाणलद्धी इड्ढी जुती जसे बले वीरिए पुरिसक्कारपरक्कमे लद्धे पत्ते अभिसमन्नागए, से से दंसणे  
विवच्चासे भवति, से तेणट्ठेणं जाव पासति।

[१९२]अणगारे णं भंते! भावियप्पा अमायी सम्मद्दिट्ठी वीरियलद्धीए वेउच्चियलद्धीए  
ओहिनाणलद्धीए रायगिहे नगरे समोहए, २ वाणारसीए नगरीए रूवाइं जाणइ पासइ? हंता।

से भंते! किं तहाभावं जाणइ पासइ? अन्नहाभावं जाणति पासति? गोयमा! तहाभावं जाणति  
पासति, नो अन्नहाभावं जाणति पासति।

से केणट्ठेणं भंते! एवं वुच्चइ? गोयमा! तस्स णं एवं भवति-एवं खलु अहं रायगिहे नगरे  
समोहए, समोहणित्ता वाणारसीए नगरीए रूवाइं जाणामि पासामि, से से दंसणे अविवच्चासे भवति, से  
तेणट्ठेणं गोयमा! एवं वुच्चति।

बीओ वि आलावगो एवं चेव, नवरं वाणारसीए नगरीए समोहणावेयव्वो, रायगिहे नगरे रूवाइं  
जाणइ पासइ।

अणगारे णं भंते! भावियप्पा अमायी सम्मद्दिट्ठी वीरियलद्धीए वेउच्चियलद्धीए ओहिनाण-  
लद्धीए रायगिहं नगरं वाणारसिं च नगरिं अंतरा य एगं महं जणवयवग्गं समोहए, २

रायगिहं नगरं वाणारसिं च नगरिं तं च अंतरा एगं महं जणवयवग्गं जाणइ पासइ? हंता, जाणइ पासइ।

से भंते! किं तहाभावं जाणइ पासइ? अन्नहाभावं जाणइ पासइ? गोयमा! तहाभावं जाणइ पासइ, णो अन्नहाभावं जाणइ पासइ।

से केणट्ठेणं? गोयमा! तस्स णं एवं भवति-नो खलु एस रायगिहे णगरे, णो खलु एस वाणारसी नगरी, नो खलु एस अंतरा एगे जणवयवग्गे, एस खलु ममं वीरियलद्धी वेडवियलद्धी ओहिणाणलद्धी इड्ढी जुती जसे बले वीरिए पुरिसक्कारपरक्कमे लद्धे पत्ते अभिसमन्नागए, से से दंसणे अविवच्चासे भवति, से तेणट्ठेणं गोयमा! एवं वुच्चति-तहाभावं जाणति पासति, नो अन्नहाभावं जाणति पासति।

अणगारे णं भंते! भावियप्पा बाहिरए पोग्गले अपरियाइत्ता पभू एगं महं गामरूवं वा नगररूवं वा जाव सन्निवेसरूवं वा विकुच्चित्तए? णो इणट्ठे समट्ठे।

एवं बित्तिओ वि आलावगो, णवरं बाहिरए पोग्गले परियादिइत्ता पभू।

अणगारे णं भंते! भावियप्पा केवतियाइं पभू गामरूवाइं विकुच्चित्तए? गोयमा! से जहानामए जुवति जुवाणे हत्थेणं हत्थे गेण्हेज्जा तं चेव जाव विकुच्चिसु वा ३। एवं जाव सन्निवेसरूवं वा।

**[१९३]** चमरस्स णं भंते! असुरिंदस्स असुररण्णो कति आयरक्खदेवसाहस्सीओ पण्णत्ताओ? गोयमा! चत्तारि चउसट्ठीओ

आयरक्खदेवसाहस्सीओ पण्णत्ताओ। ते णं आयरक्खा. वण्णओ जहा रायप्पसेणइज्जे।

एवं सत्वेसिं इंदाणं जस्स जत्तिया आयरक्खा ते भाणियत्त्वा। सेवं भंते! सेवं भंते! ति.।

**\*तइय सए छट्ठो उद्देशो समत्तो\***

## ० सतमो उद्देशो ०

**[१९४]** रायगिहे नगरे जाव पज्जुवासमाणे एवं वयासी-

सक्कस्स णं भंते! देविंदस्स देवरण्णो कति लोगपाला पण्णत्ता? गोयमा! चत्तारि

विणाणा पण्णत्ता, तं जहा-सोमे जमे वरूणे वेसमणे।

एतेसि णं भंते! चउण्हं लोगपालाणं कति विमाणा पण्णत्ता? गोयमा! चत्तारि विमाणा पण्णत्ता, तं जहा-संझप्पभे वरसिट्ठे सतंजले वग्गू।

कहि णं भंते! सक्कस्स देविंदस्स देवरण्णो समोस्स महारण्णो संझप्पभे णामं महाविमाणे पण्णत्ते? गोयमा! जंबुद्धीवे २ मंदरस्स पत्वयस्स दाहिणेणं इमीसे रयणप्पभाए पुढवीए बहुसमरमणिज्जाओ भूमिभागाओ उड्ढं चंदिम-सूरिय-गहगण-नक्खत्त-तारारूवाणं बहूइं जोयणाइं जाव पंच वडिंसया पण्णत्ता, तं जहा-असोयवडैसए सत्तवण्णवडिंसए चंपयवडिंसए चूयवडिंसए मज्झे सोहम्मवडिंसए। तस्स णं सोहम्मवडैसयस्स महाविमाणस्स पुरत्थिमेणं सोहम्ममे कप्पे असंखेज्जाइं जोयणाइं वीतीवइत्ता एत्थ णं सक्कस्स देविंदस्स देवरण्णो सोमस्स महारण्णो संझप्पभे नामं महाविमाणे पण्णत्ते अद्धतेरस जोयणसयसहस्साइं आयाम-विक्खंभेणं, ऊयालीसं जोयणसयसहस्साइं बावण्णं च सहस्साइं अट्ठ य अडयाले जोयणसए किंचिविसेसाहिए परिक्खेवेणं प.। जा सूरियाभविमाणस्स वत्तव्वया सा अपरिसेसा भाणियत्त्वा जाव अभिसेयो नवरं सोमे देवे।

संज्ञापभस्स णं महाविमाणस्स अहे सपक्खिं सपडिदिसिं असंखेज्जाइं जोयणसय सहस्साइं ओगाहिता एत्थ णं सक्कस्स देविंदस्स देवरण्णो सोमस्स महारण्णो सोमा नामं रायहाणी पण्णत्ता, एगं जोयणसयसहस्सं आयाम-विक्खंभेणं जंबुद्वीवपमाणा।

वेमाणियाणं पमाणस्स अद्धं नेयत्वं जाव उवरियलेणं सोलस जोयणसहस्साइं आयाम-विक्खंभेणं, पण्णासं जोयणसहस्साइं पंच य सत्ताणउए जोयणसते किंचिविसेसूणे परिक्खेवेणं पण्णत्ते। पासायाणं चत्तारि परिवाडीओ नेयत्वाओ, सेसा नत्थि।

सक्कस्स णं देविंदस्स देवरण्णो सोमस्स महारण्णो इमे देवा आणाउववाय-वयण-निद्देसे चिट्ठंति, तं जहा-सोमकाइया ति.वा, सोमदेवकाइया ति वा, विज्जुकुमारा विज्जुकुमारीओ, अग्गिकुमारा अग्गिकुमारीओ, वायुकुमारा वाउकुमारीओ, चंदा सूरा गहा नक्खत्ता तारारूवा, जे यावन्ने तहप्पगारा सत्त्वे ते तब्भत्तिया तप्पक्खिया तब्भारिया सक्कस्स देविंदस्स देवरण्णो सोमस्स महारण्णो आणा-उववाय-वयण-निद्देसे चिट्ठंति।

जंबुद्वीवे २ मंदरस्स पव्वयस्स दाहिणेणं जाइं इमाइं समुप्पज्जंति, तं जहा-गहदंडा ति वा, गहमुसला ति वा, गहगज्जिया ति वा, एवं गहजुद्धा ति वा, गहसिंघाडगा ति वा, गहावसत्त्वा इ वा, अब्भा ति वा, अब्भरूक्खा ति वा, संज्ञा इ वा, गंधव्वनगरा ति वा, उक्कापाया ति वा, दिसीदाहा ति वा, गज्जिया ति वा, विज्जुया ति वा, पंसुवुट्ठी ति वा, जूवेति वा, जक्खालित ति वा, धूमिया इ वा, महिया इ वा, रयुग्घाया इ वा, चंदोवरागा ति वा, सूरुवरागा ति वा, चंदपरिवेसा ति वा, सूरपरिवेसा ति वा, पडिचंदा इ वा, पडिसूरा ति वा, इंदधणू ति वा, उदगमच्छ-कपिहसिय-अमोह-पाईणवाया ति वा, पडीणवाता ति वा, जाव संवट्टयवाता ति वा, गामदाहा इ वा, जाव सन्निवेसदाहा ति वा पाणक्खया जणक्खया धणक्खया कुलक्खया वसणब्भूया अणारिया जे यावन्ने तहप्पगारा ण ते सक्कस्स देविंदस्स देवरण्णो सोमस्स महारण्णो अण्णाया अदिट्ठा असुया अमुया अविण्णाया, तेसिं वा सोमकाइयाणं देवाणं।

सक्कस्स णं देविंदस्स देवरण्णो सोमस्स महारण्णो इमे अहावच्चा अभिण्णाया होत्था, तं जहा-इंगालए वियालए लोहियक्खे सणिच्छरे चंदे सूरे सुक्के बुहे बहस्सती राहू।

सक्कस्स णं देविंदस्स देवरण्णो सोमस्स महारण्णो सत्तिभागं पलिओवमं ठिती पण्णत्ता। अहावच्चाभिण्णायाणं देवाणं एगं पलिओवमं ठिई पण्णत्ता। एमहिइढीए जाव एमहाणुभागे सोमे महाराया।

**[१९५]** कहि णं भंते! सक्कस्स देविंदस्स देवरण्णो जमस्स महारण्णो वरसिट्ठे णामं महाविमाणे पण्णत्ते? गोयमा! सोहम्मवडिसयस्स महाविमाणस्स दाहिणेणं सोहम्मे कप्पे असंखेज्जाइं जोयणसहस्साइं वीईवइत्ता एत्थ णं सक्कस्स देविंदस्स देवरण्णो जमस्स महारण्णो वरसिट्ठे णामं महाविमाणे पण्णत्ते अद्धतेरस जोयणसयसहस्साइं जहा सोमस्स विमाणं तहा जाव अभिसेओ। रायहाणी तहेव जाव पासायपंतीओ।

सक्कस्स णं देविंदस्स देवरण्णो जमस्स महारण्णो इमे देवा आणा. जाव चिट्ठंति, तं जहा-जमकाइया ति वा, जमदेवकाइया इ वा, पेयकाइया इ वा, पेयदेवकाइया ति वा, असुरकुमारा असुरकुमारीओ, कंदप्पा निरयवाला आभिओगा जे यावन्ने तहप्पगारा सत्त्वे ते तब्भत्तिगा, तप्पक्खिता तब्भारिया सक्कस्स देविंदस्स देवरण्णो जमस्स महारण्णो आणा जाव चिट्ठंति।

जंबुद्वीवे २ मंदरस्स पव्वयस्स दाहिणेणं जाइं इमाइं समुप्पज्जंति, तं जहा-डिंवा ति वा,

डमरा ति वा, कलहा ति वा, बोला ति वा, खारा ति वा, महाजुद्धा ति वा, महासंगामा ति वा, महासत्थनिवडणा ति वा, एवं महापुरिसनिवडणा ति वा, महारुधिरनिवडणा इ वा, दुब्भूया ति वा, कुलरोगा ति वा, गामरोगा ति वा, मंडलरोगा ति वा, नगररोगा ति वा, सीसवेयणा इ वा, अच्छवेयणा इ वा, कण्ह-नह-दंतवेयणा इ वा, इंदग्गहा इ वा, खंदग्गहा इ वा, कुमारग्गहा., जक्खग्ग., भूयग्ग., एगाहिया ति वा, बेहिया ति वा, तेहिया ति वा, चाउत्थया ति वा, उव्वेयणा ति वा, कासा., खासा इ वा, सासा ति वा, सोसा ति वा, जरा इ वा, दाहा., कच्छकोहा ति वा, अजीरया, पंडुरोया, अरिसा इ वा, भगंदला इ वा, हितयसूला ति वा, मत्थयसू., जोणिसू., पाससू., कुच्छिसू., गाममारीति वा, नगर., खेड., कब्बड., दोणमुह., मडंब., पट्टण., आसम., संवाह. सन्निवेसमारीति वा, पाणक्खया, धणक्खया, जणक्खया, कुलक्खया, वसणब्भूया अणारिया जे यावन्ते तहप्पगारा न ते सक्कस्स देविंदस्स देवरण्णो जमस्स महारण्णो अण्णया, तेसिं वा जमकाइयाणं देवाणं।

सक्कस्स णं देविंदस्स देवरण्णो जमस्स महारण्णो इमे देवा अहावच्चा अभिण्णया होत्था, तं जहा-

[१९६] अंब अंबरिसे चव सामे सबले ति यावरे ।  
रुद्धोवरुद्धे काले य महाकाले ति यावरे ॥

[१९७] असी य असिपते कुंभे वालू वेतरणी ति य ।  
खरस्सरे महाघोसे एए पन्नरसासहिया ॥

[१९८] सक्कस्स णं देविंदस्स देवरण्णो जमस्स महारण्णो सत्तिभागं पलिओवमं ठिती पण्णत्ता। अहावच्चाभिण्णयाणं देवाणं एगं पलिओवमं ठिती पण्णत्ता। एमहिड्ढिए जाव जमे महाराया।

[१९९] कहि णं भंते! सक्कस्स देविंदस्स देवरण्णो वरुणस्स महारण्णो सयंजले नामं महाविमाणे पण्णत्ते? गोयमा! तस्स णं सोहम्मवडिसयस्स महाविमाणस्स पच्चत्थिमेणं सोहम्मे कप्पे असंखेज्जाइं जहा सोमस्स तहा विमाणरायहाणीओ भाणियच्चा जाव पासायवडिसया, नवरं नामनाणत्तं।

सक्कस्स णं. वरुणस्स महारण्णो इमे देवा आणा. जाव चिट्ठंति, तं-वरुणकाइया ति वा, वरुणदेवयकाइया इ वा, नागकुमारा नागकुमारीओ, उदहिकुमारा उदहिकुमारीओ, थणियकुमारा थणिय-कुमारीओ, जे यावण्णे तहप्पगारा सव्वे ते तब्भत्तिया जाव चिट्ठंति।

जंबुद्धीवे २ मंदरस्स पव्वयस्स दाहिणेणं जाइं इमाइं समुप्पज्जंति, तं जहा-अतिवासा ति वा, मंदवासा ति वा, सुवुट्ठी ति वा, दुव्वुट्ठी ति वा, उदब्भेया ति वा, उदप्पीला इ वा, उदवाहा ति वा, पवाहा ति वा, गामवाहा ति वा, जाव सन्निवेसवाहा ति वा, पाणक्खया जाव तेसिं वा वरुणकाइयाणं देवाणं।

सक्कस्स णं देविंदस्स देवरण्णो वरुणस्स महारण्णो जाव अहावच्चाभिण्णया होत्था, तं जहा-कक्कोडए कद्धमए अंजणे संखवालए पुंडे पलासे मोएज्जए दहिमुहे अयंपुले कायरिए।

सक्कस्स णं देविंदस्स देवरण्णो वरुणस्स महारण्णो देसूणाइं दो पलिओवमाइं ठिती पण्णत्ता। अहावच्चाभिण्णयाणं देवाणं एगं पलिओवमं ठिती पण्णत्ता। एमहिड्ढीए जाव वरुणे महाराया।

[२००] कहि णं भंते ! सक्कस्स देविंदस्स देवरण्णो वेसमणस्स महारण्णो वग्गूणामं महा-विमाणे पण्णत्ते ? गोयमा ! तस्स णं सोहम्म वडिसयस्स महाविमाणस्स उत्तरेणं जहा सोमस्स विमाण-

रायहाणिवत्तव्वया तहा नेयच्चा जाव पासायवडिसया।

सक्कस्स णं देविंदस्स देवरण्णो वेसमणस्स महारण्णो इमे देवा आणा-उववाय-वयण-निद्देसे चिट्ठंति, तं जहा-वेसमणकाइया ति वा, वेसमणदेवयकाइया ति वा, सुवण्णकुमारा सुवण्णकुमारा सुवण्णकुमारीओ, दीवकुमारा दीवकुमारीओ, दिसाकुमारा दिसाकुमारीओ, वाणमंतरा वाणमंतरीओ, जे यावन्ने तहप्पगारा सव्वे ते तब्भत्तिया जाव चिट्ठंति।

जंबुद्धीवे २ मंदरस्स पव्वयस्स दाहिणेणं जाइं इमाइं समुप्पज्जंति, तं जहा-अयागरा इ वा, तउयागरा इ वा, तंबयागरा इ वा, एवं सीसागरा इ वा, हिरण्ण., सुवण्ण., रयण., वयरागरा इ वा, वसुधारा ति वा, हिरण्णवासा ति वा, सुवण्णवासा ति वा, रयण., वइर., आभरण., पत्., पुप्फ., फल., बीय., मल्ल., वण्ण., चुण्ण., गंध., वत्थवासा इ

वा, हिरण्णवुट्ठी इ वा, सु., र., व., आ., प., पु., फ., बी., म., व., चुण्ण. गंधवुट्ठी., वत्थवुट्ठी ति वा, भायणवुट्ठी ति वा, खीरवुट्ठी ति वा, सुकाला ति वा, दुक्काला ति वा, अप्पग्घा ति वा, महग्घा ति वा, सुभिक्षा ति वा, दुभिक्षा ति वा, कयविक्कया ति वा, सन्निहि ति वा, सन्निचया ति वा, निही ति वा, णिहाणा ति वा, चिरपोराणाइ वा, पहीणसमियाति वा, पहीणसेतुयाति वा, पहीणमग्गाणि वा, पहीणगोतागाराइ वा उच्छन्नसामियाति वा उच्छन्नसेतुयाति वा, उच्छन्नगोतागाराति वा सिंघाडग-तिग-चउक्क-चच्चर-चउम्मह-महापह-पहेसु नगरनिद्धमेणेसु सुसाण-गिरि-कंदर-संति-सेलोवट्ठाण-भवणगिहेसु सन्निक्खिताइं चिट्ठंति, ण ताइं सक्कस्स देविंदस्स देवरण्णो वेसमणस्स महारण्णो अण्णायाइं अदिट्ठाइं असुयाइं अविन्नायाइं, तेसिं वा वेसमणकाइयाणं देवाणं।

सक्कस्स णं देविंदस्स देवरण्णो वेसमणस्स महारण्णो इमे देवा अहावच्चाभिण्णाया होत्था, तं जहा-पुण्णभद्दे माणिभद्दे सालिभद्दे सुमणभद्दे चक्करक्खे पुण्णरक्खे सव्वाणे सव्वजसे सव्वकामसमिद्धे अमोहे असंगे।

सक्कस्स णं देविंदस्स देवरण्णो वेसमणस्स महारण्णो दो पत्तिओवमाणि ठिती पण्णत्ता। अहावच्चाभिण्णायाणं देवाणं एगं पत्तिओवमं ठिती पण्णत्ता। एमहिइडीए जाव वेसमणे महाराया।

सेवं भंते! सेवं भंते! ति।

**\*तइय सते सत्तमो उद्देशो समत्तो\***

## ० अट्ठमो उद्देशो ०

[२०१] रायगिहे नगरे जाव पज्जुवासमाणे एवं वदासी-असुरकुमाराणं भंते! देवाणं कति देवा आहेवच्चं जाव विहरंति? गोयमा! दस देवा आहेवच्चं जाव विहरंति, तं जहा- चमरे असुरिंदे असुरराया, सोमे, जमे, वरुणे, वेसमणे, बली वइरोयणिंदे वइरोयणराया, सोमे, जमे, वरुणे, वेसमणे।

नागकुमाराणं भंते! पुच्छा। गोयमा! दस देवा आहेवच्चं जाव विहरंति, तं जहा-धरणे नागकुमारिंदे नागकुमारराया, कालवाले, कोलवाले सेलवाले, संखवाले, भूयाणंदे नागकुमारिंदे नागकुमारराया, कालवाले, कोलवाले, संखवाले, सेलवाले।

जहा नागकुमारिंदाणं एताए वत्तव्वताए णीयं एवं इमाणं नेयव्वं-सुवण्णकुमाराणं वेणुदेवे, वेणुदाली, चित्ते, विचित्ते, चित्तपक्खे, विचित्तपक्खे। विज्जुकुमाराणं हरिक्कंत, हरिस्सह, पभ, सुप्पभ, पभकंत, सुप्पभकंत। अग्गिकुमाराणं अग्गिसिहे, अग्गिमाणव, तेउ, तेउसिहे, तेउकंते, तेउप्पभे। दीवकुमाराणं पुण्ण,

विसिट्ठ, रूय, रूयंस, रूयकंत, रूयप्पभ। उदहिकुमाराणं जलकंते, जलप्पभ, जल, जलरूय, जलकंत, जलप्पभ।  
दिसाकुमाराणं अमियगति, अमियवाहण, तुरियगति, खिप्पगति, सीहगति, सीहविककमगति। वाउकुमाराणं  
वेल्ब, पभंजण, काल अंजण रिट्ठ। थणियकुमाराणं घोस, महाघोस, आवत्त, वियावत्त, नंदियावत्त,  
महानंदियावत्त। एवं भाणियत्वं जहा असुरकुमारा। सो. १ का. २ चि. ३ प. ४ ते. ५ रू. ६ ज. ७ तु. ८  
का. ९ आ. १०।

पिसायकुमाराणं पुच्छा। गोयमा! दो देवा आहेवच्चं जाव विहरंति, तं जहा-

[२०२] काले य महाकाले सुरुव पडिरूव पुन्नभद्दे य।

अमरवड् माणिभद्दे भीमे य तहा महाभीमे।।

[२०३] किन्नर किंपुरिसे खलु सप्पुरिसे खलु तहा महापुरिसे।

अतिकाय महाकाए गीतरती चेव गीयजसे ।।

[२०४] एते वाणमंतराणं देवाणं।

जोतिसियाणं देवाणं दो देवा आहेवच्चं जाव विहरंति, तं जहा-चंदे य सूरै य।

सोहम्मिसाणेसु णं भंते! कप्पेसु कति देवा आहेवच्चं जाव विहरंति? गोयमा! दस देवा जाव  
विहरंति, तं जहा-सक्के देविंदे देवराया, सोमे, जमे, वरूणे, वेसमणे। ईसाणे देविंदे देवराया, सोमे, जमे, वरूणे,  
वेसमणे। एसा वत्तव्वया सव्वेसु वि कप्पेसु, एते चेव भाणियत्त्वा। जे य इंदा ते य भाणियत्त्वा।

सेवं भंते! सेवं! भंते ति।।

**\*तइय सते अट्ठमो उद्देसो समतो\***

**० नवमो उद्देसओ ०**

[२०५] रायगिहे जाव एवं वदासी-कतिविहे णं भंते! इंदियविसए पण्णत्ते? गोयमा! पंचविहे  
इंदियविसए पण्णत्ते, तं-सोतिंदियविसए, जीवाभिगमे जोतिसियउद्देसो नेयव्वो अपरिसेसो।

**\*तइय सए नवमो उद्देसो समतो\***

**० दसमो उद्देसो ०**

[२०६] रायगिहे जाव एवं वयासी- चमरस्स णं भंते! असुरिंदस्स असुररण्णो कति परिसाओ  
पण्णत्ताओ? गोयमा! तओ परिसाओ पण्णत्ताओ, तं जहा-समिता चंडा जाता।

एवं जहाणुपुव्वीए जाव अच्चुओ कप्पो।

सेवं भंते! सेवं भंते! ति।।

**\*तइय सए दसमो उद्देसो समतो\***

**०-तइयं सयं समतं-०**

**० मुनि दीपरत्तसागरेण संशोधितः सम्पादितश्च तइयं सतं समतं ०**

**[ ] चउत्थं सयं [ ]**

[२०७] चत्तारि विमाणेहिं , चत्तारि य होंति रायहाणीहिं ।

नेरइए लेस्साहि य दस उद्देसा चउत्थसते ।।

### ० उद्देसगा--१,२,३,४:- ०

[२०८] रायगिहे नगरे जाव एवं वयासी- ईसाणस्स णं भंते! देविंदस्स देवरण्णो कति लोग-पाला पण्णत्ता? गोयमा! चत्तारि लोगपाला पण्णत्ता, तं जहा-सोमे जमे वेसमणे वरुणे।

एतेसि णं भंते! लोगपालाणं कति विमाणा पण्णत्ता? गोयमा! चत्तारि विमाणा पण्णत्ता, तं जहा-सुमणे सव्वतोभद्धे वग्गू सुवग्गू।

कहि णं भंते! ईसाणस्स देविंदस्स देवरण्णो सोमस्स महारण्णो सुमणे नामं महाविमाणे पण्णत्ते? गोयमा! जंबुद्धीवे दीवे मंदरस्स पव्वयस्स उत्तरेणं इमीसे रयणप्पभाए पुढवीए जाव ईसाणे णामं कप्पे पण्णत्ते। तत्थ णं जाव पंच वडैसया पण्णत्ता, तं जहा-अंकवडैसए फलिहवडिंसए पयणवडैसए जायरूववडिंसए, मज्झे यत्थ ईसाणवडैसए। तस्स णं ईसाणवडैसयस्स महाविमाणस्स पुरत्थिमेणं तिरियमसंखेज्जाइं जोयणसहस्साइं वीतिवत्तिता एत्थ णं ईसाणस्स देविंदस्स देवरण्णो सोमस्स २ सुमणे नामं महाविमाणे पण्णत्ते, अद्धतेरसजोयण. जहा सक्कस्स वत्तव्वता ततियसते तहा ईसाणस्स वि जाव अच्चणिया समत्ता।

चउण्ह वि लोगपालाणं विमाणे विमाणे उद्देसओ। चउसो विमाणेसु चत्तारि उद्देसा अपरिसेसा। नवरं ठितीए नाणत्तं-

[२०९] आदि दुय तिभागूणा पलिया धणयस्स होंति दो चेव।

दो सतिभागा वरुणे पलियमहावच्चदेवाणं ॥

\*चउत्थे सए पढम-बिइय-तइय-चउत्था उद्देसा समत्ता\*

### ० उद्देसगा-५,६,७,८- ०

[२१०] रायहाणीसु वि चत्तारि उद्देसा भाणियव्वा जाव एमहिड्डीए जाव वरुणे महाराया।

\*चउत्थे सए पंचम-छट्ठ-सत्तम-अट्ठमा उद्देसा समत्ता\*

### ० नवमो उद्देसो ०

[२११] नेरइए णं भंते! नेरतिएसु उववज्जइ? अनेरइए नेरइएसु उववज्जइ? पण्णवणाए लेस्सापदे ततिओ उद्देसओ भाणियव्वो जाव नाणाइं।

\*चउत्थे सए नवमो उद्देसो समत्तो\*

### ० दसमो उद्देसो ०

[२१२] से नूणं भंते! कण्हलेस्सा नीललेस्सं पप्प तारूवत्ताए तावण्णत्ताए.? एवं चउत्थो उद्देसओ पण्णवणाए चेव लेस्सापदे नेयव्वो जाव

[२१३] परिणाम-वण्ण-रस-गंध-सुद्ध-अपसत्थ-संकिलिट्ठुण्हा।

गति-परिणाम -पदेसोगाह -वग्गणा-ठाणमप्पबहुं ॥

[२१४] सेवं भंते! सेवं भंते! ति.।

\*चउत्थे सए दसमो उद्देसो समत्तो\*

### ०-चउत्थं सयं समत्तं-०

० मुनि दीपरत्तसागरेण संशोधितः सम्पादितश्च चउत्थं सतं समत्तं ०

## [ ] पंचमं सयं [ ]

[२१५] चंप रवि अणिल गंठिय सद्दे छउमायु एयण णियंठे ।  
रायगिहं चंपाचंदिमा य दस पंचमम्मि सते ॥

## ० पढमो उद्देशो ०

[२१६] तेषं कालेणं तेषं समएणं चंपा नामं नगरी होत्था। वण्णओ। तीसे णं चंपाए नगरीए पुण्णभद्दे नामे चेतिए होत्था। वण्णओ। सामी समोसढे जाव परिसा पडिगता।

तेषं कालेणं तेषं समएणं समणस्स भगवतो महावीरस्स जेट्ठे अंतेवासी इंदभूती णामं अणगारे गोतमे गोत्तेणं जाव एवं वदासी-

जंबुद्धीवे णं भंते! दीवे सूरिया उदीण-पादीणमुग्गच्छ पादीणदाहिणमागच्छंति? पादीणदाहिण-मुग्गच्छ दाहिण-पादीणमागच्छंति? दाहिणपादीणमुग्गच्छ पादीण-उदीणमागच्छंति? पादीण-उदीणमुग्गच्छ उदीचिपादीणमागच्छंति? हंता, गोयमा! जंबुद्धीवे णं दीवे सूरिया उदीण-पादीणमुग्गच्छ जाव उदीचि-पादीणमागच्छंति।

[२१७] जदा णं भंते! जंबुद्धीवे दीवे दाहिणइढे दिवसे भवति तदा णं उत्तरइढे दिवसे भवति? जदा णं उत्तरइढेवि दिवसे भवति तदा णं जंबुद्धीवे दीवे मंदरस्स पव्वयस्स पुरत्थिम-पच्चत्थिमेणं राती भवति? हंता, गोयमा! जदा णं जंबुद्धीवे दीवे दाहिणइढे दिवसे जाव राती भवति।

जदा णं भंते! जंबु. मंदरस्स पव्वयस्स पुरत्थिमेणं दिवसे भवति तदा णं पच्चत्थिमेण वि दिवसे भवति? जदा णं पच्चत्थिमेणं दिवसे भवति तदा णं जंबुद्धीवे दीवे मंदरस्स पव्वयस्स उत्तर-दाहिणेणं राती भवति? हंता, गोयमा! जदा णं जंबु. मंदर. पुरत्थिमेणं दिवसे जाव राती भवति।

जदा णं भंते! जंबुद्धीवे दीवे दाहिणइढे उक्कोसए अट्ठारसमुहुत्ते दिवसे भवति तदा णं उत्तरइढे वि उक्कोसए अट्ठारसमुहुत्ते दिवसे भवति? जदा णं उत्तरइढे उक्कोसए अट्ठारसमुहुत्ते दिवसे भवति तदा णं जंबुद्धीवे दीवे मंदरस्स पुरत्थिम-पच्चत्थिमेणं जहन्निया दुवालसमुहुत्ता राती भवति? हंता, गोयमा! जदा णं जंबु. जाव दुवालसमुहुत्ता राती भवति।

जदा णं जंबु० मंदरस्स पुरत्थिमेणं उक्कोसए अट्ठारस जाव तदा णं जंबुद्धीवे दीवे पच्चत्थिमेण वि उक्को० अट्ठारसमुहुत्ते दिवसे भवति? जया णं पच्चत्थिमेणं उक्कोसए अट्ठारसमुहुत्ते दिवसे भवति तदा णं भंते! जंबुद्धीवे दीवे उत्तर० दुवालसमुहुत्ता जाव राती भवति? हंता, गोयमा! जाव भवति।

जदा णं भंते! जंबु० दाहिणइढे अट्ठारसमुहुत्ताणंतरे दिवसे भवति तदा णं उत्तरे अट्ठारस मुहुत्ताणंतरे दिवसे भवति? जदा णं उत्तरे अट्ठारसमुहुत्ताणंतरे दिवसे भवति तदा णं जंबु० मंदरस्स पव्वयस्स पुरत्थिम-पच्चत्थिमेणं सातिरेगा दुवालसमुहुत्ता राती भवति? हंता, गोयमा! जदा णं जंबु० जाव राती भवति।

जदा णं भंते! जंबुद्धीवे दीवे मंदरस्स पव्वयस्स पुरत्थिमेणं अट्ठारसमुहुत्ताणंतरे दिवसे भवति तदा णं पच्चत्थिमेणं अट्ठारसमुहुत्ताणंतरे दिवसे भवति? जदा णं पच्चत्थिमेणं अट्ठारसमुहुत्ताणंतरे दिवसे भवति तदा णं जंबुद्धीवे दीवे मंदरस्स पव्वयस्स उत्तरदाहिणेणं साइरेगा दुवालसमुहुत्ता राती भवति?

हंता, गोयमा! जाव भवति।

एवं एतेणं कमेणं ओसारेयत्वं-सत्तरसमुहुते दिवसे, तेरसमुहुता राती। सत्तरसमुहुताणंतरे दिवसे, सातिरेगा तेरसमुहुता राती। सोलसमुहुते दिवसे, चोदसमुहुता राती। सोलसमुहुताणंतरे दिवसे सातिरेगा चोदसमुहुता राती। पन्नरसमुहुते दिवसे, पन्नरसमुहुता राती। पन्नरसमुहुताणंतरे दिवसे, सातिरेगा पन्नरसमुहुता राती। चोदसमुहुते दिवसे, सोलसमुहुता राती। तेरसमुहुते दिवसे, सत्तरसमुहुता राती। तेरसमुहुताणंतरे दिवसे, सातिरेगा सत्तरसमुहुता राती।

जदा णं जंबु० दाहिणइडे जहन्नए दुवालसमुहुते दिवसे भवति तथा णं उत्तरइडे वि? जया णं उत्तरइडे तथा णं जंबुद्वीवे दीवे मंदरस्स पव्वयस्स पुरत्थिमेणं उक्कोसिया अट्ठारसमुहुता राती भवति?

हंता, गोयमा! एवं चेव उच्चारेयत्वं जाव राती भवति।

जदा णं भंते! जंबु. मंदरस्स पव्वयस्स पुरत्थिमेणं जहन्नए दुवालसमुहुते दिवसे भवति तदा णं पच्चत्थिमेण वि ? जया णं पच्चत्थिमेण वि तदा णं जंबु० मंदरस्स पव्वयस्स उत्तरदाहिणेणं उक्कोसिया अट्ठारसमुहुता राती भवति? हंता, गोयमा! जाव राती भवति।

**[२१८]** जया णं भंते! जंबु. दाहिणइडे वासाणं पढमे समए पडिवज्जति तथा णं उत्तरइडे वि वासाणं पढमे समए पडिवज्जइ? जया णं उत्तरइडे वासाणं पढमे समए पडिवज्जइ तथा णं जंबुद्वीवे दीवे मंदरस्स पव्वयस्स पुरत्थिमपच्चत्थिमेणं अणंतरपुरेक्खडसमयंसि वासाणं पढमे समए पडिवज्जति?

हंता, गोयमा! जदा णं जंबु० २ दाहिणइडे वासाणं प. स. पडिवज्जति तह चेव जाव पडिवज्जति।

जदा णं भंते! जंबु० मंदरस्स पुरत्थिमेणं वासाणं पढमे समए पडिवज्जति तथा णं पच्चत्थिमेण वि वासाणं पढमे समए पडिवज्जइ? जया णं पच्चत्थिमेण वासाणं पढमे समए पडिवज्जइ तथा णं जाव मंदरस्स पव्वयस्स उत्तरदाहिणेणं अणंतरपच्छाकडसमयंसि वासाणं प० स० पडिवन्ने भवति?

हंता, गोयमा! जदा णं जंबु० मंदरस्स पव्वयस्स पुरत्थिमेणं

एवं चेव उच्चारेयत्वं जाव पडिवन्ने भवति।

एवं जहा समएणं अभिलावो भणिओ वासाणं तहा आवलियाए वि भाणियव्वो , आणापाणूण वि, थोवेण वि, लवेण वि, मुहुतेण वि, अहोरत्तेण वि, पक्खेण वि, मासेण वि, उउणा वि । एतेसिं सव्वेसिं जहा समयस्स अभिलावो तहा भाणियव्वो।

जदा णं भंते! जंबु. दाहिणइडे हेमंताणं पढमे समए पडिवज्जति? जहेव वासाणं अभिलावो तहेव हेमंताण वि, गिम्हाण वि भाणियव्वो जाव उऊ। एवं एते तिन्नि वि। एतेसिं तीसं आलावगा भा० ।

जया णं भंते! जंबु. मंदरस्स पव्वयस्स दाहिणइडे पढमे अयणे पडिवज्जति तदा णं उत्तरइडे वि पढमे अयणे पडिवज्जइ? जहा समएणं अभिलावो तहेव अयणेण वि भाणियव्वो जाव अणंतर-पच्छाकडसमयंसि पढमे अयणे पडिवन्ने भवति।

जहा अयणेणं अभिलावो तहा संवच्छरेण वि भाणियव्वो, जुएण वि, वाससतेण वि, वाससहस्सेण वि, वाससतसहस्सेण वि, पुव्वंगेण वि, पुव्वेण वि, तुडियंगेण वि, तुडिएण वि, एवं पुव्वे २, तुडिए २, अडडे २, अववे २, हूहूए २, उप्पले २, पउमे २, नलिणे २, अत्थणिउरे २, अउए २, पउए २, चूलिया २, सीसपहेलिया २, पलिओवमेण वि, सागरोवमेण वि, भाणितव्वो।

जदा णं भंते! जंबुद्वीवे दीवे दाहिणङ्के पढमा ओसप्पिणी पडिवज्जति तदा णं उत्तरङ्के वि पढमा ओसप्पिणी पडिवज्जइ? जता णं उत्तरङ्के वि पडिवज्जइ तदा णं जंबुद्वीवे दीवे मंदरस्स पव्वयस्स पुरत्थिम-पच्चत्थिमेणं णेवत्थि ओसप्पिणी णेवत्थि उस्सप्पिणी, अवट्ठिते णं तत्थ काले पन्नते समणाउसो!? हंता, गोयमा! तं चेव उच्चारयत्वं जाव समणाउसो!।

जहा ओसप्पिणीए आलावओ भणितो एवं उस्सप्पिणीए वि भाणितव्वो।

[२१९] लवणे णं भंते! समुद्दे सूरिया उदीचि-पाईणमुग्गच्छ ज च्चेव जंबुद्वीवस्स वत्तव्वता भणिता स च्चेव सव्वा अपरिसेसिता लवणसमुद्दस्स वि भाणितव्वा, नवरं अभिलावो इमो जाणितव्वो- 'जता णं भंते! लवणे समुद्दे दाहिणङ्के दिवसे भवति तदा णं लवणे समुद्दे पुरत्थिम-पच्चत्थिमेणं राती भवति?' एतेणं अभिलावेणं नेतव्वं-जदा णं भंते! लवणसमुद्दे दाहिणङ्के पढमा ओसप्पिणी पडिवज्जति तदा णं उत्तरङ्के वि पढमा ओसप्पिणी पडिवज्जइ? जदा णं उत्तरङ्के पढमा ओसप्पिणी पडिवज्जइ तदा णं लवणसमुद्दे पुरत्थिम-पच्चत्थिमेणं नेवत्थि ओसप्पिणी, णेवत्थि उस्सप्पिणी समणाउसो!? हंता, गोयमा! जाव समणाउसो!।

धायतिसंडे णं भंते! दीवे सूरिया उदीचि-पादीणमुग्गच्छ जहेव जंबुद्वीवस्स वत्तव्वता भणिता स च्चेव धायइसंडस्स वि भाणितव्वा, नवरं इमेणं अभिलावेणं सव्वे आलावगा भाणितव्वा-जता णं भंते! धायतिसंडे दीवे दाहिणङ्के दिवसे भवति तदा णं उत्तरङ्के वि? जदा णं उत्तरङ्के वि तदा णं धायइसंडे दीवे मंदराणं पव्वताणं पुरत्थिम-पच्चत्थिमेणं राती भवति? हंता, गोयमा! एवं जाव राती भवति।

जदा णं भंते! धायइसंडे दीवे मंदराणं पव्वताणं पुरत्थिमेणं दिवसे भवति तदा णं पच्चत्थिमेण वि? जदा णं पच्चत्थिमेण वि तदा णं धायइसंडे दीवे मंदराणं पव्वयाणं उत्तरदाहिणेणं राती भवति? हंता, गोयमा! जाव भवति।

एवं एतेणं अभिलावेणं नेयत्वं जाव जदा णं भंते! दाहिणङ्के पढमा ओसप्पिणी तदा णं उत्तरङ्के, जदा णं उत्तरङ्के तया णं धायइसंडे दीवे मंदराणं पव्वयाणं पुरत्थिम-पच्चत्थिमेणं णेवत्थि ओसप्पिणी जाव समणाउसो!? हंता, गोयमा! जाव समणाउसो!।

जहा लवणसमुद्दस्स वत्तव्वता तहा कालोदस्स वि भाणितव्वा, नवरं कालोदस्स नामं भाणितव्वं।

अब्भित्तरपुक्खरद्धे णं भंते! सूरिया उदीचि-पाईणमुग्गच्छ जहेव धायइसंडस्स वत्तव्वता तहेव अब्भित्तरपुक्खरद्धस्स वि भाणितव्वा। नवरं अभिलावो जाणेयव्वो जाव तदा णं अब्भित्तरपुक्खरद्धे मंदराणं पुरत्थिमपच्चत्थिमेणं नेवत्थि ओसप्पिणी नेवत्थि उस्सप्पिणी, अवट्ठिते णं तत्थ काले पन्नते समणाउसो!।

सेवं भंते! सेवं भंते! ति।

**\*पंचम सए पढमो उद्देशो समतो\***

**० बिइओ उद्देशो ०**

[२२०] रायगिहे नगरे जाव एवं वदासी-

अत्थि णं भंते! ईसिं पुरेवाता, पत्था वाता, मंदा वाता, महावाता वायंति? हंता, अत्थि।

अत्थि णं भंते! पुरत्थिमेणं ईसिं पुरेवाता, पत्था वाता, मंदा वाता, महावाता वायंति? हंता, अत्थि।

एवं पच्चत्थिमेणं, दाहिणेणं, उत्तरेणं, उत्तर-पुरत्थिमेणं, पुरत्थिमदाहिणेणं, दाहिण-पच्चत्थिमेणं पच्छिम-उत्तरेणं।

जदा णं भंते! पुरत्थिमेणं ईसिं पुरेवाता पत्था वाता मंदा वाता महावाता वायंति तदा णं पच्चत्थिमेण वि ईसिं पुरेवाता.? जया णं पच्चत्थिमेणं ईसिं पुरेवाता. तदा णं पुरत्थिमेण वि? हंता, गोयमा जदा णं पुरत्थिमेणं तदा णं पच्चत्थिमेण वि ईसिं, जया णं पच्चत्थिमेणं तदा णं पुरत्थिमेण वि ईसिं। एवं दिसासु।

एवं विदिसासु वि।

अत्थि णं भंते! दीविच्चया ईसिं०? हंता, अत्थि।

अत्थि णं भंते! सामुद्दया ईसिं०? हंता, अत्थि।

जया णं भंते! दीविच्चया ईसिं तदा णं सामुद्दया वि ईसिं०, जदा णं सामुद्दया ईसिं तदा० णं दीविच्चया वि ईसिं०? णो इणट्ठे समट्ठे।

से केणट्ठेणं भंते! एवं वुच्चति 'जदा णं दीविच्चया ईसिं० णो णं तथा सामुद्दया ईसिं, जया णं सामुद्दया ईसिं० णो णं तदा दीविच्चया ईसिं०? गोयमा! तेसि णं वाताणं अन्नमन्नस्स विवच्चासेणं लवणे समुद्दे वेलं नातिक्कमति से तेणट्ठेणं जाव वाता वायंति।

अत्थि णं भंते! ईसिं० पुरेवाता पत्था वाता मंदा वाता महावाता वायंति? हंता, अत्थि।

कया णं भंते! ईसिं० जाव वायंति? गोयमा! जया णं वाउयाए अहारियं रियति तदा णं ईसिं जाव वायंति।

अत्थि णं भंते! ईसिं? हंता, अत्थि।

कया णं भंते! ईसिं०? गोतमा! जया णं वाउयाए उत्तरकिरियं रियइ तथा णं ईसिं।

अत्थि णं भंते! ईसिं०? हंता, अत्थि।

कया णं भंते ईसिं० पुरेवाता पत्था वाता.? गोयमा! जया णं वाउकुमारा वाउकुमारीओ वा अप्पणो वा परस्स वा तदुभयस्स वा अट्ठाए वाउकायं उदीरेंति तथा णं ईसिं पुरेवाया जाव वायंति।

वाउकाए णं भंते! वाउकायं चेव आणमति वा पाणमति वा? जहा खंदए तहा चत्तारि आलावगा नेयव्वा-अणेगसतसहस्स.। पुट्ठे उद्दति वा। ससरीरी निक्खमति।

**[२२१]**अह भंते! ओदणे कुम्मासे सुरा एते णं किंसरीरा ति वत्तव्वं सिया? गोयमा! ओदणे कुम्मासे सुराए य जे घणे दव्वे एए णं पुव्वभावपण्णवणं पडुच्च वणस्सतिजीवसरीरा, तओ पच्छा सत्थातीता सत्थपरिणामिता अगणिज्झामिता अगणिज्झसिता अगणिपरिणामिता अगणिजीवसरीरा इ वत्तव्वं सिया। सुराए य जे दवे दव्वे एए णं पुव्वभावपण्णवणं पडुच्च आउजीवसरीरा, ततो पच्छा सत्थातीता जाव अगणिसरीरा ति वत्तव्वं सिया।

अह णं भंते! अये तंबे तउए सीसए उवले कसट्टिया, एए णं किंसरीरा इ वत्तव्वं सिया? गोयमा! अए तंबे तउए सीसए उवले कसट्टिया, एए णं पुव्वभावपण्णवणं पडुच्च पुढविजीवसरीरा, तओ पच्छा सत्थातीता जाव अगणिजीवसरीरा ति वत्तव्वं सिया।

अहं भंते! अट्ठी अट्ठीज्झामे, चम्मे चम्मज्झामे, रोमे रोमज्झामे, सिंगे सिंगज्झामे, खुरे खुरज्झामे, नखे नखज्झामे, एते णं किंसरीरा ति वत्तव्वं सिया? गोयमा! अट्ठी चम्मे रोमे सिंगे खुरे नहे, एए णं तसपाणजीवसरीरा। अट्ठीज्झामे चम्मज्झामे रोमज्झामे सिंगज्झामे खुरज्झामे णहज्झामे, एए णं पुव्वभावपण्णवणं पडुच्च तसपाणजीवसरीरा, ततो पच्छा सत्थातीता जाव अगणि. जाव सिया।

अहं भंते! इंगाले छारिए भुसे गोमए, एए णं किंसरीरा ति वत्तव्वं सिया? गोयमा! इंगाले छारिए भुसे गोमए एए णं पुव्वभावपण्णवणाए एगिंदियजीवसरीरप्पओगपरिणामिया वि जाव पंचिंदियजीवसरीरप्पओगपरिणामिया वि, तओ पच्छा सत्थातीया जाव अगणिजीवसरीरा ति वत्तव्वं सिया।

[२२२] लवणे णं भंते! समुद्दे केवतियं चक्कवालविक्खंभेणं पन्नते? एवं नेयव्वं जाव लोगट्ठती लोगाणुभावे।

सेवं भंते! सेवं भंते! ति भगवं जाव विहरति।

**\*पंचम सए बिइओ उद्देशो समतो \***

### ० तइओ उद्देशो ०

[२२३] अण्णउत्थिया णं भंते! एवमाइक्खंति भा. प. एवं परूवेत्ति-से जहानामए जालगंठिया सिया आणुपुव्विगढिया अणंतरगढिया परंपरगढिता अन्नमन्नगढिता अन्नमन्नगुरुयताए अन्नमन्न-भारियताए अन्नमन्नगुरुयसंभारियताए अन्नमन्नघडताए चिट्ठति, एवामेव बहूणं जीवाणं बहूसु आजाति सहस्सेसु बहूइं आउयसहस्साइं आणुपुव्विगढियाइं जाव चिट्ठंति। एगे वि य णं जीवे एगेणं समएणं दो आउयाइं पडिसंवेदयति, तं जहा-इहभवियाउयं च परभवियाउयं च; जं समयं इहभवियाउयं पडिसंवेदेइ तं समयं परभवियाउयं पडिसंवेदेइ, जाव से कहमेयं भंते! एवं? गोतमा! जं णं ते अन्नउत्थिया तं चेव जाव परभवियाउयं च; जे ते एवमाहंसु मिच्छा ते एवमाहंसु।

अहं पुण गोयमा! एवमाइक्खामि जाव परूवेमि-जहानामए जालगंठिया सिया जाव अन्नमन्नघडताए चिट्ठति, एवामेव एगमेगस्स जीवस्स बहूहिं आजातिसहस्सेहिं बहूइं आउयसहस्साइं आणुपुव्विगढियाइं जाव चिट्ठंति। एगे वि य णं जीवे एगेणं समएणं एगं आउयं पडिसंवेदेइ, तं जहा-इहभवियाउयं वा परभवियाउयं वा, जं समयं इहभवियाउयं पडिसंवेदेइ नो तं समयं पर. पडिसंवेदेति, जं समयं प. नो तं समयं इहभवियाउयं प., इहभवियाउयस्स पडिसंवेयणाए नो परभवियाउयं पडिसंवेदेइ, परभवियाउयस्स पडिसंवेयणाए नो इहभवियाउयं पडिसंवेदेति। एवं खलु एगे जीवे एगेणं समएणं एगं आउयं प., तं जहा-इहभवियाउयं वा, परभवियाउयं वा।

[२२४] जीवे णं भंते! जे भविए नेरइएसु उववज्जित्तए से णं भंते! किं साउए संकमति, निराउए संकमति? गोयमा! साउए संकमति, नो निराउए संकमति।

से णं भंते! आउए कहिं कडे? कहिं समाइण्णे? गोयमा! पुरिमे भवे कडे, पुरिमे भवे समाइण्णे।

एवं जाव वेमाणियाणं दंडओ।

से नूणं भंते! जे जं भविए जोणिं उववज्जित्तए से तमाउयं पकरेइ, तं जहा-नेरतियाउयं वा जाव देवाउयं वा? हंता, गोयमा! जे जं भविए जोणिं उववज्जित्तए से तमाउयं पकरेइ, तं जहा-नेरइयाउयं वा,

तिरि., मणु., देवाउयं वा। नेरइयाउयं पकरेमाणे सतविहं पकरेइ, तं जहा-रयणप्पभापुढविनेरइयाउयं वा जाव अहेसतमापुढविनेरइयाउयं वा। तिरिक्खजोणियाउयं पकरेमाणे पंचविहं पकरेइ, तं जहा-एगिंदिय तिरिक्ख-जोणियाउयं वा, भेदो सत्वो भाणियव्वो। मणुस्साउयं दुविहं। देवाउयं चउव्विहं।

सेवं भंते! सेवं भंते! ति.।

**\*पंचम सए तइओ उद्देशो समतो \***

### ० चउत्थो उद्देशो ०

[२२५] छउमत्थे णं भंते! मणुस्से आउडिज्जमाणाइं सद्दाइं सुणेति, तं जहा-संखसद्दाणि वा, सिंगसद्दाणि वा, संखियसद्दाणि वा, खरमुहिसद्दाणि वा, पोयासद्दाणि वा, परिपिरियासद्दाणि वा, पणवसद्दाणि वा, पडहसद्दाणि वा, भंभासद्दाणि वा, होरंभसद्दाणि वा, भेरिसद्दाणि वा, झल्लरिसद्दाणि वा, दुंदुभिसद्दाणि वा, तताणि वा, वितताणि वा, घणाणि वा, झुसिराणि वा? हंता, गोयमा! छउमत्थे णं मणुस्से आउडिज्जमाणाइं सद्दाइं सुणेति, तं जहा-संखसद्दाणि वा जाव झुसिराणि वा।

ताइं भंते! किं पुट्ठाइं सुणेति? अपुट्ठाइं सुणेति? गोयमा! पुट्ठाइं सुणेति, नो अपुट्ठाइं सुणेति जाव णियमा छद्धिसिं सुणेति।

छउमत्थे णं भंते! मणुस्से किं आरगताइं सद्दाइं सुणेइ? पारगताइं सद्दाइं सुणेइ?

गोयमा! आरगयाइं सद्दाइं सुणेइ, नो पारगयाइं सद्दाइं सुणेइ।

जहा णं भंते! छउमत्थे मणुस्से आरगयाइं सद्दाइं सुणेइ, नो पारगयाइं सद्दाइं सुणेइ तथा णं भंते! केवली किं आरगयाइं सद्दाइं सुणेइ, नो पारगयाइं सद्दाइं सुणेइ? गोयमा! केवली णं आरगयं वा पारगयं वा सव्वदूरमूलमणंतियं सद्दं जाणइ पासइ।

से केणट्ठेणं तं चेव केवली णं आरगयं वा जाव पासइ? गोयमा! केवली णं पुरत्थिमेणं मियं पि जाणइ, अमियं पि जाणइ; एवं दाहिणेणं, पच्चत्थिमेणं, उत्तरेणं, उड्ढं, अहे मियं पि जाणइ, अमियं पि जाणइ, सव्वं जाणइ केवली, सव्वं पासइ केवली, सव्वतो जाणइ पासइ, सव्वकालं जा. पा., सव्वभावे जाणइ केवली, सव्वभावे पासइ केवली, अणंते नाणे केवलिस्स, अणंते दंसणे केवलिस्स, निव्वुडे नाणे केवलिस्स, निव्वुडे दंसणे केवलिस्स। से तेणट्ठेणं जाव पासइ।

[२२६] छउमत्थे णं भंते! मणुस्से हसेज्ज वा? उस्सुआएज्ज वा? हंता, हसेज्ज वा, उस्सुयाएज्ज वा।

जहा णं भंते! छउमत्थे मणुस्से हसेज्ज वा उस्सु. तथा णं केवली वि हसेज्ज वा, उस्सुयाएज्ज वा? गोयमा! नो इणट्ठे समट्ठे।

से केणट्ठेणं भंते! जाव नो णं तथा केवली हसेज्ज वा, उस्सुयाएज्ज वा? गोयमा!

जं णं जीवा चरित्तमोहणिज्जकम्मस्स उदएणं हसंति वा उस्सुयायंति वा, से णं केवलिस्स नत्थि, से तेणट्ठेणं जाव नो णं तथा केवली हसेज्ज वा, उस्सुयाएज्ज वा।

जीवे णं भंते! हसमाणे वा उस्सुयमाणे वा कति कम्मपगडीओ बंधति? गोयमा! सतविहबंधए वा अट्ठविहबंधए वा।

एवं जाव वेमाणिए।

पोहतिएहिं जीवेगिंदियवज्जो तियभंगो।

छउमत्थे णं भंते! मणूसे निद्वाएज्ज व? पयलाएज्ज वा? हंता, निद्वाएज्ज वा, पयलाएज्ज वा।

जहा हसेज्ज वा तहा, नवरं दरिसणावरणिज्जस्स कम्मस्स उदएणं निद्वायंति वा, पयलायंति वा। से णं केवलिस्स नत्थि। अन्नं तं चेव।

जीवे णं भंते! निद्वायमाणे वा पयलायमाणे वा कति कम्मपगडीओ बंधति? गोयमा! सत्तविहबंधए वा अट्ठविहबंधए वा।

एवं जाव वेमाणिए।

पोहतिएसु जीवेगिंदियवज्जो तियभंगो।

[२२७] हरी णं भंते! नेगमेसी सक्कदूते इत्थीगब्भं साहरमाणे किं गब्भाओ गब्भं साहरति? गब्भाओ जोणिं साहरइ? जोणीतो गब्भं साहरति? जोणीतो जोणिं साहरइ?

गोयमा! नो गब्भातो गब्भं साहरति, नो गब्भाओ जोणिं साहरति, नो जोणीतो जोणिं साहरति, परामसिय परामसिय अच्वाबाहेणं अच्वाबाहं जोणीओ गब्भं साहरइ।

पभू णं भंते! हरिणेगमेसी सक्कस्स दूते इत्थीगब्भं नहसिरंसि वा रोमकूवंसि वा साहरित्तए वा नीहरित्तए वा? हंता, पभू, नो चेव णं तस्स गब्भस्स किंचि वि आबाहं वा विबाहं वा उप्पाएज्जा, छविच्छेदं पुण करेज्जा, एसुहुमं च णं साहरिज्ज वा, नीहरिज्ज वा।

[२२८]तेणं कालेणं तेणं समएणं समणस्स भगवतो महावीरस्स अंतेवासी अतिमुत्ते णामं कुमारसमणे पगतिभद्दए जाव विणीए।

तए णं से अतिमुत्ते कुमारसमणे अन्नया कयाइ महावुट्ठिकायंसि निवयमाणंसि कक्ख-पडिग्गह-रयहरणमायाए बहिया संपट्ठिते विहारए।

तए णं से अतिमुत्ते कुमारसमणे वाहयं वहमाणं पासति, २ मट्ठियापालिं बंधति, २ 'नाविया मे २ णाविओ विवणावमयं पडिग्गहकं, उदगंसि कट्टु पच्चाहमाणे पच्चाहमाणे अभिरमति।

तं च थेरा अद्दक्खु। जेणेव समणे भगवं महावीरे तेणेव उवागच्छंति, २ एवं वदासी-

एवं खलु देवाणुप्पियाणं अंतेवासी अतिमुत्ते णामं कुमारसमणे, से णं भंते! अतिमुत्ते कुमारसमणे कतिहिं भवग्गहणेहिं सिज्झिहिति जाव अंतं करेहिति? 'अज्जो!' ति समणे भगवं महावीरे ते थेरे एवं वदासी-

एवं खलु अज्जो! ममं अंतेवासी अतिमुत्ते णामं कुमारसमणे पगतिभद्दए जाव विणीए, से णं अतिमुत्ते कुमारसमणे इमेणं चेव भवग्गहणेणं सिज्झिहिति जाव अंतं करेहिति। तं मा णं अज्जो! तुब्भे अतिमुत्तं कुमारसमणं हीलेह निंदह खिंसह गरहह अवमन्नह। तुब्भे णं देवाणुप्पिया! अतिमुत्तं कुमारसमणं अगिलाए संगिण्हह, अगिलाए उवगिण्हह, अगिलाए भत्तेणं पाणेणं विणयेणं वेयावडियं करेह।

अतिमुत्ते णं कुमारसमणे अंतकरे चेव, अंतिमसरीरिए चेव।

तए णं ते थेरा भगवंतो समणेणं भगवता महावीरेणं एवं वुत्ता समाणा समणं भगवं महावीरं वंदंति णमंसंति, अतिमुत्तं कुमारसमणं अगिलाए संगिण्हंति जाव वेयावडियं करंति।

[२२९]तेणं कालेणं तेणं समएणं महासुक्कातो कप्पातो महासामाणातो विमाणातो दो देवा महिड्ढीया जाव महाणुभागा समणस्स भगवओ महावीरस्स अंतियं पाउब्भूता।

तए णं ते देवा समणं भगवं महावीरं वंदंति, नमंसंति, वंदिता नमंसिता मणसा चेव इं एतारूवं वागरणं पुच्छंति-कति णं भंते! देवाणुप्पियाणं अंतेवासिसयाइं सिज्झिहिति जाव अंतं करेहिति? तए णं समणे भगवं महावीरे तेहिं देवेहिं मणसा पुट्ठे, तेसिं देवाणं मणसा चेव इमं एतारूवं वागरणं वागरेति- एवं खलु देवाणुप्पिया! मम सत्त अंतेवासिसयाइं सिज्झिहिति जाव अंतं करेहिति।

तए णं ते देवा समणेणं भगवया महावीरेणं मणसा पुट्ठेणं मणसा चेव इमं एतारूवं वागरणं वागरिया समाणा हट्ठतुट्ठा जाव ह्यहियया समणं भगवं महावीरं वंदंति णमंसंति, २ ता मणसा चेव सुस्सूमाणा णमंसमाणा अभिमुहा जाव पज्जुवासंति।

तेणं कालेणं तेणं समएणं समणस्स भगवओ महावीरस्स जेट्ठे अंतेवासी इंदभूती णामं अणगारे जाव अदूरसामंते उड्ढंजाणू जाव विहरति।

तए णं तस्स भगवतो गोतमस्स झाणंतरियाए वट्टमाणस्स इमेयारूवे अज्झत्थिए जाव समुप्पज्जित्था-एवं खलु दो देवा महिड्ढीया जाव महाणुभागा समणस्स भगवओ महावीरस्स अंतियं पाउब्भूया, तं नो खलु अहं ते देवे जाणामि कयरातो कप्पातो वा सग्गातो वा विमाणातो वा कस्स वा अत्थस्स अट्ठाए इहं हव्वमागता? तं गच्छामि णं भगवं महावीरं वंदामि णमंसामि जाव पज्जुवासामि, इमाइं च णं एयारूवाइं वागरणाइं पुच्छिस्सामि ति कट्टु एवं संपेहेति, २ उट्ठाए उट्ठेति, २ जेणेव समणे भगवं महावीरे जाव पज्जुवासति।

गोयमा! इ समणे भगवं महावीरे भगवं गोयमं एवं वदासी-से नूणं तव गोयमा! झाणंतरियाए वट्टमाणस्स इमेयारूवे अज्झत्थिए जाव जेणेव मम अंतिए तेणेव हव्वमागए। से नूणं गोतमा! अट्ठे समट्ठे? हंता, अत्थि। तं गच्छाहि णं गोतमा! एते चेव देवा इमाइं एतारूवाइं वागरणाइं वागरेहिति।

तए णं भगवं गोतमे समणेणं भगवया महावीरेणं अब्भणुण्णाए समाणे समणं भगवं महावीरं वंदंति णमंसंति, २ जेणेव ते देवा तेणेव पहारेत्थ गमणाए।

तए णं ते देवा भगवं गोतमं एज्जमाणं पासंति, २ हट्ठा जाव ह्यहियया खिप्पामेव अब्भुट्ठेति, २ खिप्पामेव पच्चुवगच्छंति, २ जेणेव भगवं गोतमे तेणेव उवागच्छंति, २ ता जाव णमंसिता एवं वदासी-एवं खलु भंते! अम्हे महासुक्कातो कप्पातो महासामाणातो

विमाणातो दो देवा महिड्ढीया जाव पादुब्भूता, तए णं अम्हे समणं भगवं महावीरं वंदामो णमंसामो, २ मणसा चेव इमाइं एतारूवाइं वागरणाइं पुच्छामो-कति णं भंते! देवाणुप्पियाणं अंतेवासिसयाइं सिज्झिहिति जाव अंतं करेहिति? तए णं समणे भगवं महावीरे अम्हेहिं मणसा पुट्ठे अम्हं मणसा चेव इमं एतारूवं वागरणं वागरेति-एवं खलु देवाणुप्पिया ! मम सत्त अंतेवासि. जाव अंतं करेहिति। तए णं अम्हे समणेणं भगवया महावीरेणं मणसा पुट्ठेणं मणसा चेव इमं एतारूवं वागरणं वागरिया समाणा समणं भगवं महावीरं वंदामो नमंसामो, २ जाव पज्जुवासामो ति कट्टु भगवं गोतमं वंदंति नमंसंति, २ जामेव दिसिं पाउब्भूता तामेव दिसिं पडिगया।

**[२३०]** 'भंते'ति भगवं गोतमे समणं जाव एवं वदासी-देवा णं भंते! 'संजया' ति वत्तव्वं सिया? गोतमा! णो इणट्ठे समट्ठे। अब्भक्खाणमेयं देवाणं।

भंते! 'असंजता' ति वत्तव्वं सिया? गोयमा! णो इणट्ठे समट्ठे। णिट्ठुरवयणमेयं देवाणं।

भंते! 'संजयासंजया'ति वत्तव्वं सिया? गोयमा! णो इणट्ठे समट्ठे। असब्भयमेयं देवाणं।  
से किं खाति णं भंते! देवा ति वत्तव्वं सिया? गोयमा! देवा णं 'नो संजया' ति वत्तव्वं सिया।

[२३१] देवा णं भंते! कयराए भासाए भासंति? कतरा वा भासा भासिज्जमाणी विसिस्सति?  
गोयमा! देवा णं अद्धमागहाए भासाए भासंति, सा वि य णं अद्धमागहा भासा भासिज्जमाणी विसिस्सति।

[२३२] केवली णं भंते! अंतकरं वा अंतिमसरीरियं वा जाणति पासइ? हंता गोयमा! जाणति  
पासति।

जहा णं भंते! केवली अंतकरं वा अंतिमसरीरियं वा जाणति पासति तथा णं छउमत्थे वि  
अंतकरं वा अंतिमसरीरियं वा जाणति पासति? गोयमा! णो इणट्ठे समट्ठे, सोच्चा जाणति पासति  
पमाणतो वा।

से किं तं सोच्चा? सोच्चा णं केवलिस्स वा, केवलिसावयस्स वा, केवलिसावियाए वा,  
केवलिउवासगस्स वा, केवलिउवासियाए वा, तप्पक्खियस्स वा, तप्पक्खियसावगस्स वा, तप्पक्खियसावियाए  
वा, तप्पक्खियउवासगस्स वा तप्पक्खियउवासियाए वा। से तं सोच्चा।

[२३३] से किं तं पमाणे? पमाणे चउत्विहे पण्णत्ते, तं जहा-पच्चक्खे, अणुमाणे, ओवम्मे,  
आगमे। जहा अणुयोगद्वारे तहा णेयव्वं पमाणं जाव तेण परं नो अत्तागमे, नो अणंतरागमे, परंपरागमे।

[२३४] केवली णं भंते! चरमकम्मं वा चरमनिज्जरं वा जाणति, पासति? हंता, गोयमा!  
जाणति, पासति।

जहा णं भंते! केवली चरमकम्मं वा., जहा णं अंतकरेणं आलावगो तहा चरमकम्मेण वि  
अपरिसेसितो णेयव्वो।

[२३५] केवली णं भंते! पणीतं मणं वा, वइं वा धारेज्जा? हंता, धारेज्जा।

जे णं भंते! केवली पणीयं मणं वा वइं वा धारेज्जा तं णं वेमाणिया देवा जाणंति, पासंति?  
गोयमा! अत्थेगइया जाणंति पासंति, अत्थेगइया न जाणंति न पासंति।

से केणट्ठेणं जाव न जाणंति न पासंति? गोयमा! वेमाणिया देवा दुविहा पण्णत्ता, तं जहा-  
मायिमिच्छादिट्ठिउववन्नगा य, अमायिसम्मद्धिट्ठिउववन्नगा य। एवं अणंतर-परंपर-पज्जत्ताऽपज्जत्ता य  
उवउत्ता अणुवउत्ता। तत्थ णं जे ते उवउत्ता ते जाणंति पासंति। से तेणट्ठेणं., तं चेव।

[२३६] पभू णं भंते! अणुत्तरोववातिया देवा तत्थगया चेव समाणा इहगतं केवलिणा सद्धिं  
आलावं वा संलावं वा करेतए? हंता, पभू।

से केणट्ठेणं जाव पभू णं अणुत्तरोववातिया देवा जाव करेतए? गोयमा! जं णं  
अणुत्तरोववातिया देवा तत्थगता चेव समाणा अट्ठं वा हेउं वा पसिणं वा कारणं वा वागरणं वा पुच्छंति, तं  
णं इहगते केवली अट्ठं वा जाव वागरणं वा वागरेति। से तेणट्ठेणं.।

जं णं भंते! इहगए चेव केवली अट्ठं वा जाव वागरेति तं णं अणुत्तरोववातिया देवा  
तत्थगता चेव समाणा जाणंति, पासंति? हंता, जाणंति पासंति।

से केणट्ठेणं जाव पासंति? गोयमा! तेसि णं देवाणं अणंताओ मणोदव्ववग्गणाओ लद्धाओ  
पत्ताओ अभिसमन्नागताओ भवंति। से तेणट्ठेणं जं णं इहगते केवली जाव पा०।

[२३७] अणुत्तरोववातिया णं भंते! देवा किं उदिण्णमोहा उवसंतमोहा खीणमोहा? गोयमा! नो

उदिण्णमोहा उवसंतमोहा, नो खीणमोहा।

[२३८]केवली णं भंते! आयाणेहिं जाणइ, पासइ? गोयमा! णो इणट्ठे समट्ठे।से केणट्ठेणं जाव केवली णं आयाणेहिं न जाणति, न पासति? गोयमा! केवली णं पुरत्थिमेणं मियं पि जाणति, अमियं पि जाणइ जाव निव्वुडे दंसणे केवलिस्स। से तेणट्ठेणं०।

[२३९]केवली णं भंते! अस्सिं समयंसि जेसु आगासपदेसेसु हत्थं वा पादं वा बाहं वा ऊरुं वा ओगाहिताणं चिट्ठति, पभू णं भंते! केवली सेयकालंसि वि तेसु चेव आगासपदेसेसु हत्थं वा जाव ओगाहिताणं चिट्ठित्तए? गोयमा! णो इणट्ठे समट्ठे।

से केणट्ठेणं भंते! जाव केवली णं अस्सिं समयंसि जेसु आगासपदेसेसु हत्थं वा जाव चिट्ठति नो णं पभू केवली सेयकालंसि वि तेसु चेव आगासपदेसेसु हत्थं वा जाव चिट्ठित्तए? गोयमा! केवलिस्स णं वीरियसजोगसद्धव्वताए चलाइं उवगरणाइं भवंति, चलोवगरणट्ठयाए य णं पभू केवली सेयकालंसि वि तेसु चेव जाव चिट्ठित्तए। से तेणट्ठेणं जाव वुच्चइ-केवली णं अस्सिं समयंसि जावं चिट्ठित्तए।

[२४०]पभू णं भंते! चोद्धसपुव्वी घडाओ घडसहस्सं, पडाओ पडसहस्सं, कडाओ कडसहस्सं, रहाओ रहसहस्सं, छताओ छतसहस्सं, दंडाओ दंडसहस्सं अभिनिव्वत्तिता उवदंसेत्तए? हंता, पभू।

से केणट्ठेणं पभू चोद्धसपुव्वी जाव उवदंसेत्तए? गोयमा! चउद्धसपुव्विस्स णं अणंताइं दव्वाइं उक्कारियाभेदेणं भिज्जमाणाइं लद्धाइं पताइं अभिसमन्नागताइं भवंति। से तेणट्ठेणं जाव उवदंसित्तए।

सेवं भंते! सेवं भंते! ति।

**\*पंचम सए चउत्थो उद्देशो समतो \***

## ० पंचमो उद्देशो

[२४१]छउमत्थे णं भंते! मणूसे तीयमणंतं सासतं समयं केवलेणं संजमेणं. जहा पढमसए चउत्थुद्देशे आलावगा तहा नेयव्वं जाव 'अलमत्थु'त्ति वत्तव्वं सिया।

[२४२]अन्नउत्थिया णं भंते! एवमाइक्खंति जाव परूवेत्ति सव्वे पाणा सव्वे भूया सव्वे जीवा सव्वे सत्ता एवंभूयं वेदणं वेदंति, से कहमेयं भंते! एवं? गोयमा! जं णं ते अन्नउत्थिया एवमाइक्खंति जाव वेदंति, जे ते एवमाहंसु मिच्छा ते एवमाहंसु। अहं पुण गोयमा! एवमाइक्खामि जाव परूवेमि-अत्थेगइया पाणा भूया जीवा सत्ता अणेवंभूयं वेदणं वेदंति।

से केणट्ठेणं अत्थेगइया. तं चेव उच्चारयव्वं। गोयमा! जे णं पाणा भूया जीवा सत्ता जहा कडा कम्मा तहा वेदणं वेदंति ते णं पाणा भूया जीवा सत्ता एवंभूयं वेदणं वेदति। जे णं पाणा भूया जीवा सत्ता जहा कडा कम्मा नो तहा वेदणं वेदंति ते णं पाणा भूया जीवा सत्ता अणेवंभूयं वेदणं वेदंति। से तेणट्ठेणं० तहेव।

नेरतिया णं भंते! किं एवंभूतं वेदणं वेदंति? अणेवंभूयं वेदणं वेदंति? गोयमा! नेरइया णं एवंभूयं पि वेदणं वेदंति, अणेवंभूयं पि वेदणं वेदंति।

से केणट्ठेणं.? तं चेव। गोयमा ! जे णं नेरइया जहा कडा कम्मा तहा वेयणं वेदंति ते णं नेरइया एवंभूयं वेदणं वेदंति। जे णं नेरतिया जहा कडा कम्मा णो तहा वेदणं वेदंति ते णं नेरइया अणेवं-

भूयं वेदणं वेदंति। से तेणट्ठेणं। एवं जाव वेमाणिया। संसारमंडलं नेयव्वं।

**[२४३]**जंबुद्वीवे णं भंते इह भारहे वासे इमीसे ओसप्पिणीए समाए कइ कुलगरा होत्था, गोयमा! सत्त एव तित्थयरमायरो पियरो पढमा सिस्सिणीओ चक्कवट्टिमायरो इत्थिरयणं बलदेवा वासुदेवा वासुदेवमारो बलदेव वासुदेव पियरो एएसिं पडिसत्तु जहा समवाए परिवाडी तहा नेयव्वा सेवं भंते! सेवं भंते! ति जाव विहरइ।।

**\*पंचम सए पंचमो उद्देशो समतो\***

**० छट्ठो उद्देशो ०**

**[२४४]**कहं णं भंते! जीवा अप्पाउयत्ताए कम्मं पकरंति? गोतमा! तिहिं ठाणेहिं, तं जहा-पाणे अइवाएत्ता, मुसं वइत्ता, तहारूवं समणं वा माहणं वा अफासुएणं अणेसणिज्जेणं असण-पाण-खाइम-साइमेणं पडिलाभेत्ता, एवं खलु जीवा अप्पाउयत्ताए कम्मं पकरंति।

कहं णं भंते! जीवा दीहाउयत्ताए कम्मं पकरंति? गोयमा! तिहिं ठाणेहिं-नो पाणे अतिवाइत्ता, नो मुसं वदित्ता, तहारूवं समणं वा माहणं वा फासुएसणिज्जेणं असण-पाण-खाइम-साइमेणं पडिलाभेत्ता, एवं खलु जीवा दीहाउयत्ताए कम्मं पकरंति।

कहं णं भंते! जीवा असुभदीहाउयत्ताए कम्मं पकरंति? गोयमा! पाणे अतिवाइत्ता, मुसं वइत्ता, तहारूवं समणं वा माहणं वा हीलित्ता निंदित्ता खिसित्ता गरहित्ता अवमन्नित्ता, अन्नतरेणं अमणुण्णेणं अपीतिकारणं असण-पाणखाइमसाइमेणं पडिलाभेत्ता, एवं खलु जीवा असुभदीहाउयत्ताए कम्मं पकरंति।

कहं णं भंते! जीवा सुभदीहाउयत्ताए कम्मं पकरंति? गोयमा! नो पाणे अतिवात्तित्ता, नो मुसं वइत्ता, तहारूवं समणं वा माहणं वा वंदित्ता नमंसित्ता जाव पज्जुवासित्ता, अन्नतरेणं मणुण्णेणं पीतिकारणं असण-पाण-खाइमसाइमेणं पडिलाभेत्ता, एवं खलु जीवा सुभदीहाउयत्ताए कम्मं पकरंति।

**[२४५]**गाहावतिस्स णं भंते! भंडं विक्किणमाणस्स केइ भंडं अवहरेज्जा, तस्स णं भंते! तं भंडं अणुगवेसमाणस्स किं आरंभिया किरिया कज्जइ? पारिग्गहिया., मायावत्तिया., अपचचक्खा., मिच्छादंसण.? गोयमा! आरंभिया किरिया कज्जइ, पारि., माया., अपचच.; मिच्छादंसणकिरिया सिय कज्जति, सिय नो कज्जति। अह से भंडे अभिसमन्नागते भवति ततो से पच्छा सव्वाओ ताओ पयणुईभवन्ति।

गाहावतिस्स णं भंते! भंडं विक्किणमाणस्स कइए भंडं सातिज्जेज्जा, भंडे य से अणुवणीए सिया, गाहावतिस्स णं भंते! ताओ भंडाओ किं आरंभिया किरिया कज्जइ जाव मिच्छादंसणवत्तिया किरिया कज्जइ? कइयस्स वा ताओ भंडाओ किं आरंभिया किरिया कज्जइ जाव मिच्छादंसणवत्तिया किरिया कज्जइ? गोयमा! गाहावतिस्स ताओ भंडाओ आरंभिया किरिया कज्जइ जाव अपचचक्खाणिया; मिच्छादंसणवत्तिया किरिया सिय कज्जइ, सिय नो कज्जइ। कइयस्स णं ताओ सव्वाओ पयणुईभवन्ति।

गाहावतिस्स णं भंते! भंडं विक्किणमाणस्स जाव भंडे से उवणीए सिया, कइयस्स णं भंते! ताओ भंडाओ किं आरंभिया किरिया कज्जति.? गाहावतिस्स वा ताओ भंडाओ किं आरंभिया किरिया कज्जति.? गोयमा! कइयस्स ताओ भंडाओ हेट्ठिल्लाओ चत्तारि किरियाओ कज्जन्ति, मिच्छादंसणकिरिया भयणाए। गाहावतिस्स णं ताओ सव्वाओ पयणुईभवन्ति।

गाहावतिस्स णं भंते! भंडं जाव धणे य से अणुवणीए सिया.? एयं पि जहा 'भंडे उवणीते'

तहा नेयव्वं।

चउत्थो आलावगो- धणे य से उवणीए सिया जहा पढमो आलावगो भंडे य से अणुवणीए सिया तहा नेयव्वो। पढम-चउत्थाणं एक्को गमो। बित्ति-तत्तियाणं एक्को गमो।

अगणिकाए णं भंते! अहुणोज्जलिते समाणे महाकम्मतराए चेव महाकिरियतराए चेव, महासवतराए चेव, महावेदणतराए चेव भवति। अहे णं समए समए वोक्कसिज्जमाणे वोक्कसिज्जमाणे वोच्छिज्जमाणे चरिमकालसमयंसि इंगालभूते मुम्मुरभूते छारियभूते, तओ पच्छा अप्पकम्मतराए चेव, अप्पकिरियतराए चेव, अप्पासवतराए चेव, अप्पवेदणतराए चेव भवति? हंता, गोयमा! अगणिकाए णं अहुणोज्जलिते समाणे तं चेव।

**[२४६]**पुरिसे णं भंते! धणुं परामुसति, धणुं परामुसिता उंसुं परामुसति, उंसुं परामुसिता ठाणं ठाति, ठाणं ठिच्चा आयतकण्णाययं उंसुं करेति, आययकण्णाययं उंसुं करेता उड्ढं वेहासं उंसुं उव्विहति, २ ततो णं से उंसुं उड्ढं वेहासं उव्विहिए समाणे जाइं तत्थ पाणाइं भूयाइं जीवाइं सताइं अभिहणति वत्तेति लेस्सेति संघाएति संघट्टेति परितावेति किलामेति, ठाणाओ ठाणं संकामेति, जीवितातो ववरोवेति, तए णं भंते! से पुरिसे कतिकिरिए? गोयमा! जावं च णं से पुरिसे धणुं परामुसति जाव उव्विहति तावं च णं से पुरिसे काइयाए जाव पाणातिवातकिरियाए, पंचहिं किरियाहिं पुट्ठे।

जेसिं पि य णं जीवाणं सरीरेहिं तो धणू निव्वत्तिए ते वि य णं जीवा काइयाए जाव पंचहिं किरियाहिं पुट्ठे।

एवं धणुपुट्ठे पंचहिं किरियाहिं। जीवा पंचहिं। ण्हारू पंचहिं। उंसू पंचहिं। सरे पत्तणे फले ण्हारू पंचहिं।

**[२४७]**अहे णं से उंसू अप्पणो गरुयत्ताए भारियत्ताए गुरुसंभारियत्ताए अहे वीससाए पच्चोवयमाणे जाइं तत्थ पाणाइं जाव जीवितातो ववरोवेति, तावं च णं से पुरिसे कतिकिरिए? गोयमा! जावं च णं से उंसू अप्पणो गरुययाए जाव ववरोवेति तावं च णं से पुरिसे काइयाए जाव चउहिं किरियाहिं पुट्ठे। जेसिं पि य णं जीवाणं सरीरेहिं धणू निव्वत्तिए ते वि जीवा चउहिं करियाहिं। धणुपुट्ठे चउहिं। जीवा चउहिं। ण्हारू चउहिं। उंसू पंचहिं। सरे, पत्तणे, फले, ण्हारू पंचहिं। जे वि य से जीवा अहे पच्चोवयमाणस्स उवग्गहे चिट्ठंति ते वि य णं जीवा काइयाए जाव पंचहिं किरियाहिं पुट्ठा।

**[२४८]**अन्नउत्थिया णं भंते ! एवमाइक्खंति जाव परुव्वेति-से जहानामए जुवतिं जुवाणे हत्थेणं हत्थे गेण्हेज्जा, चक्कस्स वा नाभी अरगाउत्ता सिया एवामेव जाव चत्तारि पंच जोयणसताइं बहुसमाइण्णे मणुयलोए मणुस्सेहिं। से कहमेतं भंते! एवं? गोतमा! जं णं ते अन्नउत्थिया जाव मणुस्सेहिं, जे ते एवमाहंसु मिच्छा। अहं पुण गोयमा! एवमाइक्खामि जाव एवामेव चत्तारि पंच जोयणसताइं बहुसमाइण्णे निरयलोए नेरइएहिं।

**[२४९]**नेरइया णं भंते! किं एगतं पभू विउव्वित्तए? पुहत्तं पभू विकुव्वित्तए? जहा जीवाभिगमे आलावगो तहा नेयव्वो जाव दुरहियासं।

**[२५०]**आहाकम्मं णं अणवज्जे'त्ति मणं पहारेत्ता भवति, से णं तस्स ठाणस्स अणालोइयपडिक्कंते कालं करेति नत्थि तस्स आराहणा।

से णं तस्स ठाणस्स आलोइयपडिक्कंते कालं करेति अत्थि तस्स आराहणा।

एतेणं गमेणं नेयत्वं-कीयकडं ठवियगं रइयगं कंतारभतं दुब्भिकखभतं वदलियाभतं गिलाणभतं सिज्जातरपिंडं रायपिंडं।

आहाकम्मं णं अणवज्जे'ति बहुजणमज्झे भासिता सयमेव परिभुंजिता भवति, से णं तस्स ठाणस्स जाव अत्थि तस्स आराहणा।

एयं पि तह चेव जाव रायपिंडं।

आहाकम्मं णं अणवज्जे' ति सयं अन्नमन्नस्स अणुप्पदावेता भवति, से णं तस्स. एयं तह चेव जाव रायपिंडं।

आहाकम्मं णं अणवज्जे' ति बहुजणमज्झे पन्नवइत्ता भवति, से णं तस्स जाव अत्थि आराहणा जाव रायपिंडं।

**[२५१]**आयरिय-उवज्झाए णं भंते! सविसयंसि गणं अगिलाए संगिण्हमाणे अगिलाए उवगिण्हमाणे कतिहिं भवग्गहणेहिं सिज्झति जाव अंतं करेति? गोतमा! अत्थेगइए तेणेव भवग्गहणेणं सिज्झति, अत्थेगइए दोच्चेणं भवग्गहणेणं सिज्झति, तच्चं पुण भवग्गहणं नातिक्कमति।

**[२५२]** जे णं भंते! परं अलिएणं असब्भूएणं अब्भक्खाणेणं अब्भक्खाति तस्स णं कहप्पगारा कम्मा कज्जंति? गोयमा! जे णं परं अलिएणं असंतएणं अब्भक्खाणेणं अब्भक्खाति तस्स णं तहप्पगारा चेव कम्मा कज्जंति, जत्थेव णं अभिसमागच्छति तत्थेव णं पडिसंवेदेति, ततो से पच्छा वेदेति। सेवं भंते! २ ति.।

### **\*पंचम सए छट्ठो उद्देशो समतो\***

### **० सतमो उद्देशो ०**

**[२५३]**परमाणुपोग्गले णं भंते! एयति वेयति जाव तं तं भावं परिणमति? गोयमा! सिय एयति वेयति जाव परिणमति, सिय णो एयति जाव णो परिणमति।

दुपदेसिए णं भंते! खंधे एयति जाव परिणमइ? गोयमा! सिय एयति जाव परिणमति, सिय णो एयति जाव णो परिणमति; सिय देसे एयति, देसे नो एयति।

तिपदेसिए णं भंते! खंधे एयति.? गोयमा! सिय एयति, सिय नो एयति, सिय देसे एयति, नो देसे एयति, सिए देसे एयति, नो देसा एयंति, सिय देसा एयंति, नो देसे एयति।

चउप्पएसिए णं भंते! खंधे एयति.? गोयमा! सिय एयति, सिय नो एयति, सिय देसे एयति, णो देसे एयति, सिय देसे एयति, णो देसा एयंति, सिय देसा एयंति, नो देसे एयति, सिय देसा एयंति, नो देसा एयंति।

जहा चउप्पदेसिओ तहा पंचपदेसिओ, तहा जाव अणंतपदेसिओ।

**[२५४]**परमाणुपोग्गले णं भंते! असिधारं वा खुरधारं वा ओगाहेज्जा? हंता, ओगाहेज्जा। से णं भंते! तत्थ छिज्जेज्ज वा भिज्जेज्ज वा? गोतमा! णो इणट्ठे समट्ठे, नो खलु तत्थ सत्थं कमति।

एवं जाव असंखेज्जपएसिओ।

अणंतपदेसिए णं भंते! खंधे असिधारं वा खुरधारं वा ओगाहेज्जा? हंता, ओगाहेज्जा।

से णं तत्थ छिज्जेज्ज वा भिज्जेज्ज वा? गोयमा! अत्थेगइए छिज्जेज्ज वा भिज्जेज्ज वा, अत्थेगइए नो छिज्जेज्ज वा नो भिज्जेज्ज वा।

एवं अगणिकायस्स मज्झंमज्झेणं। तहिं णवरं 'झियाएज्जा' भाणितव्वं।

एवं पुक्खलसंवट्टगस्स महामेहस्स मज्झंमज्झेणं। तहिं 'उल्ले सिया'।

एवं गंगाए महाणदीए पडिसोतं हव्वमागच्छेज्जा। तहिं 'विणिघायमावज्जेज्जा, उदगावतं वा उदगबिंदु वा ओगाहेज्जा, से णं तत्थ परियावज्जेज्जा'।

**[२५५]**परमाणुपोग्गले णं भंते! किं सअइठे समज्झे सपदेसे? उदाहु अणइठे अमज्झे अपदेसे? गोतमा! अणइठे अमज्झे अपदेसे, नो सअइठे नो समज्झे नो सपदेसे।

दुपदेसिए णं भंते! खंधे किं सअद्धे समज्झे सपदेसे? उदाहु अणद्धे अमज्झे अपदेसे? गोयमा! सअद्धे अमज्झे सपदेसे, णो अणद्धे णो समज्झे णो अपदेसे।

तिपदेसिए णं भंते! खंधे. पुच्छा। गोयमा! अणद्धे समज्झे सपदेसे, नो सअद्धे णो अमज्झे णो अपदेसे।

जहा दुपदेसिओ तहा जे समा ते भाणियव्वा। जे विसमा ते जहा तिपएसिओ तहा भाणियव्वा।

संखेज्जपदेसिए णं भंते! खंधे किं सअइठे ६, पुच्छा। गोयमा! सिय सअद्धे अमज्झे सपदेसे, सिय अणइठे समज्झे सपदेसे।

जहा संखेज्जपदेसिओ तहा असंखेज्जपदेसिओ वि, अणंतपदेसिओ वि।

**[२५६]**परमाणुपोग्गले णं भंते! परमाणुपोग्गलं फुसमाणे किं देसेणं देसं फुसति? देसेणं देसे फुसति? देसेणं सव्वं फुसति? देसेहिं देसं फुसति? देसेहिं देसे फुसति? देसेहिं सव्वं फुसति? सव्वेणं देसं फुसति? सव्वेणं देसे फुसति? सव्वेणं सव्वं फुसति? गोयमा! नो देसेणं देसं फुसति, नो देसेणं देसे फुसति, नो देसेणं सव्वं फुसति, णो सव्वेणं देसं फुसति, णो सव्वेणं देसे फुसति, सव्वेणं सव्वं फुसति।

एवं परमाणुपोग्गले दुपदेसियं फुसमाणे सत्तम-णवमेहिं फुसति।

परमाणुपोग्गले तिपदेसियं फुसमाणे निप्पच्छिमएहिं तिहिं फुसति।

जहा परमाणुपोग्गलो तिपदेसियं फुसाविओ एवं फुसावेयव्वो जाव अणंतपदेसिओ।

दुपदेसिए णं भंते! खंधे परमाणुपोग्गलं फुसमाणे. पुच्छा? ततिय-णवमेहिं फुसति।

दुपएसिओ दुपदेसियं फुसमाणो पढम-तइय-सत्तम-णवमेहिं फुसति।

दुपएसिओ तिपदेसियं फुसमाणो आदिल्लएहि य पच्छिल्लएहि य तिहिं फुसति, मज्झिमएहिं तिहिं वि पडिसेहेयव्वं।

दुपदेसिओ जहा तिपदेसियं फुसावितो एवं फुसावेयव्वो जाव अणंतपदेसियं।

तिपदेसिए णं भंते! खंधे परमाणुपोग्गलं फुसमाणे. पुच्छा। ततिय-छट्ठ-णवमेहिं फुसति।

तिपदेसिओ दुपदेसियं फुसमाणो पढमएणं ततियएणं चउत्थ-छट्ठसत्तम-णवमेहिं फुसति।

तिपदेसिओ तिपदेसियं फुसमाणो सव्वेसु वि ठाणेसु फुसति।

जहा तिपदेसिओ तिपदेसियं फुसावितो एवं तिपदेसिओ जाव अणंतपएसिएणं संजोएयव्वो।

जहा तिपदेसिओ एवं जाव अणंतपएसिओ भाणियव्वो।

[२५७]परमाणुपोग्गले णं भंते! कालतो केवच्चिरं होति? गोयमा! जहन्नेणं एगं समयं, उक्कोसेणं असंखेज्जं कालं।

एवं जाव अणंतपदेसिओ।

एगपदेसोगाढे णं भंते! पोग्गले सेए तम्मि वा ठाणे अन्नम्मि वा ठाणे कालओ केवच्चिरं होइ? गोयमा! जहन्नेणं एगं समयं, उक्कोसेणं आवलियाए असंखेज्जइभागं।

एवं जाव असंखेज्जपदेसोगाढे।

एगपदेसोगाढे णं भंते! पोग्गले निरेए कालओ केवच्चिरं होइ? गोयमा! जहन्नेणं एगं समयं, उक्कोसेणं असंखेज्जं कालं।

एवं जाव असंखेज्जपदेसोगाढे।

एगगुणकालए णं भंते! पोग्गले कालतो केवच्चिरं होइ? गोयमा! जहन्नेणं एगं समयं, उक्कोसेणं असंखेज्जं कालं।

एवं जाव अणंतगुणकालए।

एवं वण्ण-गंध-रस-फास. जाव अणंतगुणलुक्खे।

एवं सुहमपरिणए पोग्गले।

एवं बादरपरिणए पोग्गले।

सद्दपरिणते णं भंते! पुग्गले कालओ केवच्चिरं होइ? गोयमा! जहन्नेणं एगं समयं उक्कोसेणं आवलियाए असंखेज्जइभागं।

असद्दपरिणते जहा एगगुणकालए।

परमाणुपोग्गलस्स णं भंते! अंतरं कालतो केवच्चिरं होइ? गोयमा! जहन्नेणं एगं समयं, उक्कोसेणं असंखेज्जं कालं।

दुप्पदेसियस्स णं भंते! खंधस्स अंतरं कालओ केवच्चिरं होइ? गोयमा! जहन्नेणं एगं समयं, उक्कोसेणं अणंतं कालं।

एवं जाव अणंतपदेसिओ।

एगपदेसोगाढस्स णं भंते! पोग्गलस्स सेयस्स अंतरं कालतो केवच्चिरं होइ? गोयमा! जहन्नेणं एगं समयं, उक्कोसेणं असंखेज्जं कालं।

एवं जाव असंखेज्जपदेसोगाढे।

एगपदेसोगाढस्स णं भंते! पोग्गलस्स निरेयस्स अंतरं कालतो केवच्चिरं होइ?

गोयमा! जहन्नेणं एगं समयं, उक्कोसेणं आवलियाए असंखेज्जइभागं।

एवं जाव असंखेज्जपदेसोगाढे।

वण्ण-गंध-रस-फास-सुहमपरिणय-बादरपरिणयाणं एतेसिं ज च्चेव संचिट्ठणा तं च्चेव अंतरं पि भाणियत्वं।

सद्दपरिणयस्स णं भंते! पोग्गलस्स अंतरं कालतो केवच्चिरं होइ? गोयमा! जहन्नेणं एगं समयं, उक्कोसेणं असंखेज्जं कालं।

असद्दपरिणयस्स णं भंते! पोग्गलस्स अंतरं कालओ केवच्चिरं होइ? गोयमा! जहन्नेणं एगं

समयं, उक्कोसेणं आवलियाए असंखेज्जइभागं।

[२५८] एयस्स णं भंते! दव्वट्ठाणाउयस्स खेतट्ठाणाउयस्स ओगाहणट्ठाणाउयस्स भाव-  
ट्ठाणाउयस्स कयरे कयरेहितो जाव विसेसाहिया वा? गोयमा! सव्वत्थोवे खेतट्ठाणाउए, ओगाहणट्ठाणाउए  
असंखेज्जगुणे, दव्वट्ठाणाउए असंखेज्जगुणे, भावट्ठाणाउए असंखेज्जगुणे।

[२५९] खेतोगाहण-दव्वे भावट्ठाणाउयं च अप्पबहुं।  
खेते सव्वत्थोवे सेसा ठाणा असंखेज्जा ॥

[२६०] नेरइया णं भंते! किं सारंभा सपरिग्गहा? उदाहु अणारंभा अपरिग्गहा? गोयमा! नेरइया  
सारंभा सपरिग्गहा, नो अणारंभा णो अपरिग्गहा।

से केणट्ठेणं जाव अपरिग्गहा? गोयमा! नेरइया णं पुढविकायं समारंभंति जाव तसकायं  
समारंभंति, सरीरा परिग्गहिया भवंति, कम्मा परिग्गहिया भवंति, सचित्त-अचित्त-मीसयाइं दव्वाइं  
परिग्गहियाइं भवंति; से तेणट्ठेणं तं चेव।

असुरकुमारा णं भंते! किं सारंभा सपरिग्गहा? उदाहु अणारंभा अपरिग्गहा? गोयमा!  
असुरकुमारा सारंभा सपरिग्गहा, नो अणारंभा अपरिग्गहा।

से केणट्ठेणं? गोयमा! असुरकुमारा णं पुढविकायं समारंभंति जाव तसकायं समारंभंति,  
सरीरा परिग्गहिया भवंति, कम्मा परिग्गहिया भवंति, भवणा परि. भवंति, देवा देवीओ मणुस्सा मणुस्सीओ  
तिरिक्खजोणिया तिरिक्खजोणिणीओ परिग्गहियाओ भवंति, आसण-सयण-भंडमतोवगरणा परिग्गहिया  
भवन्ति, सचित्त-अचित्त-मीसयाइं दव्वाइं परिग्गहियाइं भवंति; से तेणट्ठेणं तहेव।

एवं जाव थणियकुमारा।

एगिंदिया जहा नेरइया।

बेइंदिया णं भंते! किं सारंभा सपरिग्गहा? तं चेव जाव सरीरा परिग्गहिया भवंति, बाहिरया  
भंडमतोवगरणा परि. भवंति, सचित्तअचित्त. जाव भवंति।

एवं जाव चउरिंदिया।

पंचेंदियतिरिक्खजोणिया णं भंते! तं चेव जाव कम्मा परिग्गहिया भवंति, टंका कूडा सेला  
सिहरी पळभारा परिग्गहिया भवंति, जल-थल-बिल-गुहलेणा परिग्गहिया भवंति, उज्झर-निज्झर-चिल्लल-  
पल्लल-वप्पिणा परिग्गहिया भवंति, अगड-तडाग-दह-नदीओ वावि-पुक्खरिणी-दीहिया गुंजालिया सरा  
सरपंतियाओ सरसरपंतियाओ बिलपंतियाओ परिग्गहियाओ भवंति, आराम-उज्जाणा काणणा वणाइं  
वणसंडाइं वणराईओ परिग्गहियाओ भवंति, देवउल-सभा-पवा-थूभा खातिय-परिखाओ परिग्गहियाओ भवंति,  
पागारऽट्टालग-चरिया-दार-गोपुरा परिग्गहिया भवंति, पासाद-घर-सरण-लेण-आवणा परिग्गहिता भवंति,  
सिंधाडगतिग-चउक्क-चच्चर-चउम्महुह-पहपहा परिग्गहिया भवंति, सगड-रह-जाण-जुग्गगिल्लि-थिल्लि-सीय-  
संदमाणियाओ परिग्गहियाओ भवंति, लोही-लोहकडाह-कडच्छुया परिग्गहिया भवंति, भवणा परिग्गहिया  
भवन्ति, देवा देवीओ मणुस्सा मणुस्सीओ तिरिक्खजोणिया तिरिक्खजोणिणीओ आसण-सयण-खंभ-भंड-  
सचित्त- अचित्त-मीसयाइं दव्वाइं परिग्गहियाइं भवंति; से तेणट्ठेणं।

जहा तिरिक्खजोणिया तहा मणुस्सा वि भाणियव्वा।

वाणमंतर-जोतिस-वेमाणिया जहा भवणवासी तहा नेयव्वा।

[२६१] पंच हेतू पण्णत्ता, तं जहा-हेतुं जाणति, हेतुं पासति, हेतुं बुज्झति, हेतुं अभिसमागच्छति, हेतुं छउमत्थमरणं मरति।

पंचेव हेतू पण्णत्ता, तं जहा-हेतुणा जाणति जाव हेतुणा छुमत्थमरणं मरति।

पंच हेतू पण्णत्ता, तं जहा-हेतुं न जाणइ जाव हेतुं अण्णाणमरणं मरति।

पंच हेतू पण्णत्ता, तं जहा-हेतुणा ण जाणति जाव हेतुणा अण्णाणमरणं मरति।

पंच अहेऊ पण्णत्ता, तं जहा-अहेउं जाणइ जाव अहेउं केवलिमरणं मरति।

पंच अहेऊ पण्णत्ता, तं जहा-अहेउणा जाणइ जाव अहेउणा केवलिमरणं मरइ।

पंच अहेऊ पण्णत्ता, तं जहा-अहेउं न जाणइ जाव अहेउं छउमत्थमरणं मरइ।

पंच अहेऊ पण्णत्ता, तं जहा-अहेउणा न जाणइ जाव अहेउणा छउमत्थमरणं मरइ।

सेवं भंते! सेवं भंते! ति।

**\*पंचमे सए सत्तमो उद्देशो समतो\***

## ० अट्ठमो उद्देशो ०

[२६२] तेणं कालेणं तेणं समएणं जाव परिसा पडिगता। तेणं कालेणं तेणं समएणं समणस्स भगवओ महावीरस्स अंतेवासी नारयपुत्ते नामं अणगारे पगतिभद्दए जाव विहरति।

तेणं कालेणं तेणं समएणं समणस्स भगवओ महावीरस्स अंतेवासी नियंठिपुत्ते णामं अणगारे पगतिभद्दए जाव विहरति।

तए णं से नियंठिपुत्ते अणगारे जेणामेव नारयपुत्ते अणगारे तेणेव उवागच्छति, उवागच्छिता नारयपुत्तं अणगारं एवं वदासी-सव्वपोग्गला ते अज्जो! किं सअइढा समज्झा सपदेसा? उदाहु अणइढा अमज्झा अपएसा? 'अज्जो' ति नारयपुत्ते अणगारे नियंठिपुत्तं अणगारं एवं वदासीसव्वपोग्गला मे अज्जो! सअइढा समज्झा सपदेसा, नो अणइढा अमज्झा अपएसा।

तए णं से नियंठिपुत्ते अणगारे नारदपुत्तं अणगारं एवं वदासी-जति णं ते अज्जो! सव्वपोग्गला सअइढा समज्झा सपदेसा, नो अणइढा अमज्झा अपदेसा; किं दव्वादेसेणं अज्जो! सव्वपोग्गला सअइढा समज्झा सपदेसा, नो अणइढा अमज्झा अपदेसा? खेत्तादेसेणं अज्जो! सव्वपोग्गला सअइढा समज्झा सपदेसा? तह चेव। कालादेसेणं.? तं चेव। भावादेसेणं अज्जो!..? तं चेव।

तए णं से नारयपुत्ते अणगारे नियंठिपुत्तं अणगारं एवं वदासीदव्वादेसेण वि मे अज्जो! सव्वपोग्गला सअइढा समज्झा सपदेसा, नो अणइढा अमज्झा अपदेसा; खेत्ताए

सेण वि सव्वपोग्गला सअइढा.; तह चेव कालादेसेण वि; तं चेव भावादेसेण वि।

तए णं से नियंठिपुत्ते अणगारे नारयपुत्तं अणगारं एवं वयासी- जति णं अज्जो ! दव्वादेसेणं सव्वपोग्गला सअइढा समज्झा सपएसा, नो अणइढा अमज्झा अपएसा; एवं ते परमाणुपोग्गले वि सअइढे समज्झे सपएसे, णो अणइढे अमज्झे अपएसे; जति णं अज्जो! खेत्तादेसेण वि सव्वपोग्गला सअ०३, जाव एवं ते एगपदेसोगाढे वि पोग्गले सअइढे समज्झे सपदेसे; जति णं अज्जो! कालादेसेणं सव्वपोग्गला सअइढा समज्झा सपएसा, एवं ते एगसमयठितीए वि पोग्गले ३ तं चेव; जति णं अज्जो! भावादेसेणं सव्वपोग्गला सअइढा समज्झा सपएसा ३ एवं ते एगगुणकालए वि पोग्गले सअइढे ३

तं चेव; अह ते एवं न भवति, तो जं वदसि दव्वादेसेण वि सव्वपोग्गला सअ. ३, नो अण्ड्ढा अमज्झा अपदेसा, एवं खेत्तादेसेण वि, काला., भावादेसेण वि तं णं मिच्छा।

तए णं से नारयपुत्ते अणगारे नियंठिपुत्तं अणगारं एवं वदासि-नो खलु वयं देवाणुप्पिया! एतमट्ठं जाणामो पासामो, जति णं देवाणुप्पिया! नो गिलायंति परिकहितए तं इच्छामि णं देवाणुप्पियाणं अंतिए एतमट्ठं सोच्चा निसम्म जाणितए।

तए णं से नियंठिपुत्ते अणगारे नारयपुत्तं अणगारं एवं वदासीदव्वादेसेण वि मे अज्जो सव्वपोग्गला सपदेसा वि अपदेसा वि अणंता। खेत्तादेसेण वि एवं चेव।

कालादेसेण वि भावादेसेण वि एवं चेव।

जे दव्वतो अपदेसे से खेतओ नियमा अपदेसे, कालतो सिय सपदेसे सिय अपदेसे, भावओ सिय सपदेसे सिय अपदेसे। जे खेतओ अपदेसे से दव्वतो सिय सपदेसे सिय अपदेसे, कालतो भयणाए, भावतो भयणाए। जहा खेतओ एवं कालतो। भावतो जे दव्वतो सपदेसे से खेततो सिय सपदेसे सिय अपदेसे, एवं कालतो भावतो वि। जे खेततो सपदेसे से दव्वतो नियमा सपदेसे, कालओ भयणाए, भावतो भयणाए। जहा दव्वतो तहा कालतो भावतो वि।

एतेसि णं भंते! पोग्गलाणं दव्वादेसेणं खेत्तादेसेणं कालादेसेणं भावादेसेणं सपदेसाण य अपदेसाण य कतरे कतरेहितो जाव विसेसाहिया वा?

नारयपुत्ता! सव्वत्थोवा पोग्गला भावादेसेणं अपदेसा, कालादेसेणं अपदेसा असंखेज्जगुणा, दव्वादेसेणं अपदेसा असंखेज्जगुणा, खेत्तादेसेणं अपदेसा असंखेज्जगुणा, खेत्तादेसेणं चेव सपदेसा असंखेज्जगुणा, दव्वादेसेणं सपदेसा विसेसाहिया, कालादेसेणं सपदेसा विसेसाहिया, भावादेसेणं सपदेसा विसेसाहिया।

तए णं से नारयपुत्ते अणगारे नियंठिपुत्तं अणगारं वंदइ नमंसइ, नियंठिपुत्तं अणगारं वंदिता नमंसिता एतमट्ठं सम्मं विणएणं भुज्जो भुज्जो खामेति, २ ता संजमेणं तवसा अप्पाणं भावेमाणे विहरइ।

**[२६३]** भंते! ति भगवं गोतमे समणं जाव एवं वदासी-जीवा णं भंते! किं वड्ढंति, हायंति, अवट्ठिया? गोयमा! जीवा णो वड्ढंति, नो हायंति, अवट्ठिता।

नेरतिया णं भंते! किं वड्ढंति, हायंति, अवट्ठिता? गोयमा! नेरइया वड्ढंति वि, हायंति वि, अवट्ठिया वि।

जहा नेरइया एवं जाव वेमाणिया।

सिद्धा णं भंते!. पुच्छा। गोयमा! सिद्धा वड्ढंति, नो हायंति, अवट्ठिता वि।

जीवा णं भंते! केवतियं कालं अवट्ठिता? गोयमा! सव्वद्धं ।

नेरतिया णं भंते! केवतियं कालं वड्ढंति? गोयमा! जहन्नेणं एगं समयं, उक्कोसेणं आवलियाए असंखेज्जतिभाणं।

एवं हायंति।

नेरइया णं भंते! केवतियं कालं अवट्ठिया? गोयमा! जहन्नेणं एगं समयं, उक्कोसेणं चउव्वीसं मुहुत्ता।

एवं सत्तसु वि पुढ्वीसु 'वड्ढंति, हायंति' भाणियव्वं। नवरं अवट्ठितेसु इमं नाणत्तं, तं जहा-

रयणप्पभाए पुढवीए अडतालीसं मुहुत्ता, सक्करप्पभाए चोदस राइंदियाइं, वालुयप्पभाए मासं, पंकप्पभाए दो मासा, धूमप्पभाए चत्तारि मासा, तमाए अट्ठ मासा, तमतमाए बारस मासा।

असुरकुमारा वि वड्ढंति हायंति, जहा नेरइया। अवट्ठिता जहन्नेणं एक्कं समयं, उक्कोसेणं अट्ठचत्तालीसं मुहुत्ता।

एवं दसविहा वि।

एगिंदिया वड्ढंति वि, हायंति वि, अवट्ठिया वि। एतेहिं तिहि वि जहन्नेणं एक्कं समयं, उक्कोसेणं आवलियाए असंखेज्जतिभागं।

बेइंदिया वड्ढंति हायंति तहेव। अवट्ठिता जहन्नेणं एक्कं समयं, उक्कोसेणं दो अंतोमुहुत्ता।

एवं जाव चतुरिंदिया।

अवसेसा सव्वे वड्ढंति, हायंति तहेव। अवट्ठियाणं णाणत्तं इमं, तं जहा-

सम्मच्छिम- पंचिंदियतिरिक्खजोणियाणं दो अंतोमुहुत्ता। गब्भवक्कंतियाणं चउव्वीसं मुहुत्ता।

सम्मच्छिम- मणुस्साणं अट्ठचत्तालीसं मुहुत्ता। गब्भवक्कंतियमणुस्साणं चउव्वीसं मुहुत्ता। वाणमंतर-जोतिस-सोहम्मिसाणेसु अट्ठचत्तालीसं मुहुत्ता। सणंकुमारे अट्ठारस रातिंदियाइं चत्तालीस य मुहुत्ता। माहिंदे चउवीसं रातिंदियाइं, वीस य मुहुत्ता। बंभलोए पंच चत्तालीसं रातिंदियाइं। लंतए नउतिं रातिंदियाइं। महासुक्के सट्ठं रातिंदियसतं। सहस्सारे दो रातिंदियसताइं। आणय-पाणयाणं संखेज्जा मासा। आरणसच्चुयाणं संखेज्जाइं वासाइं। एवं गेवेज्जगदेवाणं। विजय-वेजयंत-जयंत-अपराजियाणं असंखिज्जाइं वाससहस्साइं।

सव्वट्ठसिद्धे य पलियओवमस्स संखेज्जतिभागो। एवं भाणियव्वं-वड्ढंति हायंति जहन्नेणं एक्कं समयं, उक्कोसेणं आवलियाए असंखेज्जतिभागं; अवट्ठियाणं जं भणियं।

सिद्धा णं भंते! केवतियं कालं वड्ढंति? गोयमा! जहण्णेणं एक्कं समयं, उक्कोसेणं अट्ठ समया।

केवतियं कालं अवट्ठिया? गोयमा! जहन्नेणं एक्कं समयं, उक्कोसेणं छम्मासा।

जीवा णं भंते! किं सोवचया, सावचया, सोवचयसावचया, निरुवचयनिरवचया? गोयमा! जीवा णो सोवचया, नो सावचया, णो सोवचयसावचया, निरुवचयनिरवचया।

एगिंदिया ततियपदे, सेसा जीवा चउहि वि पदेहिं भाणियव्वा।

सिद्धा णं भंते! .पुच्छा। गोयमा! सिद्धा सोवचया, णो सावचया, णो सोवचयसावचया, निरुवचयनिरवचया।

जीवा णं भंते! केवतियं कालं निरुवचयनिरवचया? गोयमा! सव्वद्धं।

नेरतिया णं भंते ! केवतियं कालं सोवचया ? गोयमा ! जहन्नेणं एक्कं समयं, उक्कोसेणं आवलियाए असंखेज्जइभागं।

केवतियं कालं सावचया? एवं चेव।

केवतियं कालं सोवचयसावचया? एवं चेव।

केवतियं कालं निरुवचयनिरवचया? गोयमा! जहन्नेणं एक्कं समयं, उक्कोसेणं बारस मुहुत्ता।

एगिंदिया सव्वे सोवचयसावचया सव्वद्धं।

सेसा सव्वे सोवचया वि, सावचया वि, सोवचयसावचया वि, निरुवचयनिरवचया वि जहन्नेणं एगं समयं, उक्कोसेणं आवलियाए असंखेज्जतिभागं अवट्ठिण्हिं वक्कतिकालो भाणियव्वो।

सिद्धा णं भंते! केवतियं कालं सोवचया? गोयमा! जहन्नेणं एककं समयं, उक्कोसेणं अट्ठ समयया।

केवतियं कालं निरुवचयनिरवचया? जहन्नेणं एककं समयं, उक्कोसेणं छम्मासा।

सेवं भंते! सेवं भंते! ति।

**\*पंचम सए अट्ठमो उद्देशो समतो\***

## ० नवमो उद्देशओ ०

[२६४]तेणं कालेणं तेणं समएणं जाव एवं वयासी-

किमिदं भंते! 'नगरं रायगिहं' ति पवुच्चति? जाव वणस्सती? जहा एयणुद्देशए पंचिंदिय-तिरिक्खजोणियाणं वत्तव्वता तहा भाणियव्वं जाव सचित्त-अचित्त-मीसयाइं दव्वाइं नगरं रायगिहंति पवुच्चति? गोतमा! पुढवी वि 'नगरं रायगिहं'ति पवुच्चति जाव सचित्त-अचित्त-मीसियाइं दव्वाइं 'नगरं रायगिहंति पवुच्चति।

से केणट्ठेणं.? गोयमा! पुढवी जीवा ति य अजीवा ति य नगरं रायगिहंति पवुच्चति जाव सचित्त-अचित्त-मीसियाइं दव्वाइं जीवा ति य अजीवा ति य नगरं रायगिहंति पवुच्चति, से तेणट्ठेणं तं चेव

[२६५]से नूणं भंते! दिया उज्जोते, रतिं अंधकारे? हंता, गोयमा! जाव अंधकारे।

से केणट्ठेणं.? गोतमा! दिया सुभा पोग्गला, सुभे पोग्गलपरिणामे, रतिं असुभा पोग्गला, असुभे पोग्गलपरिणामे, से तेणट्ठेणं।

नेरइयाणं भंते! किं उज्जोए, अंधकारे? गोयमा! नेरइयाणं नो उज्जोए, अंधयारे।

से केणट्ठेणं.? गोतमा! नेरइयाणं असुभा पोग्गला, असुभे पोग्गलपरिणामे, से तेणट्ठेणं।

असुरकुमाराणं भंते! किं उज्जोते, अंधकारे? गोयमा! असुरकुमाराणं उज्जोते, नो अंधकारे।

से केणट्ठेणं.? गोतमा! असुरकुमाराणं सुभा पोग्गला, सुभे पोग्गलपरिणामे, से तेणट्ठेणं एवं वुच्चति।

एवं जाव थणियाणं।

पुढविकाइया जाव तेइंदिया जहा नेरइया।

चउरिंदियाणं भंते! किं उज्जोते, अंधकारे? गोतमा! उज्जोते वि, अंधकारे वि।

से केणट्ठेणं० ? गोतमा! चतुरिंदियाणं सुभाऽसुभा पोग्गला, सुभाऽसुभे पोग्गलपरिणामे, से तेणट्ठेणं०।

एवं जाव मणुस्साणं।

वाणमंतर-जोतिस-वेमाणिया जहा असुरकुमारा।

[२६६]अत्थि णं भंते! नेरइयाणं तत्थगयाणं एवं पण्णायति, तं जहा-समया ति वा आवलिया ति वा जाव ओसप्पिणी ति वा उस्सप्पिणी ति वा? णो इणट्ठे समट्ठे।

से केणट्ठेणं जाव समयया ति वा आवलिया ति वा जाव ओसप्पिणी ति वा उस्सप्पिणी ति

से केणट्ठेणं जाव समया ति वा आवलिया ति वा जाव ओसप्पिणी ति वा उस्सप्पिणी ति वा? गोयमा! इहं तेसिं माणं, इहं तेसिं पमाणं, इहं तेसिं एवं पण्णायति, तं जहा-समया ति वा जाव उस्सप्पिणी ति वा। से तेणट्ठेणं जाव नो एवं पण्णायति, तं जहा-समया ति वा जाव उस्सप्पिणी ति वा।

एवं जाव पंचेदियतिरिक्खजोणियाणं।

अत्थि णं भंते! मणुस्साणं इहगताणं एवं पण्णायति, तं जहा-समया ति वा जाव उस्सप्पिणी ति वा? हंता, अत्थि।

से केणट्ठेणं? गोतमा! इहं तेसिं माणं, इहं तेसिं पमाणं, इहं चेव तेसिं एवं पण्णायति, तं जहा-समया ति वा जाव उस्सप्पिणी ति वा। से तेणट्ठेणं।

वाणमंतर-जोतिस-वेमाणियाणं जहा नेरइयाणं।

**[२६७]**तेणं कालेणं तेणं समएणं पासावच्चिज्जा थेरा भगवंतो जेणेव समणे भगवं महावीरे तेणेव उवागच्छंति, तेणेव उवागच्छिता समणस्स भगवओ महावीरस्स अदूरसामंते ठिच्चा एवं वदासी-से नूणं भंते! असंखेज्जे लोए, अणंता रातिंदिया उप्पज्जिंसु वा उप्पज्जंति वा उप्पज्जिस्संति वा?, विगच्छिंसु वा विगच्छंति वा विगच्छिस्संति वा?, परित्ता रातिंदिया उप्पज्जिंसु वा उप्पज्जंति वा उप्पज्जिस्संति वा? विगच्छिंसु वा विगच्छंति वा विगच्छिस्संति वा? हंता, अज्जो! असंखेज्जे लोए, अणंता रातिंदिया. तं चेव।

से केणट्ठेणं जाव विगच्छिस्संति वा? से नूणं भे अज्जो! पासेणं अरहया पुरिसादाणीएणं "सासते लोए वुइते अणादीए अणवदग्गे परित्ते परिवुडे; हेट्ठा वित्थिण्णे, मज्झे संखित्ते, उप्पिं विसाले, अहे पलियंकसंठित्ते, मज्झे वरवइरविग्गहित्ते, उप्पिं उद्धमुइंगाकारसंठित्ते। ते(?तं)सिं च णं सासयंसि लोणंसि अणादियंसि अणवदग्गंसि परित्तंसि परिवुडंसि हेट्ठा वित्थिण्णंसि, मज्झे संखित्तंसि, उप्पिं विसालंसि, अहे पलियंकसंठियंसि, मज्झे वरवइरविग्गहियंसि, उप्पिं उद्धमुइंगाकारसंठियंसि अणंता जीवघणा उप्पज्जिता उप्पज्जिता निलीयंति, परित्ता जीवघणा उप्पज्जिता उप्पज्जिता निलीयंति। से भूए उप्पन्ने विगते परिणए अजीवेहिं लोक्कति, पलोक्कइ। जे लोक्कइ से लोए? 'हंता, भगवं!'। से तेणट्ठेणं अज्जो! एवं वुच्चति असंखेज्जे तं चेव।

तप्पभित्तिं च णं ते पासावच्चेज्जा थेरा भगवंतो समणं भगवं महावीरं पच्चभिजाणंति 'सव्वण्णुं सव्वदरिसिं ति।

तए णं ते थेरा भगवंतो समणं भगवं महावीरं वंदंति नमंसंति, २ एवं वदासि-इच्छामि णं भंते! तुब्भं अंतिए चाउज्जामाओ धम्माओ पंचमहव्वइयं सप्पडिक्कमणं धम्मं उवसंपज्जिताणं विहरित्तए। अहासुहं देवाणुप्पिया! मा पडिबंधं करेह।

तए णं ते पासावच्चिज्जा थेरा भगवंतो जाव चरिमेहिं उस्सासनिस्सासेहिं सिद्धा जाव सव्व-दुक्खप्पहीणा, अत्थेगइया देवा देवलोगेसु उववन्ना।

**[२६८]**कतिविहा णं भंते! देवलोगा पण्णत्ता? गोयमा! चउव्विहा देवलोगा पण्णत्ता, तं जहा-भवणवासी-वाणमंतर-जोतिसिय-वेमाणियभेदेण। भवणवासी दसविहा। वाणमंतरा अट्ठविहा। जोतिसिया पंचविहा। वेमाणिया दुविहा।

**[२६९]** किमिदं रायगिहं ति य, उज्जोते अंधकारे समए य।

पासंतिवासिपुच्छा रातिंदिय, देवलोगा य ॥

[२७०] सेवं भंते! सेवं भंते! ति।

**\*पंचमे सए नवमो उद्देसो समतो\***

**० दसमो उद्देसो ०**

[२७१]तेणं कालेणं तेणं समएणं चंपानामं नगरी। जहा पढमिल्लो उद्देसओ तहा नेयव्वो एसो वि। नवरं चंदिमा भाणियव्वा।

**\*पंचमे सए दसमो उद्देसो समतो\***

**०-पंचमं सयं समतं-०**

**० मुनि दीपरत्तसागरेण संशोधितः सम्पादितश्च पंचमं सतं समतं ०**

**[ ] छट्ठं सयं [ ]**

[२७२] . वेयण आहार महस्सवे य सपदेस तमुयए भविए ।  
साली पुढवी कम्मऽन्नउत्थि दस छट्ठगम्मि सते ॥

**० पढमो उद्देसो ०**

[२७३]से नूणं भंते! जे महावेदणे से महानिज्जरे? जे महानिज्जरे से महावेदणे? महावेदणस्स य अप्पवेदणस्स य से सेए जे पसत्थनिज्जराए? हंता, गोयमा! जे महावेदणे एवं चेव।

छट्ठी-सत्तमासु णं भंते! पुढवीसु नेरइया महावेदणा? हंता, महावेदणा।

ते णं भंते! समणेहिंतो निग्गंथेहिंतो महानिज्जरतरा? गोयमा! णो इणट्ठे समट्ठे।

से केणट्ठेणं भंते! एवं वुच्चति जे महावेदणे जाव पसत्थनिज्जराए? गोयमा! से जहानामए दुवे वत्थे सिया, एगे वत्थे कद्धमरागरत्ते, एगे वत्थे खंजणरागरत्ते। एतेसि णं गोयमा! दोण्हं वत्थाणं कतरे वत्थे दुधोयतराए चेव, सुवामतराए चेव, सुपरिकम्मतराए चेव, जे वा से वत्थे कद्धमरागरत्ते? जे वा से वत्थे खंजणरागरत्ते? भगवं! तत्थ णं जे से वत्थे कद्धमरागरत्ते से णं वत्थे दुधोयतराए चेव दुवामतराए चेव दुप्परिकम्मतराए चेव। एवामेव गोतमा! नेरइयाणं पावाइं कम्माइं गाढीकताइं चिक्कणीकताइं सिलिट्ठीकताइं खिलीभूताइं भवंति; संपगाढं पि य णं ते वेदणं वेदेमाणा नो महानिज्जरा, णो महापज्जवसाणा भवंति। से जहा वा केइ पुरिसे अहिगरणीं आउडेमाणे महता महता सद्देणं महता महता घोसेणं महता महता परंपराघातेणं नो संचाएति तीसे अहिगरणीए अहाबायरे वि पोग्गले परिसाडित्तए।

एवामेव गोयमा! नेरइयाणं पावाइं कम्माइं गाढीकयाइं जाव नो महापज्जवसाणा भवंति। भगवं! तत्थ जे से वत्थे खंजणरागरत्ते से णं वत्थे सुधोयतराए चेव सुवामतराए चेव सुपरिकम्मतराए चेव। एवामेव गोयमा! समणाणं निग्गंथाणं अहाबायराइं कम्माइं सिढिलीकताइं निट्ठिताइं कडाइं विप्परिणामिताइं खिप्पामेव विद्धत्थाइं भवंति जावतियं तावतियं पि णं ते वेदणं वेदेमाणा महानिज्जरा महापज्जवसाणा भवंति। से जहानामए केइ पुरिसे सुक्कं तणहत्थयं जायतेयंसि पक्खिवेज्जा, से नूणं गोयमा! से सुक्के तणहत्थए जायतेयंसि पक्खित्ते समाणे खिप्पामेव मसमसाविज्जति? हंता, मसमसा-विज्जति। एवामेव गोयमा! समणाणं निग्गंथाणं अहाबादराइं कम्माइं जाव महापज्जवसाणा भवंति। से जहा नामए केइ पुरिसे तत्तंसि अयकवल्लंसि उदगबिंदू जाव हंता, विद्धंसमागच्छति। एवामेव गोयमा !

समणाणं निग्गंथाणं जाव महापज्जवसाणा भवंति। से तेणट्ठेणं जे महावेदणे से महानिज्जरे जाव निज्जराए।

**[२७४]**कतिविहे णं भंते! करणे पण्णत्ते? गोतमा! चउत्विहे करमे पण्णत्ते, तं जहा-मणकरणे वइकरणे कायकरणे कम्मकरणे।

णेइयाणं भंते! कतिविहे करणे पण्णत्ते? गोयमा! चउत्विहे पण्णत्ते, तं जहा-मणकरणे वइकरणे कायकरणे कम्मकरणे। एवं पंचेदियाणं सच्चवेसिं चउत्विहे करणे पण्णत्ते। एगिंदियाणं दुविहे-कायकरणे य कम्मकरणे य। विगलेंदियाणं वइकरणे कायकरणे कम्मकरणे।

नेइया णं भंते! किं करणतो असायं वेदणं वेदेंति? अकरणतो वेदणं वेदेंति? गोयमा! नेइया णं करणओ असायं वेदणं वेदेंति, नो अकरणओ वेदणं वेदेंति।

से केणट्ठेणं.? गोयमा! नेइयाणं चउत्विहे करणे पण्णत्ते, तं जहा-मणकरणे वइकरणे कायकरणे कम्मकरणे। इच्चेएणं चउत्विहेणं असुभेणं करणेणं नेइया करणतो असायं वेदणं वेदेंति, नो अकरणतो, से तेणट्ठेणं।

असुरकुमारा णं किं करणतो, अकरणतो? गोयमा! करणतो, नो अकरणतो।

से केणट्ठेणं०? गोतमा! असुरकुमाराणं चउत्विहे करणे पण्णत्ते, तं जहा-मणकरणे वइकरणे कायकरणे कम्मकरणे। इच्चेएणं सुभेणं करणेणं असुरकुमारा णं करणतो सायं वेदणं वेदेंति, नो अकरणतो।

एवं जाव थणियकुमारा।

पुढविकाइयाणं एस चेव पुच्छा। नवरं इच्चेएणं सुभासुभेणं करणेणं पुढविकाइया करणतो वेमायाए वेदणं वेदेंति, नो अकरणतो।

ओरालियसरीरा सच्चे सुभासुभेणं वेमायाए। देवा सुभेणं सातं।

**[२७५]**जीवा णं भंते! किं महावेदणा महानिज्जरा? महावेदणा अप्पनिज्जरा? अप्पवेदणा महानिज्जरा? अप्पवेदणा अप्पनिज्जरा? गोयमा! अत्थेगइया जीवा महावेदणा महानिज्जरा, अत्थेगइया जीवा महावेयणा अप्पनिज्जरा, अत्थेगइया जीवा अप्पवेदणा महानिज्जरा, अत्थेगइया जीवा अप्पवेदणा अप्पनिज्जरा।

से केणट्ठेणं०? गोयमा! पडिमापडिवन्नए अणगारे महावेदणे महानिज्जरे। छट्ठ-सत्तमासु पुढवीसु नेइया महावेदणा अप्पनिज्जरा। सेलेसिं पडिवन्नए अणगारे अप्पवेदणे महानिज्जरे। अणुत्तरो-ववाइया देवा अप्पवेदणा अप्पनिज्जरा।

सेवं भंते! सेवं भंते! ति।

**[२७६]** महावेदणे य वत्थए कद्धम-खंजणमए य अधिकरणी।

तणहत्थेऽयकवल्ले करण महावेदणा जीवा ॥

सेवं भंते! सेवं भंते! ति।

**\*छट्ठे सए पढमो उद्देशो समतो\***

**० बीओ उद्देशो ०**

**[२७७]**रायगिहं नगरं जाव एवं वदासी-आहारुद्देशो जो पण्णवणाए सो सच्चो निरवसेसो

नेयव्वो।

सेवं भंते! सेवं भंते! ति. ।

**\*छट्ठे सए बीओ उद्देशो समतो\***

**० तइओ उद्देशो ०**

[२७८] बहुकम्म वत्थपोग्गल पयोगसा वीससा य सादीए ।

कम्मट्ठि-त्थि संजय सम्मट्ठि य सण्णी य ॥

[२७९] भविए दंसण पज्जत भासय परित्त नाण जोगे य।

उवओगा-सहारग सुहुम चरिम बंधे य, अप्पबहुं ॥

[२८०] से नूणं भंते! महाकम्मस्स महाकिरियस्स महासवस्स महावेदणस्स सव्वतो पोग्गला बज्झंति, सव्वओ पोग्गला चिज्जंति, सव्वओ पोग्गला उवचिज्जंति, सया समितं च णं पोग्गला बज्झंति, सया समितं पोग्गला चिज्जंति, सया समितं पोग्गला उवचिज्जंति, सया समितं च णं तस्स आया दुरूवताए दुवण्णताए दुगंधताए दुरसताए दुफासताए अणिट्ठताए अकंतताए अप्पियताए असुभताए अमणुण्णताए अमणामताए अणिच्छियताए अभिज्झियताए; अहताए, नो उड्ढताए, दुक्खताए, नो सुहताए भुज्जो भुज्जो परिणमंइ? हंता, गोयमा! महाकम्मस्स तं चेव।

से केणट्ठेणं.? गोयमा! से जहानामए वत्थस्स अहतस्स वा धोतस्स वा तंतुग्गतस्स वा आणुपुव्वीए परिभुज्जमाणस्स सव्वओ पोग्गला बज्झंति, सव्वओ पोग्गला चिज्जंति जाव परिणमंति, से तेणट्ठेणं०।

से नूणं भंते! अप्पकम्मस्स अप्पकिरियस्स अप्पासवस्स अप्पवेदणस्स सव्वओ पोग्गला भिज्जंति, सव्वओ पोग्गला छिज्जंति, सव्वओ पोग्गला विद्धंसंति, सव्वओ पोग्गला परिविद्धंसंति, सया समितं पोग्गला भिज्जंति छिज्जंति विद्धंसंति परिविद्धंसंति, सया समितं च णं तस्स आया सुरूवताए पसत्थं नेयव्वं जाव सुहताए, नो दुक्खताए भुज्जो २ परिणमंति? हंता, गोयमा! जाव परिणमंति।

से केणट्ठेणं.? गोयमा! से जहानामए वत्थस्स जल्लियस्स वा पंकितस्स वा मइलियस्स वा रइल्लियस्स वा आणुपुव्वीए परिकम्मिज्जमाणस्स सुद्धेणं वारिणा धोव्वमाणस्स सव्वतो पोग्गला भिज्जंति जाव परिणमंति, से तेणट्ठेणं०।

[२८१] वत्थस्स णं भंते! पोग्गलोवचए किं पयोगसा, वीससा? गोयमा! पयोगसा वि, वीससा वि।

जहा णं भंते! वत्थस्स णं पोग्गलोवचए पयोगसा वि, वीससा वि तहा णं जीवाणं कम्मोवचए किं पयोगसा, वीससा? गोयमा! पयोगसा, नो वीससा।

से केणट्ठेणं.? गोयमा! जीवाणं तिविहे पयोगे पण्णते, तं जहा-मणप्पयोगे वइप्पयोगे काय-प्पयोगे य। इच्चेतेणं तिविहेणं पयोगेणं जीवाणं कम्मोवचए पयोगसा, नो वीससा। एवं सव्वेसिं पंचेदियाणं तिविहे पयोगे भाणियव्वे।

पुढविक्काइयाणं एगविहेणं पयोगेणं, एवं जाव वणस्सतिकाइयाणं। विगलिनदियाणं दुविहे पयोगे पण्णते, तं जहा- वइप्पयोगे य, कायप्पयोगे य। इच्चेतेणं दुविहेणं पयोगेणं कम्मोवचए पयोगसा, नो

वीससा। से एणट्ठेणं जाव नो वीससा। एवं जस्स जो पयोगो जाव वेमाणियाणं।

[२८२] वत्थस्स णं भंते! पोग्गलोवचए किं सादीए सपज्जवसिते? सादीए अपज्जवसिते? अणादीए सपज्जवसिते? अणा० अपज्जवसिते? गोयमा! वत्थस्स णं पोग्गलोवचए सादीए सपज्जवसिते, नो सादीए अपज्जवसिते, नो अणादीए सपज्जवसिते, नो अणादीए अपज्जवसिते।

जहा णं भंते! वत्थस्स पोग्गलोवचए सादीए सपज्जवसिते, नो सादीए अपज्जवसिते, नो अणादीए सपज्जवसिते, नो अणादीए अपज्जवसिते तथा णं जीवाणं कम्मोवचए पुच्छा। गोयमा! अत्थेगइयाणं जीवाणं कम्मोवचए साईए सपज्जवसिते, अत्थे. अणाईए सपज्जवसिए, अत्थे० अणाईए अपज्जवसिए, नो चेव णं जीवाणं कम्मोवचए सादीए अपज्जवसिते।

से केणट्ठेणं०? गोयमा! रियावहियाबंधयस्स कम्मोवचए साईए सप.। भवसिद्धियस्स कम्मोवचए अणादीए सपज्जवसिते। अभवसिद्धियस्स कम्मोवचए अणाईए अपज्जवसिते। से तेणट्ठेणं गोयमा!०।

वत्थे णं भंते! किं सादीए सपज्जवसिते? चतुभंगो। गोयमा! वत्थे सादीए सपज्जवसिते, अवसेसा तिण्णि वि पडिसेहेयव्वा।

जहा णं भंते! वत्थे सादीए सपज्जवसिते, णो अणाईए अपज्जवसिते० तथा णं जीवा किं सादीया सपज्जवसिया? चतुभंगो, पुच्छा। गोयमा! अत्थेगतिया सादीया सप., चत्तारि वि भाणियव्वा।

से केणट्ठेणं०? गोयमा! नेरतिया तिरिक्खजोणिया मणुस्सा देवा गतिरागतिं पडुच्च सादीया सपज्जवसिया। सिद्धा गतिं पडुच्च सादीया अपज्जवसिया। भवसिद्धिया लद्धिं पडुच्च अणादीया सपज्जवसिया। अभवसिद्धिया संसारं पडुच्च अणादीया अपज्जवसिया भवंति। से तेणट्ठेणं०।

[२८३] कति णं भंते! कम्मपगडीओ पण्णत्ताओ? गोयमा! अट्ठ कम्मप्पगडीओ पण्णत्ताओ, तं जहा-णाणावरणिज्जं दंसणावरणिज्जं जाव अंतराइयं।

नाणावरणिज्जस्स णं भंते! कम्मस्स केवतियं कालं बंधिती पण्णत्ता? गोयमा! जहा. अंतोमुहुत्तं, उक्को० तीसं सागरोवमकोडाकोडीओ, तिण्णि य वाससहस्साइं अबाहा, अबाहूणिया कम्मट्ठिती कम्मनिसेओ।

एवं दरिसणावरणिज्जं पि।

वेदणिज्जं जहा. दो समया, उक्को. जहा नाणावरणिज्जं।

मोहणिज्जं जहा. अंतोमुहुत्तं, उक्को. सत्तरि सागरोवमकोडाकोडीओ सत्त य वाससहस्साणि अबाधा, अबाहूणिया कम्मठिई कम्मनिसेगो।

आउगं जहन्नेणं अंतोमुहुत्तं, उक्को. तेतीसं सागरोवमाणि पुत्वकोडितिभागमव्हियाणि, कम्मट्ठिती कम्मनिसेओ।

नाम-गोयाणं जह.अट्ठ मुहुत्ता, उक्को वीसं सागरोवमकोडाकोडीओ, दोण्णि य वाससहस्साणि अबाहा, अबाहूणिया कम्मट्ठिती कम्मनिसेओ।

अंतराइयं जहा नाणावरणिज्जं।

[२८४] नाणावरणिज्जं णं भंते! कम्मं किं इत्थी बंधति, पुरिसो बंधति, नपुंसओ बंधति, णोइत्थी-नोपुरिसो-नोनपुंसओ बंधइ ? गोयमा! इत्थी वि बंधइ, पुरिसो वि बंधइ, नपुंसओ वि बंधइ, नोइत्थी-

नोपुरिसोनोनपुंसओ सिय बंधइ, सिय नो बंधइ।

एवं आउगवज्जाओ सत कम्मप्पगडीओ।

आउगं णं भंते! कम्मं किं इत्थी बंधइ, पुरिसो बंधइ, नपुंसओ बंधइ? पुच्छा। गोयमा! इत्थी सिय बंधइ सिय नो बंधइ, एवं तिण्णि वि भाणियत्त्वा। नोइत्थीनोपुरिसोनोनपुंसओ न बंधइ।

णाणावरणिज्जं णं भंते! कम्मं किं संजते बंधइ, असंजते बंधइ, संजयासंजए बंधइ, नोसंजएनोअसंजएनोसंजयासंजए बंधति? गोयमा! संजए सिय बंधति सिय नो बंधति, असंजए बंधइ, संजयासंजए वि बंधइ, नोसंजएनोअसंजएनोसंजयासंजए न बंधति।

एवं आउगवज्जाओ सत वि।

आउगे हेट्ठिल्ला तिण्णि भयणाए, उवरिल्ले ण बंधइ।

णाणावरणिज्जं णं भंते! कम्मं किं सम्मद्धिट्ठी बंधइ, मिच्छद्धिट्ठी बंधइ, सम्मामिच्छद्धिट्ठी बंधइ? गोयमा! सम्मद्धिट्ठी सिय बंधइ सिय नो बंधइ, मिच्छद्धिट्ठी बंधइ, सम्मामिच्छद्धिट्ठी बंधइ।

एवं आउगवज्जाओ सत वि।

आउए हेट्ठिल्ला दो भयणाए, सम्मामिच्छद्धिट्ठी न बंधइ।

णाणावरणिज्जं किं सण्णी बंधइ, असण्णी बंधइ, नोसण्णीनोअसण्णी बंधइ? गोयमा! सण्णी सिय बंधइ सिय नो बंधइ, असण्णी बंधइ, नोसण्णीनोअसण्णी न बंधइ।

एवं वेदणिज्जाऽऽउगवज्जाओ छ कम्मप्पगडीओ।

वेदणिज्जं हेट्ठिल्ला दो बंधति, उवरिल्ले भयणाए। आउगं हेट्ठिल्ला दो भयणाए, उवरिल्ले न बंधइ।

णाणावरणिज्जं कम्मं किं भवसिद्धीए बंधइ, अभवसिद्धीए बंधइ, नोभवसिद्धीएनोअभवसिद्धीए बंधति? गोयमा! भवसिद्धीए भयणाए, अभवसिद्धीए बंधति, नोभवसिद्धीएनोअभवसिद्धीए ण।

एवं आउगवज्जाओ सत वि।

आउगं हेट्ठिल्ला दो भयणाए, उवरिल्लो न बंधइ।

णाणावरणिज्जं किं चक्खुदंसणी बंधति, अचक्खुदंस., ओहिदंस., केवदंस.? गोयमा! हेट्ठिल्ला तिण्णि भयणाए, उवरिल्ले ण बंधइ।

एवं वेदणिज्जवज्जाओ सत वि।

वेदणिज्जं हेट्ठिल्ला तिण्णि बंधति, केवलदंसणी भयणाए।

णाणावरणिज्जं कम्मं किं पज्जतओ बंधइ, अपज्जतओ बंधइ, नोपज्जतएनोअपज्जतए बंधइ? गोयमा! पज्जतए भयणाए, अपज्जतए बंधइ, नोपज्जतएनोअपज्जतए न बंधइ।

एवं आउगवज्जाओ।

आउगं हेट्ठिल्ला दो भयणाए, उवरिल्ले ण बंधइ।

णाणावरणिज्जं किं भासए बंधइ, अभासए.? गोयमा! दो वि भयणाए।

एवं वेदणिज्जवज्जाओ सत।

वेदणिज्जं भासए बंधइ, अभासए भयणाए।

णाणावरणिज्जं किं परित्ते बंधइ, अपरित्ते बंधइ, नोपरित्तेनोअपरित्ते बंधइ? गोयमा! परित्ते

भयणाए, अपरिते बंधइ, नोपरितेनोअपरिते न बंधइ।

एवं आउगवज्जाओ सत्त कम्मपगडीओ।

आउए परितो वि, अपरितो वि भयणाए। नोपरितेनोअपरितो न बंधइ।

णाणावरणिज्जं कम्मं किं आभिणिबोहियनाणी बंधइ, सुयनाणी., ओहिनाणी., मणपज्जवनाणी., केवलनाणी बं.? गोयमा! हेट्ठिल्ला चत्तारि भयणाए, केवलनाणी न बंधइ।

एवं वेदणिज्जवज्जाओ सत्त वि।

वेदणिज्जं हेट्ठिल्ला चत्तारि बंधंति, केवलनाणी भयणाए।

णाणावरणिज्जं किं मतिअण्णाणी बंधइ, सुय., विभंग.? गोयमा! आउगवज्जाओ सत्त वि बंधंति। आउगं भयणाए।

णाणावरणिज्जं किं मणजोगी बंधइ, वय., काय., अजोगी बंधइ? गोयमा! हेट्ठिल्ला तिण्णि भयणाए, अजोगी न बंधइ।

एवं वेदणिज्जवज्जाओ।

वेदणिज्जं हेट्ठिल्ला बंधंति, अजोगी न बंधइ।

णाणावरणिज्जं किं सागारोवउत्ते बंधइ, अणागारोवउत्ते बंधइ? गोयमा! अट्ठसु वि भयणाए।

णाणावरणिज्जं किं आहारए बंधइ, अणाहारए बंधइ? गोयमा! दो वि भयणाए।

एवं वेदणिज्ज-आउगवज्जाणं छण्हं।

वेदणिज्जं आहारए बंधंति, अणाहारए भयणाए। आउगं आहारए भयणाए, अणाहारए न बंधंति।

णाणावरणिज्जं किं सुहुमे बंधइ, बादरे बंधइ, नोसुहुमेनोबादरे बंधइ? गोयमा! सुहुमे बंधइ, बादरे भयणाए, नोसुहुमेनोबादरे न बंधइ।

एवं आउगवज्जाओ सत्त वि।

आउए सुहुमे बादरे भयणाए, नोसुहुमेनोबादरे ण बंधइ।

णाणावरणिज्जं किं चरिमे बंधंति, अचरिमे बं.? गोयमा! अट्ठ वि भयणाए।

**[२८५]**एएसि णं भंते! जीवाणं इत्थिवेदगाणं पुरिसवेदगाणं नपुंसगवेदगाणं अवेदगाण य कयरे २ अप्पा वा ४? गोयमा! सव्वत्थोवा जीवा पुरिसवेदगा, इत्थिवेदगा संखेज्जगुणा, अवेदगा अणंतगुणा, नपुंसगवेदगा अणंतगुणा।

एतेसिं सव्वेसिं पदाणं अप्पबहुगाइं उच्चारेयव्वाइं जाव सव्वत्थोवा जीवा अचरिमा, चरिमा अणंतगुणा।

सेवं भंते! सेवं भंते! ति.।

**\*छट्ठे सए तइओ उद्देशो समतो\***

**० चउत्थो उद्देशो ०**

**[२८६]**जीवे णं भंते! कालादेसेणं किं सपदेसे, अपदेसे? गोयमा! नियमा सपदेसे।

नेरतिए णं भंते! कालादेसेणं किं सपदेसे, अपदेसे? गोयमा! सिय सपदेसे, सिय अपदेसे।

एवं जाव सिद्धे।

जीवा णं भंते! कालादेसेणं किं सपदेसा, अपदेसा? गोयमा! नियमा सपदेसा।

नेरइया णं भंते! कालादेसेणं किं सपदेसा, अपदेसा? गोयमा! सत्वे वि ताव होज्ज सपदेसा, अहवा सपदेसा य अपदेसे य, अहवा सपदेसा य अपदेसा य।

एवं जाव थणियकुमारा।

पुढविकाइया णं भंते! किं सपदेसा, अपदेसा? गोयमा! सपदेसा वि, अपदेसा वि।

एवं जाव वणप्फतिकाइया।

सेसा जहा नेरइया तहा जाव सिद्धा।

आहारगाणं जीवेगिंदियवज्जो तियभंगो।

अणाहारगाणं जीवेगिंदियवज्जा छब्भंगा एवं भाणियच्चा-सपदेसा वा, अपएसा वा, अहवा सपदेसे य अपदेसे य, अहवा सपदेसे य अपदेसा य, अहवा सपदेसा य अपदेसे य, अहवा सपदेसा य अपदेसा य। सिद्धेहिं तियभंगो।

भवसिद्धीया अभवसिद्धीया जहा ओहिया।

नोभवसिद्धियनोअभवसिद्धिया जीव-सिद्धेहिं तियभंगो।

सण्णीहिं जीवादिओ तियभंगो।

असण्णीहिं एगिंदियवज्जो तियभंगो। नेरइय-देव-मणुएहिं छब्भंगा।

नोसण्णिनोअसण्णिणो जीव-मणुय-सिद्धेहिं तियभंगो।

सलेसा जहा ओहिया। कणहलेस्सा नीललेस्सा काउलेस्सा जहा आहारओ, नवरं जस्स अत्थि एयाओ। तेउलेस्साए जीवादिओ तियभंगो, नवरं पुढविकाइएसु आउ-वणप्फतीसु छब्भंगा। पम्हलेस-सुक्कलेस्साए जीवाइओ तियभंगो।

अलेसेहिं जीव-सिद्धेहिं तियभंगो मणुएसु छब्भंगा।

सम्मद्धिट्ठीहिं जीवाइओ तियभंगो। विगलिंदिएसु छब्भंगा।

मिच्छद्धिट्ठीहिं एगिंदियवज्जो तियभंगो।

सम्मामिच्छद्धिट्ठीहिं छब्भंगा।

संजतेहिं जीवाइओ तियभंगो।

असंजतेहिं एगिंदियवज्जो तियभंगो।

संजतासंजतेहिं तियभंगो जीवादिओ।

नोसंजयनोअसंजयनोसंजतासंजत जीव-सिद्धेहिं तियभंगो।

सकसाईहिं जीवादिओ तियभंगो। एगिंदिएसु अभंगकं। कोहकसाईहिं जीवेगिंदियवज्जो तियभंगो। देवेहिं छब्भंगा। माणकसाई मायाकसाई जीवेगिंदियवज्जो तियभंगो। नेरतिय-देवेहिं छब्भंगा। लोभकसायीहिं जीवेगिंदियवज्जो तियभंगो।

नेरतिएसु छब्भंगा।

अकसाई जीव-मणुएहिं सिद्धेहिं य तियभंगो।

ओहियनाणे आभिणिबोहियनाणे सुयनाणे जीवादिओ तियभंगो। विगलिंदिएहिं छब्भंगा।

ओहिनाणे मणपज्जवणाणे केवलनाणे जीवादिओ तियभंगो।

ओहिए अण्णाणे मतिअण्णाणे सुयअण्णाणे एगिंदियवज्जो तियभंगो। विभंगणाणे जीवादिओ तियभंगो।

सजोगी जहा ओहिओ। मणजोगी वयजोगी कायजोगी जीवादिओ तियभंगो, नवरं कायजोगी एगिंदिया तेसु अभंगकं।

अजोगी जहा अलेसा।

सागारोवउत्त-अणागारोवउत्तेहिं जीवेगिंदियवज्जो तियभंगो।

सवेयगा य जहा सकसाई। इत्थिवेयग-पुरिसवेदग-नपुंसगवेदगेसु जीवादिओ तियभंगो, नवरं नपुंसगवेदे एगिंदिएसु अभंगयं।

अवेयगा जहा अकसाई।

ससरीरी जहा ओहिओ। ओरालिय-वेउच्चियसरीरीणं जीवएगिंदियवज्जो तियभंगो। आहारगसरीरे जीव-मणुएसु छब्भंगा। तेयग-कम्मगाणं जहा ओहिया।

असरीरेहिं जीव-सिद्धेहिं तियभंगो।

आहारपज्जतीए सरीरपज्जतीए इंदियपज्जतीए आणापाणपज्जतीए जीवेगिं दियवज्जो तियभंगो। भासामणपज्जतीए जहा सण्णी।

आहारअपज्जतीए जहा अणाहारगा। सरीरअपज्जतीए इंदियअपज्जतीए आणापाणअपज्जतीए जीवेगिंदियवज्जो तियभंगो, नेरइय-देव-मणुएहिं छब्भंगा। भासामणअपज्जतीए जीवादिओ तियभंगो, नेरइय-देव-मणुएहिं छब्भंगा।

[२८७] सपदेसाऽऽहारग भविय सण्णि लेस्सा दि संजय कसाए।

णाणे जोगुवओगे वेदे य सरीर पज्जती।।

[२८८] जीवा णं भंते! किं पच्चक्खाणी, अपच्चक्खाणी, पच्चक्खाणापच्चक्खाणी? गोयमा! जीवा पच्चक्खाणी वि, अपच्चक्खाणी वि, पच्चक्खाणाऽपच्चक्खाणी वि।

सव्वजीवाणं एवं पुच्छा। गोयमा! नेरइया अपच्चक्खाणी जाव चउरिंदिया, सेसा दे पडिसेहेयव्वा। पंचेदियतिरिक्खजोणिया नो पच्चक्खाणी, अपच्चक्खाणी वि, पच्चक्खाणापच्चक्खाणी वि। मणुस्सा तिण्णि वि। सेसा जहा नेरतिया।

जीवा णं भंते! किं पच्चक्खाणं जाणंति, अपच्चक्खाणं जाणंति, पच्चक्खाणापच्चक्खाणं जाणंति? गोयमा! जे पंचेदिया ते तिण्णि वि जाणंति, अवसेसा पच्चक्खा[ण-अपच्चक्खाणपच्चक्खाणा-पच्चक्खा]णं न जाणंति।

जीवा णं भंते ! किं पच्चक्खाणं कुव्वंति अपच्चक्खाणं कुव्वंति, पच्चक्खाणा-पच्चक्खाणं कुव्वंति? जहा ओहिया तहा कुव्वणा।

जीवा णं भंते! किं पच्चक्खाणनिव्वत्तियाउया, अपच्चक्खाणनि., पच्चक्खाणापच्चक्खाणनि.? गोयमा! जीवा य वेमाणिया य पच्चक्खाणणिव्वत्तियाउया तिण्णि वि। अवसेसा अपच्चक्खाण- निव्वत्तियाउया।

[२८९] पच्चक्खाणं जाणइ कुच्चति तेणेव आउनिच्चती ।

सपदेसुद्देशम्मि य एमेए दंडगा चउरो ॥

[२९०]सेवं भंते! सेवं भंते! ति.।

**\*छट्ठे सए चउत्थो उद्देशो समतो\***

## ० पंचमो उद्देशो ०

[२९१]किमियं भंते! तमुक्काए ति पवुच्चइ? किं पुढवी तमुक्काए ति पवुच्चति, आऊ तमुक्काए ति पवुच्चति? गोयमा! नो पुढवी तमुक्काए ति पवुच्चति, आऊ तमुक्काए ति पवुच्चति।

से केणट्ठेणं.? गोयमा! पुठविकाए णं अत्थेगइए सुभे देसं पकासेति, अत्थेगइए देसं नो पकासेइ, से तेणट्ठेणं।

तमुक्काए णं भंते! कहिं समुट्ठिणं? कहिं सन्निट्ठिते? गोयमा! जंबुद्वीवस्स दीवस्स बहिया तिरियमसंखेज्जे दीव-समुद्दे वीतिवइत्ता अरुणवरस्स दीवस्स बाहिरिल्लाओ वेतियंताओ अरुणोदयं समुद्धं बायालीसं जोयणसहस्साणि ओगाहिता उवरिल्लाओ जलंताओ एकपदेसियाए सेठीए इत्थ णं तुमुक्काए समुट्ठिणं; सत्तरस एककवीसे जोयणसते उद्धं उप्पत्तिता तओ पच्छा तिरियं पवित्थरमाणे पवित्थरमाणे सोहम्मिसाण-सणंकुमार-माहिंदे चत्तारि वि कप्पे आवरित्ताणं उद्धं पि य णं जाव बंभलोगे कप्पे रिट्ठविमाणपत्थडं संपत्ते, एत्थ णं तमुक्काए सन्निट्ठिते।

तमुक्काए णं भंते! किंसंठिए पण्णत्ते? गोयमा! अहे मल्लगमूलसंठिते, उप्पिं कुक्कुडगपंजरगसंठिए पण्णत्ते।

तमुक्काए णं भंते! केवतियं विक्खंभेणं? केवतियं परिक्खेवेणं पण्णत्ते? गोयमा! दुविहे पण्णत्ते, तं जहा-संखेज्जवित्थडे य असंखेज्जवित्थडे य। तत्थ णं जे से संखेज्ज

वित्थडे से णं संखेज्जाइं जोयणसहस्साइं विक्खंभेणं, असंखेज्जाइं जोयणसहस्साइं परिक्खेवेणं प०। तत्थ णं जे से असंखिज्जवित्थडे से णं असंखेज्जाइं जोयणसहस्साइं विक्खंभेणं, असंखेज्जाइं जोयणसहस्साइं परिक्खेवेणं।

तमुक्काए णं भंते! केमहालए प.? गोयमा! अयं णं जंबुद्वीवे २ जाव परिक्खेवेणं पण्णत्ते। देवे णं महिड्डीए जाव 'इणामेव इणामेव'ति कट्टु केवलकप्पं जंबुद्वीवं दीवं तिहिं अच्छरानिवाएहिं तिसत्तखुतो अणुपरियट्ठित्ताणं हव्वमागच्छिज्जा। से णं देवे ताए उक्किट्ठाए तुरियाए जाव देवगइए वीईवयमाणे वीईवयमाणे जाव एकाहं वा दुयाहं वा तियाहं वा उक्कोसेणं छम्मासे वीतीवएज्जा, अत्थेगइयं तमुकायं वीतीवएज्जा, अत्थेगइयं तमुकायं नो वीतीवएज्जा। एमहालए णं गोतमा! तमुक्काए पन्नत्ते।

अत्थि णं भंते! तमुकाए गेहा ति वा, गेहावणा ति वा? णो इणट्ठे समट्ठे।

अत्थि णं भंते! तमुकाए गामा ति वा जाव सन्निवेसा ति वा? णो इणट्ठे समट्ठे।

अत्थि णं भंते! तमुक्काए ओराला बलाहया संसेयंति सम्मुच्छंति, वासं वासंति? हंता, अत्थि।

तं भंते! किं देवो पकरेति, असुरो पकरेति, नागो पकरेति? गोयमा! देवो वि पकरेति, असुरो वि पकरेति, नागो वि पकरेति।

अत्थि णं भंते! तमुकाए बादरे थणियसद्दे, बायरे विज्जुए? हंता, अत्थि।

तं भंते! किं देवो पकरेति ३ ? तिण्णि वि पकरेति।

अत्थि णं भंते! तमुकाए बादरे पुढविकाए, बादरे अगणिकाए? णो तिणट्ठे समट्ठे, णन्नत्थ विग्गहगतिसमावन्नएणं।

अत्थि णं भंते! तमुकाए चंदिम-सूरिय-गहगण-णक्खत्त-तारारूवा? णो तिणट्ठे समट्ठे, पलिपस्सतो पुण अत्थि।

अत्थि णं भंते! तमुकाए चंदाभा ति वा, सूरभा ति वा? णो तिणट्ठे समट्ठे, कादूसणिया पुण सा।

तमुक्काए णं भंते! केरिसए वण्णेणं पण्णते? गोयमा! काले कालोभासे गंभीरलोमहरिसजणणे भीमे उतासणए परमकिण्हे वण्णेणं पण्णते। देवे वि णं अत्थेगतिए जे णं तप्पढमताए पासिता णं खभाएज्जा, अहे णं अभिसमागच्छेज्जा, ततो पच्छा सीहं सीहं तुरियं तुरियं खिप्पामेव वीतीवएज्जा।

तमुकायस्स णं भंते! कति नामधेज्जा पण्णता? गोयमा! तेरस नामधेज्जा पण्णता, तं जहा-तमे ति वा, तमुकाए ति वा, अंधकारे इ वा, महंधकारे इ वा, लोगंधकारे इ वा, लोगतमिस्से इ वा, देवंधकारे ति वा, देवतमिस्से ति वा, देवारण्णे ति वा, देववूहे ति वा, देवफलिहे ति वा, देवपडिक्खोभे ति वा, अरुणोदए ति वा समुद्दे।

तमुकाए णं भंते! किं पुढविपरिणामे आउपरिणामे जीवपरिणामे पोग्गलपरिणामे? गोयमा! नो पुढविपरिणामे, आउपरिणामे वि, जीवपरिणामे वि, पोग्गलपरिणामे वि।

तमुकाए णं भंते! सव्वे पाणा भूता जीवा सत्ता पुढविकाइयत्ताए जाव तसकाइयत्ताए उववन्नपुच्चा? हंता, गोयमा!

असइं अदुवा अणंतखुत्तो, णो चेव णं बादरपुढविकाइयत्ताए वा, बादरअगणिकाइयत्ताए वा।

**[२९२]** कति णं भंते! कण्हराईओ पण्णताओ? गोयमा! अट्ठ कण्हराईओ पण्णताओ।

कहिं णं भंते! एयाओ अट्ठ कण्हराईओ पण्णताओ? गोयमा! उप्पिं सणंकुमार-माहिंदाणं कप्पाणं, हत्विं बंभलोगे कप्पे रिट्ठे विमाणपत्थडे, एत्थ णं अक्खाडग-समचउरंससंठाणसंठियाओ अट्ठ कण्हराईओ पण्णताओ, तं जहापुरत्थिमेणं दो, पच्चत्थिमेणं दो, दाहिणेणं दो, उत्तरेणं दो। पुरत्थिमब्भंतरा कण्हराई दाहिणबाहिरं कण्हराइं पुट्ठा, दाहिणब्भंतरा कण्हराई पच्चत्थिमबाहिरं कण्हराइं पुट्ठा, पच्चत्थिमब्भंतरा कण्हराई उत्तरबाहिरं कण्हराइं पुट्ठा, उत्तरब्भंतरा कण्हराई पुरत्थिमबाहिरं कण्हराइं पुट्ठा। दो पुरत्थिमपच्चत्थिमाओ बाहिराओ कण्हराईओ छलंसाओ, दो उत्तरदाहिणबाहिराओ कण्हराईओ तंसाओ, दो पुरत्थिमपच्चत्थिमाओ अब्भंतराओ कण्हराईओ चउरंसाओ, दो उत्तरदाहिणाओ अब्भंतराओ कण्हराईओ चउरंसाओ।

**[२९३]** पुच्चावरा छलंसा, तंसा पुण दाहिणुत्तरा बज्झा।

अब्भंतर चउरंसा सव्वा वि य कण्हराईओ ॥

**[२९४]** कण्हराईओ णं भंते! केवतियं आयामेणं, केवतियं विक्खंभेणं, केवतियं परिक्खेवेणं पण्णताओ? गोयमा! असंखेज्जाइं जोयणसहस्साइं आयामेणं, असंखेज्जाइं जोयणसहस्साइं विक्खंभेणं, असंखेज्जाइं जोयणसहस्साइं परिक्खेवेणं पण्णताओ।

कण्हराईओ णं भंते! केमहालियाओ पण्णताओ? गोयमा! अयं णं जंबुद्वीवे दीवे जाव अद्धमासं

वीतीवएज्जा। अत्थेगतियं कण्हराइं वीतीवएज्जा, अत्थेगइयं कण्हराइं ण वीतीवएज्जा। एमहालियाओ णं गोयमा! कण्हराइंओ पण्णत्ताओ।

अत्थि णं भंते! कण्हराइंसु गेहा ति वा, गेहावणा ति वा? नो इणट्ठे समट्ठे।

अत्थि णं भंते! कण्हराइंसु गामा ति वा.? णो इणट्ठे समट्ठे।

अत्थि णं भंते! कण्ह. ओराला बलाहया सम्मुच्छंति ३? हंता, अत्थि।

तं भंते! किं देवो प० ३? गोयमा! देवो पकरेति, नो असुरो, नो नागो य।

अत्थि णं भंते! कण्हराइंसु बादरे थणियसद्धे? जहा ओराला तथा।

अत्थि णं भंते! कण्हराइंसु बादरे आउकाए बादरे अगणिकाए बायरे वणप्फतिकाए? णो इणट्ठे समट्ठे, णऽण्णत्थ विग्गहगतिसमावन्नएणं।

अत्थि णं भंते! चंदिमसूरिय. ४ प०? णो इणट्ठे समट्ठे ।

अत्थि णं कण्ह. चंदाभा ति वा २ ? णो इणट्ठे समट्ठे।

कण्हराइंओ णं भंते! केरिसियाओ वण्णेणं पन्नत्ताओ? गोयमा! कालाओ जाव खिप्पामेव वीतीवएज्जा।

कण्हराइंणं भंते! कति नामधेज्जा पण्णत्ता ? गोयमा! अट्ठ नामधेज्जा पण्णत्ता, तं जहा- कण्हराइं ति वा, मेहराई ति वा, मघा इ वा, माघवती ति वा, वातफलिहा ति वा, वातपल्लिखोभा इ वा, देवफलिहा इ वा, देवपल्लिखोभा ति वा।

कण्हराइंओ णं भंते! किं पुढविपरिणामाओ, आउपरिणामाओ, जीवपरिणामाओ, पुग्गल परिणामाओ? गोयमा! पुढविपरिणामाओ, नो आउपरिणामाओ, जीवपरिणामाओ वि, पुग्गलपरिणामाओ वि।

कण्हराइंसु णं भंते! सव्वे पाणा भूया जीवा सत्ता उववन्नपुव्वा? हंता, गोयमा! असइं अदुवा अणंतखुतो, नो चेव णं बादरआउकाइयताए, बादरअगणिकाइयताए, बादरवणस्सतिकाइयताए वा।

**[२९५]** एएसिं णं अट्ठण्हं कण्हराइंणं अट्ठसु ओवासंतरेसु अट्ठ लोगंतियविमाणा पण्णत्ता, तं जहा-अच्ची अच्चिमाली वइरोयणे पभंकरे चंदाभे सूराभे सुक्काभे सुपतिट्ठाभे, मज्झे रिट्ठाभे।

कहि णं भंते! अच्ची विमाणे प०? गोयमा! उत्तरपुरत्थिमेणं।

कहिं णं भंते! अच्चिमाली विमाणे प०? गोयमा! पुरत्थिमेणं।

एवं परिवाडीए नेयव्वं जाव कहि णं भंते! रिट्ठे विमाणे पण्णत्ते? गोयमा! बहुमज्झदेसभागे।

एतेसु णं अट्ठसु लोगंतियविमाणेसु अट्ठविहा लोगंतिया देवा परिवसंति, तं जहा-

**[२९६]** सारस्सयमात्तिच्चा वण्ही वरुणा य गद्धतोया य।

तुसिया अच्चाबाहा अग्गिच्चा चेव रिट्ठा य ॥

**[२९७]** कहि णं भंते! सारस्सता देवा परिवसंति? गोयमा! अच्चिम्मि विमाणे परिवसंति।

कहि णं भंते! आदिच्चा देवा परिवसंति? गोयमा! अच्चिमालिम्मि विमाणे०।

एवं नेयव्वं जहाणुपुव्वीए जाव कहि णं भंते! रिट्ठा देवा परिवसंति? गोयमा! रिट्ठम्मि विमाणे।

सारसस्य-मादिच्चाणं भंते! देवाणं कति देवा, कति देवसता पण्णत्ता?

गोयमा! सत्त देवा, सत्त देवसया परिवारो पण्णत्तो।

वण्ही-वरुणाणं देवाणं चउद्दस देवा, चउद्दस देवसहस्सा परिवारो पण्णतो।  
गद्धतोय-तुसियाणं देवाणं सत्त देवा, सत्त देवसहस्सा परिवारो पण्णतो।  
अवसेसाणं नव देवा, नव देवसया परिवारो पण्णतो।

[२९८] पढमजुगलम्मि सत्त उ सयाणि बीयम्मि चोद्दस सहस्सा।  
ततिए सत्त सहस्सा नव चेव सयाणि सेसेसु ॥ य

[२९९] लोगंतिगविमाणा णं भंते! किंपतिट्ठिता पण्णत्ता?

गोयमा! वाउपतिट्ठिया पण्णत्ता।

एवं नेयव्वं-विमाणाणं पतिट्ठाणं बाहल्लुच्चत्तमेव संठाणं। बंभलोयवत्तव्वया नेयव्वा जाव  
हंता गोयमा! असतिं अदुवा अणंतखुत्तो, नो चेव णं देवित्ताए।

लोगंतिगविमाणेसु लोगंतियदेवाणं भंते! केवतियं कालं ठिती पण्णत्ता! गोयमा! अट्ठ  
सागरोवमाइं ठिती पण्णत्ता।

लोगंतिगविमाणेहिंतो णं भंते! केवतियं अबाहाए लोगंते पण्णत्ते? गोयमा! असंखेज्जाइं  
जोयणसहस्साइं अबाहाए लोगंते पण्णत्ते।

सेवं भंते! सेवं भंते! ति।

**\*छट्ठे सए पंचमो उद्देशो समतो \***

**० छट्ठो उद्देशो ०**

[३००] कति णं भंते! पुढवीओ पण्णत्ताओ?

गोयमा ! सत्त पुढवीओ पण्णत्ताओ, तं जहा- रयणप्पभा जाव तमतमा। रयणप्पभादीणं  
आवासा भाणियव्वा जाव अहेसत्तमाए।

एवं जे जत्तिया आवासा ते भाणियव्वा जाव कति णं भंते! अणुत्तरविमाणा पण्णत्ता? गोयमा!  
पंच अणुत्तरविमाणा पण्णत्ता, तं जहा-विजए जाव सव्वट्ठसिद्धे।

[३०१] जीवे णं भंते! मारणंतियसमुग्घाएणं समोहते, समोहन्निता जे भविए इमीसे  
रयणप्पभाए पुढवीए तीसाए निरयावाससयसहस्सेसु अन्नतरंसि निरयावासंसि नेरइयत्ताए उववज्जित्तए से  
णं भंते! तत्थगते चेव आहारेज्ज वा, परिणामेज्ज वा, सरीरं वा बंधेज्जा?

गोयमा! अत्थेगइए तत्थगते चेव आहारेज्ज वा, परिणामेज्ज वा, सरीरं वा बंधेज्ज, अत्थेग  
इए ततो पडिनियत्तति, ततो पडिनियत्तिता इहमागच्छति, इहमागच्छिता दोच्चं पि मारणंतियसमुग्घाएणं  
समोहणति, समोहणित्ता इमीसे रयणप्पभाए पुढवीए तीसाए निरयावाससयसहस्सेसु अन्नतरंसि निरया-  
वासंसि नेरइयत्ताए उववज्जित्तए ततो पच्छा आहारेज्ज वा परिणामेज्ज वा सरीरं वा बंधेज्जा।

एवं जाव अहेसत्तमा पुढवी।

जीवे णं भंते ! मारणंतियसमुग्घाएणं समोहए, २ जे भविए चउसट्ठीए असुरकुमारावाससय-  
सहस्सेसु अन्नतरंसि असुरकुमारावासंसि असुरकुमारताए उववज्जित्तए. जहा नेरइया तहा भाणियव्वा जाव  
थणियकुमारा।

जीवे णं भंते! मारणंतियसमुग्घाएणं समोहए, २ जे भविए असंखेज्जेसु पुढविकाइयावास-

सयसहस्सेसु अन्नयरंसि पुढविकाइयावासंसि पुढविकाइयताए उववज्जितए से णं भंते! मंदरस्स पव्वयस्स पुरत्थिमेणं केवतियं गच्छेज्जा, केवतियं पाउणेज्जा? गोयमा! लोयंतं गच्छेज्जा, लोयंतं पाउणिज्जा।

से णं भंते! तत्थगए चेव आहारेज्ज वा, परिणामेज्ज वा, सरीरं वा बंधेज्जा? गोयमा! अत्थेगइए तत्थगते चेव आहारेज्ज वा, परिणामेज्ज वा, सरीरं वा बंधेज्ज; अत्थेगइए ततो पडिनियत्तति, २ ता इहमागच्छइ, २ ता दोच्चं पि मारणंतियसमुग्घाएणं समोहण्णति, २ ता मंदरस्स पव्वयस्स पुरत्थिमेणं अंगुलस्स असंखेज्जतिभागमेतं वा संखेज्जति- भागमेतं वा, वालग्गं वा, वालग्गपुहंतं वा एवं लिक्खं जूयं जवं अंगुलं जाव जोयणकोडिं वा, जोयणकोडाकोडिं वा, संखेज्जेसु वा असंखेज्जेसु वा जोयणसहस्सेसु, लोगंते वा एगपदेसियं सेटिं मोत्तूण असंखेज्जेसु पुढविकाइयावाससयसहस्सेसु अन्नयरंसि पुढविकाइयावासंसि पुढविकाइयताए उववज्जेता तओ पच्छा आहारेज्ज वा, परिणामेज्ज वा, सरीरं वा बंधेज्जा।

जहा पुरत्थिमेणं मंदरस्स पव्वयस्स आलावगो भणिओ एवं दाहिणेणं, पच्चत्थिमेणं, उत्तरेणं, उइडे, अहे।

जहा पुढविकाइया तहा एगिंदियाणं सव्वेसिं एक्केक्कस्स छ आलावगा भाणियच्चा।

जीवे णं भंते! मारणंतियसमुग्घातेणं समोहते, २ ता जे भविए असंखेज्जेसु बैदियावाससयसहस्सेसु अन्नतरंसि बैदियावासंसि बेइंदियताए उववज्जितए से णं भंते! तत्थगते चेव. जहा नेरइया। एवं जाव अणुत्तरोववातिया।

जीवे णं भंते! मारणंतियसमुग्घातेणं समोहते, २ जे भविए पंचसु अणुत्तरेसु महतिमहालएसु महाविमाणेसु अन्नयरंसि अनुत्तरविमाणंसि अणुत्तरोववाइयदेवताए उववज्जितए, से णं भंते! तत्थगते चेव जाव आहारेज्ज वा, परिणामेज्ज वा, सरीरं वा बंधेज्जा।

सेवं भंते! सेवं भंते! ति.।।

**\*छट्ठे सए छट्ठो उद्देशो समतो \***

## ० सतमो उद्देशो ०

[३०२]अह णं भंते! सालीणं वीहीणं गोधूमाणं जवाणं जवजवाणं एतेसि णं धन्नाणं कोट्ठा-उत्ताणं पल्लाउत्ताणं मंचाउत्ताणं मालाउत्ताणं ओलित्ताणं लिताणं पिहित्ताणं मुद्धियाणं लंछियाणं केवतियं कालं जोणी संचिट्ठति?

गोयमा! जहन्नेणं अंतोमुहुतं उक्कोसेणं तिण्णि संवच्छराइं, तेण परं जोणी पमिलाति, तेण परं जोणी पविद्धंसति, तेण परं बीए अबीए भवति, तेण परं जोणिवोच्छेदे पन्नते समाणाउसो!।

अह भंते! कलाय-मसूर-तिल-मुग्ग-मास-निप्पाव-कुलत्थ-आलिसंदगसईण-पलिमंथगमादीणं एतेसि णं धन्नाणं.? जहा सालीणं तहा एयाण वि, नवरं पंच संवच्छराइं। सेसं तं चेव।

अह भंते! अयसि-कुसुंभग-कोद्धव-कंगु-वरग-रालग-कोदूसग-सणसरिसव-मूलाबीयमादीणं एतेसि णं धन्नाणं.? एताणि वि तहेव, नवरं सत्त संवच्छराइं। सेसं तं चेव।

[३०३] एगमेगस्स णं भंते! मुहुत्तस्स केवतिया ऊसासद्धा वियाहिया ? गोयमा! असंखेज्जाणं समयणं समुदय-समिति-समागमेणं सा एगा आवलिय ति पवुच्चइ, संखेज्जा आवलिया ऊसासो, संखेज्जा आवलिया निस्सासो।

[३०४] हट्ठस्स अणवगल्लस्स निरुवकिट्ठस्स जंतुणो।  
एगे ऊसासनीसासे, एस पाणु ति वुच्चति ॥

[३०५] सत्त पाणूणि से थोवे, सत्त थोवाइं से लवे।  
लवाणं सत्तहत्तरिए एस मुहुत्ते वियाहिते ॥

[३०६] तिण्णि सहस्सा सत्त य सयाइं तेवत्तरिं च ऊसासा।  
एस मुहुत्तो दिट्ठो सव्वेहिं अणंतनाणीहिं ॥

[३०७] एतेणं मुहुत्तपमाणेणं तीसमुहुत्तो अहोरत्तो, पण्णरस अहोरत्ता पक्खो, दो पक्खा मासो, दो मासा उऊ, तिण्णि उऊ अयणे, दो अयणा संवच्छरे, पंचसंवच्छरिए जुगे, वीसं जुगाइं वाससयं, दस वाससयाइं वाससहस्सं, सयं वाससहस्साइं वाससतसहस्सं, चउरासीतिं वाससतसहस्साणि से एगे पुव्वंगे, चउरासीतिं पुव्वंगसयसहस्साइं से एगे पुव्वे, एवं तुडिअंगे तुडिए, अडडंगे अडडे, अववंगे अववे, हूहूअंगे हूहूए, उप्पलंगे उप्पले, पउमंगे पउमे, नलिणंगे नलिणे, अत्थनिउरंगे अत्थनिउरे, अउअंगे अउए, पउअंगे पउए य, नउअंगे नउए य, चूलिअंगे चूलिया य, सीसपहेलिअंगे सीसपहेलिया। एताव ताव गणिए। एताव ताव गणियस्स विसए। तेण परं ओवमिए।

से किं तं ओवमिए? ओवमिए दुविहे पण्णते, तं जहा-पलिओवमे य, सागरोवमे य।

से किं तं पलिओवमे? से किं तं सागरोवमे?

[३०८] सत्थेण सुत्तिक्खेण वि छेतुं भेतुं च जं किर न सकका।

तं परमाणुं सिद्धा वदंति आदिं पमाणानं ॥

[३०९] अणंताणं परमाणुपोग्गलाणं समुदयसमितिसमागमेणं सा एगा उस्सण्हसण्हिया ति वा, सण्हसण्हिया ति वा, उड्डरेणू ति वा, तसरेणू ति वा, रहरेणू ति वा, वालग्गे ति वा, लिक्खा ति वा, जूया ति वा, जवमज्झे ति वा, अंगुले ति वा। अट्ठ उस्सण्हसण्हियाओ सा एगा सण्हसण्हिया, अट्ठ सण्हसण्हियाओ सा एगा उड्डरेणू अट्ठ उड्डरेणूओ सा एगा तसरेणू अट्ठ तसरेणूओ सा एगा रहरेणू अट्ठ रहरेणूओ से एगे देवकुरु-उत्तरकुरुगाणं मणूसाणं वालग्गे, एवं हरिवासरम्मग-हेमवत-एरण्णवताणं पुव्वविदेहाणं मणूसाणं अट्ठ वालग्गा सा एगा लिक्खा, अट्ठ लिक्खाओ सा एगा जूया, अट्ठ जूयाओ से एगे जवमज्झे, अट्ठ जवमज्झा से एगे अंगुले, एतेणं अंगुलपमाणेणं छ अंगुलाणि पादो, बारस अंगुलाइं विहत्थी, चउव्वीसं अंगुलाणि रयणी, अडयालीसं अंगुलाइं कुच्छी, छण्णउतिं अंगुलाणि से एगे दंडे ति वा, धणू ति वा, जूए ति वा, नालिया ति वा, अक्खे ति वा, मुसले ति वा, एतेणं धणुप्पमाणेणं दो धणुसहस्साइं गाउयं, चत्तारि गाउयाइं जोयणं, एतेणं जोयणप्पमाणेणं जे पल्ले जोयणं आयामविक्खंभेणं, जोयणं उड्डं उच्चत्तेणं तं तिउणं सविसेसं परिरएणं।

से णं एगाहिय-बेहिय-तेहिय उक्कोसं सत्तरत्तप्परूढाणं संसट्ठे सन्निचिते भरिते वालग्ग-कोडीणं, ते णं वालग्गे नो अग्गी दहेज्जा, नो वातो हरेज्जा, नो कुत्थेज्जा, नो परिविद्धंसेज्जा, नो पूत्तिताए हव्वमागच्छेज्जा। ततो णं वाससते वाससते गते एगमेणं वालग्गं अवहाय जावतिएणं कालेणं से पल्ले खीणे नीरए निम्मले निट्ठिते निल्लेवे अवहडे विसुद्धे भवति। से तं पलिओवमे।

[३१०] एतेसिं पल्लाणं कोडाकोडी हवेज्ज दसगुणिया।

तं सागरोवमस्स तु एकस्स भवे परीमाणं ॥

[३११]एणं सागरोवमपमाणेणं चत्तारि सागरोवमकोडाकोडीओ कालो सुसमसुसमा, तिण्णि सागरोवम कोडाकोडीओ कालो सुसमा, दो सागरोवमकोडाकोडीओ कालो सुसमदूसमा, एगा सागरोवम कोडाकोडी बायालीसाए वाससहस्सेहिं ऊणिया कालो दूसमसुसमा, एक्कवीसं वाससहस्साइं कालो दूसमा, एक्कवीसं वाससहस्साइं कालो दूसमदूसमा। पुणरवि उस्सप्पिणीए एक्कवीसं वाससहस्साइं कालो दूसमदूसमा । एक्कवीसं वाससहस्साइं जाव चत्तारि सागरोवमकोडाकोडीओ कालो सुसमसुसमा । दस सागरोवमकोडाकोडीओ कालो ओसप्पिणी। दस सागरोवमकोडाकोडीओ कालो उस्सप्पिणी। वीसं सागरोवम कोडाकोडीओ कालो ओसप्पिणी य उस्सप्पिणी य।

[३१२]जंबुद्दीवे णं भंते! दीवे इमीसे ओसप्पिणीए सुसमसुसमाए समाए उत्तमट्ठपताए भरहस्स वासस्स केरिसए आगारभावपडोगारे होत्था? गोतमा! बहुसमरमणिज्जे भू मिभागे होत्था, से जहानामए आलिंगपुक्खरे ति वा, एवं उत्तरकुरुवत्तव्वया नेयव्वा जाव आसयंति सयंति। तीसे णं समाए भारहे वासे तत्थ तत्थ देसे देसे तहिं तहिं बहवे उद्दाला कुद्दाला जाव कुसविकुसविसुद्धरुक्खमूला जाव छत्विहा मणूसा अणुसज्जित्था, तं जहा० -पम्हगंधा मियगंधा अममा तेयली सहा सणिंचारी । सेवं भंते! सेवं भंते! ति।

**\*छट्ठे सए सतमो उद्देशो समतो \***

## ० अट्ठमो उद्देशो ०

[३१३] कइ णं भंते! पुढवीओ पण्णत्ताओ? गोयमा! अट्ठ पुढवीओ पण्णत्ताओ, तं जहा-रयणप्पभा जाव ईसीपब्भारा।

अत्थि णं भंते! इमीसे रयणप्पभाए पुढवीए अहे गेहा ति वा गेहावणा ति वा? गोय मा! णो इणट्ठे समट्ठे।

अत्थि णं भंते! इमीसे रयणप्पभाए अहे गामा ति वा जाव सन्निवेसा ति वा? नो इणट्ठे समट्ठे।

अत्थि णं भंते! इमीसे रयणप्पभाए पुढवीए अहे उराला बलाहया संसेयंति, सम्मुच्छंति, वासं वासंति? हंता, अत्थि।

तिण्णि वि पकरंति-देवो वि पकरेति, असुरो वि प., नागो वि प०।

अत्थि णं भंते! इमीसे रयण. बादरे थणियसद्दे? हंता, अत्थि।

तिण्णि वि पकरंति।

अत्थि णं भंते! इमीसे रयणप्पभाए अहे बादरे अगणिकाए? गोयमा! नो इणट्ठे समट्ठे, नऽन्नत्थ विग्गहगतिसमावन्नएणं।

अत्थि णं भंते! इमीसे रयण. अहे चंदिम जाव तारारूवा? नो इणट्ठे समट्ठे।

अत्थि णं भंते! इमीसे रयणप्पभाए पुढवीए चंदाभा ति वा २ ? णो इणट्ठे समट्ठे।

एवं दोच्चाए वि पुढवीए भाणियव्वं।

एवं तच्चाए वि भाणियव्वं, नवरं देवो वि पकरेति, असुरो वि पकरेति, णो नागो पकरेति।

चउत्थीए वि एवं, नवरं देवो एक्को पकरेति, नो असुरो., नो नागो पकरेति।

एवं हेट्ठिल्लासु सव्वासु देवो एक्को पकरेति।

अत्थि णं भंते! सोहम्मसीसाणाणं कप्पाणं अहे गेहा इ वा २? नो इणट्ठे समट्ठे।

अत्थि णं भंते!० उराला बलाहया? हंता, अत्थि।

देवो पकरेति, असुरो वि पकरेइ, नो नाओ पकरेइ।

एवं थणियसद्धे वि।

अत्थि णं भंते!० बादरे पुढविकाए, बादरे अगणिकाए? नो इणट्ठे समट्ठे, नऽन्नत्थ विग्गहगतिसमावन्नएणं।

अत्थि णं भंते! चंदिम० ? णो इणट्ठे समट्ठे।

अत्थि णं भंते! गामा इ वा० ? णो इणट्ठे स०।

अत्थि णं भंते! चंदाभा ति वा २ ? गोयमा! णो इणट्ठे समट्ठे।

एवं सणंकुमार-माहिंदेसु, नवरं देवो एगो पकरेति।

एवं बंभलोए वि।

एवं बंभलोगस्स उवरिं सव्वहिं देवो पकरेति।

पुच्छियत्वे य बादरे आउकाए, बादरे तेउकाए, बायरे वणस्सतिकाए। अन्नं तं चेव। गाहा-

[३१४] तमुकाए कप्पपणए अगणी पुढवी य, अगणि पुढवीसु।

आऊ-तेउ-वणस्सति कप्पुवरिम-कणहराईसु ॥

[३१५] कतिविहे णं भंते! आउयबंधे पण्णत्ते? गोयमा! छव्विहे आउयबंधे पण्णत्ते, तं जहा-जातिनामनिहत्ताउए गतिनामनिहत्ताउए ठितिनामनिहत्ताउए ओगाहणानामनिहत्ताउए पदेसनामनिहत्ताउए अणुभागनामनिहत्ताउए।

एवं दंडओ जाव वेमाणियाणं।

जीवा णं भंते! किं जातिनामनिहत्ता गतिनामनिहत्ता जाव अणुभागनामनिहत्ता? गोतमा! जातिनामनिहत्ता वि जाव अणुभागनामनिहत्ता वि।

दंडओ जाव वेमाणियाणं।

जीवा णं भंते! किं जातिनामनिहत्ताउया जाव अणुभागनामनिहत्ताउया? गोयमा! जातिनामनिहत्ताउया वि जाव अणुभागनामनिहत्ताउया वि।

दंडओ जाव वेमाणियाणं।

एवमेए दुवालस दंडगा भाणियत्वा-जीवा णं भंते! किं जातिनामनिहत्ता, जातिनामनिहत्ताउया, जीवा णं भंते! किं जातिनामनिउत्ता, जातिनामनिउत्ताउया., जातिगोयनिहत्ता, जातिगोयनिहत्ताउया, जातिगोत्त-निउत्ता, जातिगोत्तनिउत्ताउया, जातिणामगोत्तनिहत्ता, जातिणामगोयनिहत्ताउया, जातिणामगोयनिउत्ता, जीवा णं भंते! किं जातिनामगोत्तनिउत्ताउया जाव अणुभागनामगोत्तनिउत्ताउया गोतमा! जातिनामगोयनिउत्ताउया वि जाव अणुभागनामगोत्तनिउत्ताउया वि।

दंडओ जाव वेमाणियाणं।

[३१६] लवणे णं भंते! समुद्धे किं उस्सिओदए, पत्थडोदए, खुभियजले, अखुभियजले? गोयमा! लवणे णं समुद्धे उस्सिओदए, नो पत्थडोदए; खुभियजले, नो अखुभियजले। एत्तो आढत्तं जहा जीवाभिगमे

जाव से तेणट्ठेणं गोयमा! बाहिरया णं दीव-समुद्दा पुण्णा पुण्णप्पमाणा वोलट्ठमाणा वोसट्ठमाणा समभरघडत्ताए चिट्ठंति, संठाणतो एगविहिंविहाणा, वित्थरओ अणेगविहिंविहाणा, दुगुणा दुगुणप्पमाणतो जाव अस्सिं तिरियलोए असंखेज्जा दीव-समुद्दा सयंभुरमणपज्जवसाणा पण्णत्ता समणाउसो!।

दीव-समुद्दा णं भंते! केवतिया नामधेज्जेहिं पण्णत्ता? गोयमा! जावतिया लोए सुभा नामा, सुभा रूवा, सुभा गंधा, सुभा रसा, सुभा फासा एवतिया णं दीव-समुद्दा नामधेज्जेहिं पण्णत्ता। एवं नेयच्वा सुभा नामा, उद्धारो परिणामो सच्चजीवाणं।

सेवं भंते! सेवं भंते! ति।

**\*छट्ठे सए अट्ठमो उद्देशो समतो \***

### ० नवमो उद्देशो ०

[३१७] जीवे णं भंते! णाणावरणिज्जं कम्मं बंधमाणे कति कम्मप्पगडीओ बंधइ? गोयमा! सत्तविहबंधए वा, अट्ठविहबंधए वा छत्विहबंधए वा। बंधुद्देशो पण्णवणाए नेयच्वो।

[३१८] देवे णं भंते! महिंढीए जाव महाणुभागे बाहिरए पोग्गले अपरियादिइत्ता पभू एगवण्णं एगरूवं विउच्चित्तए? गोयमा! नो इणट्ठे० समट्ठे।

देवे णं भंते! बाहिरए पोग्गले परियादिइत्ता पभू? हंता, पभू।

से णं भंते! किं इहगए पोग्गले परियादिइत्ता विउच्चित्ति, तत्थगए पोग्गले परियादिइत्ता विकुच्चित्ति, अन्नत्थगए पोग्गले परियादिइत्ता विउच्चित्ति? गोयमा! नो इहगते पोग्गले परियादिइत्ता विउच्चित्ति, तत्थगते पोग्गले परियादिइत्ता विकुच्चित्ति, नो अन्नत्थगए पोग्गले परियादिइत्ता विउच्चित्ति।

एवं एतेणं गमेणं जाव एगवण्णं एगरूवं, एगवण्णं अणेगरूवं, अणेगवण्णं एगरूवं, अणेगवण्णं अणेगरूवं, चउण्हं चउभंगो।

देवे णं भंते! महिंढीए जाव महाणुभागे बाहिरए पोग्गले अपरियादिइत्ता पभू कालगं पोग्गलं नीलगपोग्गलत्ताए परिणामित्तए? नीलगं पोग्गलं वा कालगपोग्गलत्ताए परिणामित्तए? गोयमा! नो इणट्ठे समट्ठे, परियादित्ता पभू।

से णं भंते! किं इहगए पोग्गले. तं चेव, नवरं परिणामेति ति भाणियच्चं।

एवं कालगपोग्गलं लोहियपोग्गलत्ताए।

एवं कालएणं जाव सुक्किलं।

एवं णीलएणं जाव सुक्किलं।

एवं लोहिएणं जाव सुक्किलं।

एवं हालिद्धएणं जाव सुक्किलं।

एवं एताए परिवाडीए गंध-रस-फास. कक्खडफासपोग्गलं मउयफासपोग्गलत्ताए। एवं दो दो गरुय-लहुय २, सीय-उसिण २, णिद्धलुक्ख २, वण्णाइ सच्चत्थ परिणामेइ। आलावगा य दो दो-पोग्गले अपरियाइत्ता, परियाइत्ता।

[३१९] अविस्सुद्धलेसे णं भंते! देवे असमोहतेणं अप्पाणेणं अविस्सुद्धलेसं देवं देविं अन्नयरं जाणति पासति? एवं अविस्सुद्धलेसे.

असमोहणं अप्पाणेणं विसुद्धलेसं देवं.? नो इणट्ठे समट्ठे २। णो इणट्ठे समट्ठे । एवं  
 अविमुद्धलेसे. असमोहणं अप्पाणेणं विसुद्धलेसं देवं.? नो इणट्ठे समट्ठे २। अविमुद्धलेसे.  
 समोहणं अप्पाणेणं अविमुद्धलेसं देवं.? नो इणट्ठे समट्ठे ३। अविमुद्धलेसे देवे समोहणं अप्पाणेणं  
 विसुद्धलेसं देवं.? नो इणट्ठे समट्ठे ४। अविमुद्धलेसे. समोहयासमोहणं अप्पाणेणं अविमुद्धलेसं देवं.? णो  
 इणट्ठे समट्ठे ५। अविमुद्धलेसे समोहयासमोहतेणं. विसुद्धलेसं देवं.? नो इणट्ठे समट्ठे ६। विसुद्धलेसे.  
 असमोहणं अप्पाणेणं अविमुद्धलेसं देवं.? नो इणट्ठे समट्ठे ७। विसुद्धलेसे. असमोहणं विसुद्धलेसं देवं.?  
 नो इणट्ठे समट्ठे ८। विसुद्धलेसे णं भंते! देवे समोहणं. अविमुद्धलेसं देवं. जाणइ.? हंता, जाणइ. ९। एवं  
 विसुद्धलेसे. समोहणं. विसुद्धलेसं देवं. जाणइ.? हंता, जाणइ. १०। विसुद्धलेसे. समोहयासमोहणं अप्पाणेणं  
 अविमुद्धलेसं देवं जाणइ २ ? हंता, जाणइ. ११। विसुद्धलेसे. समोहयासमोहणं अप्पाणेणं विसुद्धलेसं देवं.?  
 [हंता,] जाणइ. १२। एवं हेट्ठिल्लएहिं अट्ठहिं न जाणइ न पासइ, उवरिल्लएहिं चउहिं जाणइ पासइ।  
 सेवं भंते! सेवं भंते! ति.।

**\*छट्ठे सए नवमो उद्देशो समतो \***

### ० दसमो उद्देशो ०

[३२०]अन्नउत्थिया णं भंते! एवमाइक्खंति जाव परूवेति-जावतिया रायगिहे नयरे जीवा  
 एवतियाणं जीवाणं नो चक्किया केइ सुहं वा दुहं वा जाव कोलट्ठिगमातमवि निप्फावमातमवि  
 कलमायमवि मासमायमवि मुग्गमातमवि जूयामायमवि लिक्खामायमवि अभिनिवट्ठेता उवदंसितए, से  
 कहमेयं भंते! एवं? गोयमा! जं णं ते अन्नउत्थिया एवमाइक्खंति जाव मिच्छं ते एवमाहंसु, अहं पुण  
 गोतमा! एवमाइक्खामि जाव परूवेमि सव्वलोए वि य णं सव्वजीवाणं णो चक्किया केइ सुहं वा तं चव  
 जाव उवदंसितए।

से केणट्ठेणं.? गोयमा! अयं णं जंबुद्धीवे २ जाव विसेसाहिए परिक्खेवेणं पन्नते। देवे णं  
 महिद्धीए जाव महाणुभागे एगं महं सविलेवणं गंधसमुग्गं गहाय तं अवदालेति, तं अवदालिता जाव  
 इणामेव कट्ठु केवलकप्पं जंबुद्धीवं २ तिहिं अच्छरानिवातेहिं तिसत्तहुतो अणुपरियट्ठिताणं हव्वमागच्छेज्जा,  
 से नूणं गोतमा! से केवलकप्पे जंबुद्धीवे २ तेहिं घाणपोग्गलेहिं फुडे? हंता, फुडे। चक्किया णं गोतमा! केइ  
 तेसिं घाणपोग्गलाणं कोलट्ठियमायमवि जाव उवदंसितए? णो इणट्ठे समट्ठे। से तेणट्ठेणं जाव  
 उवदंसितए।

[३२१]जीवे णं भंते! जीवे? जीवे जीवे? गोयमा! जीवे ताव नियमा जीवे, जीवे वि नियमा  
 जीवे।

जीवे णं भंते! नेरइए? नेरइए जीवे? गोयमा! नेरइए ताव नियमा जीवे, जीवे पुण सिय  
 नेरइए, सिय अनेरइए।

जीवे णं भंते! असुरकुमारे? असुरकुमारे जीवे? गोतमा! असुरकुमारे ताव नियमा जीवे, जीवे  
 पुण सिय असुरकुमारे, सिय णो असुरकुमारे।

एवं दंडओ णेयव्वो जाव वेमाणियाणं।

जीवति भंते! जीवे? जीवे जीवति? गोयमा! जीवति ताव नियमा जीवे, जीवे पुण सिय जीवति

सिय नो जीवति।

जीवति भंते! नेरतिए? नेरतिए जीवति? गोयमा! नेरतिए ताव नियमा जीवति, जीवति, जीवति  
पुण सिय नेरतिए, सिय अनेरइए।

एवं दंडओ नेयव्वो जाव वेमाणियाणं।

भवसिद्धीए णं भंते! नेरइए? नेरइए भवसिद्धीए? गोयमा! भवसिद्धीए सिय नेरइए, सिय  
अनेरइए। नेरतिए वि य सिय भवसिद्धीए, सिय अभवसिद्धीए।

एवं दंडओ जाव वेमाणियाणं।

[३२२]अन्नउत्थिया णं भंते! एवमाइक्खंति जाव परूवेति-"एवं खलु सव्वे पाणा सव्वे भूया  
सव्वे जीवा सव्वे सत्ता एगंतदुक्खं वेदणं वेदंति से कहमेतं भंते! एवं? गोतमा! जं णं ते अन्नउत्थिया जाव  
मिच्छं ते एवमाहंसु। अहं पुण गोतमा! एवमाइक्खामि जाव परूवेमि-अत्थेगइया पाणा भूया जीवा सत्ता  
एगंतदुक्खं वेदणं वेदंति, आहच्च सातं। अत्थेगइया पाणा भूया जीवा सत्ता एगंतसातं वेदणं वेदंति, आहच्च  
असायं वेयणं वेदंति। अत्थेगइया पाणा भूया जीवा सत्ता वेमाताए वेयणं वेयंति, आहच्च सायमसायं।

से केणट्ठेणं.? गोयमा! नेरइया एगंतदुक्खं वेयणं वेयंति, आहच्च सातं। भवणवति-  
वाणमंतर-जोइस-वेमाणिया एगंतसातं वेदणं वेदंति, आहच्च असायं। पुढविककाइया जाव मणुस्सा वेमाताए  
वेदणं वेदंति, आहच्च सातमसातं। से तेणट्ठेणं।।

[३२३]नेरतिया णं भंते! जे पोग्गले अत्तमायाए आहारंति ते किं आयसरीरक्खेतोगाढे  
पोग्गले अत्तमायाए आहारंति? अणंतरखेतोगाढे पोग्गले अत्तमायाए आहारंति? परंपरखेतोगाढे पोग्गले  
अत्तमायाए आहारंति? गोतमा! आयसरीरक्खेतोगाढे पोग्गले अत्तमायाए आहारंति, नो अणंतरखेतोगाढे पोग्गले  
अत्तमायाए आहारंति, नो परंपरखेतोगाढे।

जहा नेरइया तहा जाव वेमाणियाणं दंडओ।

[३२४]केवली णं भंते! आयाणेहिं जाणति पासति? गोतमा! नो इणट्ठे।

से केणट्ठेणं.? गोयमा! केवली णं पुरत्थिमेणं मितं पि जाणति अमितं पि जाणति जाव  
निव्वुडे दंसणे केवलिस्स, से तेणट्ठेणं। गहा-

[३२५] जीवाण सुहं दुक्खं जीवे जीवति तहेव भविया य।

एगंतदुक्खवेदण अत्तमायाय केवली ॥

[३२६]सेवं भंते! सेवं भंते! ति।।

\* छट्ठ सए दसमो उद्देशो समतो \*

०-छट्ठं सतं समत्तं-०

० मुनि दीपरत्तसागरेण संशोधितः सम्पादितश्च छट्ठं सतं समत्तं ०

[ ] सत्तमं सतं [ ]

[३२७] आहार, विरति, थावर, जीवा, पक्खी, य आउ, अणगारे।

छउमत्थ, असंवुड, अन्नउत्थि, दस सत्तमम्मि सते ॥

## ० पढमो उद्देशो ०

[३२८] तेणं कालेणं तेणं समएणं जाव एवं वदासी-

जीवे णं भंते ! कं समयमणाहारए भवति ? गोयमा! पढमे समए सिय आहारए, सिय अणाहारए। बितिए समए सिय आहारए, सिय अणाहारए। ततिए समए सिय आहारए, सिय अणाहारए। चउत्थे समए नियमा आहारए।

एवं दंडओ। जीवा य एगिंदिया य चउत्थे समए। सेसा ततिए समए।

जीवे णं भंते! कं समयं सव्वप्पाहारए भवति? गोयमा! पढमसमयोववन्नए वा, चरमसमयभवत्थे वा, एत्थ णं जीवे सव्वप्पाहारए भवति।

दंडओ भाणियव्वो जाव वेमाणियाणं।

[३२९] किंसंठिते णं भंते! लोए पण्णते? गोयमा! सुपतिट्ठगसंठिते लोए पण्णते, हेट्ठा वित्थिण्णे जावउप्पिं उद्धमुङ्गाकारसंठिते। तंसि च णं सासयंसि लोगंसि हेट्ठा वित्थिण्णंसि जाव उप्पिं उद्धमुङ्गाकारसंठितंसि उप्पन्ननाणदंसणधरे अरहा जिणे केवली जीवे वि जाणति पासति, अजीवे वि जाणति पासति। ततो पच्छा सिज्झति जाव अंतं करेति।

[३३०] समणोवासगस्स णं भंते! सामाइयकडस्स समणोवस्सए अच्छमाणस्स तस्स णं भंते! किं रियावहिया किरिया कज्जइ? संपराइया किरिया कज्जति? गोतमा! नो इरियावहिया किरिया कज्जति, संपराइया किरिया कज्जति।

से केणट्ठेणं जाव संपराइया.? गोयमा! समणोवासयस्स णं सामाइयकडस्स समणोवस्सए अच्छमाणस्स आया अहिकरणी भवति। आयाहिगरणवतियं च णं तस्स नो रियावहिया किरिया कज्जति, संपराइया किरिया कज्जति। से तेणट्ठेणं जाव संपराइया।

[३३१] समणोवासगस्स णं भंते! पुव्वामेव तसपाणसमारंभे पच्चक्खाते भवति, पुढविसमारंभे अपच्चक्खाते भवति, से य पुढविं खणमाणे अन्नयरं तसं पाणं विहिंसेज्जा, से णं भंते! तं वतं अतिचरति? णो इणट्ठे समट्ठे, नो खलु से तस्स अतिवाताए आउट्ठति।

समणोवासगस्स णं भंते! पुव्वामेव वणस्सतिसमारंभे पच्चक्खाते, से य पुढविं खणमाणे अन्नयरस्स रुक्खस्स मूलं छिंदेज्जा, से णं भंते! तं वतं अतिचरति? णो इणट्ठे समट्ठे, नो खलु से तस्स अतिवाताए आउट्ठति।

[३३२] समणोवासए णं भंते! तहारूवं समणं वा माहणं वा फासुएसणि एसणिज्जेणं असण-पाण-साइमेणं पडिलाभेमाणे किं लभति? गोयमा! समणोवासए णं तहारूवं समणं वा माहणं वा जाव पडिलाभेमाणे तहारूवस्स समणस्स वा माहणस्स वा समाहिं उप्पाएति, समाहिकारए णं तमेव समाहिं पडिलभति।

समणोवासए णं भंते! तहारूवं समणं वा माहणं वा जाव पडिलाभेमाणे किं चयति? गोयमा! जीवियं चयति, २ दुच्चयं चयति, २ दुक्करं करेति, २ दुल्लभं लभति, २ बोहिं बुज्झति २ ततो पच्छा सिज्झति जाव अंतं करेति।

[३३३] अत्थि णं भंते! अकम्मस्स गती पण्णायति? हंता, अत्थि।

कहं णं भंते! अकम्मस्स गती पण्णायति? गोयमा! निस्संगताए, निरंगणताए, गति-परिणामेणं, बंधणछेयणताए, निरिंधणताए, पुव्वपओगेणं, अकम्मस्स गती पण्णायति।

कहं णं भंते! निस्संगताए, निरंगणताए, गतिपरिणामेणं, अकम्मस्स गती पण्णायति? गो.। से जहानामए केयि पुरिसे सुक्कं तुंबं निच्छिद्धं निरुवहतं आणुपुव्वीए परिकम्ममाणे परिकम्ममाणे दब्भेहि य कुसेहि य वेदेति, वेदित्ता अट्ठहिं मट्ठियालेवेहिं लिंपति, २ उण्हे दलयति, भूइं भूइं सुक्कं समाणं अत्थाहमतारमपोरिसियंसि उदगंसि पक्खिवेज्जा, से नूणं गोयमा! से तुंबे तेसिं अट्ठण्हं मट्ठियालेवाणं गुरुर्यताए भारियताए गुरूसंभारियताए सलिलतलमतिवतिता अहे धरणितलपतिट्ठाणे भवति ? हंता, भवति। अहे णं से तुंबे तेसिं अट्ठण्हं मट्ठियालेवाणं परिकखएणं धरणितलमतिवतिता उप्पिं सलिलतलपतिट्ठाणे भवति? हंता, भवति। एवं खलु गोयमा! निस्संगताए निरंगणताए गतिपरिणामेणं अकम्मस्स गती पण्णायति।

कहं णं भंते! बंधणछेदणताए अकम्मस्स गती पण्णायति? गोयमा! से जहानामए कलसिंबलिया ति वा, मुग्गसिंबलिया ति वा, माससिंबलिया ति वा, सिंबलिसिंबलिया ति वा, एरंडमिंजिया ति वा उण्हे दिण्णा सुक्का समाणी फुडित्ताणं एगंतमंतं गच्छइ एवं खलु गोयमा!।

कहं णं भंते! निरिंधणताए अकम्मस्स गती? गोयमा! से जहानामए धूमस्स इंधणविप्पमुक्कस्स उड्ढं वीससाए निव्वाघातेणं गती पवत्तति एवं खलु गोतमा!।

कहं णं भंते! पुव्वप्पयोगेणं अकम्मस्स गती पण्णायति? गोतमा! से जहानामए कंडस्स कोदंडविप्पमुक्कस्स लक्खाभिमुही निव्वाघातेणं गती पवत्तति एवं खलु गोयमा! नीसंगयाए निरंगणयाए जाव पुव्वप्पयोगेणं अकम्मस्स गती पण्णायति।

**[३३४]**दुक्खी भंते! दुक्खेणं फुडे? अदुक्खी दुक्खेणं फुडे? गोयमा! दुक्खी दुक्खेणं फुडे, नो अदुक्खी दुक्खेणं फुडे।

दुक्खी भंते! नेरतिए दुक्खेणं फुडे? अदुक्खी नेरतिए दुक्खेणं फुडे? गोयमा! दुक्खी नेरतिए दुक्खेणं फुडे, नो अदुक्खी नेरतिए दुक्खेणं फुडे।

एवं दंडओ जाव वेमाणियाणं।

एवं पंच दंडगा नेयव्वा-दुक्खी दुक्खेणं फुडे, दुक्खी दुक्खं परियादियति, दुक्खी दुक्खं उदीरेति, दुक्खी दुक्खं वेदेति, दुक्खी दुक्खं निज्जरेति।

**[३३५]**अणगारस्स णं भंते! अणाउतं गच्छमाणस्स वा, चिट्ठमाणस्स वा, निसीयमाणस्स वा, तुयट्ठमाणस्स वा; अणाउतं वत्थं पडिग्गहं कंबलं पादपुंछणं गेण्हमाणस्स वा, निक्खिवमाणस्स वा, तस्स णं भंते! किं इरियावहिया किरिया कज्जति? संपराइया किरिया कज्जति? गो.। नो ईरियावहिया किरिया कज्जति, संपराइया किरिया कज्जति।

से केणट्ठेणं.? गोयमा! जस्स णं कोह-माण-माया-लोभा वोच्छिन्ना भवंति तस्स णं रियावहिया किरिया कज्जति, नो संपराइया किरिया कज्जति। जस्स णं कोह-माण-माया-लोभा अवोच्छिन्ना भवंति तस्स णं संपराइया किरिया कज्जति, नो रियावहिया। अहासुतं रियं रीयमाणस्स रियावहिया किरिया कज्जति। उस्सुतं रीयमाणस्स संपराइया किरिया कज्जति, से णं उस्सुतमेव रियति। से तेणट्ठेणं०।

[३३६]अह भंते! सङ्गालस्स सधूमस्स संजोयणादोसदुट्ठस्स पाणभोयणस्स के अट्ठे पण्णते? गोयमा! जे णं निग्गंथे वा निग्गंथी वा फासुएसणिज्जं असण-पाण-खाइम-साइमं पडिगाहिता मुच्छित्ते गिद्धे गढित्ते अज्झोववन्ने आहारं आहारेति एस णं गोयमा! सङ्गाले पाण-भोयणे। जे णं निग्गंथे वा निग्गंथी वा फासुएसणिज्जं असण-पाण-खाइम-साइमं पडिगाहिता महयाअप्पत्तियं कोहकिलामं करेमाणे आहारमाहारेति एस णं गोयमा! सधूमे पाण-भोयणे। जे णं निग्गंथे वा २ जाव पडिगाहिता गुणुप्पायणहेतुं अन्नदव्वेणं सद्धिं संजोयता आहारमाहारेति एस णं गोयमा! संजोयणादोसदुट्ठे पाण-भोयणे। एस णं गोतमा! सङ्गालस्स सधूमस्स संजोयणादोसदुट्ठस्स पाण-भोयणस्स अट्ठे पण्णते।

अह भंते! वीतिंगालस्स वीयधूमस्स संजोयणादोसविप्पमुक्कस्स पाण-भोयणस्स के अट्ठे पण्णते? गोयमा! जे णं निग्गंथे वा २ जाव पडिगाहेता अमुच्छित्ते जाव आहारेति एस णं गोयमा! वीतिंगाले पाण-भोयणे। जे णं निग्गंथे वा २ जाव पडिगाहेता णो महताअप्पत्तियं जाव आहारेति, एस णं गोयमा! वीतधूमे पाण-भोयणे। जे णं निग्गंथे वा २ जाव पडिगाहेता जहा लद्धं तहा आहारं आहारेति एस णं गोतमा! संजोयणादोसविप्पमुक्के पाण-भोयणे। एस णं गोतमा! वीतिंगालस्स वीतधूमस्स संजोयणादोसविप्पमुक्कस्स पाण-भोयणस्स अट्ठे पण्णते।

[३३७]अह भंते! खेतातिक्कंतस्स कालातिक्कंतस्स मग्गातिक्कंतस्स पमाणातिक्कंतस्स पाण-भोयणस्स के अट्ठे पण्णते? गोयमा! जे णं निग्गंथे वा निग्गंथी वा फासुएसणिज्जं असण-पाण-खाइम-साइमं अणुगगते सूरिए पडिगाहिता उग्गते सूरिए आहारं आहारेति एस णं गोतमा! खेतातिक्कंते पाण-भोयणे। जे णं निग्गंथे वा २ जाव. साइमं पढमाए पोरिसीए पडिगाहेता पच्छिमं पोरिसिं उवायणावेता आहारं आहारेति एस णं गोयमा! कालातिक्कंते पाणभोयणे। जे णं निग्गंथे वा २ जाव सातिमं पडिगाहिता परं अद्धजोयणमेराए वीतिक्कमावेता आहारमाहारेति एस णं गोयमा! मग्गातिक्कंते पाण-भोयणे।

जे णं निग्गंथे वा निग्गंथी वा फासुएसणिज्जं जाव सातिमं पडिगाहिता परं बत्तीसाए कुक्कुडिअंडगप्पमाणमेताणं कवलाणं आहारमाहारेति एस णं गोतमा! पमाणातिक्कंते पाण-भोयणे। अट्ठकुक्कुडिअंडगप्पमाणमेते कवले आहारमाहारेमाणे अप्पाहारे, दुवालसकुक्कुडिअंडगप्पमाणमेते कवले आहारमाहारेमाणे अवड्ढोमोयरिया, सोलसकुक्कुडिअंडगप्पमाणमेते कवले आहारमाहारेमाणे दुभागप्पते, चउव्वीसं कुक्कुडिअंडगप्पमाणमेते जाव आहारमाहारेमाणे ओमोदरिया, बत्तीसं कुक्कुडिअंडगप्पमाणमेते कवले आहारमाहारेमाणे पमाणपत्ते, एत्तो एक्केण वि गासेणं ऊणगं आहारमाहारेमाणे समणे निग्गंथे नो पकामरसभोई इति वत्तव्वं सिया। एस णं गोयमा ! खेतादिक्कंतस्स कालातिक्कंतस्स मग्गातिक्कंतस्स पमाणातिक्कंतस्स पाणभोयणस्स अट्ठे पण्णते।

[३३८]अह भंते! सत्थातीतस्स सत्थपरिणामितस्स एसियस्स वेसियस्स सामुदाणियस्स पाण-भोयणस्स के अट्ठे पण्णते? गोयमा! जे णं निग्गंथे वा निग्गंथी वा निक्खित्तसत्थमुसले ववगतमाला-वण्णगविलेवणे ववगतचुय-चइयत्तदेहं जीवविप्पजढं अकयमकारियमसंकप्पियमणाहूतमकीत-कडमणुद्धिट्ठं नवकोडीपरिसुद्धं दसदोसविप्पमुक्कं उग्गमउप्पायणेसणासुपरिसुद्धं वीतिंगालं वीतधूमं संजोयणादोसविप्पमुक्कं असुरसुरं अचवचवं अदुतमविलंबितं अपरिसाडिं अक्खोवंजण-वणाणुलेवणभूतं संयमजाता-मायावत्तियं संजमभारवहणट्ठयाए बिलमिव पन्नगभूणं अप्पाणेणं आहारमाहारेति; एस णं गोतमा! सत्थातीतस्स सत्थपरिणामितस्स जाव पाण-भोयणस्स अट्ठे पण्णते।

सेवं भंते! सेवं भंते! त्ति।

**\*सतम सए पढमो उद्देशो समतो\***

### ० बीओ उद्देशो ०

[३३९] से नूणं भंते ! सव्वपाणेहिं सव्वभूतेहिं सव्वजीवेहिं सव्वसत्तेहिं 'पच्चक्खायं' इति वदमाणस्स सुपच्चक्खायं भवति? दुपच्चक्खायं भवति? गोतमा! सव्वपाणेहिं जाव सव्वसत्तेहिं 'पच्चक्खायं' इति वदमाणस्स सिय सुपच्चक्खातं भवति, सिय दुपच्चक्खातं भवति।

से केणट्ठेणं भंते! एवं वुच्चइ सव्वपाणेहिं जाव सव्वसत्तेहिं जाव सिय दुपच्चक्खातं भवति? गोतमा! जस्स णं सव्वपाणेहिं जाव सव्वसत्तेहिं 'पच्चक्खायं' इति वदमाणस्स णो एवं अभिसमन्नागतं भवति 'इमे जीवा, इमे अजीवा, इमे तसा, इमे थावरा' तस्स णं सव्वपाणेहिं जाव सव्वसत्तेहिं 'पच्चक्खायं' इति वदमाणस्स नो सुपच्चक्खायं भवति, दुपच्चक्खायं भवति। एवं खलु से दुपच्चक्खाई सव्वपाणेहिं जाव सव्वसत्तेहिं 'पच्चक्खायं' इति वदमाणो नो सच्चं भासं भासति, मोसं भासं भासइ, एवं खलु से मुसावाती सव्वपाणेहिं जाव सव्वसत्तेहिं तिविहं तिविहेणं अस्संजयविरयपडिहय- पच्चक्खायपावकम्मं सकिरिए असंवुडे एगंतदंडे एगंतबाले यावि भवति। जस्स णं सव्वपाणेहिं जाव सव्वसत्तेहिं 'पच्चक्खायं' इति वदमाणस्स एवं अभिसमन्नागतं भवति 'इमे जीव, इमे अजीवा, इमे तसा, इमे थावरा' तस्स णं सव्वपाणेहिं जाव सव्वसत्तेहिं 'पच्चक्खायं' इति वदमाणस्स सुपच्चक्खायं भवति, नो दुपच्चक्खायं भवति।

एवं खलु से सुपच्चक्खाई सव्वपाणेहिं जाव सव्वसत्तेहिं 'पच्चक्खायं' इति वयमाणे सच्चं भासं भासति, नो मोसं भासं भासति, एवं खलु से सच्चवादी सव्वपाणेहिं जाव सव्वसत्तेहिं तिविहं तिविहेणं संजयविरयपडिह यपच्चक्खायपावकम्मं अकिरिए संवुडे [एगंतअदंडे] एगंतपंडिते यावि भवति। से तेणट्ठेणं गोयमा! एवं वुच्चइ जाव सिय दुपच्चक्खायं भवति।

[३४०] कतिविहे णं भंते! पच्चक्खाणे पण्णत्ते? गोयमा! दुविहे पच्चक्खाणे पण्णत्ते, तं जहा-मूलगुणपच्चक्खाणे य उत्तरगुणपच्चक्खाणे य।

मूलगुणपच्चक्खाणे णं भंते! कतिविहे पण्णत्ते? गोयमा! दुविहे पण्णत्ते, तं जहा-सव्वमूलगुणपच्चक्खाणे य देसमूलगुणपच्चक्खाणे य।

सव्वमूलगुणपच्चक्खाणे णं भंते! कतिविहे पण्णत्ते? गोयमा! पंचविहे पण्णत्ते, तं जहा-सव्वातो पाणातिवातातो वेरमणं जाव सव्वातो परिग्गहातो वेरमणं।

देसमूलगुणपच्चक्खाणे णं भंते! कतिविहे पण्णत्ते? गोयमा! पंचविहे पण्णत्ते, तं जहा-थूलातो पाणातिवातातो वेरमणं जाव थूलातो परिग्गहातो वेरमणं।

उत्तरगुणपच्चक्खाणे णं भंते! कतिविहे पण्णत्ते? गोयमा! दुविहे पण्णत्ते, तं-सव्वुत्तरगुणपच्चक्खाणे य, देसुत्तरगुणपच्चक्खाणे य।

सव्वुत्तरगुणपच्चक्खाणे णं भंते! कतिविहे पण्णत्ते? गोयमा! दसविहे पण्णत्ते, तं जहा-

[३४१] अणागतं अतिककंतं कोडीसहितं नियंणियं चव।

सागारमणागारं परिमाणकडं निरवसेसं ।

साकेयं चव अद्वाए पच्चक्खाणं भवे दसहा॥

[३४२] देसुतरगुणपच्चक्खाणे णं भंते! कतिविहे पण्णते? गोयमा! सतविहे पण्णते, तं जहा-दिसिच्चयं, उवभोग-परीभोगपरिमाणं, अणत्थदंडवेरमणं, सामाइयं, देसावगासियं, पोसहोववासो, अतिहि-संविभागो, अपच्छिममारणंतियसंलेहणा झूसणाऽऽराहणता।

[३४३] जीवा णं भंते! किं मूलगुणपच्चक्खाणी, उत्तरगुणपच्चक्खाणी, अपच्चक्खाणी? गोयमा! जीवा मूलगुणपच्चक्खाणी वि, उत्तरगुणपच्चक्खाणी वि, अपच्चक्खाणी वि।

नेरइया णं भंते! किं मूलगुणपच्चक्खाणी.? पुच्छा। गोतमा! नेरइया नो मूलगुणपच्चक्खाणी, नो उत्तरगुणपच्चक्खाणी, अपच्चक्खाणी।

एवं जाव चउरिंदिया।

पंचेंदियतिरिक्खजोणिया मणुस्सा य जहा जीवा ।

वाणमंतर-जोतिसिय-वेमाणिया जहा नेरइया ।

एतेसि णं भंते! जीवाणं मूलगुणपच्चक्खाणीणं उत्तरगुणपच्चक्खाणीणं अपच्चक्खाणीणं य कतरे कतरेहिंतो जाव विसेसाहिया वा? गोयमा! सच्चत्थोवा जीवा मूलगुणपच्चक्खाणी, उत्तरगुणपच्चक्खाणी असंखेज्जगुणा, अपच्चक्खाणी अणंतगुणा।

एतेसि णं भंते! पंचेंदियतिरिक्खजोणियाणं. पुच्छा। गोयमा! सच्चत्थोवा जीवा पंचेंदिय-तिरिक्खजोणिया मूलगुणपच्चक्खाणी, उत्तरगुणपच्चक्खाणी असंखेज्जगुणा, अपच्चक्खाणी असंखिज्जगुणा।

एतेसि णं भंते! मणुस्साणं मूलगुणपच्चक्खाणीणं. पुच्छा। गोयमा! सच्चत्थोवा मणुस्सा मूलगुणपच्चक्खाणी, उत्तरगुणपच्चक्खाणी संखेज्जगुणा, अपच्चक्खाणी असंखेज्जगुणा।

जीवा णं भंते! किं सच्चमूलगुणपच्चक्खाणी? देसमूलगुणपच्चक्खाणी? अपच्चक्खाणी? गोयमा! जीवा सच्चमूलगुणपच्चक्खाणी, देसमूलगुणपच्चक्खाणी, अपच्चक्खाणी वि।

नेरइयाणं पुच्छा। गोयमा! नेरतिया नो सच्चमूलगुणपच्चक्खाणी, नो देसमूलगुण-पच्चक्खाणी, अपच्चक्खाणी।

एवं जाव चउरिंदिया।

पंचेंदियतिरिक्खपुच्छा। गोयमा! पंचेंदियतिरिक्खा नो सच्चमूलगुणपच्चक्खाणी, देसमूलगुणपच्चक्खाणी वि, अपच्चक्खाणी वि।

मणुस्सा जहा जीवा।

वाणमंतर-जोतिस-वेमाणिया जहा नेरइया।

एतेसि णं भंते! जीवाणं सच्चमूलगुणपच्चक्खाणीणं देसमूलगुणपच्चक्खाणीणं अपच्चक्खा-णीणं य कतरे कतरेहिंतो जाव विसेसाहिया वा? गोयमा! सच्चत्थोवा जीवा सच्चमूलगुणपच्चक्खाणी।

एवं अप्पाबहुगाणि तिण्णि वि जहा पढमिल्लए दंडए, नवरं सच्चत्थोवा पंचेंदियतिरिक्खजोणिया देसमूलगुण-पच्चक्खाणी, अपच्चक्खाणी असंखेज्जगुणा।

जीवा णं भंते! किं सच्चुत्तरगुणपच्चक्खाणी? देसुत्तरगुणपच्चक्खाणी? अपच्चक्खाणी? गोतमा! जीवा सच्चुत्तरगुणपच्चक्खाणी वि, तिण्णि वि।

पंचेंदियतिरिक्खजोणिया मणुस्सा य एवं चेव।

सेसा अपच्चक्खाणी जाव वेमाणिया।

एतेसि णं भंते! जीवाणं सच्चुत्तरगुणपच्चक्खाणी., अप्पाबहुगाणि तिण्णि वि जहा पढमे दंडए जाव मणुसाणं।

जीवा णं भंते ! किं संजता? असंजता? संजतासंजता? गोयमा! जीवा संजया वि., तिण्णि वि, एवं जहेव पणवणाए तहेव भाणियत्वं जाव वेमाणिया। अप्पाबहुगं तहेव तिण्ह वि भाणियत्वं।

जीवा णं भंते! किं पच्चक्खाणी? अपच्चक्खाणी? पच्चक्खाणापच्चक्खाणी? गोतमा! जीवा पच्चक्खाणी वि, एवं तिण्णि वि।

एवं मणुस्साण वि।

पंचेदियतिरिक्खजोणिया आदिल्लविरहिया।

सेसा सच्चे अपच्चक्खाणी जाव वेमाणिया।

एतेसि णं भंते! जीवाणं पच्चक्खाणीणं जाव विसेसाहिया वा? गोयमा! सच्चत्थोवा जीवा पच्चक्खाणी, पच्चक्खाणापच्चक्खाणी असंखेज्जगुणा, अपच्चक्खाणी अणंतगुणा।

पंचेदियतिरिक्खजोणिया सच्चत्थोवा पच्चक्खाणापच्चक्खाणी, अपच्चक्खाणी असंखेज्जगुणा।

मणुस्सा सच्चत्थोवा पच्चक्खाणी, पच्चक्खाणापच्चक्खाणी संखेज्जगुणा, अपच्चक्खाणी असंखेज्जगुणा।

**[३४४]**जीवा णं भंते! किं सासता? असासता? गोयमा! जीवा सिय सासता, सिय असासता।

से केणट्ठेणं भंते! एवं वुच्चइ 'जीवा सिय सासता, सिय असासता'? गोतमा! दच्चट्ठताए सासता, भावट्ठयाए असासता। से तेणट्ठेणं गोतमा! एवं वुच्चइ जाव सिय असासता।

नेरइया णं भंते! किं सासता? असासता? एवं जहा जीवा तहा नेरइया वि।

एवं जाव वेमाणिया जाव सिय असासता।

सेवं भंते! सेवं भंते। ति.।

**\*सत्तम सए बिइओ उद्देशो समतो\***

**० तइओ उद्देशो ०**

**[३४५]**वणस्सतिकाइया णं भंते! कं कालं सच्चप्पाहारगा वा सच्चमहाहारगा वा भवंति, तदाणंतरं च णं हेमंते, तदाणंतरं च णं वसंते, तयाणंतरं च णं गिम्हे। गिम्महासु णं वणस्सतिकाइया सच्चप्पाहारगा भवंति।

जति णं भंते! गिम्हासु वणस्सइकाइया सच्चप्पाहारगा भवंति, कम्हा णं भंते! गिम्हासु बहवे वणस्सतिकाइया पत्तिया पुप्फिया फलिया हरितगरेरिज्जमाणा सिरीए अतीव अतीव उवसोभेमाणा उवसोभेमाणा चिट्ठंति? गोयमा! गिम्हासु णं बहवे उसिणजोणिया जीवा य पुग्गला य वणस्सतिकाइयाए वक्कमंति विउक्कमंति चयंति उववज्जंति, एवं खलु गोयमा! गिम्हासु बहवे वणस्सतिकाइया पत्तिया पुप्फिया जाव चिट्ठंति।

**[३४६]**से नूणं भंते! मूला मूलजीवफुडा, कंदा कंदजीवफुडा जाव बीया बीयजीवफुडा? हंता,

गोतमा! मूला मूलजीवफुडा जाव बीया बीयजीवफुडा।

जति णं भंते! मूला मूलजीवफुडा जाव बीया बीयजीवफुडा, कम्हा णं भंते। वणस्सतिकाइया आहारेंति? कम्हा परिणामेंति? गोयमा! मूला मूलजीवफुडा पुढविजीवपडिबद्धा तम्हा आहारेंति, तम्हा परिणामेंति। कंदा कंदजीवफुडा मूलजीवपडिबद्धा तम्हा आहारेंति, तम्हा परिणामेंति। एवं जाव बीया बीयजीवफुडा फलजीवपडिबद्धा तम्हा आहारेंति, तम्हा परिणामेंति।

[३४७] अह भंते ! आलुए मूलए सिंगबेरे हिरिली सिरिली सिस्सिरिली किट्ठिया छिरिया छीरविरालिया कण्हकंदे वज्जकंदे सूरणकंदे खिलूडे भद्दमुत्था पिंडहलिद्धा लोही णीहू थीहू थिभगा मुग्गकण्णी अस्सकण्णी सीहकण्णी सीहंठी मुसुंठी, जे यावन्ने तहप्पगारा सव्वे ते अणंतजीवा विविहसत्ता? हंता, गोयमा! आलुए मूलए जाव अणंतजीवा विविहसत्ता।

[३४८] सिय भंते! कण्हलेसे नेरतिए अप्पकम्मतराए, नीललेसे नेरतिए महाकम्मतराए? हंता, गोयमा! सिया।से केणट्ठेणं भंते एवं वुच्चति 'कण्हलेसे नेरतिए अप्पकम्मतराए, नीललेसे नेरतिए महाकम्मतराए'? गोयमा! ठित्तिं पडुच्च, से तेणट्ठेणं गोयमा! जाव महाकम्मतराए।

सिय भंते! नीललेसे नेरतिए अप्पकम्मतराए, काउलेसे नेरतिए महाकम्मतराए? हंता, सिया।

से केणट्ठेणं भंते! एवं वुच्चति नीललेसे अप्पकम्मतराए, काउलेसे नेरतिए महाकम्मतराए? गोयमा! ठित्तिं पडुच्च, से तेणट्ठेणं गोयमा जाव महाकम्मतराए।

एवं असुरकुमारे वि, नवरं तेउलेसा अब्भहिया।

एवं जाव वेमाणिया, जस्स जति लेसाओ तस्स तति भाणियव्वाओ। जोतिसियस्स न भण्णति। जाव सिय भंते! पम्हलेसे वेमाणिए अप्पकम्मतराए, सुक्कलेसे वेमाणिए महाकम्मतराए? हंता, सिया। से केणट्ठेणं. सेसं जहा नेरइयस्स जाव महाकम्मतराए।

[३४९] से नूणं भंते! जा वेदणा सा निज्जरा? जा निज्जरा सा वेदणा? गोयमा! णो इणट्ठे समट्ठे।

से केणट्ठेणं भंते ! एवं वुच्चइ जा वेयणा न सा निज्जरा, जा निज्जरा न सा वेयणा? गोयमा! कम्मं वेदणा, णोकम्मं निज्जरा। से तेणट्ठेणं गोयमा! जाव न सा वेदणा।

नेरतियाणं भंते! जाव वेदणा सा निज्जरा? जा निज्जरा सा वेदणा? गोयमा! णो इणट्ठे समट्ठे।

से केणट्ठेणं भंते! एवं वुच्चति वेरइयाणं जा वेदणा न सा निज्जरा, जा निज्जरा न सा वेयणा? गोतमा! नेरइयाणं कम्मं वेदणा, णोकम्मं निज्जरा। से तेणट्ठेणं गोतमा! जाव न सा वेयणा।

एवं जाव वेमाणियाणं।

से नूणं भंते! जं वेदेंसु तं निज्जरिंसु? जं निज्जरिंसु तं वेदेंसु? णो इणट्ठे समट्ठे।

से केणट्ठेणं भंते! एवं वुच्चति 'जं वेदेंसु नो तं निज्जरेंसु, जं निज्जरेंसु नो तं वेदेंसु'? गोयमा! कम्मं वेदेंसु, नोकम्मं निज्जरिंसु, से तेणट्ठेणं गोयमा! जाव नो तं वेदेंसु।

नेरतिया णं भंते! जं वेदेंसु तं निज्जरिंसु? एवं नेरइया वि।

एवं जाव वेमाणिया।

से नूणं भंते! जं वेदेंति तं निज्जरिंति, जं निज्जरेंति तं वेदेंति? गोयमा नो इणट्ठे समट्ठे।

से केणट्ठेणं भंते ! एवं वुच्चति जाव नो तं वेदंति ? गोतमा! कम्मं वेदंति, नोकम्मं निज्जरंति। से तेणट्ठेणं गोयमा! जाव नो तं वेदंति। एवं नेरइया वे जाव वेमाणिया।

से नूणं भंते! जं वेदिस्संति तं निज्जरिस्संति? जं निज्जरिस्संति तं वेदिस्संति? गोयमा! णो इणट्ठे समट्ठे।

से केणट्ठेणं जाव 'णो तं वेदिस्संति'? गोयमा! कम्मं वेदिस्संति, नोकम्मं निज्जिस्संति। से तेणट्ठेणं जाव नो तं निज्जरि (वेदि)स्संति। एवं नेरतिया वि जाव वेमाणिया।

से णूणं भंते! जे वेदणासमए से निज्जरासमए, जे निज्जरासमए से वेदणासमए? गोयमा! नो इणट्ठे समट्ठे।

से केणट्ठेणं भंते! एवं वुच्चति जे वेदणासमए न से णिज्जरासमए, जे निज्जरासमए न से वेदणासमए? गोयमा! जं समयं वेदंति नो तं समयं निज्जरंति, जं समयं निज्जरंति नो तं समयं वेदंति; अन्नम्मि समए वेदंति, अन्नम्मि समए निज्जरंति; अन्ने से वेदणासमए, अन्ने से निज्जरासमए। से तेणट्ठेणं जाव न से वेदणासमए।

नेरतियाणं भंते! जे वेदणासमए से निज्जरासमए? जे निज्जरासमए से वेदणासमए? गोयमा! णो इणट्ठे समट्ठे।

से केणट्ठेणं भंते! एवं वुच्चइ 'नेरइयाणं जे वेदणासमए न से निज्जरासमए, जे निज्जरासमए न से वेदणासमए?' गोयमा! नेरइया णं जं समयं वेदंति णो तं समयं निज्जरंति, जं समयं निज्जरंति नो तं समयं वेदंति; अन्नम्मि समए वेदंति, अन्नम्मि समए निज्जरंति; अन्ने से वेदणासमए, अन्ने से निज्जरासमए। से तेणट्ठेणं जाव न से वेदणासमए।

एवं जाव वेमाणियाणं।

[३५०]नेरतिया भंते! किं सासया, असासया? गोयमा! सिय सासया, सिय असासया।

से केणट्ठेणं भंते! एवं वुच्चइ 'नेरतिया सिय सासया, सिय असासया'? गोयमा! अक्वोच्छित्तिनयट्ठताए सासया, वोच्छित्तिणयट्ठयाए असासया। से तेणट्ठेणं जाव सिय असासया।

एवं जाव वेमाणियाणं जाव सिय असासया।

सेवं भंते! सेवं भंते ति।

**\*सत्तम सए तइओ उद्देशो समतो\***

**० चउत्थो उद्देशो ०**

[३५१]रायगिहे नगरे जाव एवं वदासी-

कतिविहा णं भंते! संसारसमावन्नगा जीवा पण्णत्ता? गोयमा! छव्विहा संसारसमावन्नगा जीवा पण्णत्ता, तं जहा-पुढविकाइया एवं जहा जीवाभिगमे जाव सम्मत्तकिरियं वा मिच्छत्तकिरियं वा।

सेवं भंते! सेवं भंते! ति।

[३५२] जीवा छव्विह पुढवी जीवाण ठिती भवट्ठितिकाये ।

निल्लेवण अणगारे किरिया सम्मत्त मिच्छत्ता ॥

**\*सत्तम सए चउत्थो उद्देशो समतो\***

## ० पंचमो उद्देशो ०

[३५३] रायगिहे नगरे जाव एवं वदासी- खहचरपंचेंदियतिरिक्खजोणियाणं भंते! कतिविहे जोणीसंगहे पण्णते? गोयमा! तिविहे जोणीसंगहे पण्णते, तं जहा-अंडया पोयया सम्मुच्छिमा। एवं जहा जीवाभिगमे जाव नो चेव णं ते विमाणे वीतीवएज्जा। एमहालया णं गोयमा! ते विमाणा पण्णता।

[३५४] जोणीसंगह-लेसा दिट्ठी नाणे य जोग उवओगे ।  
उववाय-ट्ठिति-समुग्घाय-चवण-जाती-कुल-वीहीओ ॥  
सेवं भंते! सेवं भंते! ति।

### \*सतम सए पंचमो उद्देशो समतो\*

## ० छट्ठो उद्देशो ०

[३५५] रायगिहे जाव एवं वदासी-

जीवे णं भंते! जे भविए नेरइएसु उववज्जित्तए से णं भंते! किं इहगते निरतियाउयं पकरेति? उववज्जमाणे नेरतियाउयं पकरेति? उववन्ने नेरइयाउयं पकरेति? गोयमा! इहगते नेरइयाउयं पकरेइ, नो उववज्जमाणे नेरइयाउयं पकरेइ, नो उववन्ने नेरइयाउयं पकरेइ।

एवं असुरकुमारेसु वि।

एवं जाव वेमाणिएसु।

जीवे णं भंते! जे भविए नेरतिएसु उववज्जित्तए से णं भंते! किं इहगते नेरतियाउयं पडिसंवेदेति? उववज्जमाणे नेरइयाउयं पडिसंवेदेति? उववन्ने नेरइयाउयं पडिसंवेदेति? गोयमा! णो इहगते नेरइयाउयं पडिसंवेदेइ, उववज्जमाणे नेरइयाउयं पडिसंवेदेति, उववन्ने वि नेरइयाउयं पडिसंवेदेति।

एवं जाव वेमाणिएसु।

जीवे णं भंते! जे भविए नेरतिएसु उववज्जित्तए से णं भंते! किं इहगते महावेदणे? उववज्जमाणे महावेदणे? उववन्ने महावेदणे? गोयमा! इहगते सिय महावेदणे, सिय अप्पवेदणे; उववज्जमाणे सिय महावेदणे, सिय अप्पवेदणे; अहे णं उववन्ने भवति ततो पच्छा एगंतदुक्खं वेदणं वेदेति, आहच्च सातं।

जीवे णं भंते! जे भविए असुरकुमारेसु उववज्जित्तए० पुच्छा। गोयमा! इहगते सिय महावेदणे, सिय अप्पवेदणे; उववज्जमाणे सिय महावेदणे, सिय अप्पवेदणे; अहे णं उववन्ने भवति ततो पच्छा एगंतसातं वेदणं वेदेति, आहच्च असातं।

एवं जाव थणियकुमारेसु।

जीवे णं भंते! जे भविए पुढविकाएसु उववज्जित्तए० पुच्छा। गोयमा! इहगए सिय महावेदणे, सिय अप्पवेदणे; एवं उववज्जमाणे वि; अहे णं उववन्ने भवति ततो पच्छा वेमाताए वेदणं वेदेति।

एवं जाव मणुस्सेसु।

वाणमंतर-जोतिसिय-वेमाणिएसु जहा असुरकुमारेसु ।

[३५६] जीवा णं भंते! किं आभोगनिव्वतियाउया? अणाभोगनिव्वत्तिताउया? गोयमा! नो आभोगनिव्वत्तिताउया, अणाभोगनिव्वत्तिताउया।

एवं नेरइया वि।

एवं जाव वेमाणिया।

**[३५७]**अत्थि णं भंते! जीवाणं कक्कसवेदणिज्जा कम्मा कज्जंति? हंता, अत्थि।

कहं णं भंते! जीवाणं कक्कसवेदणिज्जा कम्मा कज्जंति? गोयमा! पाणातिवातेणं जाव मिच्छादंसणसल्लेणं, एवं खलु गोयमा! जीवाणं कक्कसवेदणिज्जा कम्मा कज्जंति।

अत्थि णं भंते! नेरइयाणं कक्कसवेदणिज्जा कम्मा कज्जंति? एवं चेव।

एवं जाव वेमाणियाणं।

अत्थि णं भंते! जीवाणं अकक्कसवेदणिज्जा कम्मा कज्जंति? हंता, अत्थि।

कहं णं भंते! जीवाणं अकक्कसवेदणिज्जा कम्मा कज्जंति? गोयमा! पाणातिवा तवेरमणेणं जाव परिग्गहवेरमणेणं कोहविवेगेणं जाव मिच्छादंसणसल्लविवेगेणं, एवं खलु गोयमा! जीवाणं अकक्कसवेदणिज्जा कम्मा कज्जंति।

अत्थि णं भंते! नेरतियाणं अकक्कसवेदणिज्जा कम्मा कज्जंति? गोयमा! णो इण्ट्ठे समट्ठे।

एवं जाव वेमाणिया। नवरं मणुस्साणं जहा जीवाणं ।

**[३५८]**अत्थि णं भंते! जीवाणं सातावेदणिज्जा कम्मा कज्जंति? हंता, अत्थि।

कहं णं भंते! जीवाणं सातावेदणिज्जा कम्मा कज्जंति? गोयमा! पाणाणुकंपाए भूयाणुकंपाए जीवाणुकंपाए सत्ताणुकंपयाए, बहूणं पाणाणं भूयाणं जीवाणं सत्ताणं अदुक्खणयाए असोयणयाए अजूरणयाए अतिप्पणयाए अपिट्णयाए अपरितावणयाए; एवं खलु गोयमा! जीवाणं सातावेदणिज्जा कम्मा कज्जंति।

एवं नेरतियाणं वि।

एवं जाव वेमाणियाणं।

अत्थि णं भंते! जीवाणं असातावेदणिज्जा कम्मा कज्जंति? हंता, अत्थि।

कहं णं भंते! जीवाणं अस्सायावेदणिज्जा कम्मा कज्जंति? गोयमा! परदुक्खणयाए परसोयणयाए परजूरणयाए परतिप्पणयाए परपिट्णयाए परपरितावणयाए, बहूणं पाणाणं जाव सत्ताणं दुक्खणताए सोयणयाए जाव परितावणयाए, एवं खलु गोयमा! जीवाणं असातावेदणिज्जा कम्मा कज्जंति।

एवं नेरतियाणं वि।

एवं जाव वेमाणियाणं।

**[३५९]**जंबुद्धीवे णं भंते! दीवे भारहे वासे इमीसे ओसप्पिणीए दुस्समदुस्समए समाए उत्तमकट्ठपत्ताए भरहस्स वासस्स केरिसए आकारभावपडोयारे भविस्सति? गोयमा काले भविस्सति हाहाभूते भंभाभूए कोलाहलभूते, समयाणुभावेण य णं खरफरुसधूलिमइला दुव्विसहा वाउला भयंकरा वाता संवट्णगा य वाहित्ति, इह अभिक्खं धूमाहिंति य दिसा समंता रयस्सला रेणुकलुसतमपडलनिरालोगा, समयलुक्खयाए य णं अहियं चंदा सीतं मोच्छंति, अहियं सूरिया तवइस्संति, अदुत्तरं च णं अभिक्खणं बहवे अरसमेहा विरसमेहा खारमेहा खत्तमेहा अग्गिमेहा विज्जुमेहा विसमेहा असणिमेहा अपिबणिज्जोदगा वाहिरोग वेदणोदीरणापरिणामसल्लिला अमणुण्णपाणियगा चंडानिलपहयतिकखधारा निवायपउरं वासं वासिहिंति। जेणं भारहे वासे गामागर-नगर-खेड-कब्बड-मडंब-दोणमुह-पट्णणास्ससमगतं जणवयं, चउप्पयगवेत्तए खहयरे य

पक्खिसंधे, गामाऽरण्यपयारनिरए तसे य पाणे बहुप्पगारे, रुक्ख-गुच्छ-गुम्म-लय-वल्लि-तण-पव्वग-हरितोसहि-पवालंकुरमादीए य तणवणस्सतिकाइए विद्धंसेहिति। पव्वय-गिरि-डोंगरुत्थल-भट्ठमादीए य वेयड्ढगिरिवज्जे विरावेहिति। सलिलबिल-गड्ड-दुग्ग-विसमनिण्णुन्नताइं च गंगासिंधूवज्जाइं समीकरेहिति।

तीसे णं भंते ! समाए भरहस्स वासस्स भूमीए केरिसए आगार-भाव-पडोयारे भविस्सति ?

गोयमा! भूमी भविस्सति इंगालभूता मुम्मुरभूता छारियभूता तत्तक वेल्लयभूया तत्तसमजोतिभूया धूलिबहुला रेणुबहुला पंकबहुला पणगबहुला चलणिबहुला, बहूणं धरणिगोयराणं सत्ताणं दुन्निक्कमा यावि भविस्सति।

[३६०] तीसे णं भंते! समाए भारहे वासे मणुयाणं केरिसए आगारभावपडोयारे भविस्सति? गोयमा! मणुया भविस्सति दुरूवा दुव्वण्णा दुग्गंधा दूरसा दूफासा, अणिट्ठा अकंता जाव अमणामा, हीणस्सरा दीणस्सरा अणिट्ठस्सरा जाव अमणामस्सरा, अणादिज्जवयण-पच्चायाता निल्लज्जा कूड-कवड-कलह-वह-बंध-वेरनिरया मज्जादातिककमप्पहाणा अकज्जनिच्चुज्जता गुरुनियोगविणयरहिता य विकलरूवा परूढनह-केस-मंसुरोमा काला खरफरुसझामवण्णा फुट्ठसिरा कविलपलियकेसा बहुणहारुसंपिणद्धदु-द्वंसणिज्जरूवा संकुडियवलीतरंगपरि वेढियंगमंगा जरापरिणत व्व थेरगनरा पविरलपरिसडियदंतसेढी उब्भडघडमुहा विसमनयणा वंकनासा वंकवलीविगतभेसणमुहा कच्छकसराभिभूता खरतिक्खनक्खकंइइय विक्खयतणू दद्दु-किडिभ-सिज्झफुडियफरुसच्छवी चित्तलंगा षोलगति-विसमसंधिबंधण उक्कुडु अट्ठिगविभत दुब्बलकुसंधयणकुप्पमाणकुसंठिता कुरूवा कुट्ठाणासणकुसेज्जकुभोइणो असुइणो अणेगवाहिपरिपीलियंगमंगा खलंतविब्भलगती निरुच्छाहा सत्तपरिवज्जिया विगतचेट्ठनट्ठतेया अभिक्खणं सीय-उण्ह-खर-फरुसवात विज्झडियमलिणपंसुरउग्गुडितंगमंगा बहुकोह-माण-माया बहुलोभा असुहदुक्खभागी ओसन्नं धम्मसण्णा-सम्मत्तपरिब्भट्ठा उक्कोसेणं रयणिपमाणमेता सोलसवीसतिवासपरमाउसा पुत्त-णत्तुपरियालपणयबहुला गंगा-सिंधूओ महानदीओ वेयड्ढं च पव्वयं निस्साए बहुतरिं णिगोदा बीयं बीयामेता बिलवासिणो भविस्सति।

ते णं भंते! मणुया कमाहारमाहारेहिति? गोयमा! तेणं कालेणं तेणं समएणं गंगा-सिंधूओ महानदीओ रहपहवित्थाराओ अक्खसोत्तप्पमाणमित्तं जलं वोज्झिहिति, से वि य णं जले बहुमच्छ-कच्छ-भाइण्णे णो च्चेव णं आउबहुले भविस्सति। तए णं ते मणुया सूरोगमणमुहुत्तंसि य सूरत्थमणमुहुत्तंसि य बिलेहितो निद्धाहिति, बिलेहितो निद्धाइत्ता मच्छ-कच्छभे थलाइं गाहेहिति, मच्छ-कच्छभे थलाइं गाहेत्ता सीतातवततएहिं मच्छ-कच्छएहिं एक्कवीसं वाससहस्साइं वितिं कप्पेमाणा विहरिस्सति।

ते णं भंते! मणुया निस्सीला णिग्गुणा निम्मेरा निप्पच्चक्खाणपोसहोववासा उस्सन्नं मंसाहारा मच्छाहारा खोद्दाहारा कुणिमाहारा कालमासे कालं किच्चा कहिं गच्छिहिति? कहिं उववज्जिहिति? गोयमा! ओसन्नं नरग-तिरिक्खजोणिएसु उववज्जिहिति।

ते णं भंते! सीहा वग्घा विगा दीविहा अच्चा तरच्चा परस्सरा णिस्सीला तहेव जाव कहिं उववज्जिहिति? गोयमा! ओसन्नं नरग-तिरिक्खजोणिएसु उववज्जिहिति।

ते णं भंते! ढंका कंका विलका मद्दुगा सिही णिस्सीला तहेव जाव ओसन्नं नरग-तिरिक्खजोणिएसु उववज्जिहिति।

सेवं भंते! सेवं भंते! ति।

**\*सत्तमसए छट्ठो उद्देशो समतो\***

## ० सतमो उद्देशो ०

[३६१]संवुडस्स णं भंते! अणगारस्स आउत्तं गच्छमाणस्स जाव आउत्तं तुयट्माणस्स, आउत्तं वत्थं पडिग्गहं कंबलं पायपुंछणं गिण्हमाणस्स वा निक्खिण्णमाणस्स वा, तस्स णं भंते! किं इरियावहिया किरिया कज्जति? संपराइया किरिया कज्जति? गोतमा! संवुडस्स णं अणगारस्स जाव तस्स णं इरियावहिया किरिया कज्जति, णो संपराइया किरिया कज्जति।

से केणट्ठेणं भंते! एवं वुच्चइ 'संवुडस्स णं जाव नो संपराइया किरिया कज्जति'? गोयमा! जससणं कोह-माण-माया-लोभा वोच्छिन्ना भवंति तस्स णं इरियावहिया किरिया कज्जति तहेव जाव उस्सुत्तं रीयमाणस्स संपराइया किरिया कज्जति, से णं अहासुत्तमेव रीयति; से तेणट्ठेणं गोतमा! जाव नो संपराइया किरिया कज्जति।

[३६२]रूवी भंते! कामा? अरूवी कामा? गोयमा! रूवी कामा णो अरूवी कामा।

सचित्ता भंते! कामा? अचित्ता कामा? गोयमा! सचित्ता वि कामा, अचित्ता वि कामा।

जीवा भंते! कामा? अजीवा कामा? गोतमा! जीवा वि कामा, अजीवा वि कामा।

जीवाणं भंते! कामा? अजीवाणं कामा? गोयमा! जीवाणं कामा, नो अजीवाणं कामा।

कतिविहा णं भंते! कामा पण्णत्ता? गोयमा! दुविहा कामा पण्णत्ता, तं जहा-सद्दा य, रूवा य।

रूवी भंते! भोगा? अरूवी भोगा? गोयमा! रूवी भोगा, नो अरूवी भोगा।

सचित्ता भंते! भोगा? अचित्ता भोगा? गोयमा! सचित्ता वि भोगा, अचित्ता वि भोगा।

जीवा भंते! भोगा? पुच्छा। गोयमा! जीवा वि भोगा, अजीवा वि भोगा।

जीवाणं भंते! भोगा? अजीवाणं भोगा? गोयमा! जीवाणं भोगा, नो अजीवाणं भोगा।

कतिविहा णं भंते! भोगा पण्णत्ता? गोयमा! तिविहा भोगा पण्णत्ता, तं जहा-गंधा, रसा, फासा।

कतिविहा णं भंते! कामभोगा पण्णत्ता? गोयमा! पंचविहा कामभोगा पण्णत्ता, तं जहा-सद्दा रूवा गंधा रसा फासा।

जीवा णं भंते! किं कामी? भोगी? गोयमा! जीवा कामी वि, भोगी वि।

से केणट्ठेणं भंते! एवं वुच्चति 'जीवा कामी वि, भोगी वि'? गोयमा! सोइंदिय-चक्खिंदियाइं पडुच्च कामी, घाणिंदिय-जिब्भिंदिय-फासिंदियाइं पडुच्च भोगी। से तेणट्ठेणं गोयमा! जाव भोगी वि।

नेरइया णं भंते! किं कामी? भोगी? एवं चेव।

एवं जाव थणियकुमारा।

पुढविकाइयाणं पुच्छा। गोयमा! पुढविकाइया नो कामी, भोगी।

से केणट्ठेणं जाव भोगी? गोयमा! फासिंदियं पडुच्च, से तेणट्ठेणं जाव भोगी।

एवं जाव वणस्सतिकाइया।

बेइंदिया एवं चेव। नवरं जिब्भिंदिय-फासिंदियाइं पडुच्च।

तेइंदिया वि एवं चेव। नवरं घाणिंदिय-जिब्भिंदिय-फासिंदियाइं पडुच्च।

चउरिंदियाणं पुच्छा। गोयमा! चउरिंदिया कामी वि भोगी वि। से केणट्ठेणं जाव भोगी वि? गोयमा! चक्खिंदियं पडुच्च कामी, घाणिंदिय-जिब्भिंदिय-फासिंदियाइं पडुच्च भोगी।

से तेणट्ठेणं जाव भोगी वि।

अवसेसा जहा जीवा जाव वेमाणिया।

एतेसि णं भंते! जीवाणं कामभोगीणं, नोकामीणं, नोभोगीणं, भोगीण य कतरे कतरेहिंतो जाव विसेसाहिया वा? गोयमा! सव्वत्थोवा जीवा कामभोगी, नोकामी नोभोगी अणंतगुणा, भोगी अणंतगुणा।

**[३६३]** छउमत्थे णं भंते ! मणुस्से जे भविए अन्नयरेसु देवलोएसु देवताए उववज्जितए, से नूणं भंते! से खीणभोगी नो पभू उट्ठाणेणं कम्मणेणं बलेणं वीरिएणं पुरिसक्कारपरक्कमेणं विउलाइं भोग- भोगाइं भुंजमाणे विहरितए, से नूणं भंते! एयमट्ठं एवं वयह? गोयमा! णो इणट्ठे समट्ठे, पभू णं से उट्ठाणेण वि कम्मणेण वि बलेण वि वीरिएण वि पुरिसक्कारपरक्कमेण वि अन्नयराइं विपुलाइं भोगभोगाइं भुंजमाणे विहरितए, तम्हा भोगी, भोगे परिच्चयमाणे महानिज्जरे महापज्जवसाणे भवति।

आहोहिए णं भंते! मणुस्से जे भविए अन्नयरेसु देवलोएसु., एवं चेव जहा छउमत्थे जाव महापज्जवसाणे भवति।

परमाहोहिए णं भंते! मणुस्से जे भविए तेणं चेव भवग्गहणेणं सिज्जितए जाव अंतं करेतए, से नूणं भंते! से खीणभोगी. सेसं जहा छउमत्थस्स।

केवली णं भंते! मणुस्से जे भविए तेणं चेव भवग्गहणेणं. एवं चेव जहा परमाहोहिए जाव महापज्जवसाणे भवति।

**[३६४]**जे इमे भंते! असण्णिणो पाणा, तं जहा-पुढविकाइया जाव वणस्सतिकाइया छट्ठा य एगइया तसा, एते णं अंधा मूढा तमं पविट्ठा तमपडलमोहजालपलिच्छन्ना अकामनिकरणं वेदणं वेदेतीति वत्तत्वं सिया? हंता, गोयमा! जे इमे असण्णिणो पाणा जाव वेदणं वेदेतीति वत्तत्वं सिया।

अत्थि णं भंते! पभू वि अकामनिकरणं वेदणं वेदेति? हंता, गोयमा! अत्थि।

कहं णं भंते! पभू वि अकामनिकरणं वेदणं वेदेति? गोतमा! जे णं णोपभू विणा पदीवेणं अंधकारंसि रूवाइं पासितए, जे णं नोपभू पुरतो रूवाइं अणिज्झाइताणं पासितए, जे णं नोपभू मग्गतो रूवाइं अणवयक्खित्ताणं

पासितए, जे णं नोपभू पासतो रूवाइं अणवल्लोएत्ताणं पासितए, जे णं नोपभू उड्ढंरूवाइं अणाल्लोएत्ताणं पासितए, जे णं नोपभू अहे रूवाइं अणाल्लोएत्ताणं पासितए, एस णं गोतमा! पभू वि अकामनिकरणं वेदणं वेदेति।

अत्थि णं भंते! पभू वि पकामनिकरणं वेदणं वेदेति? हंता, अत्थि।

कहं णं भंते! पभू वि पकामनिकरणं वेदणं वेदेति? गोयमा! जे णं नोपभू समुद्धस्स पारं गमितए, जे णं नोपभू समुद्धस्स पारगताइं रूवाइं पासितए, जे णं नोपभू देवलोगं गमितए, जे णं नोपभू देवलोगगताइं रूवाइं पासितए एस णं गोयमा! पभू वि पकामनिकरणं वेदणं वेदेति।

सेवं भंते! सेवं भंते! ति।

**\*सत्तमसए सत्तमो उद्देशओ समतो\***

**० अट्ठमो उद्देशो ०**

**[३६५]**छउमत्थे णं भंते! मणुस्से तीयमणंतं सासयं समयं केवलेणं संजमेणं एवं जहा

पढमसते चउत्थे उद्देशए तहा भाणियच्चं जाव अलमत्थु।

[३६६] से नूणं भंते! हत्थिस्स य कुंथुस्स य समे चेव जीवे? हंता, गोयमा! हत्थिस्स य कुंथुस्स य एवं जहा रायपसेणइज्जे जाव खुड्डियं वा, महालियं वा, से तेणट्ठेणं गोयमा! जाव समे चेव जीवे।

[३६७]नेरइयाणं भंते! पावे कम्मं जे य कडे, जे य कज्जति, जे य कज्जिस्सति सव्वे से दुक्खे? जे निज्जिण्णे से णं सुहे? हंता, गोयमा! नेरइयाणं पावे कम्मं जाव सुहे।

एवं जाव वेमाणियाणं।

[३६८]कति णं भंते! सण्णाओ पण्णत्ताओ? गोयमा! दस सण्णाओ पण्णत्ताओ, तं जहा-आहारसण्णा, भयसण्णा, मेहुणसण्णा, परिग्गहसण्णा, कोहसण्णा, माणसण्णा, मायासण्णा, लोभसण्णा, ओहसण्णा, लोणसण्णा।

एवं जाव वेमाणियाणं।

नेरइया दसविहं वेयणं पच्चणुभवमाणा विहरंति, तं जहा-सीतं उसिणं खुहं पिवासं कंडुं परज्झं जरं दाहं भयं सोगं।

[३६९]से नूणं भंते! हत्थिस्स य कुंथुस्स य समा चेव अपच्चक्खाणकिरिया कज्जति? हंता, गोयमा! हत्थिस्स य कुंथुस्स य जाव कज्जति।

से केणट्ठेणं भंते! एवं वुच्चइ जाव कज्जति? गोयमा! अविरतिं पडुच्च। से तेणट्ठेणं जाव कज्जति।

[३७०]आहाकम्मं णं भंते! भुंजमाणे किं बंधति? किं पकरेति? किं चिणाति? किं उवचिणाति? एवं जहा पढमे सते नवमे उद्देशए तहा भाणियच्चं जाव सासते पंडिते, पंडिततं असासयं।

सेवं भंते! सेवं भंते! ति.!

**\*सतम सए अट्ठमो उद्देशो समतो\***

## ० नवमो उद्देशो ०

[३७१]असंवुडे णं भंते! अणगारे बाहिरए पोग्गले अपरियादिइत्ता पभू एगवण्णं एगरूवं विउच्चित्तए? णो इणट्ठे समट्ठे।

असंवुडे णं भंते! अणगारे बाहिरए पोग्गले परियादिइत्ता पभू एगवण्णं एगरूवं जाव हंता, पभू।

से भंते! किं इहगते पोग्गले परियादिइत्ता विउच्चइ? तत्थगए पोग्गले परियादिइत्ता विउच्चइ? अन्नत्थगए पोग्गले परियादिइत्ता विउच्चइ? गोयमा! इहगए पोग्गले परियादिइत्ता विकुच्चइ, नो तत्थगए पोग्गले परियादिइत्ता विकुच्चइ, नो अन्नत्थगए पोग्गले जाव विकुच्चइ।

एवं एगवण्णं अणेगरूवं चउभंगो जहा छट्ठसए नवमे उद्देशए तहा इहावि भाणियच्चं। नवरं अणगारे इहगए इहगए चेव पोग्गले परियादिइत्ता विकुच्चइ। सेसं तं चेव जाव लुक्खपोग्गलं निद्धपोग्गलत्ताए परिणामेत्तए? हंता, पभू।

से भंते! किं इहगए पोग्गले परियादिइत्ता जाव नो अन्नत्थगए पोग्गले परियादिइत्ता

विकुव्वइ।

[३७२]णायमेतं अरहता, सुयमेतं अरहया, विण्णायमेतं अरहया, महासिलाकंए संगामे महासिलाकंए संगामे। महासिलाकंए णं भंते! संगामे वट्ठमाणे के जयित्था? के पराजइत्था? गोयमा! वज्जी विदेहपुते जइत्था, नव मल्लई नव लेच्छई कासी-कोसलगा-अट्ठारस वि गणरायाणो पराजइत्था।

तए णं से कूणिए राया महासिलाकंए संगामं उवट्ठियं जाणेत्ता कोडुंबियपुरिसे सद्दावेइ, सद्दावेत्ता एवं वयासी-खिप्पामेव भो देवाणुप्पिया! उदाइं हत्थिरायं परिकप्पेह, हय-गय-रह-जोहकलियं चातुरंगिणिं सेणं सन्नाहेह, सन्नाहेत्ता जाव मम एतमाणत्तियं खिप्पामेव पच्चप्पिणह।

तए णं ते कोडुंबियपुरिसा कूणिएणं रण्णा एवं वुत्ता समाणा हट्ठतुट्ठा जाव अंजलिं कट्ठु एवं सामी! तहत्ति आणाए विणएणं वयणं पडिसुणंति, पडिसुणिता खिप्पामेव छेयायरियोवएसमति कप्पणाविकप्पेहिं सुनिउणेहिं एवं जहा उववातिए जाव भीमं संगामियं अउज्झं उदाइं हत्थिरायं परिकप्पेत्ति हय-गय जाव सन्नाहेत्ति, सन्नाहिता जेणेव कूणिय राया तेणेव उवा०, तेणेव २ करयल. कूणियस्स रण्णो तमाणत्तियं पच्चप्पिणंति।

तए णं से कूणिए राया जेणेव मज्जणघरे तेणेव उवा०, २ ता मज्जणघरं अणुप्पविसति, मज्जण. २ ण्हाते कतबलिकम्मे कयकोतुयमंगलपायच्छित्ते सत्त्वालंकारविभूसिए सन्नद्धबद्धवम्मियकवए उप्पीलियसरासणपट्टिए पिणद्धगेवेज्जविमलवरबद्धचिंधपट्टो गहियायुहप्पहरणे सकोरेणमल्लदामेणं छत्तेणं धरिज्जमाणेणं चउचामरवालवीइतंगे मंगलजयसद्दकतालोए एवं जहा उववातिए जाव उवागच्छित्ता उदाइं हत्थिरायं दुरूढे।

तए णं से कूणिए नरिंदे हारोत्थयसुकयरतियवच्छे जहा उववातिए जाव सेयवरचामराहिं उडुव्वमाणीहिं उडुव्वमणीहिं हय-गय-रह-पवरजोहकलिताए चातुरंगिणीए सेणाए सद्धिं संपरिवुडे महया भडचडगरवंदपरिक्खित्ते जेणेव महासिलाकंए संगामे तेणेव उवागच्छइ, तेणेव उवागच्छित्ता महासिलाकंएयं संगामं ओयाए, पुरओ य से सक्के देविंदे देवराया एगं महं अभेज्जकवयं वइरपडिरूवगं विउट्ठित्ताणं चिट्ठति। एवं खलु दो इंदा संगामं संगामेत्ति, तं जहा देविंदे य मणुइंदे य, एगहत्थिणा वि णं पभू कूणिए राया पराजिणित्तए।

तए णं से कूणिए राया महासिलाकंएकं संगामं संगामेमाणे नव मल्लई, नव लेच्छई, कासी कोसलगा अट्ठारस वि गणरायाणो हयमहियपवरवीरघातियविवडियचिंधधय-पडागे किच्छप्पाणगते दिसो दिसिं पडिसेहेत्था।

से केणट्ठेणं भंते! एवं वुच्चति 'महासिलाकंए संगामे महासिलाकंए संगामे'? गोयमा! महासिलाकंए णं संगामे वट्ठमाणे जे तत्थ आसे वा हत्थी वा जोहे वा सारही वा तणेण वा कट्ठेण वा पतेण वा सक्कराए वा अभिहम्मति सत्त्वे से जाणति 'महासिलाए अहं अभिहते महासिलाए अहं अभिहते'; से तेणट्ठेणं गोयमा! महासिलाकंए संगामे महासिलाकंए संगामे।

महासिलाकंए णं भंते! संगामे वट्ठमाणे कति जणसतसाहस्सीओ वहियाओ? गोयमा! चउरासीतिं जणसतसाहस्सीओ वहियाओ।

ते णं भंते! मणुया निस्सीला जाव निप्पच्चक्खाणपोसहोववासा सारुत्ठा परिकुविया समरवहिया अणुवसंता कालमासे कालं किच्चा कहिं गता? कहिं उववन्ना? गोयमा! ओसन्नं नरग-

तिरिक्खजोणिएसु उववन्ना।

**[३७३]**णायमेतं अरहया, सुतमेतं अरहता, विण्णायमेतं अरहता रहमुसले संगामे रहमुसले संगामे। रहमुसले णं भंते! संगामे वट्ठमाणे के जइत्था? के पराजइत्था? गोयमा! वज्जी विदेहपुते चमरे य असुरिंदे असुरकुमारराया जइत्था, नव मल्लई नव लेच्छई पराजइत्था।

तए णं से कूणिए राया रहमुसलं संगामं उवट्ठितं., सेसं जहा महासिलाकंए, नवरं भूताणंदे हत्थिराया जाव रहमुसलं संगामं ओयाए, पुरतो य से सक्के देविंदे देवराया। एवं तहेव जाव चिट्ठति, मग्गतो य से चमरे असुरिंदे असुरकुमारराया एगं महं आयसं किट्ठिणपडिरूवगं विठत्थिताणं चिट्ठति, एवं खलु तओ इंदा संगामं संगामेति, तं जहा-देविंदे मणुइंदे असुरिंदे य। एगहत्थिणा वि णं पभू कूणिए राया जइत्तए तहेव जाव दिसो दिसिं पडिसेहेत्था।

से केणट्ठेणं भंते! एवं वुच्चति रहमुसले संगामे रहमुसले संगामे? गोयमा! रहमुसले णं संगामे वट्ठमाणे एगे रहे अणासए असारहिए अणारोहए समुसले महताजणक्खयं जणवहं जणप्पमदं जणसंवट्ठकप्पं रुहिरकद्धमं करेमाणे सच्चतो समंता परिधावित्था; से तेणट्ठेणं जाव रहमुसले संगामे।

रहमुसले णं भंते! संगामे वट्ठमाणे कति जणसयसाहस्सीओ वहियाओ? गोयमा! छण्णउतिं जणसयसाहस्सीओ वहियाओ।

ते णं भंते! मणुया निस्सीला जाव उववन्ना? गोयमा! तत्थ णं दस साहस्सीओ एगाए मच्छियाए कुच्छंसि उववन्नाओ, एगे देवलोगेसु उववन्ने, एगे सुकुले पच्चायाते, अवसेसा ओसन्नं नरग-तिरिक्खजोणिएसु उववन्ना।

**[३७४]**कम्हा णं भंते! सक्के देविंदे देवराया, चमरेय असुरिंदे असुरकुमारराया कूणियस्स रण्णो साहज्जं दलइत्था? गोयमा! सक्के देविंदे देवराया पुच्चसंगतिए, चमरे असुरिंदे असुरकुमारराया परियायसंगतिए, एवं खलु गोयमा! सक्के देविंदे देवराया, चमरे य असुरिंदे असुरकुमारराया कूणियस्स रण्णो साहज्जं दलइत्था।

**[३७५]**बहुजणे णं भंते! अन्नमन्नस्स एवमाइक्खति जाव परूवेति एवं खलु बहुवे मणुस्सा अन्नतरेसु उच्चावएसु संगामेसु अभिमुहा चेव पहया समाणा कालमासे कालं किच्चा अन्नयरेसु देवलोएसु देवताए उववतारो भवंति। से कहमेतं भंते! एवं? गोयमा! जं णं से बहुजणे अन्नमन्नस्स एवमाइक्खति जाव उववतारो भवंति, जे ते एवमाहंसु मिच्छं ते एवमाहंसु, अहं पुण गोयमा! एवमाइक्खामि जाव परूवेमि-

एवं खलु गोयमा! तेणं कालेणं तेणं समएणं वेसाली नामं नगरी होत्था। वण्णओ। तत्थ णं वेसालीए णगरीए वरुणे नामं णागनत्तुए परिवसति अइडे जाव अपरिभूते समणोवासए अभिगतजीवाजीवे जाव पडिलाभेमाणे छट्ठंछट्ठेणं अणिकिखत्तेणं तवोकम्मणेणं अप्पाणं भावेमाणे विहरति।

तए णं से वरुणे णागनत्तुए अन्नया कयाई रायाभिओगेणं गणाभिओगेणं बलाभिओगेणं रहमुसले संगामे आणत्ते समाणे छट्ठभत्तिए, अट्ठमभत्तं अणुवट्ठेति, अट्ठमभत्तं अणुवट्ठेता कोडुंबियपरुसे सद्दावेति, सद्दावेता एवं वदासी-खिप्पामेव भो! देवाणुप्पिया! चातुग्घं आसरहं जुत्तामेव उवट्ठावेह हय-गय-रहपवर जाव सन्नाहेत्ता मम एतमाणत्तियं पच्चप्पिणह।

तए णं ते कोडुंबियपुरिसा जाव पडिसुणेता खिप्पामेव सच्छत्तं सज्झयं जाव उवट्ठावेति, हय-गय-रह जाव सन्नाहेति, सन्नाहिता जेणेव वरुणे नागनत्तुए जाव पच्चप्पिणंति।

तए णं से वरुणे नागनत्तुए जेणेव मज्जणघरे तेणेव उवागच्छति, तेणेव उवागच्छिता जहा कूणिओ जाव पायच्छित्ते सव्वालंकारविभूसिते सन्नद्धबद्ध. सकोरेंमल्लदामेणं जाव धरिज्जमाणेणं अणेग गणनायग जाव दूयसंधिवाल सद्धिं संपरिवुडे मज्जणघरातो पडिनिक्खमति, पडिनिक्खमिता जेणेव बाहिरिया उवट्ठाणसाला जेणेव चातुघंठो आसरहे तेणेव उवागच्छइ, तेणेव उवागच्छिता चातुघंठो आसरहं द्रूहति, चाउग्घंठो रहं द्रूहेता हय-गय-रह जाव संपरिवुडे महता भडचडगर जाव परिक्खित्ते जेणेव रहमुसले संगामे तेणेव उवागच्छइ, उवागच्छिता रहमुसलं संगामं ओयाते।

तए णं से वरुणे णागनत्तुए रहमुसलं संगामं ओयाते समाणे अयमेयारूवं अभिग्गहं अभिगिण्हइ-कप्पति मे रहमुसलं संगामं संगामेमाणस्स जे पुट्ठिं पहणति से पडिहणितए, अवसेसे नो कप्पतीति। अयमेतारूवं अभिग्गहं अभिगिण्हिता रहमुसलं संगामं संगामेति।

तए णं तस्स वरुणस्स नागनत्तुयस्स रहमुसलं संगामं संगामेमाणस्स एगे पुरिसे सरिसए सरित्तए सरिच्चए सरिसभंडमतोवगरणे रहेणं पडिरहं हव्वमागते।

तए णं से पुरिसे वरुणं णागणत्तुयं एवं वयासी-पहण भो! वरुणा! णागणत्तुया! पहण भो! वरुणा! णागणत्तुया!। तए णं से वरुणे णागणत्तुए तं पुरिसं एवं वदासि-नो खलु मे कप्पति देवाणुप्पिया! पुट्ठिं अहयस्स पहणितए, तुमं चैव पुट्ठिं पहणाहि।

तए णं से पुरिसे वरुणेणं णागणत्तुएणं एवं वुत्ते समाणे आसुरुते जाव मिसिमिसेमाणे धणुं परामुसति, धणुं परामुसिता उसुं परामुसति, उसुं परामुसिता ठाणं ठाति, ठाणं ठिच्चा आयतकण्णायतं उसुं करेति, आयतकण्णायतं उसुं करेता वरुणं णागणत्तुयं गाढप्पहारीकरेति।

तए णं से वरुणे णागणत्तुए तेणं पुरिसेणं गाढप्पहारीकए समाणे आसुरुते जाव मिसिमिसेमाणे धणुं परामुसति, धणुं परामुसिता उसुं परामुसति, उसुं परामुसिता, आयतकण्णायतं उसुं करेति, आयतकण्णायतं उसुं करेता तं पुरिसं एगाहच्चं कूडाहच्चं जीवियातो ववरोवेति।

तए णं से वरुणे नागणत्तुए तेणं पुरिसेणं गाढप्पहारीकते समाणे अत्थामे अबले अवीरिए अपुरिसक्कारपरक्कमे अधारणिज्जमिति कट्ठु तुरए निगिण्हति, तुरए निगिण्हिता रहं परावत्तेइ, रहं परावत्तेता रहमुसलातो संगामातो पडिनिक्खमति, रहमुसलाओ संगामातो पडिनिक्खमेता एगंतमंतं अवक्कमति, एगंतमंतं अवक्कमिता तुरए निगिण्हति, निगिण्हिता रहं ठवेति, २ ता रहातो पच्चोरुहति, रहातो पच्चोरुहिता रहाओ तुरए मोएति, २ तुरए विसज्जेति, विसज्जिता दब्भसंथारगं संथरेति, संथरिता दब्भसंथारगं द्रूहति, दब्भसं० द्रूहेता पुरत्थाभिमुहे संपलियंकनिसण्णे करयल जाव कट्ठु एवं वयासी-

नमोऽत्थु णं अरहंताणं जाव संपताणं। नमोऽत्थु णं समणस्स भगवओ महावीरस्स आइगरस्स जाव संपाविठकामस्स मम धम्मयारियस्स धम्मोवदेसगस्स। वंदामि णं भगवंतं तत्थगतं इहगते, पासउ मे से भगवं तत्थगते; जाव वंदति नमंसति, वंदिता नमंसिता एवं वयासी-पुट्ठिं पि णं मए समणस्स भगवतो महावीरस्स अंतियं थूलए पाणातिवाते पच्चक्खाए जावज्जीवाए एवं जाव थूलए परिग्गहे पच्चक्खाते जावज्जीवाए, इयाणिं पि णं अहं तस्सेव भगवतो महावीरस्स अंतियं सव्वं पाणातिवायं पच्चक्खामि जावज्जीवाए, एवं जहा खंदओ जाव एतं पि णं चरिमेहिं उस्सास-णिस्सासेहिं वोसिरिस्सामि' ति कट्ठु सन्नाहपट्ठं मुयति, सन्नाहपट्ठं मुइता सल्लुद्धरणं करेति, सल्लुद्धरणं करेता आलोइय-पडिक्कंते समाहिसते आणुपुट्ठीए कालगते।

तए णं तस्स वरुणस्स नागनत्तुयस्स एगे पियबालवयंसए रहमुसलं संगामं संगामेमाणे एगेणं पुरिसेणं गाढप्पहारीकए समाणे अत्थामे अबले जाव अधारणिज्जमिति कट्पु वरुणं नागनत्तुयं रहमुसलातो संगामातो पडिनिक्खममाणं पासति, पासिता तुरए निगिण्हति, तुरए निगिण्हिता जहा वरुणे नागनत्तुए जाव तुरए विसज्जेति, विसज्जिता दब्भसंथारगं दुरुहति, दब्भसंथारगं दुरुहति, दब्भसंथारगं दुरुहिता पुरत्थाभिमुहे जाव अंजलिं कट्पु एवं वदासी-जाइं णं भंते! मम पियबालवयंसस्स वरुणस्स नागनत्तुयस्स सीलाइं वताइं गुणाइं वेरमणाइं पच्चक्खाणपोसहोववासाइं ताइं णं ममं पि भवंतु ति कट्पु सन्नाहपट्ठं मुयइ, सन्नाहपट्ठं मुइता सल्लुद्धरणं करेति, सल्लुद्धरणं करेता आणुपुव्वीए कालगते।

तए णं तं वरुणं नागणत्तुयं कालगयं जाणित्ता अहासन्निहितेहिं वाणमंतरेहिं देवेहिं दिव्वे सुरभिगंधोदगवासे वुट्ठे, दसद्धवण्णे कुसुमे निवाडिए, दिव्वे य गीयगंधव्वनिनादे कते यावि होत्था।

तए णं तस्स वरुणस्स नागनत्तुयस्स तं दिव्वं देविड्ढं दिव्वं देवजुइं दिव्वं देवाणुभाणं सुणित्ता य पासिता य बहुजणो अन्नमन्नस्स एवमाइक्खइ जाव परुवेति-एवं खलु देवाणुप्पिया! बहवे मणुस्सा जाव उववतारो भवंति।

**[३७६]**वरुणे णं भंते! नागनत्तुए कालमासे कालं किच्चा कहिं गते? कहिं उववन्ने? गोयमा! सोहम्मं कप्पे अरुणाभे विमाणे देवताए उववन्ने। तत्थ णं अत्थेगइयाणं देवाणं चत्तारि पलिओवमाइं ठिती पण्णत्ता। तत्थ णं वरुणस्स वि देवस्स चत्तारि पलिओवमाइं ठिती पण्णत्ता।

से णं भंते! वरुणे देवे ताओ देवलोगातो आउक्खएणं भवक्खएणं ठित्तिक्खएणं.? जाव महाविदेहे वासे सिज्झिहिति जाव अंतं काहिति।

वरुणस्स णं भंते! नागणत्तुयस्स पियबालवयंसए कालमासे कालं किच्चा कहिं गते? कहिं उववन्ने? गोयमा! सुकुले पच्चायाते।

से णं भंते! ततोहितो अणंतरं उव्वट्ठित्ता कहिं गच्छिहिति? कहिं उववज्जिहिति? गोयमा! महाविदेहे वासे सिज्झिहिति जाव अंतं काहिति।

सेवं भंते! सेवं भंते! ति.!

**\*सत्तम एए नवमो उद्देशो समतो\***

## ० दसमो उद्देशो ०

**[३७७]**तेणं कालेणं तेणं समएणं रायगिहे नामं नगरे होत्था। वण्णओ। गुणसिलए चेइए। वण्णओ। जाव पुढविसिलापट्ठए। वण्णओ।

तस्स णं गुणसिलयस्स चेतियस्स अदूरसामंते बहवे अन्नउत्थिया परिवसंति; तं जहा-कालोदाई सेलोदाई सेवालोदाई उदए णामुदए नम्ममुदए अन्नवालए सेलवालए सुहत्थी गाहावई।

तए णं तेसिं अन्नउत्थियाणं अन्नया कयाई एगयओ सहियाणं समुवागताणं सन्निविट्ठाणं सन्निसण्णाणं अयमेयारूवे मिहोकहासमुल्लावे समुप्पज्जित्था- एवं खलु समणे णातपुत्ते पंच अत्थिकाए पण्णवेति, तं जहा-धम्मत्थिकायं जाव आगासत्थिकायं। तत्थ णं समणे णातपुत्ते चत्तारि अत्थिकाए अजीवकाए पण्णवेति, तं- धम्मत्थिकायं अधम्मत्थिकायं आगासत्थिकायं पोग्गलत्थिकायं। एगं च समणे णायपुत्ते जावत्थइकायं अरुविकायं जीवकायं पन्नवेति। तत्थ णं समणे णायपुत्ते चत्तारि अत्थिकाए

अरुविकाए पन्नवेति, तं जहा-धम्मत्थिकायं अधम्मत्थिकायं आगासत्थिकायं जीवत्थिकायं। एगं च णं समणे णायपुत्ते पोग्गलत्थिकायं रूविकायं अजीवकायं पन्नवेति। से कहमेतं मन्ने एवं?।

तेणं कालेणं तेणं समएणं समणे भगवं महावीरे जाव गुणसिलए समोसढे जाव परिसा पडिगता।

तेणं कालेणं तेणं समएणं समणस्स भगवतो महावीरस्स जेट्ठे अंतेवासी इंदभूती णामं अणगारे गोतमगोतेणं एवं जहा बितियसते नियंतुद्देसए जाव भिक्खायरियाए अडमाणे अहापज्जतं भत्त-पाणं पडिग्गहिता रायगिहातो जाव अतुरियमचवलसंभंते जाव रियं सोहेमाणे सोहेमाणे तेसिं अन्नउत्थियाणं अदूरसामंतेणं वीइवयति।

तए णं ते अन्नउत्थिया भगवं गोयमं अदूरसामंतेणं वीइवयमाणं पासंति, पासेता अन्नमन्नं सद्दावेंति, अन्नमन्नं सद्दावेता एवं वयासी-"एवं खलु देवाणुप्पिया! अम्हं इमा कहा अविप्पकडा, अयं च णं गोतमे अम्हं अदूरसामंतेणं वीतीवयति, तं सेयं खलु देवाणुप्पिया! अम्हं गोतमं एयमट्ठं पुच्छित्तए" ति कट्पु अन्नमन्नस्स अंतियं एयमट्ठं पडिसुणेंति, अण्णमण्णस्स अंतियं एयमट्ठं पडिसुणित्ता जेणेव भगवं गोतमे तेणेव उवागच्छंति, तेणेव उवागच्छित्ता भगवं गोतमं एवं वदासी-एवं खलु गोयमा! तव धम्मायरिए धम्मोवदेसए समणे णायपुत्ते पंच अत्थिकाए पण्णवेति, तं जहा-धम्मत्थिकायं जाव आगासत्थिकायं, तं चेव जाव रूविकायं अजीवकायं पण्णवेति, से कहमेयं गोयमा! एवं?

तए णं से भगवं गोतमे ते अन्नउत्थिए एवं वयासी-"नो खलु वयं देवाणुप्पिया! अत्थिभावं 'नत्थि'ति वदामो, नत्थिभावं 'अत्थि'ति वदामो। अम्हे णं देवाणुप्पिया! सव्वं अत्थिभावं 'अत्थी'ति वदामो, सव्वं नत्थिभावं 'नत्थी'ति वदामो। तं चेदसा खलु तुब्भे देवाणुप्पिया! एतमट्ठं सयमेव पच्चुविकखह" ति कट्पु ते अन्नउत्थिए एवं वदति। एवं वदित्ता जेणेव गुणसिलए चेतिए जेणेव समणे भगवं० एवं जहा नियंतुद्देसए

जाव भत्त-पाणं पडिदंसेति, भत्त-पाणं पडिदंसेता समणं भगवं महावीरं वंदति नमंसति, वंदित्ता नमंसित्ता नच्चासन्ने जाव पज्जुवासति।

तेणं कालेणं तेणं समएणं समणे भगवं महावीरे महाकहापडिवन्ने यावि होत्था, कालोदाई य तं देसं हव्वमागए।

कालोदाई ति समणे भगवं महावीरे कालोदाइं एवं वदासी-"से नूणं ते कालोदाई! अन्नया कयाई एगयओ सहियाणं समुवागताणं सन्नविट्ठाणं तहेव जाव से कहमेतं मन्ने एवं? से नूणं कालोदाई! अत्थे समट्ठे? हंता, अत्थि। तं सच्चे णं एसमट्ठे कालोदाई!, अहं पंच अत्थिकाए पण्णवेमि, तं जहा-धम्मत्थिकायं जाव पोग्गलत्थिकायं। तत्थ णं अहं चत्तारि अत्थिकाए अजीवकाए पण्णवेमि तहेव जाव एगं च णं अहं पोग्गलत्थिकायं रूविकायं पण्णवेमि।

तए णं से कालोदाई समणं भगवं महावीरं एवं वदासी-एयंसि णं भंते! धम्मत्थिकायंसि अधम्मत्थिकायंसि आगासत्थिकायंसि अरुविकायंसि अजीवकायंसि चक्किया केइ आसइत्तए वा सइत्तए वा चिट्ठित्तए वा निसीदित्तए वा तुयट्ठित्तए वा? णो इणट्ठे समट्ठे कालोदाई! एगंसि णं पोग्गलत्थिकायंसि रूविकायंसि अजीवकायंसि चक्किया केइ आसइत्तए वा सइत्तए वा जाव तुयट्ठित्तए वा।

एयंसि णं भंते! पोग्गलत्थिकायंसि रूविकायंसि अजीवकायंसि जीवाणं पावा कम्मा

पावफलविवागसंजुता कज्जंति? णो इणट्ठे समट्ठे कालोदाई।।

एयंसि णं जीवत्थिकायंसि अरुविकायंसि जीवकायंसि जीवाणं पावा कम्मा पावफलविवागसंजुता कज्जंति? हंता, कज्जंति।

एत्थ णं से कालोदाई संबुद्धे समणं भगवं महावीरं वंदति नमंसति, वंदिता नमंसिता एवं वयासी-इच्छामि णं भंते! तुब्भं अंतिए धम्मं निसामित्तए एवं जहा खंदए तहेव पव्वइए, तहेव एक्कारस अंगाइं जाव विहरति।

**[३७८]**तए णं समणे भगवं महावीरे अन्नया कयाइं रायगिहातो णगरातो गुणसिल◦ पडिनिक्खमति, २ बहिया जणवयविहारं विहरइ।

तेणं कालेणं तेणं समएणं रायगिहे नामं नगरे, गुणसिलए चेइए। तए णं समणे भगवं महावीरे अन्नया कयाइं जाव समोसडे, परिसा जाव पडिगता।

तए णं से कालोदाई अणगारे अन्नया कयाई जेणेव समणे भगवं महावीरे तेणेव उवागच्छइ, उवागच्छिता समणं भगवं महावीरं वंदइ नमंसइ, वंदिता नमंसिता एवं वदासि-अत्थि णं भंते! जीवाणं पावा कम्मा पावफलविवागसंजुता कज्जंति? हंता, अत्थि।

कहं णं भंते! जीवाणं पावा कम्मा पावफलविवागसंजुता कज्जंति? कालोदाई! से जहानामए केइ पुरिसे मणुण्णं थालीपागसुद्धं अट्ठारसवंजणाकुलं विससंमिस्सं भोजणं भुजेज्जा, तस्स णं भोयणस्स आवाते भद्दए भवति, ततो पच्छा परिणममाणे परिणममाणे दुरूवताए दुवण्णताए दुग्गंधताए जहा महस्सवए जाव भुज्जो भुज्जो परिणमति, एवामेव कालोदाई! जीवाणं पाणातिवाए जाव मिच्छादंसणसल्ले, तस्स णं आवाते भद्दए भवइ, ततो पच्छा परिणममाणे परिणममाणे दुरूवताए जाव भुज्जो भुज्जो परिणमति, एवं खलु कालोदाई! जीवाणं पावा कम्मा पावफलविवाग. जाव कज्जंति।

अत्थि णं भंते! जीवाणं कल्लाणा कम्मा कल्लाणफलविवागसंजुता कज्जंति? हंता, कज्जंति।

कहं णं भंते! जीवाणं कल्लाणा कम्मा जाव कज्जंति? कालोदाई! से जहानामए केइ पुरिसे मणुण्णं थालीपागसुद्धं अट्ठारसवंजणाकुलं ओसहसम्मिस्सं भोयणं भुजेज्जा, तस्स णं भोयणस्स आवाते णो भद्दए भवति, तओ पच्छा परिणममाणे परिणममाणे सुरूवताए सुवण्णताए जाव सुहताए, नो दुक्खताए भुज्जो भुज्जो परिणमति। एवामेव कालोदाई! जीवाणं पाणातिवातवेरमणे जाव परिग्गहवेरमणे कोहविवेगे जाव मिच्छादंसणसल्लविवेगे तस्स णं आवाए नो भद्दए भवइ, ततो पच्छा परिणममाणे परिणममाणे सुरूवताए जाव सुहताए, नो दुक्खताए भुज्जो भुज्जो परिणमइ; एवं खलु कालोदाई! जीवाणं कल्लाणा कम्मा जाव कज्जंति।

**[३७९]**दो भंते! पुरिसा सरिसया जाव सरिसभंडमतोवगरणा अन्नमन्नेणं सद्धिं अगणिकायं समारभंति, तत्थ णं एगे पुरिसे अगणिकायं उज्जालेति, एघे पुरिसे अगणिकायं निव्वावेति। एतेसि णं भंते! दोण्हं पुरिसाणं कतरे पुरिसे महाकम्मतराए चेव, महाकिरितराए चेव, महासवतराए चेव, महावेदणतराए चेव? कतरे वा पुरिसे अप्पकम्मतराए चेव जाव अप्पवेदणतराए चेव? जे वा से पुरिसे अगणिकायं उज्जालेति, जे वा से पुरिसे अगणिकायं निव्वावेति? कालोदाई! तत्थ णं जे से पुरिसे अगणिकायं उज्जालेति से णं पुरिसे महाकम्मतराए चेव जाव महावेदणतराए चेव। तत्थ णं जे से पुरिसे अगणिकायं निव्वावेति से णं पुरिसे अप्पकम्मतराए चेव जाव अप्पवेयणतराए चेव।

से केणट्ठेणं भंते! एवं वुच्चइ-‘तत्थ णं जे से पुरिसे जाव अप्पवेयणतराए चेव’? कालोदाई! तत्थ णं जे से पुरिसे अगणिकायं उज्जालेति से णं पुरिसे बहुतरागं पुडविकायं समारभति, बहुतरागं आउक्कायं समारभति, अप्पतरागं तेउकायं समारभति, बहुतरागं वाउकायं समारभति, बहुतरागं वण्णस्सतिकायं समारभति, बहुतरागं तसकायं समारभति। तत्थ णं जे से पुरिसे अगणिकायं निव्वावेति से णं पुरिसे अप्पतरागं पुडविकायं समारभति, अप्प. आउ., बहुतरागं तेउक्कायं समारभति, अप्पतरागं वाउकायं समारभइ, अप्पतरागं वण्णस्सतिकायं समारभइ, अप्पतरागं, तसकायं समारभइ। से तेणट्ठेणं कालोदाई! जाव अप्पवेदणतराए चेव।

[३८०]अत्थि णं भंते! अचिता वि पोग्गला ओभासंति उज्जोवेति तवेति पभासंति? हंता, अत्थि।

कतरे णं भंते! ते अचिता वि पोग्गला ओभासंति जाव पभासंति? कालोदाई! कुद्धस्स अणगारस्स तेयलेस्सा निसट्ठा समाणी दूरं गंता दूरं निपतति, देसं गंता देसं निपतति, जहिं जहिं च णं सा निपतति तहिं तहिं च णं ते अचिता वि पोग्गला ओभासंति जाव पभासंति। एते णं कालोदायी! ते अचिता वि पोग्गला ओभासंति जाव पभासंति।

तए णं से कालोदाई अणगारे समणं भगवं महावीरं वंदति नमंसति, वंदिता नमंसिता बहूहिं चउत्थ-छट्ठसट्ठम जाव अप्पाणं भावेमाणे जहा पढमसए कालासवेसियपुते जाव सव्वदुक्खप्पहीणे।

सेवं भंते! सेवं भंते! ति।

**\*सत्तम सए दसमो उद्देशो समतो\***

**०-सत्तमं सतं समतं-०**

**० मुनि दीपरत्तसागरेण संशोधितः सम्पादितश्च सत्तमं सतं समतं ०**

**[ ] अट्ठमं सतं [ ]**

[३८१] पोग्गल, आसीविस, रुक्ख, किरिय, आजीव, फासुगमदते।  
पडिणीय, बंध, आराहणा य दस अट्ठमम्मि सते ॥

**० पढमो उद्देशो ०**

[३८२]रायगिहे जाव एवं वदासि-

कतिविहा णं भंते! पोग्गला पण्णत्ता? गोयमा! तिविहा पोग्गला पण्णत्ता, तं जहा-पयोगपरिणता मीससापरिणता वीससापरिणता।

[३८३]पयोगपरिणता णं भंते! पोग्गला कतिविहा पण्णत्ता? गोयमा! पंचविहा पण्णत्ता, तं जहा-एगिंदियपयोगपरिणता बेइंदियपयोगपरिणता जाव पंचिंदियपयोगपरिणता।

एगिंदियपयोगपरिणता णं भंते! पोग्गला कइविहा पण्णत्ता? गोयमा! पंचविहा पण्णत्ता, तं जहा-पुढविकाइयएगिंदियपयोगपरिणता जाव वण्णस्सतिकाइयएगिंदियपयोगपरिणता।

पुढविकाइयएगिंदियपयोगपरिणता णं भंते! पोग्गला कतिविहा पण्णत्ता? गोयमा! दुविहा पण्णत्ता, तं जहा- सुहुमपुढविकाइयएगिंदियपयोगपरिणता य बादरपुढविकाइयएगिंदियपयोगपरिणता य।

आउक्काइयएगिंदियपयोगपरिणता एवं चेव।

एवं दुयओ भेदो जाव वणस्सतिकाइयाणं य।  
बेइंदियपयोगपरिणताणं पुच्छा। गोयमा! अणेगविहा पण्णता।  
एवं तेइंदिय-चउरिंदियपयोगपरिणता वि।  
पंचिंदियपयोगपरिणताणं पुच्छा। गोयमा ! चतुव्विहा पण्णता, तं जहा- नेरतियपंचिंदिय  
पयोगपरिणता, तिरिक्ख., एवं मणुस्स., देवपंचिंदिय०।  
नेरइयपंचिंदियपयोग. पुच्छा। गोयमा! सत्तविहा पण्णता, तं जहा-रतणप्पभापुढवि  
नेरइयपंचिंदियपयोगपरिणता वि जाव अहेसत्तमपुढविनेरइयपंचिंदियपयोगपरिणता वि।  
तिरिक्खजोणियपंचिंदियपयोगपरिणताणं पुच्छा। गोयमा! तिविहा पण्णता, तं जहा-  
जलयरतिरिक्खजोणियपंचिंदिय० थलचरतिरिक्खजोणियपंचिंदिय. खहचरतिरिक्खपंचिंदिय।  
जलयतिरिक्खजोणियपयोग. पुच्छा। गोयमा! दुविहा पण्णता, तं जहा-सम्मुच्छिमचलचर.,  
गब्भवक्कंतियजलचर०।  
थलचरतिरिक्ख. पुच्छा। गोयमा! दुविहा पण्णता, तं जहाचउप्पदथलचर. परिसप्पथलचर।  
चउप्पदथलचर. पुच्छा। गोयमा! दुविहा पण्णता, तं जहा सम्मुच्छिमचउप्पदथलचर.,  
गब्भवक्कंतियचउप्पयथलचर।  
एवं एतेणं अभिलावेणं परिसप्पा दुविहा पण्णता, तं जहा-उरपरिसप्पा य, भुयपरिसप्पा य।  
उरपरिसप्पा दुविहा पण्णता, तं जहा-सम्मुच्छिमा य, गब्भवक्कंतिया य।  
एवं भुयपरिसप्पा वि।  
एवं खहचरा वि।  
मणुस्सपंचिंदियपयोग. पुच्छा। गोयमा! दुविहा पण्णता, तं जहा-सम्मुच्छिममणुस्स०  
गब्भवक्कंतियमणुस्स०।  
देवपंचिंदियपयोग. पुच्छा। गोयमा! चउव्विहा पण्णता, तं जहा-भवणवासिदेवपंचिंदियपयोग।  
एवं जाव वेमाणिया।  
भवणवासिदेवपंचिंदिय. पुच्छा। गोयमा! दसविहा पण्णता, तं जहा-असुरकुमार. जाव  
थणियकुमार।  
एवं एतेणं अभिलावेणं अट्ठविहा वाणमंतरा पिसाया जाव गंधव्वा।  
जोइसिया पंचविहा पण्णता, तं जहा-चंदविमाणजोतिसिय. जाव ताराविमाणजोतिसियदेव।  
वेमाणिया दुविहा पण्णता, तं जहा-कप्पोवग. कप्पातीतगवेमाणिय।  
कप्पोवगा दुवालसविहा पण्णता, तं जहा-सोहम्मकप्पोवग. जाव अच्चुयकप्पोवगवेमाणिया।  
कप्पातीत. दुविहा पण्णता, तं जहा-गेवेज्जगकप्पातीतवे. अणुत्तरोववाइयकप्पातीतवे।  
गेवेज्जगकप्पातीतगा नवविहा पण्णता, तं जहा-हेट्ठमहेट्ठमगेवेज्जगकप्पातीतगा जाव  
उवरिमउवरिमगेविज्जगकप्पातीतया।  
अणुत्तरोववाइय-कप्पातीतग-वेमाणियदेव-पंचिंदिय-पयोगपरिणया णं भंते ! पोग्गला कइविहा  
पण्णता ? गोयमा ! पंचविहा पण्णता, तं जहा- विजयअणुत्तरोववाइय. जाव परिणया जाव सव्वट्ठसिद्ध-  
अणुत्तरोववाइयदेवपंचिंदिय जाव परिणता।

सुहुमपुढविकाइयएगिंदियपयोगपरिणया णं भंते! पोग्गला कइविहा पण्णता? गोयमा! दुविहा पण्णता-केई अपज्जतगं पढमं भणंति, पच्छा पज्जतगं।-पज्जतगसुहुमपुढविकाइय जाव परिणया य अपज्जतगसुहुमपुढविकाइय जाव परिणया य।

बादरपुढविकाइयएगिंदिय.? एवं चेव।

एवं जाव वणस्सइकाइया। एक्केक्का दुविहा-सुहुमा य बादरा य, पज्जतगा अपज्जतगा य भाणियत्वा।

बेंदियपयोगपरिणयाणं पुच्छा। गोयमा ! दुविहा पण्णता, तं जहा-पज्जतबेंदिय-पयोगपरिणया य, अपज्जतग जाव परिणया य।

एवं तेइंदिया वि।

एवं चउरिंदिया वि।

रयणप्पभापुढविनेरइय. पुच्छा। गोयमा! दुविहा पण्णता, तं जहा-पज्जतगरयणप्पभापुढवि जाव परिणया य, अपज्जतग जाव परिणया य।

एवं जाव अहेसत्तमा।

सम्मच्छिमजलचरतिरिक्ख. पुच्छा। गोयमा! दुविहा पण्णता, तं जहा-पज्जतग. अपज्जतग.। एवं गब्भवक्कंतिया वि।

सम्मच्छिमचउप्पदथलचर.। एवं चेव। एवं गब्भवक्कंतिया य।

एवं जाव सम्मच्छिमखहयर. गब्भवक्कंतिया य एक्केक्के पज्जतगा य अपज्जतगा य भाणियत्वा।

सम्मच्छिममणुस्सपंचिंदिय. पुच्छा। गोयमा! एगविहा पन्नता-अपज्जतगा चेव।

गब्भवक्कंतियमणुस्सपंचिंदिय. पुच्छा। गोयमा ! दुविहा पण्णता, तं जहा- पज्जतगगब्भवक्कंतिया वि, अपज्जतगगब्भवक्कंतिया वि।

असुरकुमारभवणवासिदेवाणं पुच्छा। गोयमा! दुविहा पण्णता, तं जहा-पज्जतगअसुरकुमार. अपज्जतगअसुर.।

एवं जाव थणियकुमारा पज्जतगा अपज्जतगा य।

एवं एतेणं अभिलावेणं द्युएणं भेदेणं पिसाया य जाव गंधच्वा, चंदा जाव ताराविमाणा, सोहम्मकप्पोवगा जाव अच्चुओ, हिट्ठिमहिट्ठिमगेविज्जकप्पातीत जाव उवरिमउवरिमगेविज्ज. , विजयअणुत्तरो. जाव अपराजिय.।

सव्वट्ठसिद्धकप्पातीय. पुच्छा। गोयमा! दुविहा पण्णता, तं जहा- पज्जतगसव्वट्ठसिद्ध-अणुत्तरो अपज्जतगसव्वट्ठ जाव परिणया वि। २ दंडगा।

जे अपज्जतासुहुमपुढवीकाइयएगिंदियपयोगपरिणया ते ओरालियतेयाकम्मगसरीरप्पयोग-परिणया, जे पज्जतासुहुम. जाव परिणया ते ओरालियतेया-कम्मगसरीरप्पयोगपरिणया। एवं जाव चउरिंदिया पज्जता। नवरं जे पज्जतगबादरवाउकाइयएगिंदियपयोगपरिणया ते ओरालिए-वेउट्ठिय-तेयाकम्मसरीर जाव परिणता। सेसं तं चेव।

जे अपज्जतरयणप्पभापुढविनेरइयपंचिंदियपयोगपरिणया ते वेउट्ठिय-तेयाकम्मसरीरप्पयोग-

परिणया। एवं पज्जत्तया वि।

एवं जाव अहेसत्तमा।

जे अपज्जत्तगसम्मच्छिमजलचर जाव परिणया ते ओरालियतेया-कम्मासरीर जाव परिणया।

एवं पज्जत्तगा वि।

गळभवक्कंतिया अपज्जत्तया एवं चेव।

पज्जत्तयाणं एवं चेव, नवरं सरीरगाणि चत्तारि जहा बादरवाउक्काइयाणं पज्जत्तगाणं।

एवं जहा जलचरेसु चत्तारि आलावगा भाणिया एवं चउप्पदउरपरिसप्प- भुयपरिसप्प-खह्यरेसु

वि चत्तारि आलावगा भाणियत्वा।

जे सम्मुच्छिमणुस्सपंचिंदियपयोगपरिणया ते ओरालियतेया-कम्मासरीर जाव परिणया।

एवं गळभवक्कंतिया वि अप्पज्जत्तगा वि।

पज्जत्तगा वि एवं चेव, नवरं सरीरगाणि पंच भाणियत्वाणि।

जे अपज्जत्तगा असुरकुमारभवणवासि जहा नेरइया तहेव। एवं पज्जत्तगा वि।

एवं दुयएणं भेदेणं जाव थणियकुमारा।

एवं पिसाया जाव गंधत्वा, चंदा जाव ताराविमाणा, सोहम्मो कप्पो जाव अच्चुओ, हेट्ठिमहेट्ठिमगेवेज्ज जाव उवरिमउवरिमगेवेज्ज., विजयअणुत्तरोववाइए जाव सव्वट्ठसिद्धअणु., एक्केक्केणं दुयओ भेदो भाणियत्वो जाव जे पज्जत्तसव्वट्ठसिद्धअणुत्तरोववाइया जाव परिणया ते वेउत्त्विय-तेया-कम्मासरीरपयोगपरिणया। दंडगा ३।

जे अपज्जत्तासुहुमपुढविकाइयएगिंदियपयोगपरिणया ते फासिंदियपयोगपरिणया।

जे पज्जत्तासुहुमपुढविकाइया. एवं चेव।

जे अपज्जत्ताबादरपुढविकाइया. एवं चेव।

एवं पज्जत्तगा वि।

एवं चउक्कएणं भेदेणं जाव वणस्सइकाइया।

जे अपज्जत्ताबेइंदियपयोगपरिणया ते जिब्भिंदिय-फासिंदियपयोगपरिणया।

जे पज्जत्ताबेइंदिया एवं चेव।

एवं जाव चउरिंदिया, नवरं एक्केक्कं इंदियं वड्ढेयत्वं।

जे अपज्जत्तारयणप्पभापुढविनेरइयपंचिंदियपयोगपरिणया ते सोइंदिय-चक्खिंदिय-घाणिंदिय-जिब्भिंदिय-फासिंदियपयोगपरिणया।

एवं पज्जत्तगा वि।

एवं सव्वे भाणियत्वा तिरिक्खजोणिय-मणुस्स-देवा, जाव जे पज्जत्तासव्वट्ठसिद्ध अणुत्तरोव-वाइय जाव परिणया ते सोइंदिय-चक्खिंदिय जाव परिणया। [दंडगा] ४।

जे अपज्जत्तासुहुमपुढविकाइयएगिंदियओरालिय-तेय-कम्मासरीरपयोगपरिणया ते फासिंदिय-पयोगपरिणया। जे पज्जत्तासुहुम. एवं चेव।

बादर. अपज्जत्ता एवं चेव। एवं पज्जत्तगा वि।

एवं एएणं अभिलावेणं जस्स जति इंदियाणि सरीराणि य ताणि भाणियत्वाणि जाव जे

पज्जत्तासव्वट्ठसिद्धअणुत्तरोववाइय जाव देवपंचिंदियवेठव्विय-तेया-कम्मासरीरपयोगपरिणया ते सोइंदिय-चक्खिंदिय जाव फासिंदियपयोगपरिणया। [दंडगा] ५।

जे अपज्जत्तासुहुमपुढविकाइयएगिंदियपयोगपरिणया ते वण्णतो कालवण्णपरिणया वि, नील., लोहिय., हालिद्ध. सुक्किल.। गंधतो सुब्धिगंधपरिणया वि, दुब्धिगंधपरिणया वि। रसतो तित्तरसपरिणया वि, कडुयरसपरिणया वि, कसायरसप., अंबिलरसप., महुररसप.। फासतो कक्खडफासपरि. जाव लुक्खफासपरि.। संठाणतो परिमंडलसंठाणपरिणया वि वट्ठ. तंस. चउरंस. आयतसंठाणपरिणया वि।

जे पज्जत्तासुहुमपुढवि. एवं चेव।

एवं जहाऽऽणुपुव्वीए नेयव्वं जाव जे पज्जत्तासव्वट्ठसिद्धअणुत्तरोववाइय जाव परिणता ते वण्णतो कालवण्णपरिणया वि जाव आयतसंठाणपरिणया वि। [दंडगा] ६।

जे अपज्जत्तासुहुमपुढविकाइयए० एगिंदियओरालियतेयाकम्मासरीरपयोगपरिणया ते वण्णओ कालवण्णपरि० जाव आययसंठाणपरि० वि।

जे पज्जत्तासुहुमपुढवि. एवं चेव।

एवं जहाऽऽणुपुव्वीए नेयव्वं जस्स जति सरीराणि जाव जे पज्जत्तासव्वट्ठसिद्ध अणुत्तरोववाइयदेवपंचिंदियवेठव्विय-तेया-कम्मासरीर जाव परिणया ते वण्णओ कालवण्णपरिणया वि जाव आयतसंठाणपरिणया वि [दंडगा] ७।

जे अपज्जत्तासुहुमपुढविकाइयएगिंदियफासिंदियपयोगपरिणया ते वण्णओ कालवण्णपरिणया जाव आययसंठाणपरिणया वि।

जे पज्जत्तासुहुमपुढवि. एवं चेव।

एवं जहाऽऽणुपुव्वीए जस्स जति इंदियाणि तस्स तति भाणियव्वाणि जाव जे पज्जत्तासव्वट्ठसिद्धअणुत्तर जाव देवपंचिंदियसोइंदिय जाव फासिंदियपयोगपरिणया वि ते वण्णओ कालवण्णपरिणया जाव आययसंठाणपरिणया वि। [दंडगा] ८।

जे अपज्जत्तासुहुमपुढविकाइयएगिंदियओरालिए-तेया-कम्मासरीरफासिंदियपयोगपरिणया ते वण्णओ कालवण्णपरिणया वि जाव आयतसंठाणप० वि।

जे पज्जत्तासुहुमपुढवि० एवं चेव।

एवं जहाऽऽणुपुव्वीए जस्स जति सरीराणि इंदियाणि य तस्स तति भाणियव्वाणि जाव जे पज्जत्तासव्वट्ठसिद्धअणुत्तरोववाइया जाव देवपंचिंदियवेठव्विय-तेया-कम्मासोइंदिय जाव फासिंदियपयोगपरि. ते वण्णओ कालवण्णपरि. जाव आययसंठाणपरिणया वि। एवं एए नव दंडगा ९।

**[३८४]**मीसापरिणया णं भंते! पोग्गला कतिविहा पण्णत्ता? गोयमा! पंचविहा पण्णत्ता, तं जहा-एगिंदियमीसापरिणया जाव पंचिंदियमीसापरिणया।

एगिंदियमीसापरिणया णं भंते! पोग्गला कतिविहा पण्णत्ता? गोयमा! एवं जहा पओगपरिणएहिं नव दंडगा भणिया एवं मीसापरिणएहिं वि नव दंडगा भाणियव्वा, तहेव सव्वं निरवसेसं, नवरं अभिलावो 'मीसापरिणया' भाणियव्वं, सेसं तं चेव, जाव जे पज्जत्तासव्वट्ठसिद्धअणुत्तरो. जाव आययसंठाणपरिणया वि।

[३८५] वीससापरिणया णं भंते! पोग्गला कतिविहा पण्णत्ता? गोयमा! पंचविहा पण्णत्ता, तं जहा-वण्णपरिणया गंधपरिणया रसपरिणया फासपरिणया संठाणपरिणया। जे वण्णपरिणया ते पंचविहा पण्णत्ता, तं जहा-कालवण्णपरिणया जाव सुक्किलवण्णपरिणया। जे गंधपरिणया ते दुविहा पण्णत्ता, तं जहा-सुब्धिगंधपरिणया वि, दुब्धिगंधपरिणया वि। एवं जहा पण्णवणाए तहेव निरवसेसं जाव जे संठाणओ आयतसंठाणपरिणया ते वण्णओ कालवण्णपरिणया वि जाव लुक्खफासपरिणया वि।

[३८६] एगे भंते! दव्वे किं पयोगपरिणए? मीसापरिणए? वीससापरिणए? गोयमा! पयोगपरिणए वा, मीसापरिणए वा, वीससापरिणए वा।

जदि पयोगपरिणए किं मणप्पयोगपरिणए? वइप्पयोगपरिणए? कायप्पयोगपरिणए? गोयमा! मणप्पयोगपरिणए वा, वइप्पयोगपरिणए वा, कायप्पयोगपरिणए वा।

जदि मणप्पओगपरिणए किं सच्चमणप्पओगपरिणए? मोसमणप्पयोग? सच्चामोस-मणप्पयो? असच्चामोसमणप्पयो? गोयमा! सच्चमणप्पयोगपरिणए वा, मोसमणप्पयोग वा, सच्चामोस-मणप्प, असच्चामोसमणप्प वा।

जदि सच्चमणप्पओगप. किं आरंभसच्चमणप्पयो? अणारंभसच्चमणप्पयोगपरि? सारंभ सच्चमणप्पयोग? असारंभसच्चमण? समारंभसच्चमणप्पयोगपरि? असमारंभसच्चमणप्पयोगपरिणए? गोयमा! आरंभसच्चमणप्पओगपरिणए वा जाव असमारंभसच्चमणप्पयोगपरिणए वा।

जदि मोसमणप्पयोगपरिणए किं आरंभमोसमणप्पयोगपरिणए वा? एवं जहा सच्चेणं तहा मोसेण वि।

एवं सच्चमोसमणप्पयोगपरिणए वि। एवं असच्चामोसमणप्पयोगेण वि।

जदि वइप्पयोगपरिणए किं सच्चवइप्पयोगपरिणए मोसवयप्पयोगपरिणए? एवं जहा मणप्पयोगपरिणए तहा वयप्पयोगपरिणए वि जाव असमारंभवयप्पयोगपरिणए वा।

जदि कायप्पयोगपरिणए किं ओरालियसरीरकायप्पयोगपरिणए ?, ओरालियमीसासरीरकाय प्पयो?, वेउट्ठियसरीरकायप्प?, वेउट्ठियमीसासरीरकायप्पयोगपरिणए?, आहारगसरीरकायप्पओगपरिणए?, आहारकमीसासरीरकायप्पयोगपरिणए?, कम्मासरीरकायप्पओगपरिणए?, गोयमा! ओरालियसरीरकायप्पओग परिणए वा जाव कम्मासरीरकायप्पओगपरिणए वा।

जदि ओरालियसरीरकायप्पओगपरिणए किं एगिंदियओरालियसरीरकायप्पओगपरिणए जाव पंचिंदियओरालिय जाव परिण? गोयमा! एगिंदियओरालियसरीरकायप्पओगपरिणए वा बेंदिय जाव परिणए वा जाव पंचिंदिय जाव परिणए वा।

जदि एगिंदियओरालियसरीरकायप्पओगपरिणए किं पुढविकाइयएगिंदिय जाव परिणए जाव वणस्सइकाइयएगिंदियओरालियसरीरकायप्पओगपरिणए वा? गोयमा! पुढविकाइयएगिंदिय जाव पयोगपरिणए वा जाव वणस्सइकाइयएगिंदिय जाव परिणए वा।

जदि पुढविकाइयएगिंदियओरालियसरीर जाव परिणए किं सुहुमपुढविकाइय जाव परिणए? बादरपुढविकाइयएगिंदिय जाव परिणए? गोयमा! सुहुमपुढविकाइयएगिंदिय जाव परिणए वा, बादरपुढविकाइय जाव परिणए वा।

जदि सुहुमपुढविकाइय जाव परिणए किं पज्जत्तसुहुमपुढवि जाव परिणए? अपज्जत्तसु-

सुहुमपुढवी जाव परिणए? गोयमा! पज्जतसुहुमपुढविकाइय जाव परिणए वा, अपज्जतसुहुमपुढविकाइय जाव परिणए वा।

एवं बादरा वि।

एवं जाव वणस्सइकाइयाणं चउक्कओ भेदो।

बेइंदिय-तेइंदिय-चउरिंदियाणं दुयओ भेदो-पज्जतगा य, अपज्जतगा य।

जदि पंचिंदियओरालियसरीरकायप्पओगपरिणए किं तिरिक्खजोणियपंचिंदियओरालियसरीर-कायप्पओगपरिणए? मणुस्सपंचिंदिय जाव परिणए? गोयमा! तिरिक्खजोणिय जाव परिणए वा, मणुस्स पंचिंदिय जाव परिणए वा।

जइ तिरिक्खजोणिय जाव परिणए किं जलचरतिरिक्खजोणिय जाव परिणए वा? थलचर.? खहचर.? एवं चउक्कओ भेदो जाव खहचराणं।

जदि मणुस्सपंचिंदिय जाव परिणए किं सम्मुच्छिमणुस्सपंचिंदिय जाव परिणए? गब्भवक्कंतिय मणुस्स जाव परिणए? गोयमा! दोसु वि।

जदि गब्भवक्कंतियमणुस्स जाव परिणए किं पज्जतगब्भवक्कंतिय जाव परिणए? अपज्जतगब्भवक्कंतिय-मणुस्सपंचिंदिय-ओरालियसरीरकायप्पयोग-परिणए? गोयमा! पज्जतगब्भवक्कंतिय जाव परिणए वा, अपज्जतगब्भवक्कंतिय जाव परिणए।

जदि ओरालियमीसासरीरकायप्पओगपरिणए किं एगिंदियओरालियमीसासरीरकायप्पओग-परिणए? बेइंदिय जाव परिणए जाव पंचिंदियओरालिय जाव परिणए? गोयमा! एगिंदियओरालिय एवं जहा ओरालियसरीरकायप्पयोगपरिणएणं आलावगो भणिओ तहा ओरालियमीसासरीरकायप्पओगपरिणएण वि आलावगो भाणियव्वो, नवरं बायरवाउक्काइय-गब्भवक्कंतिय पंचिंदियतिरिक्खजोणिय-गब्भवक्कंतिय मणुस्साण य एएसि णं पज्जतापज्जतगाणं, सेसाणं अपज्जतगाणं ।

जदि वेउव्वियसरीरकायप्पयोगपरिणए किं एगिंदियवेउव्वियसरीरकायप्पओगपरिणए जाव पंचिंदियवेउव्वियसरीर जाव परिणए? गोयमा! एगिंदिय जाव परिणए वा पंचिंदिय जाव परिणए।

जइ एगिंदिय जाव परिणए किं वाउक्काइयएगिंदिय जाव परिणए? अवाउक्काइयएगिंदिय जाव परिणते? गोयमा! वाउक्काइयएगिंदिय जाव परिणए, नो अवाउक्काइय जाव परिणते। एवं एएणं अभिलावेणं जहा ओगाहणसंठाणे वेउव्वियसरीरं भणियं तहा इह वि भाणियव्वं जाव पज्जतसव्वट्ठसिद्ध अणुत्तरोववातियकप्पातीयवेमाणियदेवपंचिंदियवेउव्वियसरीरकायप्पओगपरिणए वा, अपज्जतसव्वट्ठसिद्ध जाव कायप्पयोगपरिणए वा ।

जदि वेउव्वियमीसासरीरकायप्पयोगपरिणए किं एगिंदियमीसासरीरकायप्पओगपरिणए वा जाव पंचिंदियमीसासरीरकायप्पयोगपरिणए? एवं जहा वेउव्वियं तहा वेउव्वियमीसगं पि, नवरं देव-नेरइयाणं अपज्जतगाणं, सेसाणं पज्जतगाणं तहेव, जाव नो पज्जतसव्वट्ठसिद्धअणुत्तरो जाव प., अपज्जत सव्वट्ठ-सिद्ध अणुत्तरोववातियदेवपंचिंदियवेउव्वियमीसासरीरकायप्पओगपरिणए ।

जदि आहारगसरीरकायप्पओगपरिणए किं मणुस्साहारगसरीरकायप्पओगपरिणए? अमणुस्स आहारग जाव प०? एवं जहा ओगाहणसंठाणे जाव इडिपतपमतसंजयसम्मद्धिट्ठिपज्जतगसंखेज्जवासाउय जाव परिणए, नो अणिडिपतपमतसंजयसम्मद्धिट्ठिपज्जतगसंखेज्जवासाउय जाव प. ।

जदि आहारगमीसासरीरकायप्पयोगप. किं मणुस्साहारगमीसासरीर.? एवं जहा आहारगं तहेव मीसगं पि निरवसेसं भाणियत्वं ।

जदि कम्मासरीरकायप्पओगप० किं एगिंदियकम्मासरीरकायप्पओगप० जाव पंचिंदियकम्मासरीर जाव प०? गोयमा! एगिंदियकम्मासरीरकायप्पओ० एवं जहा ओगाहणसंठाणे कम्मगस्स भेदो तहेव इह वि जाव पज्जतसव्वट्ठसिद्धअणुत्तरोववाइयदेवपंचिंदियकम्मासरीरकायप्पयोगपरिणए वा, अपज्जतसव्वट्ठसिद्धअणु. जाव परिणए वा ।

जइ मीसापरिणए किं मणमीसापरिणए? वयमीसापरिणए ? कायमीसापरिणए? गोयमा! मनमीसापरिणए वा, वयमीसापरिणते वा कायमीसापरिणए वा।

जदि मणमीसापरिणए किं सच्चमणमीसापरिणए? मोसमणमीसापरिणए? जहा पओगपरिणए तहा मीसापरिणए वि भाणियत्वं निरवसेसं जाव पज्जतसव्वट्ठसिद्धअणुत्तरोववाइय जाव देवपंचिंदियकम्मासरीरगमीसापरिणए वा, अपज्जतसव्वट्ठसिद्धअणु. जाव कम्मासरीरमीसापरिणए वा।

जदि वीससापरिणए किं वण्णपरिणए गंधपरिणए रसपरिणए पासपरिणए संठाणपरिणए? गोयमा! वण्णपरिणए वा गंधपरिणए वा रसपरिणए वा फासपरिणए वा संठाणपरिणए वा।

जदि वण्णपरिणए किं कालवण्णपरिणए नील जाव सुक्किलवण्णपरिणए? गोयमा! कालवण्णपरिणए वा जाव सुक्किलवण्णपरिणए वा।

जदि गंधपरिणए किं सुब्धिगंधपरिणए? दुब्धिगंधपरिणए? गोयमा! सुब्धिगंधपरिणए वा, दुब्धिगंधपरिणए वा।

जइ रसपरिणए किं तित्तरसपरिणए ५ पुच्छा। गोयमा! तित्तरसपरिणए वा जाव महुररसपरिणए वा।

जइ फासपरिणए किं कक्खडफासपरिणए जाव लुक्खफासपरिणए? गोयमा! कक्खडफासपरिणए वा जाव लुक्खफासपरिणए वा।

जइ संठाणपरिणए. पुच्छा। गोयमा परिमंडलसंठाणपरिणए वा जाव आययसंठाणपरिणए वा [३८७]दो भंते! दव्वा किं पयोगपरिणया? मीसापरिणया? वीससापरिणया? गोयमा! पओगपरिणया वा । मीसापरिणया वा । वीससापरिणया वा । अहवेगे पओगपरिणए, एगे मीसापरिणए । अहवेगे पओगप०, एगे वीससापरि. । अहवेगे मीसापरिणए, एगे वीससापरिणए, एवं ।

जदि पओगपरिणया किं मणप्पयोगपरिणया? वइप्पयोग.? कायप्पयोगपरिणया?

गोयमा! मणप्पयोगपरिणता वा। वइप्पयोगप०। कायप्पयोगपरिणया वा। अहवेगे मणप्पयोगपरिणते, एगे वयप्पयोगपरिणते । अहवेगे मणप्पयोगपरिणए, एगे कायप्पओगपरिणए । अहवेगे वयप्पयोगपरिणते, एगे कायप्पओगपरिणते ।

जदि मणप्पयोगपरिणता किं सच्चमणप्पयोगपरिणता? असच्चमणप्पयोगप.? सच्चामोसमणप्पयोगप.? असच्चाऽमोसमणप्पयोगप. गोयमा! सच्चमणप्पयोगपरिणया वा जाव असच्चामोसमणप्पयोगपरिणया वा। अहवेगे सच्चमणप्पयोगपरिणए, एगे मोसमणप्पओगपरिणए। अहवेगे सच्चमणप्पओगपरिणते, एगे सच्चामोसमणप्पओगपरिणए। अहवेगे सच्चमणप्पओगपरिणए, एगे असच्चामोसमणप्पओगपरिणए। अहवेगे मोसमणप्पयोगपरिणते, एगे सच्चामोसमणप्पयोगपरिणते। अहवेगे मोसमणप्पयोग

परिणते, एगे असच्चामोसमणप्पयोगपरिणते। अहवेगे सच्चामोसमणप्पओगपरिणते, एगे असच्चामोसमण-  
प्पओग परिणते।

जइ सच्चमणप्पओगपरिणता किं आरंभसच्चमणप्पयोगपरिणया जाव असमारंभसच्चमण-  
प्पयोगपरिणता? गोयमा! आरंभसच्चमणप्पयोगपरिणया वा जाव असमारंभसच्चमणप्पयोगपरिणया वा।  
अहवेगे आरंभसच्चमणप्पयोगपरिणते, एगे अणारंभसच्चमणप्पयोगपरिणते। एवं एएणं गमएणं दुयसंजोएणं  
नेयव्वं। सव्वे संयोगा जत्थ जत्तिया उट्ठेति ते भाणियव्वा जाव सव्वट्ठसिद्धं ति।

जदि मीसापरिणता किं मणमीसापरिणता? एवं मीसापरिणया वि।

जदि वीससापरिणया किं वण्णपरिणया, गंधपरिणता.?। एवं वीससापरिणया वि जाव अहवेगे  
चउरंससंठाणपरिणते, एगे आययसंठाणपरिणए वा।

तिण्णि भंते! दव्वा किं पयोगपरिणता? मीसापरिणता? वीससापरिणता? गोयमा! पयोग  
परिणया वा, मीसापरिणया वा, वीससापरिणया वा। अहवेगे पयोगपरिणए, दो मीसापरिणता। अहवेगे  
पयोगपरिणए, दो वीससापरिणता। अहवा दो पयोगपरिणया, एगे मीसापरिणए। अहवा दो पयोगपरिणता, एगे  
वीससापरिणते। अहवेगे मीसापरिणए, दो वीससापरिणता। अहवा दो मीससापरिणता, एगे वीससा परिणते।  
अहवेगे पोयगपरिणते, एगे मीसापरिणते, एगे वीससापरिणते।

जदि पयोगपरिणता किं मणप्पयोगपरिणया? वइप्पयोगपरिणता? कायप्पयोगपरिणता?  
गोयमा! मणप्पयोगपरिणया वा. एवं एक्कगसंयोगो, दुयसंयोगो तियसंयोगो य भाणियव्वो।

जदि मणप्पयोगपरिणता किं सच्चमणप्पयोगपरिणया ४? गोयमा! सच्चमणप्पयोरिणया वा  
जाव असच्चामोसमणप्पयोगपरिणया वा ४। अहवेगे सच्चमणप्पयोगपरिणए, दो मोसमणप्पयोगपरिणया  
एवं दुयसंयोगो, तियसंयोगो य भाणियव्वो। एत्थ वि तहेव जाव अहवा एगे तंससंठाणपरिणए वा एगे  
चउरंससंठाणपरिणए वा एगे आययसंठाणपरिणए वा।

चत्तारि भंते! दव्वा किं पओगपरिणया ३? गोयमा! पयोगपरिणया वा, मीसापरिणया वा,  
वीससापरिणया वा। अहवेगे पओगपरिणए, तिण्णि मीसापरिणया। अहवा एगे पओगपरिणए, तिण्णि  
वीससापरिणया। अहवा दो पयोगपरिणया, दो मीसापरिणया। अहवा दो पयोगपरिणया, दो वीससापरिणया ।  
अहवा तिण्णि पओगपरिणया, एगे मीससापरिणए । अहवा तिण्णि पओगपरिणया, एगे वीससापरिणए ।  
अहवा एगे मीससापरिणए, तिण्णि वीससापरिणया । अहवा दो मीसापरिणया, दो वीससापरिणया । अहवा  
तिण्णि मीसापरिणया, एगे वीससापरिणए । अहवेगे पओगपरिणए एगे मीसापरिणए, दो वीससापरिणया;  
अहवेगे पयोगपरिणए, दो मीसापरिणया, एगे वीससापरिणए ; अहवा दो पयोगपरिणया, एगे मीसापरिणए, एगे  
वीससापरिणए ।

जदि पयोगपरिणया किं मणप्पयोगपरिणया ३? एवं एएणं कमेणं पंच छ सत्त जाव दस  
संखेज्जा असंखेज्जा अणंता य दव्वा भाणियव्वा। दुयासंजोएणं, तियासंजोएणं जाव दससंजोएणं  
बारससंजोएणं उवजुंजिऊणं जत्थ जत्तिया संजोगा उट्ठेति ते सव्वे भाणियव्वा। एए पुण जहा नवमसए  
पवेसणए भणीहामि तहा उवजुंजिऊण भाणियव्वा जाव असंखेज्जा। अणंता एवं चेव, नवरं एक्कं पदं  
अब्भहियं जाव अहवा अणंता परिमंडलसंठाणपरिणया जाव अणंता आययसंठाणपरिणया।

[३८८]एएसि णं भंते! पोग्गलाणं पयोगपरिणयाणं मीसापरिणयाणं वीससापरिणयाणं य

कतरे कतरेहितो जाव विसेससाहिया वा? गोयमा! सत्वत्थोवा पोग्गला पयोगपरिणया, मीसापरिणया अणंतगुणा, वीससापरिणया अणंतगुणा।

सेवं भंते! सेवं भंते! त्ति।

**\*अट्ठमे सए पढमो उद्देशो समतो\***

## ० बीओ उद्देशो ०

[३८९]कतिविहा णं भंते! आसीविसा पण्णता? गोयमा! दुविहा आसीविसा पन्नता, तं जहा-जातिआसीविसा य, कम्मआसीविसा य।

जातिआसीविसा णं भंते! कतिविहा पण्णता? गोयमा! चउत्विहा पण्णता, तं जहा-विच्छुय-जातिआसीविसे, मंडुक्कजातिआसीविसे, उरगजातिआसीविसे, मणुस्सजातिआसीविसे।

विच्छुयजातिआसीविसस्स णं भंते! केवतिए विसए पण्णते? गोयमा! पभू णं विच्छुयजाति-आसीविसे अद्धभरहप्पमाणमेतं बोदिं विसेणं विसपरिगयं विसहमाणिं करेतए। विसए से विसट्ठयाए, नो चेव णं संपतीए करेसु वा, करेति वा, करिस्संति वा।

मंडुक्कजातिआसीविसपुच्छा। गोयमा! पभू णं मंडुक्कजातिआसीविसे भरहप्पमाणमेतं बोदिं विसेणं विसपरिगयं। सेसं तं चेव, जाव करेस्संति वा।

एवं उरगजातिआसीविसस्स वि, नवरं जंबुद्धीवप्पमाणमेतं बोदिं विसेणं विसपरिगयं। सेसं तं चेव, जाव करेस्संति वा।

मणुस्स-जाति-आसीविसस्स वि एवं चेव, नवरं समय-खेतप्पमाणमेतं बोदिं विसेणं विसपरिगयं। सेसं तं चेव जाव करेस्संति वा।

जदि कम्मआसीविसे किं नेरइयकम्मआसीविसे, तिरिक्खजोगियकम्मआसीविसे, मणुस्स-कम्मआसीविसे, देवकम्मासीविसे ? गोयमा ! नो नेरइयकम्मासीविसे, तिरिक्खजोगिय-कम्मासीविसे वि, मणुस्स कम्मासीविसे वि, देवकम्मासीविसे वि।

जदि तिरिक्खजोगियकम्मासीविसे किं एगिंदियतिरिक्खजोगियकम्मासीविसे? जाव पंचिंदिय तिरिक्खजोगियकम्मासीविसे? गोयमा! नो एगिंदियतिरिक्खजोगियकम्मासीविसे जाव नो चतुरिंदिय तिरिक्खजोगियकम्मासीविसे, पंचिंदियतिरिक्खजोगियकम्मासीविसे।

जदि पंचिंदियतिरिक्खजोगियकम्मासीवेसे किं सम्मुच्छिमपंचिंदियतिरिक्खजोगियकम्मासी-विसे? गब्भवक्कंतियपंचिं दियतिरिक्खजोगियकम्मासीविसे? एवं जहा वेउत्त्वियसरीरस्स भेदो जाव पज्जता संखेज्जवासाउयगब्भवक्कंतियपंचिंदियतिरिक्खजोगियकम्मासीविसे, नो अपज्जतासंखेज्जवासाउय जाव कम्मासीविसे।

जदि मणुस्सकम्मासीविसे किं सम्मुच्छिमणुस्सकम्मासीविसे? गब्भवक्कंतियमणुस्स कम्मासीविसे? गोयमा! णो सम्मुच्छिमणुस्सकम्मासीविसे, गब्भवक्कंतियमणुस्सकम्मासीविसे, एवं जहा वेउत्त्वियसरीरं जाव पज्जतासंखेज्जवासाउयकम्मभूमगगब्भवक्कंतियमणुस्सकम्मासीविसे, नो अपज्जता जाव कम्मासीविसे।

जदि देवकम्मासीविसे किं भवणवासिदेवकम्मासीविसे जाव वेमाणियदेवकम्मासीविसे?

गोयमा! भवणवासिदेवकम्मासीविसे, वाणमंतरदेव., जोतिसिय., वेमाणियदेवकम्मासीविसे वि।

जइ भवणवासिदेवकम्मासीविसे किं असुरकुमारभवणवासिदेवकम्मासीविसे जाव थणियकुमार जाव कम्मासीविसे? गोयमा! असुरकुमारभवणवासिदेवकम्मासीविसे वि जाव थणियकुमार जाव कम्मासीविसे वि।

जइ असुरकुमार जाव कम्मासीविसे किं पज्जत्तअसुरकुमारभवणवासिदेवकम्मासीविसे? अपज्जत्तअसुरकुमारभवणवासिदेवकम्मासीविसे? गोयमा! नो पज्जत्तअसुरकुमार जाव कम्मासीविसे, अपज्जत्तअसुरकुमारभवणवासिदेवकम्मासीविसे।

एवं जाव थणियकुमाराणं।

जदि वाणमंतरदेवकम्मासीविसे किं पिसायवाणमंतर.? एवं सत्वेसिं पि अपज्जत्तगाणं।

जोतिसियाणं सत्वेसिं अपज्जत्तगाणं।

जदि वेमाणियदेवकम्मासीविसे किं कप्पोवगवेमाणियदेवकम्मासीविसे? कप्पातीतवेमाणियदेव कम्मासीविसे? गोयमा! कप्पोवगवेमाणियदेवकम्मासीविसे, नो कप्पातीतवेमाणियदेवकम्मासीविसे।

जति कप्पोवग वेमाणियदेव कम्मासीविसे किं सोधम्मकप्पोव. जाव कम्मासीविसे जाव अच्चुय कप्पोवग जाव कम्मासीविसे? गोयमा! सोधम्मकप्पोवग वेमाणियदेव कम्मासीविसे वि जाव सहस्सारकप्पोवगवेमाणियदेवकम्मासीविसे वि, नो आणयकप्पोवग जाव नो अच्चतुकप्पोवगवेमाणियदेव.।

जदि सोहम्मकप्पोवग जाव कम्मासीविसे किं पज्जत्तसोधम्मकप्पोवगवेमाणिय. अपज्जत्तग-सोहम्मग०? गोयमा! नो पज्जत्त-सोहम्मकप्पोवग-वेमाणिय, अपज्जत्त-सोधम्मकप्पोवग-वेमाणियदेव कम्मासीविसे।

एवं जाव नो पज्जत्तासहस्सारकप्पोवगवेमाणिय जाव कम्मासीविसे, अपज्जत्तसहस्सार-कप्पोवग जाव कम्मासीविसे।

[३९०] दस ठाणाइं छउमत्थे सत्त्वभावेणं न जाणति न पासति, तं जहा धम्मत्थिकायं, अधम्मत्थिकायं, आगासत्थिकायं, जीवं असरीरपडिबद्धं, परमाणुपोग्गलं, सद्धं, गंधं, वातं अयं जिणे भविस्सति वा ण वा भविस्सइ अयं सत्त्वदुक्खाणं अंतं करेस्सति वा न वा करेस्सइ।

एयाणि चेव उप्पन्ननाण-दंसणधरे अरहा जिणे केवली सत्त्वभावेणं जाणति पासति, तं जहा-धम्मत्थिकायं जाव करेस्सति वा न वा करेस्सति।

[३९१] कतिविहे णं भंते! नाणे पण्णत्ते ? गोयमा! पंचविहे नाणे पण्णत्ते, तं जहा-आभिणिबोहियनाणे सुयनाणे ओहिनाणे मणपज्जवनाणे केवलनाणे।

से किं तं आभिणिबोहियनाणे? आभिणिबोहियनाणे चतुत्विहे पण्णत्ते, तं जहा- उग्गहो ईहा अवाओ धारणा।

एवं जहा रायप्पसेणइज्जे णाणाणं भेदो तहेव इह वि भाणियत्त्वो जाव से तं केवलनाणे।

अण्णाणे णं भंते! कतिविहे पण्णत्ते? गोयमा! तिविहे पण्णत्ते, तं जहा-मइअन्नाणे सुयअन्नाणे विभंगनाणे।

से किं तं मइअण्णाणे? मइअण्णाणे चउत्विहे पण्णत्ते, तं जहाउग्गहो जाव धारणा।

से किं तं उग्गहे? उग्गहे दुविहे पण्णत्ते, तं जहाअत्थोग्गहे य वंजणोग्गहे य।

एवं जहेव आभिणिबोहियनाणं तहेव, नवरं एगट्ठियवज्जं जाव नोइंदियधारणा, से तं धारणा।  
से तं मतिअण्णाणे।

से किं तं सुयअण्णाणे? सुतअण्णाणे जं इमं अण्णाणिएहिं मिच्छद्विट्ठिएहिं जहा नंदीए जाव  
चत्तारि वेदा संगोवंगा। से तं सुयअण्णाणे।

से किं तं विभंगनाणे? विभंगनाणे अणेगविहे पण्णते, तं जहा-गामसंठिए नगरसंठिए जाव  
संन्निवेससंठिए दीवसंठिए समुद्धसंठिए वाससंठिए वासहरसंठिए पव्वयसंठिए रुक्खसंठिए थूभसंठिए  
हयसंठिए गयसंठिए नरसंठिए किन्वरसंठिए किंपुरिससंठिए महोरगसंठिते गंधव्वसंठिए उसभसंठिए पसु-  
पसयविहग-वानरणाणासंठाणसंठिते पण्णते।

जीवा णं भंते! किं नाणी, अण्णाणी? गोयमा! जीवा नाणी वि, अण्णाणी वि। जे नाणी ते  
अत्थेगतिया दुण्णाणि, अत्थेगतिया तिण्णाणी, अत्थेगतिया चउणाणी, अत्थेगतिया एगनाणी। जे दुण्णाणी ते  
आभिणिबोहियनाणी य सुयनाणी य। जे तिण्णाणी ते आभिणिबोहियनाणी सुतनाणी ओहिनाणी, अहवा  
आभिणिबोहियणाणी सुतणाणी मणपज्जवनाणी। जे चउणाणी ते आभिणिबोहियणाणी सुतणाणी ओहिणाणी  
मणपज्जवणाणी। जे एगनाणी ते नियमा केवलनाणी। जे अण्णाणी ते अत्थेगतिया दुअण्णाणी,  
अत्थेगतिया तिअण्णाणी। जे दुअण्णाणी ते मणिअण्णाणी य सुयअण्णाणी य। जे तिअण्णाणी ते  
मतिअण्णाणी सुयअण्णाणी विभंगनाणी।

नेरइया णं भंते! किं नाणी, अण्णाणी? गोयमा! नाणी वि अण्णाणी वि। जे नाणी ते नियमा  
तिण्णाणी, तं जहा-आभिणिबोहि. सुयनाणी ओहिनाणी। जे अण्णाणी ते अत्थेगतिया दुअण्णाणी,  
अत्थेगतिया तिअण्णाणी। एवं तिण्णि अण्णाणाणि भयणाए।

असुरकुमारा णं भंते किं नाणी अण्णाणी? जहेव नेरइया तहेव तिण्णि नाणाणि नियमा,  
तिण्णि य अण्णाणाणि भयणाए।

एवं जाव थणियकुमारा।

पुढविक्काइया णं भंते! किं नाणी अण्णाणी? गोयमा! नो नाणी, अण्णाणी-मतिअण्णाणी य,  
सुतअण्णाणी य।

एवं जाव वणस्सइकाइया।

बेइंदियाणं पुच्छा। गोयमा! णाणी वि, अण्णाणी वि। जे नाणी ते नियमा दुण्णाणी, तं जहा-  
आभिणिबोहियनाणी य सुयणाणी य। जे अण्णाणी ते नियमा दुअण्णाणी-आभिणिबोहियअण्णाणी य  
सुयअण्णाणी य।

एवं तेइंदिय-चउरिंदिया वि।

पंचिंदियतिरिक्खजोणियाणं पुच्छा। गोयमा! नाणी वि अण्णाणी वि। जे नाणी ते  
अत्थेगतिया दुण्णाणी, अत्थेगतिया तिण्णाणी। एवं तिण्णि नाणाणि तिण्णि अण्णाणाणि य भयणाए।

मणुस्सा जहा जीवा तहेव पंच नाणाणि तिण्णि अण्णाणाणि य भयणाए।

वाणमंतरा जहा नेरइया।

जोतिसिय-वेमाणियाणं तिण्णि नाणा तिण्णि अण्णाणा नियमा।

सिद्धा णं भंते! पुच्छा। गोयमा! णाणी, नो अण्णाणी। नियमा एगनाणी-केवलनाणी।

[३९२] निरयगतिया णं भंते! जीवा किं नाणी, अण्णाणी? गोयमा! नाणी वि, अण्णाणी वि।  
तिण्णि नाणाइं नियमा, तिण्णि अन्नाणाइं भयणाए।

तिरियगतिया णं भंते! जीवा किं नाणी, अण्णाणी? गोयमा! दो नाणा, दो अन्नाणा नियमा।  
मणुस्सगतिया णं भंते! जीवा किं नाणी, अन्नाणी? गोयमा! तिण्णि नाणाइं भयणाए, दो  
अण्णाणाइं नियमा।

देवगतिया जहा निरयगतिया।

सिद्धगतिया णं भंते! । जहा सिद्धा ।

सइंदिया णं भंते! जीवा किं नाणी, अण्णाणी? गोयमा! चत्तारि नाणाइं, तिण्णि अण्णाणाइं  
भयणाए।

एगिंदिया णं भंते! जीवा किं नाणी.? जहा पुढविकाइया।

बेइंदिय-तेइंदिय-चतुरिंदियाणं दो नाणा, दो अण्णाणा नियमा।

पंचिंदिया जहा सइंदिया।

अणिंदिया णं भंते! जीवा किं नाणी.? जहा सिद्धा।

सकाइया णं भंते! जीवा किं नाणी अन्नाणी? गोयमा! पंच नाणाणि तिण्णि अन्नाणाइं  
भयणाए।

पुढविकाइया जाव वणस्सइकाइया नो नाणी, अण्णाणी। नियमा दुअण्णाणी; तं जहा-  
मत्तिअण्णाणी य सुयअण्णाणी य।

तसकाइया जहा सकाइया।

अकाइया णं भंते! जीवा किं नाणी.? जहा सिद्धा।

सुहुमा णं भंते! जीवा किं नाणी.? जहा पुढविकाइया।

बादरा णं भंते! जीवा किं नाणी.? जहा सकाइया।

नोसुहुमानोबादरा णं भंते! जीवा.? जहा सिद्धा।

पज्जत्ता णं भंते! जीवा किं नाणी.? जहा सकाइया।

पज्जत्ता णं भंते! नेरतिया किं नाणी.? तिण्णि नाणा, तिण्णि अण्णाणा नियमा।

जहा नेरइया एवं जाव थणियकुमारा।

पुढविकाइया जहा एगिंदिया। एवं जाव चतुरिंदिया।

पज्जत्ता णं भंते! पंचिंदियतिरिक्खजोणिया किं नाणी, अण्णाणी? तिण्णि नाणा, तिण्णि  
अण्णाणा भयणाए।

मणुस्सा जहा सकाइया।

वाणमंतर-जोइसिय-वेमाणिया जहा नेरइया।

अपज्जत्ता णं भंते! जीवा किं नाणी २ ? तिण्णि नाणा, तिण्णि अण्णाणा भयणाए।

अपज्जत्ता णं भंते! नेरतिया किं नाणी, अन्नाणी? तिण्णि नाणा नियमा, तिण्णि अण्णाणा  
भयणाए।

एवं जाव थणियकुमारा।

पुढविककाइया जाव वणस्सतिकाइया जहा एगिंदिया।

बैंदियाणं० पुच्छा। दो नाणा, दो अण्णाणा णियमा।

एवं जाव पंचिंदियतिरिक्खजोणियाणं।

अपज्जतगा णं भंते! मणुस्सा किं नाणी, अन्नाणी? तिण्णि नाणाइं भयणाए, दो अण्णाणाइं

नियमा।

वाणमंतरा जहा नेरतिया।

अपज्जतगा जोतिसिय-वेमाणिया णं.? तिण्णि नाणा, तिन्नि अण्णाणा नियमा।

नोपज्जतनोअपज्जतगा णं भंते! जीवा किं नाणी.? जहा सिद्धा ।

निरयभवत्था णं भंते! जीवा किं नाणी, अण्णाणी? जहा निरयगतिया।

तिरियभवत्था णं भंते! जीवा किं नाणी, अण्णाणी? तिण्णि नाणा, तिण्णि अण्णाणा भयणाए।

मणुस्सभवत्था णं.? जहा सकाइया।

देवभवत्था णं भंते! जहा निरयभवत्था।

अभवत्था जहा सिद्धा।

भवसिद्धिया णं भंते! जीवा किं नाणी.? जहा सकाइया।

अभवसिद्धिया णं. पुच्छा। गोयमा! नो नाणी; अण्णाणी, तिण्णि अण्णाणाइं भयणाए।

नोभवसिद्धियनोअभवसिद्धिया णं भंते! जीवा.? जहा सिद्धा।

सण्णी णं. पुच्छा। जहा सइंदिया ।

असण्णी जहा बेइंदिया।

नोसण्णीनोअसण्णी जहा सिद्धा।

**[३९३]** कतिविहा णं भंते! लद्धी पण्णत्ता? गोयमा! दसविहा लद्धी पण्णत्ता, तं जहा- नाणलद्धी दंसणलद्धी चरित्तलद्धी चरित्ताचरित्तलद्धी दाणलद्धी लाभलद्धी भोगलद्धी उवभोगलद्धी वीरियलद्धी इंदियलद्धी ।

णाणलद्धी णं भंते! कतिविहा पण्णत्ता? गोयमा! पंचविहा पण्णत्ता, तं जहा- आभिणिबोहियणाणलद्धी जाव केवलणाणलद्धी।

अण्णाणलद्धी णं भंते! कतिविहा पण्णत्ता? गोयमा! तिविहा पण्णत्ता, तं जहा-मइअण्णाणलद्धी सुतअण्णाणलद्धी विभंगनाणलद्धी।

दंसणलद्धी णं भंते! कतिविहा पण्णत्ता? गोयमा! तिविहा पण्णत्ता, तं जहा-सम्मदंसणलद्धी मिच्छादंसणलद्धी सम्मामिच्छादंसणलद्धी।

चरित्तलद्धी णं भंते! कतिविहा पण्णत्ता? गोयमा! पंचविहा पण्णत्ता, तं जहा-सामाइयचरित्तलद्धी छेदोवट्ठावणियलद्धी परिहारविसुद्धलद्धी सुहुमसंपरागलद्धी अहक्खायचरित्तलद्धी।

चरित्ताचरित्तलद्धी णं भंते! कतिविहा पण्णत्ता? गोयमा! एगागारा पण्णत्ता।

एवं जाव उवभोगलद्धी एगागारा पण्णत्ता।

वीरियलद्धी णं भंते! कतिविहा पण्णत्ता? गोयमा! तिविहा पण्णत्ता, तं जहा-बालवीरियलद्धी पंडियवीरियलद्धी बालपंडियवीरियलद्धी।

इंदियलद्धी णं भंते! कतिविहा पण्णता? गोयमा! पंचविहा पण्णता, तं जहा-सोतिंदियलद्धी जाव फासिंदयलद्धी।

नाणलद्धिया णं भंते ! जीवा किं नाणी, अण्णाणी? गोयमा! नाणी, नो अण्णाणी; अत्थगतिया दुनाणी। एवं पंच नाणाइं भयणाए।

तस्स अलद्धीया णं भंते! जीवा किं नाणी, अण्णाणी? गोयमा! नो नाणी, अण्णाणी; अत्थगतिया दुअण्णाणी, तिण्णि अण्णाणाणि भयणाए।

आभिणिबोहियणाणलद्धिया णं भंते! जीवा किं नाणी, अण्णाणी? गोयमा! नाणी, नो अण्णाणी; अत्थगतिया दुण्णाणी, चत्तारि नाणाइं भयणाए।

तस्स अलद्धीया णं भंते! जीवा किं नाणी अण्णाणी? गोयमा! नाणी वि, अण्णाणी वि। नाणी ते नियमा एगणाणी-केवलनाणी। जे अण्णाणी ते अत्थगतिया दुअन्नाणी, तिण्णि अण्णाणाइं भयणाए।

एवं सुयनाणलद्धीया वि।

तस्स अलद्धीया वि जहा आभिणिबोहियनाणस्स अलद्धीया।

ओहिनाणलद्धीया णं. पुच्छ। गोयमा! नाणी, नो अण्णाणी, अत्थगतिया तिणाणी, अत्थगतिया चउनाणी। जे तिणाणी ते आभिणिबोहियनाणी सुयनाणी ओहिनाणी। जे चउनाणी ते आभिणिबोहियनाणी सुतणाणी ओहिणाणी मणपज्जवनाणी।

तस्स अलद्धीया णं भंते! जीवा किं नाणी.? गोयमा! नाणी वि, अण्णाणी वि। एवं ओहिनाणवज्जाइं चत्तारि नाणाइं, तिण्णि अण्णाणाइं भयणाए।

मणपज्जवनाणलद्धिया णं. पुच्छ। गोयमा! णाणी, णो अण्णाणी। अत्थगतिया तिणाणि, अत्थगतिया चउनाणी। जे तिणाणी ते आभिणिबोहियनाणी सुतणाणी मणपज्जवणाणी। जे चउनाणी ते आभिणिबोहियनाणी सुयनाणी ओहिनाणी मणपज्जवनाणी।

तस्स अलद्धीया णं. पुच्छ। गोयमा! णाणी वि, अण्णाणी वि, मणपज्जवणाणवज्जाइं चत्तारि णाणाइं, तिण्णि अण्णाणाइं भयणाए।

केवलनाणलद्धिया णं भंते! जीवा किं नाणी, अन्नाणी? गोयमा! नाणी, नो अण्णाणी। नियमा एगणाणी-केवलनाणी।

तस्स अलद्धीया णं. पुच्छ। गोयमा! नाणी वि, अण्णाणि वि। केवलनाणवज्जाइं चत्तारि णाणाइं, तिण्णि अण्णाणाइं भयणाए।

अण्णाणलद्धिया णं० भंते० पुच्छ। गोयमा! नो नाणी, अण्णाणी; तिण्णि अण्णाणाइं भयणाए

तस्स अलद्धीया णं० पुच्छ। गोयमा! नाणी, नो अण्णाणी। पंच नाणाइं भयणाए।

जहा अण्णाणस्स लद्धिया अलद्धिया य भणिया एवं मइअण्णाणस्स, सुयअण्णाणस्स य लद्धिया अलद्धिया य भाणियच्चा।

विभंगनाणलद्धियाणं तिण्णि अण्णाणाइं नियमा। तस्स अलद्धियाणं पंच नाणाइं भयणाए। दो अण्णाणाइं नियमा।

तस्स अलद्धियाणं पंच नाणाइं भयणाए। दो अन्नाणाइं नियमं।

दंसणलद्धिया णं भंते! जीवा किं नाणी, अण्णाणी? गोयमा! नाणी वि, अण्णाणी वि। पंच

नाणाइं, तिण्णि अण्णाणाइं भयणाए।

तस्स अलद्धिया णं भंते! जीवा किं नाणी अन्नाणी? गोयमा! तस्स अलद्धिया नत्थि।

सम्मदंसणलद्धियाणं पंच नाणाइं भयणाए।

तस्स अलद्धियाणं तिण्णि अण्णाणाइं भयणाए।

मिच्छादंसणलद्धिया णं भंते! पुच्छा। तिण्णि अण्णाणाइं भयणाए।

तस्स अलद्धियाणं पंच नाणाइं, तिण्णि य अण्णाणाइं भयणाए।

सम्मामिच्छादंसणलद्धिया अलद्धिया य जहा मिच्छादंसणलद्धी अलद्धी तहेव भाणियत्वं।

चरित्तलद्धिया णं भंते! जीवा किं नाणी, अण्णाणी? गोयमा! पंच नाणाइं भयणाए।

तस्स अलद्धियाणं मणपज्जवनाणवज्जाइं चत्तारि नाणाइं, तिण्णि य अन्नाणाइं भयणाए।

सामाइयचरित्तलद्धिया णं भंते! जीवा किं नाणी, अन्नाणी? गोयमा! नाणी, केवलवज्जाइं

चत्तारि नाणाइं भयणाए।

तस्स अलद्धियाणं पंच नाणाइं तिण्णि य अण्णाणाइं भयणाए।

एवं जहा सामाइयचरित्तलद्धिया अलद्धिया य भणिया एवं जाव अहक्खायचरित्तलद्धिया अलद्धिया य भाणियत्वा, नवरं अहक्खायचरित्तलद्धियाणं पंच नाणाइं भयणाए।

चरित्ताचरित्तलद्धिया णं भंते! जीवा किं नाणी, अण्णाणी? गोयमा! नाणी, नो अण्णाणी।

अत्थगतिया दुण्णाणी, अत्थगतिया तिण्णाणी। जे दुन्नाणी ते आभिणिबोहियनाणी य, सुयनाणी य। जे तिन्नाणी ते आभि० सुतना० ओहिनाणी य।

तस्स अलद्धीयाणं पंच नाणाइं, तिण्णि अण्णाणाइं भयणाए।

दाणलद्धियाणं पंच नाणाइं, तिण्णि अण्णाणाइं भयणाए।

तस्स अलद्धीया णं. पुच्छा। गोयमा! नाणी, नो अण्णाणी, नियमं ए। एगनाणी-केवलनाणी।

एवं जाव वीरियस्स लद्धी अलद्धी य भाणियत्वा।

बालवीरियलद्धियाणं तिण्णि नाणाइं तिण्णि अण्णाणाइं भयणाए।

तस्स अलद्धियाणं पंच नाणाइं भयणाए।

पंडियवीरियलद्धियाणं पंच नाणाइं भयणाए।

तस्स अलद्धियाणं मणपज्जवनाणवज्जाइं नाणाइं, अण्णाणाणि तिण्णि य भयणाए।

बालपंडियवीरियलद्धिया णं भंते! जीवा.? तिण्णि नाणाइं भयणाए।

तस्स अलद्धियाणं पंच नाणाइं, तिण्णि अण्णाणाइं भयणाए।

इंदियलद्धिया णं भंते! जीवा किं नाणी, अण्णाणी? गोयमा! चत्तारि नाणाइं, तिण्णि अन्नाणाइं

भयणाए।

तस्स अलद्धिया णं. पुच्छा। गोयमा! नाणी, नो अण्णाणी नियमं ए। एगनाणी-केवलनाणी।

सोइंदियलद्धियाणं जहा इंदियलद्धिया।

तस्स अलद्धिया णं. पुच्छा। गोयमा! नाणी वि अण्णाणी वि। जे नाणी ते अत्थगतिया

दुन्नाणी, अत्थगतिया एगन्नाणी। जे दुन्नाणी ते आभिणिबोहियनाणी सुयनाणी। जे एगनाणी ते केवलनाणी। जे अण्णाणी ते नियमा दुअन्नाणी, तं जहा-मइअण्णाणी य, सुतअण्णाणी य।

चक्खिंदिय-घाणिंदियाणं लद्धियाणं अलद्धियाणं य जहेव सोइंदियस्स।  
जिब्भिंदियलद्धियाणं चत्तारि णाणाइं, तिण्णिं य अण्णाणाणि भयणाए।  
तस्स अलद्धिया णं. पुच्छा। गोयमा! नाणी वि, अण्णाणी वि। जे नाणी ते नियमा  
एगनाणी-केवलनाणी। जे अण्णाणी ते नियमा दुअन्नाणी, तं जहा-मइअण्णाणी य, सुतअन्नाणी य।  
फासिंदियलद्धिया अलद्धिया जहा इंदियलद्धिया य अलद्धिया य।  
[३९४] सागारोवयुत्ता णं भंते! जीवा किं नाणी, अण्णाणी? पंच नाणाइं, तिण्णिं अण्णाणाइं  
भयणाए।

आभिणिबोहियनाणसाकारोवयुत्ता णं भंते!.? चत्तारि णाणाइं भयणाए।  
एवं सुतनाणसागारोवउत्ता वि।  
ओहिनाणसागारोवउत्ता जहा ओहिनाणलद्धिया।  
मणपज्जवनाणसागारोवजुत्ता जहा मणपज्जवनाणलद्धिया।  
केवलनाणसागारोवजुत्ता जहा केवलनाणलद्धिया।  
मइअण्णाणसागारोवयुत्ताणं तिण्णिं अण्णाणाइं भयणाए।  
एवं सुतअण्णाणसागारोवयुत्ता वि।  
विभंगनाणसागारोवजुत्ताणं तिण्णिं अण्णाणाइं नियमा।  
अणागारोवयुत्ता णं भंते! जीवा किं नाणी, अण्णाणी? पंच नाणाइं, तिण्णिं अण्णाणाइं  
भयणाए।

एवं चक्खुदंसण-अचक्खुदंसणअणागारोवजुत्ता वि, नवरं चत्तारि णाणाइं, तिण्णिं अण्णाणाइं  
भयणाए।

ओहिदंसणअणागारोवजुत्ता णं. पुच्छा। गोयमा! नाणी वि अण्णाणी वि। जे नाणी ते  
अत्थेगतिया तिन्नाणी, अत्थेगतिया चउनाणी। जे तिन्नाणी ते आभिणिबोहिय. सुतनाणी ओहिनाणी। जे  
चउणाणी ते आभिणिबोहियनाणी जाव मणपज्जवनाणी। जे अन्नाणी ते नियमा तिअण्णाणी, तं  
जहामइअण्णाणी सुतअण्णाणी विभंगनाणी।

केवलदंसणअणागारोवजुत्ता जहा केवलनाणलद्धिया।  
सजोगी णं भंते! जीवा किं नाणी.? जहा सकाइया।  
एवं मणजोगी, वइजोगी कायजोगी वि।  
अजोगी जहा सिद्धा।  
सलेस्सा णं भंते!.? जहा सकाइया।  
कण्हलेस्सा णं भंते!.? जहा सइंदिया।  
एवं जाव पम्हलेसा।  
सुक्कलेस्सा जहा सलेस्सा।  
अलेस्सा जहा सिद्धा।  
सकसाई णं भंते!.? जहा सइंदिया।  
एवं जाव लोहकसाई।

अकसाई णं भंते! किं णाणी.? पंच नाणाइं भयणाए।

सवेदगा णं भंते! जहा सइंदिया।

एवं इत्थिवेदगा वि। एवं पुरिसवेयगा वि। एवं नपुंसकवेदना वि।

अवेदगा जहा अकसाई ।

आहारगा णं भंते! जीवा.? जहा सकसाई नवरं केवलनाणं पि।

अणाहारगा णं भंते! जीवा किं नाणी, अण्णाणी? मणपज्जवनाणवज्जाइं नाणाइं, अन्नाणाणि य तिप्णि भयणाए।

[३९५] आभिणिबोहियनाणस्स णं भंते! केवतिए विसए पण्णत्ते? गोयमा! से समासतो चउच्चिहे पण्णत्ते, तं जहा-दव्वतो खेत्ततो कालतो भावतो। दव्वतो णं आभिणिबोहिणाणी आदेसेणं सव्वदव्वाइं जाणति पासति। खेत्ततो णं आभिणिबोहियणाणी आदेसेणं सव्वं खेत्तं जाणति पासति। एवं कालतो वि। एवं भावओ वि।

सुतनाणस्स णं भंते! केवतिए विसए पण्णत्ते? गोयमा! से समासओ चतुच्चिहे पण्णत्ते, तं जहा-दव्वतो खेत्ततो कालतो भावतो। दव्वतो णं सुतनाणी उवयुत्ते सव्वदव्वाइं जाणति पासति। एवं खेत्ततो वि, कालतो वि। भावतो णं सुयनाणी उवजुत्ते सव्वभावे जाणति पासति।

ओहिनाणस्स णं भंते! केवतिए विसए पण्णत्ते? गोयमा! से समासओ चतुच्चिहे पण्णत्ते, तं जहा- दव्वतो खेत्ततो कालतो भावतो। दव्वतो णं ओहिनाणी रूविदव्वाइं जाणति पासति जहा नंदीए जाव भावतो।

मणपज्जवनाणस्स णं भंते! केवतिए विसए पण्णत्ते? गोयमा! से समासओ चउच्चिहे पण्णत्ते, तं जहा- दव्वतो खेत्ततो कालतो भावतो। दव्वतो णं उज्जुमती अणंते अणंतपदेसिए जहा नंदीए जाव भावओ।

केवलनाणस्स णं भंते! केवतिए विसए पण्णत्ते? गोयमा! से समासओ चतुच्चिहे पण्णत्ते, तं जहा-दव्वतो खेत्ततो कालतो भावतो। दव्वतो णं केवलनाणी सव्वदव्वाइं जाणति पासति। एवं जाव भावओ।

मइअन्नाणस्स णं भंते! केवतिए विसए पण्णत्ते? गोयमा! से समासतो चतुच्चिहे पण्णत्ते, तं जहा-दव्वतो खेत्ततो कालओ भावतो। दव्वतो णं मइअन्नाणी मइअन्नाणपरिगताइं

दव्वाइं जाणति पासति। एवं जाव भावतो मणिअन्नाणी मइअन्नाणपरिगते भावे जाणति पासति।

सुतअन्नाणस्स णं भंते! केवतिए विसए पण्णत्ते? गोयमा! से समासतो चउच्चिहे पण्णत्ते, तं जहा-दव्वतो खेत्ततो कालतो भावतो। दव्वतो णं सुयअन्नाणी सुतअन्नाणपरिगयाइं दव्वाइं आघवेति पण्णवेति जाव परूवेइ। एवं खेत्ततो कालतो। भावतो णं सुयअन्नाणी सुतअन्नाणपरिगते भावे आघवेति तं चेव।

विभंगणाणस्स णं भंते! केवतिए विसए पण्णत्ते? गोयमा! से समासतो चतुच्चिहे पण्णत्ते, तं जहा-दव्वतो खेत्ततो कालतो भावतो। दव्वतो णं विभंगनाणी विभंगणाणपरिगयाइं दव्वाइं जाणति पासति। एवं जाव भावतो णं विभंगनाणी विभंगनाणपरिगए भावे जाणति पासति।

[३९६] णाणी णं भंते! 'णाणि'ति कालतो केवच्चिरं होति? गोयमा! नाणी दुविहे पण्णत्ते, तं

जहा-सादीए वा अपज्जवसिते, सादीए वा सपज्जवसिए। तत्थ णं जे से सादीए सपज्जवसिए से जहन्नेणं अंतोमुहुत्तं, उक्कोसेणं छावट्ठिं सागरोवमाइं सातिरेगाइं।

आभिणिबोहियणाणी णं भंते! आभिणिबोहियणाणि ति.?! एवं नाणी, आभिणिबोहियणाणी जाव केवलनाणी, अन्नाणी, मइअन्नाणी, सुतअन्नाणी, विभंगनाणी; एएसिं दसण्ह वि संचिट्ठणा जहा कायठितीए।

अंतरं सच्चं जहा जीवाभिगमे ।

अप्पाबहुगाणि तिप्णि जहा बहुवत्तच्चताए।

केवतिया णं भंते! आभिणिबोहियणाणपज्जवा पण्णता? गोयमा! अणंता आभिणिबोहियणाण पज्जवा पण्णता।

केवतिया णं भंते! सुतनाणपज्जवा पण्णता? एवं चेव।

एवं जाव केवलनाणस्स।

एवं मतिअनन्नाणस्स सुतअन्नाणस्स।

केवतिया णं भंते! विभंगनाणपज्जवा पण्णता गोयमा! अणंता विभंगनाणपज्जवा पण्णता ।

एतेसि णं भंते! आभिणिबोहियणाणपज्जवाणं सुयनाणपज्जवाणं ओहिनाणपज्जवाणं मणपज्जवनाणपज्जवाणं केवलनाणपज्जवाणं य कतरे कतरेहिंतो जाव विसेसाहिया वा?

गोयमा! सच्चत्थोवा मणपज्जवनाणपज्जवा, ओहिनाणपज्जवा अणंतगुणा, सुतनाणपज्जवा अमंतगुणा, आभिणिबोहियणाणपज्जवा अणंतगुणा, केवलनाणपज्जवा अणंतगुणा।

एएसि णं भंते! मइअन्नाणपज्जवाणं सुतअन्नाणपज्जवाणं विभंगनाणपज्जवाणं य कतरे कतरेहिंतो जाव विसेसाहिया वा? गोयमा! सच्चत्थोवा विभंगनाणपज्जवा, सुतअन्नाणपज्जवा अमंतगुणा, मतिअन्नाणपज्जवा अणंतगुणा।

एएसि णं भंते! आभिणिबोहियणाण-पज्जवाणं जाव केवलनाणपज्जवाणं मइअन्नाण पज्जवाणं सुयअन्नाणपज्जवाणं विभंगनाणपज्जवाणं य कतरे कतरेहिंतो जाव विसेसाहिया वा? गोयमा! सच्चत्थो वा मणपज्जवनाण-पज्जवा, विभंगनाण-पज्जवा अणंतगुणा, ओहिणाण-पज्जवा अणंतगुणा, सुतअन्नाण-पज्जवा अणंतगुणा, सुतनाण-पज्जवा विसेसाहिया, मइअन्नाण-पज्जवा अणंतगुणा, आभिणिबोहियणाणपज्जवा विसेसाहिया, केवलनाणपज्जवा अणंतगुणा।

सेवं भंते! सेवं भंते! ति।।

**\*अट्ठमे सए बितिओ उद्देशो समतो\***

**० ततिओ उद्देशो ०**

[३९७] कतिविहा णं भंते! रुक्खा पण्णता? गोयमा! तिविहा रुक्खा पण्णता, तं जहा-संखेज्जजीविया असंखेज्जजीविया अणंतजीविया।

से किं तं संखेज्जजीविया? संखेज्जजीविया अणेगविहा पण्णता, तं जहा-ताले तमाले तक्कलि तेतलि जहा पण्णवणाए जाव नालिएरी, जे यावन्ने तहप्पगारा। से तं संखेज्जजीविया।

से किं तं असंखेज्जजीविया? असंखेज्जजीविया दुविहा पण्णता, तं जहा-एगट्ठिया य

बहुबीयगा य।

से किं तं एगट्ठिया? एगट्ठिया अणेगविहा पण्णत्ता, तं जहा निंबंबजंबु एवं जहा पण्णवणापए जाव फला बहुबीयगा। से तं बहुबीयगा। से तं असंखेज्जजीविया।

से किं तं अणंतजीविया? अणंतजीविया अणेगविहा पण्णत्ता, तं जहा-आलुए मूलए सिंगबेरे एवं जहा सत्तमसए जाव सीउंढी मुसुंढी, जे यावन्ने तहप्पकारा। से तं अणंतजीविया।

**[३९८]** अह भंते! कुम्मे कुम्मावलिया, गोहे गोहावलिया, गोणे गोणावलिया, मणुस्से मण्णुस्सावलिया, महिसे महिसावलिया, एएसि णं दुहा वा तिहा वा संखेज्जहा वा छिन्नाणं जे अंतरा ते वि णं तेहिं जीवपदेसेहिं फुडा? हंता, फुडा।

पुरिसे णं भंते! ते अंतरे हत्थेण वा पादेण वा अंगुलियाए वा, सलागाए वा कट्ठेण वा किलिंचेण वा आमसमाणे वा सम्मुसमाणे वा आलिहमाणे वा विलिहमाणे वा अन्नयरेण वा तिक्खेणं सत्थजातेणं आच्छिंदेमाणे वा विच्छिंदेमाणे वा, अगणिकाएणं वा समोडहमाणे तेसिं जीवपदेसाणं किंचि आबाहं वा वाबाहं वा उप्पायइ? छविच्छेदं वा करेइ? णो इणट्ठे समट्ठे, नो खलु तत्थ सत्थं संकमति।

**[३९९]** कति णं भंते! पुढवीओ पण्णत्ताओ? गोयमा! अट्ठ पुढवीओ पन्नत्ताओ, तं जहा-रयणपपभा जाव अहेसत्तमा पुढवी, ईसिपब्भारा।

इमा णं भंते! रयणपपभापुढवी किं चरिमा, अचरिमा? चरिमपदं निरवसेसं भाणियत्वं जाव वेमाणिया णं भंते! फासचरिमेणं किं चरिमा अचरिमा? गोयमा! चरिमा वि अचरिमा वि।

सेवं भंते! सेवं भंते ति भगवं गोतमे।

**\*अट्ठमे सए तइओ उद्देशो समतो\***

**० चउत्थो उद्देशो ०**

**[४००]** रायगिहे जाव एवं वदासि-

कति णं भंते! किरियाओ पण्णत्ताओ? गोयमा! पंच किरियाओ पण्णत्ताओ, तं जहा-काइया अहिगरणिया, एवं किरियापदं निरवसेसं भाणियत्वं जाव मायावत्तियाओ किरियाओ विसेसाहियाओ।

सेवं भंते! सेवं भंते ति भगवं गोयमे०।

**\*अट्ठमे सए चउत्थो उद्देशो समतो\***

**० पंचमो उद्देशो ०**

**[४०१]** रायगिहे जाव एवं वदासि-

आजीविया णं भंते! थेरे भगवंते एवं वदासि-

समणोवासगस्स णं भंते! सामाइयकडस्स समणोवस्सए अच्छमाणस्स केइ भंडं अवहरेज्जा, से णं भंते! तं भंडं अणुगवेसमाणे किं सभंडं अणुगवेसति? परायगं भंडं अणुगवेसइ? गोयमा! सयं भंडं अणुगवेसति, नो परायगं भंडं अणुगवेसेति।

**[४०२]** तस्स णं भंते! तेहिं सीलव्वत-गुण-वेरमण-पच्चक्खाणपोसहोववासेहिं से भंडे अभंडे भवति? हंता, भवति।

से केणं खाइ णं अट्ठेणं भंते एवं वुच्चति 'सभंडं अणुगवेसइ नो परायगं भंडं अणुगवेसेइ?'

गोयमा! तस्स णं एवं भवति-णो मे हिरण्णे, नो मे सुवण्णे, नो मे कंसे, नो मे दूसे, नो मे विठलधण-कणग-रयण-मणिमोत्तिय-संख-सिल-प्पवाल-रत्तरयणमादीए संतसारसावदेज्जे, ममतभावे पुण से अपरिण्णाते भवति, से तेणट्ठेणं गोयमा! एवं वुच्चइ-सभंडं अणुगवेसइ, नो परायणं भंडं अणुगवेसइ।

समणोवासगस्स णं भंते! सामाइयकडस्स समणोवस्सए अच्छमाणस्स केइ जायं चरेज्जा, से णं भंते! किं जायं चरइ, अजायं चरइ? गोयमा! जायं चरइ, नो अजायं चरइ।

तस्स णं भंते! तेहिं सीलव्वय-गुण-वेरमण-पच्चक्खाण-पोसहोववासेहि सा जाया अजाया भवइ? हंता, भवइ।

से केणं खाइ णं अट्ठेणं भंते! एवं वुच्चइ. 'जायं चरइ, नो अजायं चरइ'? गोयमा! तस्स णं एवं भवइ-णो मे माता, णो मे पिता, णो मे भाया, णो मे भगिणी, णो मे भज्जा, णो मे पुत्ता, णो मे धूत्ता, नो मे सुण्हा, पेज्जबंधणे पुण से अट्ठोच्छिन्ने भवइ, से तेणट्ठेणं गोयमा! जाव नो अजायं चरइ।

• समणोवासगस्स णं भंते! पुव्वामेव थूलए पाणातिवाते अपच्चक्खाए भवइ, से णं भंते! पच्छा पच्चाइक्खमाणे किं करेति? गोयमा! तीतं पडिक्कममति, पडुप्पन्नं संवरेति, अणागतं पच्चक्खाति।

तीतं पडिक्कममाणे किं तिविहं तिविहेणं पडिक्कममति १, तिविहं दुविहेणं पडिक्कममति २, तिविहं एगविहेणं पडिक्कममति ३, दुविहं तिविहेणं पडिक्कममति ४, दुविहं दुविहेणं पडिक्कममति ५, दुविहं एगविहेणं पडिक्कममति ६, एक्कविहं तिविहेणं पडिक्कममति ७, एक्कविहं दुविहेणं पडिक्कममति ८, एक्कविहं एगविहेणं पडिक्कममति ९? गोयमा! तिविहं वा तिविहेणं पडिक्कममति, तिविहं वा दुविहेणं पडिक्कममति तं चेव जाव एक्कविहं वा एक्कविहेणं पडिक्कममति।

तिविहं तिविहेणं पडिक्कममाणे न करेति, न कारवेति, करेतं णाणुजाणति, मणसा वयसा कायसा। तिविहं दुविहेणं पडिक्कममाणे न करेति, न कारवेति, करेतं नाणुजाणति, मणसा वयसा। अहवा न करेति, न कारवेति, करेतं नाणुजाणति, मणसा कायसा। अहवा न करेइ, न कारवेति, करेतं णाणुजाणति, वयसा कायसा। तिविहं एगविहेणं पडिक्कममाणे न करेति, न कारवेति, करेतं णाणुजाणति, मणसा । अहवा न करेइ, ण कारवेति, करेतं णाणुजाणति, वयसा। अहवा न करेति, न कारवेति, करेतं णाणुजाणति, कायसा । दुविहं तिविहेणं पडिक्कममाणे न करेइ, न कारवेति, मणसा वयसा कायसा। अहवा न करेति, करेतं नाणुजाणइ, मणसा वयसा कायसा। अहवा न कारवेइ, करेतं नाणुजाणइ; मणसा वयसा कायसा। दुविहं दुविहेणं पडिक्कममाणे न करेति न कारवेति, मणसा वयसा। अहवा न करेति, न कारवेति, मणसा कायसा। अहवा न करेति, न कारवेति, वयसा कायसा। अहवा न करेति, करेतं नाणुजाणइ, मणसा वयसा ।

अहवा न करेति, करेतं नाणुजाणइ, मणसा कायसा। अहवा न करेति, करेतं नाणुजाणति, वयसा कायसा। अहवा न कारवेति, करेतं नाणुजाणति मणसा वयसा। अहवा न कारवेइ, करेतं नाणुजाणइ, मणसा कायसा। अहवा न कारवेति, करेतं नाणुजाणइ वयसा कायसा। दुविहं एक्कविहेणं पडिक्कममाणे न करेति, न कारवेति, मणसा। अहवा न करेति, न कारवेति वयसा। अहवा न करेति, न कारवेति कायसा। अहवा न करेति, करेतं नाणुजाणइ, मणसा। अहवा न करेइ, करेतं नाणुजाणति, वयसा। अहवा न करेइ, करेतं नाणुजाणइ, कायसा। अहवा न कारवेइ, करेतं नाणुजाणइ, मणसा। अहवा न कारवेइ, करेतं नाणुजाणइ, वयसा। अहवा न कारवेइ, करेतं नाणुजाणइ, कायसा। एगविहं तिविहेणं पडिक्कममाणे न करेति, मणसा वयसा कायसा। अहवा न कारवेइ मणसा वयसा कायसा। अहवा करेतं नाणुजाणति मणसा वयसा कायसा।

एककविहं दुविहेणं पडिक्कममाणे न करेति मणसा वयसा|अहवा न करेति मणसा कायसा|

अहवा न करेइ वयसा कायसा|अहवा न कारवेति मणसा वयसा|अहवा न कारवेति मणसा कायसा|अहवा न कारवेइ वयसा कायसा|अहवा करेतं नाणुजाणति मणसा वयसा|अहवा करेतं नाणुजाणति मणसा कायसा|अहवा करेतं नाणुजाणइ वयसा कायसा। एककविहं एगविहेणं पडिक्कममाणे न करेति मणसा|अहवा न करेति वयसा|अहवा न करेति कायसा|अहवा न कारवेति मणसा|अहवा न कारवेति वयस|अहवा न कारवेइ कायसा|अहवा करेतं नाणुजाणइ मणसा|अहवा करेतं नाणुजाणति वयसा|अहवा करेतं नाणुजाणइ कायसा।

पडुप्पन्नं संववेमाणे किं तिविहं तिविहेणं संवरेइ? एवं जहा पडिक्कममाणेणं एगूणपण्णं भंगा भणिया एवं संववेमाणेण वि एगूणपण्णं भंगा भाणियत्वा।

अणागतं पच्चक्खमाणे किं तिविहं तिविहेणं पच्चक्खाइ? एवं ते चेव भंगा एगूणपण्णं भाणियत्वा जाव अहवा करेतं नाणुजाणइ कायसा।

समणोवासगस्स णं भंते! पुत्त्वामेव थूलमुसावादे अपच्चक्खाए भवइ, से णं भंते! पच्छा पच्चाइक्खमाणे एवं जहा पाणाइवातस्स सीयालं भंगसतं भणितं तहा मुसावादस्स वि भाणियत्वं।

एवं अदिण्णादाणस्स वि। एवं थूलगस्स मेहुणस्स वि। थूलगस्स परिग्गहस्स वि जाव अहवा करेतं नाणुजाणइ कायसा।

एए खलु एरिसगा समणोवासगा भवंति, नो खलु एरिसगा आजीवियोवासगा भवंति।

**[४०३]** आजीवियसमयस्स णं अयमट्ठे पण्णत्ते-अक्खीणपडिभोइणो सच्चे सत्ता, से हंता छेत्ता भत्ता लुंपित्ता विलुंपित्ता उद्दवइत्ता आहारमाहारंति।

तत्थ खलु इमे दुवालस आजीवियोवासगा भवंति, तं जहा-ताले, तालपलंबे, उच्चिह, संविहे, अवविहे, उदए, नामुदए, णम्मुदए, अणुवालए, संखवालए, अयंपुले, कायरए।

इच्चेते दुवालस आजीवियोवासगा अरहंतदेवतागा अम्मा-पिउसुस्सूसागा; पंचफलपडिक्कंता, तं जहा-उंबरेहिं, वडेहिं, बोरेहिं सतरेहिं पिलंखूहिं; पलंडु-ल्हसण-कंद-मूलविवज्जगा अणिल्लंछिएहिं अणक्कभिन्नेहिं गोणेहिं तसपाणविवज्जिएहिं छेत्तेहिं वित्तिं कप्पेमाणे विहरंति।

एए वि ताव एवं इच्छंति, किमंग पुण जे इमे समणोवासगा भवंति?' जेसिं नो कप्पंति इमाइं पण्णरस कम्मदाणाइं सयं करेतए वा, कारवेत्तए वा, करेतं वा अन्नं न समणुजाणेत्तए, तं जहा-इंगाल कम्मे वणकम्मे साडीकम्मे भाडीकम्मे फोडीकम्मे दंतवाणिज्जे लक्खवाणिज्जे केसवाणिज्जे रसवाणिज्जे विसवाणिज्जे जंतपीलणकम्मे निल्लंछणकम्मे दवग्गिदावणया सर-दह-तलायपरिसोसणया असतीपोसणया।

इच्चेते समणोवासगा सुक्का सुक्काभिजातीया भवित्ता कालमासे कालं किच्चा अन्नयरेसु देवलोएसु देवत्ताए उववत्तारो भवंति।

**[४०४]** कतिविहा णं भंते! देवलोगा पण्णत्ता? गोयमा! चउच्चिहा देवलोगा पण्णत्ता, तं जहा-भवणवासि-वाणमंतर-जोइस-वेमाणिया।

सेवं भंते! सेवं भंते! ति।

**\*अट्ठमे सए पंचमो उद्देशो समतो\***

## ० छट्ठो उद्देशो ०

[४०५]समणोवासगस्स णं भंते! तहारूवं समणं वा माहणं वा फासुएसणिज्जेणं असण-पाण-खाइम-साइमेणं पडिलाभेमाणस्स किं कज्जति? गोयमा! एगंतसो से निज्जरा कज्जइ, नत्थि य से पावे कम्मं कज्जति।

समणोवासगस्स णं भंते! तहारूवं समणं वा माहणं वा अफासुएणं अणेसणिज्जेणं असण-पाण जाव पडिलाभेमाणस्स किं कज्जइ? गोयमा! बहुतरिया से निज्जरा कज्जइ, अप्पतराए से पावे कम्मं कज्जइ।

समणोवासगस्स णं भंते! तहारूवं अस्संजयविरयपडिहयपच्चक्खायपावकम्मं फासुएण वा अफासुएण वा एसणिज्जेण वा अणेसणिज्जेण वा असण-पाण जाव किं कज्जइ? गोयमा! एगंतसो से पावे कम्मं कज्जइ, नत्थि से काइ निज्जरा कज्जइ।

[४०६]निग्गंथं च णं गाहावइकुलं पिंडवायपडियाए अणुपविट्ठं केइ दोहिं पिंडेहिं उवनिमंतेज्जा-एगं आउसो! अप्पणा भुंजाहि, एगं थेराणं दलयाहि, से य तं पिंडं पडिग्गहेज्जा, थेरा य से अणुगवेसियच्चा सिया, जत्थेव अणुगवेसमाणे थेरे पासिज्जा तत्थेवाऽणुप्पदायच्चे सिया, नो चेव णं अणुगवेसमाणे थेरे पासिज्जा तं नो अप्पणा भुंजेज्जा, नो अन्नेसिं दावए, एगंते अणावाए अचित्ते बहुफासुए थंडिले पडिलेहेत्ता, पमज्जित्ता परिट्ठावेतच्चे सिया।

निग्गंथं च णं गाहावइकुलं पिंडवायपडियाए अणुपविट्ठं केति तिहिं पिंडेहिं उवनिमंतेज्जा-एगं आउसो! अप्पणा भुंजाहि, दो थेराणं दलयाहि, से य ते पडिग्गहेज्जा, थेरा य से अणुगवेसेयच्चा, सेसं तं चेव जाव परिट्ठावेयच्चे सिया।

एवं जाव दसहिं पिंडेहिं उवनिमंतेज्जा, नवरं एगं आउसो! अप्पणा भुंजाहि, नव थेराणं दलयाहि, सेसं तं चेव जाव परिट्ठावेतच्चे सिया।

निग्गंथं च णं गाहावइ जाव केइ दोहिं पडिग्गहेहिं उवनिमंतेज्जा-एगं आउसो! अप्पणा परिभुंजाहि, एगं थेराणं दलयाहि, से य तं पडिग्गहेज्जा, तहेव जाव तं नो अप्पणा परिभुंजेज्जा, नो अन्नेसिं दावए। सेसं तं चेव जाव परिट्ठावेयच्चे सिया।

एवं जाव दसहिं पडिग्गहेहिं।

एवं जहा पडिग्गहवत्तव्वया भणिया एवं गोच्छग-रयहरण-चोलपट्ठगकंबल-लट्ठी-संथारगवत्तव्वया य भाणियच्चा जाव दसहिं संथारएहिं उवनिमंतेज्जा जाव परिट्ठावेयच्चे सिया।

[४०७]निग्गंथेण य गाहावइकुलं पिंडवायपडियाए पविट्ठेणं अन्नयरे अकिच्चट्ठाणे पडिसेविए, तस्स णं एवं भवति-इहेव ताव अहं एयस्स ठाणस्स आलोएमि पडिक्कमामि निंदामि गरहामि विउट्ठामि विसोहेमि अकरणयाए अब्भुट्ठेमि, अहारिहं पायच्छित्तं तवोकम्मं पडिवज्जामि, तओ पच्छा थेराणं अंतियं आलोएस्सामि जाव तवोकम्मं पडिवज्जिस्सामि। से य संपट्ठिए, असंपत्ते, थेरा य अमुहा सिया, से णं भंते! किं आराहए विराहए?, गोयमा! आराहए, नो विराहए।

से य संपट्ठिए असंपत्ते अप्पणा य पुव्वामेव अमुहे सिया, से णं भंते! किं आराहए, विराहए? गोयमा! आराहए, नो विराहए।

से य संपट्ठिए, असंपत्ते थेरा य कालं करेज्जा, से णं भंते! किं आराहए विराहए? गोयमा! आराहए, नो विराहए।

से य संपट्ठिए असंपत्ते अप्पणा य पुट्ठामेव कालं करेज्जा, से णं भंते! किं आराहए विराहए? गोयमा! आराहए, नो विराहए।

से य संपट्ठिए संपत्ते, थेरा य अमुहा सिया, से णं भंते! किं आराहए विराहए? गोयमा! आराहए, नो विराहए।

से य संपट्ठिए संपत्ते अप्पणा य। एवं संपत्तेणं वि चत्तारि आलावगा भाणियच्चा जहेव असंपत्तेणं।

निग्गंथेण य बहिया वियारभूमिं वा विहारभूमिं वा निक्खंतेणं अन्नयरे अकिच्चट्ठाणे पडिसेविए, तस्स णं एवं भवति-इहेव ताव अहं। एवं एत्थ वि ते चेव अट्ठ आलावगा भाणियच्चा जाव नो विराहए।

निग्गंथेण य गामाणुगामं दूइज्जमाणेणं अन्नयरे अकिच्चट्ठाणे पडिसेविए, तस्स णं एवं भवति-इहेव ताव अहं। एत्थ वि ते चेव अट्ठ आलावगा भाणियच्चा जाव नो विराहए।

निग्गंथीए य गाहावइकुलं पिंडवायपडियाए अणुपविट्ठाए अन्नयरे अकिच्चट्ठाणे पडिसेविए, तीसे णं एवं भवइ-इहेव ताव अहं एयस्स ठाणस्स आलोएमि जाव तवोकम्मं

पडिवज्जामि तओ पच्छा पवत्तिणीए अंतियं आलोएस्सामि जाव पडिवज्जिस्सामि, सा य संपट्ठिया असंपत्ता, पवत्तिणी य अमुहा सिया, सा णं भंते! किं आराहिया, विराहिया? गोयमा! आराहिया, नो विराहिया।

सा य संपट्ठिया जहा निग्गंथस्स तिण्णि गमा भणिया एवं निग्गंथीए वि तिण्णि आलावगा भाणियच्चा जाव आराहिया, नो विराहिया।

से केणट्ठेणं भंते! एवं वुच्चइ-आराहए, नो विराहए? "गोयमा! से जहानामए केइ पुरिसे एगं महं उण्णालोमं वा गयलोमं वा सणलोमं वा कप्पासलोमं वा तणसूयं वा दुहा वा तिहा वा संखेज्जहा वा छिंदित्ता अगणिकायंसि पक्खिवेज्जा, से नूणं गोयमा! छिज्जमाणे छिन्ने, पक्खिप्पमाणे पक्खित्ते, इज्जमाणे दइढे ति वत्तव्वं सिया? हंता, भगवं! छिज्जमाणे छिन्ने जाव दइढे ति वत्तव्वं सिया।

से जहा वा केइ पुरिसे वत्थ अहतं वा धोतं वा तंतुग्गयं वा मंजिट्ठादोणीए पक्खिवेज्जा, से नूणं गोयमा! उक्खिप्पमाणे उक्खित्ते, पक्खिप्पमाणे पक्खित्ते, रज्जमाणे रते ति वत्तव्वं सिया? हंता, भगवं! उक्खिप्पमाणे उक्खित्ते जाव रते ति वत्तव्वं सिया? से तेणट्ठेणं गोयमा! एवं वुच्चइ-आराहए, नो विराहए।

[४०८] पईवस्स णं भंते! झियायमाणस्स किं पदीवे झियाति, लट्ठी झियाइ, वती झियाइ, तेल्ले झियाइ, दीवचंपए झियाइ, जोती झियाइ? गोयमा! नो पदीवे झियाइ, जाव नो दीवचंपए झियाइ, जोती झियाइ।

अगारस्स णं भंते! झियायमाणस्स किं अगारे झियाइ, कुइडा झियायंति, कडणा झियायंति, धारणा झियायंति, बलहरणे झियाइ, वंसा झियायंति, मल्ला झियायंति, वागा झियायंति, छित्तरा झियायंति, छाणे झियाति, जोति झियाति? गोयमा! नो अगारे झियाति, नो कुइडा झियायंति, जाव नो छाणे झियाति, जोती झियाति।

[४०९] जीवे णं भंते! ओरालियसरीराओ कतिकिरिए? गोयमा! सिय तिकिरिए, सिय चउकिए, सिय पंचकिए, सिय अकिए।

नेरइए णं भंते ! ओरालियसरीराओ कतिकिरिए ? गोयमा ! सिय तिकिरिए, सिय चउकिए सिय पंचकिए।

असुरकुमारे णं भंते! ओरालियसरीराओ कतिकिरिए? एवं चेव।

एवं जाव वेमाणिए, नवरं मणुस्से जहा जीवे।

जीवे णं भंते! ओरालियसरीरेहिंतो कतिकिरिए? गोयमा! सिय तिकिरिए जाव सिय अकिए।

नेरइए णं भंते! ओरालियसरीरेहिंतो कतिकिरिए? एवं एसो जहा पढमो दंडओ तहा इमो वि अपरिसेसो भाणियव्वो जाव वेमाणिए, नवरं मणुस्से जहा जीवे ।

जीवा णं भंते! ओरालियसरीराओ कतिकिरिया? गोयमा! सिय तिकिरिया जाव सिय अकिरिया।

नेरइया णं भंते! ओरालियसरीराओ कतिकिरिया? एवं एसो वि जहा पढमो दंडओ तहा भाणियव्वो जाव वेमाणिया, नवरं मणुस्सा जहा जीवा

जीवा णं भंते! ओरालियसरीरेहिंतो कतिकिरिया? गोयमा! तिकिरिया वि, चउकिए वि, पंचकिए वि, अकिए वि।

नेरइया णं भंते! ओरालियसरीरेहिंतो कइकिए? गोयमा! तिकिए वि, चउकिए वि, पंचकिए वि।

एवं जाव वेमाणिया, नवरं मणुस्सा जहा जीवा।

जीवे णं भंते! वेउव्वियसरीराओ कतिकिरिए? गोयमा! सिय तिकिए, सिय चउकिए, सिय अकिए।

नेरइए णं भंते! वेउव्वियसरीराओ कतिकिरिए? गोयमा! सिय तिकिए, सिय चउकिए।

एवं जाव वेमाणिए, नवरं मणुस्से जहा जीवे।

एवं जहा ओरालियसरीरेणं चत्तारि दंडगा भणिया तहा वेउव्वियसरीरेण वि चत्तारि दंडगा भाणियव्वा, नवरं पंचमकिए न भणइ, सेसं तं चेव।

एवं जहा वेउव्वियं तहा आहारगं पि, तेयगं पि, कम्मगं पि भाणियव्वं। एक्केक्के चत्तारि दंडगा भाणियव्वा जाव वेमाणिया णं भंते! कम्मगसरीरेहिंतो कइकिए? गोयमा! तिकिए वि, चउकिए वि।

सेवं भंते! सेवं भंते! ति।

**\*अट्ठमे सए छट्ठो उद्देशो समत्तो\***

## ० सत्तमो उद्देशो ०

[४१०] तेणं कालेणं तेणं समएणं रायगिहे नगरे। वण्णओ। गुणसिलए चेइए। वण्णओ, जाव पुढविसिलावट्ठओ। तस्स णं गुणसिलयस्स चेइयस्स अदूरसामंते बहवे अन्नउत्थिया परिवसंति।

तेणं कालेणं तेणं समएणं समणे भगवं महावीरे आदिगरे जाव समोसढे जाव परिसा

पडिगया।

तेणं कालेणं तेणं समएणं समणस्स भगवओ महावीरस्स बहवे अंतेवासी थेरा भगवंतो जातिसंपन्ना कुलसंपन्ना जहा बितियसए जाव जीवियासामरणभयविप्पमुक्का समणस्स भग० महावीरस्स अदूर सामंते उड्डंजाणू अहोसिरा झाणकोट्ठोवगया संजमेणं तवसा अप्पाणं भावेमाणा जाव विहरंति।

तए णं ते अन्नउत्थिया जेणेव थेरा भगवंतो तेणेव उवागच्छंति, उवागच्छता ते थेरे भगवंते एवं वयासी-

तुब्भे णं अज्जो! तिविहं तिविहेणं अस्संजयअविरयअप्पडिहय जहा सतमसए बितिए उद्देशए जाव एगंतबाला यावि भवह।

तए णं ते थेरा भगवंतो ते अन्नउत्थिए एवं वयासी-केणं कारणेणं अज्जो! अम्हे तिविहं तिविहेणं अस्संजयअविरय जाव एगंतबाला यावि भवामो?

तए णं ते अन्नउत्थिया ते थेरे भगवंते एवं वयासी-तुब्भे णं अज्जो! अदिन्नं गेण्हह, अदिन्नं भुंजह, अदिन्नं सातिज्जह। तए णं तुब्भे अदिन्नं गेण्हमाणा, अदिन्नं सातिज्जह। तए णं तुब्भे अदिन्नं गेण्हमाणा, अदिन्नं भुंजमाणा, अदिन्नं सातिज्जमाणा तिविहं तिविहेणं अस्संजयअविरय जाव एगंतबाला यावि भवह।

तए णं ते थेरा भगवंतो ते अन्नउत्थिए एवं वयासी केणं कारणेणं अज्जो! अम्हे अदिन्नं गेण्हामो, अदिन्नं भुंजामो, अदिन्नं सातिज्जामो, तए णं अम्हे अदिन्नं गेण्हमाणा, जाव अदिन्नं सातिज्जमाणा तिविहं तिविहेणं अस्संजय जाव एगंतबाला यावि भवामो?

तए णं ते अन्नउत्थिया ते थेरे भगवंते एवं वयासी-तुम्हाणं अज्जो! दिज्जमाणे अदिन्ने, पडिगाहेज्जमाणे अपडिग्गाहिए, निसिरज्जमाणे अणिसट्ठे, तुब्भे णं अज्जो! दिज्जमाणं पडिग्गहगं असंपतं एत्थ णं अंतरा केइ अवहरिज्जा, गाहावइस्स णं तं, नो खलु तं तुब्भं, तए णं तुब्भे अदिन्नं गेण्हह जाव अदिन्नं सातिज्जह, तए णं तुब्भे अदिन्नं गेण्हमाणा जाव एगंतबाला यावि भवह।

तए णं ते थेरा भगवंतो ते अन्नउत्थिए एवं वयासी-नो खलु अज्जो! अम्हे अदिन्नं गिण्हामो, अदिन्नं भुंजामो, अदिन्नं सातिज्जामो, अम्हे णं अज्जो! दिन्नं गेण्हामो, दिन्नं भुंजामो, दिन्नं सातिज्जामो, तए णं अम्हे दिन्नं गेण्हमाणा दिन्नं भुंजमाणा दिन्नं सातिज्जमाणा तिविहं तिविहेणं संजयविरयपडिहय जहा सतमसए जाव एगंतपंडिया यावि भवामो।

तए णं ते अन्नउत्थिया ते थेरे भगवंते एवं वयासी-केण कारणेणं अज्जो! तुम्हे दिन्नं गेण्हह जाव दिन्नं सातिज्जह, तए णं तुब्भे दिन्नं गेण्हमाणा जाव एगंतपंडिया यावि भवह?

तए णं ते थेरा भगवंतो ते अन्नउत्थिए एवं वयासी-अम्हे णं अज्जो! दिज्जमाणे दिन्ने, पडिगाहेज्जमाणे पडिग्गहिए, निसिरिज्जमाणे निसट्ठे। अम्हं णं अज्जो! दिज्जमाणं पडिग्गहगं असंपतं एत्थ णं अंतरा केइ अवहरेज्जा, अम्हं णं तं, णो खलु तं गाहावइस्स, तए णं अम्हे दिन्नं गेण्हामाणा जाव दिन्नं सातिज्जमाणा तिविहं तिविहेणं संजय जाव एगंतपंडिया यावि भवामो। तुब्भे णं अज्जो! अप्पणा चेव तिविहं तिविहेणं अस्संजय जाव एगंतबाला यावि भवह।

तए णं ते अन्नउत्थिया ते थेरे भगवंते एवं वयासी-केण कारणेणं अज्जो! अम्हे तिविहं जाव एगंतबाला यावि भवामो?

तए णं ते थेरा भगवंतो ते अन्नउत्थिए एवं वयासी-तुब्भे णं अज्जो! अदिन्नं गेण्हह, अदिन्नं भुंजह, अदिन्नं साइज्जह, तए णं अज्जो! तुब्भे अदिन्नं गे. जाव एगंतबाला यावि भवह।

तए णं ते अन्नउत्थिया ते थेरे भगवंते एवं वयासी-केण कारणेणं अज्जो! अम्हे अदिन्नं गेण्हामो जाव एगंतबाला यावि भवामो?

तए णं ते थेरा भगवंतो ते अन्नउत्थिए एवं वयासी-तुब्भे णं अज्जो! दिज्जमाणे अदिन्ने तं चेव जाव गाहावइस्स णं तं, णो खलु तं तुब्भं, तए णं तुब्भे अदिन्नं गेण्हह, तं चेव जाव एगंतबाला यावि भवह।

तए णं ते अन्नउत्थिया ते थेरे भगवंते एवं वयासी-तुब्भे णं अज्जो! तिविहं तिविहेणं अस्संजय जाव एगंतबाला यावि भवह।

तए णं ते थेरा भगवंतो ते अन्नउत्थिए एवं वयासी-केण कारणेणं अज्जो! अम्हे तिविहं तिविहेणं जाव एगंतबाला यावि भवामो?

तए णं ते अन्नउत्थिया ते थेरे भगवंते एवं वयासी-तुब्भे णं अज्जो! रीयं रीयमाणा पुढविं पेच्चेह अभिहणह वतेह लेसेह संघाएह संघट्ठेह परितावेह किलामेह उवद्धवेह, तए णं तुब्भे पुढविं पेच्चेमाणा अभिहणेमाणा जाव उवद्धवेमाणा तिविहं तिविहेणं असंजयअविरय जाव एगंतबाला यावि भवह।

तए णं ते थेरा भगवंतो ते अन्नउत्थिए एवं वयासी-नो खलु अज्जो! अम्हे रीयं रीयमाणा पुढविं पेच्चेमो अभिहणामो जाव उवद्धवेमो, अम्हे णं अज्जो! रीयं रीयमाणा कायं वा जोगं वा रियं वा पडुच्च देसं देसेणं वयामो, पएसं पएसेणं वयामो, तेणं अम्हे देसं देसेणं वयमाणा पएसं पएसेणं वयमाणा नो पुढविं पेच्चेमो अभिहणामो जाव उवद्धवेमो, तए णं अम्हे पुढविं अपेच्चेमाणा अणाभिहणेमाणा जाव अणुवद्धवेमाणा तिविहं तिविहेणं संजय जाव एगंतपंडिया यावि भवामो, तुब्भे णं अज्जो! अप्पणा चेव तिविहं तिविहेणं अस्संजय जाव बाला यावि भवह।

तए णं ते अन्नउत्थिया ते थेरे भगवंते एवं वयासी-केणं कारणेणं अज्जो! अम्हे तिविहं तिविहेणं जाव एगंतबाला यावि भवामो?

तए णं ते थेरा भगवंतो ते अन्नउत्थिए एवं वयासी-तुब्भे णं अज्जो! रीयं रीयमाणा पुढविं पेच्चेह जाव उवद्धवेह, तए णं तुब्भे पुढविं पेच्चेमाणा जाव उवद्धवेमाणा तिविहं तिविहेणं जाव एगंतबाला यावि भवह।

तए णं ते अन्नउत्थिया ते थेरे भगवंते एवं वयासी-तुब्भे णं अज्जो! गम्ममाणे अगते, वीतिककमिज्जमाणे अवीतिककंते रायगिहं नगरं संपाविठकामे असंपते?

तए णं ते थेरा भगवंतो ते अन्नउत्थिए एवं वयासी-नो खलु अज्जो! अम्हं गम्ममाणे अगए, वीइक्कमिज्जमाणे अवीतिककंते रायगिहं नगरं जाव असंपते, अम्हं णं अज्जो! गम्ममाणे गए, वीतिककमिज्जमाणे वीतिककंते रायगिहं नगरं संपाविठकामे संपते, तुब्भं णं अज्जो! अप्पणा चेव गम्ममाणे अगए वीतिककमिज्जमाणे अवीतिककंते रायगिहं नगरं जाव असंपते।

तए णं ते थेरा भगवंतो ते अन्नउत्थिए एवं पडिहणेंति, पडिहणित्ता गइप्पवायं नाममज्झयणं पन्नवइंसु।

[४११] कइविहे णं भंते! गइप्पवाए पण्णते? गोयमा! पंचविहे गइप्पवाए पण्णते, तं जहा-

पयोगगती ततगती बंधणछेयणगती उववायगती विहायगती। एतो आरब्भ पयोगपयं  
निरवसेसं भाणियत्वं, जाव से तं विहायगई।  
सेवं भंते! सेवं भंते! ति।

**\*अट्ठमे सए सत्तमो उद्देशो समतो\***

## ० अट्ठमो उद्देशो ०

**[४१२]** रायगिहे नयरे जाव एवं वयासी-

गुरू णं भंते! पडुच्च कति पडिणीया पण्णत्ता? गोयमा! तओ पडिणीया पण्णत्ता, तं जहा-  
आयरियपडिणीए उवज्झायपडिणीए थेरपडिणीए।

गइं णं भंते! पडुच्च कति पडिणीया पण्णत्ता? गोयमा! तओ पडिणीया पण्णत्ता, तं जहा-  
इहलोगपडिणीए परलोगपडिणीए दुहओलोगपडिणीए।

समूहं णं भंते! पडुच्च कति पडिणीया पण्णत्ता? गोयमा! तओ पडिणीया पण्णत्ता, तं जहा-  
कुलपडिणीए गणपडिणीए संघपडिणीए।

अणुकंपं पडुच्च. पुच्छा। गोयमा! तओ पडिणीया पण्णत्ता, तं जहा-तवस्सिपडिणीए  
गिलाणपडिणीए सेहपडिणीए।

सुयं णं भंते! पडुच्च. पुच्छा। गोयमा! तओ पडिणीया पण्णत्ता, तं जहा-सुत्तपडिणीए  
अत्थपडिणीए तदुभयपडिणीए।

भावं णं भंते! पडुच्च. पुच्छा। गोयमा! तओ पडिणीया पण्णत्ता, तं जहा-नाणपडिणीए  
दंसणपडिणीए चरित्तपडिणीए।

**[४१३]** कइविहे णं भंते! ववहारे पण्णत्ते? गोयमा! पंचविहे ववहारे पण्णत्ते, तं जहा-आगम-  
सुत्त-आणा-धारणा-जीए। जहा से तत्थ आगमे सिया, आगमेणं ववहारं पट्ठवेज्जा। णो य से तत्थ आगमे  
सिया; जहा से तत्थ सुत्ते सिया, सुएणं ववहारं पट्ठवेज्जा। णो वा से तत्थ सुए सिया; जहा से तत्थ आणा  
सिया, आणाए ववहारं पट्ठवेज्जा। णो य से तत्थ आणा सिया; जहा से तत्थ धारणा सिया, धारणाए  
ववहारं पट्ठवेज्जा। णो य से तत्थ धारणा सिया; जहा से तत्थ जीए सिया जीएणं ववहारं पट्ठवेज्जा।  
इच्चेएहिं पंचहिं ववहारं पट्ठवेज्जा, तं जहा-आगमेणं सुएणं आणाए धारणाए जीएणं। जहा जहा से आगमे  
सुए आणा धारणा जीए तहा तहा ववहारं पट्ठवेज्जा।

से किमाहु भंते! आगमबलिया समणा निग्गंथा इच्चेयं पंचविहं ववहारं जया जया जहिं  
जहिं तया तया तहिं तहिं अणिस्सिओवस्सितं सम्मं ववहरमाणे समणे निग्गंथे आणाए आराहए भवइ?

**[४१४]** कइविहे णं भंते! बंधे पण्णत्ते? गोयमा! दुविहे बंधे पन्नत्ते, तं जहा-इरियावहियाबंधे य  
संपराइयबंधे य।

इरियावहियं णं भंते! कम्मं किं नेरइओ बंधइ, तिरिक्खजोणिओ बंधइ, तिरिक्खजोणिणी  
बंधइ, मणुस्सो बंधइ, मणुस्सी बंधइ, देवो बंधइ, देवी बंधइ? गोयमा! नो नेरइओ बंधइ, नो तिरिक्खजोणीओ  
बंधइ, नो तिरिक्खजोणिणी बंधइ, नो देवो बंधइ, नो देवी बंधइ, पुव्वपडिवन्नए पडुच्च मणुस्सा य,  
मणुस्सीओ य बंधंति, पडिवज्जमाणए पडुच्च मणुस्सो वा बंधइ, मणुस्सी वा बंधइ, मणुस्सा वा बंधंति,

मणुस्सीओ वा बंधंति, अहवा मणुस्सो य मणुस्सी य बंधइ, अहवा मणुस्सो य मणुस्सीओ य बंधंति, अहवा मणुस्सा य मणुस्सी य बंधंति, अहवा मणुस्सा य मणुस्सीओ य बंधंति।

तं भंते! किं इत्थी बंधइ, पुरिसो बंधइ, नपुंसगो बंधति, इत्थीओ बंधंति, पुरिसा बंधंति, नपुंसगा बंधंति? नोइत्थीनोपुरिसोनोनपुंसगो बंधइ? गोयमा! नो इत्थी बंधइ, नो पुरिसो बंधइ जाव नो नपुंसओ बंधइ। पुव्वपडिवन्नए पडुच्च अवगयवेदा बंधंति, पडिवज्जमाणए य पडुच्च अवगयवेदो वा बंधंति, अवगयवेदा वा बंधंति।

जइ भंते! अवगयवेदो वा बंधइ, अवगयवेदा वा बंधंति तं भंते! किं इत्थीपच्छाकडो बंधइ, पुरिसपच्छाकडो बंधइ, नपुंसकपच्छाकडो बंधइ, इत्थीपच्छाकडा बंधंति, पुरिसपच्छाकडा बंधंति, नपुंसगपच्छाकडा बंधंति, उदाहु इत्थिपच्छाकडो य पुरिसपच्छाकडो य बंधंति, उदाहु इत्थीपच्छाकडो य गपुंसगपच्छाकडो य बंधइ, उदाहु पुरिसपच्छाकडो य गपुंसगपच्छाकडो य बंधइ, उदाहु इत्थिपच्छाकडो य पुरिसपच्छाकडो य गपुंसगपच्छाकडो य बंधइ, एवं एते छव्वीसं भंगा जाव उदाहु इत्थीपच्छाकडा वि बंधइ, पुरिसपच्छाकडो वि बंधइ, नपुंसगपच्छाकडो वि बंधइ, इत्थीपच्छाकडा वि बंधंति , पुरिसपच्छाकडा वि बंधंति, नपुंसकपच्छाकडा वि बंधंति, अहवा इत्थीपच्छाकडो य पुरिसपच्छाकडो य बंधइ, एवं एए चेव छव्वीसं भंगा भाणियव्वा जाव अहवा इत्थिपच्छाकडा य पुरिसपच्छाकडा य नपुंसगपच्छाकडा य बंधंति।

तं भंते! किं बंधी बंधइ बंधिस्सइ, बंधी बंधइ न बंधिस्सइ, बंधी न बंधइ बंधिस्सइ, बंधी न बंधइ न बंधिस्सइ, न बंधी बंधइ बंधिस्सइ, न बंधी बंधइ न बंधिस्सइ, न बंधी न बंधइ बंधिस्सइ, न बंधी न बंधइ न बंधिस्सइ? गोयमा! भवागरिसं पडुच्च अत्थेगतिए बंधी बंधइ बंधिस्सइ। अत्थेगतिए बंधी बंधइ न बंधिस्सइ। एवं तं चेव सव्वं जाव अत्थेगतिए न बंधी न बंधइ न बंधिस्सइ। गहणागरिसं पडुच्च अत्थेगतिए बंधी, बंधइ, बंधिस्सइ; एवं जाव अत्थेगतिए न बंधी, बंधइ, बंधिस्सइ। णो चेव णं न बंधी, बंधइ, न बंधिस्सइ। अत्थेगतिए न बंधी, न बंधइ, बंधिस्सइ। अत्थेगतिए न बंधी, न बंधइ, बंधिस्सइ।

तं भंते! किं साईयं सपज्जवसियं बंधइ, साईयं अपज्जवसियं बंधइ, अणाईयं सपज्जवसियं बंधइ, अणाईयं अपज्जवसियं बंधइ? गोयमा! साईयं सपज्जवसियं बंधइ, नो साईयं अपज्जवसियं बंधइ, नो अणाईयं सपज्जवसियं बंधइ, नो अणाईयं सपज्जवसियं बंधइ, नो अणाईयं अपज्जवसियं बंधइ।

तं भंते! किं देसेणं देसं बंधइ, देसेणं सव्वं बंधइ, सव्वेणं देसं बंधइ, सव्वेणं सव्वं बंधइ? गोयमा! नो देसेणं देसं बंधइ, णो देसेणं सव्वं बंधइ, नो सव्वेणं देसं बंधइ, सव्वेणं सव्वं बंधइ।

**[४१५]** संपराइयं णं भंते! कम्मं किं नेरइयो बंधइ, तिरिक्खजोणीओ बंधइ, जाव देवी बंधइ? गोयमा! नेरइओ वि बंधइ, तिरिक्खजोणीओ वि बंधइ, तिरिक्खजोणिणी वि बंधइ, मणुस्सो वि बंधइ, मणुस्सी वि बंधइ, देवो वि बंधइ, देवी वि बंधइ।

तं भंते! किं इत्थी बंधइ, पुरिसो बंधइ, तहेव जाव नोइत्थीनोपुरिसोनोनपुंसओ बंधइ? गोयमा! इत्थी वि बंधइ, पुरिसो वि बंधइ, जाव नपुंसगो वि बंधइ। अहवेए य अवगयवेदो य बंधइ, अहवेए य अवगयवेद्या य बंधंति।

तं भंते! किं बंधी बंधइ बंधिस्सइ; बंधी बंधइ न बंधिस्सइ ; बंधी न बंधइ, बंधिस्सइ ; बंधी न बंधइ, न बंधिस्सइ ? गोयमा! अत्थेगतिए बंधी बंधइ बंधिस्सइ ; अत्थेगतिए बंधी बंधइ, न बंधिस्सइ ; अत्थेगतिए बंधी न बंधइ, बंधिस्सइ ; अत्थेगतिए बंधी न बंधइ न बंधिस्सइ ।

तं भंते! किं साईयं सपज्जवसियं बंधइ? पुच्छा तहेव। गोयमा! साईयं वा सपज्जवसियं बंधइ, अणाईयं वा सपज्जवसियं बंधइ, अणाईयं वा अपज्जवसियं बंधइ, णो चेव णं साईयं अपज्जवसियं बंधइ। तं भंते! किं देसेणं देसं बंधइ? एवं जहेव इरियावहियाबंधगस्स जाव सत्वेणं सत्वं बंधइ।

[४१६] कइ णं भंते! कम्मपयडीओ पण्णत्ताओ? गोयमा! अट्ठ कम्मपयडीओ पण्णत्ताओ, तं जहा-णाणावरणिज्जं जाव अंतराइयं।

कइ णं भंते! परीसहा पण्णत्ता? गोयमा! बावीसं परीसहा पण्णत्ता, तं जहा-दिगिंछापरीसहे, पिवासापरीसहे, जाव दंसणपरीसहे।

एए णं भंते! बावीसं परीसहा कतिसु कम्मपगडीसु समयरंति? गोयमा! चउसु कम्मपयडीसु समयरंति, तं जहा-नाणावरणिज्जे, वेयणिज्जे, मोहणिज्जे, अंतराइए।

नाणावरणिज्जे णं भंते! कम्मे कति परीसहा समयरंति? गोयमा! दो परीसहा समयरंति, तं जहा-पण्णापरीसहे य नाणपरीसहे य।

वेयणिज्जे णं भंते! कम्मे कति परीसहा समयरंति? गोयमा! एक्कारस परीसहा समयरंति, तं जहा-

[४१७] पंचेव आणुपुव्वी, चरिया, सेज्जा, वहे य, रोगे य।  
तण्णफास जल्लमेव य एक्कारस वेदणिज्जम्मि ॥

[४१८] दंसणमोहणिज्जे णं भंते! कम्मे कति परीसहा समयरंति? गोयमा! एगे दंसणपरीसहे समयरइ।

चरित्तमोहणिज्जे णं भंते! कम्मे कति परीसहा समयरंति? गोयमा! सत्त परीसहा समयरंति, तं जहा-

[४१९] अरती अचेल इत्थी निसीहिया जायणा य अक्कोसे।  
सक्कारपुरक्कारे चरित्तमोहम्मि सत्तेते ॥

[४२०] अंतराइए णं भंते! कम्मे कति परीसहा समयरंति? गोयमा! एगे अलाभपरीसहे समयरइ।

सत्तविहबंधगस्स णं भंते! कति परीसहा पण्णत्ता? गोयमा! बावीसं परीसहा पण्णत्ता, वीसं पुण वेदेइ-जं समयं सीयपरीसहं वेदेति णो तं समयं उस्सिणपरीसहं वेदेइ, जं समयं उस्सुणपरीसहं वेदेइ णो तं समयं सीयपरीसहं वेदेइ। जं समयं चरियापरीसहं वेदेति णो तं समयं निसीहियापरीसहं वेदेति, जं समयं निसीहियापरीसहं वेदेइ णो तं समयं चरियापरीसहं वेदेइ।

अट्ठविहबंधगस्स णं भंते! कति परीसहा पण्णत्ता? गोयमा! बावीसं परीसहा पण्णत्ता. एवं अट्ठविहबंधगस्स वि।

छत्विहबंधगस्स णं भंते! वीयरागछउमत्थस्स कति परीसहा पण्णत्ता? गोयमा! चोदुस पण्णत्ता, बारस पुण वेदेइ-जं समयं सीयपरीसहं वेदेइ णो तं समयं उस्सिणपरीसहं वेदेइ, जं समयं उस्सुणपरीसहं वेदेइ नो तं समयं सीयपरीसहं वेदेइ। जं समयं चरियापरीसहं वेदेति णो तं समयं सेज्जापरीसहं वेदेइ, जं समयं सेज्जापरीसहं वेदेति णो तं समयं चरियापरीसहं वेदेइ।

एकविहबंधगस्स णं भंते! वीयरागछउमत्थस्स कति परीसहा पण्णत्ता? गोयमा! एवं चेव जहेव छव्विहबंधगस्स।

एगविहबंधगस्स णं भंते! सजोगिभवत्थकेवलिस्स कति परीसहा पण्णत्ता? गोयमा! एक्कारस परीसहा पण्णत्ता, नव पुण वेदेइ। सेसं जहा छव्विहबंधगस्स।

अबंधगस्स णं भंते! अजोगिभवत्थकेवलिस्स कति परीसहा पण्णत्ता? गोयमा! एक्कारस परीसहा पण्णत्ता, नव पुण वेदेइ, जं समयं सीयपरीसहं वेदेति नो तं समयं उस्सिणपरीसहं वेदेइ, जं समयं उस्सिणपरीसहं वेदेति नो तं समयं सीयपरीसहं वेदेइ। जं समयं चरियापरीसहं वेदेइ नो तं समयं सेज्जापरीसहं वेदेति, जं समयं सेज्जापरीसहं वेदेइ नो तं समयं चरियापरीसहं वेदेइ।

[४२१]जंबुद्धीवे णं भंते! दीवे सूरिया उग्गमणमुहुत्तंसि दूरे य मूले य दीसंति, मज्झंतिय मुहुत्तंसि मूले य दूरे य दीसंति, अत्थमण-मुहुत्तंसि दूरे य मूले य दीसंति? हंता, गोयमा! जंबुद्धीवे णं दीवे सूरिया उग्गमणमुहुत्तंसि दूरे य तं चेव जाव अत्थमणमुहुत्तंसि दूरे य मूले य दीसंति।

जंबुद्धीवे णं भंते! दीवे सूरिया उग्गमणमुहुत्तंसि य मज्झंतियमुहुत्तंसि य, अत्थमणमुहुत्तंसि य सव्वत्थ समा उच्चत्तेणं? हंता, गोयमा! जंबुद्धीवे णं दीवे सूरिया उग्गमण जाव उच्चत्तेणं।

जइ णं भंते! जंबुद्धीवे दीवे सूरिया उग्गमणमुहुत्तंसि य मज्झंतियमुहुत्तंसि य अत्थमण मुहुत्तंसि जाव उच्चत्तेणं से केणं खाइ अट्ठेणं भंते! एवं वुच्चइ 'जंबुद्धीवे णं दीवे सूरिया उग्गमणमुहुत्तंसि दूरे य मूले य दीसंति जाव अत्थमणमुहुत्तंसि दूरे य मूले य दीसंति?' गोयमा! लेसा पडिघाएणं उग्गमण मुहुत्तंसि दूरे य मूले य दीसंति, से तेणट्ठेणं गोयमा! एवं वुच्चइ-जंबुद्धीवे णं दीवे सूरिया उग्गमणमुहुत्तंसि दूरे य मूले य दीसंति जाव अत्थमण जाव दीसंति।

जंबुद्धीवे णं भंते! दीवे सूरिया किं तीयं खेतं गच्छंति, पडुप्पन्नं खेतं गच्छंति, अणागयं खेतं गच्छंति? गोयमा! णो तीयं खेतं गच्छंति, पडुप्पन्नं खेतं गच्छंति, णो अणागयं खेतं गच्छंति।

जंबुद्धीवे णं दीवे सूरिया किं तीयं खेतं ओभासंति, पडुप्पन्नं खेतं ओभासंति, अणागयं खेतं ओभासंति? गोयमा! नो तीयं खेतं ओभासंति, पडुप्पन्नं खेतं ओभासंति, नो अणागयं खेतं ओभासंति। तं भंते! किं पुट्ठं ओभासंति, अपुट्ठं ओभासंति? गोयमा! पुट्ठं ओभासंति, नो अपुट्ठं ओभासंति जाव नियमा छद्धिसिं।

जंबुद्धीवे णं भंते! दीवे सूरिया किं तीयं खेतं उज्जोर्वेति? एवं चेव जाव नियमा छद्धिसिं।

एवं तवेति, एवं भासंति जाव नियमा छद्धिसिं।

जंबुद्धीवे णं भंते! दीवे सूरियाणं किं तीए खेत्ते किरिया कज्जइ, पडुप्पन्ने खेत्ते किरिया कज्जइ, अणागए खेत्ते किरिया कज्जइ? गोयमा! नो तीए खेत्ते किरिया कज्जइ, पडुप्पन्ने खेत्ते किरिया कज्जइ, णो अणागए खेत्ते किरिया कज्जइ।

सा भंते! किं पुट्ठा कज्जति, अपुट्ठा कज्जइ? गोयमा! पुट्ठा कज्जइ, नो अपुट्ठा कज्जति जाव नियमा छद्धिसिं।

जंबुद्धीवे णं भंते! दीवे सूरिया केवतियं खेतं उड्ढं तवंति, केवतियं खेतं अहे तवंति, केवतियं खेतं तिरियं तवंति? गोयमा! एगं जोयणसयं उड्ढं तवंति, अट्ठारस जोयणसयाइं अहे तवंति, सीयालीसं जोयणसहस्साइं दोण्णि तेवट्ठे जोयणसए एकवीसं च सट्ठिभाए जोयणस्स तिरियं तवंति।

अंतो णं भंते! माणुसुत्तरस्स पव्वयस्स जे चंदिम-सूरिय-गहगणणक्खत्त-तारारूवा ते णं भंते! देवा किं उड्ढोववन्नगा? जहा जीवाभिगमे तहेव निरवसेसं जाव उक्कोसेणं छम्मासा।

बहिया णं भंते! माणुसुत्तरस्स. जहा जीवाभिगमे जाव इंदट्ठाणे णं भंते! केवतियं कालं उववाएणं विरहिए पन्नते? गोयमा! जहन्नेणं एककं समयं, उक्कोसेणं छम्मासा।

सेवं भंते! सेवं भंते! ति.।

**\*अट्ठम सए अट्ठमो उद्देशो समतो \***

## ० नवमो उद्देशो ०

**[४२२]** कइविहे णं भंते! बंधे पण्णते? गोयमा! दुविहे बंधे पण्णते, तं जहा-पयोगबंधे य, वीससाबंधे य।

**[४२३]** वीससाबंधे णं भंते! कतिविहे पण्णते? गोयमा! दुविहे पण्णते, तं जहा-साईयवीससा बंधे य अणाईयवीससाबंधे य।

अणाईयवीससाबंधे णं भंते! कतिविहे पण्णते? गोयमा! तिविहे पण्णते, तं जहा-धम्मत्थिकायअन्नमन्नअणादीयवीससाबंधे अधम्मत्थिकायअन्नमन्नअणादीयवीससाबंधे, आगासत्थिकाय-अन्नमन्न अणादीयवीससाबंधे।

धम्मत्थिकायअन्नमन्नअणादीयवीससाबंधे णं भंते! किं देसबंधे सत्त्वबंधे? गोयमा! देसबंधे, नो सत्त्वबंधे।

एवं अधम्मत्थिकाय-अन्नमन्न-अणादीय-वीससाबंधे वि, एवं आगासत्थिकाय-अन्नमन्न-अणादीय वीससाबंधे वि।

धम्मत्थिकायअन्नमन्नअणाईयवीससाबंधे णं भंते! कालओ केवच्चिरं होइ? गोयमा! सत्त्वद्धं।

एवं अधम्मत्थिकाए, एवं आगासत्थिकाये।

सादीयवीससाबंधे णं भंते! कतिविहे पण्णते? गोयमा! तिविहे पण्णते, तं जहा-बंधणपच्चइए भायणपच्चइए परिणामपच्चइए।

से किं तं बंधणपच्चइए? बंधणपच्चइए, जं णं परमाणुपुग्गल-दुपरसिय-तिपरसिय-जाव-दसपरसिय-संखेज्जपरसिय-असंखेज्जपरसिय-अणंतपरसियाणं खंधाणं वेमायनिद्धयाए वेमायलुक्खयाए वेमायनिद्ध-लुक्खयाए बंधणपच्चएणं बंधे समुप्पज्जइ जहन्नेणं एककं समयं, उक्कोसेणं

असंखेज्जं कालं। से तं बंधणपच्चइए।

से किं तं भायणपच्चइए? भायणपच्चइए, जं णं जुण्णसुरा-जुण्णगुल-जुण्णतंदुलाणं भायणपच्चएणं बंधे समुप्पज्जइ जहन्नेणं अंतोमुहुत्तं, उक्कोसेणं संखेज्जं कालं। से तं भायणपच्चइए।

से किं तं परिणामपच्चइए ? परिणामपच्चइए, जं णं अब्भाणं अब्भरुक्खाणं जहा ततियसए जाव अमोहाणं परिणामपच्चएणं बंधे समुप्पज्जइ जहन्नेणं एककं समयं, उक्कोसेणं छम्मासा। से तं परि - णाम पच्चइए। से तं सादीयवीससाबंधे। से तं वीससाबंधे।

**[४२४]** से किं तं पयोगबंधे? पयोगबंधे तिविहे पण्णते, तं जहा-अणाईए वा अपज्जवसिए, सादीए वा अपज्जवसिए, सादीए वा सपज्जवसिए। तत्थ णं जे से अणाईए अपज्जवसिए से णं अट्ठहं

जीवमज्झपएसणं। तत्थ वि णं तिण्हं तिण्हं अणाईए अपज्जवसिए, सेसाणं साईए। तत्थ णं जे से सादीए अपज्जवसिए से णं सिद्धाणं। तत्थ णं जे से साईए सपज्जवसिए से णं चउत्विहे पण्णते, तं जहा-आलावणबंधे अल्लियावणबंधे सरीरबंधे सरीरप्पयोगबंधे।

से किं तं आलावणबंधे? आलावणबंधे, जं णं तणभाराण वा कट्ठभाराण वा पत्तभाराण वा पलालभाराण वा वेल्लभाराण वा वेत्तलया-वाग-वरत्तरज्जु-वल्लि-कुस-दब्भमादिएहिं आलावणबंधे समुप्प-ज्जइ; जहन्नेणं अंतोमुहुत्तं उक्कोसेणं संखेज्जं कालं। से तं आलावणबंधे।

से किं तं अल्लियावणबंधे? अल्लियावणबंधे चउत्विहे पण्णते, तं जहा-लेसणाबंधे उच्चयबंधे समुच्चयबंधे साहणणाबंधे।

से किं तं लेसणाबंधे? लेसणाबंधे, जं णं कुड्डाणं कुट्टिमाणं खंभाणं पासायाणं कट्ठाणं चम्माणं घडाणं पडाणं कडाणं छुहा-चिक्खल्ल-सिलेसलक्ख-महुसित्थमाइएहिं लेसणाएहिं बंधे समुप्पज्जइ, जहन्नेणं अंतोमुहुत्तं, उक्कोसेणं संखेज्जं कालं। से तं लेसणाबंधे।

से किं तं उच्चयबंधे? उच्चयबंधे, जं णं तणरासीण वा कट्ठरासीण वा पत्तरासीण वा तुसरासीण वा भुसरासीण वा गोमयरासीण वा अवगररासीण वा उच्चयणं बंधे समुप्पज्जइ, जहन्नेणं अंतोमुहुत्तं, उक्कोसेणं संखेज्जं कालं। से तं उच्चयबंधे।

से किं तं समुच्चयबंधे? समुच्चयबंधे, जं णं अगड-तडाग-नदिदह-वावी-पुक्खरणी-दीहियाणं गुंजालियाणं सराणं सरपंतिआणं सरसरपंतियाणं बिलपंतियाणं देवकुल-सभा-पवा-थूभ-खाइयाणं फरिहाणं पागार-सट्ठालग-चरिय-दारगोपुर-तोरणाणं पासाय-घर-सरण-लेण-आवणाणं सिंघाडग-तिय-चउक्क-चच्चर चउम्मुह-महापहमादीणं छुहा-चिक्खल्ल-सिलेससमुच्चयणं बंधे समुप्पज्जइ, जहन्नेणं अंतोमुहुत्तं, उक्कोसेणं संखेज्जं कालं। से तं समुच्चयबंधे।

से किं तं साहणणाबंधे ? साहणणाबंधे दुविहे पण्णते, तं जहा- देससाहणणाबंधे य सव्वसाहणणा बंधे य।

से किं तं देससाहणणाबंधे? देससाहणणाबंधे, जं णं सगडरह-जाण-जुगग-गिल्लि-थिल्लि-सीय-संदमाणिया-लोही-लोहकडाह-कडच्छुअ-आसणसयण-खंभ-भंड-मतोवगरणमाईणं देससाहणणाबंधे समुप्पज्जइ, जहन्नेणं अंतोमुहुत्तं, उक्कोसेणं संखेज्जं कालं। से तं देससाहणणाबंधे।

से किं तं सव्वसाहणणाबंधे? सव्वसाहणणाबंधे, से णं खीरोदगमाईणं। से तं सव्वसाहणणाबंधे। से तं साहणणाबंधे। से तं अल्लियावणबंधे।

से किं तं सरीरबंधे? सरीरबंधे दुविहे पण्णते, तं जहा-पुव्वप्पओगपच्चइए य पडुप्पन्न-प्पओगपच्चइए य।

से किं तं पुव्वप्पओग-पच्चइए य पुव्वप्पओग-पच्चइए, जं णं नेरइयाणं संसारत्थाणं सव्व-जीवाणं तत्थ तत्थ तेसु तेसु कारणेसु समोहन्नमाणाणं जीवप्पदेसाणं बंधे समुप्पज्जइ। से तं पुव्वपण्ण-पयोगपच्चइए।

से किं तं पडुप्पन्नप्पयोगपच्चइए? पडुप्पन्नप्पयोगपच्चइए, जं णं केवलनाणिस्स

अणगारस्स केवलिसमुग्घाएणं समोहयस्स, ताओ समुग्घायाओ पडिनियत्तमाणस्स, अंतरा मंथे वट्ठमाणस्स तेया-कम्माणं बंधे समुप्पज्जइ। किं कारणं?

ताहे से पएसा एगतीगया भवंति ति। से तं पडुप्पन्नप्पयोगपच्चइए। से तं सरीरबंधे।

से किं तं सरीरप्पयोगबंधे? सरीरप्पयोगबंधे पंचविहे पन्नते, तं जहा-ओरालियसरीर-  
प्पओगबंधे वेउच्चियसरीरप्पओगबंधे आहारगसरीरप्पओगबंधे तेयासरीरप्पयोगबंधे कम्मसरीरप्पयोगबंधे।

ओरालियसरीरप्पयोगबंधे णं भंते! कतिविहे पन्नते? गोयमा! पंचविहे पन्नते, तं जहा-  
एगिंदियओरालियसरीरप्पयोगबंधे बेइंदियओरालियसरीरप्पयोगबंधे जाव पंचिंदियओरालियसरीरप्पयोगबंधे।

एगिंदियओरालियसरीरप्पयोगबंधे णं भंते! कतिविहे पण्णते? गोयमा! पंचविहे पण्णते, तं  
जहा-पुढविकाइयएगिंदियओरालियसरीरप्पयोगबंधे, एवं एएणं अभिलावेणं भेदा जहा ओगाहणसंठाणे  
ओरालियसरीरस्स तहा भाणियत्वा जाव पज्जतगब्भवक्कंतियमणुस्सपंचिंदियओरालियसरीरप्पयोगबंधे य  
अपज्जतगब्भवक्कंतियमणुस्सपंचिंदियओरालियसरीरप्पयोगबंधे य।

ओरालियसरीरप्पयोगबंधे णं भंते! कस्स कम्मस्स उदएणं? गोयमा! वीरियसजोगसद्धवयाए  
पमादपच्चया कम्मं च जोगं च भवं च आउयं च पडुच्च ओरालियसरीरप्पयोगनामाए कम्मस्स उदएणं  
ओरालियसरीरप्पयोगबंधे।

एगिंदियओरालियसरीरप्पयोगबंधे णं भंते! कस्स कम्मस्स उदएणं? एवं चेव।

पुढविकाइयएगिंदियओरालियसरीरप्पयोगबंधे एवं चेव।

एवं जाव वणस्सइकाइया। एवं बेइंदिया। एवं तेइंदिया। एवं चउरिंदिया।

तिरिक्खजोणियपंचिंदियओरालियसरीरप्पयोगबंधे णं भंते! कस्स कम्मस्स उदएणं? एवं चेव।

मणुस्सपंचिंदियओरालियसरीरप्पयोगबंधे णं भंते! कस्स कम्मस्स उदएणं? गोयमा!  
वीरियसजोगसद्धवयाए पमादपच्चया जाव आउयं च पडुच्च मणुस्सपंचिंदियओरालियसरीरप्पयोगनामाए  
कम्मस्स उदएणं मणुस्सपंचिंदियओरालियसरीरप्पओगबंधे।

ओरालियसरीरप्पयोगबंधे णं भंते! किं देसबंधे, सत्त्वबंधे? गोयमा! देसबंधे वि सत्त्वबंधे वि।

एगिंदियओरालियसरीरप्पयोगबंधे णं भंते! किं देसबंधे, सत्त्वबंधे? एवं चेव।

एवं पुढविकाइया।

एवं जाव मणुस्सपंचिंदियओरालियसरीरप्पयोगबंधे णं भंते! किं देसबंधे, सत्त्वबंधे? गोयमा!  
देसबंधे वि, सत्त्वबंधे वि।

ओरालियसरीरप्पयोगबंधे णं भंते! कालओ केवच्चिरं होइ? गोयमा! सत्त्वबंधे एककं समयं;  
देसबंधे जहन्नेणं एककं समयं, उक्कोसेणं तिण्णि पलिओवमाइं समयूणाइं।

एगिंदियओरालियसरीरप्पयोगबंधे णं भंते! कालओ केवच्चिरं होइ? गोयमा! सत्त्वबंधे एककं  
समयं; देसबंधे जहन्नेणं एककं समयं, उक्कोसेणं बावीसं वाससहस्साइं समऊणाइं।

पुढविकाइयएगिंदिय. पुच्छा। गोयमा! सत्त्वबंधे एककं समयं, देसबंधे जहन्नेणं खुड्डाग भव-  
ग्गहणं तिसमयूणं, उक्कोसेणं बावीसं वाससहस्साइं समऊणाइं।

एवं सत्त्वबंधो एककं समयं, देसबंधो जेसिं नत्थि वेउच्चियसरीरं तेसिं जहन्नेणं  
खुड्डागं भवग्गहणं तिसमयूणं, उक्कोसेणं जा जस्स उक्कोसिया ठिती सा समऊणा कायत्वा। जेसिं पुण  
अत्थि वेउच्चियसरीरं तेसिं देसबंधो जहन्नेणं एककं समयं, उक्कोसेणं जा जस्स ठिती सा समऊणा  
कायत्वा जाव मणुस्साणं देसबंधे जहन्नेणं एककं समयं, उक्कोसेणं तिण्णि पलिओवमाइं समयूणाइं।

ओरालियसरीरबंधंतरं णं भंते! कालओ केवच्चिरं होइ? गोयमा! सच्चबंधंतरं जहन्नेणं खुड्डागं भवग्गहणं तिसमयूणं, उक्कोसेणं तेतीसं सागरोवमाइं पुच्चकोडिसमयाहियाइं। देसबंधंतरं जहन्नेणं एककं समयं, उक्कोसेणं तेतीसं सागरोवमाइं तिसमयाहियाइं।

एगिंदियओरालिय. पुच्छा। गोयमा! सच्चबंधंतरं जहन्नेणं खुड्डागं भवग्गहणं तिसमयूणं, उक्कोसेणं बावीसं वाससहस्साइं समयाहियाइं। देसबंधंतरं जहन्नेणं एककं समयं, उक्कोसेणं अंतोमुहुत्तं।

पुढविकाइयएगिंदिय. पुच्छा। गोयमा! सच्चबंधंतरं जहेव एगिंदियस्स तहेव भाणियच्चं; देसबंधंतरं जहन्नेणं एककं समयं, उक्कोसेणं तिण्णि समयं।

जहा पुढविकाइयाणं एवं जाव चउरिंदियाणं वाउक्काइयवज्जाणं, नवरं सच्चबंधंतरं जहन्नेणं खुड्डागभवग्गहणं तिसमयूणं, उक्कोसेणं तिण्णि वाससहस्साइं समयाहियाइं। देसबंधंतरं जहन्नेणं एककं समयं, उक्कोसेणं अंतोमुहुत्तं।

पंचिंदियतिरिक्खजोणियओरालिय. पुच्छा। सच्चबंधंतरं जहन्नेणं खुड्डागभवग्गहणं तिसमयूणं, उक्कोसेणं पुच्चकोडी

समयाहिया, देसबंधंतरं जहा एगिंदियाणं तथा पंचिंदियतिरिक्खजोणियाणं।

एवं मणुस्साण वि निरवसेसं भाणियच्चं जाव उक्कोसेणं अंतोमुहुत्तं।

जीवस्स णं भंते! एगिंदियते णोएगिंदियते पुणरवि एगिंदियते एगिंदियओरालियसरीरप्पओग बंधंतरं कालओ केवच्चिरं होइ ? गोयमा ! सच्चबंधंतरं जहन्नेणं दो खुड्डागभवग्गहणाइं तिसमयूणाइं, उक्कोसेणं दो सागरोवमसहस्साइं संखेज्जवासमब्भहियाइं; देसबंधंतरं जहन्नेणं खुड्डागं भवग्गहणं समयाहियं, उक्कोसेणं दो सागरोवमसहस्साइं संखेज्जवासमब्भहियाइं।

जीवस्स णं भंते! पुढविकाइयते नोपुढविकाइयते पुणरवि पुढविकाइयते पुढविकाइय एगिंदियओरालियसरीरप्पयोगबंधंतरं कालओ केवच्चिरं होइ? गोयमा! सच्चबंधंतरं जहन्नेणं दो खुड्डाइं भवग्गहणाइं तिसमयरूणाइं; उक्कोसेणं अणंतं कालं, अणंता ओसप्पिणी-उस्सप्पिणीओ कालओ, खेतओ अणंता लोगा, असंखेज्जा पोग्गलपरियट्ठा, ते णं पोग्गलपरियट्ठा आवलियाए असंखेज्जइभागे। देसबंधंतरं जहन्नेणं खुड्डागं भवग्गहणं समयाहियं, उक्कोसेणं अणंतं कालं जाव आवलियाए असंखेज्जइभागे।

जहा पुढविकाइयाणं एवं वणस्सइकाइयवज्जाणं जाव मणुस्साणं। वणस्सइकाइयाणं दोण्णि खुड्डाइं एवं चेव; उक्कोसेणं असंखिज्जं कालं, असंखिज्जाओ ओसप्पिणि-उस्सप्पिणीओ कालओ, खेतओ असंखेज्जा लोगा। एवं देसबंधंतरं पि उक्कोसेणं पुढवीकालो।

एएसि णं भंते ! जीवाणं ओरालियसरीरस्स देस-बंधगाणं सच्च-बंधगाणं अबंधगाणं य कयरे कयरेहिंतो जाव विसेसाहिया वा? गोयमा! सच्चत्थोवा जीवा ओरालियसरीरस्स सच्चबंधगा, अबंधगा विसेसाहिया, देसबंधगा असंखेज्जगुणा।

**[४२५]** वेउच्चियसरीरप्पयोगबंधे णं भंते! कतिविहे पन्नते? गोयमा! दुविहे पन्नते, तं जहा- एगिंदियवेउच्चियसरीरप्पयोगबंधे य, पंचिंदियवेउच्चियसरीरप्पयोगबंधे य।

जइ एगिंदिय-वेउच्चियसरीर-प्पयोगबंधे किं वाउक्काइय-एगिंदिय-वेउच्चियसरीर-प्पयोगबंधे, अवाउक्काइयएगिंदियवेउच्चियसरीरप्पयोगबंधे? एवं एणं अभिलावेणं जहा ओगाहणसंठाणे वेउच्चियसरीर भेदो तथा भाणियच्चो जाव पज्जत्तसच्चट्ठसिद्धअणुत्तरोववाइयकप्पातीयवेमाणियदेवपंचिंदियवेउच्चियसरीर-

प्ययोगबंधे य अपज्जतसत्त्वट्ठसिद्धअणुत्तरोववाइय जाव पयोगबंधे य।

वेउत्त्वियसरीरप्पयोगबंधे णं भंते! कस्स कम्मस्स उदएणं? गोयमा! वीरियसजोगसद्धवयाए जाव आउयं वा लद्धिं वा पडुच्च वेउत्त्वियसरीरप्पयोगनामाए कम्मस्स उदएणं वेउत्त्वियसरीरप्पयोगबंधे।

वाउक्काइयएगिंदियवेउत्त्वियसरीरप्पयोगबंधे णं भंते! कस्स कम्मस्स उदएणं? गोयमा! वीरियसजोगसद्धवयाए एवं चेव जाव लद्धिं वा पडुच्च वाउक्काइयएगिंदियवेउत्त्विय जाव बंधे।

रयणप्पभापुढविनेरइयपंचिंदियवेउत्त्वियसरीरप्पयोगबंधे णं भंते! कस्स कम्मस्स उदएणं? गोयमा! वीरियसजोगसद्धवयाए जाव आउयं वा पडुच्च रयणप्पभापुढवि. जाव बंधे।

एवं जाव अहेसत्तमाए।

तिरिक्खजोगियपंचिंदियवेउत्त्वियसरीर. पुच्छा। गोयमा! वीरिय. जहा वाउक्काइयाणं।

मणुस्सपंचिंदियवेउत्त्विय.? एवं चेव।

असुरकुमारभवणवासिदेवपंचिंदियवेउत्त्विय. जहा रयणप्पभापुढविनेरइया।

एवं जाव थणियकुमारा।

एवं वाणमंतरा।

एवं जोइसिया।

एवं सोहम्मकप्पोवगया वेमाणिया। एवं जाव अच्चुय०।

गेवेज्जकप्पातीया वेमाणिया एवं चेव।

अणुत्तरोववाइयकप्पातीया वेमाणिया एवं चेव।

वेउत्त्वियसरीरप्पयोगबंधे णं भंते! किं देसबंधे, सत्त्वबंधे? गोयमा! देसबंधे वि, सत्त्वबंधे वि।

वाउक्काइयएगिंदिय.। एवं चेव।

रयणप्पभापुढविनेरइय.। एवं चेव।

एवं जाव अणुत्तरोववाइया।

वेउत्त्वियसरीरप्पयोगबंधे णं भंते! कालओ केवच्चिरं होइ? गोयमा! सत्त्वबंधे जहन्नेणं एककं समयं, उक्कोसेणं दो समयया। देसबंधे जहन्नेणं एककं समयं, उक्कोसेणं तेतीसं सागरोवमाइं समयूणाइं।

वाउक्काइयएगिंदियवेउत्त्विय. पुच्छा। गोयमा! सत्त्वबंधे एककं समयं; देसबंधे जहन्नेणं एककं समयं, उक्कोसेणं अंतोमुहुत्तं।

रयणप्पभापुढविनेरइय० पुच्छा। गोयमा! सत्त्वबंधे एककं समयं; देसबंधे जहन्नेणं दसवाससहस्साइं तिसमयऊणाइं, उक्कोसेणं सागरोवमं समऊणं।

एवं जाव अहेसत्तमा। नवरं देसबंधे जस्स जा जहन्निया ठिती सा तिसमऊणा कायव्वा, जा च उक्कोसिया सा समयूणा।

पंचिंदियतिरिक्खजोगियाण मणुस्साण य जहा वाउक्काइयाणं।

असुरकुमार-नागकुमार. जाव अणुत्तरोववाइयाणं जहा नेरइयाणं, नवरं जस्स जा ठिई सा भाणियव्वा जाव अणुत्तरोववाइयाणं सत्त्वबंधे एककं समयं; देसबंधे जहन्नेणं एककतीसं सागरोवमाइं तिसमयूणाइं, उक्कोसेणं तेतीसं सागरोवमाइं समयूणाइं।

वेउत्त्वियसरीरप्पयोगबंधंतरं णं भंते! कालओ केवच्चिरं होइ? गोयमा! सत्त्वबंधंतरं जहन्नेणं

एककं समयं, उक्कोसेणं अणंतं कालं, अणंताओ जाव आवलियाए असंखेज्जभागो। एवं देसबंधंतरं पि।

वाउक्काइयवेउव्वियसरीर. पुच्छा। गोयमा! सव्वबंधंतरं जहन्नेणं अंतोमुहुत्तं, उक्कोसेणं पलिओवमस्स असंखेज्जइभागं। एवं देसबंधंतरं पि।

तिरिक्खजोणियपंचिंदियवेउव्वियसरीरप्पयोगबंधंतरं. पुच्छा। गोयमा! सव्वबंधंतरं जहन्नेणं अंतोमुहुत्तं, उक्कोसेणं पुव्वकोडीपुहत्तं। एवं देसबंधंतरं पि।

एवं मणूसस्स वि।

जीवस्स णं भंते! वाउक्काइयते नो-वाउक्काइयते पुणरवि वाउक्काइयते वाउक्काइय एगिंदिय वेउव्विय पुच्छा। गोयमा! सव्वबंधंतरं जहन्नेणं अंतोमुहुत्तं, उक्कोसेणं अणंतं कालं, वणस्सइकालो। एवं देसबंधंतरं पि

जीवस्स णं भंते! रयणप्पभापुढविनेरइयते णोरयणप्पभापुढवि. पुच्छा। गोयमा! सव्वबंधंतरं जहन्नेणं दस वाससहस्साइं अंतोमुहुत्तमब्भहियाइं, उक्कोसेणं वणस्सइकालो। देसबंधंतरं जहन्नेणं अंतोमुहुत्तं; उक्कोसेणं अणंतं कालं, वणस्सइकालो।

एवं जाव अहेसत्तमाए, नवरं जा जस्स ठिती जहन्निया सा सव्वबंधंतरे जहन्नेणं अंतोमुहुत्तमब्भहिया कायव्वा, सेसं तं चेव।

पंचिंदियतिरिक्खजोणिय-मणुस्साण जहा वाउक्काइयाणं।

असुरकुमार-नागकुमार जाव सहस्सारदेवाणं एएसिं जहा रयणप्पभागाणं, नवरं सव्वबंधंतरे जस्स जा ठिती जहन्निया सा अंतोमुहुत्तमब्भहिया कायव्वा, सेसं तं चेव।

जीवस्स णं भंते आणयदेवते नोआणय. पुच्छा। गोयमा! सव्वबंधंतरं जहन्नेणं अट्ठारस सागरोवमाइं वासपुहत्तमब्भहियाइं; उक्कोसेणं अणंतं कालं, वणस्सइकालो। देसबंधंतरं जहन्नेणं वासपुहत्तं; उक्कोसेणं अणंतं कालं, वणस्सइकालो। एवं जाव अच्चुए; नवरं जस्स जा ठिती सा सव्वबंधंतरे जहन्नेणं वासपुहत्तमब्भहिया कायव्वा, सेसं तं चेव।

गेवेज्जकप्पातीय० पुच्छा। गोयमा! सव्वबंधंतरं जहन्नेणं बावीसं सागरोवमाइं वासपुहत्तमब्भहियाइं; उक्कोसेणं अणंतं कालं, वणस्सइकालो। देसबंधंतरं जहन्नेणं वासपुहत्तं, उक्कोसेणं वणस्सइकालो।

जीवस्स णं भंते! अणुततरोववातिय. पुच्छा। गोयमा! सव्वबंधंतरं जहन्नेणं एककतीसं सागरोवमाइं वासपुहत्तमब्भहियाइं, उक्कोसेणं संखेज्जाइं सागरोवमाइं। देसबंधंतरं जहन्नेणं वासपुहत्तं, उक्कोसेणं संखेज्जाइं सागरोवमाइं।

एएसि णं भंते ! जीवाणं वेउव्वियसरीरस्स देसबंधगाणं, सव्वबंधगाणं, अबंधगाण य कयरे कयरेहितो जाव विसेसाहिया वा? गोयमा! सव्वत्थोवा जीवा वेउव्वियसरीरस्स सव्वबंधगा, देसबंधगा असंखेज्जगुणा, अबंधगा अणंतगुणा।

आहारगसरीरप्पयोगबंधे णं भंते! कतिविहे पण्णत्ते? गोयमा! एगागारे पण्णत्ते।

जइ एगागारे पण्णत्ते किं मणुस्साहारगसरीरप्पयोगबंधे? अमणुस्साहारगसरीरप्पयोगबंधे? गोयमा! मणुस्साहारगसरीरप्पयोगबंधे, नो अमणुस्साहारगसरीरप्पयोगबंधे।

एवं एएणं अभिलावेणं जहा ओगाहणसंठाणे जाव इड्ढिपत्तपमतसंजय सम्मद्दिट्ठि पज्जत

संखेज्जवासासउय-कम्मभूमग-गब्भवक्कंतिय-मणुस्साहारग-सरीरप्पयोगबंधे, णो अणिड्ढिपत्तपमत्त जाव आहारग सरीरप्पयोगबंधे।

आहारगसरीरप्पयोगबंधे णं भंते! कस्स कम्मस्स उदएणं? गोयमा! वीरियसजोगसद्दव्वयाए जाव लद्धिं पडुच्च आहारगसरीरप्पयोगणामाए कम्मस्स उदएणं आहारगसरीरप्पयोगबंधे।

आहारगसरीरप्पयोगबंधे णं भंते! किं देसबंधे, सव्वबंधे? गोयमा! देसबंधे वि, सव्वबंधे वि।

आहारगसरीरप्पयोगबंधे णं भंते! कालओ केवचिरं होइ? गोयमा! सव्वबंधे एककं समयं। देसबंधे जहन्नेणं अंतोमुहुत्तं, उक्कोसेण वि अंतोमुहुत्तं।

आहारगसरीरप्पयोगबंधंतरं णं भंते! कालओ केवचिरं होइ? गोयमा! सव्वबंधंतरं जहन्नेणं अंतोमुहुत्तं, उक्कोसेणं अणंतं कालं-अणंताओ ओसप्पिणि-उस्सप्पिणीओ कालओ, खेतओ अणंता लोया; अवड्ढपोग्गलपरियट्ठं देसूणं। एवं देसबंधंतरं पि।

एएसि णं भंते! जीवाणं आहारगसरीरस्स देसबंधगाणं, सव्वबंधगाणं, अबंधगाण य कयरे कयरेहितो जाव विसेसाहिया वा? गोयमा! सव्वत्थोवा जीवा आहारगसरीरस्स सव्वबंधगा, देसबंधगा संखेज्जगुणा, अबंधगा अणंतगुणा।

**[४२६]** तेयासरीरप्पयोगबंधे णं भंते! कतिविहे पण्णते? गोयमा! पंचविहे पण्णते, तं जहा-एगिंदियतेयासरीरप्पयोगबंधे, बेइंदिय., तेइंदिय., जाव पंचिंदियतेयासरीरप्पयोगबंधे।

एगिंदियतेयासरीरप्पयोगबंधे णं भंते! कइविहे पण्णते? एवं एएणं अबिलावेणं भेदो जहा ओगाहणसंठाणे जाव पज्जत्तसव्वट्ठसिद्धअणुत्तरोववाइयकप्पातीयवेमाणियदेवपंचिंदियतेयासरीरप्पयोगबंधे य अपज्जत्तसव्वट्ठसिद्धअणुत्तरोववाइय. जाव बंधे य।

तेयासरीरप्पयोगबंधे णं भंते! कस्स कम्मस्स उदएणं? गोयमा! वीरियसजोगसद्दव्वयाए जाव आउयं वा पडुच्च तेयासरीरप्पयोगणामाए कम्मस्स उदएणं तेयासरीरप्पयोगबंधे।

तेयासरीरप्पयोगबंधे णं भंते! किं देसबंधे सव्वबंधे? गोयमा! देसबंधे, नो सव्वबंधे।

तेयासरीरप्पयोगबंधे णं भंते! कालओ केवचिरं होइ? गोयमा! दुविहे पण्णते, तं जहा-अणाईए वा अपज्जवसिए, अणाईए वा सपज्जवसिए।

तेयासरीरप्पयोगबंधंतरं णं भंते! कालओ केवच्चिरं होइ? गोयमा! अणाईयस्स अपज्जवसियस्स नत्थि अंतरं, अणाईयस्स सपज्जवसियस्स नत्थि अंतरं।

एएसि णं भंते! जीवाणं तेयासरीरस्स देसबंधगाणं अबंधगाण य कयरे कयरेहितो जाव विसेसाहिया वा? गोयमा! सव्वत्थोवा जीवा तेयासरीरस्स अबंधगा, देसबंधगा अणंतगुणा।

**[४२७]** कम्मासरीरप्पयोगबंधे णं भंते! कतिविहे पण्णते? गोयमा! अट्ठविहे पण्णते, तं जहा-नाणावरणिज्जकम्मासरीरप्पयोगबंधे जाव अंतराइयकम्मासरीरप्पयोगबंधे।

णाणावरणिज्जकम्मासरीरप्पयोगबंधे णं भंते! कस्स कम्मस्स उदएणं? गोयमा! नाणपडिणीययाए णाणणिण्हवणयाए णाणंतराएणं णाणप्पदोसेणं णाणच्चासादणाए णाणविसंवादणाजोगेणं णाणावरणिज्जकम्मासरीरप्पयोगणामाए कम्मस्स उदएणं णाणावरणिज्जकम्मासरीरप्पयोगबंधे।

दरिसणावरणिज्जकम्मासरीरप्पयोगबंधे णं भंते! कस्स कम्मस्स उदएणं? गोयमा! दंसणपडिणीययाए एवं जहा णाणावरणिज्जं, नवरं 'दंसण' नाम घेतत्त्वं जाव दंसणविसंवादणाजोगेणं

दरिसणावरणिज्जकम्मासरीरप्पयोगनामाए कम्मस्स उदएणं जाव प्पओगबंधे।

सायावेयणिज्जकम्मासरीरप्पयोगबंधे णं भंते! कस्स कम्मस्स उदएणं? गोयमा! पाणाणुकंपयाए भूयाणुकंपयाए, एवं जहा सत्तमसए दुस्समाउद्देशए जाव अपरियावणयाए सायावेयणिज्जकम्मासरीरप्पयोगनामाए कम्मस्स उदएणं सायावेयणिज्जकम्मा जाव बंधे।

अस्सायावेयणिज्ज० पुच्छ। गोयमा! परदुक्खणयाए परसोयणयाए जहा सत्तमसए दुस्समा उद्देशए जाव परियावणयाएअस्सायावेयणिज्जकम्मा जाव पयोगबंधे।

मोहणिज्जकम्मासरीरप्पयोग. पुच्छ। गोयमा! तिव्वकोहयाए तिव्वमाणयाए तिव्वमाययाए तिव्वलोभयाए तिव्वदंसणमोहणिज्जयाए तिव्वचरित्तमोहणिज्जयाए मोहणिज्जकम्मासरीर० जाव पयोगबंधे। नेरइयाउयकम्मासरीरप्पयोगबंधे णं भंते! पुच्छ। गोयमा! महारंभयाए महापरिग्गहयाए पंचिंदियवहेणं कुणिमाहारेणं नेरइयाउयकम्मासरीरप्पयोगनामाए कम्मस्स उदएणं नेरइयाउयकम्मासरीर. जाव पयोगबंधे।

तिरिक्खजोणियाउयकम्मासरीरप्पओग. पुच्छ। गोयमा! माइल्लायाए नियडिल्लयाए अलियवयणेणं कूडतूल-कूडमाणेणं तिरिक्खजोणियाउयकम्मासरीर जाव पयोगबंधे।

मणुस्सआउयकम्मासरीर. पुच्छ। गोयमा! पगइभइयाए पगइविणीययाए साणुक्कोसयाए अमच्छरिययाए मणुस्साउयकम्मा. जाव पयोगबंधे।

देवाउयकम्मासरीर. पुच्छ। गोयमा! सरागसंजमेणं संजमासंजमेणं बालतवोकम्मणेणं अकामनिज्जराए देवाउयकम्मासरीर. जाव पयोगबंधे।

सुभनामकम्मासरीर. पुच्छ। गोयमा! कायउज्जुययाए भावुज्जुययाए भासुज्जुययाए अविसंवादणाजोगेणं सुभनामकम्मासरीर. जाव प्पयोगबंधे।

असुभनामकम्मासरीर. पुच्छ। गोयमा! कायअणुज्जुययाए भावअणुज्जुययाए भासअणुज्जुययाए विसंवायणाजोगेणं असुभनामकम्मा. जाव पयोगबंधे।

उच्चागोयकम्मासरीर. पुच्छ। गोयमा! जातिअमदेणं कुलअमदेणं बलअमदेणं रूवअमदेणं तवअमदेणं सुयअमदेणं लाभअमदेणं इस्सरियअमदेणं उच्चागोयकम्मासरीर. जाव पयोगबंधे।

नीयागोयकम्मासरीर. पुच्छ। गोयमा! जातिमदेणं कुलमदेणं बलमदेणं जाव इस्सरियमदेणं णीयागोयकम्मासरीर. जाव पयोगबंधे।

अंतराइयकम्मासरीर. पुच्छ। गोयमा! दाणंतराएणं लाभंतराएणं भोगंतराएणं उवभोगंतराएणं वीरियंतराएणं अंतराइयकम्मासरीरप्पयोगनामाए कम्मस्स उदएणं अंतराइयकम्मासरीरप्पयोगबंधे।

णाणावरणिज्जकम्मासरीरप्पयोगबंधे णं भंते! किं देसबंधे सत्त्वबंधे? गोयमा! देसबंधे, णो सत्त्वबंधे।

एवं जाव अंतराइयकम्मासरीरप्पओगबंधे।

णाणावरणिज्जकम्मासरीरप्पयोगबंधे णं भंते! कालओ केवच्चिरं होइ? गोयमा! णाणावरणिज्जकम्मासरीरप्पयोगबंधे दुविहे पण्णते, तं जहाअणाईए सपज्जवसिए, अणाईए अपज्जवसिए वा, एवं जहा तेयगस्ससंचिट्ठणा तहेव।

एवं जाव अंतराइयकम्मस्स।

णाणावरणिज्जकम्मासरीरप्पयोगबंधंतरं णं भंते! कालओ केवच्चिरं होइ? गोयमा!  
अणाईयस्स. एवं जहा तेयगसरीरस्स अंतरं तहेव।

एवं जाव अंतराइयस्स।

एसि णं भंते! जीवाणं नाणावरणिज्जस्स कम्मस्स देसबंधगाणं, अबंधगाण य कयरे  
कयरेहितो. जाव अप्पाबहुगं जहा तेयगस्स।

एवं आउयवज्जं जाव अंतराइयस्स।

आउयस्स पुच्छा। गोयमा! सव्वत्थोवा जीवा आउयस्स कम्मस्स देसबंधगा, अबंधगा  
संखेज्जगुणा।

**[४२८]** जस्स णं भंते! ओरालियसरीरस्स सव्वबंधे से णं भंते! वेउव्वियसरीरस्स किं बंधए,  
अबंधए? गोयमा! नो बंधए, अबंधए।

आहारगसरीरस्स किं बंधए, अबंधए? गोयमा! नो बंधए, अबंधए।

तेयासरीरस्स किं बंधए, अबंधए? गोयमा! बंधए, नो अबंधए।

जइ बंधए किं देसबंधए, सव्वबंधए? गोयमा! देसबंधए, नो सव्वबंधए।

कम्मासरीरस्स किं बंधए, अबंधए? जहेव तेयगस्स जाव देसबंधए, नो सव्वबंधए।

जस्स णं भंते! ओरालियसरीरस्स देसबंधे से णं भंते! वेउव्वियसरीरस्स किं बंधए, अबंधए?  
गोयमा! नो बंधए, अबंधए।

एवं जहेव सव्वबंधेणं भणियं तहेव देसबंधेण वि भाणियत्वं जाव कम्मगस्स।

जस्स णं भंते! वेउव्वियसरीरस्स सव्वबंधे से णं भंते! ओरालियसरीरस्स किं बंधए, अबंधए?  
गोयमा! नो बंधए, अबंधए।

आहारगसरीरस्स एवं चेव।

तेयगस्स कम्मगस्स य जहेव ओरालिएणं समं भणियं तहेव भाणियत्वं जाव देसबंधए, नो  
सव्वबंधए।

जस्स णं भंते! वेउव्वियसरीरस्स देसबंधे से णं भंते! ओरालियसरीरस्स किं बंधए, अबंधए?  
गोयमा! नो बंधए, अबंधए।

एवं जहा सव्वबंधेणं भणियं तहेव देसबंधेण वि भाणियत्वं जाव कम्मगस्स।

जस्स णं भंते! आहारगसरीरस्स सव्वबंधे से णं भंते! ओरालियसरीरस्स किं बंधए, अबंधए?  
गोयमा! नो बंधए, अबंधए।

एवं वेउव्वियस्स वि।

तेया-कम्माणं जहेव ओरालिएणं समं भणियं तहेव भाणियत्वं।

जस्स णं भंते! आहारगसरीरस्स देसबंधे से णं भंते! ओरालियसरीरस्स. एवं जहा  
आहारगसरीरस्स सव्वबंधेणं भणियं तहा देसबंधेण वि भाणियत्वं जाव कम्मगस्स।

जस्स णं भंते! तेयासरीरस्स देसबंधे से णं भंते! ओरालियसरीरस्स किं बंधए, अबंधए?  
गोयमा! बंधए वा अबंधए वा।

जइ बंधए किं देसबंधए, सव्वबंधए? गोयमा! देसबंधए वा, सव्वबंधए वा।

वेउच्चियसरीरस्स किं बंधए,अबंधए? एवं चेव।

एवं आहारगसरीरस्स वि।

कम्मगसरीरस्स किं बंधए,अबंधए? गोयमा! बंधए, नो अबंधए।

जइ बंधए किं देसबंधए, सच्चबंधए? गोयमा! देसबंधए, नो सच्चबंधए।

जस्स णं भंते! कम्मगसरीरस्स देसबंधे से णं भंते! ओरालियसरीरस्स. जहा तेयगस्स वत्तच्चया भणिया तहा कम्मगस्स वि भाणियच्चा जाव तेयासरीरस्स जाव देसबंधए, नो सच्चबंधए।

**[४२९]** एसि णं भंते! जीवाणं ओरालिय-वेउच्चिय-आहारग-तेयाकम्मासरीरगाणं देसबंधगाणं सच्चबंधगाणं अबंधगाणं य कयरे कयरेहिंतो जाव विसेसाहिया वा? गोयमा! सच्चत्थोवा जीवा आहारगसरीरस्स सच्चबंधगा। तस्स चेव देसबंधगा संखेज्जगुणा। वेउच्चियसरीरस्स सच्चबंधगा असंखेज्जगुणा। तस्स चेव देसबंधगा असंखेज्जगुणा । तेयाकम्मगाणं दुण्ह वि तुल्ला अबंधगा अणंतगुणा। ओरालियसरीरस्स सच्चबंधगा अणंतगुणा । तस्स चेव अबंधगा विसेसाहिया । तस्स चेव देसबंधगा असंखेज्जगुणा । तेया-कम्मगाणं देसबंधगा विसेसाहिया । वेउच्चियसरीरस्स अबंधगा विसेसाहिया । आहारगसरीरस्स अबंधगा विसेसाहिया ।

सेवं भंते! सेवं भंते! ति।

**\*अट्ठमे सए नवमो उद्देशो समतो\***

**० दसमो उद्देशो ०**

**[४३०]** रायगिहे नगरे जाव एवं वयासी-

अन्नउत्थिया णं भंते! एवमाइक्खंति जाव एवं परूवेति-एवं खलु सीलं सेयं, सुयं सेयं, सुयं सेयं सीलं सेयं, से कहमेयं भंते! एवं? गोयमा! जं णं ते अन्नउत्थिया एवमाइक्खंति जाव जे ते एवमाहंसु मिच्छा ते एवमाहंसु, अहं पुण गोयमा! एवमाइक्खामि जाव परूवेमि-एवं खलु मए चत्तारि पुरिसजाया पण्णत्ता, तं जहा-सीलसंपन्ने णामं एगे, णो सुयसंपन्ने; सुयसंपन्ने नामं एगे, नो सीलसंपन्ने; एगे सीलसंपन्ने वि सुयसंपन्ने वि, एगे णो सीलसंपन्ने नो सुयसंपन्ने। तत्थ णं जे से पढमे पुरिसजाए से णं पुरिसे सीलवं, असुयवं, उवरए, अविण्णायधम्मे, एस णं गोयमा! मए पुरिसे देसाराहए पण्णत्ते। तत्थ णं जे से दोच्चे पुरिसजाए से णं पुरिसे असीलवं, सुयवं, अणुवरए, विण्णायधम्मे, एस णं गोयमा! मए पुरिसे देसविराहए पण्णत्ते। तत्थ णं जे से तच्चे पुरिसजाए से णं पुरिसे सीलवं, सुयवं, उवरए, विण्णायधम्मे, एस णं गोयमा! मए पुरिसे सच्चाराहए पण्णत्ते। तत्थ णं जे से चउत्थे पुरिसजाए से णं पुरिसे असीलवं, असुतवं, अणुवरए, अविण्णायधम्मे एस णं गोयमा! मए पुरिसे सच्चविराहए पण्णत्ते।

**[४३१]** कतिविहा णं भंते! आराहणा पण्णत्ता? गोयमा! तिविहा आराहणा पण्णत्ता, तं जहा-नाणाराहणा दंसणाराहणा चरित्ताराहणा।

णाणाराहणा णं भंते! कतिविहा पण्णत्ता? गोयमा! तिविहा पण्णत्ता, तं जहा-उक्कोसिया मज्झिमिया जहन्ना।

दंसणाराहणा णं भंते!..? एवं चेव तिविहा वि।

एवं चरित्ताराहणा वि।

जस्स णं भंते! उक्कोसिया णाणाराहणा तस्स उक्कोसिया दंसणाराहणा? जस्स उक्कोसिया दंसणाराहणा तस्स उक्कोसिया णाणाराहणा? गोयमा! जस्स उक्कोसिया णाणाराहणा तस्स दंसणाराहणा उक्कोसिया वा अजहन्नउक्कोसिया वा, जस्स पुण उक्कोसिया दंसणाराहणा तस्स नाणाराहणा उक्कोसा वा जहन्ना वा अजहन्नमणुक्कोसा वा।

जस्स णं भंते! उक्कोसिया णाणाराहणा तस्स उक्कोसिया चरित्ताराहणा? जस्सुक्कोसिया चरित्ताराहणा तस्सुक्कोसिया णाणाराहणा? जहा उक्कोसिया णाणाराहणा य दंसणाराहणा य भणिया तहा उक्कोसिया णाणाराहणा य चरित्ताराहणा य भाणियव्वा।

जस्स णं भंते! उक्कोसिया दंसणाराहणा तस्सुक्कोसिया चरित्ताराहणा? जस्सुक्कोसिया चरित्ताराहणा तस्सुक्कोसिया दंसणाराहणा? गोयमा! जस्स उक्कोसिया दंसणाराहणा तस्स चरित्ताराहणा उक्कोसा वा जहन्ना वा अजहन्नमणुक्कोसा वा, जस्स पुण उक्कोसिया चरित्ताराहणा तस्स दंसणाराहणा नियमा उक्कोसा।

उक्कोसियं णं भंते! णाणाराहणं आराहेता कतिहिं भवग्गहणेहिं सिज्झति जाव अंतं करेति? गोयमा! अत्थेगइए तेणेव भवग्गहणेणं सिज्झति जाव अंतं करेति। अत्थेगतिए दोच्चेणं भवग्गहणेणं सिज्झति जाव अंतं करेति। अत्थेगतिए कप्पोवएसु वा कप्पातीएसु वा उववज्जति।

उक्कोसियं णं भंते! दंसणाराहणं आराहेता कतिहिं भवग्गहणेहिं.? एवं चेव।

उक्कोसियं णं भंते! चरित्ताराहणं आराहेता.? एवं चेव। नवरं अत्थेगतिए कप्पातीएसु उववज्जति।

मज्झिमियं णं भंते! णाणाराहणं आराहेता कतिहिं भवग्गहणेहिं सिज्झति जाव अंतं करेति? गोयमा! अत्थेगतिए दोच्चेणं भवग्गहणेणं सिज्झइ जाव अंतं करेति, तच्चं पुण भवग्गहणं नाइक्कमइ।

मज्झिमियं णं भंते! दंसणाराहणं आराहेता.? एवं चेव।

एवं मज्झिमियं चरित्ताराहणं पि।

जहन्नियं णं भंते! नाणाराहणं आराहेता कतिहिं भवग्गहणेहिं सिज्झति जाव अंतं करेति? गोयमा! अत्थेगतिए तच्चेणं भवग्गहणेणं सिज्झइ जाव अंतं करेइ, सत-sट्ठभवग्गहणाइं पुण नाइक्कमइ।

एवं दंसणाराहणं पि।

एवं चरित्ताराहणं पि।

**[४३२]** कतिविहे णं भंते! पोग्गलपरिणामे पण्णते? गोयमा! पंचविहे पोग्गलपरिणामे पण्णते तं जहा-वण्णपरिणामे, गंधपरिणामे, रसपरिणामे, फासपरिणामे, संठाणपरिणामे।

वण्णपरिणामे णं भंते! कइविहे पण्णते? गोयमा! पंचविहे पण्णते, तं जहा-कालवण्णपरिणामे जाव सुक्किल्लवण्णपरिणामे।

एवं एएणं अभिलावेणं गंधपरिणामे दुविहे, रसपरिणामे पंचविहे, फासपरिणामे अट्ठविहे।

संठाणपरिणामे णं भंते! कइविहे पण्णते? गोयमा! पंचविहे पण्णते, तं जहा-परिमंडलसंठाणपरिणामे जाव आययसंठाणपरिणामे।

**[४३३]** एगे भंते! पोग्गलत्थिकायपएसे किं दव्वं, दव्वदेसे, दव्वाइं, दव्वदेसा, उदाहु दव्वं च दव्वदेसे य, उदाहु दव्वं च दव्वदेसा य, उदाहु दव्वाइं च दव्वदेसे य, उदाहु दव्वाइं च दव्वदेसा य ? गोयमा!

सिय दव्वं, सिय दव्वदेसे, नो दव्वाइं, नो दव्वदेसा, नो दव्वं च दव्वदेसे य, नो दव्वं च दव्वदेसा य, नो दव्वाइं च दव्वदेसे य, नो दव्वाइं च दव्वदेसा य।

दो भंते! पोग्गलत्थिकायपएसा किं दव्वं दव्वदेसे. पुच्छा तहेव। गोयमा! सिय दव्वं?, सिय दव्वदेसे, सिय दव्वाइं, सिय दव्वदेसा, सिय दव्वं च दव्वदेसे य, नो दव्वं च दव्वदेसा य, सेसा पडिसेहेयव्वा।

तिण्णि भंते! पोग्गलत्थिकायपएसा किं दव्वं, दव्वदेसे. पुच्छा। गोयमा! सिय दव्वं, सिय दव्वदेसे, एवं सत्त भंगा भाणियव्वा, जाव सिय दव्वाइं च दव्वदेसे य; नो दव्वाइं च दव्वदेसा य।

चत्तारि भंते! पोग्गलत्थिकायपएसा किं दव्वं. पुच्छा। गोयमा! सिय दव्वं, सिय दव्वदेसे, अट्ठ वि भंगा भाणियव्वा जाव सिय दव्वाइं च दव्वदेसा य ।

जहा चत्तारि भणिया एवं पंच छ सत्त जाव असंखेज्जा।

अणंता भंते! पोग्गलत्थिकायपएसा किं दव्वं० एवं चेव जाव सिय दव्वाइं च दव्वदेसा य।

**[४३४]** केवतिया णं भंते! लोयागासपएसा पण्णता? गोयमा! असंखेज्जा लोयागासपएसा पण्णता।

एगमेगस्स णं भंते! जीवस्स केवइया जीवपएसा पण्णता? गोयमा! जावतिया लोयागासपएसा एगमेगस्स णं जीवस्स एवतिया जीवपएसा पण्णता।

**[४३५]** कति णं भंते! कम्मपगडीओ पण्णताओ? गोयमा! अट्ठ कम्मपगडीओ पण्णताओ, तं जहा-नाणावरणिज्जं जाव अंतराइयं।

नेरइयाणं भंते! कइ कम्मपगडीओ पण्णताओ? गोयमा! अट्ठ।

एवं सव्वजीवाणं अट्ठ कम्मपगडीओ ठावेयव्वाओ जाव वेमाणियाणं।

नाणावरणिज्जस्स णं भंते! कम्मस्स केवतिया अविभागपलिच्छेदा पण्णता? गोयमा! अणंता अविभागपलिच्छेदा पण्णता।

नेरइयाणं भंते! नाणावरणिज्जस्स कम्मस्स केवतिया अविभागपलिच्छेदा पण्णता? गोयमा! अणंता अविभागपलिच्छेदा पण्णता।

एवं सव्वजीवाणं जाव वेमाणियाणं पुच्छा, गोयमा! अणंता अविभागपलिच्छेदा पण्णता।

एवं जहा नाणावरणिज्जस्स अविभागपलिच्छेदा भणिया तहा अट्ठण्ह वि कम्मपगडीणं भाणियव्वा जाव वेमाणियाणं अंतराइयस्स।

एगमेगस्स णं भंते! जीवस्स एगमेगे जीवपएसे नाणावरणिज्जस्स कम्मस्स केवइएहि अविभागपलिच्छेदेहि आवेदियपरिवेदिए सिया? गोयमा! सिय आवेदियपरिवेदिए, सिय नो आवेदियपरिवेदिए। जइ आवेदियपरिवेदिए नियमा अणंतेहिं।

एगमेगस्स णं भंते! नेरइयस्स एगमेगे जीवपएसे नाणावरणिज्जस्स कम्मस्स केवइएहिं अविभागपलिच्छेदेहिं आवेदियपरिवेदिते? गोयमा! नियमा अणंतेहिं।

जहा नेरइयस्स एवं जाव वेमाणियस्स। नवरं मणूसस्स जहा जीवस्स।

एगमेगस्स णं भंते! जीवस्स एगमेगे जीवपएसे दरिसणावरणिज्जस्स कम्मस्स केवतिएहिं? एवं जहेव नाणावरणिज्जस्स तहेव दंडगो भाणियव्वो जाव वेमाणियस्स।

एवं जाव अंतराइयस्स भाणियव्वं, नवरं वेयणिज्जस्स आठयस्स नामस्स गोयस्स, एएसिं

चउण्ह वि कम्मणं मणूसस्स जहा नेरइयस्स तहा भाणियत्वं, सेसं तं चेव।

[४३६] जस्स णं भंते! नाणावरणिज्जं तस्स दरिसणावरणिज्जं, जस्स दंसणावरणिज्जं तस्स नाणावरणिज्जं? गोयमा! जस्स णं नाणावरणिज्जं तस्स दंसणावरणिज्जं नियमा अत्थि, जस्स णं दरिसणावरणिज्जं तस्स वि नाणावरणिज्जं नियमा अत्थि।

जस्स णं भंते! णाणावरणिज्जं तस्स वेयणिज्जं, जस्स वेयणिज्जं तस्स णाणावरणिज्जं? गोयमा! जस्स नाणावरणिज्जं तस्स वेयणिज्जं नियमा अत्थि, जस्स पुण वेयणिज्जं तस्स णाणावरणिज्जं सिय अत्थि, सिय नत्थि।

जस्स णं भंते! नाणावरणिज्जं तस्स मोहणिज्जं, जस्स मोहणिज्जं तस्स नाणावरणिज्जं? गोयमा! जस्स नाणावरणिज्जं तस्स मोहणिज्जं सिय अत्थि सिय नत्थि, जस्स पुण मोहणिज्जं तस्स नाणावरणिज्जं नियमा अत्थि।

जस्स णं भंते! णाणावरणिज्जं तस्स आउयं.? एवं जहा वेयणिज्जेण समं भणियं तहा आउएण वि समं भाणियत्वं।

एवं नामेण वि, एवं गोएण वि समं।

अंतराइएण जहा दरिसणावरणिज्जेण समं तहेव नियमा परोप्परं भाणियत्वाणि ।

जस्स णं भंते! दरिसणावरणिज्जं तस्स वेयणिज्जं, जस्स वेयणिज्जं तस्स दरिसणावरणिज्जं? जहा नाणावरणिज्जं उवरिमेहिं सतहिं कम्महिं समं भणियं तहा दरिसणावरणिज्जं पि उवरिमेहिं छहिं कम्महिं समं भाणियत्वं जाव अंतराइएणं ।

जस्स णं भंते! वेयणिज्जं तस्स मोहणिज्जं, जस्स मोहणिज्जं तस्स वेयणिज्जं? गोयमा! जस्स वेयणिज्जं तस्स मोहणिज्जं सिय अत्थि सिय नत्थि, जस्स पुण मोहणिज्जं तस्स वेयणिज्जं नियमा अत्थि।

जस्स णं भंते! वेयणिज्जं तस्स आउयं.? एवं एयाणि परोप्परं नियमा।

जहा आउएण समं एवं नामेण वि, गोएण वि समं भाणियत्वं।

जस्स णं भंते! वेयणिज्जं तस्स अंतराइयं.? पुच्छा। गोयमा! जस्स वेयणिज्जं तस्स अंतराइयं सिय अत्थि सिय नत्थि, जस्स पुण अंतराइयं तस्स वेयणिज्जं नियमा अत्थि ।

जस्स णं भंते! मोहणिज्जं तस्स आउयं, जस्स आउयं तस्स मोहणिज्जं ? गोयमा ! जस्स मोहणिज्जं तस्स आउयं नियमा अत्थि, जस्स पुण आउयं तस्स पुण मोहणिज्जं सिय अत्थि सिय नत्थि।

एवं नामं गोयं अंतराइयं च भाणियत्वं ।

जस्स णं भंते! आउयं तस्स नामं.? पुच्छा। गोयमा! दो वि परोप्परं नियमं।

एवं गोत्तेण वि समं भाणियत्वं।

जस्स णं भंते! आउयं तस्स अंतराइयं.? पुच्छा। गोयमा! जस्स आउयं तस्स

अंतराइयं सिय अत्थि सिय नत्थि, जस्स पुण अंतराइयं तस्स आउयं नियमा मं अत्थि ।

जस्स णं भंते! नामं तस्स गोयं, जस्स णं गोयं तस्स णं नामं? गोयमा! जस्स णं नामं तस्स णं नियमा गोयं, जस्स णं गोयं तस्स णं नियमा नामं-गोयमा! दो वि एए परोप्परं नियमं।

जस्स णं भंते! णामं तस्स अंतराइयं! पुच्छा। गोयमा! जस्स नामं तस्स अंतराइयं सिय अत्थि सिय नत्थि, जस्स पुण अंतराइयं तस्स नामं नियमं अत्थि ।

जस्स णं भंते! गोयं तस्स अंतराइयं? पुच्छा। गोयमा! जस्स णं गोयं तस्स अंतराइयं सिय अत्थि सिय नत्थि, जस्स पुण अंतराइयं तस्स गोयं नियमा अत्थि ।

**[४३७]** जीवे णं भंते! किं पोग्गली, पोग्गले? गोयमा! जीवे पोग्गली वि, पोग्गले वि।

से केणट्ठेणं भंते! एवं वुच्चइ 'जीवे पोग्गली वि पोग्गले वि'? गोयमा! से जहानामए छत्तेणं छत्ती, दंडेणं दंडी, घडेणं घडी, पडेणं पडी, करेणं करी एवामेव गोयमा! जीवे वि सोइंदिय-चक्खिंदिय-घाणिंदियजिब्भिंदिय-फासिंदियाइं पडुच्च पोग्गली, जीवं पडुच्च पोग्गले, से तेणट्ठेणं गोयमा! एवं वुच्चइ 'जीवे पोग्गली वि पोग्गले वि'।

नेरइए णं भंते! किं पोग्गली.? एवं चेव।

एवं जाव वेमाणिए। नवरं जस्स जइ इंदियाइं तस्स तइ भाणियत्वाइं।

सिद्धे णं भंते! किं पोग्गली, पोग्गले? गोयमा! नो पोग्गली, पोग्गले।

से केणट्ठेणं भंते! एवं वुच्चइ जाव पोग्गले? गोयमा! जीवं पडुच्च, से तेणट्ठेणं गोयमा! एवं वुच्चइ 'सिद्धे नो पोग्गली, पोग्गले'।

सेवं भंते! सेवं भंते ति।

**\*अट्ठमे सए दसमो उद्देशो समतो\***

**०-अट्ठमं सयं समतं-०**

**० मुनि दीपरत्तसागरेण संशोधितः सम्पादितश्च अट्ठमं सतं समतं ०**

**[ ] नवमं सतं [ ]**

**[४३८]** जंबुद्दीवे जोइस अंतरदीवा असोच्च गंगेये ।  
कुंडग्गामे पुरिसे नवमंमि संयम्मि चोत्तीसा ॥

**० पढमो उद्देशो ०**

**[४३९]** तेणं कालेणं तेणं समएणं मिहिला नामं नगरी होत्था। वण्णओ। माणिभद्दे चेइए। वण्णओ। सामी समोसडे। परिसा निग्गया। धम्मो कहिओ। जाव भगवं गोयमे पज्जुवासमाणे एवं वयासी- कहि णं भंते! जंबुद्दीवे दीवे? किंसंठिए णं भंते! जंबुद्दीवे दीवे? एवं जंबुद्दीवपण्णती भाणियत्वा जाव एवामेव सपुट्वावरेणं जंबुद्दीवे दीवे चोद्धस सलिलासयसहस्सा छप्पन्नं च सहस्सा भवंतीति मक्खाया। सेवं भंते! सेवं भंते ति।

**\*नवमे सए पढमो उद्देशो समतो\***

**० बितिओ उद्देशो ०**

**[४४०]** रायगिहे जाव एवं वयासी-

जंबुद्दीवे णं भंते! दीवे केवइया चंदा पभासिंसु वा पभासेंति वा पभासिस्संति वा? एवं जहा जीवाभिगमे जाव-

**[४४१]** एगं च सयसहस्सं तेत्तीसं खलु भवे सहस्साइं ।

नव य सया पण्णासा तारागणकोडिकोडीणं।।

[४४२] सोभिंसु सोभिति सोभिस्संति।

[४४३] लवणे णं भंते! समुद्दे केवतिया चंदा पभासिंसु वा पभासिति वा पभासिस्संति वा? एवं जहा जीवाभिगमे जाव ताराओ।

धायइसंडे कालोदे पुक्खरवरे अब्भितरपुक्खरद्धे मणुस्सखेत्ते, एणसु सव्वेसु जहा जीवाभिगमे जाव-एग ससी परिवारो तारागणकोडिकोडीणं।।'

पुक्खरद्धे णं भंते! समुद्दे केवइया चंदा पभासिंसु वा पभासिति वा पभासिस्संति वा? एवं सव्वेसु दीव-समुद्देसु जोतिसियाणं भाणियत्वं जाव सयंभूरमणे जाव सोभं सोभिंसु वा सोभिति वा सोभिस्संति वा।

सेवं भंते! सेवं भंते ति।

**\*नवमे सए बीओ उद्देशो समतो\***

**० उद्देशगा-:३--३०:- ०**

[४४४] रायगिहे जाव एवं वयासी-

कहि णं भंते! दाहिणिल्लाणं एगोरुयमणुस्साणं एगोरुयदीवे णामं दीवे पन्नत्ते? गोयमा! जंबुद्धीवे दीवे मंदरस्स पव्वयस्स दाहिणेणं एवं जहा जीवाभिगमे जाव सुद्धदंतदीवे जाव देवलोगपरिग्गहा णं ते मणुया पण्णत्ता समणाउसो!।

एवं अट्ठावीसं पि अंतरदीवा सएणं सएणं आयाम-विक्खंभेणं भाणियत्वा, नवरं दीवे दीवे उद्देशओ। एवं सव्वे वि एए अट्ठावीसं उद्देशगा।

सेवं भंते! सेवं भंते! ति।

**\*नवमे सए तइयाइआ तीसंता उद्देशा समत्ता\***

**० एगतीसइमो उद्देशो ०**

[४४५] रायगिहे जाव एवं वयासी-

असोच्चा णं भंते! केवलिस्स वा केवलिसावगस्स वा केवलिसावियाए वा केवलिउवासगस्स वा केवलिउवासियाए वा तप्पक्खियस्स वा तप्पक्खियसावगस्स वा तप्पक्खियसावियाए वा तप्पक्खियउवासगस्स वा तप्पक्खियउवासियाए वा केवलिपण्णतं धम्मं लभेज्जा सवणयाए? गोयमा! असोच्चा णं केवलिस्स वा जाव तप्पक्खियउवासियाए वा अत्थेगइए केवलिपण्णतं धम्मं लभेज्जा सवणयाए, अत्थेगतिए केवलिपण्णतं धम्मं नो लभेज्जा सवणयाए।

से केणट्ठेणं भंते! एवं वुच्चइ-असोच्चा णं जाव नो लभेज्जा सवणयाए? गोयमा! जस्स णं नाणावरणिज्जाणं कम्माणं खओवसमे कडे भवइ से णं असोच्चा केवलिस्स वा जाव तप्पक्खियउवासियाए वा केवलिपण्णतं धम्मं लभेज्ज सवणयाए, जस्स णं नाणावरणिज्जाणं कम्माणं खओवसमे नो कडे भवइ से णं असोच्चा केवलिस्स वा जाव तप्पक्खियउवासियाए वा केवलिपण्णतं धम्मं नो लभेज्ज सवणयाए, से तेणट्ठेणं गोयमा! एवं वुच्चइ-तं चेव जाव नो लभेज्ज सवणयाए।

असोच्चा णं भंते! केवलिस्स वा जाव तप्पक्खियउवासियाए वा केवलं बोहिं बुज्जेज्जा?

गोयमा! असोच्चा णं केवलिस्स वा जाव अत्थेगतिए केवलं बोहिं बुज्झेज्जा, अत्थेगइए केवलं बोहिं णो बुज्झेज्जा।

से केणट्ठेणं भंते! जाव नो बुज्झेज्जा? गोयमा! जस्स णं दरिसणावरणिज्जाणं कम्माणं खओवसमे कडे भवइ से णं असोच्चा केवलिस्स वा जाव केवलं बोहिं बुज्झेज्जा, जस्स णं दरिसणावरणिज्जाणं कम्माणं खओवसमे णो कडे भवइ से णं असोच्चा केवलिस्स वा जाव केवलं बोहिं णो बुज्झेज्जा, से तेणट्ठेणं जाव णो बुज्झेज्जा।

असोच्चा णं भंते! केवलिस्स वा जाव तप्पक्खियउवासियाए वा केवलं मुंडे भविता अगाराओ अणगारियं पव्वएज्जा? गोयमा! असोच्चा णं केवलिस्स वा जाव उवासियाए वा अत्थेगतिए केवलं मुंडे भविता अगाराओ अणगारियं पव्वइज्जा, अत्थेगतिए केवलं मुंडे भविता अगाराओ अणगारियं नो पव्वएज्जा।

से केणट्ठेणं जाव नो पव्वएज्जा? गोयमा! जस्स णं धम्मंतराइयाणं कम्माणं खओवसमे कडे भवति से णं असोच्चा केवलिस्स वा जाव केवलं मुंडे भविता अगाराओ अणगारियं पव्वएज्जा, जस्स णं धम्मंतराइयाणं कम्माणं खओवसमे नो कडे भवति से णं असोच्चा केवलिस्स वा जाव मुंडे भविता जाव णो पव्वएज्जा, से तेणट्ठेणं गोयमा! जाव नो पव्वएज्जा।

असोच्चा णं भंते! केवलिस्स वा जाव उवासियाए वा केवलं बंभचेरवासं आवसेज्जा? गोयमा! असोच्चा णं केवलिस्स वा जाव उवासियाए वा अत्थेगतिए केवलं बंभचेरवासं आवसेज्जा, अत्थेगतिए केवलं बंभचेरवासं नो आवसेज्जा।

से केणट्ठेणं भंते! एवं वुच्चइ जाव नो आवसेज्जा? गोयमा! जस्स णं चरितावरणिज्जाणं कम्माणं खओवसमे कडे भवइ से णं असोच्चा केवलिस्स वा जाव केवलं बंभचेरवासं आवसेज्जा, जस्स णं चरितावरणिज्जाणं कम्माणं खओवसमे नो कडे भवइ से णं असोच्चा केवलिस्स वा जाव नो आवसेज्जा, से तेणट्ठेणं जाव नो आवसेज्जा।

असोच्चा णं भंते! केवलिस्स वा जाव केवलेणं संजमेणं संजमेज्जा? गोयमा! असोच्चा णं केवलिस्स जाव उवासियाए वा जाव अत्थेगतिए केवलेणं संजमेणं संजमेज्जा, अत्थेगतिए केवलेणं संजमेणं नो संजमेज्जा।

से केणट्ठेणं जाव नो संजमेज्जा? गोयमा! जस्स णं जयणावरणिज्जाणं कम्माणं खओवसमे कडे भवइ से णं असोच्चा केवलिस्स वा जाव केवलेणं संजमेणं संजमेज्जा, जस्स णं जयणा वरणिज्जाणं कम्माणं खओवसमे नो कडे भवइ से णं असोच्चा केवलिस्स वा जाव नो संजमेज्जा, से तेणट्ठेणं गोयमा! जाव अत्थेगतिए नो संजमेज्जा।

असोच्चा णं भंते! केवलिस्स वा जाव उवासियाए वा केवलेणं संवरेणं संवरेज्जा? गोयमा! असोच्चा णं केवलिस्स जाव अत्थेगतिए केवलेणं संवरेणं संवरेज्जा, अत्थेगतिए केवलेणं जाव नो संवरेज्जा।

से केणट्ठेणं जाव नो संवरेज्जा? गोयमा! जस्स णं अज्झवसाणावरणिज्जाणं कम्माणं खओवसमे कडे भवइ से णं असोच्चा केवलिस्स वा जाव केवलेणं संवरेणं संवरेज्जा, जस्स णं अज्झवसाणावरणिज्जाणं कम्माणं खओवसमे णो कडे भवइ से णं असोच्चा केवलिस्स वा जाव नो

संवरेज्जा, 'से तेणट्ठेणं जाव नो संवरेज्जा।

असोच्चा णं भंते! केवलिस्स जाव केवलं आभिणिबोहियनाणं उप्पाडेज्जा? गोयमा! असोच्चा णं केवलिस्स वा जाव उवासियाए वा अत्थेगतिए केवलं आभिणिबोहियनाणं उप्पाडेज्जा, अत्थेगइए केवलं आभिणिबोहियनाणं नो उप्पाडेज्जा।

से केणट्ठेणं जाव नो उप्पाडेज्जा? गोयमा! जस्स णं आभिणिबोहियनाणावरणिज्जाणं कम्माणं खओवसमे कडे भवइ से णं असोच्चा केवलिस्स वा जाव केवलं आभिणिबोहियनाणं उप्पाडेज्जा, जस्स णं आभिणिबोहियनाणावरणिज्जाणं कम्माणं खओवसमे नो कडे भवइ से णं असोच्चा केवलिस्स वा जाव केवलं आभिणिबोहियनाणं नो उप्पाडेज्जा, से तेणट्ठेणं जाव नो उप्पाडेज्जा।

असोच्चा णं भंते! केवलि. जाव केवलं सुयनाणं उप्पाडेज्जा? एवं जहा आभिणिबोहिय-  
नाणस्स वत्तव्वया भणिया तहा सुयनाणस्स वि भाणियव्वा, नवरं सुयनाणावरणिज्जाणं कम्माणं खओवसमे  
भाणियव्वे।

एवं चेव केवलं ओहिनाणं भाणियव्वं; नवरं ओहिणाणावरणिज्जाणं कम्माणं खओवसमे  
भाणियव्वे।

एवं केवलं मणपज्जवनाणं उप्पाडेज्जा, नवरं मणपज्जवनाणावरणिज्जाणं कम्माणं  
खओवसमे भाणियव्वे।

असोच्चा णं भंते! केवलिस्स वा जाव तप्पक्खियउवासियाए वा केवलनाणं उप्पाडेज्जा? एवं  
चेव, नवरं केवलनाणावरणिज्जाणं कम्माणं खए भाणियव्वे, सेसं तं चेव। से तेणट्ठेणं गोयमा! एवं वुच्चइ  
जाव केवलनाणं उप्पाडेज्जा।

असोच्चा णं भंते! केवलिस्स वा जाव तप्पक्खियउवासियाए वा केवलिपन्नतं धम्मं  
लभेज्जा सवणयाए?, केवलं बोहिं बुज्जेज्जा?, केवलं मुंडे भविता अगाराओ अणगारियं पव्वएज्जा?, केवलं  
बंधेरवासं आवसेज्जा?, केवलेणं संजमेणं संजमेज्जा?, केवलेणं संवरेणं संवरेज्जा?, केवलं  
आभिणिबोहियनाणं उप्पाडेज्जा?, जाव केवलं मणपज्जवनाणं उप्पाडेज्जा?, केवलनाणं उप्पाडेज्जा?, गोयमा!  
असोच्चा णं केवलिस्स वा जाव उवासियाए वा अत्थेगतिए केवलिपन्नतं धम्मं लभेज्जा सवणयाए,  
अत्थेगतिए केवलिपन्नतं धम्मं नो लभेज्जा सवणयाए; अत्थेगतिए केवलं बोहिं बुज्जेज्जा, अत्थेगतिए  
केवलं बोहिं णो बुज्जेज्जा; अत्थेगतिए केवलं मुंडे भविता अगाराओ अणगारियं पव्वएज्जा, अत्थेगतिए  
जाव नो पव्वएज्जा; अत्थेगतिए केवलं बंधेरवासं आवसेज्जा, अत्थेगतिए केवलं बंधेरवासं नो  
आवसेज्जा; अत्थेगतिए केवलेणं संजमेणं संजमेज्जा, अत्थेगतिए केवलेणं संजमेणं नो संजमेज्जा; एवं  
संवरेण वि; अत्थेगतिए केवलं आभिणिबोहियनाणं उप्पाडेज्जा, अत्थेगतिए जाव नो उप्पाडेज्जा; एवं जाव  
मणपज्जवनाणं; अत्थेगतिए केवलनाणं उप्पाडेज्जा, अत्थेगतिए केवलनाणं नो उप्पाडेज्जा ।

से केणट्ठेणं भंते! एवं वुच्चइ असोच्चा णं तं चेव जाव अत्थेगतिए केवलनाणं नो  
उप्पाडेज्जा? गोयमा! जस्स णं नाणावरणिज्जाणं कम्माणं खओवसमे नो कडे भवइ, जस्स णं  
दरिसणावरणिज्जाणं कम्माणं खओवसमे नो कडे भवइ, जस्स णं धम्मंतराइयाणं कम्माणं खओवसमे नो  
कडे भवइ, एवं चरित्तावरणिज्जाणं, जयणावरणिज्जाणं, अज्झवसाणावरणिज्जाणं, आभिणिबोहियनाणावरणि-  
ज्जाणं, जाव मणपज्जवनाणावरणिज्जाणं कम्माणं खओवसमे नो कडे भवइ जस्स णं केवलनाणा-

वरणिज्जाणं जाव खए नो कडे भवइ, से णं असोच्चा केवलिस्स वा जाव केवलिपन्नतं धम्मं नो लभेज्जा सवणयाए, केवलं बोहिं नो बुज्जेज्जा जाव केवलनाणं नो उप्पाडेज्जा। जस्स णं नाणावरणिज्जाणं कम्माणं खओवसमे कडे भवति, जस्स णं दरिसणावरणिज्जाणं कम्माणं खओवसमे कडे भवइ, जस्स णं धम्मंतराइयाणं, एवं जाव जस्स णं केवलनाणावरणिज्जाणं कम्माणं खए कडे भवइ, से णं असोच्चा केवलिस्स वा जाव केवलिपन्नतं धम्मं लभेज्जा सवणयाए, केवलं बोहिं बुज्जेज्जा, जाव केवलनाणं उप्पाडेज्जा ।

**[४४६]** तस्स णं भंते! छट्ठंछट्ठेणं अनिक्खितेणं तवोकम्मेषं उड्ढं बाहाओ पगिज्झिय पगिज्झिय सूराभिमुहस्स आयावणभूमीए आयावेमाणस्स पगतिभद्वयाए पगइउवसंतयाए पगतिपयणुकोह-माण-माया-लोभयाए मिठमद्ववसंपन्नयाए अल्लीणताए भद्वताए विणीतताए अण्णया कयाइ सुभेणं अज्झवसाणेणं, सुभेणं परिणामेणं, लेस्साहिं विसुज्झमाणीहिं तयावरणिज्जाणं

कम्माणं खओवसमेणं ईहापोह-मग्गण-गवेसणं करेमाणस्स विब्भंगे नामं अन्नाणे समुप्पज्जइ, से णं तेणं विब्भंगनाणेणं समुप्पन्नेणं जहन्नेणं अंगुलस्स असंखेज्जइभागं, उक्कोसेणं असंकेज्जाइं जोयणसहस्साइं जाणइ पासइ, से णं तेणं विब्भंगनाणेणं समुप्पन्नेणं जीवे वि जाणइ, अजीवे वि जाणइ, पासंडत्थे सारंभे सपरिग्गहे संकिलिस्समाणे वि जाणइ, विसुज्झमाणे वि जाणइ, से णं पुट्ठामेव सम्मतं पडिवज्जइ, सम्मतं पडिवज्जिता समणधम्मं रोएति, समणधम्मं रोएता चरितं पडिवज्जइ, चरितं पडिवज्जिता लिंगं पडिवज्जइ, तस्स णं तेहिं मिच्छत्तपज्जवेहिं परिहायमाणेहिं परिहायमाणेहिं, सम्मदंसणपज्जवेहिं परिवड्ढमाणेहिं परिवड्ढमाणेहिं से विब्भंगे अन्नाणे सम्मतपरिग्गहिए खिप्पामेव ओही परावत्तइ।

**[४४७]** से णं भंते! कतिसु लेस्सासु होज्जा? गोयमा! तिसु विसुद्धलेस्सासु होज्जा, तं जहा-तेउलेस्साए पम्हलेस्साए सुक्कलेस्साए।

से णं भंते! कतिसु णाणेषु होज्जा? गोयमा! तिसु, आभिणिबोहियनाण-सुयनाण-ओहिनाणेषु होज्जा।

से णं भंते! किं सजोगी होज्जा, अजोगी होज्जा? गोयमा! सजोगी होज्जा, नो अजोगी होज्जा।

जइ सजोगी होज्जा किं मणजोगी होज्जा, वइजोगी होज्जा, कायजोगी होज्जा ? गोयमा ! मणजोगी वा होज्जा, वइजोगी वा होज्जा, कायजोगी वा होज्जा।

से णं भंते! किं सागारोवउत्ते होज्जा, अणागारोवउत्ते होज्जा? गोयमा! सागारोवउत्ते वा होज्जा, अणागारोवउत्ते वा होज्जा।

से णं भंते! कयरम्मि संघयणे होज्जा? गोयमा! वइरोसभनारायसंघयणे होज्जा।

से णं भंते! कयरम्मि संठाणे होज्जा? गोयमा! छण्हं संठाणाणं अन्नयरे संठाणे होज्जा।

से णं भंते! कयरम्मि उच्चते होज्जा? गोयमा! जहन्नेणं सत्तरयणिए उक्कोसेणं पंचधणुसतिए होज्जा।

से णं भंते! कयरम्मि आउए होज्जा? गोयमा! जहन्नेणं सातिरेगट्ठवासाउए, उक्कोसेणं पुट्ठकोडिआउए होज्जा।

से णं भंते! किं सवेदए होज्जा, अवेदए होज्जा? गोयमा! सवेदए होज्जा, नो अवेदए होज्जा।  
जइ सवेदए होज्जा किं इत्थिवेदए होज्जा, पुरिसवेदए होज्जा, नपुंसगवेदए होज्जा,  
पुरिसनपुंसगवेदए होज्जा? गोयमा! नो इत्थिवेदए होज्जा, पुरिसवेदए वा होज्जा, नो नपुंसगवेदए होज्जा,  
पुरिसनपुंसगवेदए वा होज्जा।

से णं भंते! किं सकसाई होज्जा, अकसाई होज्जा? गोयमा! सकसाई होज्जा, नो अकसाई  
होज्जा।

जइ सकसाई होज्जा, से णं भंते! कतिसु कसाएसु होज्जा? गोयमा! चउसु संजलणकोह-  
माण-माया-लोभेसु होज्जा।

तस्स णं भंते! केवतिया अज्झवसाणा पण्णता? गोयमा! असंखेज्जा अज्झवसाणा पण्णता।

ते णं भंते! किं पसत्था अप्पसत्था? गोयमा! पसत्था, नो अप्पसत्था।

से णं तेहिं पसत्थेहिं अज्झवसाणेहिं वट्ठमाणे अणंतेहिं नेरइयभवग्गहणेहिं अप्पाणं  
विसंजोएइ, अणंतेहिं तिरिक्खजोणिय जाव विसंजोएइ, अणंतेहिं मणुस्सभवग्गहणेहिं अप्पाणं विसंजोएइ,  
अणंतेहिं देवभवग्गहणेहिं अप्पाणं विसंजोएइ, जाओ वि य से इमाओ नेरइय-तिरिक्खजोणियमणुस्स-  
देवगतिनामाओ उत्तरपयडीओ तासिं च णं उवग्गहिए अणंताणुबंधी कोह-माण-माया-लोभे खवेइ,  
अणंताणुबंधी कोह-माण-माया-लोभे खवित्ता अप्चक्खाणकसाए कोह-माण-माया-लोभए खवेइ,  
अप्चक्खाणकसाए कोह-माण-माया-लोभे खवित्ता प्चक्खाणावरणे कोह-माण-माया-लोभे खवेइ,  
प्चक्खाणावरणे कोह-माण-माया-लोभे खवित्ता पंचविहं नाणावरणिज्जं नवविहं दरिसणावरणिज्जं  
पंचविहमंतराइयं तालमत्थकडं च णं मोहणिज्जं कट्ठु कम्मरयविकरणकरं अपुच्चकरणं अणुपविट्ठस्स  
अणंते अणुत्तरे निव्वाघाए निरावरणे कसिणे पडिपुण्णे केवलवरणाण-दंसणे समुप्पज्जति।

**[४४८]** से णं भंते! केवलिपण्णतं धम्मं आघवेज्जा वा पण्णवेज्जा वा परूवेज्जा वा? नो  
इणट्ठे समट्ठे, णस्सन्तथ एगणाएण वा एगवागरणेण वा।

से णं भंते! पट्वावेज्ज वा मुंडावेज्ज वा? णो इणट्ठे समट्ठे, उवदेसं पुण करेज्जा।

से णं भंते! सिज्झति जाव अंतं करेति? हंता, सिज्झति जाव अंतं करेति।

**[४४९]** से णं भंते ! किं उड्ढं होज्जा, अहो होज्जा, तिरियं होज्जा? गोयमा! उड्ढं वा होज्जा,  
अहो वा होज्जा, तिरियं वा होज्जा। उड्ढं होमाणे सद्दावइ-वियडावइ-गंधावइ-  
मालवंतपरियाएसु वट्ठवेयइड्ढपव्वएसु होज्जा, साहरणं पडुच्च सोमणसवणे वा पंडगवणे वा होज्जा। अहो  
होमाणे गइडाए वा दरीए वा होज्जा, साहरणं पडुच्च पायाले वा भवणे वा होज्जा। तिरियं होमाणे  
पण्णरससु कम्मभूमीसु होज्जा, साहरणं पडुच्च अइडाइज्जदीव-समुद्धतदेक्कदेसभाए होज्जा।

ते णं भंते! एगसमएणं केवतिया होज्जा? गोयमा! जहन्नेणं एक्को वा दो वा तिन्नि वा,  
उक्कोसेणं दस। से तेणट्ठेणं गोयमा! एवं वुच्चइ असोच्चा णं केवलिस्स वा जाव अत्थेगतिए  
केवलिपण्णतं धम्मं लभेज्जा सवणयाए, अत्थेगतिए असोच्चा णं केवलि जाव नो लभेज्जा सवणयाए,  
अत्थेगतिए असोच्चा णं केवलि जाव नो लभेज्जा सवणयाए जाव अत्थेगतिए केवलनाणं उप्पाडेज्जा,  
अत्थेगतिए केवलनाणं नो उप्पाडेज्जा।

**[४५०]** सोच्चा णं भंते! केवलिस्स वा जाव तप्पक्खियउवासियाए वा केवलिपण्णतं धम्मं

लभेज्जा सवणयाए? गोयमा! सोच्चा णं केवलिस्स वा जाव अत्थेगतिए केवलिपण्णतं धम्मं। एवं जा चेव असोच्चाए वत्तव्वया सा चेव सोच्चाए वि भाणियव्वा, नवरं अभिलावो सोच्चेति। सेसं तं चेव निरवसेसं जाव जस्स णं मणपज्जवनाणावरणिज्जाणं कम्माणं खओवसमे कडे भवइ, जस्स णं केवलनाणावरणिज्जाणं कम्माणं खए कडे भवइ से णं सोच्चा केवलिस्स वा जाव उवासियाए वा केवलिपण्णतं धम्मं लभिज्ज सवणयाए, केवलं बोहिं बुज्जेज्जा जाव केवलनाणं उप्पाडेज्जा ।

तस्स णं अट्ठमंअट्ठमेणं अनिक्खित्तेणं तवोकम्मेणं अप्पाणं भावेमाणस्स पगइभद्वयाए तहेव जाव गवेसणं करेमाणस्स ओहिणाणे समुप्पज्जइ। से णं तेणं ओहिणाणेणं समुप्पन्नेणं जहन्नेणं अंगुलस्स असंखेज्जइभागं, उक्कोसेणं असंखेज्जाइं अलोए लोयप्पमाणमेताइं खंडाइं जाणइ पासइ।

से णं भंते! कतिसु लेस्सासु होज्जा? गोयमा! छसु लेस्सासु होज्जा, तं जहा-कणहलेसाए जाव सुक्कलेसाए।

से णं भंते! कतिसु णाणेसु होज्जा? गोयमा! तिसु वा चउसु वा होज्जा। तिसु होज्जमाणे आभिणिबोहियनाण-सुयनाण-ओहिणाणेसु होज्जा, चउसु होज्जमाणे आभिणिबोहियनाण-सुयनाण-ओहिणाण-मणपज्जवनाणेसु होज्जा।

से णं भंते! किं सजोगी होज्जा, अजोगी होज्जा? एवं जोगो उवओगो संघयणं संठाणं उच्चतं आउयं च एयाणि सत्त्वाणि जहा असोच्चाए तहेव भाणियव्वाणि।

से णं भंते! किं सवेदए. पुच्छ। गोयमा! सवेदए वा होज्जा, अवेदए वा होज्जा।

जइ अवेदए होज्जा किं उवसंतवेयए होज्जा, खीणवेयए होज्जा? गोयमा! नो उवसंतवेदए होज्जा, खीणवेदए होज्जा।

जइ सवेदए होज्जा किं इत्थीवेदए होज्जा. पुच्छ। गोयमा! इत्थीवेदए वा होज्जा, पुरिसवेदए वा होज्जा, पुरिसनपुंसगवेदए वा होज्जा।

से णं भंते! सकसाई होज्जा? अकसाई होज्जा? गोयमा! सकसाई वा होज्जा, अकसाई वा होज्जा।

जइ अकसाई होज्जा किं उवसंतकसाई होज्जा, खीणकसाई होज्जा? गोयमा नो उवसंतकसाई होज्जा, खीणकसाई होज्जा।

जइ सकसाई होज्जा से णं भंते! कतिसु कसाएसु होज्जा? गोयमा! चउसु वा, तिसु वा, दोसु वा, एक्कम्मि वा होज्जा। चउसु होमाणे चउसु संजलणकोह-माण-माया-लोभेसु होज्जा, तिसु होमाणे तिसु संजलणमाण-माया-लोभेसु होज्जा, दोसु होमाणे दोसु संजलणमाया-लोभेसु होज्जा, एगम्मि होमाणे एगम्मि संजलणे लोभे होज्जा।

तस्स णं भंते! केवतिया अज्झवसाणा पण्णत्ता? गोयमा! असंखेज्जा, एवं जहा असोच्चाए तहेव जाव केवलवरनाण-दंसणे समुप्पज्जइ

से णं भंते! केवलिपण्णतं धम्मं आघविज्जा वा, पण्णवेज्जा वा, परुविज्जा वा? हंता, आघविज्ज वा, पण्णवेज्ज वा, परुवेज्ज वा।

से णं भंते! पच्चावेज्ज वा मुंडावेज्ज वा? हंता, गोयमा! पच्चावेज्ज वा, मुंडावेज्ज वा।

तस्स णं भंते! सिस्सा वि पच्चावेज्ज वा, मुंडावेज्ज वा? हंता, पच्चावेज्ज वा मुंडावेज्ज वा।

तस्स णं भंते! पसिस्सा वि पच्चावेज्ज वा मुंडावेज्ज वा? हंता, पच्चावेज्ज वा मुंडावेज्ज वा।  
से णं भंते! सिज्झति बुज्झति जाव अंतं करेइ? हंता, सिज्झइ जाव अंतं करेइ।  
तस्स णं भंते! सिस्सा वि सिज्झंति जाव अंतं करंति? हंता, सिज्झंति जाव अंतं करंति।  
तस्स णं भंते! पसिस्सा वि सिज्झंति जाव अंतं करंति? एवं चेव जाव अंतं करंति।  
से णं भंते! किं उड्ढं होज्जा? जहेव असोच्चाए जाव तदेक्कदेसभाए होज्जा।  
ते णं भंते! एगसमएणं केवतिया होज्जा? गोयमा! जहन्नेणं एक्को वा दो वा तिण्णि वा,  
उक्कोसेणं अट्ठसयं।

से तेणट्ठेणं गोयमा! एवं वुच्चइ-सोच्चा णं केवलिस्स वा जाव केवलिउवासियाए वा जाव  
अत्थेगतिए केवलनाणं उप्पाडेज्जा, अत्थेगतिए केवलनाणं नो उप्पाडेज्जा।  
सेवं भंते! सेवं भंते! ति जाव विहरइ।

**\*नवमे सए इगतीसइमो उद्देशो समतो\***

**० बतीसइमो उद्देशो ०**

[४५१] तेणं कालेणं तेणं समएणं वाणियगामे नगरे होत्था। वण्णओ। दूतिपलासे चेइए।  
सामी समोसढे। परिसा निग्गया। धम्मो कहिओ। परिसा पडिगया।

तेणं कालेणं तेणं समएणं पासावच्चिज्जे गंगेए नामं अणगारे जेणेव समणे भगवं महावीरे  
तेणेव उवागच्छइ, तेणेव उवागच्छिता समणस्स भगवओ महावीरस्स अदूरसामंते ठिच्चा समणं भगवं  
महावीरं एवं वयासी-

संतरं भंते! नेरइया उववज्जंति, निरंतरं नेरइया उववज्जंति? गंगेया! संतरं पि नेरइया  
उववज्जंति, निरंतरं पि नेरइया उववज्जंति।

संतरं भंते! असुरकुमारा उववज्जंति, निरंतरं असुरकुमारा उववज्जंति? गंगेया! संतरं पि  
असुरकुमारा उववज्जंति, निरंतरं पि असुरकुमारा उववज्जंति।

एवं जाव थणियकुमारा।

संतरं भंते! पुढविकाइया उववज्जंति, निरंतरं पुढविकाइया उववज्जंति? गंगेया! नो संतरं  
पुढविकाइया उववज्जंति, निरंतरं पुढविकाइया उववज्जंति।

एवं जाव वणस्सइकाइया।

बेइंदिया जाव वेमाणिया, एते जहा णेरइया।

[४५२] संतरं भंते! नेरइया उववट्ठंति, निरंतरं नेरइया उववट्ठंति? गंगेया! संतरं पि नेरइया  
उववट्ठंति, निरंतरं पि नेरइया उववट्ठंति।

एवं जाव थणियकुमारा।

संतरं भंते! पुढविककाइया उववट्ठंति? पुच्छा। गंगेया! णो संतरं पुढविककाइया उववट्ठंति,  
निरंतरं पुढविककाइया उववट्ठंति।

एवं जाव वणस्सइकाइया नो संतरं, निरंतरं उववट्ठंति।

संतरं भंते! बेइंदिया उव्वट्पंति, निरंतरं बेइंदिया उव्वट्पंति? गंगेया! संतरं पि बेइंदिया उव्वट्पंति, निरंतरं पि बेइंदिया उव्वट्पंति।

एवं जाव वाणमंतरा।

संतरं भंते! जोइसिया चयंति.? पुच्छा। गंगेया! संतरं पि जोइसिया चयंति, निरंतरं पि जोइसिया चयंति।

एवं जाव वेमाणिया वि।

**[४५३]** कइविहे णं भंते! पवेसणए पण्णत्ते? गंगेया! चउव्विहे पवेसणए पण्णत्ते, तं जहा-- नेरइयपवेसणए तिरिक्खजोणियपवेसणए मणुस्सपवेसणए देवपवेसणए।

नेरइयपवेसणए णं भंते! कइविहे पण्णत्ते? गंगेया! सत्तविहे पन्नत्ते, तं जहा-रयणप्पभा- पुढविनेरइयपवेसणए जाव

अहेसत्तमापुढविनेरइयपवेसणए।

• एगे भंते! नेरइए नेरइयपवेसणए णं पविसमाणे किं रयणप्पभाए होज्जा, सक्करप्पभाए होज्जा, जाव अहेसत्तमाए होज्जा? गंगेया! रयणप्पभाए वा होज्जा जाव अहेसत्तमाए वा होज्जा।

• दो भंते! नेरइया नेरइयपवेसणए णं पविसमाणा किं रयणप्पभाए होज्जा जाव अहेसत्तमाए होज्जा? गंगेया! रयणप्पभाए वा होज्जा जाव अहेसत्तमाए वा होज्जा।

अहवा एगे रयणप्पभाए हुज्जा, एगे सक्करप्पभाए होज्जा। अहवा एगे रयणप्पभाए, एगे वालुयप्पभाए होज्जा। जाव एगे रयणप्पभाए, एगे अहेसत्तमाए होज्जा। अहवा एगे सक्करप्पभाए एगे वालुयप्पभाए होज्जा। जाव अहवा एगे सक्करप्पभाए, एगे अहेसत्तमाए होज्जा। अहवा एगे वालुयप्पभाए, एगे पंकप्पभाए होज्जा। एवं जाव अहवा एगे वालुयप्पभाए, एगे अहेसत्तमाए होज्जा। एवं एक्केक्का पुढवी छड्ढेयव्वा जाव अहवा एगे तमाए, एगे अहेसत्तमाए होज्जा।

• तिण्णि भंते! नेरइया नेरइयपवेसणए णं पविसमाणा किं रयणप्पभाए होज्जा जाव अहेसत्तमाए होज्जा? गंगेया! रयणप्पभाए वा होज्जा जाव अहेसत्तमाए वा होज्जा।

अहवा एगे रयणप्पभाए, दो सक्करप्पभाए होज्जा। जाव अहवा एगे रयणप्पभाए, दो अहेसत्तमाए होज्जा। अहवा दो रयणप्पभाए, एगे सक्करप्पभाए होज्जा। जाव अहवा दो रयणप्पभाए, एगे अहेसत्तमाए होज्जा। अहवा एगे सक्करप्पभाए, दो वालुयप्पभाए होज्जा। जाव अहवा एगे सक्करप्पभाए, दो अहेसत्तमाए होज्जा। अहवा दो सक्करप्पभाए, एगे वालुयप्पभाए होज्जा। जाव अहवा दो सक्करप्पभाए, एगे अहेसत्तमाए होज्जा। एवं जहा सक्करप्पभाए वत्तव्वया भणिया तहा सव्वपुढवीणं भाणियव्वा, जाव अहवा दो तमाए, एगे अहेसत्तमाए होज्जा।

अहवा एगे रयणप्पभाए, एगे सक्करप्पभाए, एगे वालुयप्पभाए होज्जा। अहवा एगे रयणप्पभाए, एगे सक्करप्पभाए, एगे पंकप्पभाए होज्जा। जाव अहवा एगे रयणप्पभाए, एगे सक्करप्पभाए, एगे अहेसत्तमाए होज्जा। अहवा एगे रयणप्पभाए, एगे वालुयप्पभाए एगे पंकप्पभाए होज्जा। अहवा एगे रयणप्पभाए, एगे वालुयप्पभाए, एगे धूमप्पभाए होज्जा। एवं जाव अहवा एगे रयणप्पभाए, एगे वालुयप्पभाए, एगे अहेसत्तमाए होज्जा। अहवा एगे रयणप्पभाए, एगे पंकप्पभाए, एगे धूमप्पभाए होज्जा। जाव अहवा एगे रयणप्पभाए, एगे पंकप्पभाए, एगे अहेसत्तमाए होज्जा। अहवा एगे रयणप्पभाए, एगे

धूमप्पभाए, एगे तमाए होज्जा। अहवा एगे रयणप्पभाए, एगे धूमप्पभाए, एगे अहेसत्तमाए होज्जा। अहवा एगे रयणप्पभाए, एगे तमाए, एगे अहेसत्तमाए होज्जा। अहवा एगे सक्करप्पभाए, एगे वालुयप्पभाए, एगे पंकप्पभाए होज्जा। अहवा एगे सक्करप्पभाए, एगे वालुयप्पभाए, एगे धूमप्पभाए होज्जा। जाव अहवा एगे सक्करप्पभाए, एगे वालुयप्पभाए, एगे अहेसत्तमाए होज्जा। अहवा एगे सक्करप्पभाए, एगे पंकप्पभाए, एगे धूमप्पभाए होज्जा। जाव अहवा एगे सक्करप्पभाए, एगे पंकप्पभाए, एगे अहेसत्तमाए होज्जा।

अहवा एगे सक्करप्पभाए, एगे धूमप्पभाए, एगे तमाए होज्जा। अहवा एगे सक्करप्पभाए, एगे धूमप्प., एगे अहेसत्तमाए होज्जा। अहवा एगे सक्करप्पभाए, एगे तमाए, एगे अहेसत्तमाए होज्जा। अहवा एगे वालुयप्पभाए, एगे पंकप्पभाए, एगे धूमप्पभाए होज्जा। अहवा एगे वालुयप्पभाए, एगे पंकप्पभाए, एगे तमाए होज्जा। अहवा एगे वालुयप्पभाए, एगे पंकप्पभाए, एगे अहेसत्तमाए होज्जा। अहवा एगे वालुयप्पभाए, एगे धूमप्पभाए, एगे तमाए होज्जा। अहवा एगे वालुयप्पभाए, एगे धूमप्पभाए, एगे अहेसत्तमाए होज्जा। अहवा एगे वालुयप्पभाए, एगे तमाए, एगे अहेसत्तमाए होज्जा। अहवा एगे पंकप्पभाए, एगे धूमप्पभाए, एगे तमाए होज्जा। अहवा एगे पंकप्पभाए, एगे धूमप्पभाए, एगे अहेसत्तमाए होज्जा। अहवा एगे पंकप्पभाए, एगे तमाए, एगे अहेसत्तमाए होज्जा। अहवा एगे धूमप्पभाए, एगे तमाए, एगे अहेसत्तमाए होज्जा।

चत्तारि भंते! नेरइया नेरइयपवेसणए णं पविसमाणा किं रयणप्पभाए होज्जा.? पुच्छा। गंगेया! रयणप्पभाए वा होज्जा जाव अहेसत्तमाए वा होज्जा।

• अहवा एगे रयणप्पभाए, तिण्णि सक्करप्पभाए होज्जा। अहवा एगे रयणप्पभाए, तिण्णि वालुयप्पभाए होज्जा। एवं जाव अहवा एगे रयणप्पभाए, तिण्णि अहेसत्तमाए होज्जा। अहवा दो रयणप्पभाए, दो सक्करप्पभाए होज्जा, एवं जाव अहवा दो रयणप्पभाए, दो अहेसत्तमाए होज्जा।

अहवा तिण्णि रयणप्पभाए, एगे सक्करप्पभाए होज्जा। एवं जाव अहवा तिण्णि रयणप्पभाए, एगे अहेसत्तमाए होज्जा।

अहवा एगे सक्करप्पभाए तिण्णि वालुयप्पभाए होज्जा, एवं जहेव रयणप्पभाए उवरिमाहिं समं चारियं तहा सक्करप्पभाए वि उवरिमाहिं समं चारियत्वं।

एवं एक्केक्काए समं चारेयत्वं जाव अहवा तिण्णि तमाए, एगे अहेसत्तमाए होज्जा ।

अहवा एगे रयणप्पभाए, एगे सक्करप्पभाए, दो वालुयप्पभाए होज्जा। अहवा एगे रयण-प्पभाए, एगे सक्कर.दो पंकप्पभाए होज्जा। एवं जाव एगे रयणप्पभाए, एगे सक्कर.दो अहेसत्तमाए होज्जा

अहवा एगे रयण., दो सक्कर., एगे वालुयप्पभाए होज्जा १। एवं जाव अहवा एगे रयण., दो सक्कर., एगे अहेसत्तमाए होज्जा।

अहवा दो रयण., एगे सक्कर., एगे वालुयप्पभाए होज्जा। एवं जाव अहवा दो रयण., एगे सक्कर., एगे अहेसत्तमाए होज्जा। अहवा एगे रयण., एगे वालुय., दो पंकप्पभाए होज्जा। एवं जाव अहवा एगे रयणप्पभाए, एगे वालुय, दो अहेसत्तमाए होज्जा। एवं एएणं गमएणं जहा तिण्हं तियसंजोगो तहा भाणियत्त्वो जाव अहवा दो धूमप्पभाए, एगे तमाए, एगे अहेसत्तमाए होज्जा।

अहवा एगे रयणप्पभाए, एगे सक्करप्पभाए, एगे वालुयप्पभाए, एगे पंकप्पभाए होज्जा। अहवा एगे रयणप्पभाए, एगे सक्कर., एगे वालुय., एगे धूमप्पभाए होज्जा। अहवा एगे रयण., एगे सक्कर., एगे वालुय., एगे तमाए होज्जा। अहवा एगे रयणप्पभाए, एगे सक्करप्पभाए, एगे वालुयप्पभाए, एगे

अहेसतमाए होज्जा। अहवा एगे रयण., एगे सक्कर., एगे पंक., एगे धूमप्पभाए होज्जा। अहवा एगे रयण. एगे सक्कर., एगे पंकप्पभाए, एगे तमाए होज्जा। अहवा एगे रयण., एगे सक्कर., एगे पंक., एगे अहेसतमाए होज्जा। अहवा एगे रयणप्पभाए, एगे सक्कर., एगे धूम., एगे तमाए होज्जा। अहवा एगे रयण., एगे सक्कर., एगे धूम., एगे अहेसतमाए होज्जा। अहवा एगे रयण., एगे सक्करप्पभाए, एगे तमाए, एगे अहेसतमाए होज्जा। अहवा एगे रयण., एगे वालुय., एगे पंक., एगे धूमप्पभाए होज्जा। अहवा एगे रयण., एगे वालुय., एगे पंक., एगे तमाए होज्जा। अहवा एगे रयण., एगे वालुय., एगे पंक., एगे अहेसतमाए होज्जा। अहवा एगे रयण., एगे वालुय., एगे धूम., एगे तमाए होज्जा।

अहवा एगे रयणप्पभाए, एगे वालुय., एगे धूम., एगे अहेसतमाए होज्जा। अहवा एगे रयण., एगे वालुय., एगे तमाए, एगे अहेसतमाए होज्जा। अहवा एगे रयण., एगे पंक., एगे धूम., एगे तमाए होज्जा। अहवा एगे रयण., एगे पंक., एगे धूम., एगे अहेसतमाए होज्जा। अहवा एगे रयण., एगे पंक., एगे तमाए, एगे अहेसतमाए होज्जा। अहवा एगे रयण., एगे धूम., एगे तमाए, एगे अहेसतमाए होज्जा। अहवा एगे सक्कर., एगे वालुय., एगे पंक., एगे धूमप्पभाए होज्जा। एवं जहा रयणप्पभाए उवरिमाओ पुढवीओ चारियाओ तहा सक्करप्पभाए वि उवरिमाओ चारियच्चाओ जाव अहवा एग सक्कर., एगे धूम., एगे तमाए, एगे अहेसतमाए होज्जा। अहवा एगे वालुय., एगे पंक., एगे धूम., एगे तमाए होज्जा। अहवा एगे वालुय., एगे पंक., एगे धूमप्पभाए, एगे अहेसतमाए होज्जा। अहवा एगे वालुय., एगे पंक., एगे तमाए, एगे तमाए, एगे अहेसतमाए जोज्जा। अहवा एगे वालुय., एगे धूम., एगे तमाए, एगे अहेसतमाए होज्जा। अहवा एगे पंक., एगे धूम., एगे तमाए एगे अहेस्तमाए होज्जा।

• पंच भंते! नेरइया नेरइयप्पवेसणए णं पविसमाणा किं रयणप्पभाए होज्जा.? पुच्छा। गंगेया! रयणप्पभाए वा होज्जा जाव अहेसतमाए वा होज्जा।

अहवा एगे रयण., चत्तारि सक्करप्पभाए होज्जा। जाव अहवा एगे रयण., चत्तारि अहेसतमाए होज्जा। अहवा दो रयण., तिण्णि सक्करप्पभाए होज्जा। एवं जाव अहवा दो रयणप्पभाए, तिण्णि अहेसतमाए होज्जा। अहवा तिण्णि रयण., दो सक्करप्पभाए होज्जा। एवं जाव अहेसतमाए होज्जा। अहवा चत्तारि रयण., एगे सक्करप्पभाए होज्जा। एवं जाव अहवा चत्तारि रयण., एगे अहेसतमाए होज्जा। अहवा एगे सक्कर., चत्तारि वालुयप्पभाए होज्जा। एवं जहा रयणप्पभाए समं उवरिमपुढवीओ चारियाओ तहा सक्करप्पभाए वि समं चारेयच्चाओ जाव अहवा चत्तारि सक्करप्पभाए, एगे अहेसतमाए होज्जा। एवं एक्केक्काए समं चारेयच्चाओ जाव अहवा चत्तारि तमाए, एगे अहेसतमाए होज्जा।

अहवा एगे रयण., एगे सक्कर., तिण्णि वालुयप्पभाए होज्जा। एवं जाव अहवा एगे रयण., एगे सक्कर., तिण्णि अहेसतमाए होज्जा। अहवा एगे रयण., दो सक्कर., दो वालुयप्पभाए होज्जा। एवं जाव अहवा एगे रयण., दो सक्कर., दो अहेसतमाए होज्जा ५-१०। अहवा दो रयणप्पभाए, एगे सक्कर- प्पभाए, दो वालुयप्पभाए होज्जा

एवं जाव अहवा दो रयणप्पभाए, एगे सक्करप्पभाए, दो अहेसतमाए होज्जा। अहवा एगे रयण., तिण्णि सक्कर., एगे वालुयप्पभाए होज्जा। एवं जाव

अहवा एगे रयण., तिण्णि सक्कर., एगे अहेसतमाए होज्जा। अहवा दो रयण., दो सक्कर., एगे वालुयप्पभाए होज्जा। एवं जाव दो रयण., दो सक्कर., एगे अहेसतमाए। अहवा तिण्णि रयण., एगे

सक्कर., एगे वालुयप्पभाए होज्जा। एवं जाव अहवा तिण्णि रयण., एगे सक्कर., एगे अहेसत्तमाए होज्जा । अहवा एगे रयण., एगे वालुय., तिण्णि पंकप्पभाए होज्जा। एवं एणं कमेणं जहा चउण्हं तियसंजोगो भणितो तहा पंचण्ह वि तियसंजोगो भाणियव्वो; नवरं तत्थ एगो संचारिज्जइ, इह दोण्णि, सेसं तं चेव, जाव अहवा तिण्णि धूमप्पभाए एगे तमाए एगे अहेसत्तमाए होज्जा।

अहवा एगे रयण., एगे सक्कर., एगे वालुय., दो पंकप्पभाए होज्जा। एवं जाव अहवा एगे रयण., एगे सक्कर., एगे वालुय. दो अहेसत्तमाए होज्जा। अहवा एगे रयण., एगे सक्कर., दो वालुय., एगे पंकप्पभाए होज्जा। एवं जाव अहेसत्तमाए। अहवा एगे रयण., दो सक्करप्पभाए, एगे वालुय, एगे पंकप्पभाए होज्जा। एवं जाव अहवा एगे रयण., दो सक्कर., एगे वालुय., एगे अहेसत्तमाए होज्जा। अहवा दो रयण., एगे सक्कर., एगे वालुय., एगे पंकप्पभाए होज्जा। एवं जाव अहवा दो रयण., एगे सक्कर., एगे वालुय., एगे अहेसत्तमाए होज्जा। अहवा एगे रयण., एगे सक्कर., एगे पंक., दो धूमप्पभाए होज्जा। एवं जहा चउण्हं चउक्कसंजोगो भणिओ तहा पंचण्ह वि चउक्कसंजोगो भाणियव्वो, नवरं अब्भहियं एगो संचारेयव्वो, एवं जाव अहवा दो पंक., एगे धूम., एगे तमाए, एगे अहेसत्तमाए, होज्जा।

अहवा एगे रयण., एगे सक्कर., एगे वालुय., एगे पंक. एगे धूमप्पभाए होज्जा। अहवा एगे रयण., एगे सक्कर., एगे वालुय., एगे पंक., एगे तमाए होज्जा। अहवा एगे रयण., जाव एगे पंक. एगे अहेसत्तमाए होज्जा। अहवा एगे रयण., एगे सक्कर., एगे वालुयप्पभाए, एगे धूमप्पभाए, एगे तमाए होज्जा। अहवा एगे रयण., एगे सक्कर., एगे वालुय, एगे धूमाए, एगे अहेसत्तमाए होज्जा। अहवा एगे रयण., एगे सक्कर., एगे वालुय., एगे तमाए, एगे अहेसत्तमाए होज्जा। अहवा एगे रयण., एगे सक्कर., एगे पंक., एगे धूम., एगे तमाए होज्जा। अहवा एगे रयण., एगे सक्कर., एगे पंक., एगे धूम., एगे अहेसत्तमाए होज्जा। अहवा एगे रयण., एगे सक्कर. एगे पंक., एगे तम., एगे अहेसत्तमाए होज्जा। अहवा एगे रयण., एगे सक्कर., एगे धूम., एगे तम., एगे अहेसत्तमाए होज्जा। अहवा एगे रयण., एगे वालुय., एगे पंक., एगे धूम., एगे तमाए होज्जा। अहवा एगे रयण., एगे वालुय., एगे पंक., एगे धूम., एगे अहेसत्तमाए होज्जा। अहवा एगे रयण., एगे वालुय, एगे पंक., एगे तम., एगे अहेसत्तमाए होज्जा। अहवा एगे रयण., एगे वालुय, एगे धूम., एगे तम., एगे अहेसत्तमाए होज्जा। अहवा एगे रयण., एगे पंक., जाव एगे अहेसत्तमाए होज्जा। अहवा एगे सक्कर. एगे वालुय. जाव एगे तमाए होज्जा । अहवा एगे सक्कर. एगे वालुय, एगे पंक., एगे धूम., एगे अहेसत्तमाए होज्जा। अहवा एगे सक्कर., जाव एगे पंक., एगे तमाए, एगे अहेसत्तमाए होज्जा। अहवा एगे सक्कर., एगे वालुय., एगे धूम., एगे तमाए, एगे अहेसत्तमाए होज्जा। अहवा एगे सक्कर., एगे पंक., जाव एगे अहेसत्तमाए होज्जा। अहवा एगे वालुय. जाव एगे अहेसत्तमाए होज्जा।

• छब्भंते! नेरइया नेरइयप्पवेसणए णं पविसमाणा किं रयणप्पभाए होज्जा.? पुच्छा। गंगेया! रयणप्पभाए वा होज्जा जाव अहेसत्तमाए वा होज्जा।

अहवा एगे रयण., पंच सक्करप्पभाए वा होज्जा। अहवा एगे रयण., पंच वालुयप्पभाए वा होज्जा। जाव अहवा एगे रयण., पंच अहेसत्तमाए होज्जा। अहवा दो रयण., चत्तारि सक्करप्पभाए होज्जा । जाव अहवा दो रयण., चत्तारि अहेसत्तमाए होज्जा। अहवा तिण्णि रयण., तिण्णि सक्कर.। एवं एणं कमेणं जहा पंचण्हं दुयासंजोगो तहा छण्ह वि भाणियव्वो, नवरं एक्को अब्भहिओ संचारेयव्वो जाव अहवा पंच तमाए एगे अहेसत्तमाए होज्जा।

अहवा एगे रयण., एगे सक्कर., चत्तारि वालुयप्पभाए होज्जा। अहवा एगे रयण., एगे सक्कर., चत्तारि पंकप्पभाए होज्जा। एवं जाव अहवा एगे रयण. एगे सक्कर. चत्तारि अहेसत्तमाए होज्जा। अहवा एगे रयण., दो सक्कर., तिण्णि वालुयप्पभाए होज्जा। एवं एणं कमेणं जहा पंचण्हं तियासंजोगो भणिओ तहा छण्ह वि भाणियव्वो, नवरं एक्को अब्भहिओ उच्चारयेव्वो, सेसं तं चेव।

पंचसंजोगो वि तहेव, नवरं एक्को अब्भहिओ संचारेयव्वो जाव पच्छिमो भंगो-अहवा दो वालुय, एगे पंक., एगे धूम., एगे तम., एगे अहेसत्तमाए होज्जा।

अहवा एगे रयण. एगे सक्कर. जाव एगे तमाए होज्जा, अहवा एगे रयण. जाव एगे धूम. एगे अहेसत्तमाए होज्जा, अहवा एगे रयण. जाव एगे पंक. एगे तमाए एगे अहेसत्तमाए होज्जा, अहवा एगे रयण. जाव एगे वालुय. एगे धूम. जाव एगे अहेसत्तमाए होज्जा, अहवा एगे रयण. एगे सक्कर. एगे पंक. जाव एगे अहेसत्तमाए होज्जा, अहवा एगे रयण. एगे वालुय. जाव एगे अहेसत्तमाए होज्जा, अहवा एगे सक्करप्पभाए एगे वालुयप्पभाए जाव एगे अहेसत्तमाए होज्जा।

• सत्त भंते! नेरइया नेरइयपवेसणए णं पविसमाणा. पुच्छा। गंगेया! रयणप्पभाए वा होज्जा जाव अहेसत्तमाए वा होज्जा।

अहवा एगे रयणप्पभाए, छ सक्करप्पभाए होज्जा। एवं एणं कमेणं जहा छण्हं दुयासंजोगो तहा सत्तण्ह वि भाणियव्वं नवरं एगो अब्भहिओ संचारिज्जइ। सेसं तं चेव।

तियासंजोगो, चउक्कसंजोगो, पंचसंजोगो, छक्कसंजोगो य छण्हं जहा तहा सत्तण्ह वि भाणियव्वो, नवरं एक्केक्को अब्भहिओ संचारेयव्वो जाव छक्कगसंजोगो। अहवा दो सक्कर. एगे वालुय. जाव एगे अहेसत्तमाए होज्जा।

अहवा एगे रयण. एगे सक्कर. जाव एगे अहेसत्तमाए होज्जा।

• अट्ठ भंते! नेरतिया नेरइयपवेसणए णं पविसमाणा. पुच्छा। गंगेया! रयणप्पभाए वा होज्जा जाव अहेसत्तमाए वा होज्जा।

अहवा एगे रयण. सत्त सक्करप्पभाए होज्जा। एवं दुयासंजोगो जाव छक्कसंजोगो य जहा सत्तण्हं भणिओ तहा अट्ठण्ह वि भाणियव्वो, नवरं एक्केक्को अब्भहिओ संचारेयव्वो। सेसं तं चेव जाव छक्कसंजोगस्स। अहवा तिण्णि सक्कर. एगे वालुय. जाव एगे अहेसत्तमाए होज्जा, अहवा एगे रयण. जाव एगे तमाए दो अहेसत्तमाए होज्जा, अहवा एगे रयण. जाव दो तमाए एगे अहेसत्तमाए होज्जा, एवं संचारेयव्वं जाव अहवा दो रयण. एगे सक्कर. जाव एगे अहेसत्तमाए होज्जा।

• नव भंते! नेरतिया नेरतियपवेसणए णं पविसमाणा. पुच्छा। गंगेया! रयणप्पभाए वा होज्जा जाव अहेसत्तमाए वा होज्जा।

अहवा एगे रयण. अट्ठ सक्करप्पभाए होज्जा। एवं दुयासंजोगो जाव सत्तगसंजोगो य। जहा अट्ठण्हं भणियं तहा नवण्हं पि भाणियव्वं, नवरं एक्केक्को अब्भहिओ संचारेयव्वो, सेसं तं चेव। पच्छिमो आलावगो-अहवा तिण्णि रयण. एगे सक्कर. एगे वालुय. जाव एगे अहेसत्तमाए होज्जा।

• दस भंते! नेरइया नेरइयपवेसणए णं पविसमाणा. पुच्छा। गंगेया! रयणप्पभाए वा होज्जा जाव अहेसत्तमाए वा होज्जा।

अहवा एगे रयणप्पभाए, नव सक्करप्पभाए होज्जा। एवं दुयासंजोगो जाव सत्तसंजोगो य

जहा नवण्हं, नवरं एक्केक्को अब्भहिओ संचारेयव्वो। सेसं तं चेव। अपच्छिमआलावगो- अहवा चत्तारि रयण., एगे सक्करप्पभाए जाव एगे अहेसतमाए होज्जा।

• संखेज्जा भंते! नेरइया नेरइयप्पवेसणए णं पविसमाणा. पुच्छा। गंगेया! रयणप्पभाए वा होज्जा जाव अहेसतमाए वा होज्जा।

अहवा एगे रयणप्पभाए, संखेज्जा सक्करप्पभाए होज्जा, एवं जाव अहवा एगे रयणप्पभाए, संखेज्जा अहेसतमाए होज्जा। अहवा दो रयण., संखेज्जा सक्करप्पभाए वा होज्जा; एवं जाव अहवा दो रयण., संखेज्जा अहेसतमाए होज्जा। अहवा तिण्णि रयण., संखेज्जा सक्करप्पभाए होज्जा। एवं एएणं कमेणं एक्केक्को संचारेयव्वो जाव अहवा दस रयण., संखेज्जा सक्करप्पभाए होज्जा, एवं जाव अहवा दस रयण., संखेज्जा सक्करप्पभाए होज्जा, एवं जाव अहवा दस रयण., संखेज्जा अहेसतमाए होज्जा। अहवा संखेज्जा रयण., संखेज्जा सक्करप्पभाए होज्जा; जाव अहवा संखेज्जा रयणप्पभाए, संखेज्जा अहेसतमाए होज्जा। अहवा एगे सक्कर., संखेज्जा वालुयप्पभाए होज्जा; एवं जहा रयणप्पभा उवरिमपुढवीहिं समं चारिया एवं सक्करप्पभा वि उवरिमपुढवीहिं समं चारेयव्वा। एवं एक्केक्का पुढवी उवरिमपुढवीहिं समं चारेयव्वा जाव अहवा संखेज्जा तमाए, संखेज्जा अहेसतमाए होज्जा।

अहवा एगे रयण., एगे सक्कर., संखेज्जा वालुयप्पभाए होज्जा। अहवा एगे रयण., एगे सक्कर., संखेज्जा पंकप्पभाए होज्जा। जाव अहवा एगे रयण., एगे सक्कर., संखेज्जा अहेसतमाए होज्जा। अहवा एगे रयण., दो सक्कर., संखेज्जा वालुयप्पभाए होज्जा। जाव अहवा एगे रयण०. दो सक्कर०, संखेज्जा अहेसतमाए होज्जा। अहवा एगे रयण०, तिण्णि सक्कर०, संखेज्जा वालुयप्पभाए होज्जा। एवं एएणं कमेणं एक्केक्को संचारेयव्वो सक्करप्पभाए जाव अहवा एगे रयण., संखेज्जा सक्कर., संखेज्जा वालुयप्पभाए होज्जा; जाव अहवा एगे रयण., संखेज्जा वालुय., संखेज्जा अहेसतमाए होज्जा। अहवा दो रयण., संखेज्जा सक्कर., संखेज्जा अहेसतमाए होज्जा। अहवा तिण्णि रयण., संखेज्जा सक्कर., संखेज्जा वालुयप्पभाए होज्जा। एवं एएणं कमेणं एक्केक्को रयणप्पभाए संचारेयव्वो जाव अहवा संखेज्जा रयण., संखेज्जा सक्कर., संखेज्जा अहेसतमाए होज्जा। अहवा एगे रयण., एगे वालुय., संखेज्जा पंकप्पभाए होज्जा; जाव अहवा एगे रयण., एगे वालुय., संखेज्जा अहेसतमाए होज्जा। अहवा एगे रयण., दो वालुय., संखेज्जा पंकप्पभाए होज्जा। एवं एएणं कमेणं तियासंजोगो चउक्कसंजोगो जाव सतगसंजोगो य जहा दसण्हं तहेव भाणियव्वो। पच्छिमो आलावगो सतसंजोगस्स-अहवा संखेज्जा रयण., संखेज्जा सक्कर., जाव संखेज्जा अहेसतमाए होज्जा।

• असंखेज्जा भंते! नेरइया नेरइयपवेसणए णं. पुच्छा। गंगेया! सयणप्पभाए वा होज्जा जाव अहेसतमाए वा होज्जा।

अहवा एगे रयण., असंखेज्जा सक्करप्पभाए होज्जा। एवं दुयासंजोगो जाव सतगसंजोगो य जहा संखेज्जाणं भणिओ तहा असंखेज्जाण वि भाणियव्वो, नवरं असंखेज्जाओ अब्भहिओ भाणियव्वो, सेसं तं चेव जाव सतगसंजोगस्स पच्छिमो आलावगो-अहवा असंखेज्जा रयण. असंखेज्जा सक्कर. जाव असंखेज्जा अहेसतमाए होज्जा।

उक्कोसा णं भंते! नेरइया नेरतियपवेसणए णं. पुच्छा? गंगेया! सव्वे वि ताव रयणप्पभाए होज्जा।

अहवा रयणप्पभाए य सक्करप्पभाए य होज्जा। अहवा रयणप्पभाए य वालुयप्पभाए य होज्जा, जाव अहवा रयणप्पभाए य अहेसत्तमाए य होज्जा।

अहवा रयणप्पभाए य सक्करप्पभाए य वालुयप्पभाए य होज्जा। एवं जाव अहवा रयण., सक्करप्पभाए य अहेसत्तमाए य होज्जा। अहवा रयण., वालुय., पंकप्पभाए य होज्जा; जाव अहवा रयण., वालुय, अहेसत्तमाए य होज्जा। अहवा रयण., पंकप्पभाए य, धूमाए य होज्जा। एवं रयणप्पभं अमुयंतेसु जहा तिण्हं तियासंजोगो भणिओ तहा भाणियत्वं जाव अहवा रयण., तमाए य, अहेसत्तमाए य होज्जा ।

अहवा रयणप्पभाए य, सक्करप्पभाए य, वालुय., पंकप्पभाए य होज्जा। अहवा रयणप्पभाए य, सक्करप्पभाए य, वालुय०, धूमप्पभाए य होज्जा; जाव अहवा रयणप्पभाए य, सक्करप्पभाए य, वालुय., अहेसत्तमाए य होज्जा। अहवा रयण., सक्कर., पंक., धूमप्पभाए य होज्जा। एवं रयणप्पभं अमुयंतेसु जहा चउण्हं चउक्कसंजोगो तहा भाणियत्वं जाव अहवा रयण., धूम., तमाए य, अहेसत्तमाए होज्जा। अहवा रयण., सक्कर., वालुय., पंक., धूमप्पभाए य होज्जा। अहवा रयणप्पभाए जाव पंक., तमाए य होज्जा। अहवा रयण. जाव पंक., अहेसत्तमाए य होज्जा ३। अहवा रयण., सक्कर., वालुय., धूम., तमाए य होज्जा। एवं रयणप्पभं अमुयंतेसु जहा पंचण्हं पंचकसंजोगो तहा भाणियत्वं जाव अहवा रयण., पंकप्पभा., जाव अहेसत्तमाए होज्जा।

अहवा रयण., सक्कर., जाव धूमप्पभाए, तमाए य होज्जा। अहवा रयण., जाव धूम., अहेसत्तमाए य होज्जा। अहवा रयण., सक्कर., जाव पंक., तमाए य, अहेसत्तमाए य होज्जा। अहवा रयण., सक्कर., वालुय., धूमप्पभाए, तमाए, अहेसत्तमाए होज्जा। अहवा रयण., सक्कर., पंक. जाव अहेसत्तमाए य होज्जा। अहवा रयण., वालुय., जाव अहेसत्तमाए होज्जा।

अहवा रयणप्पभाए य, सक्कर., जाव अहेसत्तमाए होज्जा।

एयस्स णं भंते! रयणप्पभापुढविनेरइयपवेसणगस्स सक्करप्पभापुढवि. जाव अहेसत्तमापुढवि नेरइयपवेसणगस्स य कयरे कयरेहिंतो जाव विसेसाहि ए वा? गंगेया! सव्वत्थोवे अहेसत्तमापुढविनेरइय पवेसणए, तमापुढविनेरइयपवेसणए असंखेज्जगुणे, एवं पडिलोमगं जाव रयणप्पभापुढविनेरइयपवेसणए असंखेज्जगुणे।

**[४५४]** तिरिक्खजोणियपवेसणए णं भंते! कतिविहे पण्णत्ते? गंगेया! पंचविहे पण्णत्ते, तं जहा-एगिंदियतिरिक्खजोणियपवेसणए जाव पंचिंदियतिरिक्खजोणियपवेसणए।

एगे भंते! तिरिक्खजोणिए तिरिक्खजोणियपवेसणए णं पविसमाणे किं एगिंदिएसु होज्जा जाव पंचिंदिएसु होज्जा? गंगेया! एगिंदिएसु वा होज्जा जाव पंचिंदिएसु वा होज्जा।

दो भंते! तिरिक्खजोणिया. पुच्छ। गंगेया! एगिंदिएसु वा होज्जा जाव पंचिंदिएसु वा होज्जा अहवा एगे एगिंदिएसु होज्जा एगे बेइंदिएसु होज्जा। एवं जहा नेरइयपवेसणए तहा तिरिक्खजोणियपवेसणए वि भाणियत्वे जाव असंखेज्जा।

उक्कोसा भंते! तिरिक्खजोणिया. पुच्छ। गंगेया! सव्वे वि ताव एगिंदिएसु वा होज्जा। अहवा एगिंदिएसु वा बेइंदिएसु वा होज्जा। एवं जहा नेरतिया चारिया तहा तिरिक्खजोणिया वि चारेयव्वा। एगिंदिया अमुयंतेसु दुयासंजोगो तियासंजोगो चउक्कसंजोगो पंचसंजोगो उवउज्जिरुण भाणियत्त्वो जाव अहवा एगिंदिएसु वा बेइंदिय जाव पंचिंदिएसु वा होज्जा।

एयस्स णं भंते! एगिंदियतिरिक्खजोणियपवेसणगस्स जाव पंचिंदियतिरिक्खजोणियपवेसण-  
यस्स य कयरे कयरेहिंतो जाव विसेसाहिए वा? गंगेया! सत्त्वत्थोवे पंचिंदियतिरिक्खजोणियपवेसणए,  
चउरिंदियतिरिक्खजोणियप०विसेसाहिए, तेइंदिय०विसेसाहिए, बेइंदिय०विसेसाहिए, एगिंदियतिरिक्ख० विसे०

**[४५५]** मणुस्सपवेसणए णं भंते! कतिविहे पन्नते? गंगेया! दुविहे पण्णते, तं जहा-  
सम्मच्छिममणुस्सपवेसणए, गब्भवक्कंतियमणुस्सपवेसणए य।

एगे भंते! मणुस्से मणुस्सपवेसणए णं पविसमाणे किं सम्मुच्छिममणुस्सेसु होज्जा, गब्भ-  
वक्कंतियमणुस्सेसु होज्जा? गंगेया! सम्मुच्छिममणुस्सेसु वा होज्जा, गब्भवक्कंतियमणुस्सेसु वा होज्जा।

दो भंते! मणुस्सा. पुच्छा। गंगेया! सम्मुच्छिममणुस्सेसु वा होज्जा, गब्भवक्कंतियमणुस्सेसु  
वा होज्जा। अहवा एगे सम्मुच्छिममणुस्सेसु होज्जा, एगे गब्भवक्कंतियमणुस्सेसु होज्जा। एवं एणं कमेणं  
जहा नेरइयपवेसणए तहा मणुस्सपवेसणए वि भाणियत्वे जाव दस।

संखेज्जा भंते! मणुस्सा. पुच्छा। गंगेया! सम्मुच्छिममणुस्सेसु वा होज्जा गब्भवक्कंतिय-  
मणुस्सेसु वा होज्जा। अहवा एगे सम्मुच्छिममणुस्सेसु होज्जा, संखेज्जा गब्भवक्कंतियमणुस्सेसु होज्जा।  
अहवा दो सम्मुच्छिममणुस्सेसु होज्जा, संखेज्जा गब्भवक्कंतियमणुस्सेसु होज्जा। एवं एक्केक्कं  
ओसारितेसु जाव अहवा संखेज्जा सममुच्छिममणुस्सेसु होज्जा, संखेज्जा गब्भवक्कंतियमणुस्सेसु होज्जा।

असंखेज्जा भंते! मणुस्सा. पुच्छा। गंगेया! सत्त्वे वि ताव सम्मुच्छिममणुस्सेसु होज्जा।  
अहवा असंखेज्जा सम्मुच्छिममणुस्सेसु, एगे गब्भवक्कंतियमणुस्सेसु होज्जा। अहवा असंखेज्जा  
सम्मच्छिम मणुस्सेसु, दो गब्भवक्कंतियमणुस्सेसु होज्जा। एवं जाव असंखेज्जा सम्मुच्छिममणुस्सेसु  
होज्जा, संखेज्जा गब्भवक्कंतियमणुस्सेसु होज्जा।

उक्कोसा भंते! मणुस्सा०पुच्छा। गंगेया! सत्त्वे वि ताव सम्मुच्छिममणुस्सेसु होज्जा। अहवा  
गब्भवक्कंतियमणुस्सेसु वा होज्जा अहवा सम्मुच्छिममणुस्सेसु वा गब्भवक्कंतियमणुस्सेसु वा होज्जा।

एयस्स णं भंते! सम्मुच्छिममणुस्सपवेसणगस्स गब्भवक्कंतियमणुस्सपवेसणगस्स य कयरे  
कयरेहिंतो जाव विसेसाहिए वा? गंगेया! सत्त्वत्थोवे गब्भवक्कंतियमणुस्सपवेसणए, सम्मुच्छिममणुस्स  
पवेसणए असंखेज्जगुणे।

**[४५६]** देवपवेसणए णं भंते! कतिविहे पण्णते? गंगेया! चउत्विहे पण्णते, तं जहा-  
भवणवासिदेवपवेसणए जाव वेमाणियदेवपवेसणए।

एगे भंते! देवे देवपवेसणए णं पविसमाणे किं भवणवासीसु होज्जा वाणमंतर-जोइसिय-  
वेमाणिएसु होज्जा? गंगेया! भवणवासीसु वा होज्जा वाणमंतर-जोइसिय-वेमाणिएसु वा होज्जा।

दो भंते! देवा देवपवेसणए. पुच्छा। गंगेया! भवणवासीसु वा होज्जा, वाणमंतर-जोइसिय-  
वेमाणिएसु वा होज्जा।

अहवा एगे भवणवासीसु, एगे वाणमंतरेसु होज्जा। एवं जहा तिरिक्खजोणियपवेसणए तहा  
देवपवेसणए वि भाणियत्वे जाव असंखिज्ज ति।

उक्कोसा भंते!. पुच्छा। गंगेया! सत्त्वे वि ताव जोइसिएसु होज्जा।

अहवा जोइसिय-भवणवासीसु य होज्जा। अहवा जोइसिय-वाणमंतरेसु य होज्जा। अहवा  
जोइसिय-वेमाणिएसु य होज्जा।

अहवा जोइसियएसु य भवणवासीसु य वाणमंतरेसु य होज्जा। अहवा जोइसिएसु य भवणवासीसु य वेमाणिएसु य होज्जा। अहवा जोइसिएसु य वाणमंतरेसु य वेमाणिएसु य होज्जा।

अहवा जोइसिएसु य भवणवासीसु य वाणमंतरेसु य वेमाणिएसु य होज्जा।

एयस्स णं भंते! भवणवासिदेवपवेसणगस्स वाणमंतरदेवपवेसणगस्स जोइसियदेव-पवेसणगस्स वेमाणियदेवपवेसणगस्स य कयरे कयरेहिंतो जाव विसेसाहिए वा ? गंगेया ! सच्चत्थोवे वेमाणियदेवपवेसणए, भवणवासिदेवपवेसणए असंखेज्जगुणे, वाणमंतरदेवपवेसणए असंखेज्जगुणे, जोइसियदेवपवेसणए संखेज्जगुणे।

[४५७] एयस्स णं भंते! नेरइयपवेसणगस्स तिरिक्ख. मणुस्स. देवपवेसणगस्स य कयरे कयरेहिंतो जाव विसेसाहिए वा? गंगेया! सच्चत्थोवे मणुस्सपवेसणए, नेरइयपवेसणए असंखेज्जगुणे, देवपवेसणए असंखेज्जगुणे, तिरिक्खजोणियपवेसणए असंखेज्जगुणे।

[४५८] संतरं भंते! नेरइया उववज्जंति? निरंतरं नेरइया उववज्जंति? संतरं असुरकुमारा उववज्जंति? निरंतरं असुरकुमारा उववज्जंति जाव संतरं वेमाणिया उववज्जंति? निरंतरं वेमाणिया उववज्जंति? संतरं नेरइया उववट्पंति? निरंतरं नेरतिया उववट्पंति? जाव संतरं वाणमंतरा उववट्पंति? निरंतरं वाणमंतरा उववट्पंति? संतरं जोइसिया चयंति? निरंतरं जोइसिया चयंति? संतरं वेमाणिया चयंति? निरंतरं वेमाणिया चयंति? गंगेया! संतरं पि नेरतिया उववज्जंति, निरंतरं पि नेरतिया उववज्जंति जाव संतरं पि थणियकुमारा उववज्जंति, निरंतरं पि थणियकुमारा उववज्जंति। नो संतरं पुढविककाइया उववज्जंति, निरंतरं पुढविककाइया उववज्जंति; एवं जाव वणस्सइकाइया। सेसा जहा नेरइया जाव संतरं पि वेमाणिया उववज्जंति, निरंतरं पि वेमाणिया उववज्जंति। संतरं पि नेरइया उववट्पंति, निरंतरं पि नेरइया उववट्पंति; एवं जाव थणियकुमारा। नो संतरं पुढविककाइया उववट्पंति, निरंतरं पुढविककाइया उववट्पंति; एवं जाव वणस्सइकाइया। सेसा जहा नेरइया, नवरं जोइसिय-वेमाणिया चयंति अभिलावो, जाव संतरं पि वेमाणिया चयंति, निरंतरं पि वेमाणिया चयंति।

सओ भंते ! नेरतिया उववज्जंति ? असओ भंते! नेरइया उववज्जंति? गंगेया! सओ नेरइया उववज्जंति, नो असओ नेरइया उववज्जंति। एवं जाव वेमाणिया।सओ भंते! नेरतिया उववट्पंति, असओ नेरइया उववट्पंति? गंगेया! सतो नेरइया उववट्पंति, नो असओ नेरइया उववट्पंति। एवं जाव वेमाणिया, नवरं जोइसिय-वेमाणिएसु 'चयंति' भाणियत्वं।सओ भंते! नेरइया उववज्जंति, असओ भंते! नेरइया उववज्जंति? सओ असुरकुमारा उववज्जंति जाव सतो वेमाणिया उववज्जंति, असतो वेमाणिया उववज्जंति? सतो नेरतिया उववट्पंति, असतो नेरइया उववट्पंति? सतो असुरकुमारा उववट्पंति जाव सतो वेमाणिया चयंति, असतो वेमाणिया चयंति? गंगेया! सतो नेरइया उववज्जंति, नो असओ नेरइया उववज्जंति, सओ असुरकुमारा उववज्जंति, नो असतो असुरकुमारा उववज्जंति, जाव सओ वेमाणिया उववज्जंति, नो असतो वेमाणिया उववज्जंति। सतो नेरतिया उववट्पंति, नो असतो नेरइया उववट्पंति; जाव सतो वेमाणिया चयंति, नो असतो वेमाणिया।।

से केणट्ठेणं भंते! एवं वुच्चइ सतो नेरइया उववज्जंति, नो असतो नेरइया उववज्जंति; जाव सओ वेमाणिया चयंति, नो असओ वेमाणिया चयंति? से नूणं गंगेया! पासेणं अरहया पुरिसादाणीएणं

सासए लोए बुइए, अणाईए अणवयग्गे जहा पंचमे सए जाव जे लोक्कइ से लोए, से तेणट्ठेणं गंगेया! एवं वुच्चइ जाव सतो वेमाणिया चयंति, नो असतो वेमाणिया चयंति।

सयं भंते! एतेवं जाणह उदाहु असयं? असोच्चा एतेवं जाणह उदाहु सोच्चा 'सतो नेरइया उववज्जंति, नो असतो नेरइया उववज्जंति जाव सओ वेमाणिया चयंति, नो असओ वेमाणिया चयंति'? गंगेया! सयं एतेवं जाणामि, नो असयं; असोच्चा एतेवं जाणामि, नो सोच्चा; 'सतो नेरइया उववज्जंति, नो असओ नेरइया उववज्जंति, जाव सतो वेमाणिया चयंति, नो असतो वेमाणिया चयंति'।

से केणट्ठेणं भंते! एवं वुच्चइ तं चेव जाव नो असतो वेमाणिया चयंति? गंगेया! केवली णं पुरत्थिमेणं मियं पि जाणइ, अमियं पि जाणइ, दाहिणेणं एवं जहा सुद्धेसए जाव निव्वुडे नाणे केवलिस्स, से तेणट्ठेणं गंगेया! एवं वुच्चइ तं चेव जाव नो असतो वेमाणिया चयंति।

सयं भंते! नेरइया नेरइएसु उववज्जंति? असयं नेरइया नेरइएसु उववज्जंति? गंगेया! सयं नेरइया नेरइएसु उववज्जंति, नो असयं नेरइया नेरइएसु उववज्जंति।

से केणट्ठेणं भंते! एवं वुच्चइ जाव उववज्जंति? गंगेया! कम्मोदएणं कम्मगुरुयत्ताए कम्मभारियत्ताए कम्मगुरुसंभारियत्ताए, असुभाणं कम्माणं उदएणं, असुभाणं कम्माणं विवागेणं, असुभाणं कम्माणं फलविवागेणं सयं नेरइया नेरइएसु उववज्जंति, नो असयं नेरइया नेरइएसु उववज्जंति, से तेणट्ठेणं गंगेया! जाव उववज्जंति।

सयं भंते! असुरकुमारा. पुच्छा। गंगेया! सयं असुरकुमारा जाव उववज्जंति, नो असयं असुरकुमारा जाव उववज्जंति।

से केणट्ठेणं तं चेव जाव उववज्जंति? गंगेया! कम्मोदएणं कम्मविगतीए कम्मविसोहीए कम्मविसुद्धीए, सुभाणं कम्माणं उदएणं, सुभाणं कम्माणं विवागेणं, सुभाणं कम्माणं फलविवागेणं सयं असुरकुमारा असुरकुमारत्ताए उववज्जंति, नो असयं असुरकुमारत्ताए उववज्जंति। से तेणट्ठेणं जाव उववज्जंति। एवं जाव थणियकुमारा।

सयं भंते! पुढविकाइया. पुच्छा। गंगेया! सयं पुढविकाइया जाव उववज्जंति, नो असयं पुढविकाइया जाव उववज्जंति।

से केणट्ठेणं भंते! एवं वुच्चइ जाव उववज्जंति? गंगेया! कम्मोदएणं कम्मगुरुयत्ताए कम्मभारियत्ताए कम्मगुरुसंभारियत्ताएष सुभासुभाणं कम्माणं उदएणं, सुभासुभाणं कम्माणं विवागेणं, सुभासुभाणं कम्माणं फलविवागेणं सयं पुढविकाइया जाव उववज्जंति, नो असयं पुढविकाइया जाव उववज्जंति। से तेणट्ठेणं जाव उववज्जंति।

एवं जाव मणुस्सा।

वाणमंतर-जोइसिय-वेमाणिया जहा असुरकुमारा। से तेणट्ठेणं गंगेया! एवं वुच्चइ-सयं वेमाणिया जाव उववज्जंति, नो असयं जाव उववज्जंति।

[४५९] तप्पभिइं च णं से गंगेये अणगारे समणं भगवं महावीरं पच्चभिजाणइ सव्वण्णू सव्वदरिसी।

तए णं से गंगेये अणगारे समणं भगवं महावीरं तिक्खुतो आयाहिणपयाहिणं करेइ, करेता वंदइ नमंसइ, वंदिता नमंसिता एवं वयासी-इच्छामि णं भंते! तुब्भं अंतियं चाउज्जामाओ धम्माओ

पंचमहव्वइयं एवं जहा कालासवेसियपुतो तहेव भाणियव्वं जाव सव्वदुक्खप्पहीणे।  
सेवं भंते! सेवं भंते! ति।

**\*नवमे सए बत्तीसइमो उद्देशो समतो\***

### ० तेतीसइमो उद्देशो ०

[४६०] तेणं कालेणं तेणं समएणं माहणकुंडग्गामे नयरे होत्था। वण्णओ। बहुसालए चेतिए।  
वण्णओ।

तत्थ णं माहणकुंडग्गामे नयरे उसभदत्ते नामं माहणे परिवसत्तिअइढे दित्ते वित्ते जाव  
अपरिभूए। रिव्वेवेद-जजुवेद-सामवेद-अथव्वणवेद जहा खंदओ जाव अन्नेसु य बहुसु बंभण्णएसु नएसु  
सुपरिनिट्ठिए समणोवासए अभिगयजीवाजीवे उवलद्धपुण्ण-पावे जाव अप्पाणं भावेमाणे विहरति।

तस्स णं उसभदत्तत्तस्समाहणस्स देवाणंदा नामं माहणी होत्था, सुकुमालपाणि-पाया जाव  
पियदंसणा सुरूवा समणोवासिया अभिगयजीवाजीवा उवलद्धपुण्ण-पावा जाव विहरइ।

तेणं कालेणं तेणं समएणं सामी समोसढे। परिसा पज्जुवासति।

तए णं से उसभदत्ते माहणे इमीसे कहाए लद्धट्ठे समाणे हट्ठ जाव हियए जेणेव देवाणंदा  
माहणी तेणेव उवागच्छति, उवागच्छिता देवाणंदं माहणिं एवं वयासी-एवं खलु देवाणुप्पिए! समणे भगवं  
महावीरे आदिगरे जाव सव्वण्णू सव्वदरिसी आगासगएणं चक्केणं जाव सुहंसुहेणं विहरमाणे जाव बहुसालए  
चेइए अहापडिरूवं जाव विहरति।

तं महाफलं खलु देवाणुप्पिए! तहारूवाणं अरहंताणं भगवंताणं नाम-गोयस्स वि सवणयाए  
किमंग पुण अभिगमण-वंदण-नमंसण-पडिपुच्छण-पज्जुवासणयाए? एगस्स वि आरियस्स धम्मियस्स  
सुवयणस्स सवणयाए किमंग पुण विठलस्स अट्ठस्स गहणयाए? तं गच्छामो णं देवाणुप्पिए! समणं भगवं  
महावीरं वंदामो नमंसामो जाव पज्जुवासामो। एयं णे इहभवे य परभवे य हियाए सुहाए खमाए निस्सेसाए  
आणुगामियत्ताए भविस्सइ।

तए णं सा देवाणंदा माहणी उसभदत्तेणं माहणेणं एवं वुत्ता समाणी हट्ठ जाव हियया  
करयल जाव कट्पु उसभदत्तस्स माहणस्स एयमट्ठं विणएणं पाडिसुणेइ।

तए णं से उसभदत्ते माहणे कोडुंबियपुरिसे सद्दावेइ, कोडुंबियपुरिसे सद्दावेत्ता एवं वयासि-  
खिप्पामेव भो देवाणुप्पिया! लहुकरणजुत्तजोइयसमखुर-वालिधाणसमलिहियसिंगएहिं जंबूणयामयकलावजुत्त-  
पइविसिट्ठएहिं रययामयघं सुत्तरज्जुपवरकंचणत्थपग्गहोग्गहियएहिं नीलुप्पलकयामेलएहिंपवरगोणजुवाण-  
एहिं नाणामणिरयणघं याजालपरिगयं सुजायजुगजोत्तरज्जुयजुगपसत्थसुविरचितनिम्मियं पवरलक्खणोववेयं  
धम्मियं जाणप्पवरं जुतामेव उवट्ठवेह, उवट्ठवित्ता मम एयमाणत्तियं पच्चप्पिणह।

तए णं ते कोडुंबियपुरिसा उसभदत्तेणं माहणेणं एवं वुत्ता समाणा हट्ठ जाव हियया करयल।  
एवं वयासी-सामी तह ताणाए विणएणं वयणं जाव पडिसुणेत्ता खिप्पामेव लहुकरणजुत्त. जाव धम्मियं  
जाणप्पवरं जुतामेव उवट्ठवेत्ता जाव तमाणत्तियं पच्चप्पिणंति।

तए णं से उसभदत्ते माहणे ण्हाए जाव अप्पमहग्घाभरणालंकियसरीरे साओ गिहाओ  
पडिनिक्खमिता जेणेव बाहिरिया उवट्ठाणसाला, जेणेव धम्मिए जाणप्पवरे तेणेव उवागच्छइ, तेणेव

उवागच्छिता धम्मियं जाणप्पवरं द्रुढे।

तए णं सा देवाणंदा माहणी ण्हाया जाव अप्पमहग्घाभरणालंकियसरीरा बहूहिं खुज्जाहिं चिलाइयाहिं जाव महयरगवंदपरिक्खिता अंतेउराओ निग्गच्छति; अंतेउराओ निग्गच्छिता जेणेव बाहिरिया उवट्ठाणसाला, जेणेव धम्मिए जाणप्पवरे तेणेव उवागच्छइ, तेणेव उवागच्छिता जाव धम्मियं जाणप्पवरं द्रुढा। तए णं से उसभदत्ते माहणे देवाणंदाए माहणीए सद्धिं धम्मियं जाणप्पवरं द्रुढे समाणे णियगपरियालसंपरिवुडे माहणकुंडग्गामं नगरं मज्झंमज्झेणं निग्गच्छइ, निग्गच्छिता जेणेव बहुसालए चेइए तेणेव उवागच्छइ, तेणेव उवागच्छिता छत्तादीए तित्थकरातिसए पासइ, २ धम्मियं जाणप्पवरं ठवेइ, ठवेता धम्मियाओ जाणप्पवराओ पच्चोरुहइ, २ समणं भगवं महावीरं पंचविहेणं अभिगमेणं अभिगच्छति, तं जहा-सचित्ताणं दव्वाणं विओसरणयाए एवं जहा बिइयसए जाव तिविहाए पज्जुवासणाए पज्जुवासइ।

**[४६१]** तए णं सा देवाणंदा माहणी धम्मियाओ जामप्पवराओ पच्चोरुहइ., पच्चोरुहिता बहुयाडिं खुज्जाहिं जाव महतरगवंदपरिक्खिता समणं भगवं महावीरं पंचविहेणं अभिगमेणं अभिच्छइ, तं जहा-सचित्ताणं दव्वाणं विओसरणयाए, अचित्ताणं दव्वाणं अविमोयणयाए, विणयोणयाए गायलट्ठीए, चक्खुफासे अंजलिपग्गहेणं, मणस्स एगतीभावकरणेणं ।

जेणेव समणे भगवं महावीरे तेणेव उवागच्छिता समणं भगवं महावीरं तिक्खुतो आयाहिणं पयाहिणं करेइ, करेता वंदइ नमंसइ, वंदिता नमंसिता उसभदत्तं माहणं पुरओ कट्पु ठिया चेव सपरिवारा सुस्सूसमाणी णमंसमाणी अभिमुहा विणएणं पंजलिउडा पज्जुवासइ।

तए णं सा देवाणंदा माहणी आगयपण्हया पप्फुयलोयणा संवरियवलयबाहा कंचुय परिक्खितिया धाराहायकलंबगं पिव समूसतियरोमकूवा समणं भगवं महावीरं अणिमिसाए दिट्ठीए देहमाणीचिट्ठति।

भंते! ति भगवं गोयमे समणं भगवं महावीरं वंदति नमंसति, वंदिता नमंसिता एवं वयासी-किं णं भंते! एसा देवाणंदा माहणी आगयपण्हया तं चेव जाव रोमकूवा देवाणुप्पियं अणिमिसाए दिट्ठीए देहमाणी देहमाणी चिट्ठइ? 'गोयमा!' दि समणे भगवं महावीरे भगवं गोयमं एवं वयासी एवं खलु गोयमा! देवाणंदा माहणी मम अम्मगा, अहं णं देवाणंदाए माहणीए अत्तए। तेणं एसा देवाणंदा माहणी तेणं पुव्वपुत्तसिणेहाणुरागेणं आगयपण्हया जाव समूसतियरोमकूवा ममं अणिमिसाए दिट्ठीए देहमाणी देहमाणी चिट्ठइ।

**[४६२]** तए णं समणे भगवं महावीरे उसभदत्तस्स माहणस्स देवाणंदाए य माहणीए तीसे य महतिमहालियाए इसिपरिसाए जाव परिसा पडिगया।

तए णं से उसभदत्ते माहणे समणस्स भगवओ महावीरस्स अंतियं धम्मं सोच्चा निसम्म हट्ठतुट्ठे उट्ठाए उट्ठेइ, उट्ठाए उट्ठेता समणं भगवं महावीरं तिक्खुतो आया. जाव नमंसिता एवं वयासी-एवमेयं भंते! तहमेयं भंते! जहा खंदओ जाव 'से जहेयं तुब्भे वदह' ति कट्पु उत्तरपुरत्थिमं दिसीभागं अवक्कमइ, उत्तरपुरत्थिमं दिसीभागं अवक्कमिता सयमेव आभरण-मल्लालंकारं ओमुयइ, सयमेव आभरण-मल्लालंकारं ओमुइता सयमेव पंचमुट्ठियं लोयं करेति, सयमेव पंचमुट्ठियं लोयं करिता जेणेव समणे भगवं महावीरे तेणेव उवागच्छइ, उवागच्छिता समणं भगवं महावीरं तिक्खुतो आयाहिणं पयाहिणं जाव नमंसिता एवं वयासी-आलिते णं भंते! लोए, पलिते णं भंते! लोए, आलितपत्तिलेणं भंते! जराए मरणेण

य, एवं एरणं इमं एवं जहा खंदओ तहेव पव्वइओ जाव सामाइय- माइयाइं इक्कारस अंगाइ अहिज्जइ जाव बहूहिं चउत्थ-छट्ठ-सट्ठम-दसम जाव विचित्तेहिं तवोकम्महिं अप्पाणं भावेमाणे बहूइं वासाइं सामण्णपरियायं पाउणइ, पाउणिता मासियाए संलेहणाए अत्ताणं झूसेति, मासियाए संलेहणाए अत्ताणं झूसिता सट्ठिं भत्ताइं अणसणाए छेदेति, सट्ठिं भत्ताइं अणसणाए छेदेता जस्सट्ठाए कीरति नग्गभावो जाव तमट्ठं आराहेइ, २ जाव सव्वदुक्खप्पहीणे।

तए णं सा देवाणंदा माहणी समणस्स भगवओ महावीरस्स अंतियं धम्मं सोच्चा निसम्म हट्ठतुट्ठा. समणं भगवं महावीरं तिक्खुतो आयाहिणपयाहिणं जाव नमंसिता एवं वयासि-एवमेयं भंते!, तहमेयं भंते!, एवं जहा उसभदतो तहेव जाव धम्ममाइक्खियं।

तए णं समणे भगवं महावीरे देवाणंदं माहणिं सयमेव पव्वावेति, सयमेव मुंडावेति, सयमेव अज्जचंदणाए अज्जाए सीसिणिताए दलयइ।

तए णं सा अज्जचंदणा अज्जा देवाणंदं माहणिं सयमेव पव्वावेति, सयमेव मुंडावेति, सयमेव सेहावेति, एवं जहेव उसभदतो तहेव अज्जचंदणाए अज्जाए इमं एयारूवं धम्मियं उवदेसं सम्मं संपडिवज्जइ-तमाणाए तहा गच्छइ जाव संजमेणं संजमति।

तए णं सा देवाणंदा अज्जा अज्जचंदणाए अज्जाए अंतियं सामाइयमाइयाइं एक्कारस अंगाइ अहिज्जइ। सेसं तं चेव जाव सव्वदुक्खप्पहीणा।

**[४६३]** तस्स णं माहणकुंडग्गामस्स नगरस्स पच्चत्थिमेणं, एत्थ णं खत्तियकुंडग्गामे नामं नगरे होत्था। वण्णओ।

तत्थ णं खत्तियकुंडग्गामे नयरे जमाली नामं खत्तियकुमारे परिवसति, अड्ढे दित्ते जाव अपरिभूए उप्पिं पासायवरगए फुट्ठमाणेहिं मुडुंगमत्थएहिं बत्तीसतिबद्धेहिं नाडएहिं वरतरुणीसंपउत्तेहिं उवनच्चिज्जमाणे उवनच्चिज्जमाणे उवगिज्जमाणे उवगिज्जमाणे उवलालिज्जमाणे उवलालिज्जमाणे पाउस-वासारत्त-सरद-हेमंत-वसंत-गिम्हपज्जंते छप्पि उऊ जहाविभवेणं माणेमाणे माणेमाणे कालं गालेमाणे इट्ठे सद्ध-फरिस-रस-रूव-गंधे पंचविहे माणुस्सए कामभोगे पच्चणुभवमाणे विहरइ।

तए णं खत्तियकुंडग्गोम नगरे सिंघाडग-तिय-चउक्क-चच्चर जाव बहुजणसद्धे इ वा जहा उववाइए जाव एवं पण्णवेइ, एवं परूवेइ-एवं खलु देवाणुप्पिया! समणे भगवं महावीरे आइगरे जाव सव्वण्णू सव्वदरिसी माहणकुंडग्गामस्स नगरस्स बहिया बहुसालए चेइए अहापडिरूवं जाव विहरइ। तं महप्फलं खलु देवाणुप्पिया! तहारूवाणं अरहंताणं भगवंताणं जहा उववाइए जाव एगाभिमुहे खत्तियकुंडग्गामं नगरं मज्झंमज्झेणं निग्गच्छंति, निग्गच्छंता जेणेव माहणकुंडग्गामे नगरे जेणेव बहुसालए चेइए एवं जहा उववाइए जाव तिविहाए पज्जुवासणाए पज्जुवासंति।

तए णं तस्स जमालिस्स खत्तियकुमारस्स तं महया जणसद्धं वा जाव जणसन्निवायं वा सुणमाणस्स वा पासमाणस्स वा अयमेयारूवे अज्झत्थिए जाव समुप्पज्जित्था-किं णं अज्ज खत्तियकुंडग्गामे नगरे इंदमहे इ वा, खंदमहे इ वा, मुगुंदमहे इ वा, नाइमहे इ वा, जक्खमहे इ वा, भूयमहे इ वा, कूवमहे इ वा, तडागमहे इ वा, नइमहे इ वा, दहमहे इ वा, पव्वयमहे इ वा, रुक्खमहे इ वा, चेइयमहे इ वा, थूभमहे इ वा, जं णं एए बहवे उग्गा भोगा राइन्ना इक्खागा णाया कोरव्वा खत्तिया खत्तियपुत्ता जहा उववाइए जाव सत्थवाहप्पभिइओ ण्हाया कयबलिकम्मा जहा उववाइए जाव निग्गच्छंति? एवं संपहेइ, एवं

संपेहिता कंचुइज्जपुरिसं सद्दावेति, कंचुइज्जपुरिसं सद्दावेता एवं वयासि-किं णं देवाणुप्पिया! अज्ज खत्तियकुंडग्गामे नगरे इंदमहे इ वा जाव निग्गच्छंति?

तए णं से कंचुइज्जपुरिसे जमालिणा खत्तियकुमारेणं एवं वुत्ते समाणे हट्ठतुट्ठ. समणस्स भगवओ महावीरस्स आगमणगहियविणिच्छए करयल. जमालिं खत्तियकुमारं जएणं विजएणं वद्धावेइ, वद्धावेता एवं वयासी-णो खलु देवाणुप्पिया! अज्ज खत्तियकुंडग्गामे नयरे इंदमहे इ वा जाव निग्गच्छंति। एवं खलु देवाणुप्पिया! अज्ज समणे भगवं महावीरे आइगरे जाव सव्वण्णू सव्वदरिसी माहणकुंडग्गामस्स नगरस्स बहिया बहुसालए चेइए अहापडिरूवं उग्गहं जाव विहरति, तए णं एए बहवे उग्गा भोगा जाव अप्पेगइया वंदणवत्तियं जाव निग्गच्छंति।

तए णं से जमाली खत्तियकुमारे कंचुइज्जपुरिसस्स अंतिए एयमट्ठं सोच्चा निसम्म हट्ठतुट्ठ. कोडुंबियपुरिसे सद्दावेइ, कोडुंबियपुरिसे सद्दावइता एवं वयासी-खिप्पामेव भो देवाणुप्पिया! चाउघंणं आसरहं जुतामेव उवट्ठवेह, उवट्ठवेता मम एयमाणत्तियं पच्चप्पिणह।

तए णं ते कोडुंबियपुरिसा जमालिणा खत्तियकुमारेणं एवं वुत्ता समाणा जाव पच्चप्पिणंति।

तए णं से जमाली खत्तियकुमारे जेणेव मज्जणघरे तेणेव उवागच्छइ, तेणेव उवागच्छिता ण्हाए कयबलिकम्म जहा उववाइए परिसावण्णओ तहा भाणियव्वं जाव चंदणोक्खितगायसरीरे सव्वालंकारविभूसिए मज्जणघराओ पडिनिक्खमइ, मज्जणघराओ पडिनिक्खमिता जेणेव बाहिरिया उवट्ठाणसाला जेणेव चाउघंणं आसरहे तेणेव उवागच्छइ, तेणेव उवागच्छिता चाउघंणं आसरहं द्रुहति, २ सकोरंमल्लदामेणं छत्तेणं धरिज्जमाणेणं महया भडचडकरपहकरवंदपरिक्खिते खत्तियकुंडग्गामं नगरं मज्जंमज्जेणं निग्गच्छइ, निग्गच्छिता जेणेव माहणकुंडग्गामे नगरे जेणेव बहुसालए चेइए तेणेव उवागच्छइ, तेणेव उवागच्छिता तुरए निगिण्हेइ, तुरए निगिण्हिता रहं ठवेइ, रहं ठवित्ता रहाओ पच्चोरुहति, रहाओ पच्चोरुहिता पुप्फ-तंबोलाउहमादीयं पाहणाओ य विसज्जेइ, पा० २ एगसाडियं उत्तरासंगं करेइ, एगसाडियं उत्तरासंगंकरेता आयंते चोक्खे परमसुइब्भूए अंजलिमउलियहत्थे जेणेव समणे भगवं महावीरे तेणेव उवागच्छइ, तेणेव उवागच्छिता समणं भगवं महावीरं तिक्खुतो आयाहिणपयाहिणं करेइ, तिक्खुतो आयाहिणपयाहिणं करेता जाव तिविहाए पज्जुवासणाए पज्जुवासेइ।

तए णं समणे भगवं महावीरे जमालिस्स खत्तियकुमारस्स तीसे य महतिमहालियाए इस्सि. जाव धम्मकहा जाव परिसा पडिगया।

तए णं से जमाली खत्तियकुमारे समणस्स भगवओ महावीरस्स अंतिए धम्मं सोच्चा निसम्म हट्ठ जाव हियए उट्ठाए उट्ठेइ, उट्ठाए उट्ठेता समणं भगवं महावीरं तिक्खुतो जाव नमंसित्ता एवं वयासी-सद्दहामि णं भंते! निग्गंथं पावयणं, पत्तियामि णं भंते! निग्गंथं पावयणं, रोएमि णं भंते! निग्गंथं पावयणं, अब्भुट्ठेमि णं भंते! निग्गंथं पावयणं, एवमेयं भंते! तहमेयं भंते! अवितहमेयं भंते! असंदिद्धमेयं भंते! जाव से जहेवं तुब्भे वदह, जं नवरं देवाणुप्पिया! अम्मा-पियरो आपुच्छामि, तए णं अहं देवाणुप्पियाणं अंतियं मुंडे भवित्ता अगाराओ अणगारियं पव्वयामि। अहासुहं देवाणुप्पिया! मा पडिबंधं।

[४६४] तए णं से जमाली खत्तियकुमारे समणेणं भगवया महावीरेणं एवं वुत्ते समाणे हट्ठतुट्ठ. समणं भगवं महावीरं तिक्खुतो जाव नमंसित्ता तमेव चाउघंणं आसरहं द्रूहइ, द्रूहिता समणस्स भगवओ महावीरस्स अंतियाओ बहुसालाओ चेइयाओ पडिनिक्खमइ, पडिनिक्खमिता सकोरं जाव

धरिज्जमाणेणं महया भडचडगर. जाव परिक्खित्ते जेणेव खत्तियकुंडग्गामे नयरे तेणेव उवागच्छइ, तेणेव उवागच्छिता खत्तियकुंडग्गामं नगरं मज्झंमज्झेणं जेणेव सए गिहे जेणेव बाहिरिया उवट्ठाणसाला तेणेव उवागच्छइ, तेणेव उवागच्छिता तुरए निगिण्हइ, तुरए निगिण्हिता रहं ठवेइ, रहं ठवेता रहाओ पच्चोरुहइ, रहाओ पच्चोरुहिता जेणेव अब्भित्तिया उवट्ठाणसाला, जेणेव अम्मा-पियरो तेणेव उवागच्छइ, तेणेव उवागच्छिता अम्मा-पियरो जएणं विजएणं वद्धावेइ, वद्धावेता एवं वयासी-एवं खलु अम्म! ताओ! मए समणस्स भगवओ महावीरस्स अंतियं धम्मं निसंते, से वि य मे धम्मं इच्छिए, पडिच्छिए, अभिरुइए।

तए णं तं जमालिं खत्तियकुमारं अम्मा-पियरो एवं वयासि-धन्ने सि णं तुमं जाया!, कयत्थे सि णं तुमं जाया, कयपुण्णे सि णं तुमं जाया!, कयलक्खणे सि णं तुमं जाया!, जं णं तुमे समणस्स भगवओ महावीरस्स अंतियं धम्मं निसंते, से वि य ते धम्मं इच्छिए पडिच्छिए अभिरुइए।

तए णं से जमाली खत्तियकुमारे अम्मा-पियरो दोच्चं पि एवं वयासी-एवं खलु मए अम्म! ताओ! समणस्स भगवओ महावीरस्स अंतिए धम्मं निसंते जाव अभिरुइए। तए णं अहं अम्म! ताओ! संसारभउच्चिग्गे, भीए जम्मण-मरणेणं, तं इच्छामि णं अम्म! ताओ! तुब्भेहिं अब्भणुण्णाए समाणे समणस्स भगवओ महावीरस्स अंतियं मुंडे भवित्ता अगाराओ अणगारियं पव्वइत्तए।

तए णं सा जमालिस्स खत्तियकुमारस्स माता तं अणिट्ठं अकंतं अप्पियं अमणुण्णं अमणामं असुयपुव्वं गिरं सोच्चा निसम्म सेयागयरोमकूवपगलंतविलीणगता सोगभरपवेवियंगमंगी नितेया दीणविमणवयणा करयलमलिय व्व कमलमाला तक्खणओलुग्गदुब्बलसरीरलायन्नसुन्ननिच्छाया गयसिरीया पसिद्धिलभूसणपडंतखुण्णियसंचुण्णियधवलवलयपब्भट्ठत्तरिज्जा मुच्छावसणट्ठचेतगुरुई सुकुमालविकिण्ण-केसहत्था परसुणियत्त व्व चंपगलता निव्वत्तमहे व्व इंदलट्ठी विमुक्कसंधिबंधणा कोट्ठिमत्तलंसि 'धस'ति सव्वंगेहिं सन्निवडिया।

तए णं सा जमालिस्स खत्तियकुमारस्स माया ससंभमोयतियायं तुरियं कंचणभिंजारमुह-विणिग्गय-सीयलविमलजलधारा-पसिच्चमाण-निव्ववियगायलट्ठी उक्खेवग-तालियं वीयणग-जणियवाएणं सफुसिएणं अंतेउपरिजणेणं आसासिया समाणी रोयमाणी कंदमाणी सोयमाणी विलवमाणी जमालिं खत्तियकुमारं एवं वयासी-तुमं सि णं जाया! अम्मं एगे पुते इट्ठे कंते पिए मणुण्णे मणामे थेज्जे वेसासिए सम्मए बहुमए अणुमए भंडकरंडगसमाणे रयणे रयणब्भूए जीविऊसविये हिययनंदिजणणे उंबरपुप्फं पिव दुल्लभे सवणयाए किमंग पुण पासणयाए? तं नो खलु जाया! अम्हे इच्छामो तुब्भं खणमवि विप्पओगं, तं अच्छाहि ताव जाया! जाव ताव अम्हे जीवामो; तओ पच्छा अम्हेहिं कालगएहिं समाणेहिं परिणयवये वड्ढिय कुलवंसतंतुकज्जम्मि निरवयक्खे समणस्स भगवओ महावीरस्स अंतियं मुंडे भवित्तभ अगाराओ अणगारियं पव्वइहिसि।

तए णं से जमाली खत्तियकुमारे अम्मा-पियरो एवं वयासी-तहा वि णं तं अम्म! ताओ! जं णं तुब्भे ममं एवं वदह 'तुमं सि णं जाया! अम्मं एगे पुते इट्ठे कंते तं चेव जाव पव्वइहिसि', एवं खलु अम्म! ताओ! माणुस्सए भवे अणेगजाइ-जरा-मरण-रोग-सारीर-माणसपकामदुक्खवेयण-वसणसतोवद्दवाभि-भूए अधुवे अणितिए असासए संझब्भरागसरिसे जलबुब्बुदसमाणे कुसग्गजलबिंदुसन्निभे सुविणगदंसणोवमे विज्जुलयाचंचले अणिच्चे सडण-पडणविद्धंसणधम्मं पुट्ठिं वा पच्छा वा अवस्सविप्पजहियव्वे भविस्सइ, से केस णं जाणइ अम्म! ताओ! के पुट्ठिं गमणयाए? के पच्छा गमणयाए? तं इच्छामि णं अम्म! ताओ!

तुब्भेहिं अब्भणुण्णाए समाणे समणस्स भगवओ महावीरस्स जाव पव्वइत्तए।

तए णं तं जमालिं खत्तियकुमारं अम्मा-पियरो एवं वयासी-इमं च ते जाया! सरीरगं पविसिट्ठरूवं लक्खण-वंजण-गुणोववेयं उत्तमबल-वीरियसत्तजुत्तं विण्णाणवियक्खणं ससोहग्गगुणसमुस्सियं अभिजायमहक्खमं विविहवाहिरोगरहियं निरुवहयउदत्तलट्ठपंचिंदियपडुं, पढमजोव्वणत्थं अणेगउत्तमगुणेहिं जुत्तं, तं अणुहोहि ताव जाव जाया! नियगसरीररूवसोहग्गजोव्वणगुणे, तओ पच्छा अणुभूयनियगसरीर-रूवसोभग्गजोव्वणगुणे अम्हेहिं कालगएहिं समाणेहिं परिणयवये वड्ढिय कुलवंसतंतुकज्जम्मि निरवयक्खे समणस्स भगवओ महावीरस्स अंतियं मुंडे भविता अगाराओ अणागारियं पव्वइहिसि।

तए णं से जमाली खत्तियकुमारे अम्मा-पियरो एवं वयासी-तहा वि णं तं अम्म! ताओ! जं णं तुब्भे ममं एवं वदह 'इमं च णं ते जाया! सरीरगं. तं चेव जाव पव्वइहिसि' एवं खलु अम्म! ताओ! माणुस्सगं सरीरं दुक्खाययणं विविहवाहिसयसन्निकेतं अट्ठियकट्ठुट्ठियं छिरा-ण्हारुजालओणद्धसंपिणद्धं मट्ठियभंडं व दुब्बलं असुइसंकिलिट्ठं अणिट्ठवियसव्वकालसंठप्पयं जराकुणिम-जज्जघरं व सडण-पडण-विद्धंसणधम्मं पुट्ठिं वा पच्छा वा अवस्स विप्पजहियव्वं भविस्सइ, से केस णं जाणति अम्म! ताओ! के पुट्ठिं.? तं चेव जाव पव्वइत्तए।

तए णं तं जमालिं खत्तियकुमारं अम्मा-पियरो एवं वयासी-इमाओ य ते जाया! विपुल-कुलबालियाओ कलाकुसलसव्वकाललालियसुहोचियाओ मद्दवगुणजुत्तनिठणविणओवयारपंडियवियक्खणाओ-मंजुलमियमहरभणियविहसियविप्पेक्खियगतिविलासविट्ठियविसारदाओ अविकलकुलसीलसालिणीओ विसुद्ध कुलवंससंताणतंतुवद्धणपगल्भवयभाविणीओ मणाणुकूलहियइच्छयाओ अट्ठ तुज्झ गुणवल्लभाओ उत्तमाओ निच्चं भावाणुरत्तसव्वंगसुंदरीओ भारियाओ, तं भुंजाहि ताव जाया! एताहिं सद्धिं विउले माणुस्सए कामभोगे, तओ पच्छा भुत्तभोगी विसयविगयवोच्छिन्नकोठहल्ले अम्हेहिं कालगएहिं जाव पव्वइहिसि।

तए णं से जमाली खत्तियकुमारे अम्मा-पियरो एवं वयासी-तहा वि णं तं अम्म! ताओ! जं णं तुब्भे ममं एवं वयह 'इमाओ ते जाया! विपुलकुल. जाव पव्वइहिसि' एवं खलु अम्म! ताओ! माणुस्सगा कामभोगा उच्चार-पासवण-खेल-सिंघाणग-वंत-पित्त-पूय-सुक्क-सोणियसमुब्भवा अमणुण्णदुरूवमुत्त-पूइय-पुरीसपुण्णा मयगंधुस्सासअसुभनिस्सास उव्वेयणगा बीभच्छा अप्पकालिया लहुसगा कलमलाहिवासदुक्खा वहुजणसाहारणा परिकिलेस-किच्छदुक्खसज्झा अबुहजणसेविया सदा साहुगरहणिज्जा अणंतसंसारवद्धणा कडुयफलविवागा चुडलि व्व अमुच्चमाण दुक्खाणुबंधिणो सिद्धिगमणविग्घा, से केस णं जाणति अम्म! ताओ! के पुट्ठिं गमणयाए? के पच्छा गमणयाए? तं इच्छामि णं अम्म! ताओ! जाव पव्वइत्तए।

तए णं तं जमालिं खत्तियकुमारं अम्मा-पियरो एवं वयासी-इमे य ते जाया! अज्जय-पज्जय-पिठपज्जयागए सुबहू हिरण्णे य सुवण्णे य कंसे य दूसे य विउलधणकणग. जाव संतसारसावएज्जे अलाहि जाव आसत्तमाओ कुलवंसाओ पकामं दातुं, पकामं भोतुं, पकामं परिभाएउं, तं अणुहोहि ताव जाया! विउले माणुस्सए इड्ढिसक्कारसमुदए, तओ पच्छा अणुहूयकल्लाणे वड्ढिय कुलवंसतंतु जाव पव्वइहिसि।

तए णं से जमाली खत्तियकुमारे अम्मा-पियरो एवं वयासी-तहा वि णं तं अम्म! ताओ! जं णं तुब्भे ममं एवं वदह-'इमे य ते जाया! अज्जग-पज्जग. जाव पव्वइहिसि' एवं खलु अम्म! ताओ! हिरण्णे य सुवण्णे य जाव सावएज्जे अग्गिसाहिए चोरसाहिए रायसाहिए मच्चुसाहिए दाइयसाहिए अग्गिसामन्ने जाव दाइयसामन्ने अधुवे अणितिए असासए पुट्ठिं वा पच्छा वा अवस्सविप्पजहियव्वे

भविस्सइ, से केस णं जाणइ. तं चेव जाव पव्वइत्तए।

तए णं तं जमालिं खत्तियकुमारं अम्म-ताओ जाहे नो संचाएन्ति विसयाणुलोमाहिं बहूहिं आघवणाहि य पण्णवणाहि य सन्नवणाहि य विण्णवणाहि य आघवित्तए वा पण्णवित्तए वा सन्नवित्तए वा विण्णवित्तए वा ताहे विसयपडिकूलाहिं संजमभयुव्वेवणकरीहिं पण्णवणाहिं पण्णवेमाणा एवं वयासी-एवं खलु जाया! निग्गंथे पावयणे सच्चे अणुत्तरे केवले जहा आवस्सए जाव सव्वदुक्खाणमंतं करेन्ति, अहीव एगंतदिट्ठीए, खुरो इव एगंतधाराए, लोहमया जवा चावेयव्वा,वालुयाकवले इव निरस्साए, गंगा वा महानदी पडिसोयगमणयाए, महासमुद्दे वा भुजाहिं दुत्तरे, तिक्खं कमियव्वं, गरुयं लंबेयव्वं, असिधारगं वतं चरियव्वं, नो खलु कप्पइ जाया! समणाणं निग्गंथाणं आहाकम्मिए इ वा, उद्देशिए इ वा, मिस्सजाए इ वा, अज्झोयरए इ वा, पूइए इ वा, कीए इ वा, पामिच्चे इ वा, अच्छेज्जे इ वा, अणिसट्ठे इ वा, अभिहडे इ वा, कंतारभते इ वा, दुब्भिक्खिभते इ वा, गिलाणभते इ वा, वदलियाभते इ वा, पाहुणगभते इ वा, सेज्जायरपिंडे इ वा, रायपिंडे इ वा, मूलभोयणे इ वा, कंदभोयणे इ वा, फलभोयणे इ वा, बीयभोयणे इ वा, हरियभोयणे इ वा, भुत्तए वा पायए वा। तुमं सि च णं जाया! सुहसमुयिते णो चेव णं दुहसमुयिते, नालं सीयं, नालं उण्हं, नालं खुहा, नालं पिवासा, नालं चोरा, नालं वाला, नालं दंसा, नालं मसगा, नालं वाइय-पित्तिय-सेंभिय-सन्निवाइए विविहे रोगायंके परीसहोवसग्गे उदिण्णे अहियासेत्तए। तं नो खलु जाया! अम्हे इच्छामो तुज्झं खणमवि विप्पयोगं, तं अच्छाहि ताव जाया! जाव ताव अम्हे जीवामो, तओ पच्छा अम्हेहिं जाव पव्वइहिसि।

तए णं से जमाली खत्तियकुमारे अम्मा-पियरो एवं वयासी-तहा वि णं तं अम्म! ताओ! जं णं तुब्भे ममं एवं वदह-एवं खलु जाया! निग्गंथे पावयणे सच्चे अणुत्तरे केवले तं चेव जाव पव्वइहिसि। एवं खलु अम्म! ताओ! निग्गंथे पावयणे कीवाणं कायरणं कापुरिसाणं इहलोगपडिबद्धाणं परलोगपरम्महाणं विसयतिसियाणं दुरणुचरे, पागयजणस्स, धीरस्स निच्छियस्स ववसियस्स नो खलु एत्थं किंचि वि दुक्करं करणयाए, तं इच्छामि णं अम्म! ताओ! तुब्भेहिं अब्भणुण्णाए समाणे समणस्स भगवओ महावीरस्स जाव पव्वइत्तए।

तए णं तं जमालिं खत्तियकुमारं अम्मा-पियरो जाहे नो संचाएन्ति विसयाणुलोमाहि य विसयपडिकूलाहि य बहूहि य आघवणाहि य पण्णवणाहि य सन्नवणाहि य विण्णवणाहि य आघवेत्तए वा जाव विण्णवेत्तए वा ताहे अकामाइं चेव जमालिस्स खत्तियकुमारस्स निक्खमणं अणुमन्नित्था।

**[४६५]** तए णं तस्स जमालिस्स खत्तियकुमारस्स पिया कोडुंबियपुरिसे सद्दावेइ, सद्दावेता एवं वयासी-खिप्पामेव भो देवाणुप्पिया! खत्तियकुंडग्गामं नगरं सव्विन्तरबाहिरियं आसियसम्मज्जिओवलितं जहा उववाइए जाव पच्चप्पिणंति।

तए णं से जमालिस्स खत्तियकुमारस्स पिया दोच्चं पि कोडुंबियपुरिसे सद्दावेइ, सद्दावेता एवं वयासी-खिप्पामेव भो देवाणुप्पिया! जमालिस्स खत्तियकुमारस्स महत्थं महग्घं महरिहं विपुलं निक्खमणाभिसेयं उवट्ठवेह।

तए णं ते कोडुंबियपुरिसा तहेव जाव पच्चप्पिणंति।

तए णं तं जमालिं खत्तियकुमारं अम्मा-पियरो सीहासणवरंसि पुरत्थाभिमुहं निसीयावेत्ति, निसीयावेत्ता अट्ठसएणं सोवण्णियाणं कलसाणं एवं जहा रायप्पसेणइज्जे जाव अट्ठसएणं भोमिज्जाणं कलसाणं सव्विइट्ठीए जाव रवेणं महया महया निक्खमणाभिसेगेणं अभिसिंचइ, निक्खमणाभिसेगेणं

अभिसिंचिता करयल जाव जएणं विजएणं वद्धावेति, जएणं विजएणं वद्धावेता एवं वयासीभण जाया! किं देमो? किं पयच्छामो? किणा वा ते अट्ठो?

तए णं से जमाली खतियकुमारे अम्मा-पियरो एवं वयास- इच्छामि णं अम्म! ताओ! कुतियावणाओ रयहरणं च पडिग्गहं च आणितं कासवगं च सद्दाविडं।

तए णं से जमालिस्स खतियकुमारस्स पिया कोडुंबियपुरिसे सद्दावेइ, सद्दावेता एवं वयासी- खिप्पामेव भो देवाणुप्पिया! सिरिघराओ तिण्णि सयसहस्साइं गहाय सयसहस्सेणं सयसहस्सेणं कुतियावणाओ रयहरणं च पडिग्गहं च आणेह, सयसहस्सेणं च कासवगं सद्दावेह।

तए णं ते कोडुंबियपुरिसा जमालिस्स खतियकुमारस्स पिउणा एवं वुत्ता समाणा हट्ठतुट्ठा करयल जाव पडिसुणिता खिप्पामेव सिरिघराओ तिण्णि सयसहस्साइं तहेव जाव कासवगं सद्दावेति।

तए णं से कासवए जमालिस्स खतियकुमारस्स पिउणो कोडुंबियपुरिसेहिं सद्दाविते समाणे हट्ठतुट्ठो ण्हाए कयबलिकम्मे जाव सरीरे जेणेव जमालिस्स खतियकुमारस्स पिया तेणेव उवागच्छइ, तेणेव उवागच्छिता करयल. जमालिस्स खतियकुमारस्स पियरं जएणं विजएणं वद्धावेइ, जएणं विजएणं वद्धावित्ता एवं वयासी-संदिंसंतु णं देवाणुप्पिया! जं मए करणिज्जं।

तए णं से जमालिस्स खतियकुमारस्स पिया तं कासवगं एवं वयासी-तुमं णं देवाणुप्पिया! जमालिस्स खतियकुमारस्स परेणं जतेणं चउरंगुलवज्जे निक्खमणपाउग्गे अग्गकेसे कप्पेहि।

तए णं से कासवए जमालिस्स खतियकुमारस्स पिउणा एवं वुत्ते समाणे हट्ठतुट्ठे करयल जाव एवं सामी! तहताणाए विणएणं वयणं पडिसुणेइ, पडिसुणिता सुरभिणा गंधोदएणं हत्थ-पादे पक्खालेइ, सुरभिणा गंधोदएणं हत्थ-पादे पक्कालिता सुद्धाए अट्ठपडलाए पोतीए मुहं बंधइ, मुहं बंधिता जमालिस्स खतियकुमारस्स परेणं जतेणं चउरंगुलवज्जे निक्खमणपाउग्गे अग्गकेसे कप्पेइ।

तए णं सा जमालिस्स खतियकुमारस्स माया हंसलक्खणेणं पडसाडएणं अग्गकेसे पडिच्छइ, अग्गकेसे पडिच्छिता सुरभिणा गंधोदएणं पक्खालेइ, सुरभिणा गंधोदएणं पक्खालेता अग्गेहिं वरेहिं गंधेहिं मल्लेहिं अच्चेति, अच्चिता सुद्धवत्थेणं बंधइ, सुद्धवत्थेणं बंधिता रयणकरंडगंसि पक्खिवति, पक्खिविता हार-वारिधार-सिंदुवार-छिन्नमुतावलिप्पगासाइं सुयवियोगदूसहाइं अंसूइं विणिम्मयमाणी विणिम्मयमाणी एवं वयासी-एस णं अम्मं जमालिस्स खतियकुमारस्स बहूसु तिहीसु य पव्वणीसु य उस्सवेसु य जण्णेसु य छणेसु य अपच्छिमे दरिसणे भविस्सति इति कट्पु ऊसीसगमूले ठवेति।

तए णं तस्स जमालिस्स खतियकुमारस्स अम्मा-पियरो दुच्चं पि उत्तरावक्कमणं सीहासणं रयावेति, दोच्चं पि उत्तरावक्कमणं सीहासणं रयावित्ता जमालिं खतियकुमारं सेयापीतएहिं कलसेहिं ण्हाणंति, से० पम्मलहसुकुमालाए सुरभीगंधकासाइए गायाइं लूहेति, सुरभीए गंधकासाइए गायाइं लूहेति, सुरभीए गंधकासाइए गायाइं लूहेता सरसेणं गोसीसचंदणेणं गायाइं अणुलिंपंति, गायाइं अणुलिंपिता नासानिस्सासवायवोज्झं चक्खुहरं वण्णफरिसजुतं हयलालापेलवातिरेगं धवलं कणगखचियंतकम्मं महरिहं हंसलक्खणं पडसाडगं परिहिति, परिहिता हारं पिणद्धंति, २ अद्धहारं पिणद्धंति, अ. पिणद्धिता एवं जहा सूरियाभस्स अलंकारो तहेव जाव चितं रयणसंकडुक्कडं मउडं पिणद्धंति, किं बहुणा? गंधिम-वेढिम-पूरिमसंघातिमेणं चउत्विहेणं मल्लेणं कप्परुक्खणं पिव अलंकियविभूसियं करंति।

तए णं से जमालिस्स खतियकुमारस्स पिया कोडुंबियपुरिसे सद्दावेइ, सद्दावेता एवं वयासि-

खिप्पामेव भो देवाणुप्पिया! अणेगखंभसयसन्निविट्ठं लीलट्ठियसालभंजियागं जहा रायप्पसेणइज्जे विमाणवण्णओ जाव मणिरयणघंणियाजालपरिखितं पुरिससहस्सवाहणीयं सीयं उवट्ठवेह, उवट्ठवेता मम एयमाणतियं पच्चप्पिणह।तए णं ते कोडुंबियपुरिसा जाव पच्चप्पिणंति।

तए णं से जमाली खतियकुमारे केसालंकारेणं वत्थालंकारेणं मल्लालंकारेणं आभरणालंकारेणं चउच्चिहेणं अलंकारेणं अलंकरिए समाणे पडिपुण्णालंकारे सीहसणाओ अब्भुट्ठेति, सीहासणाओ अब्भुट्ठेता सीयं अणुप्पदाहिणीकरेमाणे सीयं दुरुहिता सीहासणवरंसि पुरत्थाभिमुहे सन्निसण्णे।

तए णं तस्स जमालिस्स खतियकुमारस्स माया ण्हाया कयबलिकम्मा जाव सरीरा हंसलक्खणं पडसाडगं गहाय सीयं अणुप्पदाहिणीकरेमाणी सीयं द्रुहइ सी० २ जमालिस्स खतियकुमारस्स दाहिणे पासे भद्दासणवरंसि सन्निसण्णा।

तए णं तस्स जमालिस्स खतियकुमारस्स अम्मधाई ण्हाया जाव सरीरा रयहरणं च पडिग्गहं च गहाय सीयं अणुप्पदाहिणीकरेमाणी सीयं दुरुहइ, सी० २ जमालिस्स खतियकुमारस्स वामे पासे भद्दासणवरंसि सन्निसण्णा।

तए णं तस्स जमालिस्स खतियकुमारस्स पिठओ एगा वरतरुणी सिंगारागारचारुवेसा संगय-गय जाव रूवजोव्वणविलासकलिया सुंदरथण. हिम-रयत-कुमुद-कुंदेदुप्पगासं सकोरेणंमल्लदामं धवलं आयवत्तं गहाय सलीलं उवरिं धरमाणी चिट्ठति।

तए णं तस्स जमालिस्स उभयोपासिं दुवे वरतरुणीओ सिंगारागारचारु जाव कलियाओ नाणामणि-कणग-रयण-विमलमहरिहतवणिज्जुज्जलविचित्तदंडाओ चिल्लियाओ संखंक-कुंदेदु-दगरयअमय महिय फेणपुंजसन्निकासाओ धवलाओ चामराओ गहाय सलीलं वीयमाणीओ वीयमाणीओ चिट्ठंति।

तए णं तस्स जमालिस्स खतियकुमारस्स उत्तरपुरत्थिमेणं एगा वरतरुणी सिंगारागार जाव कलिया सेयं रयतामयं विमलसलिलपुण्णं मतगयमहामुहाकितिसमाणं भिंगारं गहाय चिट्ठइ।

तए णं तस्स जमालिस्स खतियकुमारस्स दाहिणपुरत्थिमेणं एगा वरतरुणी सिंगारागार जाव कलिया चित्तं कणगदंडं तालयं गहाय चिट्ठति।

तए णं तस्स जमालिस्स खतियकुमारस्स पिया कोडुंबियपुरिसे सद्दावेइ, कोडुंबियपुरिसे सद्दावेता एवं वयासी-खिप्पामेव भो देवाणुप्पिया! सरिसयं सरित्तयं सरिच्चयं सरिसलावण्ण-रूव-जोव्वणगुणोववेयं एगाभरणवसणगहियनिज्जोयं कोडुंबियवरतरुणसहस्सं सद्दावेह।

तए णं ते कोडुंबियपुरिसा जाव पडिसुणेता खिप्पामेव सरिसयं सरित्तयं जाव सद्दावेति।

तए णं ते कोडुंबियपुरिसा जमालिस्स खतियकुमारस्स पिठणो कोडुंबियपुरिसेहिं सद्दाविया समाणा हट्ठतुट्ठ. ण्हाया कयबलिकम्मा कयकोउयमंगलपायच्छिता एगाभरण-वसणगहिय- निज्जोया जेणेव जमालिस्स खतियकुमारस्स पिया तेणेव उवागच्छंति, तेणेव उवागच्छिता करयल जाव वद्दावेता एवं वयासी-संदिसंतु णं देवाणुप्पिया! जं अम्हेहिं करणिज्जं।

तए णं से जमालिस्स खतियकुमारस्स पिया तं कोडुंबियवरतरुणसहस्सं एवं वदासी-तुब्भे णं देवाणुप्पिया! ण्हाया कयबलिकम्मा जाव गहियनिज्जोगा जमालिस्स खतियकुमारस्स सीयं परिवहह।

तए णं ते कोडुंबियपुरिसा जमालिस्स खतियकुमारस्स जाव पडिसुणेता ण्हाया जाव गहिय-निज्जोगा जमालिस्स खतियकुमारस्स सीयं परिवहंति।

तए णं तस्स जमालिस्स खत्तियकुमारस्स पुरिससहस्सवाहिणिं सीयं द्रूढस्स समाणस्स तप्पढमयाए इमे अट्ठठमंगलगा पुरओ अहाणुपुव्वीए संपट्ठिया, तं-सोत्थिय सिरिवच्छ जाव दप्पणा। तदणंतरं च णं पुण्णकलसभिंंगारं जहा उववाइए जाव गगणतलमणुलिहंती पुरओ अहाणुपुव्वीए संपट्ठिया। एवं जहा उववाइए तहेव भाणियव्वं जाव आलोयं च करेमाणा 'जय जय' सद्धं च पठंजमाणा पुरओ अहाणुपुव्वीए संपट्ठिया। तदणंतरं च णं बहवे उग्गा भोगा जहा उववाइए जाव महापुरिसवग्गुरापरिक्खिता जमालिस्स खत्तियकुमारस्स पुरओ य मग्गओ य पासओ य अहाणुपुव्वीए संपट्ठिया।

तए णं से जमालिस्स खत्तियकुमारस्स पिया ण्हाए कतबलिकम्ममे जाव विभूसिए हत्थिखंधवरगए सकोरेंमल्लदामेणं छत्तेणं धरिज्जमाणेणं सेयवरचामराहिं उद्धुव्वमाणीहिं उद्धुव्वमाणीहिं हय-गय-रह-पवरजोहकलियाए चाउरंगिणीए सेणाए सद्धिं संपरिवुडे महया भड-चडगर जाव परिक्खिते जमालिस्स खत्तियकुमारं पिट्ठओ पिट्ठओ अणुगच्छइ।

तए णं तस्स जमालिस्स खत्तियकुमारस्स पुरओ महंआसा आसवरा, उभओ पासिं णागा णागवरा, पिट्ठओ रहा रहसंगेल्ली।

तए णं से जमाली खत्तियकुमारे अब्भुग्गयभिंंगारे पग्गहियतालियां उरुसवियसेतछत्ते पवीइतसेतचामरवालवीयणीए सत्विइटीए जाव णादितरवेणं खत्तियकुंडग्गामं नगरं मज्झंमज्झेणं जेणेव माहणकुंडग्गामे नयरे जेणेव बहुसालए चेइए जेणेव समणे भगवं महावीरे तेणेव पहारेत्थ गमणाए।

तए णं तस्स जमालिस्स खत्तियकुमारस्स खत्तियकुंडग्गामं नगरं मज्झंमज्झेणं निग्गच्छमाणस्स सिंघाडग-तिग-चउक्क जाव पहेसु बहवे अत्थत्थिया जहा उववाइए जाव अभिनंदंता य अभित्थुणंता य एवं वयासी- जय जय णंदा! धम्मेणं, जय जय णंदा! तवेणं, जय जयणंदा ! भद्धं ते, अभग्गेहिं णाण-दंसण-चरित्तमुत्तमेहिं अजियाइं जिणाहि इंदियाइं, जियं च पालेहि समणधम्मं, जियविग्घो वि य वसाहि तं देव! सिद्धिमज्झे, णिहणाहि य राग-दोसमल्ले तवेणं धिति-धणिय-बद्धकच्छे, मद्दाहि य अट्ठ-कम्मसत्तू झाणेणं उत्तमेणं सुक्केणं, अप्पमतो हराहि आराहण-पडागं च धीर! तिलोक्क-रंगमज्झे, पाव य वित्तिभिरमणुत्तरं केवलं णाणं, गच्छ य मोक्खं परं पदं जिणवरोवदिट्ठेणं सिद्धि-मग्गेणं अकुडिलेणं, हंता परीसह-चमुं, अभिभविय गाम-कंकोवसग्गा णं, धम्ममे ते अविग्घमत्थु ।.....

.....ति कट्ठु अभिनंदंति य अभित्थुणंति य।

तए णं से जमाली खत्तियकुमारे नयणमालासहस्सेहिं पिच्छिज्जमाणे पिच्छिज्जमाणे एवं जहा उववाइए कूणिओ जाव णिग्गच्छति, निग्गच्छिता जेणेव माहणकुंडग्गामे नगरे जेणेव बहुसालए चेइए तेणेव उवागच्छइ, तेणेव उवागच्छिता छत्तादीए तित्थगरातिसए पासइ, पासिता पुरिससहस्सवाहिणिं सीयं ठवेइ, ठवित्ता पुरिससहस्सवाहिणीओ सीयाओ पच्चोरुहइ।

तए णं तं जमालिं खत्तियकुमारं अम्मा-पियरो पुरओ काउं जेणेव समणे भगवं महावीरे तेणेव उवागच्छंति; तेणेव उवागच्छिता, समणं भगवं महावीरं तिक्खुत्तो जाव नमंसित्ता एव वदासी-एवं खलु भंते! जमाली खत्तियकुमारे अम्हं एगे पुत्ते इट्ठे कंते जाव किमंग पुण पासणयाए? से जहानामए उप्पले इ वा पउमे इ वा जाव सहस्सपत्ते इ वा पंके जाए जले संवुइडे णोवलिप्पति पंकरएणं णोवलिप्पइ जलरएणं एवामेव जमाली वि खत्तियकुमारे कामेहिं जाए भोगेहिं संवुइडे णोवलिप्पइ कामरएणं णोवलिप्पइ भोगरएणं णोवलिप्पइ मित्त-णाइ-नियग-सयण-संबंधि-परिजणेणं, एस णं देवाणुप्पिया! संसारभउत्विग्गे, भीए

जम्मण-मरणेणं देवाणुप्पियाणं अंतिए मुंडे भवित्ता अगाराओ अणगारियं पव्वयइ, तं एयं णं देवाणुप्पियाणं अम्हे सीसभिव्खं दलयामो, पडिच्छंति णं देवाणुप्पिया सीसभिव्खं।

तए णं समणे भगवं महावीरे तं जमालिं खत्तियकुमारं एवं वयासी अहासुहं देवाणुप्पिया! मा पडिबंधं।

तए णं से जमाली खत्तियकुमारे समणेणं भगवया महावीरेणं एवं वुत्ते समाणे हट्ठतुट्ठो समणं भगवं महावीरं तिक्खुतो जाव नमंसित्ता उत्तरपुरत्थिमं दिसीभागं अवक्कमइ, अवक्कमिता सयमेव आभरण-मल्लालंकारं ओमुयइ।

तते णं सा जमालिस्स खत्तियकुमारस्स माया हंसलक्खणेणं पडसाडएणं आभरण-मल्लालंकारं पडिच्छति, पडिच्छित्ता हार-वारि जाव विणिम्मयमाणी विणिम्मयमाणी जमालिं खत्तियकुमारं एवं वयासी-घडियव्वं जाया!, जइयव्वं जाया!, परक्कमियव्वं जाया!, अस्सिं च णं अट्ठे णो पमायेतव्वं'ति कट्णु जमालिस्स खत्तियकुमारस्स अम्मा-पियरो समणं भगवं महावीरं वंदंति णमंसंति, वंदित्ता णमंसित्ता, जामेव दिसं पाउब्भूया तामेव दिसं पडिगया।

तए णं से जमाली खत्तियकुमारे सयमेव पंचमुट्ठियं लोयं करेति, करित्ता जेणेव समणे भगवं महावीरे तेणेव उवागच्छइ, तेणेव उवागच्छित्ता एवं जहा उसभदत्तो तहेव पव्वइओ, नवरं पंचहिं पुरिससएहिं सद्धिं तहेव सव्वं जाव सामाइयमाइयाइं एक्कारस अंगाइं अहिज्जइ, सामाइयमाइयाइं एक्कारस अंगाइं अहिज्जेत्ता बहूहिं चउत्थ-छट्ठ-सट्ठम जाव मासद्धमासखमणेहिं विचित्तेहिं तवोकम्महिं अप्पाणं भावेमाणे विहरइ।

[४६६] तए णं से जमाली अणगारे अन्नया कयाई जेणेव समणे भगवं महावीरे तेणेव उवागच्छइ, तेणेव उवागच्छित्ता समणं भगवं महावीरं वंदति नमंसंति, वंदित्ता नमंसित्ता एवं वयासी-इच्छामि णं भंते! तुब्भेहिं अब्भणुण्णाए समाणे पंचहिं अणगारसएहिं सद्धिं बहिया जणवयविहारं विहरित्तए।

तए णं से समणे भगवं महावीरे जमालिस्स अणगारस्स एयमट्ठं णो आढाइ, णो परिजाणाइ, तुसिणीए संचिट्ठइ।

तए णं से जमाली अणगारे समणं भगवं महावीरं दोच्चं पि तच्चं पि एवं वयासी-इच्छामि णं भंते! तुब्भेहिं अब्भणुण्णाए समाणे पंचहिं अणगारसएहिं सद्धिं जाव विहरित्तए।

तए णं समणे भगवं महावीरे जमालिस्स अणगारस्स दोच्चं पि तच्चं पि एयमट्ठं णो आढाइ जाव तुसिणीए संचिट्ठइ।

तए णं से जमाली अणगारे समणं भगवं महावीरं वंदइ णमंसइ, वंदित्ता णमंसित्ता समणस्स भगवओ महावीरस्स अंतियाओ बहुसालाओ चेइयाओ पडिनिक्खमइ, पडिनिक्खमिता पंचहिं अणगारसएहिं सद्धिं बहिया जणवयविहारं विहरइ।

तेणं कालेणं तेणं समएणं सावत्थी नाम णयरी होत्था। वण्णओ। कोट्ठए चेइए। वण्णओ। जाव वणसंडस्स।

तेणं कालेणं तेणं समएणं चंपा नाम नयरी होत्था। वण्णओ। पुण्णभद्दे चेइए। वण्णओ। जाव पुढविसिलावट्ठओ।

तए णं से जमाली अणगारे अन्नया कयाइ पंचहिं अणगारसएहिं सद्धिं संपरिवुडे

पुच्वाणुपुट्ठिं चरमाणे गामाणुगामं दूड्ज्जमाणे जेणेव सावत्थी नयरी जेणेव कोट्ठए चेइए तेणेव उवागच्छइ, तेणेव उवागच्छिता अहापडिरूवं ओग्गहं ओग्गिण्हति, अहापडिरूवं ओग्गहं ओग्गिण्हिता संजमेणं तवसा अप्पाणं भावेमाणे विहरइ।

तए णं समणे भगवं महावीरे अन्नया कयाइ पुच्वाणुपुट्ठिं चरमाणे जाव सुहंसुहेणं विहरमाणे जेणेव चंपा नगरी जेणेव पुण्णभद्रे चेइए तेणेव उवागच्छइ; तेणेव उवागच्छिता अहापडिरूवं उग्गहं उग्गिण्हति, अहापडिरूवं उग्गहं उग्गिण्हति, अहापडिरूवं उग्गहं उग्गिण्हिता संजमेणं तवसा अप्पाणं भावेमाणे विहरइ।

तए णं तस्स जमालिस्स अणगारस्स तेहिं अरसेहि य विरसेहि य अंतेहि य पंतेहि य लूहेहि य तुच्छेहि य कालाइक्कंतेहि य पमाणाइक्कंतेहि य सीतएहि य पाण-भोयणेहिं अन्नया कयाइ सरीरगंसि विउले रोगातंके पाउब्भूए उज्जले तिउले पगाढे कक्कसे कडुए चंडे दुक्खे दुग्गे तिव्वे दुरहियासे पित्तज्जरपरिगतसरीरे दाहवक्कंतेहि यावि विहरइ।

तए णं से जमाली अणगारे वेयणाए अभिभूए समाणे समणे णिग्गंथे सद्दावेइ, सद्दावेत्ता एवं वयासी-तुब्भे णं देवाणुप्पिया! मम सेज्जासंथारगं संथरेह।

तए णं ते समणा णिग्गंथा जमालिस्स अणगारस्स एयमट्ठं विणएणं पडिसुणेति, पडिसुणेता जमालिस्स अणगारस्स सेज्जासंथारगं संथरेंति।

तए णं से जमाली अणगारे बलियतरं वेदणाए अभिभूए समाणे दोच्चं पि समणे निग्गंथे सद्दावेइ, सद्दावित्ता दोच्चं पि एवं वयासी-ममं णं देवाणुप्पिया! सेज्जासंथारए किं कडे? कज्जइ? तए णं ते समणा निग्गंथा जमालिं अणगारं एवं वयासी-णो खलु देवाणुप्पियाणं सेज्जासंथारए कडे, कज्जति।

तए णं तस्स जमालिस्स अणगारस्स अयमेयारूवे अज्झत्थिए जाव समुप्पज्जित्था-जं णं समणे भगवं महावीरे एवं आइक्खइ जाव एवं परूवेइ 'एवं खलु चलमाणे चलिए, उदीरिज्जमाणे उदीरिए जाव निज्जरिज्जमाणे णिज्जिण्णे' तं णं मिच्छा, इमं च णं पच्चक्खमेव दीसइ सेज्जासंथारए कज्जमाणे अकडे, संथरिज्जमाणे असंथरिए, जम्हा णं सेज्जासंथारए कज्जमाणे अकडे संथरिज्जमाणे असंथरिए तम्हा चलमाणे वि अचलिए जाव निज्जरिज्जमाणे वि अणिज्जिण्णे। एवं संपेहेइ; एवं संपेहेत्ता समणे निग्गंथे सद्दावेइ; समणे निग्गंथे सद्दावेत्ता एवं वयासी-जं णं देवाणुप्पिया! समणे भगवं महावीरे एवं आइक्खइ जाव परूवेइ-एवं खलु चलमाणे चलिए तं चेव सत्वं जाव णिज्जरिज्जमाणे अणिज्जिण्णे।

तए णं तस्स जमालिस्स अणगारस्स एवं आइक्खमाणस्स जाव परूवेमाणस्स अत्थेगइया समणा निग्गंथा एयमट्ठं सद्दहंति पत्तियंति रोयंति। अत्थेगइया समणा निग्गंथा एयमट्ठं णो सद्दहंति णो पत्तियंति णो रोयंति। तत्थ णं जे ते समणा निग्गंथा जमालिस्स अणगारस्स एयमट्ठं सद्दहंति पत्तियंति रोयंति ते णं जमालिं चेव अणगारं उवसंपज्जित्ताणं विहरंति। तत्थ णं जे ते समणा निग्गंथा जमालिस्स अणगारस्स एयमट्ठं णो सद्दहंति णो पत्तियंति णो रोयंति ते णं जमालिस्स अणगारस्स अंतियाओ कोट्ठयाओ चेइयाओ पडिनिक्खमंति, पडिनिक्खमिता पुच्वाणुपुट्ठिं चरमाणा गामाणुगामं दूड्ज्जमाणा जेणेव चंपानयरी जेणेव पुण्णभद्रे चेइए जेणेव समणे भगवं महावीरे तेणेव उवागच्छंति, उवागच्छिता समणं भगवं महावीरं तिक्खुत्तो आयाहिणं पयाहिणं करेंति, करित्ता वंदंति णमंसंति, २ समणं भगवं महावीरं उवसंपज्जित्ताणं विहरंति।

[४६७] तए णं से जमाली अणगारे अन्नया कयाइ ताओ रोगायंकाओ विप्पमुक्के हट्ठे जाए अरोए बलियसरीरे सावत्थीओ नयरीओ कोट्ठयाओ चेइयाओ पडिनिक्खमइ, पडिनिक्खमिता पुट्वाणुपुट्ठिं चरमाणे गामाणुगामं दूइज्जमाणे जेणेव चंपा नयरी जेणेव पुण्णभद्दे चेइए जेणेव समणे भगवं महावीरे तेणेव उवागच्छइ, उवागच्छिता समणस्स भगवओ महावीरस्स अदूरसामंते ठिच्चा समणं भगवं महावीरं एवं वयासी-जहा णं देवाणुप्पियाणं बह्वे अंतेवासी समणा निग्गंथा छउमत्था भवेत्ता छउमत्थावक्कमणेणं अवक्कंता, णो खलु अहं तहा छउमत्थे भविता छउमत्थावक्कमणेणं अवक्कंते, अहं णं उप्पन्नणाण-दंसणधरे अरहा जिणे केवली भविता केवलिअवक्कमणेणं अवक्कंते।

तए णं भगवं गोयमे जमालिं अणगारं एवं वयासि-णो खलु जमाली! केवलिस्स णाणे वा दंसणे वा सेलंसि वा थंभंसि वा थूभंसि वा आवरिज्जइ वा णिवारिज्जइ वा। जइ णं तुमं जमाली! उप्पन्नणाण-दंसणधरे अरहा जिणे केवली भविता केवलिअवक्कमणेणं अवक्कंते तो णं इमाइं दो वागरणाइं वागरेहिं, 'सासए लोए जमाली! असासए लोए जमाली!? सासए जीवे जमाली! असासए जीवे जमाली!?'

तए णं से जमाली अणगारे भगवया गोयमेणं एवं वुत्ते समाणे संकिए कंखिए जाव कलुससमावन्ने जाए यावि होत्था, णो संचाएति भगवओ गोयमस्स किंचि वि पमोक्खमाइक्खितए, तुसिणीए संचिट्ठइ।

जमाली'ति समणे भगवं महावीरे जमालिं अणगारं एवं वयासी-अत्थि णं जमाली! ममं बह्वे अंतेवासी समणा निग्गंथा छउमत्था जे णं पभू एयं वागरणं वागरित्तए जहा णं अहं, नो चेव णं एयप्पगारं भासं भासित्तए जहा णं तुमं। सासए लोए जमाली! जं नं कयावि णासि, ण कयावि ण भवति, न कदावि ण भविस्सइ; भुविं च, भवइ य, भविस्सइ य, धुवे णितिए सासए अक्खए अक्खए अवट्ठिणं णिच्चे। असासए लोए जमाली! जओ ओसप्पिणी भविता उस्सप्पिणी भवइ, उस्सप्पिणी भविता ओसप्पिणी भवइ। सासए जीवे जमाली! जं णं न कयाइ णासि जाव णिच्चे। असासए जीवे जमाली! जं णं नेरइए भविता तिरिक्खजोणिए भवइ, तिरिक्खजोणिए भविता मणुस्से भवइ, मणुस्से भविता देवे भवइ।

तए णं से जमाली अणगारे समणस्स भगवओ महावीरस्स एवमाइक्खमाणस्स जाव एवं परूवेमाणस्स एयमट्ठं णो सद्धइ णो पत्तियइ णो रोएइ, एयमट्ठं असद्धमाणे अपत्तियमाणे अरोएमाणे दोच्चं पि समणस्स भगवओ महावीरस्स अंतियाओ आयाए अवक्कमइ, दोच्चं पि आयाए अवक्कमिता बहूहिं असब्भावुब्भावणाहिं य मिच्छताभिणिवेसेहि य अप्पाणं च परं च तदुभयं च वुग्गाहेमाणे वुप्पाएमाणे बहूइं वासाइं सामण्णपरियागं पाठणइ, पाठणिता अद्धमासियाए संलेहणाए अत्ताणं झूसेइ, अ. झूसेता तीसं भत्ताइं अणसणाए छेदेति, छेदेता तस्स ठाणस्स अणालोइयपडिक्कंते कालमासे कालं किच्चा लंतए कप्पे तेरससागरोवमठितीएसु देवकिब्बिसिएसु देवेसु देवकिब्बिसियताए उववन्ने।

[४६८] तए णं से भगवं गोयमे जमालिं अणगारं कालगयं जाणित्ता जेणेव समणे भगवं महावीरे तेणेव उवागच्छइ, उवागच्छिता समणं भगवं महावीरं वंदति नमंसति, वंदिता नमंसिता एवं वयासी- एवं खलु देवाणुप्पियाणं अंतेवासी कुसिस्से जमाली णामं अणगारे, से णं भंते! जमाली अणगारे कालमासे कालं किच्चा कहिं गए? कहिं उववन्ने? गोयमा! दि समणे भगवं महावीरे भगवं गोयमं एवं वयासी- एवं खलु गोयमा! ममं अंतेवासी कुसिस्से जमाली नामं अणगारे से णं तदा मम एवं

आइक्खमाणस्स ४ एयमट्ठं णो सद्वहइ णो पतियइ णो रोएइ, एयमट्ठं असद्वहमाणे अपतियमाणे अरोएमाणे दोच्चं पि ममं अंतियाओ आयाए अवक्कमइ, अवक्कमिता बहूहिं असब्भावुब्भावणाहिं तं चैव जाव देवकिब्बिसियत्ताए उववन्ने।

**[४६९]** कतिविहा णं भंते! देवकिब्बिसिया पण्णत्ता? गोयमा! तिविहा देवकिब्बिसिया पण्णत्ता, तं जहा-तिपलिओवमट्ठिईया, तिसागरोवमट्ठिईया, तेरससागरोवमट्ठिईया।

कहि णं भंते! तिपलिओवमट्ठितीया देवकिब्बिसिया परिवसंति? गोयमा! उप्पिं जोइसियाणं, हिट्ठिं सोहम्मिसाणेसु कप्पेसु, एत्थ णं तिपलिओवमट्ठिईया देवकिब्बिसिया परिवसंति।

कहि णं भंते! तिसागरोवमट्ठिईया देवकिब्बिसिया परिवसंति? गोयमा! उप्पिं सोहम्म-ईसाणाणं कप्पाणं, हिट्ठिं सणंकुमार-माहिंदेसु कप्पेसु, एत्थ णं तिसागरोवमट्ठिईया देवकिब्बिसिया परिवसंति।

कहि णं भंते! तेरससागरोवमट्ठिईया देवकिब्बिसिया देवा परिवसंति? गोयमा! उप्पिं बंभलोगस्स कप्पस्स, हिट्ठिं लंतए कप्पे, एत्थ णं तेरससागरोवमट्ठिईया देवकिब्बिसिया देवा परिवसंति।

देवकिब्बिसिया णं भंते! केसु कम्मदाणेसु देवकिब्बिसियत्ताए उववत्तारो भवंति? गोयमा! जे इमे जीवा आयरियपडिणीया उवज्झायपडिणीया कुलपडिणीया गणपडिणीया, संघपडिणीया, आयरिय-उवज्झायाणं अयसकरा अवण्णकरा अकित्तिकरा बहूहिं असब्भावुब्भावणाहिं मिच्छताभिनिवेसेहि य अप्पाणं च परं च त उभयं च वुग्गाहेमाणा वुप्पाएमाणा बहूइं वासाइं सामण्णपरियागं पाउणंति, पाउणित्ता तस्स ठाणस्स अणालोइयपडिक्कंता कालमासे कालं किच्चा अन्नयरेसु देवकिब्बिसिएसु देवकिब्बिसियत्ताए उववत्तारो भवंति; तं जहा- तिपलिओवम-ट्ठितीएसु वा तिसागरोवम-ट्ठितीएसु वा तेरससागरोवम-ट्ठितीएसु वा।

देवकिब्बिसिया णं भंते! ताओ देवलोगाओ आउक्खएणं भवक्खएणं ठिइक्खएणं अणंतरं चयं चइत्ता कहिं गच्छंति? कहिं उववज्जंति? गोयमा! जाव चत्तारि पंच नेरइय-तिरिक्खजोणिय-मणुस्स-देवभवग्गहणाइं संसारं अणुपरियट्ठित्ता तओ पच्छा सिज्जंति बुज्जंति जाव अंतं करंति। अत्थेगइया अणादीयं अणवदग्गं दीहमद्धं चाउरंतसंसारकंतरं अणुपरियट्ठित्ति।

जमाली णं भंते! अणगारे अरसाहारे विरसाहारे अंताहारे पंताहारे लूहाहारे तुच्छाहारे अरसजीवी विरसजीवी जाव तुच्छजीवी उवसंतजीवी पसंतजीवी विवित्तजीवी? हंता, गोयमा! जमाली णं अणगारे अरसाहारे विरसाहारे जाव विवित्तजीवी।

जति णं भंते! जमाली अणगारे अरसाहारे विरसाहारे जाव विवित्तजीवी कम्हा णं भंते! जमाली अणगारे कालमासे कालं किच्चा लंतए कप्पे तेरससागरोवमट्ठितीएसु देवकिब्बिसिएसु देवेसु देवकिब्बिसियत्ताए उववन्ने? गोयमा! जमाली णं अणगारे आयरियपडिणीए उवज्झायपडिणीए आयरिय-उवज्झायाणं अयसकारे अवण्णकारे जाव वुग्गाहेमाणे वुप्पाएमाणे बहूइं वासाइं सामण्णपरियागं पाउणित्ता अद्धमासियाए संलेहणाए तीसं भत्ताइं अणसणाए छेदेति, तीसं भत्ताइं अणसणाए छेदेत्ता तस्स ठाणस्स अणालोइयपडिक्कंते कालमासे कालं किच्चा लंतए कप्पे जाव उववन्ने।

**[४७०]** जमाली णं भंते! देवे ताओ देवलोयाओ आउक्खएणं भवक्खएणं जाव कहिं गए? उववहिकहिं? गोयमा! जाव पंच तिरिक्खजोणिय-मणुस्स-देवभवग्गहणाइं संसारं अणुपरियट्ठित्ता ततो पच्छा

सिज्झिहिति जाव अंतं काहिति।

सेवं भंते! सेवं भंते! ति।।

**\*नवमे सए तेतीसइमो उद्देशो समतो\***

**० चउतीसइमो उद्देशो ०**

**[४७१]** तेणं कालेणं तेणं समएणं रायगिहे जाव एवं वदासी-

पुरिसे णं भंते! पुरिसं हणमाणे किं पुरिसं हणति, नोपुरिसं हणति? गोयमा! पुरिसं पि हणति, नोपुरिसे वि हणति।

से केणट्ठेणं भंते! एवं वुच्चइ 'पुरिसं पि हणइ, नोपुरिसे वि हणइ'? गोतमा! तस्स णं एवं भवइ-एवं खलु अहं एगं पुरिसं हणामि' से णं एगं पुरिसं हणमाणे अणेगे जीवे हणइ। से तेणट्ठेणं गोयमा! एवं वुच्चइ 'पुरिसं पि हणइ नोपुरिसे वि हणति'।

पुरिसे णं भंते! आसं हणमाणे किं आसं हणइ, नोआसे वि हणइ? गोयमा! आसं पि हणइ, नोआसे वि हणइ।

से केणट्ठेणं? अट्ठो तहेव।

एवं हत्थिं सीहं वग्घं जाव चिल्ललगं।

पुरिसे णं भंते! अन्नयरं तसपाणं हणमाणे किं अन्नयरं तसपाणं हणइ, नोअन्नयरे तसे पाणे हणइ? गोयमा! अन्नयरं पि तसपाणं हणइ, नोअन्नयरे वि तसे पाणे हणइ।

से केणट्ठेणं भंते! एवं वुच्चइ 'अन्नयरं पि तसपाणं [हणति] नोअन्नयरे वि तसे पाणे हणइ'? गोयमा! तस्स णं एवं भवइ-एवं खलु अहं एगं अन्नयरं तसं पाणं हणामि, से णं एगं अन्नयरं तसं पाणं हणमाणे अणेगे जीवे हणइ। से तेणट्ठेणं गोयमा! तं चेव। एए सव्वे वि एककगमा।

पुरिसे णं भंते! इसिं हणमाणे किं इसिं हणइ, नोइसिं हणइ? गोयमा! इसिं पि हणइ नोइसिं पि हणइ।

से केणट्ठेणं भंते! एवं वुच्चइ जाव नोइसिं पि हणइ? गोयमा! तस्स णं एवं भवइ-एवं खलु अहं एगं इसिं हणामि, से णं एगं इसिं हणमाणे अणंते जीवे हणइ से तेणट्ठेणं निक्खेवओ।

पुरिसे णं भंते! पुरिसं हणमाणे किं पुरिसवरेणं पुट्ठे, नोपुरिसवरेणं पुट्ठे?

गोयमा! नियमा ताव पुरिसवरेणं पुट्ठे, अहवा पुरिसवरेण य णोपुरिसवरेण य पुट्ठे, अहवा पुरिसवरेण य नोपुरिसवरेहि य पुट्ठे।

एवं आसं, एवं जाव चिल्ललगं जाव अहवा चिल्ललगवरेण य णोचिल्ललगवरेहि य पुट्ठे।

पुरिसे णं भंते! इसिं हणमाणे किं इसिवरेणं पुट्ठे, नोइसिवरेणं पुट्ठे? गोयमा! नियमा ताव इसिवरेणं पुट्ठे, अहवा इसिवरेण य णोइसिवरेण य पुट्ठे, अहवा इसिवरेण य नोइसिवरेहि य पुट्ठे।

**[४७२]** पुढविकाइये णं भंते! पुढविकायं चेव आणमति वा पाणमति वा ऊससति वा नीससति वा? हंता, गोयमा! पुढविकाइए पुढविकाइयं चेव आणमति वा जाव नीससति वा।

पुढविकाइए णं भंते! आउक्काइयं आणमति वा जाव नीससति वा? हंता, गोयमा! पुढविकाइए आउक्काइयं आणमति वा जाव नीससति वा।

एवं तेउक्काइयं वाउक्काइयं। एवं वणस्सइकाइयं।  
आउक्काइए णं भंते! पुढविक्काइयं आणमति वा पाणमति वा.? एवं चेव।  
आउक्काइए णं भंते! आउक्काइयं चेव आणमति वा.? एवं चेव।  
एवं तेउ-वाउ-वणस्सइकाइयं।  
तेउक्काइए णं भंते! पुढविक्काइयं आणमति वा? एवं जाव वणस्सइकाइए णं भंते!  
वणस्सइकाइयं चेव आणमति वा.? तहेव।  
पुढविक्काइए णं भंते! पुढविकाइयं चेव आणममाणे वा पाणममाणे वा ऊससमाणे वा  
नीससमाणे वा कइकिरिए? गोयमा! सिय तिकिरिए, सिय चउकिरिए, सिय पंचकिरिए।  
पुढविक्काइए णं भंते! आउक्काइयं आणममाणे वा.? एवं चेव।  
एवं जाव वणस्सइकाइयं।  
एवं आउकाइएण वि सट्ठे वि भाणियट्ठवा।  
एवं तेउक्काइएण वि।  
एवं वाउक्काइएण वि।  
वणस्सइकाइए णं भंते! वणस्सइकाइयं चेव आणममाणे वा.? पुच्छा। गोयमा! सिय  
तिकिरिए, सिय चउकिरिए, सिय पंचकिरिए।  
[४७३] वाउक्काइए णं भंते! रुक्खस्स मूलं पचालेमाणे वा पवाडेमाणे वा कतिकिरिए?  
गोयमा! सिय तिकिरिए, सिय चउकिरिए, सिय पंचकिरिए।  
एवं कंदं। एवं जाव बीयं पचालेमाणे वा. पुच्छा। गोयमा! सिय तिकिरिए, सिय चउकिरिए,  
सिय पंचकिरिए।  
सेवं भंते! सेवं भंते ति.।

**\*\*नवमे सए चउतीसइमो उद्देशो समतो\***

**०-नवमं सतं समतं-०**

**० मुनि दीपरत्तसागरेण संशोधितः सम्पादितश्च नवमं सतं समतं ०**

**[] दसमं सयं []**

[४७४] दिस संवुडअणगारे आइइढी सामहत्थि देवि सभा ।  
उत्तर अंतरदीवा दसमम्मि सयम्मि चोतीसा ॥

**० पढमो उद्देशो ०**

[४७५] रायगिहे जाव एवं वदासी--

किमियं भंते! पाईणा ति पवुच्चति? गोयमा! जीवा चेव अजीवा चेव।

किमियं भंते! पडीणा ति पवुच्चति? गोयमा! एवं चेव।

एवं दाहिणा, एवं उदीणा, एवं उइढा, एवं अहा वि।

कति णं भंते! दिसाओ पण्णत्ताओ? गोयमा! दस दिसाओ पण्णत्ताओ, तं जहा-पुरत्थिमा,

पुरत्थिमदाहिणा, दाहिणा, दाहिणपच्चत्थिमा, पच्चत्थिमा, पच्चत्थिमुत्तरा, उत्तरा, उत्तरपुरत्थिमा, उड्ढा, अहा।

एयासि णं भंते! दसण्हं दिसाणं कति णामधेज्जा पण्णत्ता? गोयमा! दस नामधेज्जा पण्णत्ता, तं जहा-

इंदग्गेयी जम्मा य नेरती वारुणी य वायच्चा ।

सोमा ईसाणी या विमला य तमा य बोधच्चा ॥

इंदा णं भंते! दिसा किं जीवा, जीवदेसा, जीवपदेसा, अजीवा, अजीवदेसा, अजीवपएसा? गोयमा! जीवा वि, तं चेव जाव अजीवपएसा वि। जे जीवा ते नियमं एगिंदिया, बेइंदिया जाव पंचिंदिया, अणिंदिया। जे जीवदेसा ते नियमं एगिंदियदेसा जाव अणिंदियदेसा। जे जीवपएसा ते नियमं एगिंदियपएसा जाव अणिंदियपएसा। जे अजीवा, ते दुविहा पण्णत्ता, तं जहा-रूविअजीवा य, अरूविअजीवा य। जे रूविअजीवा ते चउत्विहा पण्णत्ता, तं जहा-खंधा, खंधदेसा, खंधपएसा, परमाणुपोग्गला। जे अरूविअजीवा ते सत्तविहा पण्णत्ता, तं जहा-नो धम्मत्थिकाये, धम्मत्थिकायस्स देसे, धम्मत्थिकायस्स पदेसा; नो अधम्मत्थिकाये, अधम्मत्थिकायस्स देसे, अधम्मत्थिकायस्स पदेसा; नो आगासत्थिकाये, आगासत्थिकायस्स देसे, आगासत्थिकायस्स पदेसा, अद्वासमये।

अग्गेयी णं भंते! दिसा किं जीवा, जीवदेसा, जीवपदेसा• पुच्छा। गोयमा! णो जीवा, जीवदेसा वि, जीवपदेसा वि, अजीवा वि, अजीवदेसा वि, अजीवपदेसा वि। जे जीवदेसा ते नियमं एगिंदियदेसा। अहवा एगिंदियदेसा य बेइंदियस्स देसे, अहवा एगिंदियदेसा य बेइंदियस्स देसा, अहवा एगिंदियदेसा य बेइंदियाण य देसा। अहवा एगिंदियदेसा य तेइंदियस्स देसे, एवं चेव तियभंगो भाणियच्चो। एवं जाव अणिंदियाणं तियभंगो। जे जीवपदेसा ते नियमा एगिंदियपदेसा। अहवा एगिंदियपदेसा य बेइंदियस्स पदेसा, अहवा एगिंदियपदेसा य बेइंदियाण य पएसा। एवं आदिल्लविरहिओ जाव अणिंदियाणं। जे अजीवा ते दुविहा पण्णत्ता, तं जहा-रूविअजीवा य अरूविअजीवा य। जे रूविअजीवा ते चउत्विहा पण्णत्ता, तं जहा-खंधा जाव परमाणुपोग्गला। जे अरूविअजीवा ते सत्तविधा पण्णत्ता, तं जहा--नो धम्मत्थिकाये, धम्मत्थिकायस्स देसे, धम्मत्थिकायस्स पदेसा; एवं अधम्मत्थिकायस्स वि; एवं आगासत्थिकायस्स वि जाव आगासत्थिकायस्स पदेसा; अद्वासमये।

जम्मा णं भंते! दिसा किं जीवा? जहा इंदा तहेव निरवसेसं।

नेरई जहा अग्गेयी।

वारुणी जहा इंदा।

वायच्चा जहा अग्गेयी।

सोमा जहा इंदा।

ईसाणी जहा अग्गेयी।

विमलाए जीवा जहा अग्गेईए, अजीवा जहा इंदाए।

एवं तमाए वि, नवरं अरूवी छत्विहा। अद्वासमयो न भण्णति।

**[४७६]** कति णं भंते! सरीरा पण्णत्ता?

गोयमा! पंच सरीरा पण्णत्ता, तं जहा-ओरालिए जाव कम्मए।

ओरालियसरीरे णं भंते! कतिविहे पण्णत्ते?  
एवं ओगाहणसंठाणपदं निरवसेसं भाणियत्वं जाव अप्पाबहुगं ति।  
सेवं भंते! सेवं भंते ति०।

**\*दसमे सए पढमो उद्देशो समतो\***

**० बीओ उद्देशो ०**

**[४७७]** रायगिहे जाव एवं वयासी-

संवुडस्स णं भंते! अणगारस्स वीयी पंथे णिच्चा पुरओ रूवाइं निज्झायमाणस्स, मग्गतो रूवाइं अवयक्खमाणस्स, पासतो रूवाइं अवलोएमाणस्स, उड्ढं रूवाइं ओलोएमाणस्स, अहे रूवाइं आलोएमाणस्स तस्स णं भंते! किं इरियावहिया किरिया कज्जइ, संपराइया किरिया कज्जइ? गोयमा! संवुडस्स णं अणगारस्स वीयी पंथे ठिच्चा जाव तस्स णं णो इरियावहिया किरिया कज्जइ, संपराइया किरिया कज्जइ।

से केणट्ठेणं भंते ! एवं वुच्चइ-संवुड० जाव संपराइया किरिया कज्जइ? गोयमा! जस्स णं कोह-माण-माया-लोभा एवं जहा सत्तमसए पढमोद्देशए जाव से णं उस्सुत्तमेव रीयति, सेतेणट्ठेणं जाव संपराइया किरिया कज्जति।

संवुडस्स णं भंते! अणगारस्स अवीयी पंथे ठिच्चा पुरतो रूवाइं निज्झायमाणस्स जाव तस्स णं भंते! किं इरियावहिया किरिया कज्जइ०? पुच्छा। गोयमा! संवुड० जाव तस्स णं इरियावहिया किरिया कज्जइ, नो संपराइया किरिया कज्जइ।

से केणट्ठेणं भंते! एवं वुच्चइ? जहा सत्तमसए सत्तमुद्देशए जाव से णं अहासुत्तमेव रीयति, सेतेणट्ठेणं जाव नो संपराइया किरिया कज्जइ।

**[४७८]** कतिविधा णं भंते! जोणी पण्णत्ता? गोयमा! तिविहा जोणी पण्णत्ता, तं-सीया उसिणा सीतोसिणा। एवं जोणीपयं निरवसेसं भाणियत्वं।

**[४७९]** कतिविधा णं भंते! वेदणा पण्णत्ता? गोयमा! तिविहा वेदणा पण्णत्ता, तं जहा-सीता उसिणा सीतोसिणा। एवं वेदणापदं भाणितत्वं जाव नेरइया णं भंते! किं दुक्खं वेदणं वेदंति, सुहं वेदणं वेदंति, अदुक्खमसुहं वेदणं वेदंति? गोयमा! दुक्खं पि वेदणं वेदंति, सुहं पि वेदणं वेदंति, अदुक्खमसुहं पि वेदणं वेदंति।

**[४८०]** मासियं णं भंते! भिक्खुपडिमं पडिवन्नस्स अणगारस्स निच्चं वोसट्ठे काये चियत्ते देहे, एवं मासिया भिक्खुपडिमा निरवसेसा भाणियत्वा जहा दसाहिं जाव आराहिया भवति।

**[४८१]** भिक्खू य अन्नयरं अकिच्चट्ठाणं पडिसेवित्ता, से णं तस्स ठाणस्स अणालोइय अपडिक्कंते कालं करेति नत्थि तस्स आराहणा।

से णं तस्स ठाणस्स आलोइयपडिक्कंते कालं करेति अत्थि तस्स आराहणा।

भिक्खू य अन्नयरं अकिच्चट्ठाणं पडिसेवित्ता, तस्स णं एवं भवति पच्छा वि णं अहं चरिमकालसमयंसि एयस्स ठाणस्स आलोएस्सामि जाव पडिवज्जिस्सामि, से णं तस्स ठाणस्स अणालोइयपडिक्कंते जाव नत्थि तस्स आराहणा।

से णं तस्स ठाणस्स आलोइयपडिक्कंते कालं करेइ अत्थि तस्स आराहणा।  
भिक्षू य अन्नयरं अकिच्चट्ठाणं पडिसेवित्ता, तस्स णंएवं भवति -'जइ ताव  
समणोवासगा वि कालमासे कालं किच्चा अन्नयरेसु देवलोगेसु देवत्ताए उववतारो भवंति  
किमंग पुण अहं अणपन्नियदेवत्तणं पि नो लभिस्सामि?'ति कट्ठु से णं तस्स ठाणस्स  
अणालोइयपडिक्कंते कालं करेति नत्थि तस्स आराहणा।

से णं तस्स ठाणस्स आलोइयपडिक्कंते कालं करेति अत्थि तस्स आराहणा।  
सेवं भंते! सेवं भंते! ति०

**\*दसमे सए बीइओ उद्देशो समतो\***

**० तइओ उद्देशओ ०**

**[४८२]** रायगिहे जाव एवं वदासि--

आइइढीए णं भंते! देवे जाव चत्तारि पंच देवावासंतराइं वीतिक्कंते तेण परं परिइढीए?  
हंता, गोयमा! आइइढीए णं०, तं चेव।

एवं असुरकुमारे वि। नवरं असुरकुमारावासंतराइं, सेसं तं चेव।

एवं एएणं कमेणं जाव थणियकुमारे।

एवं वाणमंतरे जोतिसिए वेमाणिए जाव तेण परं परिइढीए।

अप्पिइढीए णं भंते! देवे महिइढीयस्स देवस्स मज्झंमज्झेणं वीतीवइज्जा?  
णो इणट्ठे समट्ठे।

समिइढीए णं भंते! देवे समिइढीयस्स देवस्स मज्झंमज्झेणं वीतीवएज्जा?  
णो इणट्ठे समट्ठे। पमत्तं पुण वीतीवएज्जा।

से णं भंते! किं विमोहिता पभू, अविमोहिता पभू?

गोयमा! विमोहेता पभू, नो अविमोहेता पभू।

से भंते! किं पुट्ठिं विमोहेता पच्छा वीतीवएज्जा? पुट्ठिं वीतीवएत्ता पच्छा विमोहेज्जा?

गोयमा! पुट्ठिं विमोहेता पच्छा वीतीवएज्जा, णो पुट्ठिं वीतीवइत्ता पच्छा विमोहेज्जा।

महिइढीए णं भंते! देवे अप्पिइढीयस्स देवस्स मज्झंमज्झेणं वीतीवएज्जा?

हंता, वीतीवएज्जा।

से भंते! किं विमोहिता पभू, अविमोहिता पभू?

गोयमा! विमोहिता वि पभू, अविमोहिता वि पभू।

से भंते! किं पुट्ठिं विमोहेता पच्छा वीतीवइज्जा? पुट्ठिं वीतीवइत्ता पच्छा विमोहेज्जा?

गोयमा! पुट्ठिं वा विमोहिता पच्छा वीतीवएज्जा, पुट्ठिं वा वीतीवइत्ता पच्छा विमोहेज्जा।

अप्पिइढीए णं भंते! असुरकुमारे महिइढीयस्स असुरकुमारस्स मज्झंमज्झेणं वीतीवएज्जा?

णो इणट्ठे समट्ठे।

एवं असुरकुमारेण वि तिण्णि आलावगा भाणियत्त्वा जहा ओहिणं देवेणं भणिता।

एवं जाव थणियकुमारेणं।

वाणमंतर-जोतिसिय-वेमाणिएणं एवं चेव।  
अप्पिड्ढीए णं भंते! देवे महिड्ढीयाए देवीए मज्झंमज्झेणं वीतीवएज्जा?  
णो इणट्ठे समट्ठे।  
समिड्ढीए णं भंते! देवे समिड्ढीयाए देवीए मज्झंमज्झेणं०?  
एवं तहेव देवेण य देवीए य दंडओ भाणियच्चो जाव वेमाणियाए।  
अप्पिड्ढिया णं भंते! देवी महिड्ढीयस्स देवस्स मज्झंमज्झेणं०?  
एवं एसो वि तइओ दंडओ भाणियच्चो जाव महिड्ढिया वेमाणिणी अप्पिड्ढियस्स  
वेमाणियस्स मज्झंमज्झेणं वीतीवएज्जा? हंता, वीतीवएज्जा।  
अप्पिड्ढीया णं भंते! देवी महिड्ढीयाए देवीए मज्झंमज्झेणं वीतीवएज्जा?  
णो इणट्ठे समट्ठे।  
एवं समिड्ढिया देवी समिड्ढीयाए देवीए तहेव।  
महिड्ढीया देवी अप्पिड्ढीयाए देवीए तहेव।  
एवं एक्केक्के तिण्णि तिण्णि आलावगा भाणियच्चा जाव महिड्ढीया णं भंते ! वेमाणिणी  
अप्पिड्ढीयाए वेमाणिणीए मज्झंमज्झेणं वीतीवएज्जा ? हंता, वीतीवएज्जा। सा भंते! किं विमोहिता पभू ?  
तहेव जाव पुच्चिं वा वीइवइत्ता पच्छा विमोहेज्जा। एए चत्तारि दंडगा।

[४८३] आसस्स णं भंते! धावमाणस्स किं 'खु खु'त्ति करेइ? गोयमा! आसस्स णं  
धावमाणस्स हिययस्स य जगयस्स य अंतरा एत्थ णं कक्कडए नामं वाए समुट्ठइ, जे णं आसस्स  
धावमाणस्स 'खु खु'त्ति करेति।

[४८४] अह भंते! आसइस्सामो सइस्सामो चिट्ठिस्सामो निसिइस्सामो तुयट्ठिस्सामो,  
पण्णवणी णं एस भासा न एस भासा मोस, हंता गोयमा आसइस्साणो सइस्सामो चिट्ठिस्सामो  
निसिइस्सामो तुयट्ठिस्सामो-पण्णवणी णं एस भासा न एस भासा मोसा सेवं भंते सेवं भंते ति ।

[४८५] आमंतणि आणमणी जायणि तह पुच्छणी य पण्णवणी।  
पच्चक्खाणी भासा भासा इच्छाणुलोमा य ॥

[४८६] अणभिग्गहिया भासा भासा य अभिग्गहम्मि बोधच्चा।  
संसयकरणी भासा वोयड मच्चोयडा चेव ॥

पण्णवणी णं एस भासा, न एस भासा मोसा? हंता, गोयमा! आसइस्सामो० तं चेव जाव न  
एस भासा मोसा।

सेवं भंते! सेवं भंते! ति०।

**\*दसमे सए तइओ उद्देशो समतो\***

## ० चउत्थो उद्देशो ०

[४८७] तेणं कालेणं तेणं समएणं वाणियगामे नामं नगरे होत्था। वण्णओ। दूतिपलासए  
चेतिए। सामी समोसढे जाव परिसा पडिगया।

तेणं कालेणं तेणं समएणं समणस्स भगवतो महावीरस्स जेट्ठे अंतेवासी इंदभूती नामं

अणगारे जाव उड्ढंजाणू जाव विहरइ।

तेणं कालेणं तेणं समएणं समणस्स भगवतो महावीरस्स अंतेवासी सामहत्थी नामं अणगारे पगतिभद्दए जहा रोहे जाव उड्ढंजाणू जाव विहरति।

तए णं से सामहत्थी अणगारे जायसड्ढे जाव उट्ठाए उट्ठेति, उ० २ जेणेव भगवं गोयमे तेणेव उवाच्छति, ते० उ० २ भगवं गोयमं तिकखुत्तो जाव पज्जुवासमाणे एवं वदासी--

अत्थि णं भंते! चमरस्स असुरिदस्स असुरकुमाररण्णो तावतीसगा देवा? हंता, अत्थि।

से केणट्ठेणं भंते! एवं वुच्चति-चमरस्स असुरिदस्स असुरकुमाररण्णो तावतीसगा देवा, तावतीसगा देवा? एवं खलु सामहत्थी! तेणं कालेणं तेणं समएणं इहेव जंबुद्धीवे दीवे भारहे वासे कायंदी नामं नगरी होत्था। वण्णओ। तत्थ णं कायंदीए नयरीए तावतीसं सहाया गाहावती समणोवासगा परिवसंति अड्ढा जाव अपरिभूया अभिगयजीवाऽजीवा उवलद्धपुण्ण-पावा जाव विहरंति। तए णं ते तावतीसं सहाया गाहावती समणोवासया पुत्विं उग्गा उग्गविहारी संविग्गा संविग्गविहारी भवित्ता तओ पच्छा पासत्था पासत्थविहारी ओसन्ना ओसन्नविहारी कुसीला कुसीलविहारी अहाछंदा अहाछंदविहारी बहूइं वासाइं समणोवासगपरियागं पाउणंति, पा० २ अद्धमासियाए संलेहणाए अत्ताणं झूसंति, झू० २ तीसं भत्ताइं अणसणाए छेदंति, छे० २ तस्स ठाणस्स अणालोइयऽपडिक्कंता कालमासे कालं किच्चा चमरस्स असुरिदस्स असुरकुमाररण्णो तावतीसगदेवताए उववन्ना।

जप्पभित्तिं च णं भंते! ते कायंदगा तावतीसं सहाया गाहावती समणोवासगा चमरस्स असुरिदस्स असुरकुमाररण्णो तावतीसदेवताए उववन्ना तप्पभित्तिं च णं भंते एवं वुच्चति चमरस्स असुरिदस्स असुरकुमाररण्णो तावतीसगा देवा, तावतीसगा देवा?।

तए णं भगवं गोयमे सामहत्थिणा अणगारेणं एवं वुत्ते समाणे संकिते कंखिए वित्तिगिंछिए उट्ठाए उट्ठेइ, उ० २ सामहत्थिणा अणगारेणं सद्धिं जेणेव समणे भगवं महावीरे तेणेव उवागच्छइ, ते० उ० २ समणं भगवं महावीरं वंदइ नमंसइ, एवं वदासी-

अत्थि णं भंते! चमरस्स असुरिदस्स असुररण्णो तावतीसगा देवा, तावतीसगा देवा? हंता, अत्थि।

से केणट्ठेणं भंते! एवं वुच्चइ, एवं तं चेव सत्वं भाणियत्वं जाव तप्पभित्तिं च णं एवं वुच्चइ चमरस्स असुरिदस्स असुरकुमाररण्णो तावतीसगा देवा, तावतीसगा देवा? णो इणट्ठे समट्ठे, गोयमा! चमरस्स णं असुरिदस्स असुरकुमाररण्णो तावतीसगाणं देवाणं सासए नामधेज्जे पण्णत्ते, जं न कदायि नासी, न कदायि न भवति, जाव निच्चे अव्वोच्छित्तिनयट्ठताए। अन्ने चयंति, अन्ने उववज्जंति।

अत्थि णं भंते! बलिस्स वइरोयणिंदस्स वइरोयणरण्णो तावतीसगा देवा, तावतीसगा देवा? हंता, अत्थि।

से केणट्ठेणं भंते! एवं वुच्चति-बलिस्स वइरोयणिंदस्स जाव तावतीसगा देवा, तावतीसगा देवा? एवं खलु गोयमा! तेणं कालेणं तेणं समएणं इहेव जंबुद्धीवे दीवे भारहे वासे विब्भेले णामं सन्निवेसे होत्था। वण्णओ। तत्थ णं वेभेले सन्निवेसे जहा चमरस्स जाव उववन्ना। जप्पभित्तिं च णं भंते! ते विब्भेलगा तावतीसं सहाया गाहावती समणोवासगा बलिस्स वइरोयणिंदस्स वइरोयणरण्णो सेसं तं चेव जाव निच्चे अव्वोच्छित्तिनयट्ठयाए। अन्ने उववज्जंति।

अत्थि णं भंते धरणस्स नागकुमारिंदस्स नागकुमाररण्णो तावतीसगा देवा, तावतीसगा देवा? हंता, अत्थि।

से केणट्ठेणं जाव तावतीसगा देवा, तावतीसगा देवा? गोयमा! धरणस्स नागकुमारिंदस्स नागकुमाररण्णो तावतीसगाणं देवाणं सासए नामधेज्जे पण्णत्ते, जं न कदायि नासी, जाव अन्ने चयंति, अन्ने उववज्जंति।

एवं भूयाणंदस्स वि। एवं जाव महाघोसस्स।

अत्थि णं भंते! सक्कस्स देविंदस्स देवरण्णो० पुच्छा। हंता, अत्थि।

से केणट्ठेणं जाव तावतीसगा देवा, तावतीसगा देवा? एवं खलु गोयमा! तेणं कालेणं तेणं समएणं इहेव जंबुद्धीवे दीवे भारहे वासे वालाए नामं सन्निवेसे होत्था। वण्णओ। तत्थ णं वालाए सन्निवेसे तावतीसं सहाया गाहावती समणोवासगा जहा चमरस्स जाव विहरंति। तए णं ते तावतीसं सहाया गाहावती समणोवासगा पुच्चिं पि पच्छा वि उग्गा उग्गविहारी संविग्गा संविग्गविहारी बहूइं वासाइं समणोवासगपरियागं पाउणित्ता मासियाए संलेहणाए अत्ताणं झूसेंति, झू० २ सट्ठिं भताइं अणसणाए छेदेंति, छे०२ आलोइयपडिक्कंता समाहिपत्ता कालमासे कालं किच्चा जाव उववन्ना। जप्पभित्तिं च णं भंते! ते वालागा तावतीसं सहाया गाहावती समणोवासगा सेसं जहा चमरस्स जाव अन्ने उववज्जंति।

अत्थि णं भंते! ईसाणस्स०। एवं जहा सक्कस्स, नवरं चंपाए नगरीए जाव उववन्ना। जप्पभित्तिं च णं भंते! चंपिच्चा तावतीसं सहाया० सेसं तं चेव जाव अन्ने उववज्जंति।

अत्थि णं भंते! सणंकुमारस्स देविंदस्स देवरण्णो० पुच्छा। हंता, अत्थि।

से केणट्ठेणं०? जहा धरणस्स तहेव।

सेवं भंते! सेवं भंते! ति०।

### **\*दसमे सए चउत्थो उद्देशो समतो\***

### **० पंचमो उद्देशो ०**

[४८८] तेणं कालेणं तेणं समएणं रायगिहे नामं नगरे गुणसिलए चेइए जाव परिसा पडिगया।

तेणं कालेणं तेणं समएणं समणस्स भगवओ महावीरस्स बहवे अंतेवासी थेरा भगवंतो जाइसंपन्ना जहा अट्ठमे सए सत्तमुद्देशए जाव विहरंति।

तए णं ते थेरा भगवंतो जायसइढा जायसंसया जहा गोयमसामी जाव पज्जुवासमाणा एवं वदासी--

चमरस्स णं भंते! असुरिंदस्स असुरकुमाररण्णो कति अग्गमहिंसीओ पन्नत्ताओ? अज्जो! पंच अग्गमहिंसीओ पन्नत्ताओ, तं जहा--काली रायी रयणी विज्जू मेहा। तत्थ णं एगमेगाए देवीए अट्ठट्ठ देवीसहस्सा परिवारो पन्नत्तो। पभू णं ताओ एगमेगा देवी अन्नाइं अट्ठट्ठ देवीसहस्साइं परियारं विउव्वित्तए। एवामेव सपुव्वावरेणं चत्तालीसं देवीसहस्सा, से तं तुडिए।

पभू णं भंते! चमरे असुरिंदे असुरकुमारराया चमरचंचाए रायहाणीए सभाए सुहम्मए चमरंसि सीहासणंसि तुडिएणं सद्धिं दिव्वाइं भोगभोगाइं भुंजमाणे विहरित्तए? णो इणट्ठे समट्ठे।

से केणट्ठेणं भंते! एवं वुच्चइ-नो पभू चमरे असुरिदे चमरचंचाए रायहाणीए जाव विहरित्तए? "अज्जो! चमरस्स णं असुरिदस्स असुरकुमाररण्णो चमरचंचाए रायहाणीए सभाए सुहम्माए माणवए चेइयखंभे वइरामएसु गोलवट्ठसमुग्गएसु बहूओ जिणसकहाओ सन्निक्खिताओ चिट्ठंति, जाओ णं चमरस्स असुरिदस्स असुरकुमाररण्णो अन्नेसिं च बहूणं असुरकुमाराणं देवाण य देवीण य अच्चणिज्जाओ वंदणिज्जाओ नमंसणिज्जाओ पूयणिज्जाओ सक्कारणिज्जाओ सम्माणणिज्जाओ कल्लाणं मंगलं देवयं चेतियं पज्जुवासणिज्जाओ भवंति, तेसिं पणिहाए नो पभू; सेतेणट्ठेणं अज्जो! एवं वुच्चइ-नो पभू चमरे असुरिदे जाव राया चमरचंचाए जाव विहरित्तए।

पभू णं अज्जो! चमरे असुरिदे असुरकुमारराया चमरचंचाए रायहाणीए सभाए सुहम्माए चमरंसि सीहासणंसि चउसट्ठीए सामाणियसाहस्सीहिं तावतीसाए जाव अन्नेहि य बहूहिं असुरकुमारेहिं देवेहि य देवीहि य सद्धिं संपरिवुडे महयाऽहय जाव भुंजमाणे विहरित्तए, केवलं परियारिद्धीए; नो चेव णं मेहुणवत्तियं"।

**[४८९]** चमरस्स णं भंते! असुरिदस्स असुरकुमाररण्णो सोमस्स महारण्णो कति अग्गमहिसीओ पन्नताओ? अज्जो! चत्तारि अग्गमहिसीओ पन्नताओ, तं जहा-कणगा कणगलया चित्तगुता वसुंधरा। तत्थ णं एगमेगाए देवीए एगमेगं देविसहस्सं परियारो पन्नतो। पभू णं ताओ एगमेगा देवी अन्नं एगमेगं देविसहस्सं परिवारं विउत्त्वित्तए। एवामेव चत्तारि देविसहस्सा, से तं तुडिए।

पभू णं भंते! चमरस्स असुरिदस्स असुरकुमाररण्णो सोमे महाराया सोमाए रायहाणीए सभाए सुहम्माए सोमंसि सीहासणंसि तुडिएणं? अवसेसं जहा चमरस्स, नवरं परियारो जहा सूरियाभस्स, सेसं तं चेव जाव णो चेव णं मेहुणवत्तियं।

चमरस्स णं भंते! जाव रण्णो जमस्स महारण्णो कति अग्गमहिसीओ? एवं चेव, नवरं जमाए रायहाणीए सेसं जहा सोमस्स।

एवं वरुणस्स वि, नवरं वरुणाए रायहाणीए।

एवं वेसमणस्स वि, नवरं वेसमणाए रायहाणीए। सेसं तं चेव जाव णो चेव णं मेहुणवत्तियं।

बलिस्स णं भंते! वइरोयणिंदस्स० पुच्छ। अज्जो! पंच अग्गमहिसीओ पन्नताओ, तं जहा-सुंभा निसुंभा रंभा निरंभा मयणा। तत्थ णं एगमेगाए देवीए अट्ठट्ठ० सेसं जहा चमरस्स, नवरं बलि-चंचाए रायहाणीए परियारो जहा मोउद्देसए सेसं तं चेव, जाव मेहुणवत्तियं।

बलिस्स णं भंते! वइरोयणिंदस्स वइरोयणरण्णो सोमस्स महारण्णो कति अग्गमहिसीओ पन्नताओ? अज्जो! चत्तारि अग्गमहिसीओ पन्नताओ, तं जहा-मीणगा सुभद्दा विजया असणी। तत्थ णं एगमेगाए देवीए० सेसं जहा चमरसोमस्स, एवं जाव वेसमणस्स।

धरणस्स णं भंते! नागकुमारिंदस्स नागकुमाररण्णो कति अग्गमहिसीओ पन्नताओ? अज्जो! छ अग्गमहिसीओ पन्नताओ, तं जहा-अलामक्का सतेरा सोयामणी इंदा घणविज्जुया। तत्थ णं एगमेगाए देवीए छ च्छ देविसहस्सा परियारो पन्नतो। पभू णं ताओ एगमेगा देवी अन्नाइं छ च्छ देविसहस्साइं परियारं विउत्त्वित्तए। एवामेव सपुच्चावरेणं छतीसं देविसहस्सा, से तं तुडिए।

पभू णं भंते! धरणे०? सेसं तं चेव, नवरं धरणाए रायहाणीए धरणंसि सीहासणंसि सओ परियारो, सेसं तं चेव।

धरणस्स णं भंते! नागकुमारिंदस्स कालवालस्स लोगपालस्स महारण्णो कति अग्गमहिंसीओ पन्नताओ? अज्जो! चत्तारि अग्गमहिंसीओ पन्नताओ; तं जहा--असोगा विमला सुप्पभा सुदंसणा। तत्थ णं एगमेगाए० अवसेसं जहा चमरलोगपालाणं। एवं सेसाणं तिण्ह वि लोगपालाणं।

भूयाणंदस्स णं भंते!० पुच्छा। अज्जो! छ अग्गमहिंसीओ पन्नताओ, तं जहा--रूया रूयंसा सुरूया रूयगावती रूयकंता रूयप्पभा। तत्थ णं एगमेगाए देवीए० अवसेसं जहा धरणस्स। भूयाणंदस्स णं भंते! नागवित्तस्स०पुच्छा। अज्जो! चत्तारि अग्गमहिंसीओ पन्नताओ, तं जहा--सुणंदा सुभद्धा सुजाया सुमणा। तत्थ णं एगमेगाए देवीए० अवसेसं जहा चमरलोगपालाणं। एवं सेसाणं तिण्ह वि लोगपालाणं।

जे दाहिणिल्ला इंदा तेसिं जहा धरणस्स। लोगपालाणं पि तेसिं जहा धरणलोगपालाणं। उत्तरिल्लाणं इंदाणं जहा भूयाणंदस्स। लोगपालाणं वि तेसिं जहा भूयाणंदस्स लोगपालाणं। नवरं इंदाणं सव्वेसिं रायहाणीओ, सीहासणाणि य सरिसणामगाणि, परियारो जहा मोउद्देशए। लोगपालाणं सव्वेसिं रायहाणीओ सीहासणाणि य सरिसणामगाणि, परियारो जहा चमरलोगपालाणं।

कालस्स णं भंते! पिसायिंदस्स पिसायरण्णो कति अग्गमहिंसीओ पन्नताओ? अज्जो! चत्तारि अग्गमहिंसीओ पन्नताओ, तं जहा--कमला कमलप्पभा उप्पला सुदंसणा। तत्थ णं एगमेगाए देवीए एगमेगं देविसहस्सं, सेसं जहा चमरलोगपालाणं। परियारो तहेव, नवरं कालाए रायहाणीए कालंसि सीहासणंसि, सेसं तं चेव।

एवं महाकालस्स वि।

सुरूवस्स णं भंते! भूइंदस्स भूयरन्नो० पुच्छा। अज्जो! चत्तारि अग्गमहिंसीओ पन्नताओ, तं जहा--रूववती बहुरूवा सुरूवा सुभगा। तत्थ णं एगमेगाए० सेसं जहा कालस्स।

एवं पडिरूवगस्स वि।

पुण्णभद्धस्स णं भंते! जक्खिंदस्स० पुच्छा। अज्जो! चत्तारि अग्गमहिंसीओ पन्नताओ, तं जहा--पुण्णा बहुपुत्तिया उत्तमा तारया। तत्थ णं एगमेगाए० सेसं जहा कालस्स०।

एवं माणिभद्धस्स वि।

भीमस्स णं भंते! रक्खसिंदस्स० पुच्छा। अज्जो! चत्तारि अग्गमहिंसीओ पन्नताओ, तं जहा--पउमा पउमावती कणगा रयणप्पभा। तत्थ णं एगमेगा० सेसं जहा कालस्स।

एवं महाभीमस्स वि।

किन्नरस्स णं भंते!० पुच्छा। अज्जो! चत्तारि अग्गमहिंसीओ पन्नताओ, तं जहा--वडेंसा केतुमती रतिसेणा रतिप्पिया। तत्थ णं० सेसं तं चेव।

एवं किंपुरिसस्स वि।

सप्पुरिसस्स णं० पुच्छा। अज्जो! चत्तारि अग्गमहिंसीओ पन्नताओ, तं जहा--रोहिणी नवमिया हिरी पुप्फवती। तत्थ णं एगमेगा०, सेसं तं चेव।

एवं महापुरिसस्स वि।

अतिकायस्स णं भंते!० पुच्छा। अज्जो! चत्तारि अग्गमहिंसीओ पन्नताओ, तं जहा--भुयगा भुयगवती महाकच्छा फुडा। तत्थ णं०, सेसं तं चेव।

एवं महाकायस्स वि।

गीतरतिस्स णं भंते!० पुच्छा। अज्जो! चत्तारि अग्गमहिंसीओ पन्नताओ, तं जहा--सुघोसा विमला सुस्सरा सरस्सती। तत्थ णं०, सेसं तं चेव।

एवं गीयजसस्स वि। सव्वेसिं एतेसिं जहा कालस्स, नवरं सरिसनामियाओ राय हाणीओ सीहासणाणि य। सेसं तं चेव।

चंदस्स णं भंते! जोतिसिंदस्स जोतिसरण्णो० पुच्छा। अज्जो! चत्तारि, अग्गमहिंसीओ पन्नताओ, तं जहा--चंदप्पभा दोसिणाभा अच्चिमाली पभंकरा। एवं जहा जीवाभिगमे जोतिसियउद्देशए तहेव।

सूरस्स वि सूरप्पभा आयवाभा अच्चिमाली पभंकरा। सेसं तं चेव जाव नो चेव णं मेहुणवत्तियं।

इंगालस्स णं भंते! महग्गहस्स कति अग्ग० पुच्छा। अज्जो! चत्तारि अग्गमहिंसीओ पन्नताओ, तं जहा--विजया वेजयंती जयंती अपराजिया। तत्थ णं एगमेगाए देवीए०, सेसं जहा चंदस्स। नवरं इंगालवडैसए विमाणे इंगालगंसि सीहासणंसि। सेसं तं चेव।

एवं वियालगस्स वि। एवं अट्ठासीतीए वि महागहाणं भाणियव्वं जाव भावकेउस्स। नवरं वडैसगा सीहासणाणि य सरिनामगाणि। सेसं तं चेव।

सक्कस्स णं भंते! देविंदस्स देवरण्णो० पुच्छा। अज्जो! अट्ठ अग्गमहिंसीओ पन्नताओ, तं जहा--पठ्ठा सिवा सुयी अंजू अमला अच्छरा नवमिया रोहिणी। तत्थ णं एगमेगाए देवीए सोलस सोलस देविसहस्सा परियारो पन्नतो। पभू णं ताओ एगमेगा देवी अन्नाइं सोलस सोलस देविसहस्सा परियारं विउच्चित्तए। एवामेव सपुच्चावरेणं अट्ठावीसुतत्रं देविसयसहस्सं, से तं तुडिए।

पभू णं भंते! सक्के देविंदे देवराया सोहम्मं कप्पे सोहम्मवडैसए विमाणे सभाए सुहम्मए सक्कंसि सीहासणंसि तुडिएणं सद्धिं० सेसं जहा चमरस्स । नवरं परियारो जहा मोउद्देशए।

सक्कस्स णं देविंदस्स देवरण्णो सोमस्स महारण्णो कति अग्गमहिंसीओ० पुच्छा। अज्जो! चत्तारि अग्गमहिंसीओ पन्नताओ, तं जहा--रोहिणी मदणा चित्ता सोमा। तत्थ णं एगमेगा०, सेसं जहा चमरलोगपालाणं। नवरं सयंपभे विमाणे सभाए सुहम्मए सोमंसि सीहासणंसि, सेसं तं चेव। एवं जाव वेसमणस्स, नवरं विमाणाइं जहा ततियसए।

ईसाणस्स णं भंते!० पुच्छा। अज्जो! अट्ठ अग्गमहिंसीओ पन्नताओ, तं जहा-कण्हा कण्हराई रामा रामरक्खिया वसू वसुगुता वसुमिता वसुंधरा। तत्थ णं एगमेगाए०, सेसं जहा सक्कस्स।

ईसाणस्स णं भंते! देविंदस्स सोमस्स महारण्णो कति० पुच्छा। अज्जो! चत्तारि अग्गमहिंसीओ पन्नताओ, तं जहा-पुढवी राती रयणी विज्जू। तत्थ णं०, सेसं जहा सक्कस्स लोगपालाणं। एवं जाव वरुणस्स, नवरं विमाणा जहा चउत्थसए । सेसं तं चेव जाव नो चेव णं मेहुणवत्तियं।

सेवं भंते! सेवं भंते! ति जाव विहरइ।

**\*दसमे सए पंचमो उद्देशो समतो\***

**० छट्ठो उद्देशो ०**

[४९०] कहि णं भंते! सक्कस्स देविंदस्स देवरण्णो सभा सुहम्म पन्नता? गोयमा! जंबुद्धीवे

दीवे मंदरस्स पव्वयस्स दाहिणेणं इमीसे रयणप्पभाए एवं जहा रायप्पसेणइज्जे जाव पंच वडैसगा पन्नता, तं जहा--असोगवडैसए जाव मज्झो सोहम्मवडैसए। से णं सोहम्मवडैसए महाविमाणे अद्धतेरस जोयणसयसहस्साइं आयाम-विक्खंभेणं, .....

[४९१] एवं जह सूरियाभे तहेव माणं तहेव उववातो।  
सक्कस्स य अभिसेओ तहेव जह सूरियाभस्स ॥

[४९२] अलंकार अच्चणिया तहेव जाव आयरक्ख ति, दो सागरोवमाइं ठिती।  
सक्के णं भंते! देविंदे देवराया केमहिड्डीए जाव केमहासोक्खे? गोयमा! महिड्डीए जाव महासोक्खे, से णं तत्थ बतीसाए विमाणावाससयसहस्साणं जाव विहरति, एमहिड्डीए जाव एमहासोक्खे सक्के देविंदे देवराया।

सेवं भंते! सेवं भंते! ति०।

**\*दसमे सए छट्ठो उद्देशो समतो\***

**० उद्देशगा-:/७-३४:- ०**

[४९३] कहिं णं भंते! उत्तरिल्लाणं एगोरुयमणुस्साणं एगोरुयदीवे नामं दीवे पन्नते? एवं जहा जीवाभिगमे तहेव निरवसेसं जाव सुद्धदंतदीवो ति। एए अट्ठावीसं उद्देशगा भाणियच्चा।  
सेवं भंते! सेवं भंते! ति जाव विहरति।

**\*दसमे सए -७-३४- उद्देशो समतो\***

**०-दसमं सयं समतं-०**

० मुनि दीपरत्तसागरेण संशोधितः सम्पादितश्च दसमं सतं समतं ०

**[ ] एक्कारसं सयं [ ]**

[४९४] उप्पल सालु पलासे कुंभी नालीय पउम कण्णीय ।  
नलिण सिव लोग कालास्सलभिय दस दो य एक्कारे ॥

**० पढमो उद्देशओ ०**

[४९५] उववाओ परिमाणं अवहारुच्चत बंध वेदे य।  
उदए उदीरणाए लेसा दिट्ठी य नाणे य ॥

[४९६] जोगुवओगे वण्ण-रसमाइ ऊसासगे य आहारे ।  
विरई किरिया बंधे सण्ण कसायित्थि बंधे य ॥

[४९७] सण्णिंदिय अणुबंधे संवेहास्सहार ठिइ समुग्घाए ।  
चयणं मूलादीसु य उववाओ सव्वजीवाणं ॥

[४९८] तेणं कालेणं तेणं समएणं रायगिहे जाव पज्जुवासमाणे एवं वदासी--  
उप्पले णं भंते! एगपत्तए किं एगजीवे अणेगजीवे? गोयमा! एगजीवे, नो अणेगजीवे। तेण परं जे अन्ने जीवा उववज्जंति ते णं णो एगजीवा, अणेगजीवा।

ते णं भंते! जीवा कतोहितो उववज्जंति? किं नेरइएहितो उववज्जंति, तिरिक्खजोणिएहितो उववज्जंति, मणुस्सेहितो उववज्जंति, देवेहितो उववज्जंति ? गोयमा ! नो नेरतिएहितो उववज्जंति, तिरिक्ख-

जोणिएहिंतो वि उववज्जंति, मणुस्सेहिंतो वि उववज्जंति, देवेहिंतो वि उववज्जंति। एवं उववाओ भाणियच्चो जहा वक्कंतीए वणस्सतिकाइयाणं जाव ईसाणो ति।

ते णं भंते! जीवा एगसमएणं केवतिया उववज्जंति? गोयमा! जहन्नेणं एक्को वा दो वा तिण्णि वा, उक्कोसेणं संखेज्जा वा असंखेज्जा वा उववज्जंति।

ते णं भंते! जीवा समए समए अवहीरमाणा अवहीरमाणा केवतिकालेणं अवहीरंति? गोयमा! ते णं असंखेज्जा समए समए अवहीरमाणा अवहीरमाणा असंखेज्जाहिं ओसप्पिणि-उस्सप्पिणीहिं अवहीरंति, नो चेव णं अवहिया सिया।

तेसि णं भंते! जीवाणं केमहालिया सरीरोगाहणा पन्नता? गोयमा! जहन्नेणं अंगुलस्स असंखेज्जइभागं, उक्कोसेणं सातिरेणं जोयणसहस्सं।

ते णं भंते! जीवा णाणावरणिज्जस्स कम्मस्स किं बंधगा, अबंधगा? गोयमा! नो अबंधगा, बंधए वा बंधगा वा। एवं जाव अंतराइयस्स। नवरं आउयस्स पुच्छा, गोयमा!

बंधए वा, अबंधए वा, बंधगा वा, अबंधगा वा, अहवा बंधए य अबंधए य, अहवा बंधए य अबंधगा य, अहवा बंधगा य अबंधगे य, अहवा बंधगा य अबंधगा य, एते अट्ठ भंगा।

ते णं भंते! जीवा णाणावरणिज्जस्स कम्मस्स किं वेदगा, अवेदगा? गोयमा! नो अवेदगा, वेदए वा वेदगा वा। एवं जाव अंतराइयस्स।

ते णं भंते! जीवा किं सातावेदगा, असातावेदगा? गोयमा! सातावेदए वा, असातावेयए वा, अट्ठ भंगा।

ते णं भंते! जीवा नाणावरणिज्जस्स कम्मस्स किं उदई, अणुदई? गोयमा! नो अणुदई, उदई वा उदइणो वा। एवं जाव अंतराइयस्स।

ते णं भंते! जीवा नाणावरणिज्जस्स कम्मस्स किं उदीरगा, अणुदीरगा? गोयमा! नो अणुदीरगा, उदीरए वा उदीरगा वा। एवं जाव अंतराइयस्स। नवरं वेदणिज्जाउएसु अट्ठ भंगा।

ते णं भंते! जीवा किं कणहलेस्सा नीललेस्सा काउलेस्सा तेउलेस्सा? गोयमा! कणहलेस्से वा जाव तेउलेस्से वा, कणहलेस्सा वा नीललेस्सा वा काउलेस्सा वा तेउलेस्सा वा, अहवा कणहलेस्से य नीललेस्से य, एवं एए दुयासंजोग-तियासंजोग-चउक्कसंजोगेण य असीतिं भंगा भवंति।

ते णं भंते! जीवा किं सम्मद्धिट्ठी, मिच्छादिट्ठी, सम्मामिच्छादिट्ठी? गोयमा! नो सम्मद्धिट्ठी, नो सम्मामिच्छद्धिट्ठी, मिच्छादिट्ठी वा मिच्छादिट्ठिणो वा।

ते णं भंते! जीवा किं नाणी, अन्नाणी? गोयमा? नो नाणी, अन्नाणी वा अन्नाणिणो वा।

ते णं भंते! जीवा किं मणजोगी, वइजोगी, कायजोगी? गोयमा! नो मणजोगी, णो वइजोगी, कायजोगी वा कायजोगिणो वा।

ते णं भंते! जीवा किं सागारोवउत्ता, अणागारोवउत्ता? गोयमा! सागारोवउत्ते वा अणागारोवउत्ते वा, अट्ठ भंगा।

तेसि णं भंते! जीवाणं सरीरगा कतिवण्णा कतिरसा कतिगंधा कतिफासा पन्नता? गोयमा! पंचवण्णा, पंचरसा, दुगंधा, अट्ठफासा पन्नता। ते पुण अप्पणा अवण्णा अगंधा अरसा अफासा पन्नता।

ते णं भंते! जीवा किं उस्सासा, निस्सासा, नोउस्सासनिस्सासा? गोयमा! उस्सासए वा,

निस्सासए वा, नोउस्सासनिस्सासए वा, उस्सासगा वा, निस्सासगा वा, नोउस्सासनिस्सासगा वा, अहवा उस्सासए य निस्सासए य ४ , अहवा उस्सासए य नोउस्सासनिस्सासए य ४, अहवा निस्सासए य नोउस्सासनीसासए य ४, अहवा उस्सासए य नीसासए य नोउस्सासनिस्सासए य-अट्ठ भंगा, एए छव्वीसं भंगा भवंति।

ते णं भंते! जीवा किं आहारगा, अणाहारगा?

गोयमा! आहारए वा अणाहारए वा, एवं अट्ठ भंगा।

ते णं भंते! जीवा किं विरया, अविरया, विरयाविरया?

गोयमा! नो विरया, नो विरयाविरया, अविरए वा अविरता वा।

ते णं भंते! जीवा किं सकिरिया, अकिरिया? गोयमा! नो अकिरिया, सकिरिए वा सकिरिया वा।

ते णं भंते जीवा किं सत्तविहबंधगा, अट्ठविहबंधगा?

गोयमा! सत्तविहबंधए वा अट्ठविहबंधए वा, अट्ठ भंगा।

ते णं भंते! जीवा किं आहारसण्णोवउत्ता, भयसण्णोवउत्ता, मेहुणसन्नोवउत्ता, परिग्गहसन्नोवउत्ता? गोयमा! आहारसण्णोवउत्ता वा, असीती भंगा।

ते णं भंते! जीवा किं कोहकसायी, माणकसायी, मायाकसायी, लोभकसायी? असीती भंगा।

ते णं भंते! जीवा किं इत्थिवेदगा, पुरिसवेदगा, नपुंसगवेदगा?

गोयमा! नो इत्थिवेदगा, नो पुरिसवेदगा, नपुंसगवेदए वा नपुंसगवेदगा वा।

ते णं भंते! जीवा किं इत्थिवेदबंधगा, पुरिसवेदबंधगा, नपुंसगवेदबंधगा? गोयमा! इत्थिवेद-बंधए वा पुरिसवेदबंधए वा नपुंसगवेदबंधए वा, छव्वीसं भंगा।

ते णं भंते! जीवा किं सण्णी, असण्णी? गोयमा! नो सण्णी, असण्णी वा असण्णिणो वा।

ते णं भंते! जीवा किं सइंदिया, अणिंदिया? गोयमा! नो अणिंदिया, सइंदिए वा सइंदिया वा।

से णं भंते! 'उप्पलजीवे'ति कालओ केवचिरं होति? गोयमा! जहन्नेणं अंतोमुहुत्तं, उक्कोसेणं असंखेज्जं कालं।

से णं भंते! उप्पलजीवे 'पुढविजीवे' पुणरवि 'उप्पलजीवे'ति केवतियं कालं से हवेज्जा? केवतियं कालं गतिरागतिं करेज्जा? गोयमा! भवादेसेणं जहन्नेणं दो भवग्गहणाइं, उक्कोसेणं असंखेज्जाइं भवग्गहणाइं। कालादेसेणं जहन्नेणं दो अंतोमुहुत्ता, उक्कोसेणं असंखेज्जं कालं। एवतियं कालं से हवेज्जा, एवतियं कालं गतिरागतिं करेज्जा।

से णं भंते! उप्पलजीवे आउजीवे० एवं चेव।

एवं जहा पुढविजीवे भणिए तहा जाव वाउजीवे भाणियव्वे।

से णं भंते! उप्पलजीवे से वणस्सइजीवे, से वणस्सइजीवे पुणरवि उप्पलजीवे ति

केवतियं कालं से हवेज्जा, केवतियं कालं गतिरागतिं करेज्जा? गोयमा! भवाएसेणं जहन्नेणं दो भवग्गहणाइं, उक्कोसेणं अणंताइं भवग्गहणाइं। कालाएसेणं जहन्नेणं दो अंतोमुहुत्ता, उक्कोसेणं अणंतं कालं-तरुकालो, एवतियं कालं से हवेज्जा, एवइयं कालं गइरागइं करेज्जा।

से णं भंते! उप्पलजीवे बेइंदियजीवे, बेइंदियजीवे पुणरवि उप्पलजीवे ति केवतियं कालं से

हवेज्जा? केवतियं कालं गतिरागतिं करेज्जा? गोयमा! भवादेसेणं जहन्नेणं दो भवग्गहणाइं, उक्कोसेणं संखेज्जाइं भवग्गहणाइं। कालादेसेणं जहन्नेणं दो अंतोमुहुत्ता, उक्कोसेणं संखेज्जं कालं। एवतियं कालं से हवेज्जा, एवतियं कालं गतिरागतिं करेज्जा।

एवं तेइंदियजीवे, एवं चउरिंदियजीवे वि।

से णं भंते! उप्पलजीवे पंचेंदियतिरिक्खजोणियजीवे, पंचिंदियतिरिक्खजोणियजीवे पुणरवि उप्पलजीवे ति० पुच्छ। गोयमा! भवादेसेणं जहन्नेणं दो भवग्गहणाइं, उक्कोसेणं अट्ठ भवग्गहणाइं। कालाएसेणं जहन्नेणं दो अंतोमुहुत्ता, उक्कोसेणं पुव्वकोडिपुहत्तं। एवतियं कालं से हवेज्जा, एवतियं कालं गतिरागतिं करेज्जा।

एवं मणुस्सेण वि समं जाव एवतियं कालं गतिरागतिं करेज्जा।

ते णं भंते! जीवा किमाहारमाहारंति? गोयमा! दव्वओ अणंतपदेसियाइं दव्वाइं०, एवं जहा आहारुद्देसए वणस्सतिकाइयाणं आहारो तहेव जाव सव्वप्पणयाए आहारमाहारंति, नवरं नियमं छद्धिसिं, सेसं तं चेव।

तेसि णं भंते! जीवाणं केवतियं कालं ठिती पन्नता? गोयमा! जहन्नेणं अंतोमुहुत्तं, उक्कोसेणं दस वाससहस्साइं।

तेसि णं भंते! जीवाणं कति समुग्घाता पन्नता? गोयमा! तओ समुग्घाया पन्नता, तं जहा- वेदणासमुग्घाए कसायसमुग्घाए मारणंतियसमुग्घाए।

ते णं भंते! जीवा मारणंतियसमुग्घाएणं किं समोहया मरंति, असमोहया मरंति?

गोयमा! समोहया वि मरंति, असमोहया वि मरंति।

ते णं भंते! जीवा अणंतरं उव्वट्ठिता कहिं गच्छंति ?, कहिं उव्वज्जंति?, किं नेरइएसु उव्वज्जंति, तिरिक्खजोणिएसु उव्वज्जंति?० एवं जहा वक्कंतीए उव्वट्ठिणाए वणस्सइकाइयाणं तहा भाणियव्वं।

अह भंते! सव्वपाणा सव्वभूया सव्वजीवा सव्वसत्ता उप्पलमूलताए उप्पलकंदताए उप्पलनालताए उप्पलपत्तताए उप्पलकेसरताए उप्पलकणियताए उप्पलथिभगताए उव्वन्नपुव्वा? हंता, गोयमा! असतिं अदुवा अणंतखुत्तो। सेवं भंते! सेवं भंते! ति०।

**\*एक्कारसमे सए पढमो उद्देशो समतो\***

## ० बीओ उद्देशो ०

[४९९] सालुए णं भंते! एगपत्तए किं एगजीवे, अणेगजीवे? गोयमा! एगजीवे, एवं उप्पलुद्देसगवत्तव्वया अपरिसेसा भाणियव्वा जाव अणंतखुत्तो। नवरं सरीरोगाहणा जहन्नेणं अंगु लस्स असंखेज्जइभागं, उक्कोसेणं धणुपुहत्तं। सेसं तं चेव। सेवं भंते! सेवं भंते! ति०।

**\*एक्कारसमे सए बीइओ उद्देशो समतो\***

## ० तइओ उद्देशो ०

[५००] पलासे णं भंते! एगपत्तए किं एगजीवे, अणेगजीवे? एवं उप्पलुद्देसगवत्तव्वया

अपरिसेसा भाणितव्वा। नवरं सरीरोगाहणा जहन्नेणं अंगुलस्स असंखेज्जतिभागं, उक्कोसेणं गाउयपुहत्तं। देवा एएसु न उववज्जंति। लेसासु--ते णं भंते! जीवा किं कण्हलेस्सा नीललेस्सा काउलेस्सा? गोयमा! कण्हलेस्सा वा, नीललेस्सा वा, काउलेस्सा वा, छव्वीसं भंगा। सेसं तं चेव।

सेवं भंते! सेवं भंते! ति०।

**\*एक्कारसमे सए तइओ उद्देशो समतो\***

**० चउत्थो उद्देशो ०**

[५०१] कुंभिए णं भंते! एगपत्तए किं एगजीवे, अणेगजीवे? एवं जहा पलासुद्देसए तहा भाणियव्वे, नवरं ठिती जहन्नेणं अंतोमुहुत्तं, उक्कोसेणं वासपुहत्तं। सेसं तं चेव।

सेवं भंते! सेवं भंते! ति०।

**\*एक्कारसमे सए चउत्थो उद्देशो समतो\***

**० पंचमो उद्देशो ०**

[५०२] नालिए णं भंते! एगपत्तए किं एगजीवे, अणेगजीवे? एवं कुंभिउद्देसगवत्तव्वया निरवसेसा भाणियव्वा।

सेवं भंते! सेवं भंते! ति०।

**\*एक्कारसमे सए पंचमो उद्देशो समतो\***

**० छट्ठो उद्देशो ०**

[५०३] पउमे णं भंते ! एगपत्तए किं एगजीवे, अणेगजीवे ? एवं उप्पलुद्देसग-वत्तव्वया निरवसेसा भाणियव्वा।

सेवं भंते! सेवं भंते! ति०।

**\*एक्कारसमे सए छट्ठो उद्देशो समतो\***

**० सत्तमो उद्देशो ०**

[५०४] कण्णिए णं भंते! एगपत्तए किं एगजीवे, अणेगजीवे? एवं चेव निरवसेसं भाणियव्वं।

सेवं भंते! सेवं भंते! ति०।

**\*एक्कारसमे सए सत्तमो उद्देशो समतो\***

**० अट्ठमो उद्देशो ०**

[५०५] नलिणे णं भंते! एगपत्तए किं एगजीवे, अणेगजीवे? एवं चेव निरवसेसं जाव अणंतखुत्तो।

सेवं भंते! सेवं भंते! ति०।

**\*एक्कारसमे सए अट्ठमो उद्देशो समतो\***

**० नवमो उद्देशो ०**

[५०६]तेणं कालेणं तेणं समएणं हत्थिणापुरे नामं नगरे होत्था। वण्णओ।

तस्स णं हत्थिणापुरस्स नगरस्स बहिया उत्तरपुरत्थिमे दिसीभागे एत्थ णं सहसंबवणे नामं उज्जाणे होत्था। सव्वोउयपुप्फफलसमिद्धे रम्मं पंदणवणसन्निगासे सुहसीयलच्छाए मणोरमे सादुफले

अकंए पासादीए जाव पडिरूवे।

तत्थ णं हत्थिणापुरे नगरे सिवे नामं राया होत्था, महताहिमवंतं०। वण्णओ।

तस्स णं सिवस्स रण्णो धारिणी नामं देवी होत्था, सुकुमालपाणिपाया०। वण्णओ।

तस्स णं सिवस्स रण्णो पुत्ते धारिणीए अत्तए सिवभद्दए नामं कुमारे होत्था, सुकुमाल० जहा सूरियकंते जाव पच्चुवेक्खमाणे पच्चुवेक्खमाणे विहरति।

तए णं तस्स सिवस्स रण्णो अन्नया कदायि पुच्चरत्तावरत्तकालसमयंसि रज्जधुरं चिंतेमाणस्स अयमेयारूवे अज्झत्थिए जाव समुप्पज्जित्था-"अत्थि ता मे पुरा पोराणाणं जहा तामलिस्स जाव पुत्तेहिं वड्ढामि, पसूहिं वड्ढामि, रज्जेणं वड्ढामि, एवं रट्ठेणं बलेणं वाहणेणं कोसेणं कोट्ठागारेणं पुरेणं अंतेउरेणं वड्ढामि, विपुलधण-कणग-रयण० जाव संतसारसावदेज्जेणं अतीव अतीव अभिवड्ढामि, तं किं णं अहं पुरा पोराणाणं जाव एगंतसोक्खयं उवेहमाणे विहरामि? तं जाव ताव अहं हिरण्णेणं वड्ढामि तं चेव जाव अभिवड्ढामि, जावं च मे सामंतरायाणो वि वसे वट्ठंति, तावता मे सेयं कल्लं पाउप्पभायाए जाव जलंते सुबहुं लोहीलोहकडाहकडुच्छुयं तंबियं तावसभंडयं घडावेत्ता, सिवभद्दं कुमारं रज्जे ठावित्ता, तं सुबहुं लोहीलोहकडाहकडुच्छुयं तंबियं तावसभंडयं गहाय जे इमे गंगाकूले वाणपत्था तावसा भवंति, तं जहा-- होत्तिया पोत्तिया जहा उववातिए जाव कट्ठसोल्लियं पिव अप्पाणं करेमाणा विहरंति। तत्थ णं जे ते दिसापोक्खिय तावसा तेसिं अंतियं मुंडे भविता दिसापोक्खिततावसत्ताए पच्चइत्तए। पच्चइत्ते वि य णं समाणे अयमेयारूवं अभिग्गहं अभिगिण्हिस्सामि-कप्पति मे जावज्जीवाए छट्ठंछट्ठेणं अणिक्खित्तेणं दिसाचक्कवालएणं तवोकम्मणं उड्ढं बाहाओ पगिज्झिय पगिज्झिय जाव विहरित्तए" ति कट्ठु; एवं संपेहेइ, संपेहेत्ता कल्लं जाव जलंते सुबहुं लोहीलोह जाव घडाविता कोडुंबियपुरिसे सद्दावेइ, को० स० २ एवं वदासी-- खिप्पामेव भो देवाणुप्पिया! हत्थिणापुरं नगरं सच्चिंतरबाहिरियं आसिय जाव तमाणतियं पच्चप्पिणंति।

तए णं से सिवे राया दोच्चं पि कोडुंबियपुरिसे सद्दावेत्ति, स० २ एवं वदासी--खिप्पामेव भो देवाणुप्पिया! सिवभद्दस्स कुमारस्स महत्थं महग्घं महरिहं विउलं रायाभिसेयं उवट्ठवेह।

तए णं ते कोडुंबियपुरिसा तहेव उवट्ठवेत्ति।

तए णं से सिवे राया अणेगगणनायग-दंडनायग जाव संधिपाल सद्धिं संपरिवुडे सिवभद्दं कुमारं सीहासणवरंसि पुरत्थाभिमुहं निसीयावेत्ति, नि०२ अट्ठसत्तेणं सोवण्णियाणं कलसाणं जाव अट्ठसत्तेणं भोमेज्जाणं कलसाणं सच्चिइदीए जाव रवेणं महया महया रायाभिसेएणं अभिसिंचति, म० अ० २ पम्हलसुकुमालाए सुरभीए गंधकासाईए गाताइं लूहेत्ति, पम्ह० लू०२ सरसेणं गोसीसेणं एवं जहेव जमालिस्स अलंकारो तहेव जाव कप्परुक्खगं पिव अलंकियविभूसियं करेत्ति, क० २ करयल जाव कट्ठु सिवभद्दं कुमारं जएणं विजएणं वद्धावेत्ति, जए० व० २ ताहिं इट्ठाहिं कंताहिं पियाहिं जहा उववातिए कोणियस्स जाव परमायुं पालयाहि इट्ठजणसंपरिवुडे हत्थिणापुरस्स नगरस्स अन्नेसिं च बहूणं गामागर-नगर जाव विहराहि, ति कट्ठु जयजयसद्धं पंजति।

तए णं से सिवभद्दे कुमारे राया जाते महया हिमवंतं० वण्णओ जाव विहरति।

तए णं से सिवे राया अन्नया कयाइ सोभणंसि तिहि-करण-णक्खत्त-दिवस-मुहुत्तंसि विपुलं असण-पाण-खाइम-साइमं उवक्खडावेत्ति, वि० उ० २ मित्त-णाति-नियग जाव परिजणं रायाणो य खतिया आमंतेत्ति, आ० २ ततो पच्छा पहाते जाव सरीरे भोयणवेलाए भोयणमंडवंसि सुहासणवरगए तेणं मित्तनाति-

नियग-सयण जाव परिजणेणं राईहि य खतिएहि य सद्धिं विपुलं असण-पाण-खाइम-साइमं एवं जहा तामली जाव सक्कारेति सम्माणेति, सक्कारे० स० २ तं मित्त-नाति जाव परिजणं रायाणो य खतिए य सिवभद्धं च रायाणं आपुच्छति, आपुच्छिता सुबहुं लोहीलोहकडाहकडुच्छु जाव भंडगं गहाय जे इमे गंगाकूलगा वाणपत्था तावसा भवंति तं चेव जाव तेसिं अंतियं मुंडे भविता दिसापोक्खियतावसताए पव्वइए। पव्वइए वि य णं समाणे अयमेयारूवं अभिग्गहं अभिगिण्हति-कप्पति मे जावज्जीवाए छट्ठं० तं चेव जाव अभिग्गहं अभिगिण्हइ, अय० अभि० २ पढमं छट्ठक्खमणं उवसंपज्जिताणं विहरइ।

तए णं से सिवे रायरिसी पढमछट्ठक्खमणपारणगंसि आयावणभूमीओ पच्चोरुहति, आया० प० २ वागलवत्थनियत्थे जेणेव सए उडए तेणेव उवागच्छति, ते० उ०२ किट्ठिणसंकाइयगं गिण्हइ, कि० गि० २ पुरत्थिमं दिसं पोक्खेइ। पुरत्थिमाए दिसाए सोमे महाराया पत्थाणे पत्थियं अभिरक्खउ सिवं रायरिसिं, अभिरक्खउ सिवं रायरिसिं, जाणि य तत्थ कंदाणि य मूलाणि य तयाणि य पत्ताणि य पुप्फाणि य फलाणि य बीयाणि य हरियाणि य ताणि अणुजाणत्तुत्ति कट्ठु पुरत्थिमं दिसं पासति, पा० २ जाणि य तत्थ कंदाणि य जाव हरियाणि य ताइं गेण्हति, गे०२ किट्ठिणसंकाइयगं भरेति, किट्ठि० भ०२ दब्भे य कुसे य समिहाओ य पत्तामोडं च गेण्हइ, गे०२ जेणेव सए उडए तेणेव उवागच्छइ, ते० उवा० २ किट्ठिणसंकाइयगं ठवेइ, किट्ठि० ठवेता वेदिं वड्ढेति, वेदिं व०२ उवलेवणसम्मज्जणं करेति, उ० क०२ दब्भ-कलसाहत्थगए जेणेव गंगा महानदी तेणेव उवागच्छइ, उवा०२ गंगामहानदिं ओगाहइ, गंगा० ओ०२ जलमज्जणं करेति, जल० क०२ जलकीडं करेति, जल० क० २ जलाभिसेयं करेति, ज० क० २ आयंते चोक्खे परमसूइभूते देवत-पितिकयकज्जे दब्भसगब्भकलसाहत्थगते गंगाओ महानदीओ पच्चुत्तरति, गंगा० प० २ जेणेव सए उडए तेणेव उवागच्छति, उवा० २ दब्भेहि य कुसेहि य वालुयाए य वेदिं रएति, वेदिं र० २ सरएणं अरणिं महेति, स० म० २ अग्गिं पाडेति, अग्गिं पा० २ अग्गिं संधुक्केति, अ० सं० २ समिहाकट्ठाइं पक्खिवइ, स० प०२ अग्गिं उज्जालेति, अग्गिस्स दाहिणे पासे, सत्तंगाइं समादहे। तं जहा-

[५०७] सकहं वक्कलं ठाणं सेज्जाभंडं कमंडलुं ।

दंडदारुं तहसप्पाणं अहेताइं समादहे ॥

महुणा य घएण य तंदुलेहि य अग्गिं हुणइ, अ० हु० २ चरुं साहेइ, चरुं सा० २ बलिवइस्सदेवं करेइ, बलि० क० २ अतिहिपूयं करेति, अ० क० २ ततो पच्छा अप्पणा आहारमाहारेति।

[५०८] तए णं से सिवे रायरिसी दोच्चं छट्ठक्खमणं उवसंपज्जिताणं विहरइ। तए णं से सिवे रायरिसी दोच्चे छट्ठक्खमणपारणगंसि आयावणभूमीतो पच्चोरुहइ, आ० प० २ वागल० एवं जहा-पढमपारणगं, नवरं दाहिणं दिसं पोक्खेति। दाहिणाए दिसाए जमे महाराया पत्थाणे पत्थियं०, सेसं तं चेव जाव आहारमाहारेइ।

तए णं से सिवे रायरिसी तच्चं छट्ठक्खमणं उवसंपज्जिताणं विहरति। तए णं से सिवे रायरिसी० सेसं तं चेव, नवरं पच्चत्थिमं दिसं पोक्खेति। पच्चत्थिमाए दिसाए वरुणे महाराया पत्थाणे पत्थियं अभिरक्खतु सिवं० सेसं तं चेव जाव ततो पच्छा अप्पणा आहारमाहारेइ।

तए णं से सिवे रायरिसी चउत्थं छट्ठक्खमणं उवसंपज्जिताणं विहरइ। तए णं से सिवे रायरिसी चउत्थं छट्ठक्खमणं० एवं तं चेव, नवरं उत्तरं दिसं पोक्खेइ। उत्तराए दिसाए वेसमणे महाराया पत्थाणे पत्थियं अभिरक्खउ सिवं०, सेसं तं चेव जाव ततो पच्छा अप्पणा आहारमाहारेति।

तए णं तस्स सिवस्स रायरिसिस्स छट्ठंछट्ठेणं अनिक्खित्तेणं दिसाचक्कवालेणं जाव आयावेमाणस्स पगतीभद्दयाए जाव विणीययाए अन्नया कदायि तयावरणिज्जाणं कम्ममाणं खयोवसमेणं ईहापोहमग्गणगवेसणं करेमाणस्स विब्भंगे नामं अन्नाणे समुप्पन्ने। से णं तेणं विब्भंगनाणेणं समुप्पन्नेणं पासति अस्सिं लोए सत्त दीवे सत्त समुद्दे। तेण परं न जाणति न पासति।

तए णं तस्स सिवस्स रायरिसिस्स अयमेयारूवे अज्झत्थिए जाव समुप्पज्जित्था--अत्थि णं ममं अतिसेसे नाण-दंसणे समुप्पन्ने, एवं खलु अस्सिं लोए सत्त दीवा, सत्त समुद्दा, तेण परं वोच्छिन्ना दीवा य समुद्दा य। एवं संपेहेइ, एवं सं० २ आयावणभूमीओ पच्चोरुभति, आ० प० २ वागवत्थनियत्थे जेणेव सए उडए तेणेव उवागच्छति, ते० उ० २ सुबहुं लोहीलोहकडाहकडुच्छुयं जाव भंडगं किट्ठिणसंकाइयं च गेण्हति, गे० २ जेणेव हत्थिणापुरे नगरे जेणेव तावसावसहे तेणेव उवागच्छति, ते० उ० २ भंडनिकखेवं करेइ, भंड० क० २ हत्थिणापुरे नगरे सिंघाडग-तिग जाव पहेसु बहुजणस्स एवमाइक्खति जाव एवं परूवेइ-

-अत्थि णं देवाणुप्पिया! ममं अतिसेसे नाण-दंसणे समुप्पन्ने, एवं खलु अस्सिं लोए जाव दीवा य समुद्दा य।

तए णं तस्स सिवस्स रायरिसिस्स अंतियं एयमट्ठं सोच्चा निसम्म हत्थिणापुरे नगरे सिंघाडग-तिग जाव पहेसु बहुजणो अन्नमन्नस्स एवमाइक्खति जाव परूवेइ--एवं खलु देवाणुप्पिया! सिवे रायरिसी एवं आइक्खइ जाव परूवेइ 'अत्थि णं देवाणुप्पिया! ममं अतिसेसे नाण-दंसणे जाव तेण परं वोच्छिन्ना दीवा य समुद्दा य'। से कहमेयं मन्ने एवं?

तेणं कालेणं तेणं समएणं सामी समोसढे। परिसा जाव पडिगया।

तेणं कालेणं तेणं समएणं समणस्स भगवओ महावीरस्स जेट्ठे अंतेवासी जहा बितियसए नियंतुद्देसए जाव अडमाणे बहुजणसद्धं निसामेति--बहुजणो अन्नमन्नस्स एवं आइक्खति जाव एवं परूवेइ 'एवं खलु देवाणुप्पिया! सिवे रायरिसी एवं आइक्खइ जाव परूवेइ--अत्थि णं देवाणुप्पिया! तं चेव जाव वोच्छिन्ना दीवा य समुद्दा य। से कहमेयं मन्ने एवं?'

तए णं भगवं गोयमे बहुजणस्स अंतियं एयमट्ठं सोच्चा निसम्म जायसइढे जहा नियंतुद्देसए जाव तेण परं वोच्छिन्ना दीवा य समुद्दा य। से कहमेयं भंते! एवं? 'गोयमा!' दी समणे भगवं महावीरे भगवं गोयमं एवं वदासी--जं णं गोयमा! से बहुजणे अन्नमन्नस्स एवमाइक्खति तं चेव सत्वं भाणियत्वं जाव भंडनिकखेवं करेति, हत्थिणापुरे नगरे सिंघाडग० तं चेव जाव वोच्छिन्ना दीवा य समुद्दा य। तए णं तस्स सिवस्स रायरिसिस्स अंतिए एयमट्ठं सोच्चा निसम्म तं चेव जाव तेण परं वोच्छिन्ना दीवा य समुद्दा य। तं णं मिच्छा। अहं पुण गोयमा! एवमाइक्खामि जाव परूवेमि -एवं खलु जंबुदीवादीया दीवा लवणादीया समुद्दा संठाणओ एगविहिविहाणा, वित्थारओ अणेगविहिविहाणा एवं जहा जीवाभिगमे जाव सयंभुरमणपज्जवसाणा अस्सिं तिरियलोए असंखेज्जा दीवसमुद्दा पण्णत्ता समणाउसो!।

अत्थि णं भंते! जंबुदीवे दीवे दव्वाइं सवण्णाइं पि अवण्णाइं पि, सगंधाइं पि अगंधाइं पि, सरसाइं पि अरसाइं पि, सफासाइं पि अफासाइं पि, अन्नमन्नबद्धाइं अन्नमन्नपुट्ठाइं जाव घडताए चिट्ठंति? हंता, अत्थि।

अत्थि णं भंते! लवणसमुद्दे दव्वाइं सवण्णाइं पि अवण्णाइं पि, सगंधाइं पि अगंधाइं पि, सरसाइं पि अरसाइं पि, सफासाइं पि अफासाइं पि, अन्नमन्नबद्धाइं अन्नमन्नपुट्ठाइं जाव घडताए

चिट्ठंति? हंता, अत्थि।

अत्थि णं भंते! धातइसंडे दीवे दव्वाइं सवन्नाइं पि० एवं चेव।

एवं जाव सयंभुरमणसमुद्धे जाव हंता, अत्थि।

तए णं सा महत्तिमहालिया महच्चपरिसा समणस्स भगवओ महावीरस्स अंतियं एयमट्ठं सोच्चा निसम्म हट्ठत्तुट्ठं समणं भगवं महावीरं वंदति नमंसति, वं० २ जामेव दिसं पाउब्भूता तामेव दिसं पडिगया।

तए णं हत्थिणापुरे नगरे सिंघाडग जाव पहेसु बहुजणो अन्नमन्नस्स एवमाइक्खइ जाव परूवेइ-"जं णं देवाणुप्पिया! सिवे रायरिसी एवमाइक्खइ जाव परूवेइ-अत्थि णं देवाणुप्पिया! ममं अतिसेसे नाण जाव समुद्धा य, तं नो इणट्ठे समट्ठे। समणे भगवं महावीरे एवमाइक्खइ जाव परूवेइ एवं खलु एयस्स सिवस्स रायरिसिस्स छट्ठंछट्ठेणं तं चेव जाव भंडनिक्खेवं करेति, भंडं० क० २ हत्थिणापुरे नगरे सिंघाडग जाव समुद्धा य।

तए णं तस्स सिवस्स रायरिसिस्स अंतियं एयमट्ठं सोच्चा निसम्म जाव समुद्धा य, तं णं मिच्छा'। समणे भगवं महावीरे एवमाइक्खति--एवं खलु जंबुद्धीवाईया दीवा लवणाईया समुद्धा तं चेव जाव असंखेज्जा दीव-समुद्धा पण्णत्ता समणाउसो!"।

तए णं से सिवे रायरिसी बहुजणस्स अंतियं एयमट्ठं सोच्चा निसम्म संकिए कंखिए वित्तिगिच्छिए भेदसमावन्ने कलुससमावन्ने जाए यावि होत्था।

तए णं तस्स सिवस्स रायरिसिस्स संकियस्स कंखियस्स जाव कलुससमावन्नस्स से विभंगे अन्नाणे खिप्पामेव परिवडिए।

तए णं तस्स सिवस्स रायरिसिस्स अयमेयारूवे अज्झत्थिए जाव समुप्पज्जित्था--'एवं खलु समणे भगवं महावीरे आदिगरे तित्थगरे जाव सव्वण्णू सव्वदरिसी आगासगएणं चक्केणं जाव सहसंबवणे उज्जाणे अहापडिरूवं जाव विहरति। तं महाफलं खलु तहारूवाणं अरहंताणं भगवंताणं नाम-गोयस्स जहा उववातिए जाव गहणयाए, तं गच्छामि णं समणं भगवं महावीरं वंदामि जाव पज्जुवासामि।

एयं णे इहभवे य परभवे य जाव भविस्सति'ति कट्ठु एवं संपेहेति, एवं सं० २ जेणेव तावसावसहे तेणेव उवागच्छइ, ते० ३० २ तावसावसहं अणुप्पविसति, ता० अ०२ सुबहुं लोहीलोहकडाह जाव किडिणसंकातियगं च गेण्हति, गे० २ तावसावसहातो पडिनिक्खमति, ता० प० २ परिवडियविभंगे हत्थिणापुरं नगरं मज्झंमज्झेणं निग्गच्छति, नि० २ जेणेव सहसंबवणे उज्जाणे जेणेव समणे भगवं महावीरे तेणेव उवागच्छति, उवा०२ समणं भगवं महावीरं तिक्खुतो आयाहिणपयाहिणं करेति, क०२ वंदति नमंसति, वं०२ नच्चासन्ने नाइदूरे जाव पंजलिकडे पज्जुवासति।

तए णं समणे भगवं महावीरे सिवस्स रायरिसिस्स तीसे य महत्तिमहालियाए जाव आणाए आराहए भवति।

तए णं से सिवे रायरिसी समणस्स भगवतो महावीरस्स अंतियं धम्मं सोच्चा निसम्म जहा खंदओ जाव उत्तरपुरत्थिमं दिसीभागं अवक्कमइ, ३० अ० २ सुबहुं लोहीलोहकडाह जाव किडिणसंकातियगं एगंते एडेइ, ए० २ सयमेव पंचमुट्ठियं लोयं करेति, स० क० २ समणं भगवं महावीरं एवं जहेव उसभदत्ते तहेव पव्वइओ, तहेव एक्कारस अंगाइं अहिज्जइ, तहेव सव्वं जाव सव्वदुक्खप्पहीणे।

[५०९] भंते! ति भगवं गोयमे समणं भगवं महावीरं वंदति, नमंसति, वं० २ एवं वयासी-जीवा णं भंते! सिज्झमाणा कयरम्मि संघयणे सिज्झंति? गोयमा! वडरोसभणारायसंघयणे सिज्झंति एवं जहेव उववातिए तहेव 'संघयणं संठाणं उच्चत्तं आउयं च परिवसणा' एवं सिद्धिगंडिया निरवसेसा भाणियव्वा जाव 'अच्चाबाहं सोक्खं अणुहुंती सासयं सिद्धा'!!

सेवं भंते! सेवं भंते! ति०।

**\*एक्कारसमे सए नवमो उद्देसो समतो\***

## ० दसमो उद्देसओ ०

[५१०] रायगिहे जाव एवं वदासी--

कतिविधे णं भंते! लोए पन्नते? गोयमा! चउच्चिहे लोए पन्नते, तं जहा--दच्चलोए खेतलोए काललोए भावलोए।

खेतलोए णं भंते! कतिविधे पन्नते? गोयमा! तिविधे पन्नते, तं जहा--अहेलोयखेतलोए, तिरियलोयखेतलोए, उड्ढलोयखेतलोए ।

अहेलोयखेतलोए णं भंते! कतिविधे पन्नते? गोयमा! सत्तविधे पन्नते, तं जहा-रयणप्पभापुढविअहेलोयखेतलोए जाव अहेसत्तमपुढविअहेलोयखेतलोए।

तिरियलोयखेतलोए णं भंते! कतिविधे पन्नते? गोयमा! असंखेज्जतिविधे पन्नते, तं जहा--जंबुद्धीवतिरियलोयखेतलोए जाव सयंभुरमणसमुद्धतिरियलोयखेतलोए।

उड्ढलोगखेतलोए णं भंते! कतिविधे पन्नते? गोयमा! पण्णरसविधे पन्नते, तं जहा--सोहम्मकप्पउड्ढलोगखेतलोए जाव अच्चुयउड्ढलोग० गेवेज्जविमाणउड्ढलोग० अणुत्तरविमाण० इसिपब्भारपुढविउड्ढलोगखेतलोए।

अहेलोगखेतलोए णं भंते! किंसंठिते पन्नते? गोयमा! तप्पागारसंठिए पन्नते।

तिरियलोगखेतलोए णं भंते! किंसंठिए पन्नते? गोयमा! झल्लरिसंठिए पन्नते।

लोए णं भंते! किंसंठिए पन्नते? गोयमा! सुपइठगसंठिए लोए पन्नते, तं जहा--हेट्ठा वित्थिण्णे, मज्झे संखिते जहा सत्तमसए पढमे उद्देसए जाव अंतं करेति।

अलोए णं भंते! किंसंठिए पन्नते? गोयमा! झुसिरगोलसंठिए पन्नते।

अहेलोगखेतलोए णं भंते! किं जीवा, जीवदेसा, जीवपदेसा०? एवं जहा इंदा दिसा तहेव निरवसेसं भाणियव्वं जाव अद्वासमए।

तिरियलोगखेतलोए णं भंते! किं जीवा०? एवं चेव।

एवं उड्ढलोगखेतलोए वि। नवरं अरूवी छच्चिहा, अद्वासमओ नत्थि।

लोए णं भंते! किं जीवा०? जहा बित्तियसए अत्थिउद्देसए लोयागासे नवरं अरूवी सत्तविहा जाव अधम्मत्थिकायस्स पदेसा, नो आगासत्थिकाए, आगासत्थिकायस्स देसे आगासत्थिकायस्स पएसा, अद्वासमए। सेसं तं चेव।

अलोए णं भंते! किं जीवा०? एवं जहा अत्थिकायउद्देसए अलोयागासे तहेव निरवसेसं जाव अणंतभागूणे।

अहेलोगखेतलोगस्स णं भंते! एगम्मि आगासपएसे किं जीवा, जीवदेसा जीवपदेसा, अजीवा, अजीवदेसा, अजीवपएसा? गोयमा! नो जीवा, जीवदेसा वि जीवपदेसा वि

अजीवा वि अजीवदेसा वि अजीवपदेसा वि। जे जीवदेसा ते नियमं एगिंदियदेसा; अहवा एगिंदियदेसा य बेइंदियस्स देसे, अधवा एगिंदियदेसा य बेइंदियाण य देसा; एवं मज्झिंल्लविरहिओ जाव अणिंदिएसु जाव अहवा एगिंदियदेसा य अणिंदियाण देसा। जे जीवपदेसा ते नियमं एगिंदियपएसा, अहवा एगिंदियपएसा य बेइंदियस्स पएसा, अहवा एगिंदियपएसा य बेइंदियाण य पएसा, एवं आदिल्लविरहिओ जाव पंचिंदिएसु, अणिंदिएसु तिय भंगो।

जे अजीवा ते दुविहा पन्नता, तं जहा-रूवी अजीवा य, अरूवी अजीवा य। रूवी तहेव। जे अरूवी अजीवा ते पंचविहा पन्नता, तं जहा-नो धम्मत्थिकाए, धम्मत्थिकायस्स देसे, धम्मत्थिकायस्स पदेसे, एवं अधम्मत्थिकायस्स वि, अद्धासमए ।

तिरियलोगखेतलोगस्स णं भंते! एगम्मि आगासपदेसे किं जीवा? एवं जहा अहेलोगखेतलोगस्स तहेव।

एवं उड्ढलोगखेतलोगस्स वि, नवरं अद्धासमओ नत्थि, अरूवी चउत्विहा।

लोगस्स जहा अहेलोगखेतलोगस्स एगम्मि आगासपदेसे।

लोगस्स णं भंते! एगम्मि आगासपएसे० पुच्छा। गोयमा! नो जीवा, नो जीवदेसा, तं चेव जाव अणंतेहिं अगरुयलहुयगुणेहिं संजुते सत्त्वागासस्स अणंतभागूणे।

दव्वओ णं अहेलोगखेतलोए अणंता जीवदव्वा, अणंता अजीवदव्वा, अणंता जीवाजीवदव्वा।

एवं तिरियलोयखेतलोए वि।

एवं उड्ढलोयखेतलोए वि।

दव्वओ णं अलोए णेवत्थि जीवदव्वा, नेवत्थि अजीवदव्वा, नेवत्थि जीवाजीवदव्वा, एगे अजीवदव्वस्स देसे जाव सत्त्वागासअणंतभागूणे।

कालओ णं अहेलोयखेतलोए न कदायि नासि जाव निच्चे।

एवं जाव अलोगे।

भावओ णं अहेलोगखेतलोए अणंता वण्णपज्जवा जहा खंदए (स० २ ३० १ सु० २४ [१]) जाव अणंता अगरुयलहुयपज्जवा।

एवं जाव लोए।

अजीवदव्वदेसे जाव अणंतभागूणे।

[५११] लोए णं भंते! केमहालए पण्णत्ते? गोयमा! अयं णं जंबुद्धीवे दीवे सव्वदीव० जाव परिक्खेवेणं। तेणं कालेणं तेणं समएणं छ देवा महिइद्धीया जाव महेसक्खा जंबुद्धीवे दीवे मंदरे पव्वए मंदरचूलियं सव्वओ समंता संपरिक्खिताणं चिट्ठेज्जा। अहे णं चत्तारि दिसाकुमारिमहत्तरियाओ चत्तारि बलिपिंडे गहाय जंबुद्धीवस्स दीवस्स चउसु वि दिसासु बहियाभिमुहीओ ठिच्चा ते चत्तारि बलिपिंडे जमगसमगं बहियाभिमुहे पक्खिजेज्जा। पभू णं गोयमा! तओ एगमेगे देवे ते चत्तारि बलिपिंडे धरणिंतलमसंपते खिप्पामेव पडिसाहरित्तए। ते णं गोयमा! देवा ताए उक्किट्ठाए जाव देवगतीए एगे देवे पुरत्थाभिमुहे पयाते, एवं दाहिणाभिमुहे, एवं पच्चत्थाभिमुहे, एवं उत्तराभिमुहे, एवं उड्ढाभिमुहे, एगे देवे

अहोभिमुहे पयाते। तेणं कालेणं तेणं समएणं वाससहस्साउए दारए पयाए। तए णं तस्स दारगस्स अम्मपियरो पहीणा भवंति, णो चेव णं ते देवा लोगंतं संपाउणंति। तए णं तस्स दारगस्स आउए पहीणे भवति, णो चेव णं जाव संपाउणंति। तए णं तस्स दारगस्स अट्ठिमिंजा पहीणा भवंति, णो चेव णं ते देवा लोगंतं संपाउणंति। तए णं तस्स दारगस्स आसत्तमे वि कुलवंसे पहीणे भवति, नो चेव णं ते देवा लोगंतं संपाउणंति। तए णं तस्स दारगस्स नाम-गोते वि पहीणे भवति, नो चेव णं ते देवा लोगंतं संपाउणंति। 'तेसि णं भंते! देवाणं किं गए बहुए, अगए बहुए?' 'गोयमा! गए बहुए, नो अगए बहुए, गयाओ से अगए असं-खेज्जइभागे, अगयाओ से गए असंखेज्जगुणे। लोए णं गोतमा! एमहालए पन्नते।'

अलोए णं भंते! केमहालए पन्नते? गोयमा! अयं णं समयखेते पणयालीसं जोयणसयसहस्साइं आयामविक्खंभेणं जहा खंदए जाव परिक्खेवेणं। तेणं कालेणं तेणं समएणं दस देवा महिइदीया तहेव जाव संपरिक्खिताणं चिट्ठेज्जा, अहे णं अट्ठ दिसाकुमारिमहतरियाओ अट्ठ बलिपिंडे गहाय माणुसुत्तरपव्वयस्स चउसु वि दिसासु चउसु वि विदिसासु बहियाभिमुहीओ ठिच्चा अट्ठ बलिपिंडे जमगसमगं बहियाभिमुहीओ पक्खिजेज्जा। पभू णं गोयमा! तओ एगमेगे देवे ते अट्ठ बलिपिंडे धरणितलमसंपते खिप्पामेव पडिसाहरितए। ते णं गोयमा! देवा ताए उक्किट्ठाए जाव देवगईए लोगंते ठिच्चा असव्भावपट्ठवणाए एगे देवे पुरत्थाभिमुहे पयाए, एगे देवे दाहिणपुरत्थाभिमुहे पयाते, एवं जाव उत्तरपुरत्थाभिमुहे, एगे देवे उइढाभिमुहे, एगे देवे अहोभिमुहे पयाए।

तेणं कालेणं तेणं समएणं वाससयसहस्साउए दारए पयाए। तए णं तस्स दारगस्स अम्मपियरो पहीणा भवंति, नो चेव णं ते देवा अलोयंतं संपाउणंति। तं चेव जाव 'तेसि णं देवाणं किं गए बहुए, अगए बहुए?' 'गोयमा! नो गते बहुए, अगते बहुए, गयाओ से अगए अणंतगुणे, अगयाओ से गए अणंतभागे। अलोए णं गोयमा! एमहालए पन्नते।'

**[५१२]** लोगस्स णं भंते! एगम्मि आगासपएसे जे एगिंदियपएसा जाव पंचिंदियपदेसा अणिंदियपएसा अन्नमन्नबद्धा जाव अन्नमन्नघडताए चिट्ठंति, अत्थि णं भंते! अन्नमन्नस्स किंचि आबाहं वा वाबाहं वा उप्पाएंति, छविच्छेदं वा करंति? णो इणट्ठे समट्ठे।

से केणट्ठेणं भंते! एवं वुच्चइ लोगस्स णं एगम्मि आगासपएसे जे एगिंदियपएसा जाव चिट्ठंति नत्थि णं ते अन्नमन्नस्स किंचि आबाहं वा जाव करंति? गोयमा! से जहानामए नट्ठिया सिया सिंगारागारचारुवेसा जाव कलिया रंगट्ठाणंसि जणसयाउलंसि जणसयसहस्साउलंसि बतीसतिविधस्स नट्ठस्स अन्नयरं नट्ठविहिं उवदंसेज्जा। से नूणं गोयमा! ते पेच्छगा तं नट्ठियं अणिमिसाए दिट्ठीए सव्वओ समंता समभिलोएंति? 'हंता, समभिलोएंति'। ताओ णं गोयमा! दिट्ठीओ तंसि नट्ठियंसि सव्वओ समंता सन्निवडियाओ? 'हंता, सन्निवडियाओ।' अत्थि णं गोयमा! ताओ दिट्ठीओ तीसे नट्ठियाए किंचि आबाहं वा वाबाहं वा उप्पाएंति, छविच्छेदं वा करंति? 'णो इणट्ठे समट्ठे।' सा वा नट्ठिया तासिं दिट्ठीणं किंचि आबाहं वा वाबाहं वा उप्पाएंति, छविच्छेदं वा करेइ? 'णो इणट्ठे समट्ठे।' ताओ वा दिट्ठीओ अन्नमन्नाए दिट्ठीए किंचि आबाहं वा वाबाहं वा उप्पाएंति, छविच्छेदं वा करंति? 'णो इणट्ठे समट्ठे।' सेतेणट्ठेणं गोयमा! एवं वुच्चति तं चेव जाव छविच्छेदं वा न करंति।

**[५१३]** लोगस्स णं भंते! एगम्मि आगासपएसे जहन्नपदे जीवपदेसाणं, उक्कोसपदे जीवपदेसाणं, सव्वजीवाण य कतरे कतरेहितो जाव विसेसाहिया वा ? गोयमा ! सव्वत्थोवा लोगस्स एगम्मि

आगासपदेसे जहन्नपदे जीवपदेसा, सव्वजीवा असंखेज्जगुणा, उक्कोसपदे जीवपदेसा विसेसाहिया।  
सेवं भंते! सेवं भंते ति०।

**\*एक्कारसमे सए दसमो उद्देशो समतो\***

**० एक्कारसो उद्देशो ०**

[५१४] तेणं कालेणं तेणं समएणं वाणियग्गामे नामं नगरे होत्था, वण्णओ। दूतिपलासए  
चेतिए, वण्णओ जाव पुढविसिलावट्ठओ।

तत्थ णं वाणियग्गामे नगरे सुदंसणे नामं सेट्ठी परिवसति अड्ढे जाव अपरिभूते  
समणोवासए अभिगयजीवाजीवे जाव विहरइ।

सामी समोसढे जाव परिसा पज्जुवासति।

तए णं से सुदंसणे सेट्ठी इमीसे कहाए लद्धट्ठे समाणे हट्ठतुट्ठे ण्हाते कय जाव  
पायच्छित्ते सव्वालंकारविभूसिए सातो गिहाओ पडिनिक्खमति, सातो गिहाओ प० २ सकोरेंमल्लदामेणं  
छत्तेणं धरिज्जमाणेणं पायविहारचारेणं महया पुरिसवग्गुरापरिक्खित्ते वाणियग्गामं नगरं मज्झंमज्झेणं  
निग्गच्छति, निग्गच्छत्ता जेणेव दूतिपलासए चेतिए जेणेव समणे भगवं महावीरे तेणेव उवागच्छइ, ते० ३०  
२ समणं भगवं महावीरं पंचविहेणं अभिगमेणं अभिगच्छति, तं जहा--सचित्ताणं दव्वाणं जहा उसभदतो  
जाव तिविहाए पज्जुवासणाए पज्जुवासति।

तए णं समणे भगवं महावीरे सुदंसणस्स सेट्ठिस्स तीसे य महतिमहालियाए जाव आराहए  
भवति।

तए णं से सुदंसणे सेट्ठी समणस्स भगवओ महावीरस्स अंतियं धम्मं सोच्चा निसम्म  
हट्ठतुट्ठ० उट्ठाए उट्ठेति, ३० २ समणं भगवं महावीरं तिक्खुतो जाव नमंसित्ता एवं वदासी-

कतिविधे णं भंते! काले पन्नते? सुदंसणा! चउत्विहे काले पन्नते, तं जहा--पमाणकाले,  
अहाउनिव्वत्तिकाले, मरणकाले, अद्धाकाले ।

से किं तं पमाणकाले? पमाणकाले दुविहे पन्नते, तं जहा--दिवसप्पमाणकाले य,  
रत्तिप्पमाणकाले य । चउपोरिसिए दिवसे, चउपोरिसिया राती भवति।

[५१५] उक्कोसिया अद्धपंचममुहुत्ता दिवसस्स वा रातीए वा पोरिसी भवति। जहन्निया  
तिमुहुत्ता दिवसस्स वा रातीए वा पोरिसी भवति।

जदा णं भंते! उक्कोसिया अद्धपंचममुहुत्ता दिवसस्स वा रातीए वा पोरिसी भवति तदा णं  
कतिभागमुहुत्तभागेणं परिहायमाणी परिहायमाणी जहन्निया तिमुहुत्ता दिवसस्स वा रातीए वा पोरिसी  
भवति? जदा णं जहन्निया तिमुहुत्ता दिवसस्स वा रातीए वा पोरिसी भवति तदा णं कतिभागमुहुत्तभागेणं  
परिवड्ढमाणी परिवड्ढमाणी उक्कोसिया अद्धपंचममुहुत्ता दिवसस्स वा रातीए वा पोरिसी भवइ? सुदंसणा!  
जदा णं उक्कोसिया अद्धपंचममुहुत्ता दिवसस्स वा रातीए वा पोरिसी भवति तदा णं  
बावीससयभागमुहुत्तभागेणं परिहायमाणी परिहायमाणी जहन्निया तिमुहुत्ता दिवसस्स वा रातीए वा पोरिसी  
भवति। जदा वा जहन्निया तिमुहुत्ता दिवसस्स वा रातीए वा पोरिसी भवति तदा णं  
बावीससयभागमुहुत्तभागेणं परिवड्ढमाणी परिवड्ढमाणी उक्कोसिया अद्धपंचममुहुत्ता दिवसस्स वा रातीए वा

पोरिसी भवति।

कदा णं भंते! उक्कोसिआ अद्धपंचममुहुता दिवसस्स वा रातीए वा पोरिसी भवति? कदा वा जहन्निया तिमुहुता दिवसस्स वा रातीए वा पोरिसी भवति? सुदंसणा! जदा णं उक्कोसए अट्ठारसमुहुते दिवसे भवति, जहन्निया दुवालसमुहुता राती भवति तदा णं उक्कोसिया अद्धपंचममुहुता दिवसस्स पोरिसी भवति, जहन्निया तिमुहुता रातीए पोरिसी भवति। जदा वा उक्कोसिया अट्ठारसमुहुता राती भवति, जहन्नए दुवालसमुहुते दिवसे भवति तदा णं उक्कोसिया अद्धपंचममुहुता रातीए पोरिसी भवइ, जहन्निया तिमुहुता दिवसस्स पोरिसी भवइ।

कदा णं भंते! उक्कोसए अट्ठारसमुहुते दिवसे भवति, जहन्निया दुवालसमुहुता राती भवति? कदा वा उक्कोसिया अट्ठारसमुहुता राती भवति, जहन्नए दुवालसमुहुते दिवसे भवइ? सुदंसणा! सुदंसणा! आसाढपुण्णिमाए उक्कोसए अट्ठारसमुहुते दिवसे भवति, जहन्निया दुवालसमुहुता राती भवइ; पोसपुण्णिमाए णं उक्कोसिया अट्ठारसमुहुता राती भवति, जहन्नए दुवालसमुहुते दिवसे भवति।

अत्थि णं भंते! दिवसा य रातीओ य समा चेव भवंति? हंता, अत्थि।

कदा णं भंते! दिवसा य रातीओ य समा चेव भवंति? सुदंसणा! चेत्तासोयपुण्णिमासु णं, एत्थ णं दिवसा य रातीओ य समा चेव भवंति; पन्नरसमुहुते दिवसे, पन्नरसमुहुता राती भवति; चउभागमुहुत्तभागूणा चउमुहुता दिवसस्स वा रातीए वा पोरिसी भवइ। से तं पमाणकाले।

**[५१६]** से किं तं अहाउनिव्वत्तिकाले? अहाउनिव्वत्तिकाले, जं णं जेणं नेरइएण वा तिरिक्खजोणिएण वा मणुस्सेण वा देवेण वा अहाउयं निव्वत्तियं से तं अहाउनिव्वत्तिकाले।

से किं तं मरणकाले? मरणकाले, जीवो वा सरीराओ, सरीरं वा जीवाओ। से तं मरणकाले।

से किं तं अद्धाकाले? अद्धाकाले अणेगविहे पन्नत्ते, से णं समयट्ठयाए आवलियट्ठयाए जाव उस्सप्पिणिअट्ठयाए।

एस णं सुदंसणा! अद्धा दोहारच्छेदेणं छिज्जमाणी जाहे विभागं नो हव्वमागच्छति से तं समए समयट्ठताए।

असंखेज्जाणं समयाणं समुदयसमितिसमागमेणं सा एगा आवलियति पवुच्चइ। संखेज्जाओ आवलियाओ जहा सालिउद्देशए जाव तं सागरोवमस्स उ एगस्स भवे परीमाणं।

एएहि णं भंते! पलिओवम-सागरोवमेहिं किं पयोयणं? सुदंसणा! एएहि णं पलिओवम-सागरोवमेहिं नेरतिय-तिरिक्खजोणिय-मणुस्स-देवाणं आउयाइं मविज्जंति।

**[५१७]** नेरइयाणं भंते! केवतियं कालं ठिती पण्णत्ता? एवं ठितिपदं निरवसेसं भाणियव्वं जाव अजहन्नमणुक्कोसेणं तेत्तीसं सागरोवमाइं ठिती पण्णत्ता।

**[५१८]** अत्थि णं भंते! एतेसिं पलिओवम-सागरोवमाणं खए ति वा अवचए ति वा? हंता, अत्थि।

से केणट्ठेणं भंते! एवं वुच्चति अत्थि णं एएसिं पलिओवमसागरोवमाणं जाव अवचये ति वा?

एवं खलु सुदंसणा! तेणं कालेणं तेणं समएणं हत्थिणापुरे नामं नगरे होत्था, वण्णओ। सहसंबवणे उज्जाणे, वण्णओ।

तत्थ णं हत्थिणापुरे नगरे बले नामं राया होत्था, वण्णओ।

तस्स णं बलस्स रण्णो पभावती नामं देवी होत्था, सुकुमाल० वण्णओ जाव विहरति।

तए णं सा पभावती देवी अन्नया कयाइ तंसि तारिसगंसि वासघरंसि अब्भंतरओ सचित्तकम्मं बाहिरतो दूमियघट्ठमट्ठे विचित्तल्लोगचिल्लियतले मणिरतणपणासियंधकारे बहुसमसुविभत्त देसभाए पंचवण्णसरससुरभिमुक्कपुप्फपुंजोवयारकलिए कालागरु-पवरकुंदुरुक्क-तुरुक्कधूवमघमघंत गंधुद्धुताभिरामे सुगंधवरगंधिए गंधवट्ठिभूते तंसि तारिसगंसि सयणिज्जंसि सालिंगणवट्ठिए उभओ बिब्बोयणे दुहओ उन्नए मज्झे णय-गंभीरे गंगापुलिणवालयउद्दालसालिए ओयवियखोमियदुगुल्लपट्ठ पलिच्छायणे सुविरइयरयताणे रत्तंसुयसंवुए.....

.....सुरम्मं आइणग-रूय-बूर-नवणीय-तूलफासे सुगंधवरकुसुमचुण्णसयणोवयारकलिए अद्धरत्त-काल समयंसि सुत्तजागरा ओहीरमाणी ओहीरमाणी अयमेयारूवं ओरालं कल्लाणं सिवं धन्नं मंगल्लं सस्सिरीयं महासुविणं सुविणे पासिताणं पडिबुद्धा हार-रयय-खीर-सागर-ससंककिरण-दगरय-रययमहासेल-पंडुरतरोरु-रमणिज्ज-पेच्छणिज्ज-थिर-लट्ठपउट्ठ-वट्ठिपीवर-सुसिलिट्ठ-विसिट्ठ-तिक्खदाढा-विडंबितमुहं-परिकम्मिय जच्चकमलकोमलमाइयसोभंतलट्ठउट्ठं रतुप्पलपत्तमउयसुकुमालतालुजीहं मूसागयपवरकणग-तावितआवतायंतवट्ठितडिविमलसरिसनयणं विसालपीवरोरुपडिपुण्णविमलखंधं मिउविसदसुहुमलक्खणपसत्थ वित्थिण्णकेसरसडोवसोभियं रुसियसुनिमित्तसुजातअप्फोडितणंगूलं सोमं सोमाकारं लीलायंतं जंभायंतं नहयलातो ओवयमाणं निययवदणकमलसरमतिवयंतं सीहं सुविणे पासिताणं पडिबुद्धा।

तए णं सा पभावती देवी अयमेयारूवं ओरालं जाव सस्सिरीयं महासुविणं सुविणे पासिताणं पडिबुद्धा समाणी हट्ठतुट्ठ जाव ह्दिदया धाराहयकलंबगं पिव समूसवियरोमकूवा तं सुविणं ओगिण्हति, ओगिण्हिता सयणिज्जाओ अब्भुट्ठेति, अतुरियमचवलमसंभंताए अविलंबिताए रायहंससरिसीए गतीए जेणेव बलस्स रण्णो सयणिज्जे तेणेव उवागच्छति, ते० बलं रायं ताहिं इट्ठाहिं कंताहिं पियाहिं मणुण्णाहिं मणामाहिं ओरालाहिं कल्लाणाहिं सिवाहिं धन्नाहिं मंगल्लाहिं सस्सिरीयाहिं मियमहुरमंजुलाहिं गिराहिं संलवमाणी संलवमाणी पडिबोहेति, पडि० २ बलेणं रण्णा अब्भणुण्णाया समाणी नाणामणि-रयणभत्ति-चित्तंसि भद्दासणंसि णिसीयति, णिसीयिता आसत्था वीसत्था सुहासणवरगया बलं रायं ताहिं इट्ठाहिं कंताहिं जाव संलवमाणी संलवमाणी एवं वयासी--एवं खलु अहं देवाणुप्पिया! अज्ज तंसि तारिसगंसि सयणिज्जंसि सालिंगण० तं चेव जाव नियगवयणमतिवयंतं सीहं सुविणे पासिताणं पडिबुद्धा। तं णं देवाणुप्पिया! एतस्स ओरालस्स जाव महासुविणस्स के मन्ने कल्लाणे फलवित्तिविसेसे भविस्सति?

तए णं से बले राया पभावतीए देवीए अंतियं एयमट्ठं सोच्चा निसम्म हट्ठतुट्ठ जाव ह्यहियये धाराहतणीमसुरभिकुसुमं व चंचुमालइयतणू ऊसवियरोमकूवे तं सुविणं ओगिण्हइ, ओ० २ ईहं पविसति, ईहं प० २ अप्पणो साभाविएणं मतिपुट्ठवणं बुद्धिविण्णाणेणं तस्स सुविणस्स अत्थोग्गहणं करेति, तस्स० क० २ पभावतिं देविं ताहिं इट्ठाहिं जाव मंगल्लाहिं मियमहुरसस्सिरीयाहिं वग्गूहिं संलवमाणे संलवमाणे एवं वयासी-

"ओराले णं तुमे देवी! सुविणे दिट्ठे, कल्लाणे णं तुमे जाव सस्सिरीए णं तुमे देवी! सुविणे दिट्ठे, आरोग्गतुट्ठि-दीहाउ-कल्लाण-मंगलकारेण णं तुमे देवी! सुविणे दिट्ठे, अत्थलाभो देवाणुप्पिए!, भोगलाभो देवाणुप्पिए !, पुत्तलाभो देवाणुप्पिए !, रज्जलाभो देवाणुप्पिए ! एवं खलु तुमं देवाणुप्पिए! णवण्हं

मासाणं बहुपडिपुण्णाणं अद्धट्ठमाणं य राइंदियाणं वीतिककंताणं अम्मं कुलकेठं कुलदीवं कुलपच्चयं कुलवडंसगं कुलतिलगं कुलकित्तिकरं कुलनंदिकरं कुलजसकरं कुलाधारं कुलपायवं कुलविवड्ढणकरंसुकुमालपाणिपायं अहीणपुण्णपंचिंदियसरीरं जाव ससिसोमागारं कंतं पियदंसणं सुरूवं देवकुमारसप्पभं दारगं पयाहिसि। से वि य णं दारए उम्मुककबालभावे विण्णयपरिणयमेते जोच्चवणग-मणुप्पते सूरे वीरे विक्कंते वित्थिण्णविपुलबलवाहणे रज्जवती राया भविस्सति। तं ओराले णं तुमे देवी! सुमिणे दिट्ठे जाव आरोग्ग-तुट्ठिठ जाव मंगल्लकारे णं तुमे देवी! सुविणे दिट्ठे" ति कट्पु पभावतिं देविं ताहिं इट्ठाहिं जाव वग्गूहिं दोच्चं पि तच्चं पि अणुवूहति।

तए णं सा पभावती देवी बलस्स रण्णो अंतियं एयमट्ठं सोच्चा निसम्म हट्ठतुट्ठो करयल जाव एवं वयासी--'एवमेतं देवाणुप्पिया!, तहमेयं देवाणुप्पिया!, अवितहमेयं देवाणुप्पिया!, असंदिद्धमेयं देवाणुप्पिया!, इच्छियमेयं देवाणुप्पिया!, पडिच्छियमेतं देवाणुप्पिया!, इच्छियपडिच्छियमेयं देवाणुप्पिया से जहेयं तुब्भे वदह'ति कट्पु तं सुविणं सम्मं पडिच्छइ, तं० पडि०२ बलेण रण्णा अब्भणुण्णाया समाणी णाणामणि-रयणभत्तिचित्तातो भद्दासणाओ अब्भुट्ठइ, अ०२ अतुरियमचवल जाव गतीए जेणेव सए सयणिज्जे तेणेव उवागच्छइ, ते० उ० २ सयणिज्जंसि निसीयति, नि० २ एवं वदासी--'मा मे से उत्तमे पहाणे मंगल्ले सुविणे अन्नेहिं पावसुविणेहिं पडिहम्मिस्सइ'ति कट्पु देव-गुरुजण-संबद्धाहिं पसत्थाहिं मंगल्लाहिं धम्मियाहिं कहाहिं सुविणजागरियं पडिजागरमाणी पडिजागरमाणी विहरति।

तए णं से बले राया कोडुंबियपुरिसे सद्दावेति, को० स० २ एवं वयासी--'खिप्पामेव भो देवाणुप्पिया! अज्ज सविसेसं बाहिरियं उवट्ठाणसालं गंधोदयसित्तसुइयसम्मज्जियोवलितं सुगंधवरपंचवण्ण-पुप्फोवयारकलियं कालागरुपवरकुंदुरुक्क० जाव गंधवट्ठिभूयं करेह य कारवेह य, करे० २ सीहासणं एएह, सीहा० २० २ ममेतं जाव पच्चप्पिणह।

तए णं ते कोडुंबिय० जाव पडिसुणेता खिप्पामेव सविसेसं बाहिरियं उवट्ठाणसालं जाव पच्चप्पिणंति।

तए णं से बले राया पच्चूसकालसमयंसि सयणिज्जाओ समुट्ठेति, स० स० २ पायवीढातो पच्चोरुभत्ति, प० २ जेणेव अट्ठणसाला तेणेव उवागच्छति, ते० उ० २ अट्ठणसालं अणुपविसइ जहा उववातिए तहेव अट्ठणसाला तहेव मज्जणघरे जाव ससि व्व पियदंसणे नरवई मज्जणघराओ पडिनिक्खमति, म० प० २ जेणेव बाहिरिया उवट्ठाणसाला तेणेव उवागच्छति, ते० उ० २ सीहासणवरंसि पुरत्थाभिमुहे निसीयति, नि० २ अप्पणो उत्तरपुरत्थिमे दिसीभाए अट्ठ भद्दासणाइं सेयवत्थपच्चत्थुयाइं सिद्धत्थगकयमंगलोवयाराइं रयावेइ, रया० २ अप्पणो अदूरसामंते णाणामणिरयणमंडियं अहियपेच्छणिज्जं महग्घवरपट्ठणुग्गयं सण्हपट्ठभत्तिसयचित्तताणं ईहामियउसभ जाव भत्तिचित्तं अब्भित्तियं जवणियं अंछावेति, अं० २ नाणामणि-रयणभत्तिचित्तं अत्थरयमउयमसूरगोत्थगं सेयवत्थपच्चत्थुतं अंगसुहफासयं सुमउयं पभावतीए देवीए भद्दासणं रयावेइ, र० २ कोडुंबियपुरिसे सद्दावेइ, को० स० २ एवं वदासि-खिप्पामेव भो देवाणुप्पिया! अट्ठंगमहानिमित्तसुत्तत्थधारए विविहसत्थकुसले सुविणलक्खणपाढए सद्दावेह।

तए णं ते कोडुंबियपुरिसा जाव पडिसुणेता बलस्स रण्णो अंतियाओ पडिनिक्खमंति, पडि० २ सिग्घं तुरियं चवलं चंडं वेइयं हत्थिणापुरं नगरं मज्झंमज्झेणं जेणेव तेसिं सुविणलक्खणपाढागाणं गिहाइं तेणेव उवागच्छति, ते० उ० २ ते सुविणलक्खणपाढए सद्दावेति।

तए णं ते सुविणलक्खणपाढगा बलस्स रण्णो कोडुंबियपुरिसेहिं सद्दविया समाणा हट्ठतुट्ठो प्हाया कय० जाव सरीरा सिद्धत्थग-हरियालियकयमंगलमुद्दाणा सएहिं सएहिं गिहेहिंतो निग्गच्छंति, स० नि० २ हत्थिणापुरं नगरं मज्झंमज्झेणं जेणेव बलस्स रण्णो भवणवरवडैसए तेणेव उवागच्छंति, तेणेव ३० २ भवणवरवडैसगपडिदुवारंसि एगतो मिलंति, ए० मि० २ जेणेव बाहिरिया उवट्ठाणसाला, जेणेव बले राया तेणेव उवागच्छंति, ते० ३० २ करयल० बलं रायं जएणं विजएणं वद्धावेंति। तए णं ते सुविणलक्खणपाढगा बलेणं रण्णा वंदियपूइयसक्कारियसम्मणिया समाणा पत्तेयं पत्तेयं पुव्वनत्थेसु भद्दासणेसु निसीयंति।

तए णं से बले राया पभावतिं देविं जवणियंतरियं ठावेइ, ठा० २ पुप्फ-फलपडिपुण्णहत्थे परेणं विणएणं ते सुविणलक्खणपाढए एवं वयासी--एवं खलु देवाणुप्पिया! पभावती देवी अज्ज तंसि तारिसगंसि वासघरंसि जाव सीहं सुविणे पासित्ताणं पडिबुद्धा, तं णं देवाणुप्पिया! एयस्स ओरालस्स जाव के मन्ने कल्लाणे फलवित्तिविसेसे भविस्सति?

तए णं ते सुविणलक्खणपाढगा बलस्स रण्णो अंतियं एयमट्ठं सोच्चा निसम्म हट्ठतुट्ठो तं सुविणं ओगिण्हंति, तं० ओ० २ ईहं पविसंति, ईहं पविसित्ता तस्स सुविणस्स अत्थोग्गहणं करेंति, त० क० २ अन्नमन्नेणं सद्धिं संचालेंति, अ० सं० २ तस्स सुविणस्स लद्धट्ठा गहियट्ठा पुच्छियट्ठा विणिच्छियट्ठा अभिगयट्ठा बलस्स रण्णो पुरओ सुविणसत्थाइं उच्चारमाणा एवं वयासी--

एवं खलु देवाणुप्पिया! अम्हं सुविणसत्थंसि बायालीसं सुविणा, तीसं महासुविणा, बावत्तरिं सव्वसुविणा दिट्ठा। तत्थ णं देवाणुप्पिया! तित्थयरमायरो वा चक्कवट्ठिमायरो वा तित्थगरंसि वा चक्कवट्ठिंसि वा गब्भं वक्कममाणंसि एएसिं तीसाए महासुविणाणं इमे चोद्धस महासुविणे पासित्ताणं पडिबुज्झंति, तं जहा-

[५१९] गय वसह सीह अभिसेय दाम ससि दिणयरं झयं कुंभं।

पउमसर सागर विमाणभवण रयणुच्चय सिहिं च ॥

[५२०] वासुदेवमायरो णं वासुदेवंसि गब्भं वक्कममाणंसि एएसिं चोद्धसण्हं महासुविणाणं अन्नयरे सत्त महासुविणे पासित्ताणं पडिबुज्झंति। बलदेवमायरो बलदेवंसि गब्भं वक्कममाणंसि एएसिं चोद्धसण्हं महासुविणाणं अन्नयरे चत्तारि महासुविणे पासित्ताणं पडिबुज्झंति। मंडलियमायरो मंडलियंसि गब्भं वक्कममाणंसि एतेसिं चोद्धसण्हं महासुविणाणं अन्नयरं एगं महासुविणं पासित्ताणं पडिबुज्झंति।

इमे य णं देवाणुप्पिया! पभावतीए देवीए एगे महासुविणे दिट्ठे, तं ओराले णं देवाणुप्पिया! पभावतीए देवीए सुविणे दिट्ठे जाव आरोग्ग-तुट्ठि जाव मंगल्लकारे णं देवाणुप्पिया! पभावतीए देवीए सुविणे दिट्ठे। अत्थलाभो देवाणुप्पिया! भोगलाभो० पुत्तलाभो० रज्जलाभो देवाणुप्पिया!।

एवं खलु देवाणुप्पिया! पभावती देवी नवण्हं मासाणं बहुपडिपुण्णाणं जाव वीतिककंताणं तुम्हं कुलकेउं जाव पयाहित्ति। से वि य णं दारए उम्मुक्कबालभावे जाव रज्जवती राया भविस्सति, अणगारे वा भावियप्पा। तं ओराले णं देवाणुप्पिया! पभावतीए देवीए सुविणे दिट्ठे जाव आरोग्ग-तुट्ठि-दीहाउ-कल्लाण जाव दिट्ठे।"

तए णं से बले राया सुविणलक्खणपाढगाणं अंतिए एयमट्ठं सोच्चा निसम्म हट्ठतुट्ठकरयल जाव कट्पु ते सुविणलक्खणपाढगे एवं वयासी-एवमेयं देवाणुप्पिया! जाव से जहेयं

तुभ्मे वदह', ति कट्पु तं सुविणं सम्मं पडिच्छति, तं० प० २ ते सुविणलक्खणपाढए विउलेणं असण-पाण-खाइम-साइम-पुप्फ-वत्थ-गंधमल्लालंकारेणं सक्कारेति सम्माणेति, स० २ विउलं जीवियारिहं पीतिदाणं दलयति, वि० द० २. पडिविसज्जेति, पडि० २ सीहासणाओ अब्भुट्ठेति, सी० अ० २ जेणेव पभावती देवी तेणेव उवागच्छति, ते० उ० २ पभावतिं देविं ताहिं इट्ठाहिं जाव संलवमाणे संलवमाणे एवं वयासी--"एवं खलु देवाणुप्पिए! सुविणसत्थंसि बायालीसं सुविणा, तीसं महासुविणा, बावत्तरिं सच्चसुविणा दिट्ठा। तत्थ णं देवाणुप्पिए! तित्थगरमायरो वा चक्कवट्ठिमायरो वा, तं चेव जाव अन्नयरं एणं महासुविणं पासित्ताणं पडिबुज्झंति। इमे य णं तुमे देवाणुप्पिए! एगे महासुविणे दिट्ठे। तं ओराले णं तुमे देवी! सुविणे दिट्ठे जाव रज्जवती राया भविस्सति अणगारे वा भावियप्पा, तं ओराले णं तुमे देवी! सुविणे दिट्ठे" ति कट्पु पभावतिं देविं ताहिं इट्ठाहिं जाव दोच्चं पि तच्चं पि अणुवूहइ।

तए णं सा पभावती देवी बलस्स रण्णो अंतियं एयमट्ठं सोच्चा निसम्म हट्ठतुट्ठ० करयल जाव एवं वदासी--एवमेयं देवाणुप्पिया! जाव तं सुविणं सम्मं पडिच्छति, तं० पडि० २ बलेणं रण्णा अब्भणुण्णाता समाणी नाणामणि-रयणभत्ति जाव अब्भुट्ठेति, अ० २ अतुरितमचवल जाव गतीए जेणेव सए भवणे तेणेव उवागच्छति, ते० उ० २ सयं भवणमणुपविट्ठा।

तए णं सा पभावती देवी पहाया कयबलिकम्मा जाव सच्चालंकारविभूसिया तं गब्भं णातिसीतेहिं नातिउण्हेहिं नातितितेहिं नातिकडुएहिं नातिकसाएहिं नातिअंबिलेहिं नातिमहुरेहिं उडुअयमाणसुहेहिं भोयण-सच्छायण-गंध-मल्लेहिं जं तस्स गब्भस्स हियं मितं पत्थं गब्भोसणं तं देसे य काले य आहारमाहारेमाणी विवित्तमउएहिं सयणासणेहिं पतिरिक्कसुहाए मणाणुकूलाए विहारभूमिए पसत्थदोहला संपुण्णदोहला सम्माणियदोहला अविमाणियदोहला वोच्छिन्नदोहला विणीयदोहला ववगयरोग-सोग-मोह-भय-परितासा तं गब्भं सुहंसुहेणं परिवहइ।

तए णं सा पभावती देवी नवण्हं मासाणं बहुपडिपुण्णाणं अद्धट्ठमाण य राइंदियाणं वीतिककंताणं सुकुमालपाणि-पायं अहीणपुण्णपंचिंदियसरीरं लक्खण-वंजण-गुणोववेयं जाव ससिसोमागारं कंतं पियदंसणं सुरूवं दारयं पयाता।

तए णं तीसे पभावतीए देवीए अंगपडियारियाओ पभावतिं देविं पसूयं जाणेत्ता जेणेव बले राया तेणेव उवागच्छंति, उवा० २ करयल जाव बलं रायं जएणं विजएणं वद्धावेति, ज० व० २ एवं वदासि-- एवं खलु देवाणुप्पिया! पभावती देवी नवण्हं मासाणं बहुपडिपुण्णाणं जाव दारयं पयाता, तं एयं णं देवाणुप्पियाणं पियट्ठताए पियं निवेदेमो, पियं ते भवउ।

तए णं से बले राया अंगपडियारियाणं अंतियं एयमट्ठं सोच्चा निसम्म हट्ठतुट्ठ जाव धाराहयणीव जाव रोमकूवे तासिं अंगपडियारियाणं मउडवज्जं जहामालियं ओमोयं दलयति, ओ० द० २ सेतं रययमयं विमलसलिलपुण्णं भिंंगारं पगिण्हति, भिं० प० २ मत्थए धोवति, म० धो० २ विउलं जीवियारिहं पीतिदाणं दलयति, वि० द० २ सक्कारेइ सम्माणेइ, स० २ पडिविसज्जेति।

**[५२१]** तए णं से बले राया कोडुंबियपुरिसे सद्दावेति, को० स० एवं वदासी--खिप्पामेव भो देवाणुप्पिया! हत्थिणापुरे नगरे चारगसोहणं करेह, चा० क० २ माणुम्माणवड्ढणं करेह, मा० क० २ हत्थिणापुरं नगरं सच्चिंतारबाहिरियं आसियसम्मज्जियोवलितं जाव करेह य कारवेह य, करेत्ता य कारवेत्ता य, जूवसहस्सं वा, चक्कसहस्सं वा, पूयामहामहिमसक्कारं वा ऊसवेह, ऊ० २ ममेतमाणतियं पच्चप्पिणह।

तए णं ते कोडुंबियपुरिसा बलेणं रण्णा एवं वुत्ता जाव पच्चप्पिणंति।

तए णं से बले राया जेणेव अट्ठणसाला तेणेव उवागच्छति, ते0 उ0 २ तं चेव जाव मज्जणघराओ पडिनिक्खमति, प0 २ उस्सुंके उक्करं उक्किट्ठं अदेज्जं अमेज्जं अभडप्पवेसं अदंडकोदंडिमं अधरिमं गणियावरनाडइज्जकलियं अणेगतालाचराणुचरियं अणुद्धुयमुडुंगं अमिलायमल्लदामं पमुडुयपक्कीलियं सपुरजणजाणवयं दसदिवसे ठितिवडियं करेति।

तए णं से बले राया दसाहियाए ठितिवडियाए वट्ठमाणीए सतिए य साहस्सिए य सयसाहस्सिए य जाए य दाए य भाए य दलमाणे य दवावेमाणे य सतिए य साहस्सिए य सयसाहस्सिए य लाभे पडिच्छेमाणे य पडिच्छावेमाणे य एवं विहरति।

तए णं तस्स दारगस्स अम्मापियरो पढमे दिवसे ठितिवडियं करेति, ततिए दिवसे चंदसूरदंसावणियं करेति, छट्ठे दिवसे जागरियं करेति। एक्कारसमे दिवसे वीतिक्कंते, निव्वत्ते असुडुजायकम्मकरणे, संपत्ते बारसाहदिवसे विउलं असण-पाण-खाइम-साइमं उवक्खडावेत्ति, उ0 २ जहा सिवो जाव खतिए य आमंतेंति, आ0 २ ततो पच्छा ण्हाता कत0 तं चेव जाव सक्कारेति सम्माणेति, स0 २ तस्सेव मित्त-णाति जाव राईण य खतियाण य पुरतो अज्जयपज्जयपिउपज्जयागयं बहुपिरिसपरंपरप्परूढं कुलाणुरूवं कुलसरिसं कुलसंताणतंतुवद्धणकरं अयमेयारूवं गोणं गुणनिप्फन्नं नामधेज्जं करेति--जम्हा णं अम्हं इमे दारए बलस्स रण्णो पुत्ते पभावतीए देवीए अत्तए तं होउ णं अम्हं इमस्स दारयस्स नामधेज्जं महब्बले। तए णं तस्स दारगस्स अम्मापियरो नामधेज्जं करेति 'महब्बले'ति।

तए णं से महब्बले दारए पंचधातीपरिग्गहिते, तं जहा--खीरधातीए एवं जहा दढप्पतिण्णे जाव निवातनिव्वाघातंसि सुहंसुहेणं परिवड्ढइ।

तए णं तस्स महब्बलस्स दारगस्स अम्मा-पियरो अणुपुव्वेणं ठितिवडियं वा चंद-सूरदंसावणियं वा जागरियं वा नामकरणं वा परंगामणं वा पयचंकावणं वा जेमावणं वा पिंडवद्धणं वा पजंपामणं वा कण्णवेहणं वा संवच्छरपडिलेहणं वा चोलोयणं वा उवणयणं वा अन्नाणि य बहूणि गब्भाधाणजम्मणमादियाइं कोतुयाइं करेति।

**[५२२]** तए णं तं महब्बलं कुमारं अम्मा-पियरो सातिरेगऽट्ठवासगं जाणिता सोभणंसि तिहि-करण-मुहुत्तंसि एवं जहा दढप्पतिण्णे जाव अलंभोगसमत्थे जाए यावि होत्था।

तए णं तं महब्बलं कुमारं उम्मुक्कबालभावं जाव अलंभोगसमत्थं विजाणिता अम्मा-पियरो अट्ठ पासायवडैसए कारेति। अब्भुग्गयमूसिय पहसिते इव वण्णओ जहा रायप्पसेणइज्जे जाव पडिरूवे। तेसि णं पासायवडैसगाणं बहुमज्झदेसभाए एत्थ णं महेगं भवणं कारेति अणेगखंभसयसन्निविट्ठं, वण्णओ जहा रायप्पसेणइज्जे पेच्छाघरमंडवंसि जाव पडिरूवं।

तए णं तं महब्बलं कुमारं अम्मा-पियरो अन्नया कयाइ सोभणंसि तिहि-करण-दिवस-नक्खत्त-मुहुत्तंसि ण्हायं कयबलिकम्मं कयकोउय-मंगल-पायच्छित्तं सव्वालंकारविभूसियं पमक्खणग-ण्हाण-गीय-वाइय-पसाहणट्ठंग-तिलग-कंकण-अविहववहुउवणीयं मंगल-सुजंपितेहि य वरकोउय-मंगलोवयार कयसंतिकम्मं सरिसियाणं सरित्तयाणं सरिव्वयाणं सरिसलायण्ण-रूव-जोव्वण-गुणोववेयाणं विणीयाणं कयकोउय-मंगलोवयारकतसंतिकम्माणं सरिसएहिं रायकुलेहिंतो आणितेल्लियाणं अट्ठण्हं रायवरकन्नाणं एगदिवसेणं पाणिं गिण्हाविंसु।

तए णं तस्स महब्बलस्स कुमारस्स अम्मा-पियरो अयमेयारूवं पीतिदाणं दलयन्ति, तं जहा-  
 अट्ठ हिरण्णकोडीओ, अट्ठ सुवण्णकोडीओ, अट्ठ मउडे मउडप्पवरे, अट्ठकुंडलजोए कुंडलजोयप्पवरे, अट्ठ  
 हारे हारप्पवरे, अट्ठ अद्धहारे अद्धहारप्पवरे, अट्ठ एगावलीओ एगावलिप्पवराओ, एवं मुत्तावलीओ, एवं  
 कणगावलीओ, एवं रयणावलीओ, अट्ठ कडगजोए कडगजोयप्पवरे, एवं तुडियजोए, अट्ठ खोमजुयलाइं  
 खोमजुयलप्पवराइं, एवं वडगजुयलाइं, एवं पट्ठजुयलाइं, एवं दुगुल्लजुयलाइं, अट्ठ सिरीओ, अट्ठ हिरीओ; एवं  
 धितीओ, कितीओ, बुद्धीओ, लच्छीओ; अट्ठ नंदाइं, अट्ठ भद्दाइं, अट्ठ तले तलप्पवरे सच्चरयणामए  
 णियगवरभवणकेऊ, अट्ठ झए झयप्पवरे, अट्ठ वए वयप्पवरे दसगोसाहस्सिएणं वएणं, अट्ठ नाडगाइं  
 नाडगप्पवराइं बतीसइबद्धेणं नाडएणं, अट्ठ आसे आसप्पवरे सच्चरयणामए सिरिघरपडिरूवए, अट्ठ हत्थी  
 हत्थिप्पवरे सच्चरयणामए सिरिघरपडिरूवए, अट्ठ जाणाइं जाणप्पवराइं, अट्ठ जुंगाइं जुंगप्पवराइं, एवं  
 सिबियाओ, एवं संदमाणियाओ, एवं गिल्लीओ, थिल्लीओ, अट्ठ वियडजाणाइं वियडजाणप्पवराइं, अट्ठ रहे  
 पारिजाणिए, अट्ठ रहे संगामिए, अट्ठ आसे आसप्पवरे, अट्ठ हत्थी हत्थिप्पवरे, अट्ठ गामे गामप्पवरे  
 दसकुलसाहस्सिएणं गामेणं, अट्ठ दासे दासप्पवरे, एवं दासीओ, एवं किंकरे, एवं कंचुइज्जे, एवं वरिसधरे, एवं  
 महत्तरए, अट्ठ सोवण्णिए ओलंबणदीवे, अट्ठ रूपामए ओलंबणदीवे, अट्ठ सुवण्णरूपामए ओलंबणदीवे,  
 अट्ठ सोवण्णिए उक्कंपणदीवे, एवं चेव तिण्णि वि; अट्ठ सोवण्णिए पंजरदीवे, एवं चेव तिण्णि वि; अट्ठ  
 सोवण्णिए थाले, अट्ठ रूपामए थाले, अट्ठ सुवण्ण-रूपामए थाले, अट्ठ सोवण्णियाओ पत्तीओ, अट्ठ  
 रूपामयाओ पत्तीओ, अट्ठ सुवण्ण-रूपामयाओ पत्तीओ; अट्ठ सोवण्णियाइं थासगाइं ३, अट्ठ सोवण्णियाइं  
 मल्लगाइं ३, अट्ठ सोवण्णियाओ तलियाओ ३, अट्ठ सोवण्णियाओ कविचिआओ ३, अट्ठ सोवण्णिए  
 अवएडए ३, अट्ठ सोवण्णियाओ अवयक्काओ ३, अट्ठ सोवण्णिए पायपीढए ३, अट्ठ सोवण्णियाओ  
 भिसियाओ ३, अट्ठ सोवण्णियाओ करोडियाओ ३, अट्ठ सोवण्णिए पल्लंके ३, अट्ठ सोवण्णियाओ  
 पडिसेज्जाओ ३, अट्ठ० हंसासणाइं ३, अट्ठ० कोंचासणाइं ३, एवं गरुलासणाइं उन्नतासणाइं पणतासणाइं  
 दीहासणाइं भद्दासणाइं पक्खासणाइं मगरासणाइं, अट्ठ० पउमासणाइं, अट्ठ० उसभासणाइं, अट्ठ०  
 दिसासोवत्थियासणाइं, अट्ठ० तेल्लसमुग्गे, जहा रायप्पसेणइज्जे जाव अट्ठ० सरिसवसमुग्गे, अट्ठ  
 खुज्जाओ जहा उववातिए जाव अट्ठ पारसीओ, अट्ठ छत्ते, अट्ठ छत्तधारीओ चेडीओ, अट्ठ चामराओ, अट्ठ  
 चामरधारीओ चेडीओ, अट्ठ तालियं०, अट्ठ तालियं०धारीओ चेडीओ, अट्ठ करोडियाओ, अट्ठ  
 करोडियाधारीओ चेडीओ, अट्ठ खीरधातीओ, जाव अट्ठ अंकधातीओ, अट्ठ अंगमद्धियाओ, अट्ठ  
 उम्मद्धियाओ, अट्ठ ण्हावियाओ, अट्ठ पसाधियाओ, अट्ठ वण्णगपेसीओ, अट्ठ चुण्णगपेसीओ, अट्ठ  
 कोडा(इडा)कारीओ, अट्ठ दवकारीओ, अट्ठ उवत्थाणियाओ, अट्ठ नाडइज्जाओ, अट्ठ कोडुंबिणीओ, अट्ठ  
 महाणसिणीओ, अट्ठ भंडागारिणीओ, अट्ठ अब्भाधारिणीओ, अट्ठ पुप्फवरिणीओ, अट्ठ पाणिधरिणीओ,  
 अट्ठ बलिकारियाओ, अट्ठ सेज्जाकारीओ, अट्ठ अब्भित्तारियाओ पडिहारीओ, अट्ठ बाहिरियाओ पडिहारीओ,  
 अट्ठ मालाकारीओ, अट्ठ पेसणकारीओ, अन्नं वा सुबहुं हिरण्णं वा, सुवण्णं वा, कंसं वा, दूसं वा,  
 विउलधणकणग जाव संतसावदेज्जं अलाहि जाव आसत्तमाओ कुलवंसाओ पकामं दाउं पकामं परिभोतुं  
 पकामं परियाभाएउं।

तए णं से महब्बले कुमारे एगमेगाए भज्जाए एगमेगं हिरण्णकोडिं दलयति, एगमेगं  
 सुवण्णकोडिं दलयति, एगमेगं मउडं मउडप्पवरं दलयति, एवं तं चेव सच्चं जाव एगमेगं पेसणकारिं दलयति,

अन्नं वा सुबहुं हिरण्णं वा जाव परियाभाएउं।

तए णं से महब्बले कुमारे उप्पिं पासायवरगए जहा जमाली) जाव विहरति।

[५२३] तेणं कालेणं तेणं समएणं विमलस्स अरहओ पओप्पए धम्मघोसे नामं अणगारे जातिसंपन्ने वण्णओ जहा केसिसामिस्स जाव पंचहिं अणगारसएहिं सद्धिं संपरिवुडे पुव्वाणुपुत्विं चरमाणे गामाणुगामं दूतिज्जमाणे जेणेव हत्थिणापुरे नगरे जेणेव सहसंबवणे उज्जाणे तेणेव उवागच्छति, उवा० २ अहापडिरूवं उग्गहं ओगिण्हति, ओ० २ संजमेणं तवसा अप्पाणं भावेमाणे विहरति।

तए णं हत्थिणापुरे नगरे सिंघाडग-तिय जाव परिसा पज्जुवासति।

तए णं तस्स महब्बलस्स कुमारस्स तं महया जणसद्धं वा जणवूहं वा एवं जहा जमाली तहेव चिंता, तहेव कंचुइज्जपुरिसं सद्दावेइ, कंचुइज्जपुरिसे वि तहेव अक्खाति, नवरं धम्मघोसस्स अणगारस्स आगमणगहियविणिच्छए करयल जाव निग्गच्छति। एवं खलु देवाणुप्पिया! विमलस्स अरहतो पउप्पए धम्मघोसे नामं अणगारे सेसं तं चेव जाव सो वि तहेव रहवरेणं निग्गच्छति। धम्मकहा जहा केसिसामिस्स। सो वि तहेव अम्मापियरं आपुच्छति, नवरं धम्मघोसस्स अणगारस्स अंतियं मुंडे भविता अगारातो अणगारियं पव्वइत्तए तहेव वुत्तपडिवुत्तिया नवरं इमाओ य ते जाया! विउलरायकुलबालियाओ कला० सेसं तं चेव जाव ताहे अकामाइं चेव महब्बलकुमारं एवं वदासी-तं इच्छामो ते जाया! एगदिवसमवि रज्जसिरिं पासित्तए।

तए णं से महब्बले कुमारे अम्मा-पिउवयणमणुयत्तमाणे तुसिणीए संचिट्ठइ।

तए णं से बले राया कोडुंबियपुरिसे सद्दावेइ, एवं जहा सिवभद्धस्स तहेव रायाभिसेओ भाणितव्वो जाव अभिसिंचंति, अभिसिंचिता करतलपरि० महब्बलं कुमारं जएणं विजएणं वद्धावैति, जएणं विजएणं वद्धावित्ता एवं वयासी-भण जाया! किं देमो? किं पयच्छामो? सेसं जहा जमालिस्स तहेव, जाव

तए णं से महब्बले अणगारे धम्मघोसस्स अणगारस्स अंतियं सामाइयमाइयाइं चोद्धस पुव्वाइं अहिज्जति, अहिज्जिता बहूहिं चउत्थ जाव विचित्तेहिं तवोकम्महिं अप्पाणं भावेमाणे बहुपडिपुण्णाइं दुवालस वासाइं सामण्णपरियागं पाउणति, बहु० पा० २ मासियाए संलेहणाए सट्ठिं भताइं अणसणाए० आलोइयपडिक्कंते समाहिपते कालमासे कालं किच्चा उड्ढं चंदिमसूरिय जहा अम्मडो जाव बंभलोए कप्पे देवताए उववन्ने। तत्थ णं अत्थेगइयाणं देवाणं दस सागरोवमाइं ठिती पण्णत्ता। तत्थ णं महब्बलस्स वि देवस्स दस सागरोवमाइं ठिती पन्नत्ता।

[५२४] से णं तुमं सुदंसणा! बंभलोए कप्पे दस सागरोवमाइं दिव्वाइं भोगभोगाइं भुंजमाणे विहरित्ता तओ चेव देवलोगाओ आउक्खएणं ठित्तिक्खएणं भवक्खएणं अणंतरं चयं चइत्ता इहेव वाणियग्गामे नगरे सेट्ठिकुलंसि पुमत्ताए पच्चायाए। तए णं तुमे सुदंसणा! उम्मक्कबालभावेणं विण्णयपरिणयमेत्तेणं जोव्वणगमणुप्पत्तेणं तहारूवाणं थेराणं अंतियं केवलिपण्णत्ते धम्मं निसंते, से वि य धम्मं इच्छिण पडिच्छिण अभिरुइते, तं सुट्ठु णं तुमं सुदंसणा! इदाणिं पि करेसि। सेतेणट्ठेणं सुदंसणा! एवं वुच्चति 'अत्थि णं एतेसिं पलिओवमसागरोवमाणं खए ति वा, अवचए ति वा'।

तए णं तस्स सुदंसणस्स सेट्ठिस्स समणस्स भगवओ महावीरस्स अंतियं एयमट्ठं सोच्चा निसम्म सुभेणं अज्झवसाणेणं, सोहणेणं परिणामेणं, लेसाहिं विसुज्झमाणीहिं, तदावरणिज्जाणं कम्माणं खओवसमेणं ईहापोह-मग्गण-गवेसणं करेमाणस्स सण्णीपुव्वजातीसरणे समुप्पन्ने, एतमट्ठं सम्मं

अभिसमेति।

तए णं से सुदंसणे सेट्ठी समणेणं भगवया महावीरेणं संभारियपुव्वभवे दुगुणाणी य सड्ढसंवेगे आणंदंसुपुण्णनयणे समणं भगवं महावीरं तिक्खुतो आयाहिणं पयाहिणं करेति, आ० क० २ वंदति नमंसति, वं० २ एवं वयासी--एवमेयं भंते! जाव से जहेयं तुब्भे वदह, ति कट्पु उत्तरपुरत्थिमं दिसीभागं अवक्कमति सेसं जहा उसभदत्तस्स जाव सव्वदुक्खप्पहीणे, नवरं चोद्धस पुव्वाइं अहिज्जति, बहुपडिपुण्णाइं दुवालस वासाइं सामण्णपरियागं पाउणति। सेसं तं चेव।

सेवं भंते! सेवं भंते! ति०।

**\*एक्कारसमे सए एकारसमो उद्देशो समतो\***

### ० बारसमो उद्देशओ ०

**[५२५]** तेणं कालेणं तेणं समएणं आलभिया नामं नगरी होत्था। वण्णओ। संखवणे चेतिए। वण्णओ।

तत्थ णं आलभियाए नगरीए बहवे इसिभद्दपुत्तपामोक्खा समणोवासया परिवसंति अड्ढा जाव अपरिभूता अभिगयजीवाजीवा जाव विहरंति।

तए णं तेसिं समणोवासयाणं अन्नया कयाइ एगयओ समुवागयाणं सहियाणं समुपविट्ठाणं सन्निसन्नाणं अयमेयारूवे मिहो कहासमुल्लावे समुप्पज्जित्थादेवलोगेसु णं अज्जो! देवाणं केवतियं कालं ठिती पण्णत्ता?

तए णं से इसिभद्दपुत्ते समणोवासए देवट्ठितीगहियट्ठे ते समणोवासए एवं वयासी-देवलोगेसु णं अज्जो! देवाणं जहन्नेणं दस वाससहस्साइं ठिती पण्णत्ता, तेणं परं समयाहिया दुसमयाहिया तिसमयाहिया जाव दससमयाहिया संखेज्जसमयाहिया असंखेज्जसमयाहिया; उक्कोसेणं तेतीसं सागरोवमाइं ठिती पन्नत्ता। तेण परं वोच्छिन्ना देवा य देवलोगा य।

तए णं ते समणोवासगा इसिभद्दपुत्तस्स समणोवासगस्स एवमाइक्खमाणस्स जाव एवं परूवेमाणस्स एयमट्ठं नो सद्धंति नो पत्तियंति नो रोएंति, एयमट्ठं असद्धहमाणा अपत्तियमाणा अरोएमाणा जामेव दिसं पाउब्भूया तामेव दिसं पडिगया।

**[५२६]** तेणं कालेणं तेणं समएणं समणे भगवं महावीरे जाव समोसडे जाव परिसा पज्जुवासति।

तए णं ते समणोवासगा इमीसे कहाए लद्धट्ठा समाणा हट्ठतुट्ठा एवं जहा तुंगिउद्देशए जाव पज्जुवासंति।

तए णं समणे भगवं महावीरे तेसिं समणोवासगाणं तीसे य महति० धम्मकहा जाव आणाए आराहए भवति।

तए णं ते समणोवासया समणस्स भगवओ महावीरस्स अंतियं धम्मं सोच्चा निसम्म हट्ठतुट्ठो उट्ठाए उट्ठेति, उ० २ समणं भगवं महावीरं वंदंति नमंसंति, वं० २ एवं वदासी--एवं खलु भंते! इसिभद्दपुत्ते समणोवासए अम्हं एवं आइक्खति जाव परूवेति--देवलोएसु णं अज्जो! देवाणं जहन्नेणं दसवाससहस्साइं ठिती पन्नत्ता, तेण परं समयाहिया जाव तेण परं वोच्छिन्ना देवा य देवलोगा य। से

कहमेतं भंते! एवं?

अज्जो!'ति समणे भगवं महावीरे ते समणोवासए एवं वयासी-जं णं अज्जो! इसिभद्दपुते समणोवासए तुब्भं एवं आइक्खइ जाव परूवेइ-देवलोगेसु णं अज्जो! देवाणं जहन्नेणं दस वाससहस्साइं ठिई पण्णत्ता तेण परं समयाहिया जाव तेण परं वोच्छिन्ना देवा य देवलोगा य, सच्चे णं एसमट्ठे। अहं पि णं अज्जो! एवमाइक्खामि जाव परूवेमि--देवलोगेसु णं अज्जो! देवाणं जहन्नेणं दस वाससहस्साइं० तं चेव जाव वोच्छिन्ना देवा य देवलोगा य। सच्चे णं एसे अट्ठे।

तए णं ते समणोवासगा समणस्स भगवओ महावीरस्स अंतियं एयमट्ठं सोच्चा निसम्म समणं भगवं महावीरं वंदंति नमंसंति, वं० २ जेणेव इसिभद्दपुते समणोवासए तेणेव उवागच्छंति, उवा० २ इसिभद्दपुतं समणोवासगं वंदंति नमंसंति, वं० २ एयमट्ठं सम्मं विणएणं भुज्जो भुज्जो खामैति।

तए णं ते समणोवासया पसिणाइं पुच्छंति, प० पु० २ अट्ठाइं परियादियंति, अ० प० २ समणं भगवं महावीरं वंदंति नमंसंति, वं० २ जामेव दिसं पाउब्भूता तामेव दिसं पडिगया।

**[५२७]** भंते!' ति भगवं गोयमे समणं भगवं महावीरं वंदंति णमंसंति, वं० २ एवं वयासी-पभू णं भंते! इसिभद्दपुते समणोवासए देवाणुप्पियाणं अंतियं मुंडे भविता अगारातो अणगारियं पट्वइत्तए? णो इणट्ठे समट्ठे, गोयमा! इसिभद्दपुते णं समणोवासए बहूहिं सीलव्वत-गुणव्वत-वेरमण-पच्चक्खाण-पोसहोववासेहिं अहापरिग्गहितेहिं तवोकम्महेहिं अप्पाणं भावेमाणे बहूइं वासाइं समणोवासगपरियागं पाउणिहिति, ब० पा० २ मासियाए संलेहणाए अत्ताणं झूसेहिति, मा० झू० २ सट्ठिं भत्ताइं अणसणाए छेदेहिति, स० छे० २ आलोइयपडिक्कंते समाहिपत्ते कालमासे कालं किच्चा सोहम्मं कप्पे अरुणाभे विमाणे देवताए उववज्जिहिति। तत्थ णं अत्थेगतियाणं देवाणं चत्तारि पलिओवमाइं ठिती पण्णत्ता। तत्थ णं इसिभद्दपुत्तस्स वि देवस्स चत्तारि पलिओवमाइं ठिती भविस्सति।

से णं भंते! इसिभद्दपुते देवे ताओ देवलोगाओ आउक्खएणं भवक्खएणं ठिइक्खएणं जाव कहिं उववज्जिहिति? गोयमा! महाविदेहे वासे सिज्झिहिति जाव अंतं काहिति।

सेवं भंते! सेवं भंते! ति भगवं गोयमे जाव अप्पाणं भावेमाणे विहरति।

**[५२८]** तए णं समणे भगवं महावीरे अन्नया कयाइ आलभियाओ नगरीओ संखवणाओ चेतियाओ पडिनिक्खमति, प० २ बहिया जणवयविहारं विहरति।

तेणं कालेणं तेणं समएणं आलभिया नामं नगरी होत्था। वण्णओ। तत्थ णं संखवणे णामं चेइए होत्था। वण्णओ। तस्स णं संखवणस्स चेतियस्स अदूरसामंते मोग्गले नामं परिट्वायए परिवसति रिजुव्वेद-यजुव्वेद जाव नयेसु सुपरिनिट्ठिणं छट्ठंछट्ठेणं अणिक्खित्तेणं तवोकम्मेणं उड्ढं बाहाओ जाव आयावेमाणे विहरति।

तए णं तस्स मोग्गलस्स परिट्वायगस्स छट्ठंछट्ठेणं जाव आयावेमाणस्स पगतिभद्दयाए जहा सिवस्स जाव विब्भंगे नामं णाणे समुप्पन्ने। से णं तेणं विब्भंगेणं णाणेणं समुप्पन्नेणं बंभलोए कप्पे देवाणं ठितिं जाणति पासति।

तए णं तस्स मोग्गलस्स परिट्वायगस्स अयमेयारूवे अज्झत्थिए जाव समुप्पज्जित्था- 'अत्थि णं ममं अतिसेसे नाण-दंसणे समुप्पन्ने, देवलोएसु णं देवाणं जहन्नेणं दसवाससहस्साइं ठिती पन्नत्ता, तेण परं समयाहिया दुसमयाहिया जाव असंखेज्जसमयाहिया; उक्कोसेणं दससागरोवमाइं ठिती

पन्नता, तेण परं समयाहिया दुसमयाहिया जाव असंखेज्जसमयाहिया; उक्कोसेणं दससागरोवमाइं ठिती पन्नता, तेण परं वोच्छिन्ना देवा य देवलोगा य। एवं संपेहेति, एवं सं० २ आयावणभूमीओ पच्चोरुभति, आ० प० २ तिदंड-कुंडिय जाव धाउरत्ताओ य गेण्हति, गे० २ जेणेव आलभिया नगरी जेणेव परिव्वायगावसहे तेणेव उवागच्छति, ते० ३० २ भंडनिक्खेवं करेति, भं० क० २ आलभियाए नगरीए सिंघाडग जाव पहेसु अन्नमन्नस्स एवमाइक्खति जाव परूवेति--अत्थि णं देवाणुप्पिया! ममं अतिसेसे नाण-दंसणे समुप्पन्ने, देवलोएसु णं देवाणं जहन्नेणं दसवाससहस्साइं० तं चेव जाव वोच्छिन्ना देवा य देवलोगा य।

तए णं आलभियाए नगरीए एवं एएणं अभिलावेणं जहा सिवस्स जाव से कहमेयं मन्ने एवं?

सामी समोसडे जाव परिसा पडिगया। भगवं गोयमे तहेव भिक्खायरियाए तहेव बहुजणसदं निसामेति, तहेव सत्वं भाणियत्वं जाव अहं पुण गोयमा! एवं आइक्खामि एवं भासामि जाव परूवेमि- देवलोएसु णं देवाणं जहन्नेणं दसवाससहस्साइं ठिती पन्नता, तेण परं समयाहिया दुसमयाहिया जाव उक्कोसेणं तेतीसं सागरोवमाइं ठिती पन्नता; तेणं परं वोच्छिन्ना देवा य देवलोगा य।

अत्थि णं भंते! सोहम्मं कप्पे दव्वाइं सवण्णाइं पि अवण्णाइं पि तहेव जाव हंता, अत्थि।

एवं ईसाणे वि। एवं जाव अच्चुए। एवं गेविज्जविमाणेसु, अणुतरविमाणेसु वि, ईसिपब्भाराए वि जाव हंता, अत्थि।

तए णं सा महतिमहालिया जाव पडिगया।

तए णं आलभियाए नगरीए सिंघाडग-तिय० अवसेसं जहा सिवस्स जाव सत्त्वदुक्खप्पहीणे, नवरं तिदंड-कुंडियं जाव धाउरत्तवत्थपरिहिए परिवडियविब्भंगे आलभियं नगरिं मज्झंमज्झेणं निग्गच्छति जाव उत्तरपुरत्थिमं दिसीभागं अवक्कमति, उत्तर० अ० २ तिदंड-कुंडियं च जहा खंदओ जाव पव्वइओ। सेसं जहा सिवस्स जाव अच्चाबाहं सोक्खं अणुहुंते(ती) सासतं सिद्धा।

सेवं भंते! सेवं भंते! ति०।

**\*एक्कारसमे सए बारसमो उद्देशो समतो\***

**०-एक्कारसमं सयं समत्तं-०**

**० मुनि दीपरत्तसागरेण संशोधितः सम्पादितश्च एककारसमं सतं समत्तं ०**

**[ ] बारसमं सयं [ ]**

**[५२९]** संखे जयंति पुढवी पोग्गल अइवाय हाहु लोग य।  
नागे य देव आया १ बारसमसए दसुद्देशा ॥

**० पढमो उद्देशो ०**

**[५३०]** तेणं कालेणं तेणं समएणं सावत्थी नामं नगरी होत्था। वण्णओ। कोट्ठए चेतिए।  
वण्णओ।

तत्थ णं सावत्थीए नगरीए बहवे संखपामोक्खा समणोवासगा परिवसंति अइढा जाव अपरिभूया अभिगयजीवाजीवा जाव विहरंति।

तस्स णं संखस्स समणोवासगस्स उप्पला नामं भारिया होत्था, सुकुमाल जाव सुरूवा

समणोवासिया अभिगयजीवाजीवा जाव विरहति।

तत्थ णं सावत्थीए नगरीए पोक्खली नामं समणोवासए परिवसति अड्ढे अभिगय जाव विहरति।

तेणं कालेणं तेणं समएणं सामी समोसडे। परिसा निग्गया जाव पज्जुवासइ।

तए णं ते समणोवासगा इमीसे जहा आलभियाए जाव पज्जुवासंति।

तए णं समणे भगवं महावीरे तेसिं समणोवासगाणं तीसे य महतिमहालियाए० धम्मकहा जाव परिसा पडिगया।

तए णं ते समणोवासगा समणस्स भगवओ महावीरस्स अंतियं धम्मं सोच्चा निसम्म हट्ठतुट्ठ० समणं भगवं महावीरं वंदंति नमंसंति, वं० २ पसिणाइं पच्छंति, प० पु० २ अट्ठाइं परियादियंति, अ० प० २ उट्ठाए उट्ठेति, उ० २ समणस्स भगवओ महावीरस्स अंतियाओ कोट्ठगाओ चेतियाओ पडिनिक्खमंति, प० २ जेणेव सावत्थी नगरी तेणेव पाहारेत्थ गमणाए।

**[५३१]** तए णं से संखे समणोवासए ते समणोवासए एवं वदासी--तुब्भे णं देवाणुप्पिया! विपुलं असण-पाण-खाइम-साइमं उवक्खडावेह। तए णं अम्हे तं विपुलं असण-पाण-खाइम-साइमं आसाएमाणा विस्साएमाणा परिभाएमाणा परिभुंजेमाणा पक्खियं पोसहं पडिजागरमाणा विहरिस्सामो।

तए णं ते समणोवासगा संखस्स समणोवासगस्स एयमट्ठं विणएणं पडिसुणंति।

तए णं तस्स संखस्स समणोवासगस्स अयमेयारूवे अज्झत्थिए जाव समुप्पज्जित्था--'नो खलु मे सेयं तं विउलं असणं जाव साइमं आसाएमाणस्स विस्सादेमाणस्स परिभाएमाणस्स परिभुंजेमाणस्स पक्खियं पोसहं पडिजागरमाणस्स विहरत्तए। सेयं खलु मे पोसहसालाए पोसहियस्स बंधयारिस्स उम्मक्कमणि-सुवण्णस्स ववगयमाला-वण्णग-विलेवणस्स निक्खित्तसत्थ-मुसलस्स एगस्स अब्बिइयस्स दब्भसंथारोवगयस्स पक्खियं पोसहं पडिजागरमाणस्स विहरत्तए'ति कट्पु एवं संपेहेति, ए० सं० २ जेणेव सावत्थी नगरी जेणेव सए गिहे जेणेव उप्पला समणोवासिया तेणेव उवागच्छति, उवा० २ उप्पलं समणोवासियं आपुच्छति, उ० आ० २ जेणेव पोसहसाला तेणेव उवागच्छति, उवा० २ उप्पलं समणोवासियं आपुच्छति, उ० आ० २ जेणेव पोसहसाला तेणेव उवागच्छति, उवा० २ पोसहसालं अणुपविसति, पो० अ० २ पोसहसालं पमज्जति, पो० प० २ उच्चारपासवणभूमिं पडिलेहेति, उ० प० २ दब्भसंथारगं संथरति, द० सं० २ दब्भसंथारगं द्रुहइ, द्रु० २ पोसहसालाए पोसहिए बंधचारी जाव पक्खियं पोसहं पडिजागरमाणे विहरति।

तए णं ते समणोवासगा जेणेव सावत्थी नगरी जेणेव साइं साइं गिहाइं तेणेव उवागच्छंति, ते० उ० २ विपुलं असण-पाण-खाइम-साइमं उवक्खडावेति, उ० २ अन्नमन्ने सद्दावेति, अन्न० स० २ एवं वयासी--'एवं खलु देवाणुप्पिया! अम्हेहिं से विउले असण-पाण-खाइम-साइमे उवक्खडाविते, संखे य णं समणोवासए नो हव्वमागच्छइ। तं सेयं खलु देवाणुप्पिया! अम्हं संखं समणोवासगं सद्दावेत्तए।'

तए णं से पोक्खली समणोवासए ते समणोवासए एवं वयासी--'अच्छह णं तुब्भे देवाणुप्पिया! सुनिव्वुया वीसत्था, अहं णं संखं समणोवासगं सद्दावेमि'ति कट्पु तेसिं समणोवासगाणं अंतियाओ पडिनिक्खमति, प० २ सावत्थीनगरीमज्झंमज्झेणं जेणेव संखस्स समणोवासयस्स गिहे तेणेव उवागच्छति, ते० उ० २ संखस्स समणोवासगस्स गिहं अणुपविट्ठे।

तए णं सा उप्पला समणोवासिया पोक्खलिं समणोवासगं एज्जमाणं पासति, पा० २ हट्ठतुट्ठ० आसणातो अब्भुट्ठेति, आ० अ० २ सत्तट्ठ पदाइं अणुगच्छति, स० अ० २ पोक्खलिं समणोवासगं वंदति नमंसति, वं० २ आसणेणं उवनिमंतेति, आ० उ० २ एवं वयासी--संदिसंतु णं देवाणुप्पिया! किमागमणप्पयोयणं? तए णं से पोक्खली समणोवासए उप्पलं समणोवासियं एवं वयासी--कहिं णं देवाणुप्पिए! संखे समणोवासए? तए णं सा उप्पला समणोवासिया पोक्खलिं समणोवासगं एवं वयासी--एवं खलु देवाणुप्पिया! संखे समणोवासए पोसहसालाए पोसहिए बंभयारी जाव विहरति।

तए णं से पोक्खली समणोवासए जेणेव पोसहसाला जेणेव संखे समणोवासए तेणेव उवागच्छति, उवा० २ गमणागमणाए पडिक्कमति, ग० प० २ संखं समणोवासगं वंदति नमंसति, वं० २ एवं वयासी--एवं खलु देवाणुप्पिया! अम्हेहिं से विउले असण जाव साइमे उवक्खडाविते, तं गच्छामो णं देवाणुप्पिया! तं विउलं असणं जाव साइमं आसाएमाणा जाव पडिजागरमाणा विहरामो।

तए णं से संखे समणोवासए पोक्खलिं समणोवासगं एवं वयासी--'णो खलु कप्पति देवाणुप्पिया! तं विउलं असणं पाणं खाइमं साइमं आसाएमाणस्स जाव पडिजागरमाणस्स विहरितए। कप्पति मे पोसहसालाए पोसहियस्स जाव विहरितए। तं छंदेणं देवाणुप्पिया! तुब्भे तं विउलं असणं पाणं खाइमं साइमं आसाएमाणा जाव विहरह'।

तए णं से पोक्खली समणोवासगे संखस्स समणोवासगस्स अंतियाओ पोसहसालाओ पडिनिक्खमति, पडि० २ सावत्थिं नगरिं मज्झमज्झेणं जेणेव ते समणोवासगा तेणेव उवागच्छति, ते० उ० २ ते समणोवासए एवं वयासी--एवं खलु देवाणुप्पिया! संखे समणोवासए पोसहसालाए पोसहिए जाव विहरति। तं छंदेणं देवाणुप्पिया! तुब्भे विउलं असण-पाण-खाइम-साइमं जाव विहरह। संखे णं समणोवासए नो हव्वमागच्छति।

तए णं ते समणोवासगा तं विउलं असण-पाण-खाइम-साइमं आसाएमाणा जाव विहरंति।

तए णं तस्स संखस्स समणोवासगस्स पुव्वरत्तावरत्तकालसमयंसि धम्मजागरियं जागरमाणस्स अयमेयारूवे जाव समुप्पज्जित्था--'सेयं खलु मे कल्लं पादु० जाव जलंते समणं भगवं महावीरं वंदित्ता नमंसित्ता जाव पज्जुवासित्ता तओ पडिनियत्तस्स पक्खियं पोसहं पारित्तए'ति कट्पु एवं संपेहेति, एवं सं० २ कल्लं जाव जलंते पोसहसालाओ पडिनिक्खमति, पो० प० २ सुद्धप्पावेसाइं मंगल्लाइं वत्थाइं पवर परिहिते सयातो गिहातो पडिनिक्खमति, स० प० २ पायविहारचारेणं सावत्थिं णगरिं मज्झमज्झेणं जाव पज्जुवासति। अभिगमो नत्थि।

तए णं ते समणोवासगा कल्लं पादु० जाव जलंते ण्हाया कयबलिकम्मा जाव सरीरा सएहिं सएहिं गिहेहितो पडिनिक्खमति, स० प० २ एगयओ मिलायंति, एगयओ मिलाइत्ता सेसं जहा पढमं जाव पज्जुवासंति।

तए णं समणे भगवं महावीरे तेसिं समणोवासगाणं तीसे य० धम्मकहा जाव आणाए आराहए भवति।

तए णं ते समणोवासगा समणस्स भगवओ महावीरस्स अंतियं धम्मं सोच्चा निसम्म हट्ठतुट्ठ० उट्ठाए उट्ठेति, उ० २ समणं भगवं महावीरं वंदंति नमंसंति, वं० २ जेणेव संखे समणोवासए तेणेव उवागच्छंति, उवा० २ संखं समणोवासयं एवं वयासी--'तुमं णं देवाणुप्पिया! हिज्जो अम्हे अप्पणा

चेव एवं वदासी 'तुब्भे णं देवाणुप्पिया! विउलं असणं जाव विहरिस्सामो'। तए णं तुमं पोसहसालाए जाव विहरिए तं सुट्ठु णं तुमं देवाणुप्पिया! अम्हं हीलसि।"

अज्जो!' ति समणे भगवं महावीरे ते समणोवासए एवं वयासी- मा णं अज्जो! तुब्भे संखं समणोवासगं हीलह, निंदह, खिंसह, गरहह, अवमन्नह। संखे णं समणोवासए पियधम्मं चेव, सुदक्खुजागरियं जागरिते।

**[५३२]** भंते!' ति भगवं गोयमे समणं भगवं महावीरं वंदति नमंसति, वं० २ एवं वयासी- कइविधा णं भंते! जागरिया पन्नता? गोयमा! तिविहा जागरिया पन्नता, तं जहा- बुद्धजागरिया, अबुद्धजागरिया, सुदक्खुजागरिया ।

से केणट्ठेणं भंते! एवं वुच्चति 'तिविहा जागरिया पन्नता, तं जहा—बुद्धजागरिया, अबुद्धजागरिया, सुदक्खुजागरिया? गोयमा! जे इमे अरहंता भगवंतो उप्पन्ननाण-दंसणधरा जहा खंदए जाव सव्वण्णू सव्वदरिसी, एए णं बुद्धा बुद्धजागरियं जागरंति। जे इमे अणगारा भगवंतो इरियासमिता भासासमिता जाव गुतबंभचारी, एए णं अबुद्धा अबुद्धजागरियं जागरंति। जे इमे समणोवासगा अभिगयजीवाजीवा जाव विहरंति एते णं सुदक्खुजागरियं जागरंति। सेतेणट्ठेणं गोयमा! एवं वुच्चति 'तिविहा जागरिया जाव सुदक्खुजागरिया'।

**[५३३]** तए णं से संखे समणोवासए समणं भगवं महावीरं वंदति नमंसति, वंदिता २ एवं वयासी--कोहवसट्ठो णं भंते! जीवे किं बंधति? किं पकरेति? किं चिणाति? किं उवचिणाति?

संखा! कोहवसट्ठो णं जीवे आउयवज्जाओ सत कम्मपगडीओ सिढिलबंधणबद्धाओ एवं जहा पढमसते असंवुडस्स अणगारस्स जाव अणुपरियट्ठइ।

माणवसट्ठो णं भंते! जीवे०? एवं चेव।

एवं मायावसट्ठो वि। एवं लोभवसट्ठो वि जाव अणुपरियट्ठइ।

तए णं ते समणोवासगा समणस्स भगवओ महावीरस्स अंतियं एयमट्ठं सोच्चा निसम्म भीता तत्था तसिया संसारभउच्चिग्गा समणं भगवं महावीरं वंदंति, नमंसति, वं० २ जेणेव संखे समणोवासए तेणेव उवागच्छंति, उवा० २ संखं समणोवासगं वंदंति नमंसति, वं० २ एयमट्ठं सम्मं विणएणं भुज्जो भुज्जो खामंति।

तए णं ते समणोवासगा सेसं जहा आलभियाए जाव पडिगता।

भंते!'ति भगवं गोयमे समणं भगवं महावीरं वंदति नमंसति, वंदिता नमंसिता एवं वयासी-- पभू णं भंते! संखे समणोवासए देवाणुप्पियाणं अंतियं सेसं जहा इसिभद्वपुत्तस्स जाव अंतं काहिति।

सेवं भंते! सेवं भंते! ति जाव विहरति।

**\*बारसमे सए पढमो उद्देशो समतो \***

## ० बीओ उद्देशो ०

**[५३४]** तेणं कालेणं तेणं समएणं कोसंबी नामं नगरी होत्था। वण्णओ। चंदोवतरणे चेतिए। वण्णओ।

तत्थ णं कोसंबीए नगरीए सहस्साणीयस्स रण्णो पोते, सयाणीयस्स रण्णो पुते, चेडगस्स

रण्णो नत्तुए, मिगावतीए देवीए अत्तए, जयंतीए समणोवासियाए भत्तिज्जए उदयणे नामं राया होत्था। वण्णओ।

तत्थ णं कोसंबीए नगरीए सहस्साणीयस्स रण्णो सुण्हा, सयाणीयस्स रण्णो भज्जा, चेडगस्स रण्णो धूया, उदयणस्स रण्णो माया, जयंतीए समणोवासियाए भाउज्जा मिगावती नामं देवी होत्था। सुकुमाल० जाव सुरूवा समणोवासिया जाव विहरइ।

तत्थ णं कोसंबीए नगरीए सहस्साणीयस्स रण्णो धूता, सताणीयस्स रण्णो भगिणी, उदयणस्स रण्णो पितुच्छा, मिगावतीए देवीए नणंदा, वेसालीसावगाणं अरहंताणं पुच्चसेज्जायरी जयंती नामं समणोवासिया होत्था। सुकुमाल० जाव सुरूवा अभिगत जाव विहरइ।

**[५३५]** तेणं कालेणं तेणं समएणं सामी समोसढे जाव परिसा पज्जुवासति।

तए णं से उदयणे राया इमीसे कहाए लद्धट्ठे समाणे हट्ठतुट्ठे कोडुंबियपुरिसे सद्दावेति, को० स० २ एवं वयासी-

खिप्पामेव भो देवाणुप्पिया! कोसंबिं नगरिं सच्चिंततरबाहिरियं एवं जहा कूणिओ तहेव सच्चं जाव पज्जुवासइ।

तए णं सा जयंती समणोवासिया इमीसे कहाए लद्धट्ठा समाणी हट्ठतुट्ठा जेणेव मियावती देवी तेणेव उवागच्छति, उवा० २ मियावतिं देविं एवं वयासी--एवं जहा नवमसए उसभदत्तो जाव भविस्सति।

तए णं सा मियावती देवी जयंतीए समणोवासियाए जहा देवाणंदा जाव पडिसुणेति।

तए णं सा मियावती देवी कोडुंबियपुरिसे सद्दावेति, को० स० २ एवं वयासी-

खिप्पामेव भो देवाणुप्पिया! लहुकरणजुत्तजोइय० जाव धम्मियं जाणप्पवरं जुतामेव उवट्ठवेह जाव उवट्ठवेति जाव पच्चप्पिणंति।

तए णं सा मियावती देवी जयंतीए समणोवासियाए सद्धिं ण्हाया कयबलिकम्मा जाव सरीरा बहूहिं खुज्जाहिं जाव अंतेउराओ निग्गच्छति, अं० नि० २ जेणेव बाहिरिया उवट्ठाणसाला जेणेव धम्मिए जाणप्पवरे तेणेव उवागच्छति, ते० उ० २ जाव रूढा।

तए णं सा मियावती देवी जयंतीए समणोवासियाए सद्धिं धम्मियं जाणप्पवरं रूढा समाणी णियगपरियाल० जहा उसभदत्तो जाव धम्मियाओ जाणप्पवराओ पच्चोरुहति।

तए णं सा मियावती देवी जयंतीए समणोवासियाए सद्धिं बहूहिं खुज्जाहिं जहा देवाणंदा जाव वंदति नमंसति, वं० २ उदयणं रायं पुरओ कट्ु ठिया चेव जाव पज्जुवासइ।

तए णं समणे भगवं महावीरे उदयणस्स रण्णो मियावतीए देवीए जयंतीए समणोवासियाए तीसे य महतिमहा० जाव धम्मं परिकहेति जाव परिसा पडिगता, उदयणे पडिगए, मियावती वि पडिगया।

**[५३६]** तए णं सा जयंती समणोवासिया समणस्स भगवओ महावीरस्स अंतियं धम्मं सोच्चा निसम्म हट्ठतुट्ठा समणं भगवं महावीरं वंदइ नमंसइ, वं० २ एवं वयासी-

-कहं णं भंते! जीवा गरुयत्तं हव्वमागच्छंति? जयंती! पाणातिवातेणं जाव मिच्छादंसण-सल्लेणं, एवं खलु जीवा गरुयत्तं हव्वमागच्छंति। एवं जहा पढमसते जाव वीतीवयंति।

भवसिद्धियत्तणं भंते! जीवाणं किं सभावओ, परिणामओ? जयंती! सभावओ, नो परिणामओ।

सव्वे वि णं भंते! भवसिद्धीया जीवा सिज्झिस्संति? हंता, जयंती! सव्वे वि णं भवसिद्धीया जीवा सिज्झिस्संति।

जइ णं भंते! सव्वे भवसिद्धीया जीवा सिज्झिस्संति तम्हा णं भवसिद्धीयविरहिए लोए भविस्सइ? णो इणट्ठे समट्ठे।

से केणं खाइ णं अट्ठेणं भंते! एवं वुच्चइ--सव्वे वि णं भवसिद्धीया जीवा सिज्झिस्संति, नो चेव णं भवसिद्धीयविरहिते लोए भविस्सति? जयंती! से जहानामए सव्वागाससेढी सिया अणादीया अणवदग्गा परिता परिवुडा, सा णं परमाणुपोग्गलमेतेहिं खंडेहिं समए समए अवहीरमाणी अवहीरमाणी अणंताहिं ओसप्पिणि-उस्सप्पिणीहिं अवहीरंती नो चेव णं अवहिया सिया, सेतेणट्ठेणं जयंती! एवं वुच्चइ सव्वे वि णं जाव भविस्सति।

सुत्तं भंते! साहू, जागरियत्तं साहू? जयंती! अत्थेगतियाणं जीवाणं सुत्तं साहू, अत्थेगतियाणं जीवाणं जागरियत्तं साहू।

से केणट्ठेणं भंते! एवं वुच्चइ 'अत्थेगतियाणं जाव साहू?' जयंती! जे इमे जीवा अहम्मिया अहम्माणुया अहम्मिट्ठा अहम्मक्खाई अहम्मपलोई अहम्मपलज्जणा अहम्मसमुदायारा अहम्मेणं चेव वित्तिं कप्पेमाणा विहरंति, एएसि णं जीवाणं सुत्तं साहू। एए णं जीवा सुत्ता समाणा नो बहूणं पाणाणं भूयाणं जीवाणं सत्ताणं दुक्खणयाए सोयणयाए जाव परियावणयाए वट्ठंति। एए णं जीवा सुत्ता समाणा अप्पाणे वा परं वा तदुभयं वा नो बहूहिं अहम्मियाहिं संजोयणाहिं संजोएत्तारो भवंति। एएसिं णं जीवाणं सुत्तं साहू। जयंती! जे इमे जीवा धम्मिया धम्माणुया जाव धम्मेणं चेव वित्तिं कप्पेमाणा विहरंति, एएसि णं जीवाणं जागरियत्तं साहू। एए णं जीवा जागरा समाणा बहूणं पाणाणं जाव सत्ताणं अदुक्खणयाए जाव अपरियावणयाए वट्ठंति। एते णं जीवा जागरमाणा अप्पाणं वा परं वा तदुभयं वा बहूहिं धम्मियाहिं संजोयणाहिं संजोएत्तारो भवंति। एए णं जीवा जागरमाणा धम्मजागरियाए अप्पाणं जागरइत्तारो भवंति। एएसि णं जीवाणं जागरियत्तं साहू। सेतेणट्ठेणं जयंती! एवं वुच्चइ--'अत्थेगतियाणं जीवाणं सुत्तं साहू, अत्थेगतियाणं जीवाणं जागरियत्तं साहू।

बलियत्तं भंते! साहू, दुब्बलियत्तं साहू? जयंती! अत्थेगतियाणं जीवाणं बलियत्तं साहू, अत्थेगतियाणं जीवाणं दुब्बलियत्तं साहू।

से केणट्ठेणं भंते! एवं वुच्चइ 'जाव साहू?' जयंती! जे इमे जीवा अहम्मिया जाव विहरंति एएसि णं जीवाणं दुब्बलियत्तं साहू। एए णं जीवा0 एवं जहा सुत्तस्स तहा दुब्बलियस्स वत्तव्वया भाणियव्वा। बलियस्स जहा जागरस्स तहा भाणियव्वं जाव संजोएत्तारो भवंति, एएसि णं जीवाणं बलियत्तं साहू। सेतेणट्ठेणं जयंती! एवं वुच्चइ तं चेव जाव साहू।

दक्खत्तं भंते! साहू, आलसियत्तं साहू? जयंती! अत्थेगतियाणं जीवाणं दक्खत्तं साहू, अत्थेगतियाणं जीवाणं आलसियत्तं साहू।

से केणट्ठेणं भंते! एवं वुच्चति तं चेव जाव साहू? जयंती! जे इमे जीवा अहम्मिया जाव विहरंति, एएसि णं जीवाणं आलसियत्तं साहू, एए णं जीवा अलसा समाणा नो बहूणं जहा सुत्ता तहा अलसा भाणियव्वा। जहा जागरा तहा दक्खा भाणियव्वा जाव संजोएत्तारो भवंति। एए णं जीवा दक्खा समाणा बहूहिं आयरियवेयावच्चेहिं, उवज्झायवेयावच्चेहिं, थेरवेयावच्चेहिं, तवस्सिवेयावच्चेहिं, गिलाणवेयावच्चेहिं,

सेहवेयावच्चेहिं, कुलवेयावच्चेहिं, गणवेयावच्चेहिं, संघवेयावच्चेहिं, साहम्मियवेयावच्चेहिं अत्ताणं संजोएतारो भवंति। एतेसि णं जीवाणं दक्खतं साहू। सेतेणट्ठेणं तं चेव जाव साहू।

सोइंदियवसट्ठो णं भंते! जीवे किं बंधति? एवं जहा कोहवसट्ठो तहेव जाव अणुपरियट्ठइ।

एवं चक्खिंदियवसट्ठो वि। एवं जाव फासिंदियवसट्ठो जाव अणुपरियट्ठइ।

तए णं सा जयंती समणोवासिया समणस्स भगवओ महावीरस्स अंतियं एयमट्ठं सोच्चा

निसम्म हट्ठत्तुठा सेसं जहा देवाणंदाए तहेव पव्वइया जाव सव्वदुक्खप्पहीणा।

सेवं भंते! सेवं भंते! ति०।

**\*बारसमे सए बीइओ उद्देशो समतो \***

**० तइओ उद्देशो ०**

[५३७] रायगिहे जाव एवं वयासी--

कति णं भंते पुढवीओ पन्नताओ? गोयमा! सत्त पुढवीओ पन्नताओ, तं जहा-पढमा दोच्चा जाव सत्तमा। पढमा णं भंते! पुढवी किंनामा? किंगोत्ता पन्नता? गोयमा! घम्मा नामेणं, रयणप्पभा गोतेणं, एवं जहा जीवाभिगमे पढमो नेरइयउद्देशओ सो निरवसेसो भाणियव्वो जाव अप्पाबहुगं ति।

सेवं भंते! सेवं भंते ति०।

**\*बारसमे सए तइओ उद्देशो समतो \***

**० चउत्थो उद्देशो ०**

[५३८] रायगिहे जाव एवं वयासी--

० दो भंते! परमाणुपोग्गला एगयओ साहण्णंति, एगयओ साहण्णिता किं भवति? गोयमा! दुपदेसिए खंधे भवति। से भिज्जमाणे दुहा कज्जति। एगयओ परमाणुपोग्गले, एगयओ परमाणुपोग्गले भवति।

० तिन्नि भंते! परमाणुपोग्गला एगयओ साहण्णंति, एगयओ साहण्णिता किं भवति? गोयमा! तिपदेसिए खंधे भवति। से भिज्जमाणे दुहा वि, तिहा वि कज्जति। दुहा कज्जमाणे एगयओ परमाणुपोग्गले, एगयओ दुपदेसिए खंधे भवति। तिहा कज्जमाणे तिन्नि परमाणुपोग्गला भवंति।

० चत्तारि भंते! परमाणुपोग्गला एगयओ साहण्णंति पुच्छा। गोयमा! चउप्पएसिए खंधे भवति। से भिज्जमाणे दुहा वि, तिहा वि, तउहा वि कज्जइ। दुहा कज्जमाणे एगयओ परमाणुपोग्गले, एगयओ तिपदेसिए खंधे भवति; अहवा दो दुपदेसिया खंधा भवंति। तिहा कज्जमाणे एगयओ दो परमाणुपोग्गला, एगयओ दुपदेसिए खंधे भवति। चउहा कज्जमाणे चत्तारि परमाणुपोग्गला भवंति।

० पंच भंते! परमाणुपोग्गला० पुच्छा। गोयमा! पंचपदेसिए खंधे भवति। से भिज्जमाणे दुहा वि, तिहा वि, चउहा वि, पंचहा वि कज्जइ। दुहा कज्जमाणे एगयओ परमाणुपोग्गले, एगयओ चउपदेसिए खंधे भवति; अहवा एगयओ दुपदेसिए खंधे, एगयओ तिपदेसिए खंधे भवति। तिहा कज्जमाणे एगयओ दो परमाणुपोग्गला, एगयओ तिपदेसिए खंधे भवति; अहवा एगयओ परमाणुपोग्गले, एगयओ दो दुपदेसिया खंधा भवंति। चउहा कज्जमाणे एगयओ तिपिण परमाणुपोग्गला, एगयओ दुपदेसिए खंधे भवति। पंचहा कज्जमाणे पंच परमाणुपोग्गला भवंति।

० छब्भंते! परमाणुपोग्गला० पुच्छा। गोयमा! छप्पदेसिए खंधे भवइ। से भिज्जमाणे दुहा वि, तिहा वि, जाव छाहा वि कज्जइ। दुहा कज्जमाणे एगयओ परमाणुपोग्गले, एगयओ पंचपएसिए खंधे भवति; अहवा एगयओ दुपएसिए खंधे, एगयओ चउपदेसिए खंधे भवति; अहवा दो तिपदेसिया खंधा भवति। तिहा कज्जमाणे एगयओ दो परमाणुपोग्गला, एगयओ चउपएसिए खंधे भवति; अहवा एगयओ परमाणुपोग्गले, एगयओ दुपएसिए खंधे, एगयओ तिपदेसिए खंधे भवति; अहवा तिण्णिण दुपदेसिया खंधा भवति। चउहा कज्जमाणे एगयओ तिन्नि परमाणुपोग्गला, एगयओ तिपदेसिए खंधे भवति; अहवा एगयओ दो परमाणुपोग्गला, एगयओ दो दुपदेसिया खंधा भवति। पंचहा कज्जमाणे एगयओ चत्तारि परमाणुपोग्गला, एगयओ दुपएसिए खंधे भवति। छाहा कज्जमाणे छ परमाणुपोग्गला भवति।

० सत भंते! परमाणुपोग्गला० पुच्छा। गोयमा! सतपदेसिए खंधे भवति। से भिज्जमाणे दुहा वि जाव सतहा वि कज्जइ। दुहा कज्जमाणे एगयओ परमाणुपोग्गले, एगयओ छप्पएसिए खंधे भवति; अहवा एगयओ दुप्पएसिए खंधे, एगयओ पंचपदेसिए खंधे भवति; अहवा एगयओ तिप्पएसिए, एगयओ चउपएसिए खंधे भवति। तिहा कज्जमाणे एगयओ दो परमाणुपोग्गला, एगयओ पंचपएसिए खंधे भवति; अहवा एगयओ परमाणुपोग्गले, एगयओ दुपएसिए खंधे, एगयओ चउपएसिए खंधे भवति; अहवा एगयओ परमाणु०, एगयओ दो तिपएसिया खंधा भवति; अहवा एगयओ दो दुपएसिया खंधा, एगयओ तिपएसिए खंधे भवति; चउहा कज्जमाणे एगयओ तिन्नि परमाणुपोग्गला, एगयओ चउप्पएसिए खंधे भवति; अहवा एगयओ दो परमाणुपोग्गला, एगयओ दुपएसिए खंधे, एगयओ तिपएसिए खंधे भवति; अहवा एगयओ परमाणुपो०, एगयओ तिन्नि दुपएसिया खंधा भवति। पंचहा कज्जमाणे एगयओ चत्तारि परमाणुपोग्गला, एगयओ तिपएसिए खंधे भवति; अहवा एगयओ तिन्नि परमाणुपो०, एगयओ दो दुपएसिया खंधा भवति। छाहा कज्जमाणे एगयओ पंच परमाणुपोग्गला, एगयओ दुपदेसिए खंधे भवति। सतहा कज्जमाणे सत परमाणुपोग्गला भवति।

० अट्ठ भंते! परमाणुपोग्गला० पुच्छा। गोयमा! अट्ठपएसिए खंधे भवइ, जाव दुहा कज्जमाणे एगयओ परमाणु०, एगयओ सतपएसिए खंधे भवइ; अहवा एगयओ दुपदेसिए खंधे, एगयओ छप्पदेसिए खंधे भवइ; अहवा एगयओ तिपएसिए०, एगयओ पंचपदेसिए खंधे भवइ; अहवा दो चउप्पदेसिया खंधा भवति। तिहा कज्जमाणे एगयओ दो परमाणु०, एगयओ छप्पएसिए खंधे भवइ; अहवा एगयओ परमाणु०, एगयओ दुपएसिए खंधे, एगयओ पंचप्पएसिए खंधे भवति; अहवा एगयओ परमाणु०, एगयओ तिपएसिए खंधे, एगयओ चउपएसिए खंधे भवति; अहवा एगयओ दो दुपएसिया खंधा, एगयओ चउप्पएसिए खंधे भवति; अहवा एगयओ दुपएसिए खंधे, एगयओ दो तिपएसिया खंधा भवति। चउहा कज्जमाणे एगयओ तिन्नि परमाणुपोग्गला, एगयओ पंचपएसिए खंधे भवति; अहवा एगयओ दोण्णिण परमाणुपोग्गला, एगयओ दुपएसिए खंधे, एगयओ चउप्पएसिए खंधे भवति; अहवा एगयओ दो परमाणुपो०, एगयओ दो तिपएसिया खंधा भवति; अहवा एगयओ परमाणुपो०, एगयओ दो दुपएसिया खंधा, एगयओ तिपएसिए खंधे भवति; अहवा चत्तारि दुपएसिया खंधा भवति। पंचहा कज्जमाणे एगयओ चत्तारि परमाणुपोग्गला, एगयओ चउप्पएसिए खंधे भवति; अहवा एगयओ तिन्नि परमाणुपो०, एगयओ दुपएसिए०, एगयओ तिपएसिए खंधे भवति; अहवा एगयओ दो परमाणुपो०, एगयओ तिन्नि दुपएसिया खंधा भवति। छाहा कज्जमाणे एगयओ पंच परमाणुपो०, एगयओ तिपएसिए खंधे भवति; अहवा एगयओ चत्तारि परमाणुपो०, एगयओ दो दुपएसिया

खंधा भवन्ति। सत्तहा कज्जमाणे एगयओ छ परमाणुपोग्गला, एगयओ दुपएसिए खंधे भवति। अट्ठहा कज्जमाणे अट्ठ परमाणुपोग्गला भवन्ति।

० नव भंते! परमाणुपोग्गला० पुच्छा। गोयमा! जाव नवविहा कज्जन्ति। दुहा कज्जमाणे एगयओ परमाणुपो०, एगयओ अट्ठपएसिए खंधे भवति; एवं एक्केक्कं संचारैतेहिं जाव अहवा एगयओ चउप्पएसिए खंधे, एगयओ पंचपएसिए खंधे भवति। तिहा कज्जमाणे एगयओ दो परमाणुपोग्गला, एगयओ सत्तपएसिए खंधे भवति; अहवा एगयओ परमाणुपो०, एगयओ दुपएसिए०, एगयओ छप्पएसिए खंधे भवति; अहवा एगयओ परमाणुपो०, एगयओ तिपएसिए खंधे, एगयओ पंचपएसिए खंधे भवति; अहवा एगयओ परमाणुपो०, एगयओ दो चउप्पएसिया खंधा भवन्ति; अहवा एगयओ दुपदेसिए खंधे, एगयओ तिपएसिए खंधे, एगयओ चउप्पएसिए खंधे भवति; अहवा तिण्णि तिपएसिया खंधा भवन्ति। चउहा भिज्जमाणे एगयओ तिन्नि परमाणुपो०, एगयओ छप्पएसिए खंधे भवति; अहवा एगयओ दो परमाणुपो०, एगयओ दुपएसिए खंधे, एगयओ पंचपएसिए खंधे भवति; अहवा एगयओ दो परमाणुपो०, एगयओ तिपएसिए खंधे, एगयओ चउप्पएसिए खंधे भवति; अहवा एगयओ परमाणुपो०, एगयओ दो दुपएसिया खंधा, एगयओ चउप्पएसिए खंधे भवति; अहवा एगयओ परमाणुपो०, एगयओ दुपदेसिए खंधे, एगयओ दो तिपएसिया खंधा भवन्ति; अहवा एगयओ तिन्नि दुप्पएसिया खंधा, एगयओ तिपएसिए खंधे भवति। पंचहा कज्जमाणे एगयओ चत्तारि परमाणुपो०, एगयओ पंचपएसिए खंधे भवति; अहवा एगयओ तिन्नि परमाणु०, एगयओ दुपएसिए खंधे, एगयओ चउपएसिए खंधे भवति; अहवा एगयओ तिण्णि परमाणुपो०, एगयओ दो तिपएसिया खंधा भवन्ति; अहवा एगयओ दो परमाणुपोग्गला, एगयओ दो दुपएसिया खंधा, एगयओ तिपएसिए खंधे भवइ; अहवा एगयओ परमाणुपो०, एगयओ चत्तारि दुपएसिया खंधा भवन्ति। छहा कज्जमाणे एगयओ पंच परमाणुपोग्गला, एगयओ चउप्पएसिए खंधे भवति; अहवा एगयओ चत्तारि परमाणुपो०, एगयओ दुप्पएसिए खंधे, एगयओ तिपएसिए खंधे भवति; अहवा एगयओ तिन्नि परमाणुपो०, एगयओ तिन्नि दुप्पएसिया खंधा भवन्ति। सत्तहा कज्जमाणे एगयओ छ परमाणुपो०, एगयओ तिपएसिए खंधे भवति; अहवा एगयओ पंच परमाणुपो० एगयओ दो दुपएसिया खंधा भवन्ति। अट्ठहा कज्जमाणे एगयओ सत्त परमाणुपो०, एगयओ दुपएसिए खंधे भवति। नवहा कज्जमाणे नव परमाणुपोग्गला भवन्ति।

० दस भंते! परमाणुपोग्गला जाव दुहा कज्जमाणे एगयओ परमाणुपोग्गले, एगयओ नवपएसिए खंधे भवति; अहवा एगयओ दुपएसिए खंधे, एगयओ अट्ठपएसिए खंधे भवति; एवं एक्केक्कं संचारैतेण जाव अहवा दो पंचपएसिया खंधा भवन्ति। तिहा कज्जमाणे एगयओ दो परमाणुपो०, एगयओ अट्ठपएसिए खंधे भवति; अहवा एगयओ परमाणुपो०, एगयओ दुपएसिए०, एगयओ सत्तपएसिए खंधे भवति; अहवा एगयओ परमाणुपो०, एगयओ तिपएसिए खंधे, एगयओ छप्पएसिए खंधे भवति; अहवा एगयओ परमाणुपो०, एगयओ चउप्पएसिए०, एगयओ पंचपएसिए खंधे भवति; अहवा एगयओ दो दुपएसिया खंधा, एगयओ छप्पएसिए खंधे भवति; अहवा एगयओ दो दुपएसिया खंधा, एगयओ छप्पएसिए खंधे भवति; अहवा एगयओ दुपएसिए०, एगयओ तिपएसिए०, एगयओ पंचपएसिए खंधे भवति; अहवा एगयओ दुपएसिए खंधे, एगयओ दो चउप्पएसिया खंधा भवन्ति; अहवा एगयओ दो तिपएसिया खंधा, एगयओ चउप्पएसिए खंधे भवइ। चउहा कज्जमाणे एगयओ तिन्नि परमाणुपो०, एगयओ सत्तपएसिए खंधे भवति; अहवा एगयओ दो

परमाणुपो०, एगयओ दुपएसिए०, एगयओ छप्पएसिए खंधे भवति; अहवा एगयओ दो परमाणुपो०, एगयओ तिपएसिए खंधे, एगयओ पंचपएसिए खंधे भवति; अहवा एगयओ दो परमाणुपो०, एगयओ दो चउप्पएसिया खंधा भवंति; अहवा एगयओ परमाणुपो०, एगयओ दुपदेसिए०, एगयओ तिपएसिए०, एगयओ चउप्पएसिए खंधे भवति; अहवा एगयओ परमाणुपो०, एगयओ तिन्नि तिपएसिया खंधा भवंति; अहवा एगयओ तिन्नि दुपएसिया खंधा, एगयओ चउपएसिए खंधे भवति; अहवा एगयओ दो दुपएसिया खंधा एगयओ दो तिपएसिया खंधा भवंति। पंचहा कज्जमाणे एगयओ चत्तारि परमाणुपोग्गला, एगयओ छप्पएसिए खंधे भवति; अहवा एगयओ तिन्नि परमाणुपो०, एगयओ दुपएसिए खंधे, एगयओ पंचपएसिए खंधे भवति; अहवा एगयओ तिन्नि परमाणुपो०, एगयओ तिपएसिए खंधे भवति, एगयओ चउपएसिए खंधे भवति; अहवा एगयओ दो परमाणुपो०, एगयओ दो दुपएसिया खंधा, एगयओ चउप्पएसिए खंधे भवति; अहवा एगयओ दो परमाणुपो०, एगयओ दुपएसिए खंधे, एगयओ दो तिपएसिया खंधा भवंति अहवा एगयओ परमाणुपो०, एगयओ तिन्नि दुपएसिया०, एगयओ तिपएसिए खंधे भवति; अहवा पंच दुपएसिया खंधा भवंति। छहा कज्जमाणे एगयओ पंच परमाणुपो०, एगयओ पंचपएसिए खंधे भवति; अहवा एगयओ चत्तारि परमाणुपो०, एगयओ दुपएसिए०, एगयओ चउप्पएसिए खंधे भवति; अहवा एगयओ चत्तारि परमाणुपो०, एगयओ दो तिपएसिया खंधा भवंति; अहवा एगयओ तिन्नि परमाणुपो०, एगयओ दो दुपदेसिया खंधा, एगयओ तिपएसिए खंधे भवति; अहवा एगयओ दो परमाणुपो०, एगयओ चत्तारि दुपएसिया खंधा भवंति। सत्तहा कज्जमाणे एगयओ छ परमाणुपो०, एगयओ चउप्पदेसिए खंधे भवति; अहवा एगयओ पंच परमाणुपो०, एगयओ दुपएसिए०, एगयओ तिपएसिए खंधे भवति; अहवा एगयओ चत्तारि परमाणुपो०, एगयओ तिन्नि दुपएसिया खंधा भवंति। अट्ठहा कज्जमाणे एगयओ सत्त परमाणुपो०, एगयओ तिपएसिए खंधे भवति; अहवा एगयओ छप्परमाणुपो०, एगयओ दो दुपएसिया खंधा भवंति। नवहा कज्जमाणे एगयओ अट्ठ परमाणुपो०, एगयओ दुपएसिए खंधे भवति। दसहा कज्जमाणे दस परमाणुपोग्गला भवंति।

संखेज्जा भंते! परमाणुपोग्गला एगयओ साहण्णंति, एगयओ साहण्णिता किं भवति? गोयमा! संखेज्जपएसिए संधे भवति। से भिज्जमाणे दुहा वि जाव दसहा वि संखेज्जहा वि कज्जति। दुहा कज्जमाणे एगयओ परमाणुपोग्गले, एगयओ संखेज्जपएसिए खंधे भवति; अहवा एगयओ दुपएसिए खंधे, एगयओ संखेज्जपएसिए खंधे भवति; अहवा एगयओ तिपएसिए०, एगयओ संखेज्जपएसिए खंधे भवति; एवं जाव अहवा एगयतो दसपएसिए खंधे, एगयओ संखेज्जपएसिए खंधे भवति; अहवा दो संखेज्जपएसिया खंधा भवंति। तिहा कज्जमाणे एगयतो दो परमाणुपो०, एगयतो संखेज्जपएसिए खंधे भवति; अहवा एगयतो परमाणुपो०, एगयतो दुपएसिए खंधे, एगयओ संखेज्जपएसिए खंधे भवति; अहवा एगयतो परमाणुपो०, एगयतो तिपएसिए खंधे०, एगयतो संखेज्जपएसिए खंधे भवति; एवं जाव अहवा एगयतो परमाणुपो०, एगयतो दसपएसिए खंधे, एगयतो संखेज्जपएसिए खंधे भवति; अहवा एगयतो परमाणुपो०, एगयतो दो संखेज्जपएसिया खंधा भवंति; अहवा एगयतो दुपएसिए खंधे, एगयतो दो संखेज्जपदेसिया खंधा भवंति; एवं जाव अहवा एगयओ दसपएसिए खंधे, एगयतो दो संखेज्जपएसिया खंधा भवंति; अहवा तिण्णि संखेज्जपएसिया खंधा भवंति। चउहा कज्जमाणे एगयतो तिन्नि परमाणुपो०, एगयतो संखेज्जपएसिए खंधे भवति; अहवा एगयतो दो परमाणुपो०, एगयतो तिपएसिए०, एगयतो संखेज्जपएसिए खंधे भवति; एवं जाव अहवा एगयओ दो परमाणुपो०, एगयतो दसपएसिए०, एगयतो संखेज्जपएसिए० भवति; अहवा एगयतो दो

परमाणुपो०, एगयओ दो संखेज्जपएसिया खंधा भवंति; अहवा एगयतो परमाणुपो०, एगयओ दुपएसिए खंधे, एगयओ दो संखेज्जपदेसिया खंधा भवंति; जाव अहवा एगयतो परमाणुपो०; एगयतो दसपएसिए०, एगयतो दो संखेज्जपएसिया खंधा भवंति; अहवा एगयतो परमाणुपो०, एगयतो तिन्नि संखेज्जपएसिया खंधा भवंति; अहवा एगयओ दुपएसिए०, एगयतो तिन्नि संखेज्जपएसिया० भवंति; जाव अहवा एगयओ दसपएसिए०, एगयओ तिन्नि संखेज्जपदेसिया० भवंति; अहवा चत्तारि संखेज्जपएसिया० भवंति।

एवं एएणं कमेणं पंचगसंजोगो वि भाणियव्वो जाव नवसंजोगो।

० दसहा कज्जमाणे एगयतो नव परमाणुपोग्गला, एगयतो संखेज्जपएसिए० भवति; अहवा एगयओ अट्ठ परमाणुपो०, एगयओ दुपएसिए०, एगयओ संखेज्जपएसिए खंधे भवति; एवं एएणं कमेणं एक्केक्को पूरेयव्वो जाव अहवा एगयओ दसपएसिए०, एगयओ नव संखेज्जपएसिया० भवंति; अहवा दस संखेज्जपएसिया खंधा भवंति। संखेज्जहा कज्जमाणे संखेज्जा परमाणुपोग्गला भवंति।

० असंखेज्जा भंते! परमाणुपोग्गला एगयओ साहण्णंति एगयओ साहण्णित्ता किं भवति? गोयमा! असंखेज्जपएसिए खंधे भवति। से भिज्जमाणे दुहा वि, जाव दसहा वि, संखेज्जहा वि, असंखेज्जहा वि कज्जति।

दुहा कज्जमाणे एगयओ परमाणुपो०, एगयओ असंखेज्जपएसिए खंधे भवति; जाव अहवा एगयओ दसपदेसिए०, एगयओ असंखिज्जपएसिए० भवति; अहवा एगयओ संखेज्जपएसिए खंधे, एगयओ असंखेज्जपएसिए खंधे भवति; अहवा दो असंखेज्जपएसिया खंधा भवंति।

तिहा कज्जमाणे एगयओ दो परमाणुपो०, एगयओ असंखेज्जपएसिए० भवति; अहवा एगयओ परमाणुपो०, एगयओ दुपएसिए०, एगयओ असंखिज्जपएसिए० भवति; जाव अहवा एगयओ परमाणुपो०, एगयओ दसपदेसिए०, एगयओ असंखेज्जपएसिए० भवति; अहवा एगयओ परमाणुपो०, एगयओ संखेज्जपएसिए०, एगयओ असंखेज्जपएसिए० भवति; अहवा एगयओ परमाणुपो०, एगयओ दो असंखेज्जपएसिया खंधा भवंति; अहवा एगयओ दुपएसिए०, एगयओ दो असंखेज्जपएसिया खंधा भवंति; एवं जाव अहवा एगयओ संखेज्जपएसिए०, एगयओ दो असंखेज्जपएसिया खंधा भवंति; अहवा तिन्नि असंखेज्जपएसिया० भवंति।

चउहा कज्जमाणे एगयओ तिन्नि परमाणुपो०, एगयओ असंखेज्जपएसिए० भवति। एवं चउक्कगसंजोगो जाव दसगसंजोगो। एए जहेव संखेज्जपएसियस्स, नवरं असंखेज्जगं

एगं अहिगं भाणियव्वं जाव अहवा दस असंखेज्जपदेसिया खंधा भवंति।

संखेज्जहा कज्जमाणे एगयओ संखेज्जा परमाणुपोग्गला, एगयओ असंखेज्जपएसिए खंधे भवति; अहवा एगयओ संखेज्जा दुपएसिया खंधा, एगयओ असंखेज्जपएसिए खंधे भवति; एवं जाव अहवा एगयओ संखेज्जा दसपएसिया खंधा, एगयओ असंखेज्जपएसिए खंधे भवति; अहवा एगयओ संखेज्जा संखेज्जपएसिया खंधा, एगयओ असंखेज्जपएसिए खंधे भवति; अहवा संखेज्जा असंखेज्जपएसिया खंधा भवंति।

असंखेज्जहा कज्जमाणे असंखेज्जा परमाणुपोग्गला भवंति।

अणंता णं भंते! परमाणुपोग्गला जाव किं भवति? गोयमा! अणंतपएसिए खंधे भवति। से भिज्जमाणे दुहा वि, तिहा वि जाव दसहा वि, संखिज्ज-असंखिज्ज-अणंतहा वि कज्जइ।

दुहा कज्जमाणे एगयओ परमाणुपोग्गले, एगयओ अणंतपरएसिए खंधे; जाव अहवा दो अणंतपरएसिया खंधा भवति।

तिहा कज्जमाणे एगयतो दो परमाणुपो०, एगयतो अणंतपरएसिए० भवति; अहवा एगयओ परमाणुपो०, एगयओ दुपरएसिए०, एगयओ अणंतपरएसिए० भवति; जाव अहवा एगयओ परमाणुपो०, एगयओ असंखेज्जपरएसिए०, एगयओ अणंतपदेसिए खंधे भवति; अहवा एगयओ परमाणुपो०, एगयओ दो अणंतपरएसिया० भवति; अहवा एगयओ दुपरएसिए०, एगयओ दो अणंतपरएसिया० भवति; एवं जाव अहवा एगयतो दसपरएसिए एगयतो दो अणंतपरएसिया खंधा भवति; अहवा एगयओ संखेज्जपरएसिए खंधे, एगयओ दो अणंतपदेसिया खंधा भवति; अहवा एगयओ असंखेज्जपरएसिए खंधे, एगयओ दो अणंतपरएसिया खंधा भवति; अहवा तिन्नि अणंतपरएसिया खंधा भवति। चउहा कज्जमाणे एगयओ तिन्नि परमाणुपो०, एगयतो अणंतपरएसिए० भवति; एवं चउक्कसंजोगो जाव असंखेज्जगसंजोगो। एए सत्वे जहेव असंखेज्जाणं भणिया तहेव अणंताण वि भाणियत्वा, नवरं एककं अणंतगं अब्भहियं भाणियत्वं जाव अहवा एगयतो संखेज्जा संखिज्जपरएसिया खंधा, एगयओ अणंतपरएसिए० भवति; अहवा एगयओ संखेज्जा असंखेज्जपदेसिया खंधा, एगयओ अणंतपरएसिए खंधे भवति; अहवा संखिज्जा अणंतपरएसिया खंधा भवति। असंखेज्जहा कज्जमाणे एगयतो असंखेज्जा परमाणुपोग्गला, एगयओ अणंतपरएसिए खंधे भवति; अहवा एगयतो असंखिज्जा दुपरएसिया खंधा, एगयओ अणंतपरएसिए० भवति; जाव अहवा एगयओ असंखेज्जा संखिज्जपरएसिया०, एगयओ अणंतपरएसिए० भवति; अहवा एगयओ असंखेज्जा असंखेज्जपरएसिया खंधा, एगयओ अणंतपरएसिए० भवति; अहवा असंखेज्जा अणंतपरएसिया खंधा भवति।

अणंतहा कज्जमाणे अणंता परमाणुपोग्गला भवति।

**[५३९]** एएसि णं भंते! परमाणुपोग्गलाणं साहणणाभेदाणुवाएणं अणंताणंता पोग्गलपरियट्ठा समणुगंतत्वा भवतीति मक्खाया?

हंता, गोयमा! एतेसि णं परमाणुपोग्गलाणं साहणणा जाव मक्खाया।

कतिविधे णं भंते! पोग्गलपरियट्ठे पन्नते? गोयमा! सत्तविहे पोग्गलपरियट्ठे पन्नते, तं जहा--ओरालियपोग्गलपरियट्ठे वेउच्चियपोग्गलपरियट्ठे तेयापोग्गलपरियट्ठे कम्मपोग्गलपरियट्ठे मणपोग्गलपरियट्ठे वइपोग्गलपरियट्ठे आणपाणुपोग्गलपरियट्ठे।

नेरइयाणं भंते! कतिविधे पोग्गलपरियट्ठे पन्नते? गोयमा! सत्तविधे पोग्गलपरियट्ठे पन्नते, तं जहा-ओरालियपोग्गलपरियट्ठे वेउच्चियपोग्गलपरियट्ठे जाव आणपाणुपोग्गलपरियट्ठे।

एवं जाव वेमाणियाणं।

एगमेगस्स णं भंते! जीवस्स केवतिया ओरालियपोग्गलपरियट्ठा अतीता? अणंता।

केवइया पुरेक्खडा? कस्सति अत्थि, कस्सति णत्थि। जस्सत्थि जहण्णेणं एगो वा दो वा तिण्णि वा, उक्कोसेणं संखेज्जा वा असंखेज्जा वा अणंता वा।

एवं सत्त दंडगा जाव आणपाणु ति।

एगमेगस्स णं भंते! नेरइयस्स केवतिया ओरालियपोग्गलपरियट्ठा अतीया? अणंता।

केवतिया पुरेक्खडा? कस्सइ अत्थि, कस्सइ नत्थि। जस्सत्थि जहन्नेणं एक्को वा दो वा तिण्णि वा, उक्कोसेणं संखेज्जा वा असंखेज्जा वा अणंता वा।

एगमेगस्स णं भंते! असुरकुमारस्स केवतिया ओरालियपोग्गलपरियट्ठा०? एवं चेव।  
एवं जाव वेमाणियस्स।

एगमेगस्स णं भंते! नेरइयस्स केवतिया वेउच्चियपुग्गलपरियट्ठा अतीया? अणंता।  
एवं जहेव ओरालियपोग्गलपरियट्ठा तहेव वेउच्चियपोग्गलपरियट्ठा वि भाणियच्चा।  
एवं जाव वेमाणियस्स आणापाणुपोग्गलपरियट्ठा। एए एगत्तिया सत्त दंडगा भवंति।  
नेरइयाणं भंते! केवतिया ओरालियपोग्गलपरियट्ठा अतीया? अणंता।  
केवतिया पुरेक्खडा? अणंता।

एवं जाव वेमाणियाणं।

एवं वेउच्चियपोग्गलपरियट्ठा वि। एवं जाव आणापाणुपोग्गलपरियट्ठा वेमाणियाणं। एवं  
एए पोहतिया सत्त चउवीसतिदंडगा।

एगमेगस्स णं भंते! नेरइयस्स नेरइयत्ते केवतिया ओरालियपोग्गलपरियट्ठा अतीया? नत्थि  
एक्को वि।

केवतिया पुरेक्खडा? नत्थि एक्को वि।

एगमेगस्स णं भंते! नेरइयस्स असुरकुमारत्ते केवतिया ओरालियपोग्गलपरियट्ठा०? एवं चेव।  
एवं जाव थणियकुमारत्ते।

एगमेगस्स णं भंते! नेरइयस्स पुढविकाइयत्ते केवतिया ओरालियपोग्गलपरियट्ठा अतीया?  
अणंता।

केवतिया पुरेक्खडा? कस्सइ अत्थि, कस्सइ नत्थि। जस्सइत्थि जहन्नेणं एक्को वा दो वा  
तिन्नि वा, उक्कोसेणं संखेज्जा वा असंखेज्जा वा अणंता वा।

एवं जाव मणुस्सत्ते।

वाणमंतर-जोतिसिय-वेमाणियत्ते जहा असुरकुमारत्ते।

एगमेगस्स णं भंते! असुरकुमारस्स नेरइयत्ते केवतिया ओरालियपोग्गलपरियट्ठा अतीया?  
एवं जहा नेरइयस्स वत्तव्वया भणिया तहा असुरकुमारस्स वि भाणितच्चा जाव वेमाणियत्ते।

एवं जाव थणियकुमारस्स। एवं पुढविकाइयस्स वि। एवं जाव वेमाणियस्स। सव्वेसिं एक्को  
गमो।

एगमेगस्स णं भंते! नेरइयस्स नेरइयत्ते केवतिया वेउच्चियपोग्गलपरियट्ठा अतीया? अणंता।

केवतिया पुरेक्खडा? एक्कुत्तरिया जाव अणंता वा।

एवं जाव थणियकुमारत्ते।

पुढविकाइयत्ते पुच्छा। नत्थि एक्को वि।

केवतिया पुरेक्खडा? नत्थि एक्को वि।

एवं जत्थ वेउच्चियसरीरं तत्थ एगुत्तरिओ, जत्थ नत्थि तत्थ जहा पुढविकाइयत्ते तहा  
भाणियत्तं जाव वेमाणियस्स वेमाणियत्ते।

तेयापोग्गलपरियट्ठा कम्मपोग्गलपरियट्ठा य सव्वत्थ एक्कुत्तरिया भाणितच्चा।  
मणपोग्गलपरियट्ठा सव्वेसु पंचेदिएसु एगुत्तरिया। विगलिंदिएसु नत्थि। वइपोग्गलपरियट्ठा एवं चेव, नवरं

एगिंदिएसु 'नत्थि' भाणियच्वा। आणापाणुपोग्गलपरियट्ठा सच्चत्थ एकुत्तरिया जाव वेमाणियस्स वेमाणियत्ते।

नेरइयाणं भंते! नेरइयत्ते केवतिया ओरालियपोग्गलपरियट्ठा अतीया? नत्थेक्को वि।

केवइया पुरेक्खडा? नत्थेक्को वि।

एवं जाव थणियकुमारत्ते।

पुढविकाइयत्ते पुच्छा। अणंता।

केवतिया पुरेक्खडा? अणंता।

एवं जाव मणुस्सत्ते।

वाणमंतर-जोतिसिय-वेमाणियत्ते जहा नेरइयत्ते।

एवं जाव वेमाणियस्स वेमाणियत्ते।

एवं सत्त वि पोग्गलपरियट्ठा भाणियच्वा। जत्थ अत्थि तत्थ अतीया वि, पुरेक्खडा वि अणंता भाणियच्वा। जत्थ नत्थि तत्थ दो वि 'नत्थि' भाणियच्वा जाव वेमाणियाणं वेमाणियत्ते केवतिया आणापाणुपोग्गलपरियट्ठा अतीया? अणंता। केवतिया पुरेक्खडा? अणंता।

[५४०] से केणट्ठेणं भंते! एवं वुच्चइ ओरालियपोग्गलपरियट्ठे, ओरालियपोग्गलपरियट्ठे? गोयमा! जं णं जीवेणं ओरालियसरीरे वट्ठमाणेणं ओरालियसरीरपायोग्गाइं दव्वाइं ओरालियसरीरत्ताए गहियाइं बद्धाइं पुट्ठाइं कडाइं पट्ठवियाइं निविट्ठाइं अभिनिविट्ठाइं अभिसमन्नागयाइं परियाइयाइं परिणामियाइं निज्जिण्णाइं निसिरियाइं निसिट्ठाइं भवंति, सेतेणट्ठेणं गोयमा! एवं वुच्चइ 'ओरालियपोग्गलपरियट्ठे, ओरालियपोग्गलपरियट्ठे'।

एवं वेउच्चियपोग्गलपरियट्ठे वि, नवरं वेउच्चियसरीरे वट्ठमाणेणं वेउच्चियसरीरपायोग्गाइं दव्वाइं वेउच्चियसरीरत्ताए०। सेसं तं चेव सच्चं।

एवं जाव आणापाणुपोग्गलपरियट्ठे, नवरं आणापाणुपायोग्गाइं सच्चदव्वाइं आणापाणुत्ताए०। सेसं तं चेव।

ओरालियपोग्गलपरियट्ठे णं भंते! केवतिकालस्स निच्चत्तिज्जति? गोयमा! अणंताहिं ओसप्पिणि-उस्सप्पिणीहिं, एवतिकालस्स निच्चत्तिज्जइ।

एवं वेउच्चियपोग्गलपरियट्ठे वि।

एवं जाव आणापाणुपोग्गलपरियट्ठे।

एतस्स णं भंते! ओरालिय-पोग्गल-परियट्ठे-निच्चत्तणाकालस्स, वेउच्चिय-पोग्गल-परियट्ठे - निच्चत्तणाकालस्स जाव आणापाणुपोग्गलपरियट्ठे निच्चत्तणाकालस्स य कयरे कयरेहिंतो जाव विसेसाहिया वा? गोयमा! सच्चत्थोवे कम्मगपोग्गलपरियट्ठे निच्चत्तणाकाले, तेयापोग्गलपरियट्ठे निच्चत्तणाकाले अणंतगुणे, ओरालियपोग्गलपरियट्ठे निच्चत्तणाकाले अणंतगुणे, आणापाणुपोग्गलपरियट्ठे निच्चत्तणाकाले अणंतगुणे, मण-पोग्गलपरियट्ठे निच्चत्तणाकाले अणंतगुणे, वइपोग्गलपरियट्ठे निच्चत्तणाकाले अणंतगुणे, वेउच्चियपोग्गलपरियट्ठे निच्चत्तणाकाले अणंतगुणे।

[५४१] एसि णं भंते! ओरालियपोग्गलपरियट्ठाणं जाव आणापाणुपोग्गलपरियट्ठाण य कयरे कयरेहिंतो जाव विसेसाहिया वा? गोयमा! सच्चत्थोवा वेउच्चियपोग्गलपरियट्ठा, वइपोग्गलपरियट्ठा

अणंतगुणा, मणपोग्गलपरियट्ठा अणंतगुणा, आणापाणुपोग्गलपरियट्ठा अणंतगुणा, ओरालियपोग्गलपरियट्ठा अणंतगुणा, तेयापोग्गलपरियट्ठा अणंतगुणा, कम्मगपोग्गलपरियट्ठा अणंतगुणा।

सेवं भंते! सेवं भंते! ति भगवं जाव विहरइ।

**\*बारसमे सए चउत्थो उद्देशो समतो \***

**० पंचमो उद्देशो ०**

**[५४२]** रायगिहे जाव एवं वयासी-

अह भंते! पाणातिवाए मुसावाए अदिन्नादाणे मेहुणे परिग्गहे, एस णं कतिवण्णे कतिगंधे कतिरसे कतिफासे पन्नते? गोयमा! पंचवण्णे दुगंधे पंचरसे चउफासे पन्नते।

अह भंते! कोहे कोवे रोसे दोसे अखमा संजलणे कलहे चंडिकके भंडणे विवादे, एस णं कतिवण्णे जाव कतिफासे पन्नते? गोयमा! पंचवण्णे पंचरसे दुगंधे चउफासे पन्नते।

अह भंते! माणे मदे दप्पे थंभे गव्वे अत्तुक्कोसे परपरिवाए उक्कासे अवक्कासे उन्नए उन्नामे दुन्नामे, एस णं कतिवण्णे कतिगंधे कतिरसे कतिफासे पन्नते? गोयमा! पंचवण्णे जहा कोहे तहेव।

अह भंते! माया उवही नियडी वलये गहणे णूमे कक्के कुरूए जिम्हे किब्बिसे आयरणता गूहणया वंचणया पलिउंचणया सातिजोगे, एस णं कतिवण्णे कतिगंधे कतिरसे कतिफासे पन्नते? गोयमा! पंचवण्णे जहेव कोहे।

अह भंते! लोभे इच्छा मुच्छा कंखा गेही तण्हा भिज्झा अभिज्झा आसासणता पत्थणता लालप्पणता कामासा भोगासा जीवियासा मरणासा नंदिरागे, एस णं कतिवण्णे०? जहेव कोहे।

अह भंते! पेज्जे दोसे कलहे जाव मिच्छादंसणसल्ले, एस णं कतिवण्णे०? जहेव कोहे तहेव जाव चउफासे।

**[५४३]** अह भंते! पाणातिवायवेरमणे जाव परिग्गहवेरमणे, कोहविवेगे जाव मिच्छादंसणसल्लविवेगे, एस णं कतिवण्णे जाव कतिफासे पन्नते? गोयमा! अवण्णे अगंधे अरसे अफासे पन्नते।

अह भंते! उप्पत्तिया वेणइया कम्मया पारिणामिया, एस णं कतिवण्णा०? तं चेव जाव अफासा पन्नता।

अह भंते! उग्गहे ईहा अवाये धारणा, एस णं कतिवण्णा०? एवं चेव जाव अफासा पन्नता।

अह भंते! उट्ठाणे कम्मे बले वीरिए पुरिसक्कारपरक्कमे, एस णं कतिवण्णे०? तं चेव जाव अफासे पन्नते।

सत्तमे णं भंते! ओवासंतरे कतिवण्णे०? एवं चेव जाव अफासे पन्नते।

सत्तमे णं भंते! तणुवाए कतिवण्णे०? जहा पाणातिवाए नवरं अट्ठफासे पन्नते।

एवं जहा सत्तमे तणुवाए तहा सत्तमे घणवाए घणोदधी पुढवी।

छट्ठे ओवासंतरे अवण्णे।

तणुवाए जाव छट्ठा पुढवी, एयाइं अट्ठफासाइं।

एवं जहा सत्तमाए पुढवीए वत्तव्वया भणिया तहा जाव पढमाए पुढवीए भाणियत्वं।

जंबुद्दीवे जाव सयंभुरमणे समुद्दे, सोहम्मं कप्पे जाव ईसिपब्भारा पुढवी, नेरइयावासा जाव

वेमाणियावासा, एयाणि सव्वाणि अट्ठफासाणि।

नेरइया णं भंते! कतिवण्णा जाव कतिफासा पन्नता? गोयमा! वेउव्विय-तेयाइं

पडुच्च पंचवण्णा पंचरसा दुगंधा अट्ठफासा पन्नता। कम्मगं पडुच्च पंचवण्णा पंचरसा  
दुगंधा चउफासा पन्नता। जीवं पडुच्च अवण्णा जाव अफासा पन्नता।

एवं जाव थणियकुमारा।

पुढविकाइया णं० पुच्छा। गोयमा! ओरालिय-तेयगाइं पडुच्च पंचवण्णा जाव अट्ठफासा  
पन्नता, कम्मगं पडुच्च जहा नेरइयाणं, जीवं पडुच्च तहेव।

एवं जाव चउरिंदिया, नवरं वाउकाइया ओरालिय-वेउव्वियतेयगाइं पडुच्च पंचवण्णा जाव  
अट्ठफासा पन्नता। सेसं जहा नेरइयाणं।

पंचेदियतिरिक्खजोणिया जहा वाउकाइया।

मणुस्सा णं० पुच्छा। ओरालिय-वेउव्विय-आहारग-तेयगाइं पडुच्च पंचवण्णा जाव अट्ठफासा  
पन्नता। कम्मगं जीवं च पडुच्च जहा नेरइयाणं।

वाणमंतर-जोतिसिय-वेमाणिया जहा नेरइया।

धम्मत्थिकाए जाव पोग्गलत्थिकाए, एए सव्वे अवण्णा; नवरं पोग्गलत्थिकाए पंचवण्णे  
पंचरसे दुगंधे अट्ठफासे पन्नते।

नाणावरणिज्जे जाव अंतराइए, एयाणि चउफासाणि।

कणहलेसा णं भंते! कइवण्णा० पुच्छा। दव्वलेसं पडुच्च पंचवण्णा जाव अट्ठफासा पन्नता।  
भावलेसं पडुच्च अवण्णा अरसा अगंधा अफासा।

एवं जाव सुक्कलेस्सा।

सम्मद्विट्ठ-मिच्छादिट्ठि-सम्मामिच्छादिट्ठी, चक्खुदंसणे अचक्खुदंसणे ओहिदंसणे  
केवलदंसणे, आभिनिबोहियनाणे जाव विभंगनाणे, आहारसन्ना जाव परिग्गहसण्णा, एयाणि अवण्णाणि  
अरसाणि अगंधाणि अफासाणि।

ओरालियसरीरे जाव तेयगसरीरे, एयाणि अट्ठफासाणि। कम्मगसरीरे चउफासे। मणजोगे  
वइजोगे य चउफासे। कायजोगे अट्ठफासे।

सागारोवयोगे य अणागारोवयोगे य अवण्णा०।

सव्वदव्वा णं भंते! कतिवण्णा० पुच्छा। गोयमा! अत्थेगतिया सव्वदव्वा पंचवण्णा जाव  
अट्ठफासा पन्नता। अत्थेगतिया सव्वदव्वा पंचवण्णा जाव चउफासा पन्नता। अत्थेगतिया सव्वदव्वा  
एगवण्णा एगंधा एगरसा दुफासा पन्नता। अत्थेगतिया सव्वदव्वा अवण्णा जाव अफासा पन्नता।

एवं सव्वपएसा वि, सव्वपज्जवा वि।

तीयद्धा अवण्णा जाव अफासा पन्नता। एवं अणागयद्धा वि। एवं सव्वद्धा वि।

**[५४४]** जीवे णं भंते! गब्भं वक्कममाणे कतिवण्णं कतिगंधं कतिरसं कतिफासं परिणामं  
परिणमति? गोयमा! पंचवण्णं दुगंधं पंचरसं अट्ठफासं परिणामं परिणमति।

**[५४५]** कम्मतो णं भंते! जीवे, नो अकम्मओ विभत्तिभावं परिणमइ, कम्मतो णं जए, नो  
अकम्मतो विभत्तिभावं परिणमइ? हंता, गोयमा! कम्मतो णं० तं चेव जाव परिणमइ, नो अकम्मतो

विभक्तिभावं परिणमइ।

सेवं भंते! सेवं भंते! ति०।

**\*बारसमे सए पंचमो उद्देशो समतो \***

**० छट्ठो उद्देशो ०**

**[५४६]** रायगिहे जाव एवं वदासी--

बहुजणे णं भंते! अन्नमन्नस्स एवमाइक्खति जाव एवं परूवेइ एवं खलु राहू चंदं गेण्हइ, एवं खलु राहू चंदं गेण्हइ' से कहमेयं भंते! एवं? गोयमा! जं णं से बहुजणे अन्नमन्नस्स जाव मिच्छं ते एवमाहंसु, अहं पुण गोयमा! एवमाइक्खामि जाव एवं परूवेमि--"एवं खलु राहू देवे महिइढीए जाव महेसक्खे वरवत्थधरे वरमल्लधरे वरगंधधरे वराभरणधारी।

"राहुस्स णं देवस्स नव नामधेज्जा पन्नता, तं जहा—सिंघाडए, जडिलए, खतए, खरए, दुद्धरे, मगरे, मच्छे, कच्छभे, कण्हसप्पे।

"राहुस्स णं देवस्स विमाणा पंचवण्णा पण्णता, तं जहा--किण्हा नीला लोहिया हालिद्धा सुक्किला। अत्थि कालए राहुविमाणे खंजणवण्णाभे, अत्थि नीलए राहुविमाणे लाउयवण्णाभे, अत्थि लोहिए राहुविमाणे मंजिट्ठवण्णाभे, अत्थि पीतए राहुविमाणे हालिद्धवण्णाभे पण्णत्ते, अत्थि सुक्किलए राहुविमाणे भासरासिवण्णाभे पण्णत्ते।

"जदा णं राहू आगच्छमाणे वा गच्छमाणे वा विउच्चमाणे वा परियारेमाणे वा चंदलेसं पुरत्थिमेणं आवरेत्ताणं पच्चत्थिमेणं वीतीवयति तदा णं पुरत्थिमेणं चंदे उवदंसेति, पच्चत्थिमेणं राहू। जदा णं राहू आगच्छमाणे वा गच्छमाणे वा विउच्चमाणे वा परियारेमाणे वा चंदस्स लेसं पच्चत्थिमेणं आवरेत्ताणं पुरत्थिमेणं वीतीवयति तदा णं पच्चत्थिमेणं चंदे उवदंसेति, पुरत्थिमेणं राहू। एवं जहा पुरत्थिमेणं पच्चत्थिमेणं य दो आलावगा भणिया एवं दाहिणेणं उत्तरेण य दो आलावगा भाणियत्त्वा। एवं उत्तरपुरत्थिमेणं दाहिणपच्चत्थिमेणं य दो आलावगा भाणियत्त्वा, दाहिणपुरत्थिमेणं उत्तरपच्चत्थिमेणं य दो आलावगा भाणियत्त्वा। एवं चेव जाव तदा णं उत्तरपच्चत्थिमेणं चंदे उवदंसेति, दाहिणपुरत्थिमेणं राहू। "जदा णं राहू आगच्छमाणे वा गच्छमाणे वा विउच्चमाणे वा परियारेमाणे वा चंदलेस्सं आवरेमाणे आवरेमाणे चिट्ठति तदा णं मणुस्सलोए मणुस्सा वदंति--एवं खलु राहू चंदं गेण्हइ, एवं खलु राहू चंदं गेण्हइ।

"जदा णं राहू आगच्छमाणे वा गच्छमाणे वा विउच्चमाणे वा परियारेमाणे वा चंदस्स लेस्सं आवरेत्ताणं पासेणं वीईवयइ तदा णं मणुस्सलोए मणुस्सा वदंति--एवं खलु चंदेणं राहुस्स कुच्छी भिन्ना, एवं खलु चंदेणं राहुस्स कुच्छी भिन्ना।

"जदा णं राहू आगच्छमाणे वा गच्छमाणे वा विउच्चमाणे वा परियारेमाणे वा चंदस्स लेस्सं आवरेत्ताणं पच्चोसक्कइ तदा णं मणुस्सलोए मणुस्सा वदंति--एवं खलु राहुणा चंदे वंते, एवं खलु राहुणा चंदे वंते।

"जया णं राहू आगच्छमाणे वा ४ चंदलेस्सं आवरेत्ताणं मज्झंमज्झेणं वीतीवयति तदा णं मणुस्सा वदंति--राहुणा चंदे वतिचरिए, राहुणा चंदे वतिचरिए।

"जदा णं राहू आगच्छमाणे वा जाव परियारेमाणे वा चंदलेस्सं अहे सपक्खिं सपडिदिसिं आवरेताणं चिट्ठति तदा णं मणुस्सलोए मणुस्सा वदंति--एवं खलु राहुणा चंदे घत्थे, एवं खलु राहुणा चंदे घत्थे।"

कतिविधे णं भंते! राहू पन्नते? गोयमा! दुविहे राहू पन्नते, तं जहा--धुवराहू य पव्वराहू य। तत्थ णं जे से धुवराहू से णं बहुलपक्खस्स पाडिवए पन्नरसतिभागेणं पन्नरसतिभागं चंदस्स लेस्सं आवरेमाणे आवरेमाणे चिट्ठति, तं जहा--पढमाए पढमं भागं, बितियाए बितियं भागं जाव पन्नरसेसु पन्नरसमं भागं। चरिमसमये चंदे रते भवति, अवसेसे समये चंदे रते वा विरते वा भवति। तमेव सुक्कपक्खस्स उवदंसेमाणे चिट्ठइ-पढमाए पढमं भागं जाव पन्नरसेसु पन्नरसमं भागं चरिमसमये चंदे विरते भवइ, अवसेसे समये चंदे रते य विरते य भवइ। तत्थ णं जे से पव्वराहू से जहन्नेणं छण्हं मासाणं; उक्कोसेणं बायालीसाए मासाणं चंदस्स, अडयालीसाए संवच्छराणं सूरस्स।

[५४७] से केणट्ठेणं भंते! एवं वुच्चइ 'चंदे ससी, चंदे ससी'? गोयमा! चंदस्स णं जोतिसिंदस्स जोतिसरण्णो मियंके विमाणे, कंता देवा, कंताओ देवीओ, कंताइं आसण-सयण-खंभ-भंडमत्तोवगरणाइं, अप्पणा वि य णं चंदे जोतिसिंदे जोतिसराया सोमे कंते सुभए पियदंसणे सुरूवे, सेतेणट्ठेणं जाव ससी।

[५४८] से केणट्ठेणं भंते! एवं वुच्चइ 'सूरे अदिच्चे, सूरे आदिच्चे'? गोयमा! सूरादीया णं समया इ वा आवलिया इ वा जाव ओसप्पिणी इ वा, उस्सप्पिणी इ वा। सेतेणट्ठेणं जाव आदिच्चे।

[५४९] चंदस्स णं भंते! जोतिसिंदस्स जोतिसरण्णो कति अग्गमहिंसीओ पन्नताओ? जहा दसमसए जाव णो चेव णं मेहुणवत्तियं।

सूरस्स वि तहेव।

चंदिम-सूरिया णं भंते! जोतिसिंदा जोतिसरायाणो केरिसए कामभोगे पच्चणुभवमाणे विहरंति? गोयमा! से जहानामए केइ पुरिसे पढमजोव्वणुट्ठाणबलत्थे पढमजोव्वणुट्ठाणबलत्थाए भारियाए सद्धिं अचिरवत्तविवाहकज्जे अत्थगवेसणाए सोलसवासविप्पवासिए, से णं तओ लद्धट्ठे कयकज्जे अणहसमग्गे पुणरवि नियगं गिहं ह्व्वमागते पहाते कयबलिकम्ममे कयकोउयमंगलपायच्छित्ते सव्वालंकारविभूसिए मणुण्णं थालिपागसुद्धं अट्ठारसवंजणाकुलं भोयणं भुत्ते समाणे तंसि तारिसगंसि वासघरंसि; वण्णओ० महब्बले जाव सयणोवयारकलिए ताए तारिसियाए भारियाए सिंगारागारचारुवेसाए जाव कलियाए अणुरत्ताए अविरत्ताए मणाणुकूलाए सद्धिं इट्ठे सद्धे फरिसे जाव पंचविहे माणुस्सए कामभोगे पच्चणुभवमाणे विहरेज्जा, से णं गोयमा! पुरिसे विओसमणकालसमयंसि केरिसयं सातासोक्खं पच्चणुभवमाणे विहरति? 'ओरालं समणाउसो!' तस्स णं गोयमा! पुरिसस्स कामभोएहिंतो वाणमंतराणं देवाणं एत्तो अणंतगुणविसिट्ठतरा चेव कामभोगा। वाणमंतराणं देवाणं कामभोगेहिंतो असुरिंदवज्जियाणं भवणवासीणं देवाणं एत्तो अणंतगुणविसिट्ठतरा चेव कामभोगा। असुरिंदवज्जियाणं भवणवासियाणं देवाणं कामभोगेहिंतो असुरकुमाराणं [इंदभूयाणं] देवाणं एत्तो अणंतगुणविसिट्ठतरा चेव कामभोगा। असुर-कुमाराणं० देवाणं कामभोगेहिंतो गहगणनक्खत्त-तारारूवाणं जोतिसियाणं देवाणं एत्तो अणंतगुणविसिट्ठतरा चेव कामभोगा। गहगण-नक्खत्त जाव कामभोगेहिंतो चंदिम-सूरियाणं जोतिसियाणं जोतिसराइंणं एत्तो अणंतगुणविसिट्ठतरा चेव कामभोगा। चंदिम-सूरिया णं गोतमा! जोतिसिंदा जोतिसरायाणो एरिसे

कामभोगे पच्चणुभवमाणा विहरंति।

सेवं भंते! सेवं भंते! ति भगवं गोयमे समणं भगवं महावीरं जाव विहरति।

**\*बारसमे सए छट्ठो उद्देशो समतो \***

**० सत्तमो उद्देशो ०**

**[५५०]** तेषां कालेणं तेषां समएणं जाव एवं वयासी-

केमहालए णं भंते ! लोए पन्नते ? गोयमा! महत्तिमहालए लोए पन्नते; पुरत्थिमेणं असंखेज्जाओ जोयणकोडाकोडीओ, दाहिणेणं असंखिज्जाओ एवं चेव, एवं पच्चत्थिमेण वि, एवं उत्तरेण वि, एवं उड्ढं पि, अहे असंखेज्जाओ जोयणकोडाकोडीओ आयाम-विक्खंभेणं।

एयंसि णं भंते! एमहालयंसि लोगंसि अत्थि केइ परमाणुपोग्गलमेते वि पएसे जत्थ णं अयं जीवे न जाए वा, न मए वा वि? गोयमा! नो इणट्ठे समट्ठे।

से केणट्ठेणं भंते! एवं वुच्चइ 'एयंसि णं एमहालयंसि लोगंसि नत्थि केयी परमाणुपोग्गलमेते वि पएसे जत्थ णं अयं जीवे ण जाए वा न मए वावि'? गोयमा! से जहानामए केयि पुरिसे अयासयस्स एगं महं अयावयं करेज्जा; से णं तत्थ जहन्नेणं एकं वा दो वा तिण्णि वा, उक्कोसेणं अयासहस्सं पक्खिजेज्जा; ताओ णं तत्थ पउरगोयराओ पउरपाणियाओ जहन्नेणं एगाहं वा दुयाहं वा तियाहं वा, उक्कोसेणं छम्मासे परिवसेज्जा, अत्थि णं गोयमा! तस्स अयावयस्स केयि परमाणुपोग्गलमेते वि पएसे जे णं तासिं अयाणं उच्चारेण वा पासवणेण वा खेलेण वा सिंघाणएण वा वंतेण वा पित्तेण वा पूएण वा सुक्केण वा सोणिएण वा चम्मेहि वा रोमेहि वा सिंगेहि वा खुरेहि वा नहेहिं वा अणोक्कंतपुव्वे भवति? 'णो इणट्ठे समट्ठे'। होज्जा वि णं गोयमा! तस्स अयावयस्स केयि परमाणुपोग्गलमेते वि पएसे जे णं तासिं अयाणं उच्चारेण वा जाव नहेहिं वा अणोक्कंतपुव्वे नो चेव णं एयंसि एमहालयंसि लोगंसि लोगस्स य सासयभावं, संसारस्स य अणादिभावं, जीवस्स य निच्चभावं कम्मबहुतं जम्मण-मरणबाहुल्लं च पडुच्च नत्थि केयि परमाणुपोग्गलमेते वि पएसे

जत्थ णं अयं जीवे न जाए वा, न मए वा वि। सेतेणट्ठेणं तं चेव जाव न मए वा वि।

**[५५१]** कति णं भंते! पुढवीओ पन्नताओ? गोयमा! सत्त पुढवीओ पन्नताओ, जहा पढमसए पंचमउद्देशए तहेव आवासा ठावेयव्वा जाव अणुत्तरविमाणे ति जाव अपराजिए सव्वट्ठसिद्धे।

अयं णं भंते! जीवे इमीसे रतणप्पभाए पुढवीए तीसाए निरयावाससयसहस्सेसु एगमेगंसि निरयावासंसि पुढविकाइयताए जाव वणस्सइकाइयताए नरगताए नेरइयताए उववन्नपुव्वे? हंता, गोतमा! असतिं अदुवा अणंतखुत्तो।

सव्वजीवा वि णं भंते! इमीसे रयणप्पभाए पुढवीए तीसाए निरया० तं चेव जाव अणंतखुत्तो।

अयं णं भंते! जीवे सक्करप्पभाए पुढवीए पणवीसाए० एवं जहा रयणप्पभाए तहेव दो आलावगा भाणियव्वा। एवं जाव धूमप्पभाए।

अयं णं भंते! जीवे तमाए पुढवीए पंचूणे निरयावाससयसहस्से एगमेगंसि० सेसं तं चेव।

अयं णं भंते! जीवे अहेसत्तमाए पुढवीए पंचसु अणुत्तरेसु महत्तिमहालएसु महानिरएसु

एगमेगंसि निरयावसंसि० सेसं जहा रयणप्पभाए।

अयं णं भंते! जीवे चोयट्ठीए असुरकुमारावाससयसहस्सेसु एगमेगंसि असुरकुमारावासंसि पुढविकाइयत्ताए जाव वणस्सतिकाइयत्ताए देवत्ताए देवित्ताए आसण-सयण-भंडमतोवगरणत्ताए उववन्नपुव्वे? हंता, गोयमा! जाव अणंतखुत्तो।

सव्वजीवा वि णं भंते!० एवं चेव।

एवं जाव थणियकुमारेसु नाणतं आवासेसु, आवासा पुव्वभणिया।

अयं णं भंते! जीवे असंखेज्जेसु पुढविकाइयावाससयसहस्सेसु एगमेगंसि पुढविकाइयावासंसि पुढविकाइयत्ताए जाव वणस्सतिकाइयत्ताए उववन्नपुव्वे? हंता, गोयमा! जाव अणंतखुत्तो।

एवं सव्वजीवा वि।

एवं जाव वणस्सतिकाइएसु।

अयं णं भंते! जीवे असंखेज्जेसु बेंदियावाससयसहस्सेसु एगमेगंसि बेंदियावासंसि पुढवि-काइयत्ताए जाव वणस्सतिकाइयत्ताए बेंदियत्ताए उववन्नपुव्वे? हंता, गोयमा! जाव खुत्तो।

सव्वजीवा वि णं० एवं चेव।

एवं जाव मणुस्सेसु। नवरं तेंदिएसु जाव वणस्सतिकाइयत्ताए तेंदियत्ताए, चउरिंदिएसु चउरिंदियत्ताए, पंचिंदियतिरिक्खजोणिएसु पंचिंदियतिरिक्खजोणियत्ताए, मणुस्सेसु मणुस्सत्ताए० सेसं जहा बेंदियाणं।

वाणमंतर-जोतिसिय-सोहम्मिसाणे[?सु] य जहा असुर-कुमाराणं।

अयं णं भंते! जीवे सणंकुमारे कप्पे बारससु विमाणावाससयसहस्सेसु एगमेगंसि वेमाणिय आवासंसि पुढविकाइयत्ताए० सेसं जहा असुरकुमाराणं जाव अणंतखुत्तो। नो चेव णं देवित्ताए।

एवं सव्वजीवा वि।

एवं जाव आणय-पाणएसु। एवं आरणच्चुएसु वि।

अयं णं भंते! जीवे तिसु वि अट्ठारसुत्तरेसु गोवेज्जविमाणावाससएसु० एवं चेव।

अयं णं भंते! जीवे पंचसु अणुत्तरविमाणेसु एगमेगंसि अणुत्तरविमाणंसि पुढवि० तहेव जाव अणंतखुत्तो, नो चेव णं देवत्ताए वा, देवित्ताए वा।

एवं सव्वजीवा वि।

अयं णं भंते! जीवे सव्वजीवाणं माइत्ताए पित्तिताए भाइत्ताए भगिणित्ताए भज्जत्ताए पुत्ताए धूयत्ताए सुणहत्ताए उववन्नपुव्वे? हंता, गोयमा! असइं अदुवा अणंतखुत्तो।

सव्वजीवा णं भंते! इमस्स जीवस्स माइत्ताए जाव उववन्नपुव्वे? हंता, गोयमा! जाव अणंतखुत्तो।

अयं णं भंते! जीवे सव्वजीवाणं अरित्ताए वेरियत्ताए घायत्ताए वहत्ताए पडिणीयत्ताए पच्चामित्ताए उववन्नपुव्वे? हंता, गोयमा! जाव अणंतखुत्तो।

सव्वजीवा वि णं भंते!० एवं चेव।

अयं णं भंते! जीवे सव्वजीवाणं रायत्ताए जुगरायत्ताए जाव सत्थवाहत्ताए उववन्नपुव्वे? हंता, गोयमा! असइं जाव अणंतखुत्तो।

सव्वजीवा णं० एवं चेव।

अयं णं भंते! जीवे सव्वजीवाणं दासत्ताए पेसत्ताए, भयगत्ताए भाइल्लत्ताए भोगपुरिसत्ताए सीसत्ताए वेसत्ताए उववन्नपुट्ठे? हंता, गोयमा! जाव अणंतखुत्तो।

एवं सव्वजीवा वि अणंतखुत्तो।

सेवं भंते! सेवं भंते! ति जाव विहरति।

**\*बारसमे सए सतमो उद्देशो समतो \***

**० अट्ठमो उद्देशो ०**

[५५२] तेणं कालेणं तेणं समएणं जाव एवं वयासी-

देवे णं भंते! महइढीए जाव महेसक्खे अणंतरं चयं चइत्ता बिसरीरेसु नागेसु उववज्जेज्जा? हंता, उववज्जेज्जा।

से णं तत्थ अच्चियवंदियपूइयसक्कारियसम्मणिए दिव्वे सच्चे सच्चोवाए सन्नहियपाडिहेरे यावि भवेज्जा? हंता, भवेज्जा।

से णं भंते! तओ हितो अणंतरं उव्वट्ठिता सिज्जेज्जा बुज्जेज्जा जाव अंतं करेज्जा? हंता, सिज्जेज्जा जाव अंतं करेज्जा।

देवे णं भंते! महइढीए एवं चेव जाव बिसरीरेसु मणीसु उववज्जेज्जा? एवं चेव जहा नागाणं।

देवे णं भंते! महइढीए जाव बिसरीरेसु रुक्खेसु उववज्जेज्जा? हंता, उववज्जेज्जा। एवं चेव। नवरं इमं नाणत्तं- जाव सन्नहियपाडिहेरे लाउल्लोइयमहिते यावि भवेज्जा? हंता, भवेज्जा। सेसं तं चेव जाव अंतं करेज्जा।

[५५३] अह भंते! गोलंगूलवसभे कुक्कुडवसभे मंडुक्कवसभे, एए णं निस्सीला निव्वया निग्गुणा निम्मरा निप्पच्चक्खाणपोसहोववासा कालमासे कालं किच्चा इमीसे रयणप्पभाए पुढवीए उक्कोससागरोवमट्ठितीयंसि नरगंसि नेरतियत्ताए उववज्जेज्जा? समणे भगवं महावीरे वागरेति-- 'उववज्जमाणे उववन्ने'ति वत्तव्वं सिया।

अह भंते! सीहे वग्घे जहा ओसप्पिणिउद्देशए जाव परस्सरे, एए णं निस्सीला० एवं चेव जाव वत्तव्वं सिया।

अह भंते! ढंके कंके विलए महुए सिखी, एते णं निस्सीला० सेसं तं चेव जाव वत्तव्वं सिया। सेवं भंते! सेवं भंते! ति जाव विहरइ।

**\*बारसमे सए अट्ठमो उद्देशो समतो \***

**० नवमो उद्देशो ०**

[५५४] कतिविहा णं भंते! देवा पन्नत्ता? गोयमा! पंचविहा देवा पन्नत्ता, तं जहा- भवियदव्वदेवा, नरदेवा, धम्मदेवा, देवातिदेवा, भावदेवा।

से केणट्ठेणं भंते! एवं वुच्चति 'भवियदव्वदेवा, भवियदव्वदेवा'? गोयमा! जे भविए पंचंदियतिरिक्खजोणिए वा मणुस्से वा देवेसु उववज्जितए, सेतेणट्ठेणं गोयमा! एवं वुच्चइ 'भवियदव्वदेवा,

भवियदव्वदेवा'।

से केणट्ठेणं भंते! एवं वुच्चइ 'नरदेवा, नरदेवा'? गोयमा! जे इमे रायाणो चाउरंतचक्कवट्ठी उप्पन्नसमतचक्करयणप्पहाणा नवनिहिपतिणो समिद्धकोसा बत्तीसंरायवरसहस्साणुयातमग्गा सागरवरमेहलाहिपतिणो मणुस्सिंदा, से तेणट्ठेणं जाव 'नरदेवा, नरदेवा'।

से केणट्ठेणं भंते! एवं वुच्चइ 'धम्मदेवा, धम्मदेवा'? गोयमा! जे इमे अणगारा भगवंतो रियासमिया जाव गुत्तबंधचारी, सेतेणट्ठेणं जाव 'धम्मदेवा, धम्मदेवा'।

से केणट्ठेणं भंते! एवं वुच्चइ 'देवातिदेवा, देवातिदेवा'? गोयमा! जे इमे अरहंता भगवंता उप्पन्ननाण-दंसणधरा जाव सव्वदरिसी, सेतेणट्ठेणं जाव 'देवातिदेवा, देवातिदेवा'।

से केणट्ठेणं भंते! एवं वुच्चइ 'भावदेवा, भावदेवा'? गोयमा! जे इमे भवणवति-वाणमंतर-जोतिस-वेमाणिया देवा देवगतिनाम-गोयाइं कम्माइं वेदंति, से तेणट्ठेणं जाव 'भावदेवा, भावदेवा'।

**[५५५]** भवियदव्वदेवा णं भंते! कओहिंतो उववज्जंति? किं नेरइएहिंतो उववज्जंति, तिरिक्ख-मणुस्स-देवेहिंतो उववज्जंति? गोयमा! नेरइएहिंतो उववज्जंति, तिरि-मणु-देवेहिंतो वि उववज्जंति। भेदो जहा वक्कंतीए। सव्वेसु उववातेयव्वा जाव अणुत्तरोववातिय ति। नवरं असंखेज्जवासाउय-अकम्मभूमग-अंतरदीवग-सव्वट्ठसिद्धवज्जं जाव अपराजियदेवेहिंतो वि उववज्जंति, णो सव्वट्ठसिद्धदेवेहिंतो उववज्जंति।

नरदेवा णं भंते! कओहिंतो उववज्जंति? किं नेरतिय० पुच्छा। गोयमा! नेरतिएहिंतो उववज्जंति, नो तिरि०, नो मणु०, देवेहिंतो वि उववज्जंति।

जदि नेरतिएहिंतो उववज्जंति किं रयणप्पभापुढविनेरतिएहिंतो उववज्जंति जाव अहेसत्तमा-पुढविनेरतिएहिंतो उववज्जंति? गोयमा! रयणप्पभापुढविनेरतिएहिंतो उववज्जंति, नो सक्कर० जाव नो अहेसत्तमपुढविनेरतिएहिंतो उववज्जंति।

जइ देवेहिंतो उववज्जंति किं भवणवासिदेवेहिंतो उववज्जंति, वाणमंतर-जोतिसिय-वेमाणियदेवेहिंतो उववज्जंति? गोयमा! भवणवासिदेवेहिंतो वि उववज्जंति, वाणमंतर०, एवं सव्वदेवेसु उववाएयव्वा वक्कंतीभेदेणं जाव सव्वट्ठसिद्ध ति।

धम्मदेवा णं भंते! कओहिंतो उववज्जंति किं नेरतिएहिंतो?० एवं वक्कंतीभेदेणं सव्वेसु उववाएयव्वा जाव सव्वट्ठसिद्ध ति। नवरं तमा-अहेसत्तमा-तेउ-वाउ-असंखेज्जवासाउय-अकम्मभूमग-अंतरदीवगवज्जेसु।

देवातिदेवा णं भंते! कतोहिंतो उववज्जंति? किं नेरइएहिंतो उववज्जंति?० पुच्छा। गोयमा! नेरइएहिंतो उववज्जंति, नो तिरि०, नो मणु०, देवहिंतो वि उववज्जंति।

जति नेरतिएहिंतो० एवं तिसु पुढवीसु उववज्जंति, सेसाओ खोडेयव्वाओ।

जदि देवेहिंतो०, वेमाणिएसु सव्वेसु उववज्जंति जाव सव्वट्ठसिद्ध ति। सेसा खोडेयव्वा।

भावदेवा णं भंते! कओहिंतो उववज्जंति?० एवं जहा वक्कंतीए भवणवासीणं उववातो तहा भाणियव्वो।

**[५५६]** भवियदव्वदेवाणं भंते! केवतियं कोलं ठिती पन्नता? गोयमा! जहन्नेणं अंतोमुहुत्तं, उक्कोसेणं तिण्णि पलिओवमाइं।

नरदेवाणं० पुच्छा। गोयमा! जहन्नेणं सत वाससयाइं, उक्कोसेणं चउरासीतिं पुव्वसयसहस्साइं।

धम्मदेवाणं भंते!० पुच्छा। गोयमा! जहन्नेणं अंतोमुहुत्तं, उक्कोसेणं देसूणा पुव्वकोडी।

देवातिदेवाणं० पुच्छा। गोयमा! जहन्नेणं बावत्तरिं वासाइं, उक्कोसेणं चउरासीइं पुव्वसयसहस्साइं।

भावदेवाणं० पुच्छा। गोयमा! जहन्नेणं दसवाससहस्साइं, उक्कोसेणं तेतीसं सागरोवमाइं।

**[५५७]** भवियदव्वदेवा णं भंते! किं एगतं पभू विउव्वित्तए, पुहत्तं पि पभू विउव्वित्तए? गोयमा! एगतं पि पभू विउव्वित्तए, पुहत्तं पि पभू विउव्वित्तए। एगतं विउव्वमाणे एगिंदियरूवं वा जाव पंचिंदियरूवं वा, पुहत्तं विउव्वमाणे एगिंदियरूवाणि वा जाव पंचिंदियरूवाणि वा। ताइं संखेज्जाणि वा असंखेज्जाणि वा, संबद्धाणि वा असंबद्धाणि वा, सरिसाणि वा असरिसाणि वा विउव्वंति, विउव्वित्ता तओ पुच्छा जहिच्छियाइं कज्जाइं करंति।

एवं नरदेवा वि, धम्मदेवा वि।

देवातिदेवा णं० पुच्छा। गोयमा! एगतं पि पभू विउव्वित्तए, पुहत्तं पि पभू विउव्वित्तए, नो चेव णं संपतीए विउव्विंसु वा, विउव्वंति वा, विउव्विस्संति वा।

भावदेवा जहा भवियदव्वदेवा।

**[५५८]** भवियदव्वदेवा णं भंते! अणंतरं उव्वट्ठिता कहिं गच्छंति? कहिं उव्वज्जंति? किं नेरइएसु उव्वज्जंति, जाव देवेसु उव्वज्जंति? गोयमा! नो नेरइएसु उव्वज्जंति, नो तिरि०, नो मणु०, देवेसु उव्वज्जंति।

जइ देवेसु उव्वज्जंति०? सव्वदेवेसु उव्वज्जंति जाव सव्वट्ठसिद्ध ति।

नरदेवा णं भंते! अणंतरं उव्वट्ठिता० पुच्छा। गोयमा! नेरइएसु उव्वज्जंति, नो तिरि०, नो मणु०, नो देवेसु उव्वज्जंति।

जइ नेरइएसु उव्वज्जंति, सत्तसु वि पुढवीसु उव्वज्जंति।

धम्मदेवा णं भंते! अणंतरं० पुच्छा। गोयमा! नो नेरइएसु उव्वज्जंति, नो तिरि०, नो मणु०, देवेसु उव्वज्जंति।

जइ देवेसु उव्वज्जंति किं भवणवासि० पुच्छा। गोयमा! नो भवणवासिदेवेसु उव्वज्जंति, नो वाणमंतर०, नो जोतिसिय०, वेमाणियदेवेसु उव्वज्जंति-सव्वेसु वेमाणिएसु उव्वज्जंति जाव सव्वट्ठसिद्ध-अणु० जाव उव्वज्जंति। अत्थेगइया सिज्झंति जाव अंतं करंति।

देवातिदेवा अणंतरं उव्वट्ठिता कहिं गच्छंति? कहिं उव्वज्जंति? गोयमा! सिज्झंति जाव अंतं करंति।

भावदेवा णं भंते! अणंतरं उव्वट्ठिता० पुच्छा। जहा वक्कंतीए असुरकुमाराणं उव्वट्ठणा तहा भाणियव्वा।

भवियदव्वदेवे णं भंते! 'भवियदव्वदेवे'ति कालओ केवचिरं होइ? गोयमा! जहन्नेणं अंतोमुहुत्तं, उक्कोसेणं तिण्णि पत्तिओवमाइं। एवं जच्चेव ठिई सच्चेव संचिट्ठणा वि जाव भावदेवस्स। नवरं धम्मदेवस्स जहन्नेणं एकं समयं, उक्कोसेणं देसूणा पुव्वकोडी।

भवियदव्वदेवस्स णं भंते! केवतियं कालं अंतरं होति! गोयमा! जहन्नेणं दस वाससहस्साइं अंतोमुहुत्तमब्भहियाइं, उक्कोसेणं अणंतं कालं--वणस्सतिकालो।

नरदेवाणं पुच्छा। गोयमा! जहन्नेणं सातिरेगं सागरोवमं, उक्कोसेणं अणंतं कालं अवड्ढं पोग्गलपरियट्ठं देसूणं।

धम्मदेवस्स णं० पुच्छा। गोयमा! जहन्नेणं सातिरेगं सागरोवमं, उक्कोसेणं अणंतं कालं अवड्ढं पोग्गलपरियट्ठं देसूणं।

देवातिदेवाणं पुच्छा! गोयमा! नत्थि अंतरं।

भावदेवस्स णं०पुच्छा। गोयमा! जहन्नेणं अंतोमुहुत्तं, उक्कोसेणं अणंतं कालं-वनस्सतिकालो।

एएसि णं भंते! भवियदव्वदेवाणं नरदेवाणं जाव भावदेवाणं य कयरे कयरेहिंतो जाव विसेसाहिया वा? गोयमा! सव्वत्थोवा नरदेवा, देवातिदेवा संखेज्जगुणा, धम्मदेवा संखेज्जगुणा, भवियदव्वदेवा असंखेज्जगुणा, भावदेवा असंखेज्जगुणा।

[५५९] एएसि णं भंते! भावदेवाणं-भवणवासीणं वाणमंतराणं जोतिसियाणं, वेमाणियाणं-सोहम्मगाणं जाव अच्युतगाणं, गेवेज्जगाणं अणुत्तरोववाइयाणं य कयरे कयरेहिंतो जाव विसेसाहिया वा? गोयमा! सव्वत्थोवा अणुत्तरोववातिया भावदेवा, उवरिमगेवेज्जा भावदेवा संखेज्जगुणा, मज्झिमगेवेज्जा संखेज्जगुणा, हेट्ठिमगेवेज्जा संखेज्जगुणा, अच्युए कप्पे देवा संखेज्जगुणा, जाव आणते कप्पे देवा संखेज्जगुणा एवं जहा जीवाभिगमे तिविहे देवपुरिसे अप्पाबहुयं जाव जोतिसिया भावदेवा असंखेज्जगुणा।

सेवं भंते! सेवं भंते! त्ति०।

**\*बारसमे सए नवमो उद्देशो समतो \***

**० दसमो उद्देशो ०**

[५६०] कतिविधा णं भंते! आता पन्नन्ना? गोयमा! अट्ठविहा आता पन्नता, तं जहा--दवियाया कसायाया जोगाया उवयोगाता णाणाया दंसणाया चरिताया वीरियाया।

जस्स णं भंते! दवियाया तस्स कसायाया, जस्स कसायाया तस्स दवियाया? गोयमा! जस्स दवियाया तस्स कसायाता सिय अत्थि सिय नत्थि, जस्स पुण कसायाया तस्स दवियाया नियमं अत्थि।

जस्स णं भंते! दवियाता तस्स जोगाया०? एवं जहा दवियाया य कसायाता य भणिया तहा दवियाया य जोगाया य भाणियव्वा।

जस्स णं भंते! दवियाया तस्स उवयोगाया०? एवं सव्वत्थ पुच्छा भाणियव्वा। जस्स दवियाया तस्स उवयोगाया नियमं अत्थि, जस्स वि उवयोगाया तस्स वि दवियाया नियमं अत्थि। जस्स दवियाया तस्स नाणाया भयणाए, जस्स पुण नाणाया तस्स दवियाता नियमं अत्थि। जस्स दवियाया तस्स दंसणाया नियमं अत्थि, जस्स वि दंसणाया तस्स दवियाया नियमं अत्थि। जस्स दवियाया तस्स चरिताया भयणाए, जस्स पुण चरिताया तस्स दवियाया नियमं अत्थि। एवं वीरियायाए वि समं।

जस्स णं भंते! कसायाया तस्स जोगाया० पुच्छा। गोयमा! जस्स कसायाता तस्स जोगाया नियमं अत्थि, जस्स पुण जोगाया तस्स कसायाया सिय अत्थि सिय नत्थि।

एवं उवयोगायाए वि समं कसायाता नेयव्वा।

कसायाया य नाणाया य परोप्परं दो वि भइयच्चाओ।

जहा कसायाया य उवयोगाया य तहा कसायाया य दंसणाया य।

कसायाया य चरिताया य दो वि परोप्परं भइयच्चाओ।

जहा कसायाया य जोगाया य तहा कसायाया य वीरियाया य भाणियच्चाओ।

एवं जहा कसायाताए वत्तच्चया भणिया तहा जोगायाए वि उवरिमाहिं समं भाणियच्चा।

जहा दवियायाए वत्तच्चया भणिया तहा उवयोगायाए वि उवरिल्लाहिं समं भाणियच्चा।

जस्स नाणाया तस्स दंसणाया नियमं अत्थि, जस्स पुण दंसणाया तस्स नाणाया भयणाए।

जस्स नाणाया तस्स चरिताया सिय अत्थि सिय नत्थि, जस्स पुण चरिताया तस्स नाणाया नियमं अत्थि।

णाणाया य वीरियाया य दो वि परोप्परं भयणाए।

जस्स दंसणाया तस्स उवरिमाओ दो वि भयणाए, जस्स पुण ताओ तस्स दंसणाया नियमं अत्थि।

जस्स चरिताया तस्स वीरियाया नियमं अत्थि, जस्स पुण वीरियाया तस्स चरिताया सिय अत्थि सिय नत्थि।

एयासि णं भंते! दवियायाणं कसायायाणं जाव वीरियायाण य कयरे कयरेहितो जाव विसेसाहिया वा? गोयमा! सत्त्वन्थोवाओ चरितायाओ, नाणायाओ अणंतगुणाओ, कसायायाओ अणंतगुणाओ, जोगायाओ विसेसाहियाओ, वीरियायाओ विसेसाहियाओ, उवयोग-दविय-दंसणायाओ तिण्णि वि तुल्लाओ विसेसाहियाओ।

**[५६१]** आया भंते! नाणे, अन्ने नाणे? गोयमा! आया सिय नाणे, सिय अन्नाणे, णाणे पुण नियमं आया।

आया भंते! नेरइयाणं नाणे, अन्ने नेरइयाणं नाणे? गोयमा! आया नेरइयाणं सिय नाणे सिय अन्नाणे, नाणे पुण से नियमं आया।

एवं जाव थणियकुमाराणं।

आया भंते! पुढविकाइयाणं अन्नाणे, अन्ने पुढविकाइयाणं अन्नाणे? गोयमा! आया पुढविकाइयाणं नियमं अन्नाणे, अण्णाणे वि नियमं आया।

एवं जाव वणस्सतिकाइयाणं।

बेइंदिय-तेइंदिय० जाव वेमाणियाणं जहा नेरइयाणं।

आया भंते! दंसणे, अन्ने दंसणे? गोयमा! आया नियमं दंसणे, दंसणे वि नियमं आया।

आया भंते! नेरइयाणं दंसणे, अन्ने नेरइयाणं दंसणे? गोयमा! आया नेरइयाणं नियमं दंसणे, दंसणे वि से नियमं आया।

एवं जाव वेमाणियाणं निरंतरं दंडओ।

**[५६२]** आया भंते! रयणप्पभा पुढवी, अन्ना रयणप्पभा पुढवी? गोयमा! रयणप्पभा पुढवी सिय आया, सिय नोआया, सिय अवत्तच्चं--आया ति य, नोआता ति य।

से केणट्ठेणं भंते! एवं वुच्चति रयणप्पभा पुढवी सिय आता, सिय नोआया, सिय अवत्तच्चं-

आता ति य, नोआया ति य? गोयमा! अप्पणो आदिट्ठे आया, परस्स आदिट्ठे नोआता, तदुभयस्स आदिट्ठे अवत्तव्वं-रयणप्पभा पुढवी आया ति य, नोआया ति य। सेतेणट्ठेणं तं चेव जाव नोआया ति य।

आया भंते! सक्करप्पभा पुढवी?० जहा रयणप्पभा पुढवी तहा सक्करप्पभा वि।

एवं जाव अहेसत्तमा।

आया भंते! सोहम्मं कप्पे?० पुच्छ। गोयमा! सोहम्मं कप्पे सिय आया, सिय नोआया, जाव नोआया ति य।

से केणट्ठेणं भंते! जाव नोआया ति य? गोयमा! अप्पणो आदिट्ठे आया, परस्स आदिट्ठे नोआया, तदुभयस्स आदिट्ठे अवत्तव्वं-आता ति य, नोआया ति य। सेतेणट्ठेणं तं चेव जाव नोआया ति य।

एवं जाव अच्चुए कप्पे।

आया भंते! गेवेज्जविमाणे, अन्ने गेविज्जविमाणे? एवं जहा रयणप्पभा तहेव।

एवं अणुत्तरविमाणा वि।

एवं ईसिपब्भारा वि।

आया भंते! परमाणुपोग्गले, अन्ने परमाणुपोग्गले? एवं जहा सोहम्मं तहा परमाणुपोग्गले वि भाणियव्वे।

आया भंते! दुपदेसिए खंधे, अन्ने दुपएसिए खंधे? गोयमा! दुपएसिए खंधे सिय आया, सिय नोआया, सिय अवत्तव्वं-आया ति य नोआया ति य, सिय आया य नोआया य, सिय आया य अवत्तव्वं-आया ति य नोआया ति य, सिय नोआया य अवत्तव्वं-आया ति य नोआया ति य।

से केणट्ठेणं भंते! एवं० तं चेव जाव नो आया य, अवत्तव्वं-आया ति य नोआया ति य? गोयमा! अप्पणो आदिट्ठे आया; परस्स आदिट्ठे नोआया; तदुभयस्स आदिट्ठे अवत्तव्वं-दुपएसिए खंधे आया ति य, नोआया ति य; देसे आदिट्ठे सब्भावपज्जवे, देसे आदिट्ठे असब्भावपज्जवे दुपदेसिए खंधे आया य नोआया य; देसे आदिट्ठे सब्भावपज्जवे, देसे आदिट्ठे तदुभयपज्जवे दुपएसिए खंधे आया य, अवत्तव्वं-आया ति य नोआया ति य; देसे आदिट्ठे असब्भावपज्जवे, देसे आदिट्ठे तदुभयपज्जवे दुपएसिए खंधे नोआया य, अवत्तव्वं-आता ति य नोआया ति य । सेतेणट्ठेणं तं चेव जाव नोआया ति य।

आया भंते! तिपएसिए खंधे, अन्ने तिपएसिए खंधे? गोयमा! तिपएसिए खंधे सिय आया, सिय नो आया, सिय अवत्तव्वं-आता ति य नोआता ति य, सिय आया य नोआया य, सिय आया य नोआयाओ य, सिय आयाओ य नोआया य, सिय आया य अवत्तव्वं-आया ति य नोआया ति य, सिय आया य अवत्तव्वं-आयाओ य नोआयाओ य, सिय आयाओ य अवत्तव्वं-आया ति य नोआया ति य, सिय नोआया य अवत्तव्वं-आयाओ य नोआयाओ य , सिय नोआया य अवत्तव्वं-आयाओ य नोआयाओ य , सिय नोआयाओ य अवत्तव्वं-आयाओ य अवत्तव्वं-आया ति य नोआया ति य , सिय आया य नोआया य अवत्तव्वं-आया ति य नोआता ति य ।

से केणट्ठेणं भंते! एवं वुच्चति 'तिपएसिए खंधे सिय आया य० एवं चेव उच्चारयव्वं जाव सिय आया य नोआया य अवत्तव्वं-आया ति य नोआया ति य? गोयमा! अप्पणो आदिट्ठे आया; परस्स आइट्ठे नोआया; तदुभयस्स आइट्ठे अवत्तव्वं-आया ति य नोआया ति य; देसे आदिट्ठे सब्भावपज्जवे, देसे

आदिट्ठे असब्भावपज्जवे तिपएसिए खंधे आया य नो आया य; देसे आदिट्ठे सब्भावपज्जवे, देसा आदिट्ठा असब्भावपज्जवा तिपएसिए खंधे आया य नोआयाओ य; देसा आदिट्ठा सब्भावपज्जवा, देसे आदिट्ठे असब्भावपज्जवे तिपएसिए खंधे आयाओ य नोआया य; देसे आदिट्ठे सब्भावपज्जवे, देसे आदिट्ठे तदुभयपज्जवे तिपएसिए खंधे आया य अवतत्त्वं-आया इ य नोआया ति य; देसे आदिट्ठे सब्भावपज्जवे, देसा आदिट्ठा तदुभयपज्जवा तिपएसिए खंधे आया य अवतत्त्वाइं-आयाओ य नोआयाओ य; देसा आदिट्ठा सब्भावपज्जवा, देसे आदिट्ठे तदुभयपज्जवे तिपएसिए खंधे आयाओ य अवतत्त्वं-आया ति य नोआया ति य; एए तिण्णि भंगा। देसे आदिट्ठे असब्भावपज्जवे, देसे आदिट्ठे तदुभयपज्जवे तिपएसिए खंधे नोआया य अवतत्त्वं-आया ति य नोआया ति य; देसे आदिट्ठे असब्भावपज्जवे, देसा आदिट्ठा तदुभयपज्जवा तिपएसिए खंधे नोआया य अवतत्त्वाइं-आयाओ य नो आयाओ य; देसा आदिट्ठा असब्भावपज्जवा, देसे आदिट्ठे तदुभयपज्जवे तिपएसिए खंधे नोआयाओ य अवतत्त्वं-आया ति य नोआया ति य; देसे आदिट्ठे सब्भावपज्जवे, देसे आदिट्ठे असब्भावपज्जवे, देसे आदिट्ठे तदुभयपज्जवे तिपएसिए खंधे आया य नोआया य अवतत्त्वं-आया ति य नोआया ति य। सेतेणट्ठेणं गोयमा! एवं वुच्चइ तिपएसिए खंधे सिय आया० तं चेव जाव नोआया ति य।

आया भंते! चउप्पएसिए खंधे, अन्ने० पुच्छा। गोयमा! चउप्पएसिए खंधे सिय आया, सिय नोआया, सिय अवतत्त्वं-आया ति य नोआया ति य, सिय आया य नोआया य, सिय आया य अवतत्त्वं, सिय नोआया य अवतत्त्वं, सिय आया य नोआया य अवतत्त्वं-आया ति य नोआया ति य, सिय आया य नोआया य अवतत्त्वाइं-आयाओ य नोआयाओ य, सिय आया य नोआयाओ य अवतत्त्वं-आया ति य नोआया ति य, सिय आयाओ य नोआया य अवतत्त्वं-आया ति य नोआया ति य।

से केणट्ठेणं भंते! एवं वुच्चइ-चउप्पएसिए खंधे सिय आया य, नोआया य, अवतत्त्वं० तं चेव अट्ठे पडिउच्चारेयत्त्वं। गोयमा! अप्पणो आदिट्ठे आया, परस्स आदिट्ठे नोआया, तदुभयस्स आदिट्ठे अवतत्त्वं०, देसे आदिट्ठे सब्भावपज्जवे, देसे आदिट्ठे असब्भावपज्जवे चउभंगो, सत्त्भावेणं तदुभयेण य चउभंगो, असत्त्भावेणं तदुभयेण य चउभंगो; देसे आदिट्ठे सब्भावपज्जवे, देसे आदिट्ठे असब्भावपज्जवे, देसे आदिट्ठे तदुभयपज्जवे चउप्पएसिए खंधे आया य, नोआया य, अवतत्त्वं-आया ति य नोआया ति य; देसे आदिट्ठे सब्भावपज्जवे, देसे आदिट्ठे असब्भावपज्जवे, देसा आदिट्ठा तदुभयपज्जवा चउप्पएसिए खंधे आया य, नोआया य, अवतत्त्वाइं-आयाओ य नोआयाओ य, देसे आदिट्ठे सब्भावपज्जवे, देसा आदिट्ठा असब्भावपज्जवा, देसे आदिट्ठे तदुभयपज्जवे चउप्प एसिए खंधे आया य, नोआयाओ य, अवतत्त्वं-आया ति य नोआया ति य, देसा आदिट्ठा सब्भावपज्जवा, देसे आदिट्ठे असब्भावपज्जवे, देसे आदिट्ठे तदुभयपज्जवे चउप्पएसिए खंधे आताओ य, नो आया य, अवतत्त्वं-आया ति य नोआया ति य। सेतेणट्ठेणं गोयमा! एवं वुच्चइ चउप्पएसिए खंधे सिय आया, सिय नोआया, सिय अवतत्त्वं। निक्खेवे ते चेव भंगा उच्चारेयत्त्वा जाव नोआया ति य।

आया भंते! पंचपएसिए खंधे, अन्ने पंचपएसिए खंधे? गोयमा! पंचपएसिए खंधे सिय आया, सिय नोआया, सिय अवतत्त्वं-आया ति य नोआया ति य, सिय आया य नोआया य, सिय आया य अवतत्त्वं, नोआया अवतत्त्वेण य, तियगसंजोगे एक्को ण पडइ।

से केणट्ठेणं भंते!० तं चेव पडिउच्चारेयत्त्वं। गोयमा! अप्पणो आदिट्ठे आया, परस्स

आदिट्ठे नोआया, तदुभयस्स आदिट्ठे अवत्तव्वं०, देसे आदिट्ठे सब्भावपज्जवे, देसे आदिट्ठे असब्भावपज्जवे, एवं दुयगसंजोगे सव्वे पडंति। तियगसंजोगे एक्को ण पडइ।

छप्पएसियस्स सव्वे पडंति।

जहा छप्पएसिए एवं जाव अणंतपएसिए।

सेवं भंते! सेवं भंते! ति जाव विहरति।

**\*बारसमे सए पंचमो उद्देशो समतो \***

**०-बारसमं सयं समतं-०**

**० मुनि दीपरत्तसागरेण संशोधितः सम्पादितश्च बारसमं सतं समतं ०**

**[ ] तेरसमं सयं [ ]**

[५६३]

पुढवी देव मणंतर पुढवी आहारमेव उववाए।

भासा कम अनगारे केयाघडिया समुग्घाए ॥

**० पढमो उद्देशो ०**

[५६४] रायगिहे जाव एवं वयासी--

कति णं भंते! पुढवीओ पन्नताओ? गोयमा! सत्त पुढवीओ पन्नताओ, तं जहा-रयणप्पभा जाव अहेसत्तमा।

इमीसे णं भंते! रयणप्पभाए पुढवीए केवतिया निरयावाससयसहस्सा पन्नता? गोयमा! तीसं निरयावाससयसहस्सा पन्नता।

ते णं भंते! किं संखेज्जवित्थडा, असंखेज्जवित्थडा? गोयमा! संखेज्जवित्थडा वि, असंखेज्जवित्थडा वि।

इमीसे णं भंते! रयणप्पभाए पुढवीए तीसाए निरयावाससयसहस्सेसु संखेज्जवित्थडेसु नरएसु एगसमएणं केवतिया नेरइया उववज्जंति?, केवतिया काउलेस्सा उववज्जंति?, केवतिया कण्हपक्खिया उववज्जंति?, केवतिया सुक्कपक्खिया उववज्जंति?, केवतिया सन्नी उववज्जंति?, केवतिया असन्नी उववज्जंति?, केवतिया भवसिद्धिया उववज्जंति?, केवतिया अभवसिद्धिया उववज्जंति?, केवतिया आभिणिबोहियनाणी उववज्जंति?, केवतिया सुयनाणी उववज्जंति?, केवतिया ओहिनाणी उववज्जंति?, केवतिया मतिअन्नाणी उववज्जंति?, केवतिया सुयअन्नाणी उववज्जंति?, केवतिया विभंगनाणी उववज्जंति?, केवतिया चक्खुदंसणी उववज्जंति?, केवतिया अचक्खुदंसणी उववज्जंति?, केवतिया ओहिदंसणी उववज्जंति?, केवतिया आहारसण्णोवत्ता उववज्जंति?, केवइया भयसण्णोवत्ता उववज्जंति?, केवतिया मेहुणसण्णोवत्ता उववज्जंति?, केवतिया परिग्गहसण्णोवत्ता उववज्जंति?, केवतिया इत्थिवेदगा उववज्जंति?, केवतिया पुरिसवेदगा उववज्जंति?, केवतिया नपुंसगवेदगा उववज्जंति?, केवतिया कोहकसाई उववज्जंति?, जाव केवतिया लोभकसायी उववज्जंति?, केवतिया सोतिंदियोवत्ता उववज्जंति?, जाव केवतिया फासिंदियोवत्ता उववज्जंति?, केवतिया नोइंदियोवत्ता उववज्जंति?, केवतिया मणजोगी उववज्जंति?, केवतिया वइजोगी उववज्जंति?, केवतिया कायजोगी उववज्जंति?, केवतिया सागारोवत्ता उववज्जंति?, केवतिया अणागारोवत्ता उववज्जंति?

गोयमा! इमीसे रयणप्पभाए पुढवीए तीसाए निरयावाससयसहस्सेसु संखेज्जवित्थडेसु नरएसु एगसमणं जहन्नेणं एक्को वा दो वा तिण्णि वा, उक्कोसेणं संखेज्जा नेरइया उववज्जंति। जहन्नेणं एक्को वा दो वा तिण्णि वा, उक्कोसेणं संखेज्जा काउलेस्सा उववज्जंति। जहन्नेणं एक्को वा दो वा तिण्णि वा, उक्कोसेणं संखेज्जा कण्हपक्खिया उववज्जंति। एवं सुक्कपक्खिया वि। एवं सन्नी। एवं असण्णी। एवं भवसिद्धिया। एवं अभवसिद्धिया, आभिणिबोहियनाणी, सुयनाणी, ओहिनाणी, मतिअन्नाणी, सुयअन्नाणी, विभंगनाणी। चक्खुदंसणी न उववज्जंति। जहन्नेणं एक्को वा दो वा तिण्णि वा, उक्कोसेणं संखेज्जा अचक्खुदंसणी उववज्जंति। एवं ओहिदंसणी वि, आहारसण्णोवउत्ता वि, जाव परिग्गहसण्णोवउत्ता वि इत्थिवेदगा न उववज्जंति। पुरिसवेदगा वि न उववज्जंति। जहन्नेणं एक्को वा दो वा तिण्णि वा, उक्कोसेणं संखेज्जा नपुंसगवेदगा उववज्जंति। एवं कोहकसायी जाव लोभकसायी। सोतिंदियोवउत्ता न उववज्जंति। एवं जाव फासिंदियोवउत्ता न उववज्जंति। जहन्नेणं एक्को वा दो वा तिण्णि वा, उक्कोसेणं संखेज्जा नोइंदियोवउत्ता उववज्जंति। मणजोगी ण उववज्जंति। एवं वइजोगी वि। जहन्नेणं एक्को वा दो वा तिण्णि वा, उक्कोसेणं संखेज्जा कायजोगी उववज्जंति। एवं सागारोवउत्ता वि। एवं अणागारोवउत्ता वि ।

इमीसे णं भंते! रयणप्पभाए पुढवीए तीसाए निरयावाससयसहस्सेसु संखेज्जवित्थडेसु नरएसु एगसमणं केवतिया नेरइया उव्वट्पंति?, केवतिया काउलेस्सा उव्वट्पंति?, जाव केवतिया अणागारोवउत्ता उव्वट्पंति?। गोयमा! इमीसे रयणप्पभाए पुढवीए तीसाए निरयावाससयसहस्सेसु संखेज्जवित्थडेसु नरएसु एगसमयेणं जहन्नेणं एक्को वा दो वा तिण्णि वा, उक्कोसेणं संखेज्जा नेरइया उव्वट्पंति। जहन्नेणं एक्को वा दो वा तिण्णि वा, उक्कोसेणं संखेज्जा काउलेस्सा उव्वट्पंति। एवं जाव सण्णी। असण्णी ण उव्वट्पंति। जहन्नेणं एक्को वा दो वा तिण्णि वा, उक्कोसेणं संखेज्जा भवसिद्धिया उव्वट्पंति। एवं जाव सुयअन्नाणी। विभंगनाणी न उव्वट्पंति। चक्खुदंसणी ण उव्वट्पंति। जहन्नेणं एक्को वा दो वा तिण्णि वा, उक्कोसेणं संखेज्जा अचक्खुदंसणी उव्वट्पंति। एवं जाव लोभकसायी। सोतिंदियोवउत्ता ण उव्वट्पंति। एवं जाव फासिंदियोवउत्ता न उव्वट्पंति। जहन्नेणं एक्को वा दो वा तिण्णि वा, उक्कोसेणं संखेज्जा नोइंदियोवउत्ता उव्वट्पंति। मणजोगी न उव्वट्पंति। एवं वइजोगी वि। जहन्नेणं एक्को वा दो वा तिण्णि वा, उक्कोसेणं संखेज्जा कायजोगी उव्वट्पंति। एवं सागारोवउत्ता, अणागारोवउत्ता।

इमीसे णं भंते! रयणप्पभाए पुढवीए तीसाए निरयावाससयसहस्सेसु संखेज्जवित्थडेसु नरएसु केवतिया नेरइया पण्णत्ता?, केवइया काउलेस्सा जाव केवतिया अणागारोवउत्ता पण्णत्ता?, केवतिया अणंतरोववन्नगा पन्नत्ता?, केवतिया परंपरोववन्नगा पन्नत्ता?, केवतिया अणंतरोगाढा पन्नत्ता?, केवतिया परंपरोगाढा पन्नत्ता?, केवतिया अणंतराहारा पन्नत्ता?, केवतिया परंपराहारा पन्नत्ता?, केवतिया अणंतर-पज्जत्ता पन्नत्ता? केवतिया परंपरपज्जत्ता पन्नत्ता? केवतिया चरिमा पन्नत्ता?, केवतिया अचरिमा पन्नत्ता ?

गोयमा! इमीसे रयणप्पभाए पुढवीए तीसाए निरयावाससयसहस्सेसु संखेज्जवित्थडेसु नरएसु संखेज्जा नेरइया पन्नत्ता। संखेज्जा काउलेस्सा पन्नत्ता। एवं जाव संखेज्जा सन्नी पन्नत्ता। असण्णी सिय अत्थि सिय नत्थि; जदि जत्थि जहन्नेणं एक्को वा दो वा तिण्णि वा, उक्कोसेणं संखेज्जा पन्नत्ता। संखेज्जा भवसिद्धिया पन्नत्ता। एवं जाव संखेज्जा परिग्गहसन्नोवउत्ता पन्नत्ता। इत्थिवेदगा नत्थि । पुरिसवेदगा नत्थि। संखेज्जा नपुंसगवेदगा पण्णत्ता। एवं कोहकसायी वि। माणकसाई जहा असण्णी। एवं जाव लोभकसायी। संखेज्जा सोतिंदियोवउत्ता पन्नत्ता। एवं जाव फासिंदियोवउत्ता।

नोइंदियोवउत्ता जहा असण्णी। संखेज्जा मणजोगी पन्नता। एवं जाव अणागारोवउत्ता। अणंतरोववन्नगा सिय अत्थि सिय नत्थि; जदि अत्थि जहा असण्णी। संखेज्जा परंपरोववन्नगा। एवं जहा अणंतरोववन्नगा तहा अणंतरोगाढगा, अणंतराहारगा, अणंतरपज्जतगा। परंपरोगाढगा जाव अचरिमा जहा परंपरोववन्नगा ।

इमीसे णं भंते! रयणप्पभाए पुढवीए तीसाए निरयावाससयसहस्सेसु असंखेज्जवित्थडेसु नरएसु एगसमएणं केवतिया नेरतिया उववज्जंति?, जाव केवतिया अणागारोवउत्ता उववज्जंति?

गोयमा! इमीसे रयणप्पभाए पुढवीए तीसाए निरयावाससयसहस्सेसु असंखेज्जवित्थडेसु नरएसु एगसमएणं जहन्नेणं एक्को वा दो वा तिण्णि वा, उक्कोसेणं असंखेज्जा नेरइया उववज्जंति। एवं जहेव संखेज्जवित्थडेसु तिण्णि गमगा तहा असंखेज्जवित्थडेसु वि तिण्णि गमगा भाणियच्चा। नवरं असंखेज्जा भाणियच्चा, सेसं तं चेव जाव असंखेज्जा अचरिमा पन्नता ४९। "नाणत्तं लेस्सासु", लेसाओ जहा पढमसए। नवरं संखेज्जवित्थडेसु वि असंखेज्जवित्थडेसु वि ओहिनाणी ओहिदंसणी य संखेज्जा उववट्ठवेयच्चा, सेसं तं चेव।

सक्करप्पभाए णं भंते! पुढवीए केवतिया निरयावास० पुच्छा। गोयमा! पणुवीसं निरयावाससयसहस्सा पन्नता।

ते णं भंते! किं संखेज्जवित्थडा, असंखेज्जवित्थडा? एवं जहा रयणप्पभाए तहा सक्करप्पभाए वि। नवरं असण्णी तिसु वि गमएसु न भण्णति, सेसं तं चेव।

वालुयप्पभाए णं० पुच्छा। गोयमा! पन्नरस निरयावाससयसहस्सा पन्नता। सेसं जहा सक्करप्पभाए। "णाणत्तं लेसासु", लेसाओ जहा पढमसए (स० १ उ० ५ सु० २८)।

पंकप्पभाए० पुच्छा। गोयमा! दस निरयावाससतसहस्सा०। एवं जहा सक्करप्पभाए। नवरं ओहिनाणी ओहिदंसणी य न उववट्ठंति, सेसं तं चेव।

धूमप्पभाए णं० पुच्छा। गोयमा! तिण्णि निरयावाससयसहस्सा० एवं जहा पंकप्पभाए।

तमाए णं भंते! पुढवीए केवतिया निरयावास० पुच्छा। गोयमा! एगे पंचूणे निरयावाससयसहस्से पन्नते। सेसं जहा पंकप्पभाए।

अहेसत्तमाए णं भंते! पुढवीए कति अणुतरा महतिमहालया निरया पन्नता? गोयमा! पंच अणुतरा जाव अप्पतिट्ठणे।

ते णं भंते! किं संखेज्जवित्थडा, असंखेज्जवित्थडा? गोयमा! संखेज्जवित्थडे य असंखेज्जवित्थडा य।

अहेसत्तमाए णं भंते! पुढवीए पंचसु अणुतरेसु महतिमहा० जाव महानिरएसु संखेज्जवित्थडे नरए एगसमएणं केवति० एवं जहा पंकप्पभाए। नवरं तिसु नाणेसु न उववज्जंति न उववट्ठंति। पन्नतएसु तहेव अत्थि। एवं असंखेज्जवित्थडेसु वि। नवरं असंखेज्जा भाणियच्चा।

**[५६५]** इमीसे णं भंते! रयणप्पभाए पुढवीए तीसाए निरयावाससतसहस्सेसु संखेज्ज-वित्थडेसु नरएसु किं सम्मद्विट्ठी नेरतिया उववज्जंति, मिच्छद्विट्ठी नेरइया उववज्जंति, सम्मामिच्छद्विट्ठी नेरतिया उववज्जंति? गोयमा! सम्मद्विट्ठी वि नेरतिया उववज्जंति, मिच्छद्विट्ठी वि नेरतिया उववज्जंति, नो सम्मामिच्छद्विट्ठी नेरतिया उववज्जंति।

इमीसे णं भंते! रयणप्पभाए पुढवीए तीसाए निरयावाससयसहस्सेसु संखेज्जवित्थडेसु

नरएसु किं सम्मदिट्ठी नेरतिया उव्वट्ठंति?०, एवं चेव।

इमीसे णं भंते! रयणप्पभाए पुढवीए तीसाए निरयावाससयसहस्सेसु संखेज्जवित्थडा नरगा किं सम्मदिट्ठीहिं नेरइएहिं अविरहिया, मिच्छादिट्ठीहिं नेरइएहिं अविरहिया, सम्मामिच्छादिट्ठीहिं नेरइएहिं अविरहिया? गोयमा! सम्मदिट्ठीहिं वि नेरइएहिं अविरहिया, मिच्छादिट्ठीहिं वि नेरइएहिं अविरहिता, सम्मामिच्छादिट्ठीहिं नेरइएहिं अविरहिया विरहिया वा।

एवं असंखेज्जवित्थडेसु वि तिण्णि गमगा भाणियव्वा।

एवं सक्करप्पभाए वि। एवं जाव तमाए।

अहेसत्तमाए णं भंते! पुढवीए पंचसु अणुत्तरेसु जाव संखेज्जवित्थडे नरए किं सम्मदिट्ठी नेरइया० पुच्छा। गोयमा! सम्मदिट्ठी नेरइया न उव्वज्जंति, मिच्छदिट्ठी नेरइया उव्वज्जंति, सम्मामिच्छदिट्ठी नेरइया न उव्वज्जंति।

एवं उव्वट्ठंति वि।

अविरहिए जहेव रयणप्पभाए।

एवं असंखेज्जवित्थडेसु वि तिण्णि गमगा।

[५६६] से नूणं भंते! कण्हलेस्से नीललेस्से जाव सुक्कलेस्से भविता कण्हलेस्सेसु नेरइएसु उव्वज्जंति? हंता, गोयमा! कण्हलेस्से जाव उव्वज्जंति।

से केणट्ठेणं भंते! एवं वुच्चइ 'कण्हलेस्से जाव उव्वज्जंति'? गोयमा! लेस्सट्ठाणेसु संकिलिस्समाणेसु संकिलिस्समाणेसु कण्हलेसं परिणमइ कण्हलेसं परिणमिता कण्हलेस्सेसु नेरइएसु उव्वज्जंति, सेतेणट्ठेणं जाव उव्वज्जंति।

से नूणं भंते! कण्हलेस्से जाव सुक्कलेस्से भविता नीललेस्सेसु नेरइएसु उव्वज्जंति? हंता, गोयमा! जाव उव्वज्जंति।

से केणट्ठेणं जाव उव्वज्जंति? गोयमा! लेस्सट्ठाणेसु संकिलिस्समाणेसु वा विसुज्झमाणेसु वा नीललेस्सं परिणमति, नीललेसं परिणमिता नीललेस्सेसु नेरइएसु उव्वज्जंति, सेतेणट्ठेणं गोयमा! जाव उव्वज्जंति।

से नूणं भंते! कण्हलेस्से नील० जाव भविता काउलेस्सेसु नेरइएसु उव्वज्जंति?

एवं जहा नीललेस्साए तहा काउलेस्सा वि भाणियव्वा जाव से तेणट्ठेणं जाव उव्वज्जंति।

सेवं भंते! सेवं भंते! ति०।

**\*तेरसमे सए पढमो उद्देशो समतो \***

**० बीओ उद्देशो ०**

[५६७] कतिविधा णं भंते! देवा पन्नता? गोयमा! चउव्विहा देवा पन्नता, तं जहा-भवणवासी वाणमंतरा चोत्तिसिया वेमाणिया।

भवणवासी णं भंते! देवा कतिविधा पन्नता? गोयमा! दसविहा पण्णता, तं जहा-- असुरकुमारा० एवं भेदो जहा बित्तियसए देवुद्देसए जाव अपराजिया सव्वट्ठसिद्धगा।

केवतिया णं भंते! असुरकुमारावससयसहस्सा पन्नता? गोयमा! चोसट्ठिं असुरकुमारावास-

सयसहस्सा पन्नता।

ते णं भंते! किं संखेज्जवित्थडा, असंखेज्जवित्थडा? गोयमा! संखेज्जवित्थडा वि असंखेज्जवित्थडा वि।

चोयट्ठीए णं भंते! असुरकुमारावाससयसहस्सेसु संखेज्जवित्थडेसु असुरकुमारावासेसु एगसमयेणं केवतिया असुरकुमारा उववज्जंति? जाव केवतिया तेउलेस्सा उववज्जंति? केवतिया कण्हपक्खिया उववज्जंति? एवं जहा रयणप्पभाए तहेव पुच्छा, तहेव वागरणं, नवरं दोहिं वि वेदेहिं उववज्जंति, नपुंसगवेयगा न उववज्जंति। सेसं तं चेव।

उव्वट्ठंता वि तहेव, नवरं असण्णी उव्वट्ठंति, ओहिनाणी ओहिंदसणी य ण उव्वट्ठंति, सेसं तं चेव। पन्नतएसु तहेव, नवरं संखेज्जगा इत्थिवेदगा पन्नता। एवं पुरिसवेदगा वि। नपुंसगवेदगा नत्थि। कोहकसायी सिय अत्थि, सिय नत्थि; जइ अत्थि जहन्नेण एक्को वा दो वा तिन्नि वा, उक्कोसेणं संखेज्जा पन्नता। एवं माण० माय०। संखेज्जा लोभकसायी पन्नता। सेसं तं चेव तिसु वि गमएसु चत्तारि लेस्साओ भाणियव्वाओ।

एवं असंखेज्जवित्थडेसु वि, नवरं तिसु वि गमएसु असंखेज्जा भाणियव्वा जाव असंखेज्जा अचरिमा पन्नता।

केवतिया णं भंते! नागकुमारावास०? एवं जाव थणियकुमारा, नवरं जत्थ जतिया भवणा।

केवतिया णं भंते! वाणमंतरावाससयसहस्सा पन्नता? गोयमा! असंखेज्जा वाणमंतरावाससयसहस्सा पन्नता।

ते णं भंते! किं संखेज्जवित्थडा, असंखेज्जवित्थडा? गोयमा! संखेज्जवित्थडा, नो असंखेज्जवित्थडा।

संखेज्जेसु णं भंते! वाणमंतरावाससयसहस्सेसु एगसमएणं केवतिया वाणमंतरा उववज्जंति? एवं जहा असुरकुमाराणं संखेज्जवित्थडेसु तिण्णि गमा तहेव भाणियव्वा वाणमंतराण वि तिण्णि गमा।

केवतिया णं भंते! जोतिसियविमाणावाससयसहस्सा पन्नता? गोयमा! असंखेज्जा जोतिसिया विमाणावाससयसहस्सा पन्नता।

ते णं भंते! किं संखेज्जवित्थडा०? एवं जहा वाणमंतराणं तहा जोतिसियाण वि तिन्नि गमा भाणियव्वा, नवरं एगा तेउलेस्सा। उववज्जंतेसु पन्नतेसु य असन्नी नत्थि। सेसं तं चेव।

सोहम्मं णं भंते! कप्पे केवतिया विमाणावाससयसहस्सा पन्नता? गोयमा! बतीसं विमाणावाससयसहस्सा पन्नता।

ते णं भंते! किं संखेज्जवित्थडा, असंखेज्जवित्थडा? गोयमा! संखेज्जवित्थडा वि, असंखेज्जवित्थडा वि।

सोहम्मं णं भंते! कप्पे बतीसाए विमाणावाससयसहस्सेसु संखेज्जवित्थडेसु विमाणेसु एगसमएणं केवतिया सोहम्मं देवा उववज्जंति? केवतिया तेउलेस्सा उववज्जंति? एवं जहा जोतिसियाणं तिन्नि गमा तहेव भाणियव्वा, नवरं तिसु वि संखेज्जा भाणियव्वा। ओहिनाणी ओहिंदसणी य चयावेयव्वा। सेसं तं चेव। असंखेज्जवित्थडेसु एवं चेव तिन्नि गमा, नवरं तिसु वि गमएसु असंखेज्जा भाणियव्वा। ओहिनाणी ओहिंदसणी य संखेज्जा चयंति। सेसं तं चेव।

एवं जहा सोहम्मं वतव्वया भणिया तहा ईसाणे वि छ गमगा भाणियव्वा।

सणकुमारे एवं चेव, नवरं इत्थिवेदगा उववज्जंतेसु पन्नतेसु य न भण्णंति, असण्णी तुसि वि गमएसु न भण्णंति। सेसं तं चेव।

एवं जाव सहस्सारे, नाणतं विमाणेसु, लेस्सासु य। सेसं तं चेव।

आणय-पाणएसु णं भंते! कप्पेसु केवतिया विमाणावाससयसहस्सा पन्नता? गोयमा! चत्तारि विमाणावाससयसहस्सा पन्नता।

ते णं भंते! किं संखेज्ज0 पुच्छा। गोयमा! संखेज्जवित्थडा वि, असंखेज्जवित्थडा वि। एवं संखेज्जवित्थडेसु तिन्नि गमगा जहा सहस्सारे। असंखेज्जवित्थडेसु उववज्जंतेसु य चयंतेसु य एवं चेव संखेज्जा भाणियव्वा। पन्नतेसु असंखेज्जा, नवरं नोइंदियोवउत्ता, अणंतरोववन्नगा, अणंतरोगाढगा, अणंतराहारगा, अणंतरपज्जत्तगा य, एएसिं जहन्नेणं एक्को वा दो वा तिण्णि वा, उक्कोसेणं संखेज्जा पन्नता। सेसा असंखेज्जा भाणियव्वा।

आरणऽच्युएसु एवं चेव जहा आणय-पाणतेसु, नाणतं विमाणेसु।

एवं गेवेज्जगा वि।

कति णं भंते! अणुत्तरविमाणा पन्नता? गोयमा! पंच अणुत्तरविमाणा पन्नता।

ते णं भंते! किं संखेज्जवित्थडा, असंखेज्जवित्थडा? गोयमा! संखेज्जवित्थडे य असंखेज्ज-वित्थडा य।

पंचसु णं भंते! अणुत्तरविमाणेसु संखेज्जवित्थडे विमाणे एगसमएणं केवतिया अणुत्तरोववातिया देवा उववज्जंति? केवतिया सुक्कलेस्सा उववज्जंति?0 पुच्छा तहेव। गोयमा! पंचसु णं अणुत्तरविमाणेसु संखेज्जवित्थडे अणुत्तरविमाणे एगसमएणं जहन्नेणं एक्को वा दो वा तिण्णि वा, उक्कोसेणं संखेज्जा अणुत्तरोववातिया देवा उववज्जंति। एवं जहा गेवेज्जविमाणेसु संखेज्जवित्थडेसु, नवरं कण्हपक्खिया, अभवसिद्धिया, तिसु अन्नाणेसु एए न उववज्जंति, न चयंति, न वि पन्नतएसु भाणियव्वा, अचरिमा वि खोडिज्जंति जाव संखेज्जा चरिमा पन्नता। सेसं तं चेव। असंखेज्जवित्थडेसु वि एते न भण्णंति, नवरं अचरिमा अत्थि। सेसं जहा गेवेज्जएसु असंखेज्जवित्थडेसु जाव असंखेज्जा अचरिमा पन्नता।

चोयट्ठीए णं भंते! असुरकुमारावाससयसहस्सेसु संखेज्जवित्थडेसु असुरकुमारावासेसु किं सम्मद्धिट्ठी असुरकुमारा उववज्जंति, मिच्छद्धिट्ठी?0 एवं जहा रयणप्पभाए तिन्नि आलावगा भणिया तहा भाणियव्वा। एवं असंखेज्जवित्थडेसु वि तिन्नि गमा।

एवं जाव गेवेज्जविमाणेसु।

अणुत्तरविमाणेसु एवं चेव, नवरं तिसु वि आलावएसु मिच्छादिट्ठी सम्मामिच्छद्धिट्ठी य न भण्णंति। सेसं तं चेव।

से नूणं भंते! कण्हलेस्से नील0 जाव सुक्कलेस्से भवित्ता कण्हलेस्सेसु देवेसु उववज्जंति? हंता, गोयमा! एवं जहेव नेरइएसु पढमे उद्देशए तहेव भाणियव्वं।

नीललेसाए वि जहेव नेरइयाणं जहा नीललेस्साए।

एवं जाव पम्हलेस्सेसु।

सुक्कलेस्सेसु एवं चेव, नवरं लेसाठाणेसु विसुज्झमाणेसु विसुज्झमाणेसु सुक्कलेस्सं परिणमति, सुक्कलेसं परिणमिता सुक्कलेस्सेसु देवेसु उववज्जंति, सेतेणट्ठेणं जाव उववज्जंति।

सेवं भंते! सेवं भंते! ति०।

**\*तेरसमे सए बीइओ उद्देशो समतो \***

**० ततिओ उद्देशो ०**

[५६८] नेरतिया णं भंते! अणंतराहारा ततो निव्वत्तणया। एवं परियारणापदं निरवसेसं भा०।  
सेवं भंते! सेवं भंते! ति०।

**\*तेरसमे सए तइओ उद्देशो समतो \***

**० चउत्थो उद्देशो ०**

[५६९] कति णं भंते ! पुढवीओ पन्नत्ताओ ? गोयमा ! सत्त पुढवीओ पण्णत्ताओ, तं जहा-  
रयणप्पभा जाव अहेसत्तमा।

अहेसत्तमाए णं पुढवीए पंच अणुतरा महतिमहालया जाव अपत्तिट्ठाणे। ते णं णरगा  
छट्ठाए तमाए पुढवीए नरएहिंतो महत्तरा चेव, महावित्थिण्णतरा चेव, महोवासतरा चेव, महापतिरिक्कतरा  
चेव, नो तहा-महापवेसणतरा चेव, आइण्णतरा चेव, आउलतरा चेव, अणोमाणतरा चेव; तेसु णं नरएसु  
नेरतिया छट्ठाए तमाए पुढवीए नेरइएहिंतो महाकम्मतरा चेव, महाकिरियतरा चेव, महासवतरा चेव,  
महावेयणतरा चेव, नो तहा-अप्पकम्मतरा चेव, अप्पकिरियतरा चेव अप्पासवतरा चेव, अप्पवेयणतरा चेव ।  
अप्पिड्ढियतरा चेव, अप्पजुतियतरा चेव; नो तहा-महिड्ढियतरा चेव, नो महज्जुतियतरा चेव।

छट्ठाए णं तमाए पुढवीए एगे पंचूणे निरयावाससयसहस्से पन्नते। ते णं नरगा  
अहेसत्तमाए पुढवीए नेरइएहिंतो नो तहा-महत्तरा चेव, महावित्थिण्ण० ४; महप्पवेसणतरा चेव, आइण्ण० ४।  
तेसु णं नरएसु नेरइया अहेसत्तमाए पुढवीए नेरइएहिंतो अप्पकम्मतरा चेव, अप्पकिरिय० ४; नो तहा-  
महाकम्मतरा चेव, महाकिरिय० ४; महिड्ढियतरा चेव, महज्जुतियतरा चेव; नो तहा-अप्पिड्ढियतरा चेव,  
अप्पज्जुतियतरा चेव।

छट्ठाए णं तमाए पुढवीए नरगा पंचमाए धूमप्पभाए पुढवीए नरएहिंतो महत्तरा चेव० ४; नो  
तहा महप्पवेसणतरा चेव० ४।

तेसु णं नरएसु नेरइया पंचमाए धूमप्पभाए पुढवीए नेरइएहिंतो महाकम्मतरा चेव० ४; नो  
तहा अप्पकम्मतरा चेव० ४; अप्पिड्ढियतरा चेव अप्पजुइयतरा चेव; नो तहा महिड्ढियतरा चेव० २।

पंचमाए णं धूमप्पभाए पुढवीए तिन्नि निरयावाससतसहस्सा पन्नता।

एवं जहा छट्ठाए भणिय एवं सत्त वि पुढवीओ परोप्परं भण्णंति जाव रयणप्पभ ति। जाव  
नो तहा महिड्ढियतरा चेव अप्पज्जुतियतरा चेव।

[५७०] रयणप्पभपुढविनेरइया णं भंते! केरिसयं पुढविफासं पच्चणुभवमाणा विहरंति?  
गोयमा! अणिट्ठं जाव अमणाणं।

एवं जाव अहेसत्तमपुढविनेरतिया।

एवं जाव वणस्सइफासं।

[५७१] इमा णं भंते! रयणप्पभा पुढवी दोच्चं सक्करप्पभं पुढविं पणिहाए सच्चमहंतिया बाहल्लेणं, सच्चखुड्डिया सच्चंतेसु? एवं जहा जीवाभिगमे बितिए नेरइयउद्देशए।

[५७२] इमीसे णं भंते! रयणप्पभाए पुढवीए णिरयपरिसामंतेसु जे पुढविकाइया। एवं जहा नेरइयउद्देशए जाव अहेसत्तमाए।

[५७३] कहि णं भंते! लोगस्स आयाममज्झे पन्नते? गोयमा! इमीसे रयणप्पभाए पुढवीए ओवासंतरस्स असंखेज्जतिभागं ओगाहिता, एत्थ णं लोगस्स आयाममज्झे पण्णते।

कहि णं भंते! अहेलोगस्स आयाममज्झे पन्नते? गोयमा! चउत्थीए पंकप्पभाए पुढवीए ओवासंतरस्स सातिरंगं अद्धं ओगाहिता, एत्थ णं अहेलोगस्स आयाममज्झे पन्नते।

कहि णं भंते! उड्डलोगस्स आयाममज्झे पन्नते? गोयमा! उप्पिं सणकुमार-माहिंदाणंकप्पाणं हेट्ठिं बंभलोए कप्पे रिट्ठे विमाणपत्थडे, एत्थ णं उड्डलोगस्स आयाममज्झे पन्नते।

कहि णं भंते! तिरियलोगस्स आयाममज्झे पन्नते? गोयमा! जंबुद्धीवे दीवे मंदरस्स पच्चयस्स बहुमज्झदेसभाए इमीसे रयणप्पभाए पुढवीए उवरिमहेट्ठिल्लेसु खुड्डणपयरेसु, एत्थ णं तिरियलोगमज्झे अट्ठपएसिए रुयए पन्नते, जओ णं इमाओ दस दिसाओ पवहंति, तं जहा-पुरत्थिमा पुरत्थिमदाहिणा एवं जहा दसमसते जाव नामधेज्ज ति।

इंदा अग्गेयी जमा य नेरई वारुणी य वायट्ठा

सोमा ईसाणी या विमला य तमा य बोद्धट्ठा

[५७४] इंदा णं भंते! दिसा किमादीया किंपवहा कतिपदेसादीया कतिपदेसुतरा कतिपदेसिया किंपज्जवसिया किंसंठिया पन्नता? गोयमा! इंदा णं दिसा रुयगादीया रुयगप्पवहा दुपदेसादीया दुपदेसुतरा, लोगं पडुच्च असंखेज्जपएसिया, अलोगं पडुच्च अणंतपदेसिया, लोगं पडुच्च सादीया सपज्जवसिया, अलोगं पडुच्च सादीया अपज्जवसिया, लोगं पडुच्च मुरवसंठिया, अलोगं पडुच्च सगडुद्धिसंठिता पन्नता।

अग्गेयी णं भंते! दिसा किमादीया किंपवहा कतिपएसादीया कतिपएसवित्थिण्णा कतिपदेसिया किंपज्जवसिया किंसंठिया पन्नता? गोयमा! अग्गेयी णं दिसा रुयगादीया रुयगप्पवहा एगपएसादीया एगपएसवित्थिण्णा अणुतरा, लोगं पडुच्च असंखेज्जपएसिया, अलोगं पडुच्च अणंतपएसिया, लोगं पडुच्च सादीया सपज्जवसिया, अलोगं पडुच्च सादीया अपज्जवसिया, छिन्नमुत्तावलिसंठिया पन्नता।

जमा जहा इंदा।

नेरती जहा अग्गेयी।

एवं जहा इंदा तहा दिसाओ चत्तारि वि। जहा अग्गेयी तहा चत्तारि वि विदिसाओ।

विमला णं भंते! दिसा किमादीया०, पुच्छा। गोयमा! विमला णं दिसा रुयगादीया रुयगप पवहा चउप्पएसादीया, दुपदेसवित्थिण्णा अणुतरा, लोगं पडुच्च० सेसं जहा अग्गेयीए, नवरं रुयगसंठिया पन्नता।

एवं तमा वि।

[५७५] किमियं भंते! लोए ति पवुच्चइ? गोयमा! पंचत्थिकाया, एस णं एवतिए लोए ति पवुच्चइ, तं जहा--धम्मसत्थिकाए, अधम्मसत्थिकाए, जाव पोग्गलसत्थिकाए।

धम्मसत्थिकाए णं भंते! जीवाणं किं पवत्तति? गोयमा! धम्मसत्थिकाए णं जीवाणं आगमण-

गमण-भासुम्मस-मणजोग-वइजोग-कायजोगा, जे यावन्ने तहप्पगारा चला भावा सव्वे ते धम्मसत्थिकाए पवत्तंति। गतिलक्खणे णं धम्मत्थिकाए।

अहम्मसत्थिकाए णं भंते! जीवाणं किं पवत्तति? गोयमा! अहम्मसत्थिकाए णं जीवाणं ठाण-निसीयण-तुयट्ण-मणस्स य एगत्तीभावकरणा, जे यावन्ने तहप्पगारा थिरा भावा सव्वे ते अहम्मसत्थिकाए पवत्तंति। ठाणलक्खणे णं अहम्मत्थिकाए।

आगाससत्थिकाए णं भंते! जीवाणं किं पवत्तति? गोयमा! आगाससत्थिकाए णं जीवदव्वाण य अजीवदव्वाण य भायणभूए।

[५७६] एगेण वि से पुण्णे, दोहि वि पुण्णे, सयं पि माएज्जा।  
कोडिसएण वि पुण्णे, कोडिसहस्सं पि माएज्जा ॥

[५७७] अवगाहणालक्खणे णं आगासत्थिकाए।

जीवसत्थिकाए णं भंते! जीवाणं किं पवत्तति? गोयमा! जीवसत्थिकाए णं जीवे अणंताणं आभिणिबोहियनाणपज्जवाणं अणंताणं सुयनाणपज्जवाणं एवं जहा बितियसए अत्थिकायुद्देशए जाव उवयोगं गच्छति। उवयोगलक्खणे णं जीवे।

पोग्गलसत्थिकाए पुच्छा। गोयमा! पोग्गलसत्थिकाए णं जीवाणं ओरालिय-वेडव्विय-आहारग-तेया-कम्मा-सोतिंदिय-चक्खिंदिय-घाणिंदिय-जिब्भिंदिय-फासिंदिय-मणजोग-वइजोग-कायजोग-आणापाणूणं च गहणं पवत्तति। गहणलक्खणे णं पोग्गलत्थिकाए।

[५७८] एगे भंते! धम्मसत्थिकायपएसे केवतिएहिं धम्मसत्थिकायपएसेहिं पुट्ठे? गोयमा! जहन्नपए तीहिं, उक्कोसपए छहिं।

केवतिएहिं अहम्मसत्थिकायपएसेहिं पुट्ठे? जहन्नपए चउहिं, उक्कोसपदे सत्तहिं।

केवतिएहिं आगाससत्थिकायपदेसेहिं पुट्ठे? सत्तहिं।

केवतिएहिं जीवसत्थिकायपदेसेहिं पुट्ठे? अणंतेहिं।

केवतिएहिं पोग्गलसत्थिकायपएसेहिं पुट्ठे? अणंतेहिं।

केवतिएहिं अद्वासमएहिं पुट्ठे? सिय पुट्ठे, सिय नो पुट्ठे। जइ पुट्ठे नियमं अणंतेहिं।

एगे भंते! अहम्मसत्थिकायपएसे केवतिएहिं धम्मसत्थिकायपएसेहिं पुट्ठे? गोयमा! जहन्नपए चउहिं, उक्कोसपए सत्तहिं।

केवतिएहिं अहम्मसत्थिकायपदेसेहिं पुट्ठे? जहन्नपए तीहिं, उक्कोसपदे छहिं। सेसं जहा धम्मसत्थिकायस्स।

एगे भंते! आगाससत्थिकायपएसे केवतिएहिं धम्मसत्थिकायपएसेहिं पुट्ठे? सिय नो पुट्ठे। जति पुट्ठे जहन्नपदे एक्केण वा दोहि वा तीहिं वा चउहिं वा, उक्कोसपदे सत्तहिं।

एवं अहम्मसत्थिकायपएसेहिं वि।

केवतिएहिं आगाससत्थिकायपदेसेहिं०? छहिं।

केवतिएहिं जीवसत्थिकायपदेसेहिं पुट्ठे? सिय पुट्ठे, सिय नो पुट्ठे। जइ पुट्ठे नियमं अणंतेहिं।

एवं पोग्गलसत्थिकायपएसेहिं वि, अद्वासमयेहिं वि।

[५७९] एगे भंते! जीवसत्थिकायपएसे केवतिएहिं धम्मसत्थि० पुच्छा। जहन्नपए चउहिं, उक्कोसपए सतहिं।

एवं अधम्मसत्थिकायपएसेहिं वि।

केवतिएहिं आगाससत्थि०? सतहिं।

केवतिएहिं जीवत्थि०? सेसं जहा धम्मत्थिकायस्स।

एगे भंते! पोग्गलत्थिकायपएसे केवतिएहिं धम्मत्थिकायपदेसेहिं०? एवं जहेव जीवत्थिकायस्स।

दो भंते! पोग्गलत्थिकायपपदेसा केवतिएहिं धम्मत्थिकायपएसेहिं पुट्ठा? जहन्नपए छहिं, उक्कोसपदे बारसहिं।

एवं अहम्मसत्थिकायपपएसेहिं वि।

केवतिएहिं आगासत्थिकाय०? बारसहिं।

सेसं जहा धम्मत्थिकायस्स।

तिन्नि भंते! पोग्गलसत्थिकायपदेसा केवतिएहिं धम्मत्थि० ? जहन्नपदे अट्ठहिं, उक्कोसपदे सत्तरसहिं।

एवं अहम्मत्थिकायपदेसेहिं वि।

केवइएहिं आगासत्थि०? सत्तरसहिं।

सेसं जहा धम्मत्थिकायस्स।

एवं एएणं गमेणं भाणियत्वा जाव दस, नवरं जहन्नपदे दोन्नि पक्खिवियत्वा, उक्कोसपए पंच--

चत्तारि पोग्गलसत्थिकाय०? जहन्नपदे दसहिं, उक्को० बावीसाए।

पंच पोग्गल०? जहं० बारसहिं, उक्कोस० सत्तावीसाए।

छ पोग्गल०? जहं० चोद्धसहिं, उक्को० बत्तीसाए।

सत्त पो०? जहन्नेणं सोलसहिं, उक्को० सत्ततीसाए।

अट्ठ पो०? अट्ठारसहिं, उक्कोसेणं बायालीसाए।

नव पो०? जहं० वीसाए, उक्को० सीयालीसाए।

दस०? जहं० बावीसाए, उक्को० बावण्णाए।

आगाससत्थिकायस्स सत्त्वत्थ उक्कोसगं भाणियत्वं।

संखेज्जा भंते! पोग्गलसत्थिकायपएसा केवतिएहिं धम्मसत्थिकायपएसेहिं पुट्ठा? जहन्नपदे तेणेव संखेज्जएणं दुग्ुणेणं दुरूवाहिणं, उक्कोसपए तेणेव संखेज्जएणं पंचगुणेणं दुरूवाहिणं।

केवतिएहिं अहम्मसत्थिकाएहिं०? एवं चेव।

केवतिएहिं आगाससत्थिकाय०? तेणेव संखेज्जएणं पंचगुणेणं दुरूवाहिणं।

केवतिएहिं जीवत्थिकाय०? अणंतेहिं।

केवतिएहिं पोग्गलत्थिकाय०? सिय पुट्ठे, सिय नो पुट्ठे जाव अणंतेहिं।

असंखेज्जा भंते! पोग्गलत्थिकायपएसा केवतिएहिं धम्मसत्थि०? जहन्नपदे तेणेव

असंखेज्जएणं दुगुणेणं दुरूवाहिएणं, उक्को० तेणेव असंखेज्जएणं पंचगुणेणं दुरूवाहिएणं।

सेसं जहा संखेज्जाणं जाव नियमं अणंतेहिं।

अणंता भंते! पोग्गलसत्थिकायपएसा केवतिएहिं धम्मसत्थिकाय०? एवं जहा असंखेज्जा तथा अणंता वि निरवसेसं।

एगे भंते! अद्दासमए केवतिएहिं धम्मसत्थिकायपदेसेहिं पुट्ठे? सतहिं।

केवतिएहिं अहम्मसत्थि०? एवं चेव।

एवं आगाससत्थिकाएहि वि।

केवतिएहिं जीव०? अणंतेहिं।

एवं जाव अद्दासमएहिं।

धम्मसत्थिकाए णं भंते! केवतिएहिं धम्मसत्थिकायपएसेहिं पुट्ठे? नत्थि एक्केण वि।

केवतिएहिं अधम्मसत्थिकायप्पएसहिं०? असंखेज्जेहिं।

केवतिएहिं आगाससत्थिकायप०? असंखेज्जेहिं।

केवतिएहिं जीवसत्थिकायपए०? अणंतेहिं।

केवतिएहिं पोग्गलसत्थिकायपएसेहिं०? अणंतेहिं।

केवतिएहिं अद्दासमएहिं०? सिय पुट्ठे सिय नो पुट्ठे। जइ पुट्ठे नियमा अणंतेहिं।

अधम्मसत्थिकाए णं भंते! केव० धम्मसत्थिकाय०? असंखेज्जेहिं।

केवतिएहिं अहम्मसत्थि०? नत्थि एक्केण वि।

सेसं जहा धम्मसत्थिकायस्स।

एवं एतेणं गमएणं सव्वे वि। सट्ठाणए नत्थेक्केण वि पुट्ठा। परट्ठाणए आदिल्लएहिं तीहिं असंखेज्जेहिं भाणियच्चं, पच्छिल्लएसु तिसु अणंता भाणियच्चा जाव अद्दासमयो ति-जाव केवतिएहिं अद्दासमएहिं पुट्ठे? नत्थेक्केण वि।

[५८०] जत्थ णं भंते! एगे धम्मसत्थिकायपएसे ओगाढे तत्थ केवतिया धम्मसत्थिकायपएसा ओगाढा? नत्थेक्को वि।

केवतिया अधम्मसत्थिकायपएसा ओगाढा? एक्को।

केवतिया आगाससत्थिकाय०? एक्को।

केवतिया जीवसत्थि०? अणंता।

केवतिया पोग्गलसत्थि०? अणंता।

केवतिया अद्दासमया०? सिय ओगाढा, सिय नो ओगाढा। जति ओगाढा अणंता।

जत्थ णं भंते! एगे अधम्मसत्थिकायपएसे ओगाढे तत्थ केवतिया धम्मसत्थि०? एक्को।

केवतिया अहम्मसत्थि०? नत्थि एक्को वि।

सेसं जहा धम्मसत्थिकायस्स।

जत्थ णं भंते! एगे आगाससत्थिकायपएसे ओगाढे तत्थ केवतिया धम्मसत्थि

काय०? सिय ओगाढा, सिय नो ओगाढा। जति ओगाढा एक्को।

एवं अहम्मसत्थिकायपएसा वि।

केवतिया आगासऽत्थिकाय०? नत्थेक्को वि।

केवतिया जीवऽत्थि०? सिय ओगाढा, सिय नो ओगाढा। जति ओगाढा अणंता।

एवं जाव अद्वासमया।

जत्थ णं भंते! एगे जीवऽत्थिकायपएसे ओगाढे तत्थ केवतिया धम्मऽत्थि०? एक्को।

एवं अहम्मऽत्थिकाय०।

एवं आगासऽत्थिकायपएसा वि।

केवतिया जीवऽत्थि०? अणंता।

सेसं जहा धम्मऽत्थिकायस्स।

जत्थ णं भंते! एगे पोग्गलऽत्थिकायपदेसे ओगाढे तत्थ केवतिया धम्मऽत्थिकाय०? एवं जहा जीवऽत्थिकायपएसे तहेव निरवसेसं।

जत्थ णं भंते ! दो पोग्गलऽत्थिकायपएसा ओगाढा तत्थ केवतिया धम्मऽत्थिकाय० ? सिय एक्को, सिय दोण्णि।

एवं अहम्मऽत्थिकायस्स वि।

एवं आगासऽत्थिकायस्स वि।

सेसं जहा धम्मऽत्थिकायस्स।

जत्थ णं भंते! तिन्नि पोग्गलत्थि० तत्थ केवतिया धम्मऽत्थिकाय०? सिय एक्को, सिय दोन्नि, सिय तिन्नि।

एवं अहम्मऽत्थिकायस्स वि।

एवं आगासऽत्थिकायस्स वि।

सेसं जहेव दोण्हं।

एवं एक्केक्को वड्ढियट्ठो पएसो आदिल्लएहिं तीहिं अत्थिकाएहिं। सेसं जहेव दोण्हं जाव दसण्हं सिय एक्को, सिय दोन्नि, सिय तिन्नि जाव सिय दस। संखेज्जाणं सिय एक्को, सिय दोन्नि, जाव सिय दस, सिय संखेज्जा। असंखेज्जाणं सिय एक्को, जाव सिय संखेज्जा, सिय असंखेज्जा। जहा असंखेज्जा एवं अणंता वि।

जत्थ णं भंते! एगे अद्वासमये ओगाढे तत्थ केवतिया धम्मऽत्थि०? एक्को।

केवतिया अहम्मऽत्थि०? एक्को।

केवतिया आगासऽत्थि०? एक्को।

केवइया जीवऽत्थि०? अणंता।

एवं जाव अद्वासमया।

जत्थ णं भंते! धम्मऽत्थिकाये ओगाढे तत्थ केवतिया धम्मत्थिकायपएसा ओगाढा? नत्थि एक्को वि।

केवतिया अहम्मऽत्थिकाय०? असंखेज्जा।

केवतिया आगास०? असंखेज्जा।

केवतिया जीवऽत्थिकाय०? अणंता।

एवं जाव अद्वासमया।

जत्थ णं भंते! अहम्मसत्थिकाये ओगाढे तत्थ केवतिया धम्मसत्थिकाय०? असंखेज्जा।

केवतिया अहम्मसत्थि०? नत्थि एक्को वि।

सेसं जहा धम्मसत्थिकायस्स।

एवं सव्वे। सट्ठाणे नत्थि एक्को वि भाणियत्वं। परट्ठाणे आदिल्लगा तिन्नि असंखेज्जा भाणियत्वा, पच्छिल्लगा तिन्नि अणंता भाणियत्वा जाव अद्वासमओ ति--जाव केवतिया अद्वासमया ओगाढा? नत्थि एक्को वि।

जत्थ णं भंते! एगे पुढविकाइए ओगाढे तत्थ केवतिया पुढविकाइया ओगाढा? असंखेज्जा।

केवतिया आउक्काइया ओगाढा? असंखेज्जा।

केवतिया तेउकाइया ओगाढा? असंखेज्जा।

केवतिया वाउ० ओगाढा? असंखेज्जा।

केवतिया वणस्सतिकाइया ओगाढा? अणंता।

जत्थ णं भंते! एगे आउकाइए ओगाढे तत्थ णं केवतिया पुढवि०? असंखेज्जा।

केवतिया आउ०? असंखेज्जा। एवं जहेव पुढविकाइयाणं वत्तव्वया तहेव सव्वेसिं निरवसेसं भाणियत्वं जाव वणस्सतिकाइयाणं--जाव केवतिया वणस्सतिकाइया ओगाढा? अणंता।

**[५८१]** एयंसि णं भंते! धम्मत्थिकाय० अधम्मत्थिकाय० आगासत्थिकायंसि चक्किया केइ आसइत्तए वा सइत्तए वा चिट्ठित्तए वा निसीइत्तए वा तुयट्ठित्तए वा? नो इणट्ठे समट्ठे, अणंता पुण तत्थ जीवा ओगाढा।

से केणट्ठेणं भंते! एवं वुच्चइ-एयंसि णं धम्मत्थि० जाव आगासत्थिकायंसि नो चक्किया केयि आसइत्तए वा जाव ओगाढा? "गोयमा! से जहानामए कूडागारसाला सिया दुहओ लिता गुत्ता गुत्तदुवारा जहा रायप्पसेणइज्जे जाव दुवारवयणाइं पिहेइ; दुवारवयणाइं पिहिता तीसे कूडागारसालाए बहुमज्झदेसभाए जहन्नेणं एक्को वा दो वा तिण्णि वा, उक्कोसेणं पदीवसहस्सं पलिवेज्जा; से नूणं गोयमा! ताओ पदीवलेस्साओ अन्नमन्नसंबद्धाओ अन्नमन्नपुट्ठाओ जाव अन्नमन्नघडताए चिट्ठंति?" 'हंता, चिट्ठंति।' "चक्किया णं गोयमा! केयि तासु पदीवलेस्सासु आसइत्तए वा जाव तुयट्ठित्तए वा?" 'भगवं! णो इणट्ठे समट्ठे, अणंता पुण तत्थ जीवा ओगाढा।' से तेणट्ठेणं गोयमा! एवं वुच्चइ जाव ओगाढा।

**[५८२]** कहि णं भंते! लोए बहुसमे? कहि णं भंते! लोए सव्वविग्गहिए पन्नत्ते? गोयमा! इमीसे रयणप्पभाए पुढवीए उवरिमहेट्ठिल्लेसु खुड्डगपयरेसु, एत्थ णं लोए बहुसमे, एत्थ णं लोए सव्वविग्गहिए पन्नत्ते।

कहि णं भंते! विग्गहविग्गहिए लोए पन्नत्ते? गोयमा! विग्गहकंडए, एत्थ णं विग्गह-विग्गहिए लोए पन्नत्ते।

**[५८३]** किंसंठिए णं भंते! लोए पन्नत्ते? गोयमा! सुपत्तिट्ठगसंठिए लोए पन्नत्ते, हेट्ठा वित्थिण्णे, मज्झे जहा सत्तमसए पढमुद्देसे जाव अंतं करेति।

एतस्स णं भंते! अहेलोगस्स तिरियलोगस्स उड्ढलोगस्स य कयरे कयरेहितो जाव विसेसाहिया वा? गोयमा! सव्वत्थोवे तिरियलोए, उड्ढलोए असंखेज्जगुणे, अहेलोए विसेसाहिए।

सेवं भंते! सेवं भंते! ति०।

**\*तेरसमे सए चउत्थो उद्देशो समतो \***

**० पंचमो उद्देशो ०**

[५८४]नेरतिया णं भंते! किं सचिताहारा, अचिताहारा०? पढमो नेरइयउद्देशओ निरवसेसो भाणियव्वो।

सेवं भंते! सेवं भंते! ति०।

**\*तेरसमे सए पंचमो उद्देशो समतो \***

**० छट्ठो उद्देशो ०**

[५८५] रायगिहे जाव एवं वयासी--

संतरं भंते ! नेरतिया उववज्जंति, निरंतरं नेरतिया उववज्जंति ? गोयमा! संतरं पि नेरतिया उववज्जंति, निरंतरं पि नेरतिया उववज्जंति।

एवं असुरकुमारा वि।

एवं जहा गंगेये तहेव दो दंडगा जाव संतरं पि वेमाणिया चयंति, निरंतरं पि वेमाणिया चयंति।

[५८६]कहि णं भंते! चमरस्स असुरिंदस्स असुरकुमाररण्णो चमरचंचे नामं आवासे पन्नते? गोयमा! जंबुद्दीवे दीवे मंदरस्स पव्वयस्स दाहिणेणं तिरियमसंखेज्जे दीवसमुद्दे एवं जहा बितियसए सभाउद्देशवत्तव्वया सच्चेव अपरिसेसा नेयव्वा, नवरं इमं नाणतं जाव तिगिच्छिक्कूडस्स उप्पायपव्वयस्स चमरचंचाए रायहाणीए चमरचंचस्स आवासपव्वयस्स अन्नेसिं च बहूणं० सेसं तं चेव जाव तेरसअंगुलाइं अद्धंगुलं च किंचिविसेसाहिया परिक्खेवेणं। तीसे णं चमरचंचाए रायहाणीए दाहिणपच्चत्थिमेणं छक्कोडिसए पणपन्नं च कोडीओ पणतीसं च सयसहस्साइं पन्नासं च सहस्साइं अरुणोदगसमुद्धं तिरियं वीतीवइत्ता एत्थ णं चमरस्स असुरिंदस्स असुरकुमाररण्णो चमरचंचे नामं आवासे पण्णते, चउरासीतिं जोयणसहस्साइं आयामविक्खंभेणं, दो जोयणसयसहस्सा पन्नट्ठिं च सहस्साइं छच्च बतीसे जोयणसए किंचिविसेसाहिए परिक्खेवेणं। से णं एगेणं पागारेणं सव्वतो समंता संपरिक्खित्ते। से णं पागारे दिवइढं जोयणसयं उइढं उच्चत्तेणं, एवं चमरचंचारायहाणीवत्तव्वया भाणियव्वा सभाविहूणा जाव चत्तारि पासायपंतीओ।

चमरे णं भंते! असुरिंदे असुरकुमारराया चमरचंचे आवासे वसहिं उवेति? नो इणट्ठे समट्ठे।

से केणं खाइ अट्ठेणं भंते! एवं वुच्चइ चमरचंचे आवासे, चमरचंचे आवासे? गोयमा! से जहानामए इहं मणुस्सलोगंसि उवगारियलेणा इ वा, उज्जाणियलेणा इ वा, निज्जाणियलेणा इ वा, धारवारियलेणा इ वा, तत्थ णं बहवे मणुस्सा य मणुस्सीओ य आसयंति सयंति जहा रायप्पसेणइज्जे जाव कल्लाणफलवित्तिवसेसं पच्चणुभवमाणा विहरंति, अन्नत्थ पुण वसहिं उवेति, एवामेव गोयमा! चमरस्स असुरिंदस्स असुरकुमाररण्णो

चमरचंचे आवासे केवलं किइडातिपत्तियं, अन्नत्थ पुण वसहिं उवेति। सेतेणट्ठेणं जाव आवासे।

सेवं भंते! सेवं भंते! ति जाव विहरति।

[५८७] तए णं समणे भगवं महावीरे अन्नदा कदायि रायगिहाओ नगराओ गुणसिलाओ जाव विहरति।

तेणं कालेणं तेणं समएणं चंपा नामं नयरी होत्था। वण्णओ। पुण्णभद्दे चेतिए। वण्णओ। तए णं समणे भगवं महावीरे अन्नया कदायि पुट्वाणुपुट्ठिं चरमाणे जाव विहरमाणे जेणेव चंपानगरी, जेणेव पुण्णभद्दे चेतिए तेणेव उवागच्छति, उवागच्छिता जाव विहरइ।

तेणं कालेणं तेणं समएणं तेणं समएणं सिंधूसोवीरेसु जणवएसु वीतीभए नामं नगरे होत्था। वण्णओ।

तस्स णं वीतीभयस्स नगरस्स बहिया उत्तरपुरत्थिमे दिसिभाए, एत्थ णं मियवणे नामं उज्जाणे होत्था। सट्ठोउय० वण्णओ।

तत्थ णं वीतीभए नगरे उद्दायणे नामं राया होत्था, महया० वण्णओ।

तस्स णं उद्दायणस्स रन्नो पडमावती नामं देवी होत्था, सुकुमाल० वण्णओ।

तस्स णं उद्दायणस्स रण्णो पभावती नामं देवी होत्था। वण्णओ, जाव विहरति।

तस्स णं उद्दायणस्स रण्णो पुत्ते पभावतीए देवीए अत्तए अभीयी नामं कुमारे होत्था। सुकुमाल० जहा सिवभद्दे जाव पच्चुवेक्खमाणे विहरइ।

तस्स णं उद्दायणस्स रण्णो नियए भाइणेज्जे केसी नामं कुमारे होत्था, सुकुमाल० जाव सुरूवे।

से णं उद्दायणे राया सिंधूसोवीरप्पामोक्खाणं सोलसण्हं जणवयाणं, वीतीभयप्पामोक्खाणं तिण्हं तेसट्ठीणं नगरागरसयाणं, महसेणप्पामोक्खाणं दसण्हं राईणं बद्धमउडाणं विदिण्णछत्त-चामर-वालवीयणीणं, अन्नेसिं च बहूणं राईसर-तलवर जाव सत्थवाहप्पभितीणं आहेवच्चं पोरेवच्चं जाव कारेमाणे पालेमाणे समणोवासए अभिगयजीवाजीवे जाव विहरति।

तए णं से उद्दायणे राया अन्नदा कदायि जेणेव पोसहसाला तेणेव उवागच्छति, जहा संखे जाव विहरति।

तए णं तस्स उद्दायणस्य रण्णो पुट्ठवरत्तावरत्तकालसमयंसि धम्मजागरियं जागरमाणस्स अयमेयारूवे अज्झत्थिए जाव समुप्पज्जित्था-"धन्ना णं ते गामास्सगर-नगर-खेड-कब्बड-मडंब-दोणमुह-पट्ठणा-स्ससम-संवाह-सन्निवेसा जत्थ णं समणे भगवं महावीरं वंदंति नमंसंति जाव पज्जुवासंति। जति णं समणे भगवं महावीरे पुट्वाणुपुट्ठिं चरमाणे गामाणुगामं जाव विहरमाणे इहमागच्छेज्जा, इह समोसरेज्जा, इहेव वीतीभयस्स नगरस्स बहिया मियवणे उज्जाणे अहापडिरूवं ओग्गहं ओगिण्हिता संजमेणं जाव विहरेज्जा तो णं अहं समणं भगवं महावीरं वंदेज्जा, नमंसेज्जा जाव पज्जुवासेज्जा।"

तए णं समणे भगवं महावीरे उद्दायणस्स रण्णो अयमेयारूवं अज्झत्थियं जाव समुप्पन्नं विजाणित्ता चंपाओ नगरीओ पुण्णभद्दाओ चेतियाओ पडिनिक्खमति, प० २ ता पुट्वाणुपुट्ठिं चरमाणे गामाणु० जाव विहरमाणे जेणेव सिंधूसोवीरा जणवदा, जेणेव वीतीभये नगरे, जेणेव मियवणे उज्जाणे तेणेव उवागच्छति, उवा० २ जाव विहरति।

तए णं वीतीभये नगरे सिंघाडग जाव परिसा पज्जुवासइ।

तए णं से उद्दायणे राया इमीसे कहाए लद्धट्ठे समाणे हट्ठतुट्ठो कोडुंबियपुरिसे सद्दावेति,

को० स० २ एवं वयासी-खिप्पामेव भो देवाणुप्पिया! वीयीभयं नगरं सब्भिंतरबाहिरियं जहा कूणिओ उववातिए जाव पज्जुवासति। पउमावतीपामोक्खाओ देवीओ तहेव जाव पज्जुवासति। धम्मकहा।

तए णं से उद्दायणे राया समणस्स भगवओ महावीरस्स अंतियं धम्मं सोच्चा निसम्म हट्ठतुट्ठे उट्ठाए उट्ठेति, उ० २ ता समणं भगवं महावीरं तिक्खुतो जाव नमंसिता एवं वयासी-"एवंमेयं भंते! तहमेयं भंते! जाव से जहेयं तुब्भे वदह, ति कट्पु जं नवरं देवाणुप्पिया! अभीयीकुमारं रज्जे ठावेमि। तए णं अहं देवाणुप्पियाणं अंतिए मुंडे भविता जाव पव्वयामि"। अहासुहं देवाणुप्पिया! मा पडिबंधं।

तए णं से उद्दायणे राया समणेणं भगवया महावीरेणं एवं वुत्ते समाणे हट्ठतुट्ठ० समणं भगवं महावीरं वंदति नमंसति, वं० न० ता तमेव आभिसक्कं हत्थिं दूहति, २ ता समणस्स भगवओ महावीरस्स अंतियाओ मियवणाओ उज्जाणाओ पडिनिक्खमति, पडिनिक्खमिता जेणेव वीतीभये नगरे तेणेव पहारेत्था गमणाए।

तए णं तस्स उद्दायणस्स रण्णो अयमेयारूवे अज्झत्थिए जाव समुप्पज्जित्था--"एवं खलु अभीयीकुमारे ममं एगे पुते इट्ठे कंते जाव किमंग पुण पासणयाए?, तं जति णं अहं अभीयीकुमारं रज्जे ठावेता समणस्स भगवओ महावीरस्स अंतियं मुंडे भविता जाव पव्वयामि तो णं अभीयीकुमारे रज्जे य रट्ठे य जाव जणवए य माणुस्सएसु य कामभोएसु मुच्छिए गिद्धे गट्टिए अज्झोववन्ने अणादीयं अणवदग्गं दीहमद्धं चाउरंतं संसारकंतरं अणुपरियट्ठिस्सइ, तं नो खलु मे सेयं अभीयीकुमारं रज्जे ठावेता समणस्स भगवओ महावीरस्स अंतियं मुंडे भविता जाव पव्वइतए। सेयं खलु मे णियगं भाइणेज्जं केसिकुमारं रज्जे ठावेता समणस्स भगवतो जाव पव्वइतए"। एवं संपेहेति, एवं सं०२ ता जेणेव वीतीभये नगरे तेणेव उवागच्छति, उवा० २ ता वीतीभयं नगरं मज्झंमज्झेणं० जेणेव सए गेहे जेणेव बाहिरिया उवट्ठाणसाला तेणेव उवागच्छति, उवा० २ ता आभिसेक्कं हत्थिं ठवेति, आ० ठ०२ आभिसेक्काओ हत्थीओ पच्चोरुभइ, आ० प०२ जेणेव सीहासणे तेणेव उवागच्छति, उवा०२ सीहासणवरंसि पुरत्थाभिमुहे निसीयति, नि०२ कोडुंबियपुरिसे सद्दावेइ, को० स०२ एवं वयासी-खिप्पामेव भो देवाणुप्पिया! वीतीभयं नगरं सब्भिंतरबाहिरियं जाव पच्चप्पिणंति।

तए णं से उद्दायणे राया दोच्चं पि कोडुंबियपुरिसे सद्दावेइ, सं०२ एवं वयासी--खिप्पामेव भो देवाणुप्पिया! केसिस्स कुमारस्स महत्थं महग्घं महरिहं एवं रायाभिसेओ जहा सिवभद्धस्स तहेव भाणियव्वो जाव परमायुं पालयाहि इट्ठजणसंपरिवुडे सिंधूसोवीरपामोक्खाणं सोलसण्हं जणवदाणं, वीतीभयपामोक्खाणं० महसेणप्पा०, अन्नेसिं च बहूणं राईसरतलवरं० जाव कारेमाणे पालेमाणे विहराहि, ति कट्पु जयजयसद्धं पउंजंति।

तए णं से केसी कुमारे राया जाते महया जाव विहरति।

तए णं से उद्दायणे राया केसिं रायाणं आपुच्छइ।

तए णं से केसी राया कोडुंबियपुरिसे सद्दावेइ एवं जहा जमालिस्स तहेव सब्भिंतरबाहिरियं तहेव जाव निक्खमणाभिसेयं उवट्ठवेति।

तए णं से केसी राया अणेगगणणायग० जाव परिवुडे उद्दायणं रायं सीहासणवरंसि पुरत्थाभिमुहं निसीयावेति, नि० २ अट्ठसएणं सोवणियाणं एवं जहा जमालिस्स जाव एवं वयासी-भण सामी! किं देमो? किं पयच्छामो? किणा वा ते अट्ठो? तए णं से उद्दायणे राया केसिं रायं एवं वयासी-

इच्छामि णं देवाणुप्पिया! कुतियावणाओ एवं जहा जमालिस्स नवरं पउमावती अग्गकेसे पडिच्छइ पियविप्पयोगदूसह०।

तए णं से केसी राया दोच्चं पि उत्तरावक्कमणं सीहासणं रयावेत्ति, दो० २० २ उद्दायणं रायं सेयापीतएहिं कलसेहिं० सेसं जहा जमालिस्स जाव सन्निसन्ने तहेव अम्मधाती, नवरं पउमावती हंसलक्खणं पडसाडगं गहाय, सेसं तं चेव जाव सीयाओ पच्चोरुभति, सी० ५० २ जेणेव समणे भगवं महावीरे तेणेव उवागच्छइ, उवा० २ समणं भगवं महावीरं तिक्खुतो वंदति नमंसति, वं० २ उत्तरपुरत्थिमं दिसीभागं अवक्कमति, उ० ३० २ सयमेव आभरणमल्लालंकारं० तं चेव, पउमावती पडिच्छइ जाव घडियत्वं सामी! जाव नो पमादेयत्वं ति कट्ठु, केसी राया पउमावती य समणं भगवं महावीरं वंदति नमंसति, वं० २ जाव पडिगया। तए णं से उद्दायणे राया सयमेव पंचमुट्ठियं लोयं०, सेसं जहा उसभदत्तस्स जाव सच्चदुक्खप्पहीणे।

[५८८] तए णं तस्स अभीयिस्स कुमारस्स अन्नदा कदायि पुत्वरत्तावरत्तकालसमयंसि कुटुंबजागरियं जागरमाणस्स अयमेयारूवे अज्झत्थिए जाव समुप्पज्जित्था--'एवं खलु अहं उद्दायणस्स पुते पभावतीए देवीए अत्तए, तए णं से उद्दायणे राया ममं अवहाय नियगं भागिणेज्जं केसिकुमारं रज्जे ठावेत्ता समणस्स भगवओ जाव पच्चइए'। इमेणं एतारूवेणं महता अप्पत्तिएणं मणोमाणसिएणं दुक्खेणं अभिभूए समाणे अंतपुरपरियालसंपरिवुडे सभंडमतोवगरणमायाए वीतीभयाओ नगराओ निग्गच्छति, नि० २ पुत्वाणुपुत्विं चरमाणे गामाणुगामं दूइज्जमाणे जेणेव चंपा नगरी जेणेव कूणिए राया तेणेव उवागच्छइ, तेणेव उवा० २ कूणियं रायं उवसंपज्जिताणं विहरइ। इत्थ वि णं से विउलभोगसमितिसमन्नागए यावि होत्था।

तए णं से अभीयी कुमारे समणोवासए यावि होत्था, अभिगय० जाव विहरति। उद्दायणम्मि रायरिसिम्मि समणुबद्धवेरे यावि होत्था।

तेणं कालेणं तेणं समएणं इमीसे रयणप्पभाए पुढवीए निरयपरिसामंतेसु चोसट्ठिं असुरकुमारावाससयसहस्सा पन्नता।

तए णं से अभीयी कुमारे बहूइं वासाइं समणोवासगपरियागं पाउणति, पाउणिता अद्धमासियाए संलेहणाए तीसं भत्ताइं अणसणाए छेदेइ, छे० २ तस्स ठाणस्स अणालोइयपडिक्कंते कालमासे कालं किच्चा इमीसे रयणप्पभाए पुढवीए निरयपरिसामंतेसु चोयट्ठीए आतावा जाव सहस्सेसु अण्णतरंसि आतावाअसुरकुमारावासंसि आतावाअसुरकुमारदेवत्ताए उववन्ने।

तत्थ णं अत्थेगइयाणं आतावगाणं असुरकुमाराणं देवाणं एगं पलिओवमं ठिती पन्नता। तत्थ णं अभीयिस्स वि देवस्स एगं पलिओवमं ठिती पन्नता।

से णं भंते! अभीयी देवे ताओ देवलोगाओ आउक्खएणं भवक्खएणं ठितिक्खएणं अणंतरं उव्वट्ठिता कहिं गच्छिहिति? कहिं उववज्जिहिति? गोयमा! महाविदेहे वासे सिज्झिहिति जाव अंतं काहिति। सेवं भंते! सेवं भंते! ति०।

**\*तेरसमे सए छट्ठो उद्देसो समतो \***

**० सत्तमो उद्देसो ०**

[५८९] रायगिहे जाव एवं वयासी-

आया भंते! भासा, अन्ना भासा? गोयमा! नो आता भासा, अन्ना भासा।  
रूविं भंते! भासा, अरूविं भासा? गोयमा! रूविं भासा, नो अरूविं भासा।  
सचित्ता भंते! भासा, अचित्ता भासा? गोयमा! नो सचित्ता भासा, अचित्ता भासा।  
जीवा भंते! भासा, अजीवा भासा? गोयमा! नो जीवा भासा, अजीवा भासा।  
जीवाणं भंते! भासा, अजीवाणं भासा? गोयमा! जीवाणं भासा, नो अजीवाणं भासा।  
पुट्ठिं भंते! भासा, भासिज्जमाणी भासा, भासासमयवीतिककंता भासा? गोयमा! नो पुट्ठिं  
भासा, भासिज्जमाणी भासा, नो भासासमयवीतिककंता भासा।

पुट्ठिं भंते ! भासा भिज्जइ, भासिज्जमाणी भासा भिज्जइ, भासा समयवीतिककंता भासा  
भिज्जइ? गोयमा? गोयमा! नो पुट्ठिं भासा भिज्जइ, भासिज्जमाणी भासा भिज्जइ, नो  
भासासमयवीतिककंता भासा भिज्जइ।

कतिविधा णं भंते! भासा पन्नत्ता? गोयमा! चउट्ठिहा भासा पण्णत्ता, तं जहा--सच्चा मोसा  
सच्चामोसा असच्चामोसा।

[५९०] आता भंते! मणे, अन्ने मणे? गोयमा! नो आया मणे, अन्ने मणे।  
जहा भासा तहा मणे वि जाव नो अजीवाणं मणे।  
पुट्ठिं भंते! मणे, मणिज्जमाणे मणे?० एवं जहेव भासा।  
पुट्ठिं भंते! मणे भिज्जइ, मणिज्जमाणे मणे भिज्जइ, मणसमयवीतिककंते मणे भिज्जइ?  
एवं जहेव भासा।

कतिविधे णं भंते! मणे पन्नत्ते? गोयमा! चउट्ठिहे मणे पन्नत्ते, तं जहा--सच्चे, जाव  
असच्चामोसे।

[५९१] आया भंते! काये, अन्ने काये? गोयमा! आया वि काये, अन्ने वि काये।  
रूविं भंते! काये० पुच्छा। गोयमा! रूविं पि काये, अरूविं पि काये।  
एवं सचित्ते वि काए, अचित्ते वि काए।  
एवं एक्केक्के पुच्छा। जीवे वि काये, अजीवे वि काए।  
जीवाण वि काये, अजीवाण वि काए।  
पुट्ठिं भंते! काये०? पुच्छा। गोयमा! पुट्ठिं पि काए, कायिज्जमाणे वि काए,  
कायसमयवीतिककंते वि काये।

पुट्ठिं भंते! काये भिज्जइ?० पुच्छा। गोयमा! पुट्ठिं पि काए भिज्जइ जाव  
कायसमयवीतिककंते वि काए भिज्जति।

कतिविधे णं भंते! काये पन्नत्ते? गोयमा! सत्तविधे काये पन्नत्ते, तं जहा--ओरालिए  
ओरालियमीसए वेउट्ठिए वेउट्ठियमीसए आहारए आहारयमीसए कम्मए।

[५९२] कतिविधे णं भंते! मरणे पन्नत्ते? गोयमा! पंचविधे मरणे पन्नत्ते, तं जहा-  
आवीचियमरणे ओहिमरणे आतियंतियमरणे बालमरणे पंडियमरणे।

आवीचियमरणे णं भंते! कतिविधे पण्णत्ते? गोयमा! पंचविधे पन्नत्ते, तं जहा-दट्ठावीचियमरणे  
खेतावीचियमरणे कालावीचियमरणे भवावीचियमरणे भावावीचियमरणे।

दव्वावीचियमरणे णं भंते! कतिविधे पन्नते? गोयमा! चउव्विहे पन्नते, तं जहा--  
नेरइयदव्वावीचियमरणे तिरिक्खजोणियदव्वावीचियमरणे मणुस्सदव्वावीचियमरणे देवदव्वावीचियमरणे।

से केणट्ठेणं भंते! एवं वुच्चइ 'नेरइयदव्वावीचियमरणे, नेरइयदव्वावीचियमरणे'? गोयमा! जं  
णं नेरइया नेरइयदव्वे वट्ठमाणा जाइं दव्वाइं नेरइयाउयत्ताए गहियाइं बद्धाइं पुट्ठाइं कडाइं पट्ठवियाइं  
निविट्ठाइं अभिनिविट्ठाइं अभिसमन्नागयाइं भवंति ताइं दव्वाइं आवीची अणुसमयं निरंतरं मरंतीति  
कट्ठु, सेतेणट्ठेणं गोयमा! एवं वुच्चइ 'नेरइयदव्वावीचियमरणे, नेरइयदव्वावीचियमरणे'।

एवं जाव देवदव्वावीचियरणे।

खेत्तावीचियमरणे णं भंते! कतिविधे पन्नते? गोयमा! चउव्विहे पन्नते, तं जहा- नेरइयखेत्ता-  
वीचियमरणे जाव देवखेत्तावीचियमरणे।

से केणट्ठेणं भंते! एवं वुच्चइ 'नेरइयखेत्तावीचियमरणे, नेरइयखेत्तावीचियमरणे'? गोयमा! जं  
णं नेरइया नेरइयखेत्ते वट्ठमाणा जाइं दव्वाइं नेरइयाउयत्ताए एवं जहेव दव्वावीचियमरणे तहेव  
खेत्तावीचियमरणे वि।

एवं जाव भावावीचियमरणे।

ओहिमरणे णं भंते! कतिविधे पन्नते? गोयमा! पंचविहे पन्नते, तं जहा--दव्वोहिमरणे  
खेतोहिमरणे जाव भावोहिमरणे।

दव्वोहिमरणे णं भंते! कतिविधे पन्नते? गोयमा! चउव्विहे पन्नते, तं जहा-  
नेरइयदव्वोहिमरणे जाव देवदव्वोहिमरणे।

से केणट्ठेणं भंते! एवं वुच्चइ 'नेरइयदव्वोहिमरणे, नेरइयदव्वोहिमरणे'? गोयमा! जं णं  
नेरइया नेरइयदव्वे वट्ठमाणा जाइं दव्वाइं संपयं मरंति, ते णं नेरइया ताइं दव्वाइं अणागते काले पुणो वि  
मरिस्संति। सेतेणट्ठेणं गोयमा! जाव दव्वोहिमरणे।

एवं तिरिक्खजोणिय० मणुस्स० देवोहिमरणे वि।

एवं एएणं गमएणं खेतोहिमरणे वि, कालोहिमरणे वि, भवोहिमरणे वि, भावोहिमरणे वि।

आतियंतियमरणे णं भंते!० पुच्छा। गोयमा! पंचविहे पन्नते, तं जहा--दव्वातियंतियमरणे,  
खेत्तातियंतियमरणे, जाव भावातियंतियमरणे।

दव्वातियंतियमरणे णं भंते! कतिविधे पन्नते? गोयमा! चउव्विहे पन्नते, तं जहा--  
नेरइयदव्वातियंतियमरणे जाव देवदव्वातियंतियमरणे।

से केणट्ठेणं भंते! एवं वुच्चति 'एवं वुच्चति नेरइयदव्वातियंतियमरणे, नेरइयदव्वाति-  
यंतियमरणे? गोयमा! जं णं नेरइया नेरइयदव्वे वट्ठमाणा जाइं दव्वाइं संपतं मरंति, जे णं नेरइया ताइं  
दव्वाइं अणागते काले नो पुणो वि मरिस्संति। सेतेणट्ठेणं जाव मरणे।

एवं तिरिक्ख० मणुस्स० देव०।

एवं खेत्तातियंतियमरणे वि, जाव भावातियंतियमरणे वि।

बालमरणे णं भंते! कतिविधे पन्नते? गोयमा! दुवालसविहे पन्नते तं जहा--वल्लयमरणे जहा  
खंदए गद्धपट्ठे।

पंडियमरणे णं भंते! कतिविधे पन्नते? गोयमा! दुविहे पन्नते, तं जहा- पाओवगमणे य

भत्तपच्चक्खाणे य।

पाओवगमणे णं भंते! कतिविधे पन्नते? गोयमा! दुविधे पन्नते, तं जहा--णीहारिमे य अणीहारिमे य, नियमं अपडिकम्मो।

भत्तपच्चक्खाणे णं भंते! कतिविधे पन्नते? एवं तं चेव, नवरं नियमं सपडिकम्मो।  
सेवं भंते! सेवं भंते! त्ति०।

**\*तेरसमे सए सतमो उद्देशो समतो \***

**० अट्ठमो उद्देशो ०**

[५९३] कति णं भंते! कम्मपगडीओ पन्नताओ? गोयमा। अट्ठ कम्मपगडीओ पन्नताओ।  
एवं बंधट्ठित्तिउद्देशओ भाणियव्वो निरवसेसो जहा पन्नवणाए।

सेवं भंते! सेवं भंते! त्ति०।

**\*तेरसमे सए अट्ठमो उद्देशो समतो \***

**० नवमो उद्देशो ०**

[५९४] रायगिहे जाव एवं वयासी-

से जहानामए केयि पुरिसे केयाघडियं गहाय गच्छेज्जा, एवामेव अणगारे वि भावियप्पा  
केयाघडियाकिच्चहत्थगतेणं अप्पाणेणं उड्ढं वेहासं उप्पएज्जा? गोयमा! हंता, उप्पएज्जा।

अणगारे णं भंते! भावियप्पा केवतियाइं पभू केयाघडियाकिच्चहत्थगयाइं रूवाइं विउच्चित्तए?  
गोयमा! से जहानामए जुवति जुवाणे हत्थेणं हत्थे एवं जहा ततियसते पंचमुद्देशए जाव नो चेव णं  
संपतीए विउच्चिसु वा विउच्चति वा विउच्चिस्सति वा।

से जहानामए केयि पुरिसे हिरण्णपेलं गहाय गच्छेज्जा, एवामेव अणगारे वि भावियप्पा  
हिरण्णपेलहत्थकिच्चगतेणं अप्पाणेणं०, सेसं तं चेव।

एवं सुवण्णपेलं, एवं रयणपेलं, वड्ढरपेलं, वत्थपेलं, आभरणपेलं।

एवं अयभारं तंबभारं तउयभारं सीसगभारं हिरण्णभारं सुवण्णभारं वड्ढरभारं।

से जहानामए वग्गुली सिया, दो वि पाए उल्लंबिया उल्लंबिया उड्ढंपादा अहोसिरा  
चिट्ठेज्जा, एवामेव अणगारे वि भावियप्पा वग्गुलीकिच्चगएणं अप्पाणेणं उड्ढं वेहासं०।

एवं जण्णोवइयवत्तव्वया भाणितव्वा जाव विउच्चिस्सति वा।

से जहानामए जलोया सिया, उदगंसि कायं उच्चिहिया उच्चिहिया गच्छेज्जा, एवामेव० सेसं  
जहा वग्गुलीए।

से जहानामए बीयंबीयगसउणे सिया, दो वि पाए समतुरंगेमाणे समतुरंगेमाणे गच्छेज्जा,  
एवामेव अणगारे०, सेसं तं चेव।

से जहानामए पक्खिबिरालए सिया, रुक्खाओ रुक्खं डेवेमाणे डेवेमाणे गच्छेज्जा, एवामेव  
अणगारे०, सेसं तं चेव।

से जहानामए जीवंजीवगसउणए सिया, दो वि पाए समतुरंगेमाणे समतुरंगेमाणे गच्छेज्जा,  
एवामेव अणगारे०, सेसं तं चेव।

से जहाणमए हंसे सिया, तीरातो तीरं अभिरममाणे अभिरममाणे गच्छेज्जा, एवामेव अणगारे हंसकिच्चगतेणं अप्पाणेणं०, तं चेव।

से जहानामए समुद्धवायसए सिया, वीयीओ वीयिं डेवेमाणे डेवेमाणे गच्छेज्जा, एवामेव०, तहेव।

से जहानामए केयि पुरिसे चक्कं गहाय गच्छेज्जा, एवामेव अणगारे वि भावियप्पा चक्कहत्थकिच्चगएणं अप्पाणेणं०, सेसं जहा कियाघडियाए।

एवं छत्तं।

एवं चम्मं।

से जहानामए केयि पुरिसे रयणं गहाय गच्छेज्जा,० एवं चेव। एवं वइरं, वेरुलियं, जाव रिट्ठं।

एवं उप्पलहत्थगं, एवं पउमहत्थगं, एवं कुमुदहत्थगं, एवं जाव से जहानामए केयि पुरिसे सहस्सपत्तगं गहाय गच्छेज्जा,० एवं चेव।

से जहानामए केयि पुरिसे भिसं अवद्दालिय अवद्दालिय गच्छेज्जा, एवामेव अणगारे वि भिसकिच्चगएणं अप्पाणेणं०, तं चेव।

से जहानामए मुणालिया सिया, उदगंसि कायं उम्मज्जिय उम्मज्जिय चिट्ठेज्जा, एवामेव०, सेसं जहा वग्गुलीए।

से जहानामए वणसंडे सिया किण्हे किण्होभासे जाव निकुरुंबभूए पासादीए ४, एवामेव अणगारे वि भावियप्पा वणसंडकिच्चगतेणं अप्पाणेणं उइढं वेहासं उप्पएज्जा, सेसं तं चेव।

से जहानामए पुक्खरणी सिया, चउक्कोणा समतीरा अणुपुव्वसुजाय० जाव सद्दुन्नइयमहरसरणादिया पासादीया ४, एवामेव अणगारे वि भावियप्पा पोक्खरणीकिच्चगएणं अप्पाणेणं उइढं वेहासं उप्पएज्जा? हंता, उप्पतेज्जा।

अणगारे णं भंते! भावियप्पा केवतियाइं पभू पोक्खरणीकिच्चगयाइं रूवाइं विउव्वित्तए?० सेसं तं चेव जाव विउव्विस्सति वा।

से भंते! किं मायी विउव्वइ, अमायी विउव्वइ? गोयमा! मायी विउव्वति, नो अमायी विउव्वति।

मायी णं तस्स ठाणस्स अणालोइय० एवं जहा ततियसए चउत्थुद्देसए जाव अत्थि तस्स आराहणा।

सेवं भंते! सेवं भंते! जाव विहरति।

**\*तेरसमे सए नवमो उद्देशो समतो \***

**० दसमो उद्देशो ०**

[५९५]कति णं भंते! छाउमत्थिया समुग्घाया पन्नता? गोयमा! छ छाउमत्थिया समुग्घाया पन्नता, तं जहा-वेदणासमुग्घाते, एवं छाउमत्थिया समुग्घाता नेतव्वा जहा पण्णवणाए जाव आहारग-समुग्घातो ति।

सेवं भंते! सेवं भंते! ति जाव विहरति।

**\*तेरसमे सए दसमो उद्देशो समतो \***

**०-तेरसमं सयं समतं-०**

**० मुनि दीपरत्तसागरेण संशोधितः सम्पादितश्च तेरसमं सतं समतं ०**

**[ ] चौदसमं सयं [ ]**

**[५९६]** चर उम्माद सरीरे पोग्गल अगणी तहा किमाहारे ।  
संसिट्ठमंतरे खलु अणगारे केवली चव ॥

**० पढमो उद्देशो ०**

**[५९७]** रायगिहे जाव एवं वयासी-

अणगारे णं भंते! भावियप्पा चरमं देवावासं वीतिककंते, परमं देवावासं असंपत्ते, एत्थ णं अंतरा कालं करेज्जा, तस्स णं भंते! कहिं गती, कहिं उववाते पन्नते? गोयमा! जे से तत्थ परिपस्सओ तल्लेसा देवावासा तहिं तस्स गती, तहिं तस्स उववाते पन्नते। से य तत्थगए विराहेज्जा कम्मलेस्सामेव पडिपडइ, से य तत्थ गए नो विराहेज्जा तामेव लेस्सं उवसंपज्जिताणं विहरइ।

**[५९८]** अणगारे णं भंते! भावियप्पा चरमं असुरकुमारावासं वीतिककंते, परमं असुरकुमारा०? एवं चव।

एवं जाव थणियकुमारावासं, जोतिसियावासं। एवं वेमाणियावासं जाव विहरइ।

नेरइयाणं भंते! कहं सीहा गती? कहं सीहे गतिविसए पन्नते? गोयमा! से जहानामए केयि पुरिसे तरुणे बलवं जुगवं जाव निठणसिप्पोवगएआउंणियं बाहं पसारेज्जा, पसारियं वा बाहं आउंणेज्जा, विक्खिण्णं वा मुट्ठिं साहरेज्जा, साहरियं वा मुट्ठिं विक्खिरेज्जा, उम्मिसियं वा अच्चिं निमिसेज्जा, निमिसितं वा अच्चिं उम्मिसेज्जा, भवेयारूवे? णो तिणट्ठे समट्ठे। नेरइया णं एगसमएण वा दुसमएण वा तिसमएण वा विग्गहेणं उववज्जंति, नेरइयाणं गोयमा! तहा सीहा गती, तहा सीहे गतिविसए पन्नते।

एवं जाव वेमाणियाणं, नवरं एणिंदियाणं चउसमइए विग्गहे भाणियव्वे। सेसं तं चव।

**[५९९]** नेरइया णं भंते! किं अणंतरोववन्नगा, परंपरोववन्नगा, अणंतरपरंपरअणुववन्नगा वि? गोयमा! नेरइया अणंतरोववन्नगा वि, परंपरोववन्नगा वि, अणंतरपरंपरअणुववन्नगा वि।

से केणट्ठेणं भंते! एवं वुच्चइ जाव अणंतरपरंपरअणुववन्नगा वि? गोयमा! जे णं नेरइया पढमसमयोववन्नगा ते णं नेरइया अणतरोववन्नगा, जे णं नेरइया अपढमसमयोववन्नगा ते णं नेरइया परंपरोववन्नगा, जे णं नेरइया विग्गहगतिसमावन्नगा ते णं नेरइया अणंतरपरंपरअणुववन्नगा। सेतेणट्ठेणं जाव अणुववन्नगा वि।

एवं निरंतरं जाव वेमाणिया।

अणंतरोववन्नगा णं भंते! नेरइया किं नेरइयाउयं पकरेंति? तिरिक्ख-मणुस्स-देवाउयं पकरेंति? गोयमा! नो नेरइयाउयं पकरेंति, जाव नो देवाउयं पकरेंति।

परंपरोववन्नगा णं भंते! नेरइया किं नेरइयाउयं पकरेंति, जाव देवाउयं पकरेंति?

गोयमा! नो नेरइयाउयं पकरेंति, तिरिक्खजोणियाउयं पि पकरेंति, मणुस्साउयं पि पकरेंति, नो

देवाउयं पकरेंति।

अणंतरपरंपराणुववन्नगा णं भंते! नेरइया किं नेरइयाउयं प० पुच्छा। गोयमा! नो नेरइयाउयं पकरेंति, जाव नो देवाउयं पकरेंति।

एवं जाव वेमाणिया, नवरं पंचिंदियतिरिक्खजोणिया मणुस्सा य परंपरोववन्नगा चत्तारि वि आउयाइं पकरेंति। सेसं तं चेव।

नेरइया णं भंते! किं अणंतरनिग्गया परंपरनिग्गया अणंतरपरंपराणिग्गया? गोयमा! नेरइया णं अणंतरनिग्गया वि जाव अणंतरपरंपराणिग्गया वि।

से केणट्ठेणं जाव अणिग्गता वि? गोयमा! जे णं नेरइया पढमसमयनिग्गया ते णं नेरइया अणंतरनिग्गया, जे णं नेरइया अपढमसमयनिग्गया ते णं नेरइया परंपरनिग्गया, जे णं नेरइया विग्गहगतिसमावन्नगा ते णं नेरइया अणंतरपरंपराणिग्गया। सेतेणट्ठेणं गोयमा! जाव अणिग्गता वि।

एवं जाव वेमाणिया।

अणंतरनिग्गया णं भंते! नेरइया किं नेरइयाउयं पकरेंति, जाव देवाउयं पकरेंति? गोयमा! नो नेरइयाउयं पकरेंति जाव नो देवाउयं पकरेंति।

परंपरनिग्गया णं भंते! नेरइया किं नेरइयाउयं० पुच्छा। गोयमा! नेरइयाउयं पि पकरेंति, जाव देवाउयं पि पकरेंति।

अणंतरपरंपराणिग्गया णं भंते! नेरइया० पुच्छा०। गोयमा! नो नेरइयाउयं पि पकरेंति, जाव नो देवाउयं पि पकरेंति।

निरवसेसं जाव वेमाणिया।

नेरइया णं भंते! किं अणंतरखेदोववन्नगा, परंपरखेदोववन्नगा, अणंतरपरंपरखेदाणुववन्नगा? गोयमा! नेरइया०, एवं एतेणं अभिलावेणं ते चेव चत्तारि दंडगा भाणियव्वा।

सेवं भंते! सेवं भंते! ति जाव विहरति।

**\*चोद्धसमे सए पढमो उद्देशो समतो \***

**० बीओ उद्देशो ०**

[६००] कतिविधे णं भंते! उम्मादे पन्नते? गोयमा! दुविहे उम्मादे पण्णते, तं जहा-जक्खाएसे य मोहणिज्जस्स य कम्मस्स उदएणं। तत्थ णं जे से जक्खाएसे से णं सुहवेयणतराए चेव, सुहविमोयणतराए चेव। तत्थ णं जे से मोहणिज्जस्स कम्मस्स उदएणं से णं दुहवेयणतराए चेव, दुहविमोयणतराए चेव।

नेरइयाणं भंते! कतिविधे उम्मादे पन्नते? गोयमा! दुविहे उम्मादे पन्नते, तं जहा--जक्खाएसे य, मोहणिज्जस्स य कम्मस्स उदएणं।

से केणट्ठेणं भंते! एवं वुच्चइ 'नेरइयाणं दुविहे उम्मादे पन्नते, तं जहा--जक्खाएसे य, मोहणिज्जस्स जाव उदएणं'? गोयमा! देवे वा से असुभे पोग्गले पक्खिवेज्जा, से णं तेसिं असुभाणं पोग्गलाणं पक्खिवणयाए जक्खाएसं उम्मायं पाउणिज्जा। मोहणिज्जस्स वा कम्मस्स उदएणं मोहणिज्जं

उम्मायं पाउणेज्जा, सेतेणट्ठेणं जाव उदएणं।

असुरकुमाराणं भंते! कतिविधे उम्मादे पन्नते? गोयमा! दुविहे उम्माए पन्नते। एवं जहेव नेरइयाणं, नवरं- देवे वा से महिङ्घियतराए असुभे पोग्गले पक्खिवेज्जा, से णं तेसिं असुभाणं पोग्गलाणं पक्खिवणयाए जक्खाएसं उम्मादं पाउणेज्जा, मोहणिज्जस्स वा०।

सेसं तं चेव। सेतेणट्ठेणं जाव उदएणं।

एवं जाव थणियकुमाराणं।

पुढविकाइयाणं जाव मणुस्साणं, एतेसिं जहा नेरइयाणं।

वाणमंतर-जोतिसिय-वेमाणियाणं जहा असुरकुमाराणं।

**[६०१]** अत्थि णं भंते! पज्जन्ने कालवासी वुट्ठिकायं पकरेति? हंता, अत्थि।

जाहे णं भंते ! सक्के देविंदे देवराया वुट्ठिकायं काउकामे भवति से कहमियाणिं पकरेति ? गोयमा! ताहे चेव णं से सक्के देविंदे देवराया अब्भंतरपरिसए देवे सद्दावेति, तए णं ते अब्भंतरपरिसगा देवा सद्दाविया समाणा मज्झिमपरिसए देवे सद्दावेति, तए णं ते मज्झिमपरिसगा देवा सद्दाविया समाणा बाहिरपरिसए देवे सद्दावेति, तए णं ते बाहिरपरिसदा देवा सद्दाविया समाणा बाहिरबाहिरगे देवे सद्दावेति, तए णं ते बाहिरबाहिरगा देवा सद्दाविया समाणा आभियोगिए देवे सद्दावेति, तए णं ते जाव सद्दाविया समाणा वुट्ठिकाइए देवे सद्दावेति, तए णं ते वुट्ठिकाइया देवा सद्दाविया समाणा वुट्ठिकायं पकरेति। एवं खलु गोयमा! सक्के देविंदे देवराया वुट्ठिकायं पकरेति।

अत्थि णं भंते! असुरकुमारा वि देवा वुट्ठिकायं पकरेति? हंता, अत्थि।

किंपत्तियं णं भंते! असुरकुमारा देवा वुट्ठिकायं पकरेति? गोयमा! जे इमे अरहंता भगवंतो एएसि णं जम्मणमहिमासु वा, निक्खमणमहिमासु वा, नाणुप्पायमहिमासु वा परिनिच्चाणमहिमासु वा एवं खलु गोयमा! असुरकुमारा देवा वुट्ठिकायं पकरेति।

एवं नागकुमारा वि। एवं जाव थणियकुमारा।

वाणमंतर-जोतिसिय-वेमाणिया एवं चेव।

**[६०२]** जाहे णं भंते! ईसाणे देविंदे देवराया तमुकायं कातुकामे भवति से कहमियाणिं पकरेति? गोयमा! ताहे चेव णं ईसाणे देविंदे देवराया अब्भंतरपरिसए देवे सद्दावेति, तए णं ते अब्भंतरपरिसगा देवा सद्दाविया समाणा एवं जहेव सक्कस्स जाव तए णं ते आभियोगिया देवा सद्दाविया समाणा तमुकाइए देवे सद्दावेति, तए णं ते तमुकाइया देवा सद्दाविया समाणा तमुकायं पकरेति, एवं खलु गोयमा! ईसाणे देविंदे देवराया तमुकायं पकरेति।

अत्थि णं भंते! असुरकुमारा वि देवा तमुकायं पकरेति? हंता, अत्थि।

किंपत्तियं णं भंते! असुरकुमारा देवा तमुकायं पकरेति? गोयमा! किड्डारतिपत्तियं वा, पडिणीयविमोहणट्ठयाए वा, गुत्तिसारक्खणहेडं वा अप्पणो वा सरीरपच्छायणट्ठयाए, एवं खलु गोयमा! असुरकुमारा वि देवा तमुकायं पकरेति।

एवं जाव वेमाणिया।

सेवं भंते! सेवं भंते! ति जाव विहरइ।

**\*चोद्धसमे सए बीइओ उद्देशो समतो**

## ० तइओ उद्देशो ०

[६०३] देवे णं भंते! महाकाये महासरीरे अणगारस्स भावियप्पणो मज्झंमज्झेणं वीयीवएज्जा? गोयमा! अत्थेगइए वीतीवएज्जा, अत्थेगतिए नो वीतीवएज्जा।

से केणट्ठेणं भंते! एवं वुच्चति 'अत्थेगइए वीतीवएज्जा, अत्थेगतिए नो वीतीवएज्जा'? गोयमा! देवा दुविहा पन्नता, तं जहा--मायीमिच्छादिट्ठीउववन्नगा य, अमायीसम्मद्धिट्ठीउववन्नगा य। तत्थ णं जे से मायीमिच्छादिट्ठीउववन्नए देवे से णं अणगारं भावियप्पाणं पासति, पासिता नो वंदति, नो नमंसति, नो सक्कारेइ, नो सम्माणेति, नो कल्लाणं मंगलं

देवतं जाव पज्जुवासति। से णं अणगारस्स भावियप्पणो मज्झंमज्झेणं वीतीवएज्जा। तत्थ णं जे से अमायीसम्मद्धिट्ठीउववन्नए देवे, से णं अणगारं भावियप्पाणं पासति, पासिता वंदति नमंसति जाव पज्जुवासइ, से णं अणगारस्स भावियप्पणो मज्झंमज्झेणं नो वीयीवएज्जा। सेतेणट्ठेणं गोयमा! एवं वुच्चइ जाव नो वीयीवएज्जा।

असुरकुमारे णं भंते! महाकाये महासरीरे०, एवं चेव।

एवं देवदंडओ भाणियव्वो जाव वेमाणिए।

[६०४] अत्थि णं भंते! नेरइयाणं सक्कारे ति वा सम्माणे ति वा किइकम्मे ति वा अब्भुट्ठाणे इ वा अंजलिपग्गहे ति वा आसणाभिग्गहे ति वा आसणाणुप्पदाणे ति वा, एतस्स पच्चुग्ग-च्छणया, ठियस्स पज्जुवासणया, गच्छंतस्स पडिसंसाहणया? नो तिणट्ठे समट्ठे।

अत्थि णं भंते! असुरकुमाराणं सक्कारे ति वा सम्माणे ति वा जाव पडिसंसाहणता? हंता, अत्थि।

एवं जाव थणियकुमाराणं।

पुढविकाइयाणं जाव चउरिंदियाणं, एएसिं जहा नेरइयाणं।

अत्थि णं भंते! पंचिंदियतिरिक्खजोणियाणं सक्कारे ति वा जाव पडिसंसाधणया? हंता, अत्थि, नो चेव णं आसणाभिग्गहे ति वा, आसणाणुप्पयाणे ति वा।

मणुस्साणं जाव वेमाणियाणं जहा असुरकुमाराणं।

[६०५] अप्पिड्ढिए णं भंते! देवे महिड्ढियस्स देवस्स मज्झंमज्झेणं वीतीवएज्जा? नो तिणट्ठे समट्ठे।

समिड्ढिए णं भंते! देवे समिड्ढियस्स देवस्स मज्झंमज्झेणं वीतीवएज्जा? णो तिणमट्ठे समट्ठे, पमत्तं पुण वीतीवएज्जा।

से णं भंते! किं सत्थेणं अक्कमिता पभू, अणक्कमिता पभू? गोयमा! अक्कमिता पभू, नो अणक्कमिता पभू।

से णं भंते! किं पुत्विं सत्थेणं अक्कमिता पच्छा वीतीवएज्जा, पुत्विं वीतीवतिता पच्छा सत्थेणं अक्कमेज्जा? एवं एएणं अभिलावेणं जहा दसमसए आतिड्ढीउद्देशए तहेव निरवसेसं चत्तारि दंडगा भाणितव्वा जाव महिड्ढीया वेमाणिणी अप्पिड्ढियाए वेमाणिणीए।

[६०६] रतणप्पभपुढविनेरइया णं भंते! केरिसयं पोग्गलपरिणामं पच्चणुभवमाणा विहरंति?

गोयमा! अणिट्ठं जाव अमणामं।

एवं जाव अहेसत्तमापुढविनेरइया।

एवं वेदणापरिणामं।

एवं जहा जीवाभिगमे बितिए नेरइयउद्देशए, जाव अहेसत्तमापुढविनेरइया णं भंते! केरिसयं परिग्गहसण्णापरिणामं पच्चणुभवमाणा विहरंति? गोयमा! अणिट्ठं जाव अमणामं।

सेवं भंते! सेवं भंते! ति०।

**\*चोद्धसमे सए तइओ उद्देशो समतो \***

**० चउत्थो उद्देशो ०**

[६०७] एस णं भंते! पोग्गले तीतमणंतं सासयं समयं समयं लुक्खी, समयं अलुक्खी, समयं लुक्खी वा अलुक्खी वा, पुट्ठिं च णं करणेणं अणेगवण्णं अणेगरूवं परिणामं परिणमइ, अह से परिणामे निज्जिण्णे भवति तओ पच्छा एगवण्णे एगरूवे सिया? हंता, गोयमा! एस णं पोग्गले तीत०, तं चेव जाव एगरूवे सिया।

एस णं भंते! पोग्गले पडुप्पन्नं सासयं समयं०? एवं चेव।

एवं अणागयमणंतं पि।

एस णं भंते! खंधे तीतमणंतं०? एवं चेव खंधे वि जहा पोग्गले।

[६०८] एस णं भंते! जीवे तीतमणंतं सासयं समयं समयं दुक्खी, समयं अदुक्खी, समयं दुक्खी वा अदुक्खी वा? पुट्ठिं च णं करणेणं अणेगभावं अणेगभूतं परिणामं परिणमइ, अह से वेयणिज्जे निज्जिण्णे भवति ततो पच्छा एगभावे एगभूते सिया? हंता, गोयमा! एस णं जीवे जाव एगभूते सिया।

एवं पडुप्पन्नं सासयं समयं।

एवं अणागयमणंतं सासयं समयं।

[६०९] परमाणुपोग्गले णं भंते! किं सासए, असासए? गोयमा! सिय सासए, सिय असासए। से केणट्ठेणं भंते! एवं वुच्चइ 'सिय सासए, सिय असासए'? गोयमा! दव्वट्ठयाए सासए, वण्णपज्जवेहिं जाव फासपज्जवेहिं असासए। सेतेणट्ठेणं जाव सिय असासए।

[६१०] परमाणुपोग्गले णं भंते! किं चरिमे, अचरिमे? गोयमा! दव्वादेसेणं नो चरिमे, अचरिमे; खेत्तादेसेणं सिय चरिमे, सिय अचरिमे; कालादेसेणं सिय चरिमे, सिय अचरिमे; भावादसेणं सिय चरिमे, सिय अचरिमे।

[६११] कतिविधे णं भंते! परिणामे पन्नते? गोयमा! दुविहे परिणामे पन्नते, तं जहा- जीवपरिणामे य, अजीवपरिणामे य। एवं परिणामपदं निरवसेसं भाणियत्वं।

सेवं भंते! सेवं भंते! ति जाव विहरति।

**\*चोद्धसमे सए चउत्थो उद्देशो समतो \*।**

**० पंचमो उद्देशो ०**

[६१२] नेरइए णं भंते! अगणिकायस्स मज्झंमज्झेणं वीतीवएज्जा? गोयमा! अत्थेगतिए वीतीवएज्जा, अत्थेगतिए नो वीतीवएज्जा।

से केणट्ठेणं भंते! एवं वुच्चइ अत्थेगतिए वीतीवएज्जा, अत्थेगतिए नो वीतीवएज्जा? गोयमा! नेरइया दुविहा पन्नता, तं जहा- विग्गहगतिसमावन्नगा य अविग्गहगतिसमावन्नगा य। तत्थ पं जे से विग्गहगतिसमावन्नए नेरतिए से पं अगणिकायस्स मज्झंमज्झेणं वीतीवएज्जा। से पं तत्थ झियाएज्जा? णो इणट्ठे समट्ठे, नो खलु तत्थ सत्थं कमति। तत्थ पं जे से अविग्गहगतिसमावन्नए नेरइए से पं अगणिकायस्स मज्झंमज्झेणं णो वीतीवएज्जा। सेतेणट्ठेणं जाव नो वीतीवएज्जा।

असुरकुमारे पं भंते! अगणिकायस्स० पुच्छा। गोयमा! अत्थेगतिए वीतीवएज्जा, अत्थेगतिए नो वीतीवएज्जा।

से केणट्ठेणं जाव नो वीतीवएज्जा? गोयमा! असुरकुमारा दुविहा पन्नता, तं जहा-- विग्गहगतिसमावन्नगा य अविग्गहगतिसमावन्नगा य। तत्थ पं जे से विग्गहगतिसमावन्नए असुरकुमारे से पं एवं जहेव नेरतिए जाव कमति। तत्थ पं जे से अविग्गहगतिसमावन्नए असुरकुमारे से पं अत्थेगतिए अगणिकायस्स मज्झंमज्झेणं वीतीवएज्जा, अत्थेगइए नो वीइवएज्जा। जे पं वीतीवएज्जा से पं तत्थ झियाएज्जा? नो इणट्ठे समट्ठे, नो खलु तत्थ सत्थं कमति। सेतेणट्ठेणं०।

एवं जाव थणियकुमारे।

एगिंदिया जहा नेरइया।

बेइंदिया पं भंते! अगणिकायस्स मज्झंमज्झेणं०? जहा असुरकुमारे तहा बेइंदिए वि। नवरं जे पं वीतीवएज्जा से पं तत्थ झियाएज्जा? हंता, झियाएज्जा। सेसं तं चेव।

एवं जाव चउरिंदिए।

पंचिंदियतिरिक्खजोणिए पं भंते! अगणिकाय० पुच्छा। गोयमा! अत्थेगतिए वीतीवएज्जा, अत्थेगतिए नो वीइवएज्जा।

से केणट्ठेणं०? गोयमा! पंचिंदियतिरिक्खजोणिया दुविहा पण्णता, तं जहा- विग्गहगति-समावन्नगा य अविग्गहगतिसमावन्नगा य। विग्गहगतिसमावन्नए जहेव नेरइए जाव नो खलु तत्थ सत्थं कमइ। अविग्गहगइसमावन्नगा पंचिंदियतिरिक्खजोणिया दुविहा पन्नता, तं जहा-इइडिप्पता य अणिइडिप्पता य। तत्थ पं जे से इइडिप्पते पंचिंदियतिरिक्खजोणिए से पं अत्थेगतिए अगणिकायस्स मज्झंमज्झेणं वीतीवएज्जा, अत्थेगतिए नो वीयीवएज्जा। जे पं वीतीवएज्जा से पं तत्थ झियाएज्जा? नो इणट्ठे समट्ठे, नो खलु तत्थ सत्थं कमइ। तत्थ पं जे से अणिइडिप्पते पंचिंदियतिरिक्खजोणिए से पं अत्थेगतिए अगणिकायस्स मज्झंमज्झेणं वीतीवएज्जा, अत्थेगतिए नो वीइवएज्जा। जे पं वीतीवएज्जा से पं तत्थ झियाएज्जा? हंता, झियाएज्जा! सेतेणट्ठेणं जाव नो वीतीवएज्जा।

एवं मणुस्से वि।

वाणमंतर-जोतिसिय-वेमाणिए जहा असुरकुमारे।

**[६१३]** नेरतिया दस ठाणाइं पच्चणुभवमाणा विहरंति, तं जहा- अणिट्ठा सद्दा, अणिट्ठा रूवा, जाव अणिट्ठा फासा, अणिट्ठा गती, अणिट्ठा ठिती, अणिट्ठे लायण्णे, अणिट्ठे जसोकिती, अणिट्ठे उट्ठाणकम्मबलवीरियपुरिसक्कारपरक्कमे।

असुरकुमारा दस ठाणाइं पच्चणुभवमाणा विहरंति, तं जहा- इट्ठा सद्दा, इट्ठा रूवा जाव इट्ठे उट्ठाणकम्मबलवीरियपुरिसक्कारपरक्कमे।

एवं जाव थणियकुमारा।

पुढविकाइया छट्ठाणाइं पच्चणुभवमाणा विहरंति, तं जहा- इट्ठाणिट्ठा फासा, इट्ठाणिट्ठा गती, एवं जाव परक्कमे।

एवं जाव वणस्सइकाइया।

बेइंदिया सत्त ट्ठाणाइं पच्चणुभवमाणा विहरंति, तं जहा- इट्ठाणिट्ठा रसा, सेसं जहा एगिंदियाणं।

तेइंदिया णं अट्ठ ट्ठाणाइं पच्चणुभवमाणा विहरंति, तं जहा- इट्ठाणिट्ठा गंधा, सेसं जहा बेइंदियाणं।

चउरिंदिया नव ट्ठाणाइं पच्चणुभवमाणा विहरंति, तं जहा- इट्ठाणिट्ठा रूवा, सेसं जहा तेइंदियाणं।

पंचेदियतिरिक्खजोणिया दस ट्ठाणाइं पच्चणुभवमाणा विहरंति, तं जहा- इट्ठाणिट्ठा सद्दा जाव परक्कमे।

एवं मणुस्सा वि।

वाणमंतर-जोतिसिय-वेमाणिया जहा असुरकुमारा।

[६१४] देवे णं भंते! महिइढीए जाव महेसक्खे बाहिरए पोग्गले अपरियादिइता पभू तिरियपव्वतं वा तिरियभित्तिं वा उल्लंघेतए वा पल्लंघेतए वा? गोयमा! नो इणट्ठे समट्ठे।

देवे णं भंते! महिइढीए जाव महेसक्खे बाहिरए पोग्गले परियादिइता पभू तिरियप० जाव पल्लंघेतए वा? हंता, पभू।

सेवं भंते! सेवं भंते! त्ति०।

**\*चोद्धसमे सए पंचमो उद्देशो समतो \***

**० छट्ठो उद्देशओ ०**

[६१५] रायगिहे जाव एवं वदासी-

नेरतिया णं भंते! किमाहारा, किंपरिणामा, किंजोणीया, किंठितीया पन्नत्ता? गोयमा! नेरइया णं पोग्गलाहारा, पोग्गलपरिणामा, पोग्गलजोणीया, पोग्गलट्ठितीया, कम्मोवगा, कम्मनियाणा, कम्मट्ठितीया, कम्मणा मेव विप्परियासमैति।

एवं जाव वेमाणिया।

[६१६] नेरइया णं भंते! किं वीचिदव्वाइं आहारंति, अवीचिदव्वाइं आहारंति? गोयमा! नेरतिया वीचिदव्वाइं पि आहारंति, अवीचिदव्वाइं पि आहारंति।

से केणट्ठेणं भंते! एवं वुच्चति 'नेरतिया वीचि० तं चेव जाव आहारंति'? गोयमा! जे णं नेरइया एगपदेसूणाइं पि दव्वाइं आहारंति ते णं नेरतिया वीचिदव्वाइं आहारंति, जे णं नेरतिया पडिपुण्णाइं दव्वाइं आहारंति ते णं नेरइया अवीचिदव्वाइं आहारंति। सेतेणट्ठेणं गोयमा! एवं वुच्चति जाव आहारंति।

एवं जाव वेमाणिया आहारंति ।

[६१७] जाहे णं भंते! सक्के देविंदे देवराया दिव्वाइं भोगभोगाइं भुंजिउकामे भवति से

कहमिदाणिं पकरेति? गोयमा! ताहे चेव णं से सक्के देविंदे देवराया एगं महं नेमिपडिरूवगं विउच्चति, एगं जोयणसयसहस्सं आयामविक्खंभेणं, तिण्णि जोयणसयसहस्साइं जाव अद्धंगुलं च किंचिविसेसाहियं परिक्खेवेणं, तस्स णं नेमिपडिरूवगस्स अवरिं बहुसमरमणिज्जे भूमिभागे पन्नते जाव मणीणं फासो। तस्स णं नेमिपडिरूवगस्स बहुमज्झदेसभागे, तत्थ णं महं एगं पासायवडैसगं विउच्चति, पंच जोयणसयाइं उड्डं उच्चतेणं, अड्ढाइज्जाइं जोयणसयाइं विक्खंभेणं अब्भुग्गयमूसिय० वण्णओ जाव पडिरूवं। तस्स णं पासायवडैसगस्स उल्लोए पउमलयाभतिचिते जाव पडिरूवे। तस्स णं पासायवडैसगस्स अंतो बहुसमरमणिज्जे भूमिभागे जाव मणीणं फासो मणिपेढिया अट्ठजोयणिया जहा वेमाणियाणं। तीसे णं मणिपेढियाए उवरिं महं एगे देवसयणिज्जे विउच्चति। सयणिज्जवण्णओ जाव पडिरूवे। तत्थ णं से सक्के देविंदे देवराया अट्ठहिं अग्गमहिंसीहिं सपरिवाराहिं, दोहि य अणिएहिं--नट्ठणिएण य गंधच्वाणिएण य-सद्धिं महयाहयनट्ठं जाव दिच्वाइं भोगभोगाइं भुंजमाणे विहरति।

जाहे णं ईसाणे देविंदे देवराया दिच्वाइं० जहा सक्के तहा ईसाणे वि निरवसेसं।

एवं सणंकुमारे वि, नवरं पासायवडैसओ छज्जोयणसयाइं उड्डं उच्चतेणं, तिण्णि जोयणसयाइं विक्खंभेणं। मणिपेढिया तहेव अट्ठजोयणिया। तीसे णं मणिपेढियाए उवरिं एत्थ णं महेगं सीहासणं विउच्चति, सपरिवारं भाणियच्चं। तत्थ णं सणंकुमारे देविंदे देवराया बावतरीए सामाणियसाहस्सीहिं जाव चउहि य बावतरीहिं आयरक्खदेवसाहस्सीहिं बहूहिं सणंकुमारकप्पवासीहिं वेमाणिएहिं देवेहि य देवीहि य सद्धिं संपरिवुडे महया जाव विहरति।

एवं जहा सणंकुमारे तहा जाव पाणतो अच्युतो, नवरं जो जस्स परिवारो सो तस्स भाणियच्चो। पासायउच्चतं जं सएसु सएसु कप्पेसु विमाणाणं उच्चतं, अद्धद्धं वित्थारो जाव अच्युयस्स नव जोयणसयाइं उड्डं उच्चतेणं, अद्धपंचमाइं जोयणसयाइं विक्खंभेणं, तत्थ णं गोयमा! अच्युए देविंदे देवराया दसहिं सामाणियसाहस्सीहिं जाव विहरति। सेसं तं चेव।

सेवं भंते! सेवं भंते! ति०।

### **\*चोद्धसमे सए छट्ठो उद्देशो समतो \***

#### **० सतमो उद्देशो ०**

[६१८] रायगिहे जाव परिसा पडिगया।

गोयमा! दी समणे भगवं महावीरे भगवं गोयमं आमंतेता एवं वयासी--चिरसंसिट्ठोऽसि मे गोयमा!, चिरसंथुतोऽसि मे गोयमा! चिरपरिचिओऽसि मे गोयमा!, चिरञ्जुसिओऽसि मे गोयमा! चिराणु-गओऽसि मे गोयमा!, चिराणुवती सि मे गोयमा!, अणंतरं देवलोए, अणंतरं माणुस्सए भवे, किं परं मरणा कायस्स भेदा इतो चुता, दो वि तुल्ला एगट्ठा अविसेसमणाणता भविस्सामो।

[६१९] जहा णं भंते! वयं एयमट्ठं जाणामो पासामो तहा णं अणुत्तरोववातिया वि देवा एयमट्ठं जाणंति पासंति? हंता, गोयमा! जहा णं वयं एयमट्ठं जाणामो पासामो तहा अणुत्तरोववातिया वि देवा एयमट्ठं जाणंति पासंति।

से केणट्ठेणं जाव पासंति? गोयमा! अणुत्तरोववातियाणं अणंताओ मणोदच्चवग्गणाओ लद्धाओ पत्ताओ अभिसमन्नागयाओ भवंति, सेतेणट्ठेणं गोयमा! एवं वुच्चति जाव पासंति।

[६२०] कतिविधे णं भंते! तुल्लए पन्नते? गोयमा? छव्विहे तुल्लए पन्नते, तं जहा-दव्वतुल्लए खेततुल्लए कालतुल्लए भवतुल्लए भावतुल्लए संठाणतुल्लए।

से केणट्ठेणं भंते! एवं वुच्चइ 'दव्वतुल्लए, दव्वतुल्लए'? गोयमा! परमाणुपोग्गले परमाणुपोग्गलस्स दव्वतो तुल्ले, परमाणुपोग्गले परमाणुपोग्गलवतिरित्तस्स दव्वओ णो तुल्ले। दुपएसिए खंधे दुपएसियस्स खंधस्स दव्वओ तुल्ले, दुपएसिए खंधे दुपएसियवतिरित्तस्स खंधस्स दव्वओ णो तुल्ले। एवं जाव दसपएसिए। तुल्लसंखेज्जपएसिए खंधे तुल्लसंखेज्जपएसिए खंधे तुल्लसंखेज्जपएसियस्स खंधस्स दव्वओ तुल्ले, तुल्लसंखेज्जपएसिए खंधे तुल्लसंखेज्जपएसियवतिरित्तस्स खंधस्स दव्वओ णो तुल्ले। एवं तुल्लअसंखेज्जपएसिए वि। एवं तुल्लअणंतपदेसिए वि। सेतेणट्ठेणं गोयमा! एवं वुच्चति 'दव्वतुल्लए, दव्वतुल्लए'।

से केणट्ठेणं भंते! एवं वुच्चइ 'खेततुल्लए, खेततुल्लए'? गोयमा! एगपदेसोगाढे पोग्गले एगपदेसोगाढस्स पोग्गलस्स खेतओ तुल्ले, एगपदेसोगाढे पोग्गले एगपदेसोगाढवतिरित्तस्स पोग्गलस्स खेतओ णो तुल्ले। एवं जाव दसपदेसोगाढे, तुल्लसंखेज्जपदेसोगाढे० तुल्लसंखेज्ज०। एवं तुल्लअसंखेज्जपदेसोगाढे वि। सेतेणट्ठेणं जाव खेततुल्लए।

से केणट्ठेणं भंते! एवं वुच्चति 'कालतुल्लए, कालतुल्लए'? गोयमा! एगसमयठितीए पोग्गले एग० कालओ तुल्ले, एगसमयठितीए पोग्गले एगसमयठितीयवतिरित्तस्स पोग्गलस्स कालओ णो तुल्ले। एवं जाव दससमयट्ठितीए। तुल्लसंखेज्जसमयठितीए एवं चेव। एवं तुल्लअसंखेज्जसमयट्ठितीए वि। सेतेणट्ठेणं जाव कालतुल्लए, कालतुल्लए।

से केणट्ठेणं भंते! एवं वुच्चइ 'भवतुल्लए, भवतुल्लए'? गोयमा! नेरइए नेरइयस्स भवट्ठयाए तुल्ले, नेरइए नेरइयवतिरित्तस्स भवट्ठयाए नो तुल्ले। तिरिक्खजोणिए एवं चेव। एवं मणुस्से। एवं देवे वि। सेतेणट्ठेणं जाव भवतुल्लए, भवतुल्लए।

से केणट्ठेणं भंते! एवं वुच्चइ 'भावतुल्लए, भावतुल्लए'? गोयमा! एगगुणकालए पोग्गले एगगुणकालगस्स पोग्गलस्स भावओ तुल्ले, एगगुणकालए पोग्गले एगगुणकालगवतिरित्तस्स पोग्गलस्स भावओ णो तुल्ले। एवं जाव दसगुणकालए। तुल्लसंखेज्जगुणकालए पोग्गले तुल्लसंखेज्ज०। एवं तुल्लअसंखेज्जगुणकालए वि। एवं तुल्लअणंतगुणकालए वि। जहा कालए एवं नीलए लोहियए हालिद्धए सुकिल्लए। एवं सुब्धिगंधे दुब्धिगंधे। एवं तित्ते जाव महुरे। एवं कक्खडे जाव लुक्खे। उदइए भावे उदइयस्स भावस्स भावओ तुल्ले, उदइए भावे उदइयभाववइरित्तस्स भावस्स भावओ नो तुल्ले। एवं उवसमिए खइए खयोवसमिए पारिणामिए, सन्निवातिए भावे सन्निवातियस्स भावस्स। सेतेणट्ठेणं गोयमा! एवं वुच्चति 'भावतुल्लए, भावतुल्लए'।

से केणट्ठेणं भंते! एवं वुच्चइ 'संठाणतुल्लए, संठाणतुल्लए'? गोयमा! परिमंडले संठाणे परिमंडलस्स संठाणस्स संठाणओ तुल्ले, परिमंडले संठाणे परिमंडलसंठाणवतिरित्तस्स संठाणस्स संठाणओ नो तुल्ले। एवं वट्ठे तंसे चउरंसे आयए। समचउरंसंठाणे समचउरंसस्स संठाणस्स संठाणओ तुल्ले, समचउरंसे संठाणे समचउरंसंठाणवतिरित्तस्स संठाणस्स संठाणओ नो तुल्ले। एवं परिमंडले वि। एवं जाव हुंडे। सेतेणट्ठेणं जाव संठाणतुल्लए।

[६२१] भत्तपच्चक्खायए णं भंते! अणगारे मुच्छिए जाव अज्झोववन्ने आहारमाहारेइ, अहे णं

वीससाए कालं करेति ततो पच्छा अमुच्छित्ते अगिद्धे जाव अणज्झोववन्ने आहारमाहारेइ? हंता, गोयमा!  
भत्तपच्चक्खायए णं अणगारे० तं चेव।

से केणट्ठेणं भंते! एवं वुच्चति 'भत्तपच्चक्खायए णं अण०' तं चेव? गोयमा!  
भत्तपच्चक्खायए णं अणगारे मुच्छिए जाव अज्झोववन्ने आहारे भवइ, अहे णं वीससाए कालं करेइ तओ  
पच्छा अमुच्छित्ते जाव आहारे भवति। सेतेणट्ठेणं गोयमा! जाव आहारमाहारेति।

**[६२२]** अत्थि णं भंते! 'लवसत्तमा देवा, लवसत्तमा देवा'? हंता, अत्थि।

से केणट्ठेणं भंते! एवं वुच्चइ 'लवसत्तमा देवा, लवसत्तमा देवा'? गोयमा! से जहानामए केयि  
पुरिसे तरुणे जाव निठणसिप्पोवगए सालीण वा वीहीण व गोधूमाण वा जवाण वा जवजवाण वा पिक्काणं  
परियाताणं हरियाणं हरियकंडाणं तिक्खेणं णवपज्जण एणं असियएणं पडिसाहरिया पडिसाहरिया  
पडिसंखिविय पडिसंखिविय जाव 'इणामेव इणामेव'ति कट्ठु सत्त लए लएज्जा, जति णं गोयमा! तेसिं  
देवाणं एवतियं कालं आउए पहुप्पंते तो णं ते देवा तेणं चेव भवग्गहणेणं सिज्झंता जाव अंतं करंता।  
सेतेणट्ठेणं जाव लवसत्तमा देवा, लवसत्तमा देवा।

**[६२३]** अत्थि णं भंते! अणुत्तरोववातिया देवा, अणुत्तरोववातिया देवा? हंता, अत्थि।

से केणट्ठेणं भंते! एवं वुच्चति 'अणुत्तरोववातिया देवा, अणुत्तरोववातिया देवा'? गोयमा!  
अणुत्तरोववातियाणं देवाणं अणुत्तरा सद्दा जाव अणुत्तरा फासा, सेतेणट्ठेणं गोयमा! एवं वुच्चइ  
अणुत्तरोववातिया देवा, अणुत्तरोववातिया देवा।

अणुत्तरोववातिया णं भंते! देवा केवतिएणं कम्मवसेसेणं अणुत्तरोववातियदेवत्ताए उववन्ना?  
गोयमा! जावतियं छट्ठभत्तिए समणे निग्गंथे कम्मं निज्जरेति एवतिएणं कम्मवसेसेणं अणुत्तरोववातिया  
देवा अणुत्तरोववातियदेवत्ताए उववन्ना।

सेवं भंते! सेवं भंते! ति०।

**\*चोद्धसमे सए सत्तमो उद्देशो समतो \***

## ० अट्ठमो उद्देशो ०

**[६२४]** इमीसे णं भंते! रयणप्पभाए पुढवीए सक्करप्पभाए य पुढवीए केवतियं अबाहाए  
अंतरे पन्नत्ते? गोयमा! असंखेज्जाइं जोयणसहस्साइं अबाहाए अंतरे पन्नत्ते।

सक्करप्पभाए णं भंते! पुढवीए वालुयप्पभाए य पुढवीए केवतियं०? एवं चेव।

एवं जाव तमाए अहेसत्तमाए य।

अहेसत्तमाए णं भंते! पुढवीए अलोगस्स य केवतियं अबाहाए अंतरे पन्नत्ते? गोयमा!  
असंखेज्जाइं जोयणसहस्साइं अबाहाए अंतरे पन्नत्ते।

इमीसे णं भंते! रयणप्पभाए पुढवीए जोतिसस्स य केवतियं० पुच्छा। गोयमा! सत्तनउए  
जोयणसए अबाहाए अंतरे पन्नत्ते।

जोतिसस्स णं भंते! सोहम्मिसाणाण य कप्पाणं केवतियं० पुच्छा। गोयमा! असंखेज्जाइं  
जोयणाइं जाव अंतरे पन्नत्ते।

सोहम्मिसाणाणं भंते! सणंकुमार-माहिंदाण य केवतियं०? एवं चेव।

सणकुमार-माहिंदाणं भंते! बंभलोगस्स य कप्पस्स केवतियं०? एवं चेव।

बंभलोगस्स णं भंते! लंतगस्स य कप्पस्स केवतियं०? एवं चेव।

लंतयस्स णं भंते! महासुक्कस्स य कप्पस्स केवतियं०? एवं चेव।

एवं महासुक्कस्स सहस्सारस्स य।

एवं सहस्सारस्स आणय-पाणयाण य कप्पाणं।

एवं आणय-पाणयाण आरणऽच्युयाण य कप्पाणं।

एवं आरणऽच्युताणं गेवेज्जविमाणाण य।

एवं गेवेज्जविमाणाणं अणुत्तरविमाणाण य।

अणुत्तरविमाणाणं भंते! ईसिपब्भाराए य पुढवीए केवतिए० पुच्छ। गोयमा! दुवालसजोयणे अबाहाए अंतरे पन्नते।

ईसिपब्भाराए णं भंते! पुढवीए अलोगस्स य केवतिए अबाहाए० पुच्छ। गोयमा!

देसूणं जोयणं अबाहाए अंतरे पन्नते।

**[६२५]** एस णं भंते! सालरुक्खए उण्हाभिहते तण्हाभिहए दवग्गिजालाभिहए कालमासे कालं किच्चा कहिं गच्छिहिति, कहिं उववज्जिहिति? गोयमा! इहेव रायगिहे नगरे सालरुक्खताए पच्चायाहिति। से णं तत्थ अच्चियवंदियपूइयसक्कारियसम्माणिए दिव्वे सच्चे सच्चोवाए सन्निहियपाडिहेरे लाउल्लोइय-महिते यावि भविस्सइ।

से णं भंते! तओहिंतो अणंतरं उव्वट्ठिता कहिं गमिहिति? कहिं उववज्जिहिति? गोयमा! महाविदेहे वासे सिज्झहिति जाव अंतं काहिति।

एस णं भंते! साललट्ठिया उण्हाभिहया तण्हाभिहया दवग्गिजालाभिहया कालमासे जाव कहिं उववज्जिहिति? गोयमा! इहेव जंबुद्धीवे दीवे भारहे वासे विंझगिरिपायमूले महेसरीए नगरीए सामलिरुक्खताए पच्चायाहिति। सा णं तत्थ अच्चियवंदियपूइय जाव लाउल्लोइयमहिया यावि भविस्सइ।

से णं भंते! तओहिंतो अणंतरं०, सेसं जहा सालरुक्खस्स जाव अंतं काहिति।

एस णं भंते! उंबरलट्ठिया उण्हाभिहया तण्हाभिहया दवग्गिजालाभिहया कालमासे कालं जाव कहिं उववज्जिहिति? गोयमा! इहेव जंबुद्धीवे दीवे भारहे वासे पाडलिपुत्ते नामं नगरे पाडलि-रुक्खताए पच्चायाहिति। से णं तत्थ अच्चितवंदिय जाव भविस्सइ।

से णं भंते! अणंतरं उव्वट्ठिता०, सेसं तं चेव जाव अंतं काहिति।

**[६२६]** तेणं कालेणं तेणं समएणं अम्मडस्स परिव्वायगस्स सत अंतेवासिसया गिम्हकालसमयंसि एवं जहा उववातिए जाव आराहगा।

**[६२७]** बहुजणे णं भंते! अन्नमन्नस्स एवमाइक्खति ४-एवं खलु अम्मडे परिव्वायए कंपिल्लपुरे नगरे घरसते एवं जहा उववातिए अम्मडवत्तव्वया जाव दढप्पतिण्णे अंतं काहिति।

**[६२८]** अत्थि णं भंते! अच्चाबाहा देवा, अच्चाबाहा देवा? हंता अत्थि।

से केणट्ठेणं भंते! एवं वुच्चति 'अच्चाबाहा देवा, अच्चाबाहा देवा'? गोयमा! पभू णं एगमेगे अच्चाबाहे देवे एगमेगस्स पुरिसस्स एगमेगंसि अच्छिपत्तंसि दिव्वं देविड्ढं दिव्वं देवजुतिं दिव्वं देवाणुभागं दिव्वं बत्तीसतिविहं नट्ठविहं उवदंसेत्तए, णो चेव णं तस्स पुरिसस्स किंचि आबाहं वा वाबाहं वा उप्पाएति,

छविच्छेयं वा करेति, एसुहुमं च णं उवदंसेज्जा। सेतेणट्ठेणं जाव अच्वाबाहा देवा, अच्वाबाहा देवा।

**[६२९]** पभू णं भंते! सक्के देविंदे देवराया पुरिसस्स सीसं सापाणिणा असिणा छिंदिता कमंडलुम्मि पक्खिवित्तए? हंता, पभू।

से कहमिदाणिं पकरेइ? गोयमा! छिंदिया छिंदिया व णं पक्खिवेज्जा, भिंदिया भिंदिया व णं पक्खिवेज्जा, कुट्टिया कुट्टिया व णं पक्खिवेज्जा, चुण्णिया चुण्णिया व णं पक्खिवेज्जा, ततो पच्छा खिप्पामेव पडिसंघातेज्जा, नो चेव णं तस्स पुरिसस्स किंचि आबाहं वा वाबाहं वा उप्पाएज्जा, छविच्छेयं पुण करेति, एसुहुमं च णं पक्खिवेज्जा।

**[६३०]** अत्थि णं भंते! जंभया देवा, जंभया देवा? हंता, अत्थि।

से केणट्ठेणं भंते! एवं वुच्चइ 'जंभया देवा, जंभया देवा'? गोयमा! जंभगा णं देवा निच्चं पमुदितपक्कीलिया कंदप्परतिमोहणसीला, जे णं ते देवे कुद्धे पासेज्जा से णं महंतं अयसं पाउणेज्जा, जे णं ते देवे तुट्ठे पासेज्जा से णं महंतं जसं पाउणेज्जा, सेतेणट्ठेणं गोयमा! 'जंभगा देवा, जंभगा देवा'।

कतिविहा णं भंते! जंभगा देवा पन्नता? गोयमा! दसविहा पन्नता, तं जहा--अन्नजंभगा, पाणजंभगा, वत्थजंभगा, लेणजंभगा, सयणजंभगा, पुप्फजंभगा, फलजंभगा, पुप्फफलजंभगा, विज्जाजंभगा, अवियत्तिजंभगा।

जंभगा णं भंते! देवा कहिं वसहिं उवेंति? गोयमा! सव्वेसु चेव दीहवेयइडेसु चित्तविचित्त-जमगपव्वएसु कंचणपव्वएसु य, एत्थ णं जंभगा देवा वसहिं उवेंति।

जंभगाणं भंते! देवाणं केवतियं कलं ठिती पन्नता? गोयमा! एगं पलिओवमं ठिती पन्नता।

सेवं भंते! सेवं भंते! ति जाव विरहति।

**\*चोद्धसमे सए अट्ठमो उद्देशो समतो \***

## ० नवमो उद्देशो ०

**[६३१]** अणगारे णं भंते! भावियप्पा अप्पणो कम्मलेस्सं न जाणति, न पासति, तं पुण जीवं सरूविं सकम्मलेस्सं जाणइ, पासइ? हंता, गोयमा! अणगारे णं भावियप्पा अप्पणो जाव पासति।

अत्थि णं भंते! सरूवी सकम्मलेस्सा पोग्गला ओभासंति ४ ? हंता, अत्थि।

कयरे णं भंते! सरूवी सकम्मलेस्सा पोग्गला ओभासंति जाव पभासंति? गोयमा! जाओ इमाओ चंदिम-सूरियाणं देवाणं विमाणेहिंतो लेस्साओ बहिया अभिनिस्सडाओ पभासंति एए णं गोयमा! ते सरूवी सकम्मलेस्सा पोग्गला ओभासंति ४।

**[६३२]** नेरतियाणं भंते! किं अत्ता पोग्गला, अणत्ता पोग्गला? गोयमा! नो अत्ता पोग्गला, अणत्ता पोग्गला।

असुरकुमाराणं भंते! किं अत्ता पोग्गला, अणत्ता पोग्गला? गोयमा! अत्ता पोग्गला, णो अणत्ता पोग्गला।

एवं जाव थणियकुमाराणं।

पुढवविकाइयाणं पुच्छा। गोयमा! अत्ता वि पोग्गला, अणत्ता वि पोग्गला।

एवं जाव मणुस्साणं।

वाणमंतर-जोतिसिय-वेमाणियाणं जहा असुरकुमाराणं।

नेरतियाणं भंते! किं इट्ठा पोग्गला, अणिट्ठा पोग्गला? गोयमा! नो इट्ठा पोग्गला, अणिट्ठा पोग्गला।

जहा अत्ता भणिया एवं इट्ठा वि, कंता वि, पिया वि, मणुन्ना वि भाणियच्चा। एए पंच दंडगा।

**[६३३]** देवे णं भंते! महिड्डीए जाव महेसक्खे रूवसहस्सं विउच्चिता पभू भासासहस्सं भासितए? हंता, पभू।

सा णं भंते! किं एगा भासा, भासासहस्सं? गोयमा! एगा णं सा भासा, णो खलु तं भासासहस्सं।

**[६३४]** तेणं कालेणं तेणं समएणं भगवं गोयमे अचिरुग्गतं बालसूरियं जासुमणाकुसुम-पुंजप्पगासं लोहीतगं पासति, पासिता जातसड्ढे जाव समुप्पन्नकोउहल्ले जेणेव समणे भगवं महावीरे तेणेव उवागच्छइ, उवागच्छिता जाव नमंसिता जाव एवं वयासी-किमिदं भंते! सूरिए, किमिदं भंते! सूरियस्स अट्ठे? गोयमा! सुभे सूरिए, सुभे सूरियस्स अट्ठे।

किमिदं भंते! सूरिए, किमिदं भंते! सूरियस्स पभा? एवं चेव।

एवं छाया।

एवं लेस्सा।

**[६३५]** जे इमे भंते! अज्जताए समणा निग्गंथा विहरंति एते णं कस्स तेयलेस्सं वीतीवयंति? गोयमा! मासपरियाए समणे निग्गंथे वाणमंतराणं देवाणं तेयलेस्सं वीतीवयति। दुमासपरियाए समणे निग्गंथे असुरिंदवज्जियाणं भवणवासीएणं देवाणं तेयलेस्सं वीयीवयति। एवं एतेणं अभिलावेणं तिमासपरियाए समणे० असुरकुमाराणं देवाणं तेय०। चतुमासपरियाए स० गह-नक्खत्ततारा रूवाणं जोतिसियाणं देवाणं तेय०। पंचमासपरियाए स० चंदिम-सूरियाणं जोतिसिंदाणं जोतिसराईणं तेय०। छम्मासपरियाए स० सोधम्मीसाणाणं देवाणं०। सत्तमासपरियाए० सणंकुमार-माहिंदाणं देवाणं०। अट्ठमासपरियाए बंभलोग-लंतगाणं देवाणं तेयले०। नवमासपरियाए समणे० महासुक्क-सहस्साराणं देवाणं तेय०। दसमासपरियाए सम० आणय-पाणय-आरण-अच्चुयाणं देवाणं०। एक्कारसमासपरियाए० गेवेज्जगाणं देवाणं०। बारसमासपरियाए समणे निग्गंथे अणुत्तरोववातियाणं देवाणं तेयलेस्सं वीतीवयति। तेण परं सुक्के सुक्काभिजातिए भवित्ता ततो पच्छा सिज्झति जाव अंतं करेति।

सेवं भंते! सेवं भंते! ति जाव विहरति।

**\*चोद्दसमे सए नवमो उद्देशो समतो \***

**० दसमो उद्देशो ०**

**[६३६]** केवली णं भंते! छउमत्थं जाणति पासति? हंता, जाणति पासति।

जहा णं भंते! केवली छउमत्थं जाणति पासति तथा णं सिद्धे वि छउमत्थं जाणति पासति? हंता, जाणति पासति।

केवली णं भंते! आहोधियं जाणति पासति? एवं चेव।

एवं परमाहोहियं। एवं केवलिं।

एवं सिद्धं जाव, जहा णं भंते! केवली सिद्धं जाणति पासति तथा णं सिद्धे वि सिद्धं जाणति पासति? हंता, जाणति पासति।

केवली णं भंते! भासेज्ज वा वागरेज्ज वा? हंता, भासेज्ज वा वागरेज्ज वा।

जहा णं भंते! केवली भासेज्ज वा वागरेज्ज वा तथा णं सिद्धे वि भासेज्ज वा वागरेज्ज वा? नो तिणट्ठे समट्ठे।

से केणट्ठेणं भंते! एवं वुच्चइ जहा णं केवली भासेज्ज वा वागरेज्ज वा नो तथा णं सिद्धे भासेज्ज वा वागरेज्ज वा? गोयमा! केवली णं सउट्ठाणे सकम्मे सबले सवीरिए सपुरिसक्कारपरक्कमे, सिद्धे णं अणुट्ठाणे जाव अपुरिसक्कार परक्कमे, सेतेणट्ठेणं जाव वागरेज्ज वा।

केवली णं भंते! उम्मिसेज्ज वा निमिसेज्ज वा?

हंता, उम्मिसेज्ज वा निमिसेज्ज वा, एवं चेव।

एवं आउट्ठेज्ज वा पसारेज्ज वा।

एवं ठाणं वा सेज्जं वा निसीहियं वा चेएज्जा।

केवली णं भंते! इमं रयणप्पभं पुढविं 'रयणप्पभपुढवी'ति जाणति पासति?

हंता, जाणति पासति।

जहा णं भंते! केवली इमं रयणप्पभं पुढविं 'रयणप्पभपुढवी'ति जाणति पासति

तथा णं सिद्धे वि इमं रयणप्पभं पुढविं 'रयणप्पभपुढवी'ति जाणति पासति?

हंता, जाणति पासति।

केवली णं भंते! सक्करप्पभं पुढविं 'सक्करप्पभपुढवी'ति जाणति पासति? एवं चेव।

एवं जाव अहेसत्तमा।

केवली णं भंते! सोहम्मं कप्पं 'सोहम्मकप्पे'ति जाणति पासति? हंता, जाणति० एवं चेव।

एवं ईसाणं। एवं जाव अच्चुयं।

केवली णं भंते! गेवेज्जविमाणे 'गेवेज्जविमाणे'ति जाणति पासति? एवं चेव।

एवं अणुत्तरविमाणे वि।

केवली णं भंते! ईसिपब्भारं पुढविं 'ईसीपब्भारपुढवी'ति जाणति पासति? एवं चेव।

केवली णं भंते! परमाणुपोग्गलं 'परमाणुपोग्गले'ति जाणति पासति? एवं चेव।

एवं दुपदेसियं खंधं।

एवं जाव जहा णं भंते! केवली अणंतपदेसियं खंधं 'अणंतपदेसिए खंधे'ति जाणति पासति तथा णं सिद्धे वि अणंतपदसियं जाव पासति? हंता, जाणति पासति।

सेवं भंते! सेवं भंते! ति०।

**\*चोद्धसमे सए दसमो उद्देशो समतो \***

**०-चोद्धसमं सयं समतं-०**

**० मुनि दीपरत्रसागरेण संशोधितः सम्पादितश्च चोद्धसमं सतं समतं ०**

## [ ] पन्नरसमं सतं [ ]

[६३७] नमो सुयदेवयाए भगवतीए।

तेणं कालेणं तेणं समयेणं सावत्थी नामं नगरी होत्था। वण्णओ।

तीसे णं सावत्थीए नगरीए बहिया उतरपुरत्थिमे दिसीभाए, एत्थ णं कोट्ठए नामं चेतिए होत्था। वण्णओ।

तत्थ णं सावत्थीए नगरीए हालाहला नामं कुंभकारी आजीविओवासिया परिवसति, अड्ढा जाव अपरिभूया आजीवियसमयंसि लद्धट्ठा गहितट्ठा पुच्छियट्ठा विणिच्छियट्ठा अट्ठिमिंजपेम्माणुरागरता अयमाउसो! आजीवियसमये अट्ठे, अयं परमट्ठे, सेसे अणट्ठेति आजीवियसमएणं अप्पाणं भावेमाणी विहरति।

तेणं कालेणं तेणं समयेणं गोसाले मंखलिपुते चतुवीसवासपरियाए हालाहलाए कुंभकारीए कुंभारावणंसि आजीवियसंघसंपरिवुडे आजीवियसमयेणं अप्पाणं भावेमाणे विहरति।

तए णं तस्स गोसालस्स मंखलिपुतस्स अन्नदा कदायि इमे छद्दिसाचरा अंतियं पादुब्भवित्था, तं जहा-सोणे कणंदे कणियारे अच्छिद्धे अग्गिवेसायणे अज्जुणे गोयमपुते।

तए णं ते छद्दिसाचरा अट्ठविहं पुव्वगयं मग्गदसमं सएहिं सएहिं मतिदंसणेहिं निज्जुहंति, स० निज्जुहिता गोसालं मंखलिपुतं उवट्ठाइंसु।

तए णं से गोसाले मंखलिपुते तेणं अट्ठंगस्स महानिमित्तस्स केणइ उल्लोयमेतेण सव्वेसिं पाणाणं सव्वेसिं भूयाणं सव्वेसिं जीवाणं सव्वेसिं सत्ताणं इमाइं छ अणतिककमणिज्जाइं वागरणाइं वागरेति, तं जहा--लाभं अलाभं सुहं दुक्खं जीवितं मरणं तहा।

तए णं से गोसाले मंखलिपुते तेणं अट्ठंगस्स महानिमित्तस्स केणइ उल्लोयमेतेणं सावत्थीए नगरीए अजिणे जिणप्पलावी, अणरहा अरहप्पलावी, अकेवली केवलिप्पलावी, असव्वण्णू सव्वण्णुप्पलावी, अजिणे जिणसद्धं पगासेमाणे विहरति।

[६३८] तए णं सावत्थीए नगरीए सिंघाडग जाव पहेसु बहुजणो अन्नमन्नस्स एवमाइक्खति जाव एवं परूवेति--एवं खलु देवाणुप्पिया! गोसाले मंखलिपुते जिणे जिणप्पलावी जाव पकासेमाणे विहरति, से कहमेयं मन्ने एवं?

तेणं कालेणं तेणं समएणं सामी समोसडे। जाव परिसा पडिगता।

तेणं कालेणं तेणं समएणं समणस्स भगवतो महावीरस्स जेट्ठे अंतेवासी इंदभूतीणामं अणगारे गोयमे गोतेणं जाव छट्ठंछट्ठेणं एवं जहा बितियसए नियंतुद्देसए जाव अडमाणे बहुजणसद्धं निसामेइ--"बहुजणो अन्नमन्नस्स एवमाइक्खति ४-एवं खलु देवाणुप्पिया! गोसाले मंखलिपुते जिणे जिणप्पलावी जाव पकासेमाणे विहरइ। से कहमेयं मन्ने एवं?"।

तए णं भगवं गोयमे बहुजणस्स अंतियं एयमट्ठं सोच्चा निसम्म जायसड्ढे जाव भत्त-पाणं पडिदंसेति जाव पज्जुवासमाणे एवं वयासी-एवं खलु अहं भंते!०, तं चेव जाव जिणसद्धं पगासेमाणे विहरइ, से कहमेतं भंते! एवं? तं इच्छामि णं भंते! गोसालस्स मंखलिपुतस्स उट्ठाणपारियाणियं परिकहियं।

गोतमा!दी समणे भगवं महावीरे भगवं गोयमं एवं वयासी- जं णं गोयमा! से बहुजणे

अन्नमन्नस्स एवमाइक्खति ४ 'एवं खलु गोसाले मंखलिपुत्ते जिणे जिणप्पलावी जाव पगासेमाणे विहरति' तं णं मिच्छा, अहं पुण गोयमा! एवमाइक्खामि जाव परूवेमि--एवं खलु एयस्स गोसालस्स मंखलिपुत्तस्स मंखली णामं मंखे पिता होत्था। तस्स णं मंखलिस्स मंखस्स भद्दा नामं भारिया होत्था, सुकुमाल० जाव पडिरूवा। तए णं सा भद्दा भारिया अन्नदा कदायि गुत्विणी यावि होत्था।

तेणं कालेणं तेणं समएणं सरवणे नामं सन्निवेसे होत्था, रिद्धत्थिमिय जाव सन्निभप्पगासे पासादीए ४।

तत्थ णं सरवणे सन्निवेसे गोबहुले नामं माहणे परिवसति अइडे जाव अपरिभूते रिच्वेद जाव सुपरिनिट्ठिए यावि होत्था। तस्स णं गोबहुलस्स माहणस्स गोसाला यावि होत्था।

तए णं से मंखली मंखे अन्नदा कदायि भद्दाए भारियाए गुत्विणीए सद्धिं चित्तफलगहत्थगए मंखत्तणेणं अप्पाणं भावेमाणे पुत्वाणुपुत्विं चरमाणे गामाणुगामं दूइज्जमाणे जेणेव सरवणे सन्निवेसे जेणेव गोबहुलस्स माहणस्स गोसाला तेणेव उवागच्छति, उवा०२ गोबहुलस्स माहणस्स गोसालाए एगदेसंसि भंडानिक्खेवं करेति, भंडा० क० २ सरवणे सन्निवेसे उच्च-नीय-मज्झिमाइं कुलाइं घरसमुदाणस्स भिक्खायरियाए अडमाणे वसहीए सच्चओ समंता मग्गणगवेसणं करेति, वसहीए सच्चओ समंता मग्गणगवेसणं करेमाणे अन्नत्थ वसहिं अलभमाणे तस्सेव गोबहुलस्स माहणस्स गोसालाए एगदेसंसि वासावासं उवागए।

तए णं सा भद्दा भारिया नवण्हं मासाणं बहुपडिपुण्णाणं अद्धट्ठमाण य रातिंदियाणं वीतिककंताणं सुकुमाल जाव पडिरूवं दारगं पयाता।

तए णं तस्स दारगस्स अम्मापियरो एक्कारसमे दिवसे वीतिककंते जाव बारसाहदिवसे अयमेतारूवं गोण्णं गुणनिप्फन्नं नामधेज्जं करेति--जम्हा णं अम्हं इमे दारए गोबहुलस्स माहणस्स गोसालाए जाए तं होउ णं अम्हं इमस्स दारगस्स नामधेज्जं 'गोसाले, गोसाले'ति। तए णं तस्स दारगस्स अम्मापियरो नामधेज्जं करेति 'गोसाले'ति।

तए णं से गोसाले दारए उम्मुक्कबालभावे विण्णयपरिणतमेत्ते जोत्त्वणगमणुप्पत्ते सयमेव पाडिएक्कं चित्तफलगं करेति, सय० क० २ चित्तफलगहत्थगए मंखत्तणेणं अप्पाणं भावेमाणे विहरति।

**[६३९]**तेणं कालेणं तेणं समएणं अहं गोयमा! तीसं वासाइं अगारवासमज्झे वसित्ता अम्मा-पितीहिं देवते गतेहिं एवं जहा भावणाए जाव एगं देवदूसमुपादाय मुंडे भवित्ता अगारातो अणगारियं पच्चइए।

तए णं अहं गोतमा! पढमं वासं अद्धमासं अद्धमासेणं खममाणे अट्ठियगामं निस्साए पढमं अंतरवासं वासावासं उवागते। दोच्चं वासं मासंमासेणं खममाणे पुत्वाणुपुत्विं चरमाणे गामाणुगामं दूइज्जमाणे जेणेव रायगिहे नगरे जेणेव नालंदाबाहिरिया जेणेव तंतुवायसाला तेणेव उवागच्छामि, ते० उवा० २ अहापडिरूवं ओग्गहं ओगिण्हामि, अहा० ओ० २ तंतुवायसालाए एगदेसंसि वासवासं उवागते। तए णं अहं गोतमा! पढमं मासक्खमणं उवसंपज्जित्ताणं विहरामि।

तए णं से गोसाले मंखलिपुत्ते चित्तफलगहत्थगए मंखत्तणेण अप्पाणं भावेमाणे पुत्वाणुपुत्विं चरमाणे जाव दूइज्जमाणे जेणेव रायगिहे नगरे जेणेव नालंदाबाहिरिया जेणेव तंतुवायसाला तेणेव उवागच्छति, ते० उवा० २ तंतुवायसालाए एगदेसंसि भंडानिक्खेवं करेइ, भंडा० क० २ रायगिहे नगरे उच्च-नीय

जाव अन्नत्थ कत्थयि वसहिं अलभमाणे तीसे व तंतुवायसालाए एगदेसंसि वासावासं उवागते जत्थेव णं अहं गोयमा।।

तए णं अहं गोयमा! पढममासक्खमणपारणगंसि तंतुवायसालाओ पडिनिक्खमामि, तंतु० प० २ णालंदं बाहिरियं मज्झंमज्झेणं जेणेव रायगिहे नगरे तेणेव उवागच्छामि, ते० उवा० २ रायगिहे नगरे उच्च-नीय जाव अडमाणे विजयस्स गाहावतिस्स गिहं अणुप्पविट्ठे।

तए णं से विजये गाहावती ममं एज्जमाणं पासति, पा० २ हट्ठतुट्ठ० खिप्पामेव आसणाओ अब्भुट्ठेति, खि० अ० २ पादपीढाओ पच्चोरुभति, पाद० प० २ पाउयाओ ओमुयइ, पा० ओ० २ एगसाडियं उत्तरासंगं करेति, एग० क० २ अंजलिमउलियहत्थे ममं सत्तट्ठपयाइं अणुगच्छति, अ० २ ममं तिक्खुतो आदाहिणपदाहिणं करेति, क० २ ममं वंदति नमंसति, ममं वं० २ ममं विउलेणं असण-पाण-खाइम-साइमेणं 'पडिलाभेस्सामि' ति कट्ठु तुट्ठे, पडिलाभेमाणे वि तुट्ठे, पडिलाभिते वि तुट्ठे।

तए णं तस्स विजयस्स गाहावतिस्स तेणं दव्वसुद्धेणं दायगसुद्धेणं पडिगाहगसुद्धेणं तिविहेणं तिकरणसुद्धेणं दाणेणं मए पडिलाभिए समाणे देवाउए निबद्धे, संसारे परितीकते, गिहंसि य से इमाइं पंच दिव्वाइं पादुब्भूयाइं, तं जहा- वसुधारा वुट्ठा, दसद्धवण्णे कुसुमे निवातिते, चेलुक्खेवे कए, आहयाओ देवदुंदुभीओ, अंतरा वि य णं आगासे अहो! दाणे, अहो! दाणेति घुट्ठे।

तए णं रायगिहे नगरे सिंघाडग जाव पहेसु बहुजणो अन्नमन्नस्स एवमाइक्खति जाव एवं परूवेति--धन्ने णं देवाणुप्पिया! विजये गाहावती, कतत्थे णं देवाणुप्पिया! विजये गाहावती, कयपुन्ने णं देवाणुप्पिया! विजये गाहावती, कयलक्खणे णं देवाणुप्पिया! विजये गाहावती, कया णं लोया देवाणुप्पिया! विजयस्स गाहावतिस्स, सुलद्धे णं देवाणुप्पिया! माणुस्सए जम्मजीवियफले विजयस्स गाहावतिस्स, जस्स णं गिहंसि तहारूवे साधू साधुरूवे पडिलाभिए समाणे इमाइं पंच दिव्वाइं पादुब्भूयाइं, तं जहा--वसुधारा वुट्ठा जाव अहो दाणे घुट्ठे। तं धन्ने कयत्थे कयपुण्णे कयलक्खणे, कया णं लोया, सुलद्धे माणुस्सए जम्मजीवियफले विजयस्स गाहावतिस्स, विजयस्स गाहावतिस्स।

तए णं से गोसाले मंखलिपुते बहुजणस्स अंतियं एयमट्ठं सोच्चा निसम्म समुप्पन्नसंसए समुप्पन्नकोउहल्ले जेणेव विजयस्स गाहावतिस्स गिहंसि वसुधारं वुट्ठं, दसद्धवण्णं कुसुमं निवडियं। ममं च णं विजयस्स गाहावतिस्स गिहाओ पडिनिक्खममाणं पासति, पासिता हट्ठतुट्ठ० जेणेव ममं अंतियं तेणेव उवागच्छति, उवा० २ ममं तिक्खुतो आदाहिणपदाहिणं करेति, क० २ ममं वंदति नमंसति, वं० २ ममं एवं वयासी--तुब्भे णं भंते! ममं धम्मायरिया, अहं णं तुब्भं धम्मंतेवासी।

तए णं अहं गोयमा! गोसालस्स मंखलिपुतस्स एयमट्ठं नो आढामि, नो परिजाणामि, तुसिणीए संचिट्ठामि।

तए णं अहं गोयमा! रायगिहाओ नगराओ पडिनिक्खमामि, प०२ णालंदं बाहिरियं मज्झं मज्झेणं जेमेव तंतुवायसाला तेणेव उवागच्छामि, उवा० २ दोच्चं मासक्खमणं उवसंपज्जिताणं विहरामि।

तए णं अहं गोयमा! दोच्चमासक्खमणपारणगंसि तंतुवायसालाओ पडिनिक्खमामि, तं० प० २ नालंदं बाहिरियं मज्झंमज्झेणं जेणेव रायगिहे नगरे जाव अडमाणे आणंदस्स गाहावतिस्स गिहं अणुप्पविट्ठे।

तए णं से आणंदे गाहावती ममं एज्जमाणं पासति, एवं जहेव विजयस्स, नवरं ममं विउलाए

खज्जगविहीए 'पडिलाभेस्सामी'ति तुट्ठे। सेसं तं चेव जाव तच्चं मासक्खमणं उवसंपज्जिताणं विहरामि।

तए णं अहं गोतमा! तच्चमासक्खमणपारणगंसि तंतुवायसालाओ पडिनिक्खमामि, तं० प० २ तहेव जाव अडमाणे सुणंदस्स गाहावतिस्स गिहं अणुपविट्ठे।

तए णं से सुणंदे गाहावती०, एवं जहेव विजए गाहावती, नवरं ममं सच्चकामगुणिएणं भोयणेणं पडिलाभेति। सेसं तं चेव जाव चउत्थं मासक्खमणं उवसंपज्जिताणं विहरामि।

तीसे णं नालंदाए बाहिरियाए अदूरसामंते एत्थ णं कोल्लाए नामं सन्निवेसे होत्था। सन्निवेसवण्णओ।

तत्थ णं कोल्लाए सन्निवेसे बहुले नामं माहणे परिवसइ अड्ठे जाव अपरिभूए रिच्चेद जाव सुपरिनिट्ठिणं यावि होत्था।

तए णं से बहुले माहणे कतियचातुम्मसियपाडिवगंसि विउलेणं महु-घयसंजुतेणं परमन्नेणं माहणे आयामेत्था।

तए णं अहं गोयमा! चउत्थमासक्खमणपारणगंसि तंतुवायसालाओ पडिनिक्खमामि, तं० प० २ णालंदं बाहिरियं मज्झंमज्झेणं निग्गच्छामि, नि० २ जेणेव कोल्लाए सन्निवेसे तेणेव उवागच्छामि, ते० ३० २ कोल्लाए सन्निवेसे उच्च-नीय जाव अडमाणे बहुलस्स माहणस्स गिहं अणुप्पविट्ठे।

तए णं से बहुले माहणे ममं एज्जमाणं तहेव जाव ममं विउलेणं महु-घयसंजुतेणं परमन्नेणं 'पडिलाभेस्सामी'ति तुट्ठे। सेसं जहा विजयस्स जाव बहुलस्स माहणस्स, बहुलस्स माहणस्स।

तए णं से गोसाले मंखलिपुत्ते ममं तंतुवायसालाए अपासमाणे रायगिहे नगरे सब्भंतरबाहिरिए ममं सच्चओ समंता मग्गणगवेसणं करेइ। ममं कत्थति सुत्तिं वा खुत्तिं वा पवत्तिं वा अलभमाणे जेणेव तंतुवायसाला तेणेव उवागच्छति, उवा० २ साडियाओ य पाडियाओ य कुंडियाओ य पाहणाओ य चित्तफलगं च माहणे आयामेति, आ०२ सउत्तरोट्ठं भंडं कारेति, स० का० २ तंतुवायसालाओ पडिनिक्खमति, तं० प० २ णालंदं बाहिरियं मज्झंमज्झेणं निग्गच्छति, नि०२ जेणेव कोल्लागसन्निवेसे तेणेव उवागच्छइ।

तए णं तस्स कोल्लागस्स सन्निवेसस्स बहिया बहुजणो अन्नमन्नस्स एवमाइक्खति जाव परूवेति--धन्ने णं देवाणुप्पिया! बहुले माहणे, तं चेव जाव जीवियफले बहुलस्स माहणस्स, बहुलस्स माहणस्स।

तए णं तस्स गोसालस्स मंखलिपुत्तस्स बहुजणस्स अंतियं एयमट्ठं सोच्चा निसम्म अयमेयारूवे अज्झत्थिए जाव समुप्पज्जित्था-जारिसिया णं ममं धम्मयारियस्स धम्मोवदेसगस्स समणस्स भगवतो महावीरस्स इड्ढी जुती जसे बले वीरिए पुरिसक्कारपरक्कमे लद्धे पत्ते अभिसमन्नागए नो खलु अत्थि तारिसिया अन्नस्स कस्सइ तहारूवस्स समणस्स वा माहणस्स वा इड्ढी जुती जाव परक्कमे लद्धे पत्ते अभिसमन्नागते, तं निस्संदिद्धं णं 'एत्थं ममं धम्मयारिए धम्मोवएसए समणे भगवं महावीरे भविस्सति' ति कट्ठु कोल्लाए सन्निवेसे सब्भंतरबाहिरिए ममं सच्चओ समंता मग्गणगवेसणं करेति। ममं सच्चओ जाव करमाणे कोल्लागस्स सन्निवेसस्स बहिया पणियभूमीए मए सद्धिं अभिसमन्नागए।

तए णं से गोसाले मंखलिपुत्ते हट्ठतुट्ठ० ममं तिक्खुत्तो आयाहिणपयाहिणं जाव नमंसिता

एवं वदासी--'तुब्भे णं भंते! मम धम्मायरिया,अहं णं तुब्भं अंतेवासी।

तए णं अहं गोयमा! गोसालस्स मंखलिपुत्तस्स एयमट्ठं पडिसुणेमि।

तए णं अहं गोयमा! गोसालेणं मंखलिपुत्तेणं सद्धिं पणियभूमीए छव्वासाइं लाभं अलाभं सुखं दुक्खं सक्कारमसक्कारं पच्चणुभवमाणे अणिच्चजागरियं विहरित्था।

[६४०] तए णं अहं गोयमा! अन्नदा कदायि पढमसरदकालसमयंसि अप्पवुट्ठिकायंसि गोसालेणं मंखलिपुत्तेणं सद्धिं सिद्धत्थगामाओ नगराओ कुम्मग्गामं नगरं संपट्ठिए विहाराए। तस्स णं सिद्धत्थग्गामस्स नगरस्स कुम्मग्गामस्स नगरस्स य अंतरा एत्थ णं महं एगे तिलथंभए पत्तिए पुप्फिए हरियगरेरिज्जमाणे सिरीए अतीव अतीव उवसोभेमाणे उवसोभेमाणे चिट्ठति। तए णं से गोसाले मंखलिपुत्ते तं तिलथंभगं पासति, पा० २ ममं वंदति नमंसति, वं० २ एवं वदासी--एसं णं भंते! तिलथंभए किं निप्फज्जिस्सति, नो निप्फज्जिस्सति? एते य सत्त तिलपुप्फजीवा उद्दाइत्ता उद्दाइत्ता कहिं गच्छिहिंति? कहिं उववज्जिहिंति? तए णं अहं गोयमा! गोसालं मंखलिपुत्तं एवं वयासी--गोसाला! एसं णं तिलथंभए निप्फज्जिस्सति, नो न निप्फज्जिस्सइ; एए य सत्त तिलपुप्फजीवा उद्दाइत्ता उद्दाइत्ता एयस्स चेव तिलथंभगस्स एगाए तिलसंगलियाए सत्त तिला पच्चायाइस्सति।

तए णं से गोसाले मंखलिपुत्ते ममं एवं आइक्खमाणस्स एयमट्ठं नो सद्धति, नो पत्तियति, नो रोएइ; एतमट्ठं असद्धमाणे अपत्तियमाणे अरोएमाणे ममं पणिहाए 'अयं णं मिच्छावादी भवतु' ति कट्ठु ममं अंतियाओ सणियं सणियं पच्चोसक्कइ, स० प०२ जेणेव से तिलथंभए तेणेव उवागच्छति, उ०२ तं तिलथंभगं सलेट्ठुयायं चेव उप्पाडेइ, उ०२ एगंते एडेति, तक्खणमेत्तं च णं गोयमा! दिव्वे अब्भवद्दलए पाउब्भूए। तए णं से दिव्वे अब्भवद्दलए खिप्पामेव पतणतणाति, खिप्पा० प० २ खिप्पामेव पविज्जुयाति, खि० प०२ खिप्पामेव नच्चोदगं नातिमट्ठियं पविरलपप्फुसियं रयरेणुविणासणं दिव्वं सलिलोदगं वासं वासति जेणं से तिलथंभए आसत्थे पच्चायाते बद्धमूले तत्थेव पत्तिट्ठिए। ते य सत्त तिलपुप्फजीवा उद्दाइत्ता उद्दाइत्ता तस्सेव तिलथंभगस्स एगाए तिलसंगलियाए सत्त तिला पच्चायाता।

[६४१] तए णं अहं गोयमा! गोसालेणं मंखलिपुत्तेणं सद्धिं जेणेव कुम्मग्गामे नगरे तेणेव उवागच्छामि।

तए णं तस्स कुम्मग्गामस्स नगरस्स बहिया वेसियायणे नामं बालतवस्सी छट्ठंछट्ठेणं अणिक्खित्तेणं तवोकम्मणेणं उइढं बाहाओ पगिज्झिया पगिज्झिया सूराभिमुहे आयावणभूमीए आयावेमाणे विहरति, आदिच्चतेयतवियाओ य से छप्पदाओ सव्वओ समंता अभिनिस्सवंति, पाण-भूय-जीव-सत्तदयट्ठयाए च णं पडियाओ पडियाओ तत्थेव तत्थेव भुज्जो भुज्जो पच्चोरुभेति।

तए णं से गोसाले मंखलिपुत्ते वेसियायणं बालतवस्सिं पासति, पा०२ ममं अंतियाओ सणियं सणियं पच्चोसक्कति, ममं० प०२ जेणेव वेसियायणे बालतवस्सी तेणेव उवागच्छति, उवा० २ वेसियायणं बालतवस्सिं एवं वयासि--किं भवं मुणी मुणिए? उदाहु जूयासेज्जायरए? तए णं से वेसियायणे बालतवस्सी गोसालस्स मंखलिपुत्तस्स एयमट्ठं णो आढाति नो परिजाणति, तुसिणीए संचिट्ठति। तए णं से गोसाले मंखलिपुत्ते वेसियायणं बालतवस्सिं दोच्चं पि तच्चं पि एवं वयासी--किं भवं मुणी मुणिए जाव सेज्जायरए? तए णं से वेसियायणे बालतवस्सी गोसालेणं मंखलिपुत्तेणं दोच्चं पि तच्चं पि एवं वुत्ते समाणे आसुरुत्ते जाव मिसिमिसेमाणे आयावणभूमीओ पच्चोरुभति, आयावण० प० २ तेयासमुग्घाएणं समोहन्नति,

ते0स0२ सतट्ठपयाइं पच्चोसक्कति, स0 प0 २ गोसालस्स मंखलिपुत्तस्स वहाए सरीरगंसि तेयं निसिरति।

तए णं अहं गोयमा! गोसालस्स मंखलिपुत्तस्स अणुकंपणट्ठयाए वेसियायणस्स बालतवस्सिस्स तेयपडिसाहरणट्ठयाए एत्थ णं अंतरा सीयलियं तेयलेस्सं निसिरामि, जाए सा ममं सीयलियाए तेयलेस्साए वेसियायणस्स बालतवस्सिस्स उसुणा तेयलेस्सा पडिहया।

तए णं से वेसियायणे बालतवस्सी ममं सीयलियाए तेयलेस्साए साउसुणं तेयलेस्सं पडिहयं जाणिता गोसालस्स य मंखलिपुत्तस्स सरीरगस्स किंचि आबाहं वा वाबाहं वा छविच्छेदं वा अकीरमाणं पासिता साअं उसुणं तेयलेस्सं पडिसाहरति, साउसुणं तेयलेस्सं पडिसाहरिता ममं एवं वयासी--से गतमेयं भगवं!, गतगेतमयं भगवं!।

तए णं से गोसाले मंखलिपुत्ते ममं एवं वयासी--किं णं भंते! एस जूयासेज्जायरए तुब्भे एवं वदासी--से गयमेतं भगवं! गयगयमेतं! तए णं अहं गोयमा! गोसालं मंखलिपुत्तं एवं वदामि--"तुमं णं गोसाला! वेसियायणं बालतवस्सिं पाससि, पा0२ ममं अंतियातो सणियं सणियं पच्चोसक्कसि, प0 २ जेणेव वेसियायणे बालतवस्सी तेणेव उवागच्छसि, ते0 उ0 २ वेसियायणं बालतवस्सिं एवं वयासी--किं भवं मुणी मुणिए? उदाहु जूयासेज्जायरए? तए णं से वेसियायणे बालतवस्सी तव एयमट्ठं नो आढाति, नो परिजाणति, तुसिणीए संचिट्ठति। तए णं तुमं गोसाला! वेसियायणं बालतवस्सिं दोच्चं पि तच्चं पिए वं वयासी--किं भवं मुणी जाव सेज्जायरए? तए णं से वेसियायणे बालतवस्सी तुमं(?मे) दोच्चं पि तच्चं पि एवं वुत्ते समाणे आसुरुते जाव पच्चोसक्कति, प0 २ तव वहाए सरीरगंसि तेयं निसिरति। तए णं अहं गोसाला! तव अणुकंपणट्ठताए वेसियायणस्स बालतवस्सिस्स उसिणतेयपडिसाहरणट्ठयाए एत्थ णं अंतरा सीयलियं तेयलेस्सं निसिरामि जाव पडिहयं जाणिता तव य सरीरगस्स किंचि आबाहं वा वाबाहं वा छविच्छेदं वा अकीरमाणं पासिता सायं उसुणं तेयलेस्सं पडिसाहरति, सायं0 प0 २ ममं एवं वयासी--से गयमेयं भगवं!, गयगयमेयं भगवं!"।

तए णं से गोसाले मंखलिपुत्ते ममं अंतियाओ एयमट्ठं सोच्चा निसम्म भीए जाव

संजायभये ममं वंदति नमंसति, ममं वं0 २ एवं वयासी--कहं णं भंते! संखितविउलतेयलेस्से भवति? तए णं अहं गोयमा! गोसालं मंखलिपुत्तं एवं वदामि--जे णं गोसाला! एगाए सणहाए कुम्मासपिंडियाए एगेण य वियडासएणं छट्ठंछट्ठेणं अनिक्खितेणं तवोकम्मणं उड्ढं बाहाओ पगिज्झिय पगिज्झिय जाव विहरइ से णं अंतो छण्हं मासाणं संखितविउलतेयलेस्से भवति। तए णं से गोसाले मंखलिपुत्ते ममं एयमट्ठं सम्मं विणएणं पडिस्सुणेति।

**[६४२]** तए णं अहं गोयमा! अन्नदा कदायि गोसालेणं मंखलिपुत्तेणं सद्धिं कुम्मग्गामाओ नगराओ सिद्धत्थग्गामं नगरं संपत्थिए विहाराए। जाहे य मो तं देसं हव्वमागया जत्थ णं से तिलथंभए। तए णं से गोसाले मंखलिपुत्ते ममं एवं वदासि--"तुब्भे णं भंते! तदा ममं एवं आइक्खह जाव परूवेह- 'गोसाला! एस णं तिलथंभए निप्फज्जिस्सति, नो न निप्फ0, तं चेव जाव पच्चायाइस्संति' तं णं मिच्छा, इमं णं पच्चक्खमेव दीसति 'एस णं से तिलथंभए णो निप्फन्ने, अनिप्फन्नमेव; ते य सत्त तिलपुप्फजीवा उद्दाइता उद्दाइता नो एयस्स चेव तिलथंभगस्स एगाए तिलसंगलियाए सत्त तिला पच्चायाता"। तए णं अहं गोयमा! गोसालं मंखलिपुत्तं एवं वदामि--"तुमं णं गोसाला! तदा ममं एवं आइक्खमाणस्स जाव परूवेमाणस्स एयमट्ठं नो सदहसि, नो पतियसि, नो रोएसि, एयमट्ठं असद्धमाणे अपतियमाणे अरोएमाणे

ममं पणिहाए 'अयं णं मिच्छावादी भवतु'ति कट्पु ममं अंतियाओ सणियं सणियं पच्चोसक्कसि, प० २ जेणेव से तिलथंभए तेणेव उवागच्छसि, ३० २ जाव एगंतमंते एडेसि, तक्खणमेतं गोसाला! दिव्वे अब्भवद्दलए पाउब्भूते। तए णं से दिव्वे अब्भवद्दलए खिप्पामेव०, तं चेव जाव तस्स चेव तिलथंभगस्स एगाए तिलसंगलियाए सत्त तिला पच्चायाया। तं एस णं गोसाला! से तिलथंभए निप्फन्ने, णो अनिप्फन्नमेव, ते य सत्त तिलपुप्फजीवा उद्दाइत्ता उद्दाइत्ता एयस्स चेव तिलथंभगस्स एगाए तिलसंगलियाए सत्त तिला पच्चायाया। एवं खलु गोसाला! वणस्सतिकाइया पउट्परिहारं परिहरंति"।

तए णं से गोसाले मंखलिपुत्ते ममं एवमाइक्खमाणस्स जाव परूवेमाणस्स एयमट्ठं नो सद्वहति३। एतमट्ठं असद्वहमाणे जाव अरोयेमाणे जेणेव से तिलथंभए तेणेव उवागच्छति, ३०२ ततो तिलथंभयाओ तं तिलसंगलियं खुडति, खुडिता करतलंसि सत्त तिले पप्फोडेइ। तए णं तस्स गोसालस्स मंखलिपुत्तस्स ते सत्त तिले गणेमाणस्स अयमेयारूवे अज्झत्थिए जाव समुप्पज्जित्था-एवं खलु सच्चजीवा वि पउट्परिहारं परिहरंति'। एस णं गोयमा! गोसालस्स मंखलिपुत्तस्स पउट्पे। एस णं गोयमा! गोसालस्स मंखलिपुत्तस्स ममं अंतियाओ आयाए अवक्कमणे पन्नते।

**[६४३]** तए णं से गोसाले मंखलिपुत्ते एगाए सणहाए कुम्मासपिंडियाए एगेण य वियडासएणं छट्ठंछट्ठेणं अनिक्खित्तेणं तवोकम्मणेणं उड्ढं बाहाओ पगिज्झिय जाव विहरइ। तए णं से गोसाले मंखलिपुत्ते अंतो छण्हं मासाणं संखितविउलतेयलेस्से जाते।

**[६४४]** तए णं तस्स गोसालस्स मंखलिपुत्तस्स अन्नदा कदायि इमे छद्विसाचरा अंतियं पादुब्भवित्था, तं जहा--सोणे०, तं चेव सच्चं जाव अजिणे जिणसद्वं पगासेमाणे विहरति। तं नो खलु गोयमा! गोसाले मंखलिपुत्ते जिणे, जिणप्पलावी जाव जिणसद्वं पगासेमाणे विहरति। गोसाले णं मंखलिपुत्ते अजिणे जिणप्पलावी जाव पगासेमाणे विहरति।

तए णं सा महतिमहालिया महच्चपरिसा जहा सिवे जाव पडिगया।

तए णं सावत्थीए नगरीए सिंघाडग जाव बहुजणो अन्नमन्नस्स जाव परूवेइ--"जं णं देवाणुप्पिया! गोसाले मंखलिपुत्ते जिणे जिणप्पलावी जाव विहरति तं मिच्छा, समणे भगवं महावीरे एवं आइक्खति जाव परूवेति 'एवं खलु तस्स गोसालस्स मंखलिपुत्तस्स मंखली नामं मंखे पिता होत्था। तए णं तस्स मंखलिस्स०, एवं चेव सच्चं भाणितच्चं जाव अजिणे जिणसद्वं पकासेमाणे विहरति'। तं नो खलु गोसाले मंखलिपुत्ते जिणे जिणप्पलावी जाव विहरति, गोसाले णं मंखलिपुत्ते अजिणे जिणप्पलावी जाव विहरति। समणे भगवं महावीरे जिणे जिणप्पलावी जाव जिणसद्वं पगासेमाणे विहरति"।

तए णं से गोसाले मंखलिपुत्ते बहुजणस्स अंतियं एयमट्ठं सोच्चा निसम्म आसुरुत्ते जाव मिसिमिसेमाणे आतावणभूमितो पच्चोरुभति, आ० प० २ सावत्थिं नगरिं मज्झिमज्झेणं जेणेव हालाहलाए कुंभकारीए कुंभकारावणे तेणेव उवागच्छइ, ते० ३० २ हालाहलाए कुंभकारीए कुंभकारावणंसि आजीवियसंघसंपरिवुडे महता अमरिसं वहमाणे एवं वा वि विहरति।

**[६४५]** तेणं कालेणं तेणं समयेणं समणस्स भगवतो महावीरस्स अंतेवासी आणंदे नामं थेरे पगतिभद्वए जाव विणीए छट्ठंछट्ठेणं अणिक्खित्तेणं तवोकम्मणेणं संजमेणं तवसा अप्पाणं भावेमाणे विहरति। तए णं से आणंदे थेरे छट्ठक्खमणपारणगंसि पढमाए पोरिसीए एवं जहा गोयमसामी तहेव आपुच्छइ, तहेव जाव उच्च-नीय-मज्झिम जाव अडमाणे हालाहलाए कुंभकारीए कुंभकारावणस्स

अदूरसामंतेणं वीतीवयति।

तए णं से गोसाले मंखलिपुत्ते आणंदं थेरं हालाहलाए कुंभकारीए कुंभकारावणस्स अदूरसामंतेणं वीतीवयमाणं पासति, पासिता एवं वयासी--एहि ताव आणंदा! इओ एगं महं ओवमियं निसामेहि।

तए णं से आणंदे थेरे गोसालेणं मंखलिपुत्तेणं एवं वुत्ते समाणे जेणेव हालाहलाए कुंभकारीए कुंभकारावणे जेणेव गोसाले मंखलिपुत्ते तेणेव उवागच्छति।

तए णं से गोसाले मंखलिपुत्ते आणंदं थेरं एवं वदासी--

"एवं खलु आणंदा! इतो चिरातीयाए अद्दाए केयी उच्चावया वणिया अत्थत्थी अत्थलुद्धा अत्थगवेसी अत्थकंखिया अत्थपिवासा अत्थगवेसणयाए नाणाविहविठलपणियभंडमायाए सगडी-सागडेणं सुबहुं भत्त-पाणपत्थयणं गहाय एगं महं अगामियं अणोहियं छिन्नावायं दीहमद्धं अडविं अणुप्पविट्ठा।

"तए णं तेसिं वणियाणं तीसे अकामियाए अणोहियाए छिन्नावायाए दीहमद्धाए अडवीए कंचि देसं अणुप्पत्ताणं समाणाणं से पुव्वगहिए उदए अणुपुव्वेणं परिभुज्जमाणे परिभुज्जमाणे झीणे।

"तए णं ते वणिया झीणोदगा समाणा तण्हाए परिब्भवमाणा अन्नमन्नं सद्धान्ति, अन्न0 एवं वयासि--एवं खलु देवाणुप्पिया! अम्हं इमीसे अकामियाए जाव अडवीए कंचि देसं अणुप्पत्ताणं समाणाणं से पुव्वगहिते उदए अणुपुव्वेणं परिभुज्जमाणे परिभुज्जमाणे झीणे, तं सेयं खलु देवाणुप्पिया! अम्हं इमीसे अकामियाए जाव अडवीए उदगस्स सव्वतो समंता मग्गणगवेसणं करेतए"ति कट्टु अन्नमन्नस्स अंतियं एयमट्ठं पडिसुणेंति, अन्न0 पडि0 २ तीसे णं अगामियाए जाव अडवीए उदगस्स सव्वओ समंता मग्गणगवेसणं करेंति। उदगस्स सव्वतो समंता मग्गणगवेसणं करेमाणा एगं महं वणसंडं आसादेंति किण्हं किण्होभासं जाव निकुरंबभूयं पासादीयं जाव पडिरूवं। तस्स णं वणसंडस्स बहुमज्झदेसभाए एत्थ णं महेगं वम्मीयं आसादेंति। तस्स णं वम्मीयस्स चत्तारि वप्पूओ अब्भुग्गयाओ अभिनिसदाओ, तिरियं सुसंपग्गहिताओ, अहे पन्नगद्धरूवाओ पन्नगद्धसंठाणसंठियाओ पासादीयाओ जाव पडिरूवाओ।

"तए णं ते वणिया हट्ठतुट्ठ0 अन्नमन्नं सद्धान्ति, अन्न0 स0 २ एवं वयासी--एवं खलु देवाणुप्पिया! अम्हे इमीसे अकामियाए जाव सव्वतो समंता मग्गणगवेसणं करेमाणेहिं इमे वणसंडे आसादिते किण्हे किण्होभासे०, इमस्स णं वणसंडस्स बहुमज्झदेसभाए इमे वम्मीए आसादिए, इमस्स णं वम्मीयस्स चत्तारि वप्पूओ अब्भुग्गयाओ जाव पडिरूवाओ, तं सेयं खलु देवाणुप्पिया! अम्हं इमस्स वम्मीयस्स पढमं वपुं भिंदितए अवि या इंथ ओरालं उदगरयणं अस्सादेस्सामो"।

"तए णं ते वणिया अन्नमन्नस्स अंतियं एतमट्ठं पडिसुणेंति, अन्न0 प0 २ तस्स वम्मीयस्स पढमं वपुं भिंदंति, ते णं तत्थ अच्छं पत्थं जच्चं तणुयं फालियवण्णाभं ओरालं उदगरयणं आसादेंति।

"तए णं ते वणिया हट्ठतुट्ठ० पाणियं पिबंति, पा0 पि0२ वाहणाइं पज्जंति, वा0 प0 २ भायणाइं भरेंति, भा0 भ0 २ दोच्चं पि अन्नमन्नं एवं वदासी-एवं खलु देवाणुप्पिया! अम्हेहिं इमस्स वम्मीयस्स पढमाए वपूए भिन्नाए ओराले उदगरयणे अस्सादिए, तं सेयं खलु देवाणुप्पिया! अम्हं इमस्स वम्मीयस्स दोच्चं पि वपुं भिंदितए, अवि या इंथ ओरालं सुवण्णरयणं अस्सादेस्सामो।

"तए णं ते वणिया अन्नमन्नस्स अंतियं एयमट्ठं पडिस्सुणेंति, अन्न० प० २ तस्स वम्मीयस्स दोच्चं पि वपुं भिंदंति। ते णं तत्थ अच्छं जच्चं तावणिज्जं महत्थं महग्घं महरिहं ओरालं सुवण्णरयणं अस्सादेति।

"तए णं ते वणिया हट्ठतुट्ठ० भायणाइं भरेति, भा० भ० २ पवहणाइं भरेति, प० भ० २ तच्चं पि अन्नमन्नं एवं वदासि--एवं खलु देवाणुप्पिया! अम्हे इमस्स वम्मीयस्स पढमाए वपूए भिन्नाए ओराले उदगरयणे अस्सादिए, दोच्चाए वपूए भिन्नाए ओराले सुवण्णरयणे अस्सादिए तं सेयं खलु देवाणुप्पिया! अम्हं इमस्स वम्मीयस्स तच्चं पि वपुं भिंदित्तए, अवि या इंथ ओरालं मणिरयणं अस्सादेस्सामो।

तए णं ते वणिया अन्नमन्नस्स अंतियं एतमट्ठं पडिस्सुणेंति, अन्न० प० २ तस्स वंमियस्स तच्चं पि वपुं भिंदंति। ते णं तत्थ विमलं निम्मलं नित्तलं निक्कलं महत्थं महग्घं महरिहं ओरालं मणिरयणं अस्सादेति।

"तए णं ते वणिया हट्ठतुट्ठ० भायणाइं भरेति, भा० भ० २ पवहणाइं भरेति, प० भ० २ चउत्थं पि अन्नमन्नं एवं वदासी-एवं खलु देवाणुप्पिया! अम्हे इमस्स वम्मीयस्स पढमाए वपूए भिन्नाए ओराले उदगरयणे अस्सादिए, दोच्चाए वपूए भिन्नाए ओराले सुवण्णरयणे अस्सादिए, तच्चाए वपूए भिन्नाए ओराले मणिरयणे अस्सादिए, तं सेयं खलु देवाणुप्पिया! अम्हं इमस्स वम्मीयस्स चउत्थं पि वपुं भिंदित्तए, अवि या इंथ उतमं महग्घं महरिहं ओरालं वइररतणं अस्सादेस्सामो।

"तए णं तेसिं वणियाणं एगे वणिए हियकामए सुहकामए पत्थकामए आणुकंपिए निस्सेसिए हिय-सुह-निस्सेसकामए ते वणिए एवं वयासी-एवं खलु देवाणुप्पिया! अम्हे इमस्स वम्मीयस्स पढमाए वपूए भिन्नाए ओराले उदगरयणे जाव तच्चाए वपूए भिन्नाए ओराले मणिरयणे अस्सादिए, तं होउ अलाहि पज्जतं णे, एसा चउत्थी वपू मा भिज्जउ, चउत्थी णं वपू सउवसग्गा यावि होज्जा।

"तए णं ते वणिया तस्स वणियस्स हियकामगस्स सुहकाम० जाव हिय-सुह-निस्सेसकामगस्स एवमाइक्खमाणस्स जाव परूवेमाणस्स एतमट्ठं नो सद्धंति जाव नो रोयेंति, एतमट्ठं असद्धहमाणा जाव अरोयेमाणा तस्स वम्मीयस्स चउत्थं पि वपुं भिंदंति, ते णं तत्थ उग्गविसं चंडविसं घोरविसं महाविसं अतिकायमहाकायं मसि-मूसाकालगं नयणविसरोसपुण्णं अंजणपुंजनिगरप्पगासं रत्तच्छं जमलजुवलचंचलचलंतजीहं धरणितलवेणिभूयं उक्कडफुडकुडिलजडुलकक्खडविकडफडाडोवकरणदच्छं लोहागरधम्ममाणधमधमेंतघोसं अणागलियचंडतिव्वरोसं समुहिं तुरियं चवलं धमंतं दिट्ठीविसं सप्पं संघट्ठोति। तए णं से दिट्ठीविसे सप्पे तेहिं वणिएहिं संघट्ठिए समाणे आसुरुते जाव मिसिमिसेमाणे सणियं सणियं उट्ठेति, उ० २ सरसरसरस्स वम्मीयस्स सिहरतलं द्रुहति, सर० दु० २ आदिच्चं णिज्जाति, आ० णि० २ ते वणिए अणिमिसाए दिट्ठीए सव्वतो समंता समभिलोएति। तए णं ते वणिया तेणं दिट्ठीविसेणं सप्पेणं अणिमिसाए दिट्ठीए सव्वओ समंता समभिलोइया समाणा खिप्पामेव सभंडमतोवकरणमाया एगाहच्चं कूडाहच्चं भासरासीकया यावि होत्था। तत्थ णं जे से वणिए तेसिं वणियाणं हियकामए जाव हिय-सुह-निस्सेसकामए से णं आणुकंपिताए देवयाए सभंडमतोवकरणमायाए नियगं नगरं साहिए।

"एवामेव आणंदा! तव वि धम्मायरिएणं धम्मोवएसएणं समणेणं नायपुत्तेणं ओराले परियाए अस्सादि, ओराला कित्ति-वण्ण-सद्ध-सिलोगा सदेवमणुयासुरे लोए पुवंति गुवंति तुवंति इति खलु समणे

भगवं महावीरे, इति खलु समणे भगवं महावीरे। तं जदि मे से अज्ज किंचि वदति तो णं तवेणं तेएणं एगाहच्चं कूडाहच्चं भासरासिं करेमि जहा वा वालेणं ते वणिया। तुमं च णं आणंदा! सारक्खामि संगोवामि जहा वा से वणिए तेसिं वणियाणं हितकामए जाव निस्सेसकामए आणुकंपियाए देवयाए सभंडमतोवगरण० जाव साहिए। तं गच्छ णं तुमं आणंदा! तव धम्मयारियस्स धम्मोवदेसगस्स समणस्स णातपुत्तस्स एयमट्ठं परिकहेहि।"

तए णं से आणंदे थेरे गोसालेणं मंखलिपुत्तेणं एवं वुत्ते समाणे भीए जाव संजायभये गोसालस्स मंखलिपुत्तस्स अंतियाओ हालाहलाए कुंभकारीए कुंभकारावणाओ पडिनिक्खमति, प० २ सिग्घं तुरियं ५ सावत्थिं नगरिं मज्झिमज्झेणं निग्गच्छइ, नि० २ जेणेव कोट्ठए चेतिए जेणेव समणे भगवं महावीरे तेणेव उवागच्छइ, उवा० २ समणं भगवं महावीरं तिकखुत्तो आयाहिणपयाहिणं करेति, क० २ वंदति नमंसति, वं० २ एवं वयासी--"एवं खलु अहं भंते! छट्ठक्खमणपारणगंसि तुब्भेहिं अब्भणुण्णाए समाणे सावत्थीए नगरीए उच्च-नीय जाव अडमाणे हालाहलाए कुंभकारीए जाव वीयीवयामि। तए णं से गोसाले मंखलिपुत्ते ममं हालाहलाए जाव पासिता एवं वदासि--एहि ताव आणंदा! इओ एगं महं ओवमियं निसामेहि। तए णं अहं गोसालेणं मंखलिपुत्तेणं एवं वुत्ते समाणे जेणेव हालाहलाए कुंभकारीए कुंभकारावणे जेणेव गोसाले मंखलिपुत्ते तेणेव उवागच्छामि। तए णं से गोसाले मंखलिपुत्ते ममं एवं वयासी--"एवं खलु आणंदा! इतो चिरातीआए अद्वाए केयि उच्चावया वणिया०, एवं तं चेव जाव सव्वं निरवसेसं भाणियव्वं जाव नियगनगरं साहिए। तं गच्छ णं तुमं आणंदा! तव धम्मयारियस्स धम्मोव० जाव परिकहेहि।"

**[६४६]** तं पभू णं भंते! गोसाले मंखलिपुत्ते तवेणं तेएणं एगाहच्चं कूडाहच्चं भासरासिं करेतए? विसए णं भंते! गोसालस्स मंखलिपुत्तस्स जाव करेतए? समत्थे णं भंते! गोसाले जाव करेतए?" "पभू णं आणंदा! गोसाले मंखलिपुत्ते तवेणं जाव करेतए, विसए णं आणंदा! गोसालस्स जाव करेतए, समत्थे णं आणंदा! गोसाले जाव करेतए। नो चेव णं अरहंते भगवंते, पारितावणियं पुण करेज्जा।

जावतिए णं आणंदा! गोसालस्स मंखलिपुत्तस्स तवतेए एत्तो अणंतगुणविसिट्ठयराए चेव तवतेए अणगाराणं भगवंताणं, खंतिखमा पुण अणगारा भगवंतो। जावइए णं आणंदा! अणगाराणं भगवंताणं तवतेए एत्तो अणंतगुणविसिट्ठयराए चेव तवतेए थेराणं भगवंताणं, खंतिखमा पुण थेरा भगवंतो। जावतिए णं आणंदा! थेराणं भगवंताणं तवतेए एत्तो अणंतगुणविसिट्ठयराए चेव तवतेए अरहंताणं भगवंताणं, खंतिखमा पुण अरहंता भगवंतो। तं पभू णं आणंदा! गोसाले मंखलिपुत्ते तवेणं तेयेणं जाव करेतए, विसए णं आणंदा! जाव करेतए, समत्थे णं आणंदा! जाव करेतए; नो चेव णं अरहंते भगवंते, पारियावणियं पुण करेज्जा।

**[६४७]** तं गच्छ णं तुमं आणंदा! गोयमाईणं समणाणं निग्गंथाणं एयमट्ठं परिकहेहि--मा णं अज्जो! तुब्भं केयि गोसालं मंखलिपुत्तं धम्मियाए पडिचोयणाए पडिचोएतु, धम्मियाए पडिसारणाए पडिसारेउ, धम्मिएणं पडोयारेणं पडोयारेउ। गोसाले णं मंखलिपुत्ते समणेहिं निग्गंथेहिं मिच्छं विप्पडिवन्ने"।

तए णं से आणंदे थेरे समणेणं भगवता महावीरेणं एवं वुत्ते समाणे समणं भगवं महावीरं वंदति नमंसति, वं० २ जेणेव गोयमादी समणा निग्गंथा तेणेव उवागच्छति, ते० उवागच्छिता गोतमादी समणे निग्गंथे आमंतेति, आ० २ एवं वयासि-एवं खलु अज्जो! छट्ठक्खमणपारणगंसि समणेणं भगवया महावीरेणं अब्भणुण्णाए समाणे सावत्थीए नगरीएउच्च-नीय०, तं चेव सव्वं जाव नायपुत्तस्स एयमट्ठं परिकहेहि०, तं

[? चेव जाव] मा णं अज्जो! तुब्भं केयि गोसालं मंखलिपुत्तं धम्मियाए पडिचोयणाए पडिचोएउ जाव मिच्छं विप्पडिवन्ने।

[६४८] जावं च णं आणंदे थेरे गोयमाईणं समणाणं निग्गंथाणं एयमट्ठं परिकहेति तावं च णं से गोसाले मंखलिपुत्ते हालाहलाए कुंभकारीए कुंभकारावणाओ पडिनिक्खमति, पडि० २ आजीविय-संघसंपरिवुडे महया अमरिसं वहमाणे सिग्घं तुरियं जाव सावत्थिं नगरिं मज्झंमज्झेणं निग्गच्छति, नि० २ जेणेव कोट्ठए चेतिए जेणेव समणे भगवं महावीरे तेणेव उवागच्छति, ते० ३० २ समणस्स भगवतो महावीरस्स अदूरसामंते ठिच्चा समणं भगवं महावीरं एवं वदासी--

"सुट्ठु णं आउसो! कासवा! ममं एवं वदासी, साहु णं आउसो! कासवा! ममं एवं वदासी-- 'गोसाले मंखलिपुत्ते ममं धम्मंतेवासी, गोसाले मंखलिपुत्ते ममं धम्मंतेवासी'। जे णं से गोसाले मंखलिपुत्ते तव धम्मंतेवासी से णं सुक्के सुक्काभिजाइए भविता कालमासे कालं किच्चा अन्नयरेसु देवलोएसु देवताए उववन्ने। अहं णं उदाई नामं कंडियायणिए अज्जुणस्स गोयमपुत्तस्स सरीरगं विप्पजहामि, अज्जु० विप्प० २ गोसालस्स मंखलिपुत्तस्स सरीरगं अणुप्पविसामि, गो० अणु० २ इमं सतमं पउट्ठपरिहारं परिहरामि।

"जे वि याइं आउसो! कासवा! अम्हं समयंसि केयि सिज्झंसु वा सिज्झंति वा सिज्झस्संति वा सव्वे ते चउरासीतिं महाकप्पसयसहस्साइं सत्त दिव्वे सत्त संजूहे सत्त सन्निगब्भे सत्त पउट्ठपरिहारे पंच कम्मणि सयसहस्साइं सट्ठिं च सहस्साइं छच्च सए तिण्णि य कम्मंसे अणुपुव्वेणं खवइता तओ पच्छा सिज्झंति, बुज्झंति, मुच्चंति, परिनिव्वाइंति सव्वदुक्खाणमंतं करैसु वा, करैति वा, करिस्संति वा।

"से जहा वा गंगा महानदी जतो पवूढा, जहिं वा पज्जुवत्थिता, एस णं अद्दा पंच जोयणसताइं आयामेणं, अद्धजोयणं विक्खंभेणं, पंच धणुसयाइं ओवेहेणं, एएणं गंगापमाणेणं सत्त गंगाओ सा एगा महागंगा, सत्त महागंगाओ सा एगा साईणगंगा, सत्त सादीणगंगाओ सा एगा मड्डगंगा, सत्त मड्डगंगाओ सा एगा लोहियगंगा, सत्त लोहियगंगाओ सा एगा आवतीगंगा, सत्त आवतीगंगाओ सा एगा परमावती, एवामेव सपुव्वावरेणं एणं गंगासयसहस्सं सत्तरस य सहस्सा छच्च अगुणपन्नं गंगासता भवंतीति मक्खाया। तासिं दुविहे उद्धारे पन्नते, तं जहा--सुहुमबोदिकलेवरे चेव, बादरबोदिकलेवरे चेव। तत्थ णं जे से सुहुमबोदिकलेवरे से ठप्पे। तत्थ णं जे से बादरबोदिकलेवरे ततो णं वाससते गते वाससते गते एगमेणं गंगावालुयं अवहाय जावतिएणं कालेणं से कोट्ठे खीणे णीरए निल्लेवे निट्ठिए भवति से तं सरे सरप्पमाणे।

एएणं सरप्पमाणेणं तिण्णि सरसयसाहस्सीओ से एगे महाकप्पे। चउरासीतिं महाकप्पसयसहस्साइं से एगे महामाणसे। अणंतातो संजूहातो जीवे चयं चयिता उवरिल्ले माणसे संजूहे देवे उववज्जति। से णं तत्थ दिव्वाइं भोगभोगाइं भुंजमाणे विहरइ, विहरिता ताओ देवलोगाओ आउक्खएणं भवक्खएणं ठित्ठिक्खएणं अणंतरं चयं चयिता पढमे सन्निगब्भे जीवे पच्चायाति। से णं तओहिंतो अणंतरं उव्वट्ठिता मज्झल्ले माणसे संजूहे देवे उववज्जइ। से णं तत्थ दिव्वाइं भोगभोगाइं जाव विहरिता ताओ देवलोगाओ आयु० जाव चइता दोच्चे सन्निगब्भे जीवे पच्चायाति। से णं ततोहिंतो अणंतरं उव्वट्ठिता हेट्ठिल्ले माणसे संजूहे देवे उववज्जइ। से णं तत्थ दिव्वाइं जाव चइता तच्चे सन्निगब्भे जीवे पच्चायाति। से णं तओहिंतो जाव उव्वट्ठिता उवरिल्लेमाणुसुत्तरे संजूहे देवे उववज्जति। से णं तत्थ

दिव्वाइं भोग० जाव चइता चतुत्थे सन्निगब्भे जीवे पच्चायाति। से णं तओहिंतो अणंतरं उव्वट्ठिता मज्झिंल्ले माणुसुतरे संजूहे देवे उव्वज्जति।

से णं तत्थ दिव्वाइं भोग० जाव चइता पंचमे सण्णिगब्भे जीवे पच्चायाति। से णं तओहिंतो अणंतरं उव्वट्ठिता हिट्ठिल्ले माणुसुतरे संजूहे देवे उव्वज्जति।

से णं तत्थ दिव्वाइं भोग० जाव चइता छट्ठे सण्णिगब्भे जीवे पच्चायाति।

से णं तओहिंतो अणंतरं उव्वट्ठिता बंभलोगे नामं से कप्पे पन्नते पाईणपडीणायते उदीणदाहिणवित्थिण्णे जहा ठाणपदे जाव पंच वडंसया पन्नता, तं जहा- असोगवडंसए जाव पडिरूवा। से णं तत्थ देवे उव्वज्जति।

से णं तत्थ दस सागरोवमाइं दिव्वाइं भोग० जाव चइता सत्तमे सन्निगब्भे जीवे पच्चायाति। से णं तत्थ नवण्हं मासाणं बहुपडिपुण्णाणं अद्धट्ठमाण जाव वीतिक्कंताणं सुकुमालगभद्वलए मिदुकुंडलकुंचियकेसए मट्ठगंडयलकण्णपीढए देवकुमारसप्पभए दारए पयाति से णं अहं कासवा!।

"तए णं अहं आउसो! कासवा! कोमारियपव्वज्जाए कोमारएणं बंभचेरवासेणं अविद्धकन्नए चेव संखाणं पडिलभामि, संखाणं पडिलभिता इमे सत पउट्ठपरिहारे परिहरामि, तंजहा- एणेज्जगस्स, मल्लरामगस्स, मंडियस्स, राहस्स, भारद्वाइस्स, अज्जुणगस्स गोतमपुत्तस्स, गोसालस्स मंखलिपुत्तस्स ।

"तत्थ णं जे से पढमे पउट्ठपरिहारे से णं रायगिहस्स नगरस्स बहिया मंडियकुच्छिसि चेतियंसि उदायिस्स कंडियायणियस्स सरीरगं विप्पजहामि, उदा० सरीरगं विप्पजहिता एणेज्जगस्स सरीरगं अणुप्पविसामि। एणेज्जगस्स सरीरगं अणुप्पविसिता बावीसं वासाइं पढमं पउट्ठपरिहारं परिहरामि।

"तत्थ णं जे से दोच्चे पउट्ठपरिहारे से णं उद्धंडपुरस्स नगरस्स बहिया चंदोयरणंसि चेतियंसि एणेज्जगस्स सरीरगं विप्पजहामि, एणेज्जगस्स सरीरगं विप्पजहिता मल्लरामगस्स सरीरगं अणुप्पविसामि; मल्लरामगस्स सरीरगं अणुप्पविसिता एककवीसं वासाइं दोच्चं पउट्ठपरिहारं परिहरामि।

"तत्थ णं जे से तच्चे पउट्ठपरिहारे से णं चंपाए नगरीए बहिया अंगमंदिरंसि चेतियंसि मल्लरामगस्स सरीरगं विप्पजहामि; मल्लरामगस्स सरीरगं विप्पजहिता मंडियस्स सरीरगं अणुप्पविसामि, मंडियस्स सरीरगं अणुप्पविसिता वीसं वासाइं तच्चं चउट्ठपरिहारं परिहरामि।

तत्थ णं जे से चउत्थे पउट्ठपरिहारे से णं वाणारसीए नगरीए बहिया काममहावणंसि चेतियंसि मंडियस्स सरीरगं विप्पजहामि, मंडियस्स सरीरगं विप्पजहिता राहस्स सरीरगं अणुप्पविसामि; राहस्स सरीरगं अणुप्पविसिता एककूणवीसं वासाइं चउत्थं पउट्ठपरिहारं परिहरामि।

तत्थ णं जे से पंचमे पउट्ठपरिहारे से णं आलभियाए नगरीए बहिया पत्तकालगंसि चेतियंसि राहस्स सरीरगं विप्पजहामि, राहस्स सरीरगं विप्पजहिता भारद्वाइस्स सरीरगं अणुप्पविसामि, भारद्वाइस्स सरीरगं अणुप्पविसिता अट्ठारस वासाइं पंचमं पउट्ठपरिहारं परिहरामि।

तत्थ णं जे से छट्ठे पउट्ठपरिहारे से णं वेसालीए नगरीए बहिया कंडियायणियंसि चेतियंसि भारद्वाइयस्स सरीरगं विप्पजहामि, भारद्वाइयस्स सरीरगं विप्पजहिता अज्जुणगस्स गोयमपुत्तस्स सरीरगं अणुप्पविसामि, अज्जुणगस्स० सरीरगं अणुप्पविसिता सत्तरस वासाइं छट्ठं पउट्ठपरिहारं परिहरामि।

तत्थ णं जे से सत्तमे पउट्ठपरिहारे से णं इहेव सावत्थीए नगरीए हालाहलाए कुंभकारीए

कुंभकारावणंसि अज्जुणगस्स गोयमपुत्तस्स सरीरगं विप्पजहामि, अज्जुणयस्स० सरीरगं विप्पजहिता गोसालस्स मंखलिपुत्तस्स सरीरगं अलं थिरं धुवं धारणिज्जं सीयसहं उण्हसहं खुहासहं विविहदंस-मसगपरीसहोवसग्गसहं थिरसंघयणं ति कट्पु तं अणुप्पविसामि, तं अणुप्पविसिता सोलस वासाइं इमं सत्तमं पउट्ठपरिहारं परिहरामि।

एवामेव आउसो! कासवा! एणं तेत्तीसेणं वाससएणं सत्त पउट्ठपरिहारा परिहरिया भवंतीति मक्खाता। तं सुट्ठु णं आउसो! कासवा! ममं एवं वदासि, साधु णं आउसो! कासवा! ममं एवं वदासि 'गोसाले मंखलिपुत्ते ममं धम्मंतेवासी, गोसाले मंखलिपुत्ते ममं धम्मंतेवासि'ति।"

[६४९] तए णं समणे भगवं महावीरे गोसालं मंखलिपुत्तं एवं वदासि- गोसाला! से जहानामए तेणए सिया, गामेल्लएहिं परब्भमाणे परब्भमाणे कत्थयि गइडं वा दरिं वा दुग्गं वा णिण्णं वा पव्वयं वा विसमं वा अणस्सादेमाणे एणेणं महं उण्णालोमेण वा सणलोमेण वा कप्पासपोम्हेण वा तणसूएण वा अत्ताणं आवरेत्ताणं चिट्ठेज्जा, से णं अणावरिए आवरियमिति अप्पाणं मन्नति, अप्पच्छन्ने पच्छन्नमिति अप्पाणं मन्नति, अणिलुक्के णिलुक्कमिति अप्पाणं मन्नति, अपलाए पलायमिति अप्पाणं मन्नति, एवामेव तुमं पि गोसाला! अणन्ने संते अन्नमिति अप्पाणं उवलभसि, तं मा एवं गोसाला!, नारिहसि गोसाला!, सच्चेव ते सा छाया, नो अन्ना।

[६५०] तए णं से गोसाले मंखलिपुत्ते समणेणं भगवया महावीरेणं एवं वुत्ते समाणे आसुरुते ५ समणं भगवं महावीरं उच्चावयाहिं आओसणाहिं आओसति, उच्चा० आओ० २ उच्चावयाहिं उद्धंसणाहिं उद्धंसति, उच्चा० उ० २ उच्चावयाहिं निब्भच्छणाहिं निब्भच्छेति, उच्चा० नि० २ उच्चावयाहिं निच्छोडणाहिं निच्छोडेति, उच्चा० नि० २ एवं वदासि--नट्ठे सि कदायि, विणट्ठे सि कदायि, भट्ठे सि कदायि, नट्ठविणट्ठभट्ठे सि कदायि, अज्ज न भवसि, ना हि ते ममाहिंतो सुहमत्थि।

[६५१] तेणं कालेण तेणं समएणं समणस्स भगवओ महावीरस्स अंतेवासी पायीणजाणवए सव्वाणुभूती णामं अणगारे पगतिभद्दए जाव विणीए धम्मायरियाणुरागेणं एयमट्ठं असद्दहमाणे उट्ठाए उट्ठेति, उ० २ जेणेव गोसाले मंखलिपुत्ते तेणेव उवागच्छइ, उवा० २ गोसालं मंखलिपुत्तं एवं वयासि--जे वि ताव गोसाला! तहारूवस्स समणस्स वा माहणस्स वा अंतियं एगमवि आरियं धम्मियं सुवयणं निसामेति से वि ताव तं वंदति नमंसति जाव कल्लाणं मंगलं देवयं चेतियं पज्जुवासति, किमंग पुण तुमं गोसाला! भगवया चेव पव्वाविए, भगवया चेव मुंडाविए, भगवया चेव सेहाविए, भगवया चेव सिक्खाविए, भगवया चेव बहुस्सुतीकते, भगवओ चेव मिच्छं विप्पडिवन्ने, तं मा एवं गोसाला!, नारिहसि गोसाला!, सच्चेव ते सा छाया, नो अन्ना।

तए णं से गोसाले मंखलिपुत्ते सव्वाणुभूइणा अणगारेणं एवं वुत्ते समाणे आसुरुते सव्वाणुभूतिं अणगारं तवेणं तेएणं एगाहच्चं कूडाहच्चं भासरासिं करेति।

तए णं से गोसाले मंखलिपुत्ते सव्वाणुभूइं अणगारं तवेणं तेएणं एगाहच्चं जाव भासरासिं करेता दोच्चं पि समणं भगवं महावीरं उच्चावयाहिं आओसणाहिं आओसइ जाव सुहमत्थि।

तेणं कालेणं तेणं समएणं समणस्स भगवतो महावीरस्स अंतेवासी कोसलजाणवए सुनक्खते नामं अणगारे पगतिभद्दए जाव विणीए धम्मायरियाणुरागेणं जहा सव्वाणुभूती तहेव जाव सच्चेव ते सा छाया, नो अन्ना।

तए णं से गोसाले मंखलिपुत्ते सुनक्खत्तेणं अणगारेणं एवं वुत्ते समाणे आसुरुत्ते ५ सुनक्खत्तं अणगारं तवेणं तेएणं परितावेति। तए णं से सुनक्खत्ते अणगारे गोसालेणं मंखलिपुत्तेणं तवेणं तेएणं परिताविए समाणे जेणेव समणे भगवं महावीरे तेणेव उवागच्छइ, उवा० २ समणं भगवं महावीरं तिक्खुत्तो वंदति नमंसति, वं० २ सयमेव पंच महव्वयाइं आरुभेति, स० आ० २ समणा य समणीओ य खामेति, सम० खा० २ आलोइयपडिक्कंते समाहिपत्ते आणुपुट्ठीए कालगते।

तए णं से गोसाले मंखलिपुत्ते सुनक्खत्तं अणगारं तवेणं तेयेणं परितावेत्ता तच्चं पि समणं भगवं महावीरं उच्चावयाहिं आओसणाहिं आओसति सच्चं तं चेव जाव सुहमत्थि।

तए णं समणे भगवं महावीरे गोसालं मंखलिपुत्तं एवं वयासि-जे वि ताव गोसाला! तहारूवस्स समणस्स वा माहणस्स०, वा तं चेव जाव पज्जुवासति, किमंग पुण गोसाला! तुमं मए चेव पट्ठाविए जाव मए चेव बहुस्सुतीकते ममं चेव मिच्छं विप्पडिवन्ने?, तं मा एवं गोसाला! जाव नो अन्ना।

तए णं से गोसाले मंखलिपुत्ते समणेणं भगवता महावीरेणं एवं वुत्ते समाणे आसुरुत्ते ५ तेयासमुग्घातेणं समोहन्नइ, तेया० स० २ सत्तठपयाइं पच्चोसक्कइ, स० प० २ समणस्स भगवतो महावीरस्स वहाए सरीरगंसि तेयं निसिरति। से जहानामए वाउक्कलिया इ वा वायमंडलिया इ वा सेलंसि वा कुडंसि वा थंभंसि वा थूभंसि वा आवारिज्जमाणी वा निवारिज्जमाणी वा सा णं तत्थ णो कमति, नो पक्कमति, एवामेव गोसालस्स वि मंखलिपुत्तस्स तवे तेये समणस्स भगवतो महावीरस्स वहाए सरीरगंसि निसिट्ठे समाणे से णं तत्थ नो कमति, नो पक्कमति, अंचिअंचिं करेति, अंचि० क० २ आदाहिणपयाहिणं करेति, आ० क० २ उइं वेहासं उप्पतिए। से णं तओ पडिहए पडिनियत्तमाणे तमेव गोसालस्स मंखलिपुत्तस्स सरीरगं अणुडहमाणे अणुडहमाणे अंतो अंतो अणुप्पविट्ठे।

तए णं से गोसाले मंखलिपुत्ते सएणं तेयेणं अन्नाइट्ठे समाणे समणं भगवं महावीरं एवं वदासि--तुमं णं आउसो! कासवा! मम तवेणं तेएणं अन्नाइट्ठे समाणे अंतो छण्हं मासाणं पित्तज्जरपरिगयसरीरे दाहवक्कंतीए छउमत्थे चेव कालं करेस्ससि।

तए णं समणे भगवं महावीरे गोसालं मंखलिपुत्तं एवं वदासि-नो खलु अहं गोसाला! तव तवेणं तेयेणं अन्नाइट्ठे समाणे अंतो छण्हं जाव कालं करेस्सामि, अहं णं अन्नाइं सोलस वासाइं जिणे सुहत्थी विहरिस्सामि। तुमं णं गोसाला! अप्पणा चेव सएणं तेयेणं अन्नाइट्ठे समाणे अंतो सत्तरत्तस्स पित्तज्जरपरिगयसरीरे जाव छउमत्थे चेव कालं करेस्ससि।

तए णं सावत्थीए नगरीए सिंघाडग जाव पहेसु बहुजणो अन्नमन्नस्स एवमाइक्खइ जाव एवं परूवेति--एवं खलु देवाणुप्पिया! सावत्थीए नगरीए बहिया कोट्ठए चेतिए दुवे जिणा संलव्वेति, एगे वदति--तुमं पुट्ठिं कालं करेस्ससि, एगे वदति तुमं पुट्ठिं कालं करेस्ससि, तत्थ णं के सम्मावादी, के मिच्छावादी? तत्थ णं जे से अहप्पहाणे जणे से वदति--समणे भगवं महावीरे सम्मावादी, गोसाले मंखलिपुत्ते मिच्छावादी।

अज्जो!' ति समणे भगवं महावीरे समणे निग्गंथे आमंतेत्ता एवं वयासि--अज्जो! से जहानामए तणरासी ति वा कट्ठरासी ति वा पत्तरासी ति वा तयारासी ति वा तुसरासी ति वा भुसरासी ति वा गोमयरासी ति वा अवकररासी ति वा अगणिझामिए अगणिझूसिए अगणिपरिणामिए ह्यतेये गयतेये नट्ठतेये भट्ठतेये लुत्ततेए विणट्ठतेये जाए एवामेव गोसालेमंखलिपुत्ते ममं वहाए सरीरगंसि तेयं निसिरेत्त।

हततेये गततेये जाव विणट्ठतेये जाए, तं छंदेणं अज्जो! तुब्भे गोसालं मंखलिपुत्तं धम्मियाए पडिचोयणाए पडिचोदेह, धम्मियाए पडिचोयणाए पडिचोएत्ता धम्मियाए पडिसारणाए पडिसारेह, धम्मियाए पडिसारणाए पडिसारेत्ता धम्मिएणं पडोयारेणं पडियारेह, धम्मिएणं पडोयारेणं पडोयारेत्ता अट्ठेहि य हेतूहि य पसिणेहि य वागरणेहि य कारणेहि य निप्पट्ठपसिणवागरणं करेह।

तए णं ते समणा निग्गंथा समणेणं भगवया महावीरेणं एवं वुत्ता समाणा समणं भगवं महावीरं वंदंति नमंसंति, वं० २ जेणेव गोसाले मंखलिपुत्ते तेणेव उवागच्छंति, उवा० २ गोसालं मंखलिपुत्तं धम्मियाए पडिचोदणाए पडिचोदेति, ध० प० २ धम्मियाए पडिसारणाए पडिसारंति, ध० प० २ धम्मिएणं पडोयारेणं पडोयारंति, ध० प० २ अट्ठेहि य हेतूहि य कारणेहि य जाव निप्पट्ठपसिणवागरणं करंति।

तए णं से गोसाले मंखलिपुत्ते समणेहिं निग्गंथेहिं धम्मियाए पडिचोयणाए पडिचोइज्जमाणे जाव निप्पट्ठपसिणवागरणे कीरमाणे आसुरुत्ते जाव मिसिमिसेमाणे नो संचाएति समणाणं निग्गंथाणं सरीरगस्स किंचि आबाहं वा वाबाहं वा उप्पाएत्तए, छविच्छेयं वा करेत्तए।

तए णं ते आजीविया थेरा गोसालं मंखलिपुत्तं समणेहिं निग्गंथेहिं धम्मियाए पडिचोयणाए पडिचोइज्जमाणं, धम्मियाए पडिसारणाए पडिसारिज्जमाणं, धम्मिएणं पडोयारेणं पडोयारिज्जमाणं अट्ठेहि य हेतूहि य जाव कीरमाणं आसुरुत्तं जाव मिसिमिसेमाणं समणाणं निग्गंथाणं सरीरगस्स किंचि आबाहं वा वाबाहं वा छविच्छेदं वा अकरेमाणं पासंति, पा० २ गोसालस्स मंखलिपुत्तस्स अंतियाओ अत्थेगइया आयाए अवक्कमंति, आयाए अ० २ जेणेव समणे भगवं महावीरे तेणेव उवागच्छंति, ते० उ० २ समणं भगवं महावीरं तिक्खुत्तो आयाहिणपयाहिणं करंति; क० २ वंदंति नमंसंति, वं० २ समणं भगवं महावीरं उवसंपज्जित्ताणं विहरंति। अत्थेगइया आजीविया थेरा गोसालं चेव मंखलिपुत्तं उवसंपज्जित्ताणं विहरंति।

तए णं से गोसाले मंखलिपुत्ते जस्सट्ठाए हव्वमागए तमट्ठं असाहेमाणे, रुंदाइं पलोएमाणे, दीहुण्हाइं नीससमाणे, दाढियाए लोमाइं लुंचमाणे, अवडुं कंडूयमाणे, पुयलिं पप्फोडेमाणे, हत्थे विणिद्धुणमाणे, दोहि वि पाएहिं भूमिं कोट्ठमाणे 'हाहा अहो! हओऽहमस्सी' ति कट्ठु समणस्स भगवतो महावीरस्स अंतियाओ कोट्ठयाओ चेतियाओ पडिनिक्खमति, पडि० २ जेणेव सावत्थी नगरी जेणेव हालाहलाए कुंभकारीए कुंभकारावणे तेणेव उवागच्छति, ते० उ० २ हालाहलाए कुंभकारीए कुंभकारावणंसि अंबकूणगहत्थगए मज्जपाणं पियमाणे अभिक्खणं गायमाणे अभिक्खणं गायमाणे अभिक्खणं नच्चमाणे अभिक्खणं हालाहलाए कुंभकारीए अंजलिकम्मं करेमाणे सीयलएणं मट्ठियापाणएणं आयंचणिउदएणं गयाइं परिसिंचेमाणे विहरइ।

**[६५२]** अज्जो'ति समणे भगवं महावीरे समणे निग्गंथे आमंतेत्ता एवं वयासि--जावतिए णं अज्जो! गोसालेणं मंखलिपुत्तेणं ममं वहाए सरीरगंसि तेये निसट्ठे से णं अलाहि पज्जते सोलसण्हं जणवयाणं, तं जहा--अंगाणं वंगाणं मगहाणं मलयाणं मालवगाणं अच्छाणं वच्छाणं कोट्ठाणं पाढाणं लाढाणं वज्जाणं मोलीणं कासीणं कोसलाणं अवाहाणं सुंभुत्तराणं घाताए वहाए उच्छादणताए भासीकरणताए।

जं पि य अज्जो! गोसाले मंखलिपुत्ते हालाहलाए कुंभकारीए कुंभकारावणंसि अंबकूणगहत्थगए मज्जपाणं पियमाणे अभिक्खणं जाव अंजलिकम्मं करेमाणे विहरति तस्स वि णं वज्जस्स पच्छायणट्ठताए इमाइं अट्ठ चरिमाइं पन्नवेति, तं जहा-- चरिमे पाणे, चरिमे गेये, चरिमे नट्ठो,

चरिमे अंजलिकम्मे, चरिमे पुक्खलसंवट्णए महामेहे, चरिमे सेयणए गंधहत्थी, चरिमे महासिलाकंणए संगामे, अहं च णं इमीसे ओसप्पिणिसमाए चउवीसाए तित्थकराणं चरिमे तित्थकरे सिज्झिस्सं जाव अंतं करेस्सं।

जं पि य अज्जो! गोसाले मंखलिपुत्ते सीयलणं मट्ठियापाणणं आदंचणिउदणं गायाइं परिसिंचेमाणे विहरति तस्स वि णं वज्जस्स पच्छायणट्ठयाए इमाइं चत्तारि पाणगाइं, चत्तारि अपाणगाइं पन्नवेति।

से किं तं पाणए? पाणए चउच्चिहे पन्नते, तं जहा-गोपुट्ठए हत्थमद्वियए आयवतत्तए सिलापब्भट्ठए। से तं पाणए।

से किं तं अपाणए? अपाणए चउच्चिहे पन्नते, तं जहा-थाल-पाणए तयापाणए सिंबलिपाणए सुद्धपाणए।

से किं तं थालपाणए? थालपाणए जे णं दाथालगं वा दावारगं वा दाकुंभगं वा दाकलसं वा सीयलगं उल्लगं हत्थेहिं परामसइ, न य पाणियं पियइ से तं थालपाणए।

से किं तं तयापाणए? तयापाणए जे णं अंबं वा अंबाडगं वा जहा पयोगपए जाव बोरं वा तिंदुरुयं वा तरुणगं आमगं आसगंसि आवीलेति वा पवीलेति, वा, न य पाणियं पियइ से तं तयापाणए।

से किं तं सिंबलिपाणए? सिंबलिपाणए जे णं कलसंगलियं वा मुग्गसिंगलियं वा माससंगलियं वा सिंबलिसिंगलियं वा तरुणियं आमियं आसगंसि आवीलेति वा पवीलेति वा, ण य पाणियं पियइ से तं सिंबलिपाणए।

से किं तं सुद्धपाणए? सुद्धपाणए जे णं छम्मासे सुद्धं खादिमं खाति-दो मासे पुढविसंथारोवगए, दो मासे कट्ठसंथारोवगए, दो मासे दब्भसंथारोवगए। तस्स णं बहुपडिपुण्णाणं छण्हं मासाणं अंतिमराईए इमे दो देवा महिङ्कीया जाव महेसक्खा अंतियं पाउब्भवंति, तं जहा--पण्णभद्दे य माणिभद्दे य । तए णं ते देवा सीतलएहिं उल्लएहिं हत्थेहिं गायाइं परामसंति, जे णं ते देवे सातिज्जति से णं आसीविसत्ताए कम्मं पकरेति, जे णं ते देवे नो सातिज्जति तस्स णं संसि सरीरगंसि अगणिकाए संभवति। से णं सएणं तेयेणं सरीरगं झामेति, सरीरगं झामेता ततो पच्छा सिज्झति जाव अंतं करेति। से तं सुद्धपाणए।

तत्थ णं सावत्थीए नगरीए अयंपुले णामं आजीविओवासए परिवसति अड्ढे जहा

हालाहला जाव आजीवियसमएणं अप्पाणं भावेमाणे विहरति।

तए णं तस्स अयंपुलस्स आजीविओवासगस्स अन्नदा कदाइ पुव्वरत्तावरत्तकालसमयंसि कुडुंबजागरियं जागरमाणस्स अयमेयारूवे अज्झत्थिए जाव समुप्पज्जित्था-किंसंठिया णं हल्ला पन्नता?।

तए णं तस्स अयंपुलस्स आजीविओवासगस्स दोच्चं पि अयमेयारूवे अज्झत्थिए जाव समुप्पज्जित्था-एवं खलु ममं धम्मायरिए धम्मोवएसए गोसाले मंखलिपुत्ते उप्पन्ननाण-दंसणधरे जाव सव्वण्णू सव्वदरिसी इहेव सावत्थीए नगरीए हालाहलाए कुंभकारीए कुंभकारावणंसि आजीवियसंघसंपरिवुडे आजीवियसमएणं अप्पाणं भावेमाणे विहरति, तं सेयं खलु मे कल्लं जाव जलंते गोसालं मंखलिपुत्तं वंदित्ता जाव पज्जुवासेत्ता, इमं एयारूवं वागरणं वागरित्तएत्ति कट्ठु एवं संपेहेति, एवं सं0 २ कल्लं जाव जलंते प्हाए कय जाव अप्पमहग्घाभरणालंकियसरीरे सातो गिहाओ पडिनिक्खमइ, सातो0 प0 २ पादविहारचारेणं सावत्थिं नगरिं मज्झंमज्झेणं जेणेव हालाहलाए कुंभकारीए कुंभकारावणे तेणेव उवागच्छति, तेणेव उवा0 २

पासति गोसालं मंखलिपुतं हालाहलाए कुंभकारीए कुंभकारावणंसि अंबकूणगहत्थगयं जाव अंजलिकम्मं करेमाणं सीयलएणं मट्ठिया जाव गायाइं परिसिंचमाणं, पासिता लज्जिए विलिए विड्ढे सणियं सणियं पच्चोसक्कइ।

तए णं ते आजीविया थेरा अयंपुलं आजीवियोवासगं लज्जियं जाव पच्चोसक्कमाणं पासंति, पा० २ एवं वदासि--एहि ताव अयंपुला! इतो।

तए णं से अयंपुले आजीवियोवासए आजीवियथेरेहिं एवं वुत्ते समाणे जेणेव आजीविया थेरा तेणेव उवागच्छइ, उवा० २ आजीविए थेरे वंदति नमंसति, वं० २ नच्चासन्ने जाव पज्जुवासति।

अयंपुला! ति आजीविया थेरा अयंपुलं आजीवियोवासगं एवं वदासि--से नूणं ते अयंपुला! पुट्टवरत्तावरत्तकालसमयंसि जाव किंसंठिया हल्ला पन्नता? तए णं तव अयंपुला! दोच्चं पि अयमेयारूवे०, तं चेव सत्वं भाणियत्वं जाव सावत्थिं नगरिं मज्झमज्झेणं जेणेव हालाहलाए कुंभकारीए कुंभकारावणे जेणेव इहं तेणेव हव्वमागए, से नूणं ते अयंपुला! अट्ठे समट्ठे?' हंता, अत्थि'। जं पि य अयंपुला! तव धम्मयारिए धम्मोवएसए गोसाले मंखलिपुते हालाहलाए कुंभकारीए कुंभकारावणंसि अंबकूणगहत्थगए जाव अंजलिकम्मं करेमाणे विहरइ तत्थ वि णं भगवं इमाइं अट्ठ चरिमाइं पन्नवेति, तं जहा--चरिमे पाणे जाव अंतं करेस्सति। जं पि य अयंपुला! तव धम्मयारिए धम्मोवएसए गोसाले मंखलिपुते सीयलएणं मट्ठिया जाव विहरति, तत्थ वि णं भगवं इमाइं चत्तारि पाणगाइं, चत्तारि अपाणगाइं पन्नवेति। से किं तं पाणए? पाणए जाव ततो पच्छा सिज्झति जाव अंतं करेति। तं गच्छ णं तुमं अयंपुला! एस चेव ते धम्मयारिए धम्मोवएसए गोसाले मंखलिपुते इमं एयारूवं वागरणं वागरेहिति।

तए णं से अयंपुले आजीवियोवासए आजीविएहिं थेरेहिं एवं वुत्ते समाणे हट्ठतुट्ठ० उट्ठाए उट्ठेति, उ० २ जेणेव गोसाले मंखलिपुते तेणेव पहारेत्थ गमणाए।

तए णं ते आजीविया थेरा गोसालस्स मंखलिपुतस्स अंबकूणगएडावणट्ठयाए एगंतमंते संगारं कुव्वंति।

तए णं से गोसाले मंखलिपुते आजीवियाणं थेराणं संगारं पडिच्छइ, सं० पा० अंबकूणगं एगंतमंते एडेइ।

तए णं से अयंपुले आजीवियोवासए जेणेव गोसाले मंखलिपुते तेणेव उवागच्छइ, उवा० २ गोसालं मंखलिपुते तेणेव उवागच्छइ, उवा० २ गोसालं मंखलिपुतं तिक्खुतो जाव पज्जुवासति।

अयंपुला! ती गोसाले मंखलिपुते अयंपुलं आजीवियोवासगं एवं वदासि--से नूणं अयंपुला! पुट्टवरत्तावरत्तकालसमयंसि जाव जेणेव ममं अंतियं तेणेव हव्वमागए, से नूणं अयंपुला! अट्ठे समट्ठे?' हंता, अत्थि'। तं नो खलु एस अंबकूणए, अंबचोयए णं एसे। किं संठिया हल्ला पन्नता? वंसीमूलसंठिया हल्ला पण्णत्ता। वीणं वाएहि रे वीरगा!, वीणं वाएहि रे वीरगा!।

तए णं से अयंपुले आजीवियोवासए गोसालेणं मंखलिपुतेणं इमं एयारूवं वागरणं वागरिए समाणे हट्ठतुट्ठ० जाव हियए गोसालं मंखलिपुतं वंदति नमंसति, वं० २ पसिणाइं पुच्छइ, पसि० पु० २ अट्ठाइं परियादीयति, अ० पा० २ उट्ठाइ उट्ठेति, उ० २ गोसालं मंखलिपुतं वंदति नमंसति जाव पडिगए।

तए णं से गोसाले मंखलिपुते अप्पणो मरणं आभोएइ, अप्प० आ० २ आजीविए थेरे सद्दावेइ, आ० स० २ एवं वदासि--"तुब्भे णं देवाणुप्पिया! ममं कालगयं जाणित्ता सुरभिणा गंधोदएणं ण्हाणेह, सु०

पहा०२ पम्हलसुकुमालाए गंधकासाईए गायाइं लूहेह, गा० लू० २ सरसेणं गोसीसेणं चंदणेणं गायाइं अणुलिंपह, सर० अ० २ महरिहं हंसलक्खणं पडसाडगं नियंसेह, मह० नि०२ सव्वालंकारविभूसियं करेह, स० क०२ पुरिससहस्सवाहिणिं सीयं द्रुहह, पुरि० द्रु० २ सावत्थीए नगरीए सिंघाडग० जाव पहेसु महया महया सद्देणं उग्घोसेमाणा उग्घोसेमाणा एवं वदह--'एवं खलु देवाणुप्पिया! गोसाले मंखलिपुत्ते जिणे जिणप्पलावी जाव जिणसद्दं पगासेमाणे विहरिता इमीसे ओसप्पिणीए चउवीसाए तित्थगराणं चरिमत्तिथगरे सिद्धे जाव सव्वदुक्खप्पहीणे'। इड्ढिसक्कारसमुदएणं ममं सरीरगस्स णीहरणं करेह"। तए णं ते आजीविया थेरा गोसालस्स मंखलिपुत्तस्स एतमट्ठं विणएणं पडिसुणेंति।

[६५३] तए णं तस्स गोसालस्स मंखलिपुत्तस्स सत्तरंतंसि परिणममाणंसि पडिलद्धसम्मत्तस्स अयमेयारूवे अज्झत्थिए जाव समुप्पज्जित्था-णो खलु अहं जिणे जिणप्पलावी जाव जिणसद्दं पगासेमाणे विहरिए, अहं णं गोसाले चेव मंखलिपुत्ते समणघातए समणमारए समणपडिणीए, आयरिय-उवज्झायाणं अयसकारए अवण्णकारए अकित्तिकारए बहूहिं असब्भावुब्भावणाहिं मिच्छता भिनिवेसेहि य अप्पाणं वा परं वा तदुभयं वा वुग्गाहेमाणे वुप्पाएमाणे विहरिता सएणं तेएणं अन्नाइट्ठे समाणे अंतोसत्तरत्तस्स पित्तज्जरपरिगयसरीरे दाहवक्कंतीए छउमत्थे चेव कालं करेस्सं, समणे भगवं महावीरे जिणे जिणप्पलावी जाव जिणसद्दं पगासेमाणे विहरति। एवं संपेहेति, एवं सं० २ आजीविए थेरे सद्दावेइ, आ० स० २ उच्चावयसवहसाविए करेति, उच्चा० क० २ एवं वदासि--"नो खलु अहं जिणे जिणप्पलावी जाव पकासेमाणे विहरिए, अहं णं गोसाले चेव मंखलिपुत्ते समणघातए जाव छउमत्थे चेव कालं करेस्सं, समणे भगवं महावीरे जिणे जिणप्पलावी जाव जिणसद्दं पगासेमाणे विहरति। तं तुब्भे णं देवाणुप्पिया! ममं कालगयं जाणिता वामे पाए सुंबेणं बंधह, वामे० बं०२ तिक्खुत्तो मुहे उट्ठुभह, ति० उ० २ सावत्थीए नगरीए सिंघाडग० जाव पहेसु आकड्ढविकड्ढिं करेमाणा महया महया सद्देणं उग्घोसेमाणा उग्घोसेमाणा एवं वदह--'नो खलु देवाणुप्पिया! गोसाले मंखलिपुत्ते जिणे जिणप्पलावी जाव विहरिए, एस णं गोसाले चेव मंखलिपुत्ते समणघायए जाव छउमत्थे चेव कालगते, समणे भगवं महावीरे जिणे जिणप्पलावी जाव विहरति।' महता अणिड्ढिसक्कारसमुदएणं ममं सरीरगस्स नीहरणं करेज्जाह"। एवं वदिता कालगए।

[६५४] तए णं ते आजीविया थेरा गोसालं मंखलिपुत्तं कालगयं जाणिता हालाहलाए कुंभकारीए कुंभकारावणस्स दुवाराइं पिहेति; दु० पि० २ हालाहलाए कुंभकारीए कुंभकारावणस्स बहुमज्झदेसभाए सावत्थि नगरिं आलिहंति, सा० आ०२ गोसालस्स मंखलिपुत्तस्स सरीरगं वामे पाए सुंबेणं बंधंति, वा० बं० २ तिक्खुत्तो मुहे उट्ठुहंति, ति० उ० २ सावत्थीए नगरीए सिंघाडग० जाव पहेसु आकड्ढविकड्ढिं करेमाणा णीयं णीयं सद्देणं उग्घोसेमाणा उग्घोसेमाणा एवं वयासि--'नो खलु देवाणुप्पिया! गोसाले मंखलिपुत्ते जिणे जिणप्पलावी जाव विहरिए, एस णं गोसाले चेव मंखलिपुत्ते समणघायए जाव छउमत्थे चेव कालगते, समणे भगवं महावीरे जिणे जिणप्पलावी जाव विहरइ'। सवहपडिमोक्खणगं करेति, सवहपडिमोक्खणगं करेता दोच्चं पि पूयासक्कारथिरीकरणट्ठयाए गोसालस्स मंखलिपुत्तस्स वामाओ पादाओ सुंबं मुयंति, सुंबं मु० २ हालाहलाए कुंभकारीए कुंभकारावणस्स दुवारवयणाइं अवंगुणंति, अवं० २ गोसालस्स मंखलिपुत्तस्स सरीरगं सुरभिणा गंधोदएणं प्हाणेंति, तं चेव जाव महया इड्ढिसक्कारसमुदएणं गोसालस्स मंखलिपुत्तस्स सरीरगस्स नीहरणं करेति।

[६५५] तए णं समणे भगवं महावीरे अन्नदा कदायि सावत्थीओ नगरीओ कोट्ठयाओ

चेतियाओ पडिनिक्खमति, पडि० २ बहिया जणवयविहारं विहरति।

तेणं कालेणं तेणं समएणं मेंढियग्गामे नामं नगरे होत्था।वण्णओ। तस्स णं मेंढियग्गामस्स नगरस्स बहिया उत्तरपुरत्थिमे दिसीभागे एत्थ णं साणकोट्ठए नामं चेतिए होत्था। वण्णओ। जाव पुढविसिलापट्ठओ। तस्स णं साणकोट्ठगस्स चेतियस्स अदूरसामंते एत्थ णं महेगे मालुयाकच्छए यावि होत्था, किण्हे किण्होभासे जाव निकुरंबभूए पत्तिए पुप्फिए फल्लिए हरियगरेरिज्जमाणे सिरीए अतीव अतीव उवसोभेमाणे उवसोभेमाणे चिट्ठति।

तत्थ णं मेंढिग्गामे नगरे रेवती नामं गाहावतिणी परिवसति अङ्घा जाव अपरिभूया।

तए णं समणे भगवं महावीरे अन्नदा कदायि पुट्वाणुपुट्ठिं चरमाणे जाव जेणेव मेंढियग्गामे नगरे जेणेव साणकोट्ठए चेतिए जाव परिसा पडिगया।

तए णं समणस्स भगवओ महावीरस्स सरीरगंसि विपुले रोगायंके पाउब्भूते उज्जले जाव दुरहियासे। पित्तज्जरपरिगयसरीरे दाहवक्कंतिए यावि विहरति। अवि यास्सइं लोहियवच्चाइं पि पकरेति। चाउच्चवण्णं च णं वागरेति--'एवं खलु समणे भगवं महावीरे गोसालस्स मंखलिपुत्तस्स तवेणं तेयेणं अन्नाइट्ठे समाणे अंतो छण्हं मासाणं पित्तज्जरपरिगयसरीरे दाहवक्कंतिए छउमत्थे चैव कालं करेस्सति'।

तेणं कालेणं तेणं समएणं समणस्स भगवतो महावीरस्स अंतेवासी सीहे नामं अणगारे पगतिभद्दए जाव विणीए मालुयाकच्छगस्स अदूरसामंते छट्ठंछट्ठेणं अनिक्खितेणं तवोकम्मणं उड्ढंबाहा० जाव विहरति।

तए णं तस्स सीहस्स अणगारस्स ज्ञाणंतरियाए वट्ठमाणस्स अयमेयारूवे जाव समुप्पज्जित्था-एवं खलु मम धम्मयारियस्स धम्मोवएसगस्स समणस्स भगवतो महावीरस्स सरीरगंसि विपुले रोगायंके पाउब्भूते उज्जले जाव छउमत्थे चैव कालं करिस्सति, वदिस्संति य णं अन्नतित्थिया 'छउमत्थे चैव कालगए'। इमेणं एयारूवेणं महया मणोमाणसिएणं दुक्खेणं अभिभूए समाणे आयावणभूमीओ पच्चोरुभति, आया० प० २ जेणेव मालुयाकच्छए तेणेव उवागच्छति, उवा० २ मालुयाकच्छयं अंतो अंतो अमुप्पविसति, मा० अणु० २ महया महया सद्देणं कुहुकुहुस्स परुन्ने'।

अज्जो' ति समणे भगवं महावीरे समणे निग्गंथे आमंतेति, आमंतेता एवं वदासि- 'एवं खलु अज्जो! मम अंतेवासी सीहे नामं अणगारे पगतिभद्दए०, तं चैव सत्वं भाणियत्वं जाव परुन्ने। तं गच्छह णं अज्जो! तुब्भे सीहं अणगारं सद्दह'।

तए णं ते समणा निग्गंथा समणेणं भगवया महावीरेणं एवं वुत्ता समाणा समणं भगवं महावीरं वंदंति नमंसंति, वं० २ समणस्स भगवतो महावीरस्स अंतियातो साणकोट्ठयातो चेतियातो पडिनिक्खमंति, सा० प० २ जेणेव मालुयाकच्छए, जेणेव सीहे अणगारे तेणेव उवागच्छंति, उवा० २ सीहं अणगारं एवं वयासि-'सीहा! धम्मयारिया सद्दवेंति'।

तए णं से सीहे अणगारे समणेहिं निग्गंथेहिं सद्धिं मालुयाकच्छगाओ पडिनिक्खमति, प० २ जेणेव साणकोट्ठए चेतिए जेणेव समणे भगवं महावीरे तेणेव उवागच्छइ, उवा० २ समणं भगवं महावीरं तिक्खुत्तो आयाहिण० जाव पज्जुवासति।

सीहा!' दि समणे भगवं महावीरे सीहं अणगारं एवं वयासि-- 'से नूणं ते सीहा! ज्ञाणंतरियाए वट्ठमाणस्स अयमेयारूवे जाव परुन्ने। से नूणं ते सीहा! अट्ठे समट्ठे?' हंता, अत्थि। 'तं नो खलु अहं

सीहा! गोसालस्स मंखलिपुत्तस्स तवेणं तेयेणं अन्नाइट्ठे समाणे अंतो छण्हं मासाणं जाव कालं करेस्सं। अहं णं अन्नाइं अद्धसोलस वासाइं जिणे सुहत्थी विहरिस्सामि। तं गच्छ णं तुमं सीहा! मेंढियगामं नगरं रेवतीए गाहावतिणीए गिहं, तत्थ णं रेवतीए गाहावतिणीए ममं अट्ठाए दुवे कवोयसरीरा उवक्खडिया, तेहिं नो अट्ठो, अत्थि से अन्ने पारियासिए मज्जारकडए कुक्कुडमंसए तमाहराहि, तेणं अट्ठो।

तए णं से सीहे अणागारे समणेणं भगवया महावीरेणं एवं वुत्ते समाणे हट्ठतुट्ठो जाव हियए समणं भगवं महावीरं वंदति नमंसति, वं० २ अतुरियमचवलमसंभंतं मुहपोत्तियं पडिलेहेति, मु० प० २ जहा गोयमसामी जाव जेणेव समणे भगवं महावीरे तेणेव उवागच्छइ, उवा० २ समणं भगवं महावीरं वंदति नमंसति, वं० २ समणस्स भगवतो महावीरस्स अंतियातो साणकोट्ठयाओ चेतियाओ पडिनिक्खमति, पडि० २ अतुरिय जाव जेणेव मेंढियग्गामे नगरे तेणेव उवागच्छति, उवा० २ मेंढियग्गामं नगरं मज्झंमज्झेणं जेणेव रेवतीए गाहावतिणीए गिहे तेणेव उवागच्छइ, उवा० २ रेवतीए गाहावतिणीए गिहं अणुप्पविट्ठे।

तए णं सा रेवती गाहावतिणी सीहं अणगारं एज्जमाणं पासति, पा० २ हट्ठतुट्ठो खिप्पामेव आसणाओ अब्भुट्ठेति, खि० अ० २ सीहं अणगारं सत्तट्ठ पयाइं अणुगच्छइ, स० अणु० २ तिक्खुतो आयाहिणपयाहिणं करेति, क० २ वंदति नमंसति, वं० २ एवं वयासी-संदिसंतु णं देवाणुप्पिया! किमागमणप्पओयणं? तए णं से सीहे अणगारे रेवतिं गाहावतिणिं एवं वयासी--एवं खलु तुमे देवाणुप्पिए! समणस्स भगवतो महावीरस्स अट्ठाए दुवे कवोयसरीरा उवक्खडिया तेहिं नो अट्ठे, अत्थि ते अन्ने पारियासिए मज्जारकडए कुक्कुडमंसए तमाहराहि, तेणं अट्ठो।

तए णं सा रेवती गाहावतिणी सीहं अणगारं एवं वदासि-केस णं सीहा! से णाणी वा तवस्सी वा जेणं तव एस अट्ठे मम आतरहस्सकडे हव्वमक्खाए जतो णं तुमं जाणासि? एवं जहा खंदए जाव जतो णं अहं जाणामि।

तए णं सा रेवती गाहावतिणी सीहस्स अणगारस्स अंतियं एतमट्ठं सोच्चा निसम्म हट्ठतुट्ठो जेणेव भत्तघरे तेणेव उवागच्छइ, उवा०२ पत्तं मोएति, पत्तं मो०२ जेणेव सीहे अणगारे तेणेव उवागच्छति, उवा०२ सीहस्स अणगारस्स पडिग्गहंगंसि तं सव्वं सम्मं निसिरति।

तए णं तीए रेवतीए गाहावतिणीए तेणं दव्वसुद्धेणं जाव दाणेणं सीहे अणगारे पडिलाभिए समाणे देवाउए निबद्धे जहा विजयस्स जाव जम्मजीवियफले रेवतीए गाहावतिणीए, रेवतीए गाहावतिणीए।

तए णं से सीहे अणगारे रेवतीए गाहावतिणीए गिहाओ पडिनिक्खमति, पडि० २ मेंढियग्गामं नगरं मज्झंमज्झेणं निग्गच्छति, नि०२ जहा गोयमसामी जाव भत्तपाणं पडिदंसेति, भ० प० २ समणस्स भगवतो महावीरस्स पाणिंसि तं सव्वं सम्मं निसिरति।

तए णं समणे भगवं महावीरे अमुच्छिए जाव अणज्झोववन्ने बिलमिव पन्नगभूएणं अप्पाणेणं तमाहारं सरीरकोट्ठगंसि पक्खिवइ। तए णं समणस्स भगवतो महावीरस्स तमाहारं आहारियस्स समाणस्स से विपुले रोगायंके खिप्पामेव उवसंते हट्ठे जाए अरोए बलियसरीरे। तुट्ठा समणा, तुट्ठाओ समणीओ, तुट्ठा सावगा, तुट्ठाओ सावियाओ, तुट्ठा देवा, तुट्ठाओ देवीओ, सदेवमणुयासुरे लोए तुट्ठे हट्ठे जाए- 'समणे भगवं महावीरे हट्ठे, समणे भगवं महावीरे हट्ठे'।

**[६५६]** भंते! 'त्ति भगवं गोयमे समणं भगवं महावीरं वंदति नमंसति, वं०२ एवं वदासी- एवं खलु देवाणुप्पियाणं अंतेवासी पाईणजाणवए सव्वाणुभूती नामं अणगारे पगतिभद्दए जाव विणीए, से णं भंते

तदा गोसालेणं मंखलिपुत्तेणं तवेणं तेयेणं भासरासीकए समाणे कहिं गए, कहिं उववन्ने? एवं खलु गोयमा! ममं अंतेवासी पाईणजाणवए सव्वाणुभूती नामं अणगारे पगतीभदए जाव विणीए से णं तदा गोसालेणं मंखलिपुत्तेणं तवेणं तेएणं भासरासीकए समाणे उड्ढं चंदिमसूरिय जाव बंभ-लंतक-महासुक्के कप्पे वीतीवइता सहस्सारे कप्पे देवताए उववन्ने। तत्थ णं अत्थेगतियाणं देवाणं अट्ठारस सागरोवमाइं ठिती पन्नता, तत्थ णं सव्वाणुभूतिस्स वि देवस्स अट्ठारस सागरोवमाइं ठिती पन्नता।

से णं भंते! सव्वाणुभूती देवे ताओ देवलोगाओ आउक्खएणं भवक्खएणं ठित्तिक्खएणं जाव महाविदेहे वासे सिज्झिहिति जाव अंतं करेहिति।

एवं खलु देवाणुप्पियाणं अंतेवासी कोसलजाणवते सुनक्खते नामं अणगारे पगतिभदए जाव विणीए, से णं भंते! तदा गोसालेणं मंखलिपुत्तेणं तवेणं तेयेणं परिताविए समाणे कालमासे कालं किच्चा कहिं गए, कहिं उववन्ने? एवं खलु गोयमा! ममं अंतेवासी सुनक्खते नामं अणगारे पगतिभदए जाव विणीए, से णं तदा गोसालेणं मंखलिपुत्तेणं तवेणं तेयेणं परिताविए समाणे जेणेव ममं अंतिए तेणेव उवागच्छति, उवा० २ वंदति नमंसति, वं० २ सयमेव पंच महव्वयाइं आरुभेति, सयमेव पंच० आ० २ समणा य समणीओ य खामेति, स० खा० २ आलोइयपडिक्कंते समाहिपते कालमासे कालं किच्चा उड्ढं चंदिमसूरिय जाव आणय-पाणयारणे कप्पे वीतीवइता अच्चुते कप्पे देवताए उववन्ने। तत्थ णं अत्थेगतियाणं देवाणं बावीसं सागरोवमाइं ठिती पन्नता, तत्थ णं सुनक्खतस्स वि देवस्स बावीसं सागरोवमाइं०, सेसं जहा सव्वाणुभूतिस्स जाव अंतं काहिति।

**[६५७]** एवं खलु देवाणुप्पियाणं अंतेवासी कुसिस्से गोसाले नामं मंखलिपुत्ते, से णं भंते! गोसाले मंखलिपुत्ते कालमासे कालं किच्चा कहिं गए, कहिं उववन्ने? एवं खलु गोयमा! ममं अंतेवासी कुसिस्से गोसाले नामं मंखलिपुत्ते समणघातए जाव छउमत्थे चेव कालमासे कालं किच्चा उड्ढं चंदिमसूरिय जाव अच्चुए कप्पे देवताए उववन्ने। तत्थ णं अत्थेगतियाणं देवाणं बावीसं सागरोवमाइं ठिती पन्नता, तत्थ णं गोसालस्स वि देवस्स बावीसं सागरोवमाइं ठिती पन्नता।

से णं भंते! गोसाले देव ताओ देवलोगाओ आउक्खएणं जाव कहिं उववज्जिहिति?

"गोयमा! इहेव जंबुद्धीवे दीवे भारहे वासे विंझगिरिपायमूले पुंडेसु जणवएसु सतदुवारे नगरे सम्मुतिस्स रन्तो भदए भारियाए कुच्छंसि पुत्ताए पच्चायाहिति। से णं तत्थ नवण्हं मासाणं बहुपडिपुण्णाणं जाव वीतिककंताणं जाव सुरूवे दारए पयाहिति, जं रयणिं च णं से दारए जाहिति, तं रयणिं च णं सतदुवारे नगरे सब्भंतरबाहिरिए भारग्गसो य कुंभग्गसो य पउमवासे य रयणवासे य वासे वासिहिति। तए णं तस्स दारगस्स अम्मापियरो एक्कारसमे दिवसे वीतिककंते जाव संपते बारसाहदिवसे अयमेयारूवं गोण्णं गुणनिप्फन्नं नामधेज्जं काहिति--जम्हा णं अम्हं इमंसि दारगंसि जायंसि समाणंसि सतदुवारे नगरे सब्भंतरबाहिरिए जाव रयणवासे य वासे वुट्ठे, तं होउ णं अम्हं इमस्स दारगस्स नामधेज्जं 'महापउमे, महापउमे'।

"तए णं तस्स दारगस्स अम्मापियरो नामधेज्जं करेहिति 'महापउमो'ति।

"तए णं तं महापउमं दारगं अम्मापियरो सातिरेगट्ठवासजायगं जाणित्ता सोभणंसि तिहि-करण-दिवस-नक्खत्तमुहुत्तंसि महया महया रायाभिसेगेणं अभिसिंचेहिति। से णं तत्थ राया भविस्सइ महता हिमवंत० वण्णओ जाव विहरिस्सति।

"तए णं तस्स महापउमस्स रण्णो अन्नदा कदायि दो देवा महिड्ढिया जाव महेसक्खा सेणाकम्मं काहिति, तं जहा--पुण्णभद्दे य माणिभद्दे य। तए णं सतदुवारे नगरे बहवे राईसर-तलवर० जाव सत्थवाहप्पभितयो अन्नमन्नं सद्दावेहिति, अन्न० स० २ एवं वदिहिति--जम्हा णं देवाणुप्पिया! अम्हं महापउमस्स रण्णो दो देवा महिड्ढिया जाव सेणाकम्मं करेति तं जहा--पुण्णभद्दे य माणिभद्दे य; तं होउ णं देवाणुप्पिया! अम्हं महापउमस्स रण्णो दोच्चे वि नामधेज्जे 'देवसेणे, देवसेणे'।

"तए णं तस्स महापउमस्स रन्नो दोच्चे वि नामधेज्जे भविस्सति 'देवसेणे'ति।

"तए णं तस्स देवसेणस्स रण्णो अन्नदा कदायि सेते संखतलविमलसन्निगासे चउद्धंते हत्थिरयणे समुप्पज्जिस्सइ। तए णं से देवसेणे राया तं सेतं संखतलविमलसन्निगासं चउद्धंतं हत्थिरयणं दूढे समाणे सयदुवारं नगरं मज्झंमज्झेणं अभिक्खणं अभिक्खणं अतिजाहिति य निज्जाहिति य। तए णं सयदुवारे नगरे बहवे राईसर जाव पभितयो अन्नमन्नं सद्दावेहिति, अन्न० स० २ एवं वदिहिति--जम्हा णं देवाणुप्पिया! अम्हं देवसेणस्स रण्णो सेते संखतलविमलसन्निगासे चउद्धंते हत्थिरयणे समुप्पन्ने, तं होउ णं देवाणुप्पिया! अम्हं देवसेणस्स रण्णो तच्चे वि नामधेज्जे 'विमलवाहणे विमलवाहणे'।

"तए णं तस्स देवसेणस्स रण्णो तच्चे वि नामधेज्जे भविस्सति 'विमलवाहणे'ति।

"तए णं से विमलवाहणे राया अन्नदा कदायि समणेहिं निग्गंथेहिं मिच्छं विप्पडिवज्जिहिति-अप्पेगतिए आओसेहिति, अप्पेगतिए अवहसिहिति, अप्पेगतिए निच्छोडेहिति, अप्पेगतिए निब्भच्छेहिति, अप्पेगतिए बंधेहिति, अप्पेगतिए णिरुंभेहिति, अप्पेगतियाणं छविच्छेदं करेहिति, अप्पेगइए मारेहिति, अप्पेगतिए पमारेहिइ, अप्पेगतिए उद्धवेहिति, अप्पेगतियाणं वत्थं पडिग्गहं कंबलं पायपुंछणं आछिंदिहिति विच्छिंदिहिति भिंदिहिति अवहरिहिति, अप्पेगतियाणं भत्तपाणं वोच्छिंदिहिति, अप्पेगतिए णिन्नगरे करेहिति, अप्पेगतिए निच्चिसए करेहिति।

"तए णं सतदुवारे नगरे बहवे राईसर जाव वदिहिति--'एवं खलु देवाणुप्पिया! विमलवाहणे राया समणेहिं निग्गंथेहिं मिच्छं विप्पडिवन्ने अप्पेगतिए आओसति जाव निच्चिसए करेति, तं नो खलु देवाणुप्पिया! एयं अम्हं सेयं, नो खलु एयं विमलवाहणस्स रण्णो सेयं, नो खलु एयं रज्जस्स वा रट्ठस्स वा बलस्स वा वाहणस्स वा पुरस्स वा अंतैरस्स वा जणवयस्स वा सेयं, जं णं विमलवाहणे राया समणेहिं निग्गंथेहिं मिच्छं विप्पडिवन्ने। तं सेयं खलु देवाणुप्पिया! अम्हं विमलवाहणं रायं एयमट्ठं विण्णवित्तए' ति कट्ठु अन्नमन्नस्स अंतियं एयमट्ठं पडिसुणेति, अन्न० प० २ जेणेव विमलवाहमे राया तेणेव उवागच्छंति, उवा० २ करयलपरिग्गहियं विमलवाहणं रायं जएणं विजएणं वद्धावेहिति, जएणं विजएणं वद्धावित्ता एवं वदिहिति--'एवं खलु देवाणुप्पिया समणेहिं निग्गंथेहिं मिच्छं विप्पडिवन्ना, अप्पेगतिए आओसति जाव अप्पेगतिए निच्चिसए करेति, तं नो खलु एयं देवाणुप्पियाणं सेयं, नो खलु एयं अम्हं सेयं, नो खलु एयं रज्जस्स वा जाव जणवदस्स वा सेयं, जं णं देवाणुप्पिया समणेहिं निग्गंथेहिं मिच्छं विप्पडिवन्ना, तं विरमंतु णं देवाणुप्पिया एयमट्ठस्स अकरणयाए'।

"तए णं से विमलवाहणे राया तेहिं बहूहिं राईसर जाव सत्थवाहप्पभित्तीहिं एयमट्ठं विन्नते समाणे 'नो धम्मो ति, नो तवो, ति, मिच्छाविणएणं एयमट्ठं पडिसुणेहिति।

"तस्स णं सतदुवारस्स नगरस्स बहिया उत्तरपुरत्थिमे दिसीभागे एत्थ णं सुभूमिभागे नामं उज्जाणे भविस्सति, सव्वोउय० वण्णओ।

"तेणं कालेणं तेणं समएणं विमलस्स अरहओ पउप्पए सुमंगले नामं अणगारे जातिसंपन्ने जहा धम्मघोसस्स वण्णओ जाव संखितविउलतेयलेस्से तिणाणोवगए सुभूमिभागस्स उज्जाणस्स अदूरसामंते छट्ठंछट्ठेणं अणिक्खितेणं जाव आयावेमाणे विहरिस्सति।

"तए णं से विमलवाहणे राया अन्नदा कदायि रहचरियं काउं निज्जाहिति। तए णं से विमलवाहणे राया सुभूमिभागस्स उज्जाणस्स अदूरसामंते रहचरियं करेमाणे सुमंगलं अणगारं छट्ठंछट्ठेणं जाव आयावेमाणं पासिहिति, पा० २ आसुरुते जाव मिसिमिसेमाणे सुमंगलं अणगारं रहसिरेणं णोल्लावेहिति।

"तए णं से सुमंगले अणगारे विमलवाहणेणं रण्णा रहसिरेणं णोल्लाविए समाणे सणियं सणियं उट्ठेहिति, स० ३० २ दोच्चं पि उड्डं बाहाओ पगिज्झिय जाव आयावेमाणे विहरिस्सति।

"तए णं से विमलवाहणे राया सुमंगलं अणगारं दोच्चं पि रहसिरेणं णोल्लावेहिति।

"तए णं से सुमंगले अणगारे विमलवाहणेणं रण्णा दोच्चं पि रहसिरेणं णोल्लाविए समाणे सणियं सणियं उट्ठेहिति, स० ३० २ ओहिं पउंजिहिति, ओहिं प०२ विमलवाहणस्स रण्णो तीयद्धं आभोएहिति, ती० आ० २ विमलवाहणं रायं एवं वदिहिति--'नो खलु तुमं विमलवाहणे राया, नो खलु तुमं देवसेणे राया, नो खलु तुमं महापउमे राया, तुमं णं इओ तच्चे भवग्गहणे गोसाले नामं मंखलिपुते होत्था समणघायए जाव छउमत्थे चेव कालगए। तं जति ते तदा सव्वाणुभूतिणा अणगारेणं पभुणा वि होइऊणं सम्मं सहियं खमियं तित्तिक्खियं अहियासियं, जइ ते तदा सुनक्खितेणं अणगारेणं पभुणा वि होइऊणं सम्मं सहियं जाव अहियासियं, जइ ते तदा समणेणं भगवता महावीरेणं पभुणा वि जाव अहियासियं, तं नो खलु अहं तहा सम्मं सहिस्सं जाव अहियासिस्सं, अहं ते नवरं सहयं सरहं ससारहीयं तवेणं तेयेणं एगाहच्चं कूडाहच्चं भासरासिं करेज्जामि'।

"तए णं से विमलवाहणे राया सुमंगलेणं अणगारेणं एवं वुत्ते समाणे आसुरुते जाव मिसिमिसेमाणे सुमंगलं अणगारं तच्चं पि रहसिरेणं णोल्लावेहिति।

"तए णं से सुमंगले अणगारे विमलवाहणेणं रण्णा तच्चं पि रहसिरेणं नोल्लाविए समाणे आसुरुते जाव मिसिमिसेमाणे आयावणभूमिओ पच्चोरुहति, आ० प० २ तेयासमुग्घातेणं समोहन्निहिति, तेया० स० २ सत्तट्ठपयाइं पच्चोसक्किहिति, सत्तट्ठ० पच्चो० २ विमलवाहणं रायं सहयं सरहं ससारहीयं तवेणं तेयेणं जाव भासरासिं करेहिति।"

सुमंगले णं भंते! अणगारे विमलवाहणं रायं सहयं जाव भासरासिं करेता कहिं गच्छिहिति कहिं उववज्जिहिति? गोयमा! सुमंगले णं अणगारे विमलवाहणं रायं सहयं जाव भासरासिं करेता बहूहिं चउत्थ-छट्ठट्ठम-दसम-दुवालस जाव विचित्तेहिं तवोकम्महिं अप्पाणं भावेमाणे बहूइं वासाइं सामण्णपरियागं पाउणेहिति, बहूइं० पा० २ मासियाए संलेहणाए सट्ठिं भत्ताइं अणसणाए जाव छेदेता आलोइयपडिक्कंते समाहिपत्ते कालमासे० उड्डं चंदिम जाव गेवेज्जविमाणावाससयं वीतीवइत्ता सव्वट्ठसिद्धे महाविमाणे देवत्ताए उववज्जिहिति। तत्थ णं देवाणं अजहन्नमणुक्कोसेणं तेतीसं सागरोवमाइं ठिती पन्नता। तत्थ णं सुमंगलस्स वि देवस्स अजहन्नमणुक्कोसेणं तेतीसं सागरोवमाइं ठिती पन्नता। तत्थ णं सुमंगलस्स वि देवस्स अजहन्नमणुक्कोसेणं तेतीसं सागरोवमाइं ठिती पन्नता।

से णं भंते! सुमंगले देवे ताओ देवलोगाओ जाव महाविदेहे वासे सिज्झिहिति जाव अंतं काहिति।

[६५८] विमलवाहणे णं भंते! राया सुमंगलेणं अणगारेणं सहये जाव भासरासीकए समाणे कहिं गच्छिहिति, कहिं उववज्जिहिति? गोयमा! विमलवाहणे णं राया सुमंगलेणं अणगारेणं सहये जाव भासरासीकए समाणे अहेसतमाए पुढवीए उक्कोसकालट्ठितीयंसि नरगंसि नेरइयताए उववज्जिहिति।

से णं ततो अणंतरं उव्वट्ठिता मच्छेसु उववज्जिहिति। तत्थ वि णं सत्थवज्जे दाहवक्कंतीए कालमासे कालं किच्चा दोच्चं पि अहेसतमाए, पुढवीए उक्कोसकालट्ठितीयंसि नरगंसि नेरइयताए उववज्जिहिति।

से णं ततो अणंतरं उव्वट्ठिता दोच्चं पि मच्छेसु उववज्जिहिति। तत्थ वि णं सत्थवज्जे जाव किच्चा छट्ठाए तमाए पुढवीए उक्कोसकालट्ठितीयंसि नरगंसि नेरइयताए उववज्जिहिति।

से णं तओहिंतो जाव उव्वट्ठिता इत्थियासु उववज्जिहिति। तत्थ वि णं सत्थवज्जे दाह0 जाव दोच्चं पि छट्ठाए तमाए पुढवीए उक्कोसकाल जाव उव्वट्ठिता दोच्चं पि इत्थियासु उववज्जिहिति। तत्थ वि णं सत्थवज्जे जाव किच्चा पंचमाए धूमप्पभाए पुढवीए उक्कोसकाल जाव उव्वट्ठिता उरएसु उववज्जिहिति। तत्थ वि णं सत्थवज्जे जाव किच्चा दोच्चं पि पंचमाए जाव उव्वट्ठिता दोच्चं पि उरएसु उववज्जिहिति जाव किच्चा चउत्थीए पंकप्पभाए पुढवीए उक्कोसकालट्ठितीयंसि जाव उव्वट्ठिता सीहेसु उववज्जिहिति। तत्थ वि णं सत्थवज्जे तहेव जाव किच्चा दोच्चं पि चउत्थीए पंक0 जाव उव्वट्ठिता दोच्चं पि सीहेसु उववज्जिहिति जाव किच्चा तच्चाए वालुयप्पभाए पुढवीए उक्कोसकाल जाव उव्वट्ठिता पक्खीसु उववज्जिहिति। तत्थ वि णं सत्थवज्जे जाव किच्चा दोच्चं पि तच्चाए वालुय जाव उव्वट्ठिता दोच्चं पि पक्खीसु उवव0 जाव किच्चा दोच्चाए सक्करप्पभाए जाव उव्वट्ठिता सिरीसिवेसु उवव0। तत्थ वि णं सत्थ0 जाव किच्चा दोच्चं पि दोच्चाए सक्करप्पभाए जाव उव्वट्ठिता दोच्चं पि सिरीसिवेसु उववज्जिहिति जाव किच्चा इमीसे रतणप्पभाए पुढवीए उक्कोसकालट्ठितीयंसि नरगंसि नेरइयताए उववज्जिहिति, जाव उव्वट्ठिता सण्णीसु उववज्जिहिति। तत्थ वि णं सत्थवज्जे जाव किच्चा असण्णीसु उववज्जिहिति। तत्थ वि णं सत्थवज्जे जाव किच्चा दोच्चं पि इमीसे रयणप्पभाए पुढवीए पलिओवमस्स असंखेज्जइभागट्ठितीयंसि नरगंसि नेरइयताए उववज्जिहिति।

से णं ततो उव्वट्ठिता जाइं इमाइं खहचरविहाणाइं भवंति, तं जहा--चम्मपक्खीणं लोमपक्खीणं समुग्गपक्खीणं विततपक्खीणं तेसु अणेगसतसहस्सखुतो उद्दाइता उद्दाइता तत्थेव भुज्जो भुज्जो पच्चायाहिति। सव्वत्थ वि णं सत्थवज्जे दाहवक्कंतीए कालमासे कालं किच्चा जाइं इमाइं भुयपरिसप्पविहाणाइं भवंति; तं जहा-गोहाणं नउलाणं जहा पण्णवणापदे जाव जाहगाणं चाउप्पाइयाणं, तेसु, अणेगसयसहस्सखुतो सेसं जहा खहचराणं, जाव किच्चा जाइं इमाइं उरपरिसप्पविहाणाइं भवंति, तं जहा--अहीणं अयगराणं आसालियाणं महोरगाणं, तेसु अणेगसयसह0 जाव किच्चा जाइं इमाइं चउप्पयविहाणाइं भवंति, तं जहा--एगखुराणं दुखुराणं गंडीपदाणं सणप्पदाणं, तेसु अणेगसयसह0 जाव किच्चा जाइं इमाइं जलचर विहाणाइं भवंति, तं जहा--मच्छाणं कच्छभाणं जाव सुंसुमाराणं, तेसु अमेगसय सहस्स0 जाव किच्चा जाइं इमाइं चउरिंदियविहाणाइं भवंति, तं जहा--अंधियाणं पोत्तियाणं जहा पण्णवणापदे जाव गोमयकीडाणं, तेसु अणेगसय0 जाव किच्चा जाइं इमाइं तेइंदियविहाणाइं भवंति, तं जहा-उवचियाणं जाव हत्थिसांडाणं, तेसु अणेगसय0 जाव किच्चा जाइं इमाइं बेइंदियविहाणाइं भवंति तं जहा-पुलाकिमियाणं जाव समुद्धलिकखाणं, तेसु अणेगसय0 जाव किच्चा जाइं इमाइं वणस्सतिविहाणाइं भवंति, तं जहा-

रुक्खाणं गच्छाणं जाव कुहुणाणं, तेसु अणेगसय० जाव पच्चायाइस्सइ, उस्सन्नं च णं कडुयरुक्खेसु कडुयवल्लीसु सव्वत्थ वि णं सत्थवज्झे जाव किच्चा जाइं इमाइं वाउकाइयविहाणाइं भवंति, तं जहा--पाईणवाताणं जाव सुद्धवाताणं, तेसु अणेगसयसहस्स० जाव किच्चा जाइं इमाइं तेउक्काइयविहाणाइं भवंति, तं जहा--इंगालाणं जाव सूरकंतमणिनिस्सियाणं, तेसु अणेगसयसह० जाव किच्चा जाइं इमाइं आउकाइयविहाणाइं भवंति, तं जहा--उस्साणं जाव खातोदगाणं, तेसु अणेगसयसह० जाव पच्चायाइस्सति, उस्सणं च णं खारोदएसु खातोदएसु, सव्वत्थ वि णं सत्थवज्झे जाव किच्चा जाइं इमाइं पुढविकाइयविहाणाइं भवंति, तं जहा--पुढवीणं सक्कराणं जाव सूरकंताणं, तेसु अणेगसय० जाव पच्चायाहिति, उस्सन्नं च णं खरबादरपुढविकाइएसु, सव्वत्थ वि णं सत्थवज्झे जाव किच्चा रायगिहे नगरे बाहिंखरियताए उववज्जिहिति।

तत्थ वि णं सत्थवज्झे जाव किच्चा दोच्चं पि रायगिहे नगरे अंतोखरियताए उववज्जिहिति। तत्थ वि णं सत्थवज्झे जाव किच्चा ।

**[६५९]** इहेव जंबुद्धीवे दीवे भारहे वासे विंझगिरिपादमूले बेभेले सन्निवेसे माहणकुलसि दारियताए पच्चायाहिति। तए णं तं दारियं अम्मापियरो उम्मुक्कबालभावं जोव्वणमणुप्पतं पडिरुविएणं सुंकेणं पडिरुविएणं विणएणं पडिरुवियस्स भतारस्स भारियताए दलइस्संठि। सा णं तस्स भारिया भविस्सति इट्ठा कंता जाव अणुमया भंडकरंडगसमाणा तेल्लकेला इव सुसंगोविया, चेलपेला इव सुसंपरिहिया, रयणकरंडओ विव सुरक्खिया सुसंगोविया-मा णं सीयं मा णं उण्हं जाव परीसहोवसग्गा फुसंतु। तए णं सा दारिया अन्नदा कदापि गुव्विणी ससुरकुलाओ कुलघरं निज्जमाणी अंतरा दवग्गि जालाभिहया कालमासे कालं किच्चा दाहिणिल्लेसु अग्गिकुमारेसु देवेसु देवताए उववज्जिहिति।

से णं ततोहितो अणंतरं उव्वट्ठिता माणुसं विग्गहं लभिहिति, माणुसं विग्गहं लभिता केवलं बोधिं बुज्झिहिति, केवलं बोधिं बुज्झिता मुंडे भविता अगाराओ अणगारियं पव्वइहिति। तत्थ वि णं विराहियसामण्णे कालमासे कालं किच्चा दाहिणिल्लेसु असुरकुमारेसु देवेसु देवताए उववज्जिहिति।

से णं ततोहितो जाव उव्वट्ठिता माणुसं विग्गहं तं चेव जाव तत्थ वि णं विराहियसामण्णे कालमासे जाव किच्चा दाहिणिल्लेसु नागकुमारेसु देवेसु देवताए उववज्जिहिति।

से णं ततोहितो अणंतरं० एवं एणं अभिलावेणं दाहिणिल्लेसु सुवण्णकुमारेसु, दाहिणिल्लेसु विज्जुकुमारेसु, एवं अग्गिकुमारवज्जं जाव दाहिणिल्लेसु थणियकुमारेसु०।

से णं ततो जाव उव्वट्ठिता माणुस्सं विग्गहं लभिहिति जाव विराहियसामण्णे जोतिसिएसु देवेसु उववज्जिहिति।

से णं ततो अणंतरं चयं चइत्ता माणुस्सं विग्गहं लभिहिति, केवलं बोधिं बुज्झिहिति जाव अविराहियसामण्णे कालमासे कालं किच्चा सोहम्मं कप्पे देवताए उववज्जिहिति।

से णं ततोहितो अणंतरं चयं चइत्ता माणुस्सं विग्गहं लभिहिति, केवलं बोधिं बुज्झिहिति। तत्थ वि णं अविराहियसामण्णे कालमासे कालं किच्चा ईसाणे कप्पे देवताए उववज्जिहिति।

से णं ततोहितो अणंतरं चयं चइत्ता माणुस्सं विग्गहं लभिहिति, केवलं बोधिं बुज्झिहिति। तत्थ वि णं अविराहियसामण्णे कालमासे कालं किच्चा सणकुमारे कप्पे देवताए उववज्जिहिति।

से णं ततोहितो एवं जहा सणकुमारे तथा बंभलोए महासुक्के आणए आरणे०।

से णं ततो जाव अविराहियसामण्णे कालमासे कालं किच्चा सच्चट्ठसिद्धे महाविमाणे देवताए उववज्जिहिति।

से णं ततोहितो अणंतरं चयं चयिता महाविदेहे वासे जाइं इमाइं कुलाइं भवंति-अड्ढाइं जाव अपरिभूयाइं, तहप्पगारेसु कुलेसु पुमत्ताए पच्चायाहिति। एवं जहा उववातिए दढप्पतिण्णवत्तव्वता सच्चेव वत्तव्वता निरवसेसा भाणितव्वा जाव केवलवरनाण-दंसणे समुप्पज्जिहिति।

तए णं से दढप्पतिण्णे केवली अप्पणो तीयद्धं आभोएही, अप्प0 आ0 २ समणे निग्गंथे सद्दावेहिति, सम0 स0 २ एवं वदिही--'एवं खलु अहं अज्जो! इतो चिरातीयाए अद्दाए गोसाले नामं मंखलिपुत्ते होत्था समणघायए जाव छउमत्थे चेव कालगए, तम्मूलगं च णं अहं अज्जो! अणादीयं अणवदग्गं दीहमद्धं चाउरंतं संसारकंतरं अणुपरियट्ठिण्णं। तं मा णं अज्जो! तुब्भं पि केयि भवतु आयरियपडिणीए, उवज्झायपडिणीए आयरिय-उवज्झायाणं अयसकारए अवण्णकारए अकित्तिकारए, मा णं से वि एवं चेव अणादीयं अणवयग्गं जाव संसारकंतरं अणुपरियट्ठिण्णं हिति जहा णं अहं'।

तए णं ते समणा निग्गंथा दढप्पतिण्णस्स केवलिस्स अंतियं एयमट्ठं सोच्चा निसम्मा भीया तत्था तसिता संसारभउव्विग्गा दढप्पतिण्णं केवलं वंदिहिति नमंसिहिति, वं0 २ तस्स ठाणस्स आलोएहिति निंदिहिति जाव पडिवज्जिहिति।

तए णं से दढप्पतिण्णे केवली बहूइं वासाइं केवलिपरियागं पाउणेहिति, बहू0 पा0 २ अप्पणो आउसेसं जाणेत्ता भत्तं पच्चक्खाहिति एवं जहा उववातिए जाव सच्चदुक्खाणमंतं काहिति।

सेवं भंते! सेवं भंते! ति जाव विहरति।

०-पन्नरसमं सयं समतं-०

० मुनि दीपरत्तसागरेण संशोधितः सम्पादितश्च पन्नरसमं सतं समतं ०

[ ] सोलसमं सयं [ ]

[६६०] अहिकरणि जरा कम्ममे जावतियं गंगदत्त सुमिणे य ।  
उवयोग लोग बलि ओहि दीव उदही दिसा थणिया॥

० पढमो उद्देशो ०

[६६१] तेणं कालेणं तेणं समएणं रायगिहे जाव पज्जुवासमाणे एवं वदासि--  
अत्थि णं भंते! अधिकरणिंसि वाउयाए वक्कमइ? हंता; अत्थि।

से भंते! किं पुट्ठे उद्दाति, अपुट्ठे उद्दाइ? गोयमा! पुट्ठे उद्दाइ, नो अपुट्ठे उद्दाइ।

से भंते! किं असरीरे निक्खमइ, असरीरे निक्खमइ? एवं जहा खंदए जाव सेतेणट्ठेणं जाव असरीरे निक्खमति।

[६६२] इंगालकारियाए णं भंते! अगणिकाए केवतियं कालं संचिट्ठइ? गोयमा! जहन्नेणं अंतोमुहुत्तं, उक्कोसेणं तिन्नि रातिंदियाइं। अन्ने वित्थ वाउयाए वक्कमति, न विणा वाउकाएणं अगणिकाए उज्जलति।

[६६३] पुरिसे णं भंते! अयं अयकोट्ठंसि आयोमयेणं संडासएणं उच्चिहमाणे वा पच्चिहमाणे

वा कतिकिरिए? गोयमा! जावं च णं से पुरिसे अयं अयकोट्ठंसि अयोमयेणं संडासएणं उव्विहति वा पव्विहति वा तावं च णं से पुरिसे काइयाए जाव पाणातिवायकिरियाए पंचहिं किरियाहिं पुट्ठे; जेसिं पि य णं जीवाणं सरीरेहिंतो अये निव्वत्तिए, अयकोट्ठे निव्वत्तिए, संडासए निव्वत्तिए, इंगाला निव्वत्तिया, इंगालकड्ढणी निव्वत्तिया, भत्था निव्वत्तिया, ते वि णं जीवा काइयाए जाव पंचहिं किरियाहिं पुट्ठा।

पुरिसे णं भंते! अयं अयकोट्ठाओ अयोमएणं संडासएणं गहाय अहिकरणिंसि उक्खिवमाणे वा निक्खिवमाणे वा कतिकिरिए? गोयमा! जावं च णं से पुरिसे अयं अयकोट्ठाओ जाव निक्खिवति वा तावं च णं से पुरिसे काइयाए जाव पाणातिवायकिरियाए पंचहिं किरियाहिं पुट्ठे; जेसिं पि य णं जीवाणं सरीरेहिंतो अये निव्वत्तिए, संडासए निव्वत्तिते, चम्मेट्ठे निव्वत्तिए, मुट्ठिणं निव्वत्तिए, अधिकरणी णिव्वत्तिता, अधिकरणिखोडी णिव्वत्तिता, उदगदोणी णि०, अधिकरणसाला निव्वत्तिया ते वि णं जीवा काइयाए जाव पंचहिं किरियाहिं पुट्ठा।

**[६६४]** जीवे णं भंते! किं अधिकरणी, अधिकरणं? गोयमा! जीवे अधिकरणी वि, अधिकरणं पि।

से केणट्ठेणं भंते! एवं वुच्चति 'जीवे अधिकरणी वि, अधिकरणं पि'? गोयमा! अविरतिं पडुच्च, सेतेणट्ठेणं जाव अहिकरणं पि।

नेरतिए णं भंते! किं अधिकरणी, अधिकरणं? गोयमा! अधिकरणी वि, अधिकरणं पि। एवं जहेव जीवे तहेव नेरइए वि।

एवं निरंतरं जाव वेमाणिए।

जीवे णं भंते! किं साहिकरणी, निरधिकरणी? गोयमा! साहिकरणी, नो निरहिकरणी।

से केणट्ठेणं० पुच्छा। गोयमा! अविरतिं पडुच्च, सेतेणट्ठेणं जाव नो निरहिकरणी।

एवं जाव वेमाणिए।

जीव णं भंते! किं आयाहिकरणी, पराहिकरणी, तदुभयाधिकरणी? गोयमा! आयाहिकरणी वि, पराधिकरणी वि, तदुभयाहिकरणी वि।

से केणट्ठेणं भंते! एवं वुच्चति जाव तदुभयाधिकरणी वि? गोयमा! अविरतिं पडुच्च। सेतेणट्ठेणं जाव तदुभयाहिकरणी वि।

एवं जाव वेमाणिए।

जीवाणं भंते! अधिकरणे किं आयप्पयोगनिव्वत्तिए, परप्पयोगनिव्वत्तिए, तदुभयप्पयोगनिव्वत्तिए? गोयमा! आयप्पयोगनिव्वत्तिए वि, परप्पयोगनिव्वत्तिए वि, तदुभयप्पयोगनिव्वत्तिए वि।

से केणट्ठेणं भंते! एवं वुच्चइ? गोयमा! अविरतिं पडुच्च। से तेणट्ठेणं जाव तदुभयप्पयोगनिव्वत्तिए वि।

एवं जाव वेमाणियाणं।

**[६६५]** कति णं भंते! सरीरगा पन्नता? गोयमा! पंच सरीरगा पन्नता, तं जहा-ओरालिए जाव कम्मए।

कति णं भंते! इंदिया पन्नता? गोयमा! पंच इंदिया पन्नता, तं जहा-सोतिंदिए जाव फासिंदिए।

कतिविहे णं भंते! जोए पन्नते? गोयमा! तिविहे जोए पन्नते, तं जहा--मणजोए वइजोए कायजोए।

जीवे णं भंते! आरोलियसरीरं निव्वत्तेमाणे किं अधिकरणी, अधिकरणं? गोयमा! अधिकरणी वि, अधिकरणं पि।

से केणट्ठेणं भंते! एवं वुच्चइ अधिकरणी वि, अधिकरणं पि? गोयमा! अविरतिं पडुच्च। सेतेणट्ठेणं जाव अधिकरणं पि।

पुढविकाइए णं भंते! ओरालियसरीरं निव्वत्तेमाणे किं अधिकरणी? एवं चेव।

एवं जाव मणुस्से।

एवं वेडवियसरीरं पि। नवरं जस्स अत्थि।

जीवे णं भंते! आहारगसरीरं निव्वत्तेमाणे किं अधिकरणी? पुच्छ। गोयमा! अधिकरणी वि, अधिकरणं पि।

से केणट्ठेणं जाव अधिकरणं पि? गोयमा! पमादं पडुच्च। से तेणट्ठेणं जाव अधिकरणं पि।

एवं मणुस्से वि।

तेयासरीरं जहा ओरालियं, नवरं सव्वजीवाणं भाणियत्वं।

एवं कम्मगसरीरं पि।

जीवे णं भंते! सोत्तिंदियं निव्वत्तेमाणे किं अधिकरणी, अधिकरणं? एवं जहेव ओरालियसरीरं तहेव सोत्तिंदियं पि भाणियत्वं। नवरं जस्स अत्थि सोत्तिंदियं।

एवं चक्खिंदिय-घाणिंदिय-जिब्भिंदिय-फासिंदियाणि वि, नवरं जाणियत्वं जस्स जं अत्थि।

जीवे णं भंते! मणजोगं निव्वत्तेमाणे किं अधिकरणी, अधिकरणं? एवं जहेव सोत्तिंदियं तहेव निरवसेसं।

वइजोगो एवं चेव। नवरं एगिंदियवज्जाणं।

एवं कायजोगो वि, नवरं सव्वजीवाणं जाव वेमाणिए।

सेवं भंते! सेवं भंते! ति०।

**\*सोलसमे सए बत्तीसइमो उद्देशो समतो\***

**० बीओ उद्देशो ०**

[६६६] रायगिहे जाव एवं वदासि-

जीवाणं भंते! किं जहा, सोगे? गोयमा! जीवाणं जरा वि, सोगे वि।

से केणट्ठेणं भंते! जाव सोए वि? गोयमा! जे णं जीवा सारीरं वेयणं वेदंति तेसि णं जीवाणं जरा, जे णं जीवा माणसं वेदणं वेदंति तेसि णं जीवाणं सोगे। सेतेणट्ठेणं जाव सोगे वि।

एवं नेरइयाण वि।

एवं जाव थणियकुमाराणं।

पुढविकाइयाणं भंते! किं जरा, सोगे? गोयमा! पुढविकाइयाणं जरा, नो सोगे।

से केणट्ठेणं जाव नो सोगे? गोयमा! पुढविकाइया णं सारीरं वेदणं वेदंति, नो माणसं वेदणं

वेदंति। सेतेणट्ठेणं जाव नो सोगे।

एवं जाव चउरिंदियाणं।

सेसाणं जहा जीवाणं जाव वेमाणियाणं।

सेवं भंते! सेवं भंते! जाव पज्जुवासति।

[६६७] तेणं कालेणं तेणं समयेणं सक्के देविंदे देवराया वज्जपाणी पुरंदरे जाव भुंजमाणे विहरति। इमं च णं केवलकप्पं जंबुद्धीवं दीवं विपुलेणं ओहिणा आभोएमाणे आभोएमाणे पासति यत्थ समणं भगवं महावीरं जंबुद्धीवे दीवे एवं जहा ईसाणे ततियसए तहेव सक्को वि। नवरं आभियोगिए ण सद्दावेति, हरी पायत्ताणियाहिवती, सुघोसा घंठा, पालओ विमाणकारी, पालगं विमाणं, उत्तरिल्ले निज्जाणमग्गे, दाहिणपुरत्थिमिल्ले रतिकरपट्टवए, सेसं तं चेव जाव नामगं सावेत्ता पज्जुवासति। धम्मकहा जाव परिसा पडिगया।

तए णं से सक्के देविंदे देवराया समणस्स भगवतो महावीरस्स अंतियं धम्मं सोच्चा निसम्मा हट्ठत्तुठ्ठो समणं भगवं महावीरं वंदति नमंसति, २ ता एवं वयासी--

कतिविहे णं भंते! ओग्गहे पन्नते? सक्का! पंचविहे ओग्गहे पन्नते, तं जहा-देविंदोग्गहे, रायोग्गहे गाहावतिओग्गहे सागारिओग्गहे साधम्मिओग्गहे।

जे इमे भंते! अज्जताए समणा निग्गंथा विहरंति एएसि णं अहं ओग्गहं अणुजाणामीति कट्ठु समणं भगवं महावीरं वंदति नमंसति, २ ता तमेव दिव्वं जाणविमाणं द्रूहति, द्रू २ जामेव दिसं पाउळ्भूए तामेव दिसं पडिगए।

भंते! ति भगवं गोयमे समणं भगवं महावीरं वंदति नमंसति, वं २ ता एवं वयासी-जं णं भंते! सक्के देविंदे देवराया तुब्भे एवं वदति सच्चे णं एस मट्ठे? हंता, सच्चे।

[६६८] सक्के णं भंते! देविंदे देवराया किं सम्मावादी, मिच्छावादी? गोयमा! सम्मावादी, नो मिच्छावादी।

सक्के णं भंते! देविंदे देवराया किं सच्चं भासं भासति, मोसं भासं भासति, सच्चामोसं भासं भासति, असच्चामोसं भासं भासइ? गोयमा! सच्चं पि भासं भासति, जाव असच्चामोसं पि भासं भासति।

सक्के णं भंते! देविंदे देवराया किं सावज्जं भासं भासति, अणवज्जं भासं भासति? गोयमा! सावज्जं पि भासं भासति, अणवज्जं पि भासं भासति।

से केणट्ठेणं भंते! एवं वुच्चइ--सावज्जं पि जाव अणवज्जं पि भासं भासति? गोयमा! जाहे णं सक्के देविंदे देवराया सुहुमकायं अनिज्जूहिताणं भासं भासति ताहे णं सक्के देविंदे देवराया सावज्जं भासं भासति, जाहे णं सक्के देविंदे देवराया सुहुमकायं निज्जूहिताणं भासं भासइ ताहे सक्के देविंदे देवराया अणवज्जं भासं भासति, सेतेणट्ठेणं जाव भासति।

सक्के णं भंते! देविंदे देवराया किं भवसिद्धीए, अभवसिद्धीए, सम्मदिट्ठीए? एवं जहा मोउद्देसए सणंकुमारो जाव नो अचरिमे।

[६६९] जीवाणं भंते! किं चेयकडा कम्मा कज्जंति, अचेयकडा कम्मा कज्जंति? गोयमा! जीवाणं चेयकडा कम्मा कज्जंति, नो अचेयकडा कम्मा कज्जंति।

से केणट्ठेणं भंते! एवं वुच्चइ जाव कज्जंति? गोयमा जीवाणं आहारोवचिता पोग्गला

बौद्धिचिया पोग्गला कलेवरचिया पोग्गला तहा तहा णं ते पोग्गला परिणमंति, नत्थि अचेयकडा कम्मा समणाउसो!! दुट्ठाणेसु दुसेज्जासु दुन्निसीहियासु तहा तहा णं ते पोग्गला परिणमंति, नत्थि अचेयकडा कम्मा समणाउसो!! आयंके से वहाए होति, संकप्पे से वहाए होति, मरणंते से वहाए होति, तहा तहा णं ते पोग्गला परिणमंति, नत्थि अचेयकडा कम्मा समणाउसो!! सेतेणट्ठेणं जाव कम्मा कज्जंति।

एवं नेरतियाण वि।

एवं जाव वेमाणियाणं।

सेवं भंते! सेवं भंते! जाव विहरति।

**\*सोलसमे सए बीइओ उद्देशो समतो\***

**० तइओ उद्देशो ०**

**[६७०]** रायगिहे जाव एवं वदासि--

कति णं भंते! कम्मपगडीओ पन्नताओ? गोयमा! अट्ठ कम्मपगडीओ पन्नताओ, तं जहा--  
नाणावरणिज्जं जाव अंतराइयं।

एवं जाव वेमाणियाणं।

जीवे णं भंते! नाणावरणिज्जं कम्मं वेदेमाणे कति कम्मपगडीओ वेदेति? गोयमा! अट्ठ  
कम्मपगडीओ, एवं जहा पन्नवणाए वेदावेउद्देशओ सो चेव निरवसेसो भाणियच्चो। वेदाबंधो वि तहेव।  
बंधावेदो वि तहेव। बंधाबंधो वि तहेव भाणियच्चो जाव वेमाणियाणं ति।

सेवं भंते! सेवं भंते! ति जाव विहरति।

**[६७१]** तए णं समणे भगवं महावीरे अन्नदा कदायि रायगिहाओ नगराओ गुणसिलाओ  
चेतियाओ पडिनिक्खमति, प०२ बहिया जणवयविहारं विहरति।

तेणं कालेणं तेणं समएणं उल्लुयतीरे नामं नगरे होत्था। वण्णओ।

तस्स णं उल्लुयतीरस्स नगरस्स बहिया उत्तरपुरत्थिमे दिसिभाए, एत्थ णं एगजंबुए नामं  
चेतिए होत्था। वण्णओ।

तए णं समणे भगवं महावीरे अन्नदा कदायि पुच्चाणुपुच्चिं चरमाणे जाव एगजंबुए  
समोसडे। जाव परिसा पडिगया।

भंते! ति भगवं गोयमे समणं भगवं महावीरं वंदति नमंसति, २ एवं वदासि--

अणगारस्स णं भंते! भावियप्पणो छट्ठंछट्ठेणं अणिक्खित्तेणं जाव आतावेमाणस्स तस्स णं  
पुरत्थिमेणं अवड्ढं दिवसं नो कप्पति हत्थं वा पायं वा बाहं वा ऊरुं वा आउंवेत्तए वा  
पसारेत्तए वा; पच्चत्थिमेणं से अवड्ढं दिवसं कप्पति हत्थं वा पायं वा जाव ऊरुं वा आउंवेत्तए वा  
पसारेत्तए वा। तस्स य अंसियाओ लंबंति, तं च वेज्जे अदक्खु, ईसिं पाडेति, ई० २ अंसियाओ छिंदेज्जा। से  
नूणं भंते! जे छिंदति तस्स किरिया कज्जति? जस्स छिज्जंति नो तस्स किरिया कज्जइ णऽन्नत्थेगेणं  
धम्मंतराइएणं? हंता, गोयमा! जे छिंदति जाव धम्मंतराइएणं।

सेवं भंते! सेवं भंते! ति०।

**\*सोलसमे सए तइओ उद्देशो समतो\***

## ० चउत्थो उद्देशो ०

[६७२] रायगिहे जाव एवं वदासि-

जावतियं णं भंते! अन्नगिलायए समणे निग्गंथे कम्मं निज्जरेति एवतियं कम्मं नरएसु नेरतिया वासेण वा वासेहि वा वाससतेण वा खवयंति? णो इणट्ठे समट्ठे।

जावतियं णं भंते! चउत्थभत्तिए समणे निग्गंथे कम्मं निज्जरेति एवतियं कम्मं नरएसु नेरतिया वाससतेण वा वाससतेहि वा वाससहस्सेण वा खवयंति? णो इणट्ठे समट्ठे।

जावतियं णं भंते! छट्ठभत्तिए समणे निग्गंथे कम्मं निज्जरेति एवतियं कम्मं नरएसु नेरतिया वाससहस्सेण वा वाससहस्सेहि वा वाससयसहस्सेण वा खवयंति? णो इणट्ठे समट्ठे।

जावतियं णं भंते! अट्ठभत्तिए समणे निग्गंथे कम्मं निज्जरेति एवतियं कम्मं नरएसु नेरइया वाससयसहस्सेण वा वाससयसहस्सेहि वा वासकोडीए वा खवयंति? नो इणट्ठे समट्ठे।

जावतियं णं भंते! दसमभत्तिए समणे निग्गंथे कम्मं निज्जरेति एवतियं कम्मं नरएसु नेरतिया वासकोडीए वा वासकोडीहिं वा वासकोडाकोडीए वा खवयंति? नो इणट्ठे समट्ठे।

से केणट्ठेणं भंते! एवं वुच्चति--जावतियं अन्नगिलातए समणे निग्गंथे कम्मं निज्जरेति एवतियं कम्मं नरएसु नेरतिया वासेण वा वासेहि वा वाससएण वा नो खवयंति, जावतियं चउत्थभत्तिए, एवं तं चेव पुच्चभणियं उच्चारयत्वं जाव वासकोडाकोडीए वा नो खवयंति? गोयमा!

से जहानामए-केयि पुरिसे जुण्णे जराजज्जरियदेहे सिढिलतयावलितरंगसंपिणद्धगते पविरलपरिसडियदंतसेढी उण्हाभिहए तण्हाभिहए आउरे झुंझिते पिवासिए दुब्बले किलंते एगं महं कोसंबगंडियं सुक्खं जडिलं गंठिल्लं चिक्कणं वाइद्धं अपत्तियं मुंडेण परसुणा अक्कमेज्जा, तए णं से पुरिसे महंताइं महंताइं सद्दाइं करेइ, नो महंताइं महंताइं दलाइं अवद्दालेति, एवामेव गोयमा! नेरइयाणं पावाइं कम्ममाइं गाढीकयाइं चिक्कणीकयाइं एवं जहा छट्ठसए जाव नो महापज्जवसाणा भवंति।

से जहा वा केयि पुरिसे अहिकरणिं आउडेमाणे महया जाव नो महापज्जवसाणा भवंति।

से जहानामए- केयि पुरिसे तरुणे बलवं जाव मेहावी निउणसिप्पोवगए एगं महं सामलिगंडियं उल्लं अजडिलं अगंठिल्लं अचिक्कणं अवाइद्धं सपत्तियं तिक्खेण परसुणा अक्कमेज्जा, तए णं से पुरिसे नो महंताइं महंताइं सद्दाइं करेति, महंताइं महंताइं दलाइं अवद्दालेति, एवामेव गोयमा! समणाणं निग्गंथाणं अहाबादराइं कम्ममाइं सिढिलीकयाइं णिट्ठियाइं कयाइं जाव खिप्पामेव परिविद्धत्थाइं भवंति, जावतियं तावतियं जाव महापज्जवसाणा भवंति।

से जहा वा केयि पुरिसे सुक्कं तणहत्थगं जायतेयंसि पक्खिवेज्जा एवं जहा छट्ठसए तहा अयोक्कवल्ले वि जाव महापज्जवसाणा भवंति। सेतेणट्ठेणं गोयमा! एवं वुच्चइ जावतियं अन्नइलायए समणे निग्गंथे कम्मं निज्जरेइ० तं चेव जाव वासकोडाकोडीए वा नो खवयंति।

सेवं भंते! सेवं भंते! जाव विहरइ।

**\*सोलसमे सए चउत्थो उद्देशो समतो\***

## ० पंचमो उद्देशो ०

[६७३] तेणं कालेणं तेणं समएणं उल्लुयतीरे नामं नगरे होत्था। वण्णओ। एगजंबुए चेइए।

वण्णओ।

तेणं कालेणं तेणं समएणं सामी समोसठे जाव परिसा पज्जुवासति।

तेणं कालेणं तेणं समएणं सक्के देविंदे देवराया वज्जपाणी एवं जहेव बितियउद्देशए तहेव दिव्वेणं जाणविमाणेणं आगतो जाव जेणेव समणे भगवं महावीरे तेणेव उवागच्छइ, २ ता जाव नमंसिता एवं वदासि--

देवे णं भंते! महिइढीए जाव महेसक्खे बाहिरए पोग्गले अपरियादिइता पभू आगमित्तए? नो इणट्ठे समट्ठे।

देवे णं भंते! महिइढीए जाव महेसक्खे बाहिरए पोग्गले परियादिइता पभू आगमित्तए? हंता, पभू।

देवे णं भंते! महिइढीए एवं एतेणं अभिलावेणं गमित्तए। एवं भासित्तए वा, विआगरित्तए वा, उम्मिसावेत्तए वा निमिसावेत्तए वा, आउंणावेत्तए वा पसारेत्तए वा, ठाणं वा सेज्जं वा निसीहियं वा चेइत्तए वा, एवं विउच्चित्तए वा, एवं परियारेत्तए वा? जाव हंता, पभू।

इमाइं अट्ठ उक्खित्तपसिणवागरणाइं पुच्छति, इमाइं ० २ संभंतियवंदणएणं वंदति, संभंतिय ० २ तमेव दिव्वं जाणविमाणं द्रूहति, २ जामेव दिसं पाउब्भूए तामेव दिसं पडिगते।

**[६७४]** भंते!' ति भगवं गोयमे समणं भगवं महावीरं वंदति नमंसति, २ एवं वयासी-- अन्नदा णं भंते! सक्के देविंदे देवराया देवाणुप्पियं वंदति नमंसति, वंदि ० २ सक्कारेति जाव पज्जुवासति, किं णं भंते! अज्ज सक्के देविंदे देवराया देवाणुप्पियं अट्ठ उक्खित्तपसिणवागरणाइं पुच्छइ, २ संभंतियवंदणएणं वंदति ०, २ जाव पडिगए? 'गोयमा!' दि समणे भगवं महावीरे भगवं गोयमं एवं वदासि--

एवं खलु गोयमा! तेणं कालेणं तेणं समएणं महासुक्के कप्पे महासामाणे विमाणे दो देवा महिइढीया जाव महेसक्खा एगविमाणंसि देवत्ताए उववन्ना, तं जहा--मायिमिच्छादिट्ठिउववन्नए, अमायिसम्मद्विट्ठिउववन्नए य।

तए णं से मायिमिच्छादिट्ठिउववन्नए देवे तं अमायिसम्मद्विट्ठिउववन्नगं देवं एवं वदासि--परिणममाणा पोग्गला नो परिणया, अपरिणया; परिणमंतीति पोग्गला नो परिणया, अपरिणया।

तए णं से अमायिसम्मद्विट्ठिउववन्नए देवे तं मायिमिच्छद्विट्ठिउववन्नगं देवं एवं वयासी--परिणममाणा पोग्गला परिणया, नो अपरिणया; परिणमंतीति पोग्गला परिणया, नो अपरिणया।

तं मायिमिच्छद्विट्ठिउववन्नगं देवं एवं पडिहणइ, एवं पडिहणित्ता ओहिं पउंजति, ओहिं ० २ ममं ओहिणा आभोएति, ममं ० २ अयमेयारूवे जाव समुप्पज्जित्था--'एवं खलु समणे भगवं महावीरे जंबुद्धीवे दीवे भारहे वासे उल्लुयतीरस्स नगरस्स बहिया एगजंबुए चेइए अहापडिरूवं जाव विहरति, तं सेयं खलु मे समणं भगवं महावीरं वंदिता जाव पज्जुवासिता इमं एयारूवं वागरणं पुच्छित्तए' ति कट्ठु एवं संपेहेति, एवं संपेहिता चउहि वि सामाणियसाहस्सीहिं ० परियारो जहा सूरियाभस्स जाव निग्घोसनाइतरवेणं जेणेव जंबुद्धीवे दीवे जेणेव भारहे वासे जेणेव उल्लुयतीरे नगरे जेणेव एगजंबुए चेतिए जेणेव ममं अंतियं तेणेव पहारेत्थ गमणाए। तए णं से सक्के देविंदे देवराया तस्स देवस्स तं दिव्वं देविइं दिव्वं देवजुतिं दिव्वं देवाणुभावं दिव्वं तेयलेस्सं असहमाणे ममं अट्ठ उक्खित्तपसिणवागरणाइं पुच्छति, पु ० २ संभंतिय जाव पडिगए।

[६७५] जावं च णं समणे भगवं महावीरे भगवतो गोयमस्स एयमट्ठं परिकहेति तावं च णं से देवे तं देसं हव्वमागए।

तए णं से देवे समणं भगवं महावीरं तिक्खुतो वंदति नमंसति, २ एवं वदासी--"एवं खलु भंते! महासुक्के कप्पे महासामाणे विमाणे एगे मायिमिच्छद्दिट्ठिउववन्नए देवे ममं एवं वदासी-- 'परिणममाणा पोग्गला नो परिणया, अपरिणया; परिणमंतीति पोग्गला नो परिणया, अपरिणया'। तए णं अहं तं मायिमिच्छद्दिट्ठिउववन्नगं देवं एवं वदामि--'परिणममाणा पोग्गला परिणया, नो अपरिणया; परिणमंतीति पोग्गला परिणया, णो अपरिणया'। से कहमेयं भंते! एवं?"

गंगदत्ता! ई समणे भगवं महावीरे गंगदत्तं देवं एवं वदासी--अहं पि णं गंगदत्ता! एवमाइक्खामि० ४ परिणममाणा पोग्गला जाव नो अपरिणया, सच्चमेसे अट्ठे।

तए णं से गंगदत्ते देवे समणस्स भगवतो महावीरस्स अंतियं एयमट्ठं सोच्चा निसम्म हट्ठतुट्ठ० समणं भगवं महावीरं वंदति नमंसति, २ नच्चासन्ने जाव पज्जुवासइ।

तए णं समणे भगवं महावीरे गंगदत्तस्स देवस्स तीसे य जाव धम्मं परिकहेति जाव आराहए भवति।

तए णं से गंगदत्ते देवे समणस्स भगवतो महावीरस्स अंतिये धम्मं सोच्चा निसम्म हट्ठतुट्ठ० उट्ठाए उट्ठेति, ३० २ समणं भगवं महावीरं वंदति नमंसति, २ एवं वदासी--अहं णं भंते! गंगदत्ते देवे किं भवसिद्धिए अभवसिद्धिए? एवं जहा सूरियाभो जाव बत्तीसतिविहं नट्ठविहिं उवदंसेति, उव० २ जाव तामेव दिसं पडिगए।

[६७६] भंते! ति भगवं गोयमे समणं भगवं महावीरं जाव एवं वदासी--गंगदत्तस्स णं भंते! देवस्स सा दिव्वा देविड्ढी दिव्वा देवजुती जाव अणुप्पविट्ठा? गोयमा! सरीरं गया, सरीरं अणुप्पविट्ठा। कूडागारसालादिट्ठंतो जाव सरीरं अणुप्पविट्ठा। अहो! णं भंते! गंगदत्ते देवे महिड्ढीए जाव महेसक्खे।

गंगदत्तेणं भंते! देवेणं सा दिव्वा देविड्ढी दिव्वा देवजुती किणा लद्धा जाव जं णं गंगदत्तेणं देवेणं सा दिव्वा देविड्ढी जाव अभिसमन्नागया? 'गोयमा!' ई समणे भगवं गोयमं एवं वदासी--"एवं खलु गोयमा!"तेणं कालेणं तेणं समयेणं इहेव जंबुद्धीवे दीवे भारहे वासे हत्थिणापुरे णामं नगरे होत्था, वण्णओ। सहसंबवणे उज्जाणे, वण्णओ। तत्थ णं हत्थिणापुरे नगरे गंगदत्ते नामं गाहावती परिवसति अड्ढे जाव अपरिभूते।

तेणं कालेणं तेणं समयेणं मुणिसुव्वए अरहा आदिगरे जाव सव्वण्णू सव्वदरिसी आगासगएणं चक्केणं जाव पकडिड्ढज्जमाणेणं पकडिड्ढज्जमाणेणं सीसगणसंपरिवुडे पुव्वाणुपुव्विं चरमाणे गामाणुगामं जाव जेणेव सहसंबवणे उज्जाणे जाव विहरति। परिसा निग्गता जाव पज्जुवासति।

तए णं से गंगदत्ते गाहावती इमीसे कहाए लद्धट्ठे समाणे हट्ठतुट्ठ० णहाते कतबलिकम्मए जाव सरीरे सातो गिहातो पडिनिक्खमति, २ पादविहारचारेणं हत्थिणापुरं नगरं मज्झंमज्झेणं निग्गच्छति, नि० २ जेणेव सहसंबवणे उज्जाणे जेणेव मुणिसुव्वए अरहा तेणेव उवागच्छइ, उवा० २ मुणिसुव्वयं अरहं तिक्खुतो आयाहिणपयाहिणं जाव तिविहाए पज्जुवासणाए पज्जुवासति।

तए णं मुणिसुव्वए अरहा गंगदत्तस्स गाहावतिस्स तीसे य महति जाव परिसा पडिगता।

तए णं से गंगदत्ते गाहावती मुणिसुव्वयस्स अरहओ अंतियं धम्मं सोच्चा निसम्म

हट्ठतुट्ठो उट्ठाए उट्ठेति, उ०२ मुणिसुव्वतं अरहं वंदति नमंसति, वं० २ एवं वदासी--'सद्धामि णं भंते! निग्गंथं पावयणं जाव से जहेयं तुब्भे वदह। जं नवरं देवाणुप्पिया! जेट्ठपुत्तं कुडुंबे ठावेमि, तए णं अहं देवाणुप्पियाणं अंतियं मुंडे जाव पव्वयामि'। 'अहासुहं देवाणुप्पिया! मा पडिबंधं'।

तए णं से गंगदत्ते गाहावती मुणिसुव्वतेणं अरहया एवं वुत्ते समाणे हट्ठतुट्ठो मुणिसुव्वतं अरहं वंदति नमंसति, वं० २ मुणिसुव्वयस्स अरहओ अंतियाओ सहसंबवणाओ उज्जाणातो पडिनिक्खमति, पडि० २ जेणेव हत्थिणापुरे नगरे जेणेव सए गिहे तेणेव उवागच्छति, उवा०२ विपुलं असण-पाण० जाव उवक्खडावेइ, उव०२ मित्त-णाति-णियग० जाव आमंतेति, आ०२ ततो पच्छा प्हाते जहा पूरणे जाव जेट्ठपुत्तं कुडुंबे ठावेति, ठा० २ तं मित्त-णाति० जाव जेट्ठपुत्तं च आपुच्छति, आ० २ पुरिससहस्सवाहिणिं सीयं द्रूहति, पुरिससह० २ मित्त-णाति-नियग० जाव परिजणेणं जेट्ठपुत्तेण य समणुगम्ममाणमग्गे सत्विइढीए जाव णादितरवेणं हत्थिणापुरं नगरं मज्झंमज्झेणं निग्गच्छति, नि० २ जेणेव सहसंबवणे उज्जाणे तेणेव उवागच्छति, उ० २ छत्तादिए तित्थगरातिसए पासति, एवं जहा उद्दायणो जाव सयमेव आभरणं ओमुयइ, स० २ सयमेव पंचमुट्ठियं लोयं करेइ, स० २ जोणेव मुणिसुव्वये अरहा, एवं जहेव उद्दायणो तहेव पव्वइओ। तहेव एक्कारस अंगाइं अधिज्जइ जाव मासियाए संलेहणाए सट्ठिं भत्ताइं अणसणाए जाव छेदेति, सट्ठिं० २ आलोइयपडिक्कंते समाहिपते कालमासे कालं किच्चा महासुक्के कप्पे महासामाणे विमाणे उववायसभाए देवसयणिज्जंसि जाव गंगदत्तदेवताए उववन्ने।

"तए णं से गंगदत्ते देवे अहुणोववन्नमेतए समाणे पंचविहाए पज्जतीए पज्जतीभावं गच्छति, तं जहा--आहारपज्जतीए जाव भासा-मणपज्जतीए।

एवं खलु गोयमा! गंगदत्तेणं देवेणं सा दिव्वा देविइढी जाव अभिसमन्नागया।

गंगदत्तस्स णं भंते! देवस्स केवतियं कालं ठिती पन्नता? गोयमा! सत्तरसागरोवमाइं ठिती पन्नता।

गंगदत्ते णं भंते! देवे ताओ देवलोगाओ आउक्खएणं जाव महाविदेहे वासे सिज्झिहिति जाव अंतं काहिति।

सेवं भंते! सेवं भंते! ति०।

**\*सोलसमे सए पंचमो उद्देशो समतो\***

## ० छट्ठो उद्देशो ०

[६७७] कतिविधे णं भंते! सुविणदंसणे पन्नते? गोयमा! पंचविहे सुविणदंसणे पन्नते, तं जहा--अहातच्चे पयाणे चिंतासुविणे तत्त्विवरीए अक्कतदंसणे।

सुत्ते णं भंते! सुविणं पासति, जागरे सुविणं पासति, सुत्तजागरे सुविणं पासति?

गोयमा! नो सुत्ते सुविणं पासति, नो जागरे सुविणं पासति, सुत्तजागरे सुविणं पासति।

जीवा णं भंते! किं सुत्ता, जागरा, सुत्तजागरा?

गोयमा! जीवा सुत्ता वि, जागरा वि, सुत्तजागरा वि।

नेरतिया णं भंते! किं सुत्ता० पुच्छा। गोयमा! नेरइया सुत्ता, नो जागरा, नो सुत्तजागरा।

एवं जाव चउरिंदिया।

पंचेदियतिरिक्खजोणिया णं भंते! किं सुत्ता० पुच्छा।

गोयमा! सुत्ता, नो जागरा, सुत्ताजागरा वि।

मणुस्सा जहा जीवा।

वाणमंतर-जोतिसिय-वेमाणिया जहा नेरइया।

[६७८] संवुडे णं भंते! सुविणं पासति, असंवुडे सुविणं पासति, संवुडासंवुडे सुविणं पासति? गोयमा! संवुडे वि सुविणं पासति, असंवुडे वि सुविणं पासति, संवुडासंवुडे वि सुविणं पासति। संवुडे सुविणं पासति-अहातच्चं पासति। असंवुडे सुविणं पासति-तहा वा तं होज्जा, अन्नहा वा तं होज्जा। संवुडासंवुडे सुविणं पासति-एवं चेव।

जीवा णं भंते! किं संवुडा, असंवुडा, संवुडासंवुडा? गोयमा! जीवा संवुडा वि, असंवुडा वि, संवुडासंवुडा वि।

एवं जहेव सुत्ताणं दंडओ तहेव भाणियव्वो।

कति णं भंते! सुविणा पन्नता? गोयमा! बायालीसं सुविणा पन्नता।

कति णं भंते! महासुविणा पन्नता? गोयमा! तीसं महासुविणा पन्नता।

कति णं भंते! सव्वसुविणा पन्नता? गोयमा! बावतरिं सव्वसुविणा पन्नता।

तित्थयरमायरो णं भंते! तित्थगरंसि गब्भं वक्कममाणंसि कति महासुविणे पासित्ताणं पडिबुज्झंति? गोयमा! तित्थगरमायरो णं तित्थगरंसि गब्भं वक्कममाणंसि एएसिं तीसाए महासुविणाणं इमे चोदस महासुविणे पासित्ताणं पडिबुज्झंति, तं जहा--गय-वसभ-सीह जाव सिहिं च।

चक्कवट्ठिमायरो णं भंते! चक्कवट्ठिंसि गब्भं वक्कममाणंसि कति महासुविणे जाव बुज्झंति? गोयमा! चक्कवट्ठिमायरो चक्कवट्ठिंसि गब्भं वक्कममाणंसि एएसिं तीसाए महासु० एवं जहा तित्थगरमायरो जाव सिहिं च।

वासुदेवमायरो णं० पुच्छा। गोयमा! वासुदेवमायरो जाव वक्कममाणंसि एएसिं चोदसण्हं महासुविणाणं अन्नयरे सत्त महासुविणे पासित्ताणं पडिबुज्झंति।

बलदेवमायरो० पुच्छा। गोयमा! बलदेवमायरो जाव एएसिं चोदसण्हं महासुविणाणं अन्नयरे चत्तारि महासुविणे पासित्ताणं पडिबुज्झंति।

मंडलियमायरो णं भंते! मं० पुच्छा। गोयमा! मंडलियमायरो जाव एएसिं चोदसण्हं महासुविणाणं अन्नयरं एगं महासुविणं जाव पडिबुज्झंति।

[६७९] समणे भगवं महावीरेणं छउमत्थकालियाए अंतिमराइयंसि इमे दस महासुविणे पासित्ताणं पडिबुद्धे, तं जहा-एगं च णं महं घोररूवदित्थरं तालपिसायं सुविणे पराजियं पासित्ताणं पडिबुद्धे। एगं च णं महं सुक्किलपक्खगं पूसकोइलं सुविणे पासित्ताणं पडिबुद्धे। एगं च णं महं चित्तविचित्तपक्खगं पूसकोइलगं सुविणे पासित्ताणं पडिबुद्धे। एगं च णं महं दामदुगं सव्वरयणामयं सुविणे पासित्ताणं पडिबुद्धे। एगं च णं महं सेयं गोवग्गं सुविणे पासित्ताणं पडिबुद्धे। एगं च णं महं पउमसरं सव्वतो समंता कुसुमियं सुविणे पासित्ताणं पडिबुद्धे। एगं च णं महं सागरं उम्मी-वीयीसहस्सकलियं भुयाहिं तिण्णं सुविणे पासित्ताणं पडिबुद्धे। एगं च णं महं दिणकरं तेयसा जलंतं सुविणे पासित्ताणं पडिबुद्धे। एगं च णं महं हरिवेरुलियवण्णाभेणं नियगेणं अंतेणं माणुसुत्तरं पव्वयं सव्वतो समंता आवेढियं परिवेढियं सुविणे

पासिताणं पडिबुद्धे। एगं च णं महं मंदरे पव्वए मंदरचूलियाए उवरिं सीहासणवरगयं अप्पाणं सुविणे पासिताणं पडिबुद्धे।

जं णं समणे भगवं महावीरे एगं महं घोररूवदित्तधरं तालपिसायं सुविणे पराजियं पा० जाव पडिबुद्धे तं णं समणेणं भगवता महावीरेणं मोहणिज्जे कम्ममे मूलओ उग्घातिए

जं णं समणे भगवं महावीरे एगं महं सुक्किल जाव पडिबुद्धे तं णं समणे भगवं महावीरे एगं महं सुक्किल जाव पडिबुद्धे तं णं समणे भगवं महावीरे सुक्कज्झाणोवगए विहरति। जं णं समणे भगवं महावीरे एगं महं चित्तविचित्त जाव पडिबुद्धे तं णं समणे भगवं महावीरे विचित्तं ससमय-परसमइयं दुवालसंगं गणिपिडगं आघवेति पन्नवेति परूवेति दंसेति निदंसेति उवदंसेति, तं जहा--आयारं सूयगडं जाव दिट्ठिवायं। जं णं समणे भगवं महावीरे एगं महं दामदुगं सव्वरयणामयं सुविणे पासिताणं पडिबुद्धे तं णं समणे भगवं महावीरे दुविहं धम्मं पन्नवेति, तं जहा--अगारधम्मं वा अणगारधम्मं वा। जं णं समणे भगवं महावीरे एगं महं सेयं गोवग्गं जाव पडिबुद्धे तं णं समणस्स भगवतो महावीरस्स चाउववण्णाइण्णे समणसंघे, तं जहा--समणा समणीओ सावगा सावियाओ। जं णं समणे भगवं महावीरे एगं महं पउमसरं जाव पडिबुद्धे तं णं समणे जाव वीरे चउव्विहे देवे पण्णवेति, तं जहा--भवणवासी वाणमंतरे जोतिसिए वेमाणिए। जं णं समणे भगवं महावीरे एगं महं सागरं जाव पडिबुद्धे तं णं समणेणं भगवता महावीरेणं अणादीए अणवदग्गे जाव संसारकंतारे तिण्णे। जं णं समणे भगवं महावीरे एगं महं दिणकरं जाव पडिबुद्धे तं णं समणस्स भगवतो महावीरस्स अणंते अणुत्तरे जाव केवलवरनाण-दंसणे समुप्पन्ने। जं णं समणे जाव वीरे एगं महं हरिवेरुलिय जाव पडिबुद्धे तं णं समणस्स भगवतो महावीरस्स ओराला कित्तिवण्णसद्दिसिलोया सदेवमणुयासुरे लोगे परितुवंति--इति खलु समणे भगवं महावीरे, इति खलु समणे भगवं महावीरे। जं णं समणे भगवं महावीरे मंदरे पव्वते मंदरचूलियाए जाव पडिबुद्धे तं णं समणे भगवं महावीरे सदेवमणुयासुराए परिसाए मज्झगए केवली धम्मं आघवेति जाव उवदंसेति।

**[६८०]** इत्थी वा पुरिसे वा सुविणंते एगं महं हयपंतिं वा गयपंतिं वा जाव उसभपंतिं वा पासमाणे पासति, द्रूहमाणे द्रूहति, द्रूढमिति अप्पाणं मन्नति, तक्खणामेव बुज्झति, तेणेव भवग्गहणेणं सिज्झति जाव अंतं करेति।

इत्थी वा पुरिसे वा सुविणंते एगं महं दामिणिं पाईणपडिणायतं दुहओ समुद्धे पुट्ठं पासमाणे पासति, संवेल्लेमाणे संवेल्लेइ, संवेल्लियमिति अप्पाणं मन्नति, तक्खणामेव बुज्झति, तेणेव भवग्गहणेण जाव अंतं करेइ।

इत्थी वा पुरिसे वा सुविणंते एगं महं रज्जुं पाईणपडिणायतं दुहओ लोगंते पुट्ठं पासमाणे पासति, छिंदमाणे छिंदइ, छिन्नमिति अप्पाणं मन्नति, तक्खणामेव जाव अंतं करेइ।

इत्थी वा पुरिसे वा सुविणंते एगं महं किण्हसुत्तगं वा जाव सुक्किलसुत्तगं वा पासमाणे पासति, उग्गोवेमाणे उग्गोवेइ, उग्गोवितमिति अप्पाणं मन्नति, तक्खणामेव जाव अंतं करेति।

इत्थी वा पुरिसे वा सुविणंते एगं महं अयरासिं वा तंबरासिं वा तउयरासिं वा सीसगरासिं वा पासमाणे पासति, दुरूहमाणे दुरूहति, दुरूढमिति अप्पाणं मन्नति, तक्खणामेव बुज्झइ, दोच्चे भवग्गहणे सिज्झति जाव अंतं करेति।

इत्थी वा पुरिसे वा सुविणंते एगं महं हिरण्णरासिं वा सुवण्णरासिं वा रयणरासिं वा

वइररासिं वा पासमाणे पासइ, दुरूहमाणे दुरूहइ, दुरूढमिति अप्पाणं मन्नति, तक्खणामेव बुज्झति, तेणेव भवग्गहणेणं सिज्झति जाव अंतं करेति।

इत्थी वा पुरिसे वा सुविणंते एगं महं तणरासिं वा जहा तेयनिसग्गे (स० १५ सु० ८२) जाव अवकररासिं वा पासमाणे पासति, विक्खिरमाणे विक्खिरइ, विक्खिणमिति अप्पाणं मन्नति, तक्खणामेव बुज्झति, तेणेव जाव अंतं करेति।

इत्थी वा पुरिसे वा सुविणंते एगं महं सरथंभं वा वीरणथंभं वा वंसीमूलथंभं वा वल्लीमूलथंभं वा पासमाणे पासति, उम्मूलेमाणे उम्मूलेइ, उम्मूलितमिति अप्पाणं मन्नति तक्खणामेव बुज्झति, तेणेव जाव अंतं करेति।

इत्थी वा पुरिसे वा सुविणंते एगं महं खीरकुंभं वा दधिकुंभं वा घयकुंभं वा मधुकुंभं वा पासमाणे पासति, उप्पाडेमाणे उप्पाडेति, उप्पाडितमिति अप्पाणं मन्नति, तक्खणामेव बुज्झति तेणेव जाव अंतं करेति।

इत्थी वा पुरिसे वा सुविणंते एगं महं सुरावियडकुंभं वा सोवीरगवियडकुंभं वा तेल्लकुंभं वा वसाकुंभं वा पासमाणे पासति, भिंदमाणे भिंदति, भिन्नमिति अप्पाणं मन्नति, तक्खणामेव बुज्झति, दोच्चेणं भव० जाव अंतं करेति।

इत्थी वा पुरिसे वा सुविणंते एगं महं पउमसरं कुसुमियं पासमाणे पासति, ओगाहमाणे ओगाहति, ओगाढमिति अप्पाणं मन्नति, तक्खणामेव० तेणेव जाव अंतं करेति।

इत्थी वा जाव सुविणंते एगं महं सागरं उम्मी-वीथी जाव कलियं पासमाणे पासति, तरमाणे तरति, तिण्णमिति अप्पाणं मन्नति, तक्खणामेव० तेणेव जाव अंतं करेति।

इत्थी वा जाव सुविणंते एगं महं भवणं सत्वरयणामयं पासमाणे पासति, अणुप्पविसमाणे अणुप्पविसति, अणुप्पविट्ठमिति अप्पाणं मन्नति० तेणेव जाव अंतं करेति।

इत्थी वा पुरिसे वा सुविणंते एगं महं विमाणं सत्वरयणामयं पासमाणे पासति, द्रूहमाणे द्रूहति, द्रूढमिति अप्पाणं मन्नति, तक्खणामेव बुज्झति, तेणेव जाव अंतं करेति।

**[६८१]** अहं भंते! कोट्ठपुडाण वा जाव केयतिपुडाण वा अणुवायंसि उब्भिज्जमाणाण वा जाव ठाणाओ वा ठाणं संकामिज्जमाणाणं किं कोट्ठे वाति जाव केयती वाति? गोयमा! नो कोट्ठे वाति जाव नो केयती वाति घाणसहगया पोग्गला वांति। सेवं भंते! सेवं भंते! ति०।

**\*सोलसमे सए छट्ठो उद्देशो समतो\***

**० सत्तमो उद्देशो ०**

**[६८२]** कतिविधे णं भंते! उवओगे पन्नते? गोयमा! दुविहे उवयोगे पन्नते, एवं जहा उवयोगपयं पन्नवणाए तहेव निरवसेसं भाणियत्वं पासणयापयं च निरवसेसं नेयत्वं।

सेवं भंते! सेवं भंते! ति०।

**\*सोलसमे सए सत्तमो उद्देशो समतो\***

**० अट्ठमो उद्देशो ०**

**[६८३]** केमहालए णं भंते! लोए पन्नते? गोयमा! महतिमहालए जहा बारसमसए तहेव जाव

असंखेज्जाओ जोयणकोडाकोडीओ परिक्खेवेणं।

लोगस्स णं भंते! पुरत्थिमिल्ले चरिमंते किं जीवा, जीवदेसा, जीवपदेसा, अजीवा, अजीवदेसा, अजीवपदेसा? गोयमा! नो जीवा, जीवदेसा वि, जीवपदेसा वि, अजीवा वि, अजीवदेसा वि, अजीवपदेसा वि। जे जीवदेसा ते नियमं एगिंदियदेसा, अहवा एगिंदियदेसा य बेइंदियस्स य देसे। एवं जहा दसमसए अग्गेयी दिसा तहेव, नवरं देसेसु अणिंदियाणं आदिल्लविरहिओ। जे अरूवी अजीवा ते छव्विहा, अद्वासमयो नत्थि। सेसं तं चेव सव्वं।

लोगस्स णं भंते! दाहिणिल्ले चरिमंते किं जीवा०? एवं चेव।

एवं पच्चत्थिमिल्ले वि, उत्तरिल्ले वि।

लोगस्स णं भंते! उवरिल्ले चरिमंते किं जीवा० पुच्छा। गोयमा! नो जीवा, जीवदेसा वि जाव अजीवपएसा वि। जे जीवदेसा ते नियमं एगिंदियदेसा य अणिंदियदेसा य, अहवा एगिंदियदेसा य अणिंदियदेसा य बेइंदियस्स य देसे, अहवा एगिंदियदेसा य अणिंदियदेसा य बेइंदियाण य देसा। एवं मज्झिल्लविरहितो जाव पंचिंदियाणं। जे जीवप्पएसा ते नियमं एगिंदियप्पदेसा य अणिंदियप्पएसा य, अहवा एगिंदियप्पदेसा य अणिंदियप्पदेसा य बेइंदियस्स य पदेसा, अहवा एगिंदियपदेसा य अणिंदियपएसा य बेइंदियाण य पदेसा। एवं आदिल्लविरहिओ जाव पंचिंदियाणं। अजीवा जहा दसमसए तमाए तहेव निरवसेसं।

लोगस्स णं भंते! हेट्ठिल्ले चरिमंते किं जीवा० पुच्छा। गोयमा! नो जीवा, जीवदेसा वि जाव अजीवप्पएसा वि। जे जीवदेसा ते नियमं एगिंदियदेसा, अहवा एगिंदियदेसा य बेइंदियस्स य देसे, अहवा एगिंदियदेसा य बेइंदियाण य देसा। एवं मज्झिल्लविरहिओ जाव अणिंदियाणं पदेसा आदिल्लविरहिया सव्वेसिं जहा पुरत्थिमिल्ले चरिमंते तहेव। अजीवा जहा उवरिल्ले चरिमंते तहेव।

इमीसे णं भंते! रयणप्पभाए पुढवीए पुरत्थिमिल्ले चरिमंते किं जीवा० पुच्छा गोयमा! नो जीवा, एवं जहेव लोगस्स तहेव चत्तारि वि चरिमंता जाव उत्तरिल्ले, उवरिल्ले जहा दसमसए विमला दिसा तहेव निरवसेसं। हेट्ठिल्ले चरिमंते जहेव लोगस्स हेट्ठिल्ले चरिमंते तहेव, नवरं देसे पंचेदिणसु तियभंगो, सेसं तं चेव।

एवं जहा रयणप्पभाए चत्तारि चरिमंता भणिया एवं सक्करप्पभाए वि। उवरिम-हेट्ठिल्ला जहा रयणप्पभाए हेट्ठिल्ले।

एवं जाव अहेसत्तमाए।

एवं सोहम्मस्स वि जाव अच्चुयस्स।

गेविज्जविमाणाणं एवं चेव। नवरं उवरिम-हेट्ठिल्लेसु चरिमंतेसु देसेसु पंचेदियाण वि मज्झिल्लविरहितो चेव, सेसं तहेव।

एवं जहा गेवेज्जविमाणा तहा अणुत्तरविमाणा वि, ईसिपब्भारा वि।

[६८४] परमाणुपोग्गले णं भंते! लोगस्स पुरत्थिमिल्लाओ चरिमंताओ पच्चत्थिमिल्लं चरिमंतं एगसमएणं गच्छति, पच्चत्थिमिल्लाओ चरिमंताओ पुरत्थिमिल्लं चरिमंतं एगसमएणं गच्छति, दाहिणिल्लाओ चरिमंताओ उत्तरिल्लं जाव गच्छति, उत्तरिल्लाओ० दाहिणिल्लं जाव गच्छति, उवरिल्लाओ चरिमंताओ हेट्ठिल्लं चरिमंतं एग० जाव गच्छति, हेट्ठिल्लाओ चरिमंताओ उवरिल्लं चरिमंतं एगसमएणं

गच्छति? हंता, गोतमा! परमाणुपोग्गले णं लोगस्स पुरित्थिमिल्लं० तं चेव जाव उवरिल्लं चरिमंतं गच्छति।

**[६८५]** पुरिसे णं भंते! वासं वासति, वासं नो वासतीति हत्थं वा पायं वा बाहुं वा ऊरुं वा आउंवेमाणे वा पसारेमाणे वा कतिरिए? गोयमा! जावं च णं से पुरिसे वासं वासति, वासं नो वासतीति हत्थं वा जाव ऊरुं वा आउंवेति वा पसारेति वा तावं च णं से पुरिसे काइयाए जाव पंचहिं किरियाहिं पुट्ठे।

**[६८६]** देवे णं भंते! महिड्डीए जाव महेसक्खे लोगंते ठिच्चा पभू अलोगंसि हत्थं वा जाव ऊरुं वा आउंवेत्तए वा पसारेत्तए वा? णो इणट्ठे समट्ठे।

से केणट्ठेणं भंते! एवं वुच्चति 'देवे णं महिड्डीए जाव लोगंते ठिच्चा णो पभू अलोगंसि हत्थं वा जाव पसारेत्तए वा?' गोयमा! जीवाणं आहारोवचिया पोग्गला, बौदिचिया पोग्गला, कलेवरचिया पोग्गला, पोग्गलमेव पप्प जीवाण य अजीवाण य गतिपरियाए आहिज्जइ, अलोए णं नेवत्थि जीवा, नेवत्थि पोग्गला, सेतेणट्ठेणं जाव पसारेत्तए वा।

सेवं भंते! सेवं भंते! ति०।

**\*सोलसमे सए अट्ठमो उद्देशो समतो\***

**० नवमो उद्देशो ०**

**[६८७]** कहिं णं भंते! बलिस्स वइरोयणिंदस्स वइरोयणरन्नो सभा सुहम्मा पन्नता? गोयमा! जंबुद्वीवे दीवे मंदरस्स पव्वयस्स उत्तरेणं तिरियमसंखेज्जे० जहेव चमरस्स जाव बायालीसं जोयणसहस्साइं ओगाहिता एत्थ णं बलिस्स वइरोयणिंदस्स वइरोयणरन्नो रुयगिंदे नामं उप्पायपव्वए पन्नते सतरस एक्कवीसे जोयणसए एवं पमाणं जहेव तिगिंछिकूडस्स, पासायवडंसगस्स वि तं चेव पमाणं सीहासणं सपरिवारं बलिस्स परियारेणं अट्ठो तहेव, नवरं रुयगिंदप्पभाइं ३ कुमुयाइं। सेसं तं चेव जाव बलिचंचाए रायहाणीए अन्नेसिं च जाव निच्चे, रुयगिंदस्स णं उप्पायपव्वयस्स उत्तरेणं छक्कोडिसए तहेव जाव चत्तालीसं जोयणसहस्साइं ओगाहिता एत्थ णं बलिस्स वइरोयणिंदस्स वइरोयणरन्नो बलिचंचा नामं रायहाणी पन्नता; एगं जोयणसयसहस्सं पमाणं तहेव जाव बलिपेढस्स उववातो जाव आयरक्खा सव्वं तहेव निरवसेसं, नवरं सातिरेगं सागरोवमं ठिती पन्नता। सेसं तं चेव जाव बली वइरोयणिंदे, बली वइरोयणिंदे।

सेवं भंते! सेवं भंते! जाव विहरति।

**\*सोलसमे सए नवमो उद्देशो समतो\***

**० दसमो उद्देशो ०**

**[६८८]** कतिविधे(?धा) णं भंते! ओही पण्णता? गोयमा! दुविधा ओही पन्नता। ओहीपयं निरवसेसं भाणियव्वं।

सेवं भंते! सेवं भंते! जाव विहरति।

**\*सोलसमे सए दसमो उद्देशो समतो\***

**० एगारसमो उद्देशो ०**

**[६८९]** दीवकुमारा णं भंते! सव्वे समाहारा० निस्सासा? नो इणट्ठे समट्ठे। एवं जहा पढमसए बितियउद्देशए दीवकुमाराणं वत्तव्वया तहेव जाव समाउया समुस्सासनिस्सासा।

दीवकुमाराणं भंते! कति लेस्साओ पन्नताओ? गोयमा! चत्तारि लेस्साओ पन्नताओ, तं जहा--  
कण्हलेस्सा जाव तेउलेस्सा।

एएसि णं भंते! दीवकुमाराणं कण्हलेस्साणं जाव तेउलेस्साण य कयरे कयरेहितो जाव  
विसेसाहिया वा? गोयमा! सव्वत्थोवा दीवकुमारा तेउलेस्सा, काउलेस्सा असंखेज्जगुणा, निललेस्सा  
विसेसाहिया, कण्हलेस्सा विसेसाहिया।

एतेसि णं भंते! दीवकुमाराणं कण्हलेस्साणं जाव तेउलेस्साण य कयरे कयरेहितो  
अप्पिड्ढिया वा महिड्ढिया वा? गोयमा! कण्हलेस्सेहितो नीललेस्सा महिड्ढिया जाव सव्वमहिड्ढिया  
तेउलेस्सा।

सेवं भंते! सेवं भंते! जाव विहरति।

**\*सोलसमे सए एक्कारसमो उद्देशो समतो\***

**० बारसमो उद्देशो ०**

[६९०] उदधिकुमारा णं भंते! सव्वे समाहारा०? एवं चेव।  
सेवं भंते! सेवं भंते!०।

**\*सोलसमे सए बारसमो उद्देशो समतो\***

**० तेरसमो उद्देशो ०**

[६९१] एवं दिसाकुमारा वि।

**\*सोलसमे सए तेरसमो उद्देशो समतो\***

**० चउदसमो उद्देशो ०**

[६९२] एवं थणियकुमारा वि।

सेवं भंते! सेवं भंते! ति जाव विहरति।

**\*सोलसमे सए चौदसमो उद्देशो समतो\***

**०-सोलसमं सयं समतं-०**

**० मुनि दीपरत्रसागरेण संशोधितः सम्पादितश्च सोलसमं सतं समतं ०**

**[ ] सत्तरसमं सयं [ ]**

[६९३] नमो सुयदेवयाए भगवतीए।

[६९४] कुंजर संजय सेलेसि किरिय ईसाण पुढवि दग वाऊ।  
एगिंदिय नाग सुवण्ण विज्जु वाय ऽग्गि सत्तरसे।।

**० पढमो उद्देशो ०**

[६९४] रायगिहे जाव एवं वदासि-

उदायी णं भंते ! हत्थिराया कओहितो अणंतरं उव्वट्ठिता उदायि-हत्थिरायताए उववन्ने ?  
गोयमा! असुरकुमारेहितो देवेहितो अणंतरं उव्वट्ठिता उदायिहत्थिरायताए उववन्ने।

उदायी णं भंते! हत्थिराया कालमासे कालं किच्चा कहिं गच्छिहिति, कहिं उववज्जिहिति? गोयमा! इमीसे णं रतणप्पभाए पुढवीए उक्कोससागरोवमट्ठितीयंसि नरगंसि नेरइयताए उववज्जिहिति।

से णं भंते! ततोहिंतो अणंतरं उव्वट्ठिता कहिं गच्छिहिति?, कहिं उववज्जिहिति? गोयमा! महाविदेहे वासे सिज्झिहिति जाव अंतं काहिति।

भूयाणंदे णं भंते! हत्थिराया कतोहिंतो अणंतरं उव्वट्ठिता भूयाणंदो? एवं जहेव उदायी जाव अंतं काहिति।

**[६९६]** पुरिसे णं भंते! तालमारुभइ, तालं आरुभित्ता तालाओ तालफलं पचालेमाणे वा पवाडेमाणे वा कतिकिरिए? गोयमा! जावं च णं से पुरिसे तालमारुभति, तालमारुभित्ता तालाओ तालफलं पचालेइ वा पवाडेइ वा तावं च णं से पुरिसे काइयाए जाव पंचहिं किरियाहिं पुट्ठे। जेसिं पि य णं जीवाणं सरीरेहिंतो ताले निव्वत्तिए तालफले निव्वत्तिए ते वि णं जीवा काइयाए जाव पंचहिं किरियाहिं पुट्ठा।

अहे णं भंते! से तालफले अप्पणो गरुययाए जाव पच्चोवयमाणे जाइं तत्थ पाणाइं जाव जीवियाओ ववरोवेति ततो णं भंते! से पुरिसे कतिकिरिए? गोयमा! जावं च णं से पुरिसे तालफले अप्पणो गरुययाए जाव जीवियाओ ववरोवेति तावं च णं से पुरिसे काइयाए जाव चउहिं किरियाहिं पुट्ठे। जेसिं पि य णं जीवाणं सरीरेहिंतो ताले निव्वत्तिए ते वि णं जीवा काइयाए जाव चउहिं किरियाहिं पुट्ठा। जेसिं पि य णं जीवाणं सरीरेहिंतो तालफले निव्वत्तिए ते वि णं जीवा काइयाए जाव पंचहिं किरियाहिं पुट्ठा। जे वि य से जीवा अहे वीससाए पच्चोवतमाणस्स उवग्गहे वट्ठंति ते वि णं जीवा काइयाए जाव पंचहिं किरियाहिं पुट्ठा।

पुरिसे णं भंते! रुक्खस्स मूलं पचालेमाणे वा पवाडेमाणे वा कतिकिरिए? गोयमा! जावं च णं से पुरिसे रुक्खस्स मूलं पचालेति वा पवाडेति वा तावं च णं से पुरिसे काइयाए जाव पंचहिं किरियाहिं पुट्ठे। जेसिं पि य णं जीवाणं सरीरेहिंतो मूले निव्वत्तिए जाव बीए निव्वत्तिए ते वि णं जीवा काइयाए जाव पंचहिं किरियाहिं पुट्ठा।

अहे णं भंते! से मूले अप्पणो गरुययाए जाव जीवियाओ ववरोवेति तओ णं भंते! से पुरिसे कतिकिरिए? गोयमा! जावं च णं से मूले अप्पणो जाव ववरोवेति तावं च णं से पुरिसे काइयाए जाव चउहिं किरियाहिं पुट्ठे। जेसिं पि य णं जीवाणं सरीरेहिंतो कंदे निव्वत्तिए जाव बीए निव्वत्तिए ते वि णं जीवा काइयाए जाव चउहिं० पुट्ठा। जेसिं पि य णं जीवाणं सरीरेहिंतो मूले निव्वत्तिए ते वि णं जीवा काइयाए जाव पंचहिं किरियाहिं पुट्ठा। जे वि य से जीवा अहे वीससाए पच्चोवयमाणस्स उवग्गहे वट्ठंति ते वि णं जीवा काइयाए जाव पंचहिं किरियाहिं पुट्ठा।

पुरिसे णं भंते! रुक्खस्स कंदं पचालेइ०? गोयमा! जावं च णं से पुरिसे जाव पंचहिं किरियाहिं पुट्ठे। जेसिं पि य णं जीवाणं सरीरेहिंतो कंदे निव्वत्तिते ते वि णं जीवा जाव पंचहिं किरियाहिं पुट्ठा।

अहे णं भंते! से कंदे अप्पणो जाव चउहिं० पुट्ठे। जेसिं पि य णं जीवाणं सरीरेहिंतो मूले निव्वत्तिते, खंधे निवत्तिते जाव चउहिं० पुट्ठा। जेसिं पि य णं जीवाणं सरीरेहिंतो कंदे निव्वत्तिते ते वि णं जाव पंचहिं० पुट्ठा। जे वि य से जीवा अहे वीससाए पच्चोवयमाणस्स जाव पंचहिं० पुट्ठा।

जहा कंदो एवं जाव बीयं।

[६९७] कति णं भंते! सरीरगा पन्नता? गोयमा! पंच सरीरगा पन्नता, तं जहा--ओरालिए जाव कम्मए।

कति णं भंते! इंदिया पन्नता? गोयमा! पंच इंदिया पन्नता, तं जहा--सोतिंदिए जाव फासिंदिए।

कतिविधे णं भंते! जोए पन्नते? गोयमा! तिविधे जोए पन्नते, तं जहा--मणजोए वड़जोए कायजोए।

जीवे णं भंते! ओरालियसरीरं निव्वत्तेमाणे कतिकिरिए? गोयमा! सिय तिकिरिए, सिय चउकिरिए, सिय पंचकिरिए।

एवं पुढविकाइए वि।

एवं जाव मणुस्से।

जीवा णं भंते! ओरालियसरीरं निव्वत्तेमाणा कतिकिरिया? गोयमा! तिकिरिया वि, चउकिरिया वि, पंचकिरिया वि।

एवं पुढविकाइया वि।

एवं जाव मणुस्सा।

एवं वेउव्वियसरीरेण वि दो दंडगा, नवरं जस्स अत्थि वेउव्वियं।

एवं जाव कम्मगसरीरं।

एवं सोतिंदियं जाव फासिंदिय।

एवं मणजोगं, वड़जोगं, कायजोगं, जस्स जं अत्थि तं भाणियव्वं। एते एगत्त- पुहत्तेणं छव्वीसं दंडगा।

[६९८] कतिविधे णं भंते! भावे पन्नते? गोयमा! छव्विहे भावे पन्नते, तं जहा--उदइए उवसमि ए जाव सन्निवाति ए।

से किं तं उदइए भावे? उदइए भावे दुविहे पन्नते, तं जहा--उदए य उदयनिप्फन्ने य। एवं एतेणं अभिलावेणं जहा अणुओगद्वारे छन्नामं तहेव निरवसेसं भाणियव्वं जाव से तं सन्निवाति ए भावे।

सेवं भंते! सेवं भंते! ति०।

**\*सत्तरसमे सए चौदसमो उद्देशो समतो\***

## ० बीओ उद्देशो ०

[६९९] से नूणं भंते! संयतविरयपडिहयपच्चक्खायपावकम्मं धम्मं ठिए, अस्संजयअविरय अपडिहयपच्चक्खायपावकम्मं अधम्मं ठिए, संजयासंजये धम्माधम्मं ठिए? हंता, गोयमा! संजयविरय जाव धम्माधम्मं ठिए।

एयंसि णं भंते! धम्मंसि वा अहम्मंसि वा धम्माधम्मंसि वा चक्किया केयि आसइत्तए वा जाव तुयट्ठित्तए वा? णो इणट्ठे समट्ठे।

से केणं खाइं अट्ठेणं भंते! एवं वुच्चइ जाव धम्माधम्मं ठिए? गोयमा! संजतविरत जाव पावकम्मं धम्मं ठिए धम्मं चव उवसंपज्जित्ताणं विहरति। अस्संयत जाव पावकम्मं अधम्मं ठिए अधम्मं

चेव उवसंपज्जिताणं विहरइ। संजया-संजये धम्माधम्मं ठिए धम्माधम्मं उवसंपज्जिताणं विहरति, सेतेणट्ठेणं जाव ठिए।

जीवा णं भंते! किं धम्मं ठिया, अधम्मं ठिया धम्माधम्मं ठिया? गोयमा! जीवा धम्मं वि ठिया, अधम्मं वि ठिया, धम्माधम्मं वि ठिया।

नेरतिया णं० पुच्छा। गोयमा! णेरतिया नो धम्मं ठिया, अधम्मं ठिया, नो धम्माधम्मं ठिया।

एवं जाव चउरिंदियाणं।

पंचिंदियतिरिक्खजोणिया णं० पुच्छा। गोयमा! पंचिंदियतिरिक्खजोणिया नो धम्मं ठिया, अधम्मं ठिया, धम्माधम्मं वि ठिया।

मणुस्सा जहा जीवा।

वाणमंतर-जोतिसिय-वेमाणिया जहा नेरइया।

[७००] अन्नउत्थिया णं भंते! एवमाइक्खंति जाव परुवेति--'एवं खलु समणा पंडिया, समणोवासया बालपंडिया; जस्स णं एगपाणाए वि दंडे अनिक्खिते से णं एगंतबाले ति वत्तव्वं सिया' से कहमेयं भंते! एवं? गोयमा! जं णं ते अन्नउत्थिया एवमाइक्खंति जाव वत्तव्वं सिया, जे ते एवमाहंसु, मिच्छं ते एवमाहंसु। अहं पुण गोयमा! एवमाइक्खामि जाव परुवेमि--एवं खलु समणा पंडिया; समणोवासया बालपंडिया; जस्स णं एगपाणाए वि दंडे निक्खिते से णं नो एगंतबाले ति वत्तव्वं सिया।

जीवा णं भंते! किं बाला, पंडिया, बालपंडिया?

गोयमा! जीवा बाला वि, पंडिया वि, बालपंडिया वि।

नेरइया णं० पुच्छा। गोयमा! नेरइया बाला, नो पंडिया, नो बालपंडिया।

एवं जाव चउरिंदियाणं।

पंचिंदियतिरिक्ख० पुच्छा।

गोयमा! पंचिंदियतिरिक्खजोणिया बाला, नो पंडिया, बालपंडिया वि।

मणुस्सा जहा जीवा।

वाणमंतर-जोतिसिय-वेमाणिया जहा नेरतिया।

[७०१] अन्नउत्थिया णं भंते! एवमाइक्खंति जाव परुवेति--"एवं खलु पाणाइवाए मुसावाए जाव मिच्छादंसणसल्ले वट्माणस्स अन्ने जीवे, अन्ने जीवाया। पाणातिवायवेरमणे जाव परिग्गहवेरमणे, कोहविवेगे जाव मिच्छादंसणसल्लविवेगे वट्माणस्स अन्ने जीवे, अन्ने जीवाया। उप्पतियाए जाव पारिणामियाए वट्माणस्स अन्ने जीवे, अन्ने जीवाया। उग्गहे ईहा-अवाये धारणाए वट्माणस्स जाव जीवाता। उट्ठाणे जाव परक्कमे वट्माणस्स जाव जीवाया। नेरइयते तिरिक्खमणुस्स-देवते वट्माणस्स जाव जीवाया। नाणावरणिज्जे जाव अंतराइए वट्माणस्स जाव जीवाया। एवं कणहलेस्साए जाव सुक्कलेस्साए, सम्मदिट्ठीए३। एवं चक्खुदंसणे४, आभिणिबोहियनाणे५, मतिअन्नाणे३, आहारसन्नाए ४। एवं ओरालियसरीरे५। एवं मणजोए३। सागारोवयोगे अणागारोवयोगे वट्माणस्स अन्ने जीवे, अन्ने जीवाता" से कहमेयं भंते! एवं? गोयमा! जं णं ते अन्नउत्थिया एवमाइक्खंति जाव मिच्छं ते एवमाहंसु। अहं पुण गोयमा! एवमाइक्खामि जाव परुवेमि-एवं खलु पाणातिवाए जाव मिच्छादंसणसल्ले वट्माणस्स से चेव

जीवे, से चेष जीवाता जाव अणागारोवयोगे वट्माणस्स से चेष जीवे, से चेष जीवाया'।

[७०२] देवे णं भंते! महिड्डीए जाव महसक्खे पुव्वामेव रूवी भविता पभू अरूविं विउच्चित्ताणं चिट्ठित्तए? णो इणट्ठे समट्ठे।

से केणट्ठेणं भंते! एवं वुच्चइ देवे णं जाव नो पभू अरूविं विउच्चित्ताणं चिट्ठित्तए? गोयमा! अहमेयं जाणामि, अहमेयं पासामि, अहमेयं बुज्झामि, अहमेयं अभिसमन्नागच्छामि--मए एयं नायं, मए एयं दिट्ठं, मए एयं बुद्धं, मए एयं अभिसमन्नागयं जं णं तहागयस्स जीवस्स सरुविस्स सकम्मस्स सरागस्स सवेयणस्स समोहस्स सलेसस्स ससरीरस्स ताओ सरीराओ अविप्पमुक्कस्स एवं पण्णायति, तं जहा-- कालते वा जाव सुक्किलते वा, सुब्धिगंधते वा दुब्धिगंधते वा, तित्तते वा जाव महुरते वा, कक्खडते वा जाव लुक्खते वा, सेतेणट्ठेणं गोयमा! जाव चिट्ठित्तए।

स चेष णं भंते! से जीवे पुव्वामेव अरूवी भविता पभू रूविं विउच्चित्ताणं चिट्ठित्तए? णो तिणट्ठे समट्ठे। जाव चिट्ठित्तए? गोयमा! अहमेयं जाणामि, जाव जं णं तहागयस्स जीवस्स अरूविस्स अकम्मस्स अरागस्स अवेदस्स अमोहस्स अलेसस्स असरीरस्स ताओ सरीराओ विप्पमुक्कस्स णो एवं पन्नायति, तं जहा-कालते वा जाव लुक्खते वा, सेतेणट्ठेणं जाव चिट्ठित्तए।

सेवं भंते! सेवं भंते! ति०।

**\*सत्तरसमे सए बीइओ उद्देशो समतो\***

**० तइओ उद्देशो ०**

[७०३] सेलेसिं पडिवन्नए णं भंते! अणगारे सदा समियं एयति वेयति जाव तं तं भावं परिणमति? नो इणट्ठे समट्ठे, नऽन्नत्थेगेणं परप्पयोगेणं।

कतिविधा णं भंते! एयणा पन्नता? गोयमा! पंचविहा एयणा पन्नता, तं जहा-दव्वेयणा खेतेयणा कालेयणा भवेयणा भावेयणा।

दव्वेयणा णं भंते! कतिविधा पन्नता? गोयमा! चउच्चिहा पन्नता, तं जहा-नेरतियदव्वेयणा तिरिक्खजोणियदव्वेयणा मणुस्सदव्वेयणा देवदव्वेयणा।

से केणट्ठेणं भंते! एवं वुच्चति नेरतियदव्वेयणा, नेरइयदव्वेयणा? गोयमा! जं णं नेरतिया नेरतियदव्वे वट्णसु वा, वट्णंति वा, वट्णस्संति वा तेषं तत्थ नेरतिया नेरतियदव्वे वट्माणे नेरतियदव्वेयणं एइंसु वा, एयंति वा, एइस्संति वा, सेतेणट्ठेणं जाव दव्वेयणा।

से केणट्ठेणं भंते! एवं वुच्चति तिरिक्खजोणियदव्वेयणा०? एवं चेष, नवरं तिरिक्खजोणिय-दव्वे' भाणियव्वं। सेसं तं चेष।

एवं जाव देवदव्वेयणा।

खेतेयणा णं भंते! कतिविहा पन्नता? गोयमा! चउच्चिहा पन्नता, तं जहा--नेरतियखेतेयणा जाव देवखेतेयणा।

से केणट्ठेणं भंते! एवं वुच्चति--नेरतियखेतेयणा, नेरइयखेतेयणा? एवं चेष, नवरं नेरतियखेतेयणा भाणितव्वा।

एवं जाव देवखेतेयणा।

एवं कालेयणा वि। एवं भवेयणा वि, भावेयणा वि; जाव देव भावेयणा।

[७०४] कतिविहा णं भंते! चलणा पन्नता? गोयमा! तिविहा चलणा पन्नता, तं जहा-सरीर-चलणा इंदियचलणा जोगचलणा।

सरीरचलणा णं भंते! कतिविहा पन्नता? गोयमा! पंचविहा पन्नता, तं जहा--ओरालियसरीरचलणा जाव कम्मगसरीरचलणा।

इंदियचलणा णं भंते! कतिविहा पन्नता? गोयमा! पंचविहा पन्नता, तं जहा--सोतिंदियचलणा जाव फासिंदियचलणा।

जोगचलणा णं भंते! कतिविहा पन्नता? गोयमा! तिविहा पन्नता, तं जहा--मणजोगचलणा वइजोगचलणा कायजोगचलणा।

से केणट्ठेणं भंते! एवं वुच्चइ--ओरालियसरीरचलणा, ओरालियसरीरचलणा? गोयमा! जं णं जीवा ओरालियसरीरे वट्ठमाणा ओरालियसरीरपायोग्गाइं दट्वाइं ओरालियसरीरताए परिणामेमाणा ओरालियसरीरचलणं चलिंसु वा, चलंति वा, चलिस्संति वा, सेतेणट्ठेणं जाव ओरालियसरीरचलणा, ओरालियसरीरचलणा।

से केणट्ठेणं भंते! एवं वुच्चइ--वेउव्वियसरीरचलणा, वेउव्वियसरीरचलणा? एवं चेव, नवरं वेउव्वियसरीरे वट्ठमाणा।

एवं जाव कम्मगसरीरचलणा।

से केणट्ठेणं भंते! एवं वुच्चइ--सोतिंदियचलणा, सोतिंदियचलणा? गोयमा! जं णं जीवा सोतिंदिए वट्ठमाणा सोतिंदियपायोग्गाइं दट्वाइं सोतिंदियताए परिणामेमाणा सोतिंदियचलणं चलिंसु वा, चलंति वा, चलिस्संति वा, सेतेणट्ठेणं जाव सोतिंदियचलणा, सोतिंदियचलणा।

एवं जाव फासिंदियचलणा।

से केणट्ठेणं भंते! एवं वुच्चइ--मणजोगचलणा, मणजोगचलणा? गोयमा! जं णं जीवा मणजोए वट्ठमाणा मणजोगप्पायोग्गाइं दट्वाइं मणजोगताए परिणामेमाणा मणचलणं चलिंसु वा, चलंति वा, चलिस्संति वा, सेतेणट्ठेणं जाव मणजोगचलणा, मणजोगचलणा।

एवं वइजोगचलणा वि। एवं कायजोगचलणा वि।

[७०५] अहं भंते! संवेगे निव्वेए गुरु-साधम्मियसुस्सूणया आलोयणया निंदणया गरहणया खमावणया सुयसहायता विओसमणया, भावे अपडिबद्धया विणिवट्ठणया विवित्तसयणासणसेवणया सोतिंदियसंवरे जाव फासिंदियसंवरे जोगपच्चक्खाणे सरीरपच्चक्खाणे कसायपच्चक्खाणे संभोगपच्चक्खाणे उवहिपच्चक्खाणे भत्तपच्चक्खाणे खमा विरागया भावसच्चे जोगसच्चे करणसच्चे मणसमन्नाहरणया वइसमन्नाहरणया कायसमन्नाहरणया कोहविवेगे जाव मिच्छादंसणसल्लविवेगे, णाणसंपन्नया दंसणसंपन्नया चरित्तसंपन्नया वेदणअहियासणया मारणंतियअहियासणया, एए णं भंते! पदा किंपज्जवसाणफला पन्नता समणाउसो! गोयमा! संवेगे निव्वेए जाव मारणंतियअहियासणया, एए णं सिद्धिपज्जवसाणफला पन्नता समणाउसो!।

सेवं भंते! सेवं भंते! जाव विहरति।

**\*सत्तरसमे सए तइओ उद्देशो समतो\***

## ० चउत्थो उद्देशो ०

[७०६] तेषं कालेणं तेषं समएणं जाव एवं वयासी--

अत्थि णं भंते! जीवाणं पाणातिवाएणं किरिया कज्जति? हंता, अत्थि।

सा भंते! किं पुट्ठा कज्जति, अपुट्ठा कज्जति? गोयमा! पुट्ठा कज्जति, नो अपुट्ठा कज्जति। एवं जहा पढमसए छट्ठुद्देशए जाव नो अणाणुपुच्चिकडा ति वत्तव्वं सिया।

एवं जाव वेमाणियाणं; नवरं जीवाणं एगिंदियाण य निव्वाघाएणं छद्दिसिं; वाघायं पडुच्च सिय तिदिसिं सिय चउदिसिं सिय पंचदिसिं; सेसाणं नियमं छद्दिसिं।

अत्थि णं भंते! जीवाणं मुसावाएणं किरिया कज्जति? हंता, अत्थि।

सा भंते! किं पुट्ठा कज्जति? जहा पाणातिवाएणं दंडओ एवं मुसावातेण वि।

एवं अदिण्णादाणेण वि, मेहुणेण वि, परिग्गहेण वि। एवं एए पंच दंडगा।

जं समयं णं भंते! जीवाणं पाणातिवाएणं किरिया कज्जति सा भंते! किं पुट्ठा कज्जइ, अपुट्ठा कज्जइ? एवं तहेव जाव वत्तव्वं सिया। जाव वेमाणियाणं।

एवं जाव परिग्गहेणं। एते वि पंच दंडगा ।

जं देसं णं भंते! जीवाणं पाणातिवाएणं किरिया कज्जइ? एवं चेव। जाव परिग्गहेणं। एवं एते वि पंच दंडगा।

जं पदेसं णं भंते! जीवाणं पाणातिवाएणं किरिया कज्जइ सा भंते! किं पुट्ठा कज्जइ? एवं तहेव दंडओ।

एवं जाव परिग्गहेणं। एवं एए वीसं दंडगा।

[७०७] जीवाणं भंते! किं अत्तकडे दुक्खे, परकडे दुक्खे, तदुभयकडे दुक्खे? गोयमा! अत्तकडे दुक्खे, नो परकडे दुक्खे, नो तदुभयकडे दुक्खे।

एवं जाव वेमाणियाणं।

जीवा णं भंते! किं अत्तकडं दुक्खं वेदंति, परकडं दुक्खं वेदंति, तदुभयकडं दुक्खं वेदंति? गोयमा! अत्तकडं दुक्खं वेदंति, नो परकडं दुक्खं वेदंति, नो तदुभयकडं दुक्खं वेदंति।

एवं जाव वेमाणिया।

जीवाणं भंते! किं अत्तकडा वेयणा, परकडा वेयणा? पुच्छ। गोयमा! अत्तकडा वेयणा, णो परकडा वेयणा, णो तदुभयकडा वेदणा।

एवं जाव वेमाणियाणं।

जीवा णं भंते! किं अत्तकडं वेदणं वेदति, परकडं वेदणं वेदंति, तदुभयकडं वेयणं वेदंति? गोयमा! जीवा अत्तकडं वेदणं वेदंति, नो परकडं वेयणं वेरंति, नो तदुभयकडं वेयणं वेरंति।

एवं जाव वेमाणिया।

सेवं भंते! सेवं भंते! त्ति०।

**\*सत्तरसमे सए चउत्थो उद्देशो समतो\***

## ० पंचमो उद्देशो ०

[७०८] कहि णं भंते! ईसाणस्स देविंदस्स देवरण्णो सभा सुहम्मा पन्नता? गोयमा! जंबुद्धीवे दीवे मंदरस्स पव्वयस्स उत्तरेणं इमीसे रयणप्पभाए पुढवीए बहुसमरमणिज्जाओ भूमिभागाओ उड्ढं चंदिम० जहा ठाणपए जाव मज्झे ईसाणवडेंसए। से णं ईसाणवडेंसए महाविमाणे अड्ढतेरस जोयणसयसहस्साइं एवं जहा दसमसए सक्कविमाणवत्तव्वया, सा इह वि ईसाणस्स निरवसेसा भाणियव्वा जाव आयरक्ख ति। ठिती सातिरेगाइं दो सागरोवमाइं। सेसं तं चेव जाव ईसाणे देविंदे देवराया, ईसाणे देविंदे देवराया।

सेवं भंते! सेवं भंते! ति०।

**\*सत्तरसमे सए पंचमो उद्देशो समतो\***

## ० छट्ठो उद्देशो ०

[७०९] पुढविकाइए णं भंते! इमीसे रयणप्पभाए पुढवीए समोहए, समोहण्णिता जे भविए सोहम्मे कप्पे पुढविकाइयताए उववज्जितए से णं भंते! किं पुट्ठिं उववज्जिता पच्छा संपाउणेज्जा, पुट्ठिं वा संपाउणित्ता पच्छा उववज्जेज्जा? गोयमा! पुट्ठिं वा उववज्जिता पच्छा संपाउणेज्जा, पुट्ठिं वा संपाउणित्ता पच्छा उववज्जेज्जा।

से केणट्ठेणं जाव पच्छा उववज्जेज्जा? गोयमा! पुढविकाइयाणं तओ समुग्घाया पन्नता, तं जहा--वेयणासमुग्घाए कसायमुग्घाए मारणंतियसमुग्घाए। मारणंतियसमुग्घाएणं समोहण्णमाणे देसेण वा समोहण्णति सव्वेण वा समोहण्णति, देसेणं समोहण्णमाणे पुट्ठिं संपाउणित्ता पच्छा उववज्जित्ता, सव्वेणं समोहण्णमाणे पुट्ठिं उववज्जेज्जा पच्छा संपाउणेज्जा, सेतेणट्ठेणं जाव उववज्जित्ता।

पुढविकाइए णं भंते! इमीसे रयणप्पभाए पुढवीए जाव समोहए, सामोहण्णित्ता जे भविए ईसाणे कप्पे पुढवि० एवं चेव ईसाणे वि।

एवं जाव अच्चुए।

गेविज्जविमाणे अणुत्तरविमाणे ईसिपब्भाराए य एवं चेव।

पुढविकाइए णं भंते! सक्करप्पभाए पुढवीए समोहते, समोहण्णित्ता जे भविए सोहम्मे कप्पे पुढवि०। एवं जहा रयणप्पभाए पुढविकाइओ उववातिओ एवं सक्करप्पभपुढविकाइओ वि उववाएयव्वो जाव ईसिपब्भाराए।

एवं जहा रयणप्पभाए वत्तव्वता भणिया एवं जाव अहेसत्तमाए समोहतो ईसिपब्भाराए उववातेयव्वो। सेसं तं चेव।

सेवं भंते! सेवं भंते! ति०।

**\*सत्तरसमे सए छट्ठो उद्देशो समतो\***

## ० सत्तमो उद्देशो ०

[७१०] पुढविकाइए णं भंते! सोहम्मे कप्पे समोहए, समोहण्णिता जे भविए इमीसे रयणप्पभाए पुढवीए पुढविकाइयताए उववज्जितए से णं भंते! किं पुट्ठिं० सेसं तं चेव। जहा रयणप्पभापुढविकाइओ सव्वकप्पेसु जाव ईसिपब्भाराए ताव उववातिओ एवं सोहम्मपुढविकाइओ वि सत्तसु

वि पुढवीसु उववातेयव्वो जाव अहेसत्तमाए। एवं जहा सोहम्मपुढविकाइओ सव्वपुढवीसु उववातिओ एवं जाव ईसिपब्भारापुढविकाइओ सव्वपुढवीसु उववातेयव्वो जाव अहेसत्तमाए।

सेवं भंते! सेवं भंते!०।

**\*सत्तरसमे सए सत्तमो उद्देशो समतो\***

### ० अट्ठमो उद्देशो ०

[७११] आउकाइए णं भंते! इमीसे रतणप्पभाए पुढवीए समोहते, समोहन्निता जे भविए सोहम्मे कप्पे आउकाइयताए उववज्जित्तए०? एवं जहा पुढविकाइओ तहा आउकाइओ वि सव्वकप्पेसु जाव ईसिपब्भाराए तहेव उववातेयव्वो।

एवं जहा रयणप्पभआउकाइओ उववातिओ तहा जाव अहेसत्तमआउकाइओ उववाएयव्वो जाव ईसिपब्भाराए।

सेवं भंते! सेवं भंते! ति०।

**\*सत्तरसमे सए अट्ठमो उद्देशो समतो\***

### ० नवमो उद्देशो ०

[७१२] आउकाइए णं भंते! सोहम्मे कप्पे समोहए, समोहन्निता जे भविए इमीसे रयणप्पभाए पुढवीए घणोदधिवलयेसु आउकाइयताए उववज्जित्तए से णं भंते!०? सेसं तं चेव।

एवं जाव अहेसत्तमाए।

जहा सोहम्मआउकाइओ एवं जाव ईसिपब्भाराआउकाइओ जाव अहेसत्तमाए उववातेयव्वो।

सेवं भंते! सेवं भंते!०।

**\*सत्तरसमे सए नवमो उद्देशो समतो\***

### ० दसमो उद्देशो ०

[७१३] वाउकाइए णं भंते! इमीसे रतणप्पभाए जाव जे भविए सोहम्मे कप्पे वाउकाइयताए उववज्जित्तए से णं०? जहा पुढविकाइओ तहा वाउकाइओ वि, नवरं वाउकाइयाणं चत्तारि समुग्घाया पन्नता, तं जहा--वेदणासमुग्घाए जाव वेउव्वियसमुग्घाए। मारणंतियसमुग्घाएणं समोहण्णमाणे देसेण वा समो०। सेसं तं चेव जाव अहेसत्तमाए समोहओ ईसिपब्भाराए उववातेयव्वो।

सेवं भंते! सेवं भंते! ति०।

**\*सत्तरसमे सए दसमो उद्देशो समतो\***

### ० एगारसमो उद्देशो ०

[७१४] वाउकाइए णं भंते! सोहम्मे कप्पे समोहए, समोहन्निता जे भविए इमीसे रयणप्पभाए पुढवीए घणवाए तणुवाए घणवायवलएसु तणुवायवलएसु वाउकाइयताए उववज्जित्तए से णं भंते!०? सेसं तं चेव। एवं जहा सोहम्मवाउकाइओ सत्तसु वि पुढवीसु उववातिओ एवं जाव ईसिपब्भारावाउकाइओ अहेसत्तमाए जाव उववायेयव्वो।

सेवं भंते! सेवं भंते!०।

**\*सत्तरसमे सए एगारसमो उद्देशो समतो\***

### ० बारसमो उद्देशो ०

[७१५] एगिंदिया णं भंते! सव्वे समाहारा, सव्वे समसरीरा? एवं जहा पढमसए बितियउद्देशए पुढविकाइयाणं वत्तव्वया भणिया सा चेव एगिंदियाणं इहं भाणियव्वा जाव समाउया समोववन्नगा।

एगिंदियाणं भंते! कति लेस्साओ पन्नताओ? गोयमा! चत्तारि लेस्साओ पन्नताओ, तं जहा-कण्हलेस्सा जाव तेउलेस्सा।

एतेसि णं भंते! एगिंदियाणं कण्हलेस्साणं जाव विसेसाहिया वा? गोयमा! सव्वत्थोवा एगिंदिया तेउलेस्सा, काउलेस्सा अणंतगुणा, णीललेस्सा विसेसाहिया, कण्हलेस्सा विसेसाहिया।

एएसि णं भंते! एगिंदियाणं कण्हलेस्सा० इड्ढी जहेव दीवकुमाराणं।

सेवं भंते! सेवं भंते!०।

\*सत्तरसमे सए बारसमो उद्देशो समतो\*

### ० तेरसमो उद्देशो ०

[७१६] नागकुमारा णं भंते सव्वे समाहारा जहा सोलसमसए दीवकुमारुद्देशण तहेव निरवसेसं भाणियव्वं जाव इड्ढी। सेवं भंते! सेवं भंते! जाव विहरइ।

\*सत्तरसमे सए तेरसमो उद्देशो समतो\*

### ० चोद्धसमो उद्देशो ०

[७१७] सुवण्णकुमारा णं भंते! सव्वे समाहारा०? एवं चेव।

सेवं भंते! सेवं भंते!०।

\*सत्तरसमे सए चउद्धसमो उद्देशो समतो\*

### ० पन्नरसमो उद्देशो ०

[७१८] विज्जुकुमारा णं भंते! सव्वे समाहारा०? एवं चेव।

सेवं भंते! सेवं भंते!०।

\*सत्तरसमे सए पन्नरसमो उद्देशो समतो\*

### ० सोलसमो उद्देशो ०

[७१९] वायकुमारा णं भंते! सव्वे समाहारा०? एवं चेव।

सेवं भंते! सेवं भंते!०।।

\*सत्तरसमे सए सोलसमो उद्देशो समतो\*

### ० सत्तरसमो उद्देशो ०

[७२०] अग्गिकुमारा णं भंते! सव्वे समाहारा०? एवं चेव।

सेवं भंते! सेवं भंते!०।

\*सत्तरसमे सए सत्तरसमो उद्देशो समतो\*

०-सत्तरसमं सयं समतं-०

० मुनि दीपरत्तसागरेण संशोधितः सम्पादितश्च सत्तरसमं सतं समतं ०

## [ ] अट्ठारसमं सयं [ ]

[७२१] पढमा विसाह मायंदिए य पाणातिवाय असुरे य।  
गुल केवलि अणगारे भविए तह सोमिलऽट्ठरसे।।

### ० पढमो उद्देशो ०

[७२२] तेषं कालेणं तेषं समएणं रायगिहे जाव एवं वयासी-  
जीवे णं भंते! जीवभावेणं किं पढमे, अपढमे? गोयमा! नो पढमे, अपढमे।  
एवं नेरइए जाव वेमाणिए।  
सिद्धे णं भंते! सिद्धभावेणं किं पढमे, अपढमे? गोयमा! पढमे, नो अपढमे।  
जीवा णं भंते! जीवभावेणं किं पढमा, अपढमा? गोयमा! नो पढमा, अपढमा।  
एवं जाव वेमाणिया।  
सिद्धा णं० पुच्छा। गोयमा! पढमा, नो अपढमा।  
आहारए णं भंते! जीवे आहारभावेणं किं पढमे, अपढमे? गोयमा! नो पढमे, अपढमे।  
एवं जाव वेमाणिए।  
पोहत्तिए एवं चेव।  
अणाहारए णं भंते! जीवे अणाहारभावेणं० पुच्छा? गोयमा! सिय पढमे, सिय अपढमे।  
नेरत्तिए णं भंते!०? एवं नेरत्तिए जाव वेमाणिए नो पढमे, अपढमे।  
सिद्धे पढमे, नो अपढमे।  
अणाहारगा णं भंते! जीवा अणाहारभावेणं० पुच्छा! गोयमा! पढमा वि, अपढमा वि।  
नेरत्तिया जाव वेमाणिया णो पढमा, अपढमा।  
सिद्धा पढमा, नो अपढमा। एक्केक्के पुच्छा भाणियच्चा।  
भवसिद्धीए एगत्त-पुहत्तेणं जहा आहारए ।  
एवं अभवसिद्धीए वि।  
नोभवसिद्धीय-नोअभवसिद्धीए णं भंते! जीवे नोभव० पुच्छा। गोयमा! पढमे, नो अपढमे।  
णोभवसिद्धीय-नोअभवसिद्धीये णं भंते! सिद्धे नोभव०? एवं चेव।  
एवं पुहत्तेण वि दोण्ह वि।  
सण्णी णं भंते! जीवे सण्णिभावेणं किं० पुच्छा। गोयमा! नो पढमे, अपढमे।  
एवं विगल्लिंदियवज्जं जाव वेमाणिए।  
एवं पुहत्तेण वि।  
असण्णी एवं चेव एगत्त-पुहत्तेणं, नवरं जाव वाणमंतरा।  
नोसण्णीनोअसण्णी जीवे मणुस्से सिद्धे पढमे, नो अपढमे।  
एवं पुहत्तेण वि।  
सत्तेसे णं भंते!० पुच्छा। गोयमा! जहा आहारए।  
एवं पुहत्तेण वि।

कणहलेस्सा जाव सुक्कलेस्सा एवं चेव, नवरं जस्स जा लेसा अत्थि।  
अलेसे णं जीव-मणुस्स-सिद्धे जहा नोसण्णीनोअसण्णी ।  
सम्मदिट्ठीए णं भंते! जीवे सम्मदिट्ठिभावेणं किं पढमे० पुच्छा। गोयमा! सिय पढमे, सिय  
अपढमे।

एवं एगिंदियवज्जं जाव वेमाणिए।

सिद्धे पढमे, नो अपढमे।

पुहत्तिया जीवा पढमा वि, अपढमा वि।

एवं जाव वेमाणिया।

सिद्धा पढमा, नो अपढमा।

मिच्छादिट्ठीए एगत्त-पुहत्तेणं जहा आहारगा।

सम्मामिच्छदिट्ठीए एगत्त-पुहत्तेणं जहा सम्मदिट्ठी नवरं जस्स अत्थि सम्मामिच्छंतं।

संजए जीवे मणुस्से य एगत्त-पुहत्तेणं जहा सम्मदिट्ठी ।

अस्संजए जहा आहारए ।

संजयासंजये जीवे पंचिंदियतिरिक्खजोणिय-मणुस्सा एगत्त-पुहत्तेणं जहा सम्मदिट्ठी।

नोसंजए नोअसंजए नोसंजयासंजये जीवे सिद्धे य एगत्तपुहत्तेणं पढमे, नो अपढमे।

सकसायी कोहकसायी जाव लोभकसायी, एए एगत्त-पुहत्तेणं जहा आहारए।

अकसायी जीवे सिय पढमे, सिय अपढमे।

एवं मणुस्से वि।

सिद्धे पढमे, नो अपढमे।

पुहत्तेणं जीव मणुस्सा वि पढमा वि, अपढमा वि।

सिद्धा पढमा, नो अपढमा।

णाणी एगत्त-पुहत्तेणं जहा सम्मदिट्ठी।

आभिणिबोहियनाणि जाव मणपज्जवनाणी एगत्त-पुहत्तेणं एवं चेव, नवरं जस्स जं अत्थि।

केवलनाणी जीवे मणुस्से सिद्धे य एगत्त-पुहत्तेणं पढमा, नो अपढमा।

अन्नाणि-मतिअन्नाणी सुयअन्नाणी विभंगनाणी य एगत्त-पुहत्तेणं जहा आहारए।

सजोगी-मणजोगी वइजोगी कायजोगी एगत्त-पुहत्तेणं जहा आहारए, नवरं जस्स जो जोगो

अत्थि।

अजोगी जीव-मणुस्स-सिद्धा एगत्त-पुहत्तेणं पढमा, नो अपढमा।

सागारोवउत्ता अणागारोवउत्ता एगत्त-पुहत्तेणं जहा अणाहारए।

सवेदगो जाव नपुंसगवेदगो एगत्त-पुहत्तेणं जहा आहारए, नवरं जस्स जो वेदो अत्थि।

अवेदओ एगत्त-पुहत्तेणं तिसु वि पएसु जहा अकसायी।

ससरीरी जहा आहारए। एवं जाव कम्मगसरीरी, जस्स जं अत्थि सरीरं; नवरं आहारगसरीरी

एगत्त-पुहत्तेणं जहा सम्मदिट्ठी।

असरीरी जीवे सिद्धे; एगत्त-पुहत्तेणं पढमा, नो अपढमा।

पंचहिं पज्जतीहिं, पंचहिं अपज्जतीहिं एगत्त-पुहत्तेणं जहा आहारए। नवरं जस्स जा अत्थि जाव वेमाणिया नो पढमा, अपढमा।

इमा लक्खणगाहा--

[७२३] जो जेण पत्तपुव्वो भावो सो तेणऽपढमओ होति।

सेसेसु होइ पढमो अपत्तपुव्वेसु भावेसु ॥

[७२४] जीवे णं भंते! जीवभावेणं किं चरिमे, अचरिमे? गोयमा! नो चरिमे, अचरिमे।

नेरतिए णं भंते! नेरतियभावेणं० पुच्छा। गोयमा! सिय चरिमे, सिय अचरिमे।

एवं जाव वेमाणिए।

सिद्धे जहा जीवे।

जीवा णं० पुच्छा। गोयमा! नो चरिमा, अचरिमा।

नेरतिया चरिमा वि, अचरिमा वि।

एवं जाव वेमाणिया।

सिद्धा जहा जीवा।

आहारए सव्वत्थ एगत्तेणं सिय चरिमे, सिय अचरिमे। पुहत्तेणं चरिमा वि, अचरिमा वि।

अणाहारओ जीवो सिद्धो य; एगत्तेण वि पुहत्तेण वि नो चरिमा, अचरिमा।

सेसट्ठाणेसु एगत्त-पुहत्तेणं जहा आहारओ ।

भवसिद्धीओ जीवपदे एगत्त-पुहत्तेणं चरिमे, नो अचरिमे।

सेसट्ठाणेसु जहा आहारओ।

अभवसिद्धीओ सव्वत्थ एगत्त-पुहत्तेणं नो चरिमे, अचरिमे।

नोभवसिद्धीयनोअभवसिद्धीयजीवा सिद्धा य एगत्त-पुहत्तेणं जहा अभवसिद्धीओ।

सण्णी जहा आहारओ। एवं असण्णी वि।

नोसन्नीनोअसन्नी जीवपदे सिद्धपदे य अचरिमो, मणुस्सपदे चरिमो, एगत्त-पुहत्तेणं।

सलेस्सो जाव सुक्कलेस्सो जहा आहारओ, नवरं जस्स जा अत्थि।

अलेस्सो जहा नोसण्णीनोअसण्णी।

समद्धिट्ठी जहा अणाहारओ।

मिच्छादिट्ठी जहा आहारओ ।

सम्मामिच्छद्धिट्ठी एगिंदिय-विगलिंदियवज्जं सिय चरिमे, सिय अचरिमे। पुहत्तेणं चरिमा

वि, अचरिमा वि।

संजओ जीवो मणुस्सो य जहा आहारओ।

असंजतो वि तहेव।

संजयासंजतो वि तहेव; नवरं जस्स जं अत्थि।

नोसंजयनोअसंजयनोसंजयासंजओ जहा नोभवसिद्धीयनोअभवसिद्धीयो।

सकसायी जाव लोभकसायी सव्वट्ठाणेसु जहा आहारओ।

अकसायी जीवपए सिद्धे य नो चरिमो, अचरिमो। मणुस्सपदे सिय चरिमो, सिय अचरिमो।

णाणी जहा सम्मद्धिटी सव्वत्थ।

आभिणिबोहियनाणी जाव मणपज्जवनाणी जहा आहारओ, जस्स जं अत्थि।

केवलनाणी जहा नोसण्णीनोअसण्णी।

अण्णाणी जाव विभंगनाणी जहा आहारओ।

सजोगी जाव कायजोगी जहा आहारओ, जस्स जो जोगो अत्थि।

अजोगी जहा नोसण्णीनोअसण्णी।

सागारोवउत्तो अणागारोवउत्तो य जहा अणाहारओ ।

सवेदओ जाव नपुंसगवेदओ जहा आहारओ ।

अवेदओ जहा अकसायी।

ससरीरी जाव कम्मगसरीरी जहा आहारओ, नवरं जस्स जं अत्थि।

असरीरी जहा नोभवसिद्धीयनोअभवसिद्धीओ।

पंचहिं पज्जतीहिं पंचहिं अपज्जतीहिं जहा आहारओ। सव्वत्थ एगत्त-पुहत्तेणं दंडगा

भाणियच्चा।

इमा लक्खणगाहा--

[७२५] जो जं पाविहिति पुणो भावं सो तेण अचरिमो होइ।

अच्चंतवियोगो जस्स जेण भावेण सो चरिमो ॥

[७२६] सेवं भंते! सेवं भंते!0 जाव विहरति।

**\*अट्ठारसमे सए पढमो उद्देशो समत्तो\***

## ० बीओ उद्देशो ०

[७२७] तेणं कालेणं तेणं समयेणं विसाहा नामं नगरी होत्था। वन्नओ। बहुपुत्तिए चेतिए। वण्णओ। सामी समोसढे जाव पज्जुवासति।

तेणं कालेणं तेणं समएणं सक्के देविंदे देवराया वज्जपाणी पुरंदरे एवं जहा सोलसमसए बितिए उद्देशए तहेव दिव्वेण जाणविमाणेण आगतो; नवरं एत्थ आभियोगा वि अत्थि, जाव बत्तीसतिविहं नट्ठविहिं उवदंसेति, उव0 २ जाव पडिगते।

भंते ! ति भगवं गोयमे समणं जाव एवं वदासी- जहा ततियसते ईसाणस्स तहेव कूडागार दिट्ठंतो, तहेव पुव्वभवपुच्छा जाव अभिसमन्नागया? 'गोयमा' ईसमणे भगवं महावीरे भगवं गोतमं एवं वदासी-"एवं खलु गोयमा!, "तेणं कालेणं तेणं समएणं इहेव जंबुद्धीवे दीवे भारहे वासे हत्थिणापुरे नामं नगरे होत्था। वण्णओ। सहस्संबवणे उज्जाणे। वण्णओ।

तत्थ णं हत्थिणापुरे नगरे कत्तिए नामं सेट्ठी परिवसइ अड्ढे जाव अपरिभूए णेगमपढमासणिए, णेगमट्ठसहस्सस्स बहूसु कज्जेसु य कारणेसु य कोडुंबेसु य एवं जहा रायपसेणइज्जे चित्ते जाव चक्खुभूते णेगमट्ठसहस्सस्स सायस्स य कुडुंबस्स आहेवच्चं जाव करेमाणे पालेमाणे समणोवासए अभिगयजीवाजीवे जाव विहरति।

तेणं कालेणं तेणं समएणं मुणिसुव्वयेअरहा आदिगरे जहा सोलसमसए तहेव जाव समोसढे

जाव परिसा पज्जुवासति।

तए णं से कतिए सेट्ठी इमीसे कहाए लद्धट्ठे समाणे हट्ठतुट्ठो एवं जहा एक्कारसमसते सुदंसणे तहेव निग्गओ जाव पज्जुवासति।

तए णं मुणिसुव्वए अरहा कतियस्स सेट्ठिस्स धम्मकहा जाव परिसा पडिगता।

तए णं से कतिए सेट्ठी मुणिसुव्वयओ जाव निसम्म हट्ठतुट्ठो उट्ठाए उट्ठेति, ओ २ मुणिसुव्वयं जाव एवं वदासी--'एवमेयं भंते! जाव से जहेयं तुब्भे वदह। जं नवरं देवाणुप्पिया! नेगमट्ठसहस्सं आपुच्छामि, जेट्ठपुत्तं च कुडुंबे ठावेमि, तए णं अहं देवाणुप्पियाणं अंतियं पव्वयामि। अहासुहं जाव मा पडिबंधं'।

तए णं से कतिए सेट्ठी जाव पडिनिक्खमइ, पओ २ जेणेव हत्थिणापुरे नगरे जेणेव सए गिहे तेणेव उवागच्छइ, उवाओ २ नेगमट्ठसहस्सं सद्दावेइ, सओ २ एवं वयासी--'एवं खलु देवाणुप्पिया! मए मुणिसुव्वयस्स अरहओ अंतियं धम्मे निसंते, से वि य मे धम्मे इच्छए पडिच्छए अभिरुयिते। तए णं अहं देवाणुप्पिया! संसारभयुव्विग्गे जाव पव्वयामि। तं तुब्भे णं देवाणुप्पिया! किं करेह? किं ववसह? के भे हिदइच्छए? के भे सामत्थे?'

तए णं तं नेगमट्ठसहस्सं तं कतियं सेट्ठिं एवं वदासी--'जदि णं देवाणुप्पिया! संसारभयुव्विग्गा जाव पव्वइस्संति अम्हं देवाणुप्पिया! किं अन्ने आलंबणे वा आहारे वा पडिबंधे वा? अम्हे वि णं देवाणुप्पिया! संसारभउव्विग्गा भीता जम्मण-मरणाणं देवाणुप्पिएहिं सद्धिं मुणिसुव्वयस्स अरहओ अंतियं मुंडा भवित्ता अगाराओ जाव पव्वयामो'।

तए णं से कतिए सेट्ठी तं नेगमट्ठसहस्सं एवं वयासी--'जदि णं देवाणुप्पिया! संसारभयुव्विग्गा भीया जम्मण-मरणाणं मए सद्धिं मुणिसुव्वय जाव पव्वाह तं गच्छह णं तुब्भे देवाणुप्पिया! सएसु गिहेसुओ जेट्ठपुत्ते कुडुंबे ठावेह, जेट्ठओ ठाओ २ पुरिससहस्सवाहिणीओ सीयाओ द्रूहह, पुरिसओ द्रूओ २ अकालपरिहिणं चेव मम अंतियं पादुब्भवह'।

तए णं तं नेगमट्ठसहस्सं पि कतियस्स सेट्ठिस्स एतमट्ठं विणएणं पडिसुणेति, पओ २ जेणेव साइं साइं गिहाइं तेणेव उवागच्छइ, उवाओ २ विपुलं असण जाव उवक्खडावेति, ओ २ मित्तनातिओ जाव तस्सेव मित्तनातिओ जाव पुरतो जेट्ठपुत्ते कुडुंबे ठावेति, जेओ ठाओ २ तं मित्तनाति जाव जेट्ठपुत्ते य आपुच्छति, आओ २ पुरिससहस्सवाहिणीओ सीयाओ द्रूहति, पुओ द्रूओ २ मित्तनातिओ जाव परिजणेणं जेट्ठपुत्तेहि य समणुगम्ममाणमग्गा(?ग्गं) सव्विइदीए जाव रवेणं अकालपरिहीणं चेव कतियस्स सेट्ठिस्स अंतियं पाउब्भवति।

तए णं से कतिए सेट्ठी विपुलं असण ४ जहा गंगदत्तो जाव मित्तनातिओ जाव परिजणेणं जेट्ठपुत्तेणं नेगमट्ठसहस्सेण य समणुगम्ममाणमग्गे सव्विइदीए जाव रवेणं हत्थिणापुरं नगरं मज्झंमज्झेणं जहा गंगदत्तो जाव आलिते णं भंते! लोए, पलिते णं भंते! लोए, जाव आणुगामियत्ताए भविस्सति, तं इच्छामि णं भंते! नेगमट्ठसहस्सेणं सद्धिं सयमेव पव्वावियं जाव धम्ममाइक्खितं।

तए णं मुणिसुव्वए अरहा कतियं सेट्ठिं नेगमट्ठसहस्सेणं सद्धिं सयमेव पव्वावेइ जाव धम्ममाइक्खइ- एवं देवाणुप्पिया! गंतव्वं, एवं चिट्ठियव्वं जाव संजमियव्वं।

तए णं से कतिए सेट्ठी नेगमट्ठसहस्सेण सद्धिं मुणिसुव्वयस्स अरहओ इमं एयारूवं

धम्मियं उवदेसं सम्मं संपडिवज्जति तमाणाए तहा गच्छति जाव संजमति।

तए णं से कत्तिए सेट्ठी णेगमट्ठसहस्सेणं सद्धिं अणगारे जाए रियासमिए जाव गुत्तबंभचारी।

तए णं से कत्तिए अणगारे मुणिसुव्वयस्स अरहओ तहारूवाणं थेराणं अंतियं सामाइयमाइयाइं चोद्धस पुव्वाइं अहिज्जइ, सा० अ० २ बहूहिं चउत्थच्छट्ठसट्ठम० जाव अप्पाणं भावेमाणे बहुपडिपुण्णाइं दुवालसवासाइं सामण्णपरियागं पाउणति, ब० पा० २ मासियाए संलेहणाए अत्ताणं झोसेइ, मा० झो० २ सट्ठिं भत्ताइं अणसणाए छेदेति, स० छे० २ आलोइय जाव कालं किच्चा सोहम्मं कप्पे सोहम्मवडैसए विमाणे उववायसभाए देवसयणिज्जंसि जाव सक्के देविंदत्ताए उववन्ने।

तए णं से सक्के देविंदे देवराया अहुणोववन्ने०।

सेसं जहा गंगदत्तस्स जाव अंतं काहित्ति, नवरं ठिती दो सागरोवमाइं सेसं तं चेव।

सेवं भंते! सेवं भंते! ति०।

**\*अट्ठारसमे सए बीइओ उद्देशो समतो\***

**० तइओ उद्देशो ०**

[७२८] तेणं कालेणं तेणं समएणं रायगिहे नामं नगरे होत्था। वण्णओ। गुणसिलए चेतिए। वण्णओ। जाव परिसा पडिगया।

तेणं कालेणं तेणं समएणं समणस्स भगवतो महावीरस्स जाव अंतेवासी मागंदियपुत्ते नामं अणगारे पगतिभद्दए जहा मंडियपुत्ते जाव पज्जुवासमाणे एवं वयासी--से नूणं भंते! काउलेस्से पुढविकाइए काउलेस्सेहिंतो पुढविकाइएहिंतो अणंतरं उव्वट्ठिता माणुस्सं विग्गहं लभति, मा० ल० २ केवलं बोहिं बुज्झइ, केव० बु० २ तओ पच्छा सिज्झति जाव अंतं करेति? हंता, मागंदियपुत्ता! काउलेस्से पुढविकाइए जाव अंतं करेति।

से नूणं भंते! काउलेस्से आउकाइए काउलेस्सेहिंतो आउकाइएहिंतो अणंतरं उव्वट्ठिता माणुस्सं विग्गहं लभति, माणुस्सं विग्गहं लभित्ता केवलं बोहिं बुज्झति जाव अंतं करेति? हंता, मागंदियपुत्ता! जाव अंतं करेति।

से नूणं भंते! काउलेस्से वणस्सइकाइए०? एवं चेव जाव अंतं करेति।

सेवं भंते! सेवं भंते! ति मागंदियपुत्ते अणगारे समणं भगवं महावीरं जाव नमंसित्ता जेणेव समणे निग्गंथे तेणेव उवागच्छति, ते० उ० २ समणे निग्गंथे एवं वदासी--'एवं खलु अज्जो! काउलेस्से पुढविकाइए तहेव जाव अंतं करेति। एवं खलु अज्जो! काउलेस्से आउक्काइए जाव अंतं करेति। एवं खलु अज्जो! काउलेस्से वणस्सत्तिकाइए जाव अंतं करेति'।

तए णं ते समणा निग्गंथा मागंदियपुत्तस्स अणगारस्स एवमाइक्खमाणस्स जाव एवं परूवेमाणस्स एयमट्ठं नो सद्धंति ३, एयमट्ठं असद्धमाणा ३ जेणेव समणे भगवं महावीरे तेणेव उवागच्छंति, ते० उ० २ समणं भगवं महावीरं वंदंति नमंसंति, वं० २ एवं वयासी--एवं खलु भंते! मागंदियपुत्ते अणगारे अम्मं एवमाइक्खइ जाव परूवेइ--'एवं खलु अज्जो! काउलेस्से पुढविकाइए जाव अंतं करेति, एवं खलु अज्जो! काउलेस्से आउकाइए जाव अंतं करेति, एवं वणस्सत्तिकाइए वि जाव अंतं करेति। से कहमेयं

भंते! एवं? अज्जो!ति समणे भगवं महावीरे ते समणे निग्गंथे आमंतिता एवं वयासी-

जं णं अज्जो! मागंदियपुत्ते अणगारे तुब्भे एवमाइक्खइ जाव परूवेइ- 'एवं खलु अज्जो! काउलेस्से पुढविकाइए जाव अंतं करेति, एवं खलु अज्जो! काउलेस्से आउकाइए जाव अंतं करेति, एवं खलु वणस्सइकातिए वि जाव अंतं करेति' सच्चे णं एसमट्ठे, अहं पि णं अज्जो! एवमाइक्खामि ४ एवं खलु अज्जो! कणहलेस्से पुढविकाइए कणहलेस्सेहिंतो पुढविकाइएहिंतो जाव अंतं करेति, एवं खलु अज्जो! नीललेस्से पुढविकाइए जाव अंतं करेति, एवं काउलेस्से वि, जहा पुढविकाइए एवं आउकाइए वि, एवं वणस्सतिकाइए वि, सच्चे णं एसमट्ठे।

सेवं भंते! सेवं भंते! ति समणा निग्गंथा समणं भगवं महावीरं वंदंति नमंसंति, वं० २ जेणेव मागंदियपुत्ते अणगारे तेणेव उवागच्छंति, उवा० २ मागंदियपुत्तं अणगारं वंदंति नमंसंति, वं० २ एयमट्ठं सम्मं विणएणं भुज्जो भुज्जो खामैति।

**[७२९]** तए णं से मागंदियपुत्ते अणगारे उट्ठाए उट्ठेइ, ५० २ जेणेव समणे भगवं महावीरे तेणेव उवागच्छति, ते० ५० २ समणं भगवं महावीरं वंदंति नमंसंति, वं० २ एवं वदासी--अणगारस्स णं भंते! भावियप्पणो सत्वं कम्मं वेदेमाणस्स, सत्वं कम्मं निज्जरेमाणस्स, सत्वं मारं मरमाणस्स, सत्वं सरीरं विप्पजहमाणस्स, चरिमं कम्मं वेदेमाणस्स, चरिमं कम्मं निज्जरेमाणस्स, चरिमं मारं मरमाणस्स, चरिमं सरीरं विप्पजहमाणस्स, मारणंतियं कम्मं वेदेमाणस्स, मारणंतियं कम्मं निज्जरेमाणस्स, मारणंतियं मारं मरमाणस्स, मारणंतियं सरीरं विप्पजहमाणस्स जे चरिमा निज्जरापोग्गला, सुहुमा णं ते पोग्गला पण्णत्ता समणाउसो! सत्वं लोगं पि णं ते ओगाहिताणं चिट्ठंति? हंता, मागंदियपुत्ता! अणगारस्स णं भावियप्पणो जाव ओगाहिताणं चिट्ठंति।

छउमत्थे णं भंते! मणुस्से तेसिं निज्जरापोग्गलाणं किंचि आणत्तं वा णाणत्तं वा एवं जहा इंदियउद्देशए पढमे जाव वेमाणिया जाव तत्थ णं जे ते उवउत्ता ते जाणंति पासंति आहारंति, सेतेणट्ठेणं निक्खेवो भाणितव्वो।

**[७३०]** कतिविधे णं भंते! बंधे पन्नते? मागंदियपुत्ता! दुविहे बंधे पन्नते, तं जहा--दव्वबंधे य भावबंधे य।

दव्वबंधे णं भंते ! कतिविधे पन्नते ? मागंदियपुत्ता ! दुविधे पन्नते, तं जहा- पयोगबंधे य वीससाबंधे य।

वीससाबंधे णं भंते ! कतिविधे पन्नते ? मागंदियपुत्ता! दुविधे पन्नते, तं जहा- सादीय- वीससाबंधे य अणादीयवीससाबंधे य।

पयोगबंधे णं भंते! कतिविधे पन्नते? मागंदियपुत्ता! दुविहे पन्नते, तं जहा--सिद्धिलबंधणबंधे य धणियबंधणबंधे य।

भावबंधे णं भंते! कतिविधे पन्नते? मागंदियपुत्ता! दुविहे पन्नते, तं जहा--मूलपगडिबंधे य उत्तरपगडिबंधे य।

नेरइयाणं भंते! कतिविहे भावबंधे पन्नते? मागंदियपुत्ता! दुविहे भावबंधे पन्नते, तं जहा-- मूलपगडिबंधे य उत्तरपगडिबंधे य।

एवं जाव वेमाणियाणं।

नाणावरणिज्जस्स णं भंते! कम्मस्स कतिविहे भावबंधे पन्नते? मागंदियपुत्ता! दुविहे भावबंधे पन्नते, तं जहा- मूलपगडिबंधे य उत्तरपगडिबंधे य।

नेरइयाणं भंते! नाणावरणिज्जस्स कम्मस्स कतिविहे भावबंधे पण्णते? मागंदियपुत्ता! दुविहे भावबंधे पन्नते, तं जहा- मूलपगडिबंधे य उत्तरपगडिबंधे य।

एवं जाव वेमाणियाणं।

जहा नाणावरणिज्जेणं दंडओ भणिओ एवं जाव अंतराइएणं भाणियच्चो।

**[७३१]** जीवाणं भंते! पावे कम्मे जे य कडे जाव जे य कज्जिस्सइ अत्थि याइं तस्स केयि णाणते? हंता, अत्थि।

से केणट्ठेणं भंते! एवं वुच्चति 'जीवाणं पावे कम्मे जे य कडे जाव जे य कज्जिस्सति अत्थि याइं तस्स णाणते?' 'मागंदियपुत्ता! से जहानामए--केयि पुरिसे धणुं परामुसति, धणुं प० २ उंसुं परामुसति, उंसुं प० २ ठाणं ठाति, ठा० २ आयतकण्णायतं उंसुं करेति, आ० क० २ उड्ढं वेहासं उच्चिहइ। से नूणं मागंदियपुत्ता! तस्स उंसुस्स उड्ढं वेहासं उच्चिहस्स समाणस्स एयति वि णाणत्तं, जाव तं तं भावं परिणमति वि णाणत्तं?' 'हंता, भगवं! एयति वि णाणत्तं, जाव परिणमति वि णाणत्तं।' सेतेणट्ठेणं मागंदियपुत्ता! एवं वुच्चति जाव तं तं भावं परिणमति वि णाणत्तं।

नेरतियाणं भंते! पावे कम्मे जे य कडे० एवं चेव।

एवं जाव वेमाणियाणं।

**[७३२]** नेरतिया णं भंते! जे पोग्गले आहारताए गेण्हंति तेसि णं भंते! पोग्गलाणं सेयकालंसि कतिभागं आहारंति, कतिभागं निज्जरंति? मागंदियपुत्ता! असंखेज्जइभागं आहारंति, अणंतभागं निज्जरंति।

चक्किया णं भंते! केयि तेसु निज्जरापोग्गलेसु आसइत्तए वा जाव तुयट्ठि॥त्तए वा? नो इणट्ठे समट्ठे, अणाहरणमेयं बुइयं समणाउसो!

एवं जाव वेमाणियाणं।

सेवं भंते! सेवं भंते! ति०।

### **\*अट्ठारसमे सए तइओ उद्देशो समतो\***

### **० चउत्थो उद्देशो ०**

**[७३३]** तेणं कालेणं तेणं समएणं रायगिहे जाव भगवं गोयमे एवं वयासि--

अहं भंते! पाणातिवाए मुसावाए जाव मिच्छादंसणसल्ले, पाणातिवायवेरमणे जाव मिच्छा-दंसणसल्लवेरमणे, पुढविकाए जाव वणस्सतिकाये, धम्मत्थिकाए अधम्मत्थिकाए आगासत्थिकाये जीवे असरीरपडिबद्धे, परमाणुपोग्गले, सेलेसिं पडिवन्नए अणगारे, सच्चे य बादरबोदिधरा कलेवरा; एए णं दुविहा जीवदच्चा य अजीवदच्चा य जीवाणं परिभोगत्ताए हच्चमागच्छंति? गोयमा! पाणातिवाए जाव एए णं दुविहा जीवदच्चा य अजीवदच्चा य अत्थेगतिया जीवाणं परिभोगत्ताए हच्चमागच्छंति, अत्थेगतिया जीवाणं जाव नो हच्चमागच्छंति।

से केणट्ठेणं भंते! एवं वुच्चति 'पाणाइवाए जाव नो हच्चमागच्छंति?' गोयमा! पाणातिवाए

जाव मिच्छादंसणसल्ले, पुढविकाइए जाव वणस्सतिकाइए सव्वे य बादरबोदिधरा कलेवरा, एए णं दुविहा-जीवदव्वा य अजीवदव्वा य जीवाणं परिभोगत्ताए हव्वमागच्छंति। पाणातिवायवेरमणे जाव मिच्छादंसण-सल्लविवेगे, धम्मत्थिकाये अधम्मत्थिकाये जाव परमाणुपोग्गले, सेलेसिं पडिवन्नए अणगारे, एए णं दुविहा जीवदव्वा य अजीवदव्वा य जीवाणं परिभोगत्ताए नो हव्वमागच्छंति। सेतेणट्ठेणं जाव नो हव्वमागच्छंति।

**[७३४]** कति णं भंते! कसाया पन्नता? गोयमा! चत्तारि कसाया पन्नता, तं जहा--कसायपयं निरवसेसं भाणियव्वं जाव निज्जरिस्संति लोभेणं।

कति णं भंते! जुम्मा पन्नता? गोयमा! चत्तारि जुम्मापन्नता, तं जहा--कडजुम्मे तेयोए दावरजुम्मे कलिओए।

से केणट्ठेणं भंते! एवं वुच्चति--जाव कलिओए? गोयमा! जे णं रासी चउक्कएणं अवहारेणं अवहीरमाणे चउपज्जवसिए से तं कडजुम्मे। जे णं रासी चउक्कएणं अवहारेणं अवहीरमाणे तिपज्जवसिए से तं तेयोए। जे णं रासी चउक्कएणं अवहारेणं अवहीरमाणे दुपज्जवसिए से तं दावरजुम्मे। जे णं रासी चउक्कएणं अवहारेणं अवहीरमाणे एगपज्जवसिए से तं कलिओये, सेतेणट्ठेणं गोतमा! एवं वुच्चति जाव कलिओए।

नेरतिया णं भंते! किं कडजुम्मा तेयोया दावरजुम्मा कलिओया? गोयमा! जहन्नपए कडजुम्मा, उक्कोसपए तेयोया, अजहन्नमणुक्कोसपदे सिय कडजुम्मा जाव सिय कलियोया।

एवं जाव थणियकुमारा।

वणस्सतिकातिया णं० पुच्छा। गोयमा! जहन्नपदे अपदा, उक्कोसपदे अपदा, अजहन्नमणुक्कोसपदे सिय कडजुम्मा जाव सिय कलियोगा।

बेइंदिया णं० पुच्छा। गोयमा! जहन्नपए कडजुम्मा, उक्कोसपए दावरजुम्मा, अजहन्नमणु-क्कोसपए सिय कडजुम्मा जाव सिय कलियोगा।

एवं जाव चतुरिंदिया।

सेसा एगिंदिया जहा बेंदिया।

पंचिंदियतिरिक्खजोणिया जाव वेमाणिया जहा नेरतिया।

सिद्धा जहा वणस्सतिकाइया।

इत्थीओ णं भंते! किं कडजुम्माओ० पुच्छा। गोयमा! जहन्नपदे कडजुम्माओ, उक्कोसपए कडजुम्माओ, अजहन्नमणुक्कोसपए सिय कडजुम्माओ जाव सिय कलियोगाओ।

एवं असुरकुमारित्थीओ वि जाव थणियकुमारित्थीओ।

एवं तिरिक्खजोणित्थीओ।

एवं मणुस्सित्थीओ।

एवं जाव वाणमंतर-जोतिसिय-वेमाणियदेवित्थीओ।

**[७३५]** जावतिया णं भंते! वरा अंधगवण्हिणो जीवा तावतिया परा अंधगवण्हिणो जीवा? हंता, गोयमा! जावतिया वरा अंधगवण्हिणो जीवा तावतिया परा अंधगवण्हिणो जीवा।

सेवं भंते! सेवं भंते! ति०।

**\*अट्ठारसमे सए चउत्थो उद्देशो समतो\***

## ० पंचमो उद्देशो ०

[७३६] दो भंते! असुरकुमारा एगंसि असुरकुमारावासंसि असुरकुमारदेवताए उववन्ना। तत्थ णं एगे असुरकुमारे देवे पासादीए दरिसणिज्जे अभिरूवे पडिरूवे, एगे असुरकुमारे देवे से णं नो पासादीए नो दरिसणिज्जे नो अभिरूवे नो पडिरूवे, से कहमेयं भंते! एवं? गोयमा! असुरकुमारा देवा दुविहा पन्नता, तं जहा--वेउच्चियसरीरा य अवेउच्चियसरीरा य। तत्थ णं जे से वेउच्चियसरीरे असुरकुमारे देवे से णं पासादीए जाव पडिरूवे। तत्थ णं जे से अवेउच्चियसरीरे असुरकुमारे देवे से णं नो पासादीए जाव नो पडिरूवे।

से केणट्ठेणं भंते! एवं वुच्चइ तत्थ णं जे से वेउच्चियसरीरे० तं चेव जाव नो पडिरूवे? गोयमा! से जहानामए इहं मणुयलोगंसि दुवे पुरिसा भवंति--एगे पुरिसे अलंकियविभूसिए, एगे पुरिसे अणलंकियविभूसिए; एएसि णं गोयमा! दोण्हं पुरिसाणं कयरे पुरिसे पासादीये जाव पडिरूवे? कयरे पुरिसे नो पासादीए जावन नो पडिरूवे? जे वा से पुरिसे अलंकियविभूसिए, जे वा से पुरिसे अलंकियविभूसिए? भगवं! तत्थ णं जे से पुरिसे अलंकियविभूसिए से णं पुरिसे पासादीये जाव पडिरूवे, तत्थ णं जे से पुरिसे अणलंकियविभूसिए से णं पुरिसे नो पासादीए जाव नो पडिरूवे। सेतेणट्ठेणं जाव नो पडिरूवे।

दो भंते! नागकुमारा देवा एगंसि नागकुमारावासंसि०? एवं चेव।

एवं जाव थणियकुमारा।

वाणमंतर-जोतिसिय-वेमाणिया एवं चेव।

[७३७] दो भंते! नेरइया एगंसि नेरतियावासंसि नेरतियताए उववन्ना। तत्थ णं एगे नेरइए महाकम्मतराए चेव जाव महावेदणतराए चेव, एगे नेरइए अप्पकम्मतराए चेव जाव अप्पवेदणतराए चेव, से कहमेयं भंते! एवं? गोयमा! नेरइया दुविहा पन्नता, तं जहा--मायिमिच्छद्धिट्ठिउववन्नगा य, अमायिसम्मद्धिट्ठिउववन्नगा य। तत्थ णं जे से मायिमिच्छद्धिट्ठिउववन्नए नेरतिए से णं महाकम्मतराए चेव जाव महावेदणतराए चेव, तत्थ णं जे से अमायिसम्मद्धिट्ठिउववन्नए नेरइए से णं अप्पकम्मतराए चेव जाव अप्पवेदणतराए चेव।

दो भंते! असुरकुमारा०? एवं चेव।

एवं एगिंदिय-विगलिनंदियवज्जा जाव वेमाणिया।

[७३८] नेरइए णं भंते! अणंतरं उच्चट्ठिता जे भविए पंचिंदियतिरिक्खजोणिएसु उववज्जित्तए से णं भंते! कयरं आउयं पडिसंवेदेति? गोयमा! नेरइयाउयं पडिसंवेदेति, पंचिंदियतिरिक्खजोणियाउए से पुरओ कडे चिट्ठइ।

एवं मणुस्सेसु वि, नवरं मणुस्साउए से पुरतो कडे चिट्ठति।

असुरकुमारे णं भंते! अणंतरं उच्चट्ठिता जे भविए पुढविकाइएसु उववज्जित्तए० पुच्छा। गोयमा! असुरकुमाराउयं पडिसंवेदेति, पुढविकाइयाउए से पुरतो कडे चिट्ठइ।

एवं जो जहिं भविओ उववज्जित्तए तस्स तं पुरतो कडं चिट्ठति, जत्थ ठितो तं पडिसंवेदेति जाव वेमाणिए। नवरं पुढविकाइओ पुढविकाइएसु उववज्जंतओ पुढविकाइयाउयं पडिसंवेदेति, अन्ने य से पुढविकाइयाउए पुरतो कडे चिट्ठति। एवं जाव मणुस्सो सट्ठाणे उववातेयव्वो, परट्ठाणे तहेव।

[७३९] दो भंते! असुरकुमारा एगंसि असुरकुमारावासंसि असुरकुमारदेवताए उववन्ना। तत्थ

पं एगे असुरकुमारे देवे 'उज्जुयं विउच्चिस्सामी'ति उज्जुयं विउच्चइ, 'वंकं विउच्चिस्सामी'ति वंकं विउच्चइ, जं जहा इच्छति तं तहा विउच्चइ। एगे असुरकुमारे देवे 'उज्जुयं विउच्चिस्सामी'ति वंकं विउच्चति, 'वंकं विउच्चिस्सामी'ति उज्जुयं विउच्चति, जं जहा इच्छति णो तं तहा विउच्चति। से कहमेयं भंते! एवं? गोयमा! असुरकुमारा देवा दुविहा पन्नता, तं जहा- मायिमिच्छद्दिठ्ठववन्नगा य अमायिसम्मद्दिठ्ठववन्नगा य। तत्थ णं जे से मायिमिच्छद्दिठ्ठववन्नए असुरकुमारे देवे से णं 'उज्जुयं विउच्चिस्सामी'ति वंकं विउच्चति जाव णो तं तहा विउच्चइ, तत्थ णं जे से अमायिसम्मद्दिठ्ठववन्नए असुरकुमारे देवे से 'उज्जुयं विउच्चिस्सामी'ति उज्जुयं विउच्चति जाव तं तहा विउच्चति।

दो भंते! नागकुमारा०? एवं चेव।

एवं जाव थणियकुमारा।

वाणमंतर-जोतिसिय-वेमाणिया एवं चेव।

सेवं भंते! सेवं भंते! त्ति०।

**\*अट्ठारसमे सए पंचमो उद्देशो समतो\***

## ० छट्ठो उद्देशो ०

[७४०] फाणियगुले णं भंते! कतिवण्णे कतिगंधे कतिरसे कतिफासे पन्नते? गोयमा! एत्थं दो नया भवंति, तं जहा--नेच्छइयनए य वावहारियनए य। वावहारियनयस्स गोड्डे फाणियगुले, नेच्छइयनयस्स पंचवण्णे दुगंधे पंचरसे अट्ठफासे पन्नते।

भमरे णं भंते! कतिवण्णे० पुच्छा। गोयमा! एत्थं दो नया भवंति, तं जहा--नेच्छइयनए य वावहारियनए य। वावहारियनयस्स कालए भमरे, नेच्छइयनयस्स पंचवण्णे जाव अट्ठफासे पन्नते।

सुयपिंछे णं भंते! कतिवण्णे०? एवं चेव, नवरं वावहारियनयस्स नीलए सुयपिंछे, नेच्छइयनयस्स पंचवण्णे० सेसं तं चेव।

एवं एणं अभिलावेणं लोहिया मंजिट्ठी पीतिया हलिद्धा, सुक्किलए संखे, सुब्भिगंधे कोट्ठे, दुब्भिगंधे मयगसरीरे, तित्ते निंबे, कडुया सुंठी, कसायतुरए कविट्ठे, अंबा अंबिलिया, महुरे खंडे, कक्खंडे वडुरे, मउए नवणीए, गरुए अये, लहुए उलुयपत्ते, सीए हिमे, उसिणे अगणिकाए, णिद्धे तेल्ले।

छारिया णं भंते!० पुच्छा। गोयमा! एत्थ दो नया भवंति, तं जहा--नेच्छइयनए य वावहारियनए य। वावहारियनयस्स लुक्खा छारिया, नेच्छइयनयस्स पंचवण्णा जाव अट्ठफासा पन्नता।

[७४१] परमाणुपोग्गले णं भंते! कइवण्णे जाव कतिफासे पन्नते? गोयमा! एगवण्णे एगगंधे एगरसे दुफासे पन्नते।

दुपदेसिए णं भंते! खंधे कतिवण्णे० पुच्छा। गोयमा! सिय एगवण्णे सिय दुवण्णे, सिय एगगंधे सिय दुगंधे, सिय एगरसे सिय दुरसे, सिय दुफासे, सिय तिफासे, सिय चउफासे पन्नते।

एवं तिपदेसिए वि, नवरं सिय एगवण्णे, सिय दुवण्णे, सिय तिवण्णे। एवं रसेसु वि। सेसं जहा दुपदेसियस्स।

एवं चउपदेसिए वि, नवरं सिय एगवण्णे जाव सिय चउवण्णे। एवं रसेसु वि। सेसं तं चेव।

एवं पंचपदेसिए वि, नवरं सिय एगवण्णे जाव सिय पंचवण्णे। एवं रसेसु वि। गंध-फासा

तहेव।

जहा पंचपएसिओ एवं जाव असंखेज्जपएसिओ।

सुहुमपरिणए णं भंते! अणंतपदेसिए खंधे कतिवण्णे०? जहा पंचपदेसिए तहेव निरवसेसं।

बादरपरिणए णं भंते! अणंतपएसिए खंधे कतिवण्णे० पुच्छ। गोयमा! सिय एगवण्णे जाव सिय पंचवण्णे, सिय एगगंधे सिय दुगंधे, सिय एगरसे जाव सिय पंचरसे, सिय चउफासे जाव सिय अट्ठफासे पन्नते।

सेवं भंते! सेवं भंते! ति०।

**\*अट्ठारसमे सए छट्ठो उद्देशो समतो\***

**० सत्तमो उद्देशो ०**

**[७४२]** रायगिहे जाव एवं वयासी-

अन्नउत्थिया णं भंते! एवमाइक्खंति जाव परुवेति- एवं खलु केवली जक्खाएसेणं आइस्सति, एवं खलु केवली जक्खाएसेणं आइट्ठे समाणे आहच्य दो भासाओ भासइ, तं जहा- मोसं वा सच्चामोसं वा। से कहमेयं भंते! एवं? गोयमा! जं णं ते अन्नउत्थिया जाव जे ते एवमाहंसु मिच्छं ते एवमाहंसु, अहं पुण गोयमा! एवमाइक्खामि ४- नो खलु केवली जक्खाएसेणं आइस्सति, नो खलु केवली जक्खाएसेणं आइट्ठे समाणे आहच्य दो भासाओ भासइ, तं जहा--मोसं वा सच्चामोसं वा। केवली णं असावज्जाओ अपरोवघातियाओ आहच्य दो भासाओ भासति, तं जहा--सच्चं वा असच्चामोसं वा।

**[७४३]** कतिविधे णं भंते! उवही पन्नते? गोयमा! तिविहे उवही पन्नते, तं जहा--कम्मोवही सरीरोवही बाहिरभंडमत्तोवगरणोवही।

नेरइयाणं भंते!० पुच्छ। गोयमा! दुविहे उवही पन्नते, तं जहा--कम्मोवही य सरीरोवही य।

सेसाणं तिविहा उवही एगिंदियवज्जाणं जाव वेमाणियाणं।

एगिंदियाणं दुविहे, तं जहा--कम्मोवही य सरीरोवही य।

कतिविधे णं भंते! उवही पन्नते? गोयमा! तिविहे उवही पन्नते, तं जहा--सच्चित्ते अचित्ते

मीसए।

एवं नेरइयाण वि।

एवं निरवसेसं जाव वेमाणियाणं।

कतिविधे णं भंते! परिग्गहे पन्नते? गोयमा! तिविहे परिग्गहे पन्नते, तं जहा--कम्मपरिग्गहे सरीरपरिग्गहे बाहिरगभंडमत्तोवगरणपरिग्गहे।

नेरतियाणं भंते!०? एवं जहा उवहिणा दो दंडगा भणिया तहा परिग्गहेण वि दो दंडगा भाणियत्त्वा।

कतिविधे णं भंते! पणिहाणे पन्नते? गोयमा! तिविहे पणिहाणे पन्नते, तं जहा-मणपणिहाणे वइपणिहाणे कायपणिहाणे।

नेरतियाणं भंते! कतिविहे पणिहाणे पन्नते? एवं चेव।

एवं जाव थणियकुमाराणं।

पुढविकाइयाणं० पुच्छा। गोयमा! एगे कायपणिहाणे पन्नते।

एवं जाव वणस्सतिकाइयाणं।

बेइंदियाणं० पुच्छा। गोयमा! दुविहे पणिहाणे पन्नते, तं जहा--वइपणिहाणे य कायपणिहाणे

य।

एवं जाव चउरिंदियाणं।

सेसाणं तिविहे वि जाव वेमाणियाणं।

कतिविधे णं भंते! दुप्पणिहाणे पन्नते? गोयमा! तिविहे दुप्पणिहाणे पन्नते, तं जहा-  
मणदुप्पणिहाणे जहेव पणिहाणेणं दंडगो भणितो तहेव दुप्पणिहाणेण वि भाणियव्वो।

कतिविधे णं भंते! सुप्पणिहाणे पन्नते? गोयमा! तिविधे सुप्पणिहाणे पन्नते, तं जहा--  
मणसुप्पणिहाणे वतिसुप्पणिहाणे कायसुप्पणिहाणे।

मणुस्साणं भंते! कतिविधे सुप्पणिहाणे पन्नते? एवं चेव।

सेवं भंते! सेवं भंते! जाव विहरति।

तए णं समणे भगवं महावीरे जाव बहिया जणवयविहारं विहरइ।

[७४४]तेणं कालेणं तेणं समएणं रायगिहे नामं नयरे होत्था। वण्णतो। गुणसिलए चेतिए।  
वण्णओ, जाव पुढविसिलावट्ओ।

तस्स णं गुणसिलस्स चेतियस्स अदूरसामंते बहवे अन्नउत्थिया परिवसंति, तं जहा-  
कालोदाई सेलोदाई एवं जहा सत्तमसते अन्नउत्थिउद्देशए जाव से कहमेयं मन्ने एवं?

तत्थ णं रायगिहे नगरे मद्दुए नामं समणोवासए परिवसति अइडे जाव अपरिभूए अभिगय०  
जाव विहरइ।

तए णं समणे भगवं महावीरे अन्नदा कदायि पुच्चाणुपुच्चिं चरमाणे जाव समोसडे। परिसा  
जाव पज्जुवासइ।

तए णं मद्दुए समणोवासए इमीसे कहाए लद्धट्ठे समाणे हट्ठतुट्ठ० जाव ह्दिए ण्हाए जाव  
सरीरे साओ गिहाओ पडिनिक्खमति, सा० प० २ पायविहारचारेणं रायगिहं नगरं जाव निग्गच्छति,  
निग्गच्छता तेषिं अन्नउत्थियाणं अदूरसामंतेणं वीथीवयति।

तए णं ते अन्नउत्थिया मद्दुयं समणोवासयं अदूरसामंतेणं वीथीवयमाणं पासंति, पा०२ अन्न  
मन्नं सद्दावेति, अन्नमन्नं सद्दावेता एवं वदासि-एवं खलु देवाणुप्पिया! अम्हं इमा कहा  
अवि उप्पकडा, इमं च णं मद्दुए समणोवासए अम्हं अदूरसामंतेणं वीथीवयइ, तं सेयं खलु देवाणुप्पिया!  
अम्हं मद्दुयं समणोवासयं एयमट्ठं पुच्छित्तएति कट्पु अन्नमन्नस्स अंतियं एयमट्ठं पडिसुणैति,  
अन्नमन्नस्स० प० २ जेणेव मद्दुए समणोवासए तेणेव उवागच्छंति, उवा० २ मद्दुयं समणोवासयं एवं वदासी-  
-एवं खलु मद्दुया! तव धम्मयारिए धम्मोवएसए समणे णायपुत्ते पंच अत्थिकाये पन्नवेइ जहा सत्तमे सते  
अन्नउत्थिउद्देशए जाव से कहमेयं मद्दुया! एवं?

तए णं से मद्दुए समणोवासए ते अन्नउत्थिए एवं वयासि--जति कज्जं कज्जति जाणामो  
पासामो; अह कज्जं न कज्जति न जाणामो न पासामो।

तए णं ते अन्नउत्थिया मद्दुयं समणोवासयं एवं वयासी--केस णं तुमं मद्दुया!

समणोवासगाणं भवसि जेण तुमं एयमट्ठं न जाणसि न पाससि?

तए णं से मद्दुए समणोवासए ते अन्नउत्थिए एवं वयासि--'अत्थि णं आउसो! वाउयाए वाति'? 'हंता, अत्थि'। 'तुब्भे णं आउसो! वाउयायस्स वायमाणस्स रूवं पासह?' 'णो तिण०'। 'अत्थि णं आउसो! घाणसहगया पोग्गला?' 'हंता, अत्थि'। 'तुब्भे णं आउसो! घाणसहगयाणं पोग्गलाणं रूवं पासह?' 'णोति०'। 'अत्थि णं आउसो! अरणिसहगते अगणिकाए?' 'हंता, अत्थि'। 'तुब्भे णं आउसो! अरणिसहगयस्स अगणिकायस्स रूवं पासह?' 'णो ति०'। 'अत्थि णं आउसो? समुद्धस्स पारगताइं रूवाइं?' 'हंता, अत्थि'। 'तुब्भे णं आउसो! देवलोगगयाइं रूवाइं?' 'हंता, अत्थि'। 'तुब्भे णं आउसो! देवलोगगयाइं रूवाइं पासह?' 'णो ति०'। 'एवामेव आउसो! अहं वा तुब्भे वा अन्नो वा छउमत्थो जइ जो जं न जाणति न पासति तं सत्वं न भवति एवं भे सुबहुलोए ण भविस्सतीति' कट्ठु ते अन्नउत्थिए एवं पडिहणइ, एवं प०२ जेणेव गुणसिलए चेतिए जेणेव समणे भगवं महावीरे तेणेव उवागच्छति, उ०२ समणं भगवं महावीरं पंचविहेणं अभिगमेणं जाव पज्जुवासति।

मद्दुया! ई समणे भगवं महावीरे मद्दुयं समणोवासयं एवं वयासि--सुट्ठु णं मद्दुया! तुमं ते अन्नउत्थिए एवं वयासि, साहु णं मद्दुया! तुमं ते अन्नउत्थिए एवं वयासि, जे णं मद्दुया! अट्ठं वा हेउं वा पसिणं वा वागरणं वा अण्णातं अदिट्ठं अस्सुतं अमुयं अविण्णायं बहुजणमज्झे आघवेति पण्णवेति जाव उवदंसेति से णं अरहंताणं आसायणाए वट्ठति, अरहंतपन्नतस्स धम्मस्स आसायणाए वट्ठति, केवलीणं आसायणाए वट्ठति, केवलिपन्नतस्स धम्मस्स आसायणाए वट्ठति। तं सुट्ठु णं तुमं मद्दुया! ते अन्नउत्थिए एवं वयासि, साहु णं तुमं मद्दुया! जाव एवं वयासि।

तए णं मद्दुए समणोवासए समणेणं भगवया महावीरेण एवं वुत्ते समाणे हट्ठतुट्ठ० समणं भगवं महावीरं वंदति नमंसति, वं० २ णच्चासन्ने जाव पज्जुवासति।

तए णं समणे भगवं महावीरे मद्दुयस्स समणोवासगस्स तीसे य जाव परिसा पडिगया।

तए णं मद्दुए समणोवासए समणस्स भगवतो जाव निसम्म हट्ठतुट्ठ० पसिणाइं पुच्छति, प० पु० २ अट्ठाइं परियाइयति, अ० प० २ उट्ठाए उट्ठेति, उ० २ समणं भगवं महावीरं वंदति नमंसइ जाव पडिगए।

भंते! ति भगवं गोयमे समणं भगवं महावीरं वंदति नमंसति, वं० २ एवं वयासि-पभू णं भंते!

मद्दुए समणोवासए देवाणुप्पियाणं अंतियं जाव पव्वइत्तए? णो तिणट्ठे समट्ठे। एवं जहेव संखे तहेव अरुणाभे जाव अंतं काहिति।

**[७४५]** देवे णं भंते! महिड्डीए जाव महेसक्खे रूवसहस्सं विउच्चिता पभू अन्नमन्नेणं सद्धिं संगामं संगामित्तए? हंता, पभू।

ताओ णं भंते! बौदीओ किं एगजीवफुडाओ, अणेगजीवफुडाओ? गोयमा! एगजीवफुडाओ, णो अणेगजीवफुडाओ।

ते णं भंते! तेसिं बौदीणं अंतरा किं एगजीवफुडा, अणेगजीवफुडा? गोयमा! एगजीवफुडा, नो अणेगजीवफुडा।

पुरिसे णं भंते! अंतरे हत्थेण वा एवं जहा अट्ठमसए ततिए उद्देशए जाव नो खलु तत्थ सत्थं कमति।

[७४६] अत्थि णं भंते! देवासुरा संगामा, देवासुरा संगामा? हंता, अत्थि।

देवासुरेसु णं भंते! संगामेसु वट्ठमाणेसु किं णं तेसिं देवाणं पहरणरयणत्ताए परिणमति? गोयमा! जं णं ते देवा तणं वा कट्ठं वा पत्तं वा सक्करं वा परामुसंति तं णं तेसिं देवाणं पहरणरयणत्ताए परिणमति।

जहेव देवाणं तहेव असुरकुमाराणं? णो इणट्ठे समट्ठे। असुरकुमाराणं देवाणं निच्चं विउच्चिया पहरणरयणा पन्नत्ता।

[७४७] देवे णं भंते! महिड्डीए जाव महेसक्खे पभू लवणसमुद्धं अणुपरियट्ठिताणं हव्वमागच्छित्तए? हंता, पभू।

देवे णं भंते! महिड्डीए एवं धातइसंडं दीवं जाव हंता, पभू।

एवं जाव रुयगवरं दीवं जाव हंता, पभू। तेण परं वीतीवएज्जा, नो चेव णं अणुपरियट्ठोज्जा।

[७४८] अत्थि णं भंते! ते देवा जे अणंते कम्मंसे जहन्नेणं एक्केण वा दोहि वा तीहि वा, उक्कोसेणं पंचहिं वाससएहिं खवयंति? हंता, अत्थि।

अत्थि णं भंते! ते देवा जे अणंते कम्मंसे जहन्नेणं एक्केण वा दोहि वा तीहि वा, उक्कोसेणं पंचहिं वाससहस्सेहिं खवयंति? हंता, अत्थि।

अत्थि णं भंते! ते देवा जे अणंते कम्मंसे जहन्नेणं एक्केण वा दोहि वा तीहि वा, उक्कोसेणं पंचहिं वाससयसहस्सेहिं खवयंति? हंता, अत्थि।

कयरे णं भंते! ते देवा जे अणंते कम्मंसे जहन्नेणं एक्केण वा जाव पंचहिं वाससतेहिं खवयंति? कयरे णं भंते! ते देवा जाव पंचहिं वाससहस्सेहिं खवयंति? कयरे णं भंते! ते देवा जाव पंचहिं वाससतसहस्सेहिं खवयंति? गोयमा! वाणमंतरा देवा अणंते कम्मंसे एगेणं वाससएणं खवयंति, असुरिदवज्जिया भवणवासी देवा अणंते कम्मंसे दोहिं वाससएहिं खवयंति, असुरकुमारा(?रिंदा) देवा अणंते कम्मंसे तीहिं वाससएहिं खवयंति, गह-नक्खत्त-तारारूवा जोतिसिया देवा अणंते कम्मंसे चतुवास जाव खवयंति, चंदिम-सूरिया जोतिसिंदा जोतिसरायाणो अणंते कम्मंसे पंचहिं वाससएहिं खवयंति।

सोहम्मीसाणगा देवा अणंते कम्मंसे एगेणं वाससहस्सेणं जाव खवयंति, सणकुमार-माहिंदगा देवा अणंते कम्मंसे दोहिं वाससहस्सेहिं खवयंति, एवं एएणं अभिलावेणं बंभलोग-लंतगा देवा अणंते कम्मंसे तीहिं वाससहस्सेहिं खवयंति, महासुक्क-सहस्सारगा देवा अणंते० चउहिं वाससह०, आणय-पाणय-आरण-अच्चुयगा देवा अणंते० पंचहिं वाससहस्सेहिं खवयंति। हेट्ठिमगेवेज्जगा देवा अणंते कम्मंसे एगेणं वाससयसहस्सेणं खवयंति, मज्झिमगेवेज्जगा देवा अणंते० दोहिं वाससयसहस्सेहिं खवयंति, उवरिमगेवेज्जगा देवा अणंते कम्मंसे तिहिं वाससयसह० जाव खवयंति, विजय-वेजयंत-जयंत-अपराजियगा देवा अणंते० चउहिं वास० जाव खवयंति, सव्वट्ठसिद्धगा देवा अणंते कम्मंसे पंचहिं वाससयसहस्सेहिं खवयंति। एए णं गोयमा! ते देवा जे अणंते कम्मंसे जहन्नेणं एक्केण वा दोहि वा तीहि वा उक्कोसेणं पंचहिं वाससएहिं खवयंति। एए णं गोयमा! ते देवा जाव पंचहिं वाससहस्सेहिं खवयंति। एए णं गोयमा! ते देवा जाव पंचहिं वाससयसहस्सेहिं खवयंति।

सेवं भंते! सेवं भंते! ति०।

**\*अट्ठारसमे सए सत्तमो उद्देशो समतो\***

## ० अट्ठमो उद्देशो ०

[७४९] रायगिहे जाव एवं वयासी--

अणगारस्स णं भंते! भावियप्पणो पुरओ दुहओ जुगमायाए पेहाए पेहाए रीयं रीयमाणस्स पायस्स अहे कुक्कुडपोते वा वट्ठापोते वा कुलिंगच्छाए वा परियावज्जेज्जा, तस्स णं भंते! किं इरियावहिया किरिया कज्जइ, संपराइया किरिया कज्जइ? गोयमा! अणगारस्स णं भावियप्पणो जाव तस्स णं इरियावहिया किरिया कज्जति, नो संपराइया किरिया कज्जति।

से केणट्ठेणं भंते! एवं वुच्चइ जहा सत्तमसए सत्तुद्देशए जाव अट्ठो निक्खित्तो। सेवं भंते!० जाव विहरति।

तए णं समणे भगवं महावीरे बहिया जाव विहरइ।

[७५०] तेणं कालेणं तेणं समएणं रायगिहे जाव पुढविसिलावट्ठाए।

तस्स णं गुणसिलस्स चेतियस्स अदूरसामंते बहवे अन्नउत्थिया परिवसंति।

तए णं समणे भगवं महावीरे जाव समोसठे जाव परिसा पडिगता।

तेणं कालेणं तेणं समएणं समणस्स भगवतो महावीरस्स जेट्ठे अंतेवासी इंदभूती नामं अणगारे जाव उड्ढंजाणू जाव विहरइ।

तए णं ते अन्नउत्थिया जेणेव भगवं गोयमे तेणेव उवागच्छंति, उवा०२ भगवं गोयमं एवं वयासि--तुब्भे णं अज्जो! तिविहं तिविहेणं अस्संजय जाव एगंतबाला यावि भवह।

तए णं भगवं गोयमे ते अन्नउत्थिए एवं वयासि--केणं कारणेणं अज्जो! अम्हे तिविहं तिविहेणं अस्संजय जाव एगंतबाला यावि भवामो?

तए णं ते अन्नउत्थिया भगवं गोयमं एवं वदासि--तुब्भे णं अज्जो! रीयं रीयमाणा पाणे पेच्चेह अभिहणह जाव उवद्दवेह। तए णं तुब्भे पाणे पेच्चेमाणा जाव उवद्दवेमाणा तिविहं तिविहेणं जाव एगंतबाला यावि भवह।

तए णं भगवं गोयमे ते अन्नउत्थिए एवं वदासि--नो खलु अज्जो! अम्हे रीयं रीयमाणा पाणे पेच्चेमो जाव उवद्दवेमो, अम्हे णं अज्जो रीयं रीयमाणा कायं च जोयं च रीयं च पडुच्च दिस्स दिस्स पदिस्स पदिस्स वयामो। तए णं अम्हे दिस्स दिस्स वयमाणा पदिस्स पदिस्स वयमाणा णो पाणे पेच्चेमो जाव णो उवद्दवेमो। तए णं अम्हे पाणे अपेच्चेमाणा जाव अणोद्दवेमाणा तिविहं तिविहेणं जाव एगंतपंडिया यावि भवामो। तुब्भे णं अज्जो! अप्पणा चेव तिविहं तिविहेणं जाव एगंतबाला यावि भवह।

तए णं ते अन्नउत्थिया भगवं गोयमं एवं वदासि--केणं कारणेणं अज्जो! अम्हे तिविहं तिविहेणं जाव भवामो?

तए णं भगवं गोयमे ते अन्नउत्थिए एवं वयासि--तुब्भे णं अज्जो! रीयं रीयमाणा पाणे पेच्चेह जाव उवद्दवेह। तए णं तुब्भे पाणे पेच्चेमाणा जाव उवद्दवेमाणा तिविहं जाव एगंतबाला यावि भवह।

तए णं भगवं गोयमे ते अन्नउत्थिए एवं पडिहणइ, प०२ जेणेव समणे भगवं महावीरे तेणेव उवागच्छति, उ०२ समणं भगवं महावीरं वंदति नमंसति, वं०२ णच्चासन्ने जाव पज्जुवासति।

गोयमा! ई समणे भगवं महावीरे भगवं गोयमं एवं वयासि--सुट्ठु णं तुमं गोयमा! ते

अन्नत्थिए एवं वयासि, साहु णं तुमं गोयमा! ते अन्नत्थिए एवं वदासि, अत्थि णं गोयमा! ममं बहवे अंतेवासी समणा निग्गंथा छउमत्था जे णं नो पभू एयं वागरणं वागरेत्तए जहा णं तुमं, तं सुट्ठु णं तुमं गोयमा! ते अन्नत्थिए एवं वयासि, साहु णं तुमं गोयमा! ते अन्नत्थिए एवं वदासि।

तए णं भगवं गोयमे समणेणं भगवता महावीरेणं एवं वुत्ते समाणे हट्ठत्तुठ्ठो समणं भगवं महावीरं वंदति नमंसित, वं०२ एवं वदासि—

**[७५१]** छउमत्थे णं भंते! मणुस्से परमाणुपोग्गलं किं जाणइ पासइ, उदाहु न जाणइ न पासइ? गोयमा! अत्थेगतिए जाणति, न पासति; अत्थेगतिए न जाणति, न पासति।

छउमत्थे णं भंते! मणूसे दुपएसियं खंधं किं जाणति पासइ? एवं चेव।

एवं जाव असंखेज्जपएसियं।

छउमत्थे णं भंते! मणूसे अणंतपएसियं खंधं किं० पुच्छा। गोयमा! अत्थेगतिए जाणति पासति; अत्थेगतिए जाणति, न पासति; अत्थेगतिए न जाणति, पासति; अत्थेगतिए न जाणति न पासति।

आहोहिए णं भंते! मणुस्से परमाणुपोग्गलं०? जहा छउमत्थे एवं आहोहिए वि जाव अणंतपएसियं।

परमाहोहिए णं भंते! मणूसे परमाणुपोग्गलं०? जं समयं जाणइ तं समयं पासति, जं समयं पासति तं समयं जाणति? णो तिणट्ठे समट्ठे।

से केणट्ठेणं भंते! एवं वुच्चइ--परमाहोहिए णं मणूसे परमाणुपोग्गलं जं समयं जाणति नो तं समयं पासति, जं समयं पासति नो तं समयं जाणइ? गोयमा! सागारे से नाणे भवति, अणागारे से दंसणे भवति, सेतेणट्ठेणं जाव नो तं समयं जाणइ।

एवं जाव अणंतपएसियं।

केवली णं भंते! मणूसे परमाणुपोग्गलं०? जहा परमाहोहिए तहा केवली वि जाव अनंतपएसियं।

सेवं भंते! सेवं भंते! ति०।

**\*अट्ठारसमे सए अट्ठमो उद्देशो समतो\***

**० नवमो उद्देशो ०**

रायगिहे जाव एवं वयासि--

**[७५२]** अत्थि णं भंते! भवियदव्वनेरइया, भवियदव्वनेरइया? हंता, अत्थि।

से केणट्ठेणं भंते! एवं वुच्चइ--भवियदव्वनेरइया, भवियदव्वनेरइया? गोयमा! जे भविए पंचेंदियतिरिक्खजोणिए वा मणुस्से वा नेरइएसु उववज्जित्तए, सेतेणट्ठेणं०।

एवं जाव थणियकुमाराणं।

अत्थि णं भंते! भवियदव्वपुढविकाइया, भवियदव्वपुढविकाइया? हंता, अत्थि।

से केणट्ठेणं०? गोयमा! जे भविए तिरिक्खजोणिए वा मणुस्से वा देवे वा पुढविकाइएसु उववज्जित्तए सेतेणट्ठेणं०।

आउकाइय-वणस्सतिकाइयाणं एवं चेव।

तेउ-वाठ-बेंदिय-तेंदिय-चउरिंदियाण य जे भविए तिरिक्खजोणिए वा मणुस्से वा।  
पंचेंदियतिरिक्खजोणियाणं जे भविए नेरइए वा तिरिक्खजोणिए वा मणुस्से वा देवे वा  
पंचेंदियतिरिक्खजोणिए वा।

एवं मणुस्साण वि।

वाणमंतर-जोतिसिय-वेमाणियाणं जहा नेरइया।

भवियदव्वनेरइयस्स णं भंते! केवतियं कालं ठिती पन्नता? गोयमा! जहन्नेणं अंतोमुहुत्तं,  
उक्कोसेणं पुव्वकोडी।

भवियदव्वअसुरकुमारस्स णं भंते! केवतियं कालं ठिती पन्नता? गोयमा! जहन्नेणं  
अंतोमुहुत्तं, उक्कोसेणं तिन्नि पलिओवमाइं।

एवं जाव थणियकुमारस्स।

भवियदव्वपुढविकाइयस्स णं० पुच्छा। गोयमा! जहन्नेणं अंतोमुहुत्तं, उक्कोसेणं सातिरेगाइं दो  
सागरोवमाइं।

एवं आउकाइयस्स वि।

तेउ-वाठ जहा नेरइयस्स।

वणस्सइकाइयस्स जहा पुढविकाइयस्स।

बेइंदिय-तेइंदिय-चतुरिंदियस्स जहा नेरइयस्स।

पंचेंदियतिरिक्खजोणियस्स जहन्नेणं अंतोमुहुत्तं, उक्कोसेणं तेतीसं सागरोवमाइं।

एवं मणुस्सस्स वि।

वाणमंतर-जोतिसिय-वेमाणियस्स जहा असुरकुमारस्स।

सेवं भंते! सेवं भंते! ति०।

**\*अट्ठारसमे सए नवमो उद्देशो समतो\***

**० दसमो उद्देशो ०**

**[७५३]** रायगिहे जाव एवं वदासि-

अणगारे णं भंते! भावियप्पा असिधारं वा खुरधारं वा ओगाहेज्जा? हंता, ओगाहेज्जा।

से णं तत्थ छिज्जेज्ज वा भिज्जेज्ज वा? णो इणट्ठे समट्ठे। णो खलु तत्थ सत्थं  
कमति।

एवं जहा पंचमसते परमाणुपोग्गलवत्तव्वता जाव अणगारे णं भंते! भावियप्पा उदावत्तं वा  
जाव नो खलु तत्थ सत्थं कमति।

**[७५४]** परमाणुपोग्गले णं भंते ! वाउयाएणं फुडे, वाउयाए वा परमाणुपोग्गलेणं फुडे ?  
गोयमा! परमाणुपोग्गले वाउयाएणं फुडे, नो वाउयाए परमाणुपोग्गलेणं फुडे।

दुपएसिए णं बंते! खंधे वाउयाएणं०? एवं चेव।

एवं जाव असंखेज्जपएसिए।

अणंतपएसिए णं भंते! खंधे वाउ० पुच्छा। गोयमा! अणंत पएसिए खंधे वाउयाएणं फुडे,

वाउयाए अणंतपरसिएणं खंधेणं सिय फुडे, सिय नो फुडे।

वत्थी भंते! वाउयाएणं फुडे, वाउयाए वत्थिणा फुडे? गोयमा! वत्थी वाउयाएणं फुडे, नो वाउयाए बत्थिणा फुडे।

[७५५] अत्थि णं भंते! इमीसे रयणप्पभाए पुढवीए अहे दव्वाइं वण्णओ काल-नील-लोहिय-हालिद्ध-सुक्किलाइं, गंधओ सुब्भिगंध-दुब्भिगंधाइं, रसओ तित्तकडु-कसाय-अंबिल-महुराइं, फासतो कक्खड-मउय-गरुय-लहुय-सीय-उसुण-निद्ध-लुक्खाइं अन्नमन्नबद्धाइं अन्नमन्नपुट्ठाइं जाव अन्नमन्न-घडत्ताए चिट्ठंति? हंता, अत्थि।

एवं जाव अहेसत्तमाए।

अत्थि णं भंते! सोहम्मस्स कप्पस्स अहे0? एवं चेव।

एवं जाव ईसिपब्भाराए पुढवीए।

सेवं भंते! सेवं भंते! जाव विहरइ।

तए णं समणे भगवं महावीरे जाव बहिया जणवयविहारं विहरइ।

[७५६] तेणं कालेणं तेणं समएणं वाणियग्गामे नामं नगरे होत्था। वण्णओ। दूतिपलासए चेतिए। वण्णओ।

तत्थ णं वाणियग्गामे नगरे सोमिले नामं माहणे परिवसति अइंढे जाव अपरिभूए रिक्वेद जाव सुपरिनिट्ठिए पंचण्हं खंडियसयाणं सायस्स य कुडुंबस्स आहेवच्चं जाव विहरइ।

तए णं समणे भगवं महावीरे जाव समोसडे। जाव परिसा पज्जुवासइ।

तए णं तस्स सोमिलस्स माहणस्स इमीसे कहाए लद्धट्ठस्स समाणस्स अयमेयारूवे जाव समुप्पज्जित्था-एवं खलु समणे गायपुत्ते पुट्ठाणुपुट्ठिवं चरमाणे गामाणुगामं दूइज्जमाणे सुहंसुहेणं जाव इहमागए जाव दूतिपलासए चेतिए अहापडिरूवं जाव विहरति। तं गच्छामि णं समणस्स नायपुत्तस्स अंतियं पाठब्भवामि, इमाइं च णं एयारूवाइं अट्ठाइं जाव वागरणाइं पुच्छिस्सामि, तं जइ मे से इमाइं एयारूवाइं अट्ठाइं जाव वागरणाइं वागरेहिति तो णं वंदीहामि नमंसीहामि जाव पज्जुवासीहामि। अह मे से इमाइं अट्ठाइं जाव वागरणाइं नो वागरेहिति तो णं एतेहिं चेव अट्ठेहि य जाव वागरेहि य निप्पट्ठपसिणवागरणं करिस्सामि'ति कट्पु एवं संपेहेइ, ए0 सं0२ ण्हाए जाव सरिरे साओ गिहाओ पडिनिक्खमति, पडि0२ पादविहारचारेणं एगेणं खंडियसएणं सद्धिं संपरिवुडे वाणियग्गामं नगरं मज्झं-मज्झेणं निग्गच्छइ, नि0२ जेणेव दूतिपलासए चेतिए जेणेव समणे भगवं महावीरे तेणेव उवागच्छति, उवा0२ समणस्स भगवतो महावीरस्स अदूरसामंते ठिच्चा समणं भगवं महावीरं एवं वदासि-

जत्ता ते भंते! जवणिज्जं अट्ठावाहं फासुयविहारं? सोमिला! जत्ता वि मे, जवणिज्जं पि मे, अट्ठावाहं पि मे, फासुयविहारं पि मे।

किं ते भंते! जत्ता? सोमिला! जं मे तव-नियम-संजम-सज्झाय-झाणावस्सगमादी एसु जोएसु जयणा से तं जत्ता।

किं ते भंते! जवणिज्जं? सोमिला! जवणिज्जे दुविहे पन्नते, तं जहा--इंदियजवणिज्जे य नोइंदियजवणिज्जे य।

से किं तं इंदियजवणिज्जे? इंदियजवणिज्जे-जं मे सोतिंदिय-चक्खिंदिय-घाणिंदिय-

जिब्भंदिय-फासिंदियाइं निरुवहयाइं वसे वट्ठंति, से तं इंदियजवणिज्जे।

से किं तं नोइंदियजवणिज्जे? नोइंदियजवणिज्जे-जं मे कोह-माण-माया-लोभा वोच्छिन्ना, नो उदीरेंति, से तं नोइंदियजवणिज्जे। से तं जवणिज्जे।

किं ते भंते! अच्चाबाहं? सोमिला! जं मे वातिय-पित्तिय-संभिय-सन्निवातिया विविहा रोगायंका सरीरगया दोसा उवसंता, नो उदीरेंति, से तं अच्चाबाहं।

किं ते भंते! फासुयविहारं? सोमिला! जं णं आरामेसु उज्जाणेसु देवकुलेसु सभासु पवासु इत्थी-पसु-पंडगविवज्जियासु वसहीसु फासुएसणिज्जं पीढ-फलग-सेज्जा-संथारगं उवसंपज्जिताणं विहरामि, से तं फासुयविहारं।

सरिसवा ते भंते किं भक्खेया, अभक्खेया? सोमिला! सरिसवा मे भक्खेया वि, अभक्खेया वि से केणट्ठेणं भंते! एवं वुच्चइ सरिसवा मे भक्खेया वि, अभक्खेया वि? से नूणं सोमिला! बंभण्णएसु नएसु दुविहा सरिसवा पण्णत्ता, तं जहा--मितसरिसवा य धन्नसरिसवा य। तत्थ णं जे ते मितसरिसवा ते तिविहा पण्णत्ता, तं जहा--सहजायए सहवड्ढियए सहपंसुकीलियए; ते णं समणाणं निग्गंथाणं अभक्खेया। तत्थ णं जे ते धन्नसरिसवा ते दुविहा पण्णत्ता, तं जहा--सत्थपरिणया य असत्थपरिणया य। तत्थ णं जे ते असत्थपरिणया ते णं समणाणं निग्गंथाणं अभक्खेया। तत्थ णं जे ते सत्थपरिणया ते दुविहा पण्णत्ता, तं जहा--एसणिज्जा य अणेसणिज्जा य। तत्थ णं जे ते अणेसणिज्जा ते णं समणाणं निग्गंथाणं अभक्खेया। तत्थ णं जे ते एसणिज्जा ते दुविहा पण्णत्ता, तं जहा--जाइता य अजाइया य। तत्थ णं जे ते अजाइता ते णं समणाणं निग्गंथाणं अभक्खेया। तत्थ णं जे ते जायिया ते दुविहा पण्णत्ता, तं जहा--लद्धा य अलद्धा य। तत्थ णं जे ते अलद्धा ते णं समणाणं निग्गंथाणं अभक्खेया। तत्थ णं जे ते लद्धा ते णं समणाणं निग्गंथाणं भक्खेया। सेतेणट्ठेणं सोमिला! एवं वुच्चइ जाव अभक्खेया वि।

मासा ते भंते! किं भक्खेया, अभक्खेया? सोमिला! मासा मे भक्खेया वि, अभक्खेया वि।

से केणट्ठेणं जाव अभक्खेया वि? से नूणं सोमिला! बंभण्णएसु नएसु दुविहा मासा पण्णत्ता, तं जहा--दव्वमासा य कालमासा य। तत्थ णं जे ते कालमासा ते णं सावणादीया आसाढपज्जवसाणा दुवालस, तं जहा--सावणे भद्दवए आसोए कत्तिए मग्गसिरे पोसे माहे फग्गुणे चेत्ते वइसाहे जेट्ठामूले आसाढे, ते णं समणाणं निग्गंथाणं अभक्खेया। तत्थ णं जे ते दव्वमासा ते दुविहा पण्णत्ता, तं जहा-अत्थमासा य धण्णमासा य। तत्थ णं जे ते अत्थमासा ते दुविहा पण्णत्ता, तं जहा--सुवण्णमासा य रूप्पमासा य; ते णं समणाणं निग्गंथाणं अभक्खेया। तत्थ णं जे ते धन्नमासा ते दुविहा पण्णत्ता, तं जहा-सत्थपरिणया य असत्थपरिणया य। एवं जहा धन्नसरिसवा जाव सेतेणट्ठेणं जाव अभक्खेया वि।

कुलत्था ते भंते! किं भक्खेया, अभक्खेया? सोमिला! कुलत्था मे भक्खेया वि, अभक्खेया वि।

से केणट्ठेणं जाव अभक्खेया वि? से नूणं सोमिला! बंभण्णएसु नएसु दुविहा कुलत्था पण्णत्ता, तं जहा--इत्थिकुलत्था य धन्नकुलत्था य। तत्थ णं जे ते इत्थिकुलत्था ते तिविहा पण्णत्ता, तं जहा--कुलवधू ति वा कुलमाउया ति वा कुलधूया ति वा; ते णं समणाणं निग्गंथाणं अभक्खेया। तत्थ णं जे ते धन्नकुलत्था एवं जहा धन्नसरिसवा जाव सेतेणट्ठेणं जाव अभक्खेया वि।

[७५७] एगे भवं, दुवे भवं, अक्खए भवं, अक्खए भवं, अवट्ठिण भवं, अणेगभूयभावभविण

भवं? सोमिला! एगे वि अहं जाव अणेगभूयभावभविए वि अहं।

से केणट्ठेणं भंते! एवं वुच्चइ जाव भविए वि अहं? सोमिला! दव्वट्ठयाए एगे अहं, नाण-  
दंसणट्ठयाए दुविहे अहं, पएसट्ठयाए अक्खए वि अहं, अक्खए वि अहं, अवट्ठिए वि अहं; उवयोगट्ठयाए  
अणेगभूयभावभविए वि अहं। सेतेणट्ठेणं जाव भविए वि अहं।

एत्थ णं से सोमिले माहणे संबुद्धे समणं भगवं महावीरं जहा खंदओ जाव से जहेयं तुब्भे  
वदह जहा णं देवाणुप्पियाणं अंतियं बहवे राईसर एवं जहा रायप्पसेणइज्जे चित्तो जाव दुवालसविहं  
सावगधम्मं पडिवज्जइ, प०२ समणं भगवं महावीरं वंदति नमंसति, वं०२ जाव पडिगए। तए णं से सोमिले  
माहणे समणोवासए जाए अभिगय० जाव विहरइ।

भंते! ति भगवं गोयमे समणं भगवं महावीरं वंदति नमंसति, वं०२ एवं वदासि-

पभू णं भंते! सोमिले माहणे देवाणुप्पियाणं अंतियं मुंडे भविता जहेव संखे तहेव निरवसेसं  
जाव अंतं काहिति।

सेवं भंते! सेवं भंते! ति जाव विहरति।

**\*अट्ठारसमे सए दसमो उद्देशो समतो\***

**०-अट्ठारसमं सयं समतं-०**

**० मुनि दीपरत्तसागरेण संशोधितः सम्पादितश्च अट्ठारसमं सतं समतं ०**

**[ ] एगूणवीसइमं सयं [ ]**

[७५८] लेस्सा य गब्भ पुढवी महासवा चरम दीव भवणा य।  
निव्वत्ति करण वणचरसुरा य एगूणवीसइमे ॥

**० पढमो उद्देशो ०**

[७५९] रायगिहे जाव एवं वदासि-

कति णं भंते! लेस्साओ पन्नताओ? गोयमा! छल्लेस्साओ पन्नताओ, तं जहा, एवं पन्नवणाए  
चउत्थो लेसुद्देसओ भाणियव्वो निरवसेसो।

सेवं भंते! सेवं भंते! ०।

**\*एगूणवीसइमे सए पढमो उद्देशो समतो\***

**० बीओ उद्देशो ०**

[७६०] कति णं भंते! लेस्साओ पन्नताओ? एवं जहा पन्नवणाए गब्भुद्देशो सो चेव  
निरवसेसो भाणियव्वो।

सेवं भंते! सेवं भंते! ति०।

**\*एगूणवीसइमे सए बीओ उद्देशो समतो\***

**० तइओ उद्देशो ०**

[७६१] रायगिहे जाव एवं वयासि-

सिय भंते! जाव चत्तारि पंच पुढविकाइया एगयओ साधारणसरीरं बंधंति, एग० बं० २ ततो

पच्छा आहारैति वा परिणामैति वा सरीरं वा बंधति? नो तिणट्ठे समट्ठे, पुढविकाइया णं पतेयाहारा, पतेयपरिणामा, पतेयं सरीरं बंधति प० बं२ ततो पच्छा आहारैति वा, परिणामैति वा, सरीरं वा बंधति।

तेसि णं भंते! जीवाणं कति लेस्साओ पन्नताओ? गोयमा! चत्तारि लेस्साओ पन्नताओ? तं जहा-कण्ह० नील० काउ० तेउ०।

ते णं भंते! जीवा किं सम्मद्धिट्ठी, मिच्छादिट्ठी, सम्मामिच्छद्धिट्ठी? गोयमा! नो सम्मद्धिट्ठी, नो सम्मामिच्छादिट्ठी।

ते णं भंते! जीवा किं नाणी, अन्नाणी? गोयमा! नो नाणी; अन्नाणी, नियमा दुअन्नाणी, तं जहा--मतिअन्नाणी य सुयअन्नाणी य।

ते णं भंते! जीवा किं मणजोगी, वइजोगी, कायजोगी? गोयमा! नो मणजोगी, नो वइजोगी, कायजोगी।

ते णं भंते! जीवा किं सागारोवउत्ता, अणागारोवउत्ता? गोयमा! सागारोवउत्ता वि, अणागारोवउत्ता वि।

ते णं भंते! जीवा किमाहारमाहारैति? गोयमा! दव्वओ अणंतपएसियाइं दव्वाइं एवं जहा पन्नवणाए पढमे आहारुद्दएसए जाव सव्वप्पणयाए आहारमाहारैति।

ते णं भंते! जीवा जमाहारैति तं चिज्जति, जं नो आहारैति तं नो चिज्जइ, चिण्णे वा से उद्दाति पलिसप्पति वा? हंता, गोयमा! ते णं जीवा जमाहारैति तं चिज्जति, जं नो जाव पलिसप्पति वा।

तेसि णं भंते! जीवाणं एवं सन्ना ति वा पन्ना ति वा मणो ति वा वई ति वा 'अम्हे णं आहारमाहारेमो'? णो तिणट्ठे, समट्ठे, आहारैति पुण ते।

तेसि णं भंते! जीवाणं एवं सन्ना ति वा जाव वयी ति वा अम्हे णं इट्ठाणिट्ठे फासे पडिसंवेदेमो? नो तिणट्ठे समट्ठे, पडिसंवेदेति पुण ते।

ते णं भंते! जीवा किं पाणातिवाए उवक्खाइज्जंति, मुसावाए अदिण्णा० जाव मिच्छादंसण-सल्ले उवक्खाइज्जंति?

गोयमा पाणातिवाए वि उवक्खाइज्जंति जाव मिच्छादंसणसल्ले वि उवक्खाइज्जंति, जेसिं पि णं जीवाणं ते जीवा 'एवमाहिज्जंति' तेसिं पि णं जीवाणं नो विण्णाए नाणते।

ते णं भंते! जीवा कओहिंतो उववज्जंति? किं नेरइएहिंतो उववज्जंति? एवं जहा वक्कंतीए पुढविकाइयाणं उववातो तहा भाणितव्वो।

तेसि णं भंते! जीवाणं केवतियं कालं ठिती पन्नता? गोयमा! जहन्नेणं अंतोमुहुत्तं, उक्कोसेणं बावीसं वाससहस्साइं।

तेसि णं भंते! जीवाणं कति समुग्घाया पन्नता? गोयमा! तओ समुग्घाया पन्नता, तं जहा--वेदणासमुग्घाए कसायसमुग्घाए मारणंतियसमुग्घाए।

ते णं भंते! जीवा मारणंतियसमुग्घाएणं किं समोहया मरंति, असमोहया मरंति? गोयमा! समोहया वि मरंति, असमोहया वि मरंति।

ते णं भंते! जीवा अणंतरं उव्वट्ठिता कहिं गच्छंति? कहिं उववज्जंति? एवं उव्वट्ठिणा जहा वक्कंतीए।

सिय भंते! जाव चत्तारि पंच आउक्काइया एगयओ साहारणसरीरं बंधंति, एग० बं० २ ततो पच्छा आहारंति? एवं जो पुढविकाइयाणं गमो सो चेव भाणियव्वो जाव उव्वट्पति, नवरं ठिती सतवाससहस्साइं उक्कोसेणं, सेसं तं चेव।

सिय भंते! जाव चत्तारि पंच तेउक्काइया०? एवं चेव, नवरं उववाओ ठिती उव्वट्पणा य जहा पन्नवणाए, सेसं तं चेव।

वाउकाइयाणं एवं चेव, नाणतं--नवरं चत्तारि समुग्घाया।

सिय भंते! जाव चत्तारि पंच वणस्सतिकाइया० पुच्छा। गोयमा! णो इणट्ठे समट्ठे। अणंता वणस्सतिकाइया एगयओ साधारणसरीरं बंधंति, एग० बं० २ ततो पच्छा आहारंति वा परिणामंति वा, आ० प० २ सेसं जहा तेउक्काइयाणं जाव उव्वट्पति। नवरं आहारो नियमं छदिसिं; ठिती जहन्नेणं अंतोमुहुत्तं, उक्कोसेण वि अंतोमुहुत्तं, सेसं तं चेव।

[७६२]एएसि णं भंते! पुढविकाइयाणं आउकाइयाणं तेउका० वाउका० वणस्सतिकाइयाणं सुहुमाणं बादराणं पज्जतगाणं अपज्जतगाणं जाव जहन्नुक्कोसियाए ओगाहणाए कयरे कयरेहिंतो जाव विसेसाहिया वा? गोयमा! सव्वत्थोवा सुहुमनिओयस्स अपज्जतगस्स जहन्निया ओगाहणा। सुहुमवाउकाइयस्स अपज्जतगस्स जहन्निया ओगाहणा असंखेज्जगुणा। सुहुमतेउकाइयस्स अपज्जतगस्स जहन्निया ओगाहणा असंखेज्जगुणा। सुहुमआउकाइयस्स अपज्जतगस्स जहन्निया ओगाहणा असंखेज्जगुणा। सुहुमपुढविका० अपज्जतगस्स जहन्निया ओगाहणा असंखेज्जगुणा। बादरवाउकाइयस्स अपज्जतगस्स जहन्निया ओगाहणा असंखेज्जगुणा। बादरतेउकाइयस्स अपज्जतगस्स जहन्निया ओगाहणा असंखेज्जगुणा। बादरआउ० अपज्जतगस्स जहन्निया ओगाहणा असंखेज्जगुणा। बादरपुढविकाइयस्स अपज्जतगस्स जहन्निया ओगाहणा असंखेज्जगुणा। पतेयसरीरबादरवणस्सइकाइयस्स बादरनिओयस्स य, एएसि णं अपज्जतगाणं जहन्निया ओगाहणा दोण्ह वि तुल्ला असंखेज्जगुणा। सुहुमनिगोयस्स पज्जतगस्स जहन्निया ओगाहणा असंखेज्जगुणा। तस्सेव अपज्जतगस्स उक्कोसिया ओगाहणा विसेसाहिया। तस्स चेव पज्जतगस्स उक्कोसिया ओगाहणा विसेसाहिया। सुहुमवाउकाइयस्स पज्जतगस्स जहन्निया ओगाहणा असंखेज्जगुणा। तस्स चेव अपज्जतगस्स उक्कोसिया ओगाहणा विसेसाहिया। तस्स चेव पज्जतगस्स उक्कोसिया० विसेसाहिया। एवं सुहुमतेउकाइयस्स वि। एवं सुहुमआउकाइयस्स वि। एवं सुहुमपुढविकाइयस्स वि। एवं बादरवाउकाइयस्स वि। एवं बायरतेउकाइयस्स वि। एवं बादरआउकाइयस्स वि। एवं बादरपुढविकाइयस्स वि। सव्वेसिं तिविहेणं गमेणं भाणितव्वं। बादरनिगोदस्स पज्जतगस्स जहन्निया ओगाहणा असंखेज्जगुणा। तस्स चेव अपज्जतगस्स उक्कोसिया ओगाहणा विसेसाहिया। तस्स चेव पज्जतगस्स उक्कोसिया ओगाहणा विसेसाहिया। पतेयसरीरबादरवणस्सतिकाइयस्स पज्जतगस्स जहन्निया ओगाहणा असंखेज्जगुणा। तस्स चेव अपज्जतगस्स उक्कोसिया ओगाहणा असंखेज्जगुणा। तस्स चेव पज्जतगस्स उक्कोसिया ओगाहणा असंखेज्जगुणा।

[७६३]एयस्स णं भंते! पुढविकाइयस्स आउकाइयस्स तेउकाइयस्स वाउकाइयस्स वणस्सतिकाइयस्स य कयरे काये सव्वसुहुमे?, कयरे काये सव्वसुहुमतराए? गोयमा! वणस्सतिकाए सव्वसुहुमे, वणस्सतिकाए सव्वसुहुमतराए।

एयस्स णं भंते! पुढविकाइयस्स आउकाइयस्स तेउकाइयस्स वाउकाइयस्स य कयरे काये

सव्वसुहुमे?, कयरे काये सव्वसुहुमतराए? गोयमा! वाउकाये सव्वसुहुमे, वाउकाये सव्वसुहुमतराए।

एतस्स णं भंते! पुढविकाइयस्स आउकाइयस्स तेउकाइयस्स य कयरे काये सव्वसुहुमे?, कयरे काये सव्वसुहुमतराए? गोयमा! तेउकाये सव्वसुहुमे, तेउकाये सव्वसुहुमतराए।

एतस्स णं भंते! पुढविकाइयस्स आउक्काइयस्स य कयरे काये सव्वसुहुमे?, कयरे काये सव्वसुहुमतराए? गोयमा! आउकाये सव्वसुहुमे, आउकाए सव्वसुहुमतराए।

एयस्स णं भंते! पुढविकायस्स आउ0 तेउ0 वाउ0 वणस्सतिकाइयस्स य कयरे काये सव्वबादरे?, कयरे काये सव्वबादरतराए? गोयमा! वणस्सतिकाये सव्वबादरे, वणस्सतिकाये सव्वबादरतराए।

एयस्स णं भंते! पुढविकायस्स आउक्का0 तेउक्का0 वाउकायस्स य कयरे काये सव्वबायरे?, कयरे काये सव्वबादरतराए? गोयमा! पुढविकाए सव्वबादरे, पुढविकाए सव्वबादरतराए।

एयस्स णं भंते! आउकायस्स तेउकायस्स वाउकायस्स य कयरे काये सव्वबायरे?, कयरे काए सव्वबादरतराए? गोयमा! आउकाये सव्वबायरे, आउकाए सव्वबादरतराए।

एयस्स णं भंते! तेउकायस्स वाउकायस्स य कयरे काये सव्वबादरे?, कयरे काये सव्वबादरतराए? गोयमा! तेउकाए सव्वबादरे, तेउकाए सव्वबादरतराए।

केमहालए णं भंते! पुढविसरीरे पन्नते? गोयमा! अणंताणं सुहुमवणस्सतिकाइयाणं जावइया सरीरा से एगे सुहुमवाउसरीरे। असंखेज्जाणं सुहुमवाउसरीराणं जावतिया सरीरा से एगे सुहुमतेउसरीरे। असंखेज्जाणं सुहुमतेउकाइयसरीराणं जावतिया सरीरा से एगे सुहुमे आउसरीरे। असंखेज्जाणं सुहुमआउकाइयसरीराणं जावतिया सरीरा से एगे सुहुमे पुढविसरीरे। असंखेज्जाणं सुहुमपुढविकाइयाणं जावतिया सरीरा से एगे बायरवाउसरीरे। असंखेज्जाणं बादरवाउकाइयाणं जावतिया सरीरा से एगे बादरतेउसरीरे। असंखेज्जाणं बादरतेउकाइयाणं जावइया सरीरा से एगे बादरपुढविसरीरे, एमहालए णं गोयमा! पुढविसरीरे पन्नते।

**[७६४]** पुढविकायस्स णं भंते! केमहालिया सरीरोगाहणा पन्नता? गोयमा! से जहानामए रन्नो चाउरंतचक्कवट्ठिस्स वण्णगपेसिया सिया तरुणी बलवं जुगवं जुवाणी अप्पातंका, वण्णओ, जाव निउणसिप्पोवगया, नवरं 'चम्मेट्ठदुहणमुट्ठियसमाहयणित्तगतकाया' न भण्णति, सेसं तं चेव जाव निउणसिप्पोवगया, तिक्खाए वइरामईए सण्हकरणीए तिक्खेणं वइरामएणं वट्ठावरणं एणं महं पुढविकायं जउगोलासमाणं गहाय पडिसाहरिय पडिसाहरिय पडिसंखिविय पडिसंखिविय जाव 'इणामेव'ति कट्ठु तिसत्तखुतो ओपीसेज्जा। तत्थ णं गोयमा! अत्थेगइया पुढविकाइया आलिद्धा, अत्थेगइया नो आलिद्धा, अत्थेगइया संघट्ठिया, अत्थेगइया नो संघट्ठिया, अत्थेगइया परियाविया, अत्थेगइया नो परियाविया, अत्थेगइया उद्विया, अत्थेगइया नो उद्विया, अत्थेगइया पिट्ठा, अत्थेगइया नो पिट्ठा; पुढविकाइयस्स णं गोयमा! एमहालिया सरीरोगाहणा पन्नता।

पुढविकाइए णं भंते! अक्कंते समाणे केरिसियं वेयणं पच्चणुभवमाणे विहरति? 'गोयमा! से जहानामए केयि पुरिसे तरुणे बलवं जाव निउणसिप्पोवगए एणं पुरिसं जुण्णं जराजज्जरियदेहं जाव दुब्बलं किलंतं जमलपाणिणा मुद्धाणंसि अभिहणित्तज्जा, से णं गोयमा! पुरिसे तेणं पुरिसेणं जमलपाणिणा मुद्धाणंसि अभिहए समाणे केरिसियं वेयणं पच्चणुभवमाणे विहरइ?' 'अणिट्ठं समणाउसो!' तस्स णं गोयमा! पुरिसस्स वेदणाहित्तो पुढविकाए अक्कंते समाणे एतो अणिट्ठतरियं चेव अकंततरियं जाव अमणामतरियं चेव वेयणं

पच्चणुभवमाणे विहरइ।

आउयाए णं भंते! संघट्टिए समाणे केरिसियं वेयणं पच्चणुभवमाणे विहरइ? गोयमा! जहा पुढविकाए एवं चेव।

एवं तेउयाए वि।

एवं वाउकाए वि।

एवं वणस्सतिकाए वि जाव विहरइ।

सेवं भंते! सेवं भंते! त्ति०।

**\*एगूणवीसइमे सए तइओ उद्देशो समतो\***

**० चउत्थो उद्देशो ०**

**[७६५]**सिय भंते! नेरइया महस्सवा, महाकिरिया महावेयणा महानिज्जरा? णो इणट्ठे समट्ठे।

सिय भंते! नेरइया महस्सवा महाकिरिया महावेदणा अप्पनिज्जरा? हंता, सिया।

सिय भंते! नेरइया महस्सवा महाकिरिया अप्पवेयणा महानिज्जरा? णो इणट्ठे समट्ठे।

सिय भंते! नेरइया महस्सवा महाकिरिया अप्पवेदणा अप्पनिज्जरा? णो इणट्ठे समट्ठे।

सिय भंते! नेरइया महस्सवा अप्पकिरिया महावेदणा महानिज्जरा? गो०! णो इणट्ठे समट्ठे।

सिय भंते! नेरइया महस्सवा अप्पकिरिया महावेदणा अप्पनिज्जरा? नो इणट्ठे समट्ठे।

सिय भंते! नेरतिया महास्सवा अप्पकिरिया अप्पवेदणा महानिज्जरा? नो इणट्ठे समट्ठे।

सिय भंते! नेरतिया महस्सवा अप्पकिरिया अप्पवेदणा अप्पनिज्जरा? नो इणट्ठे समट्ठे ।

सिय भंते! नेरइया अप्पस्सवा महाकिरिया महावेदणा महानिज्जरा? नो इणट्ठे समट्ठे ।

सिय भंते! नेरइया अप्पस्सवा महाकिरिया महावेदणा अप्पनिज्जरा? नो इणट्ठे समट्ठे ।

सिय भंते! नेरइया अप्पस्सवा महाकिरिया अप्पवेयणा महानिज्जरा? नो इणट्ठे समट्ठे।

सिय भंते! नेरइया अप्पस्सवा महाकिरिया अप्पवेदणा अप्पनिज्जरा? णो इणट्ठे समट्ठे ।

सिय भंते! नेरइया अप्पस्सवा अप्पकिरिया महावेयणा महानिज्जरा? नो इणट्ठे समट्ठे।

सिय भंते! नेरतिया अप्पस्सवा अप्पकिरिया महावेदणा अप्पनिज्जरा? नो इणट्ठे समट्ठे ।

सिय भंते! नेरइया अप्पस्सवा अप्पकिरिया अप्पवेदणा महानिज्जरा? नो इणट्ठे समट्ठे ।

सिय भंते! नेरतिया अप्पस्सवा अप्पकिरिया अप्पवेयणा अप्पनिज्जरा? णो इणट्ठे समट्ठे।

एते सोलस भंगा।

सिय भंते! असुरकुमारा महस्सवा महाकिरिया महावेयणा महानिज्जरा? णो इणट्ठे समट्ठे। एवं चउत्थो भंगो भाणियव्वो। सेसा पण्णरस भंगा खोडेयव्वा।

एवं जाव थणियकुमारा।

सिय भंते! पुढविकाइया महस्सवा महाकिरिया महावेयणा महानिज्जरा? हंता, सिया।

एवं जाव सिय भंते! पुढविकाइया अप्पस्सवा अप्पकिरिया अप्पवेयणा अप्पनिज्जरा? हंता, सिया।

एवं जाव मणुस्सा।  
वाणमंतर-जोतिसिय-वेमाणिया जहा असुरकुमारा।  
सेवं भंते! सेवं भंते! त्ति०।

**\*एगूणवीसइमे सए चउत्थो उद्देसो समतो\***

### ० पंचमो उद्देसो ०

[७६६] अत्थि णं भंते! चरमा वि नेरतिया, परमा वि नेरतिया? हंता, अत्थि।

से नूणं भंते! चरमेह्हितो नेरइएह्हितो परमा नेरतिया महाकम्मतरा चेव, महाकिरियतरा चेव, महस्सवतरा चेव, महावेयणतरा चेव; परमेह्हितो वा नेरइएह्हितो चरमा नेरतिया अप्पकम्मतरा चेव, अप्पकिरियतरा चेव, अप्पस्सवतरा चेव, अप्पवेयणतरा चेव? हंता, गोयमा! चरमेह्हितो नेरइएह्हितो परमा जाव महावेयणतरा चेव; परमेह्हितो वा नेरइएह्हितो चरमा नेरइया जाव अप्पवेयणतरा चेव।

से केणट्ठेणं भंते! एवं वुच्चइ जाव अप्पवेयणतरा चेव? गोयमा! ठित्तिं पडुच्च, सेतेणट्ठेणं गोयमा! एवं वुच्चइ जाव अप्पवेयणतरा चेव।

अत्थि णं भंते! चरमा वि असुरकुमारा, परमा वि असुरकुमारा? एवं चेव, नवरं विवरीयं भाणियत्वं--परमा अप्पकम्मा चरमा महाकम्मा, सेसं तं चेव। जाव थणियकुमारा ताव एमेव।

पुढविकाइया जाव मणुस्सा एए जहा नेरइया।

वाणमंतर-जोतिस-वेमाणिया जहा असुरकुमारा।

[७६७] कतिविधा णं भंते! वेयणा पन्नता? गोयमा! दुविहा वेयणा पन्नता, तं जहा- निदा य अनिदा य।

नेरइया णं भंते! किं निदायं वेयणं वेएंति, अनिदायं? जहा पन्नवणाए जाव वेमाणिय त्ति।

सेवं भंते! सेवं भंते! त्ति०।

**\*एगूणवीसइमे सए पंचमो उद्देसो समतो\***

### ० छट्ठो उद्देसओ ०

[७६८] कहि णं भंते! दीव-समुद्दा?, केवतिया णं भंते! दीव-समुद्दा?, किंसंठिया णं भंते! दीव-समुद्दा? एवं जहा जीवाभिगमे दीव-समुद्दुद्देसो सो चेव इह वि जोतिसमंडिउद्देसगवज्जो भाणियत्त्वो जाव परिणामो जीवउववाओ जाव अणंतखुत्तो।

सेवं भंते! सेवं भंते! त्ति०।

**\*एगूणवीसइमे सए छट्ठो उद्देसो समतो\***

### ० सत्तमो उद्देसो ०

[७६९] केवतिया णं भंते! असुरकुमारभवणावाससयहस्सा पन्नता? गोयमा! चोयट्ठिं असुरकुमारभवणावाससयहस्सा पन्नता।

ते णं भंते! किंमया पन्नता? गोयमा! सत्वरयणामया अच्छा सण्हा जाव पडिरूवा। तत्थ णं बहवे जीवा य पोग्गला य वक्कमंति विउक्कमंति चयंति उववज्जंति, सासया णं ते भवणा दत्त्वट्ठयाए, वण्णपज्जवेहिं जाव फासपज्जवेहिं असासया।

एवं जाव थणियकुमारावासा।

केवतिया णं भंते! वाणमंतरभोमेज्जनगरावाससयसहस्सा पन्नता? गोयमा! असंखेज्जा वाणमंतरभोमेज्जनगरावाससयसहस्सा पन्नता।

ते णं भंते! किंमया पन्नता? सेसं तं चेव।

केवतिया णं भंते! जोतिसियविमाणावाससयसहस्सा० पुच्छा। गोयमा! असंखेज्जा जोतिसियविमाणावाससयसहस्सा पण्णता।

ते णं भंते! किंमया पन्नता? गोयमा! सव्वफालिहामया अच्छा, सेसं तं चेव।

सोहम्मं णं भंते! कप्पे केवतिया विमाणावाससयसहस्सा पन्नता? गोयमा! बत्तीसं विमाणावाससयसहस्सा०।

ते णं भंते! किंमया पन्नता? गोयमा! सव्वरयणामया अच्छा, सेसं तं चेव।

एवं जाव अणुत्तरविमाणा, नवरं जाणियच्चा जत्तिया भवणा विमाणा वा।

सेवं भंते! सेवं भंते! त्ति०।

**\*एगुणवीसइमे सए सत्तमो उद्देशो समतो\***

## ० अट्ठमो उद्देशो ०

[७७०] कतिविधा णं भंते! जीवनिव्वती पन्नता? गोयमा! पंचविहा जीवनिव्वती पन्नता, तं जहा-एगिंदियजीवनिव्वती जाव पंचिंदियजीवनिव्वती।

एगिंदियजीवनिव्वती णं भंते! कतिविधा पन्नता? गोयमा! पंचविधा पन्नता, तं जहा-- पुढविकाइयएगिंदियजीवनिव्वती जाव वणस्सइकाइयएगिंदियजीवनिव्वती।

पुढविकाइयएगिंदियजीवनिव्वती णं भंते! कतिविधा पन्नता? गोयमा! दुविहा पन्नता, तं जहा--सुहुमपुढविकाइयएगिंदियजीवनिव्वती य बायरपुढवि०।

एवं एणं अभिलावेणं भेदो जहा वड्डगबंधे तेयगसरीरस्स जाव- सव्वट्ठसिद्ध-अणुत्तरोववातिय-कप्पातीत-वेमाणियदेव-पंचिंदियजीवणिव्वती णं भंते! कतिविहा पन्नता? गोयमा! दुविहा पन्नता, तं जहा- पज्जतगसव्वट्ठसिद्धअणुत्तरोववातिय जाव देवपंचिंदियजीवनिव्वती य अपज्जग सव्वट्ठसिद्ध-अणुत्तरोववाइय जाव देवपंचिंदियजीवनिव्वती य।

कतिविधा णं भंते! कम्मनिव्वती पन्नता? गोयमा! अट्ठविहा कम्मनिव्वती पन्नता, तं जहा--नाणावरणिज्जकम्मनिव्वती जाव अंतराइयकम्मनिव्वती।

नेरतियाणं भंते! कतिविधा कम्मनिव्वती पन्नता? गोयमा! अट्ठविहा कम्मनिव्वती पन्नता, तं जहा--नाणावरणिज्जकम्मनिव्वती जाव अंतराइयकम्मनिव्वती।

एवं जाव वेमाणियाणं।

कतिविधा णं भंते! सरीरनिव्वती पन्नता? गोयमा! पंचविधा सरीरनिव्वती पन्नता, तं जहा-ओरालियसरीरनिव्वती जाव कम्मगसरीरनिव्वती।

नेरतियाणं भंते!० एवं चेव।

एवं जाव वेमाणियाणं, नवरं नायव्वं जस्स जति सरीराणि।

कतिविधा णं भंते! सत्विंदियनिव्वती पन्नता? गोयमा! पंचविहा सत्विंदियनिव्वती पन्नता, तं जहा--सोतिंदियनिव्वती जाव फासिंदियनिव्वती।

एवं जाव नेरइया जाव थणियकुमाराणं।

पुढविकाइयाणं पुच्छा। गोयमा! एगा फासिंदियसत्विंदियनिव्वती पन्नता।

एवं जस्स जति इंदियाणि जाव वेमाणियाणं।

कतिविधा णं भंते! भासानिव्वती पन्नता? गोयमा! चउव्विहा भासानिव्वती पन्नता, तं जहा--सच्चभासानिव्वती, मोसभासानिव्वती, सच्चामोसभासानिव्वती, असच्चामोसभासानिव्वती।

एवं एगिंदियवज्जं जस्स जा भासा जाव वेमाणियाणं।

कतिविहा णं भंते! मणनिव्वती पन्नता? गोयमा! चउव्विहा मणनिव्वती पन्नता, तं जहा--सच्चमणनिव्वती जाव असच्चामोसमणनिव्वती।

एवं एगिंदिय-विगलिंदियवज्जं जाव वेमाणियाणं।

कतिविहा णं भंते! कसायनिव्वती पन्नता? गोयमा! चउव्विहा कसायनिव्वती पन्नता, तं जहा--कोहकसायनिव्वती जाव लोभकसायनिव्वती।

एवं जाव वेमाणियाणं।

कतिविधा णं भंते! वण्णनिव्वती पन्नता? गोयमा! पंचविहा वण्णनिव्वती पन्नता, तं जहा--कालावण्णनिव्वती जाव सुक्किलावण्णनिव्वती

एवं निरवसेसं जाव वेमाणियाणं।

एवं गंधनिव्वती दुविहा जाव वेमाणियाणं।

रसनिव्वती पंचविहा जाव वेमाणियाणं।

फासनिव्वती अट्ठविहा जाव वेमाणियाणं।

कतिविधा णं भंते! संठाणनिव्वती पन्नता? गोयमा! छव्विहा संठाणनिव्वती पन्नता, तं जहा--समचउरंसंठाणनिव्वती जाव हुंडसंठाणनिव्वती।

नेरतियाणं पुच्छा। गोयमा! एगा हुंडसंठाणनिव्वती पन्नता।

असुरकुमाराणं पुच्छा। गोयमा! एगा समचउरंसंठाणनिव्वती पन्नता।

एवं जाव थणियकुमाराणं।

पुढविकाइयाणं पुच्छा। गोयमा! एगा मसूरचंदासंठाणनिव्वती पन्नता।

एवं जस्स जं संठाणं जाव वेमाणियाणं।

कतिविधा णं भंते! सन्नानिव्वती पन्नता? गोयमा! चउव्विहा सन्नाणिव्वती पन्नता, तं जहा-आहारसन्नानिव्वती जाव परिग्गहसन्नानिव्वती।

एवं जाव वेमाणियाणं।

कतिविधा णं भंते! लेस्सानिव्वती पन्नता? गोयमा! छव्विहा लेस्सानिव्वती पन्नता, तं जहा-कण्हलेस्सानिव्वती जाव सुक्कलेस्सानिव्वती।

एवं जाव वेमाणियाणं, जस्स जति लेस्साओ।

कतिविधा णं भंते! दिट्ठनिव्वती पन्नता? गोयमा! तिविहा दिट्ठनिव्वती पन्नता, तं जहा-

-सम्मद्धिट्ठनिव्वती, मिच्छादिट्ठनिव्वती, सम्मामिच्छादिट्ठनिव्वती।

एवं जाव वेमाणियाणं, जस्स जतिविधा दिट्ठी।

कतिविहा णं भंते! नाणनिव्वती पन्नता? गोयमा! पंचविहा नाणनिव्वती पन्नता, तं जहा--  
आभिणिबोहियनाणनिव्वती जाव केवलनाणनिव्वती।

एवं एगिंदियवज्जं जाव वेमाणियाणं, जस्स जति नाणा।

कतिविधा णं भंते! अन्नाणनिव्वती पन्नता? गोयमा! तिविहा अन्नाणनिव्वती पन्नता, तं  
जहा--मइअन्नाणनिव्वती सुयअन्नाणनिव्वती विभंगनाणनिव्वती।

एवं जस्स जति अन्नाणा जाव वेमाणियाणं।

कतिविधा णं भंते! जोगनिव्वती पन्नता? गोयमा! तिविहा जोगनिव्वती पन्नता, तं जहा--  
मणजोगनिव्वती, वइजोगनिव्वती, कायजोगनिव्वती।

एवं जाव वेमाणियाणं, जस्स जतिविधो जोगो।

कतिविधा णं भंते! उवयोगनिव्वती पन्नता? गोयमा! दुविहा उवयोगनिव्वती पन्नता, तं  
जहा--सागारोवयोगनिव्वती, अणागारोवयोगनिव्वती।

एवं जाव वेमाणियाणं।

[७७१] जीवाणं निव्वत्ति कम्मपगडी सरीर निव्वत्ति ।

सत्विंदिय निव्वत्ति भासा य मणे कसाया य ॥

[७७२] वण्ण रस गंध फासे संठाअ विहीय बोद्धवा ।

लेस दिट्ठी नाणे उवओगे चेव जोगे य ॥

[७७३] सेवं भंते! सेवं भंते! ति।

**\*एगूणवीसइमे सए अट्ठमो उद्देशो समतो\***

**० नवमो उद्देशो ०**

[७७४] कतिविधे णं भंते! करणे पन्नते? गोयमा! पंचविहे करणे पन्नते, तं जहा--दव्वकरणे  
खेत्तकरणे कालकरणे भवकरणे भावकरणे।

नेरतियाणं भंते! कतिविधे करणे पन्नते? गोयमा! पंचविहे करणे पन्नते, तं जहा--दव्वकरणे  
जाव भावकरणे।

एवं जाव वेमाणियाणं।

कतिविधे णं भंते! सरीरकरणे पन्नते? गोयमा! पंचविधे सरीरकरणे पन्नते, तं जहा--  
ओरालियसरीरकरणे जाव कम्मगसरीरकरणे।

एवं जाव वेमाणियाणं, जस्स जति सरीराणि।

कतिविधे णं भंते! इंदियकरणे पन्नते? गोयमा! पंचविधे इंदियकरणे पन्नते, तं जहा--  
सोतिंदियकरणे जाव फासिंदियकरणे।

एवं जाव वेमाणियाणं, जस्स जति इंदियाइं।

एवं एएणं कमेणं भासाकरणे चउत्विहे। मणकरणे चउत्विहे। कसायकरणे चउत्विहे।

समुग्घायकरणे सत्तविधे। सण्णाकरणे चउत्विहे। लेस्साकरणे छत्विहे। दिट्ठिकरणे तिविधे। वेदकरणे तिविधे पन्नते, तं जहा--इत्थिवेदकरणे पुरिसवेयकरणे नपुंसगवेयकरणे। एए सत्त्वे नेरइयाई दंडगा जाव वेमाणियाणं। जस्स जं अत्थि तं तस्स सत्त्वं भाणियत्त्वं।

कतिविधे णं भंते! पाणातिवायकरणे पन्नते? गोयमा! पंचविधे पाणातिवायकरणे पन्नते, तं जहा--एगिंदियपाणातिवायकरणे जाव पंचेदियपाणातिवायकरणे।

एवं निरवसेसं जाव वेमाणियाणं।

कइविधे णं भंते! पोग्गलकरणे पन्नते? गोयमा! पंचविधे पोग्गलकरणे पन्नते, तं जहा--वण्णकरणे गंधकरणे रसकरणे फासकरणे संठाणकरणे।

वण्णकरणे णं भंते! कतिविधे पन्नते? गोयमा! पंचविधे पन्नते, तं जहा--कालवण्णकरणे जाव सुक्किलवण्णकरणे।

एवं भेदो--गंधकरणे दुविधे, रसकरणे पंचविधे, फासकरणे अट्ठविधे।

संठाणकरणे णं भंते! कतिविधे पन्नते? गोयमा! पंचविधे पन्नते, तं जहा--परिमंडलसंठाणकरणे जाव आयतसंठाणकरणे।

[७७५] दत्त्वे खित्ते काले भवे य भावे य सरीर करणे य |  
इंदिय करणं भासा मणे कसाए समुग्घाए ||

[७७६] सण्णा लेस्सा दिट्ठी वेए पाणाइवायकरणे य |  
पुग्गल करणे वण्णे गंध-रस-फास-संठाणे ||

[७७७] सेवं भंते! सेवं भंते! ति जाव विहरति।।

**\*एगुणवीसइमे सए नवमो उद्देशो समतो\***

**० दसमो उद्देशो ०**

[७७८] वाणमंतरा णं भंते! सत्त्वे समाहारा०? एवं जहा सोलसमसए दीवकुमारुद्देशओ जाव अप्पिड्ढीय ति। सेवं भंते! सेवं भंते! ति जाव विहरति।

**\*एगुणवीसइमे सए दसमो उद्देशो समतो\***

**०-एगुणवीसतिमं सयं समतं-०**

**० मुनि दीपरत्तसागरेण संशोधितः सम्पादितश्च एगुणवीसतिमं सतं समतं ०**

**[ ] वीसइमं सयं [ ]**

[७७९] बेइंदिय मागासे पाणवहे उवचए य परमाणू ।  
अंतर बंधे भूमी चारण सोवक्कमा जीवा ।।

**० पढमो उद्देशो ०**

[७८०] रायगिहे जाव एवं वयासि-

सिय भंते! जाव चत्तारि पंच बेदिया एगयओ साधारणसरीरं बंधंति, एग० बं० २ ततो पच्छा आहारंति वा परिणामंति वा सरीरं वा बंधंति? नो तिणट्ठे समट्ठे, बेदिया णं पत्तेयाहारा य पत्तेयपरिणामा पत्तेयसरीरं बंधंति, प० बं०२ ततो पच्छा आहारंति वा परिणामंति वा सरीरं वा बंधंति।

तेसि णं भंते! जीवाणं कति लेस्साओ पन्नताओ? गोयमा! तयो लेस्साओ पन्नताओ, तं जहा--कण्हेस्सा नीललेस्सा काउलेस्सा, एवं जहा एगुणवीसतिमे सए तेउकाइयाणं जाव उव्वट्ठंति, नवरं सम्मद्धिट्ठी वि, मिच्छद्धिट्ठी वि, नो सम्मामिच्छादिट्ठी; दो नाणा, दो अन्नाणा नियमं; नो मणजोगी, वयजोगी वि, कायजोगी वि; आहारो नियमं छद्धिसिं।

तेसि णं भंते! जीवाणं एवं सन्ना ति वा पन्ना ति वा मणे ति वा वथी ति वा 'अम्हे णं इट्ठाणिट्ठे रसे इट्ठाणिट्ठे फासे पडिसंवेदेमो'? णो तिणट्ठे समट्ठे, पडिसंवेदेति पुण ते। ठिती जहन्नेणं अंतोमुहुत्तं, उक्कोसेणं बारस संवच्छराइं। सेसं तं चेव।

एवं तेइंदिया वि। एवं चउरिंदिया वि। नाणत्तं इंदिएसु ठितीए य, सेसं तं चेव, ठिती जहा पन्नवणाए।

सिय भंते! जाव चत्तारि पंच पंचेदिया एगयओ साहारण० एवं जहा बिंदियाणं, नवरं छ लेसाओ, दिट्ठी तिविहा वि; चत्तारिणाणा, तिण्णि अण्णाणा भयणाए; तिविहो जोगो।

तेसि णं भंते! जीवाणं एवं सन्ना ति वा पण्णा ति वा जाव वती ति वा 'अम्हे णं आहारमाहारेमो'? गोयमा! अत्थेगइयाणं एवं सण्णा ति वा पण्णा ति वा मणो ति वा वती ति वा 'अम्हे णं आहारमाहारेमो', अत्थेगइयाणं नो एवं सन्ना ति वा जाव वती ति वा 'अम्हे णं आहारमाहारेमो', आहारंति पुण ते।

तेसि णं भंते! जीवाणं एवं सन्ना ति वा पण्णा ति वा जाव वती ति वा 'अम्हे णं इट्ठाणिट्ठे सद्धे, इट्ठाणिट्ठे रूवे, इट्ठाणिट्ठे गंधे, इट्ठाणिट्ठे रसे, इट्ठाणिट्ठे फासे पडिसंवेदेमो'? गोयमा! अत्थेगइयाणं एवं सन्ना ति वा जाव वती ति वा 'अम्हे णं इट्ठाणिट्ठे सद्धे जाव इट्ठाणिट्ठे फासे पडिसंवेदेमो', अत्थेगइयाणं नो एवं सण्णा ति वा जाव वती इ वा 'अम्हे णं इट्ठाणिट्ठे सद्धे जाव इट्ठाणिट्ठे फासे पडिसंवेदेमो', पडिसंवेदेति पुण ते।

ते णं भंते! जीवा किं पाणातिवाए उवक्खाइज्जंति० पुच्छा। गोयमा! अत्थेगतिया पाणातिवाए वि उवक्खाइज्जंति जाव मिच्छादंसणसल्ले वि उवक्खाइज्जंति; अत्थेगतिया नो पाणातिवाए उवक्खाइज्जंति, नो मुसावादे जाव नो मिच्छादंसणसल्ले उवक्खाइज्जंति। जेसिं पि णं जीवाणं ते जीवा एवमाहिज्जंति तेसिं पे णं जीवाणं अत्थेगइयाणं विन्नाए नाणत्ते, अत्थेगइयाणं नो विन्नाए नाणत्ते। उववातो सव्वतो जाव सव्वट्ठसिद्धाओ। ठिती जहन्नेणं अंतोमुहुत्तं, उक्कोसेणं तेतीसं सागरोवमाइं। छस्समुग्घाया केवलिवज्जा। उव्वट्ठणा सव्वत्थ गच्छंति जाव सव्वट्ठसिद्धं ति। सेसं जहा बैदियाणं।

एएसि णं भंते! बेइंदियाणं जाव पंचेदियाण य कयरे जाव विसेसाहिया वा? गोयमा! सव्वत्थोवा पंचेदिया, चउरिंदिया विसेसाहिया, तेइंदिया विसेसाहिया, बेइंदिया विसेसाहिया।

सेवं भंते! सेवं भंते! जाव विहरति।

**\*वीसइमे सए पढमो उद्देशो समतो\***

**० बीओ उद्देशो ०**

[७८१] कतिविधे णं भंते! आगासे पन्नते? गोयमा! दुविधे आगासे पन्नते, तं जहा-लोयागासे य अलोयागासे य।

लोयागासे णं भंते! किं जीवा, जीवदेसा? एवं जहा बितियसए अत्थिउद्देशे तह चेव इह वि भाणियत्वं, नवरं अभिलावो जाव धम्मत्थिकाए णं भंते! केमहालए पन्नते? गोयमा! लोए लोयमेते लोयपमाणे लोयफुडे लोयं चेव ओगाहिताणं चिट्ठइ। एवं जाव पोग्गलत्थिकाए।

अहेलोए णं भंते! धम्मत्थिकायस्स केवतियं ओगाढे? गोयमा! सातिरेगं अद्धं ओगाढे। एवं एणं अभिलावेणं जहा बितियसए जाव ईसिपब्भारा णं भंते! पुढवी लोयागासस्स किं संखेज्जइभागं ओगाढा?० पुच्छ। गोयमा! नो संखेज्जतिभागं ओगाढा; असंखेज्जतिभागं ओगाढा; नो संखेज्जे भागे, नो असंखेज्जे भागे, नो सच्चलोयं ओगाढा। सेसं तं चेव।

**[७८२]**धम्मत्थिकायस्स णं भंते! केवतिया अभिवयणा पन्नता? गोयमा! अणेगा अभिवयणा पन्नता, तं जहा--धम्मे ति वा, धम्मत्थिकाये ति वा, पाणातिवायवेरमणे ति वा, मुसावायवेरमणे ति वा एवं जाव परिग्गहवेरमणे ति वा, कोहविवेगे ति वा जाव मिच्छादंसणसल्लविवेगे ति वा, रियासमिती ति वा, भासास० एसणास० आदाणभंडमतनिकखेवणस० उच्चार-पासवणखेल-सिंघाण-पारिट्ठावणियासमिती ति वा, मणगुती ति वा, वइगुती ति वा, कायगुती ति वा, जे यावऽन्ने तहप्पगारा सच्चे ते धम्मत्थिकायस्स अभिवयणा।

अधम्मत्थिकायस्स णं भंते! केवइया अभिवयणा पन्नता? गोयमा! अणेगा अभिवयणा पन्नता, तं जहा--अधम्मे ति वा, अधम्मत्थिकाये ति वा, पाणातिवाए ति वा जाव मिच्छादंसणसल्ले ति वा, रियाअस्समिती ति वा जाव उच्चार-पासवण जाव पारिट्ठावणियाअस्समिती ति वा, मणअगुती ति वा, वइअगुती ति वा, कायअगुती ति वा, जे यावऽन्ने तहप्पगारा सच्चे ते अधम्मत्थिकायस्स अभिवयणा।

आगासत्थिकायस्स णं० पुच्छ। गोयमा! अणेगा अभिवयणा पन्नता, तं जहा--आगासे ति वा, आगासत्थिकाये ति वा, गगणे ति वा, नभे ति वा, समे ति वा, विसमे ति वा, खहे ति वा, विहे ति वा, वीयी ति वा, विवरे ति वा, अंबरे ति वा, अंबरसे ति वा, छिड्ढे ति वा, झुसिरे ति वा, मग्गे ति वा, विमुहे ति वा, अद्दे ति वा, वियद्दे ति वा, आधारे ति वा, वोमे ति वा, भायणे ति वा, अंतरिक्खेति वा, सामे ति वा, ओवासंतरे ति वा, अगमे ति वा, फलिहे ति वा, अणंते ति वा, जे यावऽन्ने तहप्पगारा सच्चे ते आगासत्थिकायस्स अभिवयणा।

जीवत्थिकायस्स णं भंते! केवतिया अभिवयणा० पुच्छ। गोयमा! अणेगा अभिवयणा पन्नता, तं जहा--जीवे ति वा, जीवत्थिकाये ति वा, पाणे ति वा, भूते ति वा, सत्ते ति वा, विण्णू ति वा, चेया ति वा, जेया ति वा, आया ति वा, रंगणे ति वा, हिंडुए ति वा, पोग्गले ति वा, माणवे ति वा, कत्ता ति वा, विकत्ता ति वा, जए ति वा, जंतू ति वा, जोणी ति वा, सयंभू ति वा, ससरीरी ति वा, नायये ति वा, अंतरप्पा ति वा, जे यावऽन्ने तहप्पगारा सच्चे ते जीवअभिवयणा।

पोग्गलत्थिकायस्स णं भंते!० पुच्छ। गोयमा! अणेगा अभिवयणा पन्नता, तं जहा--पोग्गले ति वा, पोग्गलत्थिकाये ति वा, परमाणुपोग्गले ति वा, दुपदेसिए ति वा, तिपदेसिए ति वा जाव असंखेज्जपदेसिए ति वा अणंतपदेसिए ति वा खंधे, जे यावऽन्ने तहप्पकारा सच्चे ते पोग्गलत्थिकायस्स अभिवयणा।

सेवं भंते! सेवं भंते! ति०।

**\*वीसइमे सए बीइओ उद्देशो समतो\***

## ० तइओ उद्देशो ०

[७८३] अह भंते! पाणातिवाए मुसावाए जाव मिच्छादंसणसल्ले, पाणातिवायवेरमणे जाव मिच्छादंसणसल्लविवेगे, उप्पत्तिया जाव पारिणामिया, उग्गहे जाव धारणा, उट्ठाणे, कम्ममे, बले, वीरिए, पुरिसक्कारपरक्कमे, नेरइयत्ते, असुरकुमारत्ते जाव वेमाणियत्ते, नाणावरणिज्जे जाव अंतराइए, कण्हलेस्सा जाव सुक्कलेस्सा, सम्मदिट्ठी ३, चक्खुदंसणे ४, आभिणिबोहियणाणे जाव विभंगनाणे, आहारसन्ना ४ ओरालियसरीरे ५, मणोजोए ३, सागारोवयोगे अणागारोवयोगे, जे यावन्ने तहप्पगारा सव्वे ते णऽन्नत्थ आयाए परिणमंति? हंता, गोयमा! पाणातिवाए जाव ते णऽन्नत्थ आताए परिणमंति।

[७८४] जीवे णं भंते! गब्भं वक्कममाणे कतिवण्णं कतिगंधं एवं जहा बारसमसए पंचमुद्देशे जाव कम्मओ णं जए, णो अकम्मओ विभत्तिभावं परिणमति।

सेवं भंते! सेवं भंते! ति जाव विहरति।

**\*वीसइमे सए तइओ उद्देशो समतो\***

## ० चउत्थो उद्देशो ०

[७८५] कतिविधे णं भंते! इंदियोवचये पन्नते? गोतमा! पंचविहे इंदियोवचये पन्नते, तं जहा--सोतिंदियउवचए एवं बितियो इंदियउद्देशओ निरवसेसो भाणियव्वो जहा पन्नवणाए।

सेवं भंते! सेवं भंते! ति भगवं गोयमे जाव विहरइ।

**\*वीसइमे सए चउत्थो उद्देशो समतो\***

## ० पंचमो उद्देशो ०

[७८६] परमाणुपोग्गले णं भंते! कतिवण्णे कतिगंधे कतिरसे कतिफासे पन्नते? गोयमा! एगवण्णे एगगंधे एगरसे दुफासे पन्नते। जति एगवण्णे-सिय कालए, सिय नीलए, सिय लोहियए, सिय हालिद्वए, सिय सुक्किलए। जति एगगंधे-सिय सुब्भिगंधे, सिय दुब्भिगंधे। जति एगरसे-सिय तित्ते, सिय कडुए, सिय कसाए, सिय अंबिले, सिय महुरे। जति दुफासे-सिय सीए य निद्धे य, सिय सीते य लुक्खे य, सिय उसिणे य निद्धे य; सिय उसुणे य लुक्खे य।

दुपएसिए णं भंते ! खंधे कतिवण्णे० । एवं जहा अट्ठारसमसए छट्ठुद्देशए जाव सिय दुपएसिए णं भंते! खंधे कतिवण्णे०। एवं जहा अट्ठारसमसए छट्ठुद्देशए जाव सिय चउफासे पन्नते। जति एगवण्णे-सिय कालए जाव सिय सुक्किलए। जति दुवण्णे-सिय कालए य नीलए य १, सिय कालए य लोहियए य २, सिय कालए य हालिद्वए य ३, सिय कालए य सुक्किलए य ४, सिय नीलए य लोहियए य ५, सिय नीलए य हालिद्वए य ६, सिय नीलए य सुक्किलए य ७, सिय लोहियए य हालिद्वए य ८, सिय लोहियए य सुक्किलए य ९, सिय हालिद्वए य, सुक्किलए य १०--एवं एए दुयासंजोगे दस भंगा।

जति एगगंधे-सिय सुब्भिगंधे १, सिय दुब्भिगंधे २। जति दुगंधे--सुब्भिगंधे य दुब्भिगंधे य। रसेसु जहा वण्णसु।

जति दुफासे-सिय सीए य निद्धे य-एवं जहेव परमाणुपोग्गले ४। जति तिफासे--सव्वे सीए, देसे निद्धे, देसे लुक्खे; सव्वे उसुणे, देसे निद्धे, देसे लुक्खे; सव्वे निद्धे, देसे सीए, देसे उसुणे; सव्वे लुक्खे, देसे

सीए, देसे उसुणे। जति चउफासे-देसे सीए, देसे उसुणे, देसे निद्धे, देसे लुक्खे । एते नव भंगा फासेसु।

तिपएसिए णं भंते! खंधे कतिवण्णे०? जहा अट्ठारसमसए जाव चउफासे पन्नते। जति एगवण्णे-सिय कालए जाव सुक्किलए ५। जति दुवण्णे-सिय कालए य नीलए य १, सिय कालए य नीलगा य २, सिय कालगा य नीलए य ३; सिय कालए य लोहियए य १, सिय कालए य लोहियगा य २, सिय कालगा य लोहियए य ३; एवं हालिद्धएण वि समं ३; एवं सुक्किलएण वि समं ३; सिय नीलए य, लोहियए य एत्थ वि भंगा ३; एवं हालिद्धएण वि भंगा ३; एवं सुक्किलएण वि समं भंगा ३; सिय लोहियए य हालिद्धए य, भंगा ३; एवं सुक्किलएण वि समं ३; सिय हालिद्धए य सुक्किलए य भंगा ३। एवं सव्वेते दस दुयासंजोगा भंगा तीसं भवंति। जति तिवण्णे--सिय कालए य नीलए य लोहियए य १, सिय कालए य नीलए य हालिद्धए य २, सिय कालए य नीलए य सुक्किलए य ३, सिय कालए य लोहियए य हालिद्धए य ४, सिय कालए य लोहियए य सुक्किलए य ५, सिय कालए य हालिद्धए य सुक्किलए य ६, सिय नीलए य लोहियए य हालिद्धए य ७, सिय नीलए य लोहियए य सुक्किलए य ८, सिय नीलए य हालिद्धए य सुक्किलए य ९, सिय लोहियए य हालिद्धए य सुक्किलए य १०, एवं एए दस तियासंजोगे भंगा। जति एगगंधे-सिय सुब्धिगंधे १, सिय दुब्धिगंधे २; जति दुगंधे-सिय सुब्धिगंधे य, दुब्धिगंधे य, भंगा ३।

रसा जहा वण्णा।

जदि दुफासे-सिय सीए य निद्धे य। एवं जहेव दुपएसियस्स तहेव चत्तारि भंगा ४। जति तिफासे-सव्वे सीए, देसे निद्धे, देसे लुक्खे १; सव्वे सीए, देसे निद्धे, देसा लुक्खा २; सव्वे सीते, देसा निद्धा, देसे लुक्खे ३; सव्वे उसुणे, देसे निद्धे, देसे लुक्खे, एत्थ वि भंगा तिन्नि ३; सव्वे निद्धे, देसे सीते, देसे उसुणे--भंगा तिन्नि ३; सव्वे लुक्खे, देसे सीए, देसे उसिणे--भंगा तिन्नि, । जति चउफासे--देसे सीए, देसे उसिणे, देसे निद्धे, देसे लुक्खे १; देसे सीए, देसे उसिणे, देसे निद्धे, देसा लुक्खा २; देसे सीए, देसे उसिणे, देसा निद्धा, देसे लुक्खे ३; देसे सीए, देसा उसिणा, देसे निद्धे, देसे लुक्खे ४; देसे सीए, देसा उसिणा, देसे निद्धे, देसा लुक्खा ५, देसे सीए, देसा उसिणा, देसा निद्धा, देसे लुक्खे ६, देसा सीता, देसे उसिणे, देसे निद्धे, देसे लुक्खे ७; देसा सीया, देसे उसिणे, देसे निद्धे, देसा लुक्खा ८; देसा सीया, देसे उसिणे, देसा निद्धा, देसे लुक्खे ९। एवं एए तिपदेसिए फासेसु पणवीसं भंगा।

चउपएसिए णं भंते! खंधे कतिवण्णे०? जहा अट्ठारसमसए जाव सिय चउफासे पन्नते। जति एगवण्णे--सिय कालए य जाव सुक्किलए ५। जति दुवण्णे-सिय कालए य, नीलए य १; सिय कालए य, नीलगा य २; सिय कालगा य, नीलए य ३; सिय कालगा य, नीलगा य ४; सिय कालए य, लोहियए य, एत्थ वि चत्तारि भंगा ४; सिय कालए य, हालिद्धए य ४; सिय कालए य, सुक्किलए य ४; सिय नीलए य, लोहियए य ४; सिय नीलए य, हालिद्धए य ४; सिय नीलए य, सुक्किलए य ४; सिय लोहियए य, हालिद्धए य ४; सिय लोहियए य, सुक्किलए य ४; सिय हालिद्धए य, सुक्किलए य ४; एवं एए दस दुयासंजोगा, भंगा पुण चत्तालीसं ४०। जति तिवण्णे-सिय कालए य, नीलए य, लोहियए य १; सिय कालए य, नीलए य, लोहियगा य २; सिय कालए य, नीलगा य लोहियए य, ३; सिय कालगा य, नीलए य, लोहियए य ४; एए भंगा ४। एवं काल-नील-हालिद्धएहिं भंगा ४; काल-नील-सुक्किल० ४; काल-लोहिय-हालिद्ध० ४; काल-लोहिय-सुक्किल० ४; काल-हालिद्ध-सुक्किल० ४; नील-लोहिय-हालिद्धगाणं भंगा ४; नील-लोहिय-सुक्किल० ४; नील-हालिद्ध-सुक्किल० ४; लोहिय-हालिद्ध-सुक्किलगाणं भंगा ४; एवं एए दस तियगसंजोगा, एक्केक्के संजोए चत्तारि भंगा, सव्वेते

चत्तालीसं भंगा ४०। जति चउवण्णे-सिय कालए य, नीलए य, लोहियए य, हालिद्वए य १; सिय कालए य, नीलए य, लोहियए य, सुक्किलए य २; सिय कालए य, नीलए य, हालिद्वए य, सुक्किलए य ३; सिय कालए य, लोहियए य, हालिद्वए य, सुक्किलए य ४; सिय नीलए य, लोहियए य, हालिद्वए य, सुक्किलए य; एवमेते चउक्कगसंजोए पंच भंगा। एए सव्वे नउइभंगा।

जदि एगगंधे--सिय सुब्भिगंधे १, सिय दुब्भिगंधे २। जदि दुगंधे--सिय सुब्भिगंधे य, सिय दुब्भिगंधे य।

रसा जहा वण्णा।

जइ दुफासे-जहेव परमाणुपोग्गले ४। जइ तिफासे-सव्वे सीते, देसे निद्वे, देसे लुक्खे १; सव्वे सीए, देसे निद्वे, देसा लुक्खा २; सव्वे सीए, देसा निद्वे, देसे लुक्खे ३; सव्वे सीए, देसा निद्वे, देसा लुक्खा ४। सव्वे उसिणे, देसे निद्वे, देसे लुक्खे, एवं भंगा ४। सव्वे निद्वे, देसे सीए, देसे उसिणे ४। सव्वे लुक्खे, देसे सीए, देसे उसिणे ४। एए तिफासे सोलसभंगा। जति चउफासे--देसे सीए, देसे उसिणे, देसे निद्वे, देसे लुक्खे; देसे सीए, देसे उसिणे, देसे निद्वे, देसा लुक्खा; देसे सीए, देसे उसिणे, देसा निद्वे, देसे लुक्खे; देसे सीए, देसे उसिणे, देसा निद्वे, देसा लुक्खा; देसे सीए, देसा उसिणा, देसे निद्वे, देसे लुक्खे; देसे सीए, देसा उसिणा, देसे निद्वे, देसा लुक्खा; देसे सीए, देसा उसिणा, देसा निद्वे, देसे लुक्खे; देसे सीए, देसा उसिणा, देसा निद्वे, देसा लुक्खा। देसा सीया, देसे उसिणे, देसे निद्वे, देसे लुक्खे ९—

एवं एए चउफासे सोलस भंगा भाणियत्वा जाव देसा सीया, देसा उसिणा, देसा निद्वे, देसा लुक्खा। सव्वेते फासेसु छत्तीसं भंगा।

पंचपदेसिए णं भंते! खंधे कतिवण्णे०? जहा अट्ठारसमसए जाव सिय चउफासे पन्नते। जति एगवण्णे, एगवण्ण दुवण्णा जहेव चउपदेसिए। जति तिवण्णे--सिय कालए य, नीलए य, लोहियए य १; सिय कालए य, नीलए य, लोहियगा य २; सिय कालए य, नीलगा य, लोहियए य ३; सिय कालए य, नीलगा य, लोहियगा य ४; सिय कालगा य, नीलए य, लोहियए य ५; सिय कालगा य, नीलए य, लोहियगा य ६; सिय कालगा य, नीलगा य, लोहियए य ७। सिय कालए य, नीलए य, हालिद्वए य, एत्थ वि सत्त भंगा ७। एवं कालग-नीलग-सुक्किलएसु सत्त भंगा ७; कालग-लोहिय-हालिद्वेसु ७; कालग-लोहिय-सुक्किलेसु ७; कालगहालिद्व-सुक्किलेसु ७; नीलग-लोहिय-हालिद्वेसु ७; नीलग-लोहिय-सुक्किलेसु सत्त भंगा ७; नीलग-हालिद्व-सुक्किलेसु ७; लोहिय-हालिद्व-सुक्किलेसु वि सत्त भंगा ७; नीलग-हालिद्व-सुक्किलेसु ७; लोहिय-हालिद्व-सुक्किलेसु वि सत्त भंगा ७; एवमेते तियासंजोएण सत्तरि भंगा। जति चउवण्णे--सिय कालए य, नीलए य, लोहियए य, हालिद्वए य १; सिय कालए य, नीलए य, लोहियए य, हालिद्वगा य २; सिय कालए य, नीलए य, लोहियगा य, हालिद्वगे य ३; सिय कालए य, नीलगा य, लोहियगे य, हालिद्वए य ४; सिय कालगा य, नीलए य, लोहियगे य, हालिद्वए य ५--एए पंच भंगा; सिय कालए य, नीलए य, लोहियए य, सुक्किलए य--एत्थ वि पंच भंगा; एवं कालग-नीलग-हालिद्व-सुक्किलेसु वि पंच भंगा; कालग-लोहिय-हालिद्व-सुक्किलएसु वि पंच भंगा ५; नीलग-लोहिय-हालिद्व-सुक्किलेसु वि पंच भंगा; एवमेते चउक्कगसंजोएणं पणुवीसं भंगा। जति पंचवण्णे--कालए य, नीलए य, लोहियए य, हालिद्वए य, सुक्किलए य--सव्वमेते एक्कग-दुयग-तियग-चउक्कग-पंचगसंजोएणं ईयालं भंगसयं भवति।

गंधा जहा चउपएसियस्स। रसा जहा वण्णा।

फासा जहा चउपदेसियस्स।

छप्पएसिए णं भंते! खंधे कतिवण्णे०? एवं जहा पंचपएसिए जाव सिय चउफासे पन्नते। जदि एगवण्णे, एगवण्ण-दुवण्णा जहा पंचपदेसियस्स। जति तिवण्णे-सिय कालए य, नीलए य, लोहियए य- एवं जहेव पंच, पएसियस्स सत भंगा जाव सिय कालगा य, नीलगा य, लोहियए य ७; सिय कालगा य, नीलगा य, लोहियगा य ८, एए अट्ठ भंगा; एवमेते दस तियासंजोगा, एक्केक्के संजोगे अट्ठ भंगा; एवं सव्वे वि तियगसंजोगे असीतिभंगा। जति चउवण्णे--सिय कालए य, नीलए य, लोहियए य, हालिद्वए य १; सिय कालए य, नीलए य, लोहियए य, हालिद्वगा य २; सिय कालए य, नीलए य, लोहियगा य, हालिद्वए य ३; सिय कालए य, नीलए य, लोहियगा य, हालिद्वगा य ४; सिय कालए य नीलगा य, लोहियए य, हालिद्वए य ५; सिय कालए य, नीलगा य, लोहियए य, हालिद्वगा य ६; सिय कालए य, नीलगा य, लोहियगा य, हालिद्वए य ७; सिय कालगा य, नीलए य, लोहियए य, हालिद्वए य ८; सिय कालगा य, नीलए य, लोहियए य, हालिद्वगा य ९; सिय कालगा य, नीले य, लोहियगा य, हालिद्वए य १०; सिय कालगा य, नीलगा य, लोहियए य, हालिद्वए य ११; एए एक्कारस भंगा। एवमेए पंच चउक्का संजोगा कायव्वा, एक्केक्के संजोए एक्कारस भंगा, सव्वेते चउक्कगसंजोएणं पणपन्नं भंगा। जति पंचवण्णे--सिय कालए य, नीलए य, लोहियए य, हालिद्वए य, सुक्किलए य १; सिय कालए य, नीलए य, लोहियए य, हालिद्वए य, सुक्किलगा य २; सिय कालए य नीलए य लोहियए य हालिद्वगा य सुक्किलए य ३; सिय कालए य नीलए य लोहियगा य हालिद्वए य सुक्किलए य ४; सिय कालए य, नीलगा य, लोहियए य, हालिद्वए य, सुक्किलए य ५; सिय कालगा य, नीलए य, लोहियगे य, हालिद्वए य, सुक्किलए य ६; एवं एए छब्भंगा भाणियव्वा। एवमेते सव्वे वि एक्कग-दुयग-तियग-चउक्कग-पंचगसंजोएसु

छासीयं भंगसयं भवति।

गंधा जहा पंचपएसियस्स।

रसा जहा एयस्सेव वण्णा।

फासा जहा चउप्पएसियस्स।

सत्तपएसिए णं भंते! खंधे कतिवण्णे०? जहा पंचपएसिए जाव सिय चउफासे पन्नते। जति एगवण्णे, एवं एगवण्ण-दुवण्ण-तिवण्णा जहा छप्पएसियस्स। जइ चउवण्णे-सिय कालए य, नीलए य, लोहियए य, हालिद्वए य; सिय कालए य, नीलए य, लोहियए य, हालिद्वगा य; सिय कालए य, नीलए य, लोहियगा य, हालिद्वए य; एवमेते चउक्कगसंजोएणं पन्नरस भंगा भाणियव्वा जाव सिय कालगा य, नीलगा य, लोहियगा य, हालिद्वए य। एवमेते पंच चउक्का संजोगा नेयव्वा; एक्केक्के संजोए पन्नरस भंगा-सव्वमेते पंचसत्तरि भंगा भवंति। जति पंचवण्णे--सिय कालए य, नीलए य, लोहियए य, हालिद्वए य, सुक्किलए य; सिय कालए य, नीलए य, लोहियए य, हालिद्वए य, सुक्किलगा य; सिय कालए य, नीलए य, लोहियए य, हालिद्वगा य, सुक्किलए य; सिय कालए य, नीलए य, लोहियए य, हालिद्वगा य, सुक्किल्लगा य; सिय कालए य, नीलए य, नीलए य, लोहियगा य, हालिद्वए य, सुक्किलए य; सिय कालए य, नीलए य, लोहियगा य, हालिद्वए य, सुक्किलगा य; सिय कालए य, नीलए य, लोहियगा य, हालिद्वगा य, सुक्किलए य; सिय कालए य, नीलगा य, लोहियगे य, हालिद्वए य, सुक्किलए य; सिय कालए य, नीलगा य, लोहियए य, हालिद्वए य, सुक्किलगा य; सिय कालए य, नीलगा य, लोहियए य, हालिद्वगा य, सुक्किलए य; सिय कालए य, नीलगा य,

लोहियगा य, हालिद्वए य, सुक्किलए य; सिय कालगा य, नीलए य, लोहियए य, हालिद्वए य, सुक्किलए य; सिय कालगा य, नीलए य, लोहियए य, हालिद्वए य, सुक्किलगा य; सिय कालगा य, नीलए य, लोहियए य, हालिद्वगा य, सुक्किलए य; सिय कालगा य, नीलगे य, लोहियगा य, हालिद्वए य, सुक्किलए य; सिय कालगा य, नीलगा य, लोहियए य, हालिद्वए य, सुक्किलए य; एए सोलस भंगा। एवं सत्त्वमेते एक्कग-दुयग-तियग-चउक्कग-पंचगसंजोगेणं दो सोला भंगसता भवंति।

गंधा जहा चउप्पएसियस्स।

रसा जहा एयस्स चेव वण्णा।

फासा जहा चउप्पएसियस्स।

अट्ठपदेसियस्स णं भंते! खंधे० पुच्छा। गोयमा! सिय एगवण्णे जहा सत्तपदेसियस्स जाव सिय चतुफासे पन्नते। जति एगवण्णे, एवं एगवण्ण-दुवण्ण-तिवण्णा जहेव सत्तपएसिए। जति चउवण्णे-सिय कालए य, नीलए य, लोहियए य, हालिद्वए य; सिय कालए य, नीलए य, लोहियए य, हालिद्वगा य; एवं जहेव सत्तपदेसिए जाव सिय कालगा य, नीलगा य, लोहियगा य, हालिद्वगे य, सिय कालगा य, नीलगा य, लोहियगा य, हालिद्वगा य; एए सोलस भंगा। एवमेते पंच चउक्कगसंजोगा; सत्त्वमेते असीति भंगा। जति पंचवण्णे-सिय कालए य, नीलए य, लोहियए य, हालिद्वए य, सुक्किलए य; सिय कालगे य, नीलगे य, लोहियगे य, हालिद्वए य, सुक्किलगा य; एवं एएणं कमेणं भंगा चारेयत्वा जाव सिय कालए य, नीलगा य, लोहियगा य, हालिद्वगा य, सुक्किलगे य, एसो पन्नरसमो भंगो; सिय कालगा य, नीलए य, लोहियए य, हालिद्वए य, सुक्किलए य, सिय कालगा य, नीलए य, लोहियए य, हालिद्वए य, सुक्किलगा य; सिय कालगा य, नीलगे य, लोहियए य, हालिद्वगा य, सुक्किलगा य; सिय कालगा य, नीलए य, लोहियगा य, हालिद्वए य, सुक्किलए य; सिय कालगा य, नीलगे य, लोहियए य, हालिद्वगा य, सुक्किलगा य; सिय कालगा य, नीलए य, लोहियगा य, हालिद्वए य, सुक्किलगा य; सिय कालगा य, नीलए य, लोहियगा य, हालिद्वगा य, सुक्किलए य; सिय कालगा य, नीलगा य, लोहियगे य, हालिद्वए य, सुक्किलगे य; सिय कालगा य, नीलगा य, लोहियए य, हालिद्वए य, सुक्किलगा य; सिय कालगा य, नीलगा य, लोहियए य, हालिद्वगा य, सुक्किलए य; सिय कालगा य, नीलगा य, लोहियगे य, हालिद्वए य, सुक्किलगे य; एए पंचगसंजोएणं छत्वीसं भंगा भवंति। एवामेव सपुत्वावरेणं एक्कग-दुयग-तियग-चउक्कग-पंचगसंजोएहिं दो एक्कतीसं भंगसया भवंति।

गंधा जहा सत्तपएसियस्स।

रसा जहा एयस्स चेव वण्णा।

फासा जहा चउप्पएसियस्स।

नवपदेसियस्स० पुच्छा। गोयमा! सिय एगवण्णे जहा अट्ठपएसिए जाव सिय चउफासे पन्नते। जति एगवण्णे, एगवण्ण-दुवण्ण-तिवण्ण-चउवण्णा जहेव अट्ठपएसियस्स। जति पंचवण्णे--सिय कालए य, नीलए य, लोहियए य, हालिद्वए य, सुक्किलए य; सिय कालए य, नीलए य, लोहियए य, हालिद्वए य, सुक्किलगा य; एवं परिवाडीए एक्कतीसं भंगा भाणियत्वा जाव सिय कालगा य, नीलगा य, लोहियगा य, हालिद्वगा य, सुक्किलए य; एए एक्कतीसं भंगा। एवं एक्कग-दुयग-तियग-चउक्कग-पंचगसंजोएहिं दो छत्तीसा भंगसया भवंति।

गंधा जहा अट्ठपएसियस्स।

रसा जहा एयस्स चेव वण्णा।

फासा जहा चउप्पएसियस्स।

दसपदेसिए णं भंते! खंधे० पुच्छा। गोयमा! सिय एगवण्णे जहा नवपदेसिए जाव सिय चउफासे पन्नते। जति एगवण्णे, एगवण्ण-दुवण्ण-तिवण्ण-चउवण्णा जहेव नवपएसियस्स। पंचवण्णे वि तहेव, नवरं बत्तीसतिमो वि भंगो भण्णति। एवमेते एककग-दुयग-तियग-चउक्कग-पंचगसंजोएसु दोन्नि सत्ततीसा भंगसया भवंति।

गंधा जहा नवपएसियस्स।

रसा जहा एयस्स चेव वण्णा।

फासा जहा चउपएसियस्स।

जहा दसपएसिओ एवं संखेज्जपएसिओ वि।

एवं असंखेज्जपएसिओ वि।

सुहुमपरिणओ अणंतपएसिओ वि एवं चेव।

**[७८७]** बादरपरिणए णं भंते! अणंतपएसिए खंधे कतिवण्णे०? एवं जहा अट्ठारसमसए जाव सिय अट्ठफासे पन्नते। वण्ण-गंध-रसा जहा दसपएसियस्स।

जति चउफासे-सत्त्वे कक्खडे, सत्त्वे गरुए, सत्त्वे सीए, सत्त्वे निद्धे; सत्त्वे कक्खडे, सत्त्वे गरुए, सत्त्वे सीए, सत्त्वे लुक्खे; सत्त्वे कक्खडे, सत्त्वे गरुए, सत्त्वे उसिणे, सत्त्वे निद्धे; सत्त्वे कक्खडे, सत्त्वे गरुए, सत्त्वे उसिणे, सत्त्वे लुक्खे; सत्त्वे कक्खडे, सत्त्वे लहुए, सत्त्वे सीए, सत्त्वे निद्धे; सत्त्वे कक्खडे, सत्त्वे लहुए, सत्त्वे सीए, सत्त्वे लुक्खे; सत्त्वे कक्खडे, सत्त्वे लहुए, सत्त्वे उसिणे, सत्त्वे निद्धे; सत्त्वे कक्खडे, सत्त्वे लहुए, सत्त्वे उसिणे, सत्त्वे लुक्खे; सत्त्वे मउए, सत्त्वे गरुए, सत्त्वे सीए, सत्त्वे निद्धे; सत्त्वे मउए, सत्त्वे गरुए, सत्त्वे सीए, सत्त्वे लुक्खे; सत्त्वे मउए, सत्त्वे गरुए, सत्त्वे उसिणे, सत्त्वे निद्धे; सत्त्वे मउए, सत्त्वे गरुए, सत्त्वे उसिणे, सत्त्वे लुक्खे; सत्त्वे मउए, सत्त्वे लहुए, सत्त्वे सीए, सत्त्वे निद्धे; सत्त्वे मउए, सत्त्वे लहुए, सत्त्वे सीए, सत्त्वे लुक्खे; सत्त्वे मउए, सत्त्वे लहुए, सत्त्वे उसिणे, सत्त्वे निद्धे; सत्त्वे मउए, सत्त्वे लहुए, सत्त्वे उसिणे, सत्त्वे लुक्खे; एए सोलस भंगा।

जइ पंचफासे-सत्त्वे कक्खडे, सत्त्वे गरुए, सत्त्वे सीए, देसे निद्धे, देसे लुक्खे; सत्त्वे कक्खडे, सत्त्वे गरुए, सत्त्वे सीए, देसे निद्धे, देसा लुक्खा; सत्त्वे कक्खडे, सत्त्वे गरुए, सत्त्वे सीए, देसा निद्धा, देसे लुक्खे; सत्त्वे कक्खडे, सत्त्वे गरुए, सत्त्वे सीए, देसा निद्धा, देसा लुक्खा। सत्त्वे कक्खडे, सत्त्वे गरुए, सत्त्वे उसिणे, देसे निद्धे, देसे लुक्खे० ४; सत्त्वे कक्खडे, सत्त्वे लहुए, सत्त्वे सीए, देसे निद्धे, देसे लुक्खे० ४; सत्त्वे कक्खडे, सत्त्वे लहुए, सत्त्वे उसिणे, देसे निद्धे, देसे लुक्खे० ४; एवं एए कक्खडेणं सोलस भंगा। सत्त्वे मउए, सत्त्वे गरुए, सत्त्वे सीए, देसे निद्धे, देसे लुक्खे० ४; एवं मउएण वि सोलस भंगा। एवं बत्तीसं भंगा। सत्त्वे कक्खडे, सत्त्वे गरुए, सत्त्वे निद्धे, देसे सीए, देसे उसिणे० ४; सत्त्वे कक्खडे, सत्त्वे गरुए, सत्त्वे लुक्खे, देसे सीए, देसे उसिणे ४; ० एए बत्तीसं भंगा। सत्त्वे कक्खडे, सत्त्वे सीए, सत्त्वे निद्धे, देसे गरुए, देसे लहुए ४; ० एत्थ वि बत्तीसं भंगा। सत्त्वे गरुए, सत्त्वे सीए, सत्त्वे निद्धे, देसे कक्खडे, देसे मउए ४; ० एत्थ वि बत्तीसं भंगा। एवं सत्त्वेते पंचफासे अट्ठावीसं भंगसयं भवति।

जदि छफासे-सत्त्वे कक्खडे, सत्त्वे गरुए, देसे सीए, देसे उसिणे, देसे निद्धे, देसे लुक्खे १; सत्त्वे कक्खडे, सत्त्वे गरुए, देसे सीए, देसे उसिणे, देसे निद्धे, देसा लुक्खा २; एवं जाव सत्त्वे कक्खडे, सत्त्वे गरुए, देसा



कक्खडे, देसे मउए, देसे गरुए, देसे लहुए, देसा सीता, देसा उसिणा, देसे निद्धे, देसे लुक्खे ४; एए चत्तारि चउक्का सोलस भंगा। देसे कक्खडे, देसे मउए, देसे गरुए, देसा लहुया, देसे सीए, देसे उसिणे, देसे निद्धे, देसे लुक्खे; एवं एए गरुएणं एगत्तएणं, लहुएणं पोहतएणं सोलस भंगा कायव्वा। देसे कक्खडे, देसे मउए, देसा गरुया, देसे लहुए, देसे सीए, देसे उसिणे, देसे निद्धे, देसे लुक्खे ४; एए वि सोलस भंगा कायव्वा। देसे कक्खडे, देसे मउए, देसा गरुया, देसा लहुया, देसे सीए, देसे उसिणे, देसे निद्धे, देसे लुक्खे; एए वि सोलस भंगा कायव्वा। सव्वेते चउसट्ठिं भंगा कक्खड-मउएहिं एगत्तएहिं। ताहे कक्खडेणं एगत्तएणं, मउएणं पुहतएणं एए चेव चउसट्ठिं भंगा कायव्वा। ताहे कक्खडेणं पुहतएणं, मउएणं एगत्तएणं चउसट्ठिं भंगा कायव्वा। ताहे एतेहिं चेव दोहि वि पुहतएहिं चउसट्ठिं भंगा कायव्वा जाव देसा कक्खडा, देसा मउया, देसा गरुया, देसा लहुया, देसा सीता, देसा उसिणा, देसा निद्धा, देसा लुक्खा--एसो अपच्छिमो भंगो। सव्वेते अट्ठफासे दो छप्पण्णा भंगसया भवंति।

एवं एए बादरपरिणए अणंतपरिएसिए खंधे सव्वेसु संजोएसु बारस छण्णउया भंगसया भवंति।

**[७८८]** कतिविधे णं भंते! परमाणू पन्नते? गोयमा! चउत्विहे परमाणू पन्नते, तं जहा-दव्वपरमाणू खेतपरमाणू कालपरमाणू भावपरमाणू।

दव्वपरमाणू णं भंते! कतिविधे पन्नते? गोयमा! चउत्विहे पन्नते, तं जहा--अच्छेज्जे अभेज्जे अडज्जे अगेज्जे।

खेतपरमाणू णं भंते! कतिविधे पन्नते? गोयमा! चउत्विहे पन्नते, तं जहा--अण्ड्ढे अमज्जे अपएसे अविभाइमे।

कालपरमाणू० पुच्छा। गोयमा! चेउत्विधे पन्नते, तं जहा--अवण्णे अगंधे अरसे अफासे।

भावपरमाणू णं भंते! कतिविधे पन्नते? गोयमा! चउत्विधे पन्नते, तं जहा--वण्णमंते गंधमंते रसमंते फासमंते।

सेवं भंते! सेवं भंते! ति जाव विहरति।

**\*वीसइमे सए पंचमो उद्देशो समतो\***

**० छट्ठो उद्देशो ०**

**[७८९]** पुढविकाइए णं भंते! इमीसे रयणप्पभाए सक्करप्पभाए य पुढवीए अंतरा समोहए, समोहण्णिता जे भविए सोहम्ममे कप्पे पुढविकाइयत्ताए उववज्जित्तए से णं भंते! किं पुट्ठिं उववज्जित्ता पच्छा आहारेज्जा, पुट्ठिं आहारेत्ता पच्छा उववज्जेज्जा? गोयमा! पुट्ठिं वा उववज्जित्ता० एवं जहा सत्तरसमसए छट्ठुद्देशे जाव सेतेणट्ठेणं गोयमा! एवं वुच्चइ पुट्ठिं वा जाव उववज्जेज्जा, नवरं तहिं संपाउण्णा, इमेहिं आहारो भण्णइ, सेसं तं चेव।

पुढविकाइए णं भंते? इमीसे रयणप्पभाए सक्करप्पभाए य पुढवीए अंतरा समोहए० जे भविए ईसाणे कप्पे पुढविकाइयत्ताए उववज्जित्तए० एवं चेव।

एवं जाव ईसिपब्भाराए उववातेयव्वो।

पुढविकाइए णं भंते! सक्करप्पभाए वालुयप्पभाए य पुढवीए अंतरा समोहए, समो० २ जे भविए सोहम्ममे कप्पे जाव ईसिपब्भारा०।

एवं एणं कमेणं जाव तमाए अहेसत्तमाए य पुढवीए अंतरा समोहए समाणे जे भविए सोहम्मे जाव ईसिपब्भाराए उववाएयव्वो।

पुढविकाइए णं भंते! सोहम्मीसाणाणं सणंकुमार-माहिंदाण य कप्पाणं अंतरा समोहए, समो० २ जे भविए इमीसे रयणप्पभाए पुढवीए पुढविकाइयत्ताए उववज्जितए से णं भंते! किं पुट्ठिं उववज्जित्ता पच्छा आहारेज्जा? सेसं तं चेव जाव सेतेणट्ठेणं जाव णिक्खेवओ।

पुढविकाइए णं भंते! सोहम्मीसाणाणं सणंकुमार-माहिंदाण य कप्पाणं अंतरा समोहए, स० २ जे भविए सक्करप्पभाए पुढवीए पुढविकाइयत्ताए उववज्जितए? एवं चेव।

एवं जाव अहेसत्तमाए उववातेयव्वो।

एवं सणंकुमार-माहिंदाणं बंभलोगस्स य कप्पस्स अंतरा समोहए, सह० २ पुणरवि जाव अहेसत्तमाए उववाएयव्वो।

एवं बंभलोगस्स लंतगस्स य कप्पस्स अंतरा समोहए० पुणरवि जाव अहेसत्तमाए०।

एवं लंतगस्स महासुक्कस्स य कप्पस्स अंतरा समोहए, समोहणित्ता पुणरवि जाव अहेसत्तमाए०।

एवं महासुक्कस्स सहस्सारस्स य कप्पस्स अंतरा० पुणरवि जाव अहेसत्तमाए०।

एवं सहस्सारस्स आणय-पाणयाण य कप्पाणं अंतरा० पुणरवि जाव अहेसत्तमाए०।

एवं आणय-पाणयाणं आरणऽच्युयाण य कप्पाणं अंतरा० पुणरवि जाव अहेसत्तमाए०।

एवं आरणऽच्युताणं गेवेज्जविमाणाण य अंतरा० जाव अहेसत्तमाए०।

एवं गेवेज्जविमाणाणं अणुत्तरविमाणाण य अंतरा० पुणरवि जाव अहेसत्तमाए०।

एवं अणुत्तरविमाणाणं ईसिपब्भाराए य अंतरा० पुणरवि जाव अहेसत्तमाए उववाएयव्वो।

**[७९०]** आउकाइए णं भंते! इमीसे रयणप्पभाए सक्करप्पभाए य पुढवीए अंतरा समोहए, समो० २ जे भविए सोहम्मे कप्पे आउक्काइयत्ताए उववज्जितए०? सेसं जहा पुढविकाइयस्स जाव सेतेणट्ठेणं०।

एवं पढम-दोच्चाणं अंतरा समोहयओ जाव ईसिपब्भाराए य उववातेयव्वो।

एवं एणं कमेणं जाव तमाए अहेसत्तमाए य पुढवीए अंतरा० समोहए, समो० २ जाव ईसिपब्भाराए उववातेयव्वो आउक्काइयत्ताए।

आउयाए णं भंते ! सोहम्मीसाणाणं सणंकुमार-माहिंदाण य कप्पाणं अंतरा समोहते, समोह-णित्ता जे भविए इमीसे रयणप्पभाए पुढवीए घणोदधिवलएसु आउकाइयत्ताए उववज्जितए०? सेसं तं चेव।

एवं एएहिं चेव अंतरा समोहयओ जाव अहेसत्तमाए पुढवीए घणोदधिवलएसु आउकाइयत्ताए उववाएयव्वो।

एवं जाव अणुत्तरविमाणाणं ईसिपब्भाराए य पुढवीए अंतरा समोहए जाव अहेसत्तमाए घणोदधिवलएसु उववातेयव्वो।

**[७९१]** वाउकाइए णं भंते! इमीसे रयणप्पभाए सक्करप्पभाए य पुढवीए अंतरा समोहए, समोहणित्ता जे भविए सोहम्मे कप्पे वाउकाइयत्ताए उववज्जितए०? एवं जहा सत्तरसमसए वाउकाइयउद्देशए

तहा इह वि, नवरं अंतरेसु समोहणावेयव्वो, सेसं तं चेव जाव अणुत्तरविमाणाणं ईसिपब्भाराए य पुढवीए अंतरा समोहए, समोह० २ जे भविए अहेसतमाए घणवात-तणुवाते घणवातवलएसु तणुवायवलएसु वाउक्काइयत्ताए उववज्जित्तए, सेसं तं चेव, सेतेणट्ठेणं जाव उववज्जेज्जा।

सेवं भंते! सेवं भंते! ति०।

**\*वीसइमे सए छट्ठो उद्देशो समतो\***

**० सतमो उद्देशो ०**

[७९२] कतिविधे णं भंते! बंधे पन्नते? गोयमा! तिविधे बंधे पन्नते, तं जहा--जीवप्पयोगबंधे अणंतरबंधे परंपरबंधे।

नेरतियाणं भंते! कतिविधे बंधे पन्नते? एवं चेव।

एवं जाव वेमाणियाणं।

नाणावरणिज्जस्स णं भंते! कम्मस्स कतिविधे बंधे पन्नते? गोयमा! तिविधे बंधे पन्नते, तं जहा-जीवप्पयोगबंधे अणंतरबंधे परंपरबंधे।

नेरइयाणं भंते! नाणावरणिज्जस्स कम्मस्स कतिविधे बंधे पन्नते? एवं चेव।

एवं जाव वेमाणियाणं।

एवं जाव अंतराइयस्स।

णाणावरणिज्जोदयस्स णं भंते! कम्मस्स कतिविधे बंधे पन्नते? गोयमा! तिविधे बंधे पन्नते। एवं चेव।

एवं नेरइयाण वि।

एवं जाव वेमाणियाणं।

एवं जाव अंतराइओदयस्स।

इत्थिवेदस्स णं भंते! कतिविधे बंधे पन्नते? गोयमा! तिविधे बंधे पन्नते? एवं चेव।

असुरकुमाराणं भंते! इत्थिवेदस्स कतिविधे बंधे पन्नते? एवं चेव।

एवं जाव वेमाणियाणं, नवरं जस्स इत्थिवेदो अत्थि।

एवं पुरिसवेदस्स वि; एवं नपुंसगवेदस्स वि; जाव वेमाणियाणं, नवरं जस्स जो अत्थि वेदो।

दंसणमोहणिज्जस्स णं भंते! कम्मस्स कतिविधे बंधे पन्नते? एवं चेव।

[एवं] निरंतरं जाव वेमाणियाणं।

एवं चरित्तमोहणिज्जस्स वि जाव वेमाणियाणं।

एवं एएणं कमेणं ओरालियसरीरस्स जाव कम्मगसरीरस्स, आहारसण्णाए जाव परिग्गहसण्णाए, कण्हलेसाए जाव सुक्कलेसाए, सम्मद्धिट्ठीए मिच्छादिट्ठीए सम्मामिच्छादिट्ठीए, आभिणिबोहियणाणस्स जाव केवलनाणस्स, मतिअन्नाणस्स सुयअन्नाणस्स विभंगनाणस्स।

एवं आभिनिबोहियणाणविसयस्स णं भंते! कतिविधे बंधे पन्नते? जाव केवलनाणविसयस्स, मतिअन्नाणविसयस्स, सुयअन्नाणविसयस्स, विभंगनाणविसयस्स; एएसिं सव्वेसिं पयाणं तिविधे बंधे पन्नते।

सव्वेते चउवीसं दंडगा भाणियव्वा, नवरं जाणियव्वं जस्स जं अत्थि; जाव वेमाणियाणं भंते! विभंगणाणविसयस्स कतिविधे बंधे पन्नते? गोयमा! तिविधे बंधे पन्नते, तं जहा--जीवप्पयोगबंधे अणंतरबंधे परंपरबंधे।

सेवं भंते! सेवं भंते! जाव विहरति।

**\*वीसइमे सए सतमो उद्देशो समतो\***

**० अट्ठमो उद्देशो ०**

[७९३] कति णं भंते! कम्मभूमीओ पन्नताओ? गोयमा! पन्नरस कम्मभूमीओ पन्नताओ, तं जहा--पंच भरहाइं, पंच एरवताइं, पंच महाविदेहाइं।

कति णं भंते! अकम्मभूमीओ पन्नताओ? गोयमा! तीसं अकम्मभूमीओ पन्नताओ, तं जहा--पंच हेमवयाइं, पंच हेरण्णवयाइं, पंच हरिवासाइं, पंच रम्मगवासाइं, पंच देवकुरूओ, पंच उत्तरकुरूओ।

एयासु णं भंते! तीसासु अकम्मभूमीसु अत्थि ओसप्पिणी ति वा, उस्सप्पिणी ति वा? णो तिणट्ठे समट्ठे।

एएसु णं भंते! पंचसु भरहेसु, पंचसु एरवएसु अत्थि ओसप्पिणी ति वा, उस्सप्पिणी ति वा? हंता, अत्थि।

एएसु णं भंते! पंचसु महाविदेहेसु०? णेवत्थि ओसप्पिणी, नेवत्थि उस्सप्पिणी, अवट्ठिणं तत्थ काले पन्नते समणाउसो!।

[७९४] एएसु णं भंते! पंचसु महाविदेहेसु अरहंता भगवंतो पंचमहव्वतियं सपडिक्कमणं धम्मं पण्णवयंति? णो तिणट्ठे समट्ठे। एएसु णं पंचसु भरहेसु, पंचसु एरवएसु पुरिम-पच्छिमगा दुवे अरहंता भगवंतो पंचमहव्वतियं सपडिक्कमणं धम्मं पण्णवयंति, अवसेसा णं अरहंता भगवंतो चाउज्जामं धम्मं पण्णवयंति। एएसु णं पंचसु महाविदेहेसु अरहंता भगवंतो चाउज्जामं धम्मं पण्णवयंति।

जंबुद्दीवे णं भंते! दीवे भारहे वासे इमीसे ओसप्पिणीए कति तित्थयरा पन्नता? गोयमा! चउवीसं तित्थयरा पन्नता, तं जहा--उसभ-अजिय-संभव-अभिनंदण-सुमति-सुप्पभ-सुपास-ससि-पुप्फदंत-सीयल-सेज्जंस-वासुपुज्ज-विमल-अणंतइ-धम्म-संति-कुंथु-अर-मल्लि-मुणिसुव्वय-नमि-नेमि-पास-वद्धमाणा।

[७९५] एएसि णं भंते! चउवीसाए तित्थयराणं कति जिणंतरा पन्नता? गोयमा! तेवीसं जिणंतरा पन्नता।

एएसु णं भंते! तेवीसाए जिणंतरेसु कस्स कहिं कालियसुयस्स वोच्छेदे पन्नते? गोयमा! एएसु णं तेवीसाए जिणंतरेसु पुरिम-पच्छिमएसु अट्ठसु अट्ठसु जिणंतरेसु, एत्थ णं कालियसुयस्स अवोच्छेदे पन्नते, मज्झिमएसु सत्तसु जिणंतरेसु एत्थ णं कालियसुयस्स वोच्छेदे पन्नते, सव्वत्थ वि णं वोच्छिन्ने दिट्ठिवाए।

[७९६] जंबुद्दीवे णं भंते! दीवे भारहे वासे इमीसे ओसप्पिणीए देवाणुपियाणं केवितियं कालं पुव्वगए अणुसज्जिस्सति? गोयमा! जंबुद्दीवे णं दीवे भारहे वासे इमीसे ओसप्पिणीए ममं एगं वाससहस्सं पुव्वगए अणुसज्जिस्सति।

जहा णं भंते! जंबुद्दीवे दीवे भारहे वासे इमीसे ओसप्पिणीए देवाणुपियाणं एगं वाससहस्सं

पुव्वगए अणुसज्जिस्सति तहा णं भंते! जंबुद्धीवे दीवे भारहे वासे इमीसे ओसप्पिणीए अवसेसाणं तित्थगराणं केवतियं कालं पुव्वगए अणुसज्जित्था? गोयमा! अत्थेगइयाणं संखेज्जं कालं, अत्थेगइयाणं असंखेज्जं कालं।

[७९७] जंबुद्धीवे णं भंते! दीवे भारहे वासे इमीसे ओसप्पिणीए देवाणुपियाणं केवतियं कालं तित्थे अणुसज्जिस्सति? गोयमा! जंबुद्धीवे दीवे भारहे वासे इमीसे ओसप्पिणीए ममं एक्कवीसं वाससहस्साइं तित्थे अणुसज्जिस्सति।

[७९८] जहा णं भंते! जंबुद्धीवे दीवे भारहे वासे इमीसे ओसप्पिणीए देवाणुपियाणं एक्कवीसं वाससहस्साइं तित्थे अणुसज्जिस्सति तहा णं भंते! जंबुद्धीवे दीवे भारहे वासे आगमेस्साणं चरिमत्तित्थगरस्स केवतियं कालं तित्थे अणुसज्जिस्सति? गोयमा! जावतिए णं उसभस्स अरहओ कोसलियस्स जिणपरियाए तावतियाइं संखेज्जाइं आगमेस्साणं चरिमत्तित्थगरस्स तित्थे अणुसज्जिस्सति।

[७९९] तित्थं भंते! तित्थं, तित्थगरे तित्थं? गोयमा! अरहा ताव नियमं तित्थगरे, तित्थं पुण चाउव्वण्णाइण्णो समणसंघो, तं जहा-समणा समणीओ सावगा साविगाओ।

[८००] पवयणं भंते! पवयणं, पावयणी पवयणं? गोयमा! अरहा ताव नियमं पावयणी, पवयणं पुण दुवालसंगे गणिपिडगे, तंजहा-आयारो जाव दिट्ठिवाओ।

जे इमे भंते! उग्गा भोगा राइण्णा इक्खागा नाया कोरव्वा, एए णं अस्सिं धम्मो ओगाहंति, अस्सिं अट्ठविहं कम्मरयमलं पवाहंति, अट्ठो पवा० २ ततो पच्छा सिज्झंति जाव अंतं करंति? हंता, गोयमा! जे इमे उग्गा भोगा० तं चेव जाव अंतं करंति। अत्थेगइया अन्नयरेसु देवलोएसु देवताए उववतारो भवंति।

कतिविधा णं भंते! देवलोया पन्नता? गोयमा! चउव्विहा देवलोगा पन्नता, तं जहा-- भवणवासी वाणमंतरा जोतिसिया वेमाणिया।

सेवं भंते! सेवं भंते! ति०।

**\*वीसइमे सए अट्ठमो उद्देशो समतो\***

## ० नवमो उद्देशो ०

[८०१] कतिविधा णं भंते! चारणा पन्नता? गोयमा! दुविहा चारणा पन्नता, तं जहा- विज्जाचारणा य जंघाचारणा य।

से केणट्ठेणं भंते! एवं वुच्चति--विज्जाचारणे विज्जाचारणे? गोयमा! तस्स णं छट्ठेणं अनिक्खितेणं तवोकम्मणेणं विज्जाए उत्तरगुणलद्धिं खममाणस्स विज्जाचारणलद्धी नामं लद्धी समुप्पज्जति, सेतेणट्ठेणं जाव विज्जाचारणे विज्जाचारणे।

विज्जाचारणस्स णं भंते! कहां सीहा गती? कहां सीहे गतिविसए पन्नते? गोयमा! अयं णं जंबुद्धीवे दीवे सव्वदीवो जाव किंचिविसेसाहिए परिक्खेवेणं, देवे णं महिइद्धीए जाव महेसक्खे जाव 'इणामेव इणामेव'ति कट्ठु केवलकप्पं जंबुद्धीवं दीवं तिहिं अच्छरानिवाएहिं तिक्खुतो अणुपरियट्ठिताणं हव्वमागच्छेज्जा, विज्जाचारणस्स णं गोयमा! तहा सीहा गती, तहा सीहे गतिविसए पन्नते।

विज्जाचारणस्स णं भंते! तिरियं केवतिए गतिविसए पन्नते? गोयमा! से णं इओ एगेणं

उप्पाएणं माणुसुत्तरे पट्ठवए समोसरणं करेति, माणु० क०२ तर्हिं चेतियाइं वंदति, तर्हिं० वं० २ बितिएणं उप्पाएणं नंदिस्सरवरे दीवे समोसरणं करेति, नंदि० क० २ तर्हिं चेतियाइं वंदति, तर्हिं० वं० २ तओ पडिनियत्तति, त० प० २ इहमागच्छति, इहमा० २ इहं चेतियाइं वंदइ। विज्जाचारणस्स णं गोयमा! तिरियं एवतिए गतिविसए पन्नते।

विज्जाचारणस्स णं भंते! उड्ढं केवतिए गतिविसए पन्नते? गोयमा! से णं इओ एगेणं उप्पाएणं नंदणवणे समोसरणं करेति, नं० क०२ तर्हिं चेतियाइं वंदइ, तर्हिं० वं० २ बितिएणं उप्पाएणं पंडगवणे समोसरणं करेइ, पं० क० २ तर्हिं चेतियाइं वंदति, तर्हिं० वं० २ तओ पडिनियत्तति, तओ० प० २ इहमागच्छति, इहमा० २ इहं चेतियाइं वंदइ। विज्जाचारणस्स णं गोयमा! उड्ढं एवतिए गतिविसए पन्नते। से णं तस्स ठाणस्स अणालोइयपडिक्कंते कालं करेति, नत्थि तस्स आराहणा; से णं तस्स ठाणस्स आलोइयपडिक्कंते कालं करेति, अत्थि तस्स आराहणा।

**[८०२]** से केणट्ठेणं भंते! एवं वुच्चइ-जंघाचारणे जंघाचारणे? गोयमा! तस्स णं अट्ठमंअट्ठमेणं अनिक्खित्तेणं तवोकम्मणेणं अप्पाणं भावेमाणस्स जंघाचारणलद्धी नामं लद्धी समुप्पज्जइ। सेतेणट्ठेणं जाव जंघाचारणे जंघाचारणे।

जंघाचारणस्स णं भंते! कंहं सीहा गति? कंहं सीहे गतिविसए पन्नते? गोयमा! अयं णं जंबुद्धीवे दीवे एवं जहेव विज्जाचारणस्स, नवरं तिसत्तखुतो अणुपरियट्ठिताणं हव्वमागच्छेज्जा। जंघाचारणस्स णं गोयमा! तहा सीहा गती, तहा सीहे गतिविसए पन्नते। सेसं तं चव।

जंघाचारणस्स णं भंते! तिरियं केवतिए गतिविसए पन्नते? गोयमा! से णं इओ एगेणं उप्पाएणं रुयगवरे दीवे समोसरणं करेति, रुय० क० २ तर्हिं चेतियाइं वंदति, तर्हिं० वं० २ ततो पडिनियत्तमाणे बितिएणं उप्पाएणं नंदीसरवरदीवे समोसरणं करेति, नं० क० २ तर्हिं चेतियाइं वंदति, तर्हिं० वं० २ इहमागच्छति, इहमा० २ इहं चेतियाइं वंदति। जंघाचारणस्स णं गोयमा! तिरियं एवतिए गतिविसए पन्नते।

जंघाचारणस्स णं भंते! उड्ढं केवतिए गतिविसए पन्नते? गोयमा! से णं इओ एगेणं उप्पाएणं पंडगवणे समोसरणं करेति, स० क० २ तर्हिं चेतियाइं वंदति, तर्हिं वं० २ ततो पडिनियत्तमाणे बितिएणं उप्पाएणं नंदणवणे समोसरणं करेति, नं० क० २ तर्हिं चेतियाइं वंदति, तर्हिं० वं० २ इहमागच्छति, इहमा० २ इहं चेतियाइं वंदइ। जंघाचारणस्स णं गोयमा! उड्ढं एवतिए गतिविसए पन्नते। से णं तस्स ठाणस्स अणालोइयपडिक्कंते कालं करेति, नत्थि तस्स आराहणा; से णं तस्स ठाणस्स आलोइयपडिक्कंते कालं करेति, अत्थि तस्स आराहणा।

सेवं भंते! जाव विहरति।

**\*वीसइमे सए नवमो उद्देशो समतो\***

**० दसमो उद्देशो ०**

**[८०३]** जीवा णं भंते! किं सोवक्कमाउया, निरुवक्कमाउया? गोयमा! जीवा सोवक्कमाउया वि निरुवक्कमाउया वि।

नेरतिया णं० पुच्छ। गोयमा! नेरतिया नो सोवक्कमाउया, निरुवक्कमाउया।

एवं जाव थणियकुमारा।

पुढविकाइया जहा जीवा।

एवं जाव मणुस्सा।

वाणमंतर-जोतिसिय-वेमाणिया जहा नेरतिया।

[८०४] नेरतिया णं भंते! किं आओवक्कमेणं उववज्जंति, परोवक्कमेणं उववज्जंति, निरुवक्कमेणं उववज्जंति? गोयमा! आतोवक्कमेणं वि उववज्जंति, परोवक्कमेणं वि उववज्जंति, निरुवक्कमेणं वि उववज्जंति।

एवं जाव वेमाणिया।

नेरतिया णं भंते! किं आओवक्कमेणं उव्वट्पंति, परोवक्कमेणं उव्वट्पंति, निरुवक्कमेणं उव्वट्पंति? गोयमा! नो आओवक्कमेणं उव्वट्पंति, नो परोवक्कमेणं उव्वट्पंति, निरुवक्कमेणं उव्वट्पंति।

एवं जाव थणियकुमारा।

पुढविकाइया जाव मणुस्सा तिसु उव्वट्पंति।

सेसा जहा नेरइया, नवरं जोतिसिय-वेमाणिया चयंति।

नेरतिया णं भंते! किं आतिइढीए उववज्जंति, परिइढीए उववज्जंति? गोयमा! आतिइढीए उववज्जंति, नो परिइढीए उववज्जंति।

एवं जाव वेमाणिया।

नेरतिया णं भंते! किं आतिइढीए उव्वट्पंति, परिइढीए उव्वट्पंति? गोयमा! आतिइढीए उव्वट्पंति, नो परिइढीए उव्वट्पंति।

एवं जाव वेमाणिया, नवरं जोतिसिय-वेमाणिया चयंतीति अभिलावो।

नेरइया णं भंते! किं आयकम्मणा उववज्जंति, परकम्मणा उववज्जंति? गोयमा! आयकम्मणा उववज्जंति, नो परकम्मणा उववज्जंति।

एवं जाव वेमाणिया।

एवं उव्वट्पणादंडओ वि।

नेरइया णं भंते! किं आयप्पयोगेणं उववज्जंति, परप्पयोगेणं उववज्जंति? गोयमा! आयप्पयोगेणं उववज्जंति, नो परप्पयोगेणं उववज्जंति।

एवं जाव वेमाणिया।

एवं उव्वट्पणादंडओ वि।

[८०५] नेरइया णं भंते! किं कतिसंचिता, अकतिसंचिता, अवत्तव्वगसंचिता? गोयमा! नेरइया कतिसंचिया वि, अकतिसंचिता वि, अवत्तव्वगसंचिता वि।

से केणट्ठेणं जाव अवत्तव्वगसंचिता वि? गोयमा! जे णं नेरइया संखेज्जएणं पवेसणएणं पविसंति ते णं नेरइया कतिसंचिता, जे णं नेरइया असंखेज्जएणं पवेसणएणं पविसंति ते णं नेरइया अकतिसंचिया, जे णं नेरइया एक्कएणं पवेसणएणं पविसंति ते णं नेरइया अवत्तव्वगसंचिता; सेतेणट्ठेणं गोयमा! जाव अवत्तव्वगसंचिता वि।

एवं जाव थणियकुमारा।

पुढविकाइयाणं पुच्छा। गोयमा! पुढविकाइया नो कतिसंचिता, अकतिसंचिता, नो

अवतत्त्वगसंचिता।

से केणट्ठेणं जाव नो अवतत्त्वगसंचिता? गोयमा! पुढविकाइया असंखेज्जएणं पवेसणएणं पविसंति; सेतेणट्ठेणं जाव नो अवतत्त्वगसंचिता।

एवं जाव वणस्सतिकाइया।

बेंदिया जाव वेमाणिया जहा नेरइया।

सिद्धाणं पुच्छा। गोयमा! सिद्धा कतिसंचिता, नो अकतिसंचिता, अवतत्त्वगसंचिता वि।

से केणट्ठेणं जाव अवतत्त्वगसंचिता वि? गोयमा! जे णं सिद्धा संखेज्जएणं पवेसणएणं पविसंति ते णं सिद्धा कतिसंचिता, जे णं सिद्धा एककएणं पवेसणएणं पविसंति ते णं सिद्धा अवतत्त्वगसंचिता; सेतेणट्ठेणं जाव अवतत्त्वगसंचिता वि।

एसि णं भंते! नेरइयाणं कतिसंचिताणं अकतिसंचियाणं अवतत्त्वगसंचिताण य कयरे कयरेहितो जाव विसेसाहिया वा? गोयमा! सव्वत्थोवा नेरइया अवतत्त्वगसंचिता, कतिसंचिया संखेज्जगुणा, अकतिसंचिता असंखेज्जगुणा।

एवं एगिंदियवज्जाणं जाव वेमाणियाणं अप्पाबहुगं, एगिंदियाणं नत्थि अप्पाबहुगं।

एसि णं भंते! सिद्धाणं कतिसंचियाणं, अवतत्त्वगसंचिताण य कयरे कयरेहितो जाव विसेसाहिया वा? गोयमा! सव्वत्थोवा सिद्धा कतिसंचिता, अवतत्त्वगसंचिता संखेज्जगुणा।

नेरइया णं भंते! किं छक्कसमज्जिया, नोछक्कसमज्जिया, छक्केण य नोछक्केण य समज्जिया, छक्केहिं समज्जिया, छक्केहिं य नोछक्केण य समज्जिया? गोयमा! नेरइया छक्कसमज्जिया वि, नोछक्कसमज्जिया वि, छक्केण य नोछक्केण य समज्जिया वि, छक्केहिं समज्जिया वि, छक्केहिं य नोछक्केण य समज्जिया वि।

से केणट्ठेणं भंते! एवं वुच्चइ--नेरइया छक्कसमज्जिया वि जाव छक्केहिं य नोछक्केण य समज्जिया वि? गोयमा! जे णं नेरइया छक्कएणं पवेसणएणं पविसंति ते णं नेरइया छक्कसमज्जिता। जे णं नेरइया जहन्नेणं एककेण वा दोहिं वा तीहिं वा, उक्कोसेणं पंचएणं पवेसणएणं पविसंति ते णं नेरइया नोछक्कसमज्जिया। जे णं नेरइया एगेणं छक्कएणं; अन्नेण य जहन्नेणं एककेण वा दोहिं वा तीहिं वा, उक्कोसेणं पंचएणं पवेसणएणं पविसंति ते णं नेरइया छक्केण य नोछक्केण य समज्जिया। जे णं नेरइया णेगेहिं छक्कएहिं पवेसणं पविसंति ते णं नेरइया छक्केहिं समज्जिया। जे णं नेरइया णेगेहिं छक्कएहिं; अन्नेण य जहन्नेणं एककेण वा दोहिं वा तीहिं वा, उक्कोसेणं पंचएणं पवेसणएणं पविसंति ते णं नेरइया छक्केहिं य नोछक्केण य समज्जिया। सेतेणट्ठेणं तं चेव जाव समज्जिया वि।

एवं जाव थणियकुमारा।

पुढविकाइयाणं पुच्छा। गोयमा! पुढविकाइया नो छक्कसमज्जिया, नो नोछक्कसमज्जिया, नो छक्केण य नोछक्केण य समज्जिया, छक्केहिं समज्जिया वि, छक्केहिं य नोछक्केण य समज्जिया वि।

से केणट्ठेणं जाव समज्जिता वि? गोयमा! जे णं पुढविकाइया णेगेहिं छक्कएहिं पवेसणं पविसंति ते णं पुढविकाइया छक्केहिं समज्जिया। जे णं पुढविकाइया णेगेहिं छक्कएहिं; अन्नेण य जहन्नेणं एककेण वा दोहिं वा तिहिं वा, उक्कोसेणं पंचएणं पवेसणएणं पविसंति ते णं पुढविकाइया छक्केहिं य नोछक्केण य समज्जिया। सेतेणट्ठेणं जाव समज्जिया वि।

एवं जाव वणस्सइकाइया, बेइंदीय जाव वेमाणिया।

सिद्धा जहा नेरइया।

एएसि णं भंते! नेरतियाणं छक्कसमज्जियाणं, नोछक्कसमज्जिताणं, छक्केण य नोछक्केण य समज्जियाणं, छक्केहिं समज्जियाणं, छक्केहि य नोछक्केण य समज्जियाणं, छक्केहि य नोछक्केण य समज्जियाणं कयरे कयरेहिंतो जाव विसेसाहिया वा? गोयमा! सव्वत्थोवा नेरइया छक्कसमज्जिया, नोछक्कसमज्जिया संखेज्जगुणा, छक्केण य नोछक्केण य समज्जिया संखेज्जगुणा, छक्केहिं समज्जिया असंखेज्जगुणा, छक्केहि य नोछक्केण य समज्जिया संखेज्जगुणा।

एवं जाव थणियकुमारा।

एएसि णं भंते! पुढविकाइयाणं छक्केहिं समज्जिताणं, छक्केहि य नोछक्केण य समज्जियाणं कयरे कयरेहिंतो जाव विसेसाहिया वा? गोयमा! सव्वत्थोवा पुढविकाइया छक्केहिं समज्जिया, छक्केहि य नोछक्केण य समज्जिया संखेज्जगुणा।

एवं जाव वणस्सइकाइयाणं।

बेइंदियाणं जाव वेमाणियाणं जहा नेरइयाणं।

एएसि णं भंते! सिद्धाणं छक्कसमज्जियाणं, नोछक्कसमज्जियाणं जाव छक्केहि य नोछक्केण य समज्जियाणं कयरे कयरेहिंतो जाव विसेसाहिया वा? गोयमा! सव्वत्थोवा सिद्धा छक्केहि य नोछक्केण य समज्जिया, छक्केहिं समज्जिया संखेज्जगुणा, छक्केण य नोछक्केण य समज्जिया संखेज्जगुणा, छक्कसमज्जिया संखेज्जगुणा, नोछक्कसमज्जिया संखेज्जगुणा।

नेरइया णं भंते! किं बारससमज्जिता, नोबारससमज्जिया, बारसएण य नोबारसएण य समज्जिया, बारसएहिं समज्जिया, बारसएहि य नोबारसएण य समज्जिया? गोयमा! नेरइया बारससमज्जिया वि जाव बारसएहि य नोबारसएण य समज्जिया वि।

से केणट्ठेणं जाव समज्जिया वि? गोयमा! जे णं नेरइया बारसएणं पवेसणएणं पविसंति ते णं नेरइया बारससमज्जिया। जे णं नेरइया जहन्नेणं एक्केण वा दोहिं वा तीहिं वा, उक्कोसेणं एक्कारसएणं पवेसणएणं पविसंति ते णं नेरइया नोबारससमज्जिया। जे णं नेरइया बारसएणं; अन्नेण य जहन्नेणं एक्केण वा दोहिं वा तीहिं वा, उक्कोसेणं एक्कारसएणं पवेसणएणं पविसंति ते णं नेरइया बारसएण य नोबारसएण य समज्जिया। जे णं नेरइया णेगेहिं बारसएहिं पवेसणं पविसंति ते णं नेरइया नेरतिया बारसएहिं समज्जिया। जे णं नेरइया णेगेहिं बारसएहिं; अन्नेण य जहन्नेणं एक्केण वा दोहिं वा तीहिं वा, उक्कोसेणं एक्कारसएणं पवेसणएणं पविसंति ते णं नेरइया बारसएहि य नोबारसएण य समज्जिया। सेतेणट्ठेणं जाव समज्जिया वि।

एवं जाव थणियकुमारा।

पुढविकाइयाणं पुच्छा। गोयमा! पुढविकाइया नो बारसयसमज्जिया, नो नोबारसयसमज्जिया, नो बारसएण य नोबारसएण य समज्जिया, बारसएहिं समज्जिया वि, बारसएहि य नोबारसएण य समज्जिया वि।

से केणट्ठेणं जाव समज्जिया वि? गोयमा! जे णं पुढविकाइया णेगेहिं बारसएहिं पवेसणं पविसंति ते णं पुढविकाइया बारसएहिं समज्जिया। जे णं पुढविकाइया णेगेहिं बारसएहिं; अन्नेण य

जहन्नेणं एक्केण वा दोहिं वा तीहिं वा, उक्कोसेणं एक्कारसएणं पवेसणएणं पविसंति ते णं पुढविकाइया बारसएहिं य नोबारसएण य समज्जिया। सेतेणट्ठेणं जाव समज्जिया वि।

एवं जाव वणस्सइकाइया।

बेइंदिया जाव सिद्धा जहा नेरइया।

एएसि णं भंते! नेरइयाणं बारससमज्जियाणं० सव्वेसिं अप्पाबहुगं जहा छक्कसमज्जियाणं, नवरं बारसाभिलावो, सेसं तं चेव।

नेरतिया णं भंते! किं चुलसीतिसमज्जिया, नोचुलसीतिसमज्जिया, चुलसीतीए य नोचुलसीतीते य समज्जिया, चुलसीतीहिं समज्जिया, चुलसीतीहि य नोचुलसीतीए य समज्जिया? गोयमा! नेरतिया चुलसीतिसमज्जिया वि जाव चुलसीतीहि य नोचुलसीतीए य समज्जिया वि।

से केणट्ठेणं भंते! एवं वुच्चइ जाव समज्जिया वि? गोयमा! जे णं नेरइया चुलसीतीएणं पवेसणएणं पविसंति ते णं नेरइया चुलसीतिसमज्जिया। जे णं नेरइया जहन्नेणं एक्केण वा दोहिं वा तीहिं वा, उक्कोसेणं तेसीतिपवेसणएणं पविसंति ते णं नेरइया नोचुलसीतिसमज्जिया। जे णं नेरइया चुलसीतीएणं; अन्नेण य जहन्नेणं एक्केण वा दोहिं वा तीहिं वा, उक्कोसेणं तेसीतीएणं पवेसणएणं पविसंति ते णं नेरतिया चुलसीतीए य नोचुलसीतीए य समज्जिया। जे णं नेरइया णेगेहिं चुलसीतीएहिं पवेसणं पविसंति ते णं नेरतिया चुलसीतीहिं समज्जिया। जे णं नेरइया णेगेहिं चुलसीतीएहिं, अन्नेण य जहन्नेणं एक्केण वा जाव उक्कोसेणं तेसीयएणं जाव पवेसणएणं पविसंति ते णं नेरतिया चुलसीतीहि य नोचुलसीतीए य समज्जिया। सेतेणट्ठेणं जाव समज्जिया वि।

एवं जाव थणियकुमारा।

पुढविकाइया तहेव पच्छिल्लएहिं दोहिं, नवरं अभिलावो चुलसीतिगओ।

एवं जाव वणस्सतिकाइया।

बेइंदिया जाव वेमाणिया जहा नेरइया।

सिद्धाणं पुच्छा। गोयमा! सिद्धा चुलसीतिसमज्जिता वि, नोचुलसीतिसमज्जिया वि, चुलसीतीए य नोचुलसीतीए य समज्जिया वि, नो चुलसीतीहिं समज्जिया, नो चुलसीतीहि य नोचुलसीतीए य समज्जिया।

से केणट्ठेणं जाव समज्जिया? गोयमा! जे णं सिद्धा चुलसीतीएणं पवेसणएणं पविसंति ते णं सिद्धा चुलसीतिसमज्जिता। जे णं सिद्धा जहन्नेणं एक्केण वा दोहिं वा तीहिं वा, उक्कोसेणं तेसीतीएणं पवेसणएणं पविसंति ते णं सिद्धा नोचुलसीतिसमज्जिया। जे णं सिद्धा चुलसीतीएणं; अन्नेण य जहन्नेणं एक्केण वा दोहिं वा तीहिं वा, उक्कोसेणं तेसीतीएणं पवेसणएणं पविसंति ते णं सिद्धा चुलसीतीए य नोचुलसीतीए य समज्जिया। सेतेणट्ठेणं जाव समज्जिता।

एएसि णं भंते! नेरतियाणं चुलसीतिसमज्जियाणं नोचुलसीतिसमज्जियाणं० सव्वेसिं अप्पाबहुगं जहा छक्कसमज्जियाणं जाव वेमाणियाणं, नवरं अभिलावो चुलसीतीओ।

एएसि णं भंते! सिद्धाणं चुलसीतिसमज्जियाणं, नोचुलसीतिसमज्जियाणं, चुलसीतीए य नोचुलसीतीए य समज्जियाणं कयरे कयरेहितो जाव विसेसाहिया वा? गोयमा! सव्वत्थोवा सिद्धा चुलसीतीए य नोचुलसीतीए य समज्जिया, चुलसीतिसमज्जिया अणंतगुणा, नोचुलसीतिसमज्जिया अणंतगुणा।

सेवं भंते! सेवं भंते! त्ति जाव विहरइ।

**\*वीसइमे सए दसमो उद्देशो समतो\***

**०-वीसतिमं सयं समत्तं-०**

**० मुनि दीपरत्तसागरेण संशोधितः सम्पादितश्च वीसतिमं सतं समत्तं ०**

**[ ] एगवीसतिमं सयं [ ]**

**[८०६]** सालि कल अयसि वंसे उक्खू दब्भे य अब्भ तुलसी य।  
अट्ठेते दसवग्गा असीति पुण हौंति उद्देशा ॥

**पढमो वग्गो**

**० पढमो उद्देशो ०**

**[८०७]**रायगिहे जाव एवं वयासि--

अह भंते! साली-वीही-गोधूम-जव-जवजवाणं, एएसि णं जे जीवा मूलत्ताए वक्कमंति ते णं भंते! जीवा कओहिंतो उववज्जंति? किं नेरइएहिंतो उववज्जंति, तिरि० मणु० देव० जहा वक्कंतीए तहेव उववातो, नवरं देवज्जं।

ते णं भंते! जीवा एगसमएणं केवतिया उववज्जंति? गोयमा! जहन्नेणं एक्को वा दो वा तिन्नि वा, उक्कोसेणं संखेज्जा वा असंखेज्जा वा उववज्जंति। अवहारो जहा उप्पलुद्देशे।

एतेसि णं भंते! जीवाणं केमहालिया सरीरोगाहणा पन्नता? गोयमा! जहन्नेणं अंगुलस्स असंखेज्जइभागं, उक्कोसेणं धणुपुहुत्तं।

ते णं भंते! जीवा नाणावरणिज्जस्स कम्मस्स किं बंधगा, अबंधगा? तहेव जहा उप्पलुद्देशे ।

एवं वेदे वि, उदए वि, उदीरणाए वि।

ते णं भंते! जीवा किं कण्हलेस्सा नील० काउ०? छव्वीसं भंगा।

दिट्ठी जाव इंदिया जहा उप्पलुद्देशे।

से णं भंते! साली-वीही-गोधूम-[? जव-]जवजवगमूलगजीवे कालओ केवचिरं होति? गोयमा!  
जहन्नेणं अंतोमुहुत्तं, उक्कोसेणं असंखेज्जं कालं।

से णं भंते! साली-वीही-गोधूम-[? जव-]जवजवगमूलगजीवे पुढविजीवे पुणरवि साली-वीही जाव जवजवगमूलगजीवे केवतियं कालं सेवेज्जा? केवतियं कालं गतिरागतिं करिज्जा? एवं जहा उप्पलुद्देशे।

एएणं अभिलावेणं जाव मणुस्सजीवे।

आहारो जहा उप्पलुद्देशे।

ठिती जहन्नेणं अंतोमुहुत्तं, उक्कोसेणं वासपुहुत्तं।

समुग्घायसमोहया य उव्वट्णा य जहा उप्पलुद्देशे।

अह भंते! सव्वपाणा जाव सव्वसत्ता साली वीही जाव जवजवगमूलगजीवत्ताए उववन्नपुव्वा? हंता, गोयमा! असतिं अदुवा अणंतखुत्तो।

सेवं भंते! सेवं भंते! त्ति०।

**\*एगवीसइमे सए पढमे वग्गे पढमो उद्देशो समतो\***

## ० बीओ उद्देशो ०

[८०८] अह भंते! साली वीही जाव जवजवाणं, एएसि णं जे जीवा कंदताए वक्कमंति ते णं भंते! जीवा कओहिंतो उववज्जंति? एवं कंदाहिगारेण सो चेव मूलुद्देशो अपरिसेसो भाणियव्वो जाव असतिं अदुवा अणंतखुत्तो।

सेवं भंते! सेवं भंते! ति०।

**\*एगवीसइमे सए पढमे वग्गे बीइओ उद्देशो समत्तो\***

## ० तइओ उद्देशो ०

[८०९] एवं खंधे वि उद्देशओ नेतव्वो।

**\*एगवीसइमे सए पढमे वग्गे तइओ उद्देशो समत्तो\***

## ० चउत्थो उद्देशो ०

[८१०] एवं तयाए वि उद्देशो।

**\*एगवीसइमे सए पढमे वग्गे चउत्थो उद्देशो समत्तो\***

## ० पंचमो उद्देशो ०

[८११] साले वि उद्देशो भाणियव्वो।

**\*एगवीसइमे सए पढमे वग्गे पंचमो उद्देशो समत्तो\***

## ० छट्ठो उद्देशो ०

[८१२] पवाले वि उद्देशो भाणियव्वो।

**\*एगवीसइमे सए पढमे वग्गे छट्ठो उद्देशो समत्तो\***

## ० सत्तमो उद्देशो ०

[८१३] पत्ते वि उद्देशो भाणियव्वो।

एए सत्त वि उद्देशगा अपरिसेसं जहा मूले तहा नेयव्वा।

**\*एगवीसइमे सए पढमे वग्गे सत्तमो उद्देशो समत्तो\***

## ० उद्देशो—८,९,१०-- ०

[८१४] एवं पुप्फे वि उद्देशओ, नवरं देवो उववज्जति जहा उप्पलुद्देशे। चत्तारि लेस्साओ, असीति भंगा। ओगाहणा जहन्नेणं अंगुलस्स असंखेज्जतिभागं उक्कोसेणं अंगुलपुहंतं। सेसं तं चेव।

सेवं भंते! सेवं भंते!०।

जहा पुप्फे एवं फले वि उद्देशओ अपरिसेसो भाणियव्वो।

एवं बीए वि उद्देशओ। एए दस उद्देशगा।

**\*एगवीसइमे सते पढमे वग्गे ८-९-१०- उद्देशा समत्ता\***

**॥ एगवीसइमे सते पढमो वग्गो समत्तो ॥**

## बीओ वग्गो

[८१५] अह भंते ! कल- मसूर-तिल- मुग्ग-मास- निप्फाव-कुलत्थ- आलिसंदग-सडिण, एएसि णं जे जीवा मूलताए वक्कमंति ते णं भंते! जीवा कओहिंतो उववज्जंति? एवं मूलाईया दस उद्देशगा

भाणियच्चा जहेव सालीणं निरवसेसं तहेव।

॥ एगवीसइमे सते बीइओ वग्गो समतो ॥

### तइओ वग्गो

[८१६] अह भंते! अयसि-कुसुंभ-कोद्व-कंगु-रालव-वरा-कोदूसा-सण-सरिसव-मूलगबीयाणं, एएसि णं जे जीवा मूलत्ताए वक्कमंति ते णं भंते! जीवा कओहितो उववज्जंति? एवं एत्थ वि मूलाईया दस उद्देसगा जहेव सालीणं निरवसेसं तहेव भाणियच्चं।

॥ एगवीसइमे सते तइओ वग्गो समतो ॥

### चउत्थो वग्गो

[८१७] अह भंते! वंस-वेणु-कणग-कावंस-चारुवंस-उडाकुडा-विमा-कंडा-वेणुया-कल्लाणीणं, एएसि णं जे जीवा मूलत्ताए वक्कमंति? एवं एत्थ वि मूलाईया दस उद्देसगा जहेव सालीणं, नवरं देवो सच्चत्थ वि न उववज्जति। तिन्नि लेसाओ। सच्चत्थ वि छव्वीसं भंगा। सेसं तं चेव।

॥ एगवीसइमे सते चउत्थो वग्गो समतो ॥

### पंचमो वग्गो

[८१८] अह भंते! उक्खु-दक्खुवाडिया-वीरण-इक्कड-भमास-सुंठि-सर-वेत्त-तिमिर-सतबोरग-नलाणं, एएसि णं जे जीवा मूलत्ताए वक्कमंति? एवं जहेव वंसवग्गो तहेव एत्थ वि मूलाईया दस उद्देसगा नवरं खंधुद्देसे देवो उववज्जति। चत्तारि लेसाओ। सेसं तं चेव।

॥ एगवीसइमे सते पंचमो वग्गो समतो ॥

### छट्ठो वग्गो

[८१९] अह भंते! सेडिय-भंतिय-कौंतिय-दब्भ-कुस-पव्वग-पोदइल-अज्जुण-आसाढग-रोहियंस- मुत्तव-खीर-भुस-एरंड-कुरु-कुंद-करकर-सुंठ-विभंगु-महुरयण-थुरग-सिप्पिय-सुकलितणाणं, एएसि णं जे जीवामूलत्ताए वक्कमंति? एवं एत्थ वि दस उद्देसगा निरवसेसं जहेव वंसवग्गो।

॥ एगवीसइमे सते छट्ठो वग्गो समतो ॥

### सत्तमो वग्गो

[८२०] अह भंते! अब्भरुह-वायाण-हरितग-तंदुलेज्जग-तण-वत्थुल-बोरग-मज्जार-पाइ-विल्लि-पालक्क-दगपिप्पलिय-दव्वि-सोत्थि-कसाय-मंडुक्कि-मूलग-सरिसव-अंबिल-साग-जियंतगाणं, एएसि णं जे जीवा मूल? एवं एत्थ वि दस उद्देसगा जहेव वंसवग्गो।

॥ एगवीसइमे सते सत्तमो वग्गो समतो ॥

### अट्ठमो वग्गो

[८२१] अह भंते! तुलसी-कण्हदराल-फणेज्जा-अज्जा-भूयणा-चोरा-जीरा-दमणा-मरुया-इंदीवर-सयपुप्फाणं, एतेसि णं जे जीवा मूलत्ताए वक्कमंति? एत्थ वि दस उद्देसगा निरवसेसं जहा वंसाणं।

॥ एगवीसइमे सते अट्ठमो वग्गो समतो ॥

एवं एएसु अट्ठसु वग्गेषु असीतिं उद्देसगा भवन्ति।

०-एगवीसतिमं सयं समतं-०

० मुनि दीपरत्तसागरेण संशोधितः सम्पादितश्च एगवीसतिमं सतं समतं ०

[ ] बावीसइमं सयं [ ]

[८२२] तालेगट्ठिय बहुबीयगा य गुच्छा य गुम्म वल्ली य।  
छ दसवग्गा ए सट्ठिं पुण होंति उद्देसा ॥

पढमो वग्गो

[८२३] रायगिहे जाव एवं वयासि-

अह भंते! ताल-तमाल-तक्कलि-तेतलि-साल-सरलासारगल्लाणं जाव केयति-कयलि-कंदलि-  
चम्मरुक्ख-गुंतरुक्ख-हिंगुरुक्ख-लवंगरुक्ख-पूयफलि-खज्जूरि-नालिएरीणं, एएसि णं जे जीवा मूलत्ताए  
वक्कमंति ते णं भंते! जीवा कओहिंते उववज्जंति?० एवं एत्थ वि मूलाईया दस उद्देसगा कायच्चा जहेव  
सालीणं, नवरं इमं नाणत्तं--मूले कंदे खंधे तयाए साले य, एएसु पंचसु उद्देसगेषु देवो न उववज्जति; तिण्णि  
लेसाओ; ठिती जहन्नेणं अंतोमुहुत्तं, उक्कोसेणं दसवाससहस्साइं; उवरिल्लेसु पंचसु उद्देसएसु देवो उववज्जति;  
चत्तारि लेसाओ; ठिती जहन्नेणं अंतोमुहुत्तं, उक्कोसेणं वासपुहत्तं; ओगाहणा मूले कंदे धणुपुहत्तं, खंधे तयाए  
साले य गाउयपुहत्तं, पवाले पते य धणुपुहत्तं, पुप्फे हत्थपुहत्तं, फले बीए य अंगुलपुहत्तं; सव्वेसिं जहन्नेणं  
अंगुलस्स असंखेज्जइभाणं। सेसं जहा सालीणं। एवं एए दस उद्देसगा।

॥ बावीसइमे सते पढमो वग्गो समतो ॥

बितिओ वग्गो

[८२४] अह भंते! निंबंब-जंबु-कोसंब-ताल-अंकोल्ल-पीलु-सेलु-सल्लइ-मोयइ-मालुय-बउल-  
पलास-करंज-पुत्तजीवग-सरिट्ठ-विहेलग-हरियग-भल्लाय-उंबरिय-खीरणि-धायइ-पियाल-पूइय-णिवाग-सेण्हण-  
पासिय-सीसव-अयसि-पुन्नाग-नागरुक्ख-सीवण्णि-असोगाणं, एएसि णं जे जीवा मूलत्ताए वक्कमंति? एवं  
मूलाईया दस उद्देसगा कायच्चा निरवसेसं जहा तालवग्गे।

॥ बावीसइमे सते बीइओ वग्गो समतो ॥

तइओ वग्गो

[८२५] अह भंते अत्थिय-तेंदुय-बोर-कविट्ठ-अंबाडग-माउलुंग-बिल्ल-आमलग-फणस दाडिम  
आसोट्ठ-उंबर-वड-णग्गोह-नंदिरुक्ख-पिप्पलि-सतर-पिलक्खु- रुक्ख-काउंबरिय-कुत्थुंभरिय-देवदालि-तिलग-  
लउय-छत्तोह-सिरीस-सत्तिवण्ण-दधि-वण्ण-लोद्ध-धव-चंदण-अज्जुण-णीव-कुडग-कलंबाणं, एएसि णं जे जीवा  
मूलत्ताए वक्कमंति ते णं भंते!०? एवं एत्थ वि मूलाईया दस उद्देसगा तालवग्गसरिसा नेयच्चा जाव बीयं।

॥ बावीसइमे सते तइओ वग्गो समतो ॥

### चउत्थो वग्गो

[८२६]अह भंते! वाइंगणि-अल्लइ-बौडइ० एवं जहा पण्णवणाए गाहाणुसारेणं णेयत्वं जाव गंजपाडला-दासि-अंकोल्लाणं एएसि णं जे जीवा मूलत्ताए वक्कमंति०? एवं एत्थ वि मूलादीया दस उद्देसगा जाव बीयं ति निरवसेसं जहा वंसवग्गो।

॥ बावीसइमे सते चउत्थो वग्गो समतो ॥

### पंचमो वग्गो

[८२७]अह भंते! सिरियक-णवमालिय-कोरंग-बंधुजीवग-मणोज्जा, जहा पण्णवणाए पढमपए, गाहाणुसारेणं जाव नवणीय-कुंद-महाजातीणं, एएसि णं जे जीवा मूलत्ताए वक्कमंति०? एवं एत्थ वि मूलाईया दस उद्देसगा निरवसेसं जहा सालीणं।

॥ बावीसइमे सते पंचमो वग्गो समतो ॥

### छट्ठो वग्गो

[८२८]अह भंते! पूसफलि-कालिंगी-तुंबी-तउसी-एला-वालुंकी एवं पदाणि छिंदियच्वाणि पण्णवणागाहाणुसारेणं जहा तालवग्गे जाव दधिफोल्लइ-काकलिमोक्कलि-अक्कबौदीणं, एएसि णं जे जीवा मूलत्ताए वक्कमंति०? एवं मूलाईया दस उद्देसगा कायच्वा जहा तालवग्गे। नवरं फलउद्देसओ, ओगाहणाए जहन्नेणं अंगुलस्स असंखेज्जतिभागं, उक्कोसेणं धणुपुहत्तं; ठिती सच्चत्थ जहन्नेणं अंतोमुहत्तं उक्कोसेणं वासपुहत्तं। सेसं तं चेव।

॥ बावीसइमे सते छट्ठो वग्गो समतो ॥

{ } एवं छसु वि वग्गेसु सट्ठिं उद्देसगा भवंति। { }

०-बावीसतिमं सयं समतं-०

० मुनि दीपरत्तसागरेण संशोधितः सम्पादितश्च बावीसतिमं सतं समतं ०

[ ] तेवीसइमं सयं [ ]

[नमो सुयदेवयाए भगवतीए।]

० पढमो वग्गो ०

[८२९] आलुय लोही अवए पाढा तह मासवण्णि वल्ली य।  
पंचेते दसवग्गा पण्णासं होंति उद्देसा ॥

[८३०] रायगिहे जाव एवं वयासि--

अह भंते! आलुय-मूलग-सिंगबेर-हलिद्ध-रुरु-कंडरिय-जारु-छीरबिरालि-किट्ठि-कुंथु-कण्हकडभु-मधुपुयलइ-महुसिंगि-णेरुहा-सप्पसुगंधा-छिन्नुहा-बीयरुहाणं, एएसि णं जे जीवा मूलत्ताए वक्कमंति०? एवं मूलाईया दस उद्देसगा कायच्वा वंसवग्ग सरिसा, नवरं परिमाणं जहन्नेणं एक्को वा दो वा तिन्नि वा, उक्कोसेणं संखेज्जा वा असंखेज्जा वा, अणंता वा उववज्जंति; अवहारोगोयमा! ते णं अणंता समये समये

अवहीरमाणा अवहीरमाणा अणंताहिं ओसप्पिणि-उस्सप्पिणीहिं एवतिकालेणं अवहीरंति, नो चेव णं अवहिया सिया; ठिती जहन्नेण वि उक्कोसेण वि अंतोमुहुत्तं। सेसं तं चेव।

॥ २३-१.१-१० ॥

॥ तेवीसइमे सते पढमो वग्गो समत्तो ॥

◦ बिइओ वग्गो ◦

[८३१] अह भंते! लोही-णीहू-थीहू-थीभगा-अस्सकण्णी-सीहकण्णी-सीउंठी-मुसुंठीणं, एएसि णं जे जीवा मूल०? एवं एत्थ वि दस उद्देशगा जहेव आलुवग्गे, णवरं ओगाहणा तालवग्गसरिसा, सेसं तं चेव।  
सेवं भंते! सेवं भंते! ति०।

॥ २३-२.१-१० ॥

॥ तेवीसइमे सते बितियो वग्गो समत्तो ॥

◦ तइओ वग्गो ◦

[८३२] अह भंते! आय-काय-कुहुण-कुंदुक्क-उव्वेहलिय-सफा-सज्झा-छत्ता-वंसाणिय-कुराणं, एएसि णं जे जीवा मूलताए०? एवं एत्थ वि मूलाईया दस उद्देशगा निरवसेसं जहा आलुवग्गे।  
सेवं भंते! सेवं भंते! ति०।

॥ २३-३.१-१० ॥

॥ तेवीसइमे सते ततिओ वग्गो समत्तो ॥

◦ चउत्थो वग्गो ◦

[८३३] अह भंते! पाढा-मियवालुंकि-मधुरस-रायवल्लि-पउम-मोढरि-दंति चंडीणं, एएसि णं जे जीवा मूल०? एवं एत्थ वि मूलाईया दस उद्देशगा आलुवग्गसरिसा, नवरं ओगाहणा जहा वल्लीणं, सेसं तं चेव। सेवं भंते! सेवं भंते! ति०।

॥ २३-४.१-१० ॥

॥ तेवीसइमे सते चउत्थो वग्गो समत्तो ॥

◦ पंचमो वग्गो ◦

[८३४] अह भंते! मासपण्णी-मुग्गपण्णी-जीवग-सरिसव-करेणुया-काओलि-खीरकाओलि-भंगि-णहि-किमिरासि-भद्दमुत्थ-णंगलइ-पयुयकिण्णा-पयोयलया-ढेहरेणुया-लोहीणं, एएसि णं जे जीवा मूल०? एवं एत्थ वि दस उद्देशगा निरवसेसं आलुवग्गसरिसा।

॥ २३-५.१-१० ॥

॥ तेवीसइमे सते पंचमो वग्गो समत्तो ॥

एवं एएसु पंचसु वि वग्गेषु पण्णासं उद्देशगा भाणियच्च ति। सच्चत्थ देवा ण उववज्जंति। तिन्नि लेसाओ। सेवं भंते! सेवं भंते! ति०।

◦-तेवीसतिमं सयं समत्तं-◦

◦ मुनि दीपरत्तसागरेण संशोधितः सम्पादितश्च तेवीसतिमं सतं समत्तं ◦

## [ ] चउवीसतिमं सयं [ ]

- [८३५] उववाय परीमाणं संघयणुच्चतमेव संठाणं।  
लेस्सा दिट्ठी णाणे अण्णाणे जोग उवओगे।।
- [८३६] सण्णा कसाय इंदिय समुग्घाए वेदणा य वेदे य।  
आठं अज्झवसाणा अणुबंधो कायसंवेहो ।।
- [८३७] जीवपए जीवपए जीवाणं दंडगम्मि उद्देशो।  
चउवीसतिमम्मि सए चउवीसं होंति उद्देशा ।।

### ० पढमो उद्देशो ०

[८३८] रायगिहे जाव एवं वदासि-

नेरइया णं भंते! कओहिंतो उववज्जंति? किं नेरइएहिंतो उववज्जंति, तिरिक्खजोणिएहिंतो उववज्जंति, मणुस्सेहिंतो उववज्जंति, देवेहिंतो उववज्जंति? गोयमा! नो नेरइएहिंतो उववज्जंति, तिरिक्खजोणिएहिंतो वि उववज्जंति, मणुस्सेहिंतो वि उववज्जंति, नो देवेहिंतो उववज्जंति।

जति तिरिक्खजोणिएहिंतो उववज्जंति किं एगिंदियतिरिक्खजोणिएहिंतो उववज्जंति, बेइंदियतिरिक्ख०, तेइंदियतिरिक्ख०, चउरिंदियतिरिक्ख०, पंचेंदियतिरिक्खजोणिएहिंतो उववज्जंति? गोयमा! नो एगिंदियतिरिक्खजोणिएहिंतो उववज्जंति, नो बेइंदिय०, नो तेइंदिय०, नो चउरिंदिय०, पंचेंदियतिरिक्खजोणिएहिंतो उववज्जंति।

जति पंचेंदिय-तिरिक्खजोणिएहिंतो उववज्जंति किं सन्निपंचेंदिय-तिरिक्खजोणिएहिंतो उववज्जंति, असन्निपंचेंदियतिरिक्खजोणिएहिंतो उववज्जंति? गोयमा! सन्निपंचेंदियतिरिक्खजोणिएहिंतो वि उववज्जंति, असन्निपंचेंदियतिरिक्खजोणिएहिंतो वि उववज्जंति।

जति सन्निपंचेंदियतिरिक्खजोणिएहिंतो उववज्जंति किं जलचरेहिंतो उववज्जंति, थलचरेहिंतो उववज्जंति, खहचरेहिंतो उववज्जंति? गोयमा! जलचरेहिंतो वि उववज्जंति, थलचरेहिंतो वि उववज्जंति, खहचरेहिंतो वि उववज्जंति।

जति जलचर-थलचर-खहचरेहिंतो उववज्जंति किं पज्जत्तएहिंतो उववज्जंति, अपज्जत्तएहिंतो उववज्जंति? गोयमा! पज्जत्तएहिंतो उववज्जंति, नो अपज्जत्तएहिंतो उववज्जंति।

पज्जत्ताअसन्निपंचेंदियतिरिक्खजोणिए णं भंते! जे भविए नेरइएसु उववज्जित्तए से णं भंते! कतिसु पुढवीसु उववज्जेज्जा? गोयमा! एगाए रयणप्पभाए पुढवीए उववज्जेज्जा।

पज्जत्ता असन्नि पंचेंदिय-तिरिक्खजोणिए णं भंते ! जे भविए रयणप्पभापुढविनेरइएसु उववज्जित्तए से णं भंते! केवतिकालटिठतीएसु उववज्जेज्जा ? गोयमा ! जहन्नेणं दसवाससहस्सटिठतीएसु, उक्कोसेणं पलिओवमस्स असंखेज्जतिभागटिठतीएसु उववज्जेज्जा।

ते णं भंते! जीवा एगसमएणं केवतिया उववज्जंति? गोयमा! जहन्नेणं एक्को वा दो वा तिन्नि वा, उक्कोसेणं संखेज्जा वा, असंखेज्जा वा उववज्जंति।

तेसि णं भंते! जीवाणं सरीरगा किंसंघयणा पन्नता? गोयमा! सेवट्ठसंघयणा पन्नता।

तेसि णं भंते! जीवाणं केमहालिया सरीरोगाहणा पन्नता? गोयमा! जहन्नेणं अंगुलस्स

असंखेज्जतिभागं, उक्कोसेणं जोयणसहस्सं।

तेसि णं भंते! जीवाणं सरीरगा किंसंठिया पन्नता? गोयमा! हुंडसंठाणसंठिया पन्नता।

तेसि णं भंते! जीवाणं कति लेस्साओ पन्नताओ? गोयमा! तिन्नि लेस्साओ पन्नताओ, तं जहा--कणहलेस्सा नीललेस्सा काउलेस्सा।

ते णं भंते! जीवा किं सम्मद्धिट्ठी, मिच्छादिट्ठी, सम्मामिच्छादिट्ठी? गोयमा! नो सम्मद्धिट्ठी, मिच्छादिट्ठी, नो सम्मामिच्छादिट्ठी।

ते णं भंते! जीवा किं नाणी, अन्नाणी? गोयमा! नो नाणी, अन्नाणी, नियमं दुअन्नाणी, तं जहा--मतिअन्नाणी य सुयअन्नाणी य।

ते णं भंते! जीवा किं मणजोगी, वइजोगी, कायजोगी? गोयमा! नो मणजोगी, वइजोगी वि, कायजोगी वि।

ते णं भंते! जीवा किं सागारोवउत्ता, अणागारोवउत्ता? गोयमा! सागारोवउत्ता वि, अणागारोवउत्ता वि।

तेसि णं भंते! जीवाणं कति सन्नाओ पन्नताओ? गोयमा! चत्तारि सन्नाओ पन्नताओ, तं जहा--आहारसण्णा भयसण्णा मेहुणसण्णा परिग्गहसण्णा।

तेसि णं भंते! जीवाणं कति कसाया पन्नता? गोयमा! चत्तारि कसाया पन्नता, तं जहा--कोहकसाये माणकसाये मायाकसाये लोभकसाये।

तेसि णं भंते! जीवाणं कति इंदिया पन्नता? गोयमा! पंच इंदिया पन्नता, तं जहा--सोत्तिंदिए चक्खिंदिए जाव फासिंदिए।

तेसि णं भंते! जीवाणं कति समुग्घाया पन्नता? गोयमा! तओ समुग्घाया पन्नता, तं जहा--वेयणासमुग्घाए कसायसमुग्घाए मारणंतियसमुग्घाए।

ते णं भंते! जीवा किं सायावेदगा, असायावेदगा? गोयमा! सायावेदगा वि, असायावेदगा वि।

ते णं भंते! जीवा किं इत्थिवेदगा, पुरिसवेदगा, नपुंसगवेदगा? गोयमा! नो इत्थिवेदगा, नो पुरिसवेदगा, नपुंसगवेदगा।

तेसि णं भंते! जीवाणं केवतियं कालं ठिती पन्नता? गोयमा! जहन्नेणं अंतोमुहुत्तं, उक्कोसेणं पुव्वकोडी।

तेसि णं भंते! जीवाणं केवतिया अज्झवसाणा पन्नता? गोयमा! असंखेज्जा अज्झवसाणा पन्नता।

ते णं भंते! किं पसत्था, अप्पसत्था? गोयमा! पसत्था वि, अप्पसत्था वि।

से णं भंते ! 'पज्जताअसन्निपंचेदियतिरिक्खजोणिये' इति कालओ केवचिरं होइ ? गोयमा !

जहन्नेणं अंतोमुहुत्तं, उक्कोसेणं पुव्वकोडी।

से णं भंते! 'पज्जताअसन्निपंचेदियतिरिक्खजोणिये' रयणप्पभापुढविनेरइए पुणरवि पज्जताअसन्निपंचेदियतिरिक्खजोणिये'ति केवतियं कालं सेवेज्जा?, केवतियं कालं गतिरागतिं करेज्जा? गोयमा! भवादेसेणं दो भवग्गहणाइं; कालाएसेणं जहन्नेणं दस वाससहस्साइं अंतोमुहुत्तमब्भहियाइं, उक्कोसेणं पलिओवमस्स असंखेज्जतिभागं पुव्वकोडिअब्भहियं; एवतियं कालं सेवेज्जा, एवतियं कालं

गतिरागतिं करेज्जा।

पज्जताअसन्निपंचेदियतिरिक्खजोगिए णं भंते! जे भविए जहन्नकालटिठीएसु रयणप्पभा-पुढविनेरइएसु उववज्जित्तए से णं भंते! केवतिकालटिठीएसु उववज्जेज्जा? गोयमा! जहन्नेणं दसवास-सहस्सटिठीएसु, उक्कोसेण वि दसवाससहस्सटिठीयेसु उववज्जेज्जा।

ते णं भंते! जीवा एगसमएणं केवतिया उववज्जंति? एवं स च्चेव वत्तव्वता निरवसेसा भाणियव्वा जाव अणुबंधो त्ति।

से णं भंते! पज्जताअसन्निपंचेदियतिरिक्खजोगिए जहन्नकालटिठीयरयणप्पभापुढविनेरइए जहन्नकाल० पुणरवि पज्जताअसण्णि जाव गतिरागतिं करेज्जा? गोयमा! भवादेसेणं दो भवग्गहणाइं; कालाएसेणं जहन्नेणं दसवाससहस्साइं अंतोमुहुत्तमब्भहियाइं, उक्कोसेणं पुव्वकोडी दसहिं वाससहस्सेहिं अब्भहिया, एवतियं कालं सेवेज्जा, एवतियं कालं गतिरागतिं करेज्जा। पज्जताअसन्नि पंचेदिय तिरीक्खजोगिए णं भंते! जे भविए उक्कोसकालटिठीयेसु रतणप्पभापुढविनेरइएसु उववज्जित्तए से णं भंते! केवतिकालटिठीएसु उववज्जेज्जा? गोयमा! जहन्नेणं पलिओवमस्स असंखेज्जतिभागटिठीएसु उववज्जेज्जा, उक्कोसेण वि पलिओवमस्स असंखेज्जतिभाग- टिठीएसु उववज्जेज्जा।

ते णं भंते! जीवा०? अवसेसं तं च्चेव जाव अणुबंधो।

से णं! भंते पज्जताअसन्निपंचेदियतिरिक्खजोगिए उक्कोसकालटिठीय-रयणप्पभा-पुढवि-नेरइए उक्कोस० पुणरवि पज्जता जाव करेज्जा? गोयमा! भवाएसेणं दो भवग्गहणाइं; कालादेसेणं जहन्नेणं पलिओवमस्स असंखेज्जतिभागं अंतोमुहुत्तमब्भहियं, उक्कोसेणं पलिओवमस्स असंखेज्जतिभागं पुव्वकोडि-अब्भहियं; एवतियं कालं सेवेज्जा, एवइयं कालं गतिरागतिं करेज्जा।

जहन्नकालटिठीयपज्जताअसन्निपंचेदियतिरिक्खजोगिए णं भंते! जे भविए रयणप्पभा पुढविनेरइएसु उववज्जित्तए से णं भंते! केवतिकालटिठीएसु उववज्जेज्जा? गोयमा! जहन्नेणं दसवास सहस्सटिठीएसु, उक्कोसेणं पलिओवमस्स असंखेज्जतिभागटिठीएसु उववज्जेज्जा।

ते णं भंते! जीवा एगसमएणं केव०? अवसेसं तं च्चेव, णवरं इमाइं तिन्नि णाणत्ताइं-आउं अज्झवसाणा अणुबंधो य। ठिती जहन्नेणं अंतोमुहुत्तं, उक्कोसेण वि अंतोमुहुत्तं।

तेसि णं भंते! जीवाणं केवतिया अज्झवसाणा पन्नता? गोयमा! असंखेज्जा अज्झवसाणा पन्नता।

ते णं भंते! किं पसत्था, अप्पसत्था? गोयमा! नो पसत्था, अप्पसत्था।

अणुबंधो अंतोमुहुत्तं। सेसं तं च्चेव।

से णं भंते ! जहन्नकालटिठीयपज्जताअसन्निपंचेदियरयणप्पभा जाव करेज्जा ?

गोयमा !भवाएसेणं दो भवग्गहणाइं; कालादेसेणं जहन्नेणं दसवाससहस्साइं अंतोमुहुत्त अब्भहियाइं, उक्कोसेणं पलिओवमस्स असंखेज्जतिभागं अंतोमुहुत्तमब्भहियं, एवतियं कालं सेवेज्जा जाव करेज्जा।

जहन्नकालटिठीयपज्जताअसन्निपंचेदियतिरिक्खजोगिए णं भंते! जे भविए जहन्नकाल-टिठीएसु रयणप्पभापुढविनेरइएसु उववज्जित्तए से णं भंते! केवतिकालटिठीएसु उववज्जेज्जा? गोयमा! जहन्नेणं दसवाससहस्सटिठीएसु उववज्जेज्जा, उक्कोसेण वि दसवाससहस्सटिठीएसु उववज्जेज्जा।

ते णं भंते! जीवा०। सेसं तं चेव। ताइं चेव तिन्नि णाणत्ताइं जाव-

से णं भंते! जहन्नकालट्ठितीयपज्जता जाव जोणिए जहन्नकालट्ठितीयरयणप्पभापुढवि० पुणरवि जाव भवाएसेणं दो भवग्गहणाइं; कालाएसेणं जहन्नेणं दसवाससहस्साइं अंतोमुहुत्तमब्भहियाइं, उक्कोसेण वि दसवाससहस्साइं अंतोमुहुत्तमब्भहियाइं; एवइयं कालं सेवेज्जा जाव करेज्जा।

जहन्नकालट्ठितीयपज्जता जाव तिरिक्खजोणिए णं भंते! जे भविए उक्कोसकालट्ठितीएसु रयणप्पभापुढविनेरइएसु उववज्जित्तए से णं भंते! केवतिकालट्ठितीएसु उववज्जेज्जा? गोयमा! जहन्नेणं पलिओवमस्स असंखेज्जतिभागट्ठितीएसु उववज्जेज्जा, उक्कोसेण वि पलिओवमस्स असंखेज्जतिभाग-ट्ठितीएसु उववज्जेज्जा।

ते णं भंते! जीवा०? अवसेसं तं चेव। ताइं चेव तिन्नि नाणत्ताइं जाव-

से णं भंते! जहन्नकालट्ठितीयपज्जता जाव तिरिक्खजोणिए उक्कोसकालट्ठितीयरयण जाव करेज्जा? गोयमा! भवाएसेणं दो भवग्गहणाइं; कालाएसेणं जहन्नेणं पलिओवमस्स असंखेज्जतिभागं अंतोमुहुत्तमब्भहियं, उक्कोसेण वि पलिओवमस्स असंखेज्जतिभागं अंतोमुहुत्तमब्भहियं; एवतियं कालं जाव करेज्जा।

उक्कोसकालट्ठितीयपज्जताअसन्निपंचेदियतिरिक्खजोणिए णं भंते! जे भविए रयणप्पभा-पुढविनेरइएसु उववज्जित्तए से णं भंते! केवतिकाल जाव उववज्जेज्जा? गोयमा! जहन्नेणं दसवाससहस्स-ट्ठितीएसु, उक्कोसेणं पलिओवमस्स असंखेज्जतिभाग जाव उववज्जेज्जा।

ते णं भंते! जीवा एगसमएणं०? अवसेसं जहेव ओहियगमए तहेव अणुगंतत्वं, नवरं इमाइं दोन्नि नाणत्ताइं-ठिती जहन्नेणं पुव्वकोडी, उक्कोसेण वि पुव्वकोडी। एवं अणुबंधो वि। अवसेसं तं चेव।

से णं भंते! उक्कोसकालट्ठितीयपज्जताअसन्नि जाव तिरिक्खजोणिए रतणप्पभा० भवाएसेणं दो भवग्गहणाइं; कालाएसेणं जहन्नेणं पुव्वकोडी दसहिं वाससहस्सेहिं अब्भहिया, उक्कोसेणं पलिओवमस्स असंखेज्जइभागं पुव्वकोडीए अब्भहियं; एवतियं जाव करेज्जा।

उक्कोसकालट्ठितीयपज्जतातिरिक्खजोणिए णं भंते! जे भविए जहन्नकालट्ठितीएसु रयण जाव उववज्जित्तए से णं भंते! केवति० जाव उववज्जेज्जा? गोयमा! जहन्नेणं दसवाससहस्सट्ठितीएसु, उक्कोसेण वि दसवाससहस्सट्ठितीएसु उववज्जेज्जा।

ते णं भंते!०? सेसं तं चेव जहा सत्तमगमे जाव-

से णं भंते! उक्कोसकालट्ठिती० जाव तिरिक्खजोणिए जहन्नकालट्ठितीयरयणप्पभा० जाव करेज्जा? गोयमा! भवाएसेणं दो भवग्गहणाइं; कालाएसेणं जहन्नेणं पुव्वकोडी दसहिं वाससहस्सेहिं अब्भहिया, उक्कोसेण वि पुव्वकोडी दसहिं वाससहस्सेहिं अब्भहिया; एवतियं जाव करेज्जा।

उक्कोसकालट्ठितीयपज्जता० जाव तिरिक्खजोणिए णं भंते ! जे भविए उक्कोसकाल-ट्ठितीएसु रयण० जाव उववज्जित्तए से णं भंते! केवतिकाल० जाव उववज्जेज्जा? गोयमा! जहन्नेणं पलिओवमस्स असंखेज्जतिभागट्ठितीएसु, उक्कोसेण वि पलिओवमस्स असंखेज्जतिभागट्ठितीएसु उववज्जेज्जा।

ते णं भंते! जीवा एगसमएणं०? सेसं जहा सत्तमगमए जाव--

से णं भंते! उक्कोसकालट्ठितीयपज्जता० जाव तिरिक्खजोणिए उक्कोसकालट्ठितीय-

रयणप्पभ० जाव करेज्जा ? गोयमा ! भवाएसेणं दो भवग्गहणाइं; कालाएसेणं जहन्नेणं पलिओवमस्स असंखेज्जतिभागं पुव्वकोडीए अब्भहियं, उक्कोसेण वि पलिओवमस्स असंखेज्जतिभागं पुव्वकोडिमब्भहियं; एवतियं कालं सेवेज्जा जाव करेज्जा।

एवं एए ओहिया तिण्णि गमगा, जहन्नकालट्ठितीएसु तिन्नि गमगा, उक्कोसकालट्ठितीएसु तिन्नि गमगा; सव्वेते नव गमा भवन्ति।

[८३९]जदि सन्निपंचेदियतिरिक्खजोणिएहिंतो उववज्जंति किं संखेज्जवासाउयसन्निपंचेदियतिरिक्खजोणिएहिंतो उववज्जंति, असंखेज्जवासाउयसन्निपंचेदियतिरिक्ख० जाव उववज्जंति? गोयमा! संखेज्जवासाउयसण्णिपंचेदिय० जाव उववज्जंति, नो असंखेज्जवासाउय० जाव उववज्जंति।

जदि संखेज्जवासाउयसन्निपंचेदिय जाव उववज्जंति किं जलचरेहिंतो उववज्जंति?० पुच्छा। गोयमा ! जलचरेहिंतो उववज्जंति जहा असन्नी जाव पज्जतएहिंतो उववज्जंति, नो अपज्जतएहिंतो उववज्जंति ।

पज्जतासंखेज्जवासाउयसन्निपंचेदियतिरिक्खजोणिए णं भंते! जे भविए नेरइएसु उववज्जितए से णं भंते! कतिसु पुढवीसु उववज्जेज्जा? गोयमा! सत्तसु पुढवीसु उववज्जेज्जा, तं जहा--रयणप्पभाए जाव अहेसत्तमाए।

पज्जतासंखेज्जवासाउयसन्निपंचेदियतिरिक्खजोणिए णं भंते! जे भविए रयणप्पभपुढवि नेरइएसु उववज्जितए से णं भंते! केवतिकालट्ठितीएसु उववज्जेज्जा? गोयमा! जहन्नेणं दसवाससहस्स-ट्ठितीएसु, उक्कोसेणं सागरोवमट्ठितीएसु उववज्जेज्जा।

ते णं भंते! जीवा एगसमएणं केवतिया उववज्जंति? जहेव असन्नी।

तेसि णं भंते! जीवाणं सरीरगा किंसंघयणी पन्नता? गोयमा! छव्विहसंघयणी पन्नता, तं जहा--वइरोसभनारायसंघयणी उसभनारायसंघयणी जाव सेवट्ठसंघयणी।

सरीरोगाहणा जहेव असन्नीणं।

तेसि णं भंते! जीवाणं सरीरगा किंसंठिया पन्नता? गोयमा! छव्विहसंठिया पन्नता, तं जहा-समचतुरंस० नग्गोह० जाव हुंडा०।

तेसि णं भंते! जीवाणं कति लेस्साओ पन्नताओ? गोयमा! छल्लेसाओ पन्नताओ, तं जहा--कण्हलेस्सा जाव सुक्कलेस्सा।

दिट्ठी तिविहा वि। तिन्नि नाणा, तिन्नि अन्नाणा भयणाए। जोगो तिविहो वि। सेसं जहा असण्णीणं जाव अणुबंधो। नवरं पंच समुग्घाया आदिल्लगा। वेदो तिविहो वि, अवसेसं तं चेव जाव-

से णं भंते ! पज्जतासंखेज्जवासाउय जाव तिरिक्खजोणिए रयणप्पभ|० जाव करेज्जा ?

गोयमा! भवादेसेणं जहन्नेणं दो भवग्गहणाइं, उक्कोसेणं अट्ठ भवग्गहणाइं। कालाएसेणं जहन्नेणं दसवाससहस्साइं अंतोमुहुत्तमब्भहियाइं, उक्कोसेणं चत्तारि सागरोवमाइं चउहिं पुव्वकोडीहिं अब्भहियाइं। एवतियं कालं सेवेज्जा जाव करेज्जा।

पज्जतासंखेज्ज जाव जे भविए जहन्नकाल जाव से णं भंते! केवतिकालट्ठितीएसु उववज्जेज्जा? गोयमा! जहन्नेणं दसवाससहस्सट्ठितीएसु, उक्कोसेण वि दसवाससहस्सट्ठितीएसु जाव उववज्जेज्जा।

ते णं भंते! जीवा० एवं सो चेव पढमगमओ निरवसेसो नेयव्वो जाव कालादेसेणं जहन्नेणं दसवाससहस्साइं अंतोमुहुत्तमब्भहियाइं उक्कोसेणं चत्तारि पुव्वकोडीओ चत्तालीसाए वाससहस्सेहिं अब्भहियाओ; एवतियं कालं सेवेज्जा०।

सो चेव उक्कोसकालट्ठितीएसु उववन्नो, जहन्नेणं सागरोवमट्ठितीएसु, उक्कोसेण वि सागरोवमट्ठितीएसु उववज्जेज्जा। अवसेसो परिमाणादीओ भवादेसपज्जवसाणो सो चेव पढमगमो नेयव्वो जाव कालाएसेणं जहन्नेणं सागरोवमं अंतोमुहुत्तमब्भहियं, उक्कोसेणं चत्तारि सागरोवमाइं चउहिं पुव्वकोडीहिं अब्भहियाइं; एवतियं कालं सेविज्जा०।

जहन्नकालट्ठितीयपज्जतासंखेज्जवासाउयसन्निपंचेदियतिरिक्खजोणिए णं भंते! जे भविए रयणप्पभपुढवि जाव उववज्जित्तए से णं भंते! केवतिकालट्ठितीएसु उववज्जेज्जा? गोयमा! जहन्नेणं दसवाससहस्सट्ठितीएसु, उक्कोसेणं सागरोवमट्ठितीएसु उववज्जेज्जा।

ते णं भंते! जीवा०? अवसेसो सो चेव गमओ। नवरं इमाइं अट्ठ णाणत्ताइं-सरीरोगाहणा जहन्नेणं अंगुलस्स असंखेज्जतिभागं, उक्कोसेणं धणुपुहत्तं। लेस्साओ तिण्णि आदिल्लाओ। नो सम्मद्धिट्ठी, मिच्छद्धिट्ठी, नो सम्मामिच्छादिट्ठी। दो अन्नाणा णियमं। समुग्घाया आदिल्ला तिन्नि। आउं, अज्झवसाणा, अणुबंधो य जहेव असन्नीणं। अवसेसं जहा पढमे गमए जाव कालादेसेणं जहन्नेणं दसवास सहस्साइं अंतोमुहुत्तमब्भहियाइं; उक्कोसेणं चत्तारि सागरोवमाइं चउहिं अंतोमुहुत्तेहिं अब्भहियाइं; एवतियं कालं जाव करेज्जा। सो चेव जहन्नकालट्ठितीएसु उववन्नो, जहन्नेणं दसवाससहस्सट्ठितीएसु, उक्कोसेण वि दसवाससहस्सट्ठितीएसु उववज्जेज्जा।

ते णं भंते!०? एवं सो चेव चउत्थो गमओ निरवसेसो भाणियव्वो जाव कालाएसेणं जहन्नेणं दसवाससहस्साइं अंतोमुहुत्तमब्भहियाइं, उक्कोसेणं चत्तालीसं वाससहस्साइं चउहिं अंतोमुहुत्तेहिं अब्भहियाइं; एवतियं जाव करेज्जा।

सो च्चेव उक्कोसकालट्ठितीएसु उववन्नो, जहन्नेणं सागरोवमट्ठितीएसु उववज्जेज्जा, उक्कोसेण वि सागरोवमट्ठितीएसु उववज्जेज्जा।

ते णं भंते!० एवं सो चेव चउत्थो गमओ निरवसेसो भाणियव्वो जाव कालादेसेणं जहन्नेणं सागरोवमं अंतोमुहुत्तमब्भहियं, उक्कोसेणं चत्तारि सागरोवमाइं चउहिं अंतोमुहुत्तेहिं अब्भहियाइं; एवतियं जाव करेज्जा।

उक्कोसकालट्ठितीय-पज्जतासंखेज्जवासा० जाव तिरिक्खजोणिए णं भंते ! जाव रयणप्पभापुढविनेरइएसु उववज्जित्तए से णं भंते! केवतिकालट्ठितीएसु उववज्जेज्जा? गोयमा! जहन्नेणं दसवाससहस्सट्ठितीएसु, उक्कोसेणं सागरोवमट्ठितीएसु उववज्जेज्जा।

ते णं भंते! जीवा०? अवसेसो परिमाणादीओ भवादेसपज्जवसाणो एतेसिं चेव पढमगमओ णेतव्वो, नवरं ठिती जहन्नेणं पुव्वकोडी, उक्कोसेण वि पुव्वकोडी। एवं अणुबंधो वि। सेसं तं चेव। कालादेसेणं जहन्नेणं पुव्वकोडी दसहिं वाससहस्सेहिं अब्भहिया, उक्कोसेणं चत्तारि सागरोवमाइं चउहिं पुव्वकोडीहिं अब्भयाहिइं; एवतियं कालं जाव करेज्जा।

सो चेव जहन्नकालट्ठितीएसु उववन्नो, जहन्नेणं दसवाससहस्सट्ठितीएसु, उक्कोसेण वि दसवाससहस्सट्ठितीएसु उववज्जेज्जा।

ते णं भंते! जीवा०? सो चेव सत्तमो गमओ निरवसेसो भाणियव्वो जाव भवादेसो ति। कालादेसेणं जहन्नेणं पुव्वकोडी दसहिं वाससहस्सेहिं अब्भहिया, उक्कोसेणं चत्तारि पुव्वकोडीओ चत्तालीसाए वाससहस्सेहिं अब्भहिआओ; एवतियं जाव करेज्जा।

उक्कोसकालट्ठितीयपज्जत्ता जाव तिरिक्खजोणिए णं भंते! जे भविए उक्कोसकालट्ठितीय जाव उववज्जित्तए से णं भंते! केवतिकालट्ठितीएसु उववज्जेज्जा? गोयमा! जहन्नेणं सागरोवमट्ठितीएसु, उक्कोसेण वि सागरोवमट्ठितीएसु उववज्जेज्जा।

ते णं भंते! जीवा०? सो चेव सत्तमगमओ निरवसेसो भाणियव्वो जाव भवादेसो ति। कालादेसेणं जहन्नेणं सागरोवमं पुव्वकोडीए अब्भहियं, उक्कोसेणं चत्तारि सागरोवमाइं चउहिं पुव्वकोडीहिं अब्भहियाइं; एवइयं जाव करेज्जा।

एवं एते नव गमगा उक्खेवनिक्खेवओ नवसु वि जहेव असन्नीणं।

[८४०] पज्जत्ता-संखेज्ज-वासाउय-सण्णिपंचिंदिय-तिरिक्खजोणिए णं भंते ! जे भविए सक्करप्पभाए पुढवीए णेरइएसु उववज्जित्तए से णं भंते! केवतिकालट्ठितीएसु उववज्जेज्जा? गोयमा! जहन्नेणं सागरोवमट्ठितीएसु, उक्कोसेणं तिसागरोवमट्ठितीएसु उववज्जेज्जा।

ते णं भंते! जीवा एगसमएणं०? एवं ज च्चेव रयणप्पभाए उववज्जंतगस्स लद्धी स च्चेव निरवसेसा भाणियव्वा जाव भवादेसो ति। कालादेसेणं जहन्नेणं सागरोवमं अंतोमुहुत्तमब्भहियं, उक्कोसेणं बारस सागरोवमाइं चउहिं पुव्वकोडीहिं अब्भहियाइं; एवतियं जाव करेज्जा।

एवं रयणप्पभपुढविगमगसरिसा नव वि गमगा भाणियव्वा, नवरं सव्वगमएसु वि नेरइयट्ठिती-संवेहेसु सागरोवमा भाणितव्वा।

एवं जाव छट्ठपुढवि ति, णवरं नेरइयठिती जा जत्थ पुढवीए जहन्नुक्कोसिया सा तेणं चेव कमेणं चउग्गुणा कायव्वा, वालुयप्पभाए अट्ठावीसं सागरोवमा चउग्गुणिया भवंति, पंकप्पभाए चत्तालीसं, धूमप्पभाए अट्ठसट्ठिं, तमाए अट्ठासीतिं। संघयणाइं वालुयप्पभाए पंचविहसंघयणी, तं जहा--वइरोसभनाराय जाव खीलियासंघयणी। पंकप्पभाए चउट्ठिविहसंघयणी। धूमप्पभाए तिविहसंघयणी। तमाए दुविहसंघयणी, तं जहा--वइरोसभनारायसंघयणी य उसभनारायसंघयणी य। सेसं तं चेव।

पज्जत्तासंखेज्जवासाउय जाव तिरिक्खजोणिए णं भंते! जे भविए अहेसत्तमपुढविनेरइएसु उववज्जित्तए से णं भंते! केवतिकालट्ठितीएसु उववज्जेज्जा? गोयमा! जहन्नेणं बावीससागरोवमट्ठितीएसु, उक्कोसेणं तेतीससागरोवमट्ठितीएसु उववज्जेज्जा।

ते णं भंते! जीवा०? एवं जहेव रयणप्पभाए णव गमका, लद्धी वि स च्चेव; णवरं वइरोसभनारायसंघयणी, इत्थिवेदगा न उववज्जंति। सेसं तं चेव जाव अणुबंधो ति। संवेहो भवाएसेणं जहन्नेणं तिण्णि भवग्गहणाइं, उक्कोसेणं सत्त भवग्गहणाइं; कालाएसेणं जहन्नेणं बावीसं सागरोवमाइं दोहिं अंतोमुहुत्तेहिं अब्भहियाइं, उक्कोसेणं छावट्ठिं सागरोवमाइं चउहिं पुव्वकोडीहिं अब्भहियाइं; एवतियं जाव करेज्जा।

सो चेव जहन्नकालट्ठितीएसु उववन्नो, स च्चेव वत्तव्वया जाव भवादेसो ति। कालाएसेणं जहन्नेणं, कालादेसो वि तहेव जाव चउहिं पुव्वकोडीहिं अब्भहियाइं; एवतियं जाव करेज्जा।

सो चेव उक्कोसकालट्ठितीएसु उववन्नो, स च्चेव लद्धी जाव अणुबंधो ति, भवाएसेणं

जहन्नेणं तिन्नि भवग्गहणाइं, उक्कोसेणं पंच भवग्गहणाइं; कालाएसेणं जहन्नेणं तेतीसं सागरोवमाइं दोहिं अंतोमुहुत्तेहिं अब्भहियाइं, उक्कोसेणं छावट्ठिं सागरोवमाइं तिहिं पुव्वकोडीहिं अब्भहियाइं; एवतियं जाव करेज्जा।

सो चेव जहन्नकालट्ठितीओ जाओ, स च्चेव रयणप्पभपुढविजहन्नकालट्ठितीयवत्तव्वता भाणियव्वा जाव भवादेसो ति। नवरं पढमं संघयणं; नो इत्थिवेदगा; भवाएसेणं जहन्नेणं तिन्नि भवग्गहणाइं, उक्कोसेणं सत्तभवग्गहणाइं; कालाएसेणं जहन्नेणं बावीसं सागरोवमाइं दोहिं अंतोमुहुत्तेहिं अब्भहियाइं, उक्कोसेणं छावट्ठिं सागरोवमाइं चउहिं अंतोमुहुत्तेहिं अब्भहियाइं; एवतियं जाव करेज्जा।

सो चेव जहन्नकालट्ठितीएसु उववन्नो, एवं सो चेव चउत्थगमओ निरवसेसो भाणियव्वो जाव कालादेसो ति।

सो चेव उक्कोसकालट्ठितीएसु उववन्नो, स च्चेव लद्धी जाव अणुबंधो ति। भवाएसेणं जहन्नेणं तिन्नि भवग्गहणाइं, उक्कोसेणं पंच भवग्गहणाइं। कालाएसेणं जहन्नेणं तेतीसं सागरोवमाइं दोहिं अंतोमुहुत्तेहिं अब्भहियाइं, उक्कोसेणं छावट्ठिं सागरोवमाइं तिहिं अंतोमुहुत्तेहिं अब्भहियाइं, एवतियं कालं जाव करेज्जा।

सो चेव अप्पणा उक्कोसकालट्ठितीओ जाओ, जहन्नेणं बावीससागरोवमट्ठितीएसु, उक्कोसेणं तेतीससागरोवमट्ठितीएसु उववज्जेज्जा।

ते णं भंते!०? अवसेसा स च्चेव सत्तमपुढविपढमगमगवत्तव्वया भाणियव्वा जाव भवादेसो ति, नवरं ठिती अणुबंधो य जहन्नेणं पुव्वकोडी, उक्कोसेणं वि पुव्वकोडी। सेसं तं चेव। कालाएसेणं जहन्नेणं बावीसं सागरोवमाइं दोहिं पुव्वकोडीहिं अब्भहियाइं, उक्कोसेणं छावट्ठिं सागरोवमाइं चउहिं पुव्वकोडीहिं अब्भहियाइं, एवतियं जाव करेज्जा।

सो चेव जहन्नकालट्ठितीएसु उववन्नो, स च्चेव लद्धी, संवेहो वि तहेव सत्तमगमगसरिसो।

सो चेव उक्कोसकालट्ठितीएसु उववन्नो, एसा चेव लद्धी जाव अणुबंधो ति। भवाएसेणं जहन्नेणं तिन्नि भवग्गहणाइं, उक्कोसेणं पंच भवग्गहणाइं। कालाएसेणं जहन्नेणं तेतीसं सागरोवमाइं दोहिं पुव्वकोडीहिं अब्भहियाइं, उक्कोसेणं छावट्ठिं सागरोवमाइं तिहिं पुव्वकोडीहिं अब्भहियाइं, एवतियं कालं सेवेज्जा जाव करेज्जा।

**[८४१]** जइ मणुस्सेहिंतो उववज्जंति किं सन्निमणुस्सेहिंतो उववज्जंति, असन्निमणुस्सेहिंतो उववज्जंति? गोयमा! सन्निमणुस्सेहिंतो उववज्जंति, नो असन्निमणुस्सेहिंतो उववज्जंति।

जति सन्निमणुस्सेहिंतो उववज्जंति किं संखेज्जवासाउयसन्निमणुस्सेहिंतो उववज्जंति असं-खेज्जवा० जाव उववज्जंति? गोयमा! संखेज्जवासाउयसन्निमणु०, नो असंखेज्जवासाउय जाव उववज्जंति।

जदि संखेज्जवासा० जाव उववज्जंति किं पज्जतासंखेज्जवासाउय०, अपज्जतासंखेज्जवासाउय०? गोयमा! पज्जतासंखेज्जवासाउय०, नो अपज्जतासंखेज्जवासाउय० जाव उववज्जंति।

पज्जतासंखेज्जवासाउयसण्णिमणुस्से णं भंते! जे भविए नेरइएसु उववज्जित्तए से णं भंते! कतिसु पुढवीसु उववज्जेज्जा? गोयमा! सत्तसु पुढवीसु उववज्जेज्जा, तं जहा-रयणप्पभाए जाव अहेसत्तमाए।

पज्जता-संखेज्जवासाउय-सन्निमणुस्से णं भंते ! जे भविए रतणप्पभपुढवि-नेरइएसु

उववज्जितए से णं भंते! केवतिकालट्ठितीएसु उववज्जेज्जा? गोयमा! जहण्णेणं दसवाससहस्सट्ठितीएसु, उक्कोसेणं सागरोवमट्ठितीएसु उववज्जेज्जा।

ते णं भंते! जीवा एगसमएणं केवइया उववज्जंति? गोयमा! जहन्नेणं एक्को वा दो वा तिन्नि वा, उक्कोसेणं संखेज्जा उववज्जंति। संघयणा छ। सरीरोगाहणा जहन्नेणं अंगुलपुहत्तं, उक्कोसेणं पंच धणुसयाइं। एवं सेसं जहा सन्निपंचंदियतिरिक्खजोणियाणं जाव भवादेसो ति, नवरं चत्तारि नाणा, तिन्नि अन्नाणा भयणाए, छ समुग्घाया केवलिवज्जा; ठिती अणुबंधो य जहन्नेणं मासपुहत्तं, उक्कोसेणं पुव्वकोडी। सेसं तं चेव। कालाएसेणं जहन्नेणं दस वाससहस्साइं मासपुहत्तमब्भहियाइं, उक्कोसेणं चत्तारि सागरोवमाइं चउहिं पुव्वकोडीहिं अब्भहियाइं, एवतियं जाव करेज्जा।

सो चेव जहन्नकालट्ठितीएसु उववन्नो, एसा चेव वत्तव्वया, नवरं कालादेसेणं जहन्नेणं दस वाससहस्साइं मासपुहत्तमब्भहियाइं, उक्कोसेणं चत्तारि पुव्वकोडीओ चत्तालीसाए वाससहस्सेहिं अब्भहियाओ, एवतियं०।

सो चेव उक्कोसकालट्ठितीएसु उववन्नो, एसा चेव वत्तव्वता, नवरं कालाएसेणं जहन्नेणं सागरोवमं मासपुहत्तमब्भहियं, उक्कोसेणं चत्तारि सागरोवमाइं चउहिं पुव्वकोडीहिं अब्भहियाइं, एवतियं जाव करेज्जा।

सो चेव अप्पणा जहन्नकालट्ठितीओ जाओ, एसा चेव वत्तव्वता, नवरं इमाइं पंच नाणताइं-- सरीरोगाहणा जहन्नेणं अंगुलपुहत्तं, उक्कोसेण वि अंगुलपुहत्तं १, तिन्नि नाणा, तिन्नि अन्नाणा भयणाए २, पंच समुग्घाया आदिल्ला ३, ठिती ४ अणुबंधो ५ य जहन्नेणं मासपुहत्तं, उक्कोसेण वि मासपुहत्तं। सेसं तं चेव जाव भवादेसो ति। कालादेसेणं जहन्नेणं दस वाससहस्साइं मासपुहत्तमब्भहियाइं, उक्कोसेणं चत्तारि सागरोवमाइं चउहिं मासपुहत्तेहिं अब्भहियाइं, एवतियं जाव करेज्जा।

सो चेव जहन्नकालट्ठितीएसु उववन्नो, एसा चेव वत्तव्वया चउत्थगमगसरिसा, नवरं कालाएसेणं जहन्नेणं दस वाससहस्साइं मासपुहत्तमब्भहियाइं, उक्कोसेणं चत्तालीसं वाससहस्साइं चउहिं मासपुहत्तेहिं अब्भहियाइं, एवतियं जाव करेज्जा।

सो चेव उक्कोसकालट्ठितीएसु उववन्नो, एस चेव गमगो, नवरं कालाएसेणं जहन्नेणं सागरोवमं मासपुहत्तमब्भहियं, उक्कोसेणं चत्तारि सागरोवमाइं चउहिं मासपुहत्तेहिं अब्भहियाइं, एवतियं जाव करेज्जा।

सो चेव अप्पणा उक्कोसकालट्ठितीओ जातो, सो चेव पढमगमओ नेतव्वो, नवरं सरीरोगाहणा जहन्नेणं पंच धणुसयाइं, उक्कोसेण वि पंच धणुसयाइं; ठिती जहन्नेणं पुव्वकोडी, उक्कोसेण वि पुव्वकोडी; एवं अणुबंधो वि, कालाएसेणं जहन्नेणं पुव्वकोडी दसहिं वाससहस्सेहिं अब्भहिया, उक्कोसेणं चत्तारि सागरोवमाइं चउहिं पुव्वकोडीहिं अब्भहियाइं, एवतियं कालं जाव करेज्जा।

सो चेव जहन्नकालट्ठितीएसु उववन्नो, स च्चेव सत्तमगमगवत्तव्वया, नवरं कालाएसेणं जहन्नेणं पुव्वकोडी दसहिं वाससहस्सेहिं अब्भहिया, उक्कोसेणं चत्तारि पुव्वकोडीओ चत्तालीसाए वाससहस्सेहिं अब्भहियाओ, एवतियं कालं जाव करेज्जा।

सो चेव उक्कोसकालट्ठितीएसु उववन्नो, सा चेव सत्तमगमगवत्तव्वया, नवरं कालाएसेणं जहन्नेणं सागरोवमं पुव्वकोडीए अब्भहियं, उक्कोसेणं चत्तारि सागरोवमाइं चउहिं पुव्वकोडीहिं अब्भहियाइं,

एवतियं कालं सेवेज्जा जाव करेज्जा।

[८४२] पज्जतसंखेज्जवासाउयसन्निमणुस्से णं भंते! जे भविए सक्करप्पभाए पुढवीए नेरइएसु जाव उववज्जितए से णं भंते! केवति जाव उववज्जेज्जा? गोयमा! जहन्नेणं सागरोवमट्ठितीएसु, उक्कोसेणं तिसागरोवमट्ठितीएसु उववज्जेज्जा।

ते णं भंते!०? एवं सो चेव रयणप्पभपुढविगमओ नेयव्वो, नवरं सरीरोगाहणा जहन्नेणं रयणिपुहत्तं, उक्कोसेणं पंच धणुसयाइं; ठिती जहन्नेणं वासपुहत्तं, उक्कोसेणं पुव्वकोडी; एवं अणुबंधो वि। सेसं तं चेव जाव भवादेसो ति; कालाएसेणं जहन्नेणं सागरोवमं वासपुहत्तमब्भहियं, उक्कोसेणं बारस सागरोवमाइं चउहिं पुव्वकोडीहिं अब्भहियाइं, एवतियं जाव करेज्जा।

एवं एसा ओहिएसु तिसु गमएसु मणूसस्स लद्धी, नाणत्तं नेरइयट्ठितिं कालाएसेणं संवेहं च जाणेज्जा।

सो चेव अप्पणा जहन्नकालट्ठितीओ जाओ, तस्स वि तिसु गमएसु एसा चेव लद्धी; नवरं सरीरोगाहणा जहन्नेणं रयणिपुहत्तं, उक्कोसेण वि रयणिपुहत्तं; ठिती जहन्नेणं वासपुहत्तं, उक्कोसेण वि वासपुहत्तं; एवं अणुबंधो वि। सेसं जहा ओहियाणं। संवेहो उवजुंजिऊण भाणियव्वो।

सो चेव अप्पणा उक्कोसकालट्ठितीओ जाओ, तस्स वि तिसु वि गमएसु इमं णाणत्तं-- सरीरोगाहणा जहन्नेणं पंच धणुसयाइं, उक्कोसेण वि पंच धणुसयाइं; ठिती जहन्नेणं पुव्वकोडी, उक्कोसेण वि पुव्वकोडी; एवं अणुबंधो वि। सेसं जहा पढमगमए, नवरं नेरइयठितिं कायसंवेहं च जाणेज्जा।

एवं जाव छट्ठपुढवी, नवरं तच्चाए आढवेत्ता एककेक्कं संघयणं परिहायति जहेव तिरिक्खजोणियाणं; कालादेसो वि तहेव, नवरं मणुस्सट्ठिती जाणियव्वो।

पज्जतसंखेज्जवासाउयसन्निमणुस्से णं भंते! जे भविए अहेसत्तमपुढविनेरइएसु उववज्जितए से णं भंते! केवतिकालट्ठितीएसु उववज्जेज्जा? गोयमा! जहन्नेणं बावीससागरोवमट्ठितीएसु, उक्कोसेणं तेतीससागरोवमट्ठितीएसु उववज्जेज्जा।

ते णं भंते! जीवा एगसमएणं०? अवसेसो सो चेव सक्करप्पभापुढविगमओ नेयव्वो, नवरं पढमं संघयणं, इत्थिवेदगा न उववज्जंति। सेसं तं चेव जाव अणुबंधो ति। भवादेसेणं दो भवग्गहणाइं; कालादेसेणं जहन्नेणं बावीसं सागरोवमाइं वासपुहत्तमब्भहियाइं, उक्कोसेणं तेतीसं सागरोवमाइं पुव्वकोडीए अब्भहियाइं, एवतियं जाव करेज्जा।

सो चेव जहन्नकालट्ठितीएसु उववन्नो, एसा चेव वत्तव्वया, नवरं नेरइयट्ठितिं संवेहं च जाणेज्जा।

सो चेव उक्कोसकालट्ठितीएसु उववन्नो, एसा चेव वत्तव्वया, नवरं संवेहं जाणेज्जा।

सो चेव अप्पणा जहन्नकालट्ठितीओ जाओ, तस्स वि तिसु वि गमएसु एसा चेव वत्तव्वया, नवरं सरीरोगाहणा जहन्नेणं रयणिपुहत्तं, उक्कोसेण वि रयणिपुहत्तं, ठिती जहन्नेणं वासपुहत्तं, उक्कोसेण वि वासपुहत्तं; एवं अणुबंधो वि; संवेहो उवजुंजिऊण भाणियव्वो।

सो चेव अप्पणा उक्कोसकालट्ठितीओ जाओ, तस्स वि तिसु वि गमएसु एसा चेव वत्तव्वया, नवरं सरीरोगाहणा जहन्नेणं पंच धणुसयाइं, उक्कोसेण वि पंच धणुसयाइं; ठिती जहन्नेणं पुव्वकोडी, उक्कोसेण वि पुव्वकोडी; एवं अणुबंधो वि। नवसु वि एएसु गमएसु नेरइयट्ठितिं संवेहं च

जाणेज्जा। सव्वत्थ भवग्गहणाइं दोन्नि जाव नवमगमए कालादेसेणं जहन्नेणं तेतीसं सागरोवमाइं पुव्वकोडीए अब्भहियाइं, उक्कोसेण वि तेतीसं सागरोवमाइं पुव्वकोडीए अब्भहियाइं, एवतियं कालं सेवेज्जा, एवतियं कालं गतिरागतिं करेज्जा।

सेवं भंते! सेवं भंते! ति जाव विहरति।

**\*चउवीसइमे सते पढमो उद्देशो समतो\***

**० बिइओ उद्देशो ०**

**[८४३]** रायगिहे जाव एवं वयासि--

असुरकुमारा णं भंते! कओह्हितो उववज्जंति? किं नेरइएह्हितो उववज्जंति, तिरि-मणु-देवेह्हितो उववज्जंति? गोयमा! णो णेरतिएह्हितो उववज्जंति, तिरिक्खजोणिएह्हितो उववज्जंति, मणुस्सेह्हितो उववज्जंति, नो देवेह्हितो उववज्जंति।

एवं जहेव नेरइयउद्देशए जाव पज्जताअसन्निपंचेंदियतिरिक्खजोणिए णं भंते! जे भविए असुरकुमारेसु उववज्जितए से णं भंते! केवतिकालट्ठितीएसु उववज्जेज्जा? गोयमा! जहन्नेणं दसवाससहस्सट्ठितीएसु, उक्कोसेणं पलिओवमस्स असंखेज्जतिभागकालट्ठितीएसु उववज्जेज्जा।

ते णं भंते! जीवा०? एवं रयणप्पभागमगसरिसा नव वि गमा भाणियव्वा, नवरं जाहे अप्पणा जहन्नकालट्ठितीयो भवति ताहे अज्झवसाणा पसत्था, नो अप्पसत्था तिसु वि गमएसु। अवसेसं तं चेव।

जदि सन्निपंचेंदियतिरिक्खजोणिएह्हितो उववज्जंति किं संखेज्जवासाउयसन्नि जाव उववज्जंति, असंखेज्जवासाउय जाव उववज्जंति? गोयमा! संखेज्जवासाउय जाव उववज्जंति, असंखेज्जवासाउय जाव उववज्जंति।

असंखेज्जवासाउयसन्निपंचेंदियतिरिक्खजोणिए णं भंते! जे भविए असुरकुमारेसु उववज्जितए से णं भंते! केवतिकालट्ठितीएसु उववज्जेज्जा? गोयमा! जहन्नेणं दसवाससहस्सट्ठितीएसु उववज्जेज्जा, उक्कोसेणं तिपलिओवमट्ठितीएसु उववज्जेज्जा।

ते णं भंते! जीवा एगसमएणं० पुच्छा। गोयमा! जहन्नेणं एक्को वा दो वा तिन्नि वा, उक्कोसेणं संखेज्जा उववज्जंति। वयरोसभनारायसंघयणी। ओगाहणा जहन्नेणं धणुपुह्तं, उक्कोसेणं छग्गाउयाइं। समचउरंसंठाणसंठिया पन्नता। चत्तारि लेस्साओ आदिल्लाओ। नो सम्मद्धिट्ठी, मिच्छादिट्ठी, नो सम्मामिच्छादिट्ठी। नो नाणी, अन्नाणी, नियमं दुअण्णाणी, तं जहा--मतिअन्नाणी, सुयअन्नाणी या जोगो तिविहो वि। उवयोगो दुविहो वि। चत्तारि

सण्णाओ। चत्तारि कसाया। पंच इंदिया। तिन्नि समुग्घाया आदिल्लगा। समोहया वि मरंति, असमोहया वि मरंति। वेयणा दुविहा वि। इत्थिवेदगा वि, पुरिसवेदगा वि, नो नपुंसगवेदगा। ठिती जहन्नेणं सातिरेगा पुव्वकोडी, उक्कोसेणं तिन्नि पलिओवमाइं। अज्झवसाणा पसत्था वि अप्पसत्था वि। अणुबंधो जहेव ठिती। कायसंवेहो भवाएसेणं दो भवग्गहणाइं; कालाएसेणं जहन्नेणं सातिरेगा पुव्वकोडी दसहिं वाससहस्सेहिं अब्भहिया, उक्कोसेणं छप्पलिओवमाइं, एवतियं जाव करेज्जा।

सो चेव जहन्नकालट्ठितीएसु उववन्नो, एसा चेव वत्तव्वया, नवरं असुरकुमारट्ठितिं संवेहं च जाणेज्जा।

सो चेव उक्कोसकालटिठतीएसु उववन्नो, जहन्नेणं तिपलिओवमटिठतीएसु, उक्कोसेण वि तिपलिओवमटिठतीएसु उववज्जेज्जा। एसा चेव वत्तव्वया, नवरं ठिती से जहन्नेणं तिप्पिण पलिओवमाइं, उक्कोसेण वि तिन्नि पलिओवमाइं।

एवं अणुबंधो वि, कालाएसेणं जहन्नेणं छप्पलिओवमाइं, उक्कोसेण वि छप्पलिओवमाइं, एवतियं सेसं तं चेव।

सो चेव अप्पणा जहन्नकालटिठतीओ जाओ, जहन्नेणं दसवाससहस्सटिठतीएसु, उक्कोसेणं सातिरेगपुव्वकोडिआउएसु उववज्जेज्जा।

ते णं भंते!०? अवसेसं तं चेव जाव भवाएसो ति, नवरं ओगाहणा जहन्नेणं धणुपुहत्तं, उक्कोसेणं सातिरेगं धणुसहस्सं। ठिती जहन्नेणं सातिरेगा पुव्वकोडी, उक्कोसेण वि सातिरेगा पुव्वकोडी, एवं अणुबंधो वि।

कालाएसेणं जहन्नेणं सातिरेगा पुव्वकोडी दसहिं वाससहस्सेहिं अब्भहिया, उक्कोसेणं सातिरेगाओ दो पुव्वकोडीओ, एवतियं०।

सो चेव अप्पणा जहन्नकालटिठतीएसु उववन्नो, एसा चेव वत्तव्वया, नवरं असुरकुमारटिठतिं संवेहं च जाणेज्जा।

सो चेव उक्कोसकालटिठतीएसु उववन्नो, जहन्नेणं सातिरेगपुव्वकोडिआउएसु, उक्कोसेण वि तिरेगपुव्वकोडिआउएसु उववज्जेज्जा। सेसं तं चेव, नवरं कालाएसेणं जहन्नेणं सातिरेगाओ दो पुव्वकोडीओ, उक्कोसेण वि सातिरेगाओ दो पुव्वकोडीओ, एवतियं कालं सेवेज्जा०।.

सो चेव अप्पणा उक्कोसकालटिठतीओ जाओ, सो चेव पढमगमओ भाणियव्वो, नवरं ठिती जहन्नेणं तिन्नि पलिओवमाइं, उक्कोसेण वि तिन्नि पलिओवमाइं। एवं अणुबंधो वि।

कालाएसेणं जहन्नेणं तिन्नि पलिओवमाइं दसहिं वाससहस्सेहिं अब्भहियाइं, उक्कोसेणं छ पलितोवमाइं, एवतियं०

सो चेव जहन्नकालटिठतीएसु उववन्नो, एसा चेव वत्तव्वया, नवरं असुरकुमारटिठतिं संवेहं च जाणेज्जा। सो चेव उक्कोसकालटिठतीएसु उववन्नो, जहन्नेणं तिपलिओवमं, उक्कोसेण वि तिपलिओवमं। एसा चेव वत्तव्वया, नवरं कालाएसेणं जहन्नेणं छप्पलिओवमाइं, उक्कोसेण वि छप्पलिओवमाइं, एवतियं०।

जति संखेज्जवासाउयसन्निपंचेंदिय० जाव उववज्जंति किं जलचर एवं जाव पज्जतासंखेज्ज वासाउय-सन्निपंचेंदिय-तिरिक्खजोणिए णं भंते! जे भविए असुरकुमारेसु उववज्जित्तए से णं भंते! केवतिकालटिठतीएसु उववज्जेज्जा? गोयमा! जहन्नेणं दसवाससहस्सटिठतीएसु, उक्कोसेणं सातिरेग सागरोवमटिठतीएसु उववज्जेज्जा।

ते णं भंते! जीवा एगसमएणं०? एवं एएसिं रयणप्पभपुढविगमगसरिसा नव गमगा नेयव्वा, नवरं जाहे अप्पणा जहन्नकालटिठतीओ भवति ताहे तिसु वि गमएसु इमं नाणत्तं--चत्तारि लेस्साओ; अज्झवसाणा पसत्था, नो अप्पसत्था। सेसं तं चेव। संवेहो सातिरेगेण सागरोवमेण कायव्वो।

जदि मणुस्सेहितो उववज्जंति किं सन्निमणुस्सेहितो, असन्निमणुस्सेहितो? गोयमा! सन्निमणुस्सेहितो, नो असन्निमणुस्सेहितो उववज्जंति।

जदि सन्निमणुस्सेहितो उववज्जंति किं संखेज्जवासाउयसन्निमणुस्सेहितो उववज्जंति,

असंखेज्ज-वासाउयसन्निमणुस्सेहिंतो उववज्जंति? गोयमा! संखेज्जवासाउय० जाव उववज्जंति, असंखेज्ज-वासाउय० जाव उववज्जंति।

असंखेज्जवासाउयसन्निमणुस्से णं भंते! जे भविए असुरकुमारेसु उववज्जितए से णं भंते! केवतिकालट्ठितीएसु उववज्जेज्जा? गोयमा! जहन्नेणं दसवाससहस्सट्ठितीएसु, उक्कोसेणं तिपल्लिओवमट्ठितीएसु उववज्जेज्जा।

एवं असंखेज्जवासाउयतिरिक्खजोणियसरिसा आदिल्ला तिन्नि गमगा नेयत्त्वा, नवरं सरीरोगाहणा पढम-बितिएसु गमएसु जहन्नेणं सातिरेगाइं पंच धणुसयाइं, उक्कोसेणं तिन्नि गाउयाइं। सेसं तं चेव। ततियगमे ओगाहणा जहन्नेणं तिन्नि गाउयाइं, उक्कोसेण वि

तिण्णि गाउयाइं। सेसं जहेव तिरिक्खजोणियाणं।

सो चेव अप्पणा जहन्नकालट्ठितीओ जाओ, तस्स वि जहन्नकालट्ठितीय तिरिक्खजोणिय-सरिसा तिन्नि गमगा भाणियत्त्वा, नवरं सरीरोगाहणा तिसु वि गमएसु जहन्नेणं सातिरेगाइं पंच धणुसयाइं, उक्कोसेण वि सातिरेगाइं पंच धणुसयाइं। सेसं तं चेव।

सो चेव अप्पणा उक्कोसकालट्ठितीओ जाओ, तस्स वि ते चेव पच्छिल्लगा तिन्नि गमगा भाणियत्त्वा, नवरं सरीरोगाहणा तिसु वि गमएसु जहन्नेणं तिन्नि गाउयाइं, उक्कोसेण वि तिन्नि गाउयाइं। अवसेसं तं चेव।

जइ संखेज्जवासाउयसन्निमणुस्सेहिंतो उववज्जइ किं पज्जतासंखेज्जवासाउय० अपज्जता-संखेज्जवासाउय०? गोयमा! पज्जतासंखेज्ज०, नो अपज्जतासंखेज्ज०।

पज्जतासंखेज्जवासाउयसण्णिमणुस्से णं भंते! जे भविए असुरकुमारेसु उववज्जितए से णं भंते! केवतिकालट्ठितीएसु उववज्जेज्जा? गोयमा! जहन्नेणं दसवाससहस्सट्ठितीएसु, उक्कोसेणं सातिरेगसागरोवमट्ठितीएसु उववज्जेज्जा।

ते णं भंते! जीवा०? एवं जहेव एएसिं रयणप्पभाए उववज्जमाणाणं नव गमका तहेव इह वि नव गमगा भाणियत्त्वा, णवरं संवेहो सातिरेगेण सागरोवमेण कायत्त्वो, सेसं तं चेव।

सेवं भंते! सेवं भंते! ति०।

**\*चउवीसइमे सते बीइओ उद्देशो समतो\***

**० तइओ उद्देशो ०**

[८४४] रायगिहे जाव एवं वयासि-

नागकुमारा णं भंते! कओहिंतो उववज्जंति? किं नेरइएहिंतो उववज्जंति, तिरि-मणु-देवेहिंतो उववज्जंति? गोयमा! नो णेरइएहिंतो उववज्जंति, तिरिक्खजोणिय-मणुस्सेहिंतो उववज्जंति, नो देवेहिंतो उववज्जंति।

जदि तिरिक्ख०? एवं जहा असुरकुमाराणं वतत्त्वया तहा एतेसिं पि जाव असण्णि ति।

जदि सन्निपंचेदियतिरिक्खजोणिएहिंतो० किं संखेज्जवासाउय०, असंखेज्जवासाउय०? गोयमा! संखेज्जवासाउय०, असंखेज्जवासाउय० जाव उववज्जंति।

असंखिज्ज-वासाउय-सन्नि-पंचेदिय-तिरिक्खजोणिए णं भंते ! जे भविए नागकुमारेसु उवव-

उववज्जित्तए से णं भंते! केवतिकालट्ठिती०? गोयमा! जहन्नेणं दसवाससहस्सट्ठितीएसु, उक्कोसेणं देसूणदुपलिओवमट्ठितीएसु उववज्जेज्जा।

ते णं भंते! जीवा०? अवसेसो सो चेव असुरकुमारेसु उववज्जमाणस्स गमगो भाणियव्वो जाव भवाएसो ति; कालादेसेणं जहन्नेणं सातिरेगा पुव्वकोडी दसहिं वाससहस्सेहिं अब्भहिया, उक्कोसेणं देसूणाइं पंच पलिओवमाइं, एवतियं जाव करेज्जा।

सो चेव जहन्नकालट्ठितीएसु उववन्नो, एसा चेव वत्तव्वया, नवरं नागकुमारट्ठित्तिं संवेहं च जाणेज्जा।

सो चेव उक्कोसकालट्ठितीएसु उववन्नो, तस्स वि एस चेव वत्तव्वया, नवरं ठिती जहन्नेणं देसूणाइं दो पलिओवमाइं, उक्कोसेणं तिन्नि पलिओवमाइं। सेसं तं चेव जाव भवादेसो ति। कालादेसेणं जहन्नेणं देसूणाइं चत्तारि पलिओवमाइं, उक्कोसेणं देसूणाइं पंच पलिओवमाइं, एवतियं कालं०।

सो चेव अप्पणा जहन्नकालट्ठितीओ जाओ, तस्स वि तिसु वि गमएसु जहेव असुरकुमारेसु उववज्जमाणस्स जहन्नकालट्ठितीयस्स तहेव निरवसेसं।

सो चेव अप्पणा उक्कोसकालट्ठितीयो जाओ, तस्स वि तहेव तिन्नि गमका जहा असुरकुमारेसु उववज्जमाणस्स, नवरं नागकुमारट्ठित्तिं संवेहं च जाणेज्जा। सेसं तं चेव जहा असुरकुमारेसु उववज्जमाणस्स।

जदि संखेज्जवासाउयसन्निपंचिंदिय० जाव किं पज्जत्तासंखेज्जवासाउय०, अपज्जत्तासंखे०? गोयमा! पज्जत्तासंखेज्जवासाउय०, नो अपज्जत्तासंखेज्जवासाउय०। जाव--

पज्जत्तासंखेज्जवासाउय० जाव जे भविए णागकुमारेसु उववज्जित्तए से णं भंते! केवतिकालट्ठितीएसु उववज्जेज्जा? गोयमा! जहन्नेणं दस वाससहस्साइं, उक्कोसेणं देसूणाइं दो पलितोवमाइं। एवं जहेव असुरकुमारेसु उववज्जमाणस्स वत्तव्वया तहेव इह वि नवसु वि गमएसु, णवरं नागकुमारट्ठित्तिं संवेहं च जाणेज्जा। सेसं तं चेव।

जइ मणुस्सेहिंतो उववज्जंति किं सन्निमणु०, असण्णिमणु०? गोयमा! सन्निमणु०, नो असन्निमणु० जहा असुरकुमारेसु उववज्जमाणस्स जाव-

असंखेज्जवासाउय-सन्निमणुस्से णं भंते ! जे भविए नागकुमारेसु उववज्जित्तए से णं भंते ! केवतिकालट्ठितीएसु उववज्जइ? गोयमा! जहन्नेणं दसवाससहस्स०, उक्कोसेणं देसूणदुपलिओवम०। एवं जहेव असंखेज्जवासाउयाणं तिरिक्खजोणियाणं नागकुमारेसु आदिल्ला तिण्णि गमका तहेव इमस्स वि, नवरं पढम-वितिएसु गमएसु सरीरोगाहणा जहन्नेणं सातिरेगाइं पंच धणुसयाइं, उक्कोसेणं तिन्नि गाउयाइं, ततियगमे ओगाहणा जहन्नेणं देसूणाइं दो गाउयाइं, उक्कोसेणं तिण्णि गाउयाइं। सेसं तं चेव।

सो चेव अप्पणा जहन्नकालट्ठितीयो जाओ, तस्स तिसु वि गमएसु जहा तस्स चेव असुरकुमारेसु उववज्जमाणस्स तहेव निरवसेसं।

सो चेव अप्पणा उक्कोसकालट्ठितीयो जाओ तस्स तिसु वि गमएसु जहा तस्स चेव उक्कोसकालट्ठितीयस्स असुरकुमारेसु उववज्जमाणस्स, नवरं नागकुमारट्ठित्तिं संवेहं च जाणेज्जा। सेसं तं चेव।

जदि संखेज्जवासाउयसन्निमणु० किं पज्जतासंखेज्ज०, अपज्जतासं०? गोयमा! पज्जता-संखे०, नो अपज्जतासंखे०।

पज्जतासंखेज्जवासाउयसन्निमणुस्से णं भंते! जे भविए नागकुमारेसु उववज्जितए से णं भंते! केवति०? गोयमा! जहन्नेणं दसवाससहस्स०, उक्कोसेणं देसूणदोपलिओवमट्ठिती०। एवं जहेव असुरकुमारेसु उववज्जमाणस्स स च्चेव लद्धी निरवसेसा नवसु गमएसु, नवरं नागकुमारट्ठितं संवेहं च जाणेज्जा।

सेवं भंते! सेवं भंते! ति०।

**\*चउवीसइमे सते तइओ उद्देशो समतो\***

**० उद्देशगा: ४--११- ०**

[८४५] अवसेसा सुवण्णकुमारादी जाव थणियकुमारा, एए अट्ठ वि उद्देशगा जहेव नाग-कुमाराणं तहेव निरवसेसा भाणियव्वा।

सेवं भंते! सेवं भंते! ति०।

**\*चउवीसतिमे सए ४--११ उद्देशगा समता\***

**० बारसमो उद्देशो ०**

[८४६] पुढविकाइया णं भंते! कओहिंतो उववज्जंति? किं नेरइएहिंतो उववज्जंति, तिरिक्ख-मणुस्स-देवेहिंतो उववज्जंति? गोयमा! नो नेरइएहिंतो उववज्जंति, तिरिक्ख-मणुस्स-देवेहिंतो उववज्जंति।

जदि तिरिक्खजोणि० किं एगिंदियतिरिक्खजोणि० एवं जहा वक्कंतीए उववातो जाव--

जदि बादरपुढविकाइयएगिंदियतिरिक्खजोणिएहिंतो उववज्जंति किं पज्जताबायर० जाव उववज्जंति, अपज्जताबादरपुढवि०? गोयमा! पज्जताबायरपुढवि०, अपज्जताबादरपुढवि जाव उववज्जंति।

पुढविकाइए णं भंते! जे भविए पुढविकाइएसु उववज्जितए से णं भंते! केवतिकालट्ठितीएसु उववज्जेज्जा? गोयमा! जहन्नेणं अंतोमुहुत्तट्ठितीएसु, उक्कोसेणं बावीसवाससहस्सट्ठितीएसु उववज्जेज्जा।

ते णं भंते! जीवा एगसमएणं० पुच्छा। गोयमा! अणुसमयं अविरहिया असंखेज्जा उववज्जंति। सेवट्ठसंघयणी, सरीरोगाहणा जहन्नेणं अंगुलस्स असंखेज्जतिभागं, उक्कोसेण वि अंगुलस्स असंखेज्जतिभागं। मसूराचंदासंठिया। चत्तारि लेस्साओ। नो सम्मद्धिट्ठी, मिच्छादिट्ठी, नो सम्मामिच्छादिट्ठी। दो अन्नाणा नियमं। नो मणजोगी, नो वइजोगी, कायजोगी। उवयोगो दुविहो वि। चत्तारि सण्णाओ। चत्तारि कसाया। एगे फासिंदिए पन्नते। तिण्णि समुग्घाया। वेयणा दुविहा। नो इत्थिवेयगा, नो पुरिसवेयगा, नपुंसगवेयगा। ठिती जहन्नेणं अंतोमुहुत्तं, उक्कोसेणं बावीसं वाससहस्साइं। अज्झवसाणा पसत्था वि, अपसत्था वि। अणुबंधो जहा ठिती।

से णं भंते! पुढविकाइए पुणरवि 'पुढविकाइए' ति केवतियं कालं सेवेज्जा? केवतियं कालं गतिरागतिं करेज्जा? गोयमा! भवाएसेणं जहन्नेणं दो भवग्गहणाइं, उक्कोसेणं असंखेज्जाइं भवग्गहणाइं। कालादेसेणं जहन्नेणं दो अंतोमुहुत्ता, उक्कोसेणं असंखेज्जं कालं, एवतियं जाव करेज्जा।

सो चेव जहन्नकालट्ठितीएसु उववन्नो, जहन्नेणं अंतोमुहुत्तट्ठितीएसु, उक्कोसेण वि अंतोमुहुत्तट्ठितीएसु। एवं चेव वत्तव्वया निरवसेसा।

सो चेव उक्कोसकालट्ठितीएसु उववन्नो, जहन्नेणं बावीसवाससहस्सट्ठितीएसु, उक्कोसेण वि बावीसवाससहस्सट्ठितीएसु। सेसं तं चेव जाव अणुबंधो ति, णवरं जहन्नेणं एक्को वा दो वा तिन्नि वा, उक्कोसेणं संखेज्जा वा असंखेज्जा वा। भवाएसेणं जहन्नेणं दो भवग्गहणाइं, उक्कोसेणं अट्ठ भवग्गहणाइं। कालाएसेणं जहन्नेणं बावीसं वाससहस्साइं अंतोमुहुत्तमब्भहियाइं, उक्कोसेणं छावतरं वाससयसहस्सं, एवतियं कालं जाव करेज्जा।

सो चेव अप्पणा जहन्नकालट्ठितीओ जाओ, सो चेव पढमिल्लओ गमओ भाणियव्वो, नवरं लेस्साओ तिन्नि; ठिती जहन्नेणं अंतोमुहुत्तं, उक्कोसेण वि अंतोमुहुत्तं; अप्पसत्था अज्झवसाणा; अणुबंधो जहा ठिती। सेसं तं चेव।

सो चेव जहन्नकालट्ठितीएसु उववन्नो, स च्चेव चतुत्थगमकवत्तव्वता भाणियव्वा।

सो चेव उक्कोसकालट्ठितीएसु उववन्नो, एस चेव वत्तव्वता, नवरं जहन्नेणं एक्को वा दो वा तिन्नि वा, उक्कोसेणं संखेज्जा वा असंखेज्जा वा जाव भवाएसेणं जहन्नेणं दो भवग्गहणाइं, उक्कोसेणं अट्ठ भवग्गहणाइं। कालाएसेणं जहन्नेणं बावीसं वाससहस्साइं अंतोमुहुत्तमब्भहियाइं, उक्कोसेणं अट्ठासीतिं वाससहस्साइं चउहिं अंतोमुहुत्तेहिं अब्भहियाइं, एवतियं०।

सो चेव अप्पणा उक्कोसकालट्ठितीओ जातो, एवं तइयगमगसरिसो निरवसेसो भाणियव्वो, नवरं अप्पणा से ठिती जहन्नेणं बावीसं वाससहस्साइं, उक्कोसेण वि बावीसं वाससहस्साइं।

सो चेव अप्पणा जहन्नकालट्ठितीएसु उववन्नो, जहन्नेणं अंतोमुहुत्तं, उक्कोसेण वि अंतोमुहुत्तं। एवं जहा सत्तमगमगो जाव भवादेसो। कालाएसेणं जहन्नेणं बावीसं वाससहस्साइं अंतोमुहुत्तमब्भहियाइं, उक्कोसेणं अट्ठासीतिं वाससहस्साइं चउहिं अंतोमुहुत्तेहिं अब्भहियाइं, एवतियं०।

सो चेव उक्कोसकालट्ठितीएसु उववन्नो जहन्नेणं बावीसवाससहस्सट्ठितीएसु, उक्कोसेण वि बावीसवाससहस्सट्ठितीएसु। एस चेव सत्तमगमकवत्तव्वया जाव भवादेसो ति। कालाएसेणं जहन्नेणं चोयालीसं वाससहस्साइं, उक्कोसेणं छावतरं वाससयसहस्सं, एवतियं०।

जति आउकाइयएगिदियतिरिक्खजोणिएहिंतो उववज्जति किं सुहुमआउओ बादरआउओ एवं चउक्कओ भेदो भाणियव्वो जहा पुढविकाइयाणं।

आउकाइए णं भंते! जे भविए पुढविकाइएसु उववज्जितए से णं भंते ! केवतिकालट्ठितीएसु उववज्जिज्जा? गोयमा! जहन्नेणं अंतोमुहुत्तट्ठितीएसु, उक्कोसेणं बावीसवाससहस्सट्ठितीएसु। एवं पुढविकाइयगमगसरिसा नव गमगा भाणियव्वा। नवरं थिबुगाबिंदुसंठिते। ठिती जहन्नेणं अंतोमुहुत्तं, उक्कोसेणं सत्त वाससहस्साइं। एवं अणुबंधो वि। एवं तिसु गमएसु। ठिती संवेहो तइय-छट्ठ-सत्तमऽट्ठम-नवमेसु गमएसु भवादेसेणं जहन्नेणं दो भवग्गहणाइं, उक्कोसेणं अट्ठ भवग्गहणाइं सेसेसु चउसु गमएसु जहन्नेणं दो भवग्गहणाइं, उक्कोसेणं असंखेज्जाइं भवग्गहणाइं। तइयगमए कालाएसेणं जहन्नेणं बावीसं वाससहस्साइं अंतोमुहुत्तमब्भहियाइं, उक्कोसेणं सोलसुतरं वाससयसहस्सं, एवतियं०। छट्ठे गमए कालाएसेणं जहन्नेणं बावीसं वाससहस्साइं अंतोमुहुत्तमब्भहियाइं, उक्कोसेणं अट्ठासीतिं वाससहस्साइं चउहिं अंतोमुहुत्तेहिं अब्भहियाइं, एवतियं०।

सत्तमगमए कालाएसेणं जहन्नेणं सत्तवाससहस्साइं अंतोमुहुत्तमब्भहियाइं, उक्कोसेणं सोलसुतरं वाससयसहस्सं, एवतियं०। अट्ठमे गमए कालाएसेणं जहन्नेणं सत्त वाससहस्साइं

अंतोमुहुत्तमब्भहियाइं, उक्कोसेणं अट्ठावीसं वाससहस्साइं चउहिं अंतोमुहुत्तेहिं अब्भहियाइं, एवतियं०। नवमे गमए भवाएसेणं जहन्नेणं दो भवग्गहणाइं, उक्कोसेणं अट्ठ भवग्गहणाइं; कालाएसेणं जहन्नेणं एकूणतीसं वाससहस्साइं, उक्कोसेणं सोलसुत्तरं वाससयसहस्सं, एवतियं०। एवं नवसु वि गमएसु आउकाइयठिई जाणियव्वा।

जति तेउक्काइएहिंतो उवव०? तेउक्काइयाण वि एस चेव वत्तव्वया, नवरं नवसु वि गमएसु तिन्नि लेस्साओ। ठिती जाणियव्वा। तइयगमए कालादेसेणं जहन्नेणं बावीसं वाससहस्साइं अंतोमुहुत्तमब्भहियाइं, उक्कोसेणं अट्ठासीतिं वाससहस्साइं बारसहिं रातिंदिएहिं अब्भहियाइं, एवतियं०। एवं संवेहो उवजुंजिऊण भाणियव्वो।

जति वाउकाइएहिंतो०? वाउकाइयाण वि एवं चेव नव गमगा जहेव तेउकाइयाणं, नवरं पडागासंठिया पन्नता, तेउकाइया णं सूयीकलावसंठिया। संवेहो वाससहस्सेहिं कायव्वो, तइयगमए कालादेसेणं जहन्नेणं बावीसं वाससहस्साइं अंतोमुहुत्तमब्भहियाइं, उक्कोसेणं एणं वाससयसहस्सं, एवतियं०। एवं संवेहो उवजुंजिऊण भाणियव्वो।

जति वणस्सतिकाइएहिंतो०? वणस्सइकाइयाणं आउकाइयगमगरिसा नव गमगा भाणियव्वा, नवरं नाणासंठिया सरीरोगाहणा पन्नता-पढमएसु पच्छिल्लएसु य तिसु गमएसु जहन्नेणं अंगुलस्स असंखेज्जतिभागं, उक्कोसेणं सातिरेणं जोयणसहस्सं, मज्झिल्लएसु तिसु तहेव जहा पुढवि-काइयाणं। संवेहो ठिती य जाणितव्वा। ततिए गमए कालाएसेणं जहन्नेणं बावीसं वाससहस्साइं अंतोमुहुत्तं अब्भहियाइं, उक्कोसेणं अट्ठावीसुत्तरं वाससयसहसहस्सं, एवतियं०। एवं संवेहो उवजुंजिऊण भाणियव्वो।

**[८४७]** जदि बेइंदिएहिंतो उववज्जंति किं पज्जताबेइंदिएहिंतो उववज्जंति, अपज्जता-बेइंदिएहिंतो०? गोयमा! पज्जताबेइंदिएहिंतो उवव०, अपज्जताबेइंदिएहिंतो वि उववज्जंति।

बेइंदिए णं भंते! जे भविए पुढविकाइएसु उववज्जितए से णं भंते! केवतिकाल०?

गोयमा! जहन्नेणं अंतोमुहुत्तट्ठितीएसु, उक्कोसेणं बावीसवाससहस्सट्ठितीएसु।

ते णं भंते! जीवा एगसमएणं०? गोयमा! जहन्नेणं एक्को वा दो वा तिन्नि वा, उक्कोसेणं संखेज्जा वा, असंखेज्जा वा उववज्जंति। सेवट्ठसंघयणी। ओगाहणा जहन्नेणं अंगुलस्स असंखेज्जतिभागं, उक्कोसेणं बारस जोयणाइं। हुंडसंठिता। तिन्नि लेसाओ। सम्मद्धिट्ठी वि, मिच्छादिट्ठी वि, नो सम्मामिच्छादिट्ठी। दो णाणा, दो अन्नाणा नियमं। नो मणजोगी, वइजोगी वि, कायजोगी वि। उवयोगो दुविहो वि। चत्तारि सण्णाओ। चत्तारि कसाया। दो इंदिया पन्नता, तं जहा-जिब्भंदिए य फासिंदिए य। तिन्नि समुग्घाया। सेसं जहा पुढविकाइयाणं, नवरं ठिती जहन्नेणं अंतोमुहुत्तं, उक्कोसेणं बारस संवच्छराइं। एवं अणुबंधो वि। सेसं तं चेव। भवाएसेणं जहन्नेणं दो भवग्गहणाइं, उक्कोसेणं संखेज्जाइं भवग्गहणाइं। कालाएसेणं जहन्नेणं दो अंतोमुहुत्ता, उक्कोसेणं संखेज्जं कालं, एवतियं०।

सो चेव जहन्नकालट्ठितीएसु उववन्नो, एस चेव वत्तव्वया सव्वा।

सो चेव उक्कोसकालट्ठितीएसु उववन्नो, एस चेव बेदियस्स लद्धी, नवरं भवाएसेणं जहन्नेणं दो भवग्गहणाइं, उक्कोसेणं अट्ठ भवग्गहणाइं। कालाएसेणं जहन्नेणं बावीसं वाससहस्साइं अंतोमुहुत्तमब्भहियाइं, उक्कोसेणं अट्ठासीतिं वाससहस्साइं अडयालीसाए संवच्छरेहिं अब्भहियाइं, एवतियं०।

सो चेव अप्पणा जहन्नकालट्ठितीओ जाओ, तस्स वि एस चेव वत्तव्वता तिसु वि गमएसु,

नवरं इमाइं सत नाणत्ताइं-सरीरोगाहणा जहा पुढविकाइयाणं; नो सम्महिट्ठी, मिच्छादिट्ठी, नो सम्मामिच्छादिट्ठी; दो अन्नाणा णियमं; नो मणजोगी, नो वइजोगी, कायजोगी; ठिती जहन्नेणं अंतोमुहुत्तं, उक्कोसेण वि अंतोमुहुत्तं; अज्झवसाणा अप्पसत्था; अणुबंधो जहा ठिती। संवेहो तहेव आदिल्लेसु दोसु गमएसु, ततियगमए भवादेसो तहेव अट्ठ भवग्गहणाइं। कालाएसेणं जहन्नेणं बावीसं वाससहस्साइं अंतोमुहुत्तमब्भहियाइं, उक्कोसेणं अट्ठासीतिं वाससहस्साइं चउहिं अंतोमुहुत्तेहिं अब्भहियाइं।

सो चेव अप्पणा उक्कोसकालट्ठितीओ जाओ, एयस्स वि ओहियगमगसरिसा तिन्नि गमगा भाणियच्चा, नवरं तिसु वि गमएसु ठिती जहन्नेणं बारस संवच्छराइं, उक्कोसेण वि बारस संवच्छराइं। एवं अणुबंधो वि। भवाएसेणं जहन्नेणं दो भवग्गहणाइं, उक्कोसेणं अट्ठ भवग्गहणाइं। कालाएसेणं उवयुज्जिऊण भाणियत्वं जाव नवमे गमए जहन्नेणं बावीसं वाससहस्साइं बारसहिं संवच्छरेहिं अब्भहियाइं, उक्कोसेणं अट्ठासीतिं वाससहस्साइं अडयालीसाए संवच्छरेहिं अब्भहियाइं, एवतियं०।

जति तेइंदिएहिंतो उववज्जंति०? एवं चेव नव गमका भाणियच्चा। नवरं आदिल्लेसु तिसु वि गमएसु सरीरोगाहणा जहन्नेणं अंगुलस्स असंखेज्जतिभागं, उक्कोसेणं तिन्नि गाउयाइं। तिन्नि इंदियाइं। ठिती जहन्नेणं अंतोमुहुत्तं, उक्कोसेणं एकूणपण्णं रातिंदियाइं। ततियगमए कालाएसेणं जहन्नेणं बावीसं वाससहस्साइं अंतोमुहुत्तमब्भहियाइं, उक्कोसेणं अट्ठासीतिं वाससहस्साइं छण्णउयरातिंदियसतमब्भहियाइं, एवतियं०। मज्झिमा तिन्नि गमगा तहेव। पच्छिमा वि तिण्णि गमगा तहेव, नवरं ठिती जहन्नेणं एकूणपण्णं राइंदियाइं, उक्कोसेण वि एकूणपण्णं राइंदियाइं। संवेहो उवजुज्जिऊण भाणितव्वो।

जति चउरिंदिएहिंतो उवव०? एवं चेव चउरिंदियाण वि नव गमगा भाणियच्चा, नवरं एएसु चेव ठाणेसु नाणत्ता भाणितव्वा--सरीरोगाहणा जहन्नेणं अंगुलस्स असंखेज्जतिभागं, उक्कोसेणं चत्तारि गाउयाइं। ठिती जहन्नेणं अंतोमुहुत्तं, उक्कोसेणं छम्मासा। एवं अणुबंधो वि। चत्तारि इंदिया। सेसं तहेव जाव नवमगमए कालाएसेणं जहन्नेणं बावीसं वाससहस्साइं छहिं मासेहिं अब्भहियाइं, उक्कोसेणं अट्ठासीतिं वाससहस्साइं चउवीसाए मासेहिं अब्भहियाइं, एवतियं०।

जइ पंचेदियतिरिक्ख-जोणिएहिंतो उववज्जंति किं सन्नि-पंचेदियतिरिक्खजोणिएहिंतो उवव-ज्जंति असन्निपंचेदियतिरिक्खजो०? गोयमा! सन्निपंचेदिय०, असन्निपंचेदिय०।

जइ असण्णिपंचेदिय० किं जलचरेहिंतो उवव० जाव किं पज्जत्तएहिंतो उववज्जंति, अपज्जत्तएहिंतो उव०? गोयमा! पज्जत्तएहिंतो वि उवव०, अपज्जत्तएहिंतो वि उववज्जंति।

असन्निपंचेदियतिरिक्खजोणिए णं भंते! जे भविए पुढविकाइएसु उववज्जत्तए से णं भंते! केवति०? गोयमा! जहन्नेणं अंतोमुहुत्त० उक्कोसेणं बावीसवाससह०।

ते णं भंते! जीवा०? एवं जहेव बेइंदियस्स ओहियगमए लद्धी तहेव, नवरं सरीरोगाहणा जहन्नेणं अंगुलस्स असंखेज्जति०, उक्कोसेणं जोयणसहस्सं। पंच इंदिया। ठिती अणुबंधो य जहन्नेणं अंतोमुहुत्तं, उक्कोसेणं पुव्वकोडी। सेसं तं चेव। भवाएसेणं जहन्नेणं दो भवग्गहणाइं, उक्कोसेणं अट्ठ भवग्गहणाइं। कालादेसेणं जहन्नेणं दो अंतोमुहुत्ता, उक्कोसेणं चत्तारि पुव्वकोडीओ अट्ठासीतीए वाससहस्सेहिं अब्भहियाओ, एवतियं०। नवसु वि गमएसु कायसंवेहो भवाएसेणं जहन्नेणं दो भवग्गहणाइं, उक्कोसेणं अट्ठ भवग्गहणाइं। कालाएसेणं उवजुज्जिऊण भाणितव्वं, नवरं मज्झिमएसु तिसु गमएसु-जहेव बेइंदियस्स मज्झिल्लएसु तिसु गमएसु। पच्छिल्लएसु तिसु गमएसु जहा एयस्स चेव पढमगमए, नवरं

ठिती अणुबंधो जहन्नेणं पुव्वकोडी, उक्कोसेण वि पुव्वकोडी। सेसं तहेव जाव नवमगमए जहन्नेणं पुव्वकोडी बावीसाए वाससहस्सेहिं अब्भहिया, उक्कोसेणं चत्तारि पुव्वकोडीओ अट्ठासीतीए वाससहस्सेहिं अब्भहियाओ, एवतियं कालं सेविज्जाओ।

जदि सन्निपंचेदियतिरिक्खजोणिए० किं संखेज्जवासाउय०, असंखेज्जवासाउय०? गोयमा! संखेज्जवासाउय०, नो असंखेज्जवासाउय०।

जदि संखेज्जवासाउय० किं जलचरेहितो०? सेसं जहा असण्णीणं जाव-

ते णं भंते! जीवा एगसमएणं केवतिया उववज्जंति०? एवं जहा रयणप्पभाए उववज्जमाणस्स सन्निस्स तहेव इह वि, नवरं ओगाहणा जहन्नेणं अंगुलस्स असंखेज्जतिभागं, उक्कोसेणं जोयणसहस्सं। सेसं तहेव जाव कालादेसेणं जहन्नेणं दो अंतोमुहुत्ता, उक्कोसेणं चत्तारि पुव्वकोडीओ अट्ठासीतीए वाससहस्सेहिं अब्भहियाओ, एवतियं०। एवं संवेहो

णवसु वि गमएसु जहा असण्णीणं तहेव निरवसेसं। लद्धी से आदिल्लएसु तिसु वि गमएसु एस चेव, मज्झिल्लएसु वि तिसु गमएसु एस चेव। नवरं इमाइं नव नाणताइं-ओगाहणा जहन्नेणं अंगुलस्स असंखेज्जति०, उक्कोसेण वि अंगुलस्स असंखेज्जति०। तिन्नि लेस्साओ, मिच्छादिट्ठी, दो अन्नाणा, कायजोगी, तिन्नि समुग्घाया; ठिती जहन्नेणं अंतोमुहुत्तं, उक्कोसेण वि अंतोमुहुत्तं; अप्पसत्था अज्झवसाणा, अणुबंधो जहा ठिती। सेसं तं चेव। पच्छिल्लएसु तिसु गमएसु जहेव पढमगमए, नवरं ठिती अणुबंधो जहन्नेणं पुव्वकोडी, उक्कोसेण वि पुव्वकोडी। सेसं तं चेव।

**[८४८]** जदि मणुस्सेहितो उववज्जंति किं सन्निमणुस्सेहितो उवव०, असन्निमणुस्सेहितो०? गोयमा! सन्निमणुस्सेहितो०, असण्णिमणुस्सेहितो वि उववज्जंति।

असन्निमणुस्से णं भंते! जे भविए पुढविकाइएसु० से णं भंते! केवतिकाल०? एवं जहा असन्निपंचेदियतिरिक्खस्स जहन्नकालट्ठितीयस्स तिन्नि गमगा तहा एतस्स वि ओहिया तिन्नि गमगा भाणियव्वा तहेव निरवसेसं। सेसा छ न भण्णंति।

जइ सन्निमणुस्सेहितो उववज्जंति किं संखेज्जवासाउय०, असंखेज्जवासाउय०? गोयमा! संखेज्जवासाउय०, णो असंखेज्जवासाउय०।

जदि संखेज्जवासाउय० किं पज्जता०, अपज्जता०? गोयमा! पज्जतासंखे०, अपज्जतासंखेज्जवासा०।

सन्निमणुस्से णं भंते! जे भविए पुढविकाइएसु उवव० से णं भंते! केवतिकाल०? गोयमा! जहन्नेणं अंतोमुहुत्त०, उक्कोसेणं बावीसवाससहस्सट्ठितीएसु।

ते णं भंते! जीवा०? एवं जहेव रयणप्पभाए उववज्जमाणस्स तहेव तिसु वि गमएसु लद्धी। नवरं ओगाहणा जहन्नेणं अंगुलस्स असंखेज्जिभागं, उक्कोसेणं पंच धणुसताइं; ठिती जहन्नेणं अंतोमुहुत्तं, उक्कोसेणं पुव्वकोडी। एवं अणुबंधो। संवेहो नवसु गमएसु जहेव सन्निपंचेदियस्स। मज्झिल्लएसु तिसु गमएसु लद्धी-जहेव सन्निपंचेदियस्स मज्झिल्लएसु तिसु। सेसं तं चेव निरवसेसं। पच्छिल्ला तिन्नि गमगा जहा एयस्स चेव ओहिया गमगा, नवरं ओगाहणा जहन्नेणं पंच धणुसयाइं, उक्कोसेण वि पंच धणुसयाइं; ठिती अणुबंधो जहन्नेणं पुव्वकोडी, उक्कोसेण वि पुव्वकोडी। सेसं तहेव, नवरं पच्छिल्लएसु गमएसु संखेज्जा उववज्जंति, नो असंखेज्जा उवव०।

जति देवेहिंतो उववज्जंति किं भवणवासिदेवेहिंतो उववज्जंति, वाणमंतर०, जोतिसियदेवेहिंतो उवव०, वेमाणियदेवेहिंतो उववज्जंति? गोयमा! भवणवासिदेवेहिंतो वि उववज्जंति जाव वेमाणियदेवेहिंतो वि उववज्जंति।

जइ भवणवासिदेवेहिंतो उववज्जंति किं असुरकुमारभवणवासिदेवेहिंतो उववज्जंति जाव थणियकुमारभवणवासिदेवेहिंतो०? गोयमा! असुरकुमारभवणवासिदेवेहिंतो वि उववज्जंति जाव थणियकुमारभवणवासिदेवेहिंतो वि उववज्जंति।

असुरकुमारे णं भंते! जे भविए पुढविकाइएसु उववज्जित्तए से णं भंते! केवति०? गोयमा! जहन्नेणं अंतोमुहुत्त०, उक्कोसेणं बावीसवाससहस्सट्ठिती०।

ते णं भंते! जीवा० पुच्छा। गोयमा! जहन्नेणं एक्को वा दो वा तिन्नि वा, उक्कोसेणं संखेज्जा वा असंखेज्जा वा उवव०।

तेसि णं भंते! जीवाणं सरीरगा किंसंघयणी पन्नता? गोयमा! छण्हं संघयणाणं असंघयणी जाव परिणमंति।

तेसि णं भंते! जीवाणं केमहालिया सरीरोगाहणा०? गोयमा! दुविहा पन्नता, तं जहा- भवधारणिज्जा य, उत्तरवेउव्विया य। तत्थ णं जा सा भवधारणिज्जा सा जहन्नेणं अंगुलस्स असंखेज्जतिभागं, उक्कोसेणं सत्त रयणीओ। तत्थ णं जा सा उत्तरवेउव्विया सा जहन्नेणं अंगुलस्स असंखेज्जतिभागं, उक्कोसेणं जोयणसयसहस्सं।

तेसि णं भंते! जीवाणं सरीरगा किंसंठिता पन्नता? गोयमा! दुविहा पन्नता, तं जहा- भवधारणिज्जा य, उत्तरवेउव्विया य। तत्थ णं जे ते भवधारणिज्जा ते समचतुरंसंठिया पन्नता। तत्थ णं जे ते उत्तरवेउव्विया ते नाणासंठिया पन्नता। लेस्साओ चत्तारि। दिट्ठी तिविहा वि। तिण्णि णाणा नियमं, तिण्णि अण्णाणा भयणाए। जोगो तिविहो वि। उवयोगो दुविहो वि। चत्तारि सण्णाओ। चत्तारि कसाया। पंच इंदिया। पंच समुग्घाया। वेयणा दुविहा वि। इत्थिवेदगा वि, पुरिसवेदगा वि, नो नपुंसगवेयगा। ठिती जहन्नेणं दस वाससहस्साइं, उक्कोसेणं सातिरेगं सागरोवमं। अज्झवसाणा असंखेज्जा, पसत्था वि अप्पसत्था वि। अणुबंधो जहा ठिती। भवादेसेणं दो भवग्गहणाइं। कालादेसेणं जहन्नेणं दस वाससहस्साइं अंतोमुहुत्तमब्भहियाइं, उक्कोसेणं सातिरेगं सागरोवमं बावीसाए वाससहस्सेहिं अब्भहियं, एवतियं० एवं णव वि गमा नेयव्वा, नवरं मज्झिल्लएसु पच्छिल्लएसु य तिसु गमएसु असुरकुमाराणं ठितिवेसेसो जाणियव्वो। सेसा ओहिया चेव लद्धी कायसंवेहं च जाणेज्जा। सव्वत्थ दो भवग्गहणा जाव णवमगमए कालादेसेणं जहन्नेणं सातिरेगं सागरोवमं बावीसाए वाससहस्सेहिमब्भहियं, उक्कोसेणं वि सातिरेगं सागरोवमं बावीसाए वाससहस्सेहिं अब्भहियं, एवतियं०।

नागकुमारे णं भंते! जे भविए पुढविकाइएसु०? एस चेव वत्तव्वया जाव भवादेसो ति। णवरं ठिती जहन्नेणं दस वाससहस्साइं, उक्कोसेणं देसूणाइं दो पलितोवमाइं। एवं अणुबंधो वि, कालाएसेणं जहन्नेणं दस वाससहस्साइं अंतोमुहुत्तमब्भहियाइं, उक्कोसेणं देसूणाइं दो पलिओवमाइं बावीसाए वाससहस्सेहिं अब्भहियाइं। एवं णव वि गमगा असुरकुमारगमगसरिसा, नवरं ठितिं कालाएसं च जाणेज्जा। एवं जाव थणियकुमाराणं।

जति वाणमंतरेहिंतो उववज्जंति किं पिसायवाणमंतर० जाव गंधव्ववाणमंतर०? गोयमा!

पिसायवाणमंतर० जाव गंधव्ववाणमंतर०।

वाणमंतरदेवे णं भंते! जे भविए पुढविकाइए०? एएसिं पि असुरकुमारगमगसरिसा नव गमगा भाणियव्वा। नवरं ठितिं कालादेसं च जाणेज्जा। ठिती जहन्नेणं दस वाससहस्साइं, उक्कोसेणं पलिओवमं। सेसं तहेव।

जति जोतिसियदेवेहिंतो उवव० किं चंदविमाणजोतिसियदेवेहिंतो उववज्जंति जाव ताराविमाणजोतिसियदेवेहिंतो उववज्जंति? गोयमा! चंदविमाण० जाव ताराविमाण०।

जोतिसियदेवे णं भंते! जे भविए पुढविकाइए०। लद्धी जहा असुरकुमाराणं। णवरं एगा तेउलेस्सा पन्नता। तिन्नि नाणा, तिन्नि अन्नाणा नियमं। ठिती जहन्नेणं अट्ठभागपलिओवमं, उक्कोसेणं पलिओवमं वाससयसहस्समब्भहियं। एवं अणुबंधो वि कालाएसेणं जहन्नेणं अट्ठभागपलिओवमं अंतोमुहुत्तमब्भहियं, उक्कोसेणं पलिओवमं वाससयसहस्सेणं बावीसाए वाससहस्सेहिं अब्भहियं, एवतियं०। एवं सेसा वि अट्ठ गमगा भाणियव्वा, नवरं ठितिं कालाएसं च जाणेज्जा।

जइ वेमाणियदेवेहिंतो उववज्जंति किं कप्पोवगवेमाणिय० कप्पातीयवेमाणिय०? गोयमा! कप्पोवगवेमाणिय०, नो कप्पातीयवेमाणिय०।

जदि कप्पोवगवेमाणिय० किं सोहम्मकप्पोवगवेमाणिय० जाव अच्चुयकप्पोवगवेमा०? गोयमा! सोहम्मकप्पोवगवेमाणिय०, ईसाणकप्पोवगवेमाणिय०, नो सणंकुमारकप्पोवगवेमाणिय० जाव नो अच्चुयकप्पोवगवेमाणिय०।

सोहम्मदेवे णं भंते! जे भविए पुढविकाइएसु उवव० से णं भंते! केवति०? एवं जहा जोतिसियस्स गमगो। णवरं ठिती अणुबंधो य जहन्नेणं पलिओवमं, उक्कोसेणं दो सागरोवमाइं। कालादेसेणं जहण्णेणं पलिओवमं अंतोमुहुत्तमब्भहियं, उक्कोसेणं दो सागरोवमाइं बावीसाए वाससहस्सेहिं अब्भहियाइं, एवतियं कालं०।

एवं सेसा वि अट्ठ गमगा भाणियव्वा, णवरं ठितिं कालाएसं च जाणेज्जा।

ईसाणदेवे णं भंते! जे भविए०? एवं ईसाणदेवेण वि नव गमगा भाणियव्वा, नवरं ठिती अणुबंधो जहन्नेणं सातिरेगं पलिओवमं, उक्कोसेणं सातिरेगाइं दो सागरोवमाइं। सेसं तं चेव।

सेवं भंते! सेवं भंते! जाव विहरति।

**\*चउवीसइमे सते बारसमो उद्देशो समतो\***

## ० तेरसमो उद्देशो ०

नमो सुयदेवयाए।

[८४९]आउकाइया णं भंते! कओहिंतो उववज्जंति?० एवं जहेव पुढविकाइयउद्देशए जाव पुढविकाइये णं भंते! जे भविए आउकाइएसु उववज्जित्तए से णं भंते! केवति०? गोयमा! जहन्नेणं अंतोमुहुत्त०, उक्कोसेणं सत्तवाससहस्सट्ठितीएसु उववज्जेज्जा।

एवं पुढविकाइयउद्देशगसरिसो भाणियव्वो, णवरं ठिइं संवेहं च जाणेज्जा। सेसं तहेव।

सेवं भंते! सेवं भंते! ति जाव विहरति।

**\*चउवीसइमे सते तेरसमो उद्देशो समतो\***

### ० चउदसमो उद्देशो ०

[८५०] तेउक्काइया णं भंते! कओहंतो उववज्जंति?० एवं पुढविकाइयउद्देशगसरिसो उद्देशो भाणितव्वो, नवरं ठित्तिं संवेहं च जाणेज्जा। देवेहंतो न उववज्जंति। सेसं तं चेव।

सेवं भंते! सेवं भंते! ति जाव विहरति।

**\*चउवीसइमे सते चउदसमो उद्देशो समतो\***

### ० पण्णरसमो उद्देशो ०

[८५१] वाउकाइया णं भंते! कओहंतो उववज्जंति?० एवं जहेव तेउक्काइयउद्देशओ तहेव, नवरं ठित्तिं संवेहं च जाणेज्जा। सेवं भंते! सेवं भंते! ति०।

**\*चउवीसइमे सते पनरसमो उद्देशो समतो\***

### ० सोलसमो उद्देशओ ०

[८५२] वणस्सतिकाइया णं भंते! कओहंतो उववज्जंति?० एवं पुढविकाइयसरिसो उद्देशो, नवरं जाहे वणस्सतिकाइओ वणस्सतिकाइएसु उववज्जति ताहे पढम-बितिय-चतुत्थ-पंचमेसु गमएसु परिमाणं अणुसमयं अविरहियं अणंता उववज्जंति; भवाएसेणं जहन्नेणं दो भवग्गहणाइं, उक्कोसेणं अणंताइं भवग्गहणाइं; कालाएसेणं जहन्नेणं दो अंतोमुहुत्ता, उक्कोसेणं अणंतं कालं; एवतियं०। सेसा पंच गमा अट्ठभवग्गहणिया तहेव; नवरं ठित्तिं संवेहं च जाणेज्जा।

सेवं भंते! सेवं भंते! ति०।

**\*चउवीसइमे सते सोलसमो उद्देशो समतो\***

### ० सत्तरसमो उद्देशो ०

[८५३] बेइंदिया णं भंते! कओहंतो उववज्जंति ?० जाव पुढविकाइए णं भंते ! जे भविए बेइंदिएसु उववज्जितए से णं भंते! केवति०? स च्चेव पुढविकाइयस्स लद्धी जाव कालाएसेणं जहन्नेणं दो अंतामुहुत्ता, उक्कोसेणं संखेज्जाइं भवग्गहणाइं; एवतियं०।

एवं तेसु चेव चउसु गमएसु संवेहो, सेसेसु पंचसु तहेव अट्ठ भवा। एवं जाव चतुरिंदिएणं समं चउसु संखेज्जा भवा, पंचसु अट्ठ भवा, पंचेदियतिरिक्खजोगिय-मणुस्सेसु समं तहेव अट्ठ भवा। देवेसु न चेव उववज्जंति, ठित्तिं संवेहं च जाणेज्जा।

सेवं भंते! सेवं भंते! ति०।

**\*चउवीसइमे सते सत्तरसमो उद्देशो समतो\***

### ० अट्ठारसमो उद्देशो ०

[८५४] तेइंदिया णं भंते! कओहंतो उववज्जंति?० एवं तेइंदियाणं जहेव बेइंदियाणं उद्देशो, नवरं ठित्तिं संवेहं च जाणेज्जा। तेउकाइएसु समं ततियगमे उक्कोसेणं अट्ठतराइं बे राइंदियसयाइं। बेइंदिएहिं समं ततियगमे उक्कोसेणं अडयालीसं संवच्छराइं छण्णउयराइंदियसयमब्भहियाइं। तेइंदिएहिं समं ततियगमे उक्कोसेणं बाणउयाइं तिन्नि राइंदियसयाइं। एवं सव्वत्थ जाणेज्जा जाव सन्निमणुस्स ति।

सेवं भंते! सेवं भंते! ति०।

**\*चउवीसइमे सते अट्ठारसमो उद्देशो समतो\***

## ० एगूणवीसइमो उद्देशो ०

[८५५] चउरिंदिया णं भंते! कओहितो उववज्जंति?० जहा तेइंदियाणं उद्देशओ तहा चउरिंदियाण वि,नवरं ठितिं संवेहं च जाणेज्जा।

सेवं भंते! सेवं भंते! ति०।

**\*चउवीसइमे सते एगूणवीसइमो उद्देशो समतो\***

## ० वीसइमो उद्देशओ ०

[८५६] पंचिंदियतिरिक्खजोगिया णं भंते! कओहितो उववज्जंति? किं नेरतिएहिंतो उवव०, तिरिक्ख-मणुस्स-देवेहिंतो उववज्जंति? गोयमा! नेरइएहिंतो वि उवव०, तिरिक्ख-मणुएहिंतो वि उववज्जंति, देवेहिंतो वि उववज्जंति।

जइ नेरइएहिंतो उववज्जंति किं रयणप्पभपुढविनेरइएहिंतो उववज्जंति जाव अहेसत्तम पुढवि नेरइएहिंतो उववज्जंति? गोयमा! रयणप्पभपुढविनेरइएहिंतो वि उवव० जाव अहेसत्तमपुढविनेरइएहिंतो वि०।

रयणप्पभपुढविनेरइए णं भंते! जे भविए पंचिंदियतिरिक्खजोगिएसु उववज्जितए से णं भंते! केवतिकालट्ठितीएसु उवव०? गोयमा! जहन्नेणं अंतोमुहुत्तट्ठितीएसु, उक्कोसेणं पुव्वकोडिआउएसु उववज्जेज्जा।

ते णं भंते! जीवा एगसमएणं केवइया उवव०? एवं जहा असुरकुमाराणं वत्तव्वया। नवरं संघयणे पोग्गला अणिट्ठा अकंता जाव परिणमंति। ओगाहणा दुविहा पन्नता, तं जहा--भवधारणिज्जा य उत्तरवेउव्विया य। तत्थ णं जा सा भवधारणिज्जा सा जहन्नेणं अंगुलस्स असंखेज्जतिभागं, उक्कोसेणं सत्त धणूइं तिन्नि रयणीओ छच्च अंगुलाइं। तत्थ णं जा सा उत्तरवेउव्विया सा जहन्नेणं अंगुलस्स संखेज्जतिभागं, उक्कोसेणं पन्नरस धणूइं अइढातिज्जाओ य रयणीओ।

तेसि णं भंते! जीवाणं सरीरगा किंसंठिया पन्नता? गोयमा! दुविहा पन्नता, तंजहा- भवधार-णिज्जा य उत्तरवेउव्विया य। तत्थ णं जे ते भवधारणिज्जा ते हुंडसंठिया पन्नता। तत्थ णं जे ते उत्तरवेउव्विया ते वि हुंडसंठिया पन्नता। एगा काउलेस्सा पन्नता। समुग्घाया चत्तारि। नो इत्थिवेदगा, नो पुरिसवेदगा; नपुंसगवेदगा। ठिती जहन्नेणं दस वाससहस्साइं, उक्कोसेणं सागरोवमं। एवं अणुबंधो वि। सेसं तहेव। भवाएसेणं जहन्नेणं दो भवग्गहणाइं, उक्कोसेणं अट्ठ भवग्गहणाइं कालाएसेणं जहन्नेणं दस वाससहस्साइं अंतोमुहुत्तमब्भहियाइं, उक्कोसेणं चत्तारि सागरोवमाइं चउहिं पुव्वकोडीहिं अब्भहियाइं, एवतियं०।

सो चेव जहन्नकालट्ठितीएसु उववन्नो, जहन्नेणं अंतोमुहुत्तट्ठितीएसु उववन्नो, उक्कोसेण वि अंतोमुहुत्तट्ठितीएसु उववन्नो। अवसेसं तहेव, नवरं कालाएसेणं जहन्नेणं तहेव, उक्कोसेणं चत्तारि सागरोवमाइं चउहिं अंतोमुहुत्तेहिं अब्भहियाइं; एवतियं कालं०।

एवं सेसा वि सत्त गमगा भाणियव्वा जहेव नेरइयउद्देशए। सन्निपंचेदिएहिं समं णेरइयाणं मज्झिमएसु य तिसु गमएसु पच्छिमएसु य तिसु गमएसु ठितिनाणत्तं भवति। सेसं तं चेव। सव्वत्थ ठितिं संवेहं च जाणेज्जा।

सक्करप्पभापुढविनेरइए णं भंते! जे भविए०? एवं जहा रयणप्पभाए नव गमगा तहेव

सक्करप्पभाए वि, नवरं सरीरोगाहणा जहा ओगाहणसंठाणे; तिन्नि नाणा तिन्नि अन्नाणा नियमं। ठिति-अणुबंधा पुव्वभणिया। एवं नव वि गमगा उवजुंजिऊण भाणियच्वा।

एवं जाव छट्ठपुढवी, नवरं ओगाहणा-लेस्सा-ठिति-अणुबंधा संवेहा य जाणियच्वा।

अहेसत्तमपुढविनेरइए णं भंते! जे भविए०? एवं चेव णव गमगा, नवरं ओगाहणा-लेस्सा-ठिति-अणुबंधा जाणियच्वा। संवेहे भवाएसेणं जहन्नेणं दो भवग्गहणाइं, उक्कोसेणं छ भवग्गहणाइं। कालाएसेणं जहन्नेणं बावीसं सागरोवमाइं अंतोमुहुत्तमब्भहियाइं, उक्कोसेणं छावट्ठिं सागरोवमाइं तिहिं पुव्वकोडीहिं अब्भहियाइं; एवतियं०। आदिल्लएसु छसु गमएसु जहन्नेणं दो भवग्गहणाइं, उक्कोसेणं छ भवग्गहणाइं। पच्छिल्लएसु तिसु गमएसु जहन्नेणं दो भवग्गहणाइं, उक्कोसेणं चत्तारि भवग्गहणाइं। लद्धी नवसु वि गमएसु जहा पढमगमए, नवरं ठितिविसेसो कालाएसो य-बितियगमए जहन्नेणं बावीसं सागरोवमाइं अंतोमुहुत्तमब्भहियाइं, उक्कोसेणं छावट्ठिं सागरोवमाइं तिहिं अंतोमुहुत्तेहिं अब्भहियाइं; एवतियं कालं०। ततियगमए जहन्नेणं बावीसं सागरोवमाइं पुव्वकोडीए अब्भहियाइं, उक्कोसेणं छावट्ठिं सागरोवमाइं तिहिं पुव्वकोडीहिं अब्भहियाइं। चउत्थगमे जहन्नेणं बावीसं सागरोवमाइं अंतोमुहुत्तमब्भहियाइं, उक्कोसेणं छावट्ठिं सागरोवमाइं तिहिं पुव्वकोडीहिं अब्भहियाइं। पंचमगमए जहन्नेणं बावीसं सागरोवमाइं अंतोमुहुत्तमब्भहियाइं, उक्कोसेणं छावट्ठिं सागरोवमाइं तिहिं अंतोमुहुत्तेहिं अब्भहियाइं। छट्ठगमए जहन्नेणं बावीसं सागरोवमाइं पुव्वकोडीए अब्भहियाइं, उक्कोसेणं छावट्ठिं सागरोवमाइं तिहिं पुव्वकोडीहिं अब्भहियाइं। सत्तमगमए जहन्नेणं तेत्तीसं सागरोवमाइं अंतोमुहुत्तमब्भहियाइं, उक्कोसेणं छावट्ठिं सागरोवमाइं दोहिं पुव्वकोडीहिं अब्भहियाइं। अट्ठमगमए जहन्नेणं तेत्तीसं सागरोवमाइं अंतोमुहुत्तमब्भहियाइं, उक्कोसेणं छावट्ठिं सागरोवमाइं दोहिं अंतोमुहुत्तेहिं अब्भहियाइं। णवमगमए जहन्नेणं तेत्तीसं सागरोवमाइं पुव्वकोडीए अब्भहियाइं, उक्कोसेणं छावट्ठिं सागरोवमाइं दोहिं पुव्वकोडीहिं अब्भहियाइं, एवतियं०।

जति तिरिक्खजोणिएहिंतो उववज्जंति किं एगिंदियतिरिक्खजोणिएहिंतो०? एवं उववाओ जहा पुढविकाइयउद्देशए जाव-

पुढविकाइए णं भंते! जे भविए पंचेदियतिरिक्खजोणिएसु उववज्जितए से णं भंते! केवति०? गोयमा! जहन्नेणं अंतोमुहुत्तट्ठितीएसु, उक्कोसेणं पुव्वकोडिआउएसु उववज्जति।

ते णं भंते! जीवा०? एवं परिमाणाइया अणुबंधपज्जवसाणा जा चेव अप्पणो सट्ठाणे वत्तव्वया सा चेव पंचेदियतिरिक्खजोणिएसु उववज्जमाणस्स भाणियच्वा, नवरं नवसु वि गमएसु परिमाणे जहन्नेणं एक्को वा दो वा तिन्नि वा, उक्कोसेणं संखेज्जा वा असंखेज्जा वा उववज्जंति। भवादेसेण वि नवसु वि गमएसु-भवाएसेणं जहन्नेणं दो भवग्गहणाइं, उक्कोसेणं अट्ठ भवग्गहणाइं। सेसं तं चेव। कालाएसेणं उभओ ठितिं करेज्जा।

जदि आउकाइएहिंतो उवव०? एवं आउकाइयाण वि।

एवं जाव चउरिदिया उववाएयच्वा, नवरं सव्वत्थ अप्पणो लद्धी भाणियच्वा। नवसु वि गमएसु भवाएसेणं जहन्नेणं दो भवग्गहणाइं, उक्कोसेणं अट्ठ भवग्गहणाइं। कालाएसेणं उभओ ठितिं करेज्जा सव्वेसिं सव्वगमएसु। जहेव पुढविकाइएसु उववज्जमाणं लद्धी तहेव। सव्वत्थ ठितिं संवेहं च

जाणेज्जा।

जदि पंचेंदियतिरिक्खजोणिएहिंतो उववज्जंति किं सन्निपंचेंदियतिरिक्खजोणिएहिंतो उववज्जंति, असन्निपंचेंदियतिरिक्खजोणि०? गोयमा! सन्निपंचेंदिय०, असन्निपंचेंदिय०। भेदो जहेव पुढविकाइएसु उववज्जमाणस्स जाव--

असन्निपंचेंदियतिरिक्खजोणिए णं भंते! जे भविए पंचेंदियतिरिक्खजोणिएसु उववज्जित्तए से णं भंते! केवतिकाल०? गोयमा! जहन्नेणं अंतोमुहुत्त०, उक्कोसेणं पलिओवमस्स असंखेज्जतिभागट्ठितीएसु उवव०।

ते णं भंते!०? अवसेसं जहेव पुढविकाइएसु उववज्जमाणस्स असन्निस्स तहेव निरवसेसं जाव भवाएसो ति। कालाएसेणं जहन्नेणं दो अंतोमुहुत्ता, उक्कोसेणं पलिओवमस्स असंखेज्जतिभागं पुव्वकोडिपुहत्तमब्भहियं; एवतियं०।

बितियगमए एस चेव लद्धी, नवरं कालाएसेणं जहन्नेणं दो अंतोमुहुत्ता, उक्कोसेणं चत्तारि पुव्वकोडीओ चउहिं अंतोमुहुत्तेहिं अब्भहियाओ; एवतियं०।

सो चेव उक्कोसकालट्ठितीएसु उववन्नो, जहन्नेणं पलिओवमस्स असंखेज्जतिभाग-ट्ठितीएसु, उक्कोसेण वि पलिओवमस्स असंखेज्जतिभागट्ठितीएसु उवव०।

ते णं भंते! जीवा०? एवं जहा रयणप्पभाए उववज्जमाणस्स असन्निस्स तहेव निरवसेसं जाव कालादेसो ति, नवरं परिमाणे-जहन्नेणं एक्को वा दो वा तिन्नि वा, उक्कोसेणं संखेज्जा उववज्जंति। सेसं तं चेव।

सो चेव अप्पणा जहन्नकालट्ठितीओ जाओ, जहन्नेणं अंतोमुहुत्तट्ठितीएसु, उक्कोसेणं पुव्वकोडिआउएसु उवव०।

ते णं भंते!०? अवसेसं जहा एयस्स पुढविकाइएसु उववज्जमाणस्स मज्झिमेसु तिसु गमएसु तहा इह वि मज्झिमेसु तिसु गमएसु जाव अणुबंधो ति। भवाएसेणं जहन्नेणं दो भवग्गहणाइं, उक्कोसेणं अट्ठ भवग्गहणाइं। कालाएसेणं जहन्नेणं दो अंतोमुहुत्ता, उक्कोसेणं चत्तारि पुव्वकोडीओ चउहिं अंतोमुहुत्तेहिं अब्भहियाओ।

सो चेव जहन्नकालट्ठितीएसु उववन्नो, एस चेव वत्तव्वया, नवरं कालादेसेणं जहन्नेणं दो अंतोमुहुत्ता, उक्कोसेणं अट्ठ अंतोमुहुत्ता; एवतियं०

सो चेव उक्कोसकालट्ठितीएसु उववन्नो, जहन्नेणं पुव्वकोडिआउएसु, उक्कोसेण वि पुव्वकोडिआउएसु उवव०। एस चेव वत्तव्वया, नवरं कालाएसेणं जाणेज्जा।

सो चेव अप्पणा उक्कोसकालट्ठितीओ जाओ, सच्चेव पढमगमगवत्तव्वया, नवरं ठिती से जहन्नेणं पुव्वकोडी, उक्कोसेण वि पुव्वकोडी। सेसं तं चेव। कालाएसेणं जहन्नेणं पुव्वकोडी अंतोमुहुत्तमब्भहिया, उक्कोसेणं पलिओवमस्स असंखेज्जतिभागं पुव्वकोडिपुहत्तमब्भहियं; एवतियं०।

सो चेवं उक्कोसकालट्ठितीएसु उववन्नो, जहन्नेणं पलिओवमस्स असंखेज्जिभागं, उक्कोसेण वि पलिओवमस्स असंखेज्जिभागं। एवं जहा रयणप्पभाए उववज्जमाणस्स असन्निस्स नवमगमए तहेव निरवसेसं जाव कालादेसो ति, नवरं परिमाणं जहा एयस्सेव ततियगमे। सेसं तं चेव।

जदि सन्निपंचेंदियतिरिक्खजोणिएहिंतो उववज्जंति किं संखेज्जवासा०, असंखेज्ज०? गोयमा!

संखेज्ज०, नो असंखेज्ज०।

जदि संखेज्ज० जाव किं पज्जतासंखेज्ज०, अपज्जतासंखेज्ज०? दोसु वि।

संखेज्जवासाउयसन्निपंचेदियतिरिक्खजोणिए जे भविए पंचेदियतिरिक्खजोणिएसु उववज्जित्तए से णं भंते! केवति०? गोयमा! जहन्नेणं अंतोमुहुत्त, उक्कोसेणं तिपलिओवमट्ठितीएसु उववज्जित्ज्जा।

ते णं भंते!० अवसेसं जहा एयस्स चेव सन्निस्स रयणप्पभाए उववज्जमाणस्स पढमगमए, नवरं ओगाहणा जहन्नेणं अंगुलस्स असंखेज्जइभागं, उक्कोसेणं जोयणसहस्सं,

सेसं तं चेव जाव भवादेसो ति। कालादेसेणं जहन्नेणं दो अंतोमुहुत्ता, उक्कोसेणं तिन्नि पलिओवमाइं पुव्वकोडिपुहत्तमब्भहियाइं; एवतियं०।

सो चेव जहन्नकालट्ठितीएसु उववन्नो, एस चेव वत्तव्वया, नवरं कालाएसेणं जहन्नेणं दो अंतोमुहुत्ता, उक्कोसेणं चत्तारि पुव्वकोडीओ चउहिं अंतोमुहुत्तेहिं अब्भहियाओ।

सो चेव उक्कोसकालट्ठितीएसु उववण्णो, जहन्नेणं तिपलिओवमट्ठितीएसु, उक्कोसेणं वि तिपलिओवमट्ठितीएसु उवव०। एस चेव वत्तव्वया, नवरं परिमाणं जहन्नेणं एक्को वा दो वा तिन्नि वा, उक्कोसेणं संखेज्जा उववज्जंति। ओगाहणा जहन्नेणं अंगुलस्स असंखेज्जइभागं, उक्कोसेणं जोयणसहस्सं।

सेसं तं चेव जाव अणुबंधो ति। भवादेसेणं दो भवग्गहणाइं।

कालादेसेणं जहन्नेणं तिण्णि पलिओवमाइं अंतोमुहुत्तमब्भहियाइं, उक्कोसेणं तिण्णि पलिओवमाइं पुव्वकोडीए अब्भहियाइं।

सो चेव अप्पणा जहन्नकालट्ठितीओ जाओ, जहन्नेणं अंतोमुहुत्त, उक्कोसेणं पुव्वकोडिआउएसु उवव०। लद्धी से जहा एयस्स चेव सन्निपंचेदियस्स पुढविकाइएसु उववज्जमाणस्स मज्झिमएसु तिसु गमएसु सच्चेव इह वि मज्झिमएसु तिसु गमएसु कायव्वा। संवेहो जहेव एत्थ चेव असन्निस्स मज्झिमएसु तिसु गमएसु।

सो चेव अप्पणा उक्कोसकालट्ठितीओ जाओ, जहा पढमगमओ, णवरं ठिती अणुबंधो जहन्नेणं पुव्वकोडी, उक्कोसेणं वि पुव्वकोडी। कालाएसेणं जहन्नेणं पुव्वकोडी अंतोमुहुत्तमब्भहिया उक्कोसेणं तिन्नि पलिओवमाइं पुव्वकोडिपुहत्तमब्भहियाइं।

सो चेव जहन्नकालट्ठितीएसु उववण्णो, एस चेव वत्तव्वया, नवरं कालाएसेणं जहन्नेणं पुव्वकोडी अंतोमुहुत्तमब्भहिया, उक्कोसेणं चत्तारि पुव्वकोडीओ चउहिं अंतोमुहुत्तेहिं अब्भहियाओ।

सो चेव उक्कोसकालट्ठितीएसु उववन्नो, जहन्नेणं तिपलिओवमट्ठितीएसु, उक्कोसेणं वि तिपलिओवमट्ठितीएसु। अवसेसं तं चेव, नवरं परिमाणं ओगाहणा य जहा एयस्सेव ततियगमए। भवाएसेणं दो भवग्गहणाइं। कालाए सेणं जहन्नेणं तिण्णि पलिओवमाइं पुव्वकोडीए अब्भहियाइं, उक्कोसेणं तिन्नि पलिओवमाइं पुव्वकोडीए अब्भहियाइं; एवतियं०।

जदि मणुस्सेहितो उववज्जंति किं सण्णिमणु०, असण्णिमणु०? गोयमा! सण्णिमणु०, असण्णिमणु०।

असन्निमणुस्से णं भंते! जे भविए पंचेदियतिरिक्ख० उवव० से णं भंते! केवतिकाल०? गोयमा! जहन्नेणं अंतोमुहुत्तं, उक्कोसेणं पुव्वकोडिआउएसु उववज्जति। लद्धी से तिसु वि गमएसु जहेव पुढविकाइएसु उववज्जमाणस्स, संवेहो जहा एत्थ चेव असन्निस्स पंचेदियस्स मज्झिमेसु तिसु गमएसु

तहेव निरवसेसो भाणियव्वो।

जइ सण्णिमणुस्स० किं संखेज्जवासाउयसण्णिमणुस्स०, असंखेज्जवासाउयसण्णिमणुस्स०?  
गोयमा! संखेज्जवासाउय०, नो असंखेज्जवासाउय०।

जदि संखेज्ज० किं पज्जता०, अपज्जता०? गोयमा! पज्जता०, अपज्जता०।

असंखेज्जवासाउयसन्निमणुस्से णं भंते! जे भविए पंचेदियतिरिक्ख० उववज्जित्तए से णं  
भंते! केवति०? गोयमा! जहन्नेणं अंतोमुहुत्तं०, उक्कोसेणं तिपलिओवमट्ठितीएसु उवव०।

ते णं भंते!०? लद्धी से जहा एयस्सेव सन्निमणुस्सस्स पुढविकाइएसु उववज्जमाणस्स  
पढमगमए जाव भवादेसो ति। कालाएसेणं जहन्नेणं दो अंतोमुहुत्ता, उक्कोसेणं तिन्नि पलिओवमाइं  
पुव्वकोडिपुहत्तमब्भहियाइं।

सो चेव जहन्नकालट्ठितीएसु उववन्नो, एस चेव वत्तव्वया, नवरं कालाएसेणं जहन्नेणं दो  
अंतोमुहुत्ता, उक्कोसेणं चत्तारि पुव्वकोडीओ चउहिं अंतोमुहुत्तेहिं अब्भहियाओ।

सो चेव उक्कोसकालट्ठितीएसु उववन्नो, जहन्नेणं तिपलिओवमट्ठितीएसु, उक्कोसेण वि  
तिपलिओवमट्ठितीएसु। एसा चेव वत्तव्वया, नवरं ओगाहणा जहन्नेणं अंगुलपुहत्तं, उक्कोसेणं पंच धणुसयाइं।  
ठिती जहन्नेणं मासपुहत्तं, उक्कोसेणं पुव्वकोडी। एवं अणुबंधो वि। भवादेसेणं दो भवग्गहणाइं। कालादेसेणं  
जहन्नेणं तिण्णि पलिओवमाइं मासपुहत्तमब्भहियाइं, उक्कोसेणं तिन्नि पलिओवमाइं पुव्वकोडीए  
अब्भहियाइं; एवतियं०।

सो चेव अप्पणा जहन्नकालट्ठितीओ जाओ, जहा सन्निस्स पंचेदियतिरिक्खजोणियस्स  
पंचेदियतिरिक्खजोणिएसु उववज्जमाणस्स मज्झिमेसु तिसु गमएसु वत्तव्वया भणिया सच्चेव एतस्स वि  
मज्झिमेसु तिसु गमएसु निरवसेसा भाणियव्वा, नवरं परिमाणं उक्कोसेणं संखेज्जा उववज्जंति। सेसं तं  
चेव।

सो चेव अप्पणा उक्कोसकालट्ठितीओ जाओ, सच्चेव पढमगमगवत्तव्वया, नवरं ओगाहणा  
जहन्नेणं पंच धणुसयाइं, उक्कोसेण वि पंच धणुसयाइं। ठिती अणुबंधो जहन्नेणं पुव्वकोडी, उक्कोसेण वि  
पुव्वकोडी। सेसं तहेव जाव भवाएसो ति। कालादेसेणं जहन्नेणं पुव्वकोडी अंतोमुहुत्तमब्भहिया, उक्कोसेणं  
तिन्नि पलिओवमाइं पुव्वकोडिपुहत्तमब्भहियाइं; एवतियं०।

सो चेव जहन्नकालट्ठितीएसु उववन्नो, एसा चेव वत्तव्वया, नवरं कालाएसेणं जहन्नेणं  
पुव्वकोडी अंतोमुहुत्तमब्भहिया, उक्कोसेणं चत्तारि पुव्वकोडीओ चउहिं अंतोमुहुत्तेहिं अब्भहियाओ।

सो चेव उक्कोसकालट्ठितीएसु उववन्नो, जहन्नेणं तिपलिओवमा, उक्कोसेण वि  
तिपलिओवमा। एस चेव लद्धी जहेव सत्तमगमे। भवाएसेणं दो भवग्गहणाइं। कालाएसेणं जहन्नेणं तिन्नि  
पलिओवमाइं पुव्वकोडीए अब्भहियाइं, उक्कोसेण वि तिण्णि पलिओवमाइं पुव्वकोडीए अब्भहियाइं;  
एवतियं०।

जदि देवेहिंतो उवव० किं भवणवासिदेवेहिंतो उवव०, वाणमंतर०, जोतिसिय०,  
वेमाणियदेवेहिंतो०? गोयमा! भवणवासिदेवे० जाव वेमाणियदेवे०।

जदि भवणवासि० किं असुरकुमारभवण० जाव थणियकुमारभवण०? गोयमा! असुरकुमार०  
जाव थणियकुमारभवण०।

असुरकुमारे णं भंते! जे भविए पंचेंदियतिरिक्खजोणिएसु उववज्जित्तए से णं भंते! केवति०? गोयमा! जहन्नेणं अंतोमुहुत्तट्ठितीएसु, उक्कोसेणं पुव्वकोडिआउएसु उवव०। असुरकुमाराणं लद्धी नवसु वि गमएसु जहा पुढविकाइएसु उववज्जमाणस्स एवं जाव ईसाणदेवस्स तहेव लद्धी। भवाएसेणं सव्वत्थ अट्ठ भवग्गहणाइं उक्कोसेणं, जहन्नेणं दोन्नि भव०। ठित्तिं संवेहं च सव्वत्थ जाणेज्जा।

नागकुमारे णं भंते! जे भविए०? एस चेव वत्तव्वया, नवरं ठित्तिं संवेधं च जाणेज्जा।

एवं जाव थणियकुमारे।

जदि वाणमंतरे० किं पिसाय०? तहेव जाव-

वाणमंतरे णं भंते! जे भविए पंचेंदियतिरिक्ख०? एवं चेव, नवरं ठित्तिं संवेहं च जाणेज्जा।

जदि जोतिसिय० उववातो तहेव जाव--

जोतिसिए णं भंते! जे भविए पंचेंदियतिरिक्ख० एस चेव वत्तव्वया जहा पुढविकाइयउद्देशए। भवग्गहणाइं नवसु वि गमएसु अट्ठ जाव कालाएसेणं जहन्नेणं अट्ठभागपलिओवमं अंतोमुहुत्तमब्भहियं, उक्कोसेणं चत्तारि पलिओवमाइं चउहिं पुव्वकोडीहिं चउहिं य वाससयसहस्सेहिं अब्भहियाइं; एवतियं०।

एवं नवसु वि गमएसु, नवरं ठित्तिं संवेहं च जाणेज्जा।

जदि वेमाणियदेवे० किं कप्पोवग०, कप्पातीतवेमाणिय०? गोयमा! कप्पोवगवेमाणिय०, नो कप्पातीतवेमा०।

आणय जाव नो अच्चुयकप्पोवगवेमा०।

सोहम्मदेवे णं भंते! जे भविए पंचेंदियतिरिक्खजोणिएसु उववज्जित्तए से णं भंते! केवति०? गोयमा! जहन्नेणं अंतोमुहुत्त०, उक्कोसेणं पुव्वकोडिआउएसु। सेसं जहेव पुढविकाइयउद्देशए नवसु वि गमएसु, नवरं नवसु वि गमएसु जहन्नेणं दो भवग्गहणाइं, उक्कोसेणं अट्ठ भवग्गहणाइं। ठित्तिं कालादेसं च जाणेज्जा।

एवं ईसाणदेव वि।

एवं एएणं कमेणं अवसेसा वि जाव सहस्सारदेवेसु उववातेयव्वा, नवरं ओगाहणा जहा ओगाहणसंठाणे। लेस्सा-सणंकुमार-माहिंद-बंधलोएसु एगा पम्हलेस्सा, सेसाणं एगा सुक्कलेस्सा। वेदे-नो इत्थिवेदगा, पुरिसवेदगा, नो नपुंसगवेदगा। आउ-अणुबंधा जहा ठित्तिपदे। सेसं जहेव ईसाणगाणं। कायसंवेहं च जाणेज्जा।

सेवं भंते! सेवं भंते! त्ति०।

**\*चउवीसइमे सते वीसइमो उद्देशो समतो\***

**० एककवीसइमो उद्देशओ ०**

[८५७] मणुस्सा णं भंते! कओहितो उववज्जंति? किं नेरइएहितो उववज्जंति जाव देवेहितो उवव०? गोयमा! नेरइएहितो वि उववज्जंति, एवं उववाओ जहा पंचेंदियतिरिक्खजोणिएसु जाव तमापुढवि नेरइएहितो वि उववज्जंति, नो अहेसत्तमपुढविनेरइएहितो उवव०।

रयणप्पभपुढविनेरइए णं भंते! जे भविए मणुस्सेसु उवव० से णं भंते! केवतिकाल०? गोयमा! जहन्नेणं मासपुहत्तट्ठितीएसु, उक्कोसेणं पुव्वकोडिआउएसु।

अवसेसा वत्तव्वया जहा पंचेंदियतिरिक्खजोणिएसु उववज्जंतस्स तहेव, नवरं परिमाणे जहन्नेणं एक्को वा दो वा तिन्नि वा, उक्कोसेणं संखेज्जा उववज्जंति, जहा तहिं अंतोमुहुत्तेहिं तथा इहं मासपुहत्तेहिं संवेहं करेज्जा। सेसं तं चेव।

जहा रयणप्पभाए तथा सक्करप्पभाए वि वत्तव्वया, नवरं जहन्नेणं वासपुहत्तट्ठितीएसु, उक्कोसेणं पुव्वकोडि०। ओगाहणा-लेस्सा-नाण-ट्ठिती-अणुबंध-संवेहनाणत्तं च जाणेज्जा जहेव तिरिक्ख-जोणियउद्देशए एवं जाव तमापुढविनेरइए।

जति तिरिक्खजोणिएहिंतो उववज्जंति किं एगिंदियतिरिक्खजोणिएहिंतो उववज्जंति, जाव पंचेंदियतिरिक्खजोणिएहिंतो उवव०? गोयमा! एगिंदियतिरिक्ख० भेदो जहा पंचेंदियतिरिक्खजोणियउद्देशए नवरं तेउ-वाऊ पडिसेहेयव्वा। सेसं तं चेव जाव-

पुढविकाइए णं भंते! जे भविए मणुस्सेसु उववज्जितए से णं भंते! केवति०? गोयमा! जहन्नेणं अंतोमुहुत्तट्ठितीएसु, उक्कोसेणं पुव्वकोडिआउएसु उवव०।

ते णं भंते! जीवा०? एवं जा चेव पंचेंदियतिरिक्खजोणिएसु उववज्जमाणस्स पुढविकाइयस्स वत्तव्वया सा चेव इह वि उववज्जमाणस्स भाणियव्वा नवसु वि गमएसु, नवरं ततिय-छट्ठ-णवमेसु गमएसु परिमाणं जहन्नेणं एक्को वा दो वा तिन्नि वा, उक्कोसेणं संखेज्जा उववज्जंति।

जाहे अप्पणा जहन्नकालट्ठितीओ भवति ताहे पढमगमए अज्झवसाणा पसत्था वि अप्पसत्था वि, बितियगमए अप्पसत्था, ततियगमए पसत्था भवंति। सेसं तं चेव निरवसेसं।

जति आउकाइए० एवं आउकाइयाण वि।

एवं वणस्सतिकाइयाण वि।

एवं जाव चउरिंदियाणं।

असन्निपंचेंदियतिरिक्खजोणिया सन्निपंचेंदियतिरिक्खजोणिया असन्निमणुस्सा सन्नि-मणुस्सा य, एए सव्वे वि जहा पंचेंदियतिरिक्खजोणियउद्देशए तहेव भाणितव्वा, नवरं एताणि चेव परिमाण-अज्झवसाणणाणत्ताणि जाणिज्जा पुढविकाइयस्स एत्थ चेव उद्देशए भणियाणि। सेसं तहेव निरवसेसं।

जदि देवेहिंतो उवव० किं भवणवासिदेवेहिंतो उवव०, वाणमंतर-जोतिसिय-वेमाणियदेवेहिंतो उवव०? गोयमा! भवणवासि० जाव वेमाणिय०।

जदि भवण० किं असुर० जाव थणिय०? गोयमा! असुर० जाव थणिय०।

असुरकुमारे णं भंते! जे भविए मणुस्सेसु उवव० से णं भंते! केवति०? गोयमा! जहन्नेणं मासपुहत्तट्ठितीएसु, उक्कोसेणं पुव्वकोडिआउएसु उववज्जेज्जा।

एवं जच्चेव पंचेंदियतिरिक्खजोणि- उद्देशवत्तव्वया सा चेव एत्थ वि भाणियव्वा, नवरं जहा तहिं जहन्नगं अंतोमुहुत्तट्ठितीएसु तथा इहं मासपुहत्तट्ठितीएसु, परिमाणं जहन्नेणं एक्को वा दो वा तिन्नि वा, उक्कोसेणं संखेज्जा उववज्जंति।

सेसं तं चेव जाव ईसाणदेवो ति। एयाणि चेव णाणत्ताणि। सणंकुमारादीया जाव सहस्सारो ति, जहेव पंचेंदियतिरिक्खजोणियउद्देशए नवरं परिमाणे जहन्नेणं एक्को वा दो वा तिन्नि वा, उक्कोसेणं संखेज्जा उववज्जंति। उववाओ जहन्नेणं वासपुहत्तट्ठितीएसु, उक्कोसेणं पुव्वकोडिआउएसु उवव०।

सेसं तं चेव। संवेहं वासपुहत्तपुव्वकोडीसु करेज्जा।

सपंकुमारे ठिती चउग्गुणिया अट्ठावीसं सागरोवमा भवंति। माहिंदे ताणि चेव सातिरेगाणि। बंभलोए चत्तालीसं। लंतए छप्पण्णं। महासुक्के अट्ठसट्ठिं। सहस्सारे बावत्तरिं सागरोवमाइं। एसा उक्कोसा ठिती भणिया, जहन्नट्ठिं पि चउग्गुणेज्जा।

आणयदेवे णं भंते! जे भविए मणुस्सेसु उववज्जित्तए से णं भंते! केवति०? गोयमा! जहन्नेणं वासपुहत्तट्ठितीएसु उवव०, उक्कोसेणं पुव्वकोडिट्ठितीएसु।

ते णं भंते!०? एवं जहेव सहस्सारदेवाणं वत्तव्वया, नवरं ओगाहणाठिति-अणुबंधे य जाणेज्जा। सेसं तं चेव। भवाएसेणं जहन्नेणं दो भवग्गहणाइं, उक्कोसेणं छ भवग्गहणाइं। कालाएसेणं जहन्नेणं अट्ठारस सागरोवमाइं वासपुहत्तमब्भहियाइं, उक्कोसेणं सत्तावण्णं सागरोवमाइं तिहिं पुव्वकोडीहिं अब्भहियाइं; एवतियं कालं०। एवं नव वि गमा, नवरं ठितिं अणुबंधं संवेहं च जाणेज्जा।

एवं जाव अच्चुयदेवो, नवरं ठितिं अणुबंधं संवेहं च जाणेज्जा। पाणयदेवस्स ठिती तिउणा-- सट्ठिं सागरोवमाइं, आरणगस्स तेवट्ठिं सागरोवमाइं, अच्चुयदेवस्स छावट्ठिं सागरोवमाइं।

जदि कप्पातीतवेमाणियदेवेहिंतो उवव० किं गेवेज्जकप्पातीत०, अणुत्तरोववातियकप्पातीत०? गोयमा! गेवेज्ज० अणुत्तरोववा०।

जइ गेवेज्ज० किं हेट्ठिमहेट्ठिमगेवेज्जकप्पातीत० जाव उवरिम-उवरिमगेवेज्ज०? गोयमा! हेट्ठिमहेट्ठिमगेवेज्ज० जाव उवरिमउवरिम०।

गेवेज्जगदेवे णं भंते! जे भविए मणुस्सेसु उववज्जित्तए से णं भंते! केवतिका०? गोयमा! जहन्नेणं वासपुहत्तट्ठितीएसु, उक्कोसेणं पुव्वकोडि०। अवसेसं जहा आणयदेवस्स वत्तव्वया, नवरं ओगाहणा, गोयमा! एगे भवधारणिज्जे सरीरए से जहन्नेणं अंगुलस्स असंखेज्जइभागं, उक्कोसेणं दो रयणीओ। संठाणं गोयमा! एगे भवधारणिज्जे सरीरए से समचउरंससंठिते पन्नते। पंच समुग्घाया पन्नता, तं जहा-- वेयणासमुग्घाए जाव तेयगसमु०, नो चेव णं वेउव्विय-तेयगसमुग्घाएहिं समोहन्निसु वा, समोहन्नंति वा, समोहणिससंति वा, ठिति-अणुबंधा जहन्नेणं बावीसं सागरोवमाइं, उक्कोसेणं एककतीसं सागरोवमाइं। सेसं तं चेव। कालाएसेणं जहन्नेणं बावीसं सागरोवमाइं वासपुहत्तमब्भहियाइं, उक्कोसेणं तेणउतिं सागरोवमाइं तिहिं पुव्वकोडीहिं अब्भहियाइं; एवतियं०। एवं सेसेसु वि अट्ठगमएसु, नवरं ठितिं संवेहं च जाणेज्जा।

जदि अणुत्तरोववातियकप्पातीतवेमाणि० किं विजयअणुत्तरोववातिय० वेजयंतअणुत्तरोववातय० जाव सवट्ठसिद्ध०? गोयमा! विजयअणुत्तरोववातिय० जाव सव्वट्ठसिद्धअणुत्तरोववातिय०।

विजय-वेजयंत-जयंत-अपराजितदेवे णं भंते! जे भविए मणुस्सेसु उवव० से णं भंते! केवति०? एवं जहेव गेवेज्जगदेवाणं, नवरं ओगाहणा जहन्नेणं अंगुलस्स असंखेज्जतिभागं, उक्कोसेणं एगा रयणी। सम्मद्धिट्ठी, नो मिच्छादिट्ठी, नो सम्मामिच्छादिट्ठी, णाणी, णो अण्णाणी, नियमं तिनाणी, तं जहा- आभिणिबोहिय० सुय० ओहिणाणी। ठिती जहन्नेणं एककतीसं सागरोवमाइं, उक्कोसेणं तेतीसं सागरोवमाइं। सेसं तं चेव। भवाएसेणं जहन्नेणं दो भवग्गहणाइं, उक्कोसेणं चत्तारि भवग्गहणाइं। कालाएसेणं जहन्नेणं एककतीसं सागरोवमाइं वासपुहत्तमब्भहियाइं, उक्कोसेणं छावट्ठिं सागरोवमाइं दोहिं पुव्वकोडीहिं अब्भहियाइं; एवतियं०। एवं सेसा वि अट्ठ गमगा भाणियव्वा, नवरं ठितिं अणुबंधं संवेधं च जाणेज्जा। सेसं एवं चेव।

सव्वट्ठसिद्धगदेवे णं भंते! जे भविए मणुस्सेसु उववज्जित्तए०? सा चेव विजयादिदेववत्तव्वया भाणियव्वा, णवरं ठिती अजहन्नमणुक्कोसेणं तेतीसं सागरोवमाइं। एवं अणुबंधो वि। सेसं तं चेव।

भवाएसेणं दो भवग्गहणाइं, कालाएसेणं जहन्नेणं तेतीसं सागरोवमाइं वासपुहत्तमब्भहियाइं, उक्कोसेणं तेतीसं सागरोवमाइं पुच्चकोडीए अब्भहियाइं; एवतियं०।

सो चेव जहन्नकालट्ठितीएसु उववन्नो, एस चेव वत्तव्वया, नवरं कालाएसेणं जहन्नेणं तेतीसं सागरोवमाइं वासपुहत्तमब्भहियाइं, उक्कोसेणं वि तेतीसं सागरोवमाइं वासपुहत्तमब्भहियाइं; एवतियं०।

सो चेव उक्कोसकालट्ठितीएसु उववन्नो, एस चेव वत्तव्वया, नवरं कालाएसेणं जहन्नेणं तेतीसं सागरोवमाइं पुच्चकोडीए अब्भहियाइं, उक्कोसेणं वि तेतीसं सागरोवमाइं पुच्चकोडीए अब्भहियाइं; एवतियं०। एए चेव तिण्णि गमगा, सेसा न भण्णंति।

सेवं भंते! सेवं भंते! ति०।

**\*चउवीसइमे सते एगवीसइमो उद्देशो समतो\***

**० बावीसइमो उद्देशो ०**

[८५८] वाणमंतरा णं भंते कओहिंतो उववज्जंति? किं नेरइएहिंतो उववज्जंति, तिरिक्ख-जोणिएहिंतो उववज्जंति०? एवं जहेव णागकुमारुद्देसए असण्णी तहेव निरवसेसं।

जदि सन्निपंचेदिय० जाव असंखेज्जवासाउयसन्निपंचेदिय० जे भविए वाणमंतर० से णं भंते! केवति०? गोयमा! जहन्नेणं दसवाससहस्सट्ठितीएसु, उक्कोसेणं पलिओवमट्ठितीएसु। सेसं तं चेव जहा नागकुमारउद्देसए जाव कालाएसेणं जहन्नेणं सातिरेगा पुच्चकोडी दसहिं वाससहस्सेहिं अब्भहिया, उक्कोसेणं चत्तारि पलिओवमाइं; एवतियं०।

सो चेव जहन्नकालट्ठितीएसु उववन्नो, णागकुमाराणं बितियगमे वत्तव्वया।

सो चेव उक्कोसकालट्ठितीएसु उववन्नो, जहन्नेणं पलिओवमट्ठितीएसु, उक्कोसेणं वि पलिओवमट्ठितीएसु। एस चेव वत्तव्वया, नवरं ठिती जहन्नेणं पलिओवमं, उक्कोसेणं तिन्नि पलिओवमाइं। संवेहो जहन्नेणं दो पलिओवमाइं, उक्कोसेणं चत्तारि पलिओवमाइं; एवतियं०।

मज्झिमगमगा तिन्नि वि जहेव नागकुमारेसु।

पच्छिमेसु तिसु गमएसु तं चेव जहा नागकुमारुद्देसए, नवरं ठितिं संवेहं च जाणेज्जा।

संखेज्जवासाउय० तहेव, नवरं ठिती अणुबंधो संवेहं च उभओ ठितीए जाणेज्जा।

जदि मणुस्से० असंखेज्जवासाउयाणं जहेव नागकुमाराणं उद्देशे तहेव वत्तव्वया, नवरं ततियगमए ठिती जहन्नेणं पलिओवमं, उक्कोसेणं तिन्नि पलिओवमाइं। ओगाहणा जहन्नेणं गाउयं, उक्कोसेणं तिन्नि गाउयाइं। सेसं तहेव। संवेहो से जहा एत्थ चेव उद्देसए असंखेज्जवासाउयसन्नि-पंचेदियाणं।

संखेज्जवासाउयसन्निमणुस्सा जहेव नागकुमारुद्देसए, नवरं वाणमंतरठितिं संवेहं च जाणेज्जा। सेवं भंते! सेवं भंते! ति०।

**\*चउवीसइमे सते बावीसइमो उद्देशो समतो\***

**० तेवीसइमो उद्देशो ०**

[८५९] जोतिसिया णं भंते! कओहिंतो उववज्जंति? किं नेरइए० भेदो जाव सन्निपंचेदिय-तिरिक्खजोणिएहिंतो उववज्जंति, नो असन्निपंचेदियतिरिक्खजोणिएहिंतो उवव०।

जदि सन्नि० किं सखंज्जे०, असंखेज्ज०? गोयमा! संखेज्जवासाउय०, असंखेज्जवासाउय०।

असंखेज्जवासाउयसन्निपंचेदियतिरिक्खजोणिए णं भंते! जे भविए जोतिसिएसु उववज्जितए से णं भंते! केवति०? गोयमा! जहन्नेणं अट्ठभागपलिओवमट्ठितीएसु, उक्कोसेणं पलिओवमवाससय-सहस्सट्ठितीएसु उवव०। अवसेसं जहा असुरकुमारुद्देशए, नवरं ठिती जहन्नेणं अट्ठभागपलिओवमं, उक्कोसेणं तिण्णि पलिओवमाइं। एवं अणुबंधो वि। सेसं तहेव, नवरं कालाएसेणं जहन्नेणं दो अट्ठभागपलिओवमाइं, उक्कोसेणं चत्तारि पलिओवमाइं वाससयसहस्समब्भहियाइं; एवतियं०।

सो चेव जहन्नकालट्ठितीएसु उववन्नो, जहन्नेणं अट्ठभागपलिओवमट्ठितीएसु, उक्कोसेण वि अट्ठभागपलिओवमट्ठितीएसु। एस चेव वत्तव्वया, नवरं कालाएसं जाणेज्जा।

सो चेव उक्कोसकालट्ठितीएसु उववण्णो, एस चेव वत्तव्वया, नवरं ठिती जहन्नेणं पलिओवमं वाससयसहस्समब्भहियं, उक्कोसेणं तिन्नि पलिओवमाइं। एवं अणुबंधो वि। कालाएसेणं जहन्नेणं दो पलिओवमाइं दोहिं वाससयसहस्सेहिं अब्भहियाइं, उक्कोसेणं चत्तारि पलिओवमाइं वाससय-सहस्समब्भहियाइं।

सो चेव अप्पणा जहन्नकालट्ठितीओ जाओ, जहन्नेणं अट्ठभागपलिओवमट्ठितीएसु, उक्कोसेण वि अट्ठभागपलिओवमट्ठितीएसु उवव०।

ते णं भंते! जीवा एग०? एस चेव वत्तव्वया, नवरं ओगाहणा जहन्नेणं धणुपुहत्तं, उक्कोसेणं सातिरेगाइं अट्ठारस धणुसयाइं। ठिती जहन्नेणं अट्ठभागपलिओवमं, उक्कोसेण वि अट्ठभागपलिओवमं। एवं अणुबंधो वि। सेसं तहेव। कालाएसेणं जहन्नेणं दो अट्ठभागपलिओवमाइं, उक्कोसेण वि दो अट्ठभागपलिओवमाइं, एवतियं०। जहन्नकालट्ठितीयस्स एस चेव एक्को गमगो।

सो चेव अप्पणा उक्कोसकालट्ठितीओ जाओ, सा चेव ओहिया वत्तव्वया, नवरं ठिती जहन्नेणं तिन्नि पलिओवमाइं, उक्कोसेण वि तिन्नि पलिओवमाइं । एवं अणुबंधो वि। सेसं तं चेव । एवं पच्छिमा तिण्णि गमगा नेयव्वा, नवरं ठितिं संवेहं च जाणेज्जा। एते सत्त गमगा।

जइ संखेज्जवासाउयसन्निपंचेदिय० संखेज्जवासाउयाणं जहेव असुरकुमारेसु उववज्जमाण्णं तहेव नव वि गमगा भाणियव्वा, नवरं जोतिसियठितिं संवेहं च जाणेज्जा। सेसं तहेव निरवसेसं।

जदि मणुस्सेहितो उववज्जंति०? भेदो तहेव जाव-

असंखेज्जवासाउयसन्निमणुस्से णं भंते! जे भविए जोतिसिएसु उववज्जितए से णं भंते! ०? एवं जहा असंखेज्जवासाउयसन्निपंचेदियस्स जोतिसिएसु चेव उववज्जमाणस्स सत्त गमगा तहेव मणुस्साण वि, नवरं ओगाहणाविसेसो-पढमेसु तिसु गमएसु ओगाहणा जहन्नेणं सातिरेगाइं नव धणुसयाइं, उक्कोसेणं तिन्नि गाउयाइं। मज्झिमगमए जहन्नेणं सातिरेगाइं नव धणुसयाइं, उक्कोसेण वि सातिरेगाइं नव धणुसयाइं। पच्छिमेसु तिसु गमएसु जहन्नेणं तिन्नि गाउयाइं, उक्कोसेण वि तिन्नि गाउयाइं। सेसं तहेव निरवसेसं जाव संवेहो ति।

जदि संखेज्जवासाउयसन्निमणुस्से० संखेज्जवासाउयाणं जहेव असुरकुमारेसु उववज्जमाण्णं तहेव नव गमगा भाणियव्वा, नवरं जोतिसियठितिं संवेहं च जाणेज्जा। सेसं तहेव निरवसेसं।

सेवं भंते! सेवं भंते! ति०।

**\*चउवीसइमे सते तेवीसइमो उद्देशो समतो\***

## ० चउवीसइमो उद्देसओ ०

[८६०] सोहम्मगदेवा णं भंते! कओहिंतो उववज्जंति? किं नेरतिएहिंतो उववज्जंति? भेदो जहा जोतिसियउद्देसए।

असंखेज्जवासाउयसन्निपंचेदियतिरिक्खजोणिए णं भंते! जे भविए सोहम्मगदेवेसु उववज्जित्तए से णं भंते! केवतिकाल०? गोयमा! जहन्नेणं पलिओवमट्ठितीएसु, उक्कोसेणं तिपलिओवम-ट्ठितीएसु उवव०।

तेणं भंते! ०, अवसेसं जहा जोतिसिएसु उववज्जमाणस्स, नवरं सम्मद्धिट्ठी वि, मिच्छादिट्ठी वि, नो सम्मामिच्छादिट्ठी; नाणी वि, अन्नाणी वि, दो नाणा, दो अन्नाणा नियमं; ठिती जहन्नेणं दो पलिओवमाइं, उक्कोसेणं तिन्नि पलिओवमाइं। एवं अणुबंधो वि। सेसं तहेव। कालाएसेणं जहण्णेणं दो पलिओवमाइं, उक्कोसेणं छ पलिओवमाइं; एवतियं०।

सो चेव जहन्नकालट्ठितीएसु उववन्नो, एस चेव वत्तव्वया, नवरं कालाएसेणं जहन्नेणं दो पलिओवमाइं, उक्कोसेणं चत्तारि पलिओवमाइं; एवतियं०।

सो चेव उक्कोसकालट्ठितीएसु उववन्नो, जहन्नेणं तिपलिओवम०, उक्कोसेण वि तिपलिओवम०। एस चेव वत्तव्वया, नवरं ठिती जहन्नेणं तिन्नि पलिओवमाइं, उक्कोसेण वि तिन्नि पलिओवमाइं। सेसं तहेव। कालाएसेणं जहन्नेणं छ पलिओवमाइं, उक्कोसेण वि छपलिओवमाइं०।

सो चेव अप्पणा जहन्नकालट्ठितीओ जाओ, जहन्नेणं पलिओवमट्ठितीएसु, उक्कोसेण वि पलिओवमट्ठितीएसु। एस चेव वत्तव्वया, नवरं ओगाहणा जहन्नेणं धणुपुहत्तं, उक्कोसेणं दो गाउयाइं। ठिती जहन्नेणं पलिओवमं, उक्कोसेण वि पलिओवमं। सेसं तहेव। कालाएसेणं जहन्नेणं दो पलिओवमाइं, उक्कोसेण वि दो पलिओवमाइं; एवतियं०।

सो चेव अप्पणा उक्कोसकालट्ठितीओ जाओ, आदिल्लगमगसरिसा तिन्नि गमगा नेयव्वा, नवरं ठित्तिं कालादेसं च जाणेज्जा।

जदि संखेज्जवासाउयसन्निपंचेदिय० संखेज्जवासाउयस्स जहेव असुरकुमारेसु उववज्ज-माणस्स तहेव नव वि गमा, नवरं ठित्तिं संवेहं च जाणेज्जा। जाहे य अप्पणा जहन्नकालट्ठितीओ भवति ताहे तिसु वि गमएसु समद्धिट्ठी वि, मिच्छद्धिट्ठी वि, नो सम्मामिच्छादिट्ठी। दो नाणा, दो अन्नाणा नियमं। सेसं तं चेव।

जदि मणुस्सेहिंतो उववज्जंति भेदो जहेव जोतिसिएसु उववज्जमाणस्स जाव-असंखेज्ज-वासाउयसन्निमणुस्से णं भंते! जे भविए सोहम्मं कप्पे देवत्ताए उववज्जित्तए०? एवं जहेव असंखेज्जवासाउयस्स सन्निपंचेदियतिरिक्खजोणियस्स सोहम्मं कप्पे उववज्जमाणस्स तहेव सत्त गमगा, नवरं आदिल्लएसु दोसु गमएसु ओगाहणा जहन्नेणं गाउयं, उक्कोसेणं तिन्नि गाउयाइं। ततियगमे जहन्नेणं तिन्नि गाउयाइं, उक्कोसेण वि तिन्नि गाउयाइं। चउत्थगमए जहन्नेणं गाउयं, उक्कोसेण वि गाउयं। पच्छिमेसु गमएसु जहन्नेणं तिन्नि गाउयाइं, उक्कोसेण वि तिन्नि गाउयाइं। सेसं तहेव निरवसेसं।

जदि संखेज्जवासाउयसन्निमणुस्सेहिंतो० , एवं संखेज्जवासाउयसन्निमणुस्साणं जहेव असुरकुमारेसु उववज्जमाणं तहेव नव गमगा भाणियव्वा, नवरं सोहम्मदेवट्ठित्तिं संवेहं च जाणेज्जा।

सेसं तं चेव।

इसाणा देवा णं भंते! कओ० उववज्जंति?० ईसाणदेवाणं एस चेव सोहम्मगदेवसरिसा वत्तव्वया, नवरं असंखेज्जवासाउयसन्निपंचेदियतिरिक्खजोणियस्स जेसु ठाणेसु सोहम्मे उववज्जमाणस्स, पलिओवमठितीएसु ठाणेसु इहं सातिरेगं पलिओवमं कायव्वं।

चउत्थगमे ओगाहणा जहन्नेणं धणुपुहत्तं, उक्कोसेणं सातिरेगाइं दो गाउयाइं। सेसं तहेव।

असंखेज्जवासाउयसन्निमणूसस्स वि तहेव ठिती जहा पंचेदियतिरिक्खजोणियस्स असंखेज्जवासाउयस्स, ओगाहणा वि जेसु ठाणेसु गाउयं तेसु ठाणेसु इहं सातिरेगं गाउयं। सेसं तहेव।

संखेज्जवासाउयाणं तिरिक्खजोणियाणं मणूसाण य जहेव सोहम्मे उववज्जमाणं तहेव निरवसेसं णव वि गमगा, नवरं ईसाणे ठितिं संवेहं च जाणेज्जा।

सणंकुमारगदेवा णं भंते ! कतोहितो उवव० ? उववातो जहा सक्करप्पभपुढविनेरइयाणं जाव-पज्जत्तासंखेज्जवासाउयसन्निपंचेदियतिरिक्खजोणिए णं भंते! जे भविए सणंकुमारदेवेसु उववज्जितए०? अवसेसा परिमाणादीया भवाएसपज्जवसाणा सच्चेव वत्तव्वया भाणियव्वा जहा सोहम्मे उववज्जमाणस्स, नवरं सणंकुमारट्ठितिं संवेहं च जाणेज्जा। जाहे य अप्पणा जहन्नकालट्ठितीओ भवति ताहे तिसु वि गमएसु पंच लेस्साओ आदिल्लाओ कायव्वाओ। सेसं तं चेव।

जदि मणुस्सेहितो उवव०? मणुस्साणं जहेव सक्करप्पभाए उववज्जमाणं तहेव णव वि गमगा भाणियव्वा, नवरं सणंकुमारट्ठितिं संवेहं च जाणेज्जा।

माहिंदगदेवा णं भंते! कओहितो उववज्जंति?० जहा सणंकुमारगदेवाणं वत्तव्वया तहा माहिंदगदेवाण वि भाणियव्वा, नवरं माहिंदगदेवाणं ठिती सातिरेगा भाणियव्वा सा चेव।

एवं बंभलोगदेवाण वि वत्तव्वया, नवरं बंभलोगट्ठितिं संवेहं च जाणेज्जा। एवं जाव सहस्सरो, नवरं ठितिं संवेहं च जाणेज्जा।

लंतगाईणं जहन्नकालट्ठितीयस्स तिरिक्खजोणियस्स तिसु वि गमएसु छप्पि लेस्साओ कायव्वाओ। संघयणाइं बंभलोग-लंतएसु पंच आदिल्लगाणि, महासुक्क-सहस्सारेसु चत्तारि, तिरिक्खजोणियाण वि मणुस्साण वि। सेसं तं चेव।

आणयदेवा णं भंते! कओहितो उववज्जंति?० उववाओ जहा सहस्सारदेवाणं, णवरं तिरिक्खजोणिया खोडेयव्वा जाव--

पज्जत्तासंखेज्जवासाउयसन्निमणुस्से णं भंते! जे भविए आणयदेवेसु उववज्जितए०? मणुस्साण य वत्तव्वया जहेव सहस्सारे उववज्जमाणं, णवरं तिन्नि संघयणाणि। सेसं तहेव जाव अणुबंधो भवाएसेणं जहन्नेणं तिण्णि भवग्गहणाइं, उक्कोसेणं सत्त भवग्गहणाइं। कालाएसेणं जहन्नेणं अट्ठारस सागरोवमाइं दोहिं वासपुहत्तेहिं अब्भहियाइं, उक्कोसेणं सत्तावण्णं सागरोवमाइं चउहिं पुव्वकोडीहिं अब्भहियाइं; एवतियं०। एवं सेसा वि अट्ठ गमगा भाणियव्वा, नवरं ठितिं संवेहं च जाणेज्जा, सेसं तहेव।

एवं जाव अच्युयदेवा, नवरं ठितिं संवेहं च जाणेज्जा। चउसु वि संघयणा तिन्नि आणयादीसु।

गेवेज्जगदेवा णं भंते! कओ० उववज्जंति? एस चेव वत्तव्वया, नवरं संघयणा दो। ठितिं संवेहं च जाणेज्जा।

विजय-वेजयंत-जयंत-अपराजियदेवा णं भंते! कओहिंतो उववज्जंति?० एस चेव वत्तव्वता निरवसेसा जाव अणुबंधो ति, नवरं पढमं संघयणं, सेसं तहेव। भवाएसेणं जहन्नेणं तिन्नि भवग्गहणाइं, उक्कोसेणं पंच भवग्गहणाइं। कालाएसेणं जहन्नेणं एकक्कीसं सागरोवमाइं दोहिं वासपुहतेहिं अब्भहियाइं, उक्कोसेणं छावट्ठिं सागरोवमाइं तिहिं पुव्वकोडीहिं अब्भहियाइं; एवतियं०। एवं सेसा वि अट्ठ गमगा भाणियव्वा, नवरं ठितिं संवेहं च जाणेज्जा। मणूसलद्धी नवसु वि गमएसु जहा गेवेज्जेसु उववज्जमाणस्स, नवरं पढमसंघयणं।

सव्वट्ठसिद्धगदेवा णं भंते! कओ० उववज्जंति?० उववातो जहेव विजयाईणं जाव--

से णं भंते! केवतिकालट्ठितीएसु उववज्जेज्जा? गोयमा! जहन्नेणं तेतीससागरोवमट्ठिती०, उक्कोसेण वि तेतीससागरोवमट्ठितीएसु उवव०। अवसेसा जहा विजयादीसु उववज्जंताणं, नवरं भवाएसेणं तिन्नि भवग्गहणाइं; कालाएसेणं जहन्नेणं तेतीसं सागरोवमाइं दोहिं वासपुहतेहिं अब्भहियाइं, उक्कोसेणं तेतीसं सागरोवमाइं दोहिं पुव्वकोडीहिं अब्भहियाइं; एवतियं०।

सो चेव अप्पणा जहन्नकालट्ठितीओ जाओ, एस चेव वत्तव्वया, नवरं ओगाहणा-ठितीओ रयणिपुहत्त-वासपुहत्ताणि। सेसं तहेव। संवेहं च जाणेज्जा।

सो चेव अप्पणा उक्कोसकालट्ठितीओ जाओ, एस चेव वत्तव्वता, नवरं ओगाहणा जहन्नेणं पंच धणुसयाइं, उक्कोसेण वि पंच धणुसयाइं। ठिती जहन्नेणं पुव्वकोडी, उक्कोसेण वि पुव्वकोडी। सेसं तहेव जाव भवाएसो ति। कालाएसेणं जहन्नेणं तेतीसं सागरोवमाइं दोहिं पुव्वकोडीहिं अब्भहियाइं, उक्कोसेण वि तेतीसं सागरोवमाइं दोहिं पुव्वकोडीहिं अब्भहियाइं; एवतियं कालं सेवेज्जा, एवतियं कालं गतिरागतिं करेज्जा।

एते तिन्नि गमगा सव्वट्ठसिद्धगदेवाणं।

से एवं भंते! सेवं भंते! ति भगवं गोयमे जाव विहरइ।

**\*चउवीसइमे सते चउवीसइमो उद्देसो समतो\***

**०-चउवीसतिमं सयं समतं-०**

**० मुनि दीपरत्तसागरेण संशोधितः सम्पादितश्च चउवीसतिमं सतं समतं ०**

**[ ] पंचवीसइमं सयं [ ]**

**[८६१]** लेसा य दव्व संठाण जुम्म पज्जव नियंठ समणा य।  
ओहे भवियाऽभविए सम्मा मिच्छे य उद्देसा ॥

**० पढमो उद्देसो ०**

**[८६२]** तेणं कालेणं तेणं समएणं रायगिहे जाव एवं वयासी-

कति णं भंते! लेस्साओ पन्नताओ? गोयमा! छ ल्लेसाओ, पन्नताओ, तं जहा--कण्हलेस्सा जहा पढमसए बितिउद्देसए तहेव लेस्साविभागो अप्पाबहुगं च जाव चउव्विहाणं देवाणं चउव्विहाणं देवीणं मीसगं अप्पाबहुगं ति।

**[८६३]** कतिविधा णं भंते! संसारसमावन्नगा जीवा पन्नता? गोयमा! चोद्धसविहा संसार-समावन्नगा जीवा पन्नता, तं जहा-सुहुमा अपज्जत्तगा, सुहुमा पज्जत्तगा, बायरा अपज्जत्तगा, बादरा

पज्जतगा, बेइंदिया अपज्जतगा, बेइंदिया पज्जतगा, एवं तेइंदिया, एवं चउरिंदिया, असन्निपंचेंदिया अपज्जतगा, असन्निपंचेंदिया पज्जतगा, सन्निपंचेंदिया अपज्जतगा, सन्निपंचिंदिया पज्जतगा ।

एतेसि णं भंते! चोद्धसविहाणं संसारसमावन्नगाणं जीवाणं जहन्नुक्कोसगस्स जोगस्स कयरे कयरेहिंतो जाव विसेसाहिया वा? गोयमा! सव्वत्थोवे सुहुमस्स अपज्जतगस्स जहन्नए जोए १, बादरस्स अपज्जतगस्स जहन्नए जोए असंखेज्जगुणे २, बैदियस्स अपज्जतगस्स जहन्नए जोए असंखेज्जगुणे ३, एवं तेइंदियस्स ४, एवं चउरिंदियस्स ५, असन्निस्स पंचेंदियस्स अपज्जतगस्स जहन्नए जोए असंखेज्जगुणे ६, सन्निस्स पंचेंदियस्स अपज्जतगस्स जहन्नए जोए असंखेज्जगुणे ७, सुहुमस्स पज्जतगस्स जहन्नए जोए असंखेज्जगुणे ८, बादरस्स पज्जतगस्स जहन्नए जोए असंखेज्जगुणे ९, सुहुमस्स अपज्जतगस्स उक्कोसए जोए असंखेज्जगुणे १०, बायरस्स अपज्जतगस्स उक्कोसए जोए असंखेज्जगुणे ११, सुहुमस्स पज्जतगस्स उक्कोसए जोए असंखेज्जगुणे १२, बादरस्स पज्जतगस्स उक्कोसए जोए असंखेज्जगुणे १३, बैदियस्स पज्जतगस्स जहन्नए जोए असंखेज्जगुणे १४, एवं तेंदियस्स १५, एवं जाव सन्निस्स पंचेंदियस्स पज्जतगस्स जहन्नए जोए असंखेज्जगुणे १६-१८, बैदियस्स अपज्जतगस्स उक्कोसए जोए असंखेज्जगुणे १९, एवं तेंदियस्स वि २०, एवं जाव सण्णिपंचेंदियस्स अपज्जतगस्स उक्कोसए जोए असंखेज्जगुणे २१-२३, बैदियस्स पज्जतगस्स उक्कोसए जोए असंखेज्जगुणे २४, एवं तेइंदियस्स वि पज्जतगस्स उक्कोसए जोए असंखेज्जगुणे २५, चउरिंदियस्स पज्जतगस्स उक्कोसए जोए असंखेज्जगुणे २६, असन्निपंचिंदिय- पज्जतगस्स उक्कोसए जोए असंखेज्जगुणे २७, एवं सण्णिस्स पंचिंदियस्स पज्जतगस्स उक्कोसए जोए असंखेज्जगुणे २८।

**[८६४]**दो भंते! नेरतिया पढमसमयोववन्नगा किं समजोगी, विसमजोगी? गोयमा! सिय समजोगी, सिय विसमजोगी।

से केणट्ठेणं भंते! एवं वुच्चति-सिय समजोगी, सिय विसमजोगी? गोयमा! आहारयाओ वा से अणाहारए, अणाहारयाओ वा से आहारए सिय हीणे, सिय तुल्ले, सिय अब्भहिए। जदि हीणे असंखेज्जतिभागहीणे वा संखेज्जतिभागहीणे वा, संखेज्जगुणहीणे वा असंखेज्जगुणहीणे वा। अह अब्भहिए असंखेज्जतिभागमब्भहिए वा संखेज्जतिभागमब्भहिए वा, संखेज्जगुणमब्भहिए वा असंखेज्जगुणमब्भहिए वा। सेतेणट्ठेणं जाव सिय विसमजोगी।

एवं जाव वेमाणियाणं।

**[८६५]**कतिविधे णं भंते! जोए पन्नते? गोयमा पन्नरसविधे जोए पन्नते तं जहा-सच्चमण-जोए मोसमणजोए सच्चामोसमणजोए असच्चामोसमणजोए, सच्चवइजोए मोसवइजोए सच्चामोसवइजोए असच्चामोसवइजोए, ओरालियसरीरकायजोए ओरालियमीसासरीरकायजोए वेउव्वियसरीरकायजोए वेउव्विय-मीसासरीरकायजोए आहारगसरीरकायजोए आहारगमीसासरीरकायजोए, कम्मसरीरकायजोए ।

एयस्स णं भंते! पन्नरसविहस्स जहन्नुक्कोसगस्स जोगस्स कयरे कतरेहिंतो जाव विसेसाहिया वा? गोयमा! सव्वत्थोवे कम्मगसरीरस्स जहन्नए जोए १, ओरालियमीसगस्स जहन्नए जोए असंखेज्जगुणे २, वेउव्वियमीसगस्स जहन्नए जोए असंखेज्जगुणे ३, ओरालियसरीरस्स जहन्नए जोए असंखेज्जगुणे ४, वेउव्वियसरीरस्स जहन्नए जोए असंखेज्जगुणे ५, कम्मगसरीरस्स उक्कोसए जोए असंखेज्जगुणे ६, आहारगमीसगस्स जहन्नए जोए असंखेज्जगुणे ७, तस्स चव उक्कोसए जोए

असंखेज्जगुणे ८, ओरालियमीसगस्स विउव्वियमीसगस्स य एएसि णं उक्कोसए जोए दोण्ह वि तुल्ले असंखेज्जगुणे ९-१०, असच्चामोसमणजोगस्स जहन्नए जोए असंखेज्जगुणे ११, आहारगसरीरस्स जहन्नए जोए असंखेज्जगुणे १२; तिविहस्स मणजोगस्स, चउव्विहस्स वइजोगस्स, एएसि णं सतण्ह वि तुल्ले जहन्नए जोए असंखेज्जगुणे १३-१९; आहारगसरीरस्स उक्कोसए जोए असंखेज्जगुणे २०; ओरालियसरीरस्स वेउव्वियसरीरस्स चउव्विहस्स य मणजोगस्स, चउव्विहस्स य वइजोगस्स, एएसि णं दसण्ह वि तुल्ले उक्कोसए जोए असंखेज्जगुणे २१-३०।

सेवं भंते! सेवं भंते! ति०।

**\*पंचवीसइमे सते पढमो उद्देशो समतो\***

## ० बीओ उद्देशो ०

[८६६]कतिविधा णं भंते! दव्वा पन्नता? गोयमा! दुविहा दव्वा पन्नता, तं जहा-जीवदव्वा य अजीवदव्वा य।

अजीवदव्वा णं भंते! कतिविहा पन्नता? गोयमा! दुविहा पन्नता, तं जहा--रूविअजीवदव्वा य, अरूविअजीवदव्वा य। एवं एणं अभिलावेणं जहा अजीवपज्जवा जाव सेतेणट्ठेणं गोयमा! एवं वुच्चति-ते णं नो संखेज्जा, नो असंखेज्जा, अणंता।

जीवदव्वा णं भंते! किं संखेज्जा, असंखेज्जा, अणंता?

गोयमा! नो संखेज्जा, नो असंखेज्जा, अणंता।

से केणट्ठेणं भंते! एवं वुच्चइ-जीवदव्वा णं नो संखेज्जा, नो असंखेज्जा, अणंता? गोयमा! असंखेज्जा नेरइया जाव असंखेज्जा वाउकाइया, अणंता वणस्सतिकाइया, असंखिज्जा बैदिया, एवं जाव वेमाणिया, अणंता सिद्धा, सेतेणट्ठेणं जाव अणंता।

[८६७]जीवदव्वाणं भंते! अजीवदव्वा परिभोगत्ताए हव्वमागच्छंति, अजीवदव्वाणं जीवदव्वा परिभोगत्ताए हव्वमागच्छंति? गोयमा! जीवदव्वाणं अजीवदव्वा परिभोगत्ताए हव्वमागच्छंति, नो अजीवदव्वाणं जीवदव्वा परिभोगत्ताए हव्वमागच्छंति।

से केणट्ठेणं भंते! एवं वुच्चति--जाव हव्वमागच्छंति? गोयमा! जीवदव्वा णं अजीवदव्वे परियादियंति, अजीवदव्वे परियादिइत्ता ओरालियं वेउव्वियं आहारगं तेयगं कम्मगं सोतिंदिय जाव फासिंदिय मणजोग वइजोग कायजोग आणापाणुत्तं च निव्वत्तयंति, सेतेणट्ठेणं जाव हव्वमागच्छंति।

नेरतियाणं भंते! अजीवदव्वा परिभोगत्ताए हव्वमागच्छंति, अजीवदव्वाणं नेरतिया परिभोगत्ताए हव्वमागच्छंति? गोयमा! नेरतियाणं अजीवदव्वा जाव हव्वमागच्छंति, नो अजीवदव्वाणं नेरतिया जाव हव्वमागच्छंति।

से केणट्ठेणं०? गोयमा! नेरतिया अजीवदव्वे परियादियंति, अजीवदव्वे परियादिइत्ता वेउव्विय-तेयग-कम्मग-सोतिंदिय जाव फासिंदिय जाव आणापाणुत्तं च निव्वत्तयंति। सेतेणट्ठेणं गोयमा! एवं वुच्चइ०।

एवं जाव वेमाणिया, नवरं सरीर-इंदिय-जोगा भाणियव्वा जस्स जे अत्थि।

[८६८]से नूणं भंते! असंखेज्जे लोए अणंताइं दव्वाइं आगासे भइयव्वाइं? हंता, गोयमा!

असंखेज्जे लोए जाव भइयव्वाइं।

लोगस्स णं भंते! एगम्मि आगासपएसे कतिदिसिं पोग्गला चिज्जंति? गोयमा! निव्वाघातेणं छद्दिसिं; वाघातं पडुच्च सिय तिदिसिं, सिय चउदिसिं, सिय पंचदिसिं।

लोगस्स णं भंते! एगम्मि आगासपएसे कतिदिसिं पोग्गला छिज्जंति? एवं चेव।  
एवं उवचिज्जंति, एवं अवचिज्जंति।

[८६९] जीवे णं भंते! जाइं दव्वाइं ओरालियसरीरत्ताए गेण्हइ ताइं किं ठियाइं गेण्हइ, अठियाइं गेण्हति? गोयमा! ठियाइं पि गेण्हइ, अठियाइं पि गेण्हइ।

ताइं भंते! किं दव्वओ गेण्हइ, खेतओ गेण्हइ, कालओ गेण्हइ, भावतो गेण्हइ? गोयमा! दव्वओ वि गेण्हति, खेतओ वि गेण्हइ, कालओ वि गेण्हइ, भावतो वि गेण्हइ। ताइं दव्वतो अणंतपएसियाइं दव्वाइं, खेततो असंखेज्जपएसोगाढाइं, एवं जहा पण्णवणाए पढमे आहारुद्देसए जाव निव्वाघाएणं छद्दिसिं, वाघायं पडुच्च सिय तिदिसिं, सिय चउदिसिं, सिय पंचदिसिं।

जीवे णं भंते! जाइं दव्वाइं वेउव्वियसरीरत्ताए गेण्हइ ताइं किं ठियाइं गेण्हति, अठियाइं गेण्हति? एवं चेव, नवरं नियमं छद्दिसिं।

एवं आहारगसरीरत्ताए वि।

जीवे णं भंते! जाइं दव्वाइं तेयगसरीरत्ताए गिण्हति० पुच्छा। गोयमा! ठियाइं गेण्हइ, नो अठियाइं गेण्हइ। सेसं जहा ओरालियसरीरस्स।

कम्मगसरीरे एवं चेव जाव भावओ वि गिण्हति।

जाइं दव्वतो गेण्हति ताइं किं एगपएसियाइं गेण्हति, दुपएसियाइं गेण्हइ०? एवं जहा भासापदे जाव आणुपुव्विं गेण्हइ, नो अणाणुपुव्विं गेण्हति।

ताइं भंते! कतिदिसिं गेण्हति? गोयमा! निव्वाघातेणं० जहा ओरालियस्स।

जीवे णं भंते! जाइं दव्वाइं सोइंदियत्ताए गेण्हइ० जहा वेउव्वियसरीरं।

एवं जाव जिब्भिंदियत्ताए।

फासिंदियत्ताए जहा ओरालियसरीरं।

मणजोगत्ताए जहा कम्मगसरीरं, नवरं नियमं छद्दिसिं।

एवं वइजोगत्ताए वि।

कायजोगत्ताए जहा ओरालियसरीरस्स।

जीवे णं भंते! जाइं दव्वाइं आणापाणुत्ताए गेण्हइ? जहेव ओरालियसरीरत्ताए जाव सिय पंचदिसिं।

सेवं भंते! सेवं भंते! त्ति०।

केयि चउवीसदंडएणं एयाणि पयाणि भणंति जस्स जं अत्थि।

**\*पंचवीसइमे सते बीइओ उद्देसो समतो\***

**० तइओ उद्देसो ०**

[८७०] कति णं भंते! संठाणा पन्नत्ता? गोयमा! छ संठाणा पन्नत्ता, तं जहा--परिमंडले वट्ठे

तंसे चउरंसे आयते अणित्थंथे।

परिमंडला णं भंते! संठाणा दव्वट्ठयाए किं संखेज्जा, असंखेज्जा, अणंता? गोयमा! नो संखेज्जा, नो असंखेज्जा, अणंता।

वट्ठा णं भंते! संठाणा०? एवं चेव।

एवं जाव अणित्थंथा।

एवं पदेसट्ठताए वि।

एएसि णं भंते! परिमंडल-वट्ठा-तंस-चतुरंस-आयत-अणित्थंथाणं संठाणाणं दव्वट्ठयाए पएसट्ठताए दव्वट्ठ-पदेसट्ठयाए कयरे कयरेहिंतो जाव विसेसाहिया वा? गोयमा! सव्वत्थोवा परिमंडला संठाणा दव्वट्ठयाए, वट्ठा संठाणा दव्वट्ठयाए संखेज्जगुणा, चउरंसा संठाणा दव्वट्ठयाए संखेज्जगुणा, तंसा संठाणा दव्वट्ठयाए संखेज्जगुणा, आयता संठाणा दव्वट्ठयाए संखेज्जगुणा, अणित्थंथा संठाणा दव्वट्ठयाए असंखेज्जगुणा।

पएसट्ठताए-सव्वत्थोवा परिमंडला संठाणा पएसट्ठयाए, वट्ठा संठाणा पएसट्ठयाए संखेज्जगुणा, जहा दव्वट्ठयाए तहा पएसट्ठताए वि जाव अणित्थंथा संठाणा पएसट्ठयाए असंखेज्जगुणा।

दव्वट्ठपएसट्ठयाए-सव्वत्थोवा परिमंडला संठाणा दव्वट्ठयाए, सो चेव दव्वट्ठतागमओ भाणियव्वो जाव अणित्थंथा संठाणा दव्वट्ठयाए असंखेज्जगुणा। अणित्थंथेहिंतो संठाणेहिंतो दव्वट्ठयाए, परिमंडला संठाणा पएसट्ठयाए असंखेज्जगुणा; वट्ठा संठाणा पएसट्ठयाए असंखेज्जगुणा, सो चेव पएसट्ठयाए गमओ भाणियव्वो जाव अणित्थंथा संठाणा पएसट्ठयाए असंखेज्जगुणा।

[८७१]कति णं भंते! संठाणा पन्नता? गोयमा! पंच संठाणा पन्नता, तंजहा-परिमंडले जाव आयते।

परिमंडला णं भंते! संठाणा किं संखेज्जा, असंखेज्जा, अणंता? गोयमा! नो संखेज्जा, नो असंखेज्जा, अणंता।

वट्ठा णं भंते! संठाणा किं संखेज्जा०? एवं चेव।

एवं जाव आयता।

इमीसे णं भंते ! रयणप्पभाए पुढवीए परिमंडला संठाणा किं संखेज्जा, असंखेज्जा, अणंता ?

गोयमा! नो संखेज्जा, नो असंखेज्जा, अणंता।

वट्ठा णं भंते! संठाणा किं संखेज्जा०? एवं चेव।

एवं जाव आयता।

सक्करप्पभाए णं भंते! पुढवीए परिमंडला संठाणा०? एवं चेव।

एवं जाव आयता।

एवं जाव अहेसत्तमाए।

सोहम्मं णं भंते! कप्पे परिमंडला संठाणा०? एवं चेव।

एवं जाव अच्चुते।

गेविज्जविमाणं भंते! परिमंडला संठाणा०? एवं चेव।

एवं अणुत्तरविमाणेषु।

एवं ईसिपब्भाराए वि।

जत्थ णं भंते! एगे परिमंडले संठाणे जवमज्झे तत्थ परिमंडला संठाणा किं संखेज्जा, असंखेज्जा, अणंता? गोयमा! नो संखेज्जा, नो असंखेज्जा, अणंता।

वट्ठा णं भंते! संठाणा किं संखेज्जा, असंखेज्जा? एवं चेव।

एवं जाव आयता।

जत्थ णं भंते! एगे वट्ठो संठाणे जवमज्झे तत्थ परिमंडला संठाणा? एवं चेव; वट्ठा संठाणा? एवं चेव।

एवं जाव आयता।

एवं एक्केक्केणं संठाणेणं पंच वि चारेयत्वा।

जत्थ णं भंते! इमीसे रयणप्पभाए पुढवीए एगे परिमंडले संठाणे जवमज्झे तत्थ परिमंडला संठाणा किं संखेज्जा? पुच्छा। गोयमा! नो संखेज्जा, नो असंखेज्जा, अणंता।

वट्ठा णं भंते! संठाणा किं संखेज्जा? एवं चेव।

एवं जाव आयता।

जत्थ णं भंते! इमीसे रयणप्पभाए पुढवीए एगे वट्ठो संठाणे जवमज्झे तत्थ णं परिमंडला संठाणा किं संखेज्जा? पुच्छा। गोयमा! नो संखेज्जा, नो असंखेज्जा, अणंता।

वट्ठा संठाणा एवं चेव।

एवं जाव आयता।

एवं पुणरवि एक्केक्केणं संठाणेणं पंच वि चारेत्वा जहेव हेट्ठिल्ला जाव आयतेणं।

एवं जाव अहेसत्तमाए।

एवं कप्पेसु वि जाव ईसिपब्भाराए पुढवीए।

[८७२] वट्ठो णं भंते! संठाणे कतिपएसिए, कतिपएसोगाढे पन्नते? गोयमा! वट्ठो संठाणे दुविहे पन्नते तं जहा- घणवट्ठो य, पयरवट्ठो य। तत्थ णं जे से पयरवट्ठो से दुविधे पन्नते, तं जहा--ओयपएसिए य, जुम्मपएसिए य। तत्थ णं जे से ओयपएसिए से जहन्नेणं पंचपएसिए, पंचपएसोगाढे; उक्कोसेणं अणंतपएसिए, असंखेज्जपएसोगाढे। तत्थ णं जे से जुम्मपएसिए से जहन्नेणं बारसपएसिए, बारसपएसोगाढे; उक्कोसेणं अणंतपएसिए, असंखेज्जपदेसोगाढे। तत्थ णं जे से घणवट्ठो से दुविहे पन्नते, तं जहा--ओयपएसिए य जुम्मपएसिए य। तत्थ णं जे से ओयपएसिए से जहन्नेणं सत्तपएसिए, सत्तपएसोगाढे पन्नते; उक्कोसेणं अणंतपएसिए, असंखेज्जपएसोगाढे पन्नते। तत्थ णं जे से जुम्मपएसिए से जहन्नेणं बत्तीसपएसिए, बत्तीसपएसोगाढे पन्नते; उक्कोसेणं अणंतपएसिए, असंखेज्जपएसोगाढे पन्नते।

तंसे णं भंते! संठाणे कतिपएसिए कतिपएसोगाढे पन्नते? गोयमा! तंसे णं संठाणे दुविहे पन्नते, तं जहा- घणतंसे य पयरतंसे य। तत्थ णं जे से पयरतंसे से दुविहे पन्नते, तं जहा--ओयपएसिए य, जुम्मपएसिए य। तत्थ णं जे से ओयपएसिए से जहन्नेणं तिपएसिए, तिपएसोगाढे पन्नते; उक्कोसेणं अणंतपएसिए असंखेज्जपएसोगाढे पन्नते। तत्थ णं जे से जुम्मपएसिए से जहन्नेणं छप्पएसिए, छप्पएसोगाढे पन्नते; उक्कोसेणं अणंतपएसिए असंखेज्जपएसोगाढे पन्नते। तत्थ णं जे से घणतंसे से दुविहे पन्नते, तं जहा--ओयपदेसिए य, जुम्मपएसिए य। तत्थ णं जे से ओयपएसिए से जहन्नेणं

पणतीसपरसिए पणतीसपरसोगाढे; उक्कोसेणं अणंतपरसिए, तं चेव। तत्थ णं जे से जुम्मपरसिए से जहन्नेणं चउप्पपरसिए चउप्पदेसोगाढे पन्नते; उक्कोसेणं अणंतपरसिए, तं चेव।

चउरंसे णं भंते! संठाणे कतिपदेसिए० पुच्छ। गोयमा! चउरंसे संठाणे दुविहे पन्नते, भेदो जहेव वट्ठस्स जाव तत्थ णं जे से ओयपरसिए से जहन्नेणं नवपरसिए, नवपरसोगाढे पन्नते; उक्कोसेणं अणंतपरसिए, असंखेज्जपरसोगाढे पन्नते। तत्थ णं जे से जुम्मपरसिए से जहन्नेणं चउपरसिए, चउपरसोगाढे पन्नते; उक्कोसेणं अणंतपरसिए, तं चेव। तत्थ णं जे से घणचउरंसे से दुविहे पन्नते, तंजहा-ओयपरसिए य, जुम्मपरसिए य। तत्थ णं जे से ओयपरसिए से जहन्नेणं सत्तावीसतिपरसिए, सत्तावीसतिपरसोगाढे; उक्कोसेणं अणंतपरसिए, तहेव। तत्थ णं जे से जुम्मपरसिए से जहन्नेणं अट्ठपरसिए, अट्ठपरसोगाढे पन्नते; उक्कोसेणं अणंतपरसिए, तहेव।

आयते णं भंते! संठाणे कतिपरसिए कतिपदेसोगाढे पन्नते? गोयमा! आयते णं संठाणे तिविधे पन्नते, तं जहा-सेढिआयते, पयरायते, घणायते। तत्थ णं जे से सेढिआयते से दुविहे पन्नते, तं जहा--ओयपदेसिए य जुम्मपरसिए य। तत्थ णं जे से ओयपरसिए से जहन्नेणं तिपरसिए, तिपरसोगाढे; उक्कोसेणं अणंतपरसिए, तं चेव। तत्थ णं जे से जुम्मपरसिए से जहन्नेणं दुपरसिए दुपरसोगाढे; उक्कोसेणं अणंत० तहेव। तत्थ णं जे से पयरायते से दुविहे पन्नते, तं जहा-ओयपरसिए य, जुम्मपरसिए य। तत्थ णं जे से ओयपरसिए से जहन्नेणं पन्नरसपरसिए, पन्नरसपरसोगाढे; उक्कोसेणं अणंत० तहेव। तत्थ णं जे से जुम्मपरसिए से जहन्नेणं छप्पपरसिए, छप्पपरसोगाढे; उक्कोसेणं अणंत० तहेव। तत्थ णं जे से घणायते से दुविधे पन्नते, तं जहा-ओयपरसिए य, जुम्मपरसिए य। तत्थ णं जे से ओयपरसिए से जहन्नेणं पणयालीसपदेसिए पणयालीसपदेसोगाढे पन्नते; उक्कोसेणं अणंत० तहेव। तत्थ णं जे से जुम्मपरसिए से जहन्नेणं बारसपरसिए बारसपरसोगाढे; उक्कोसेणं अणंत० तहेव।

परिमंडले णं भंते! संठाणे कतिपरसिए० पुच्छ। गोयमा! परिमंडले णं संठाणे दुविहे पन्नते, तं जहा--घणपरिमंडले य पयरपरिमंडले य। तत्थ णं जे से पयरपरिमंडले से जहन्नेणं वीसतिपरसिए वीसतिपरसोगाढे; उक्कोसेणं अणंतपर० तहेव। तत्थ णं जे से घणपरिमंडले से जहन्नेणं चत्तालीसतिपरसिए, चत्तालीसतिपरसोगाढे पन्नते; उक्कोसेणं अणंतपरसिए, असंखेज्जपरसोगाढे पन्नते।

**[८७३]**परिमंडले णं भंते! संठाणे दव्वट्ठताए किं कडजुम्मे, तेयोए, दावरजुम्मे, कलियोए ? गोयमा! नो कडजुम्मे, णो तेयोए, णो दावरजुम्मे, कलियोए।

वट्ठो णं भंते! संठाणे दव्वट्ठताए०? एवं चेव।

एवं जाव आयते।

परिमंडला णं भंते! संठाणा दव्वट्ठताए किं कडजुम्मा, तेयोगा० पुच्छ। गोयमा! ओघाएसेणं सिय कडजुम्मा, सिय तेयोगा, सिय दावरजुम्मा, सिय कलियोगा। विहाणादेसेणं नो कडजुम्मा, नो तेयोगा, नो दावरजुम्मा, कलिओगा।

एवं जाव आयता।

परिमंडले णं भंते! संठाणे पदेसट्ठताए किं कडजुम्मे० पुच्छ। गोयमा! सिय कडजुम्मे, सिय तेयोगे, सिय दावरजुम्मे, सिय कलियोगे।

एवं जाव आयते।

परिमंडला णं भंते! संठाणा पदेसट्ठताए किं कडजुम्मा० पुच्छा। गोयमा! ओघादेसेणं सिय कडजुम्मा जाव सिय कलियोगा। विहाणादेसेणं कडजुम्मा वि, तेयोगा वि, दावरजुम्मा वि, कलियोगा वि।

एवं जाव आयता।

परिमंडले णं भंते! संठाणे किं कडजुम्मपएसोगाढे जाव कलियोगपएसोगाढे? गोयमा! कडजुम्मपएसोगाढे, नो तेयोगपदेसोगाढे, नो दावरजुम्मपएसोगाढे, नो कलियोगपएसोगाढे।

वट्ठो णं भंते! संठाणे किं कडजुम्मा० पुच्छा। गोयमा! सिय कडजुम्मपदेसोगाढे, सिय तेयोगपएसोगाढे, नो दावरजुम्मपदेसोगाढे, सिय कलियोगपएसोगाढे।

तंसे णं भंते! संठाणे० पुच्छा। गोयमा! सिय कडजुम्मपएसोगाढे, सिय तेयोगपदेसोगाढे, सिय दावरजुम्मपएसोगाढे, नो कलियोगपएसोगाढे।

चउरंसे णं भंते! संठाणे०, जहा वट्ठो तहा चतुरंसे वि।

आयते णं भंते०! पुच्छा। गोयमा! सिय कडजुम्मपएसोगाढे जाव सिय कलियोगपएसोगाढे।

परिमंडला णं भंते! संठाणा किं कडजुम्मपएसोगाढा, तेयोगपएसोगाढा० पुच्छा। गोयमा! ओघादेसेण वि विहाणादेसेण वि कडजुम्मपएसोगाढा, नो तेयोगपदेसोगाढा, नो दावरजुम्मपदेसोगाढा, नो कलियोगपदेसोगाढा।

वट्ठा णं भंते! संठाणा किं कडजुम्मपएसोगाढा० पुच्छा। गोयमा! ओघादेसेणं कडजुम्मपएसोगाढा, नो तेयोगपदेसोगाढा, नो दावरजुम्मपदेसोगाढा, नो कलियोगपएसोगाढा; विहाणादेसेणं कडजुम्मपदेसोगाढा वि तेयोगपएसोगाढा वि, नो दावरजुम्मपएसोगाढा, कलियोगपएसोगाढा वि।

तंसा णं भंते! संठाणा किं कडजुम्मा० पुच्छा। गोयमा! ओघादेसेणं कडजुम्मपएसोगाढा, नो तेयोगपदेसोगाढा, नो दावरजुम्मपदेसोगाढा, नो कलियोगपएसोगाढा; विहाणादेसेणं कडजुम्मपदेसोगाढा वि, तेयोगपएसोगाढा वि, नो दावरजुम्मपएसोगाढा, कलियोगपएसोगाढा वि।

चउरंसा जहा वट्ठा।

आयता णं भंते! संठाणा० पुच्छा। गोयमा! ओघादेसेणं कडजुम्मपदेसोगाढा, नो तेयोगपदेसोगाढा, नो दावरजुम्मपदेसोगाढा, नो कलियोगपदेसोगाढा; विहाणादेसेणं कडजुम्मपदेसोगाढा वि जाव कलियोगपएसोगाढा वि।

परिमंडले णं भंते! संठाणे किं कडजुम्मसमयट्ठतीए, तेयोगसमयट्ठतीए, दावरजुम्म-समयट्ठतीए, कलियोगसमयट्ठतीए? गोयमा! सिय कडजुम्मसमयट्ठतीए जाव सिय कलियोग-समयट्ठतीए।

एवं जाव आयते।

परिमंडला णं भंते! संठाणा किं कडजुम्मसमयट्ठतीया० पुच्छा। गोयमा! ओघादेसेणं सिय कडजुम्मसमयट्ठतीया जाव सिय कलियोगसमयट्ठतीया; विहाणादेसेणं कडजुम्मसमयट्ठतीया वि जाव कलियोगसमयट्ठतीया वि।

एवं जाव आयता।

परिमंडले णं भंते! संठाणे कालवण्णपज्जवेहिं किं कडजुम्मे जाव कलियोगे? गोयमा! सिय कडजुम्मे, एवं एणं अभिलावेणं जहेव ठितीए।

एवं नीलवण्णपज्जवेहि वि।

एवं पंचहिं वण्णेहिं, दोहिं गंधेहिं, पंचहिं रसेहिं, अट्ठहिं फासेहिं जाव लुक्खफासपज्जवेहिं।

[८७४]सेढीओ णं भंते! दव्वट्ठयाए किं संखेज्जाओ, असंखेज्जाओ, अणंताओ? गोयमा! नो संखेज्जाओ, नो असंखेज्जाओ, अणंताओ।

पाईणपडीणायताओ णं भंते! सेढीओ दव्वट्ठयाए०? एवं चेव।

एवं दाहिणुत्तरायताओ वि।

एवं उड्ढमहायताओ वि।

लोयागाससेढीओ णं भंते! दव्वट्ठताए किं संखेज्जाओ, असंखेज्जाओ, अणंताओ? गोयमा! नो संखेज्जाओ, असंखेज्जाओ, नो अणंताओ।

पाईणपडीणायताओ णं भंते! लोयागाससेढीओ दव्वट्ठताए किं संखेज्जाओ०? एवं चेव।

एवं दाहिणुत्तरायताओ वि।

एवं उड्ढमहायताओ वि।

अलोयागाससेढीओ णं भंते! दव्वट्ठताए किं संखेज्जाओ, असंखेज्जाओ० पुच्छा। गोयमा! नो संखेज्जाओ, नो असंखेज्जाओ, अणंताओ।

एवं पाईणपडीणायताओ वि।

एवं दाहिणुत्तरायताओ वि।

एवं उड्ढमहायताओ वि।

सेढीओ णं भंते! पएसट्ठयाए किं संखेज्जाओ०? जहा दव्वट्ठयाए तहा पदेसट्ठयाए वि जाव उड्ढमहायताओ, सव्वाओ अणंताओ।

लोयागाससेढीओ णं भंते! पदेसट्ठयाए किं संखेज्जाओ० पुच्छा। गोयमा! सिय संखेज्जाओ, सिय असंखेज्जाओ, नो अणंताओ।

एवं पादीणपडीणायताओ वि, दाहिणुत्तरायताओ वि।

उड्ढमहायताओ नो संखेज्जाओ, असंखेज्जाओ, नो अणंताओ।

अलोयागाससेढीओ णं भंते! पएसट्ठताए० पुच्छा। गोयमा! सिय संखेज्जाओ, सिय असंखेज्जाओ, सिय अणंताओ।

पाईणपडीणायताओ णं भंते! अलोयागाससेढीओ० पुच्छा। गोयमा! नो संखेज्जाओ, नो असंखेज्जाओ, अणंताओ।

एवं दाहिणुत्तरायताओ वि।

उड्ढमहायताओ० पुच्छा। गोयमा! सिय संखेज्जाओ, सिय असंखेज्जाओ, सिय अणंताओ।

[८७५]सेढीओ णं भंते! किं सादीयाओ सपज्जवसियाओ, सादीयाओ अपज्जवसियाओ, अणादीयाओ सपज्जवसियाओ, अणादीयाओ अपज्जवसियाओ? गोयमा! नो सादीयाओ सपज्जवसियाओ, नो सादीयाओ अपज्जवसियाओ, नो अणादीयाओ सपज्जवसियाओ, अणादीयाओ अपज्जवसियाओ।

एवं जाव उड्ढमहायताओ।

लोयागाससेढीओ णं भंते! किं सादीयाओ सपज्जवसियाओ० पुच्छा। गोयमा! सादीयाओ

सपज्जवसियाओ, नो सादीयाओ अपज्जवसियाओ, नो अणादीयाओ सपज्जवसियाओ, नो अणादीयाओ अपज्जवसियाओ।

एवं जाव उड्ढमहायताओ।

अलोयागाससेढीओ णं भंते! किं सादीयाओ० पुच्छा। गोयमा! सिय सादीयाओ सपज्जवसियाओ, सिय सादीयाओ अपज्जवसियाओ, सिय अणादीयाओ सपज्जवसियाओ, सिय अणादीयाओ अपज्जवसियाओ।

पाईणपडीणायताओ दाहिणुत्तरायताओ य एवं चेव, नवरं नो सादीयाओ सपज्जवसियाओ, सिय सादीयाओ अपज्जवसियाओ, सेसं तं चेव।

उड्ढमहायताओ जहा ओहियाओ तहेव चउभंगो।

सेढीओ णं भंते! दव्वट्ठयाए किं कडजुम्माओ, तेओयाओ० पुच्छा। गोयमा! कडजुम्माओ, नो तेओयाओ, नो दावरजुम्माओ, नो कलियोगाओ।

एवं जाव उड्ढमहायताओ।

लोयागाससेढीओ एवं चेव।

एवं अलोयागाससेढीओ वि।

सेढीओ णं भंते! पएसट्ठयाए किं कडजुम्माओ०? एवं चेव।

एवं जाव उड्ढमहायताओ।

लोयागाससेढीओ णं भंते! पएसट्ठयाए० पुच्छा। गोयमा! सिय कडजुम्माओ, नो तेओयाओ, सिय दावरजुम्माओ, नो कलियोगाओ।

एवं पादीणपडीणायताओ वि, दाहिणुत्तरायताओ वि।

उड्ढमहायताओ णं० पुच्छा। गोयमा! कडजुम्माओ, नो तेओयाओ, नो दावरजुम्माओ, नो कलियोगाओ।

अलोयागाससेढीओ णं भंते! पदेसट्ठयाए० पुच्छा। गोयमा! सिय कडजुम्माओ जाव सिय कलियोगाओ।

एवं पाईणपडीणायताओ वि।

एवं दाहिणुत्तरायताओ वि।

उड्ढमहायताओ वि एवं चेव, नवरं नो कलियोगाओ, सेसं तं चेव।

**[८७६]**कति णं भंते! सेढीओ पन्नताओ? गोयमा! सत्त सेढीओ पन्नताओ, तं जहा- उज्जुआयता, एगतोवका, दुहतोवका, एगओखहा, दुहतोखहा, चक्कवाला, अद्धचक्कवाला।

परमाणुपोग्गलाणं भंते! किं अणुसेढिं गती पवत्तति, विसेढिं गती पवत्तति? गोयमा! अणुसेढिं गती पवत्तति, नो विसेढिं गती पवत्तति।

दुपएसियाणं भंते! खंधाणं किं अणुसेढिं गती पवत्तति, विसेढिं गती पवत्तति? एवं चेव।

एवं जाव अणंतपरसियाणं खंधाणं।

नेरइयाणं भंते! किं अणुसेढिं गती पवत्तति, विसेढिं गती पवत्तति? एवं चेव।

एवं जाव वेमाणियाणं।

[८७७]इमीसे णं भंते! रयणप्पभाए पुढवीए केवतिया निरयावाससयसहस्सा पन्नता? गोयमा! तीसं निरयावाससयसहस्सा पन्नता। एवं जहा पढमसते पंचमुद्देशए जाव अणुत्तरविमाण ति।

[८७८]कतिविधे णं भंते! गणिपिडए पन्नते? गोयमा! दुवालसंगे गणिपिडए पन्नते, तं जहा-आयारो जाव दिट्ठिवाओ।

से किं तं आयारो? आयारे णं समणाणं निग्गंथाणं आयारगो० एवं अंगपरूवणा भाणियच्चा जहा नंदीए। जाव-

[८७९] सुत्तथो खलु पढमो बीओ निजुत्तिमीसओ भणिओ।

तइओ य निरवसेसो एस विही होइ अणुयोगे ॥

[८८०]एएसि णं भंते! नेरतियाणं जाव देवाणं सिद्धाण य पंचगतिसमासेणं कयरे कतरेहिंतो० पुच्छा। गोयमा! अप्पाबहुयं जहा बहुवत्तव्वयाए अट्ठगइसमासप्पाबहुगं च।

एएसि णं भंते! सइंदियाणं एगिंदियाणं जाव अणिंदियाण य कतरे कतरेहिंतो०? एय पि जहा बहुवत्तव्वयाए तहेव ओहियं पयं भाणितव्वं।

सकाइयअप्पाबहुगं तहेव ओहियं भाणितव्वं।

एएसि णं भंते! जीवाणं पोग्गलाणं जाव सव्वपज्जवाण य कतरे कतरेहिंतो०? जहा बहुवत्तव्वयाए।

एएसि णं भंते! जीवाणं आउयस्स कम्मगस्स बंधगाणं अबंधगाणं०? जहा बहुवत्तव्वयाए जाव आउयस्स कम्मस्स अबंधगा विसेसाहिया।

सेवं भंते! सेवं भंते! ति०।

**\*पंचवीसइमे सते तइओ उद्देशो समतो\***

## ० चउत्थो उद्देशो ०

[८८१]कति णं भंते! जुम्मा पन्नता? गोयमा! चत्तारि जुम्मा पन्नता, तंजहा-कडजुम्मे जाव कलियोए।

से केणट्ठेणं भंते! एवं वुच्चइ--चत्तारि जुम्मा पन्नता तं जहा कडजुम्मे०? जहा अट्ठारसमसते चउत्थे उद्देशए तहेव जाव सेतेणट्ठेणं गोयमा! एवं वुच्चइ०।

नेरतियाणं भंते! कति जुम्मा०? गोयमा! चत्तारि जुम्मा पन्नता, तं जहा-कडजुम्मे जाव कलियोए।

से केणट्ठेणं भंते! एवं वुच्चइ--नेरतियाणं चत्तारि जुम्मा पन्नता तंजहा कडजुम्मे०? अट्ठो तहेव।

एवं जाव वाउकाइयाणं।

वणस्सतिकाइयाणं भंते!० पुच्छा। गोयमा! वणस्सतिकाइया सिय कडजुम्मा, सिय तेयोया, सिय दावरजुम्मा, सिय कलियोया।

से केणट्ठेणं भंते! एवं वुच्चइ-वणस्सइकाइया जाव कलियोगा? गोयमा! उववायं पडुच्च, सेतेणट्ठेणं०, तं चेव।

बेंदियाणं जहा नेरतियाणं।  
एवं जाव वेमाणियाणं।  
सिद्धाणं जहा वणस्सतिकाइयाणं।  
कतिविधा णं भंते! सव्वदव्वा पन्नता! गोयमा! छव्विहा सव्वदव्वा पन्नता, तं जहा--  
धम्मत्थिकाये अधम्मत्थिकाये जाव अद्दासमये।  
धम्मत्थिकाये णं भंते! दव्वट्ठयाए किं कडजुम्मे जाव कलियोगे? गोयमा! नो कडजुम्मे, नो  
तेयोए, नो दावरजुम्मे, कलियोए।  
एवं अधम्मत्थिकाये वि।  
एवं आगासत्थिकाये वि।  
जीवत्थिकाए णं० पुच्छा। गोयमा! कडजुम्मे, नो तेयोए, नो दावरजुम्मे, नो कलियोए।  
पोग्गलत्थिकाये णं भंते!० पुच्छा। गोयमा! सिय कडजुम्मे, जाव सिय कलियोए।  
अद्दासमये जहा जीवत्थिकाये।  
धम्मत्थिकाये णं भंते! परसट्ठताए किं कडजुम्मे० पुच्छा। गोयमा! कडजुम्मे, नो तेयोए, नो  
दावरजुम्मे, नो कलियोगे।  
एवं जाव अद्दासमये।  
एएसि णं भंते! धम्मत्थिकाय-अधम्मत्थिकाय जाव अद्दासमयाणं दव्वट्ठयाए०? एएसिं  
अप्पाबहुगं जहा बहुवत्तव्वयाए तहेव निरवसेसं।  
धम्मत्थिकाये णं भंते! किं ओगाढे, अणोगाढे? गोयमा! ओगाढे, नो अणोगाढे।  
जदि ओगाढे किं संखेज्जपएसोगाढे, असंखेज्जपएसोगाढे, अणंतपएसोगाढे? गोयमा! नो  
संखेज्जपएसोगाढे, असंखेज्जपएसोगाढे, नो अणंतपएसोगाढे।  
जदि असंखेज्जपएसोगाढे किं कडजुम्मपदेसोगाढे० पुच्छा। गोयमा! कडजुम्मपएसोगाढे, नो  
तेयोग०, नो दावरजुम्म०, नो कलियोगपएसोगाढे।  
एवं अधम्मत्थिकाये वि।  
एवं आगासत्थिकाये वि।  
जीवत्थिकाये पोग्गलत्थिकाये अद्दासमये एवं चेव।  
इमा णं भंते! रयणप्पभापुढवी किं ओगाढा, अणोगाढा? जहेव धम्मत्थिकाये।  
एवं जाव अहेसत्तमा।  
सोहम्ममे एवं चेव।  
एवं जाव ईसिपब्भारा पुढवी।  
[८८२] जीवे णं भंते! दव्वट्ठयाए किं कडजुम्मे० पुच्छा। गोयमा! नो कडजुम्मे, नो तेयोए,  
नो दावरजुम्मे, कलियोए।  
एवं नेरइए वि।  
एवं जाव सिद्धे।  
जीवा णं भंते ! दव्वट्ठयाए किं कडजुम्मा० पुच्छा। गोयमा ! ओघादेसेणं कडजुम्मा, नो

तेयोगा, नो दावर०, नो कलियोगा; विहाणादेसेणं नो कडजुम्मा, नो तेयोगा, नो दावरजुम्मा, कलियोगा।

नेरइया णं भंते! दव्वट्ठताए० पुच्छा। गोयमा! ओघादेसेणं सिय कडजुम्मा, जाव सिय कलियोगा; विहाणादेसेणं नो कडजुम्मा, नो तेयोगा, नो दावरजुम्मा, कलियोगा।

एवं जाव सिद्धा।

जीवे णं भंते! पएसट्ठताए किं कड० पुच्छा। गोयमा! जीवपएसे पडुच्च कडजुम्मे, नो तेयोगे, नो दावर०, नो कलियोगे; सरीरपएसे पडुच्च सिय कडजुम्मे जाव सिय कलियोगे।

एवं जाव वेमाणिए।

सिद्धे णं भंते! पएसट्ठताए किं कडजुम्मे० पुच्छा। गोयमा! कडजुम्मे, नो तेयोगे, नो दावरजुम्मे, नो कलियोगे।

जीवा णं भंते! पदेसट्ठताए किं कडजुम्मा० पुच्छा। गोयमा! जीवपएसे पडुच्च ओघादेसेण वि विहाणादेसेण वि कडजुम्मा, नो तेयोगा, नो दावरजुम्मा, नो कलियोगा; सरीरपएसे पडुच्च ओघादेसेणं सिय कडजुम्मा जाव सिय कलियोगा, विहाणादेसेणं कडजुम्मा वि जाव कलियोगा वि।

एवं नेरइया वि।

एवं जाव वेमाणिया।

सिद्धा णं भंते!० पुच्छा। गोयमा! ओघादेसेण वि विहाणादेसेण वि कडजुम्मा, नो तेयोगा, नो दावरजुम्मा, नो कलियोगा।

**[८८३]** जीवे णं भंते! किं कडजुम्मपएसोगाढे० पुच्छा। गोयमा! सिय कडजुम्मपएसोगाढे जाव सिय कलियोगपएसोगाढे।

एवं जाव सिद्धे।

जीवा णं भंते! किं कडजुम्मपएसोगाढा० पुच्छा। गोयमा! ओघादेसेणं कडजुम्मपएसोगाढा, नो तेयोग०, नो दावर०, नो कलियोग०; विहाणादेसेणं कडजुम्मपएसोगाढा वि जाव कलियोगपएसोगाढा वि।

नेरतिया णं० पुच्छा । गोयमा ! ओघादेसेणं सिय कडजुम्मपएसोगाढा जाव सिय कलियोग-पएसोगाढा; विहाणादेसेणं कडजुम्मपएसोगाढा वि जाव कलियोगपएसोगाढा वि।

एवं एगिंदिय-सिद्धवज्जा सव्वे वि।

सिद्धा एगिंदिया य जहा जीवा।

जीवे णं भंते! किं कडजुम्मसमयट्ठतीए० पुच्छा। गोयमा! कडजुम्मसमयट्ठतीए, नो तेयोग०, नो दावर०, नो कलियोगसमयट्ठतीये।

नेरइए णं भंते!० पुच्छा। गोयमा! सिय कडजुम्मसमयट्ठतीये जाव सिय कलियोगसमयट्ठतीए।

एवं जाव वेमाणिए।

सिद्धे जहा जीवे।

जीवा णं भंते!० पुच्छा। गोयमा! ओघादेसेण वि विहाणादेसेण वि कडजुम्मसमयट्ठतीया, नो तेयोग०, नो दावर०, नो कलिओग०।

नेरइया णं० पुच्छा। गोयमा! ओघादेसेणं सिय कडजुम्मसमयट्ठतीया जाव सिय

कलियोगसमयटिठतीया; विहाणादेसेणं कडजुम्मसमयटिठतीया वि जाव कलियोगसमयटिठतीया वि।  
एवं जाव वेमाणिया।

सिद्धा जहा जीवा।

[८८४] जीवे णं भंते! कालवण्णपज्जवेहिं किं कडजुम्मे० पुच्छा। गोयमा! जीवपएसे पडुच्च  
नो कडजुम्मे जाव नो कलियोगे; सरीरपएसे पडुच्च सिय कडजुम्मे जाव सिय कलियोगे।

एवं जाव वेमाणिए।

सिद्धो ण चेव पुच्छिज्जति।

जीवा णं भंते! कालवण्णपज्जवेहिं० पुच्छा। गोयमा! जीवपएसे पडुच्च ओघादेसेण वि  
विहाणादेसेण वि नो कडजुम्मा जाव नो कलियोगा; सरीरपएसे पडुच्च ओघादेसेणं सिया कडजुम्मा जाव  
सिय कलियोगा, विहाणादेसेणं कडजुम्मा वि जाव कलियोगा वि।

एवं जाव वेमाणिया।

एवं नीलवण्णपज्जवेहि वि दंडओ भाणियच्चो एगत-पुहतेणं।

एवं जाव लुक्खफासपज्जवेहिं।

जीवे णं भंते! आभिणिबोहियणाणपज्जवेहिं किं कडजुम्मे० पुच्छा। गोयमा! सिय कडजुम्मे  
जाव सिय कलियोगे।

एवं एगिंदियवज्जं जाव वेमाणिए।

जीवा णं भंते! आभिणिबोहियणाणपज्जवेहिं० पुच्छा। गोयमा! ओघादेसेणं सिय कडजुम्मा  
जाव सिय कलियोगा, विहाणादेसेणं कडजुम्मा वि जाव कलियोगा वि।

एवं एगिंदियवज्जं जाव वेमाणिया।

एवं सुयनाणपज्जवेहि वि।

ओहिनाणपज्जवेहि वि एवं चेव, नवरं विगलिंदियाणं नत्थि ओहिनाणं।

मणपज्जवनाणं पि एवं चेव, नवरं जीवाणं मणुस्साण य, सेसाणं नत्थि।

जीवे णं भंते! केवलनाणपज्जवेहिं किं कडजुम्मे० पुच्छा। गोयमा! कडजुम्मे, नो तेयोए, नो  
दावरजुम्मे, णो कलियोए।

एवं मणुस्से वि।

एवं सिद्धे वि।

जीवा णं भंते! केवलनाण० पुच्छा। गोयमा! ओघादेसेण वि विहाणादेसेण वि कडजुम्मा, नो  
तेयोगा, नो दावर०, नो कलियोगा।

एवं मणुस्सा वि।

एवं सिद्धा वि।

जीवे णं भंते! मतिअन्नाणपज्जवेहिं किं कडजुम्मे०? जहा आभिणिबोहियणाणपज्जवेहिं तहेव  
दो दंडगा।

एवं सुयअन्नाणपज्जवेहि वि।

एवं विभंगनाणपज्जवेहि वि।

चक्खुदंसण-अचक्खुदंसण-ओहिदंसणपज्जवेहि वि एवं चेव, नवरं जस्स जं अत्थि तं भाणियच्चं।

केवलदंसणपज्जवेहिं जहा केवलनाणपज्जवेहिं।

[८८५]कति णं भंते! सरीरगा पन्नता? गोयमा! पंच सरीरगा पन्नता, तं जहा-ओरालिय जाव कम्मए। एत्थ सरीरगपदं निरवसेसं भाणियच्चं जहा पणवणाए।

[८८६]जीवा णं भंते! किं सेया, निरेया? गोयमा! जीवा सेया वि, निरेया वि।

से केणट्ठेणं भंते! एवं वुच्चइ-जीवा सेया वि, निरेया वि? गोयमा! जीवा दुविहा पन्नता, तं जहा--संसारसमावन्नगा य, असंसारसमावन्नगा य। तत्थ णं जे ते असंसारसमावन्नगा ते णं सिद्धा, सिद्धा णं दुविहा पन्नता, तं जहा--अणंतरसिद्धा य, परंपरसिद्धा य। तत्थ णं जे ते परंपरसिद्धा ते णं निरेया। तत्थ णं जे ते अणंतरसिद्धा ते णं सेया।

ते णं भंते! किं देसेया, सव्वेया? गोयमा! नो देसेया, सव्वेया।

तत्थ णं जे ते संसारसमावन्नगा ते दुविहा पन्नता, तं जहा-सेलेसिपडिवन्नगा य, असेलेसिपडिवन्नगा य। तत्थ णं जे ते सेलेसिपडिवन्नगा ते णं निरेया। तत्थ णं जे ते असेलेसिपडिवन्नगा ते णं सेया।

ते णं भंते! किं देसेया, सव्वेया? गोयमा! नो देसेया, सव्वेया वि। सेतेणट्ठेणं जाव निरेया वि।

नेरइया णं भंते! किं देसेया, सव्वेया? गोयमा! देसेया वि, सव्वेया वि।

से केणट्ठेणं जाव सव्वेया वि? गोयमा! नेरइया दुविहा पन्नता, तं जहा-विग्गहगति-समावन्नगा य, अविग्गहगतिसमावन्नगा य। तत्थ णं जे ते विग्गहगतिसमावन्नगा ते णं सव्वेया, तत्थ णं जे ते अविग्गहगतिसमावन्नगा ते णं देसेया, सेतेणट्ठेणं जाव सव्वेया वि।

एवं जाव वेमाणिया।

[८८७]परमाणुपोग्गला णं भंते! किं संखेज्जा, असंखेज्जा, अणंता? गोयमा! नो संखेज्जा, नो असंखेज्जा, अणंता।

एवं जाव अणंतपदेसिया खंधा।

एगपएसोगाढा णं भंते! पोग्गला किं संखेज्जा, असंखेज्जा, अणंता? एवं चेव।

एवं जाव असंखेज्जपदेसोगाढा।

एगसमयट्ठितीया णं भंते! पोग्गला किं संखेज्जा, असंखेज्जा? एवं चेव।

एवं जाव असंखेज्जसमयट्ठितीया।

एगगुणकालगा णं भंते! पोग्गला किं संखेज्जा? एवं चेव।

एवं जाव अणंतगुणकालगा।

एवं अवसेसा वि वण्ण-गंध-रस-फासा नेयच्चा जाव अणंतगुणलुक्ख ति।

एएसि णं भंते! परमाणुपोग्गलाणं दुपएसियाण य खंधाणं दव्वट्ठयाए कयरे कयरेहितो बहुया? गोयमा! दुपदेसिएहितो खंधेहितो परमाणुपोग्गला दव्वट्ठयाए बहुगा।

एएसि णं भंते! दुपएसियाणं तिपएसियाण य खंधाणं दव्वट्ठताए कयरे कयरेहितो बहुगा?

गोयमा! तिपएसिएहितो खंधेहितो दुपएसिया खंधा दव्वट्ठयाए बहुया।  
एवं एणं गमएणं जाव दसपएसिएहितो खंधेहितो नवपएसिया खंधा दव्वट्ठयाए बहुया।  
एएसि णं भंते! दसपदे० पुच्छा। गोयमा! दसपदेसिएहितो खंधेहितो संखेज्जपएसिया खंधा  
दव्वट्ठयाए बहुया।

एएसि णं संखेज्ज० पुच्छा। गोयमा! संखेज्जपएसिएहितो खंधेहितो असंखेज्जपएसिया खंधा  
दव्वट्ठयाए बहुया।

एएसि णं भंते! असंखेज्ज० पुच्छा। गोयमा! अणंतपएसिएहितो खंधेहितो असंखेज्जपएसिया  
खंधा दव्वट्ठयाए बहुया।

एएसि णं भंते! परमाणुपोग्गलाणं दुपएसियाण य खंधाणं पएसट्ठयाए कयरे कयरेहितो  
बहुया? गोयमा! परमाणुपोग्गलेहितो दुपएसिया खंधा पएसट्ठयाए बहुया।

एवं एणं गमएणं जाव नवपएसिएहितो खंधेहितो दसपएसिया खंधा पएसट्ठयाए बहुया।

एवं सव्वत्थ पुच्छियत्वं। दसपएसिएहितो खंधेहितो संखेज्जपएसिया खंधा पदेसट्ठयाए  
बहुया। संखेज्जपएसिएहितो असंखेज्जपएसिया खंधा पदेसट्ठयाए बहुया।

एएसि णं भंते! असंखेज्जपएसियाणं० पुच्छा। गोयमा! अणंतपएसिएहितो खंधेहितो  
असंखेज्जपएसिया खंधा पदेसट्ठयाए बहुया।

एएसि णं भंते! एगपएसोगाढाणं दुपएसोगाढाण य पोग्गलाणं दव्वट्ठयाए कयरे कयरेहितो  
विसेसाहिया? गोयमा! दुपएसोगाढेहितो पोग्गलेहितो एगपएसोगाढा पोग्गला दव्वट्ठयाए विसेसाहिया।

एवं एणं गमएणं तिपएसोगाढेहितो पोग्गलेहितो दुपएसोगाढा पोग्गला दव्वट्ठयाए  
विसेसाहिया जाव दसपएसोगाढेहितो पोग्गलेहितो नवपएसोगाढा पोग्गला दव्वट्ठयाए विसेसाहिया।  
दसपएसोगाढेहितो पोग्गलेहितो संखेज्जपएसोगाढा पोग्गला दव्वट्ठयाए बहुया। संखेज्जपएसोगाढेहितो  
पोग्गलेहितो असंखेज्जपएसोगाढा पोग्गला दव्वट्ठयाए बहुया। पुच्छा सव्वत्थ भाणियत्वा।

एएसि णं भंते! एगपएसोगाढाणं दुपएसोगाढाण य पोग्गलाणं पएसट्ठयाए कयरे कयरेहितो  
विसेसाहिया? गोयमा! एगपएसोगाढेहितो पोग्गलेहितो दुपएसोगाढा पोग्गला पदेसट्ठयाए  
विसेसाहिया।

एवं जाव नवपएसोगाढेहितो पोग्गलेहितो दसपएसोगाढा पोग्गला पएसट्ठयाए विसेसाहिया।  
दसपदेसोगाढेहितो पोग्गलेहितो संखेज्जपएसोगाढा पोग्गला पएसट्ठयाए बहुया। संखेज्जपएसोगाढेहितो  
पोग्गलेहितो असंखेज्जपएसोगाढा पोग्गला पएसट्ठयाए बहुया।

एएसि णं भंते! एगसमयट्ठितीयाणं दुसमयट्ठितीयाण य पोग्गलाणं दव्वट्ठयाए०? जहा  
ओगाहणाए वत्तव्वया एवं ठितीए वि।

एएसि णं भंते! एगगुणकालगाणं दुगुणकालगाण य पोग्गलाणं दव्वट्ठयाए०? एएसिं जहा  
परमाणुपोग्गलादीणं तहेव वत्तव्वया निरवसेसा।

एवं सव्वेसिं वण्ण-गंध-रसाणं।

एएसि णं भंते! एगगुणककखडाणं दुगुणककखडाण य पोग्गलाणं दव्वट्ठयाए कयरे  
कयरेहितो विसेसाहिया ? .....गोयमा ! एगगुणककखडेहितो पोग्गलेहितो दुगुणककखडा पोग्गला दव्वट्ठयाए

विसेसाहिया।

एवं जाव नवगुणककखडेहिंतो पोग्गलेहिंतो दसगुणककखडा पोग्गला दव्वट्ठयाए विसेसाहिया। दसगुणककखडेहिंतो संखेज्जगुणककखडा पोग्गला दव्वट्ठयाए बहुया। संखेज्जगुणककखडेहिंतो पोग्गलेहिंतो असंखेज्जगुणककखडा पोग्गला दव्वट्ठयाए बहुया। असंखेज्जगुणककखडेहिंतो पोग्गलेहिंतो अणंतगुणककखडा पोग्गला दव्वट्ठयाए बहुया।

एवं पएसट्ठताए वि सव्वत्थ पुच्छा भाणियच्वा।

जहा ककखडा एवं मउय-गरुय-लहुया वि।

सीय-उसिण-निद्ध-लुक्खा जहा वण्णा।

[८८८]एएसि णं भंते! परमाणुपोग्गलाणं, संखेज्जपदेसियाणं असंखेज्जपएसियाणं अणंतपएसियाणं य खंधाणं दव्वट्ठयाए पएसट्ठयाए दव्वट्ठपएसट्ठयाए कयरे कयरेहिंतो जाव विसेसाहिया वा? गोयमा! सव्वत्थोवा अणंतपएसिया खंधा दव्वट्ठयाए, परमाणुपोग्गला दव्वट्ठयाए अणंतगुणा, संखेज्जपएसिया खंधा दव्वट्ठयाए संखेज्जगुणा, असंखेज्जपएसिया खंधा दव्वट्ठयाए असंखेज्जगुणा। पएसट्ठयाए-सव्वत्थोवा अणंतपएसिया खंधा पएसट्ठताए, परमाणुपोग्गला अपदेसट्ठयाए अणंतगुणा, संखेज्जपएसिया खंधा पएसट्ठयाए संखेज्जगुणा, असंखेज्जपएसिया खंधा पएसट्ठयाए असंखेज्जगुणा। दव्वट्ठपएसट्ठयाए-सव्वत्थोवा अणंतपएसिया खंधा दव्वट्ठयाए, ते चेव पएसट्ठयाए अणंतगुणा, परमाणुपोग्गला दव्वट्ठपएसट्ठयाए अणंतगुणा, संखेज्जपएसिया खंधा दव्वट्ठयाए संखेज्जगुणा, ते चेव पएसट्ठयाए संखेज्जगुणा, असंखेज्जपएसिया खंधा दव्वट्ठयाए असंखेज्जगुणा, ते चेव पएसट्ठयाए असंखेज्जगुणा।

एएसि णं भंते! एगपएसोगाढाणं संखेज्जपएसोगाढाणं असंखेज्जपएसोगाढाणं य पोग्गलाणं दव्वट्ठयाए पदेसट्ठयाए दव्वट्ठपदेसट्ठयाए कयरे कयरेहिंतो जाव विसेसाहिया वा? गोयमा! सव्वत्थोवा एगपदेसोगाढा पोग्गला दव्वट्ठयाए, संखेज्जपएसोगाढा पोग्गला दव्वट्ठयाए संखेज्जगुणा, असंखेज्जपएसोगाढा पोग्गला दव्वट्ठयाए असंखेज्जगुणा। पएसट्ठयाए-सव्वत्थोवा एगपदेसोगाढा पोग्गला अपएसट्ठयाए, संखेज्जपएसोगाढा पोग्गला पदेसट्ठयाए संखेज्जगुणा, असंखेज्जपएसोगाढा पोग्गला पदेसट्ठयाए असंखेज्जगुणा। दव्वट्ठपएसट्ठयाए-सव्वत्थोवा एगपएसोगाढा पोग्गला दव्वट्ठपदेसट्ठयाए, संखेज्जपएसोगाढा पोग्गला दव्वट्ठयाए संखेज्जगुणा, ते चेव पएसट्ठयाए संखेज्जगुणा, असंखेज्ज-पएसोगाढा पोग्गला दव्वट्ठयाए असंखेज्जगुणा, ते चेव पएसट्ठयाए असंखेज्जगुणा।

एएसि णं भंते! एगसमयट्ठितीयाणं संखेज्जसमयट्ठितीयाणं असंखेज्जसमयट्ठितीयाणं य पोग्गलाणं? जहा ओगाहणाए तहा ठितीए वि भाणियत्वं अप्पाबहुगं।

एएसि णं भंते! एगगुणकालगाणं संखेज्जगुणकालगाणं असंखेज्जगुणकालगाणं अणंतगुणकालगाणं य पोग्गलाणं दव्वट्ठयाए पएसट्ठयाए दव्वट्ठपएसट्ठयाए? एएसिं जहा परमाणुपोग्गलाणं अप्पाबहुगं तहा एतेसिं पि अप्पाबहुगं।

एवं सेसाण वि वण्ण-गंध-रसाणं।

एएसि णं भंते! एगगुणककखडाणं संखेज्जगुणककखडाणं असंखेज्जगुणककखडाणं अणंतगुणककखडाणं य पोग्गलाणं दव्वट्ठयाए पएसट्ठयाए दव्वट्ठपएसट्ठयाए कयरे कयरेहिंतो जाव

विसेसाहिया वा? गोयमा! सव्वत्थोवा एगगुणकक्खडा पोग्गला दव्वट्ठयाए, संखेज्जगुणकक्खडा पोग्गला दव्वट्ठयाए संखेज्जगुणा, असंखेज्जगुणकक्खडा पोग्गला दव्वट्ठयाए असंखेज्जगुणा, अणंतगुणकक्खडा पोग्गला दव्वट्ठयाए अणंतगुणा। पएसट्ठयाए एवं चेव, नवरं संखेज्जगुणकक्खडा पोग्गला पएसट्ठयाए असंखेज्जगुणा, सेसं तं चेव। दव्वट्ठपएसट्ठयाए--सव्वत्थोवा एगगुणकक्खडा पोग्गला दव्वट्ठपएसट्ठयाए, संखेज्जगुणकक्खडा पोग्गला दव्वट्ठयाए संखेज्जगुणा, ते चेव पएसट्ठयाए संखेज्जगुणा, असंखेज्जगुणकक्खडा दव्वट्ठयाए असंखेज्जगुणा, ते चेव पएसट्ठयाए असंखेज्जगुणा। अणंतगुणकक्खडा दव्वट्ठयाए अणंतगुणा, ते चेव पएसट्ठयाए अणंतगुणा।

एवं मउय-गरुय-लहुयाण वि अप्पाबहुयं।

सीय-उसिण-निद्ध-लुक्खाणं जहा वण्णाणं तहेव।

[८८९]परमाणुपोग्गले णं भंते! दव्वट्ठताए किं कडजुम्मे, तेयोए, दावर०, कलियोगे? गोयमा! नो कडजुम्मे, नो तेयोए, नो दावर०, कलियोए।

एवं जाव अणंतपएसिए खंधे।

परमाणुपोग्गला णं भंते! दव्वट्ठयाए किं कडजुम्मा० पुच्छा। गोयमा! ओघादेसेणं सिय कडजुम्मा जाव सिय कलियोगा। विहाणादेसेणं नो कडजुम्मा, नो तेयोगा, नो दावर०, कलियोगा।

एवं जाव अणंतपएसिया खंधा।

परमाणुपोग्गले णं भंते! पदेसट्ठयाए किं कडजुम्मे० पुच्छा। गोयमा! नो कडजुम्मे, नो तेयोगे, नो दावर०, कलियोए।

दुपएसिए पुच्छा। गोयमा! नो कड०, नो तेयोए, दावर०, नो कलियोगे।

तिपएसिए पुच्छा। गोयमा! नो कडजुम्मे, तेयोए, नो दावर०, नो कलियोए।

चउप्पएसिए पुच्छा। गोयमा! कडजुम्मे, नो तेयोए, नो दावर०, नो कलियोए।

पंचपदेसिए जहा परमाणुपोग्गले।

छप्पदेसिए जहा दुपदेसिए।

सत्तपदेसिए जहा तिपदेसिए।

अट्ठपएसिए जहा चउपदेसिए।

नवपदेसिए जहा परमाणुपोग्गले।

दसपदेसिए जहा दुपदेसिए।

संखेज्जपएसिए णं भंते! पोग्गले० पुच्छा। गोयमा! सिय कडजुम्मे, जाव सिय कलियोगे।

एवं असंखेज्जपदेसिए वि, अणंतपदेसिए वि।

परमाणुपोग्गला णं भंते! पएसट्ठताए किं कड० पुच्छा। गोयमा! ओघादेसेणं सिय कडजुम्मा जाव सिय कलियोगा; विहाणादेसेणं नो कडजुम्मा, नो तेयोगा, नो दावर०, कलियोगा।

दुप्पएसिया णं० पुच्छा। गोयमा! ओघादेसेणं सिय कडजुम्मा, नो तेयोगा, सिय दावरजुम्मा, नो कलियोगा; विहाणादेसेणं नो कडजुम्मा, नो तेयोगा, दावरजुम्मा, नो कलियोगा।

तिपएसिया णं० पुच्छा। गोयमा! ओघादेसेणं सिय कडजुम्मा जाव सिय कलियोगा; विहाणादेसेणं नो कडजुम्मा, तेयोगा, नो दावरजुम्मा, नो कलियोगा।

चउप्पएसिया णं० पुच्छा। गोयमा! ओघादेसेण वि विहाणादेसेण वि कडजुम्मा, नो तेयोगा, नो दावर०, नो कलियोगा।

पंचपएसिया जहा परमाणुपोग्गला।

छप्पएसिया जहा दुपएसिया।

सत्तपएसिया जहा तिपएसिया।

अट्ठपएसिया जहा चउपएसिया।

नवपएसिया जहा परमाणुपोग्गला।

दसपएसिया जहा दुपएसिया।

संखेज्जपएसिया णं० पुच्छा। गोयमा! ओघादेसेणं सिय कडजुम्मा जाव सिय कलियोगा; विहाणादेसेणं कडजुम्मा वि जाव कलियोगा वि।

एवं असंखेज्जपएसिया वि, अणंतपएसिया वि।

परमाणुपोग्गले णं भंते! किं कडजुम्मपएसोगाढे० पुच्छा। गोयमा! नो कडजुम्मपएसोगाढे, नो तेयोय०, नो दावरजुम्म०, कलियोगपएसोगाढे।

दुपएसिए णं० पुच्छा। गोयमा! नो कडजुम्मपएसोगाढे, णो तेयोग०, सिय दावरजुम्मपएसोगाढे, सिय कलियोगपएसोगाढे।

तिपएसिए णं० पुच्छा। गोयमा! नो कडजुम्मपएसोगाढे, सिय तेयोगपएसोगाढे, सिय दावरजुम्मपएसोगाढे, सिय कलियोगपएसोगाढे।

चउपएसिए णं० पुच्छा। गोयमा! सिय कडजुम्मपएसोगाढे जाव सिय कलियोगपएसोगाढे।

एवं जाव अणंतपएसिए।

परमाणुपोग्गला णं भंते! किं कड० पुच्छा। गोयमा! ओघादेसेणं कडजुम्मपएसोगाढा, नो तेयोय०, नो दावर०, नो कलियोग०; विहाणादेसेणं नो कडजुम्मपएसोगाढा, णो तेयोग०, नो दावर०, कलियोगपएसोगाढा।

दुपएसिया णं० पुच्छा। गोयमा ! ओघादेसेणं कडजुम्मपएसोगाढा, नो तेयोग०, नो दावर०, नो कलिओग०; विहाणादेसेणं नो कडजुम्मपएसोगाढा, नो तेयोगपएसोगाढा, दावरजुम्मपएसोगाढा वि, कलियोगपएसोगाढा वि।

तिपएसिया णं० पुच्छा। गोयमा! ओघादेसेणं कडजुम्मपएसोगाढा, नो तेयोय० नो दावर०, नो कलि०; विहाणादेसेणं नो कडजुम्मपएसोगाढा, तेयोगपएसोगाढा वि, दावरजुम्मपएसोगाढा वि, कलियोगपएसोगाढा वि।

चउपएसिया णं० पुच्छा। गोयमा! ओघादेसेणं कडजुम्मपएसोगाढा, नो तेयोग०, नो दावर०, नो कलिओग०; विहाणादेसेणं कडजुम्मपएसोगाढा वि जाव कलियोगपएसोगाढा वि।

एवं जाव अणंतपएसिया।

परमाणुपोग्गले णं भंते! किं कडजुम्मसमयट्ठितीए० पुच्छा। गोयमा! सिय कडजुम्मसमयट्ठितीए जाव सिय कलियोगसमयट्ठितीए।

एवं जाव अणंतपएसिए।

परमाणुपोग्गला णं भंते! किं कडजुम्मसमयट्ठितीया० पुच्छा। गोयमा! ओघादेसेणं सिय कडजुम्मसमयट्ठितीया जाव सिय कलियोगसमयट्ठितीया; विहाणादेसेणं कडजुम्मसमयट्ठितीया वि जाव कलियोगसमयट्ठितीया वि।

एवं जाव अणंतपरसिया।

परमाणुपोग्गले णं भंते! कालवण्णपज्जवेहिं किं कडजुम्मे, तेयोगे०? जहा ठितीए वत्तव्वया एवं वण्णेसु वि सव्वेसु, गंधेसु वि।

एवं चेव रसेसु वि जाव महुरो रसो ति।

अणंतपरसिए णं भंते! खंधे कक्खडफासपज्जवेहिं किं कडजुम्मे० पुच्छा। गोयमा! सिय कडजुम्मे जाव सिय कलियोगे।

अणंतपरसिया णं भंते! खंधा कक्खडफासपज्जवेहिं किं कडजुम्मा० पुच्छा। गोयमा! ओघादेसेणं सिया कडजुम्मा जाव सिय कलियोगा; विहाणादेसेणं कडजुम्मा वि जाव कलियोगा वि।

एवं मउय-गरुय-लहया वि भाणियव्वा।

सीय-उसिण-निद्ध-लुक्खा जहा वण्णा।

**[८९०]** परमाणुपोग्गले णं भंते! किं सड्ढे अणड्ढे? गोयमा! नो सड्ढे, अणड्ढे।

दुपरसिए० पुच्छा। गोयमा! सड्ढे नो अणड्ढे।

तिपरसिए जहा परमाणुपोग्गले।

चउपरसिए जहा दुपरसिए।

पंचपरसिए जहा तिपरसिए।

छप्परसिए जहा दुपरसिए।

सत्तपरसिए जहा तिपरसिए।

अट्ठपरसिए जहा दुपरसिए।

नवपरसिए जहा तिपरसिए।

दसपरसिए जहा दुपरसिए।

संखेज्जपरसिए णं भंते! खंधे० पुच्छा। गोयमा! सिय सड्ढे, सिय अणड्ढे।

एवं असंखेज्जपरसिए वि।

एवं अणंतपरसिए वि।

परमाणुपोग्गला णं भंते! किं सड्ढा, अणड्ढा? गोयमा! सड्ढा वा अणड्ढा वा।

एवं जाव अणंतपरसिया।

**[८९१]** परमाणुपोग्गले णं भंते! किं सेए, निरेए? गोयमा! सिय सेए, सिय निरेए।

एवं जाव अणंतपरसिए।

परमाणुपोग्गला णं भंते! किं सेया, निरेया? गोयमा! सेया वि, निरेया वि।

एवं जाव अणंतपरसिया।

परमाणुपोग्गले णं भंते! सेए कालतो केवचिरं होति? गोयमा! जहन्नेणं एक्कं समयं, उक्कोसेणं आवलियाए असंखेज्जाइभागं।

परमाणुपोग्गले णं भंते! निरेए कालतो केवचिरं होइ? गोयमा! जहन्नेणं एककं समयं, उक्कोसेणं असंखेज्जं कालं।

एवं जाव अणंतपएसिए।

परमाणुपोग्गला णं भंते! सेया कालओ केवचिरं होंति? गोयमा! सव्वद्धं।

परमाणुपोग्गला णं भंते! निरेया कालओ केवचिरं होंति? गोयमा! सव्वद्धं।

एवं जाव अणंतपएसिया।

परमाणुपोग्गलस्स णं भंते! सेयस्स केवतियं कालं अंतरं होति? गोयमा! सट्ठाणंतरं पडुच्च जहन्नेणं एककं समयं, उक्कोसेणं असंखेज्जं कालं; परट्ठाणंतरं पडुच्च जहन्नेणं एककं समयं, उक्कोसेणं असंखेज्जं कालं।

निरेयस्स केवतियं कालं अंतरं होइ? गोयमा! सट्ठाणंतरं पडुच्च जहन्नेणं एककं समयं, उक्कोसेणं आवलियाए असंखेज्जतिभागं; परट्ठाणंतरं पडुच्च जहन्नेणं एककं समयं, उक्कोसेणं असंखेज्जं कालं।

दुपएसियस्स णं भंते! खंधस्स सेयस्स० पुच्छा। गोयमा! सट्ठाणंतरं पडुच्च जहन्नेणं एककं समयं, उक्कोसेणं असंखेज्जं कालं; परट्ठाणंतरं पडुच्च जहन्नेणं एककं समयं, उक्कोसेणं अणंतं कालं।

निरेयस्स केवतियं कालं अंतरं होइ? गोयमा! सट्ठाणंतरं पडुच्च जहन्नेणं एककं समयं, उक्कोसेणं आवलियाए असंखेज्जतिभागं; परट्ठाणंतरं पडुच्च जहन्नेणं एककं समयं, उक्कोसेणं अणंतं कालं।

एवं जाव अणंतपएसियस्स।

परमाणुपोग्गलाणं भंते! सेयाणं केवतियं कालं अंतरं होइ? गोयमा! नत्थंतरं।

निरेयाणं केवतियं कालं अंतरं होइ? नत्थंतरं।

एवं जाव अणंतपएसियाणं खंधाणं।

एसि णं भंते! परमाणुपोग्गलाणं सेयाणं निरेयाण य कयरे कयरेहितो जाव विसेसाहिया वा? गोयमा! सव्वत्थोवा परमाणुपोग्गला सेया, निरेया असंखेज्जगुणा।

एवं जाव असंखेज्जपएसियाणं खंधाणं।

एसि णं भंते! अणंतपएसियाणं खंधाणं सेयाणं निरेयाण य कयरे कयरेहितो जाव विसेसाहिया वा? गोयमा! सव्वत्थोवा अणंतपएसिया खंधा निरेया, सेया अणंतगुणा।

एसि णं भंते! परमाणुपोग्गलाणं, संखेज्जपएसियाणं असंखेज्जपएसियाणं अणंतपएसियाण य खंधाणं सेयाणं निरेयाण य दव्वट्ठयाए पएसट्ठयाए दव्वट्ठपएसट्ठयाए कयरे कयरेहितो जाव विसेसाहिया वा? गोयमा! सव्वत्थोवा अणंतपएसिया खंधा निरेया दव्वट्ठयाए १, अणंतपएसिया खंधा सेया दव्वट्ठयाए अणंतगुणा २, परमाणुपोग्गला सेया दव्वट्ठयाए अणंतगुणा ३, संखेज्जपएसिया खंधा सेया दव्वट्ठयाए असंखेज्जगुणा ४, असंखेज्जपएसिया खंधा सेया दव्वट्ठयाए असंखेज्जगुणा ५, परमाणुपोग्गला निरेया दव्वट्ठयाए असंखेज्जगुणा ६, संखेज्जपएसिया खंधा निरेया दव्वट्ठयाए संखेज्जगुणा ७, असंखेज्जपएसिया खंधा निरेया दव्वट्ठयाए असंखेज्जगुणा ८।

पएसट्ठयाए एवं चेव, नवरं परमाणुपोग्गला अपएसट्ठयाए भाणियव्वा। संखेज्जपएसिया खंधा निरेया पएसट्ठयाए असंखेज्जगुणा, सेसं तं चेव । दव्वट्ठपएसट्ठयाए-- सव्वत्थोवा अणंतपएसिया

खंधा निरेया दव्वट्ठयाए १, ते चेव पएसट्ठयाए अणंतगुणा २, अणंतपएसिया खंधा सेया दव्वट्ठयाए अणंतगुणा ३, ते चेव पएसट्ठयाए अणंतगुणा ४, परमाणुपोग्गला सेया दव्वट्ठअपएसट्ठयाए अणंतगुणा ५, संखेज्जपएसिया खंधा सेया दव्वट्ठयाए असंखेज्जगुणा ६, ते चेव पएसट्ठयाए असंखेज्जगुणा ७ असंखेज्जपएसिया खंधा सेया दव्वट्ठयाए असंखेज्जगुणा ८, ते चेव पएसट्ठयाए असंखेज्जगुणा ९, परमाणुपोग्गला निरेया दव्वट्ठअपएसट्ठयाए असंखेज्जगुणा १०, संखेज्जपएसिया खंधा निरेया दव्वट्ठयाए असंखेज्जगुणा ११, ते चेव पएसट्ठयाए असंखेज्जगुणा १२, असंखेज्जपएसिया खंधा निरेया दव्वट्ठयाए असंखेज्जगुणा १३, ते चेव पएसट्ठयाए असंखेज्जगुणा १४।

परमाणुपोग्गले णं भंते! किं देसेए, सव्वेए, निरेए?

गोयमा! नो देसेए, सिय सव्वेए, सिय निरेये ।

दुपदेसिए णं भंते! खंधे० पुच्छा। गोयमा! सिय देसेए, सिय सव्वेए, सिय निरेये।

दुपदेसिए णं भंते! खंधे० पुच्छा। गोयमा! सिय देसेए, सिय सव्वेए, सिय निरेये।

एवं जाव अणंतपदेसिए।

परमाणुपोग्गला णं भंते! किं देसेया, सव्वेया, निरेया?

गोयमा! नो देसेया, सव्वेया वि, निरेया वि।

दुपदेसिया णं भंते! खंधा० पुच्छा। गोयमा! देसेया वि, सव्वेया वि, निरेया वि।

एवं जाव अणंतपएसिया।

परमाणुपोग्गले णं भंते! सव्वेए कालतो केवचिरं होति? गोयमा! जहन्नेणं एककं समयं, उक्कोसेणं आवलियाए असंखेज्जतिभागं।

निरेये कालतो केवचिरं होति? गोयमा! जहन्नेणं एककं समयं, उक्कोसेणं असंखेज्जं कालं।

दुपएसिए णं भंते! खंधे देसेए कालतो केवचिरं होति? गोयमा! जहन्नेणं एककं समयं, उक्कोसेणं आवलियाए असंखेज्जतिभागं।

सव्वेए कालतो केवचिरं होति? जहन्नेणं एककं समयं, उक्कोसेणं आवलियाए असंखेज्जइभागं।

निरेए कालतो केवचिरं होति? जहन्नेणं एककं समयं, उक्कोसेणं असंखेज्जं कालं।

एवं जाव अणंतपदेसिए।

परमाणुपोग्गला णं भंते! सव्वेया कालतो केवचिरं होति? गोयमा! सव्वद्धं।

निरेया कालतो केवचिरं? सव्वद्धं।

दुप्पदेसिया णं भंते! खंधा देसेया कालतो केवचिरं होति? सव्वद्धं।

सव्वेया कालतो केवचिरं? सव्वद्धं।

निरेया कालतो केवचिरं? सव्वद्धं।

एवं जाव अणंतपदेसिया।

परमाणुपोग्गलस्स णं भंते! सव्वेयस्स केवतियं कालं अंतरं होति? सट्ठाणंतरं पडुच्च जहन्नेणं एककं समयं, उक्कोसेणं असंखेज्जं कालं; परट्ठाणंतरं पडुच्च जहन्नेणं एककं समयं, उक्कोसेणं एवं चेव।

निरेयस्स केवतियं अंतरं होइ? सट्ठाणंतरं पडुच्च जहन्नेणं एककं समयं, उक्कोसेणं आवलियाए असंखेज्जतिभागं; परट्ठाणंतरं पडुच्च जहन्नेणं एककं समयं, उक्कोसेणं असंखेज्जं कालं।

दुपएसियस्स णं भंते! खंधस्स देसेयस्स केवतियं कालं अंतरं होइ? सट्ठाणंतरं पडुच्च जहन्नेणं एककं समयं, उक्कोसेणं असंखेज्जं कालं; परट्ठाणंतरं पडुच्च जहन्नेणं

एककं समयं, उक्कोसेणं अणंतं कालं।

सव्वेयस्स केवतियं कालं०? एवं चेव जहा देसेयस्स।

निरेयस्स केवतियं०? सट्ठाणंतरं पडुच्च जहन्नेणं एककं समयं, उक्कोसेणं आवलियाए असंखेज्जतिभागं; परट्ठाणंतरं पडुच्च जहन्नेणं एककं समयं, उक्कोसेणं अणंतं कालं।

एवं जाव अणंतपएसियस्स।

परमाणुपोग्गलाणं भंते! सव्वेयाणं केवतियं कालं अंतरं होइ?, नत्थंतरं।

निरेयाणं केवतियं०? नत्थंतरं।

दुपएसियाणं भंते! खंधाणं देसेयाणं केवतियं कालं०? नत्थंतरं।

सव्वेयाणं केवतियं कालं०? नत्थंतरं।

निरेयाणं केवतियं कालं०? नत्थंतरं।

एवं जाव अणंतपएसियाणं।

एसि णं भंते! परमाणुपोग्गलाणं सव्वेयाणं निरेयाणं य कयरे कयरेहिंतो जाव विसेसाहिया वा? गोयमा! सव्वत्थोवा परमाणुपोग्गला सव्वेया, निरेया असंखेज्जगुणा।

एसि णं भंते! दुपएसियाणं खंधाणं देसेयाणं सव्वेयाणं निरेयाणं य कयरे कयरेहिंतो जाव विसेसाहिया वा? गोयमा! सव्वत्थोवा दुपएसिया खंधा सव्वेया, देसेया असंखेज्जगुणा, निरेया असंखेज्जगुणा।

एवं जाव असंखेज्जपएसियाणं खंधाणं।

एसि णं भंते! अणंतपएसियाणं खंधाणं देसेयाणं सव्वेयाणं निरेयाणं य कयरे कयरेहिंतो जाव विसेसाहिया वा? गोयमा! सव्वत्थोवा अणंतपएसिया खंधा सव्वेया, निरेया अणंतगुणा, देसेया अणंतगुणा।

एएणि णं भंते! परमाणुपोग्गलाणं, संखेज्जपएसियाणं असंखेज्जएसियाणं अणंतपएसियाणं य खंधाणं देसेयाणं सव्वेयाणं निरेयाणं दव्वट्ठयाए पएसट्ठयाए दव्वट्ठपएसट्ठयाए कयरे कयरेहिंतो जाव विसेसाहिया वा? गोयमा! सव्वत्थोवा अणंतपएसिया खंधा सव्वेया दव्वट्ठयाए १, अणंतपएसिया खंधा निरेया दव्वट्ठयाए अणंतगुणा २, अणंतपएसिया

खंधा देसेया दव्वट्ठयाए अणंतगुणा ३, असंखेज्जपएसिया खंधा सव्वेया दव्वट्ठयाए अणंतगुणा ४, संखेज्जपएसिया खंधा सव्वेया दव्वट्ठयाए असंखेज्जगुणा ५, परमाणुपोग्गला सव्वेया दव्वट्ठयाए असंखेज्जगुणा ६, संखेज्जपएसिया खंधा देसेया दव्वट्ठयाए असंखेज्जगुणा ७, असंखेज्जपएसिया खंधा देसेया दव्वट्ठयाए असंखेज्जगुणा ८, परमाणुपोग्गला निरेया दव्वट्ठयाए असंखेज्जगुणा ९, संखेज्जपएसिया खंधा निरेया दव्वट्ठयाए संखेज्जगुणा १०, असंखेज्जपएसिया खंधा निरेया दव्वट्ठयाए असंखेज्जगुणा ११।

पदेसट्ठयाए-सव्वत्थोवा अणंतपदेसिया। एवं पएसट्ठयाए वि, नवरं परमाणुपोग्गला

अपएसट्ठयाए भाणियत्त्वा। संखेज्जपएसिया खंधा निरेया अपएसट्ठयाए असंखेज्जगुणा,सेसं तं चेव।

दव्वट्ठपएसट्ठयाए-सव्वेत्थोवा अणंतपएसिया खंधा सव्वेया दव्वट्ठयाए १, ते चेव अपएसट्ठयाए अणंतगुणा २, अणंतपएसिया खंधा निरेया दव्वट्ठयाए अणंतगुणां ३, ते चेव अपएसट्ठयाए अणंतगुणा ४, अणंतपएसिया खंधा देसेया दव्वट्ठयाए अणंतगुणा ५, ते चेव पदेसट्ठयाए अणंतगुणा ६, असंखेज्जपएसिया खंधा सव्वेया दव्वट्ठयाए अणंतगुणा ७, ते चेव अपएसट्ठयाए असंखेज्जगुणा ८, संखेज्जपएसिया खंधा सव्वेया दव्वट्ठयाए असंखेज्जगुणा ९, ते चेव अपएसट्ठयाए असंखेज्जगुणा १०, परमाणुपोग्गला सव्वेया दव्वट्ठअपएसट्ठयाए असंखेज्जगुणा ११, संखेज्जपएसिया खंधा देसेया दव्वट्ठयाए असंखेज्जगुणा १२, ते चेव अपएसट्ठयाए असंखेज्जगुणा १३, असंखेज्जपएसिया खंधा देसेया दव्वट्ठयाए असंखेज्जगुणा १४, ते चेव पदेसट्ठयाए असंखेज्जगुणा १५, परमाणुपोग्गला निरेया दव्वट्ठअपएसट्ठयाए असंखेज्जगुणा १६, संखेज्जपएसिया खंधा निरेया दव्वट्ठयाए संखेज्जगुणा १७, ते चेव अपएसट्ठयाए संखेज्जगुणा १८, असंखेज्जपएसिया खंधा निरेया दव्वट्ठयाए असंखेज्जगुणा १९, ते चेव अपएसट्ठयाए असंखेज्जगुणा २०।

[८९२]कति णं भंते! धम्मत्थिकायस्स मज्झपएससा पन्नता? गोयमा! अट्ठ धम्मत्थिकायस्स मज्झपएससा पन्नता।

कति णं भंते! अधम्मत्थिकायस्स मज्झपएससा पन्नता? एवं चेव।

कति णं भंते! आगासत्थिकायस्स मज्झपएससा पन्नता? एवं चेव।

कति णं भंते! जीवत्थिकायस्स मज्झपएससा पन्नता? गोयमा! अट्ठ जीवत्थिकायस्स मज्झपएससा पन्नता।

एए णं भंते! अट्ठ जीवत्थिकायस्स मज्झपएससा कतिसु आगासपएससेसु ओगाहंति? गोयमा! जहन्नेणं एक्कंसि वा दोहि वा तीहि वा चउहिं वा पंचहिं वा छहिं वा, उक्कोसेणं अट्ठसु, नो चेव णं सत्तसु। सेवं भंते! सेवं भंते! ति०।

**\*पंचवीसइमे सते चउत्थो उद्देशो समतो\***

## ० पंचमो उद्देशो ०

[८९३]कतिविहा णं भंते! पज्जवा पन्नता? गोयमा! दुविहा पज्जवा पन्नता, तं जहा- जीवपज्जवा य अजीवपज्जवा य। पज्जवपयं निरवसेसं भाणितत्वं जहा पण्णवणाए।

[८९४]आवलिया णं भंते! किं संखेज्जा समया, असंखेज्जा समया, अणंता समया? गोयमा! नो संखेज्जा समया, असंखेज्जा समया, नो अणंता समया।

आणापाणू णं भंते! किं संखेज्जा०? एवं चेव।

थोवे णं भंते! किं संखेज्जा०? एवं चेव।

एवं लवे वि, मुहुत्ते वि। एवं अहोरत्ते। एवं पक्खे मासे उइ अयणे संवच्छरे जुगे वाससते वाससहस्से वाससयसहस्से पुव्वंगे पुव्वे, तुडियंगे तुडिए, अडडंगे अडडे, अववंगे अववे, हूह्यंगे हूहूए, उप्पलंगे उप्पले, पउमंगे पउमे, नल्लिणंगे नल्लिणे, अत्थनिरुंगे अत्थनिरुरे, अउयंगे अउये, नउयंगे नउए, पउयंगे पउए, चूलियंगे, चूलिए, सीसपहेलियंगे, सीसपहेलिया, पलिओवमे, सागरोवमे, ओसप्पिणी, एवं उस्सप्पिणी वि।

पोग्गलपरियट्ठो णं भंते! किं संखेज्जा समया, असंखेज्जा समया० पुच्छा। गोयमा! नो संखेज्जा समया, नो असंखेज्जा समया, अणंता समया।

एवं तीतद्ध-अणागयद्ध-सव्वद्धा।

आवलियाओ णं भंते! किं संखेज्जा समया० पुच्छा। गोयमा! नो संखेज्जा समया, सिय असंखेज्जा समया, सिय अणंता समया।

आणापाणू णं भंते! किं संखेज्जा समया०? एवं चेव।

थोवा णं भंते! किं संखेज्जा समया०? एवं चेव।

एवं जाव उस्सप्पिणीओ ति।

पोग्गलपरियट्ठा णं भंते! किं संखेज्जा समया० पुच्छा। गोयमा! नो संखेज्जा समया, नो असंखेज्जा समया, अणंता समया।

आणापाणू णं भंते! किं संखेज्जाओ आवलियाओ० पुच्छा। गोयमा! संखेज्जाओ आवलियाओ, नो असंखेज्जाओ आवलियाओ, नो अणंताओ आवलियाओ।

एवं थोवे वि।

एवं जाव सीसपहेलिय ति।

पलिओवमे णं भंते! किं संखेज्जाओ० पुच्छा। गोयमा! नो संखेज्जाओ आवलियाओ, असंखेज्जाओ आवलियाओ, नो अणंताओ आवलियाओ।

एवं सागरोवमे वि।

एवं ओसप्पिणीए वि, उस्सप्पिणीए वि।

पोग्गलपरियट्ठो पुच्छा। गोयमा! नो संखेज्जाओ आवलियाओ, नो असंखेज्जाओ आवलियाओ, अणंताओ आवलियाओ।

एवं जाव सव्वद्धा।

आणापाणू [?ओ] णं भंते! किं संखेज्जाओ आवलियाओ० पुच्छा। गोयमा! सिय संखेज्जाओ आवलियाओ, सिय असंखेज्जाओ, सिय अणंताओ।

एवं जाव सीसपहेलियाओ।

पलिओवमा णं० पुच्छा। गोयमा! नो संखेज्जाओ आवलियाओ, सिय असंखेज्जाओ आवलियाओ, सिय अणंताओ आवलियाओ।

एवं जाव उस्सप्पिणीओ।

पोग्गलपरियट्ठा णं० पुच्छा। गोयमा! नो संखेज्जाओ आवलियाओ, नो असंखेज्जाओ आवलियाओ, अणंताओ आवलियाओ।

थोवे णं भंते! किं संखेज्जाओ आणापाणूओ, असंखेज्जाओ०? जहा आवलियाए वत्तव्वया एवं आणापाणूओ वि निरवसेसा।

एवं एएणं गमएणं जाव सीसपहेलिया भाणियव्वा।

सागरोवमे णं भंते! किं संखेज्जा पलिओवमा० पुच्छा। गोयमा! संखेज्जा पलिओवमा, नो असंखेज्जा पलिओवमा, नो अणंता पलिओवमा।

एवं ओसप्पिणी वि, उस्सप्पिणी वि।

पोग्गलपरियट्ठो णं० पुच्छा। गोयमा! नो संखेज्जा पलिओवमा, नो असंखेज्जा पलिओवमा, अणंता पलिओवमा।

एवं जाव सव्वद्धा।

सागरोवमा णं भंते! किं संखेज्जा पलिओवमा० पुच्छा। गोयमा! सिय संखेज्जा पलिओवमा, सिय असंखेज्जा पलिओवमा, सिय अणंता पलिओवमा।

एवं जाव ओसप्पिणी वि, उस्सप्पिणी वि।

पोग्गलपरियट्ठा णं० पुच्छा। गोयमा! नो संखेज्जा पलिओवमा, नो असंखेज्जा पलिओवमा, अणंता पलिओवमा।

ओसप्पिणी णं भंते! किं संखेज्जा सागरोवमा०? जहा पलिओवमस्स वत्तव्वया तहा सागरोवमस्स वि।

पोग्गलपरियट्ठो णं भंते! किं संखेज्जाओ ओसप्पिणि-उस्सप्पिणीओ० पुच्छा। गोयमा! नो संखेज्जाओ ओसप्पिणि-उस्सप्पिणीओ, नो असंखेज्जाओ, अणंताओ ओसप्पिणि-उस्सप्पिणीओ।

एवं जाव सव्वद्धा।

पोग्गलपरियट्ठा णं भंते! किं संखेज्जाओ ओसप्पिणि-उस्सप्पिणीओ० पुच्छा। गोयमा! नो संखेज्जाओ ओसप्पिणि-उस्सप्पिणीओ, नो असंखेज्जाओ, अणंताओ ओसप्पिणि-उस्सप्पिणीओ।

तीतद्धा णं भंते! किं संखेज्जा पोग्गलपरियट्ठा० पुच्छा। गोयमा! नो संखेज्जा पोग्गलपरियट्ठा, नो असंखेज्जा, अणंता पोग्गलपरियट्ठा।

एवं अणागतद्धा वि।

एवं सव्वद्धा वि।

[८९५]अणागतद्धा णं भंते! किं संखेज्जाओ तीतद्धाओ, असंखेज्जाओ, अणंताओ? गोयमा! नो संखेज्जाओ तीतद्धाओ, नो असंखेज्जाओ तीतद्धाओ, नो अणंताओ तीतद्धाओ, अणागयद्धा णं तीतद्धाओ, समयाहिया; तीतद्धा णं अणागयद्धाओ समयूणा।

सव्वद्धा णं भंते! किं संखेज्जाओ तीतद्धाओ० पुच्छा। गोयमा! नो संखेज्जाओ तीतद्धाओ, नो असंखेज्जाओ, नो अणंताओ तीतद्धाओ, सव्वद्धा णं तीयद्धाओ सातिरेगदुगुणा, तीतद्धा णं सव्वद्धाओ थोवूणए अद्धे।

सव्वद्धा णं भंते! किं संखेज्जाओ अणागयद्धाओ० पुच्छा। गोयमा! नो संखेज्जाओ अणागयद्धाओ, नो असंखेज्जाओ अणागयद्धाओ, नो अणंताओ अणागयद्धाओ, सव्वद्धा णं अणागयद्धाओ थोवूणगदुगुणा, अणागयद्धा णं सव्वद्धातो सातिरेगे अद्धे।

[८९६]कतिविधा णं भंते! णिओदा पन्नता? गोयमा! दुविहा णिओदा पन्नता, तं जहा- णिओया य णिओयजीवा य।

णिओदा णं भंते! कतिविधा पन्नता? गोयमा! दुविहा पन्नता, तं जहा--सुहुमनिगोदा य, बायरनियोया य। एवं नियोया भाणियव्वा जहा जीवाभिगमे तहेव निरवसेसं।

[८९७]कतिविधे णं भंते! णामे पन्नते? गोयमा! छव्विहे नामे पन्नते, तं जहा- उदइए जाव

सन्निवाति।

से किं तं उदइए नामे? उदइए णामे दुविहे पन्नते, तं जहा--उदए य, उदयनिप्फन्ने य। एवं जहा सत्तरसमसते पढमे उद्देसए भावो तहेव इह वि, नवरं इमं नामनाणत्तं। सेसं तहेव जाव सन्निवाति।  
सेवं भंते! सेवं भंते! ति०।

**\*पंचवीसइमे सते पंचमो उद्देसो समतो\***

**० छट्ठो उद्देसो ०**

- [८९८] पण्णवण वेद रागे कप्प चरित्त पडिसेवणा णाणे।  
तित्थे लिंग सरीरे खेत्ते काल गति संजम निकासे ॥
- [८९९] जोगुवओग कसाए लेस्सा परिणाम बंध वेए य।  
कम्मोदीरण उवसंपजहण सन्ना य आहारे ॥
- [९००] भव आगरिसे कालंतरे य समुघाय खेत फुसणा य।  
भावे परिमाणे खलु अप्पाबहुयं नियंठाणं ॥

[९०१] रायगिहे जाव एवं वयासी-

कति णं भंते! नियंठा पन्नता? गोयमा! पंच नियंठा पन्नता, तं जहा-पुलाए बउसे कुसीले नियंठे सिणाए।

पुलाए णं भंते! कतिविधे पन्नते ? गोयमा! पंचविधे पन्नते, तं जहा-नाणपुलाए दंसणपुलाए चरित्तपुलाए लिंगपुलाए अहासुहुमपुलाए नामं पंचमे।

बउसे णं भंते! कतिविधे पन्नते? गोयमा! पंचविधे पन्नते, तं जहा--आभोगबउसे, अणाभोगबउसे संवुडबउसे असंवुडबउसे अहासुहुमबउसे नामं पंचमे।

कुसीले णं भंते! कतिविधे पन्नते? गोयमा! दुविधे पन्नते, तं जहा-पडिसेवणाकुसीले य, कसायकुसीले य।

पडिसेवणाकुसीले णं भंते! कतिविधे पन्नते? गोयमा! पंचविधे पन्नते, तं जहा-नाणपडिसेवणाकुसीले, दंसणपडिसेवणाकुसीले चरित्तपडिसेवणाकुसीले लिंगपडिसेवणाकुसीले अहासुहुम-पडिसेवणाकुसीले णामं पंचमे।

कसायकुसीले णं भंते! कतिविधे पन्नते? गोयमा! पंचविधे पन्नते, तं जहा--नाणकसायकुसीले दंसणकसायकुसीले चरित्तकसायकुसीले लिंगकसायकुसीले, अहासुहुमकसायकुसीले णामं पंचमे।

नियंठे णं भंते! कतिविधे पन्नते? गोयमा! पंचविधे पन्नते, तं जहा--पढमसमयनियंठे अपढमसमयनियंठे चरिमसमयनियंठे अचरिमसमयनियंठे अहासुहुमनियंठे णामं पंचमे।

सिणाए णं भंते! कतिविधे पन्नते? गोयमा! पंचविधे पन्नते, तं जहा-अच्छवी, असबले, अकम्मंसे, संसुद्धनाण-दंसणधरे अरहा जिणे केवली, अपरिस्सावी ।

पुलाए णं भंते! किं सवेयए होज्जा, अवेयए होज्जा? गोयमा! सवेयए होज्जा, नो अवेयए होज्जा।

जइ सवेयए होज्जा किं इत्थिवेयए होज्जा, पुरिसवेयए होज्जा, पुरिसनपुंसगवेयए होज्जा?।

गोयमा! नो इत्थिवेयए होज्जा, पुरिसवेयए होज्जा, पुरिसनपुंसगवेयए वा होज्जा।

बउसे णं भंते! किं सवेयए होज्जा, अवेयए होज्जा? गोयमा! सवेदए होज्जा, नो अवेदए होज्जा।

जइ सवेयए होज्जा किं इत्थिवेयए होज्जा, पुरिसवेयए होज्जा, पुरिसनपुंसगवेयए होज्जा? गोयमा! इत्थिवेदए वा होज्जा, पुरिसवेयए वा होज्जा, पुरिसनपुंसगवेयए वा होज्जा।

एवं पडिसेवणाकुसीले वि।

कसायकुसीले णं भंते! किं सवेयए० पुच्छा। गोयमा! सवेयए वा होज्जा, अवेयए वा होज्जा।

जइ अवेयए किं उवसंतवेयए, खीणवेयए होज्जा? गोयमा! उवसंतवेयए वा, खीणवेयए वा होज्जा।

जति सवेयए होज्जा किं इत्थिवेदए होज्जा० पुच्छा। गोयमा! तिसु वि जहा बउसो।

णियंठे णं भंते! किं सवेयए० पुच्छा। गोयमा! नो सवेयए होज्जा, अवेदए होज्जा।

जइ अवेयए होज्जा किं उवसंत० पुच्छा। गोयमा! उवसंतवेयए वा होज्जा, खीणवेयए वा होज्जा।

सिणाए णं भंते! किं सवेयए होज्जा०? जहा नियंठे तहा सिणाए वि, नवरं नो उवसंतवेयए होज्जा, खीणवेयए होज्जा।

[१०२]पुलाए णं भंते! किं सरागे होज्जा, वीयरगे होज्जा? गोयमा! सरागे होज्जा, नो वीयरगे होज्जा।

एवं जाव कसायकुसीले।

णियंठे णं भंते! किं सरागे होज्जा० पुच्छा। गोयमा! नो सरागे होज्जा, वीयरगे होज्जा।

जइ वीयरगे होज्जा किं उवसंतकसायवीयरगे होज्जा, खीणकसायवीयरगे०? गोयमा! उवसंतकसायवीतरगे वा होज्जा, खीणकसायवीतरगे वा होज्जा।

सिणाए एवं चेव, नवरं नो उवसंतकसायवीयरगे होज्जा, खीणकसायवीयरगे होज्जा।

[१०३]पुलाए णं भंते! किं ठियकप्पे होज्जा, अठियकप्पे होज्जा? गोयमा! ठियकप्पे वा होज्जा, अठियकप्पे वा होज्जा।

एवं जाव सिणाए।

पुलाए णं भंते! किं जिणकप्पे होज्जा, थेरकप्पे होज्जा, कप्पातीते होज्जा? गोयमा! नो जिणकप्पे होज्जा, थेरकप्पे होज्जा, नो कप्पातीते होज्जा।

बउसे णं० पुच्छा। गोयमा! जिणकप्पे वा होज्जा, थेरकप्पे वा होज्जा, नो कप्पातीते होज्जा।

एवं पडिसेवणाकुसीले वि।

कसायकुसीले णं० पुच्छा। गोयमा! जिणकप्पे वा होज्जा, थेरकप्पे वा होज्जा, कप्पातीते वा होज्जा।

नियंठे णं० पुच्छा। गोयमा! नो जिणकप्पे होज्जा, नो थेरकप्पे होज्जा, कप्पातीते होज्जा।

एवं सिणाए वि।

[१०४]पुलाए णं भंते! किं सामाइयसंजमे होज्जा, छेदोवट्ठावणियसंजमे होज्जा,

परिहारविसुद्धियसंजमे होज्जा, सुहुमसंपरायसंजमे होज्जा, अहक्खायसंजमे होज्जा? गोयमा! सामाइयसंजमे वा होज्जा, छेदोवट्ठावणियसंजमे वा होज्जा, नो परिहारविसुद्धियसंजमे होज्जा, नो सुहुमसंपरायसंजमे होज्जा, नो अहक्खायसंजमे होज्जा।

एवं बउसे वि।

एवं पडिसेवणाकुसीले वि।

कसायकुसीले णं० पुच्छ। गोयमा! सामाइयसंजमे वा होज्जा जाव सुहुमसंपरायसंजमे वा होज्जा, नो अहक्खायसंजमे होज्जा।

नियंठे णं० पुच्छ। गोयमा! णो सामाइयसंजमे होज्जा जाव णो सुहुमसंपरायसंजमे होज्जा, अहक्खायसंजमे होज्जा।

एवं सिणाए वि।

[१०५]पुलाए णं भंते! किं पडिसेवए होज्जा, अपडिसेवए होज्जा? गोयमा! पडिसेवए होज्जा, नो अपडिसेवए होज्जा।

जदि पडिसेवए होज्जा किं मूलगुणपडिसेवए होज्जा, उत्तरगुणपडिसेवए होज्जा? गोयमा! मूलगुणपडिसेवए वा होज्जा, उत्तरगुणपडिसेवए वा होज्जा । मूलगुणपडिसेवमाणे पंचण्हं आसवाणं अन्नयरं पडिसेवेज्जा, उत्तरगुणपडिसेवमाणे दसविहस्स पच्चक्खाणस्स अन्नयरं पडिसेवेज्जा।

बउसे णं० पुच्छ। गोयमा! पडिसेवए होज्जा, नो अपडिसेवए होज्जा।

जइ पडिसेवए होज्जा किं मूलगुणपडिसेवए होज्जा, उत्तरगुणपडिसेवए होज्जा? गोयमा! नो मूलगुणपडिसेवए होज्जा, उत्तरगुणपडिसेवए होज्जा। उत्तरगुणपडिसेवमाणे दसविहस्स पच्चक्खाणस्स अन्नयरं पडिसेवेज्जा।

पडिसेवणाकुसीले जहा पुलाए।

कसायकुसीले० पुच्छ। गोयमा! नो पडिसेवए होज्जा, अपडिसेवए होज्जा।

एवं नियंठे वि।

एवं सिणाए वि।

[१०६]पुलाए णं भंते! कतिसु नाणेसु होज्जा? गोयमा! दोसु वा तिसु वा होज्जा। दोसु होमाणे दोसु आभिणिबोहियनाण-सुयनाणेसु होज्जा, तिसु होमाणे तिसु आभिनिबोहियनाण-सुयनाण-ओहिनाणेसु होज्जा।

एवं बउसे वि।

एवं पडिसेवणाकुसीले वि।

कसायकुसीले णं० पुच्छ। गोयमा! दोसु वा तिसु वा चउसु वा होज्जा। दोसु होमाणे दोसु आभिनिबोहियनाण-सुयनाणेसु होज्जा। तिसु होमाणे तिसु आभिनिबोहियनाण-सुयनाण-ओहिनाणेसु अहवा तिसु आभिनिबोहियनाण-सुयनाण-मणपज्जवनाणेसु होज्जा। चउसु होमाणे चउसु आभिनिबोहियनाण-सुयनाण-ओहिनाण-मणपज्जवनाणेसु होज्जा।

एवं नियंठे वि।

सिणाए णं० पुच्छ। गोयमा! एगम्मि केवलनाणे होज्जा।

**[९०७]**पुलाए णं भंते! केवतियं सुयं अहिज्जेज्जा? गोयमा! जहन्नेणं नवमस्स पुव्वस्स ततियं आयावत्थुं, उक्कोसेणं नव पुव्वाइं अहिज्जेज्जा।

बउसे० पुच्छा। गोयमा! जहन्नेणं अट्ठ पवयणमायाओ, उक्कोसेणं दस पुव्वाइं अहिज्जेज्जा।

एवं पडिसेवणाकुसीले वि।

कसायकुसीले० पुच्छा। गोयमा! जहन्नेणं अट्ठ पवयणमायाओ, उक्कोसेणं चोद्दस पुव्वाइं अहिज्जेज्जा।

एवं नियंठे वि।

सिणाये० पुच्छा। गोयमा! सुयवतिरित्ते होज्जा।

**[९०८]**पुलाए णं भंते! किं तित्थे होज्जा, अतित्थे होज्जा? गोयमा! तित्थे होज्जा, नो अतित्थे होज्जा।

एवं बउसे वि, पडिसेवणाकुसीले वि।

कसायकुसीले० पुच्छा। गोयमा! तित्थे वा होज्जा, अतित्थे वा होज्जा।

जति अतित्थे होज्जा किं तित्थयरे होज्जा, पत्तेयबुद्धे होज्जा? गोयमा! तित्थगरे वा होज्जा, पत्तेयबुद्धे वा होज्जा।

एवं नियंठे वि।

एवं सिणाए वि।

**[९०९]**पुलाए णं भंते! किं सलिंगे होज्जा, अन्नलिंगे होज्जा, गिहिलिंगे होज्जा? गोयमा! दव्वलिंगं पडुच्च सलिंगे वा होज्जा, अन्नलिंगे वा होज्जा, गिहिलिंगे वा होज्जा। भावलिंगं पडुच्च नियमं सलिंगे होज्जा।

एवं जाव सिणाए।

**[९१०]**पुलाए णं भंते! कतिसु सरीरेसु होज्जा? गोयमा! तिसु ओरालिय-तेया-कम्मएसु होज्जा।

बउसे णं भंते!० पुच्छा। गोयमा! तिसु वा चतुसु वा होज्जा। तिसु होमाणे तिसु ओरालिय-तेया-कम्मएसु होज्जा, चउसु होमाणे चउसु ओरालिय-वेउव्विय-तेया-कम्मएसु होज्जा।

एवं पडिसेवणाकुसीले वि।

कसायकुसीले० पुच्छा। गोयमा! तिसु वा चतुसु वा पंचसु वा होज्जा। तिसु होमाणे तिसु ओरालिय-तेया-कम्मएसु होज्जा, चउसु होमाणे चउसु ओरालिय-वेउव्विय-तेया-कम्मएसु होज्जा, पंचसु होमाणे पंचसु ओरालिय-वेउव्विय-आहारग-तेयग-कम्मएसु होज्जा।

णियंठे सिणाते य जहा पुलाओ।

**[९११]**पुलाए णं भंते! किं कम्मभूमीए होज्जा, अकम्मभूमीए होज्जा? गोयमा! जम्मण-संतिभावं पडुच्च कम्मभूमीए होज्जा, नो अकम्मभूमीए होज्जा।

बउसे णं० पुच्छा। गोयमा! जम्मण-संतिभावं पडुच्च कम्मभूमीए होज्जा, नो अकम्मभूमीए होज्जा। साहरणं पडुच्च कम्मभूमीए वा होज्जा, अकम्मभूमीए वा होज्जा।

एवं जाव सिणाए।

[११२]पुलाए णं भंते! किं ओसप्पिणिकाले होज्जा, उस्सप्पिणिकाले होज्जा, नोओसप्पिणिनोउस्सप्पिणिकाले होज्जा? गोयमा! ओसप्पिणिकाले वा होज्जा, उस्सप्पिणिकाले वा होज्जा, नोओसप्पिणिनोउस्सप्पिणिकाले वा होज्जा।

जदि ओसप्पिणिकाले होज्जा किं सुसमसुसमाकाले होज्जा, सुसमाकाले होज्जा, सुसम-दुस्समाकाले होज्जा, दुस्समसुसमाकाले होज्जा, दुस्समाकाले होज्जा, दुस्समदुस्समाकाले होज्जा? गोयमा! जम्मणं पडुच्च नो सुसमसुसमाकाले होज्जा, नो सुसमाकाले होज्जा, सुसमदुस्समाकाले वा होज्जा, दुस्समसुसमाकाले वा होज्जा, नो दुस्समाकाले होज्जा, नो दुस्समदुस्समाकाले होज्जा। संतिभावं पडुच्च नो सुसमसुसमाकाले होज्जा, नो सुसमाकाले होज्जा, सुसमदुस्समाकाले वा होज्जा, दुस्समसुसमाकाले वा होज्जा, दुस्समाकाले वा होज्जा, नो दूसमदूसमाकाले होज्जा।

जदि उस्सप्पिणिकाले होज्जा किं दुस्समदुस्समाकाले होज्जा, दुसमाकाले होज्जा, दुस्समसुसमाकाले होज्जा, सुसमदुस्समाकाले होज्जा, सुसमाकाले होज्जा, सुसमसुसमाकाले होज्जा? गोयमा! जम्मणं पडुच्च णो दुस्समदुस्समाकाले होज्जा, दुस्समाकाले वा होज्जा, दुस्समसुसमाकाले वा होज्जा, सुसमदुस्समाकाले वा होज्जा, नो सुसमाकाले होज्जा, नो सुसमसुसमाकाले होज्जा। संतिभावं पडुच्च नो दुस्समदुस्समाकाले होज्जा, नो दुस्समाकाले होज्जा, दुस्समसुसमाकाले वा होज्जा, सुसमदुस्समाकाले वा होज्जा, नो सुसमाकाले होज्जा, नो सुसमसुसमाकाले होज्जा।

जति नोओसप्पिणिनोउस्सप्पिणिकाले होज्जा किं सुसमसुसमापलिभागे होज्जा, सुसमापलिभागे होज्जा, सुसमदुस्समापलिभागे होज्जा, दुस्समसुसमापलिभागे होज्जा? गोयमा! जम्मण-संतिभावं पडुच्च नो सुसमसुसमापलिभागे होज्जा, नो सुसमापलिभागे होज्जा, नो सुसमदुस्समापलिभागे होज्जा, दुस्समसुसमापलिभागे होज्जा।

बउसे णं० पुच्छा। गोयमा! ओसप्पिणिकाले वा होज्जा, उस्सप्पिणिकाले वा होज्जा, नोओसप्पिणिनोउस्सप्पिणिकाले वा होज्जा।

जति ओसप्पिणिकाले होज्जा किं सुसमसुसमाकाले होज्जा० पुच्छा। गोयमा! जम्मण-संतिभावं पडुच्च नो सुसमसुसमाकाले होज्जा, नो सुसमाकाले होज्जा, सुसमदुस्समाकाले वा होज्जा, दुस्समसुसमाकाले वा होज्जा, दुस्समाकाले वा होज्जा, नो दुस्समदुस्समाकाले होज्जा। साहरणं पडुच्च अन्नयरे समाकाले होज्जा।

जति उस्सप्पिणिकाले होज्जा किं दुस्समदुस्समाकाले होज्जा० पुच्छा। गोयमा! जम्मणं पडुच्च नो दुस्समदुस्समाकाले होज्जा जहेव पुलाए। संतिभावं पडुच्च नो दुस्समदुस्समाकाले होज्जा०; एवं संतिभावेण वि जहा पुलाए जावनो सुसमसुसमाकाले होज्जा। साहरणं पडुच्च अन्नयरे समाकाले होज्जा।

जदि नोओसप्पिणिनोउस्सप्पिणिकाले होज्जा० पुच्छा। गोयमा! जम्मण-संतिभावं पडुच्च नो सुसमसुसमापलिभागे होज्जा, जहेव पुलाए जाव दुस्समसुसमापलिभागे होज्जा। साहरणं पडुच्च अन्नयरं पलिभागे होज्जा जहा बउसे।

एवं पडिसेवणाकुसीले वि।

एवं कसायकुसीले वि।

नियंठो सिणातो य जहा पुलाए, नवरं एएसिं अब्भहियं साहरणं भाणियत्वं। सेसं तं चेव।

[९१३]पुलाए णं भंते! कालगए समाणे कं गतिं गच्छति? गोयमा! देवगतिं गच्छति।

देवगतिं गच्छमाणे किं भवणवासीसु उववज्जेज्जा, वाणमंतरेसु उववज्जेज्जा, जोतिस-  
वेमाणिएसु उववज्जेज्जा? गोयमा! नो भवणवासीसु, नो वाणमंतरेसु, नो जोतिसेसु, वेमाणिएसु उववज्जेज्जा।  
वेमाणिएसु उववज्जमाणे जहन्नेणं सोहम्मं कप्पे, उक्कोसेणं सहस्सारे कप्पे उववज्जेज्जा।

बउसे णं०? एवं चेव, नवरं उक्कोसेणं अच्युए कप्पे।

पडिसेवणाकुसीले जहा बउसे।

कसायकुसीले जहा पुलाए, नवरं उक्कोसेणं अणुतरविमाणेसु।

णियंठे णं भंते!०? एवं चेव जाव वेमाणिएसु उववज्जमाणे अजहन्नमणुक्कोसेणं  
अणुतरविमाणेसु उववज्जेज्जा।

सिणाए णं भंते! कालगते समाणे कं गतिं गच्छति? गोयमा! सिद्धिगतिं गच्छइ।

पुलाए णं भंते! देवेसु उववज्जमाणे किं इंदताए उववज्जेज्जा, सामाणियताए उववज्जेज्जा,  
तावतीसगताए उववज्जेज्जा, लोगपालताए उववज्जेज्जा, अहमिंदताए उववज्जेज्जा? गोयमा! अविराहणं  
पडुच्च इंदताए उववज्जेज्जा, सामाणियताए उववज्जेज्जा, तावतीसगताए उववज्जेज्जा, लोगपालगताए  
उववज्जेज्जा, नो अहमिंदताए उववज्जेज्जा। विराहणं पडुच्च अन्नयरेसु उववज्जेज्जा।

एवं बउसे वि।

एवं पडिसेवणाकुसीले वि।

कसायकुसीले० पुच्छा। गोयमा! अविराहणं पडुच्च इंदताए वा उववज्जेज्जा जाव  
अहमिंदताए वा उववज्जेज्जा। विराहणं पडुच्च अन्नयरेसु उववज्जेज्जा।

नियंठे० पुच्छा। गोयमा! अविराहणं पडुच्च नो इंदताए उववज्जेज्जा जाव नो लोगपालताए  
उववज्जेज्जा, अहमिंदताए उववज्जेज्जा। विराहणं पडुच्च अन्नयरेसु उववज्जेज्जा।

पुलायस्स णं भंते! देवलोगेसु उववज्जमाणस्स केवतियं कालं ठिती पन्नता? गोयमा!  
जहन्नेणं पलियोवमपुहत्तं, उक्कोसेणं अट्ठारस सागरोवमाइं।

बउसस्स० पुच्छा। गोयमा! जहन्नेणं पलियोवमपुहत्तं, उक्कोसेणं बावीसं सागरोवमाइं।

एवं पडिसेवणाकुसीलस्स वि।

कसायकुसीलस्स० पुच्छा। गोयमा! जहन्नेणं पलियोवमपुहत्तं, उक्कोसेणं तेतीसं सागरोवमाइं।

णियंठस्स० पुच्छा। गोयमा! अजहन्नमणुक्कोसेणं तेतीसं सागरोवमाइं।

[९१४]पुलागस्स णं भंते! केवतिया संजमठाणा पन्नता? गोयमा! असंखेज्जा संजमठाणा  
पन्नता।

एवं जाव कसायकुसीलस्स।

नियंठस्स णं भंते! केवतिया संजमठाणा पन्नता? गोयमा! एगे अजहन्नमणुक्कोसए  
संजमठाणे पन्नते।

एवं सिणायस्स वि।

एएसि णं भंते! पुलाग-बउस-पडिसेवणा-कसायकुसील-नियंठसिणायाणं संजमठा

णाणं कयरे कयरेहितो जाव विसेसाहिया वा? गोयमा! सव्वत्थोवे नियंठस्स सिणायस्स य एगे अजहन्नमणुक्कोसए संजमठाणे। पुलागस्स संजमठाणा असंखेज्जगुणा। बउसस्स संजमठाणा असंखे-ज्जगुणा। पडिसेवणाकुसीलस्स संजमठाणा असंखेज्जगुणा। कसायकुसीलस्स संजमठाणा असंखेज्जगुणा।

[९१५]पुलागस्स णं भंते! केवतिया चरित्तपज्जवा पन्नता? गोयमा! अणंता चरित्तपज्जवा पन्नता।

एवं जाव सिणायस्स।

पुलाए णं भंते! पुलागस्स सट्ठाणसन्निगासेणं चरित्तपज्जवेहिं किं हीणे, तुल्ले, अब्भहिए? गोयमा! सिय हीणे, सिय तुल्ले, सिय अब्भहिए। जदि हीणे अणंतभागहीणे वा असंखेज्जतिभागहीणे वा संखेज्जइभागहीणे वा, संखेज्जगुणहीणे वा असंखेज्जगुणहीणे वा, अणंतगुणहीणे वा। अह अब्भहिए अणंतभागमब्भहिए वा, असंखेज्जतिभागमब्भहिए वा, संखेज्जतिभागमब्भहिए वा, संखेज्जगुणमब्भहिए वा, असंखेज्जगुणमब्भहिए वा अणंतगुणमब्भहिए वा।

पुलाए णं भंते! बउसस्स परट्ठाणसन्निगासेणं चरित्तपज्जवेहिं किं हीणे, तुल्ले, अब्भहिए? गोयमा! हीणे, नो तुल्ले, नो अब्भहिए; अणंतगुणहीणे।

एवं पडिसेवणाकुसीलस्स वि।

कसायकुसीलेण समं छट्ठाणपडिए जहेव सट्ठाणे।

नियंठस्स जहा बउसस्स।

एवं सिणायस्स वि।

बउसे णं भंते! पुलागस्स परट्ठाणसन्निगासेणं चरित्तपज्जवेहिं किं हीणे, तुल्ले, अब्भहिए? गोयमा! नो हीणे, नो तुल्ले, अब्भहिए; अणंतगुणमब्भहिए।

बउसे णं भंते! बउसस्स सट्ठाणसन्निगासेणं चरित्तपज्जवेहिं० पुच्छा। गोयमा! सिय हीणे, सिय तुल्ले, सिय अब्भहिए। जदि हीणे छट्ठाणवडिए।

बउसे णं भंते! पडिसेवणाकुसीलस्स परट्ठाणसन्निगासेणं चरित्तपज्जवेहिं किं हीणे०? छट्ठाणवडिए।

एवं कसायकुसीलस्स वि।

बउसे णं भंते! नियंठस्स परट्ठाणसन्निगासेणं चरित्तपज्जवेहिं० पुच्छा। गोयमा! हीणे, नो तुल्ले, नो अब्भहिए; अणंतगुणहीणे।

एवं सिणायस्स वि।

पडिसेवणाकुसीलस्स एवं चेव बउसवत्तव्वया भाणियव्वा।

कसायकुसीलस्स एस चेव बउसवत्तव्वया, नवरं पुलाएण वि समं छट्ठाणपडिते।

णियंठे णं भंते! पुलागस्स परट्ठाणसन्निगासेणं चरित्तपज्जवेहिं० पुच्छा। गोयमा! नो हीणे, नो तुल्ले, अब्भहिए; अणंतगुणमब्भहिए।

एवं जाव कसायकुसीलस्स।

नियंठे णं भंते! नियंठस्स सट्ठाणसन्निगासेणं० पुच्छा। गोयमा! नो हीणे, तुल्ले, नो अब्भहिए।

एवं सिणायस्स वि।

सिणाए णं भंते! पुलागस्स परट्ठाणसन्नि०? एवं जहा नियंठस्स वत्तव्वया तहा सिणायस्स वि भाणियत्त्वा जाव-

सिणाए णं भंते! सिणायस्स सट्ठाणसन्निगासेणं० पुच्छा। गोयमा! नो हीणे, तुल्ले, नो अब्भहिए।

एएसि णं भंते! पुलाग-बकुस-पडिसेवणाकुसील-कसायकुसील-नियंठ-सिणायाणं जहन्नुक्कोसगाणं चरित्तपज्जवाणं कयरे कयरेहिंते जाव विसेसाहिया वा? गोयमा! पुलागस्स कसायकुसीलस्स य एएसि णं जहन्नगा चरित्तपज्जवा दोण्ह वि तुल्ला सव्वत्थोवा। पुलागस्स उक्कोसगा चरित्तपज्जवा अणंतगुणा। बउसस्स पडिसेवणाकुसीलस्स य एएसिं णं जहन्नगा चरित्तपज्जवा दोण्ह वि तुल्ला अणंतगुणा। बउसस्स उक्कोसगा चरित्तपज्जवा अणंतगुणा। पडिसेवणाकुसीलस्स उक्कोसगा चरित्तपज्जवा अणंतगुणा। कसायकुसीलस्स उक्कोसगा चरित्तपज्जवा अणंतगुणा। नियंठस्स सिणायस्स य एएसि णं अजहन्नमणुक्कोसगा चरित्तपज्जवा दोण्ह वि तुल्ला अणंतगुणा।

[९१६] पुलाए णं भंते ! किं सजोगी होज्जा, अजोगी होज्जा ? गोयमा ! सजोगी होज्जा, नो अजोगी होज्जा।

जति सजोगी होज्जा किं मणजोगी होज्जा, वइजोगी होज्जा, कायजोगी होज्जा? गोयमा! मणजोगी वा होज्जा, वइजोगी वा होज्जा, कायजोगी वा होज्जा।

एवं जाव नियंठे।

सिणाए णं० पुच्छा। गोयमा! सजोगी वा होज्जा, अजोगी वा होज्जा।

जदि सजोगी होज्जा किं मणजोगी होज्जा०? सेसं जहा पुलागस्स।

[९१७] पुलाए णं भंते! किं सागारोवउत्ते होज्जा, अणागारोवउत्ते होज्जा? गोयमा! सागारोवउत्ते वा होज्जा, अणागारोवउत्ते वा होज्जा।

एवं जाव सिणाए।

[९१८] पुलाए णं भंते! किं सकसायी होज्जा, अकसायी होज्जा? गोयमा! सकसायी होज्जा, नो अकसायी होज्जा।

जइ सकसायी से णं भंते! कतिसु कसाएसु होज्जा? गोयमा! चउसु, कोह-माण-माया-लोभेसु होज्जा।

एवं बउसे वि।

एवं पडिसेवणाकुसीले वि।

कसायकुसीले णं० पुच्छा। गोयमा! सकसायी होज्जा, नो अकसायी होज्जा।

जति सकसायी होज्जा से णं भंते! कतिसु कसाएसु होज्जा? गोयमा! चउसु वा, तिसु वा, दोसु वा, एगम्मि वा होज्जा। चउसु होमाणे चउसु संजलणकोह-माण-माया-लोभेसु होज्जा, तिसु होमाणे तिसु संजलणमाण-माया-लोभेसु होज्जा, दोसु होमाणे संजलणमाया-लोभेसु होज्जा, एगम्मि होमाणे एगम्मि संजलणे लोभे होज्जा।

नियंठे णं० पुच्छा। गोयमा! नो सकसायी होज्जा, अकसायी होज्जा।

जदि अकसायी होज्जा किं उवसंतकसायी होज्जा, खीणकसायी होज्जा? गोयमा!  
उवसंतकसायी वा होज्जा, खीणकसायी वा होज्जा।

सिणाए एवं चेव, नवरं नो उवसंतकसायी होज्जा, खीणकसायी होज्जा।

[९१९] पुलाए णं भंते! किं सलेस्से होज्जा, अलेस्से होज्जा? गोयमा! सलेस्से होज्जा, नो  
अलेस्से होज्जा।

जदि सलेस्से होज्जा से णं भंते! कतिसु लेसासु होज्जा? गोयमा! तिसु विसुद्धलेसासु होज्जा,  
तं जहा-तेउलेसाए, पम्हलेसाए, सुक्कलेसाए।

एवं बउसस्स वि।

एवं पडिसेवणाकुसीले वि।

कसायकुसीले० पुच्छा। गोयमा! सलेस्से होज्जा, नो अलेस्से होज्जा।

जति सलेस्से होज्जा से णं भंते! कतिसु लेसासु होज्जा? गोयमा! छसु लेसासु होज्जा, तं  
जहा-कण्हलेसाए जाव सुक्कलेसाए।

नियंठे णं भंते!० पुच्छा। गोयमा! सलेस्से होज्जा, नो अलेस्से होज्जा।

जदि सलेस्से होज्जा से णं भंते! कतिसु लेसासु होज्जा? गोयमा! एक्काए सुक्कलेसाए  
होज्जा।

सिणाए० पुच्छा। गोयमा! सलेस्से वा होज्जा, अलेस्से वा होज्जा।

जति सलेस्से होज्जा से णं भंते! कतिसु लेसासु होज्जा? गोयमा! एगाए परमसुक्काए  
लेसाए होज्जा।

[९२०]पुलाए णं भंते! किं वड्ढमाणपरिणामे होज्जा, हायमाणपरिणामे होज्जा, अवट्ठिय  
परिणामे होज्जा? गोयमा! वड्ढमाणपरिणामे वा होज्जा, हायमाणपरिणामे वा होज्जा, अवट्ठियपरिणामे वा  
होज्जा।

एवं जाव कसायकुसीले।

नियंठे० पुच्छा। गोयमा! वड्ढमाणपरिणामे होज्जा, नो हायमाणपरिणामे होज्जा,  
अवट्ठियपरिणामे वा होज्जा।

एवं सिणाए वि।

पुलाए णं भंते! केवतियं कालं वड्ढमाणपरिणामे होज्जा? गोयमा! जहन्नेणं एककं समयं,  
उक्कोसेणं अंतोमुहुत्तं।

केवतियं कालं हायमाणपरिणामे होज्जा? गोयमा! जहन्नेणं एककं समयं, उक्कोसेणं  
अंतोमुहुत्तं।

केवइयं कालं अवट्ठियपरिणामे होज्जा? गोयमा! जहन्नेणं एककं समयं, उक्कोसेणं सत्त  
समया।

एवं जाव कसायकुसीले।

नियंठे णं भंते! केवतियं कालं वड्ढमाणपरिणामे होज्जा? गोयमा! जहन्नेणं अंतोमुहुत्तं,  
उक्कोसेण वि अंतोमुहुत्तं।

केवतियं कालं अवट्ठियपरिणामे होज्जा? गोयमा! जहन्नेणं एक्कं समयं, उक्कोसेणं अंतोमुहुत्तं।

सिणाए णं भंते! केवतियं कालं वड्ढमाणपरिणामे होज्जा? गोयमा! जहन्नेणं अतोमुहुत्तं, उक्कोसेण वि अंतोमुहुत्तं।

केवतियं कालं अवट्ठियपरिणामे होज्जा? गोयमा! जहन्नेणं अंतोमुहुत्तं, उक्कोसेणं देसूणा पुच्चकोडी।

**[९२१]**पुलाए णं भंते! कति कम्मपगडीओ बंधति? गोयमा! आउयवज्जाओ सत कम्मपगडीओ बंधति।

बउसे० पुच्छा। गोयमा! सतविहबंधए वा, अट्ठविहबंधए वा। सत बंधमाणे आउयवज्जाओ सत कम्मपगडीओ बंधति, अट्ठ बंधमाणे पडिपुण्णाओ अट्ठ कम्मपगडीओ बंधति।

एवं पडिसेवणाकुसीले वि।

कसायकुसीले० पुच्छा। गोयमा! सतविहबंधए वा, अट्ठविहबंधए वा, छत्विहबंधए वा। सत बंधमाणे आउयवज्जाओ सत कम्मपगडीओ बंधति, अट्ठ बंधमाणे पडिपुण्णाओ अट्ठ कम्मपगडीओ बंधति, छ बंधमाणे आउय-मोहणिज्जवज्जाओ छ कम्मपगडीओ बंधति।

नियंठे० पुच्छा। गोयमा! एगं वेदणिज्जं कम्मं बंधति।

सिणाए० पुच्छा। गोयमा! एगविहबंधए वा, अबंधए वा। एगं बंधमाणे एगं वेदणिज्जं कम्मं बंधति।

**[९२२]**पुलाए णं भंते! कति कम्मपगडीओ वेदेति? गोयमा! नियमं अट्ठ कम्मपगडीओ वेदेति।

एवं जाव कसायकुसीले।

नियंठे० पुच्छा। गोयमा! मोहणिज्जवज्जाओ सत कम्मपगडीओ वेदेति।

सिणाए णं भंते!० पुच्छा। गोयमा! वेदणिज्जाऽऽउय-नामगोयाओ चत्तारि कम्मपगडीओ वेदेति।

**[९२३]**पुलाए णं भंते! कति कम्मपगडीओ उदीरेइ? गोयमा! आउय-वेयणिज्जवज्जाओ छ कम्मपगडीओ उदीरेइ।

बउसे० पुच्छा। गोयमा! सतविहउदीरे वा, अट्ठविहउदीरे वा, छत्विहउदीरे वा। सत उदीरेमाणे आउयवज्जाओ सत कम्मपगडीओ उदीरेइ, अट्ठ उदीरेमाणे पडिपुण्णाओ अट्ठ कम्मपगडीओ उदीरेइ, छ उदीरेमाणे आउय-वेयणिज्जवज्जाओ छ कम्मपगडीओ उदीरेति।

पडिसेवणाकुसीले एवं चेव।

कसायकुसीले० पुच्छा। गोयमा! सतविहउदीरे वा, अट्ठविहउदीरे वा, छत्विहउदीरे वा, पंचविहउदीरे वा। सत उदीरेमाणे आउयवज्जाओ सत कम्मपगडीओ उदीरेइ, अट्ठ उदीरेमाणे पडिपुण्णाओ अट्ठ कम्मपगडीओ उदीरेइ, छ उदीरेमाणे आउय-वेयणिज्जवज्जाओ छ कम्मपगडीओ उदीरेइ, पंच उदीरेमाणे आउय-वेयणिज्ज-मोहणिज्जवज्जाओ पंच कम्मपगडीओ उदीरेइ।

नियंठे० पुच्छा। गोयमा! पंचविहउदीरे वा, दुविहउदीरे वा। पंच उदीरेमाणे आउय-

वेयणिज्ज-मोहणिज्जवज्जाओ पंच कम्मप्पगडीओ उदीरेइ, दो उदीरेमाणे नामं च गोयं च उदीरेइ।

[१२४]पुलाए णं भंते! पुलायतं जहमाणे किं जहति?, किं उवसंपज्जइ? गोयमा! पुलायतं जहति; कसायकुसीलं वा असंजमं वा उवसंपज्जइ।

बउसे णं भंते! बउसतं जहमाणे किं जहति?, किं उवसंपज्जइ? गोयमा! बउसतं जहति; पडिसेवणाकुसीलं वा, कसायकुसीलं वा, असंजमं वा, संजमासंजमं वा उवसंपज्जइ।

पडिसेवणाकुसीले णं भंते! पडिसेवणाकुसीलतं जहमाणे० पुच्छा। गोयमा! पडिसेवणाकुसीलतं जहति; बउसं वा, कसायकुसीलं वा, असंजमं वा, संजमासंजमं वा उवसंपज्जइ।

कसायकुसीले० पुच्छा। गोयमा! कसायकुसीलतं जहइ; पुलायं वा, बउसं वा, पडिसेवणाकुसीलं वा, नियंठं वा, अस्संजमं वा, संजमासंजमं वा उवसंपज्जइ।

णियंठे० पुच्छा। गोयमा! नियंठतं जहति; कसायकुसीलं वा, सिणायं वा, अस्संजमं वा, उवसंपज्जइ।

सिणाए० पुच्छा। गोयमा! सिणायतं जहति; सिद्धिगतिं उवसंपज्जइ।

[१२५]पुलाए णं भंते! किं सण्णोवउते होज्जा, नोसण्णोवउते होज्जा? गोयमा! णोसण्णोवउते होज्जा।

बउसे णं भंते!० पुच्छा। गोयमा! सन्नोवउते वा होज्जा, नोसण्णोवउते वा होज्जा।

एवं पडिसेवणाकुसीले वि।

एवं कसायकुसीले वि।

नियंठे सिणाए य जहा पुलाए।

[१२६]पुलाए णं भंते! किं आहारए होज्जा, अणाहारए होज्जा? गोयमा! आहारए होज्जा, नो अणाहारए होज्जा।

एवं जाव नियंठे।

सिणाए० पुच्छा। गोयमा! आहारए वा होज्जा, अणाहारए वा होज्जा।

[१२७]पुलाए णं भंते! कति भवग्गहणाइं होज्जा? गोयमा! जहन्नेणं एक्कं, उक्कोसेणं तिन्नि।

बउसे० पुच्छा। गोयमा! जहन्नेणं एक्कं, उक्कोसेणं अट्ठ।

एवं पडिसेवणाकुसीले वि।

एवं कसायकुसीले वि।

नियंठे जहा पुलाए।

सिणाए० पुच्छा। गोयमा! एक्कं।

[१२८]पुलागस्स णं भंते! एगभवग्गहणिया केवतिया आगरिसा पन्नत्ता? गोयमा! जहन्नेणं एक्को, उक्कोसेणं तिण्णि।

बउसस्स णं० पुच्छा। गोयमा! जहन्नेणं एक्को, उक्कोसेणं सयग्गसो।

एवं पडिसेवणाकुसीले वि, कसायकुसीले वि।

णियंठस्स णं० पुच्छा। गोयमा! जहन्नेणं एक्को, उक्कोसेणं दोन्नि।

सिणायस्स णं० पुच्छा। गोयमा! एक्को।

पुलागस्स णं भंते! नाणाभवग्गहणिया केवतिया आगरिसा पन्नता? गोयमा! जहन्नेणं दोण्णि, उक्कोसेणं सत।

बउसस्स० पुच्छा। गोयमा! जहन्नेणं दोन्नि, उक्कोसेणं सहस्ससो।

एवं जाव कसायकुसीलस्स।

नियंठस्स णं० पुच्छा। गोयमा! जहन्नेणं दोन्नि, उक्कोसेणं पंच।

सिणायस्स० पुच्छा। गोयमा! नत्थि एक्को वि।

**[९२९]**पुलाए णं भंते! कालतो केवचिरं होइ? गोयमा! जहन्नेणं अंतोमुहुत्तं, उक्कोसेणं वि अंतोमुहुत्तं।

बउसे० पुच्छा। गोयमा! जहन्नेणं एक्कं समयं, उक्कोसेणं देसूणा पुव्वकोडी।

एवं पडिसेवणाकुसीले वि, कसायकुसीले वि।

नियंठे० पुच्छा। गोयमा! जहन्नेणं एक्कं समयं, उक्कोसेणं अंतोमुहुत्तं।

सिणाए० पुच्छा। गोयमा! जहन्नेणं अंतोमुहुत्तं, उक्कोसेणं देसूणा पुव्वकोडी।

पुलाया णं भंते! कालओ केवचिरं हौंति? गोयमा जहन्नेणं एक्कं समयं, उक्कोसेणं अंतोमुहुत्तं

बउसा णं भंते!० पुच्छा। गोयमा! सव्वद्धं।

एवं जाव कसायकुसीला।

नियंठा जहा पुलागा।

सिणाया जहा बउसा।

**[९३०]**पुलागस्स णं भंते! केवतियं कालं अंतरं होइ? गोयमा! जहन्नेणं अंतोमुहुत्तं, उक्कोसेणं अणंतं कालं-अणंताओ ओसप्पिणि-उस्सप्पिणीओ कालओ, खेतओ अवड्ढं पोग्गलपरियट्ठं देसूणं।

एवं जाव नियंठस्स।

सिणायस्स० पुच्छा। गोयमा! नत्थंतरं।

पुलागाणं भंते! केवतियं कालं अंतरं होइ? गोयमा! जहन्नेणं एक्कं समयं, उक्कोसेणं संखेज्जाइं वासाइं।

बउसाणं भंते!० पुच्छा। गोयमा! नत्थंतरं।

एवं जाव कसायकुसीलाणं।

नियंठाणं० पुच्छा। गोयमा! जहन्नेणं एक्कं समयं, उक्कोसेणं छम्मासा।

सिणायाणं जहा बउसाणं।

**[९३१]**पुलागस्स णं भंते! कति समुग्घाया पन्नता? गोयमा! तिन्नि समुग्घाया पन्नता, तं जहा-वेयणासमुग्घाए कसायसमुग्घाए मारणंतियसमुग्घाए।

बउसस्स णं भंते!० पुच्छा। गोयमा! पंच समुग्घाता पन्नता, तं जहा--वेयणासमुग्घाए जाव तेयासमुग्घाए।

एवं पडिसेवणाकुसीले वि।

कसायकुसीलस्स० पुच्छा। गोयमा! छ समुग्घाया पन्नता, तं जहा--वेयणासमुग्घाए जाव

आहारसमुग्घाए।

नियंठस्स णं० पुच्छा। गोयमा! नत्थि एक्को वि।

सिणायस्स० पुच्छा। गोयमा! एगे केवलिसमुग्घाते पन्नते।

[९३२]पुलाए णं भंते! लोगस्स किं संखेज्जतिभागे होज्जा, असंखेज्जतिभागे होज्जा, संखेज्जेसु भागेसु होज्जा, असंखेज्जेसु भागेसु होज्जा, सव्वलोए होज्जा? गोयमा! नो संखेज्जतिभागे होज्जा, असंखेज्जइभागे होज्जा, नो संखेज्जेसु भागेसु होज्जा, नो असंखेज्जेसु भागेसु होज्जा, नो सव्वलोए होज्जा। एवं जाव नियंठे।

सिणाए णं भंते!० पुच्छा। गोयमा! नो संखेज्जतिभागे होज्जा, असंखेज्जतिभागे होज्जा, नो संखेज्जेसु भागेसु होज्जा, असंखेज्जेसु भागेसु होज्जा, सव्वलोए वा होज्जा।

[९३३]पुलाए णं भंते ! लोगस्स किं संखेज्जतिभागं फुसति, असंखेज्जतिभागं फुसइ० ? एवं जहा ओगाहणा भणिया तथा फुसणा वि भाणियत्वा जाव सिणाये।

[९३४]पुलाए णं भंते! कयरम्मि भावे होज्जा? गोयमा! खयोवसमिए भावे होज्जा। एवं जाव कसायकुसीले।

नियंठे० पुच्छा। गोयमा! ओवसमिए वा खइए वा भावे होज्जा।

सिणाये० पुच्छा। गोयमा! खइए भावे होज्जा।

[९३५]पुलाया णं भंते! एगसमएणं केवतिया होज्जा? गोयमा! पडिवज्जमाणए पडुच्च सिय अत्थि, सिय नत्थि। जति अत्थि जहन्नेणं एक्को वा दो वा तिन्नि वा, उक्कोसेणं सयपुहत्तं। पुव्वपडिवन्नए पडुच्च सिय अत्थि, सिय णत्थि। जति अत्थि जहन्नेणं एक्को वा दो वा तिन्नि वा, उक्कोसेणं सहस्सपुहत्तं।

बउसा णं भंते! एगसमएणं० पुच्छा। गोयमा! पडिवज्जमाणए पडुच्च सिय अत्थि, सिय नत्थि। जदि अत्थि जहन्नेणं एक्को वा दो वा तिन्नि वा, उक्कोसेणं सयपुहत्तं। पुव्वपडिवन्नए पडुच्च जहन्नेणं कोडिसयपुहत्तं, उक्कोसेण वि कोडिसयपुहत्तं।

एवं पडिसेवणाकुसीला वि।

कसायकुसीला णं० पुच्छा। गोयमा! पडिवज्जमाणए पडुच्च सिय अत्थि, सिय नत्थि। जदि अत्थि जहन्नेणं एक्को वा दो वा तिन्नि वा, उक्कोसेणं सहस्सपुहत्तं। पुव्वपडिवन्नए पडुच्च जहन्नेणं कोडिसहस्सपुहत्तं, उक्कोसेण वि कोडिसहस्सपुहत्तं।

नियंठा णं० पुच्छा। गोयमा! पडिवज्जमाणए पडुच्च सिय अत्थि, सिय नत्थि। जदि अत्थि जहन्नेणं एक्को वा दो वा तिन्नि वा, उक्कोसेणं बावट्ठं सयं-अट्ठसतं खवगाणं, चउप्पणं उवसामगाणं। पुव्वपडिवन्नए पडुच्च सिय अत्थि, सिय नत्थि। जति अत्थि जहन्नेणं एक्को वा दो वा तिन्नि वा, उक्कोसेणं सयपुहत्तं।

सिणाया णं० पुच्छा। गोयमा! पडिवज्जमाणए पडुच्च सिय अत्थि, सिय नत्थि। जदि अत्थि जहन्नेणं एक्को वा दो वा तिन्नि वा, उक्कोसेणं अट्ठसयं। पुव्वपडिवन्नए पडुच्च जहन्नेणं कोडिपुहत्तं, उक्कोसेण वि कोडिपुहत्तं।

एएसि णं भंते! पुलाग-बउस-पडिसेवणाकुसील-कसायकुसील-नियंठ-सिणायाणं कयरे

कयरेहितो जाव विसेसाहिया वा? गोयमा! सव्वत्थोवा नियंठा, पुलागा संखेज्जगुणा, सिणाया संखेज्जगुणा, बउसा संखेज्जगुणा, पडिसेवणाकुसीला संखेज्जगुणा, कसायकुसीला संखेज्जगुणा।

सेवं भंते! सेवं भंते! ति जाव विहरइ।

**\*पंचवीसइमे सते छट्ठो उद्देशो समतो\***

**० सत्तमो उद्देशो ०**

[९३६] कति णं भंते! संजया पन्नता? गोयमा! पंच संजया पन्नता तं जहा-सामाइयसंजए छेदोवट्ठावणियसंजए परिहारविसुद्धियसंजए सुहुमसंपरायसंजए अहक्खायसंजए।

सामाइयसंजए णं भंते! कतिविधे पन्नते? गोयमा! दुविहे पन्नते, तं जहा-इतिरिए य, आवकहिए य।

छेदोवट्ठावणियसंजए णं० पुच्छा। गोयमा! दुविहे पन्नते, तं जहा-सातियारे य, निरतियारे य परिहारविसुद्धियसंजए० पुच्छा। गोयमा! दुविहे पन्नते, तं जहा--णिव्विसमाणए य, निव्विट्ठकाइए य।

सुहुमसंपराग०पुच्छा। गोयमा! दुविहे पन्नते, तं जहा-संकिलिस्समाणए य, विसुज्झमाणए य अहक्खायसंजए० पुच्छा। गोयमा! दुविहे पन्नते, तं जहा-छउमत्थे य, केवली य।

[९३७] सामाइयम्मि उ कए चाउज्जामं अणुत्तरं धम्मं।  
तिविहेण फासयंतो सामाइयसंजयो स खलु॥

[९३८] छेत्तूण य परियागं पोरणं जो ठवेइ अप्पाणं।  
धम्मम्मि पंचजामे छेदोवट्ठावणो स खलु॥

[९३९] परिहरति जो विसुद्धं तु पंचजामं अणुत्तरं धम्मं।  
तिविहेण फासयंतो परिहारियसंजयो स खलु॥

[९४०] लोभाणुं वेदंतो जो खलु उवसामओ व खवओ वा।  
सो सुहुमसंपराओ अहखाया ऊणओ किंचि॥

[९४१] उवसंते खीणम्मि व जो खलु कम्मम्मि मोहणिज्जम्मि।  
छउमत्थो व जिणो वा अहखाओ संजओ स खलु॥

[९४२] सामाइयसंजमे णं भंते! किं सवेयए होज्जा, अवेयए होज्जा? गोयमा! सवेयए वा होज्जा, अवेयए वा होज्जा। जति सवेयए एवं जहा कसायकुसीले तहेव निरवसेसं।

एवं छेदोवट्ठावणियसंजए वि।

परिहारविसुद्धियसंजओ जहा पुलाओ।

सुहुमसंपरायसंजओ अहक्खायसंजओ य जहा नियंठो।

सामाइयसंजए णं भंते! किं सरागे होज्जा, वीयरागे होज्जा? गोयमा! सरागे होज्जा, नो वीयरागे होज्जा।

एवं जाव सुहुमसंपरायसंजए।

अहक्खायसंजए जहा नियंठे।

सामाइयसंजए णं भंते! किं ठियकप्पे होज्जा, अठियकप्पे होज्जा? गोयमा! ठियकप्पे वा होज्जा, अठियकप्पे वा होज्जा।

छेदोवट्ठावणियसंजए० पुच्छा। गोयमा! ठियकप्पे होज्जा, नो अठियकप्पे होज्जा।

एवं परिहारविसुद्धियसंजए वि।

सेसा जहा सामाइयसंजए।

सामाइयसंजए णं भंते! किं जिणकप्पे होज्जा, थेरकप्पे होज्जा, कप्पातीते होज्जा? गोयमा! जिणकप्पे वा होज्जा जहा कसायकुसीले तहेव निरवसेसं।

छेदोवट्ठावणिओ परिहारविसुद्धिओ य जहा बउसो।

सेसा जहा नियंठे।

**[९४३]**सामाइयसंजए णं भंते! किं पुलाए होज्जा, बउसे जाव सिणाए होज्जा? गोयमा! पुलाए वा होज्जा, बउसे जाव कसायकुसीले वा होज्जा, नो नियंठे होज्जा, नो सिणाए होज्जा।

एवं छेदोवट्ठावणिए वि।

परिहारविसुद्धियसंजते णं भंते!० पुच्छा। गोयमा! नो पुलाए, नो बउसे, नो पडिसेवणाकुसीले होज्जा, कसायकुसीले होज्जा, नो नियंठे होज्जा, नो सिणाए होज्जा।

एवं सुहुमसंपराए वि।

अहक्खायसंजए० पुच्छा। गोयमा! नो पुलाए होज्जा, जाव नो कसायकुसीले होज्जा, नियंठे वा होज्जा, सिणाए वा होज्जा।

सामाइयसंजए णं भंते! किं पडिसेवए होज्जा, अपडिसेवए होज्जा? गोयमा! पडिसेवए वा होज्जा, अपडिसेवए वा होज्जा।

जइ पडिसेवए होज्जा किं मूलगुणपडिसेवए होज्जा०? सेसं जहा पुलागस्स।

जहा सामाइयसंजए एवं छेदोवट्ठावणिए वि।

परिहारविसुद्धियसंजए० पुच्छा। गोतमा! नो पडिसेवए होज्जा, अपडिसेवए होज्जा।

एवं जाव अहक्खायसंजए।

सामाइयसंजए णं भंते! कतिसु नाणेषु होज्जा? गोयमा! दोसु वा, तिसु वा, चतुसु वा नाणेषु होज्जा। एवं जहा कसायकुसीलस्स तहेव चत्तारि नाणाइं भयणाए।

एवं जाव सुहुमसंपराए।

अहक्खायसंजतस्स पंच नाणाइं भयणाए जहा नाणुद्देशए।

सामाइयसंजते णं भंते! केवतियं सुयं अहिज्जेज्जा? गोयमा! जहन्नेणं अट्ठ पवयणमायाओ जहा कसायकुसीले।

एवं छेदोवट्ठावणिए वि।

परिहारविसुद्धियसंजए० पुच्छा। गोयमा! जहन्नेणं नवमस्स पुव्वस्स तइयं आयारवत्थुं, उक्कोसेणं असंपुण्णाइं दस पुव्वाइं अहिज्जेज्जा।

सुहुमसंपरायसंजए जहा सामाइयसंजए।

अहक्खायसंजए० पुच्छा। गोयमा! जहन्नेणं अट्ठ पवयणमायाओ, उक्कोसेणं चोद्धसपुव्वाइं

अहिज्जेज्जा, सुतवतिरिते वा होज्जा।

सामाइयसंजए णं भंते! किं तित्थे होज्जा, अतित्थे होज्जा? गोयमा! तित्थे वा होज्जा, अतित्थे वा होज्जा जहा कसायकुसीले।

छेदोवट्ठावणिए परिहारविसुद्धिए य जहा पुलाए।

सेसा जहा सामाइयसंजए।

सामाइयसंजए णं भंते किं सलिंगे होज्जा, अन्नलिंगे होज्जा, गिहिलिंगे होज्जा? जहा पुलाए।

एवं छेदोवट्ठावणिए वि।

परिहारविसुद्धियसंजए णं भंते! किं० पुच्छा। गोयमा! दव्वलिंगं पि भावलिंगं पि पडुच्च सलिंगे होज्जा, नो अन्नलिंगे होज्जा, नो गिहिलिंगे होज्जा।

सेसा जहा सामाइयसंजए।

सामाइयसंजए णं भंते! कतिसु सरीरेसु होज्जा? गोयमा! तिसु वा चतुसु वा पंचसु वा जहा सामाइयसंजए णं भंते! कतिसु सरीरेसु होज्जा? गोयमा! तिसु वा चतुसु वा पंचसु वा जहा कसायकुसीले ।

एवं छेदोवट्ठावणिए वि।

सेसा जहा पुलाए।

सामाइयसंजए णं भंते! किं कम्मभूमीए होज्जा, अकम्मभूमीए होज्जा? गोयमा! जम्मणं संतिभावं च पडुच्च जहा बउसे।

एवं छेदोवट्ठावणिए वि।

परिहारविसुद्धिए य जहा पुलाए।

सेसा जहा सामाइयसंजए।

**[९४४]**सामाइयसंजए णं भंते! किं ओसप्पिणिकाले होज्जा, उस्सप्पिणिकाले होज्जा, नोओसप्पिणिनोउस्सप्पिणिकाले होज्जा? गोयमा! ओसप्पिणिकाले जहा बउसे।

एवं छेदोवट्ठावणिए वि, नवरं जम्मण-संतिभावं पडुच्च चउसु वि पलिभागेसु नत्थि, साहरणं पडुच्च अन्नयरे पलिभागे होज्जा। सेसं तं चेव।

परिहारविसुद्धिए० पुच्छा। गोयमा! ओसप्पिणिकाले वा होज्जा, उस्सप्पिणिकाले वा होज्जा, नोओसप्पिणिनोउस्सप्पिणिकाले नो होज्जा।

जदि ओसप्पिणिकाले होज्जा जहा पुलाओ।

उस्सप्पिणिकाले वि जहा पुलाओ।

सुहुमसंपराओ जहा नियंठो।

एवं अहक्खाओ वि।

**[९४५]**सामाइयसंजए णं भंते! कालगते समाणे कं गतिं गच्छति? गोयमा! देवगतिं गच्छति।

देवगतिं गच्छमाणे किं भवणवासीसु उववज्जेज्जा जाव वेमाणिएसु उववज्जेज्जा? गोयमा! नो भवणसीसु उववज्जेज्जा जहा कसायकुसीले।

एवं छेदोवट्ठावणिए वि।

परिहारविसुद्धिए जहा पुलाए।

सुहुमसंपराए जहा नियंठे।

अहक्खाते० पुच्छा । गोयमा ! एवं अहक्खायसंजए वि जाव अजहन्नमणुक्कोसेणं अणुतर विमाणेसु उववज्जेज्जा, अत्थेगइए सिज्झति जाव अंतं करेति।

सामाइयसंजए णं भंते! देवलोगेसु उववज्जमाणे किं इंदताए उववज्जति० पुच्छा। गोयमा!

अविराहणं पडुच्च एवं जहा कसायकुसीले।

एवं छेदोवट्ठावणिए वि।

परिहारविसुद्धिए जहा पुलाए।

सेसा जहा नियंठे।

सामाइयसंजयस्स णं भंते! देवलोगेसु उववज्जमाणस्स केवतियं कालं ठिती पन्नता?

गोयमा! जहन्नेणं दो पलियोवमाइं, उक्कोसेणं तेतीसं सागरोवमाइं।

एवं छेदोवट्ठावणिए वि।

परिहारविसुद्धियस्स पुच्छा। गोयमा! जहन्नेणं दो पलिओवमाइं, उक्कोसेणं अट्ठारस

सागरोवमाइं।

सेसाणं जहा नियंठस्स।

**[९४६]**सामाइयसंजयस्स णं भंते! केवतिया संजमठाणा पन्नता? गोयमा! असंखेज्जा

संजमठाणा पन्नता।

एवं जाव परिहारविसुद्धियस्स।

सुहुमसंपरायसंजयस्स० पुच्छा। गोयमा! असंखेज्जा अंतोमुहुतिया संजमठाणा पन्नता।

अहक्खायसंजयस्स० पुच्छा। गोयमा! एगे अजहन्नमणुक्कोसए संजमठाणे।

एएसि णं भंते! सामाइय-छेदोवट्ठावणिय-परिहारविसुद्धिय-सुहुमसंपराय-अहक्खायसंजयाणं

संजमठाणाणं कयरे कयरेहिंतो जाव विसेसाहिया वा? गोयमा! सच्चत्थोवे अहक्खायसंजयस्स एगे

अजहन्नमणुक्कोसए संजमट्ठाणे, सुहुमसंपरागसंजयस्स अंतोमुहुतिया संजमठाणा असंखेज्जगुणा,

परिहारविसुद्धियसंजयस्स संजमठाणा असंखेज्जगुणा, सामाइयसंजयस्स छेदोवट्ठावणियसंजयस्स य एएसि

णं संजमठाणा दोणह वि तुल्ला असंखेज्जगुणा।

**[९४७]**सामाइयसंजयतस्स णं भंते! केवतिया चरित्तपज्जवा पन्नता? गोयमा! अणंता

चरित्तपज्जवा पन्नता।

एवं जाव अहक्खायसंजयस्स।

सामाइयसंजए णं भंते! सामाइयसंजयस्स सट्ठाणसन्निगासेणं चरित्तपज्जवेहिं किं हीणे,

तुल्ले, अब्भहिए? गोयमा! सिय हीणे०, छट्ठाणवडिए।

सामाइयसंजए णं भंते! छेदोवट्ठावणियसंजयस्स पराट्ठाणसन्निगासेणं चरित्तपज्जवेहिं०

पुच्छा। गोयमा! सिय हीणे०, छट्ठाणवडिए।

एवं परिहारविसुद्धियस्स वि।

सामाइयसंजए णं भंते! सुहुमसंपरायसंजयस्स परट्ठाणसन्निगासेणं चरित्तपज्जवे० पुच्छा।  
गोयमा! हीणे, नो तुल्ले, नो अब्भहिए; अणंतगुणहीणे।

एवं अहक्खायसंजयस्स वि।

एवं छेदोवट्ठावणिए वि, हेट्ठिल्लेसु तिसु वि समं छट्ठाणपडिए, उवरिल्लेसु दोसु तहेव हीणे  
जहा छेदोवट्ठावणिए तहा परिहारविसुद्धिए वि।

सुहुमसंपरागसंजए णं भंते! सामाइयसंजयस्स परट्ठाण० पुच्छा।

गोयमा! नो हीणे, नो तुल्ले, अब्भहिए-अणंतगुणमब्भहिए।

एवं छेदोवट्ठावणिय-परिहारविसुद्धिएसु वि समं सट्ठाणे सिय हीणे, नो तुल्ले, सिय  
अब्भहिए। जदि हीणे अणंतगुणहीणे। अह अब्भहिए अणंतगुणमब्भहिए।

सुहुमसंपरायसंजयस्स अहक्खायसंजयस्स य परट्ठाण० पुच्छा।

गोयमा! हीणे, नो तुल्ले, नो अब्भहिए; अणंतगुणहीणे।

अहक्खाते हेट्ठिल्लाणं चउण्ह वि नो हीणे, नो तुल्ले, अब्भहिए--अणंतगुणमब्भहिए।  
सट्ठाणे नो हीणे, तुल्ले, नो अब्भहिए।

एएसि णं भंते! सामाइय-छेदोवट्ठावणिय-परिहारविसुद्धिय-सुहुम-संपराय-अहक्खायसंजयाणं  
जहन्नक्कोसगाणं चरित्तपज्जवाणं कयरे कयरेहिंतो जाव विसेसाहिया वा? गोयमा! सामाइयसंजयस्स  
छेदोवट्ठावणियसंजयस्स य एएसि णं जहन्नगा चरित्तपज्जवा दोण्ह वि तुल्ला सव्वत्थोवा,  
परिहारविसुद्धियसंजयस्स जहन्नगा चरित्तपज्जवा अणंतगुणा, तस्स चेव उक्कोसगा चरित्तपज्जवा  
अणंतगुणा। सामाइयसंजयस्स छेओवट्ठावणियसंजयस्स य, एएसि णं उक्कोसगा चरित्तपज्जवा दोण्ह वि  
तुल्ला अणंतगुणा। सुहुमसंपरायसंजयस्स जहन्नगा चरित्तपज्जवा अणंतगुणा, तस्स चेव उक्कोसगा  
चरित्तपज्जवा अणंतगुणा। अहक्खायसंजयस्स अजहन्नमणुक्कोसगा चरित्तपज्जवा अणंतगुणा।

सामाइयसंजए णं भंते! किं सजोगी होज्जा, अजोगी होज्जा? गोयमा! सजोगी जहा पुलाए।

एवं जाव सुहुमसंपरायसंजए।

अहक्खाए जहा सिणाए।

सामाइयसंजए णं भंते! किं सागारोवउत्ते होज्जा, अणागारोवउत्ते होज्जा?

गोयमा! सागारोवउत्ते जहा पुलाए।

एवं जाव अहक्खाए, नवरं सुहुमसंपराए सागारोवउत्ते होज्जा, नो अणागारोवउत्ते होज्जा।

सामाइयसंजए णं भंते! किं सकसायी होज्जा, अकसायी होज्जा?

गोयमा! सकसायी होज्जा, नो अकसायी होज्जा, जहा कसायकुसीले ।

एवं छेदोवट्ठावणिये वि।

परिहारविसुद्धिए जहा पुलाए ।

सुहुमसंपरागसंजए० पुच्छा।

गोयमा! सकसायी होज्जा, नो अकसायी होज्जा।

जदि सकसायी होज्जा, से णं भंते! कतिसु कसाएसु होज्जा?

गोयमा! एगंसि संजलणे लोभे होज्जा।

अहक्खायसंजए जहा नियंठे।

सामाइयसंजए णं भंते! किं सलेस्से होज्जा, अलेस्से होज्जा? गोयमा! सलेस्से होज्जा, जहा कसायकुसीले।

एवं छेदोवट्ठावणिए वि।

परिहारविसुद्धिए जहा पुलाए ।

सुहुमसंपराए जहा नियंठे ।

अहक्खाए जहा सिणाए, नवरं जइ सलेस्से होज्जा एगाए सुक्कलेसाए होज्जा।

**[९४८]**सामाइयसंजए णं भंते! किं वड्ढमाणपरिणामे होज्जा, हायमाणपरिणामे, अवट्ठियपरिणामे? गोयमा! वड्ढमाणपरिणामे, जहा पुलाए।

एवं जाव परिहारविसुद्धिए।

सुहुमसंपराय० पुच्छा। गोयमा! वड्ढमाणपरिणामे वा होज्जा, हायमाणपरिणामे वा होज्जा, नो अवट्ठियपरिणामे होज्जा।

अहक्खाते जहा नियंठे।

सामाइयसंजए णं भंते! केवतियं कालं वड्ढमाणपरिणामे होज्जा? गोयमा! जहन्नेणं एक्कं समयं, जहा पुलाए ।

एवं जाव परिहारविसुद्धिए।

सुहुमसंपरागसंजए णं भंते! केवतियं कालं वड्ढमाणपरिणामे होज्जा? गोयमा! जहन्नेणं एक्कं समयं, उक्कोसेणं अंतोमुहुत्तं।

केवतियं कालं हायमाणपरिणामे? एवं चेव।

अहक्खातसंजए णं भंते! केवतियं कालं वड्ढमाणपरिणामे होज्जा? गोयमा! जहन्नेणं अंतोमुहुत्तं, उक्कोसेण वि अंतोमुहुत्तं।

केवतियं कालं अवट्ठियपरिणामे होज्जा? गोयमा! जहन्नेणं एक्कं समयं, उक्कोसेणं देसूणा पुव्वकोडी।

**[९४९]**सामाइयसंजए णं भंते! कति कम्मपगडीओ बंधइ? गोयमा! सत्तविहबंधए वा, अट्ठविहबंधए वा, एवं जहा बउसे।

एवं जाव परिहारविसुद्धिए।

सुहुमसंपरागसंजए० पुच्छा। गोयमा! आउय-मोहणिज्जवज्जाओ छ कम्मप्पगडीओ बंधइ।

अहक्खायसंजए जहा सिणाए ।

सामाइयसंजए णं भंते! कति कम्मप्पगडीओ वेदेति?

गोयमा! नियमं अट्ठ कम्मप्पगडीओ वेदेति।

एवं जाव सुहुमसंपरागे।

अहक्खाए० पुच्छा।

गोयमा! सत्तविहवेदए वा, चउव्विहवेदए वा। सत्त वेदेमाणे मोहणिज्ज वज्जाओ सत्त कम्मप्पगडीओ वेदेति। चत्तारि वेदेमाणे वेदणिज्जाऽऽउय-नाम-गोयाओ चत्तारि कम्मप्पगडीओ वेदेति।

सामाइयसंजए णं भंते! कति कम्मप्पगडीओ उदीरेति? गोयमा! सत्तविह0 जहा बउसो।  
एवं जाव परिहारविसुद्धिए।

सुहुमसंपराए0 पुच्छा। गोयमा! छव्विहउदीरेण वा, पंचविहउदीरेण वा। छ उदीरेमाणे आउय-  
वेदणिज्जवज्जाओ छ कम्मप्पगडीओ उदीरेइ। पंच उदीरेमाणे आउय-वेयणिज्ज-मोहणिज्जवज्जाओ पंच  
कम्मप्पगडीओ उदीरेति।

अहक्खातसंजए0 पुच्छा। गोयमा! पंचविहउदीरेण वा, दुविहउदीरेण वा, अणुदीरेण वा। पंच  
उदीरेमाणे आउय-वेदणिज्ज-मोहणिज्जवज्जाओ पंच उदीरेति। सेसं जहा नियंठस्स।

[९५०]सामाइयसंजए णं भंते! सामाइयसंजयतं जहमाणे किं जहति?, किं उवसंपज्जइ?  
गोयमा! सामाइयसंजयतं जहति; छेदोवट्ठावणियसंजयं वा सुहुमसंपरायसंजयं वा असंजमं वा संजमासंजमं  
वा उवसंपज्जति।

छेदोवट्ठावणिए0 पुच्छा। गोयमा! छेदोवट्ठावणियसंजयतं जहति; सामाइयसंजयं वा  
परिहारविसुद्धियसंजयं वा सुहुमसंपरागसंजयं वा असंजमं वा संजमासंजमं वा उवसंपज्जति।

परिहारविसुद्धिए0 पुच्छा। गोयमा! परिहारविसुद्धियसंजयतं जहति; छेदोवट्ठावणियसंजयं वा  
असंजमं वा उपसंपज्जइ।

सुहुमसंपराए0 पुच्छा। गोयमा! सुहुमसंपरागसंजयतं जहति; सामाइयसंजयं वा  
छेदोवट्ठावणियसंजयं वा अहक्खायसंजयं वा असंजमं वा उवसंपज्जइ।

अहक्खायसंजए0 पुच्छा। गोयमा! अहक्खायसंजयतं जहति; सुहुमसंपरागसंजयं वा अस्संजमं  
वा सिद्धिगतिं वा उवसंपज्जति।

[९५१]सामाइयसंजए णं भंते! किं सण्णोवउत्ते होज्जा, नोसण्णोवउत्ते होज्जा? गोयमा!  
सण्णोवउत्ते जहा बउसो।

एवं जाव परिहारविसुद्धिए।

सुहुमसंपराए अहक्खाए य जहा पुलाए।

सामाइयसंजए णं भंते! किं आहारए होज्जा, अणाहारए होज्जा? जहा पुलाए

एवं जाव सुहुमसंपराए।

अहक्खाए जहा सिणाए।

सामाइयसंजए णं भंते! कति भवग्गहणाइं होज्जा? गोयमा! जहन्नेणं एक्कं, उक्कोसेणं  
अट्ठ।

एवं छेदोवट्ठावणिए वि।

परिहारविसुद्धिए0 पुच्छा। गोयमा! जहन्नेणं एक्कं, उक्कोसेणं तिन्नि।

एवं जाव अहक्खाते।

[९५२]सामाइयसंजयस्स णं भंते! एगभवग्गहणिया केवतिया आगरिसा पन्नता? गोयमा  
जहन्नेणं0 जहा बउसस्स ।

छेदोवट्ठावणियस्स0 पुच्छा। गोयमा! जहन्नेणं एक्को, उक्कोसेणं वीसपुहत्तं।

परिहारविसुद्धियस्स0 पुच्छा। गोयमा! जहन्नेणं एक्को, उक्कोसेणं तिन्नि।

सुहुमसंपरायस्स० पुच्छा। गोयमा! जहन्नेणं एक्को, उक्कोसेणं चत्तारि।  
अहक्खायस्स० पुच्छा। गोयमा! जहन्नेणं एक्को, उक्कोसेणं दोन्नि।  
सामाइयसंजयस्स णं भंते! नाणाभवग्गहणिया केवतिया आगरिसा पन्नता? गोयमा! जहा  
बउसे।

छेदोवट्ठावणियस्स० पुच्छा। गोयमा! जहन्नेणं दोन्नि, उक्कोसेणं उवरिं नवण्हं सयाणं अंतो  
सहस्सस्स।

परिहारविसुद्धियस्स जहन्नेणं दोन्नि, उक्कोसेणं सत।

सुहुमसंपरागस्स जहन्नेणं दोन्नि, उक्कोसेणं नव।

अहक्खायस्स जहन्नेणं दोन्नि, उक्कोसेणं पंच।

**[१५३]**सामाइयसंजए णं भंते! कालतो केवचिरं होति? गोयमा! जहन्नेणं एक्कं समयं,  
उक्कोसेणं देसूणएहिं नवहिं वासेहिं ऊणिया पुक्वकोडी।

एवं छेदोवट्ठावणिए वि।

परिहारविसुद्धिए जहन्नेणं एक्कं समयं, उक्कोसेणं देसूणएहिं एक्कूणतीसाए वासेहिं ऊणिया  
पुक्वकोडी।

सुहुमसंपराए जहा नियंठे ।

अहक्खाए जहा सामाइयसंजए।

सामाइयसंजया णं भंते! कालतो केवचिरं होंति? गोयमा! सक्वद्धं।

छेदोवट्ठावणिएसु पुच्छा। गोयमा! जहन्नेणं अड्ढाइज्जाइं वाससयाइं, उक्कोसेणं पन्नासं  
सागरोवमकोडिसयसहस्साइं।

परिहारविसुद्धिए पुच्छा। गोयमा! जहन्नेणं देसूणाइं दो वाससयाइं, उक्कोसेणं देसूणाओ दो  
पुक्वकोडीओ।

सुहुमसंपरागसंजया० पुच्छा। गोयमा! जहन्नेणं एक्कं समयं, उक्कोसेणं अंतोमुहुत्तं।

अहक्खायसंजया जहा सामाइयसंजया।

सामाइयसंजयस्स णं भंते! केवतियं कालं अंतरं होइ? गोयमा! जहन्नेणं० जहा पुलागस्स।

एवं जाव अहक्खायसंजयस्स।

सामाइयसंजयाणं भंते!० पुच्छा। गोयमा! नत्थंतरं।

छेदोवट्ठावणियाणं पुच्छा। गोयमा! जहन्नेणं तेवट्ठिं वाससहस्साइं, उक्कोसेणं अट्ठारस  
सागरोवमकोडाकोडीओ।

परिहारविसुद्धियाणं पुच्छा। गोयमा! जहन्नेणं चउरासीतिं वाससहस्साइं, उक्कोसेणं अट्ठारस  
सागरोवमकोडाकोडीओ।

सुहुमसंपरागाणं जहा नियंठाणं ।

अहक्खायाणं जहा सामाइयसंजयाणं।

सामाइयसंजयस्स णं भंते! कति समुग्घाया पन्नता? गोयमा! छ समुग्घाया पन्नता, जहा  
कसायकुसीलस्स।

एवं छेदोवट्ठावणियस्स वि।

परिहारविसुद्धियस्स जहा पुलागस्स।

सुहुमसंपरायस्स जहा नियंठस्स।

अहक्खातस्स जहा सिणायस्स।

सामाइयसंजए णं भंते ! लोगस्स किं संखेज्जतिभागे होज्जा, असंखेज्जइभागे० पुच्छा। गो०

नो संखेज्जति० जहा पुलाए।

एवं जाव सुहुमसंपराए।

अहक्खायसंजते जहा सिणाए।

सामाइयसंजए णं भंते! लोगस्स किं संखेज्जतिभागं फुसति? जहेव होज्जा तहेव फुसति वि।

सामाइयसंजए णं भंते! कयरम्मि भावे होज्जा? गोयमा! खओवसमिए भावे होज्जा।

एवं जाव सुहुमसंपराए।

अहक्खायसंजए० पुच्छा। गोयमा! ओवसमिए वा खइए वा भावे होज्जा।

सामाइयसंजया णं भंते! एगसमएणं केवतिया होज्जा? गोयमा! पडिवज्जमाणए पडुच्च जहा कसायकुसीला तहेव निरवसेसं।

छेदोवट्ठावणिया० पुच्छा। गोयमा! पडिवज्जमाणए पडुच्च सिय अत्थि, सिय नत्थि। जइ अत्थि जहन्नेणं एक्को वा दो वा तिन्नि वा, उक्कोसेणं सयपुहत्तं। पुव्वपडिवन्नए पडुच्च सिय अत्थि, सिय नत्थि। जदि नत्थि। जदि अत्थि जहन्नेणं कोडिसयपुहत्तं, उक्कोसेण वि कोडिसयपुहत्तं।

परिहारविसुद्धिया जहा पुलागा।

सुहुमसंपरागा जहा नियंठा।

अहक्खायसंजता णं० पुच्छा। गोयमा! पडिवज्जमाणए पडुच्च सिय अत्थि, सिय नत्थि। जदि अत्थि जहन्नेणं एक्को वा दो वा तिन्नि वा, उक्कोसेणं बावट्ठं सयं-अट्ठुत्तरसयं खवगाणं, चउप्पन्नं उवसामगाणं। पुव्वपडिवन्नए पडुच्च जहन्नेणं कोडिपुहत्तं, उक्कोसेण वि कोडिपुहत्तं।

एएसि णं भंते! सामाइय-छेओवट्ठावणिय-परिहारविसुद्धिय-सुहुमसंपराय-अहक्खायसंजयाणं कयरे कयरेहिंतो जाव विसेसाहिया वा? गोयमा सव्वत्थोवा सुहुमसंपरायसंजया, परिहारविसुद्धियसंजया संखे-ज्जगुणा, अहक्खायसंजया संखेज्जगुणा, छेओवट्ठावणियसंजया संखेज्जगुणा, सामाइयसंजया संखेज्जगुणा।

[९५४] पडिसेवण दोसालोयणा य आलोयणारिहे चेव।

ततो सामायारी पायच्छित्ते तवे चेव ॥

[९५५] कइविहाणं भंते पडिसेवणा पन्नता ?गोयमा ! दसविहा पडिसेवणा पन्नता, तं जहा-

[९५६] दप्प प्पमाद-ऽणाभोगे आउरे आवती ति य।

संकिण्णे सहसक्कारे भय प्पदोसा य वीमंसा ॥

[९५७] दस आलोयणादोसा पन्नता, तं जहा--

[९५८] आकंपइत्ता अणुमाणइत्ता जं दिट्ठं बायरं व सुहुमं वा।

छन्नं सद्दाउलयं बहुजण अव्वत्त तस्सेवी ॥

[९५९] दसहिं ठाणेहिं संपन्ने अणगारे अरिहति अत्तदोसं आलोएत्तए, तं जहा-जातिसंपन्ने,

कुलसंपन्ने, विणयसंपन्ने, णाणसंपन्ने, दंसणसंपन्ने, चरित्तसंपन्ने, खंते, दंते, अमायी, अपच्छाणुतावी ।

अट्ठहिं ठाणेहिं संपन्ने अणगारे अरिहति आलोयणं पडिच्छित्तए, तं जहा--आयारवं १  
आहारवं २ ववहारवं ३ उव्वीलए ४ पकुव्वए ५ अपरिस्सावी ६ निज्जवए ७ अवायदंसी ८।

[९६०]दसविहा सामायारी पन्नता, तं जहा-

[९६१] इच्छा १ मिच्छा २ तहक्कारो ३ आवस्सिया य ४ निसीहिया ५।

आउच्छणा य ६ पडिपुच्छा ७ छंदणा य ८ निमंतणा ९।

उपसंपया य काले १०, सामायारी भवे दसहा ॥

[९६२]दसविहे पायच्छित्ते पन्नते, तं जहा--आलोयणारिहे १ पडिक्कमणारिहे २ तदुभयारिहे  
३ विवेगारिहे ४ विउसग्गारिहे ५ तवारिहे ६ छेदारिहे ७ मूलारिहे ८ अणवट्ठप्पारिहे ९ पारंचियारिहे १०।

[९६३]दुविधे तवे पन्नते, तं जहा--बाहिरए य, अब्भिंतरए य।

से किं तं बाहिरए तवे? बाहिरए तवे छव्विधे पन्नते, तं जहा—

[९६४] अणसणमोमोरिया भिक्खायरिया य रसपरिच्चाओ ।

कायकिलेसो पडिसंलीणया ।य बज्झो तवो होइ ॥

[९६५] से किं तं अणसणे? अणसणे दुविधे पन्नते, तं जहा--इतरिए य आवकहिए य।

से किं तं इतरिए? इतरिए अणेगविधे पन्नते, तं जहा--चउत्थे भत्ते, छट्ठे भत्ते, अट्ठमे भत्ते,  
दसमे भत्ते, दुवालसमे भत्ते, चोद्धसमे भत्ते, अद्धमासिए भत्ते, मासिए भत्ते, दोमासिए भत्ते। जाव छम्मासिए भत्ते।  
से तं इतरिए।

से किं तं आवकहिए? आवकहिए दुविधे पन्नते तं जहा-पाओवगमणे य भत्तपच्चक्खाणे य।

से किं तं पाओवगमणे? पाओवगमणे दुविधे पन्नते, तं जहा--नीहारिमे य, अनीहारिमे य,  
नियमं अपडिक्कम्मे। से तं पाओवगमणे।

से किं तं भत्तपच्चक्खाणे? भत्तपच्चक्खाणे दुविधे पन्नते, तं जहा--नीहारिमे य, अनीहारिमे  
य, नियमं सपडिक्कम्मे। से तं भत्तपच्चक्खाणे। से तं आवकहिए। से तं अणसणे।

से किं तं ओमोदरिया? ओमोदरिया दुविहा प०, तं जहा-दव्वोमोदरिया य भावोमोदरिया य।

से किं तं दव्वोमोदरिया? दव्वोमोदरिया दुविहा पन्नता, तं जहा--उवगरणदव्वोमोदरिया य,  
भत्त-पाणदव्वोमोदरिया य।

से किं तं उवगरणदव्वोमोदरिया? उवगरणदव्वोमोदरिया-एगे वत्थे एगे पादे चियत्तोवगरण-  
सातिज्जणया। से तं उवगरणदव्वोमोदरिया।

से किं तं भत्त-पाणदव्वोमोदरिया? भत्त-पाणदव्वोमोदरिया अट्ठकुक्कुडिअंडगप्पमाणमेते  
कवले आहारं आहारेमाणस्स अप्पाहारे, दुवालस० जहा सत्तमसए पढमुद्देसए जाव नो पकामरसभोती ति  
वत्तवं सिया। से तं भत्त-पाणदव्वोमोदरिया। से तं दव्वोमोदरिया।

से किं तं भावोमोदरिया? भावोमोदरिया अणेगविहा पन्नता, तं जहा-अप्पकोहे, जाव अप्प-  
लोभे, अप्पसद्दे, अप्पझंझे, अप्पतुमंतुमे, से तं भावोमोदरिया। से तं ओमोदरिया।

से किं तं भिक्खायरिया? भिक्खायरिया अणेगविहा पन्नता, तं जहा-दव्वाभिग्गहचरए,  
खेत्ताभिग्गहचरए, जहा उववात्तिए जाव सुद्धेसणिए, संखादत्तिए। से तं भिक्खायरिया।

से किं तं रसपरिच्चाए? रसपरिच्चाए अणेगविधे पन्नते, तं जहा--निच्चित्तिए, पणीतरसविवज्जए जहा उववाइए जाव लूहाहारे। से तं रसपरिच्चाए।

से किं तं कायकिलेसे? कायकिलेसे अणेगविधे पन्नते, तं जहा-ठाणादीए, उक्कुडुयासणिए, जहा उववातिए जाव सच्चगायपडिकम्मविप्पमुक्के। से तं कायकिलेसे।

से किं तं पडिसंलीणया? पडिसंलीणया चउच्चिहा पन्नता, तं जहा-इंदियपडि संलीणया कसायपडिसंलीणया जोगपडिसंलीणया विवित्तसयणासणसेवणया।

से किं तं इंदियपडिसंलीणया? इंदियपडिसंलीणया पंचविहा पन्नता, तं जहा-सोइंदियविसय-पयारणिरोहो वा सोतिंदियविसयप्पत्तेसु वा अत्थेसु रागद्वोसविणिग्गहो; चक्खिंदियविसय० एवं जाव फासिंदिय विसयपयारणिरोहो वा, फासिंदियविसयप्पत्तेसु वा अत्थेसु राग-द्वोसविणिग्गहो। से तं इंदियपडिसंलीणया।

से किं तं कसायपडिसंलीणया? कसायपडिसंलीणया चउच्चिहा पन्नता, तं जहा-कोहोदयनिरोहो वा, उदयप्पत्तस्स वा कोहस्स विफलीकरणं; एवं जाव लोभोदयनिरोहो वा उदयपत्तस्स वा, लोभस्स विफलीकरणं। से तं कसायपडिसंलीणया।

से किं तं जोगपडिसंलीणया? जोगपडिसंलीणया तिविहा पन्नता, तं जहा--अकुसलमणनिरोहो वा, कुसलमणउदीरणं वा, मणस्स वा एगतीभावकरणं; अकुसलवइनिरोहो वा, कुसलवइउदीरणं वा, वईए वा एगतीभावकरणं।

से किं तं कायपडिसंलीणया? कायपडिसंलीणया जं णं सुसमाहियपसंतसाहरियपाणि-पाए कुम्मो इव गुत्तिंदिए अल्लीणे पल्लीणे चिट्ठइ। से तं कायपडिसंलीणया। से तं जोगपडिसंलीणया।

से किं तं विवित्तसयणासणसेवणता? विवित्तसयणासणसेवणया जं णं आरामेसु वा उज्जाणेसु वा जहा सोमिलुद्देसए जाव सेज्जासंथारगं उवसंपज्जिताणं विहरति। से तं विवित्तसयणासणसेवणया। से तं पडिसंलीणया। से तं बाहिरए तवे।

से किं तं अब्भित्तरए तवे? अब्भित्तरए तवे छच्चिहे पन्नते, तं जहा--पायच्छित्तं १ विणओ २ वेयावच्चं ३ सज्झायो ४, झाणं ५, विओसग्गो ६।

से किं तं पायच्छित्ते? पायच्छित्ते दसविधे पन्नते, तं जहा--आलोयणारिहे जाव पारंचियारिहे। से तं पायच्छित्ते।

से किं तं विणए? विणए सत्तविधे पन्नते, तं जहा--नाणविणए १ दंसणविणए २ चरित्तविणए ३ मणविणए ४ वइविणए ५ कायविणए ६ लोगोवयारविणए ७।

से किं तं नाणविणए? नाणविणए पंचविधे पन्नते, तं जहा--आभिनिबोहियनाणविणए जाव केवलनाणविणए। से तं नाणविणए।

से किं तं दंसणविणए? दंसणविणए दुविधे पन्नते, तं जहा--सुस्सूसाणाविणए य अणच्चासायणाविणए य।

से किं तं सुस्सूसाणाविणए? सुस्सूसाणाविणए अणेगविधे पन्नते, तं जहा--सक्कारेति वा सम्माणेति वा जहा चोद्धसमसए ततिए उद्देसए जाव पडिसंसाहणया। से तं सुस्सूसाणाविणए।

से किं तं अणच्चासादणाविणए? अणच्चासादणाविणए पणयालीसतिविधे पन्नते, तं जहा-अरहंताणं अणच्चासादणया, अरहंतपन्नतस्स धम्मस्स अणच्चासायणया आयरियाणं अणच्चासादणया

उवज्झायाणं अणच्चासायणया थेराणं अणच्चासायणया कुलस्स अणच्चासायणया गणस्स अणच्चासायणया संघस्स अणच्चासादणया किरियाए अणच्चासायणया संभोगस्स अणच्चासायणया आभिणिबोहियनाणस्स अणच्चासायणया जाव केवलनाणस्स अणच्चासायणया, एएसिं चव भत्तिबहुमाणे णं एएसिं चव वण्ण-संजलणया । से तं अणच्चासायणाविणए। से तं दंसणविणए।

से किं तं चरित्तविणए? चरित्तविणए पंचविधे पन्नते, तं जहा--सामाइयचरित्तविणए जाव अहक्खायचरित्तविणए। से तं चरित्तविणए।

से किं तं मणविणए? मणविणए दुविधे पन्नते, तं जहा--पसत्थमणविणए य अप्पसत्थमणविणए य।

से किं तं पसत्थमणविणए? पसत्थमणविणए सत्तविधे पन्नते, तं जहा-अपावए, असावज्जे, अकिरिए, निरुवक्केसे, अणण्हयकरे, अच्छविकरे, अभूयाभिसंकणे। से तं पसत्थमणविणए।

से किं तं अप्पसत्थमणविणए? अप्पसत्थमणविणए सत्तविधे पन्नते, तं जहा-पावए सावज्जे सकिरिए सउवक्केसे अण्हयकरे छविकरे भूयाभिसंकणे। से तं अप्पसत्थमणविणए। से तं मणविणए।

से किं तं वइविणए? वइविणए दुविधे पन्नते, तं जहा--पसत्थवइविणए य अप्पसत्थ-वइविणए य।

से किं तं पसत्थवइविणए? पसत्थवइविणए सत्तविधे पन्नते, तं जहा--अपावए जाव अभूयाभिसंकणे। से तं पसत्थवइविणए।

से किं तं अप्पसत्थवइविणए? अप्पसत्थवइविणए सत्तविधे पन्नते, तं जहा-पावए सावज्जे जाव भूयाभिसंकणे। से तं अप्पसत्थवइविणए। से तं वइविणए।

से किं तं कायविणए? कायविणए दुविधे पन्नते, तं जहा--पसत्थकायविणए य अप्पसत्थकायविणए य।

से किं तं पसत्थकायविणए? पसत्थकायविणए सत्तविधे पन्नते, तं जहा--आउत्तं गमणं, आउत्तं ठाणं, आउत्तं निसीयणं, आउत्तं तुयट्णं, आउत्तं उल्लंघणं, आउत्तं पल्लंघणं, आउत्तं सत्त्विंदिय-जोगजुंजणया। से तं पसत्थकायविणए।

से किं तं अप्पसत्थकायविणए? अप्पसत्थकायविणए सत्तविधे पन्नते, तं जहा--अणाउत्तं गमणं, जाव अणाउत्तं सत्त्विंदियजोगजुंजणया। से तं अप्पसत्थकायविणए। से तं कायविणए।

से किं तं लोगोवयारविणए? लोगोवयारविणए सत्तविधे पन्नते, तं जहा--अब्भासवत्तियं, परछंदाणुवत्तियं, कज्जहेतुं, कयपडिकतया, अत्तगवेसणया, देसकालण्णया, सव्वत्थेसु अपडिलोमया। से तं लोगोवयारविणए। से तं विणए।

[९६६]से किं तं वेयावच्चे? वेयावच्चे दसविधे पन्नते, तंजहा-आयरियवेयावच्चे उवज्झायवेयावच्चे थेरवेयावच्चे तवस्सिवेयावच्चे गिलाणवेयावच्चे सेहवेयावच्चे कुलवेयावच्चे गणवेयावच्चे संघवेयावच्चे साहम्मियवेयावच्चे। से तं वेयावच्चे।

[९६७]से किं तं सज्झाए पंचविधे पन्नते, तंजहा-वायणा पडिपुच्छणा परियट्णणा अणुप्पेहा धम्मकहा। से तं सज्झाए।

[९६८]से किं तं ज्ञाणे? ज्ञाणे चउत्तविधे पन्नते, तं जहा-अट्ठे ज्ञाणे, रोद्धे ज्ञाणे, धम्मं ज्ञाणे,

सुक्के ज्ञाणे।

अट्ठो ज्ञाणे चउत्विहे पण्णते, तं जहा--अमणुण्णसंपयोगसंपउत्ते तस्स विप्पयोगसत्ति-समन्नागते यावि भवति, मणुण्णसंपयोगसंपउत्ते तस्स अविप्पयोगसत्तिसमन्नागते यावि भवति, आयंकसंपयोगसंपउत्ते तस्स विप्पयोगसत्तिसमन्नागते यावि भवति, परिङ्गुसियकामभोगसंपउत्ते तस्स अविप्पयोगसत्तिसमन्नागते यावि भवति।

अट्ठस्स णं ज्ञाणस्स चत्तारि लक्खणा पन्नता, तं जहा--कंदणया सोयणया तिप्पणया परिदेवणया।

रोद्धे ज्ञाणे चउत्विधे पन्नते, तं जहा--हिंसाणुबंधी मोसाणुबंधी, तेयाणुबंधी, सारक्खणाणुबंधी। रोद्धस्स ज्ञाणस्स चत्तारि लक्खणा पन्नता, तं जहा--उस्सन्नदोसे बहुदोसे अण्णाणदोसे धम्मं ज्ञाणे चउत्विहे चउपडोयारे पन्नते, तं जहा--आणाविजये, अवायविजये विवागविजये संठाणविजये।

धम्मस्स णं ज्ञाणस्स चत्तारि लक्खणा पन्नता, तं जहा--आणारुयी निसग्गरुयी सुत्तरुयी ओगाढरुयी।

धम्मस्स णं ज्ञाणस्स चत्तारि आलंबणा पन्नता, तं जहा--वायणा पडिपुच्छणा परियट्ठणा धम्मकहा।

धम्मस्स णं ज्ञाणस्स चत्तारि अणुपेहाओ पन्नताओ, तं जहा--एगताणुपेहा अणिच्चाणुपेहा असरणाणुपेहा संसाराणुपेहा।

सुक्के ज्ञाणे चउत्विधे चउपडोयारे पन्नते, तं जहा--पुहत्तवियक्के सवियारी, एगत्तवियक्के अवियारी, सुहुमकिरिए अनियट्ठी, समोच्छिन्नकिरिए अप्पडिवाई।

सुक्कस्स णं ज्ञाणस्स चत्तारि लक्खणा पन्नता, तं जहा--खंती मुत्ती अज्जवे मद्दवे। सुक्कस्स णं ज्ञाणस्स चत्तारि आलंबणा पन्नता, तं जहा--अव्वहे असम्मोहे विवेगे विओसग्गे।

सुक्कस्स णं ज्ञाणस्स चत्तारि अणुपेहाओ पन्नताओ, तं जहा--अणंतवत्तियाणुप्पेहा विप्परिणामाणुप्पेहा असुभाणुपेहा अवायाणुपेहा। से तं ज्ञाणे।

**[९६९]**से किं तं विओसग्गे? विओसग्गे दुविधे पन्नते, तं जहा--दव्वविओसग्गे य भावविओसग्गे य।

से किं तं दव्वविओसग्गे? दव्वविओसग्गे चउत्विधे पन्नते, तं जहा--गणविओसग्गे सरीरविओसग्गे उवधिविओसग्गे भत्त-पाणविओसग्गे। से तं दव्वविओसग्गे।

से किं तं भावविओसग्गे? भावविओसग्गे तिविहे पन्नते, तं जहा--कसायविओसग्गे संसारविओसग्गे कम्मविओसग्गे।

से किं तं कसायविओसग्गे? कसायविओसग्गे चउत्विधे पन्नते, तं जहा--कोहविओसग्गे माणविओसग्गे मायाविओसग्गे लोभविओसग्गे। से तं कसायविओसग्गे।

से किं तं संसारविओसग्गे? संसारविओसग्गे चउत्विधे पन्नते, तं जहा--नेरइयसंसारविओसग्गे जाव देवसंसारविओसग्गे। से तं संसारविओसग्गे।

से किं तं कम्मविओसग्गे? कम्मविओसग्गे अट्ठविधे पन्नत्ते, तं जहा—णाणावरणिज्ज कम्मविओसग्गे जाव अंतराइयकम्मविओसग्गे। से तं कम्मविओसग्गे। से तं भावविओसग्गे। से तं अब्भित्तरए तवे।

सेवं भंते! सेवं भंते! त्ति०।

**\*पंचवीसइमे सते सत्तमो उद्देशो समतो\***

**० अट्ठमो उद्देशो ०**

[१७०]रायगिहे जाव एवं वयासी--

नेरतिया णं भंते! कंहं उववज्जंति? गोयमा! से जहाणामए पवए पवमाणे अज्झवसाणनिव्वत्तिएणं करणोवाएणं सेयकाले तं ठाणं विप्पजहिता पुरिमं ठाणं उवसंपज्जित्ताणं विहरति, एवामेव ते वि जीवा पवओ विव पवमाणा अज्झवसाणनिव्वत्तिएणं करणोवाएणं सेयकाले तं भवं विप्पजहिता पुरिमं भवं उवसंपज्जित्ताणं विहरंति।

तेसि णं भंते! जीवाणं कंहं सीहा गती? कंहं सीहे गतिविसए पन्नत्ते? गोयमा! से जहानामए केइ पुरिसे तरुणे बलवं एवं जहा चोद्धसमसए पढमुद्देसए जाव तिसमइएण वा विग्गहेणं उववज्जंति। तेसि णं जीवाणं तहा सीहा गती, तहा सीहे गतिविसए पन्नत्ते।

ते णं भंते! जीवा कंहं परभवियाउयं पकरंति? गोयमा! अज्झवसाणजोगनिव्वत्तिएणं करणोवाएणं, एवं खलु ते जीवा परभवियाउयं पकरंति।

तेसि णं भंते! जीवाणं कंहं गती पवत्तइ? गोयमा! आउक्खएणं भवक्खएणं ठित्तिक्खएणं; एवं खलु तेसिं जीवाणं गती पवत्तति।

ते णं भंते! जीवा किं आतिइढीए उववज्जंति, परिइढीए उववज्जंति? गोयमा! आतिइढीए उववज्जंति, नो परिइढीए उववज्जंति।

ते णं भंते! जीवा किं आयकम्मणा उववज्जंति, परकम्मणा उववज्जंति? गोयमा! आयकम्मणा उववज्जंति, नो परकम्मणा उववज्जंति।

ते णं भंते! जीवा किं आयप्पयोगेणं उववज्जंति, परप्पयोगेणं उववज्जंति? गोयमा! आयप्पयोगेणं उववज्जंति, नो परप्पयोगेणं उववज्जंति।

असुरकुमारा णं भंते! कंहं उववज्जंति? जहा नेरतिया तहेव निरवसेसं जाव नो परप्पयोगेणं उववज्जंति।

एवं एगिंदियवज्जा जाव वेमाणिया। एगिंदिया एवं चेव, नवरं चउसमइओ विग्गहो। सेसं तं चेव।

सेवं भंते! सेवं भंते! त्ति जाव विहरति।

**\*पंचवीसइमे सते अट्ठमो उद्देशो समतो\***

**० नवमो उद्देशो ०**

[१७१]भवसिद्धियनेरइया णं भंते! कंहं उववज्जंति? गोयमा! से जहा नामए पवए पवमाणे०, अवसेसं तं चेव जाव वेमाणिए।

सेवं भंते! सेवं भंते! ति०।

**\*पंचवीसइमे सते नवमो उद्देशो समतो\***

**० दसमो उद्देशो ०**

[१७२]अभवसिद्धियनेरइया णं भंते! कंहं उववज्जंति? गोयमा! से जहानामए पवए पवमाणे०, अवसेसं तं चेव एवं जाव वेमाणिए।

सेवं भंते! सेवं भंते! ति।

**\*पंचवीसइमे सते दसमो उद्देशो समतो\***

**० एगारसमो उद्देशो ०**

[१७३]सम्मदिट्ठिनेरइया णं भंते! कंहं उववज्जंति? गोयमा! से जहानामए पवए पवमाणे०, अवसेसं तं चेव।

एवं एगिंदियवज्जं जाव वेमाणिया।

सेवं भंते! सेवं भंते! ति०।

**\*पंचवीसइमे सते एगारसमो उद्देशो समतो\***

**० बारसमो उद्देशो ०**

[१७४]मिच्छदिट्ठिनेरइया णं भंते! कंहं उववज्जंति? गोयमा! से जहानामए पवए पवमाणे०, अवसेसं तं चेव।

एवं जाव वेमाणिए।

सेवं भंते! सेवं भंते! ति जाव विहरति।

**\*पंचवीसइमे सते बारसमो उद्देशो समतो\***

**०-पंचवीसतिमं सतं समतं-०**

**० मुनि दीपरत्रसागरेण संशोधितः सम्पादितश्च पंचवीसतिमं सतं समतं ०**

**[ ] छट्ठीसइमं सयं [ ]**

नमो सुयदेवयाए भगवतीए।

[१७५] जीवा य लेस पक्खिय दिट्ठी अन्नाण नाण सन्नाओ।

वेय कसाए उवयोग योग एक्कारस वि ठाणा।।

**० पढमो उद्देशो ०**

[१७६]तेणं कालेणं तेणं समएणं रायगिहे जाव एवं वयासी--

जीवे णं भंते! पावं कम्मं किं बंधी, बंधति, बंधिस्सति; बंधी, बंधति, न बंधिस्सति; बंधी, न बंधति, बंधिस्सति; बंधी, न बंधति, न बंधिस्सति? गोयमा! अत्थगेतिए बंधी, बंधति, बंधिस्सति; अत्थगेतिए बंधी, बंधति, न बंधिस्सति; अत्थगेतिए बंधी, न बंधति, बंधिस्सइ; अत्थगेतिए बंधी, न बंधति, न बंधिस्सति।

सलेस्से णं भंते! जीवे पावं कम्मं किं बंधी, बंधति, बंधिस्सति; बंधी, बंधति, न बंधिस्सति० पुच्छा। गोयमा! अत्थगेतिए बंधी, बंधति, बंधिस्सति; अत्थगेतिए०, चउभंगो।

कणहलेस्से णं भंते! जीवे पावं कम्मं किं बंधी, ० पुच्छा। गोयमा! अत्थेगतिए बंधी, बंधति, बंधिस्सति; अत्थेगतिए बंधी, बंधति, न बंधिस्सति।

एवं जाव पम्हलेस्से। सव्वत्थ पढम-बितिया भंगा।

सुक्कलेस्से जहा सलेस्से तहेव चउभंगो।

अलेस्से णं भंते! जीवे पावं कम्मं किं बंधी० पुच्छा। गोयमा! बंधी, न बंधति, न बंधिस्सति।

कणहपक्खिए णं भंते! जीवे पावं कम्मं० पुच्छा। गोयमा! अत्थेगतिए बंधी,० पढम-बितिया भंगा।

सुक्कपक्खिए णं भंते! जीवे० पुच्छा। गोयमा! चउभंगो भाणियव्वो।

[१७७]सम्मद्धिट्ठीणं चत्तारि भंगा।

मिच्छादिट्ठीणं पढम-बितिया।

सम्मामिच्छद्धिट्ठीणं एवं चेव।

नाणीणं चत्तारि भंगा।

आभिणिबोहियनाणीणं जाव मणपज्जवणाणीणं चत्तारि भंगा।

केवलनाणीणं चरिमो भंगो जहा अलेस्साणं।

अन्नाणीणं पढम-बितिया।

एवं मतिअन्नाणीणं, सुयअन्नाणीणं, विभंगनाणीण वि।

आहारसन्नोवउत्ताणं जाव परिग्गहसण्णोवउत्ताणं पढम-बितिया।

नोसण्णोवउत्ताणं चत्तारि।

सवेयगाणं पढम-बितिया। एवं इत्थिवेयग-पुरिसवेयग-नपुंसगवेदगाण वि।

अवेयगाणं चत्तारि।

सकसाईणं चत्तारि।

कोहकसायीणं पढम-बितिया।

एवं माणकसायिस्स वि, मायाकसायिस्स वि।

लोभकसायिस्स चत्तारि भंगा।

अकसायी णं भंते! जीवे पावं कम्मं किं बंधी० पुच्छा। गोयमा! अत्थेगतिए बंधी, न बंधति, बंधिस्सति। अत्थेगतिए बंधी, न बंधति, न बंधिस्सति।

सजोगिस्स चउभंगो।

एवं मणजोगिस्स वि, वइजोगिस्स वि, कायजोगिस्स वि।

अजोगिस्स चरिमो।

सागारोवउत्ते चत्तारि।

अणागारोवउत्ते वि चत्तारि भंगा।

[१७८]नेरतिए णं भंते! पावं कम्मं किं बंधी, बंधति, बंधिस्सति०? गोयमा! अत्थेगतिए बंधी० पढम-बितिया।

सलेस्से णं भंते! नेरतिए पावं कम्मं० एवं चेव।

एवं कण्हलेस्से वि, नीललेस्से वि, काउलेस्से वि।

एवं कण्हपक्खिए, सुक्कपक्खिए; सम्मद्धिट्ठी, मिच्छादिट्ठी, सम्मामिच्छादिट्ठी; नाणी, आभिणिबोहियनाणी, सुयनाणी, ओहिनाणी; अन्नाणी, मतिअन्नाणी, सुयअन्नाणी, विभंगनाणी; आहारसन्नोवउत्ते जाव परिग्गहसन्नोवउत्ते; सवेयए, नपुंसकवेयए; सकसायी जाव लोभकसायी; सजोगी, मणजोगी, वड्जोगी, कायजोगी; सागरोवउत्ते अणागारोवउत्ते। एएसु सव्वेसु पएसु पढम-बितिया भंगा भाणियव्वा।

एवं असुरकुमारस्स वि वत्तव्वया भाणियव्वा, नवरं तेउलेस्सा, इत्थिवेयग-पुरिसवेयगा य अब्भहिया, नपुंसगवेयगा न भण्णंति। सेसं तं चेव। सव्वत्थ पढम-बितिया भंगा।

एवं जाव थणियकुमारस्स।

एवं पुढविकाइयस्स वि, आउकाइयस्स वि जाव पंचिंदियतिरिक्खजोणियस्स वि, सव्वत्थ वि पढम-बितिया भंगा। नवरं जस्स जा लेस्सा, दिट्ठी, नाणं, अन्नाणं, वेदो, जोगो य, जं जस्स अत्थि तं तस्स भाणियव्वं। सेसं तहेव।

मणुसस्स जच्चेव जीवपए वत्तव्वया सच्चेव निरवसेसा भाणियव्वा।

वाणमंतरस्स जहा असुरकुमारस्स।

जोतिसिय-वेमाणियस्स एवं चेव, नवरं लेस्साओ जाणियव्वाओ, सेसं तहेव भाणियव्वं।

**[१७९]** जीवे णं भंते! नाणावरणिज्जं कम्मं किं बंधी, बंधति, बंधिस्सति? एवं जहेव पावस्स कम्मस्स वत्तव्वया भणिया तहेव नाणावरणिज्जस्स वि भाणियव्वा, नवरं जीवपए मणुस्सपए य सकसायिम्मि जाव लोभकसाइम्मि य पढम-बितिया भंगा। अवसेसं तं चेव जाव वेमाणिए।

एवं दरिसणावरणिज्जेण वि दंडगो भाणियव्वो निरवसेसं।

जीवे णं भंते! वेयणिज्जं कम्मं किं बंधी? पुच्छा। गोयमा! अत्थेगतिए बंधी, बंधति, बंधिस्सति; अत्थेगतिए बंधी, बंधति, न बंधिस्सति; अत्थेगतिए बंधी, न बंधति, न बंधिस्सति।

सलेस्से वि एवं चेव ततियविहूणा भंगा।

कण्हलेस्से जाव पम्हलेस्से पढम-बितिया भंगा।

सुक्कलेस्से ततियविहूणा भंगा।

अलेस्से चरिमो।

कण्हपक्खिए पढम-बितिया।

सुक्कपक्खिए ततियविहूणा।

एवं सम्मद्धिट्ठस्स वि।

मिच्छद्धिट्ठस्स सम्मामिच्छादिट्ठस्स य पढम-बितिया।

णाणिस्स ततियविहूणा।

आभिनिबोहियनाणी जाव मणपज्जवनाणी पढम-बितिया।

केवलनाणी ततियविहूणा।

एवं नोसन्नोवउत्ते, अवेदए, अकसायी, सागरोवउत्ते, अणागारोवउत्ते, एएसु ततियविहूणा।

अजोगिम्मि य चरिमो।

सेसेसु पढम-बितिया।

नेरइए णं भंते! वेयणिज्जं कम्मं किं बंधी, बंधइ०? एवं नेरइयाइया जाव वेमाणिय ति, जस्स जं अत्थि। सव्वत्थ वि पढम-बितिया, नवरं मणुस्से जहा जीवे।

जीवे णं भंते! मोहणिज्जं कम्मं किं बंधी, बंधति० ? जहेव पावं कम्मं तहेव मोहणिज्जं पि निरवसेसं जाव वेमाणिए।

**[१८०]** जीवे णं भंते! आउयं कम्मं किं बंधी बंधति० पुच्छा। गोयमा! अत्थेगतिए बंधी० चउभंगो।

सलेस्से जाव सुक्कलेस्से चत्तारि भंगा।

अलेस्से चरिमो।

कण्हपक्खिए णं० पुच्छा। गोयमा! अत्थेगतिए बंधी, बंधति, बंधिस्सति। अत्थेगतिए बंधी, न बंधति, बंधिस्सति।

सुक्कपक्खिए सम्मद्धिट्ठी मिच्छादिट्ठी चत्तारि भंगा।

सम्मामिच्छादिट्ठी० पुच्छा। गोयमा! अत्थेगतिए बंधी, न बंधति, बंधिस्सति; अत्थेगतिए बंधी, न बंधति, न बंधिस्सति।

नाणी जाव ओहिनाणी चत्तारि भंगा।

मणपज्जवनाणी० पुच्छा। गोयमा! अत्थेगतिए बंधी, बंधति, बंधिस्सति; अत्थेगतिए बंधी, न बंधति, बंधिस्सति; अत्थेगतिए बंधी, न बंधति, न बंधिस्सति।

केवलनाणे चरिमो भंगो।

एवं एएणं कमेणं नोसन्नोवउत्ते बितियविहूणा जहेव मणपज्जवनाणे।

अवेयए अकसाई य ततिय-चउत्था जहेव सम्मामिच्छते।

अजोगिम्मि चरिमो।

सेसेसु पएसु चत्तारि भंगा जाव अणागारोवउत्ते।

नेरतिए णं भंते! आउयं कम्मं किं बंधी० पुच्छा। गोयमा! अत्थेगतिए० चत्तारि भंगा। एवं सव्वत्थ वि नेरइयाणं चत्तारि भंगा, नवरं कण्हलेस्से कण्हपक्खिए य पढम-ततिया भंगा, सम्मामिच्छते ततिय-चउत्था।

असुरकुमारे एवं चेव, नवरं कण्हलेस्से वि चत्तारि भंगा भाणियव्वा। सेसं जहा नेरतियाणं।

एवं जाव थणियकुमाराणं।

पुढविकाइयाणं सव्वत्थ वि चत्तारि भंगा, नवरं कण्हपक्खिए पढमततिया भंगा।

तेउलेस्से० पुच्छा। गोयमा! बंधी, न बंधति, बंधिस्सति।

सेसेसु सव्वेसु चत्तारि भंगा।

एवं आउकाइय-वणस्सइकाइयाण वि निरवसेसं।

तेउकाइय-वाउकाइयाणं सव्वत्थ वि पढम-ततिया भंगा।

बेइंदिय-तेइंदिय-चउरिंदियाणं पि सव्वत्थ वि पढम-ततिया भंगा, नवरं सम्मत्ते नाणे आभिणिबोहियनाणे सुयनाणे ततियो भंगो।

पंचेंदियतिरिक्खजोणियाणं कण्हपक्खिए पढम-ततिया भंगा। सम्मामिच्छते ततिय-चउत्था

भंगा। सम्मते नाणे आभिणिबोहियनाणे सुयनाणे ओहिनाणे, एएसु पंचसु वि पएसु बितियविहूणा भंगा। सेसेसु चत्तारि भंगा।

मणुस्साणं जहा जीवाणं, नवरं सम्मते, ओहिए नाणे, आभिनिबोहियनाणे, सुयनाणे, ओहिनाणे, एएसु बितियविहूणा भंगा; सेसं तं चेव।

वाणमंतर-जोतिसिय-वेमाणिया जहा असुरकुमारा।

नामं गोयं अंतरायं च एयाणि जहा नाणावरणिज्जं। सेवं भंते! सेवं भंते! ति जाव विहरति।

**\*छव्वीसइमे सते पढमो उद्देशो समतो\***

**० बीओ उद्देशो ०**

[१८१]अणंतरोववन्नए णं भंते! नेरतिए पावं कम्मं किं बंधी० पुच्छा तहेव। गोयमा! अत्थेगतिए बंधी,० पढम-बितिया भंगा।

सलेस्से णं भंते! अणंतरोववन्नए नेरतिए पावं कम्मं किं बंधी० पुच्छा। गोयमा!

पढम-बितिया भंगा, नवरं कण्हपक्खिए ततिओ।

एवं सव्वत्थ पढम-बितिया भंगा, नवरं सम्मामिच्छतं मणजोगो वइजोगो य न पुच्छिज्जइ।

एवं जाव थणियकुमाराणं।

बेइंदिय-तेइंदिय-चउरिंदियाणं वइजोगो न भण्णति।

पंचेंदियतिरिक्खजोगियाणं पि सम्मामिच्छतं ओहिनाणं विभंगनाणं मणजोगो वइजोगो, एयाणि पंच ण भण्णंति।

मणुस्साणं अलेस्स- सम्मामिच्छत- मणपज्जवनाण-केवलनाण-विभंगनाण- नोसण्णोवउत्त- अवेयग-अकसायि-मणजोग-वइजोग-अजोगि, एयाणि एक्कारस पयाणि ण भण्णंति।

वाणमंतर-जोतिसिय-वेमाणियाणं जहा नेरतियाणं तहेव तिण्णि न भण्णंति। सव्वेसिं जाणि सेसाणि ठाणाणि सव्वत्थ पढम-बितिया भंगा।

एगिंदियाणं सव्वत्थ पढम-बितिया भंगा।

जहा पावे एवं नाणावरणिज्जेण वि दंडओ।

एवं आउयवज्जेसु जाव अंतराइए दंडओ।

अणंतरोववन्नए णं भंते! नेरतिए आउयं कम्मं किं बंधी० पुच्छा। गोयमा! बंधी, न बंधति, बंधिस्सति।

सलेस्से णं भंते! अणंतरोववन्नए नेरतिए आउयं कम्मं किं बंधी०? एवं चेव ततिओ भंगो।

एवं जाव अणागारोवउत्ते। सव्वत्थ वि ततिओ भंगो।

एवं मणुस्सवज्जं जाव वेमाणियाणं।

मणुस्साणं सव्वत्थ ततिय-चउत्था भंगा, नवरं कण्हपक्खिएसु ततिओ भंगो। सव्वेसिं नाणताइं ताइं चेव।

सेवं भंते! सेवं भंते! ति०।

**\*छव्वीसइमे सते बीइओ उद्देशो समतो\***

### ० तइओ उद्देशो ०

[१८२]परंपरोववन्नए णं भंते! नेरतिए पावं कम्मं किं बंधी० पुच्छा। गोयमा! अत्थेगतिए०, पढम-बितिया।

एवं जहेव पढमो उद्देशओ तहेव परंपरोववन्नएहि वि उद्देशओ भाणियव्वो नेरइयाइओ तहेव नवदंडगसंगहितो। अट्ठण्ह वि कम्मपगडीणं जा जस्स कम्मस्स वत्तव्वया सा तस्स अहीणमतिरित्ता नेयव्वा जाव वेमाणिया अणागारोवउत्ता।

सेवं भंते! सेवं भंते! ति०।

\*छव्वीसइमे सते तइओ उद्देशो समतो\*

### ० चउत्थो उद्देशो ०

[१८३]अणंतरोगाढए णं भंते! नेरतिए पावं कम्मं किं बंधी० पुच्छा। गोयमा! अत्थेगतिए०, एवं जहेव अणंतरोववन्नएहि नवदंडगसंगहितो उद्देशो भणितो तहेव अणंतरोगाढएहि वि अहीणमतिरित्तो भाणियव्वो नेरइयाईए जाव वेमाणिए।

सेवं भंते! सेवं भंते! ति०।

\*छव्वीसइमे सते चउत्थो उद्देशो समतो\*

### ० पंचमो उद्देशो ०

[१८४]परंपरोगाढए णं भंते! नेरतिए पावं कम्मं किं बंधी०? जहेव परंपरोववन्नएहि उद्देशो सो चेव निरवसेसो भाणियव्वो।

सेवं भंते! सेवं भंते! ति०।

\*छव्वीसइमे सते पंचमो उद्देशो समतो\*

### ० छट्ठो उद्देशओ ०

[१८५]अणंतराहारए णं भंते! नेरइए पावं कम्मं किं बंधी० पुच्छा। एवं जहेव अणंतरोववन्नएहि उद्देशो तहेव निरवसेसं।

सेवं भंते! सेवं भंते! ति०।

\*छव्वीसइमे सते छट्ठो उद्देशो समतो\*

### ० सत्तमो उद्देशो ०

[१८६]परंपराहारए णं भंते! नेरतिए पावं कम्मं किं बंधी० पुच्छा। गोयमा! एवं जहेव परंपरोववन्नएहि उद्देशो तहेव निरवसेसो भाणियव्वो।

सेवं भंते! सेवं भंते! ति०।

\*छव्वीसइमे सते सत्तमो उद्देशो समतो\*

### ० अट्ठमो उद्देशओ ०

[१८७]अणंतरपज्जत्तए णं भंते! नेरतिए पावं कम्मं किं बंधी० पुच्छा। गोयमा! एवं जहेव अणंतरोववन्नएहि उद्देशो तहेव निरवसेसं। सेवं भंते! सेवं भंते! ति०।

\*छव्वीसइमे सते अट्ठमो उद्देशो समतो\*

### ० नवमो उद्देशो ०

[१८८]परंपरपज्जत्तए णं भंते! नेरतिए पावं कम्मं किं बंधी० पुच्छा। गोयमा! एवं जहेव परंपरोववन्नएहिं उद्देशो तहेव निरवसेसो भाणियव्वो।

सेवं भंते! सेवं भंते! जाव विहरइ।

**\*छवीसइमे सते नवमो उद्देशो समतो\***

### ० दसमो उद्देशो ०

[१८९]चरिमे णं भंते! नेरतिए पावं कम्मं किं बंधी० पुच्छा। गोयमा! एवं जहेव परंपरोववन्नएहिं उद्देशो तहेव चरिमेहिं वि निरवसेसं।

सेवं भंते! सेवं भंते! जाव विहरति।

**\*छवीसइमे सते दसमो उद्देशो समतो\***

### ० एगारसमो उद्देशो ०

[१९०]अचरिमे णं भंते! नेरतिए पावं कम्मं किं बंधी० पुच्छा। गोयमा! अत्थेगइए०, एवं जहेव पढमुद्देसए तहेव पढम-बितिया भंगा भाणियव्वा सव्वत्थ जाव पंचेदियतिरिक्खजोणियाणं।

अचरिमे णं भंते! मणुस्से पावं कम्मं किं बंधी० पुच्छा। गोयमा! अत्थेगतिए बंधी, बंधति, बंधिस्सति; अत्थेगतिए बंधी, बंधति, न बंधिस्सति; अत्थेगतिए बंधी, न बंधति, बंधिस्सति।

सलेस्से णं भंते! अचरिमे मणुस्से पावं कम्मं किं बंधी०? एवं चेव तिन्नि भंगा चरिमविहूणा भाणियव्वा एवं जहेव पढमुद्देसए, नवरं जेसु तत्थ वीससु पदेसु चत्तारि भंगा तेसु इहं आदिल्ला तिन्नि भंगा भाणियव्वा चरिमभंगवज्जा; अलेस्से केवलनाणी य अजोगी य, एए तिन्नि वि न पुच्छिज्जंति। सेसं तहेव।

वाणमंतर-जोतिसिय-वेमाणिया जहा नेरतिए।

अचरिमे णं भंते! नेरइए नाणावरणिज्जं कम्मं किं बंधी० पुच्छा। गोयमा! एवं जहेव पावं, नवरं मणुस्सेसु सकसाईसु लोभकसायीसु य पढमबितिया भंगा, सेसा अट्ठारस चरिमविहूणा।

सेसं तहेव जाव वेमाणियाणं।

दरिसणावरणिज्जं पि एवं चेव निरवसेसं।

वेदणिज्जे सव्वत्थ वि पढम-बितिया भंगा जाव वेमाणियाणं, नवरं मणुस्सेसु अलेस्से केवली अजोगी य नत्थि।

अचरिमे णं भंते! नेरइए मोहणिज्जं कम्मं किं बंधी० पुच्छा। गोयमा! जहेव पावं तहेव निरवसेसं जाव वेमाणिए।

अचरिमे णं भंते! नेरतिए आउयं कम्मं किं बंधी० पुच्छा। गोयमा! पढम-ततिया भंगा।

एवं सव्वपएसु वि नेरइयाणं पढम-ततिया भंगा, नवरं सम्मामिच्छते तइयो भंगो।

एवं जाव थणियकुमाराणं।

पुढविकाइय-आउकाइय-वणस्सइकाइयाणं तेउलेसाए ततियो भंगो। सेसपएसु सव्वत्थ पढम-ततिया भंगा।

तेउकाइय-वाउकाइयाणं सव्वत्थ पढम-ततिया भंगा।

बेइंदिय-तेइंदिय-चतुरिंदियाणं एवं चेव, नवरं सम्मत्ते ओहिनाणे आभिणिबोहियनाणे सुयनाणे, एणसु चउसु वि ठाणेषु ततियो भंगो।

पंचेंदियतिरिक्खजोणियाणं सम्मामिच्छते ततियो भंगो। सेसपएसु सव्वत्थ पढम-ततिया भंगा।

मणुस्साणं सम्मामिच्छते अवेयए अकसायिम्मि य ततियो भंगो, अलेस्स केवलनाण अजोगी य न पुच्छिज्जंति, सेसपएसु सव्वत्थ पढम-ततिया भंगा।

वाणमंतर-जोतिसिय-वेमाणिया जहा नेरतिया।

नामं गोयं अंतराइयं च जहेव नाणावरणिज्जं तहेव निरवसेसं।

सेवं भंते! सेवं भंते! जाव विहरति

॥ २६.११ उद्देशो ॥

०-छवीसइमं सयं समतं-०

० मुनि दीपरत्तसागरेण संशोधितः सम्पादितश्च छवीवीसतिमं सतं समतं ०

[ ] सतवीसइमं सयं [ ]

० उद्देशगाः १-११ ०

[१९१] जीवे णं भंते! पावं कम्मं किं करिंसु, करेति, करिस्सति; करिंसु, करेति, न करेस्सति; करिंसु, न करेइ, करिस्सति; करिंसु, न करेइ, न करेस्सइ? गोयमा! अत्थेगतिए करिंसु, करेति, करिस्सति; अत्थेगतिए करिंसु, करेति, न करिस्सति; अत्थेगतिए करिंसु, न करेति, करेस्सति; अत्थेगतिए करिंसु, न करेति, न करेस्सति।

सलेस्से णं भंते! जीवे पावं कम्मं०? एवं एणं अभिलावेणं जच्चेव बंधिसते वत्तव्वया सच्चेव निरवसेसा भाणियव्वा, तह चेव नवदंडगसंगहिया एक्कारस उद्देशगा भाणितव्वा।

\*सतवीसइमे सते १-११ उद्देशा समतो\*

०-सतवीसइमं सयं समतं-०

० मुनि दीपरत्तसागरेण संशोधितः सम्पादितश्च सतवीसतिमं सतं समतं ०

[ ] अट्ठावीसइमं सयं [ ]

० पढमो उद्देशो ०

[१९२] जीवा णं भंते! पावं कम्मं कहिं समज्जिणिंसु?, कहिं समायरिंसु? गोयमा! सव्वे वि ताव तिरिक्खजोणिएसु होज्जा, अहवा तिरिक्खजोणिएसु य नेरइएसु य होज्जा, अहवा तिरिक्खजोणिएसु य मणुस्सेसु य होज्जा, अहवा तिरिक्खजोणिएसु य देवेसु य होज्जा, अहवा तिरिक्खजोणिएसु य नेरइएसु य मणुस्सेसु य होज्जा, अहवा तिरिक्खजोणिएसु य नेरइएसु य देवेसु य होज्जा, अहवा तिरिक्खजोणिएसु य मणुस्सेसु य देवेसु य होज्जा, अहवा तिरिक्खजोणिएसु य नेरइएसु य मणुस्सेसु य देवेसु य होज्जा ।

सलेस्सा णं भंते! जीवा पावं कम्मं कहिं समज्जिणिंसु?, कहिं समायरिंसु? एवं चेव।

एवं कण्हलेस्सा जाव अलेस्सा।  
कण्हपक्खिया, सुक्कपक्खिया एवं जाव अणागारोवउत्ता।  
नेरतिया णं भंते! पावं कम्मं कहिं समज्जिणिंसु?, कहिं समायरिंसु? गोयमा! सव्वे वि ताव  
तिरिक्खजोणिएसु होज्जा, एवं चेव अट्ठ भंगा भाणियच्चा।  
एवं सव्वत्थ अट्ठ भंगा जाव अणागारोवउत्ता।  
एवं जाव वेमाणियाणं।  
एवं नाणावरणिज्जेण वि दंडओ।  
एवं जाव अंतराइएणं।  
एवं एते जीवाईया वेमाणियपज्जवसाणा नव दंडगा भवंति।  
सेवं भंते! सेवं भंते! ति जाव विहरइ।

**\*अट्ठावीसइमे सते पढमो उद्देशो समत्तो\***

**० बीओ उद्देशो ०**

[९९३]अणंतरोववन्नगा णं भंते! नेरइया पावं कम्मं कहिं समज्जिणिंसु?, कहिं समायरिंसु?  
गोयमा! सव्वे वि ताव तिरिक्खजोणिएसु होज्जा। एवं एत्थ वि अट्ठ भंगा।  
एवं अणंतरोववन्नगाणं नेरइयाईणं जस्स जं अत्थि लेस्साईयं अणागारोवयोगपज्जवसाणं तं  
सव्वं एयाए भयणाए भाणियच्चं जाव वेमाणियाणं। नवरं अणंतरेसु जे परिहरियच्चा ते जहा बंधिसते तहा  
इहं पि।

एवं नाणावरणिज्जेण वि दंडओ।  
एवं जाव अंतराइएणं निरवसेसं। एस वि नवदंडगसंगहिओ उद्देशओ भाणियच्चो।  
सेवं भंते! सेवं भंते! ति०।

**\*अट्ठावीसइमे सते बीइओ उद्देशो समत्तो\***

**० उद्देशगा : ३-११ ०**

[९९४]एवं एएणं कमेणं जहेव बंधिसते उद्देशगाणं परिवाडी तहेव इहं पि अट्ठसु भंगेसु  
नेयच्चा। नवरं जाणियच्चं जं जस्स अत्थि तं तस्स भाणियच्चं जाव अचरिमुद्देशो। सव्वे वि एए एक्कारस  
उद्देशगा।

सेवं भंते! सेवं भंते! ति जाव विहरइ।

**\*अट्ठावीसइमे सते ३-११ उद्देशगा समत्तो\***

**०-अट्ठावीसइमं सयं समत्तं-०**

**० मुनि दीपरत्तसागरेण संशोधितः सम्पादितश्च अट्ठावीसतिमं सतं समत्तं ०**

**[ ] एगूणतीसइमं सयं [ ]**

**० पढमो उद्देशो ०**

[९९५]जीवा णं भंते! पावं कम्मं किं समायं पट्ठविंसु, समायं निट्ठविंसु; समायं पट्ठविंसु,

विसमायं निट्ठविंसु; विसमायं पट्ठविंसु, समायं निट्ठविंसु; विसमायं पट्ठविंसु, विसमायं? गोयमा!  
अत्थेगइया समायं पट्ठविंसु, समायं निट्ठविंसु; जाव अत्थेगतिया विसमायं पट्ठविंसु, विसमायं निट्ठविंसु।

से केणट्ठेणं भंते! एवं वुच्चइ-अत्थेगइया समायं०, तं चेव। गोयमा! जीवा चउच्चिहा  
पन्नता, तं जहा-अत्थेगइया समाउया समोववन्नगा, अत्थेगइया समाउया विसमोववन्नगा, अत्थेगइया  
विसमाउया समोववन्नगा, अत्थेगइया विसमाउया विसमोववन्नगा। तत्थ णं जे ते समाउया समोववन्नगा  
ते णं पावं कम्मं समायं पट्ठविंसु, समायं निट्ठविंसु। तत्थ णं जे ते समाउया समोववन्नगा ते णं पावं  
कम्मं समायं पट्ठविंसु, समायं निट्ठविंसु। तत्थ णं जे ते विसमाउया समोववन्नगा ते णं पावं कम्मं  
विसमायं पट्ठविंसु, समायं निट्ठविंसु। तत्थ णं जे ते विसमाउया विसमोववन्नगा ते णं पावं कम्मं  
विसमायं पट्ठविंसु, विसमायं निट्ठविंसु। सेतेणट्ठेणं गोयमा!०, तं चेव।

सलेस्सा णं भंते! जीवा पावं कम्मं०? एवं चेव।

एवं सव्वट्ठानेषु वि जाव अणागारोवउत्ता, एते सव्वे वि पया एयाए वत्तव्वयाए भाणितव्वा।  
नेरइया णं भंते पावं कम्मं किं समायं पट्ठविंसु, समायं निट्ठविंसु० पुच्छा। गोयमा अत्थे-  
गइया समायं पट्ठविंसु०, एवं जहेव जीवाणं तहेव भाणितव्वं जाव अणागारोवउत्ता।

एवं जाव वेमाणियाणं। जस्स जं अत्थि तं एएणं चेव कमेणं भाणियव्वं।

जहा पावेण दंडओ, एएणं कमेणं अट्ठसु वि कम्मप्पगडीसु अट्ठ दंडगा भाणियव्वा  
जीवाईया वेमाणियपज्जवसाणा। एसो नवदंडगसंगहिओ पढमो उद्देसओ भाणियव्वो।

सेवं भंते! सेवं भंते! ति०।

**\*एगुणतीसइमे सते पढमो उद्देसो समतो\***

**० बीओ उद्देसो ०**

[१९६]अणंतरोववन्नगा णं भंते! नेरतिया पावं कम्मं किं समायं पट्ठविंसु, समायं  
निट्ठविंसु० पुच्छा। गोयमा! अत्थेगइया समायं पट्ठविंसु, समायं निट्ठविंसु; अत्थेगइया समायं पट्ठविंसु,  
विसमायं निट्ठविंसु।

से केणट्ठेणं भंते! एवं वुच्चइ-अत्थेगइया समायं पट्ठविंसु० तं चेव। गोयमा! अणंतरो-  
ववन्नगा नेरतिया दुविहा पन्नता, तं जहा--अत्थेगइया समाउया समोववन्नगा, अत्थेगइया समाउया  
विसमोववन्नगा। तत्थ णं जे ते समाउया समोववन्नगा ते णं पावं कम्मं समायं पट्ठविंसु, समायं  
निट्ठविंसु। तत्थ णं जे ते समाउया विसमोववन्नगा ते णं पावं कम्मं समायं पट्ठविंसु, विसमायं  
निट्ठविंसु। सेतेणट्ठेणं० तं चेव।

सलेस्सा णं भंते! अणंतरोववन्नगा नेरतिया पावं०? एवं चेव।

एवं जाव अणागारोवयुत्ता।

एवं असुरकुमारा वि।

एवं जाव वेमाणिया। नवरं जं जस्स अत्थि तं तस्स भाणितव्वं।

एवं नाणावरणिज्जेण वि दंडओ।

एवं निरवसेसं जाव अंतराइएणं।

सेवं भंते! सेवं भंते! ति जाव विहरइ।

**\*एगूणतीसइमे सते बीइओ उद्देशो समतो\***

**० उद्देशगा/ ३ -११ ०**

[१९७]एवं एतेणं गमएणं जच्चेव बंधिसए उद्देशगपरिवाडी सच्चेव इह वि भाणियत्वा जाव अचरिमो ति। अणंतरउद्देशगाणं चउण्ह वि एक्का वत्तव्वया। सेसाणं सत्तण्हं एक्का।

**\*एगूणतीसइमे सते ३-११ उद्देशगा समता\***

**०-एगूणतीसइमं सयं समतं-०**

**० मुनि दीपरत्तसागरेण संशोधितः सम्पादितश्च एगूणतीसइमं सतं समतं ०**

**[ ] तीसइमं सयं [ ]**

**० पढमो उद्देशओ ०**

[१९८]कति णं भंते! समोसरणा पन्नता? गोयमा! चत्तारि समोसरणा पन्नता, तं जहा-- किरियावादी अकिरियावादी अन्नाणियवादी वेणइयवादी।

जीवा णं भंते! किं किरियावादी, अकिरियावादी, अन्नाणियवादी, वेणइयवादी? गोयमा! जीवा किरियावादी वि, अकिरियावादी वि, अन्नाणियवादी वि, वेणइयवादी वि।

सलेस्सा णं भंते! जीवा किं किरियावादी० पुच्छा। गोयमा! किरियावादी वि जाव वेणइयवादी वि।

एवं जाव सुक्कलेस्सा।

अलेस्सा णं भंते! जीवा० पुच्छा। गोयमा! किरियावादी, नो अकिरियावादी, नो अन्नाणियवादी, नो वेणइयवादी।

कण्हपक्खिया णं भंते! जीवा किं किरियावादी० पुच्छा। गोयमा! नो किरियावादी, अकिरियावादी वि, अन्नाणियवादी वि, वेणइयवादी वि।

सुक्कपक्खिया जहा सलेस्सा।

सम्मद्धिट्ठी जहा अलेस्सा।

मिच्छादिट्ठी जहा कण्हपक्खिया।

सम्मामिच्छद्धिट्ठी णं० पुच्छा। गोयमा! नो किरियावादी, नो अकिरियावादी, अन्नाणियवादी वि, वेणइयवादी वि।

णाणी जाव केवलनाणी जहा अलेस्सा।

अण्णाणी जाव विभंगनाणी जहा कण्हपक्खिया।

आहारसन्नोवउत्ता जाव परिग्गहसण्णोवउत्ता जहा सलेस्सा।

नोसण्णोवउत्ता जहा अलेस्सा।

सवेयगा जाव नपुंसगवेयगा जहा सलेस्सा।

अवेयगा जहा अलेस्सा।

सकसायी जाव लोभकसायी जहा सलेस्सा।

अकसायी जहा अलेस्सा।

सजोगी जाव काययोगी जहा सलेस्सा।

अजोगी जहा अलेस्सा।

सागारोवउत्ता अणागारोवउत्ता य जहा सलेस्सा।

नेरइया णं भंते! किं किरियावादी० पुच्छा। गोयमा! किरियावादी वि जाव वेणइयवादी वि।

सलेस्सा णं भंते! नेरइया किं किरियावादी०? एवं चेव।

एवं जाव काउलेस्सा।

कण्हपक्खिया किरियाविवज्जिया।

एवं एएणं कमेणं जहेव जच्चेव जीवाणं वत्तव्वया सच्चेव नेरइयाण वि जाव अणागारोवउत्ता, नवरं जं अत्थि तं भाणियव्वं, सेसं न भण्णति।

जहा नेरतिया एवं जाव थणियकुमारा।

पुढविकाइया णं भंते! किं किरियावादी० पुच्छा। गोयमा! नो किरियावादी, अकिरियावादी वि, अन्नाणियवादी वि, नो वेणइयवादी। एवं पुढविकाइयाणं जं अत्थि तत्थ सव्वत्थ वि एयाइं दो मज्झिल्लाइं समोसरणाइं जाव अणागारोवउत्त ति।

एवं जाव चउरिंदियाणं, सव्वट्ठाणेसु एयाइं चेव मज्झिल्लागाइं दो समोसरणाइं। सम्मत-  
नाणेहि वि एयाणि चेव मज्झिल्लागाइं दो समोसरणाइं।

पंचेदियतिरिक्खजोणिया जहा जीवा, नवरं जं अत्थि तं भाणियव्वं।

मणुस्सा जहा जीवा तहेव निरवसेसं।

वाणमंतर-जोतिसिय-वेमाणिया जहा असुरकुमारा।

किरियावादी णं भंते! जीवा किं नेरतियाउयं पकरेंति, तिरिक्खजोणियाउयं पकरेंति, मणुस्साउयं पकरेंति, देवाउयं पकरेंति? गोयमा! नो नेरतियाउयं पकरेंति, नो तिरिक्खजोणियाउयं पकरेंति, मणुस्साउयं पि पकरेंति, देवाउयं पि पकरेंति।

जति देवाउयं पकरेंति किं भवणवासिदेवाउयं पकरेंति, जाव वेमाणियदेवाउयं

पकरेंति? गोयमा! नो भवणवासिदेवाउयं पकरेंति, नो वाणमंतरदेवाउयं पकरेंति, नो जोतिसियदेवाउयं पकरेंति, वेमाणियदेवाउयं पकरेंति।

अकरियावाइं णं भंते! जीवा किं नेरतियाउयं पकरेंति, तिरिक्खजोणियाउयं० पुच्छा। गोयमा! नेरइयाउयं पि पकरेंति, जाव देवाउयं पि पकरेंति।

एवं अन्नाणियवादी वि, वेणइयवादी वि।

सलेस्सा णं भंते! जीवा किरियावादी किं नेरतियाउयं पकरेंति० पुच्छा। गोयमा! नो नेरइयाउयं०, एवं जहेव जीवा तहेव सलेस्सा वि चउहि वि समोसरणेहिं भाणियव्वा।

कण्हलेस्सा णं भंते! जीवा किरियावादी किं नेरइयाउयं पकरेंति० पुच्छा। गोयमा! नो नेरइयाउयं पकरेंति, नो तिरिक्खजोणियाउयं पकरेंति, मणुस्साउयं पकरेंति, नो देवाउयं पकरेंति।

अकिरिया-अन्नाणिय-वेणइयवादी चत्तारि वि आउयाइं पकरेंति।

एवं नीललेस्सा काउलेस्सा वि।

तेउलेस्सा णं भंते! जीवा किरियावादी किं नेरइयाउयं पकरेंति० पुच्छा। गोयमा! नो नेरतियाउयं पकरेंति, नो तिरिक्खजोणि०, मणुस्साउयं पि पकरेंति, देवाउयं पि पकरेंति।

जइ देवाउयं पकरेंति०, तहेव।

तेउलेस्सा णं भंते! जीवा अकिरियावादी किं नेरइयाउयं० पुच्छा। गोयमा! नो नेरतियाउयं पकरेंति, तिरिक्खजोणियाउयं पि पकरेंति, मणुस्साउयं पि पकरेंति, देवाउयं पि पकरेंति।

एवं अन्नाणियवादी वि, वेणइयवादी वि।

जहा तेउलेस्सा एवं पम्हलेस्सा वि, सुक्कलेस्सा वि नेयव्वा।

अलेस्सा णं भंते! जीवा किरियावादी किं नेरतियाउयं० पुच्छा। गोयमा! नो नेरतियाउयं पकरेंति, नो तिरि०, नो मणु०, नो देवाउयं पकरेंति।

कण्हपक्खिया णं भंते! जीवा अकिरियावादी किं नेरतियाउयं० पुच्छा। गोयमा! नेरइयाउयं पि पकरेंति, एवं चउच्चिहं पि।

एवं अण्णाणियवादी वि, वेणइयवादी वि।

सुक्कपक्खिया जहा सलेस्सा।

सम्मद्धिट्ठी णं भंते! जीवा किरियावादी किं नेरइयाउयं० पुच्छा। गोयमा! नो नेरइयाउयं पकरेंति, नो तिरिक्खजोणियाउयं, मणुस्साउयं पि पकरेंति, देवाउयं पि पकरेंति।

मिच्छद्धिट्ठी जहा कण्हपक्खिया।

सम्मामिच्छद्धिट्ठी णं भंते! जीवा अन्नाणियवादी किं नेरइयाउयं०? जहा अलेस्सा।

एवं वेणइयवादी वि।

णाणी, आभिणिबोहियणाणी य सुयणाणी य ओहिणाणी य जहा सम्मद्धिट्ठी।

मणपज्जवनाणी णं भंते!० पुच्छा। गोयमा! नो नेरतियाउयं पकरेंति, नो तिरिक्ख०, नो मणुस्स०, देवाउयं पकरेंति।

जदि देवाउयं पकरेंति किं भवणवासि० पुच्छा। गोयमा! नो भवणवासिदेवाउयं पकरेंति, नो वाणमंतर०, नो जोतिसिय०, वेमाणियदेवाउयं०।

केवलनाणी जहा अलेस्सा।

अन्नाणी जाव विभंगनाणी जहा कण्हपक्खिया।

सन्नासु चउसु वि जहा सलेस्सा।

नोसन्नोवउत्ता जहा मणपज्जवनाणी।

सवेयगा जाव नपुंसगवेयगा जहा सलेस्सा।

अवेयगा जहा अलेस्सा।

सकसायी जाव लोभकसायी जहा सलेस्सा।

अकसायी जहा अलेस्सा।

सजोगी जाव कायजोगी जहा सलेस्सा।

अजोगी जहा अलेस्सा।

सागारोवउत्ता य अणागारोवउत्ता य जहा सलेस्सा।

[१९९]किरियावाई णं भंते! नेरइया किं नेरइयाउयं० पुच्छा। गोयमा! नो नेरइयाउयं०, नो तिरिक्ख०, मणुस्साउयं पकरेंति, नो देवाउयं पकरेंति।

अकिरियावाई णं भंते! नेरइया० पुच्छा। गोयमा! नो नेरतियाउयं, तिरिक्खजोगियाउयं पि पकरेंति, मणुस्साउयं पि पकरेंति, नो देवाउयं पकरेंति।

एवं अन्नाणियवादी वि, वेणइयवादी वि।

सलेस्सा णं भंते! नेरतिया किरियावादी किं नेरइयाउयं०? एवं सव्वे वि नेरइया जे किरियावादी ते मणुस्साउयं एगं पकरेंति, जे अकिरियावादी वेणइयवादी ते सव्वट्ठाणेसु वि नो नेरइयाउयं पकरेंति, तिरिक्खजोगियाउयं पि पकरेंति, मणुस्साउयं पि पकरेंति, नो देवाउयं पकरेंति; नवरं सम्मामिच्छते उवरिल्लेहिं दोहि वि समोसरणेहिं न किंचि वि पकरेंति जहेव जीवपदे।

एवं जाव थणियकुमारा जहेव नेरतिया।

अकिरियावाई णं भंते! पुढविकाइया० पुच्छा। गोयमा! नो नेरइयाउयं पकरेंति, तिरिक्खजोगियाउयं०, मणुस्साउयं०, नो देवाउयं पकरेंति।

एवं अन्नाणियवादी वि।

सलेस्सा णं भंते!०, एवं जं जं पयं अत्थि पुढविकाइयाणं तहिं तहिं मज्झिमेसु दोसु समोसरणेसु एवं चेव दुविहं आउयं पकरेंति, नवरं तेउलेस्साए न किं पि पकरेंति।

एवं आउक्काइयाण वि, वणस्सतिकाइयाण वि।

तेउकाइया०, वाउकाइया०, सव्वट्ठाणेसु मज्झिमेसु दोसु समोसरणेसु नो नेरइयाउयं पक०, तिरिक्खजोगियाउयं पकरेंति, नो मणुयाउयं पकरेंति, नो देवाउयं पकरेंति।

बेइंदिय-तेइंदिय-चउरिंदियाणं जहा पुढविकाइयाणं, नवरं सम्मतनाणेसु न एक्कं पि आउयं पकरेंति।

किरियावाई णं भंते! पंचेंदियतिरिक्खजोगिया किं नेरइयाउयं पकरेंति० पुच्छा। गोयमा! जहा मणपज्जवनाणी।

अकिरियावादी अन्नाणियवादी वेणइयवादी य चउत्विहं पि पकरेंति।

जहा ओहिया तहा सलेस्सा वि।

कणहलेस्सा णं भंते! किरियावादी पंचेंदियतिरिक्खजोगिया किं नेरइयाउयं० पुच्छा। गोयमा! नो नेरतियाउयं पकरेंति, नो तिरिक्खजोगियाउयं०, नो मणुस्साउयं०, नो देवाउयं पकरेंति।

अकिरियावाई अन्नाणियवाई वेणइयवाई चउत्विहं पि पकरेंति।

जहा कणहलेस्सा एवं नीललेस्सा वि, काउलेस्सा वि।

तेउलेस्सा जहा सलेस्सा, नवरं अकिरियावादी अन्नाणियवादी वेणइयवादी य नो नेरइयाउयं पकरेंति, तिरिक्खजोगियाउयं पि पकरेंति, मणुस्साउयं पि पकरेंति, देवाउयं पि पकरेंति।

एवं पम्हलेस्सा वि, एवं सुक्कलेस्सा वि भाणियव्वा।

कणहपक्खिया तिहिं समोसरणेहिं चउत्विहं पि आउयं पकरेंति।

सुक्कपक्खिया जहा सलेस्सा।

सम्मद्विट्ठी जहा मणपज्जवनाणी तहेव वेमाणियाउयं पकरेंति।

मिच्छद्दिट्ठी जहा कण्हपक्खिया।

सम्मामिच्छद्दिट्ठी ण एक्कं पि पकरेंति जहेव नेरतिया।

नाणी जाव ओहिनाणी जहा सम्मद्दिट्ठी।

अन्नाणी जाव विभंगनाणी जहा कण्हपक्खिया।

सेसा जाव अणागारोवउत्ता सव्वे जहा सलेस्सा तहेव भाणियव्वा।

जहा पंचेंदियतिरिक्खजोणियाणं वत्तव्वया भणिया एवं मणुस्साण वि भाणियव्वा, नवरं मणपज्जवनाणी नोसन्नोवउत्ता य जहा सम्मद्दिट्ठी तिरिक्खजोणिया तहेव भाणियव्वा।

अलेस्सा, केवलनाणी, अवेदका, अकसायी, अजोगी य, एए न एगं पि आउयं पकरेंति जहा ओहिया जीवा, सेसं तहेव।

वाणमंतर-जोतिसिय-वेमाणिया जहा असुरकुमारा।

किरियावादी णं भंते! जीवा किं भवसिद्धीया, अभवसिद्धीया? गोयमा! भवसिद्धीया नो, अभवसिद्धीया।

अकिरियावादी णं भंते! जीवा किं भवसिद्धीया० पुच्छा। गोयमा! भवसिद्धीया वि, अभवसिद्धीया वि।

एवं अन्नाणियवादी वि, वेणइयवादी वि।

सलेस्सा णं भंते! जीवा किरियावादी किं भव० पुच्छा। गोयमा! भवसिद्धीया, नो

अभवसिद्धीया।

सलेस्सा णं भंते! जीवा अकिरियावादी किं भव० पुच्छा। गोयमा! भवसिद्धीया वि, अभवसिद्धीया वि।

एवं अन्नाणियवादी वि, वेणइयवादी वि, जहा सलेस्सा।

एवं जाव सुक्कलेस्सा।

अलेस्सा णं भंते! जीवा किरियावादी किं भव० पुच्छा। गोयमा! भवसिद्धीया, नो अभवसिद्धीया।

एवं एएणं अभिलावेणं कण्हपक्खिया तिसु वि समोसरणेसु भयणाए।

सुक्कपक्खिया चतुसु वि समोसरणेसु भवसिद्धीया, नो अभवसिद्धीया।

सम्मदिट्ठी जहा अलेस्सा।

मिच्छद्दिट्ठी जहा कण्हपक्खिया।

सम्मामिच्छद्दिट्ठी दोसु वि समोसरणेसु जहा अलेस्सा।

नाणी जाव केवलनाणी भवसिद्धीया, नो अभवसिद्धीया।

अन्नाणी जाव विभंगनाणी जहा कण्हपक्खिया।

सण्णासु चउसु वि जहा सलेस्सा।

नोसण्णोवउत्ता जहा सम्मद्दिट्ठी।

सवेयगा जाव नपुंसगवेयगा जहा सलेस्सा।

अवेयगा जहा सम्मद्दिट्ठी।

सकसायी जाव लोभकसायी जहा सलेस्सा।  
अकसायी जहा सम्मद्धिट्ठी।  
सजोगी जाव कायजोगी जहा सलेस्सा।  
अजोगी जहा सम्मद्धिट्ठी।  
सागारोवउत्ता अणागारोवउत्ता जहा सलेस्सा।  
एवं नेरतिया वि भाणियच्वा, नवरं नायच्चं जं अत्थि।  
एवं असुरकुमारा वि जाव थणियकुमारा।  
पुढविकाइया सच्चवट्ठाणेषु वि मज्झिल्लेषु दोसु वि समोसरणेषु भवसिद्धीया वि,  
अभवसिद्धीया वि।  
एवं जाव वणस्सतिकाइय ति।  
बेइंदिय-तेइंदिय-चतुरिंदिया एवं चेव, नवरं सम्मत्ते, ओहिए नाणे, आभिणिबोहियनाणे,  
सुयनाणे, एएसु चेव दोसु मज्झिमेसु समोसरणेषु भवसिद्धीया, नो अभवसिद्धीया, सेसं तं चेव।  
पंचेंदियतिरिक्खजोणिया जहा नेरइया, नवरं जं अत्थि।  
मणुस्सा जहा ओहिया जीवा।  
वाणमंतर-जोतिसिय-वेमाणिया जहा असुरकुमारा।  
सेवं भंते! सेवं भंते! ति०।

**\*तीसइमे सते पढमो उद्देशो समत्तो\***

## ० बीओ उद्देशो ०

[१०००] अणंतरोववन्नगा णं भंते! नेरइया किं किरियावादी० पुच्छा। गोयमा! किरियावाई  
वि जाव वेणइयवाई वि।  
सलेस्सा णं भंते! अणंतरोववन्नगा नेरतिया किं किरियावादी०? एवं चेव।  
एवं जहेव पढमुद्देशे नेरइयाणं वत्तच्चया तहेव इह वि भाणियच्वा, नवरं जं जस्स अत्थि  
अणंतरोववन्नगाणं नेरइयाणं तं तस्स भाणियच्चं।  
एवं सच्चवजीवाणं जाव वेमाणियाणं, नवरं अणंतरोववन्नगाणं जहिं जं अत्थि तहिं तं  
भाणियच्चं।  
किरियावाई णं भंते! अणंतरोववन्नगा नेरइया किं नेरइयाउयं पकरेंति० पुच्छा। गोयमा! नो  
नेरतियाउयं पकरेंति, नो तिरि०, नो मणु०, नो देवाउयं पकरेंति।  
एवं अकिरियावाई वि, अन्नाणियवाई वि, वेणइयवाई वि।  
सलेस्सा णं भंते! किरियावाई अणंतरोववन्नगा नेरइया किं नेरइयाउयं० पुच्छा। गोयमा! नो  
नेरइयाउयं पकरेंति, जाव नो देवाउयं पकरेंति।  
एवं जाव वेमाणिया।  
एवं सच्चवट्ठाणेषु वि अणंतरोववन्नगा नेरइया न किंचि वि आउयं पकरेंति जाव  
अणागारोवउत्त ति।

एवं जाव वेमाणिया, नवरं जं जस्स अत्थि तं तस्स भाणियत्वं।  
किरियावाई णं भंते। अणंतरोववन्नगा नेरइया किं भवसिद्धीया अभवसिद्धीया?  
गोयमा! भवसिद्धीया, नो अभवसिद्धीया।  
अकिरियावाई णं० पुच्छा। गोयमा! भवसिद्धीया वि, अभवसिद्धीया वि।  
एवं अन्नाणियवाई वि, वेणइयवाई वि।

सलेस्सा णं भंते! किरियावाई अणंतरोववन्नगा नेरइया किं भवसिद्धीया, अभवसिद्धीया?  
गोयमा! भवसिद्धीया, नो अभवसिद्धीया।

एवं एएणं अभिलावेणं जहेव ओहिए उद्देसए नेरइयाणं वत्तव्वया भणिया तहेव इह वि  
भाणियत्वा जाव अणागारोवउत्त ति।

एवं जाव वेमाणियाणं, नवरं जं जस्स अत्थि तं तस्स भाणितत्वं। इमं से लक्खणं-जे  
किरियावादी सुक्कपक्खिया सम्मामिच्छद्दिट्ठी य एए सत्त्वे भवसिद्धीया, नो अभवसिद्धीया। सेसा सत्त्वे  
भवसिद्धीया वि, अभवसिद्धीया वि।

सेवं भंते! सेवं भंते! ति०।

**\*तीसइमे सते बीइओ उद्देसो समतो\***

**० तइओ उद्देसओ ०**

[१००१] परंपरोववन्नगा णं भंते! नेरइया किरियावादी०? एवं जहेव ओहिओ उद्देसओ तहेव  
परंपरोववन्नएसु वि नेरइयाईओ, तहेव निरवसेसं भाणियत्वं, तहेव तियदंडगसंगहिओ।  
सेवं भंते! सेवं भंते! जाव विहरइ।

**\*तीसइमे सते तइओ उद्देसो समतो\***

**० उद्देसगा : ४ - ११ ०**

[१००२] एवं एएणं कमेणं जच्चेव बंधिसए उद्देसगाणं परिवाडी सच्चेव इहं पि जाव अचरिमो  
उद्देसो, नवरं अणंतरा चत्तारि वि एककगमगा। परंपरा चत्तारि वि एककगमएणं। एवं चरिमा वि, अचरिमा वि  
एवं चेव, नवरं अलेस्सो केवली अजोगी य न भण्णति। सेसं तहेव।

सेवं भंते! सेवं भंते! एते एक्कारस उद्देसगा।

**\*तीसइमे सते ४-११ उद्देसगा समता\***

**०-तीसइमं सयं समतं-०**

**० मुनि दीपरत्तसागरेण संशोधितः सम्पादितश्च तीसइमं सतं समतं ०**

**[ ] एगतीसइमं सयं [ ]**

**० पढमो उद्देसो ०**

[१००३] रायगिहे जाव एवं वयासी-

कति णं भंते! खुइडा जुम्मा पन्नत्ता? गोयमा! चत्तारि खुइडा जुम्मा पन्नत्ता, तं जहा--  
कडजुम्मे, तेयोए,, दावरजुम्मे, कलियोए।

से केणट्ठेणं भंते! एवं वुच्चइ-चत्तारि खुड्डा जुम्मा पन्नता, तं जहा कडजुम्मे जाव कलियोगे? गोयमा! जे णं रासी चउक्कएणं अवहारेणं अवहीरमाणे चउपज्जवसिए से तं खुड्डागकडजुम्मे। जे णं रासी चउक्कएणं अवहारेणं अवहीरमाणे तिपज्जवसिए से तं खुड्डागतेयोगे। जे णं रासी चउक्कएणं अवहारेणं अवहीरमाणे दुपज्जवसिए से तं खुड्डागदावरजुम्मे। जे णं रासी चउक्कएणं अवहीरमाणे एगपज्जवसिए से तं खुड्डागकलियोगे। सितेणट्ठेणं जाव कलियोगे।

खुड्डागकडजुम्मेनेरइया णं भंते! कओ उववज्जंति? किं नेरइएहिंतो उववज्जंति, तिरिक्ख0 पुच्छा। गोयमा! नो नेरइएहिंतो उववज्जंति, एवं नेरतियाणं उववातो जहा वक्कंतीए तहा भाणितव्वो।

ते णं भंते! जीवा एगसमएणं केवतिया उववज्जंति? गोयमा! चत्तारि वा, अट्ठ वा, बारस वा, सोलस वा, संखेज्जा वा, असंखेज्जा वा उववज्जंति।

ते णं भंते! जीवा कंहं उववज्जंति? गोयमा! से जहानामए पवए पवमाणे अज्झवसाण0 एवं जहा पंचवीसतिमे सते अट्ठमुद्देसए नेरइयाणं वत्तव्वया तहेव इह वि भाणियव्वा जाव आयप्पयोगेण उववज्जंति, नो परप्पयोगेण उववज्जंति।

रतणप्पभपुढविखुड्डाकडजुम्मेनेरइया णं भंते! कओ उववज्जंति? एवं जहा ओहियनेरइयाणं वत्तव्वया सच्चेव रयणप्पभाए वि भाणियव्वा जाव नो परप्पयोगेण उववज्जंति।

एवं सक्करप्पभाए वि।

एवं जाव अहेसत्तमाए। एवं उववाओ जहा वक्कंतीए।

अस्सण्णी खलु पढमं दोच्चं च सरीसवा ततिय पक्खी।0 गाहा। एवं उववातेयव्वा। सेसं तहेव।

खुड्डातेयोगनेरतिया णं भंते! कओ उववज्जंति? किं नेरइएहिंतो? उववातो जहा वक्कंतीए।

ते णं भंते! जीवा एगसमएणं केवतिया उववज्जंति? गोयमा तिन्नि वा, सत्त वा, एक्कारस वा, पन्नरस वा, संखेज्जा वा, असंखेज्जा वा उववज्जंति। सेसं जहा कडजुम्मेस्स।

एवं जाव अहेसत्तमाए।

खुड्डागदावरजुम्मेनेरतिया णं भंते! कओ उववज्जंति? एवं जहेव खुड्डाकडजुम्मे, नवरं परिमाणं दो वा, छ वा, दस वा, चौद्दस वा, संखेज्जा वा, असंखेज्जा वा। सेसं तं चेव जाव अहेसत्तमाए।

खुड्डाकलियोगनेरतिया णं भंते! कतो उववज्जंति? एवं जहेव खुड्डाकडजुम्मे, नवरं परिमाणं एक्को वा, पंच वा, नव वा, तेरस वा, संखेज्जा वा, असंखेज्जा वा उववज्जंति। सेसं तं चेव।

एवं जाव अहेसत्तमाए।

सेवं भंते! सेवं भंते! जाव विहरति।

**\*एगतीसइमे सते पढमो उद्देशो समतो\***

## 0 बिइओ उद्देशो 0

[१००४] कण्हलेस्सखुड्डाकडजुम्मेनेरइया णं भंते! कओ उववज्जंति? एवं चेव जहा ओहियगमो जाव नो परप्पयोगेण उववज्जंति, नवरं उववातो जहा वक्कंतीए धूमप्पभापुढविनेरइयाणं।

सेसं तं चेव।

धूमप्पभपुढविकण्हलेस्सखुड्डाकडजुम्मनेरइया णं भंते! कओ उववज्जंति? एवं चेव निरवसेसं।

एवं तमाए वि, अहेसत्तमाए वि, नवरं उववातो सव्वत्थ जहा वक्कंतीए।

कण्हलेस्सखुड्डागतेयोगनेरइया णं भंते! कओ उववज्जंति? एवं चेव, नवरं तिन्नि वा, सत्त वा, एक्कारस वा, पण्णरस वा, संखेज्जा वा, असंखेज्जा वा। सेसं तं चेव।

एवं जाव अहेसत्तमाए वि।

कण्हलेस्सखुड्डागदावरजुम्मनेरइया णं भंते! कओ उववज्जंति? एवं चेव, नवरं दो वा, छ वा, दस वा, चोद्दस वा। सेसं तं चेव।

एवं धूमप्पभाए वि जाव अहेसत्तमाए।

कण्हलेस्सखुड्डाकलियोगनेरइया णं भंते! कओ उववज्जंति? एवं चेव, नवरं एक्को वा, पंच वा, नव वा, तेरस वा, संखेज्जा वा, असंखेज्जा वा। सेसं तं चेव।

एवं धूमप्पभाए वि, तमाए वि, अहेसत्तमाए वि।

सेवं भंते! सेवं भंते! त्ति०।

**\*एगतीसइमे सते बीइओ उद्देशो समतो\***

**० तइओ उद्देशओ ०**

[१००५] नीललेस्सखुड्डाकडजुम्मनेरइया णं भंते! कओ उववज्जंति? एवं जहेव कण्हलेस्सखुड्डाकडजुम्मा, नवरं उववातो जो वालुयप्पभाए। सेसं तं चेव।

वालुयप्पभपुढविनीललेस्सखुड्डाकडजुम्मनेरइया०? एवं चेव।

एवं पंकप्पभाए वि, एवं धूमप्पभाए वि।

एवं चउसु वि जुम्मेसु, नवरं परिमाणं जाणियत्वं परिमाणं जहा कण्हलेस्सउद्देशए। सेसं तहेव सेवं भंते! सेवं भंते! त्ति०।

**\*एगतीसइमे सते तइओ उद्देशो समतो\***

**० चउत्थो उद्देशो ०**

[१००६] काउलेस्सखुड्डाकडजुम्मनेरतिया णं भंते! कओ उववज्जंति? एवं जहेव कण्हलेस्सखुड्डाकडजुम्म०, नवरं उववातो जो रयणप्पभाए। सेसं तं चेव।

रयणप्पभपुढविकाउलेस्सखुड्डाकडजुम्मनेरतिया णं भंते! कओ उववज्जंति? एवं चेव।

एवं सक्करप्पभाए वि, एवं वालुयप्पभाए वि।

एवं चउसु वि जुम्मेसु, नवरं परिमाणं जाणियत्वं, परिमाणं जहा कण्हलेस्सउद्देशए। सेसं एवं चेव।

सेवं भंते! सेवं भंते! त्ति०।

**\*एगतीसइमे सते चउत्थो उद्देशो समतो\***

**० पंचमो उद्देशो ०**

[१००७] भवसिद्धीयखुड्डाकडजुम्मनेरइया णं भंते! कओ उववज्जंति? किं नेरइए०? एवं जहेव

ओहिओ गमओ तहेव निरवसेसं जाव नो परप्पयोगेणं उववज्जंति।

रतणप्पभपुढविभवसिद्धीयखुड्डाकडजुम्मनेरतिया णं०? एवं चेव निरवसेसं।

एवं जाव अहेसत्तमाए।

एवं भवसिद्धीयखुड्डातेयोगनेरइया वि, एवं जाव कलियोगो ति, नवरं परिमाणं जाणियव्वं, परिमाणं पुव्वभणियं जहा पढमुद्देशए।

सेवं भंते! सेवं भंते! ति०।

**\*एगतीसइमे सते पंचमो उद्देशो समतो\***

**० छट्ठो उद्देशो ०**

[१००८]कणहलेस्सभवसिद्धीयखुड्डाकडजुम्मनेरइया णं भंते! कओ उववज्जंति?० एवं जहेव ओहिओ कणहलेस्सउद्देशओ तहेव निरवसेसं। चउसु वि जुम्मेसु भाणियव्वो जाव--

अहेसत्तमपुढविकणहलेस्सखुड्डाकलियोगनेरइया णं भंते! कओ उववज्जंति?० तहेव।

सेवं भंते! सेवं भंते! ति०।

**\*एगतीसइमे सते छट्ठो उद्देशो समतो\***

**० सत्तमो उद्देशो ०**

[१००९]नीललेस्सभवसिद्धीय० चउसु वि जुम्मेसु तहेव भाणियव्वा जहा ओहियनीललेस्सउद्देशए।

सेवं भंते! सेवं भंते! जाव विहरति।

**\*एगतीसइमे सते सत्तमो उद्देशो समतो\***

**० अट्ठमो उद्देशो ०**

[१०१०]काउलेस्सभवसिद्धीय० चउसु वि जुम्मेसु तहेव उववातेयव्वा जहेव ओहिए काउलेस्सउद्देशए।

सेवं भंते! सेवं भंते! जाव विहरति।

**\*एगतीसइमे सते अट्ठमो उद्देशो समतो\***

**० उद्देशगा : ९-१२ ०**

[१०११]जहा भवसिद्धीएहिं चत्तारि उद्देशगा भणिया एवं अभवसिद्धीएहिं वि चत्तारि उद्देशगा भाणियव्वा जाव काउलेस्सउद्देशओ ति।

सेवं भंते! सेवं भंते! ति०।

**\*एगतीसइमे सते ९-१२ उद्देशगा समता\***

**० उद्देशगा : १३-१६ ०**

[१०१२]एवं सम्मदिट्ठीहि वि लेस्सासंजुतेहिं चत्तारि उद्देशगा कायव्वा, नवरं सम्मदिट्ठी पढम-बित्तिएसु दोसु वि उद्देशएसु अहेसत्तमपुढवीए न उववातेयव्वो। सेसं तं चेव।

सेवं भंते! सेवं भंते! ति०।

**\*एगतीसइमे सते १३-१६ उद्देशगा समता\***

**० उद्देशगा : १७-२० ०**

[१०१३] मिच्छादिट्ठीहि वि चत्तारि उद्देशगा कायच्वा जहा भवसिद्धीयाणं।  
सेवं भंते! सेवं भंते! ०।

**\*एगतीसइमे सते १७-२० उद्देशगा समत्ता\***

**० उद्देशगा : २१-२४ ०**

[१०१४] एवं कण्हपक्खिएहि वि लेस्सासंजुत्ता चत्तारि उद्देशगा कायच्वा जहेव भवसिद्धीएहिं।  
सेवं भंते! सेवं भंते! ति०।

**\*एगतीसइमे सते २१-२४ उद्देशगा समत्ता\***

**० उद्देशगा : २५-२८ ०**

[१०१५] सुक्कपक्खिएहिं एवं चेव चत्तारि उद्देशगा भाणियच्वा जाव-वालुयप्पभपुढविकाउ-  
लेस्स सुक्कपक्खियखुड्डाकलियोगनेरतिया णं भंते! कतो उववज्जंति?० तहेव जाव नो परप्पयोगेणं  
उववज्जंति।

सेवं भंते! सेवं भंते! ति०।

सच्चे वि एए अट्ठावीसं उद्देशगा।

**\*एगतीसइमे सते २५-२८ उद्देशगा समत्ता\***

**०-एगतीसइमं सयं समत्तं-०**

**० मुनि दीपरत्तसागरेण संशोधितः सम्पादितश्च एगतीसइमं सतं समत्तं ०**

**[ ] बत्तीसइमं सयं [ ]**

**० पढमो उद्देशो ०**

[१०१६] खुड्डाकडजुम्मनेरइया णं भंते! अणंतरं उव्वट्ठिता कहिं गच्छंति?, कहिं उववज्जंति?,  
किं नेरइएसु उववज्जंति? किं तिरिक्खजोणिएसु उवव०? उव्वट्ठणा जहा वक्कंतीए।

ते णं भंते! जीवा एगसमएणं केवतिया उव्वट्ठंति? गोयमा! चत्तारि वा, अट्ठ वा, बारस वा,  
सोलस वा, संखेज्जा वा, असंखेज्जा वा उव्वट्ठंति।

ते णं भंते! जीवा कंहं उव्वट्ठंति? गोयमा! से जहानामए पवए०, एवं तहेव । एवं सो चेव  
गमओ जाव आयप्पयोगेणं उव्वट्ठंति, नो परप्पयोगेणं उव्वट्ठंति।

रयणप्पभापुढविखुड्डाकड०? एवं रयणप्पभाए वि।

एवं जाव अहेसत्तमाए।

एवं खुड्डादावरजुम्म-खुड्डाकलियोग०, नवरं परिमाणं जाणियच्चं। सेसं तं चेव।

सेवं भंते! सेवं भंते! ति०।

**\*बत्तीसइमे सते पढमो उद्देशो समत्तो\***

**० उद्देशगा : २-२८ ०**

[१०१७] कण्हलेस्सखुड्डाकडजुम्मनेरइया०? एवं एएणं कमेणं जहेव उववायसए अट्ठावीसं

उद्देशगा भणिया तहेव उच्चट्णासए वि अट्ठावीसं उद्देशगा भाणियच्चा निरवसेसा, नवरं 'उच्चट्णंति' ति अभिलावो भाणियच्चो। सेसं तं चेव।

सेवं भंते! सेवं भंते! ति जाव विहरइ।

**\*बतीसइमे सते २-२८ उद्देशो समत्तो\***

**०-बतीसइमं सयं समत्तं-०**

**० मुनि दीपरत्तसागरेण संशोधितः सम्पादितश्च बतीसइमं सतं समत्तं ०**

**[ ] तेत्तीसइमं सयं [ ]**

**पढमं एगिंदियं सयं**

**० पढमो उद्देशओ ०**

**[१०१८]** कतिविधा णं भंते! एगिंदिया पन्नता? गोयमा! पंचविहा एगिंदिया पन्नता, तंजहा-पुढविकाइया जाव वणस्सतिकाइया।

पुढविकाइया णं भंते! कतिविहा पन्नता? गोयमा! दुविहा पन्नता, तं जहा-सुहुमपुढविकायिया य, बायरपुढविकाइया य।

सुहुमपुढविकाइया णं भंते! कतिविहा पन्नता? गोयमा! दुविहा पन्नता, तं जहा--प

ज्जता सुहुमपुढविकाइया य, अपज्जता सुहुमपुढविकाइया य।

बायरपुढविकाइया णं भंते! कतिविहा पन्नता? एवं चेव।

एवं आउकाइया वि चउक्कएणं भेएणं णेतच्चा।

एवं जाव वणस्सतिकाइया।

अपज्जतासुहुमपुढविकाइयाणं भंते! कति कम्मप्पगडीओ पन्नताओ? गोयमा! अट्ठ कम्मप्पगडीओ पन्नताओ, तं जहा--नाणावरणिज्जं जाव अंतरायियं।

पज्जतासुहुमपुढविकाइयाणं भंते! कति कम्मप्पगडीओ पन्नताओ? गोयमा! अट्ठ कम्मप्पगडीओ पन्नताओ, तं जहा--नाणावरणिज्जं जाव अंतरायियं।

अपज्जताबायरपुढविकायियाणं भंते! कति कम्मपगडीओ पन्नताओ? एवं चेव।

पज्जताबायरपुढविकायियाणं भंते! कति कम्मप्पगडीओ? एवं चेव।

एवं एएणं कमेणं जाव बायरवणस्सइकाइयाणं पज्जत्तगाणं ति।

अपज्जतासुहुमपुढविकायिया णं भंते! कति कम्मप्पगडीओ बंधंति ? गोयमा ! सत्तविहबंधगा वि, अट्ठविहबंधगा वि। सत्त बंधमाणा आउयवज्जाओ सत्त कम्मपगडीओ बंधंति। अट्ठ बंधमाणा पडिपुण्णाओ अट्ठ कम्मप्पगडीओ बंधंति।

पज्जतासुहुमपुढविकायिया णं भंते! कति कम्म०? एवं चेव।

एवं सत्त्वे जाव--पज्जताबायरवणस्सतिकायिया णं भंते! कति कम्मप्पगडीओ बंधंति? एवं चेव।

अपज्जतासुहुमपुढविकाइया णं भंते! कति कम्मप्पगडीओ वेदंति? गोयमा! चोदस कम्मप्पगडीओ वेदंति, तं जहा-नाणावरणिज्जं जाव अंतराइयं, सोत्तिंदियवज्झं चक्खिंदियवज्झं

घाणिंदियवज्झं जिब्भिंदियवज्झं इत्थिवेदवज्झं पुरिसवेदवज्झं।

एवं चउक्कएणं भेएणं जाव-पज्जताबायरवणस्सतिकाइया णं भंते! कति कम्मप्पगडीओ वेदेंति? एवं चेव चोद्धस।

सेवं भंते! सेवं भंते! ति०।

**\*तेत्तीसइमे सते पढमे सते पढमो उद्देशो समतो\***

**० बिइओ उद्देशो ०**

[१०१९]कतिविधा णं भंते! अणंतरोववन्नगा एगिंदिया पन्नता? गोयमा! पंचविहा अणंतरो-  
ववन्नगा एगिंदिया पन्नता, तं जहा--पुढविकाइया जाव वणस्सइकाइया।

अणंतरोववन्नगा णं भंते! पुढविकाइया कतिविहा पन्नता? गोयमा! दुविहा पन्नता, तं जहा--  
सुहुमपुढविकायिया य बादरपुढविकायिया य।

एवं दुपएणं भेएणं जाव वणस्सतिकाइया।

अणंतरोववन्नगसुहुमपुढविकाइयाणं भंते! कति कम्मप्पगडीओ पन्नताओ? गोयमा! अट्ठ  
कम्मप्पगडीओ पन्नताओ, तं जहा--नाणावरणिज्जं जाव अंतराइयं।

अणंतरोववन्नगबादरपुढविकायियाणं भंते! कति कम्मप्पगडीओ पन्नताओ? गोयमा! अट्ठ  
कम्मप्पयडीओ पन्नताओ, तं जहा--नाणावरणिज्जं जाव अंतराइयं।

एवं जाव अणंतरोववन्नगबादरवणस्सइकायियाणं ति।

अणंतरोववन्नगसुहुमपुढविकायिया णं भंते! कति कम्मप्पगडीओ बंधंति? गोयमा!  
आउयवज्जाओ सत्त कम्मप्पगडीओ बंधंति।

एवं जाव अणंतरोववन्नगबायरवणस्सइकायिय ति।

अणंतरोववन्नगसुहुमपुढविकायिया णं भंते! कति कम्मप्पगडीओ वेदेंति? गोयमा! चोद्धस  
कम्मप्पगडीओ वेदेंति, तं जहा--नाणावरणिज्जं तहेव जाव पुरिसवेदवज्झं।

एवं जाव अणंतरोववन्नगबायरवणस्सतिकाइय ति।

सेवं भंते! सेवं भंते! ति०।

**\*तेत्तीसइमे सते पढमे सते बीइओ उद्देशो समतो\***

**० तइओ उद्देशो ०**

[१०२०]कतिविधा णं भंते! परंपरोववन्नगा एगिंदिया पन्नता? गोयमा! पंचविहा परंपरो-  
ववन्नगा एगिंदिया पण्णता, तं जहा--पुढविकाइया, एवं चउक्कओ भेदो जहा ओहिउद्देशए।

परंपरोववन्नगअपज्जत्तसुहुमपुढविकाइयाणं भंते! कति कम्मप्पगडीओ पन्नताओ? एवं एतेणं  
अभिलावेणं जहा ओहिउद्देशए तहेव निरवसेसं भाणियत्वं जाव चोद्धस वेदेंति।

सेवं भंते! सेवं भंते! ति०।

**\*तेत्तीसइमे सते पढमे सते तइओ उद्देशो समतो\***

**० उद्देशगा : ४-११ ०**

[१०२१]अणंतरोगाढा जहा अणंतरोववन्नगा। परंपरोगाढा जहा परंपरोववन्नगा। अणंतरा-

हारगा जहा अणंतरोववन्नगा। परंपराहारगा जहा परंपरोववन्नगा। अणंतरपज्जत्तगा जहा अणंतरोववन्नगा।  
परंपरपज्जत्तगा जहा परंपरोववन्नगा। चरिमा वि जहा परंपरोववन्नगा। एवं अचरिमा  
वि। एवं एते एक्का- रस उद्देसगा। सेवं भंते! सेवं भंते! जाव विहरति।

**\*तेतीसइमे सते पढमे सते ४-११ उद्देसगा समत्ता\***

### **बिइयं एगिंदियसयं**

[१०२२] कतिविधा णं भंते! कण्हलेस्सा एगिंदिया पन्नता? गोयमा! पंचविहा कण्हलेस्सा  
एगिंदिया पन्नता, तं जहा-पुढविकाइया जाव वणस्सतिकाइया।

कण्हलेस्सा णं भंते! पुढविकाइया कतिविहा पन्नता? गोयमा! दुविहा पन्नता, तं जहा- सुहुम  
पुढविकाइया य बादरपुढविकाइया य।

कण्हलेस्सा णं भंते! सुहुमपुढविकायिया कतिविहा पन्नता? एवं एएणं अभिलावेणं चउक्कओ  
भेदो जहेव ओहिउद्देसए।

कण्हलेस्सअपज्जत्तसुहुमपुढविकाइयाणं भंते! कति कम्मपगडीओ पन्नताओ? एवं एएणं  
अभिलावेणं जहेव ओहिउद्देसए तहेव पन्नताओ।

तहेव बंधंति। तहेव वेदंति।

सेवं भंते! सेवं भंते! ति०।

**\*तेतीसइमे सते बीइए सते पढमो उद्देसो समत्तो\***

### **० बिइओ उद्देसो ०**

कतिविधा णं भंते! अणंतरोववन्नगा कण्हलेस्सा एगिंदिया पन्नता? गोयमा! पंचविहा  
अणंतरोववन्नगा कण्हलेस्सा एगिंदिया०। एवं एएणं अभिलावेणं तहेव दुपओ भेदो जाव वणस्सतिकाइय ति

अणंतरोववन्नगकण्हलेस्ससुहुमपुढविकाइयाणं भंते! कति कम्मपगडीओ पन्नताओ? एवं  
एएणं अभिलावेणं जहा ओहिओ अणंतरोववन्नगाणं उद्देसओ तहेव जाव वेदंति।

सेवं भंते! सेवं भंते! ति०।

**\*तेतीसइमे सते बीइए सते बीइओ उद्देसो समत्तो\***

### **० तइओ उद्देसो ०**

कतिविधा णं भंते! परंपरोववन्नगा कण्हलेस्सा एगिंदिया पन्नता? गोयमा! पंचविहा  
परंपरोववन्नगा० एगिंदिया पन्नता, तं जहा--पुढविकाइया०, एवं एएणं अभिलावेणं चउक्कओ भेदो जाव  
वणस्सतिकाइय ति।

परंपरोववन्नगकण्हलेस्सअपज्जत्तसुहुमपुढविकाइयाणं भंते! कति कम्मपगडीओ पन्नताओ?  
एवं एएणं अभिलावेणं जहेव ओहिओ परंपरोववन्नगउद्देसओ तहेव जाव वेदंति।

**\*तेतीसइमे सते बीइए सते तइओ उद्देसो समत्तो\***

### **० उद्देसगा- / ४-११ ०**

एवं एएणं अभिलावेणं जहेव ओहिए एगिंदियसए एक्कारस उद्देसगा भणिया तहेव

कण्हलेस्ससते वि भाणियच्चा जाव अचरिमकण्हलेस्सा एगिंदिया।

**\*तेतीसइमे सते बितियं एगिंदियसयं समतं\***

**तइयं एगिंदियसयं**

[१०२३]जहा कण्हलेस्सेहिं एवं नीललेस्सेहिं वि सयं भाणित्त्वं।  
सेवं भंते! सेवं भंते! ति०।

**\*तेतीसइमे सते ततियं एगिंदियसयं समतं\***

**चउत्थं एगिंदियसयं**

[१०२४]एवं काउलेस्सेहिं वि सयं भाणित्त्वं, नवरं 'काउलेस्स' ति अभिलावो।

**\*तेतीसइमे सते चउत्थो एगिंदियसयं समतं\***

**पंचमं एगिंदियसयं**

[१०२५]कतिविहा णं भंते! भवसिद्धीया एगिंदिया पन्नता? गोयमा! पंचविहा भवसिद्धीया  
एगिंदिया पन्नता, तं जहा--पुढविकाइया जाव वणस्सतिकाइया। भेदो चउक्कओ जाव वणस्सतिकाइय ति।

भवसिद्धीयअपज्जत्तसुहुमपुढविकाइयाणं भंते! कति कम्मपगडीओ पन्नताओ? एवं एतेणं  
अभिलावेणं जहेव पढमिल्लं एगिंदियसयं तहेव भवसिद्धीयसयं पि भाणियत्त्वं। उद्देशगपरिवाडी तहेव जाव  
अचरिम ति।

सेवं भंते! सेवं भंते! ति०।

**\*तेतीसइमे सते पंचमं एगिंदियसयं समतं\***

**छट्ठं एगिंदियसयं**

[१०२६]कतिविहा णं भंते! कण्हलेस्सा भवसिद्धीया एगिंदिया पन्नता? गोयमा! पंचविहा  
कण्हलेस्सा भवसिद्धीया एगिंदिया पन्नता, पुढविकाइया जाव वणस्सतिकाइया।

कण्हलेस्सभवसिद्धीयपुढविकाइया णं भंते! कतिविहा पन्नता? गोयमा! दुविहा पण्णता, तं  
जहा--सुहुमपुढविकाइया य, बायरपुढविकाइया य।

कण्हलेस्सभवसिद्धीयसुहुमपुढविकायिया णं भंते! कतिविहा पन्नता? गोयमा! दुविहा पन्नता,  
तं जहा--पज्जत्तगा य अपज्जत्तगा य।

एवं बायरा वि।

एवं एतेणं अभिलावेणं तहेव चउक्कओ भेदो भाणियत्त्वो।

कण्हलेस्सभवसिद्धीयअपज्जत्तासुहुमपुढविकाइयाणं भंते! कति कम्मपगडीओ पन्नताओ? एवं  
एएणं अभिलावेणं जहेव ओहिउद्देशए तहेव जाव वेदंति ति।

कतिविहा णं भंते! अणंतरोववन्नगा कण्हलेस्सा भवसिद्धीया एगिंदिया पन्नता? गोयमा!  
पंचविहा अणंतरोववन्नगा जाव वणस्सतिकाइया।

अणंतरोववन्नगकण्हलेस्सभवसिद्धीयपुढविकाइया णं भंते! कतिविहा पन्नता? गोयमा! दुविहा  
पन्नता, तं जहा--सुहुमपुढविकाइया य, बायरपुढविकाइया य।

एवं दुपओ भेदो।

अणंतरोववन्नग-कणहलेस्स-भवसिद्धीय-सुहुम-पुढविकाइयाणं भंते! कति कम्मपगडीओ पन्नताओ? एवं एणं अभिलावेणं जहेव ओहिओ अणंतरोववन्नो उद्देशओ तहेव जाव वेदंति।

एवं एतेणं अभिलावेणं एक्कारस वि उद्देशगा तहेव भाणियत्वा जहा ओहियसए जाव अचरिमो ति।

**\*तेतीसइमे सते छट्ठं एगिंदियसयं समत्तं\***

### **सत्तमं एगिंदियसयं**

[१०२७]जहा कणहलेस्सभवसिद्धीए सयं भणियं एवं नीललेस्सभवसिद्धीएहि वि सयं भाणियत्वं।

**\*तेतीसइमे सते सत्तमं एगिंदियसयं समत्तं\***

### **अट्ठमं एगिंदियसयं**

[१०२८]एवं काउलेस्सभवसिद्धीएहि वि सयं।

**\*तेतीसइमे सते अट्ठमं एगिंदियसयं समत्तं\***

### **नवमं एगिंदियसयं**

[१०२९]कतिविधा णं भंते! अभवसिद्धीया एगिंदिया पन्नता? गोयमा! पंचविहा अभवसिद्धीया० पन्नता, तं जहा-पुढविकाइया जाव वणस्सतिकायिया।

एवं जहेव भवसिद्धीयसयं, नवरं नव उद्देशगा, चरिम-अचरिम-उद्देशकवज्जं। सेसं तहेव।

**\*तेतीसइमे सते नवमं एगिंदियसयं समत्तं\***

### **दसमं एगिंदियसयं**

[१०३०]एवं कणहलेस्सअभवसिद्धीयसयं पि।

**\*तेतीसइमे सते दसमं एगिंदियसयं समत्तं\***

### **एक्कारसमं एगिंदियसयं**

[१०३१]नीललेस्सअभवसिद्धीयएगिंदिएहि वि सयं।

**\*तेतीसइमे सते एक्कारसमं एगिंदियसयं समत्तं\***

### **बारसमं एगिंदियसयं**

[१०३२]काउलेस्सअभवसिद्धीएहि वि सयं। एवं चत्तारि वि अभवसिद्धीयसत्ताणि, नव नव उद्देशगा भवंति। एवं एयाणि बारस एगिंदियसयाणि भवंति।

**\*तेतीसइमे सते बारसमं एगिंदियसयं समत्तं\***

**०-तेतीसइमं सयं समत्तं-०**

० मुनि दीपरत्तसागरेण संशोधितः सम्पादितश्च तेतीसइमं सतं समत्तं ०

**[ ] चोतीसइमं सयं [ ]**

**पढमं एगिंदियसेढिसयं**

**० पढमो उद्देशओ ०**

[१०३३]कतिविहा णं भंते! एगिंदिया पन्नता? गोयमा! पंचविहा एगिंदिया पन्नता, तं जहा-- पुढविकाइया जाव वणस्सतिकाइया। एवमेते वि चउक्कएणं भेएणं भाणियत्वा जाव वणस्सइकाइया।

अपज्जतासुहुमपुढविकाइए णं भंते! इमीसे रयणप्पभाए पुढवीए पुरत्थिमिल्ले चरिमंते समोहए, समोहणिता जे भविए इमीसे रयणप्पभाए पुढवीए पच्चत्थिमिल्ले चरिमंते अपज्जतासुहुमपुढविकाइयत्ताए उववज्जितए, से णं भंते! कतिसमइएणं विग्गहेणं उववज्जेज्जा? गोयमा! एगसमइएण वा दुसमइएण वा तिसमइएण वा विग्गहेणं उववज्जेज्जा।

से केणट्ठेणं भंते! एवं वुच्चइ-एगसमइएण वा दुसमइएण वा जाव उववज्जेज्जा? एवं खलु गोयमा! मए सत्त सेढीओ पन्नताओ, तं जहा--उज्जुयायता सेढी १, एगओवंका २, दुहतोवंका ३, एगतोखहा ४, दुहओखहा ५, चक्कवाला ६, अद्धचक्कवाला ७। उज्जुयायताए सेढीए उववज्जमाणे एगसमइएणं विग्गहेणं उववज्जेज्जा, एगओवंकाए सेढीए उववज्जमाणे दुसमइएणं विग्गहेणं उववज्जेज्जा, दुहतोवंकाए सेढीए उववज्जमाणे तिसम

इएणं विग्गहेणं उववज्जेज्जा। सेतेणट्ठेणं गोयमा! जाव उववज्जेज्जा। १ ।

अपज्जतासुहुमपुढविकाइए णं भंते! इमीसे रयणप्पभाए पुढवीए पुरत्थिमिल्ले चरिमंते समोहए, समोहणिता जे भविए इमीसे रयणप्पभाए पुढवीए पच्चत्थिमिल्ले चरिमंते पज्जतासुहुमपुढविकाइयत्ताए उववज्जितए से णं भंते! कतिसमइएणं विग्गहेणं उववज्जेज्जा? गोयमा! एगसमइएण वा दुसमइएण वा, सेसं तं चेव जाव सेतेणट्ठेणं जाव विग्गहेणं उववज्जेज्जा। २ ।

एवं अपज्जतासुहुमपुढविकाइओ पुरत्थिमिल्ले चरिमंते समोहणावेत्ता पच्चत्थिमिल्ले चरिमंते बायरपुढविकाइएसु अपज्जतएसु उववातेयव्वो। ३ ।

ताहे तेसु चेव पज्जतएसु। ४ ।

एवं आउकाइएसु वि चत्तारि आलावगा-सुहुमेहिं अपज्जतएहिं १, ताहे पज्जतएहिं २, बादरेहिं अपज्जतएहिं ३, ताहे पज्जतएहिं उववातेयव्वो ४।

एवं चेव सुहुमतेउकाइएहिं वि अपज्जतएहिं १, ताहे पज्जतएहिं उववातेयव्वो २।

अपज्जतासुहुमपुढविकाइए णं भंते! इमीसे रयणप्पभाए पुढवीए पुरत्थिमिल्ले चरिमंते समोहए, समोहणिता जे भविए मणुस्सखेत्ते अपज्जताबायरतेउकाइयत्ताए उववज्जितए से णं भंते! कतिसमइएणं विग्गहेणं उववज्जेज्जा? सेसं तं चेव ३।

एवं पज्जताबायरतेउकाइयत्ताए उववातेयव्वो ४।

वाउकाइए सुहुम-बायरेसु जहा आउकाइएसु उववातिओ तहा उववातेयव्वो ४।

एवं वणस्सतिकाइएसु वि ४।

पज्जतासुहुमपुढविकाइए णं भंते! इमीसे रयणप्पभाए पुढवीए, एवं पज्जतासुहुम-पुढविकाइओ वि पुरत्थिमिल्ले चरिमंते समोहणावेत्ता एएणं चेव कमेणं एएसु चेव वीससु ठाणेसु उववातेयव्वो जाव बायरवणस्सतिकाइएसु पज्जतएसुं ति।

एवं अपज्जतबायरपुढविकाइओ वि।

एवं पज्जताबायरपुढविकाइओ वि।

एवं आउकाइओ वि चउसु वि गमएसु पुरत्थिमिल्ले चरिमंते समोहए एयाए चेव वत्तव्वयाए एएसु चेव वीसाए ठाणेसु उववातेयव्वो।

सुहुमतेउकाइओ वि अपज्जतओ पज्जतओ य एएसु चेव वीसाए ठाणेसु उववातेयव्वो ।

अपज्जताबायरतेउकाइए णं भंते! मणुस्सखेते समोहए, समोहणिता जे भविए इमीसे रयणप्पभाए पुढवीए पच्चत्थिमिल्ले चरिमंते अपज्जतसुहुमपुढविकाइयताए उववज्जितए से णं भंते! कतिसमइएणं विग्गहेणं उववज्जेज्जा? सेसं तहेव जाव सेतेणट्ठेणं०।

एवं पुढविकाइएसु चउच्चिहेसु वि उववातेयव्वो।

एवं आउकाइएसु चउच्चिहेसु वि।

तेउकाइएसु सुहुमेसु अपज्जतएसु पज्जतएसु य एवं चेव उववातेयव्वो।

अपज्जताबादरतेउकाइए णं भंते! मणुस्सखेते समोहए, समोहणिता जे भविए मणुस्सखेते अपज्जताबायरतेउकाइयताए उववज्जितए से णं भंते! कतिसम०? सेसं तं चेव।

एवं पज्जताबायरतेउकाइयताए वि उववाएयव्वो।

वाउकाइयताए य, वणस्सतिकाइयताए य जहा पुढविकाइएसु तहेव चउक्कएणं भएणं उववाएयव्वो।

एवं पज्जताबायरतेउकाइओ वि समयखेते समोहणावेत्ता एएसु चेव वीसाए ठाणेसु उववातेयव्वो जहेव अपज्जतओ उववातिओ।

एवं सव्वत्थ वि बायरतेउकाइया अपज्जतगा पज्जतगा य समयखेते उववातेयव्वा, समोहणावेयव्वा वि।

वाउकाइया, वणस्सतिकाइया य जहा पुढविकाइया तहेव चउक्कएणं भएणं उववातेयव्वा जाव पज्जताबायरवणस्सइकाइए णं भंते! इमीसे रयणप्पभाए पुढवीए पुरत्थिमिल्ले चरिमंते समोहए, समोहणेता जे भविए इमीसे रयणप्पभाए० पच्चत्थिमिल्ले चरिमंते पज्जताबायरवणस्सतिकाइयताए उववज्जितए से णं भंते! कतिसम०? सेसं तहेव जाव सेतेणट्ठेणं० ।

अपज्जतासुहुमपुढविकाइए णं भंते! इमीसे रयणप्पभाए पुढवीए पच्चत्थिमिल्ले चरिमंते समोहए, समोहणिता जे भविए इमीसे रयणप्पभाए पुढवीए पुरत्थिमिल्ले चरिमंते अपज्जतासुहुम-पुढविकाइयताए उववज्जितए से णं भंते! कइसमइएणं०? सेसं तहेव निरवसेसं।

एवं जहेव पुरत्थिमिल्ले चरिमंते सव्वपदेसु वि समोहया पच्चत्थिमिल्ले चरिमंते समयखेते य उववातिया, जे य समयखेते समोहया पच्चत्थिमिल्ले चरिमंते समयखेते य उववातिया, एवं एएणं चेव कमेणं पच्चत्थिमिल्ले चरिमंते समयखेते य समोहया पुरत्थिमिल्ले चरिमंते समयखेते य उववातेयव्वा तेणेव गमएणं।

एवं एतेणं गमएणं दाहिणिल्ले चरिमंते समोहयाणं समयखेते य, उत्तरिल्ले चरिमंते समयखेते य उववाओ।

एवं चेव उत्तरिल्ले चरिमंते समयखेते य समोहया, दाहिणिल्ले चरिमंते समयखेते य उववातेयव्वा तेणेव गमएणं।

अपज्जतासुहुमपुढविकाइए णं भंते! सक्करप्पभाए पुढवीए पुरत्थिमिल्ले चरिमंते समोहए, समोहणिता जे भविए सक्करप्पभाए पुढवीए पच्चत्थिमिल्ले चरिमंते अपज्जतासुहुमपुढविकाइयताए उवव०? एवं जहेव रयणप्पभाए जाव सेतेणट्ठेणं।

एवं एएणं कमेणं जाव पज्जतएसु सुहुमतेउकाइएसु।

अपज्जत्तसुहुमपुढविकाइए णं भंते! सक्करप्पभाए पुढवीए पुरत्थिमिल्ले चरिमंते समोहए, समोहणित्ता जे भविए समयखेते अपज्जत्ताबायरतेउकाइयत्ताए उववज्जित्तए से णं भंते! कतिसमइ० पुच्छा। गोयमा! दुसमइएण वा तिसमइएण वा विग्गहेण उववज्जिज्जा।

से केणट्ठेण०? एवं खलु गोयमा! मए सत्त सेढीओ पन्नताओ, तं जहा--उज्जुयायता जाव अद्धचक्कवाला। एगतोवकाए सेढीए उववज्जमाणे दुसमइएणं विग्गहेणं उववज्जेज्जा, दुहओवकाए सेढीए उववज्जमाणे तिसमइएणं विग्गहेणं उववज्जेज्जा, सेतेणट्ठेण०।

एवं पज्जत्तएसु वि बायरतेउकाइएसु। सेसं जहा रत्तणप्पभाए।

जे वि बायरतेउकाइया अपज्जत्तगा य पज्जत्तगा य समयखेते समोहया, समोहणित्ता दोच्चाए पुढवीए पच्चत्थिमिल्ले चरिमंते पुढविकाइएसु चउत्विहेसु, आउकाइएसु चउत्विहेसु, तेउकाइएसु दुविहेसु, वाउकाइएसु चउत्विहेसु, वणस्सत्तिकाइएसु चउत्विधेसु उववज्जंति ते वि एवं चेव दुसमइएण वा तिसमइएण वा विग्गहेण उववातेयत्त्वा।

बायरतेउकाइया अपज्जत्तगा पज्जत्तगा य जाहे तेसु चेव उववज्जंति ताहे जहेव रयणप्पभाए तहेव एगसमइय-दुसमइय-तिसमइया विग्गहा भाणियत्त्वा। सेसं जहेव रयणप्पभाए तहेव निरवसेसं।

जहा सक्करप्पभाए वत्तव्या भणिया एवं जाव अहेसत्तमाए भाणियत्त्वा।

**[१०३४]**अपज्जत्तासुहुमपुढविकाइए णं भंते! अहेलोयखेतनालीए बाहिरिल्ले खेते समोहए, समोहणित्ता जे भविए उड्ढलोयखेतनालीए बाहिरिल्ले खेते अपज्जत्तासुहुमपुढविकाइयत्ताए उववज्जित्तए से णं भंते! कतिसमइएणं विग्गहेणं उववज्जेज्जा? गोयमा! तिसमइएण वा, चउसमइएण वा विग्गहेणं उववज्जेज्जा।

से केणट्ठेण भंते! एवं वुच्चति-तिसमइएण वा चउसमइएण वा विग्गहेणं उववज्जेज्जा? गोयमा! अपज्जत्तासुहुमपुढविकाइए णं अहेलोयखेतनालीए बाहिरिल्ले खेते समोहए, समोहणित्ता जे भविए उड्ढलोयखेतनालीए बाहिरिल्ले खेते अपज्जत्तासुहुमपुढविकाइयत्ताए एगपयरम्मि अणुसेढिं उववज्जित्तए से णं तिसमइएणं विग्गहेणं उववज्जेज्जा, जे भविए विसेढिं उववज्जित्तए से णं चउसमइएणं विग्गहेणं उववज्जेज्जा। सेतेणट्ठेणं जाव उववज्जेज्जा।

एवं पज्जत्तासुहुमपुढविकाइयत्ताए वि।

एवं जाव पज्जत्तासुहुमतेउकाइयत्ताए।

अपज्जत्तासुहुमपुढविकाइए णं भंते! अहेलोग जाव समोहणित्ता जे भविए समयखेते अपज्जत्ताबायरतेउकाइयत्ताए उववज्जित्तए से णं भंते! कतिसमइएणं विग्गहेणं उववज्जेज्जा? गोयमा! दुसमइएण वा, तिसमइएण वा विग्गहेणं उववज्जेज्जा।

से केणट्ठेण०? एवं खलु गोयमा! मए सत्त सेढीओ पन्नताओ, तं जहा--उज्जुआयता जाव अद्धचक्कवाला। एगतोवकाए सेढीए उववज्जमाणे दुसमइएणं विग्गहेणं उववज्जेज्जा, दुहतोवकाए सेढीए उववज्जमाणे तिसमइएणं विग्गहेणं उववज्जेज्जा, सेतेणट्ठेण०।

एवं पज्जत्तएसु वि, बायरतेउकाइएसु वि उववातेयत्त्वो। वाउकाइय-वणस्सत्तिकाइयत्ताए चउक्कएणं भेएणं जहा आउकाइयत्ताए तहेव उववातेयत्त्वो।

एवं जहा अपज्जत्तासुहुमपुढविकाइयस्स गमओ भणिओ एवं पज्जत्तासुहुमपुढविकाइयस्स वि

भाणियव्वो, तहेव वीसाए ठाणेसु उववातेयव्वो।

अहेलोगखेतनालीए बाहिरिल्ले खेते समोहयओ एवं बायरपुढविकाइयस्स वि अपज्जतगस्स पज्जतगस्स य भाणियव्वं।

एवं आउकाइयस्स चउव्विहस्स वि भाणियव्वं।

सुहुमतेउकाइयस्स दुविहस्स वि एवं चेव।

अपज्जताबायरतेउकाइए णं भंते! समयखेते समोहते, समोहणिता जे भविए उड्ढलोगखेतनालीए बाहिरिल्ले खेते अपज्जतासुहुमपुढविकाइयताए उववज्जितए से णं भंते! कइसमइएणं विग्गहेणं उववज्जेज्जा? गोयमा! दुसमइएण वा, तिसमइएण वा विग्गहेणं उववज्जेज्जा।

से केणट्ठेणं०? अट्ठो तहेव सत्त सेढीओ।

एवं जाव अपज्जतबायरतेउकाइए णं भंते! समयखेते समोहए, समोहणिता जे भविए उड्ढलोगखेतनालीए बाहिरिल्ले खेते पज्जतासुहुमतेउकाइयताए उववज्जितए से णं भंते!०? सेसं तं चेव।

अपज्जताबायरतेउकाइए णं भंते! समयखेते समोहए, समोहणिता जे भविए समयखेते अपज्जताबायरतेउकाइयताए उववज्जितए से णं भंते! कतिसमइएणं विग्गहेणं

उववज्जेज्जा? गोयमा! एगसमइएण वा, दुसमइएण वा, तिसमइएण वा विग्गहेणं उववज्जेज्जा।

से केणट्ठेणं०? अट्ठो जहेव रयणप्पभाए तहेव सत्त सेढीओ।

एवं पज्जताबादरतेउकाइयताए वि।

वाउकाइएसु, वणस्सतिकाइएसु य जहा पुढविकाइएसु उववातिओ तहेव चउक्कएणं भेएणं उववाएयव्वो।

एवं पज्जताबायरतेउकाइओ वि एएसु चेव ठाणेसु उववातेयव्वो।

वाउकाइय-वणस्सतिकाइयाणं जहेव पुढविकाइयते उववातिओ तहेव भाणियव्वो। से णं कतिस०?

एवं उड्ढलोगखेतनालीए वि बाहिरिल्ले खेते समोहयाणं अहेलोगखेतनालीए बाहिरिल्ले खेते उववज्जंताणं सो चेव गमओ निरवसेसो भाणियव्वो जाव बायरवणस्सतिकाइओ पज्जतओ बादरवणस्सइ-काइएसु पज्जतएसु उववातिओ।

अपज्जतासुहुमपुढविकाइए णं भंते! लोगस्स पुरत्थिमिल्ले चरिमंते समोहते, समोहणिता जे भविए लोगस्स पुरत्थिमिल्ले चरिमंते अपज्जतासुहुमपुढविकाइयताए उववज्जितए से णं भंते! कइसमइएणं विग्गहेणं उववज्जेज्जा? गोयमा! एगसमइएण वा, दुसमइएण वा, तिसमइएण वा, चउसमइएण वा विग्गहेणं उववज्जेज्जा।

से केणट्ठेणं भंते! एवं वुच्चति-एगसमइएण वा जाव उववज्जेज्जा? एवं खलु गोयमा! मए सत्त सेढीओ पन्नताओ, तं जहा-उज्जुआयता जाव अद्धचक्कवाला। उज्जुआयताए सेढीए उववज्जमाणे एगसमइएणं विग्गहेणं उववज्जेज्जा; एगतोवंकाए सेढीए उववज्जमाणे दुसमइएणं विग्गहेणं उववज्जेज्जा; दुहओवंकाए सेढीए उववज्जमाणे जे भविए एगपयरंसि अणुसेढिं उववज्जितए से णं तिसमइएणं विग्गहेणं उववज्जेज्जा, जे भविए विसेढिं उववज्जितए से णं चउसमइएणं विग्गहेणं उववज्जेज्जा; सेतेणट्ठेणं जाव

उववज्जेज्जा।

एवं अपज्जतओ सुहुमपुढविकाइओ लोगस्स पुरत्थिमिल्ले चरिमंते समोहतो लोगस्स पुरत्थि मिल्ले चेव चरिमंते अपज्जतएसु पज्जतएसु य सुहुमपुढविकाइएसु, अपज्जतएसु पज्जतएसु य सुहुमआउकाइएसु, अपज्जतएसु पज्जतएसु य सुहुमतेउक्काइएसु, अपज्जतएसु पज्जतएसु य सुहुमवाउकाइएसु, अपज्जतएसु पज्जतएसु य बायरवाउकाइएसु, अपज्जतएसु पज्जतएसु य सुहुमवणस्सतिकाइएसु; अपज्जतएसु पज्जतएसु य बारससु वि ठाणेसु एएणं चेव कमेणं भाणियव्वो।

सुहुमपुढविकाइओ पज्जतओ एवं चेव निरवसेसो बारससु वि ठाणेसु उववातेयव्वो।

एवं एएणं गमएणं जाव सुहुमवणस्सतिकाइओ पज्जतओ सुहुमवणस्सइकाइएसु पज्जतएसु चेव भाणितव्वो।

अपज्जतासुहुमपुढविकाइए णं भंते! लोगस्स पुरत्थिमिल्ले चरिमंते समोहए, समोहणिता जे भविए लोगस्स दाहिणिल्ले चरिमंते अपज्जतासुहुमपुढविकाइएसु उववज्जितए से णं भंते! कतिसमइएणं विग्गहेणं उववज्जेज्जा? गोयमा! दुसमइएण वा, तिसमइएण वा, चउसमइएण वा विग्गहेणं उववज्जिज्जा।

से केणट्ठेणं भंते! एवं वुच्चति०? एवं खलु गोयमा! मए सत सेढीओ पन्नताओ, तं जहा उज्जुआयता जाव अद्धचक्कवाला। एगतोवंकाए सेढीए उववज्जमाणे दुसमइएणं विग्गहेणं उववज्जेज्जा; दुहतो वंकाए सेढीए उववज्जमाणे जे भविए एगपयरंसि अणुसेढिं उववज्जितए से णं तिसमइएणं विग्गहेणं उववज्जेज्जा, जे भविए विसेढिं उववज्जितए से णं चउसमइएणं विग्गहेणं उववज्जेज्जा; से तेणट्ठेणं गोयमा!०।

एवं एएणं गमएणं पुरत्थिमिल्ले चरिमंते समोहतो दाहिणिल्ले चरिमंते उववातेयव्वो। जाव सुहुमवणस्सतिकाइओ पज्जतओ सुहुमवणस्सतिकाइएसु पज्जतएसु चेव; सव्वेसिं दुसमइओ, तिसमइओ, चउसमइओ विग्गहो भाणियव्वो।

अपज्जतासुहुमपुढविकाइए णं भंते! लोगस्स पुरत्थिमिल्ले चरिमंते समोहयए, समोहणिता जे भविए लोगस्स पच्चत्थिमिल्ले चरिमंते अपज्जतासुहुमपुढविकाइयताए उववज्जितए से णं भंते! कतिसमइएणं विग्गहेणं उववज्जेज्जा? गोयमा! एगसमइएण वा, दुसमइएण वा, तिसमइएण वा, चउसमइएण वा विग्गहेणं उववज्जेज्जा।

से केणट्ठेणं०? एवं जहेव पुरत्थिमिल्ले चरिमंते समोहया पुरत्थिमिल्ले चेव चरिमंते उववातिता तहेव पुरत्थिमिल्ले चरिमंते समोहया पच्चत्थिमिल्ले चरिमंते उववातेयव्वो सव्वे।

अपज्जतासुहुमपुढविकाइए णं भंते! लोगस्स दाहिणिल्ले चरिमंते समोहए, समोहणिता जे भविए लोगस्स दाहिणिल्ले चेव चरिमंते अपज्जतासुहुमपुढविकाइयताए उववज्जितए०? एवं जहा पुरत्थिमिल्ले समोहओ पुरत्थिमिल्ले चेव उववातिओ तहा दाहिणिल्ले समोहओ दाहिणिल्ले चेव उववातेयव्वो। तहेव निरवसेसं जाव सुहुमवणस्सतिकाइओ पज्जतओ सुहुमवणस्सइकाइएसु चेव पज्जतएसु दाहिणिल्ले चरिमंते उववातिओ।

एवं दाहिणिल्ले समोहयओ पच्चत्थिमिल्ले चरिमंते उववातेयव्वो, नवरं दुसमइय-तिसमइय-चउसमइओ विग्गहो। सेसं तहेव।

एवं दाहिणिल्ले समोहयओ उत्तरिल्ले उववातेयव्वो जहेव सट्ठाणे तहेव एगसमइय-

दुसमइय-तिसमइय-चउसमइयविग्गहो।

पुरत्थिमिल्ले जहा पच्चत्थिमिल्ले तहेव दुसमइय-तिसमइय-चउसमइय०।

पच्चत्थिमिल्ले चरिमंते समोहताणं पच्चत्थिमिल्ले चेव चरिमंते उववज्जमाणाणं जहा सट्ठाणे। उत्तरिल्ले उववज्जमाणाणं एगसमइओ विग्गहो नत्थि, सेसं तहेव। पुरत्थिमिल्ले जहा सट्ठाणे। दाहिणिल्ले एगसमइओ विग्गहो नत्थि, सेसं तं चेव।

उत्तरिल्ले समोहयाणं उत्तरिल्ले चेव उववज्जमाणाणं जहा सट्ठाणे। उत्तरिल्ले समोहयाणं पुरत्थिमिल्ले उववज्जमाणाणं एवं चेव, नवरं एगसमइओ विग्गहो नत्थि। उत्तरिल्ले समोहताणं दाहिणिल्ले उववज्जमाणाणं जहा सट्ठाणे। उत्तरिल्ले समोहयाणं पच्चत्थिमिल्ले उववज्जमाणाणं एगसमइओ विग्गहो नत्थि, सेसं तहेव जाव सुहुमवणस्सतिकाइओ पज्जतओ सुहुमवणस्सतिकाइएसु पज्जतएसु चेव।

कहिं णं भंते! बायरपुढविकाइयाणं पज्जताणं ठाणा पन्नता? गोयमा! सट्ठाणेणं अट्ठसु पुढवीसु जहा ठाणपए जाव सुहुमवणस्सतिकाइया जे य पज्जतगा जे य अपज्जतगा ते सत्त्वे एगविहा अविसेसमणाणता सत्त्वलोगपरियावन्ना पण्णता समणाउसो!।

अपज्जतासुहुमपुढविकाइयाणं भंते! कति कम्मप्पगडीओ पन्नताओ! गोयमा! अट्ठ कम्मप्पगडीओ पन्नताओ, तं जहा--नाणावरणिज्जं जाव अंतराइयं। एवं चउक्कएणं भेएणं जहेव एगिंदियसएसु जाव बायरवणस्सतिकाइयाणं पज्जतगाणं।

अपज्जतासुहुमपुढविकाइया णं भंते! कति कम्मपगडीओ बंधंति? गोयमा! सत्तविहबंधगा वि, अट्ठविहबंधगा वि जहा एगिंदियसएसु जाव पज्जताबायरवणस्सतिकाइया।

अपज्जतासुहुमपुढविकाइया णं भंते! कति कम्मपगडीओ वेएंति? गोयमा! चोद्दस कम्मपगडीओ वेएंति, तं जहा--नाणावरणिज्जं जहा एगिंदियसएसु जाव पुरिसवेयवज्जं।

एवं जाव बादरवणस्सइकाइयाणं पज्जतगाणं।

एगिंदिया णं भंते! कओ उववज्जंति? किं नेरइएहिंतो०? जहा वक्कंतीए पुढविकाइयाणं उववातो।

एगिंदियाणं भंते! कति समुग्घाया पन्नता? गोयमा! चत्तारि समुग्घाया पन्नता, तं जहा-वेयणासमुग्घाए जाव वेउच्चियसमुग्घाए।

एगिंदिया णं भंते! किं तुल्लट्ठितीया तुल्लविसेसाहियं कम्मं पकरंति, तुल्लट्ठितीया वेमायविसेसाहियं कम्मं पकरंति, वेमायट्ठितीया तुल्लविसेसाहियं कम्मं पकरंति, वेमायट्ठितीया वेमायविसेसाहियं कम्मं पकरंति? गोयमा! अत्थेगइया तुल्लट्ठितीया तुल्लविसेसाहियं कम्मं पकरंति, अत्थेगइया वेमायट्ठितीया तुल्लविसेसाहियं कम्मं पकरंति, अत्थेगइया वेमायट्ठितीया वेमायविसेसाहियं कम्मं पकरंति।

से केणट्ठेणं भंते! एवं वुच्चति-अत्थेगइया तुल्लट्ठितीया जाव वेमायविसेसाहियं कम्मं पकरंति? गोयमा! एगिंदिया चउच्चिहा पन्नता, तं जहा-अत्थेगइया समाउया समोववन्नगा, अत्थेगइया समाउया विसमोववन्नगा, अत्थेगइया विसमाउया समोववन्नगा, अत्थेगइया विसमाउया विसमोववन्नगा। तत्थ णं जे ते समाउया समोववन्नगा ते णं तुल्लट्ठितीया तुल्लविसेसाहियं कम्मं पकरंति, तत्थ णं जे ते समाउया विसमोववन्नगा ते णं तुल्लट्ठितीया वेमायविसेसाहियं कम्मं पकरंति, तत्थ णं जे ते समाउया

विसमोववन्नगा ते णं तुल्लट्ठितीया वेमायविसेसाहियं कम्मं पकरेंति, तत्थ णं जे ते विसमाउया समोववन्नगा ते णं वेमायट्ठितीया तुल्लविसेसाहियं कम्मं पकरेंति, तत्थ णं जे ते विसमाउया विसमोववन्नगा ते णं वेमायट्ठितीया वेमायविसेसाहियं कम्मं पकरेंति। सेतेणट्ठेणं गोयमा! जाव वेमायविसेसाहियं कम्मं पकरेंति।

सेवं भंते! सेवं भंते! ति जाव विहरइ।

**\*चोत्तीसइमे सते पढमे एगिंदियसेढिसते पढमो उद्देशो समतो\***

### ० बिइओ उद्देशो ०

[१०३५]कतिविधा णं भंते! अणंतरोववन्नगा एगिंदिया पन्नता? गोयमा! पंचविहा अणंतरोववन्नगा एगिंदिया पन्नता, तं जहा-पुढविकाइया०, दुयाभेदो जहा एगिंदियसतेसु जाव बायरवणस्सइकाइया।

कहि णं भंते! अणंतरोववन्नगाणं बायरपुढविकाइयाणं ठाणा पन्नता? गोयमा! सट्ठाणेणं अट्ठसु पुढवीसु, तं जहा--रयणप्पभा जहा ठाणपए जाव दीवेसु समुद्देशु, एत्थ णं अणंतरोववन्नगाणं बायरपुढविकाइयाणं ठाणा पन्नता, उववातेण सव्वलोए, समुग्घाएणं सव्वलोए, सट्ठाणेणं लोगस्स असंखेज्जइभागे, अणंतरोववन्नगसुहुमपुढविकाइया णं एगविहा अविसेसमणाणता सव्वलोगपरियावन्ना पन्नता समणाउसो!।

एवं एतेणं कमेणं सव्वे एगिंदिया भाणियव्वा। सट्ठाणाइं सव्वेसिं जहा ठाणपए। एतेसिं पज्जतगाणं बायराणं उववाय-समुग्घाय-सट्ठाणाणि जहा तेसिं चेव अपज्जतगाणं बायराणं, सुहुमाणं सव्वेसिं जहा पुढविकाइयाणं भणिया तहेव भाणियव्वा जाव वणस्सइकाइय ति।

अणंतरोववन्नगसुहुमपुढविकाइयाणं भंते! कति कम्मप्पगडीओ पन्नताओ? गोयमा! अट्ठ कम्मप्पगडीओ पन्नताओ। एवं जहा एगिंदियसतेसु अणंतरोववन्नउद्देशए तहेव पन्नताओ, तहेव बंधेंति, तहेव वेदेंति जाव अणंतरोववन्नगा बायरवणस्सतिकाइया।

अणंतरोववन्नगएगिंदिया णं भंते! कओ उववज्जंति? जहेव ओहिए उद्देशओ भणिओ।

अणंतरोववन्नगएगिंदियाणं भंते! कति समुग्घाया पन्नता? गोयमा! दोन्नि समुग्घाया पन्नता तं जहा-वेयणासमुग्घाए य कसायसमुग्घाए य।

अणंतरोववन्नगएगिंदिया णं भंते! किं तुल्लट्ठितीया तुल्लविसेसाहियं कम्मं पकरेंति० पुच्छा तहेव। गोयमा! अत्थेगइया तुल्लट्ठितीया तुल्लविसेसाहियं कम्मं पकरेंति, अत्थेगइया तुल्लट्ठितीया वेमायविसेसाहियं कम्मं पकरेंति।

से केणट्ठेणं जाव वेमायविसेसाहियं कम्मं पकरेंति? गोयमा! अणंतरोववन्नगा एगिंदिया दुविहा पन्नता, तं जहा--अत्थेगइया समाउया समोववन्नगा, अत्थेगइया समाउया विसमोववन्नगा। तत्थ णं जे ते समाउया समोववन्नगा ते णं तुल्लट्ठितीया तुल्लविसेसाहियं कम्मं पकरेंति। तत्थ णं जे ते समाउया विसमोववन्नगा ते णं तुल्लट्ठितीया वेमायविसेसाहियं कम्मं पकरेंति। सेतेणट्ठेणं जाव वेमायविसेसाहियं कम्मं पकरेंति। सेवं भंते! सेवं भंते! ति०।

**\*चोत्तीसइमे सते पढमे एगिंदियसेढिसते बीइओ उद्देशो समतो\***

### ० तइओ उद्देशो ०

[१०३६]कतिविधा णं भंते! परंपरोववन्नगा एगिंदिया पन्नता? गोयमा! पंचविहा परंपरोववन्नगा एगिंदिया पन्नता, तं जहा--पुढविकाइया० भेदो चउक्कओ जाव वणस्सतिकातिय ति।

परंपरोववन्नगअपज्जतासुहुमपुढविकाइए णं भंते! इमीसे रयणप्पभाए पुढवीए पुरत्थिमिल्ले चरिमंते समोहए, समोहणिता जे भविए इमीसे रतणप्पभाए पुढवीए जाव पच्चत्थिमिल्ले चरिमंते अपज्जतासुहुमपुढविकाइयताए उववज्जितए०? एवं एएणं अभिलावेणं जहेव पढमो उद्देशओ जाव लोगचरिमंतो ति।

कहिं णं भंते! परंपरोववन्नगपज्जतगबायरपुढविकाइयाणं ठाणा पन्नता? गोयमा! सट्ठाणेणं अट्ठसु वि पुढवीसु। एवं एएणं अभिलावेणं जहा पढमे उद्देशए जाव तुल्लट्ठितीय ति।

सेवं भंते! सेवं भंते! ति०।

**\*चोतीसइमे सते पढमे एगिंदियसेढिसते तइओ उद्देशो समतो\***

### ० उद्देशगा : ४-११ ०

[१०३७]एवं सेसा वि अट्ठ उद्देशगा जाव अचरिमो ति। नवरं अणंतरा० अणंतरसरिसा, परंपरा० परंपरसरिसा। चरिमा य, अचरिमा य एवं चेव। एवं एते उक्कारस उद्देशगा।

**\*चोतीसइमे सते पढमे एगिंदियसेढिसते ४-११ उद्देशो समतो\***

### बिइयं एगिंदियसेढिसयं

[१०३८]कतिविधा णं भंते! कणहलेस्सा एगिंदिया पन्नता? गोयमा! पंचविहा कणहलेस्सा एगिंदिया पन्नता, भेदो चउक्कओ जहा कणहलेस्सएगिंदियसए जाव वणस्सतिकाइय ति।

कणहलेस्सअपज्जतासुहुमपुढविकाइए णं भंते! इमीसे रतणप्पभाए पुढवीए पुरत्थिमिल्ले० ? एवं एएणं अभिलावेणं जहेव ओहिउद्देशओ जाव लोगचरिमंते ति। सव्वत्थ कणहलेस्सेसु चेव उववातेयव्वो।

कहिं णं भंते! कणहलेस्सअपज्जताबायरपुढविकाइयाणं ठाणा पन्नता? एवं एएणं अभिलावेणं जहा ओहिउद्देशओ जाव तुल्लट्ठितीय ति। सेवं भंते! सेवं भंते! ति०।

एवं एएणं अभिलावेणं जहेव पढमं सेढिसयं तहेव एक्कारस उद्देशगा भाणियव्वा।

**\*चोतीसइमे सते बितियं एगिंदियसेढिसयं समतं\***

### तइयं एगिंदियसेढिसयं

[१०३९]एवं नीललेस्सेहि वि सयं।

**\*चोतीसइमे सते ततियं एगिंदियसेढिसयं समतं\***

### चउत्थं एगिंदियसेढिसयं

[१०४०]काउलेस्सेहि वि सयं एवं चेव।

**\*चोतीसइमे सते चउत्थं एगिंदियसेढिसयं समतं\***

### पंचमं एगिंदियसेढिसयं

[१०४१]भवसिद्धियएगिंदियेहिं सयं।

**\*चोतीसइमे सते पंचमं एगिंदियसेढिसयं समतं\***

### छट्ठं एगिंदियसेढिसयं

[१०४२]कतिविधा णं भंते! कम्हलेस्सा भवसिद्धीया एगिंदिया पन्नता? जहेव ओहिउद्देसओ।

कतिविधा णं भंते! अणंतरोववन्नाकण्हलेस्सा भवसिद्धिया एगिंदिया पन्नता? जहेव अणंतरोववण्णाउद्देसओ ओहिओ तहेव।

कतिविहा णं भंते! परंपरोववन्नकण्हलेस्सभवसिद्धिया एगिंदिया पन्नता? गोयमा! पंचविहा परंपरोववन्नाकण्हलेस्सभवसिद्धिया एगिंदिया पन्नता। भेदो चउक्कओ जाव वणस्सतिकाइय ति।

परंपरोववन्नकण्हलेस्सभवसिद्धीयअपज्जतासुहुमपुढविकाइए णं भंते! इमीसे रयणप्पभाए पुढवीए०? एवं एएणं अभिलावेणं जहेव ओहिओ उद्देसओ जाव लोयचरमंते ति। सव्वत्थ कण्हलेस्सेसु भवसिद्धिएसु उववातेयव्वो।

कहि णं भंते! परंपरोववन्नकण्हलेस्सभवसिद्धियपज्जताबायरपुढविकाइयाणं ठाणा पन्नता? एवं एएणं अभिलावेणं जहेव ओहिओ उद्देसओ जाव तुल्लट्ठितीय ति।

एवं एएणं अभिलावेणं कण्हलेस्सभवसिद्धियएगिंदिएहि वि तहेव।

**\*चोतीसइमे सते छट्ठं एगिंदियसेढिसयं समतं\***

### ७-१२/एगिंदियसेढिसयं

[१०४३]नीललेस्सभवसिद्धियएगिंदिएसु सयं।

एवं काउलेस्सभवसिद्धियएगिंदिएहि वि सयं।

जहा भवसिद्धिएहिं चत्तारि सयाणि एवं अभवसिद्धीएहि वि चत्तारि सयाणि भाणियव्वाणि, नवरं चरिम-अचरिमवज्जा नवउद्देसगा भाणियव्वा। सेसं तं चेव।

एवं एयाइं बारस एगिंदियसेढिसयाइं।

सेवं भंते! सेवं भंते! ति जाव विहरइ।

**\*चोतीसइमे सते ७-१२ एगिंदियसेढिसयाइं समताइं\***

### ०-चउतीसइमं समतं-०

० मुनि दीपरत्तसागरेण संशोधितः सम्पादितश्च चउतीसइमं सतं समतं ०

[ ] पणतीसइमं सयं [ ]

### पढमं एगिंदियमहाजुम्मसयं

० पढमो उद्देसो ०

[१०४४]कति णं भंते! महाजुम्मा पन्नता? गोयमा! सोलस महाजुम्मा पन्नता, तं जहा-- कडजुम्मकडजुम्मे १, कडजुम्मतेयोगे २, कडजुम्मदावरजुम्मे ३, कडजुम्मकलियोगे ४, तेयोगकडजुम्मे ५, तेयोगतेयोए ६, तेओयदावरजुम्मे ७, तेयोगकलियोए ८, दावरजुम्मकडजुम्मे ९, दावरजुम्मतेओए १०,

दावरजुम्मदावरजुम्मे ११, दावरजुम्मकलियोगे १२, कलियोगकडजुम्मे १३, कलियोगतेओये १४, कलियोगदावरजुम्मे १५, कलियोगकलियोगे १६।

से केणट्ठेणं भंते! एवं वुच्चइ--सोलस महाजुम्मा पन्नता, तं जहा--कडजुम्मकडजुम्मे जाव कलियोगकलियोगे? गोयमा! जे णं रासी चउक्कएणं अवहारेणं अवहीरमाणे चउपज्जवसिए, जे णं तस्स रासिस्स अवहारसमया कडजुम्मा, से तं कडजुम्मकडजुम्मे १। जे णं रासी चउक्कएणं अवहारेणं अवहीरमाणे तिपज्जवसिए, जे णं तस्स रासिस्स अवहारसमया कडजुम्मा, से तं कडजुम्मतेयोए २। जे णं रासी चउक्कएणं अवहारेणं अवहीरमाणे दुपज्जवसिए, जे णं तस्स रासिस्स अवहारसमया कडजुम्मा, से तं कडजुम्मदावरजुम्मे ३। जे णं रासी चउक्कएणं अवहारेणं अवहीरमाणे एगपज्जवसिए, जे णं तस्स रासिस्स अवहारसमया कडजुम्मा, से तं कडजुम्मकलियोगे ४। जे णं रासी चउक्कएणं अवहारेणं अवहीरमाणे चउपज्जवसिए, जे णं तस्स रासिस्स अवहारसमया तेयोगा, से तं तेयोगकडजुम्मे ५। जे णं रासी चउक्कएणं अवहारेणं अवहीरमाणे तिपज्जवसिए, जे णं तस्स रासिस्स अवहारसमया तेयोया से तं तेयोयतेयोगे ६। जे णं रासी चउक्कएणं अवहारेणं अवहीरमाणे दुपज्जवसिए, जे णं तस्स रासिस्स अवहारसमया तेयोगा, से तं तेओयदावरजुम्मे ७। जे णं रासी चउक्कएणं अवहारेणं अवहीरमाणे एगपज्जवसिए, जे णं तस्स रासिस्स अवहारसमया तेयोया, से तं तेयोयकलियोए ८। जे णं रासी चउक्कएणं अवहारेणं अवहीरमाणे चउपज्जवसिए, जे णं तस्स रासिस्स अवहारसमया दावरजुम्मा, से तं दावरजुम्मकडजुम्मे ९। जे णं रासी चउक्कएणं अवहारेणं अवहीरमाणे तिपज्जवसिए, जे णं तस्स रासिस्स अवहारसमया दावरजुम्मा, से तं दावरजुम्मतेयोए १०। जे णं रासी चउक्कएणं अवहारेणं अवहीरमाणे दुपज्जवसिए, जे णं तस्स रासिस्स अवहारसमया दावरजुम्मा, से तं दावरजुम्मदावरजुम्मे ११। जे णं रासी चउक्कएणं अवहारेणं अवहीरमाणे एगपज्जवसिए, जे णं तस्स रासिस्स अवहारसमया दावरजुम्मा से तं दावरजुम्मकलियोए १२। जे णं रासी चउक्कएणं अवहारेणं अवहीरमाणे चउपज्जवसिए, जे णं तस्स रासिस्स अवहारसमया कलियोगा, से तं कलियोगकडजुम्मे १३। जे णं रासी चउक्कएणं अवहारेणं अवहीरमाणे तिपज्जवसिए, जे णं तस्स रासिस्स अवहारसमया कलियोया, से तं कलियोयतेयोए १४। जे णं रासी चउक्कएणं अवहारेणं अवहीरमाणे दुपज्जवसिए, जे णं तस्स रासिस्स अवहारसमया कलियोगा, से तं कलियोगदावरजुम्मे १५। जे णं रासी चउक्कएणं अवहारेणं अवहीरमाणे एगपज्जवसिए, जे णं तस्स रासिस्स अवहारसमया कलियोगा, से तं कलियोयकलियोए १६। सेतेणट्ठेणं जाव कलियोगकलियोगे।

**[१०४५]**कडजुम्मकडजुम्मएगिंदिया णं भंते! कओ उववज्जंति? किं नेरइय० जहा उप्पलुद्देसए तहा उववातो।

ते णं भंते! जीवा एगसमएणं केवतिया उववज्जंति? गोयमा! सोलस वा, संखेज्जा वा, असंखेज्जा वा, अणंता वा उववज्जंति।

ते णं भंते! जीवा समए समए० पुच्छा। गोयमा! ते णं अणंता समए समए अवहीरमाणा अवहीरमाणा अणंताहिं ओसप्पिणि-उस्सप्पिणीहिं अवहीरंति, नो चेव णं अवहिया सिया।

उच्चतं जहा उप्पलुद्देसए।

ते णं भंते! जीवा नाणावरणिज्जस्स कम्मस्स किं बंधगा, अबंधगा? गोयमा! बंधगा, नो अबंधगा।

एवं सव्वेसिं आउयवज्जाणं, आउयस्स बंधगा वा, अबंधगा वा।

ते णं भंते! जीवा नाणावरणिज्जस्स० पुच्छा। गोयमा! वेदगा, नो अवेदगा।

एवं सव्वेसिं।

ते णं भंते! जीवा किं सातावेदगा० पुच्छा। गोयमा! सातावेयगा वा असातावेयगा

वा। एवं उप्पलुद्देशगपरिवाडी सव्वेसिं कम्माणं उदई, नो अणुदई। छण्हं कम्माणं उदीरगा, नो अणुदीरगा। वेयणिज्जा-ssउयाणं उदीरगा वा, अणुदीरगा वा।

ते णं भंते! जीवा किं कण्ह० पुच्छा। गोयमा! कण्हलेस्सा वा नीललेस्सा वा काउलेस्सा वा तेउलेस्सा वा। नो सम्मद्धिट्ठी, मिच्छद्धिट्ठी, नो सम्मामिच्छद्धिट्ठी। नो नाणी, अन्नाणी; नियमं दुअन्नाणी, तं जहा-मतिअन्नाणी य, सुयअन्नाणी य। नो मणजोगी, नो वइजोगी, कायजोगी। सागारोवउत्ता वा, अणागारोवउत्ता वा।

तेसि णं भंते! जीवाणं सरीरगा कतिवण्णा०? जहा उप्पलुद्देशए सव्वत्थ पुच्छा। गोयमा! जहा उपलुद्देशए। ऊसासगा वा, नीसासगा वा, नो ऊसासगनीसासगा। आहारगा वा, अणाहारगा वा। नो विरया, अविरया, नो विरयाविरया। सकिरिया, नो अकिरिया। सतविहबंधगा वा, अट्ठविहबंधगा वा। आहारसन्नोवउत्ता वा जाव परिग्गहसन्नोवउत्ता वा। कोहकसाई वा जाव लोभकसाई वा। नो इत्थिवेदगा, नो पुरिसवेदगा, नपुंसगवेदगा। इत्थिवेदबंधगा वा, पुरिसवेदबंधगा वा, नपुंसगवेदबंधगा वा। नो सण्णी, असण्णी। सइंदिया, नो अणिंदिया।

ते णं भंते! 'कडजुम्मकडजुम्मएणिंदिया' ति कालओ केवचिरं होंति? गोयमा! जहन्नेणं एककं समयं, उक्कोसेणं अणंतं कालं--अणंतो वणस्सतिकालो। संवेहो न भण्णइ आहारो जहा उप्पलुद्देशए नवरं निव्वाघाएणं छद्धिसिं, वाघायं पडुच्च सिय तिदिसिं, सिय चतुदिसिं, सिय पंचदिसिं। सेसं तहेव। ठिती जहन्नेणं एककं समयं (अंतोमुहुत्तं), उक्कोसेणं बावीसं वाससहस्साइं। समुग्घाया आइल्ला चत्तारि, मारणंतियसमुग्घाएणं समोहया वि मरंति, असमोहया वि मरंति। उव्वट्ठणा जहा उप्पलुद्देशए।

अह भंते! सव्वपाणा जाव सव्वसत्ता कडजुम्मकडजुम्मएणिंदियाए उववन्नपुव्वा? हंता, गोयमा! असइं अदुवा अणंतखुत्तो।

कडजुम्मतेयोयएणिंदिया णं भंते! कओ उववज्जंति०? उववातो तहेव।

ते णं भंते! जीवा एगसमए० पुच्छा। गोयमा! एककूणवीसा वा, संखेज्जा वा, असंखेज्जा वा, अणंता वा उववज्जंति। सेसं जहा कडजुम्मकडजुम्माणं जाव अणंतखुत्तो।

कडजुम्मदावरजुम्मएणिंदिया णं भंते! कओहिंतो उववज्जंति? उववातो तहेव।

ते णं भंते! जीवा एगसमएणं० पुच्छा। गोयमा! अट्ठारस वा, संखेज्जा वा, असंखेज्जा वा, अणंता वा उववज्जंति। सेसं तहेव जाव अणंतखुत्तो।

कडजुम्मकलियोगएणिंदिया णं भंते! कओ उवव०? उववातो तहेव। परिमाणं सत्तरस वा, संखेज्जा वा, असंखेज्जा वा, अणंता वा उववज्जंति। सेसं तहेव जाव अणंतखुत्तो।

तेयोगकडजुम्मएणिंदिया णं भंते! कओ उववज्जंति? उववातो तहेव। परिमाणं--बारस वा, संखेज्जा वा, असंखेज्जा वा, अणंता वा उववज्जंति। सेसं तहेव जाव अणंतखुत्तो।

तेयोयतेयोयएणिंदिया णं भंते! कतो उववज्जंति? उववातो तहेव। परिमाणं--पन्नरस वा,

संखेज्जा वा, असंखेज्जा वा, अणंता वा। सेसं तहेव जाव अणंतखुत्तो।

एवं एएसु सोलससु महाजुम्मेसु एक्को गमओ, नवरं परिमाणे नाणतं--तयोयदावरजुम्मेसु परिमाणं चोद्दस वा, संखेज्जा वा, असंखेज्जा वा, अणंता वा उववज्जंति। तेयोगकलियोगेसु तेरस वा, संखेज्जा वा, असंखेज्जा वा, अणंता वा उववज्जंति। दावरजुम्मकडजुम्मेसु अट्ठ वा, संखेज्जा वा, असंखेज्जा वा, अणंता वा उववज्जंति। दावरजुम्मतेयोगेसु एक्कारस वा, संखेज्जा वा, असंखेज्जा वा, अणंता वा उववज्जंति। दावरजुम्मदावरजुम्मेसु दस वा, संखेज्जा वा, असंखेज्जा वा, अणंता वा उववज्जंति। दावरजुम्मकलियोगेसु नव वा, संखेज्जा वा, असंखेज्जा वा, अणंता वा उववज्जंति। कलियोगकडजुम्मे [?सु] चत्तारि वा, संखेज्जा वा, असंखेज्जा वा, अणंता वा उववज्जंति। कलियोगतेयोगेसु सत वा, संखेज्जा वा, असंखेज्जा वा, अणंता वा उववज्जंति। कलियोगदावरजुम्मेसु छ वा, संखेज्जा वा, असंखेज्जा वा, अणंता वा उववज्जंति।

कलियोगकलियोगएगिंदिया णं भंते! कओ उववज्जंति? उववातो तहेव। परिमाणं पंच वा, संखेज्जा वा, असंखेज्जा वा, अणंता वा उववज्जंति। सेसं तहेव जाव अणंतखुत्तो।

सेवं भंते! सेवं भंते! त्ति०।

**\*३५/१-पढमो उद्देशो समतो\***

**० [३५/१] बिइओ उद्देशो ०**

[१०४६]पढमसमयकडजुम्मकडजुम्मएगिंदिया णं भंते! कओ उववज्जंति? गोयमा! तहेव।

एवं जहेव पढमो उद्देशओ तहेव सोलसखुत्तो बितियो वि भाणियव्वो। तहेव सव्वं। नवरं इमाणि दस नाणत्ताणि-ओगाहणा जहन्नेणं अंगुलस्स असंखेज्जइभागं, उक्कोसेण वि अंगुलस्स असंखेज्जइभागं। आउयकम्मस्स नो बंधगा, अबंधगा। आउयस्स नो उदीरगा, अणुदीरगा। नो उस्सासगा, नो निस्सासगा, नो उस्सासनिस्सासगा। सत्तविहबंधगा, नो अट्ठविहबंधगा।

ते णं भंते! 'पढमसमयकडजुम्मकडजुम्मएगिंदिय'ति कालतो केवचिरं०? गोयमा! एक्कं समयं।

एवं ठिती वि। समुग्घाया आइल्ला दोन्नि। समोहया न पुच्छिज्जंति। उव्वट्ठणा न पुच्छिज्जइ। सेसं तहेव सव्वं निरवसेसं सोलससु वि गमएसु जाव अणंतखुत्तो।

सेवं भंते! सेवं भंते! त्ति०।

**\*३५/१-बीइओ उद्देशो समतो\***

**० [३५/१]तइओ उद्देशो ०**

[१०४७]अपढमसमयकडजुम्मकडजुम्मएगिंदिया णं भंते! कओ उववज्जंति? एसो जहा पढमुद्देशो सोलसहि वि जुम्मेसु तहेव नेयव्वो जाव कलियोगकलियोगताए जाव अणंतखुत्तो।

सेवं भंते! सेवं भंते! त्ति०।

**\*३५/१-तइओ उद्देशो समतो\***

**० [३५/१] चउत्थो उद्देशो ०**

[१०४८]चरिमसमयकडजुम्मकडजुम्मएगिंदिया णं भंते! कतो उववज्जंति? एवं जहेव

पढमसमयउद्देसओ, नवरं देवा न उववज्जंति, तेउलेस्सा न पुच्छिज्जंति। सेसं तहेव।  
सेवं भंते! सेवं भंते! ति०।

**\*३५/१-चउत्थो उद्देसो समतो\***

**० [३५/१] पंचमो उद्देसो ०**

**[१०४९]**अचरिमसमयकडजुम्मकडजुम्मएगिंदिया णं भंते! कओ उववज्जंति? जहा **[?अ]**  
पढमसमयउद्देसो तहेव भाणियव्वो निरवसेसं।  
सेवं भंते! सेवं भंते!०।

**\*३५/१-पंचमो उद्देसो समतो\***

**० [३५/१] छट्ठो उद्देसो ०**

**[१०५०]**पढमपढमसमयकडजुम्मकडजुम्मएगिंदिया णं भंते! कओ उववज्जंति? जहा  
पढमसमयउद्देसओ तहेव निरवसेसं।  
सेवं भंते! सेवं भंते! जाव विहरइ।

**\*३५/१-छट्ठो उद्देसो समतो\***

**० [३५/१] सत्तमो उद्देसो ०**

**[१०५१]**पढमअपढमसमयकडजुम्मकडजुम्मएगिंदिया णं भंते! कओ उववज्जंति? जहा  
पढमसमयउद्देसओ तहेव भाणियव्वो।  
सेवं भंते! सेवं भंते! ति०।

**\*३५/१-सत्तमो उद्देसो समतो\***

**० [३५/१] अट्ठमो उद्देसओ ०**

**[१०५२]**पढमचरिमसमयकडजुम्मकडजुम्मएगिंदिया णं भंते! कओ उववज्जंति? जहा  
चरिमुद्देसओ तहेव निरवसेसं।  
सेवं भंते! सेवं भंते! ति०।

**\*३५/१-अट्ठमो उद्देसो समतो\***

**० [३५/१] नवमो उद्देसओ ०**

**[१०५३]**पढमअचरिमसमयकडजुम्मकडजुम्मएगिंदिया णं भंते! कओ उववज्जंति? जहा बीओ  
उद्देसओ तहेव निरवसेसं।  
सेवं भंते! सेवं भंते! जाव विहरइ।

**\*३५/१-नवमो उद्देसो समतो\***

**० [३५/१] दसमो उद्देसओ ०**

**[१०५४]**चरिमचरिमसमयकडजुम्मकडजुम्मएगिंदिया णं भंते! कओ उववज्जंति? जहा  
चतुत्थो उद्देसओ तहेव।  
सेवं भंते! सेवं भंते! ति०।

**\*३५/१-दसमो उद्देसो समतो\***

## ० [३५/१] एक्कारसमो उद्देसओ ०

[१०५५] चरिमअचरिमसमयकडजुम्मकडजुम्मएगिंदिया णं भंते! कओ उववज्जंति? जहा पढमसमयउद्देसओ तहेव निरवसेसं।

सेवं भंते! सेवं भंते! जाव विहरइ।

[१०५६] एवं एए एक्कारस उद्देसगा। पढमो ततियो पंचमओ य सरिसगमगा, सेसा अट्ठ सरिसगमगा, नवरं चउत्थे अट्ठमे दसमे य देवा न उववज्जंति, तेउलेसा नत्थि।

### \*३५/१ एगिंदियमहाजुम्मसयं समत्तं\*

## २-१२/-एगिंदियमहाजुम्मसयाइं

[१०५७] कणहलेस्सकडजुम्मकडजुम्मएगिंदिया णं भंते! कओ उववज्जंति? गोयमा! उववातो तहेव। एवं जहा ओहिउद्देसए, नवरं इमं नाणत्तं--

ते णं भंते! जीवा कणहलेस्सा? हंता, कणहलेस्सा।

ते णं भंते! 'कणहलेस्सकडजुम्मकडजुम्मएगिंदिय'ति कालओ केवचिरं होंति? गोयमा! जहन्नेणं एक्कं समयं, उक्कोसेणं अंतोमुहुत्तं।

एवं ठिती वि।

सेसं तहेव-जाव अणंतखुत्तो।

एवं सोलस वि जुम्मा भाणियव्वा।

सेवं भंते! सेवं भंते! त्ति०।

पढमसमयकणहलेस्सकडजुम्मकडजुम्मएगिंदिया णं भंते! कओ उववज्जंति? जहा पढमसमयउद्देसओ, नवरं- ते णं भंते! जीवा कणहलेस्सा? हंता, कणहलेस्सा। सेसं तहेव।

सेवं भंते! सेवं भंते! त्ति०।

एवं जहा ओहियसते एक्कारस उद्देसगा भणिया तहा कणहलेस्ससए वि एक्कारस उद्देसगा भाणियव्वा। पढमो, ततियो, पंचमो य सरिसगमा। सेसा अट्ठ वि सरिसगमा, नवरं० चउत्थ-अट्ठम-दसमेसु उववातो नत्थि देवस्स।

सेवं भंते! सेवं भंते! त्ति०।

एवं नीललेस्सेहि वि सयं कणहलेस्ससयसरिसं, एक्कारस उद्देसगा तहेव।

सेवं भंते! सेवं भंते! त्ति

एवं काउलेस्सेहि वि सयं कणहलेस्ससयसरिसं।

सेवं भंते! सेवं भंते! त्ति०।

भवसिद्धियकडजुम्मकडजुम्मएगिंदिया णं भंते! कतो उववज्जंति? जहा ओहियसयं तहेव, नवरं एक्कारससु वि उद्देसएसु 'अह भंते! सव्वपाणा जाव सव्वसत्ता भवसिद्धियकडजुम्मकडजुम्म-एगिंदियताए उववन्नपुव्वा? गोयमा! णो इणट्ठे समट्ठे'। सेसं तहेव।

सेवं भंते! सेवं भंते! त्ति०।

कणहलेस्सभवसिद्धियकडजुम्मकडजुम्मएगिंदिया णं भंते! कओ उववज्जंति? एवं

कण्हलेस्सभवसिद्धियएगिंदिएहि वि सयं बितियसयकण्हलेस्ससरिसं भाणियव्वं।

सेवं भंते! सेवं भंते! ति०।

एवं नीललेस्सभवसिद्धियएगिंदियेहि वि सयं।

सेवं भंते! सेवं भंते! ति०।

एवं काउलेस्सभवसिद्धियएगिंदिएहि वि तहेव एक्कारसउद्देसगसंजुतं सयं।

एवं एयाणि चत्तारि भवसिद्धिएसु सयाणि, चउसु वि सएसु 'सव्वपाणा जाव उववन्नपुव्वा? नो इणट्ठे समट्ठे'।

सेवं भंते! सेवं भंते! ति०।

जहा भवसिद्धिएहिं चत्तारि सयाइं भणियाइं एवं अभवसिद्धिएहि वि चत्तारि सयाणि लेसासंजुताणि भाणियव्वाणि 'सव्वपाणा०? तहेव, नो इणट्ठे समट्ठे'।

एवं एयाइं बारस एगिंदियमहाजुम्मसयाइं भवंति।

सेवं भंते! सेवं भंते! ति०।

### ०-पंचतीसइमं सयं समतं-०

## ० मुनि दीपरत्तसागरेण संशोधितः सम्पादितश्च पंचतीसइमं सतं समतं ०

### [ ] छतीसइमं सयं [ ]

### पढमं बेइंदियमहाजुम्मसयं

#### ० पढमो उद्देसओ ०

[१०५८]कडजुम्मकडजुम्मबेदिया णं भंते! कओ उववज्जंति?० उववातो जहा वक्कंतीए। परिमाणं-सोलस वा, संखेज्जा वा, असंखेज्जा वा, उववज्जंति। अवहारो जहा उप्पलुद्देसए। ओगाहणा जहन्नेणं अंगुलस्स असंखेज्जइभागं, उक्कोसेणं बारस जोयणाइं। एवं जहा एगिंदियमहाजुम्माणं पढमुद्देसए तहेव; नवरं तिन्नि लेस्साओ; देवा न उववज्जंति; सम्मद्धिट्ठी वा, मिच्छद्धिट्ठी वा, नो सम्मामिच्छादिट्ठी; नाणी वा, अन्नाणी वा; नो मणयोगी, वइयोगी वा, कायजोगी वा।

ते णं भंते! कडजुम्मकडजुम्मबेदिया कालतो केवचिरं होंति? गोयमा! जहन्नेणं एक्कं समयं, उक्कोसेणं संखेज्जं कालं।

ठिती जहन्नेणं एक्कं समयं, उक्कोसेणं बारस संवच्छराइं। आहारो नियमं छद्धिसिं। तिन्नि समुग्घाया। सेसं तहेव जाव अणंतखुतो।

एवं सोलससु वि जुम्मेसु।

सेवं भंते! सेवं भंते! ति०।

#### \*३६/१-पढमो उद्देसओ समतो\*

### ० पढमे बेइंदियमहाजुम्मसए उद्देसगा : २-११ ०

[१०५९]पढमसमयकडजुम्मकडजुम्मबेदिया णं भंते! कतो उववज्जंति? एवं जहा एगिंदियमहाजुम्माणं पढमसमयुद्देसए दस नाणत्ताइं ताइं चेव दस इह वि।

एक्कारसमं इमं नाणतं- नो मणजोगी, नो वइजोगी, कायजोगी। सेसं जहा एगिंदियाणं चेव

पढमुद्देसए। सेवं भंते! सेवं भंते! ति०।

एवं एए वि जहा एगिंदियमहाजुम्मसु एक्कारस उद्देसगा तहेव भाणियव्वा, नवरं चउत्थ-अट्ठम-दसमेसु सम्मत-नाणाणि न भण्णंति। जहेव एगिंदिएसु; पढमो ततिओ पंचमो य एक्कगमा, सेसा अट्ठ एक्कगमा।

**\*३६/१-पढमो उद्देसओ समतो\***

**बेइंदियमहाजुम्मसयाइं : २-१२**

[१०६०]कणहलेस्सकडजुम्मकडजुम्मबेइंदिया णं भंते! कतो उववज्जंति? एवं चेव कणहलेस्सेसु वि एक्कारस उद्देसगसंजुतं सयं, नवरं लेसा, संचिट्ठणा जहा एगिंदियकणहलेस्साणं।

एवं नीललेस्सेहि वि सयं।

एवं काउलेस्सेहि वि सयं।

भवसिद्धियकडजुम्मकडजुम्मबेइंदिया णं भंते!०? एवं भवसिद्धियसया वि चत्तारि तेणेव पुव्वगमएणं नेतव्वा, नवरं 'सव्वपाणा०? णो इणट्ठे समट्ठे'। सेसं जहेव ओहियसयाणि चत्तारि।

सेवं भंते! सेवं भंते! ति०।

जहा भवसिद्धियसया चत्तारि एवं अभवसिद्धियसया वि चत्तारि भाणियव्वा, नवरं सम्मतनाणाणि सव्वेहिं नत्थि। सेसं तं चेव।

एवं एयाणि बारस बेइंदियमहाजुम्मसयाणि भवंति।

सेवं भंते! सेवं भंते! ति०।

**\*३६/२-१२ बेइंदियमहाजुम्मसया समता\***

**०-छत्तीसतिमं सयं समतं-०**

**० मुनि दीपरत्तसागरेण संशोधितः सम्पादितश्च छत्तीसइमं सतं समतं ०**

**[ ] सत्ततीसइमं सयं [ ]**

[१०६१]कडजुम्मकडजुम्मतेइंदिया णं भंते! कओ उववज्जंति०? एवं तेइंदिएसु वि बारस सया कायव्वा बेइंदियसयसरिसा, नवरं ओगाहणा जहन्नेणं अंगुलस्स असंखेज्जइभागं, उक्कोसेणं तिन्नि गाउयाइं; ठिती जहन्नेणं एक्कं समयं, उक्कोसेणं एकूणवन्नरातिंदियाइं। सेसं तहेव।

सेवं भंते! सेवं भंते! ति०।

**\*३७/-तेइंदियमहाजुम्मसया समता\***

**०-सत्ततीसइमं सतं समतं-०**

**० मुनि दीपरत्तसागरेण संशोधितः सम्पादितश्च सत्ततीसइमं सतं समतं ०**

**[ ] अट्ठतीसइमं सयं [ ]**

[१०६२]चउरिंदिएहि वि एवं चेव बारस सया कायव्वा, नवरं ओगाहणा जहन्नेणं अंगुलस्स असंखेज्जइभागं, उक्कोसेणं चत्तारि गाउयाइं; ठिती जहन्नेणं एक्कं समयं, उक्कोसेणं छम्मासा। सेसं जहा बेइंदियाणं।

सेवं भंते! सेवं भंते! त्ति०।

**\*३८/-चतुरिंदियमहाजुम्मसया समता\***

**०-अट्ठतीसइमं सयं समतं-०**

**० मुनि दीपरत्तसागरेण संशोधितः सम्पादितश्च अट्ठतीसइमं सतं समतं ०**

**[ ] एगूणयालीसइमं सयं [ ]**

**[१०६३]**कडजुम्मकडजुम्मअसन्निपंचेदिया णं भंते! कओ उववज्जंति?० जहा बैदियाणं तहेव असन्नीसु वि बारस सया कायत्वा, नवरं ओगाहणा जहन्नेणं अंगुलस्स असंखेज्जइभागं, उक्कोसेणं जोयणसहस्सं; संचिट्ठणा जहन्नेणं एककं समयं, उक्कोसेणं पुव्वकोडीपुहत्तं; ठिती जहन्नेणं एककं समयं, उक्कोसेणं पुव्वकोडी। सेसं जहा बैदियाणं।

सेवं भंते! सेवं भंते! त्ति०।

**\*३९/-असण्णिपंचेदियमहाजुम्मसया समता\***

**०-एगूणयालीसइमं सयं समतं-०**

**० मुनि दीपरत्तसागरेण संशोधितः सम्पादितश्च एगूणयालीसइमं सतं समतं ०**

**[ ] चत्तालीसइमं सयं [ ]**

**पढमं सन्निपंचेदिय महाजुम्मसयं**

**० पढमो उद्देशो ०**

**[१०६४]**कडजुम्मकडजुम्मसन्निपंचेदिया णं भंते! कओ उववज्जंति?० उववातो चउसु वि गतीसु। संखेज्जवासाउय-असंखेज्जवासाउय-पज्जता-अपज्जतएसु य न कतो वि पडिसेहो जाव अणुतरविमाणं त्ति। परिमाणं, अवहारो, ओगाहणा य जहा असण्णिपंचेदियाणं। वेयणिज्जवज्जाणं सत्तण्हं पगडीणं बंधगा वा अबंधगा वा वेयणिज्जस्स बंधगा, नो अबंधगा। मोहणिज्जस्स वेयगा वा, अवेयगा वा। सेसाणं सत्तण्हं वि वेयगा, नो अवेयगा। सायावेयगा वा असायावेयगा वा। मोहणिज्जस्स उदई वा, अणुदई वा; सेसाणं सत्तण्हं वि उदई, नो अणुदई। नामस्स गोयस्स य उदीरगा, नो अणुदीरगा; सेसाणं छण्हं वि उदीरगा वा, अणुदीरगा वा। कण्हलेस्सा वा जाव सुक्कलेस्सा वा। सम्मद्धिट्ठी वा, मिच्छादिट्ठी वा, सम्मामिच्छद्धिट्ठी वा। णाणी वा अण्णाणी वा। मणजोगी वा, वइजोगी वा, कायजोगी वा। उवयोगो, वन्नमाई, उस्सासगा, आहारगा य जहा एगिंदियाणं। विरया वा अविरया वा, विरयाविरया वा। सकिरिया, नो अकिरिया।

ते णं भंते! जीवा किं सत्तविहबंधगा, अट्ठविहबंधगा, छत्विहबंधगा एगविहबंधगा? गोयमा! सत्तविहबंधगा वा जाव एगविहबंधगा वा।

ते णं भंते! जीवा किं आहारसण्णोवउत्ता जाव परिग्गहसन्नोवउत्ता, नोसण्णोवयुत्ता? गोयमा! आहारसन्नोवउत्ता वा जाव नोसन्नोवउत्ता वा।

सव्वत्थ पुच्छा भाणियत्वा। कोहकसाई वा जाव लोभकसाई वा, अकसायी वा। इत्थिवेयगा वा, पुरिसवेयगा वा, नपुंसगवेयगा वा, अवेदगा वा। इत्थिवेदबंधगा वा, पुरिसवेयबंधगा वा, नपुंसगवेदबंधगा

वा, अबंधगा वा। सण्णी, नो असण्णी। सइंदिया, नो अणिंदिया। संचिट्ठणा जहन्नेणं एक्कं समयं, उक्कोसेणं सागरोवमसयपुहंतं सातिरेणं। आहारो तहेव जाव नियमं छद्धिसिं। ठिती जहन्नेणं एक्कं समयं, उक्कोसेणं तेतीसं सागरोवमाइं। छ समुग्घाता आदिल्लगा। मारणंतियसमुग्घातेणं समोहया वि मरंति, असमोहया वि मरंति। उव्वट्ठणा जहेव उववातो, न कत्थइ पडिसेहो जाव अणुत्तरविमाण ति।

अह भंते! सव्वपाणा०? जाव अणंतखुत्तो।

एवं सोलससु वि जुम्मेसु भाणियव्वं जाव अणंतखुत्तो, नवरं परिमाणं जहा बेइंदियाणं, सेसं तहेव।

सेवं भंते! सेवं भंते! ति०।

**\*४०/१-पढमो उद्देशो समतो\***

**० ४०/१-उद्देशा- २-११ ०**

[१०६५] पढमसमयकडजुम्मकडजुम्मसन्निपंचेंदिया णं भंते! कतो उववज्जंति?० उववातो, परिमाणं, अवहारो, जहा एतेसिं चेव पढमे उद्देशए। ओगाहणा, बंधो, वेदो, वेयणा, उदयी, उदीरगा य जहा बेदियाणं पढमसमइयाणं तहेव। कण्हलेस्सा वा जाव सुक्कलेस्सा वा। सेसं जहा बेदियाणं पढमसमइयाणं जाव अणंतखुत्तो, नवरं इत्थिवेदगा वा, पुरिसवेदगा वा, नपुंसगवेदगा वा; सण्णिणो, नो असण्णिणो। सेसं तहेव। एवं सोलससु वि जुम्मेसु परिमाणं तहेव सव्वं।

सेवं भंते! सेवं भंते! ति०।

एवं एत्थ वि एक्कारस उद्देशगा तहेव। पढमो, ततिओ, पंचमो य सरिसगमा। सेसा अट्ठ वि सरिसगमा। चउत्थ-अट्ठम-दसमेसु नत्थि विसेसो कायव्वो वि।

सेवं भंते! भंते! ति०।

**\*४०/१-२-११ उद्देशा समता\***

**बिइयं सन्निपंचेंदिय महाजुम्मसयं**

[१०६६] कण्हलेस्सकडजुम्मकडजुम्मसन्निपंचेंदिया णं भंते! कओ उववज्जंति? तहेव जहा पढमुद्देशओ सन्नीणं, नवरं बंधो, वेओ, उदई, उदीरणा, लेस्सा, बंधगा, सण्णा, कसाय, वेदबंधगा य एयाणि जहा बेदियाणं कण्हलेस्साणं। वेदो तिविहो, अवेयगा नत्थि। संचिट्ठणा जहन्नेणं एक्कं समयं, उक्कोसेणं तेतीसं सागरोवमाइं अंतोमुहुत्तमब्भहियाइं। एवं ठिती वि, नवरं ठितीए 'अंतोमुहुत्तमब्भहियाइं' न भण्णंति। सेसं जहा एएसिं चेव पढमे उद्देशए जाव अणंतखुत्तो। एवं सोलससु वि जुम्मेसु।

सेवं भंते! सेवं भंते! ति०।

पढमसमयकण्हलेस्सकडजुम्मकडजुम्मसन्निपंचेंदिया णं भंते! कओ उववज्जंति?० जहा सन्निपंचेंदियपढमसमयुद्देशए तहेव निरवसेसं। नवरं ते णं भंते! जीवा कण्हलेस्सा? हंता, कण्हलेस्सा। सेसं तं चेव। एवं सोलससु वि जुम्मेसु। सेवं भंते! सेवं भंते! ति०।

एवं एए वि एक्कारस उद्देशगा कण्हलेस्सए। पढम-ततिय-पंचमा सरिसगमा।

सेसा अट्ठ वि सरिसगमा। सेवं भंते! सेवं भंते! ति०।

**\*४०/बीइयं सयं समत्तं\***

### ३-२१/-सन्निपंचिंदियमहाजुम्मसयाइं

[१०६७] एवं नीललेस्सेसु वि सयं। नवरं संचिट्ठणा जहन्नेणं एककं समयं, उक्कोसेणं दस सागरोवमाइं पलिओवमस्स असंखेज्जइभागमब्भहियाइं; एवं ठिती वि। एवं तिसु उद्देशएसु। सेसं तं चेव।

सेवं भंते! सेवं भंते! ति०।

[\*४०/३-सयं समत्तं\*]

एवं काउलेस्ससयं पि, नवरं संचिट्ठणा जहन्नेणं एककं समयं, उक्कोसेणं तिन्नि सागरोवमाइं पलियोवमस्स असंखेज्जइभागमब्भहियाइं; एवं ठिती वि। एवं तिसु वि उद्देशएसु। सेसं तं चेव।

सेवं भंते! सेवं भंते! ति०। [ \*४०/४-सयं समत्तं\* ]

एवं तेउलेस्सेसु वि सयं। नवरं संचिट्ठणा जहन्नेणं एककं समयं, उक्कोसेणं दो सागरोवमाइं पलियोवमस्स असंखेज्जइभागमब्भहियाइं; एवं ठिती वि, नवरं नोसण्णोवउत्ता वा। एवं तिसु वि गम(?) उद्देश)एसु। सेसं तं चेव।

सेवं भंते! सेवं भंते! ति०। [ \*४०/५-सयं समत्तं\* ]

जहा तेउलेसासयं तथा पम्हलेसासयं पि। नवरं संचिट्ठणा जहन्नेणं एककं समयं, उक्कोसेणं दस सागरोवमाइं अंतोमुहुत्तमब्भहियाइं; एवं ठिती वि, नवरं अंतोमुहुत्तं न भण्णइ। सेसं तं चेव। एवं एएसु पंचसु सएसु जहा कण्हलेसासए गमओ तथा नेयव्वो जाव अणंतखुत्तो।

सेवं भंते! सेवं भंते! ति०। [ \*४०/६-सयं समत्तं\* ]

सुक्कलेस्ससयं जहा ओहियसयं, नवरं संचिट्ठणा ठिती य जहा कण्हलेस्ससते। सेसं तहेव जाव अणंतखुत्तो।

सेवं भंते! सेवं भंते! ति०। [ \*४०/७-सयं समत्तं\* ]

भवसिद्धियकडजुम्मकडजुम्मसन्निपंचेदिया णं भंते! कओ उववज्जंति?० जहा पढमं सन्निसयं तथा नेयव्वं भवसिद्धियाभिलावेणं, नवरं 'सव्वपाणा०? णो तिणट्ठे समट्ठे'। सेसं तं चेव।

सेवं भंते! सेवं भंते! ति०। [ \*४०/८-सयं समत्तं\* ]

कण्हलेस्सभवसिद्धियकडजुम्मकडजुम्मसन्निपंचेदिया णं भंते! कओ उववज्जंति?०

एवं एएणं अभिलावेणं जहा ओहियकण्हलेस्ससयं।

सेवं भंते! सेवं भंते! ति०। [ \*४०/९-सयं समत्तं\* ]

एवं नीललेस्सभवसिद्धिएहि वि सतं।

सेवं भंते! सेवं भंते! ०। [ \*४०/१०-सयं समत्तं\* ]

एवं जहा ओहियाणि सन्निपंचेदियाणं सत्त सयाणि भणियाणि एवं भवसिद्धिएहि वि सत्त सयाणि कायव्वाणि, नवरं सत्तसु वि सएसु 'सव्वपाणा जाव णो इणट्ठे समट्ठे, सेसं तं चेव।

सेवं भंते! सेवं भंते! ०। [ \*४०/(११-१४-सयं समत्तं\* ]

अभवसिद्धियकडजुम्मकडजुम्मसन्निपंचेदिया णं भंते! कओ उववज्जंति?० उववातो तहेव अणुत्तरविमाणवज्जो। परिमाणं, अवहारो, उच्चत्तं, बंधो, वेदो, वेयणं, उदयो, उदीरणा, य जहा कण्हलेस्ससते। कण्हलेस्सा वा जाव सुक्कलेस्सा वा। नो सम्मद्दिट्ठी, मिच्छद्दिट्ठी, नो सम्मामिच्छादिट्ठी। नो नाणी,

अन्नाणी। एवं जहा कणहलेस्ससए, नवरं नो विरया, अविरया, नो विरयाविरया। संचिट्ठणा, ठिती य जहा ओहिउद्देशए। समुग्घाया आइल्लगा पंच। उव्वट्ठणा तहेव अणुत्तरविमाणवज्जं। 'सव्वपाणा०? णो इणट्ठे समट्ठे'। सेसं जहा कणहलेस्ससए जाव अणंतखुतो।

एवं सोलससु वि जुम्मसु।

सेवं भंते! सेवं भंते! ति०।

पढमसमयअभवसिद्धियकडजुम्मकडजुम्मसन्निपंचेंदिया णं भंते! कओ उववज्जंति?० जहा सन्नीणं पढमसमयुद्देशए तहेव, नवरं सम्मतं, सम्मामिच्छंतं, नाणं च सव्वत्थ नत्थि। सेसं तहेव।

सेवं भंते! सेवं भंते! ति०।

एवं एत्थ वि एक्कारस उद्देशगा कायव्वा, पढम-ततिय-पंचमा एक्कागमा। सेसा अट्ठ वि एक्कगमा।

[\*४०/१५-सयं समतं\*]

सेवं भंते! सेवं भंते! ति०।

॥ पढमं अभवसिद्धिय-महाजुम्मसयं समतं ॥

◦ ४०/बिइयं अभवसिद्धिय-महाजुम्मसयं ◦

कणहलेस्सअभवसिद्धियकडजुम्मकडजुम्मसन्निपंचेंदिया णं भंते! कतो उववज्जंति?० जहा एएसिं चेव ओहियसतं तहा कणहलेस्ससयं पि, नवरं 'ते णं भंते! जीवा कणहलेस्सा? हंता, कणहलेस्सा'। ठिती, संचिट्ठणा य जहा कणहलेस्ससए। सेसं तं चेव।

सेवं भंते! सेवं भंते! ति०। [\*४०/१६-सयं समतं\*]

एवं छहि वि लेसाहिं छ सया कायव्वा जहा कणहलेस्ससयं, नवरं संचिट्ठणा, ठिती य जहेव ओहिएसु तहेव भाणियव्वा; नवरं सुक्कलेसाए उक्कोसेणं एक्कतीसं सागरोवमाइं अंतोमुहुत्तमब्भहियाइं; ठिती एवं चेव, नवरं अंतोमुहुत्तो नत्थि, जहन्नगं तहेव; सव्वत्थ सम्मतं नाणाणि नत्थि। विरती, विरयाविरई, अणुत्तरविमाणोववती, एयाणि नत्थि। 'सव्वपाणा०? णो इणट्ठे समट्ठे'। सेवं भंते! सेवं भंते! ति०।

एवं एताणि सत्त अभवसिद्धीयमहाजुम्मसयाणि भवंति।

सेवं भंते! सेवं भंते! ति०। [\*४०/१७-२१ सयाइं समताइं\*]

एवं एयाणि एक्कवीसं सन्निमहाजुम्मसयाणि।

सव्वाणि वि एक्कासीति महाजुम्मसताणि।

॥ महाजुम्मसता समता ॥

◦-चत्तालीसतिमं सयं समतं-◦

◦ मुनि दीपरत्तसागरेण संशोधितः सम्पादितश्च चत्तालीसइमं सतं समतं ◦

[ ] एगचत्तालीसइमं सयं [ ]

० पढमो उद्देशो ०

[१०६८]कति णं भंते! रासीजुम्मा पन्नता? गोयमा! चत्तारि रासीजुम्मा पन्नता, तं जहा—

कडजुम्मे जाव कलियोगे।

से केणट्ठेणं भंते! एवं वुच्चइ--चत्तारि रासीजुम्मा पन्नता तं जहा जाव कलियोगे? गोयमा!  
जे णं रासी चउक्कएणं अवहारेणं अवहीरमाणे चउपज्जवसिए से तं रासीजुम्मकडजुम्मे, एवं जाव जे णं  
रासी चउक्कएणं अवहारेणं० एग पज्जवसिए से तं रासीजुम्मकलियोगे, सेतेणट्ठेणं जाव कलियोगे।

रासीजुम्मकडजुम्मनेरतिया णं भंते! कतो उववज्जंति? उववातो जहा वक्कंतीए।

ते णं भंते! जीवा एगसमएणं केवतिया उववज्जंति? गोयमा! चत्तारि वा, अट्ठ वा, बारस वा,  
सोलस वा, संखेज्जा वा, असंखेज्जा वा उववज्जंति।

ते णं भंते! जीवा किं संतरं उववज्जंति, निरंतरं उववज्जंति? गोयमा! संतरं पि उववज्जंति,  
निरंतरं पि उववज्जंति। संतरं उववज्जमाणा जहन्नेणं एकं समयं, उक्कोसेणं असंखेज्जे समये अंतरं  
कट्णु उववज्जंति; निरंतरं उववज्जमाणा जहन्नेणं दो समया, उक्कोसेणं असंखेज्जा समया अणुसमयं  
अविरहियं निरंतरं उववज्जंति।

ते णं भंते! जीवा जं समयं कडजुम्मा तं समयं तेयोगा, जं समयं तेयोगा तं समयं  
कडजुम्मा? णो इणट्ठे समट्ठे।

जं समयं कडजुम्मा तं समयं दावरजुम्मा, जं समयं दावरजुम्मा तं समयं कडजुम्मा? नो  
इणट्ठे समट्ठे।

जं समयं कडजुम्मा तं समयं कलियोगा, जं समयं कलियोगा तं समयं कडजुम्मा? णो  
इणट्ठे समट्ठे।

ते णं भंते! जीवा कहं उववज्जंति? गोयमा! से जहानामए पवए पवमाणे एवं जहा  
उववायसए जाव नो परप्पयोगेणं उववज्जंति।

ते णं भंते! जीवा किं आयजसेणं उववज्जंति, आयजसेणं उववज्जंति? गोयमा! नो  
आयजसेणं उववज्जंति, आयजसेणं उववज्जंति।

जति आयजसेणं उववज्जंति किं आयजसं उवजीवंति, आयजसं उवजीवंति? गोयमा! नो  
आयजसं उवजीवंति, आयजसं उवजीवंति।

जति आयजसं उवजीवंति किं सलेस्सा, अलेस्सा? गोयमा! सलेस्सा, नो अलेस्सा।

जति सलेस्सा किं सकिरिया, अकिरिया? गोयमा! सकिरिया, नो अकिरिया।

जति सकिरिया तेणेव भवग्गहणेणं सिज्झंति जाव अंतं करंति? णो इणट्ठे समट्ठे।

रासीजुम्मकडजुम्मअसुरकुमारा णं भंते! कओ उववज्जंति? जहेव नेरतिया तहेव निरवसेसं।

एवं जाव पंचेदियतिरिक्खजोणिया, नवरं वणस्सतिकाइया जाव असंखेज्जा वा, अणंता वा  
उववज्जंति। सेसं एवं चेव।

मणुस्सा वि एवं चेव जाव नो आयजसेणं उववज्जंति, आयजसेणं उववज्जंति।

जति आयजसेणं उववज्जंति किं आयजसं उवजीवंति, आयजसं उवजीवंति? गोयमा!  
आयजसं पि उवजीवंति, आयजसं पि उवजीवंति।

जति आयजसं उवजीवंति किं सलेस्सा, अलेस्सा? गोयमा! सलेस्सा वि, अलेस्सा वि।

जति अलेस्सा किं सकिरिया, अकिरिया? गोयमा! नो सकिरिया, अकिरिया।

जति अकिरिया तेणेव भवग्गहणेणं सिज्झंति जाव अंतं करेति? हंता, सिज्झंति जाव अंतं करेति।

जदि सलेस्सा किं सकिरिया, अकिरिया? गोयमा! सकिरिया, नो अकिरिया।

जदि सकिरिया तेणेव भवग्गहणेणं सिज्झंति जाव अंतं करेति? गोयमा! अत्थेगइया तेणेव भवग्गहणेणं सिज्झंति जाव अंतं करेति, अत्थेगइया नो तेणेव भवग्गहणेणं सिज्झंति जाव अंतं करेति।

जति आयअजसं उवजीवंति किं सलेस्सा, अलेस्सा? गोयमा! सलेस्सा, नो अलेस्सा।

जदि सलेस्सा किं सकिरिया, अकिरिया? गोयमा! सकिरिया, नो अकिरिया।

जदि सकिरिया तेणेव भवग्गहणेणं सिज्झंति जाव अंतं करेति? नो इणट्ठे समट्ठे।

वाणमंतर-जोतिसिय-वेमाणिया जहा नेरइया।

सेवं भंते! सेवं भंते! ति०।

**\*एगचतालीसइमे सते पढमो उद्देशो समतो\***

**० बिइओ उद्देशो ०**

[१०६९]रासीजुम्मतेयोयनेरयिया णं भंते! कओ उववज्जंति? एवं चेव उद्देशओ भाणियव्वो, नवरं परिमाणं तिन्नि वा, सत्त वा, एक्कारस वा, पन्नरस वा, संखेज्जा वा, असंखेज्जा वा उववज्जंति। संतरं तहेव।

ते णं भंते! जीवा जं समयं तेयोया तं समयं कडजुम्मा, जं समयं कडजुम्मा तं समयं तेयोया? णो इणट्ठे समट्ठे।

जं समयं तेयोया तं समयं दावरजुम्मा, जं समयं दावरजुम्मा तं समयं तेयोया? णो इणट्ठे समट्ठे।

एवं कलियोगेण वि समं।

सेसं तं चेव जाव वेमाणिया, नवरं उववातो सव्वेसिं जहा वक्कंतीए।

सेवं भंते! सेवं भंते! ति०।

**\*एगचतालीसइमे सते बिइओ उद्देशो समतो\***

**० तइओ उद्देशो ०**

[१०७०]रासीजुम्मदावरजुम्मनेरतिया णं भंते! कओ उववज्जंति? एवं चेव उद्देशओ, नवरं परिमाणं दो वा, छ वा, दस वा, संखेज्जा वा, असंखेज्जा वा उववज्जंति।

ते णं भंते! जीवा जं समयं दावरजुम्मा तं समयं कडजुम्मा, जं समयं कडजुम्मा तं समयं दावरजुम्मा? णो इणट्ठे समट्ठे।

एवं तेयोएण वि समं।

एवं कलियोगेण वि समं।

सेसं जहा पढमुद्देशए जाव वेमाणिया।

सेवं भंते! सेवं भंते! ति०।

**\*एगचतालीसइमे सते तइओ उद्देशो समतो\***

### ० चउत्थो उद्देसो ०

[१०७१]रासीजुम्मकलियोगनेरतिया णं भंते! कओ उववज्जंति?० एवं चेव, नवरं परिमाणं एक्को वा, पंच वा, नव वा, तेरस वा, संखेज्जा वा, असंखेज्जा वा०।

ते णं भंते! जीवा जं समयं कलियोगा तं समयं कडजुम्मा, जं समयं कडजुम्मा तं समयं कलियोगा? नो इणट्ठे समट्ठे।

एवं तेयोयेण वि समं।

एवं दावरजुम्मेण वि समं।

सेसं जहा पढमुद्देसए जाव वेमाणिया।

सेवं भंते! सेवं भंते! ति०।

\*एगचत्तालीसइमे सते चउत्थो उद्देसो समतो\*

### ० पंचमो उद्देसो ०

[१०७२]कणहलेस्सरासीजुम्मकडजुम्मनेरइया णं भंते! कतो उववज्जंति?० उववातो जहा धूमप्पभाए। सेसं जहा पढमुद्देसए।

असुरकुमाराणं तहेव, एवं जाव वाणमंतराणं।

मणुस्साण वि जहेव नेरइयाणं। आय जसं उवजीवंति। अलेस्सा, अकिरिया, तेणेव भवग्गहणेणं सिज्जंति एवं न भाणियच्चं। सेसं जहा पढमुद्देसए।

सेवं भंते! सेवं भंते! ति०।

\*एगचत्तालीसइमे सते पंचमो उद्देसो समतो\*

### ० छट्ठो उद्देसो ०

कणहलेस्सतेयोएहि वि एवं चेव उद्देसओ।

सेवं भंते! सेवं भंते! ति०।

\*एगचत्तालीसइमे सते छट्ठो उद्देसो समतो\*

### ० सत्तमो उद्देसो ०

कणहलेस्सदावरजुम्मेहिं वि एवं चेव उद्देसओ।

सेवं भंते! सेवं भंते! ति०।

\*एगचत्तालीसइमे सते सत्तमो उद्देसो समतो\*

### ० अट्ठमो उद्देसो ०

कणहलेस्सकलिओएहि वि एवं चेव उद्देसओ। परिमाणं संवेहो य जहा ओहिएसु उद्देसएसु।

सेवं भंते! सेवं भंते! ति०।

\*एगचत्तालीसइमे सते अट्ठमो उद्देसो समतो\*

### ०- उद्देसगा/९-१२ -०

जहा कणहलेस्सेहिं एवं नीललेस्सेहिं वि चत्तारि उद्देसगा भाणियच्चा निरवसेसा, नवरं

नेरइयाणं उववातो जहा वालुयप्पभाए। सेसं तं चेव।

सेवं भंते! सेवं भंते! ति०।

**\*एगचतालीसइमे सते ९-१२ उद्देसगा समताइं\***

**०- उद्देसगा/ १३-१६ -०**

काउलेस्सेहि वि एवं चेव चत्तारि उद्देसगा कायव्वा, नवरं नेरयियाणं उववातो जहा रयणप्पभाए। सेसं तं चेव।

सेवं भंते! सेवं भंते! ति०।

**\*एगचतालीसइमे सते १३-१६ उद्देसगा समताइं\***

**०- उद्देसगा/ १७-२० -०**

तेउलेस्सरासीजुम्मकडजुम्मअसुरकुमारा णं भंते! कतो उववज्जंति? एवं चेव, नवरं जेसु तेउलेस्सा अत्थि तेसु भाणियव्वं। एवं एए वि कण्हलेस्ससरिसा चत्तारि उद्देसगा कायव्वा।

सेवं भंते! सेवं भंते! ति०।

**\*एगचतालीसइमे सते १७-२० उद्देसगा समताइं\***

**०- उद्देसगा/ २१-२४ -०**

एवं पम्हलेस्साए वि चत्तारि उद्देसगा कायव्वा। पंचेंदियतिरिक्खजोणियाणं मणुस्साणं वेमाणियाण य एतेसिं पम्हलेस्सा, सेसाणं नत्थि।

सेवं भंते! सेवं भंते! ति०।

**\*एगचतालीसइमे सते २१-२४ उद्देसगा समताइं\***

**०- उद्देसगा/ २५-२८ -०**

जहा पम्हलेस्साए एवं सुक्कलेस्साए वि चत्तारि उद्देसगा कायव्वा, नवरं मणुस्साणं गमओ जहा ओहिउद्देसएसु। सेसं तं चेव।

एवं एए छसु लेस्सासु चउवीसं उद्देसगा। ओहिया चत्तारि। सव्वेए अट्ठावीसं उद्देसगा भवंति। सेवं भंते! सेवं भंते! ति०।

**\*एगचतालीसइमे सते २५-२८ उद्देसगा समताइं\***

**०- उद्देसगा/ २९-५६ -०**

[१०७३] भवसिद्धियरासीजुम्मकडजुम्मनेरइया णं भंते! कओ उववज्जंति? जहा ओहिया पढमगा चत्तारि उद्देसगा तहेव निरवसेसं एए चत्तारि उद्देसगा। सेवं भंते! सेवं भंते! ति ॥

कण्हलेस्सभवसिद्धियरासीजुम्मकडजुम्मनेरइया णं भंते! कओ उववज्जंति?० जहा कण्ह-लेसाए चत्तारि उद्देसगा तथा इमे वि भवसिद्धियकण्हलेस्सेहि चत्तारि उद्देसगा कायव्वा ॥

एवं नीललेस्सभवसिद्धिएहि वि चत्तारि उद्देसगा ॥

एवं काउलेस्सेहि चत्तारि उद्देसगा ॥

तेउलेस्सेहि वि चत्तारि उद्देशगा ओहियसरिसा ॥  
पम्हलेस्सेहि वि चत्तारि उद्देशगा ॥  
सुक्कलेस्सेहि वि चत्तारि उद्देशगा ओहियसरिसा ॥  
एवं एए वि भवसिद्धिएहिं अट्ठावीसं उद्देशगा भवंति।  
सेवं भंते! सेवं भंते! त्ति०।

**\*एगचत्तालीसइमे सते २९-५६ उद्देशगा समताइं\***

**०- उद्देशगा/ ५७-८४ -०**

[१०७४]अभवसिद्धियरासीजुम्मकडजुम्मनेरइया णं भंते! कओ उववज्जंति? जहा पढमो उद्देशगो, नवरं मणुस्सा नेरइया य सरिसा भाणियव्वा। सेसं तहेव।  
सेवं भंते! सेवं भंते! त्ति०।  
एवं चउसु वि जुम्मेसु चत्तारि उद्देशगा ॥  
कण्हलेस्सअभवसिद्धियरासीजुम्मकडजुम्मनेरइया णं भंते! कओ उववज्जंति?० एवं चेव चत्तारि उद्देशगा ॥ ४१.६१-६४ ॥

. एवं नीललेस्सअभवसिद्धीएहि वि चत्तारि उद्देशका ॥  
एवं काउलेस्सेहि वि चत्तारि उद्देशगा ॥  
एवं तेउलेस्सेहि वि चत्तारि उद्देशगा ॥  
पम्हलेस्सेहि वि चत्तारि उद्देशगा ॥  
सुक्कलेस्सअभवसिद्धिएहि वि चत्तारि उद्देशगा ॥  
एवं एएसु अट्ठावीसाए वि अभवसिद्धियउद्देशएसु मणुस्सा नेरइयगमेणं नेतव्वा।  
सेवं भंते! सेवं भंते! त्ति०। एवं एए वि अट्ठावीसं उद्देशगा

**\*एगचत्तालीसइमे सते ५७-८४ उद्देशगा समताइं\***

**०- उद्देशगा/ ८५-११२ -०**

[१०७५]सम्मद्धिट्ठारासीजुम्मकडजुम्मनेरइया णं भंते! कओ उववज्जंति?० एवं जहा पढमो उद्देशओ।  
एवं चउसु वि जुम्मेसु चत्तारि उद्देशगा भवसिद्धियसरिसा कायव्वा।  
सेवं भंते! सेवं भंते! त्ति० ॥  
कण्हलेस्ससम्मद्धिट्ठारासीजुम्मकडजुम्मनेरइया णं भंते! कओ उववज्जंति?० एए वि कण्हलेस्ससरिसा चत्तारि उद्देशगा कातव्वा। ॥  
एवं सम्मद्धिट्ठीसु वि भवसिद्धियसरिसा अट्ठावीसं उद्देशगा कायव्वा ॥  
सेवं भंते! सेवं भंते! त्ति जाव विहरइ।

**\*एगचत्तालीसइमे सते ८५-११२ उद्देशगा समताइं\***

**०- उद्देशगा/ ११३-१४० -०**

[१०७६]मिच्छद्धिट्ठारासीजुम्मकुडजुम्मनेरइया णं भंते! कओ उववज्जंति? एवं एत्थ वि

मिच्छादिट्ठिअभिलावेणं अभवसिद्धियसरिसा अट्ठावीसं उद्देसका कायव्वा।

सेवं भंते! सेवं भंते! ति०।

**\*एगचतालीसइमे सते ११३-१४० उद्देसगा समताइं\***

**०- उद्देसगा/ १४१-१६८ -०**

[१०७७]कण्हपक्खियरासीजुम्मकडजुम्मनेरइया णं भंते! कओ उववज्जंति? एवं एत्थ वि अभवसिद्धियसरिसा अट्ठावीसं उद्देसगा कायव्वा।

सेवं भंते! सेवं भंते! ति०।

**\*एगचतालीसइमे सते १४१-१६८ उद्देसगा समताइं\***

**०- उद्देसगा/ १६९-१९६ -०**

[१०७८]सुक्कपक्खियरासीजुम्मकडजुम्मनेरइया णं भंते! कओ उववज्जंति? एवं एत्थ वि भवसिद्धियसरिसा अट्ठावीसं उद्देसगा भवंति।

एवं एए सत्त्वे वि छण्णउयं उद्देसगसयं भवति रासीजुम्मसतं। जाव सुक्कलेस्स-सुक्कपक्खियरासीजुम्मकडजुम्मकलियोगवेमाणिया जाव-जति सकिरिया तेणेव भवग्गहणेणं सिज्झंति जाव अंतं करंति? नो इणट्ठे समट्ठे।

‘सेवं भंते! सेवं भंते!’ ति

[१०७९]भगवं गोयमे समणं भगवं महावीरं तिक्खुत्तो आयाहिणपयाहिणं करेति, तिक्खुत्तो आयाहिणपयाहिणं करेत्ता वंदति नमंसति, वंदित्ता नमंसित्ता एवं वयासि-एवमेयं भंते!, तहमेयं भंते!, अवितहमेतं भंते!, असंदिद्धमेयं भंते!, इच्छियमेयं भंते!, पडिच्छियमेतं भंते!, इच्छियपडिच्छियमेयं भंते!, सत्त्वे णं एसमट्ठे जं णं तुब्भे वदह, ति कट्ठु ‘अपुव्ववयणा खलु अरहंता भगवंतो’ समणं भगवं महावीरं वंदति नमंसति, वंदित्ता नमंसित्ता संजमेणं तवसा अप्पाणं भावेमाणे विहरति।

**\*एगचतालीसइमे सते १६९-१९६ उद्देसगा समताइं\***

**०-एगचतालीसइमं सयं समत्तं-०**

**० मुनि दीपरत्तसागरेण संशोधितः सम्पादितश्च एगचतालीसइमं सतं समत्तं ०**

सत्त्वाए भगवतीए अट्ठत्तीसं सयं सयाणं १३८, उद्देसगाणं १९२५ ।

[१०८०] चुलसीतिसयसहस्सा पयाण पवरवरणाण-दंसीहिं।

भावाभावमणंता पण्णत्ता एत्थमंगम्मि ॥

[१०८१] तव-नियम-विणयवेलो जयति सया नाणविमलविपुलजलो।

हेउसयविउलवेगो संघसमुद्धो गुणविसालो ॥

**॥ समत्ता य भगवती ॥**

**॥ अपरनाम - वियाहपण्णत्तिसुत्तं समत्तं ॥**

- [१०८२] - नमो गोयमादीण गणहराणं।  
- नमो भगवतीए विवाहपन्नतीए।  
- नमो दुवालसंगस्स गणिपिडगस्स।
- [१०८३] कुमुयसुसंठियचलणा, अमलियकोरें विंसंकासा।  
सुयदेवया भगवती मम मत्तितिमिरं पणासेउ ॥
- [१०८४] वियसियअरविंदकरा नासियतिमिरा सुयाहिया देवी।  
मज्झं पि देउ मेहं बुहविबुहणमंसिया णिच्चं ॥
- [१०८५] सुयदेवयाए णमिमो जीए पसाएण सिक्खियं नाणं।  
अण्णं पवयणदेवी संतिकरी तं नमंसामि ॥
- [१०८६] सुयदवेया य जक्खो कुंभधरो बंभसंति वेरोट्ठा।  
विज्जा य अंतहुंडी देउ अविग्घं लिहंतस्स ॥

०-० [भगवईए विवाहपण्णतीए उद्देसविही] ०-०

[१०८७] पण्णतीए आदिमाणं अट्ठण्हं सयाणं दो दो उद्देसया उद्दिसिज्जंति, णवरं चउत्थसए पढमदिवसे अट्ठ, बित्तियदिवसे दो उद्देसगा उद्दिसिज्जंति।

नवमाओ सयाओ आरद्धं जावत्तियं जावत्तियं एति तावइयं तावइयं एगदिवसेणं उद्दिसिज्जइ,  
उक्कोसेणं सयं पि एगदिवसेणं मज्झमेणं दोहिं दिवसेहिं सयं, जहन्नेणं तिहिं दिवसेहिं सतं। एवं जाव  
वीसइमं सतं। णवरं गोसालो एगदिवसेणं उद्दिसिज्जइ; जति ठियो एगेण चव आयंबिलेणं अणुण्णव्वइ, अह  
ण ठियो आयंबिलेणं छट्ठेणं अणुण्णव्वति।

एक्कवीस-बावीस-तेवीसतिमाइं सयाइं एक्केक्कदिवसेणं उद्दिसिज्जंति।

चउवीसत्तिमं सयं दोहिं दिवसेहिं-छ छ उद्देसगा।

पंचवीसत्तिमं दोहिं दिवसेहिं-छ छ उद्देसगा।

बंधिसयाइं अट्ठसयाइं एगेणं दिवसेणं सेट्टिसयाइं बारस एगेणं एगिंदिय महाजुम्मसयाइ  
बारस एगेणं एवं बेंदियाणं बारस तेंदियाणं बारस चउरिंदियाणं बारस एगेण असन्निपंचेंदियाणं बारस  
सन्निपंचेंदियमहाजुम्मसयाइं एक्कवीसं एगदिवसेणं उद्दिसिज्जंति। रासीजुम्मसयं एगदिवसेणं उद्दिसिज्जइ।

५	<p><b>भगवई-पंचमं अंगसुत्तं समत्तं</b></p> <p><b>अवरनाम - विवाहपन्नति-समत्तं</b></p>
---	---